


Tuhun tsa tsa naco jutu mañi yo Jesucristo

tsi yo



New Testament in Mixtec, San Juan Colorado (MX:mjc:Mixtec,
San Juan Colorado)

Tuhun tsa a tsa naco jutu mañi yo Jesucristo tsi yo New Testament in Mixtec, San Juan Colorado (MX:mjc:Mixtec, San Juan Colorado)

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, San Juan Colorado

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

c270ec54-172a-541f-83e6-7760f619c744

Contents

San Mateo	1
Marcos	44
Lucas	72
Juan	118
Los Hechos	151
Romanos	193
I Corintios	210
II Corintios	226
Gálatas	238
Efesios	244
Filipenses	250
Colosenses	255
I Tesalonicenses	259
II Tesalonicenses	263
I Timoteo	265
II Timoteo	270
Tito	274
Filemón	276
Hebreos	277
Santiago	290
I San Pedro	294
II San Pedro	299
I San Juan	302
II San Juan	307
III San Juan	308
San Judas	309
El Apocalipsis	311

Tuhun Nyoo Tsa Tyaa Ra Mateo

Nyivi ra Jesucristo tsa tsicoo tsa ndi cumañi ca cacu ra
(Lc. 3.23-38)

¹ Ihya nyecú tandihi sivi nyivi ra Jesucristo tsa tsicoo tsa ndi cumañi ca cacu ra. Nyivi ra David tan nyivi ra Abraham cuvɪ tsi ra.

² Sehe ra Abraham cuvɪ tsi ra Isaac, tan sehe ra Isaac cuvɪ tsi ra Jacob. Tan sehe ra Jacob cuvɪ tsi ra Judá tsihin tandihi ra yañi ra. ³ Tan ra Fares tsihin ra Zara sehe ra Judá tsihin ña Tamar cuvɪ tsi ra naha. Tan sehe ra Fares cuvɪ tsi ra Esrom, ra cuvɪ jutu ra Aram. ⁴ Tan sehe ra Aram cuvɪ tsi ra Aminadab, jutu ra Naasón. Tan sehe ra Naasón cuvɪ tsi ra Salmón. ⁵ Tan ra Booz, sehe ra Salmón tsihin ña Rahab cuvɪ tsi ra. Tan sehe ra Booz tsihin ña Rut cuvɪ tsi ra Obed, jutu ra Isaí. ⁶ Tan ra David, ra cuvɪ rey, sehe ra Isaí cuvɪ tsi ra. Tan sehe ra rey David tsihin ñaha tsa cuvɪ ñasihi ra Urías cuvɪ tsi ra Salomón.

⁷ Tan sehe ra Salomón cuvɪ tsi ra Roboam, ra cuvɪ jutu ra Abías. Tan sehe ra Abías cuvɪ tsi ra Aza. ⁸ Tan sehe ra Aza cuvɪ tsi ra Josafat, ra cuvɪ jutu ra Joram. Tan sehe ra Joram cuvɪ tsi ra Uzías. ⁹ Tan sehe ra Uzías cuvɪ tsi ra Jotam, ra cuvɪ jutu ra Acáz. Tan sehe ra Acáz cuvɪ tsi ra Ezequías. ¹⁰ Tan sehe ra Ezequías cuvɪ tsi ra Manasés, ra cuvɪ jutu ra Amón. Tan sehe ra Amón cuvɪ tsi ra Josías. ¹¹ Tan sehe ra Josías cuvɪ tsi ra Jeconías tsihin tandihi ra yañi ra. Tsicoo ra naha quivi tjin ra ñuu Babilonia naha ra tsi nyivi Israel, tsa cua cuhun ñi cuvɪ ñi musu ra ñuu Babilonia can naha ra.

¹² Tsa yaha can, tan tsicoo sehe ra Jeconías, tan ra ican cuvɪ ra Salatiel, jutu ra Zorobabel. ¹³ Tan sehe ra Zorobabel cuvɪ tsi ra Abiud, ra cuvɪ jutu ra Eliaquim. Tan sehe ra Eliaquim cuvɪ tsi ra Azor. ¹⁴ Tan sehe ra Azor cuvɪ tsi ra Sadoc, ra cuvɪ jutu ra Aquim. Tan sehe ra Aquim cuvɪ tsi ra Eliud. ¹⁵ Tan sehe ra Eliud cuvɪ tsi ra Eleazar, ra cuvɪ jutu ra Matán. Tan sehe ra Matán cuvɪ tsi ra Jacob. ¹⁶ Tan ra Jacob cuvɪ jutu ra José, yii ña Maria. Juvín ña cuvɪ sihi ra Jesús ra cuvɪ Cristo, o cuñi tsi catyi, ra tsa jaquitsi Nyoo tyin quihí ndaha tsi yo.

¹⁷ Tacan tsicoo utsi cumi taahan tata ra Abraham nda cuanda cacu ra David. Tan ra David, tsicoo utsi cumi tata ra nda cuanda quivi tjin ra ñuu Babilonia naha ra tsi nyivi Israel. Tan nda cuanda quivi can tsicoo utsi cumi ca tata ñi nda cuanda quivi cacu ra Cristo.

Nu cacu ra Jesucristo
(Lc. 2.1-7)

¹⁸ Tyehen cuvɪ tan cacu ra Jesucristo: tsa yaha cundaa tyiñu tsa cua tindaha ña María tsihin ra José. Tan tsa ndi cumañi ca naquihin ra tsi ña, ñihí sehe ña tsa cuenda Tatyí Ii Nyoo. ¹⁹ Tan ra José, ra cua cuvɪ yii ña, vaha xaan iñi ra. Ña cuñi ra cuhva ra ticanuu tsi ña. Yacan cuenda tsicá iñi ra tsa nacoo xeehe ra tsi ña tan ña cua tindaha ca ra tsihin ña. ²⁰ Tan tsitsi tsa tsicá iñi ra yacan, quituvɪ iin ángel Jutu Mañi yo nuu ra nu quixi ra. Tan nyehé ra ñumaahna, tan catyi ángel can tsihin ra:

—José, tata ra David, ña caça iñi un quihin un tsi ña María cuvɪ ña ñasihi un, tyin sehe ña tsa cua cacu, sehe Tatyí Ii Nyoo cuvɪ tsi. ²¹ Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyivi ra tsa iyó cuatyí ñuu ñayivi —catyi ángel can tsihin ra José.

²² Tacan cuvɪ tyin tacan tan cundaa tsa cahan ra cuvɪ ndusu yuhu Jutu Mañi yo tahañ tsanaha.

²³ Tan catyi ra tyehen:

Ñaha yoco tsa ñaha ca coo yii, cua cuhun sehe ña.

Tan cua coo iin sehe ña. Tan cua cunañi ra: Emanuel.

Tan sivi can cuñi tsi catyi: “Nyoo iyó ra tsihin yo.”

²⁴ Tan tsa ndoto ra José, javaha ra tumaa catyi ángel can tsihin ra. Quihin ra tsi ña María tyin cuvɪ ña ñasihi ra. ²⁵ Maa tyin ña quixi ra tsihin ña nda cuanda tsa yaha cacu sehe ña. Tan jacunañi ra tsi lee can: Jesús.

2

Nu cuahán ra tsitó xaan, ra cuvɪ rey, cua nyehé ra naha nu cacu ra Jesús

¹ Cacú ra Jesús ñuu Belén tsa canyíi nu cuvɪ Judea. Tan quivi can ra cuvɪ rey Judea nañi ra Herodes. Tacan tan tsaá juhva ra naha nda ñuu Jerusalén. Quee ra naha ityi nu caná ñicanyii. Tan ra tsitó xaan cuvɪ ra naha. ² Tsicá tuhun ra naha tsi nyivi tan catyi ra naha:

—¿Nu maa nyii ra cuvɪ rey cuenda nyivi Israel? Tyin ityi nu caná ñicanyii nyehé ndi tiñuu tsa tsahá cuenda tyin cacu ra ityi ihya. Tan vatsí ndi vatsí jacahnu ndi tsi ra —catyi ra naha.

³ Quivi tsa tsitó ra rey Herodes tsa cahan ra can naha ra, tuñu xaan cuñi ra cuvɪ. Tacan tucu tandihi nyivi ñuu Jerusalén can.

⁴ Tacan tan cana ra Herodes tsi tandihi ra jutu tsa cuvɪ ityi nuu tsihin ra cuvɪ jutu tan tsihin tandihi ra cuvɪ maestro cuenda ley vehe ñuhu naha ra. Tan tsicá tuhun ra tsi ra naha numaa nda taahán tsi cacu ra Cristo. ⁵ Tan nacahan ra can naha ra tan catyi ra naha:

—Ñuu Belén tsa canyíi Judea, ndacan taahán tsi cacu ra tyin tyeheh tyaq ra cuvī ndusu yuhu Nyoo nu tutu taḥan tsanaha:

⁶ Tan yooho Belén ñavin iin ñuu luhlu ñi cuvī un tsa nuu tandihi maa ñuu tsa cayucú Judá

tyin nuu yooho cua quita ra cua quihī ndaha tsi nyivī ñuu yu Israel. Maa ra cua jaha cuenda ra tsi ñi.

Tacan catyī nu tutu Nyoo, —catyī ra can naha ra tsihin ra Herodes.

⁷ Tacan tan canā xeehe ra Herodes tsi ra tsitó xaan can naha ra, tan tsicā tuhun ra tsi ra naha náa quivī tan náa hora quituvī tiñuu can. ⁸ Tacan tan jacuhun ra tsi ra naha nda ñuu Belén, tan catyī ra tsihin ra naha:

—Cyaahan ndo, tan ndāca tuhun vaha ndo tsa cuenda ra lee can. Tatun nañihi ndo tsi ra, quitsi catyī tuhun ndo tsihin yu, tyin cuhun ndihi yu cujacaḥnu yu tsi ra —catyī ra Herodes tsihin ra naha.

⁹ Tsa tsiñī ra tsa tsitó xaan can naha ra tsa caḥan ra Herodes, tan quihīn ra naha ityī cuahán ra naha. Tan tiñuu tsa nyeḥe ra naha ityī nu caná ñicanyii can, cuahán tsi ityī nuu ra naha. Tan tsicuiñī tsi maa maa siqui nu canyīi ra lee can. ¹⁰ Tan tsa nyeḥe ra tsitó xaan can naha ra tyin tsicuiñī tiñuu can, si xaan cuñī ra naha. ¹¹ Tan quihvī ra naha tsitsi vehe nu canyīi lee can. Tan nyeḥe ra naha tsi ra tsihin ña María, sihi ra. Tan tsicuiñī tsiti ra naha tyin jacahnu ra naha tsi lee can. Tacan tan nuñā ra naha yuhu caja tsa ndahá ra naha. Tan tava ra naha regalo tsa cuvī xuhun cuaan, tan cutu vixi, tan ndutya tamī tsa nañī mirra. Tan tsahā ra naha tsi lee can. ¹² Tsa yaha tsa nyeḥe ra naha tsi ra Jesús tan cuanuhu ra naha. Tan tsa cuanuhu ra naha nyeḥe ra naha ñumaahna tan catyī tsi tyin ña taahán tsi cuhun ra naha cucatyī tuhun ra naha tsihin ra Herodes. Yacan cuenda siin ityī cuanuhu ra naha.

Nu tsiñū xeehe ra José tan ña María tsihin lee sehe ñi nda Egipto

¹³ Tsa yaha cuahán ra tsa tsitó xaan can naha ra, tacan tan iin ángel Jutu Mañi yo quituvī nuu ra José tsitsi ñumaahna. Tan catyī ángel can tsihin ra:

—Nduvita, quihin tsi lee ihya, tsihin sihi ra, tan cuhun ndo nda ñuu Egipto. Ndo ndo ndacan nda cuanda cahan nyico yu tsihin un. Tyin ra Herodes cua nanducu ra tsi ra lee ihya tyin cuñī ra cañi ra tsi ra —catyī ángel can tsihin ra José.

¹⁴ Tacan tan nduvita ra José tsacuaa can. Tan quihīn ra tsi lee can tsihin sihi tsi. Tan cuahán ñi nda Egipto. ¹⁵ Ndacan tsicoq ñi nda cuanda tsa tsihi ra Herodes. Tacan cuvī tyin cundaq tsa caḥan ra cuvī ndusu yuhu

Jutu Mañi yo taḥan tsanaha jahā Nyoo. Tyeheh catyī ra: “Nda Egipto canā yu tsi Sehe yu”, catyī ra.

Nu tava tyiñu ra Herodes na cañi ra naha tsi ra nyihi

¹⁶ [Tsa ndi cumañi ca cúu ra Herodes tan ndi ndatú ra tsa quitsi nyico ra tsitó xaan can naha ra] tan tsa tuvī iñi ra Herodes tyin ra tsitó xaan can naha ra jandavī ñaha ra naha tsi ra, tan nduxaḥn xaan ra. Tan tava tyiñu ra na cañi andaru tsi tandihi ra nyihi tsa iyó ñuu Belén can tan inga ñuu tsa cayucú yatyin ñi, ra nyihi tsa ndi cacú nda cuanda ra nyihi tsa uvi cuiya. Tacan javahā ra tyin tsicá iñi ra tyin tacan cuiya ra Jesús tumaa catyī ra tsitó xaan can naha ra tsihin ra.

¹⁷ Tacan cuvī tyin cundaq tsa caḥan Nyoo tan tyaq ra Jeremías, ra cuvī ndusu yuhu ra taḥan tsanaha. Tyaq ra tyeheh:

¹⁸ Tsiñī yo iin ndusu ñuu Ramá, tsacú tsaay nyivī, tan iyo taahán ñi.

Juvin ñi nyivī cuvī tata ña Raquel, nyivī Israel, tsacú tsaay ñi tsa cuenda sehe ñi.

Maa tyin ña cuñī ñi tsa naquihin ndaahvi nyivī tsi ñi tyin tsa yaha tsihi sehe ñi, catyī tsi nu tutu Nyoo.

¹⁹ Maa tyin tsa yaha tsa tsihi ra Herodes, tacan tan quituvī nyico iin ángel Jutu Mañi yo nuu ra José nu quixi ra nda Egipto. Tan catyī ra tsihin ra:

²⁰ —Nduvita, quihin tsi lee ihya tsihin sihi ra. Tan cunuhu nyico ndo nda Israel, tyin tsa tsihi nyivī nducú cañi tsi ra lee ihya.

²¹ Tacan tan nduvita ra José, tan quihīn ra tsi lee can tan tsihin sihi ra. Tan cuanuhu ñi nda Israel. ²² Maa tyin quivī tsitō ra José tyin ra Arquelao, sehe ra Herodes, cuvī ra rey nda Judea, nayuhvī ra tan ña cuñī ra cuhun ra ndacan. Tan cuanuhu ñi nda Galilea tyin tacan jacotō Nyoo tsi ra tsitsi ñumaahna. ²³ Tsa tsaq ñi ícan, tan cuahán ñi nda ñuu Nazaret, cua coo ñi. Tan ícan tsicoq ñi. Tacan cuvī tyin cundaq tsa caḥan ra cuvī ndusu yuhu Nyoo taḥan tsanaha. Tyin catyī ra naha tyin ra Jesús ra ñuu Nazaret cua cuvī ra.

3

Nu caḥan ra Juan tuhun Nyoo tsihin nyivī (Mt. 1.1-8; Lc. 3.1-9, 15-17; Jn. 1.19-28)

¹ Quivī tsa ndi iyó ñi ñuu Nazaret, ra Juan, ra jacoondutya tsi nyivī, cuahán ra nu tsiqui tsa iyó Judea. Tan quitsahā caahán ra tuhun Nyoo tsihin nyivī tsa tsaá nu nyii ra. ² Tan catyī ra:

—Ndu uvi iñi ndo cuatyī ndo tyin tsa cuñī tsaay quivī cundaca ñaha Nyoo tsi yo.

³ Juvin ra Juan cuvī ra tsa caḥan ra Isaías ra cuvī ndusu yuhu Nyoo taḥan tsanaha. Tan tyaq ra tsa tsahā Nyoo tsi ra tyeheh:

Cua tyaa soho yo ndusu ra nu caná tsaá ra nu tsiqui tan catyí ra:

“Nuña ndo iin ityi cuiti.

Tan natyiso vaha ndo tsi ndo tyin tsa vatsi Jutu Mañi yo,” catyí tuhun tsa tyaa ra Isaías.

⁴ Tan ra Juan nditsí ra jahma tsiny tsihin ixi camellu. Tan cinturón ra, ñiñ cuví tsi. Tan tica xama tsatsí ra tan tsihí ra ndutya ñuñu.

⁵ Quitsí nyivi ñuu Jerusalén tan tandihí ñuu tsa cayucú Judea, tan nyivi tsa iyó yatyin ñi ityi yutya cahnu Jordán can; quitsí tyaa soho ñi tuhun caahán ra. ⁶ Tan tsa yahá nahma ñi cuatyí ñi, ra Juan jacoondutya ra tsi ñi yutya cahnu Jordán ican.

⁷ Maa tyin nyehe ra Juan tyin cuaha xaan ra fariseo, ra tsa tyaá yahvi xaan ley vehe ñuhu, tan cuaha xaan ra saduceo, quitsí ra naha tyin coondutya ra naha. Tan catyí ra tsihin ra naha:

—¡Nyooho, tumaa tata coo xaan cuví ndo! ¿A cuñí maa ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví. ⁸ Násama ndo kuhva iyó ndo, na nyehe yo tyin tsa ndu uví ñiñ ndo cuatyí ndo nuu Nyoo. ⁹ Maa tyin ña nduyaa ndo tan catyí ndo tyin nyivi tata ra Abraham cuví ndo. Tyin vasu tsihin yuu ihya, Nyoo cuví jananduvi ra nyivi ra Abraham. ¹⁰ Tsa ndatú yatsa Nyoo tsi tandihí ndo tsa cuví ndo tumaa yutun tsa ña tsahá tsiti vaha. Cua tyahnya tun tan cua cayu tun, tacan cua javaha Nyoo tsihin ndo —catyí ra Juan—. ¹¹ Tsa nditsa tyin yuhu jacoondutya yu tsi nyivi tsihin ndutya, tan cuví tsi iin seña tyin tsa ndu uví ñiñ ñi cuatyí ñi. Maa tyin tsa yaha jacoondutya yu tsi ñi tsihin ndutya, vatsí inga ra cua jacoondutya tsi ñi tsihin Tatyí Ii Nyoo tan tsihin ñuhu ihñi. Iyó ca tunyee ñiñ Nyoo tsi maa ra tan ñavin ca yuhu. Tan ndi tsa cuiso yu nditsan ra tan nduve yahvi nyaá yu, tyin maa ra cahnu ca cuví ra. ¹² Tan ra ican ndahá ra pala tyin cua jandava ra trigu. Cua tava siin ra trigu vaha, tan cua natyihí vaha ra itsi. Tan cua cahmí ra tsahan tsa quita tsihin trigu can tsihin ñuhu tsa ña cua ndahva maa —catyí ra Juan.

*Nu tsicoondutya ra Jesús
(Mr. 1.9-11; Lc. 3.21-22)*

¹³ Tacan tan quita ra Jesús Galilea tan tsaá ra yutya cahnu Jordán nu nyi ra Juan, tyin cuñí ra tsa jacoondutya ra Juan tsi ra. ¹⁴ Tsa jhna ñi ña cuñí ra Juan jacoondutya ra tsi ra, tan quitsaha catyí ra tsihin ra:

—Cuñí un tsa jacoondutya yu tsi un, maa tyin ña taahán tsi tsa jacoondutya yu tsi un. Maa un taahán tsi jacoondutya tsi yu —catyí ra.

¹⁵ Maa tyin ra Jesús catyí ra tsihin ra:

—Tsa vityin, na cuví tsi kuhva catyí yu tsihin un. Tyin cuñí tsi tsa javaha yo tandihí

tsa vaha tsa cuñí Nyoo —catyí ra tsihin ra Juan.

Tacan tan ndoo ra Juan vaha.

¹⁶ Tsa yahá tsicoondutya ra Jesús tan quita ra tsitsi ndutya. Tan nuña andivi, tan ra Jesús nyehe ra vatsí nuú Tatyí Ii Nyoo, tumaa iin paloma. Tan tsaá tsi siqui ra. ¹⁷ Tacan tan cahan iin ndusu ityi andivi, tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan siñ xaan cuñí yu tsihin ra —catyí ndusu can.

4

*Nu nducy kuhva nu ña vaha tsi ra Jesús
(Mr. 1.12-13; Lc. 4.1-13)*

¹ Tacan tan tsindaca Tatyí Ii Nyoo tsi ra Jesús iin nu tsiqui, tyin cua nducu kuhva nu ña vaha tsi ra.

² Tsioco nyitya ra uvi xico nduvi tan uvi xico tsacuaa. Tsa yahá can tan quitsí socó tsi ra. ³ Tacan tan natuhvá nu ña vaha nu nyaá ra, tyin cuñí nu nducu kuhva nu tsi ra. Tan catyí nu tsihin ra:

—Tatun Sehe Nyoo cuví tsi un, cahan tsihin yuu ihya, na nduvi tsi paan —catyí nu ña vaha tsihin ra Jesús.

⁴ Maa tyin ra Jesús nacahan ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tsihin tsa catsi nyivi tan coonyito ñi, tyin coonyito ñi tsihin tandihí tuhun caahán Nyoo” —catyí ra Jesús tsihin nu ña vaha.

⁵ Tacan tan quihñ nu ña vaha tsi ra. Tan cuahán ra tsihin nu nda ñuu ii Jerusalén. Tan jandaq nu tsi ra jiñi vehe ñuhu cahnu. ⁶ Tan catyí nu tsihin ra:

—Tatun Sehe Nyoo cuví tsi un, ndava nu nyaá un nu sucun ihya nda cuenda nu ñuhu. Tyin catyí tsi nuu tutu Nyoo tyehen: Nyoo cua tava tyiñu ra tsi ángel naha ra, cua jaha cuenda ra naha tsi un.

Cua janahndi ra naha tsi un, tan ña cua nañi tsaha un nuu yuu.

⁷ Tan nacahan ra Jesús tan catyí ra:

—Tan juvin ñi catyí tuhun Nyoo: “Ña nducu kuhva un tsi Nyoo un” —catyí ra Jesús tsihin nu ña vaha.

⁸ Tacan tan quihñ nu ña vaha tsi ra inga tsaha, tan cuahán ra tsihin nu iin jiñi yucu sucun. Tan janaha nu tandihí tsa cahnu cuví nu ndaca ñaha rey tan ra cumí tyiñu naha ra tsi nyivi iyó nu ñuhu ñayivi. ⁹ Tan catyí nu tsihin ra:

—Yuhu kuhva yu tandihí maa tsa janaha yu tsi un, tatun yooho tan cuñi tsiti un nuu yu tan jacahnu un tsi yu.

¹⁰ Tacan tan nacahan ra Jesús tan catyí ra tsihin nu:

—Cuaahan, cuihna. Tyin nyaá tuhun Nyoo catyí: “Jacahnu tsi intuhun ñi maa Jutu Nyoo, tan jaha tyiñu tyiñu ra.”

¹¹ Tacan tan cuahán nu ña vaha, tan ndoo ra Jesús. Tan tsaá ángel tan jatyinyee ra naha tsi ra.

Nu quitsaha caahán ra Jesús tuhun Nyoo tsihin nyivi tsa iyó ñuu tsa cayucú Galilea
(Mr. 1.14-15; Lc. 4.14-15)

¹² Quivi tsa tsito ra Jesús tyin ra Juan nyii ra vehe caa, cuahán ra nda Galilea. ¹³ Maa tyin ña ndoo ra ñuu Nazaret, nu tsahnú ra. Cuahán ra cua coo ra nda ñuu Capernaum, iin ñuu tsa canyíi yatyin ñi yuhu miñi, nu ñuhu ra Neftalí yatyin ñuhu ra Zabulón. ¹⁴ Tacan tan cundaá tsa cahan ra Isaías, ra cuví ndusu yuhu Nyoo, tahañ tsanaha. Tan catyí ra:

¹⁵ Ñuhu ra Zabulón tan ñuhu ra Neftalí tsa cayucú yuhu miñi inga tsiyo yutya cahnu Jordán, tsa cuví Galilea nu iyó nyivi tsa ñavin nyivi Israel cuví.

¹⁶ Nyivi iyó nu naa, ñi iyó nu iyó tixahñu tuhun tsihi, nyehé ñi iin ñuhu nditsin tsa jandunditsín nu yucú ñi, catyí ra Isaías.

¹⁷ Nda cuanda quivi can, tan quitsaha caahán ra Jesús tuhun Nyoo tsihin nyivi, tan catyí ra tsihin ñi:

—Ndu uvi iñi ndo cuatyí ndo tyin tsa cuñí tsa quivi cundaca ñaha Nyoo tsi ndo —catyí ra Jesús tsihin nyivi.

Nu cana ra Jesús tsi cumi taahan ra tsa tiñ tyaca
(Mr. 1.16-20; Lc. 5.1-11)

¹⁸ Ra Jesús tsicá ra yuhu miñi tsa nañi Ndutya Ñuhu Galilea. Tan nyehé ra tsi uvi taahan ra tsihin yañi ra, ra Simón tsa nañi tucu Pedro, tan ra Andrés. Ra tiñ tyaca cuví ra naha. Tan cañi ra naha traya ra naha nu ndutya. ¹⁹ Tacan tan catyí ra Jesús tsihin nduvi taahan ra naha:

—Naha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tiñ ndo tyaca, tacan cua ñihi ndo nyivi cua cuví nyivi Nyoo —catyí ra Jesús tsihin ra naha.

²⁰ Juvín ñi cuhva can nacoq ra naha traya can, tan cuahán ra naha tsihin ra Jesús.

²¹ Luxu ñi tsicá ra naha ityi nuu, tan nyehé ra Jesús tsi inga uvi ca ra tsihin yañi ra: ra Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan cana ra Jesús tsi ra naha. ²² Juvín ñi cuhva can tan nacoq ra naha tsi jutu ra naha tan yutun ndoo can, tan cuahán ra naha tsihin ra.

Nu cuaha xaan nyivi jacuahá ra Jesús
(Lc. 6.17-19)

²³ Cuahán ra Jesús tsicá ra tandihí ñuu cuenda Galilea jacuahá ra tsi nyivi tsitsi vehe ñuhu tan iin tan iin ñuu. Caahán ra tuhun vaha nácaa ndacá ñaha Nyoo tsi yo. Tan janduvahá ra tsi nyivi cuuhví tsihin tandihí ñi nuu cuehe tsa yihí tsi ñi. ²⁴ Tacan tan tsito tandihí nyivi ñuu cuenda Siria tuhun ra Jesús. Tan tsindaca ñi tandihí nyivi cuuhví tsi ra: juhva ñi yihí tatyí ña vaha. Tan yihí ñi tsihi naaha ñi. Tan yihí ñi ndohó ñi cuehe xii. Tan janduvahá ra Jesús tsi tandihí ñi. ²⁵ Cuaha xaan nyivi nyicun tsi ra Jesús: nyivi iyó ñuu tsa cayucú Galilea, nyivi tsa quee nu utsi taahan ñuu tsa nañi Decápolis, nyivi iyó ñuu Jerusalén tan tandihí ca ñuu tsa cayucú Judea, tan nyivi iyó inga tsiyo yutya cahnu Jordán.

5

Nu cahan ra Jesús tsihin nyivi nu tsiqui
(Lc. 6.20-23)

¹ Nyehe ra Jesús tyin cuaha xaan nyivi, tan ndaa ra iin nuu yucu. Tan tsiyunaa ra ican. Tacan tan nyivi tsicá tsihin ra, tsinunduvj ñi tsi ra. ² Tacan tan quitsaha jacuahá ra tsi ñi tan catyí ra:

³ Nasocó Nyoo tsi tandihí nyivi tsa tsitó tyin tsiñi ñuhu ra tsi ñi, tan tsa cuenda ñi cuví nu ndacá ñaha ra.

⁴ “Tan tandihí nyivi tsa cuihya cuñí tsa cuenda cuatyí ñi, nasocó Nyoo tsi ñi tan ña cua coo ca ñi tucuihya iñi.

⁵ “Tan tandihí nyivi tsa ña cahnu jahá ñi tsi ñi, nasocó Nyoo tsi ñi, tan cua naquihin cuenda ñi ñuhu ñayivi tsa catyí Nyoo tyin cuhva ra tsi ñi.

⁶ “Tan tandihí nyivi tsa cuñí xaan javaha cuhva catyí Nyoo, nasocó Nyoo tsi ñi, tan cua jatyinyee ra tsi ñi tan cua cuví javaha ñi cuhva cuñí maa ra.

⁷ “Tan tandihí nyivi tsa cundaahví iñi tsi inga nyivi, nasocó Nyoo tsi ñi, tan cua cundaahví iñi ra tsi ñi.

⁸ “Tan tandihí nyivi tsa janduvahá Nyoo añima, nasocó ra tsi ñi, tan cua nyehé ñi tsi ra.

⁹ “Tan nyivi tsa nducú cuhva tsa coo vaha nyivi tsihin Nyoo tan tsihin inga nyivi, nasocó ra tsi ñi tan cua catyí ra tyin sehe ra cuví tsi ñi.

¹⁰ “Tan tandihí nyivi tsa javahá cuhva cuñí Nyoo tan ndasi cuñí nyivi nyehé ñi tsi ñi, nasocó Nyoo tsi ñi, tan tsa cuenda ñi cuví nu ndacá ñaha ra. ¹¹ “Nasocó Nyoo tsi nyooho tsa caahán nyivi ndavaha ñi tsata, tan javahá ñi tsa uhví tsi ndo, tan caahán ñi cuendu tsa ña nditsa siqui ndo tsa cuenda tsa tsinú iñi ndo tsi yu. ¹² Cusi iñi ndo tun tacan javahá nyivi tsihin ndo; si cuñi ndo,

tyin cahnu xaan tan sii xaan caá tsa cua ñihi ndo nda gloria. Tyin juvin ñi tacan javahá nyivi tsa ña vaha tsihin tandihi ra cuvı ndusu yuhu Nyoo tahán tsanaha.

Tatun jandihı yo tsa tsinú iñi yo tsi Nyoo cuvıyo tumaa ñii tsa ndihı tsa uhva
(Mr. 9.50; Lc. 14.34-35)

¹³ Nyooho tsa tsinú iñi tsi yu, tumaa ñii vaha cuvı ndo. Maa tyin tatun ñii, tan ndihı tsa uhva tsi, ña cua jandu uhva ca tsi tsa catsı yo. Ña vaha ca ñii can. Tacan tan javita yo can, tan caañi nyivi tsata can.

Tatun tyaá yahvi vaha yo tuhun caahán Nyoo, cuvıyo tumaa ñuhı tsa jandunditsın nu tsicá nyivi nu naa

¹⁴ Nyooho cuvı ndo tumaa ñuhı tsa jandunditsın nu tsicá nyivi. Iin ñuu tsa canyıi jiñi iin yucu, ña cua cuvi quihı xeehe tsi. ¹⁵ Ña tuhvá yo tyaá ñuhı tyuma, tan tyihı xeehe yo itsı tsitsı iin cajú. Tyin tuhvá yo tyaá ñuhı tan tinyıi yo itsı iin nu sucun tyin tacan tan jandunditsın tsi nu yucú yo tsitsı vehe yo. ¹⁶ Tan tacan taahán tsi jandunditsın tucu nyooho tsihin ñuhı Nyoo tsa iyó añima ndo nu tsicá nyivi. Tacan tan nyehe ñi tsa vaha tsa javahá ndo, tan jacahnu ñi tsi Jutu yo Nyoo, ra nyaá gloria.

Nu jacuahá ra Jesús tyin ñiñi xaan javaha yo tandihı tuhun tsa tsahá Nyoo tsi yo tan jacuahá yo itsı tsi nyivi

¹⁷ Ña cuñi ndo tyin yuhu vatsı janaa yuley tsa tsahá Nyoo tsi ra Moisés tyin tyaá ra. Tan ndi ña vatsı janaa yu tuhun tsa tyaá tandihı ra cuvı ndusu yuhu Nyoo tahán tsanaha. Ñavin tyiñu can vatsı yu. Yuhu vatsı yu vatsı tyaá yahvi yu tsa caahán ley can, tan catyı tuhun yu tsihin ndo náa cuñı tsi catyı ley can. ¹⁸ Tsa nditsa catyı yu tsihin ndo tyin tsitsı tsa ndi iyó ñuhu ñayıvi tan andıvi, ña cua naa ndi luxu ley tsa tyaá ra Moisés tyin tandihı maa tsa tyaá ra naha tan cua cundaa tsi. ¹⁹ Yacan cuenda, ra tsa ña tyaá yahvi cuhva catyı Nyoo, vasu iin tsa luhlu ñi; tan janahá ra tsi nyıvi na javaha ñi tacan, luxu cuii ñi cua cuvı ra nu ndacá ñaha Nyoo. Maa tyin ra tsa tyaá yahvi tandihı, tan janahá ra tsi inga nyıvi, cahnu xaan cua cuvı ra nu ndacá ñaha Nyoo. ²⁰ Catyı yu tsihin ndo tyin tun ña tyaá yahvi vaha ca ndo tsi Nyoo tan ñavin ca tumaa javahá ra cuvı maestro cuenda ley vehe ñuhu naha ra, tan ra cuvı fariseo naha ra, ña cuvı quihıvi ndo nu ndacá ñaha Nyoo.

Nu caahán ra Jesús tsihin yo tyin ña taahán tsi cahan yo tsi nyivi

²¹ Nyooho tsa cuaha tsaha tsiñı ndo tsa catyı Nyoo tsihin nyıvi tsicoo tahán tsanaha. Catyı ra: “Ña cahñi ndo tsi nyıvi, tyin tatun cahñi ndo nyıvi, taahán tsi tsa cutuñi ndo.”

²² Maa tyin yuhu, catyı yu tsihin ndo, tyin vasu tsa cuxaán ñi ndo tsi iin nyıvi, vasu tsa caahán nyaá ñi ndo tsi ñi, taahán tsi tsa cutuñi ndo nu ra cumi tyiñu. Tan tatun catyı ndo tyin soho xaan caá ñi, taahán tsi cahun ndo anyaya tsa cuenda cuatyı can.

²³ Tan yacan cuenda quıvi cuahán un vehe ñuhu, tan ndahá un tsa cua jamañi un tsi Nyoo, tan nducuhún iñi un tyin iyó tsa javahá un tsi yañi un, ²⁴ nacoo tsa cuahán tsihin un ityi nu altar vehe ñuhu. Tan cahun jilna un ndacan un tucahnu iñi tsi yañi un. Tacan tan cahun un nda vehe ñuhu inga tsaha, tan cuhva cuenda un tsa cua jamañi un tsi Nyoo.

²⁵ Tatun iin ra tsicán cuatyı tsaha un, tan cuahán un tsihin ra nda nu nyaá ra cumı tyiñu, nducu cuhva cahan un tsihin ra tyin tacan tan ña cundaca ra tsi un nu nyaá ra cumı tyiñu, tyin ra cumı tyiñu can cua nacuhva cuenda ra tsi un tsi ra juez. Tan ra juez can cua nacuhva cuenda ra tsi un tsi ra vitya naha ra. Tan ra vitya can cua tyihı ra naha tsi un vehe caa. ²⁶ Tan tsa nditsa catyı yu tsihin un tyin tun ña javaha un tacan ña cua tava ra naha tsi un vehe caa tun ña cua tyahvi un tandihı xuhun tsa cua ndacan ra naha.

Nu caahán ra Jesús tyin ndi tsa tsicá iñi yo tsa coo inga ñaha, o inga rayıi tsi yo, tan ña vaha

²⁷ Nyooho tsa tsiñı ndo tyin catyı Nyoo tahán tsanaha tyin nyooho tsa iyó ñasihı, ña cua coo inga ñaha tsi ndo, tan ndi ñaha tsa iyó yıi tan ña taahán tsi coo inga rayıi tsi ña. ²⁸ Maa tyin yuhu catyı yu tsihin ndo, nyooho tsa nyehé iin ñaha tan cuñı ndo coo ndo tsihin ña, tsa tsicoo cuatyı ndo.

²⁹ Tatun tinuu cuaha un janacavá tsi un tsitsı cuatyı, vaha taxın ca tava un tinuu un tan javita un can. Tyin vaha ca quihıvi un nu ndacá ñaha Nyoo tsihin intuhun ñi tinuu un, tan ñavin ca tsa cahun un anyaya tsihin nduvi taahan tsi. ³⁰ O tatun iin ndaha un janacavá tsi un tsitsı cuatyı, vaha taxın ca cahnya un ndaha un tan javita un can. Tyin vaha ca tsa quihıvi un nu ndacá ñaha Nyoo tsihin tsa lundu ndaha un, tan ñavin ca tsa nani un tan cahun un anyaya.

Nu caahán ra Jesús tyin ña vaha tsa nacoo ihñi rayıi tsi ñasihı ra

(Mt. 19.9; Mr. 10.11-12; Lc. 16.18)

³¹ Tan juvin ñi catyı Nyoo tsihin nyıvi tsicoo tahán tsanaha tyin yóo ra nacoo ihñi ñasihı ra, cuñı tsi tsa cani ra tutu tsa tindaha ra tsihin ña. ³² Maa tyin catyı yu tsihin ndo tyin nduve ndatu iyó tsi rayıi tsa nacoo ra ñasihı ra tatun ña quituvı ña tsihin inga rayıi. Tyin tatun nacoo ra tsi ña, tan ñavin tsa cuenda cuatyı can, cua coo cuatyı ra nuu Nyoo. Tan tatun quihin ña inga rayıi cua coo

ndihi cuatyí ña. Tan tacan ra tsa cua quihin tsi ña cua coo ndihi cuatyí ra.

Ña cahan yo “naha Nyoo maa”

³³ Tan tsiñi ndihi ndo, tyin catyi tucu Nyoo tsihin nyivi tsioco tahañ tsanaha: “Tatun catyi ndo ‘naha Nyoo maa’ tyin cua javaha ndo iin tsa cua javaha ndo nuu ra, taahán tsi tsa javaha ndo can tan ña jandavi ñaha ndo.” ³⁴ Maa tyin yuhu catyi yu tsihin ndo tyin ña cahan ndo “naha Nyoo maa”. Tan ña cahan ndo tuhun andivi, tyin yacan cuví nu nyaá Nyoo. ³⁵ Tan ndi tuhun ñuhu ñayivi ihya ña cahan ndo, tyin ihya cuví nu tsañi Nyoo. Tan ndi ña cahan ndo tuhun ñuu Jerusalén, tyin ican cuví ñuu maa Nyoo tsa cuví ra Rey cahnu ca. ³⁶ Tan ndi ña cahan ndo tuhun jiñi ndo, tyin ña cuví janducuitsin ndo tan ndi tsa jandutuun ndo ndi intuhun ixi jiñi ndo. ³⁷ Vaha ca cahan ndo iin ndaha ñi tun nditsa o tun ña nditsa tsa caahán ndo. Tyin tsa catyi ndo “naha Nyoo maa” nu ña vaha jacahán tsi ndo tsa cahan ndo tacan.

Nu caahán ra Jesús tyin tatun javahá nyivi tsa ña vaha tsihin yo, na javaha yo tsa vaha tsihin ñi

(Lc. 6.29-30)

³⁸ Tan tsiñi tucu ndo tsa catyi Nyoo tahañ tsanaha: “Tatun cañi nyivi tsi ndo, tan tavá ñi iin nuhu ndo, o iin tinuu ndo, taahán tsi tyin javaha ndihi ra cumi tyiñu tacan tsihin ñi, tumaa tsa javahá ñi tsihin ndo.” ³⁹ Maa tyin yuhu catyi yu tsihin ndo, tyin ña javaha ndo tsa ña vaha tsa javahá nyivi xaan cuñi nyehe tsi ndo. Tyin tun yóo cañi iin tsiyo nuu ndo, taahán tsi tsa cuhva ndihi ndo inga tsiyo na cañi ndihi ñi, tan ña cuxaan ndo tsi ñi. ⁴⁰ O tatun tsiacán ñi cuatyí tsaaha ndo, tan cuñi ñi quihin nyaá ñi iin camisa ndo. Taahán tsi cuhva ndihi ndo camarra ndo tsi ñi tan ña cua cuxaan ndo tsi ñi. ⁴¹ O tatun yóo cuñi cundaca ndo ndaha tyiñu ñi iin kilómetro, taahán tsi cundaca ndo can uvi kilómetro. ⁴² Tatun yóo nyivi tsiacán tumañi iñi tsi ndo, cuhva ndo tsa nducu ñi. Ña catyi ndo tyin ña javaha ndo tumañi iñi can tsi ñi.

Na cuñi yo tsi nyivi xaan iñi tsi yo

(Lc. 6.27-28, 32-36)

⁴³ Tan tsiñi tucu ndo tyin catyi Nyoo tahañ tsanaha: “cuñi ndo tsi ra vaha iñi tsi ndo. Tan xaan cuñi ndo nyihe ndo tsi ra xaan iñi tsi ndo.” ⁴⁴ Maa tyin yuhu catyi yu tsihin ndo, cuñi ndo tsi nyivi xaan iñi tsi ndo. Tan javaha ndo tsa vaha tsihin nyivi caahán tsi ndo, tan tsi nyivi ña cuñi nyehe tsi ndo. Tan ndaçan tahvi ndo tsi Nyoo tsa cuenda nyivi tsa caahán nyaá tsi ndo tan tsa cuenda ñi tsa jacuvi tsa uhvi tsi ndo. ⁴⁵ Tatun javahá ndo tacan, cuví ndo sehe Jutu yo ra nyaá gloria. Tyin maa ra jacán ra ñicanyii, tan

jacuún ra savi nuu tyiñu jahá nyivi vaha tan nyivi ña vaha. ⁴⁶ Tatun nyooho tan cuñi ndo tsi nyivi vaha iñi tsi ndo tan ndasi cuñi ndo nyehe ndo tsi nyivi xaan iñi tsi ndo, nduve tsa vaha cua ñihi ndo. Tyin juvin ñi tacan javahá tucu ra tavá xuhun cuenda ra ndacá ñaha nda ñuu Roma. Tan cuñi maa ndo tyin quihni xaan iyó ra can naha ra. ⁴⁷ Tatun tshá ndo nacumi tsi maa ñi ra tsa vaha iñi tsi ndo tan ña jacuu ndo tacan tsihin inga ca nyivi, nduve tsa vaha xaan javahá ndo. Tyin juvin ñi tacan javahá nyivi tsa ña tsiót tuhun Nyoo. ⁴⁸ Tumaa Jutu yo tsa nyaá gloria cuiti xaan iyó ra, tacan taahán tsi coo tucu nyooho.

6

Nu caahán ra Jesús nácaa javaha yo tumañi iñi

¹ Jaha ndo cuenda tan ña nduyaa ndo náa tumañi iñi javaha ndo tsi nyivi. Tyin tatun javaha ndo tumañi iñi tyin nyehe nyivi, Jutu yo, ra nyaá gloria, nduve náa cua cuhva ra tsi ndo. ² Tun cua javaha ndo tumañi iñi, ña cua jacoto ndo tsi inga nyivi tyin javahá ndo tumañi iñi. Ña javaha ndo tumaa icá ra tsa jahá tyin vaha xaan ra tan tsiacán nuu ra naha nuyahvi tan tsitsi vehe ñuhu. Javahá ra naha tumañi iñi tyin na catyi nyivi tyin vaha xaan iñi ra naha. Yacan ñi ñihí ra can naha ra, tan nduve náa cua cuhva Nyoo tsi ra naha. ³ Yacan cuenda quivi javahá ndo tumañi iñi tsi nyivi ndaahvi, ña jacoto ndo ndi tsi ra tsa vaha xaan ca iñi tsi ndo. ⁴ Xeehe ñi jatyinyee ndo tsi ñi ndaahvi. Tan Jutu yo Nyoo cua nyehe ra tsa javahá ndo tacan. Tan cua cuhva ra tsa vaha tsi ndo.

Nu caahán ra Jesús nácaa ndacan tahvi yo tsi Jutu yo Nyoo

(Lc. 11.2-4)

⁵ Tatun cua ndacan tahvi ndo tsi Nyoo, ña javaha ndo tumaa javahá ra tsa jahá tyin vaha xaan ra naha. Tyin ra ican naha ra tuhvá ra naha tsiacán tahvi tsi Nyoo nu tuvi nyivi, tan nyecú nyityi ra naha tsitsi vehe ñuhu o ityi cahnu tyin taahán iñi ra naha tsa cahan nyivi tyin vaha xaan ra naha. Tsa nditsa catyi yu tsihin ndo tyin yacan ñi ñihí ra naha. ⁶ Maa tyin nyooho quivi tsa ndacan tahvi ndo tsi Nyoo, ña ndacan tahvi ndo tsi ra nu nyehe nyivi tsi ndo. Quíhvi ndo tsitsi vehe ndo tan nçasi ndo yuvehe ndo tan ndaçan tahvi ndo tsihin tsa ñi iñi añima ndo. Tan intuhun ñi maa Nyoo Jutu yo cua nyehe ra tsa javahá ndo tacan tyin nuu maa ra tsiacán tahvi ndo, tan ñavin nuu nyivi. Tan cua cuhva ra tsa vaha tsi ndo.

⁷ Tatun cua cahan ndo tsihin Nyoo, ñavin juvin ñi tuhun tsa nduve yahvi nyaá cahan ndo. Tacan javahá nyivi tsa ña tsiót tsi Nyoo. Cuñi maa ñi tyin tacan tan cua tyaa soho

Nyoo tsa caahán ñi, tyin cuaha xaan tsaha caahán ñi juven ñi tuhun tsa tsa yahá cahan ñi. ⁸ Ña javaha ndo tacan. Tyin Nyoo tsa tsitó ra náa tsiñi ñuhu tsi ndo tsa ndi cumañi ca ndacan ndo tsi ra. ⁹ Yacan cuenda nyooho, tatun cua ndacan tahvi ndo tsi Nyoo, tyehen catyi ndo:

Jutu Mañi ndi, tsa nyaá un gloria.

Jacahnú xaan ndi tsi un.

¹⁰ Na quitsi tsa ndaca ñaha un nu ñuhu ñayivi ihya,

tan na javaha tandihi nyivi tandihi cuhva cuñi maa un, tumaa cuvi nda gloria.

¹¹ Cuhva tsa catsi ndi tahan tahan quivi.

¹² Jaha tucahnu iñi tsi ndi náa tsa ña vaha javahá ndi, tumaa tsa jahá maa ndi tucahnu iñi tsi nyivi tsa javahá tsa ña vaha tsi ndi.

¹³ Ña cuhva un tsa nducu cuhva nu ña vaha tsi ndi, coto javaha ndi cuatyí nuu un. Tyin maa un cuvi ra jacacú tsi ndi ndaha nu ña vaha.

Tan maa un cuvi ra ndacá ñaha tsi ndi. Tan iyó tandihi tunyee iñi tsi un. Tan taahán tsi tyin jacahnú tandihi nyivi tsi maa ñi un tandihi maa quivi tan na ña cundihi tsi. Na cuvi tsi tacan ñi.

Tyehen taahán tsi ndacan tahvi ndo tsi Nyoo.

¹⁴ Tyin tatun nyooho tan jahá ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo ra nyaá gloria, cua jaha ra tucahnu iñi tsi maa ndo. ¹⁵ Maa tyin tatun ña jaha ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo, ña cua jaha ra tucahnu iñi cuatyí maa ndo —catyi ra Jesús.

Tatun cua coo nyitya yo tyin nanducú yo tsi Nyoo, ña cua jacoto yo tsi inga ca nyivi

¹⁶ Tan catyi tucu ra Jesús tsihin nyivi:

—Quivi tsa iyó nyitya ndo tyin nanducú ndo tsi Nyoo, ña cuiihya nyehe ndo, tumaa javahá nyivi jahá tyin vaha xaan ñi. Tyin cahyí ñi nyaa nuu ñi tyin cuñi ñi tsa nyehe nyivi tyin iyó nyitya ñi tan nanducú ñi tsi Nyoo. Catyi yu tsihin ndo tyin yacan ñi ñihí ñi. Nduve ca naa cua cuhva Nyoo tsi ñi. ¹⁷ Maa tyin nyooho quivi tsa iyó nyitya ndo tyin nanducú ndo tsi Nyoo, nacatya ndo nuu ndo. Tan tyíhi ndo cuca jiñi ndo. ¹⁸ Tacan tan ña cua tuvi iñi nyivi tyin iyó nyitya ndo tan nanducú ndo tsi Nyoo. Tyin intuhun ñi maa Nyoo nyehe tsa javahá ndo tsa xeehe ñi. Tan cuaha tsa vaha cua cuhva ra tsi ndo.

Tsa vaha tsa iyó nda gloria

(Lc. 12.33-34)

¹⁹ Ña jacaya ndo tsa cuca tsa iyó nu ñuhu ñayivi ihya. Tyin coto tivi tsi jaha tiquixin o jaha cuxi. O cuvi quihvi ñasuhu, tan suhu nu tandihi tsa jacaya ndo. ²⁰ Vaha ca jacaya

ndo tsa cuca tsa iyó nda gloria. Tyin ña cua cundihi tsi ndacan. Tyin ña cuvi tivi tsi ndacan, tan nduve quiti jativi itsi, ndi nduve ñasuhu. ²¹ Tyin nu natyihí vaha ndo tsa cuca, ican cua cunyaa ndihi aña ndo.

Nu caahán ra Jesús tyin na jaha yo cuenda ñuhu nditsin tsa tyihí ra aña yo
(Lc. 11.34-36)

²² Tinuu ndo cuvi ñuhu nditsin tsi ndo. Tatun vaha tinuu ndo, taníi cuñu ñuhu ndo tan iyó ñuhu nditsin. [Tan tuhun ihya cuñi tsi catyi tyin tatun iyó ñuhu nditsin Nyoo aña ndo cuvi ndo nyivi vaha.] ²³ Maa tyin tatun ña vaha tinuu ndo, tandihi cuñu ñuhu ndo tan nyii tsi nu naa. Tan tacan tucu tatun nduve ñuhu Nyoo iyó aña ndo, [cuví ndo tumaa iin ra cuaa. Nu naa cuahán ndo tan ña cuvi nyehe ndo ityi vaha tsa cuahán nu nyaá Nyoo].

Nu caahán ra Jesús tyin ña cuvi tyaa yahvi yo tsi Nyoo tatun cuñi xaan ca yo xuhun
(Lc. 16.13)

²⁴ Iin musu ña cuvi coo uvi tsitoho ra. Tyin musu can cuñi ca ra tsi iin ra tan ñavin ca tsi inga ra. Tan tyaa yahvi ra tsi iin ra, tan ñavin ca tsi inga ra. Tan tacan tucu nyooho, ña cuvi cuñi ndo tsi Nyoo, tan cuñi tucu ndo xuhun.

Nu caahán ra Jesús tyin ña caca xaan iñi yo nda ndihi tsa tsiñi ñuhu tsi yo
(Lc. 12.22-31)

²⁵ Yacan cuenda catyi yu tsihin ndo, tyin ña caca xaan iñi ndo nácaa ñihi ndo tsa catsi ndo tan tsa coho ndo. Ndi ña caca iñi ndo nácaa cua ñihi ndo jahma ndo. Tyin nu Nyoo nyaá yahvi ca ñayivi tsa iyó yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca jahma yo. [Tyin maa ra tsahá ra ñayivi iyó yo. Tan ña yií cuhva ra inga tsa tsiñi ñuhu tsi yo]. ²⁶ Nyehe ndo cuhva iyó saa. Ña tatsi ti itu. Tan ña jahá tyiñu ti. Tan ndi ña tyihí vaha ti tsa catsi ti. Maa tyin tsatsi ti tyin Jutu yo Nyoo ra nyaá gloria tsahá ra tsa catsi ti naha ti. Tan nuu Nyoo cahnu ca cuvi nyooho tan ñavin ca saa can naha ti. ²⁷ Tan vasu ndi maa tsicá xaan iñi ndo maa tyin ña cua cuvi jandusucun ca ndo ndi luxu ca tsi ndo.

²⁸ Tan tatun ndi luxu can ña cuvi tsi ndo, ¿nácaa tsa tsicá xaan iñi ndo tsa cuenda jahma ndo? Nyehe ndo nácaa iyó yutun ita tsitsi cuhu, tyin ña jahá tyiñu tun tan ndi ña tavi tun yuhva. ²⁹ Maa tyin catyi yu tsihin ndo tyin ndi ra cuvi rey Salomón tsihin tandihi tsa cuca ra, tan ña tsinditsi ra jahma sii ca caá tan ñavin ca tsa jacunditsi Nyoo tsi yutun ita can. ³⁰ Tatun tacan ñi jacunditsi Nyoo tsi yutun ita tsa iyó tsitsi cuhu vityin, tan tyaan cua cuvi tun nducu tan cayu tun. ¿A ña ca jatyinyee cuaha ca ra tsi ndo? Tyin

nyooho cahnu ca cuvı́ ndo nuu ra tan ñavin ca yutun ita can. Maa tyin maa ndo ña tsinú vaha iñi ndo tsi ra. ³¹ Yacan cuenda ña cua caca xaan iñi yo tan catyí yo: “¿Náa cua catsi yo, o náa cua coho yo, o nácaa cua ñihi yo jahma cunditsi yo?” ³² Tyin nyivi tsa ña tsitó tsi Nyoo tsicá xaan iñi ñi yacan. Maa tyin nyooho ña caca iñi ndo yacan tyin iyó Jutu yo Nyoo, ra nyaá gloria. Tan tsitó ra náa ndihi tsa tsíñi ñihu tsi ndo. ³³ Yacan cuenda, caca iñi ndo maa ñi maa tuhun Nyoo. Tan nanducu jihna ndo nácaa nacuhva cuenda ndo tsi ndo tsi ra na cundaca ñaha ra tsi ndo, tan na coo tsa vaha ra tsi ndo. Tyin tacan tan cua ñihi ndo tandihi tsa tsíñi ñihu tsi ndo. ³⁴ Jahá cuenda Nyoo tsi ndo vityin tan ityaan. Yacan ña caca iñi ndo tsa tsíñi ñihu tsi ndo ityaan. Caca iñi ndo tan nyehe ndo nácaa yahá ndo quivi vityin jahá Nyoo.

7

Ña cahan yo tsa caá inga nyivi
(Lc. 6.37-38, 41-42)

¹ Ña cahan ndo tsa caá inga nyivi, tacan tan Nyoo ña cua cahan ra tsa caá ndo. ² Tyin tumaa caahán ndo tsa caá inga nyivi, tacan cua javaha Nyoo tsihin ndo. Tan tumaa tsa javahá ndo tsihin inga nyivi, juvin ñi tacan cua javaha Nyoo tsihin ndo. ³ ¿Nacaa tyin nyehe un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un? ⁴ Tatun tinuu maa un nyii iin yutun cahnu, ¿nácaa cuvı́ catyi un tsihin ra yañi un: “Ñaha, na tava yo tsahan luhlu tsa nyii tinuu un?” ⁵ ¡Yooho tsa jahá tyin vaha xaan un! Tava jihna yutun cahnu tsa nyii tinuu un. Tyin tacan tan cuvı́ nyehe vaha un tsahan luhlu tsa cua tava un tinuu yañi un.

⁶ Ña jañihi ndo cahan ndo tuhun Nyoo tsihin nyivi ña cuñi coto tyin coto cañi ñi tsi ndo. Tyin cuvı́ ñi tumaa ina tsa caán xaan tsi ndo, tan tumaa quini tsa tsacá tsaha iin ndaha tyiñu tsa yahvi nyaá, tyin caahán ñi tsa ndavaha ñi siqui tuhun Nyoo.

Ña cu jutsan yo ndacan yo tsa ndacan yo tsi Nyoo, tyin tacan tan cua cuhva ra tsi yo
(Lc. 11.9-13; 6.31)

⁷ Ndacan ndo tsa tsíñi ñihu tsi ndo tsi Nyoo. Tan cua cuhva ra tsi ndo. Nanducu ndo, tan cua nañihi ndo. Cañi ndaha ndo yuvehe, tan cua nuña. ⁸ Tyin tandihi nyivi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

⁹ Tacan tucu nyooho tsihin sehe ndo. Tsahá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi? ¹⁰ O tatun tsicán tsi tyaca, ¿a cua cuhva ndo iin coo itsi? ¹¹ Nyooho vasu ndi maa quíñi iyó

ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu yo, ra nyaá gloria, cuaha ca tsa vaha cua cuhva ra tsi ndo tatun ndacan ndo tsi ra.

¹² Tumaa cuñi ndo tsa javaha nyivi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsaha Nyoo tsi ra Moisés tan tacan tucu nyaá nu tandihi libru tsa tyaa ra cuvı́ ndusu yuhu Nyoo tahañ tsanaha.

Yuvehe tihin tan ityi cuñi tsa cuahán nu nyaá Nyoo
(Lc. 13.24)

¹³ Nducu ndo cuhva quihvi ndo yuvehe tihin. Tyin quihin yuvehe, tan quihin ityi tsa cuahán nda nu cunaa nyivi anyaya. Tan cuaha xaan nyivi cuahán ityi can. ¹⁴ Maa tyin tihin yuvehe tan cuñi ityi tsa cuahán nu cuahán nyivi tsa ñihi ñayivi nyito coo ñi. Maa tyin ña cuaha nyivi nañihi ityi can.

Tsihin tsa javahá nyivi, tan nacotó yo tatun nyivi vaha, a nyivi ña vaha cuvı́ ñi
(Lc. 6.43-44)

¹⁵ Jahá ndo cuenda tsi ndo tsihin ra vatya naha ra. Tyin catyí ra naha tyin ndusu yuhu Nyoo cuvı́ ra naha, maa tyin ña nditsa. Tyin vatsí ra naha tumaa mbee nu yucú ndo, jahá ra naha tyin ra vaha cuvı́ ra naha. Maa tyin tumaa quiti xaan cuvı́ ra naha. ¹⁶ Nyooho cuvı́ nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuvı́ ra naha. Tyin iin tinyata ña cua cuhva tun mangu, tan ndi iñu nduhva ña cuvı́ cuhva tsi yucu vixi. ¹⁷ Tan tacan tucu tandihi yutun vaha. Tsahá tun tsiti vaha. Tan tandihi yutun ña vaha, tsahá tun tsiti ña vaha. ¹⁸ Tyin yutun vaha, ña cuvı́ cuhva tun tsiti ña vaha. Tan ndi yutun ña vaha ña cuvı́ cuhva tun tsiti vaha. ¹⁹ Tan tandihi yutun tsa ña tsahá tsiti vaha, cahnya yo tsi tun. Tan cayu tun. ²⁰ Tan tacan tsihin tsa javahá nyivi, cuvı́ nacoto ndo tsi ñi tatun nyivi vaha o nyivi ña vaha cuvı́ ñi.

Nu catyí ra Jesús tyin ña tandihi nyivi tan cua quihvi ñi nu ndacá ñaha Nyoo
(Lc. 13.25-27)

²¹ Ña tandihi nyivi tsa catyí tsihin yu: “Jutu Mañi yu, Jutu Mañi yu”, cua quihvi ñi nu ndacá ñaha Nyoo nda gloria. Maa tyin nyivi tsa javahá tsa catyí maa Nyoo Jutu yu, juvin ñi can cua quihvi nu ndacá ñaha ra. ²² Quivi tatsi tuñi Nyoo tsi nyivi, cuaha xaan ñi cua catyí ñi tsihin yu tyehen: “Jutu Mañi yu, nyuhu cahan ndi tuhun cun tsihin nyivi. Tan tsihin sivi un tava ndi tatyí ña vaha tsa yihı́ tsi ñi. Tan cuaha xaan tsa iyo javaha ndi tsihin sivi un”, cua catyí ñi tsihin yu. ²³ Tacan tan yuhu cua catyí yu tsihin ñi: “Ña nacotó yu tsi nyooho. Catsiyo nyaha ndo nu

nyaá yu tandihí nyooho tsa javahá maa maa ñi tsa ña vaha”, cua catyí yu tsihin ñi.

Nu caahán ra Jesús ñáaca cua cacu nyívi tsa tyaá yahvi tuhun caahán ra, tan nyívi tsa ña tyaá yahvi tsa caahán ra, ña cua cacu ñi (Lc. 6.47-49; Mr. 1.22)

²⁴ Tacan catyí yu tsihin ndo, tyin nyívi tsa tsiñi tsa caahán yu tan javahá ñi cuhva cuñi yu, cuví ñi tumaa iin ra tsiñi tuñi tsa janduvita tyihyo tsaha vehe ra tsata cava. ²⁵ Tan quitsahá cuún ñihi savi. Tan cuaha xaan ndutya ñuhu yaha tsata vehe can. Tan ñihi xaan quitsahá yihí tatyí. Maa tyin ña cuví janduva tsi vehe can, tyin vaha sama tyihyo tsaha tsi tsata cava. ²⁶ Maa tyin nyívi tsa tsiñi tuhun caahán yu, tan ña javahá ñi cuhva cuñi yu; cuví ñi tumaa iin ra soho, ra tsa javahá vehe nu nyíti. ²⁷ Tan quitsahá cuún ñihi savi. Tan cuaha xaan ndutya ñuhu yaha nu nyaá vehe ra. Tan ñihi xaan yihí tatyí. Tan vehe can iin yaha cuí ñi nduva tsi tan cunaá tsi —catyí ra Jesús tsihin ñi tsa nyicún tsi ra.

²⁸ Cuhva tsa ndihí cahán ra Jesús tsihin ñi, iyo xaan cuñi ñi tsihin tsa caahán ra, ²⁹ tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

8

Nu janduvahá ra Jesús tsi iin ra ndohó cuehe tyaahyú

(Mr. 1.40-45; Lc. 5.12-16)

¹ Cuhva tsa nuu ra Jesús yucu can, cuaha xaan nyívi nyicún tsi ra. ² Tan tsaá iin ra ndohó cuehe tyaahyú, tan tsiçuñi tsiiti ra nuu ra Jesús, tan catyí ra tsihin ra:

—Jutu Mañi yu, tatun yooho tan cuñi un, cuví janduvaha un tsi yu —catyí ra tsihin ra.

³ Tacan tan tsiyó ndaha ra Jesús jiñi ra cuuhví can, tan catyí ra tsihin ra:

—Cuñi yu janduvaha yu tsi un. Cua nduvaha un vityin —catyí ra.

Tan iin yaha ñi nduvahá ra. ⁴ Tacan tan catyí ra Jesús tsihin ra:

—Jihna, coto ñahñi catyí tuhun un tsihin nyívi. Maa tyin çaahan nu nyaá ra cuví jutu, tan janaha un tsi un tsi ra. Tan cuhva un tsa taahán tsi jamañi un nuu Nyoo tumaa catyí ley Nyoo tsa tyaá ra Moisés. Tan cua cuví tsi iin tsa ndaa tsi ra jutu can tan tsi nyívi tyin tsa nduvahá un.

Nu janduvahá ra Jesús tsi musu iin ra cuví capitán

(Lc. 7.1-10)

⁵ Quiví tsa tsaá ra Jesús ñuu Capernaum, iin ra cuví capitán, ra ñuu Roma, tsaá ra nu nyíi ra Jesús tan caahán ndaahvi ra tsihin ra, ⁶ tan catyí ra:

—Jutu Mañi yu, musu yu ñihi xaan cuuhví ra, canyí ra nu cama. Ña cuví nduvita ra tyin nduxij ra, tan yaha xaan cuhva cuñi ra.

⁷ Tan catyí ra Jesús tsihin ra:

—Cuhun maa yu tan kujanduvaha yu tsi ra —catyí ra tsihin ra.

⁸ Nacahan ra capitán can tan catyí ra:

—Jutu Mañi yu, ña cahnu cuví yu tan cuhun un yuvehe yu; tsihin tuhun cahán ñi un tan musu yu cua nduvaha ra. ⁹ Tyin juvin ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatun cua tava tyiñu yu tsi iin ra can, cua cuhun ra. Tan tatun cana yu tsi inga ra, cua quitsi ra. Tan tatun tava tyiñu yu tsi musu yu, cua javaha ra cuhva cuñi yu.

¹⁰ Tan tsa tsiñi ra Jesús tsa cahán ra can, tan iyo xaan cuñi ra. Tan catyí ra tsihin nyívi tsa nyicún tsi ra:

—Tsa nditsa catyí yu tsihin ndo, tyin ñaha ca nañihi yu iin ra Israel tsa tsinú xaan iñi tumaa tsinú iñi ra ihya. ¹¹ Tan catyí yu tsihin ndo tyin cuaha nyívi inga ñuu cua quitsi ityi nu caná ñicanyii, tan ityi nu tsiyó ñicanyii, tan cua cunyecu ñi catsi ñi tsihin ra Abraham, ra Isaac tan ra Jacob nu ndacá ñaha Nyoo. ¹² Tan nyívi tsa taahán tsi cuhun gloria, ña cua cuhun ñi, tyin cua cuhun ñi nu naa. Tan cua vacu tsaá ñi tan catsan ña cua cuví nuhu ñi tsa cuenda tsa xaan cuñi ñi tyin nyehe ñi tundoho —catyí ra Jesús tsihin nyívi nyicún tsi ra.

¹³ Tacan tan catyí ra tsihin ra capitán can:

—Çaahan, tan na nduvaha musu un tsa cuenda tyin tsinú iñi un tsi yu —catyí ra Jesús tsihin ra capitán.

Tan juvin ñi cuhva can nduvahá musu ra.

Nu janduvahá ra Jesús tsi tyiso ra Pedro

(Mr. 1.29-31; Lc. 4.38-39)

¹⁴ Tsa yaha can, tan cuahán ra Jesús yuvehe ra Pedro. Tan nyehe ra tsi ña tyiso ra, canyí ña nu tsito tyin yihí cahñi tsi ña.

¹⁵ Tan tñin ra ndaha ña, tan iin yaha ñi quita cahñi tsi ña. Tan nduvita ña, tan quitsahá nanducú ña tsa catsi ra naha.

Nu cuaha xaan nyívi cuuhví janduvahá ra Jesús

(Mr. 1.32-34; Lc. 4.40-41)

¹⁶ Tan tsa cunaaha, cuaha xaan nyívi yihí tatyí ña vaha tsindaca nyívi tsi ra Jesús. Tan tsihin intuhun ñi tuhun cahán ra Jesús tan quita tatyí ña vaha tsi ñi. Tan tandihí ñi cuuhví iin yaha ñi nduvahá ñi. ¹⁷ Tacan cuví tyin tacan tan cundaá tsa cahán Jutu Mañi yo tsihin yuhu ra Isaías, ra cuví ndusu yuhu ra tahañ tsanaha. Tan catyí ra tyehen: “Maa ra quihñin ra cuehe tsa yihí tsi yo, tan quihñin nyaa ra tsa uhvi tsi yo.”

Nyívi tsa cuñi quihvi cuenda ra Jesús (Lc. 9.57-62)

¹⁸ Tan tsa nyehę ra Jesúš tyin cuaha xaan nyivi tsinu nduvi nu nyii ra, catyí ra tsihin ra tsicá tsihin ra tyin cua yaha ra naha inga tsiyo miñi. ¹⁹ Tacan tan tsaq iin ra maestro cuenda ley vehe ñuhu tan catyí ra tsihin ra: —Maestro, cuñí yu cunyicun yu tsi un tandihi ñi ityi nu cuahán un —catyí ra.

²⁰ Tan ra Jesúš catyí ra tsihin ra:

—Ñacuui iyó vehe ti. Tan saa iyó taca ti. Maa tyin yuhu Rayi tsa queę nda gloria, nduve nu maa cunyanaa luxu jiñi yu iyó —catyí ra.

²¹ Inga ra tsa tsicá tsihin ra nacahan ra tsihin ra:

—Taa, cųhva na cųhun jihna yu cucutsi yu tsi jutu yu, —catyí ra.

²² Tan catyí ra Jesúš tsihin ra:

—Naha yooho quitsi nyicun un tsi yu. Tan nyivi ña iyó Nyoo aña na cucutsi tahan maa ñi tsi ñi tsitsi ñuhu tun tsihi ñi —catyí ra.

Nu jacutaxin ra Jesúš tatyí xaan nu miñi
(Mr. 4.35-41; Lc. 8.22-25)

²³ Tacan tan quihvi ra tsitsi yutun ndoo tan ra tsicá tsihin ra cuahán ra naha tsihin ra. ²⁴ Tan ñihi xaan quitsaha yihí tatyí nu miñi can, tan cuaha xaan ndutya quihvi tsitsi yutun ndoo ra naha. Maa tyin ra Jesúš quixí ra. ²⁵ Tan ra tsicá tsihin ra jandoto ra naha tsi ra, tan catyí ra naha:

—Jutu Mañi yu, jacacu tsi yo, tyin cuñi cunaa yo!

²⁶ Tan catyí ra Jesúš tsihin ra naha:

—¿Nacuenda yuuhvi xaan ndo? ¡Nyooho tsa luxu xaan tsinu iñi tsi yu! —catyí ra Jesúš.

Tacan tan nduvita ra tan cahán ra tsihin tatyí tan tsihin ndutya, tan cutaxin tsi.

²⁷ Tan iyo xaan cuñi ra naha tan catyí ra naha:

—¿Yóo ra cuví ra ihya? Tyin nda cuanda tatyí tan nda cuanda ndutya tan tyaá yahvi tsi ra —catyí ra naha.

Nu nduvahą uvi ra ñuu Gadara ra yihí tatyí ña vaha naha ra

(Mr. 5.1-20; Lc. 8.26-39)

²⁸ Tacan tan tsaq ra naha inga tsiyo miñi nda nu ñuhu Gadara. Tan tsaq uvi taahan ra yihí tatyí ña vaha. Tan quitą ra naha nu ñaña cumí sandu. Xaan xaan ra naha, tan yoñi maa cuví yaha ityi can. ²⁹ Tan caná tsa ra naha, tan catyí ra naha:

—¿Náa cuñi un tsihin ndi, yooho Jesúš Sehe Nyoo? ¿A vatsí un vatsí janyehę un tundoho tsi ndi tsa ndi cumañi ca tsa quivi? —catyí ra naha jahą tatyí ña vaha can.

³⁰ Tan yatyin ñi can yucú cuaha quini tsatsi ti naha ti. ³¹ Tan catyí nu tatyí ña vaha can tsihin ra Jesúš:

—Tatun cua tava un tsi ndi, cųhva tsa quihvi ndi tsitsi quini can naha ti —catyí nu tatyí ña vaha can nahnu.

³² —Vaha. Quihvi ndo —catyí ra Jesúš.

Tan quitą nu tatyí ña vaha can nahnu, tan quihvi nahnu tsitsi tandihi quini tsa nyecú can. Tan tandihi quini can tsinu ti naha ti tan cucoyo ti naha ti iin xahva yuhu miñi can, tan tsihi ti naha ti tsihin ndutya can.

³³ Tan ra jahá cuenda tsi quini can, tsinu xaan ra naha cuahán ra naha tsitsi ñuu, tan nacatyí tuhun ra naha tandihi tsa cuví tsi ra tsa yihí tatyí ña vaha can naha ra. ³⁴ Tacan tan tandihi nyivi ñuu can, tsañan ñi tsinyehę ñi tsi ra Jesúš, tan cahán ndaahvi ñi tsihin ra na quita ra ñuu can.

9

Nu janduvahą ra Jesúš tsi iin ra xii

(Mr. 2.1-12; Lc. 5.17-26)

¹ Tacan tan quihvi ra Jesúš tsitsi iin yutun ndoo tan yaha ra miñi, tan tsaq ra nda ñuu nu iyó ra. ² Nu nyii ra ican, tsindacą nyivi tsi iin ra cuuhvi tsa ña cuví nacanda tyin nduxii ra, tan canyií ra nu tsito. Tan tsa nyehę ra Jesúš tyin tsinu xaan iñi ñi tsi ra, quitsaha caahán ra tsihin ra cuuhvi can:

—Jandu iin iñi un, sehe yu, tyin tsa tsicoo tucahnu iñi cuatyí un —catyí ra Jesúš tsihin ra.

³ Tacan tan quitsaha tsicá iñi juhva ra maestro cuenda ley vehe ñuhu tsa yucú ican naha ra: “Ra ihya tsicoo cuatyí ra nu Nyoo tsihin tuhun caahán ra”, cuñi ra naha tsicá iñi ra naha.

⁴ Maa tyin ra Jesúš tsitó ra náa tsicá iñi ra naha, tan catyí ra tsihin ra naha:

—¿Nacuenda tsicá iñi ndo tsa ña vaha?

⁵ Tyin ¿ndaa tsa yii ca catyí yo: a yii ca catyí yo: “Cuatyí un tsa yaha ndatsi”, o yii ca catyí yo: “Nduvita tan қаса un”? ⁶ Vityin cua janaha yu tsi ndo tyin yuhu Rayi tsa queę nda gloria, iyó ndatu tsi yu nu ñuhu ñayivi ihya tyin jaha yu tucahnu iñi cuatyí ndo —catyí ra Jesúš.

Tacan tan catyí ra tsihin ra cuuhvi can:

—Nduvita, naquihin tsito un tan cyanuhu nda yuvehe un —catyí ra.

⁷ Tacan tan nduvita ra tan cuanuhu ra nda yuvehe ra. ⁸ Tan nyivi tsa nyehę tsa cuví, nayuhvi xaan ñi. Tan quitsaha jacahnú ñi tsi Nyoo tyin tsañą ra tunyee iñi tsi nyivi.

Nu caną ra Jesúš tsi ra Mateo

(Mr. 2.13-17; Lc. 5.27-32)

⁹ Yaha can tan quitą ra Jesúš ican. Tan nyehę ra tsi iin ra tsa nañi Mateo, nyaá ra naquihin ra xuhun tsa tyahvi nyivi Israel tsi ra ndacá ñaha. Tan catyí ra tsihin ra:

—Cohon tsihin yu.

Tacan tan nduvita ra Mateo tan cuahán ra tsihin ra Jesúš.

¹⁰ Tacan tan cuví tsi iin tsaha, ra Jesúš cuahán ra nda vehe ra Mateo, cua catsi ra

ixta. Tan cuaha xaan ra tavá xuhun cuenda ra ndaca ñaha tsaá, tan tsihin inga ca ra iyó cuatyí naha ra. Tan tsinyecú ra naha iin ñi nu mesa tsihin ra Jesús tan tsihin ra tsicá tsihin ra. ¹¹ Tan tsa nyehe ra fariseo naha ra tyin nyaá ra Jesús tsihin ra iyó cuatyí naha ra, tan tsicá tuhun ra naha tsi ra tsicá tsihin ra, tan catyí ra naha tsihin ra naha:

—¿Nacuenda tyin tsatsí ra maestro ndo tsihin ra tavá xuhun naha ra tan ra iyó cuatyí naha ra? —catyí ra naha.

¹² Tsa tsiñi ra Jesús tsa caahán ra naha, tan catyí ra tsihin ra naha:

—Ña tsiñi ñuhu doctor tsi nyívi iyó vaha, ñi ña cuuhví. Maa tyin nyívi cuuhví tsiñi ñuhu doctor tsi ñi. ¹³ Cuaahan ndo tan cutuhva ndo cuhva catyí nu tutu Nyoo, nu catyí tsi tyehen: “Yuhu cuñi yu tsa cundaahví iñi ndo tsi nyívi, tyin yacan cuví tsa ñiñi xaan ca tan ñavin ca tsa cahñi ndo quití tan cuhva cuenda ndo tsi yu.” Yuhu ña vatsí yu jatyinyee yu tsi nyívi tsa tsicá iñi tyin vaha ñi, vatsí yu jatyinyee yu tsi nyívi tsitó tyin iyó cuatyí ñi, na ndu uvi iñi ñi cuatyí ñi.

Nu tsicá tuhun nyívi tsi ra Jesús tatun taahán tsi tsa coo nyitya ñi

(Mr. 2.18-20; Lc. 5.33-35)

¹⁴ Tacan tan ra nyicún tsi ra Juan, ra jacondutya tsi nyívi, natuhvá ra naha nu nyaá ra Jesús tan tsicá tuhun ra naha tsi ra tan catyí ra naha:

—¿Nacuvi tyin nyuhu tan ra cuví fariseo naha ra, tuhvá ndi tsicoó nyitya tan ra tsicá tsihin yooho ña tuhvá ra naha coo nyitya?

¹⁵ Tan nacahan ra Jesús tan catyí ra:

—¿A cuví cunyecu cuiihya nyívi yucú vico tindaha tun nyí ra cua tindaha tsihin ñi? Maa tyin coo quívi cua quita ra tindaha ican nu yucú ñi. Tacan tan cua coo ñi tucuiihya iñi tan cua coo nyitya ñi.

Nu caahán ra Jesús tyin ña nacatsí tahan tuhun tsahnu tsa iyó nyívi tsihin tuhun tsaá tsa jacuahá ra tsi ñi

(Mr. 2.21-22; Lc. 5.36-39)

¹⁶ Ña tuhvá nyívi naquicú iin jahma tuuhu tsihin iin jahma tsaá, tyin cua nandiyi nu naquicú ñi tsihin tsa tsaá can, tan cua tyahnya tsi inga tsaá. ¹⁷ Tan tacan tucu, ña cuví tyihí nyívi vinu tsaá tsitsi ñi tsaahnu tyin tatun tacan javaha ñi, cua tyahnya ñi can, tan cua tiví vinu can tan cua tiví ndihí tucu ñi can. Yacan cuenda taahán tsi tyihí yo vinu tsaá tsitsi ñi tsaá. Tyin tacan tan ña tyahnya ñi can tan ndi vinu can ña tiví tsi.

Nu nduvahá ñaha sehe ra Jairo tan ñaha tsa tiñ jahma ra Jesús

(Mr. 5.21-43; Lc. 8.40-56)

¹⁸ Tsitsi tsa caahán ra Jesús tuhun ihya, tsaá iin ra cumí tyíñu cuenda vehe ñuhu

nyívi Judea tan tsicuiñi tsiti ra nuu ra Jesús, tan catyí ra:

—Ndi tsihi cuii ñi sehe yu, maa tyin tatun yooho tan cuhun un tan tyiso ndaha un jiñi ña, cua nandoto ña —catyí ra tsihin ra Jesús.

¹⁹ Nduvitá ra Jesús tsihin ra tsicá tsihin ra tan caahán ra naha tsihin ra.

²⁰ Tacan tan iin ñaha cuuhví natuhvá ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuún niñi ña. Tan tyanaá ña ndaha ña jahma ra, ²¹ tan cuñi ña tsicá iñi ña: “Tun nañi ndaha yu jahma ra cua nduvaha yu”, cuñi ña.

²² Maa tyin ra Jesús nanyico coo ra tan nyehe ra tsi ña, tan catyí ra tsihin ña:

—Janduní iñi un, xihí, tsa nduvahá un tyin tsinú iñi un —catyí ra.

Tan juvin ñi cuhva can tan tsicuiñi tsa cuún niñi ña.

²³ Yahá can tan tsaá ra Jesús vehe ra cumí tyíñu can, tan nyehe ra tyin ra música ndatú ra naha tsa cucutsi ra naha tsi ndiyi can. Tan nyívi tsa yucú can iyo xaan tsacú ñi. ²⁴ Tan catyí ra Jesús tsihin ñi:

—Quita ndo ihya. Ñaha luhlu ihya, ña tsihi ña. Quixí ña —catyí ra.

Tan tsa cahan ra tacan quitsahá tsacú naaha ñi. ²⁵ Tan ra Jesús tavá ra tsi ñi ityi tsata vehe. Tacan tan quihví ra tsitsi vehe nu canyihí ñaha can, tan tiñ ra ndaha ñaha luhlu can, tan nduvitá ña. ²⁶ Tan tandihí nyívi iyó ityi ñuhu can tsitó ñi tsa nandoto ñaha luhlu can.

Nu janduvahá ra Jesús tsi uvi taahan ra cuaa

²⁷ Tsa quitá ra Jesús ican, tan uvi taahan ra cuaa nyicún tsi ra, caná tsaá ra naha tan catyí ra naha:

—¿Cundahví iñi tsi ndi, yooho ra cuví tata ra David! —catyí ra naha.

²⁸ Tan tsa yahá quihví ra Jesús tsitsi vehe, ra cuaa can, natuhvá ra naha nu nyaá ra, tan maa ra Jesús quitsahá tsicá tuhun ra tsi ra naha tan catyí ra:

—¿A tsinú iñi ndo tyin cuví janduvaha yu tsi ndo?

Tan nacahan ra cuaa can naha ra tan catyí ra naha:

—Tsinú iñi ndi tsi un, Jutu Mañi yu —catyí ra naha.

²⁹ Tacan tan tyanaá ra Jesús ndaha ra tinuu ra naha tan catyí ra tsihin ra naha:

—Na cuví maa tumaa cuhva tsinú iñi ndo —catyí ra.

³⁰ Tan nduvahá tinuu ra naha. Tan catyí ra Jesús tsihin ra naha:

—Coto ñahñi catyí tuhun ndo tsihin ndi intuhun nyívi.

³¹ Maa tyin cuahán ra naha tan quitsaha catyí tuhun ra naha tsa javaha ra Jesús tsihin ra naha tsihin tandíhi nyívi iyó ityí ñuu can.

Nu janduvaha ra Jesús tsi iin ra ñíhí

³² Tsa cuahán ra naha, juhva nyívi tsindacá ñi tsi iin ra ñíhí tsa yíhí tatyí ña vaha nu nyíi ra Jesús. ³³ Tan tsa tava ra Jesús tatyí ña vaha can, tacan tan nacahan ra can. Tan iyo xaan cuñí nyívi, tan catyí ñi:

—Ñaha ca maa nyehe yo ñuu Israel ihya ndi intuhun ra tava tatyí ña vaha tsi nyívi —catyí ñi.

³⁴ Maa tyin ra cuví fariseo naha ra, catyí ra naha:

—Ra ihya tava ra tatyí ña vaha tsihin tunyee ñi nu ña vaha tsa cuví ityí nuu tsihin nahnu —catyí ra naha.

Nu caahán ra Jesús tyin ña cuaha maa nyívi jahá tyíñu cuenda Nyoo iyó

³⁵ Ra Jesús tsaahan ra tandíhi ñuu jacuahá ra tsi nyívi tsitsi vehe ñuhu intuhun intuhun ñuu. Caahán ra tuhun Nyoo nácaa ndacá ñaha ra tsi nyívi. Tan janduvahá ra tandíhi nuu cuehe tsa ndohó ñi. ³⁶ Tan tsa nyehe ra tsi nyívi, cundaahví xaan ñi ra nyehe ra tsi ñi, tyin nyehe ñi tundoho tan iyó ñi tucuihya ñi, tumaa mbee ticatyí tsa nduve tsitoho iyó. ³⁷ Tacan tan catyí ra tsihin ra tsicá tsihin ra:

—Tsa nditsa, cuaha xaan tyíñu iyó, maa tyin ra jahá tyíñu, ña cuaha ra naha. ³⁸ Yacan cuenda, ndacan ndo tsi Ra Jatsii tyíñu ihya, na jaquitsí ca ra musu naquihin vaha cosecha ra.

10

Nu nacatsi ra Jesús tsa utsi uvi ra cua caca tyíñu ra

(Mr. 3.13-19; Lc. 6.12-16)

¹ Tacan tan cana ra Jesús tsi tsa utsi uvi ra tsicá tsihin ra tan tsaah ra ndatu tsi ra naha na tava ra naha tatyí ña vaha tsa yíhí añima nyívi, tan na janduvaha ra naha tsi nyívi cuuhví náa ndíhi ca nu cuehe tan tsa uhví.

² Ihya nyaá sívi tsa utsi uvi ra tsicá tyíñu ra: jihna ca, ra Simón, tsa nañi tucu Pedro, tan ra yañi ra, ra Andrés; ra Jacobo tan ra Juan yañi ra, sehe ra Zebedeo cuví tsi ra naha; ³ tan ra Felipe; ra Bartolomé; ra Tomás; tan ra Mateo ra tava xuhun cuenda ra ndacá ñaha; ra Jacobo sehe ra Alfeo; ra Lebeo tsa nañi tucu Tadeo; ⁴ tan ra Simón ra nyíi cuenda partido tsa cuñi cuhun cuatyí síqui ñuu Roma tsa ndacá ñaha tsi ñi; tan ra Judas Iscariote, ra tsa xico tsi ra Jesús.

Nu tava tyíñu ra Jesús tsi tsa utsi uvi ra tsicá tsihin ra tyin cahan ra naha tuhun Nyoo
(Mr. 6.7-13; Lc. 9.1-6)

⁵ Tan tava tyíñu ra Jesús tsi tsa utsi uvi ra can naha ra, tan catyí ra tsihin ra naha:

—Ña cuhun ndo nu iyó nyívi tsa ñavin nyívi Israel cuví, tan ndi ña quihví ndo ñuu tsa cayucú Samaria. ⁶ Cuaahan ndo nu yucú mbee tsa tsinaa tsa cuví nyívi Israel. ⁷ Cuaahan ndo cua cahan ndo tyin tsa tsa quívi tsa cua cundaca ñaha Nyoo tsi nyívi. ⁸ Janduvaha ndo tsi nyívi cuuhví, nyívi ndohó cuehe tyaahyú, tan nyívi yíhí inga cuehe tsi. Janandoto ndo ndívi. Tava ndo tatyí ña vaha yíhí tsi nyívi. Tyin nyooho naquihin ndo tunyee ñi ihya tsa cuatu ñi, janduvaha ndo nyívi tsihin tsi, tan ña ndacan ndo xuhun tsi ñi.

⁹ Ña cuiso ndo xuhun; ndi xuhun cuaan, ndi xuhun cuitsin, ndi xuhun cuaaha. ¹⁰ Tan ña cuiso ndo ndi yunu tsa cuenda tsa caca ityí ndo. Intuhun ñi camisa tsa nditsin ndo cuhun tsihin ndo. Tan ña cuiso ndo inga pari nditsan. Tan ndi ña cundaha ndo yutun. Tyin ra jahá tyíñu, iyó ndatu tsi ra tsa coo yahvi ra.

¹¹ Tatun tsa ndo iin ñuu cahnu o iin ñuu luhlu, nducu ndo iin nyívi vaha ñi, tan ndoo ndo yuvehe ñi nda cuanda quita ndo ñuu can. ¹² Tatun cua quihví ndo iin vehe, cuhva ndo nacumi tsi nyívi iyó yuvehe can. Tan catyí ndo tsihin ñi: “Na coo tsa vaha Nyoo añima ndo”. ¹³ Tan tatun nyívi iyó yuvehe can tan nacotó ñi tyin tsiñi ñuhu tsa vaha can tsi ñi, cua ndoo can tsihin ñi. Maa tyin tatun ña tsitó ñi tyin tsiñi ñuhu tsa vaha can tsi ñi, naquihin nyico ndo can. ¹⁴ Tan tatun ña cuñí nyívi quihin cuenda ñi tsi ndo, tan ndi ña cuñí ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsaah ndo tyin ndoo maa cuatyí ñi síqui ñi. ¹⁵ Tsa nditsa catyí yu tsihin ndo tyin quívi cua tatsi tuñi Nyoo tsi nyívi, ñihi ca cua tatsi tuñi ra tsi ñi can tan ñavin ca nyívi ñuu Sodoma tan ñuu Gomorra.

Nu catyí tuhun tsi náa ndíhi tundoho cua nyehe nyívi tsicá tyíñu Nyoo

¹⁶ ¡Nyehe ndo! Tumaa mbee ticatyí cuví ndo, tan jacuhún yu tsi ndo nu yucú quiti xaan. Nyityi jaha ndo tsi ndo, tumaa coo. Maa tyin janduvita ndo ñi ndo tumaa paloma, ña xaan ti. ¹⁷ Jaha ndo cuenda tsi ndo tsihin nyívi tyin cua cuhva cuenda ñi tsi ndo tsi ra cumí tyíñu naha ra. Tan cua cañi ñi tsi ndo tsitsi vehe ñuhu. ¹⁸ Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey. Tacan tan cuví cahan ndo tuhun yu nuu ra naha tan nuu nyívi tsa ñavin nyívi Israel cuví. ¹⁹ Maa tyin tatun nacuhva cuenda ñi tsi ndo tsi ra cumí tyíñu naha ra, ña caca ñi ndo nácaa cua cahan ndo, tyin tatun tsa cuhva tsa cua cahan ndo, Nyoo cua cuhva ra tuhun cahan ndo. ²⁰ Tyin ñavin maa ndo cua cahan, tyin maa Tatyí Ji Jutu

yo Nyoo tsa iyó ańima ndo cua cuhva ra tsa cahan ndo.

²¹ Yihí rayíi cua xico ra naha juvin ñi tsi ra yańi ra naha na cahńi ra naha tsi ra. Tan yihí ra cua xico ra sehe ra. Tan yihí nyívi cua cuxaan ñi tsi jutu ñi tan sihi ñi, tan cua cuhva cuenda ñi jutu ñi tan sihi ñi tsi nyívi na cahńi nyívi can tsi ñi. ²² Tandihí nyívi, ndasi cua cuńi ñi nyehe ñi tsi ndo tsa cuenda yuhu. Maa tyin tatun ña jandihí ndo tsa tsinú ińi ndo tsi yu, tacan tan cua cacu ndo. ²³ Tatun nyaa ndaha ñi tsi ndo iin ñuu, cuhun ndo inga ñuu. Tyin tsa nditsa catyí yu tsihin ndo tyin tsa ndi cumańi ca cahun ndo tandihí ñuu nu iyó nyívi Israel tan cua quítsi nyico yuhu, Rayíi tsa quee nda gloria.

²⁴ Iin ra luhlu tsa tsicá escuela, ña cahnú cuví ra tan ñavin ca ra jacuahá tsi ra. Tan iin musu, ña cahnú ca cuví ra tan ñavin ca tsitoho ra. ²⁵ Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnú ca tan ñavin ca tsitoho ra. Yacan cuenda tatun maa yu, ra jatsii vehe, tan catyí nyívi tyin cuví yu Beelzebú, nu cuví ityí nuu tsihin nu ña vaha, tacan tucu cua catyí ñi tsihin nyívi cuenda yu.

¿Yóo tsi taahán tsi nayuhvi yo, a tsi nyívi o tsi Nyoo?

(Lc. 12.2-7)

²⁶ Yacan cuenda ña nayuhvi ndo tsi nyívi, tyin nduve tsa nyíi xeehe tsa ña cua quituvi. Tan nduve tsa xeehe tsa ña cua coto nyívi. ²⁷ Tandihí tsa caahán yu tsihin ndo tsacuaa, cahan ndo can tsinu cahńi. Tan tandihí tsa caahán xeehe yu tsihin ndo, ndaa ndo jini vehe cąna tsa ndo can, na coto tandihí nyívi. ²⁸ Ña nayuhvi ndo tsi nyívi tsańi cuńu ñuhu yo, tyin ña cuví cahńi ñi ańima yo. Vaha ca nayuhvi ndo tsi maa Nyoo, ra cuví janaa cuńu ñuhu ndo tan ańima ndo tsitsi anyaya.

²⁹ Saa ña yahvi nyaá ti. Cuví jata yo uvi taahan ti tsihin intuhun xuhun luhlu. Maa tyin ndi intuhun ti ña canacava ti nu ñuhu tatun ña cuhva maa Nyoo Jutu yo. ³⁰ Tyin nda cuanda ixí jini ndo tan tsitó Nyoo najava taahan tsi iyó, tyin tsa nacahví ra intuhun intuhun tsi. ³¹ Yacan cuenda ña nayuhvi ndo. Nyoo, nyaá yahvi ca ndo nu Nyoo tan ñavin ca tsa cuaha saa.

Ña cua nayuhvi yo cahan yo tuhun ra Jesucristo tsihin nyívi

(Lc. 12.8-9)

³² Tandihí nyívi tsa caahán catsi tsihin nyívi yóo ra cuví yu, tacan tucu yuhu cua cahan catsi yu tsihin Jutu yu ra nyaá gloria tyin nacotó yu tsi ñi. ³³ Maa tyin nyívi cua tyihí xeehe tsi yu nuu inga nyívi, tacan tucu

yuhu cua tyihí xeehe yu tsi ñi nuu Jutu yu ra nyaá gloria.

Nu caahán ra Jesús tyin tsa cuenda ra tan cua cańi tahan nyívi tsihin tahan ñi

(Lc. 12.51-53; 14.26-27)

³⁴ Ña cuńi ndo tyin yuhu vatsí cuhva yu tsa coo taxin nyívi nu ñuhu ñayívi ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan. ³⁵ Tyin yihí ñi cua tsinu ińi ñi tsi yu, maa tyin inga ñi ña cua tsinu ińi ñi. Tan yacan cuenda, iin ra cua cańi tahan ra tsihin jutu ra. Tan iin ñaha cua cańi tahan ña tsihin sihi ña. Tan inga ña cua cańi tahan ña tsihin tyiso ña. ³⁶ Tan yacan cuenda juvin ñi maa nyívi vehe ndo cua cuxaan ińi tsi ndo.

³⁷ Nyívi tsa cuńi ca tsi jutu ñi a tsi sihi ñi tan ñavin ca tsi yuhu, ña cuví cuví ñi nyívi cuenda yu. Tan nyívi cuńi ca tsi sehe yíi ñi a sehe sihi ñi, tan ñavin ca tsi yuhu, ña cuví cuví ñi nyívi cuenda yu. ³⁸ Tan nyívi tsa ña cuńi nyehe tundoho tan ndi ña cuńi ñi cuhva ñi ñayívi iyó ñi tsa cuenda yu, ña taahán tsi cuví ñi nyívi cuenda yu. ³⁹ Tyin nyívi cuńi xaan ca ñayívi iyó ñi, cua cunaa ñi. Maa tyin nyívi cua cuhva ñayívi iyó ñi tsa cuenda yu, cua ñihi ñi ñayívi nyito coo ñi.

Nu caahán ra Jesús nácaa cua ñihi yo tsa vaha Nyoo

(Mr. 9.41)

⁴⁰ Nyívi tsa naquihín cuenda tsi nyooho, tsi yuhu naquihín cuenda ñi, tan ñi naquihín cuenda tsi yuhu, quihín cuenda ñi tsi ra tsa jaquítsi tsi yu. ⁴¹ Nyívi naquihín cuenda tsi iin ra cuví ndusu yuhu Nyoo tyin vaha jaquítsi tsi ra, cua ñihi ndihí ñi tsa vaha tsa cua ñihi ra cuví ndusu yuhu Nyoo can. Tan nyívi naquihín cuenda tsi iin ra vaha tsa cuenda tyin ra vaha cuví ra, juvin ñi tsa vaha tsa cua ñihi ra vaha can cua ñihi ñi. ⁴² Tan yóo nyívi tsa cuhva intuhun vasu ndutya vitsin coho nyívi tsa nyicún tsi yu, cua ñihi ndihí ñi tsa cua cuhva Nyoo tsi ñi tsa nyicún tsi yu —catyí ra Jesús.

11

Nu jacuhun ra Juan tsi ra tsicá tsihin ra nu nyíi ra Jesús

(Lc. 7.18-35)

¹ Tsa ndihí cahan ra Jesús tsihin tsa utsi uvi ra tsicá tsihin ra, tacan tan quita ra ican, tyin cua cahan ra tuhun Nyoo tsihin nyívi tsa iyó ñuu tsa cayucú ityí can.

² Tan ra Juan nyíi ra vehe caa quívi can, tan ñihí tuhun ra tsa javahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi ra Jesús. Tan cuahan ra naha nu nyíi ra. ³ Tan catyí ra naha tsihin ra:

—¿A juvin yooho cuví ra Cristo tsa nyaa tsa cua quítsi jacacu tsi ndi? O tatun ñavin

un cuví, cuatu ndi tsi inga ra —catyí ra naha tsihin ra Jesús.

⁴ Nacahan ra Jesús tan catyí ra:

—Cuahan ndo tan catyí tuhun ndo tsihin ra Juan tandihi tsa nyehé ndo, tan tsa tsihi ndo. ⁵ Tan catyí ndo tsihin ra: nyívi cuaa nanyehé ñi, nyívi coxo nacacá ñi, nyívi ndohó cuehe tyaahtyí nduvahá ñi, nyívi soho nacuñí ñi, tan nandotó nyívi tsa tsa tsihi, tan nyívi ndaahvi tsiñí ñi tuhun Nyoo nácaa cua cacu ñi.

⁶ Tan catyí ndo tsihin ra tyin sii xaan cua cuví tsi nyívi tsa nyicún tsi yu tun ña ndu uvi iñi ñi —catyí ra Jesús tsihin ra naha.

⁷ Tsa cuahán ra naha, tan quitsahá caahán ra Jesús tuhun ra Juan tsihin nyívi, tan catyí ra:

—Quívi tsa tsahan ndo tsinyehé ndo nu tsiquí, ¿náa cua nyehé ndo cuñí maa ndo? ¿A nyehé ndo iin ndoo tsa janduva tatyí? ⁸ ¿O náa cuví tsa tsinyehé ndo? ¿A iin ra nditsí jahma vaha cua nyehé ndo? Ñavin. Tyin tsiótó ndo tyin ra nditsí jahma vaha, iyó ra vehe ra cuví rey. ⁹ ¿A ña tsahan ndo tsinyehé ndo tsi iin ra cuví ndusu yuhu Nyoo? Juvín. Tyin ra ícan cahnu ca cuví ra tan ñavin ca tandihi ra cuví ndusu yuhu Nyoo. ¹⁰ Juvín ñi tuhun ra Juan cuví tsa nyaá nuu tutu Nyoo. Tan catyí tsi tyehen: Yuhu cua jacuhun yu iin ra cahan tuhun yu tsa ndi cumañi ca cahun yu.

Tyin natyiso vaha ra ityi nu cua cahun un.

¹¹ Tsa nditsa catyí yu tsihin ndo, tyin tsiiti tsa tandihi nyívi tsa tsiocog tan nyívi iyó vityin, tan ña cahnu ca cuví ñi tan ñavin ca ra Juan, ra jacoondutyá tsi nyívi. Maa tyin ra tsa ndaca ñaha Nyoo aña, vasu ra lihli ñi cuví ra, cahnu ca ra cuví ra tan ñavin ca ra Juan.

¹² Nda cuanda quívi tsa tsaá ra Juan tan nda vityin, nyívi ñihi iñi, nducú xaan ñi cuhva ñihi ñi tsa cundaca ñaha Nyoo tsi ñi. ¹³ Ra Moisés cahan ra tuhun nácaa cua cundaca ñaha Nyoo tsi nyívi, tan tacan tucu tandihi ra cuví ndusu yuhu Nyoo. Tacan tan quitsí ra Juan jacotó ra tsi nyívi tyin tsa tsaá quívi tsa cua cundaca ñaha Nyoo. ¹⁴ Tan ra Juan cuví ra Elías ra tsa nyaá tsa cua quitsí, tun nyooho tan cuñí ndo tsinu iñi ndo tsa caahán yu. ¹⁵ Nyooho tsa iyó soho, tyaa soho ndo tsa caahán yu.

¹⁶ ¿Náa tsihin jandu inducu yu tsi nyooho, nyívi tsa iyó quívi ihya? Tumaa ra nyihi cuví nyooho. Tyin ra nyihi jasiquí nuyahvi. Caná tsaahahan ra naha tan catyí ra naha: ¹⁷ “Tiví ndi tiyoo tan ña tsañí ndo yaa. Tan tsitá ndi yaa cuiihya, tan ña tsacu ndo”, catyí ra nyihi. [Tan tacan cuví nyooho tyin ndi intuhun cuhva ña taahán iñi ndo.] ¹⁸ Tyin ra Juan, ra jacoondutyá, quitsí ra tan ña tsatsí vaha ra, tan ña tsihi ra vinu. Tan nyooho catyí ndo tyin tatyí ña vaha yihí tsi

ra. ¹⁹ Yahá can tan tsaá tucu yuhu Rayí tsa queé nda gloria. Tan tsatsí yu tan tsihi yu. Tan catyí ndo tyin tsatsí xaan yu tan tsihi xaan yu vinu, catyí ndo. Tan ña taahán iñi ndo tsa cutahán yu tsihin ra iyó cuatyí naha ra tan tsihin ra tavá xuhun cuenda ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsaahá ra tsa tsiñi tuñi ra tsi nyívi naquihín tuhun caahán yu tan tuhun cahan ra Juan, tan ñi ícan cua janaha ñi tsi ndo tyin vaha tsa tsiñi tuñi Nyoo —catyí ra Jesús.

Nyívi ña cuñi naquihin cuenda tuhun caahán ra Jesús cua nyehé ñi tundoho (Lc. 10.13-15)

²⁰ Tacan tan quitsahá caahán ra Jesús tsihin nyívi tandihi ñuu nu javahá ra cuaha tsa iyo, tyin ña nasamá ñi cuhva iyó ñi, tan catyí ra:

²¹ —¡Ndahvi nyooho, nyívi ñuu Corazin! ¡Ndahvi nyooho nyívi ñuu Betsaida! Tyin nyehé ndo tsa iyo tsa javahá yu tan ña nasamá ndo cuhva iyó ndo. Tan ñuu Tiro tan ñuu Sidón nduve tsa nyehé ñi. Maa tyin tun tsatyin nyehé ñi tsa nyehé nyooho vityin, numi xaan cua cunditsi ñi jahma tucuiihya iñi tan cua coso ñi nyaá nuu ñi: tyin ndu uvi iñi ñi cuatyí ñi. ²² Maa tyin catyí yu tsihin ndo tyin ñihi ca cua tatsi tuñi Nyoo tsi ndo tan ñavin ca ñi ñuu Tiro tan ñi ñuu Sidón. ²³ Tan nyooho nyívi ñuu Capernaum, cuñí maa ndo tyin cundaa ndo nda gloria, maa tyin cua nuu ndo nda cuanda nu yucú nyívi tsihi anyaya. Tun tsatyin tsiocog tsa iyo nyehé ñi ñuu Sodoma tumaa tsa nyehé ndo ihya, ñuu can ña tsinaá tsi tan iyó tsi nda cuanda vityin. ²⁴ Maa tyin catyí yu tsihin ndo tyin quívi cua tatsi tuñi Nyoo tsi nyívi, ñihi ca cua tatsi tuñi ra tsi nyooho tan ñavin ca nyívi ñuu Sodoma.

“Cuhva ndo tsi ndo tsi yu, tan cuhva yu tsa quitatu ndo”, catyí ra Jesucristo (Lc. 10.21-22)

²⁵ Quívi can catyí ra Jesús tsihin Nyoo:

—Jacahnú yu tsi un, Jutu yu, ra ndacá ñaha gloria tan ñuhu ñayívi. Tyin tyihí xeehe un tuhun ihya nuu ra tsiótó xaan tan ra nyityi xaan naha ra. Tan jandunditsí un tuhun ihya nuu ra nyihi. ²⁶ Tacan Tyaa, tyin tacan cuñí maa un —catyí ra Jesús.

²⁷ Tacan tan catyí tucu ra tsihin nyívi:

—Jutu yu nacuhvá cuenda ra tandihi tsa iyó tsi ra tsi yu. Yofí maa nacotó tsi yu tsa nditsa, intuhun ñi maa Jutu yu nacotó vaha tsi yu. Tan Jutu yu yofí nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsiótó yu tsi ra. Tan nyívi tsa cuñí yu tsa nacotó tsi Jutu yu, cua janaha yu tsi ra tsi ñi. ²⁸ Tandihí nyooho tsa tatú tyin jahá tyiñu ndo, tan tsihin tundoho tsa iyó ndo, ñaha ndo nu nyaá yu, tan yuhu cua cuhva yu tsa

quitatu ndo. ²⁹ Cuhva ndo tsa cundaca ñaha yu tsi ndo tan cutuhva ndo cuhva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatu añima ndo. ³⁰ Ña yii tsa cuhva ndo tsi ndo tsa cundaca ñaha yu. Tyin tsa tsahá yu cuiiso ndo, yama tsi.

12

Quiví quitatú nyívi cuví tsi tan ra tsicá tsihin ra Jesús tuhún ra naha yoco itya trigu
(Mr. 2.23-28; Lc. 6.1-5)

¹ Iin quívi quitatú nyívi, yaha ra Jesús mahñu nu iyó tsa tatsj nyívi. Tan tsaq soto tsi ra tsicá tsihin ra. Tan quitsaha tuhún ra naha yoco trigu can tan tsatsí ra naha. ² Tan tsa nyehe ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyiñu tsa ña taahán tsi javahá yo quívi quitatú yo —catyí ra naha tsihin ra.

³ Tan ra Jesús catyí ra tsihin ra naha:

—¿A ñaha ca cahvi ndo tsa javahá ra David tsihin ra cutahan tsihin ra quívi tsa tsaq soto tsi ra naha? ⁴ Quihví ra tsitsi vehe Nyoo, quihñ ra paan ii, tan tsatsj ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuví jutu naha ra taahán tsi catsi paan can. ⁵ ¿O ñaha ca cahvi ndo nu ley nu catyí tsi tyin ra cuví jutu naha ra, jahá tyiñu ra naha tsitsi vehe ñuhu quívi quitatú yo? Tan ñavin cuatyí cuví can. ⁶ Tan catyí yu tsihin ndo, tyin ihya nyaá ra tsa cahnu ca cuví tan ñavin ca vehe ñuhu. ⁷ Nyooho, ñaha ca cutuñi iñi ndo nu catyí tsi nu tuhun Nyoo tyehen: “Tsa cuñi ca yu javaha ndo cuví tsa cundaahvi iñi ndo nyehe ndo tsi nyívi tahan ndo, tan ñavin ca tsa cahñi ndo quiti tan jamañi ndo nuu yu.” Tun tsatyin cutuñi iñi ndo tuhun ihya, ña cua tyaa ndo cuatyí tsata nyívi tsa nduve cuatyí. ⁸ Yuhu, Rayii tsa quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quívi quitatú yo —catyí ra Jesús.

Nu janduvaha ra Jesús tsi iin ra na ityí ndaha

(Mr. 3.1-6; Lc. 6.6-11)

⁹ Tacan tan quita ra Jesús ican, tan cuahán ra vehe ñuhu. ¹⁰ Tan ican nyíi iin ra tsa na ityí ndaha. Tan yucú tucu juhva ra nducú cuhva nácaa tan tyaa ra naha cuatyí tsi ra Jesús. Yacan cuenda tsicá tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nyívi cuhví quívi quitatú yo? —catyí ra naha tsihin ra Jesús.

¹¹ Tan nacahan ra Jesús tan catyí ra:

—¿Ndaa nyooho, tatun canacava iin mbee jana ndo tsitsi iin yavi quívi quitatú yo, a ña cua cuhun ndo tan tava ndo tsi ti? ¹² Tan ¿a

ñi nyaá yahvi ca iin nyívi tan ñavin ca mbee? Yacan cuenda taahán tsi javaha yo tsa vaha quívi quitatú yo —catyí ra.

¹³ Tacan tan catyí ra Jesús tsihin ra tsa na ityí ndaha can:

—Janacaa ndaha un —catyí ra.

Tan cuhva tsa janacaq ra ndaha ra, iin yaha ñi nduvaha tsi tumaa inga tsiyo. ¹⁴ Tacan tan quita ra fariseo naha ra cua natuhun tahan ra naha nácaa cua cahñi ra naha tsi ra Jesús.

Tsa cahan ra Isaías, ra cuví ndusu yuhu Nyoo, tsa cuenda ra Jesús tahañ tsanaha

¹⁵ Tsa tsito ra Jesús tyin nducú ra naha tsi ra, quita ra ican. Tan cuaha nyívi tsinyicun tsi ra. Tan maa ra janduvaha ra tsi tandihi ñi cuhví. ¹⁶ Tan catyí ra tsihin ñi tyin na ña catyí tuhun ñi yóo ra cuví ra. ¹⁷ Tacan cuví tyin tacan cahan ra Isaías, ra cuví ndusu yuhu Nyoo tahañ tsanaha. Tan tyehen tyaa ra tuhun Nyoo:

¹⁸ Ra ihya cuví musu yu, ra tsa nacatsj vaha yu.

Cuñi xaan yu tsi ra, tan sii xaan cuñi yu tsihin ra.

Cua cuhva yu Tatyí li yu tsi ra.

Tan cua jacoto ra tsi nyívi tsa ñavin nyívi Israel cuví, nácaa cua janduvaha yu tsi ñi nuu yu.

¹⁹ Tan ña cua cahan yuhu ra tan ndi ña cua cana tsaa ra, tan ña cua cahan ñihi ra ityí cahnu.

²⁰ Tan ndi intuhun ndoo yacua, tan ña cua cahnu ndihi ra.

Tan ndi ña cua ndahva ndihi ra tiñuhu lihli nu caná luxu yuhma.

Nda cuanda coto tandihi nyívi tyin maa ra cuví ra ndacá ñaha tsi ñi.

²¹ Tan tandihi nyívi, tan cua cuita iñi ñi tsi ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo
(Mr. 3.20-30; Lc. 11.14-23; 12.10)

²² Tacan tan tsindaca nyívi tsi iin ra yihí tatyí ña vaha nu nyii ra Jesús, cuaa ra tan ñihi ra. Tan ra Jesús janduvaha ra tsi ra. Tacan tan nacahan ra, tan nanyehe ra. ²³ Iyo xaan cuñi tandihi nyívi, tan catyí ñi:

—¿A ñavin ra ihya cuví tata ra rey David? —catyí ñi.

²⁴ Tan cuhva tsa tsiñi ra fariseo naha ra tsa caahán ñi, catyí ra naha:

—Tsihin tunyee iñi nu Beelzebú, nu cuví ityí nuu tsihin nu ña vaha nahnu, tavá ra ihya tatyí ña vaha —catyí ra naha.

²⁵ Maa tyin ra Jesús tsitó ra tsa tsicá iñi ra naha, yacan cuenda catyí ra tsihin ra naha:

—Tatun ra ndacá ñaha naha ra tan cua natahvi ra naha, tan cua cañi tahan ra naha, tacan tan cundihi tyiñu tsa ndacá ñaha ra naha. Tan tatun iin ñuu o tandihi nyívi iin vehe tan cusin ñi, tacan tan cua tiví nu yucú

ñi. ²⁶ Tan tacan tucu tatun nu ña vaha tan tava nu juvin ñi tahan maa nu, cuñi tsi catyi tyin ña iin ñi cuví nahnu, tan cundihi tunyee iñi tsa iyó tsi nahnu. ²⁷ Tan Nyooho catyi ndo tyin tsihin tunyee iñi nu Beelzebú tavá yu tsi nu tatyí ña vaha nahnu. Tun tsatýin tavá yu tsi nahnu tumaa cuhva catyí ndo, yóo tsahá tunyee iñi tsi ra nyicun tsi ndo tan tavá ra naha tsi nahnu. Maa ra naha cua cahan tsa nditsa tsihin ndo, tyin nyooho soho xaan tsicá iñi ndo. ²⁸ Yacan cuenda catyí yu tsihin ndo, tyin yuhu tavá yu tatyí ña vaha tsihin tunyee iñi Tatyí li Nyoo. Tan cuñi tsi catyi yacan tyin nditsa tyin tsa tsaq cuhva ndacá ñaha Nyoo nu yucú ndo.

²⁹ Tan *zyóo* cuví quihvi tsitsi vehe iin ra xaan, tan quihin nyaa ra ndaha tyiñu ra? Yoñi. Maa tyin tatun cuhñi jihna ra tsi ra can, tacan tan cuví quihin nyaa ra tandihi tsa iyó tsi ra.

³⁰ Nyivi tsa ña nyaá tumañi iñi tsihin yu, ñi xaan iñi tsi yu cuví ñi. Ñi tsa ña jatynyee tsi yu tsa caahán yu tuhun Nyoo tsihin nyivi, cuñi tsi catyi tyin ña tsahá ñi tsa coto nyivi tuhun caahán yu.

³¹ Yacan cuenda catyi yu tsihin ndo tyin Nyoo jahá ra tucahnu iñi cuatyí nyivi, tan tsihin náa tsa ña vaha caahán ñi, maa tyin tatun cua cahan ñi ndavaha ñi siqui Tatyí li Nyoo, yacan nditsa, ña cua jaha Nyoo tucahnu iñi tsi ñi. ³² Tan yóo nyivi tsa caahán tsa ndavaha ñi siqui yuhu Rayii tsa quee nda gloria, Nyoo cua jaha ra tucahnu iñi tsi ñi tsa cuenda can. Maa tyin nyivi tsa caahán tsa ndavaha ñi siqui Tatyí li Nyoo, ña cua coo tucahnu iñi tsi ñi tsa cuenda cuatyí can, ndi ñuu ñayivi ihya, tan ndi inga ñuu ñayivi tsa cua coo.

Tsihin tsa javahá nyivi tan nacoto yo tsi ñi tatun vaha ñi a ña vaha ñi
(Lc. 6.43-45)

³³ Iin yutun vaha tsahá tun tsiti vaha. Tan iin yutun ña vaha tsahá tun tsiti ña vaha. Nacotó yo tatun yutun vaha cuví tun tsa cuenda tsiti tun. ³⁴ Nyooho, nyivi caquiñi tumaa tata coo xaan cuví ndo! ¿Nacaa cuví quitá tsa vaha yuhu ndo, tan nyivi caquiñi cuví ndo? Tyin tsa quitá tsitsi añima yo, yacan caahán yo. ³⁵ Nyivi vaha, vaha caahán ñi tyin yihí tsa vaha añima ñi. Tan nyivi caquiñi, tsa caquiñi caahán ñi, tyin tsa caquiñi yihí tsitsi añima ñi. ³⁶ Tan yuhu catyi yu tsihin ndo tyin quivi cua tatsi tuñi Nyoo tsi tandihi nyivi, cua cuhva cuenda ñi tandihi tuhun tsa ña vaha cahan ñi. ³⁷ Tyin tsa cuenda tsa caahán ndo, tan cua catyi Nyoo tun vaha ndo o ña vaha ndo.

Nyivi ña vaha, tsa iyo ñi cuñi ñi nyehe ñi
(Mr. 8.12; Lc. 11.29-32)

³⁸ Tacan tan juhva ra fariseo tan ra maestro cuenda ley vehe ñuhu catyí ra naha tsihin ra Jesús:

—Maestro, cuñi ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

³⁹ Tan nacahan ra Jesús tan catyí ra:

—Nyivi ña vaha tan nyivi tsa nyicún inga nyoo cuñi ñi nyehe ñi tsa iyo. Maa tyin ña cua nyehe ñi tsa iyo, intuhun ñi tsa cua nyehe ñi, tumaa tsa javahá Nyoo tsihin ra Jonás ra cuví ndusu yuhu ra tahañ tsanaha.

⁴⁰ Tyin tumaa tsinyii ra Jonás tsitsi tyaca cahnu uñi quivi tan uñi tsacuaa, tacan cua cunyii yuhu Rayii tsa quee nda gloria tsitsi ñuhu uñi quivi tan uñi tsacuaa. ⁴¹ Tan quivi cua tatsi tuñi Nyoo tsi tandihi nyivi, cua nduvita nyivi tsicoq ñuu Nínive tahañ tsanaha tan cua catyí ñi na tatsi tuñi Nyoo tsi nyooho nyivi tsa iyó vityin. Tan cua catyí ñi tyin cua cunaa ndo, tyin maa ñi tsa cuví ñi ñuu Nínive, nasamā ñi cuhva iyó ñi quivi cahan ra Jonás tuhun Nyoo tsihin ñi. Tan ihya nyii ra cahnu ca cuví tan ñavin ca ra Jonás. [Tan ña cuñi ndo tyaa soho ndo tsa caahán yu.] ⁴² Tan tacan tucu ñaha tsa tsindacá ñaha ityi Sur, cua nduvita ña quivi cua cutuñi nyivi tan cua catyí ña tyin cua cunaa nyooho nyivi iyó vityin, tyin maa ña, vasu cañi ñuu ña maa tyin quitsj ña, quitsj tyaa soho ña tsa nyityi tsa cahan ra Salomón. Tan vityin cahnu ca ra caahán tsihin ndo tan ñavin ca ra Salomón.

Nu caahán ra Jesús tsihin yo nácaa quihvi nu tatyí ña vaha añima yo inga tsaha tatun naa iñi yo tsi Nyoo
(Lc. 11.24-26)

⁴³ Tatun iin nu tatyí ña vaha quitá nu tsitsi añima iin nyivi, tsicá nuu nu ñuhu ityi, nanducú nu iin nu quitatu nu. Tan ña nañihi maa nu nu quitatu nu. Tacan tan tsicá iñi nu: ⁴⁴ “Cunuhu yu nda vehe yu nu quee yu.” Tacan tan cuahán nyico nu añima nu quee nu. Tan nyehe nu tyin ndii xaan, tan yoñi iyó, tan sii xaan caá. ⁴⁵ Tacan tan cua quihin nu utsa taahan ca tatyí ña vaha, tsa yaha ca caquiñi tan ñavin ca maa nu. Tacan tan iin caa ñi quihvi tandihi tatyí ña vaha can añima ñi can. Yacan cuenda, yaha ca ndasi cua coo ñi tan ñavin ca tsa ndi cumañi ca quita nu. Tan tacan cua cuvi tsi nyivi quiiñi iyó —catyí ra Jesús.

Nu tsaha cuenda ra Jesús tyin tumaa cuví yañi ra, tan tumaa cuví sihi ra, cuví tsi nyivi tsa javahá cuhva cuñi Nyoo
(Mr. 3.31-35; Lc. 8.19-21)

⁴⁶ Ndi caahán ca ra Jesús tsihin nyivi, tan tsaq sihi ra tan yañi ra, tan nyecú ñi ityi tsata vehe, tan cuñi ñi cahan ñi tsihin ra. ⁴⁷ Tacan tan jacotoq iin ra tsi ra Jesús, tan catyí ra:

—Sihí un tsihin ra yañi un naha ra nyecú ñi tsata vehe. Tan cuñí ñi cahan ñi tsihin un.

⁴⁸Tan nacahan ra Jesús tan catyí ra tsihin ra can:

—¿Yóo cuví sihi yu tan yóo cuví yañi yu? —catyí ra.

⁴⁹Tacan tan janaha ndaha ra nu nyecú ra tsicá tsihin ra, tan catyí ra:

—Ra ihya naha ra cuví sihi yu tan yañi yu.
⁵⁰Tyin tandihí nyivi tsa javahá cuhva cuñí Jutu yu, ra nyaá gloria, juvin ñi can cuví yañi yu, tan cuhva yu, tan sihi yu —catyí ra Jesús.

13

Nu caahán ra Jesús tyin tumaa iin ra tatsí, tacan cuví ra caahán tuhun Nyoo

(Mr. 4.1-9; Lc. 8.4-8)

¹Quivi can quita ra Jesús vehe nu nyii ra tan cuahán ra, tsicunyaá ra yuhu miñi. ²Tan cuaha xaan nyivi ndu iin nu nyaá ra, yacan cuenda quihvi ra tsitsi iin yutun ndoo tan tsinyaá ra. Tan tandihí nyivi ndoo ñi yuhu nduya. ³Tacan tan quitsahá jacuahá ra tsi ñi tan caahán ra tsihin ñi tsihin iin cuhva, tan catyí ra:

—Quita iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra. ⁴Tan cuhva tsa quití ra tsiti can, cucoyo juhva tsi yuhu ityi. Tan quitsí saa tan tsatsí ti tsiti can. ⁵Tan juhva ca tsiti can cucoyo tyañu yuu nu ña cuaha nyahyu yihí. Tan ican caná tsiti can tsa numi ñi tyin ña cuaha nyahyu yihí tyañu yuu can. ⁶Maa tyin cuhva tsa caná ñicanyii, numi ñi na ityi tsi, tyin ña cunu yihí yoho tsaha tsi. ⁷Juhva ca tsiti can cucoyo tyañu iñu. Tan quivi caná trigu can tsahnú tsi iin caa ñi tsihin iñu can, tan iñu can numi xaan ca tsahnú tsi tan tsahñi tsi trigu can. ⁸Maa tyin juhva ca tsiti can cucoyo nu ñuhu vaha. Tan quivi tsahnú tsi, vaha xaan tsahá tsi tsiti. Tyin tsa iin tsiti can, cientu tsiti quita tsihin tsi. Tan inga tsiti can, uñi xico, tan inga tsi oco utsi tsiti tsahá tsi. ⁹¡Tatun nyaá soho ndo, tyaa soho ndo tuhun caahán yu! —catyí ra Jesús.

Nu catyí tuhun ra Jesús nacuenda jacuahá ra tsi nyivi tan ña catyí tuhun catsi ra tsihin ñi

(Mr. 4.10-12; Lc. 8.9-10)

¹⁰Tacan tan natuhvá ra tsicá tsihin ra Jesús, tan tsicá tuhun ra naha tsi ra, tan catyí ra naha:

—¿Nacuenda tyin tsihin cuhva ñi jacuahá un tsi nyivi, tan ña catyí tuhun catsi un tsihin ñi? —catyí ra naha.

¹¹Tan nacahan ra Jesús tan catyí ra:

—Tsi nyoocho jacotó Nyoo tuhun xeehe, cuhva ndacá ñaha ra, maa tyin nyivi ihya ña cuví coto ñi tsa tsahá Nyoo tsi nyoocho.
¹²Tyin tandihí nyivi tsa cutuñí iñi tsa caahán

yu tan javahá ñi, cuaha ca cua cutuñi iñi ñi. Tan nyivi tsa ña cutuñí iñi, tan ña cuñí ñi javaha ñi, cua quihin nyaa ndihí yu tsa luxu ñi tsa tsitó ñi. ¹³Yacan cuenda caahán yu tsihin ñi tsihin cuhva, tyin nyehé ñi tan cuví tsi tumaa tsa ña nyehé ñi. Tsiñí ñi maa tyin ña cutuñí iñi ñi, tumaa tsa ña tsiñí ñi cuví can. ¹⁴Tyin tacan tan cundaa tsa cahan ra Isaías ra cuví ndusu yuhu Nyoo tahán tsanaha, tan catyí ra:

Tsa nditsa tyin nyoocho tsiñí ndo tuhun yu, maa tyin ña cutuñí iñi ndo.

Cua nyehé ndo tsa javahá yu, tan ña cua cutuñí iñi ndo.

¹⁵Tyin tsa ndundava xaan añima nyivi ihya, tan ña catsi vaha tsiñí ñi.

tan ndasi tinuu ñi,

na ña cua nyehé ñi tsihin tinuu ñi,

tan ña cua cuñí ñi tsihin soho ñi.

Tan ndi ña cua cutuñí iñi ñi tsihin añima ñi.

Tan ndi ña cua nanducu ñi tsi yu, na janduvaha yu tsi ñi.

¹⁶Maa tyin sii xaan cuví tsi nyoocho, tyin nyehé ndo tsihin tinuu ndo, tan tsiñí ndo tsihin soho ndo. ¹⁷Tsa nditsa catyí yu tsihin ndo, tyin cuaha xaan ra cuví ndusu yuhu Nyoo tan cuaha xaan nyivi vaha, cuñí ñi nyehé ñi tsa nyehé nyoocho tsa javahá yu, maa tyin ña nyehé ñi. Tan cuñí ñi tyaa soho ñi tandihí tsa tsiñí nyoocho vityin, maa tyin ña tsiñí ñi.

Nu catyí tuhun ra Jesús tsa cuñí tsi catyí cuhva tsa cahan ra tsihin nyivi tsa cuenda ra tatsi can

(Mr. 4.13-20; Lc. 8.11-15)

¹⁸Tyaa soho ndo tsa cuñí tsi catyí cuhva tsa cahan yu tsa cuenda ra tsa tatsi tsiti trigu can: ¹⁹Nyivi tsa tsiñí tuhun nácaa cuñí Nyoo cundaca ñaha ra añima ñi, tan ña cutuñí iñi ñi, cuví ñi tumaa nu cucoyo tsiti trigu yuhu ityi. Tan quitsí nu ña vaha tan quihin nyaa nu tuhun Nyoo tsa iyó añima ñi. ²⁰Tan tumaa nu cucoyo tsiti can tyañu yuu, juvin ñi nyivi tsa tsiñí tuhun Nyoo cuví can. Tan sii xaan naquihin vaha ñi itsi juhva ñi quivi.

²¹Tyin nduve ñuhu cunu ican, yacan cuenda caná tsiti can, maa tyin ña cuví cuhun yoho tsi. Tan tacan cuví nyivi can. Juhva ñi quivi tsinú iñi ñi. Maa tyin quivi can quitsahá nyehé ñi tundoho, tan caahán ndasi nyivi tsata ñi tsa cuenda tuhun Nyoo, tacan tan jandihí ñi tsa tsinú iñi ñi. ²²Tan tumaa nu cucoyo tsiti can tsitsi iñu, juvin ñi nyivi tsa tsiñí tuhun Nyoo cuví can. Tsiñí ñi, maa tyin ña cuñí ñi javaha ñi tumaa tsiñí ñi. Tyin tyaa xaan ca iñi ñi tundoho ñayivi tan ñavin ca tuhun Nyoo. Tan nyiyo ca iñi ñi tsa cuca. Tan tandihí tuhun can jatyañú tsi tsi ñi, tan cuví ñi tumaa yutun tsa ña tsahá tsiti. ²³Tan ñuhu vaha nu cucoyo tsiti can, yacan cuví inga nyivi tsa tsiñí tuhun Nyoo, tan cutuñí

iñi ñi, tan javahá ñi tandihi tuhun caahán ra. Yihí ñi cuví ñi tumaa tsiti tsa cana tan tsaha tsi iin cientu tsiti, tan inga ñi cuví ñi tumaa tsiti tsa tsahá uñi xico, o tumaa tsiti tsa tsahá oco utsi tsiti intuhun intuhun.

Nu caahán ra Jesús nácaa cuahán tuhun trigu tan cuhu ña vaha

²⁴ Tan cahan tucu ra Jesús inga cuhva ihya tsihin ñi; tan catyí ra:

—Tsa ndacá ñaha Nyoo tsi nyívi cuví tsi tumaa iin ra tsa tatsí tsiti trigu nu ñuhu ra. ²⁵ Tan cuhva tsa quixí tandihi ra jahá tyiñu naha ra, quihví iin ra xaan iñi tsi ra jatsii can, tan quiti ra tsiti cuhu ña vaha, tan cuahán ra. ²⁶ Tan quivi cana tsiti trigu can, tan cana yoco tsi, cana ndihi tucu cuhu ña vaha can. ²⁷ Tacan tan ra cuví musu can naha ra, tsahan ra naha tsicatyi tuhun ra naha tsihin tsitoho ra naha: “Tata, maa ñi tsiti trigu tatsí ndi, ¿tan nacuenda tyin cana cuhu ña vaha can?” catyí ra naha. ²⁸ Tan nacahan ra can tan catyí ra: “Iyó iin ra xaan iñi tsi yu javaha tsehe, tun cuví.” Tacan tan musu can, catyí ra naha tsihin tsitoho ra: “¿A cuñi un tyin cuhun ndi tan tuhun ndi cuhu ña vaha can?” ²⁹ Tan tsitoho ra naha catyí ra: “Na tñun ndo, tyin coto tuhun ndi ndo trigu can. ³⁰ Jaña ndo, na cuahnu maa tsi iin caa ñi tsihin trigu can, tatun tsa tsitsa tsi, tacan tan cua tava tyiñu yu na tuhun jihna ra naha cuhu ña vaha can, tan cuhñi ra naha cuenda jucun, tan cahmi ra naha. Tan yaha can tan natyihí vaha ra naha tsa vaha can tsitsi yaca yu.”

Nu caahán ra Jesús tyin tumaa tsiti mostaza cuví tsa ndacá ñaha Nyoo tsi yo

(Mr. 4.30-32; Lc. 13.18-19)

³¹ Tacan tan cahan ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyívi cuví tsi tumaa iin tsiti mostaza tsa tatsí iin ra nu ñuhu ra. ³² Tyin tsiti can lihli ñi tsi tan ñavin ca tandihi ca tsiti. Maa tyin quivi tsahnu tsi cuví tsi iin yutun. Tan quitsj saa, tan javahá ti taca ti soco tun —catyí ra Jesús.

Nu caahán ra Jesús tyin tumaa yutsan iya tacan cuví tsa ndacá ñaha Nyoo tsi yo

(Lc. 13.20-21)

³³ Tan cahan ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyívi cuví tsi tumaa yutsan iya tsa nasaca nuu iin ñaha tsihin uñi jahma yutyi paan. Tyin tumaa ndaá tandihi yutsan paan can jahá tsa luxu ñi yutsan iya can, tacan cuví tsa ndacá ñaha Nyoo tsi yo —catyí ra.

Nu catyí tuhun ra Jesús nacuenda jacuahá ra tsi nyívi tsihin cuhva

(Mr. 4.33-34)

³⁴ Tandihí tuhun can cahan ra Jesús tsihin nyívi tsihin cuhva. Tan tandihí tsa cahan ra tsihin ñi ña cahan catsi maa ra, maa ñi maa tsihin cuhva cahan ra. ³⁵ Tacan cuví tyin tacan tan cundaa tsa cahan Jutu Mañi yo tsihin yuhu ra cuví ndusu yuhu ra tahan tsanaha tan tyaq ra tyeheh:

Tsihin cuhva cua cahan yu tsihin nyívi.

Cua cahan yu tsihin ñi tuhun tsa yihí xeehe nda cuenda tsa javaha Nyoo ñuhu ñayivi.

Nu caahán ra Jesús náa cuñi tsi catyí cuhu ña vaha tsa caná tsihin tsiti trigu can

³⁶ Tacan tan jacunuhu ra Jesús tsi nyívi, tan quihví ra tsitsi vehe nu nyii ra. Tan natuhva ra tsicá tsihin ra nu nyaá ra, tan catyí ra naha tsihin ra:

—Catyí tuhun tsihin ndi náa cuñi tsi catyí tsa cahan un tsihin nyívi tsa cuenda cuhu ña vaha tan trigu can.

³⁷ Tacan tan quitsaha catyí ra Jesús tsihin ra naha:

—Ra tsa tatsí tsiti trigu can cuví yuhu Rayii tsa queq nda gloria. ³⁸ Tan ñuhu can cuví nyívi iyó nu ñuhu ñayivi. Tan tsiti trigu can cuví nyívi tsa ndacá ñaha Nyoo. Tan cuhu ña vaha can cuví nyívi tsa nyicún tsi nu ña vaha. ³⁹ Tan nu tsa tatsí cuhu ña vaha can, nu ican cuví nu ña vaha juvin ñi nu tsa xaan iñi tsi yu. Tan quivi cua naquihin yu tyiñu jahá yu, yacan cuñi tsi catyí quivi cua cundihi ñuhu ñayivi. Tan ra tsa cua naquihin tsiti can, cuví ra ángel naha ra. ⁴⁰ Tumaa jataca ra naha cuhu ña vaha can tyin cayu tsi, tacan cua cuví quivi cua cundihi ñayivi. ⁴¹ Yuhu Rayii tsa queq nda gloria can jaquitsi yu ángel tan jataca ra naha tsi nyívi natyuhu tsi inga nyívi na javaha ñi tsa ña vaha tan inga nyívi tsa iyó cuatyí. ⁴² Tan cua tyihí ra naha tsi ñi tsitsi ono nu cayú ñuhu. Tan ican cua vacu tsa ñi tan cahyu ña cua cuví nuhu ñi. ⁴³ Nyooho tan nyívi javahá cuhva cuñi Nyoo cua quituvi ndo nuu Jutu yo. Tan cua cuví ndo tumaa tsa nditsin ñuhu ñicanyii, nu ndacá ñaha Jutu yo. Tatun iyó soho ndo, tyaq soho ndo tsa caahán yu.

Xuhun cuaan tsa yihí xeehe

⁴⁴ Tsa ndacá ñaha Nyoo tsi nyívi cuví tsi tumaa xuhun cuaan tsa yihí xeehe tsitsi ñuhu. Tan iin ra nañihí ra xuhun cuaan can, tan tyihí xeehe nyico ra inga tsaha, tan sii xaan cuñi ra cuanuhu ra tan xico ra tandihí tsa iyó tsi ra. Tacan tan jata ra ñuhu nu yihí xeehe xuhun cuaan can.

Iin cuhva tsa cahan ra Jesús cuenda iin yuu xiñu tsa yahvi xaan nyaá

⁴⁵ Tan tsa ndacá ñaha Nyoo tsi nyívi, cuví tucu tsi tumaa iin ra najatá yuu xiñu tan naxico nyico ra, ⁴⁶ tan tsa ñihí ra iin tsa yahví

xaan nyaá, xicó ra tandihí maa tsa cumí ra, tan jatá ra yuu xiñu vaha can.

Nu caahán ra Jesús iin cuhva cuenda traya

⁴⁷ Tan juvin ñi cuví tucu tsa ndacá ñaha Nyoo tsi nyívi tumaa iin traya tsa cañí ra naha nu ndutya ñuhu, tan ñihí ra naha tandihí nuu tyaca. ⁴⁸ Tan tsa tsitü traya can tsihin tyaca, tavá ra naha traya can nu ityi. Tan ican nacatsí ra naha tsi ti, naquihín vaha ra naha quiti vaha tsitsi iin tyica, tan javitá ra naha quiti ña vaha can. ⁴⁹ Tan tacan cua cuví quívi naa ñayívi, cua quitsi ángel, quitsi tava siin ra naha tsi nyívi vaha tan nyívi ña vaha. ⁵⁰ Tan cua tyihí ra naha tsi nyívi ña vaha can anyaya nu cayú ñuhu, nu cua vacu tsaá ñi tan cahyu ña cua cuví nuhu ñi.

Nu caahán ra Jesús tyin vaha tuhun tsahnu Nyoo tan tuhun tsaá Nyoo

⁵¹ Tacan tan ra Jesús tsicá tuhun ra tsi ra tsicá tsihin ra, tan catyí ra tsihin ra naha:

—¿A cutuñí iñi ndo tandihí tsa cahán yu?

Tan nacahán ra naha tan catyí ra naha:

—Cutuñí iñi ndi, Jutu Mañi yu.

⁵² Tacan tan catyí ra Jesús tsihin ra naha:

—Iin ra cuví maestro cuenda ley tsa tsitó maa ra tuhun tsahnu tan taton cua coto ndihí ra nácaa ndacá ñaha Nyoo tsihin tandihí tuhun tsaá tsa caahán yu, cua cuví ra tumaa iin ra jatsii vehe tan cua jacuaha ra nduvi taahan tuhun vaha can tsi nyívi —catyí ra Jesús.

Nu tsinuhú ra Jesús ñuu Nazaret nu tsahnu ra

(Mr. 6.1-6; Lc. 4.16-30)

⁵³ Tsa ndihí cahán ra Jesús cuhva ihya tan quita ra cuahán ra. ⁵⁴ Tan tsaá nyico ra ñuu ra. Tan quitsahá jacuahá ra tsitsi vehe ñuhu ñuu can. Tan iyo cuñí nyívi tan catyí ñi:

—¿Nu maa tahan cutuhvá ra ihya tsa tsitó xaan ra? ¿Tan nácaa cuví javaha ra tsa iyo? ⁵⁵ Tyin sehe ra tahví yutun can cuví tsi ra. Tan ña María cuví sihi ra. Tan yañi ra cuví tsi ra Jacobo, ra José, ra Simón tan ra Judas. ⁵⁶ Tan cuhva ra iyo tucu ñi ityi nu iyó yo. Tun tacan, ¿nu maa tahan cutuhvá ra tandihí tsa tsitó ra? —catyí ñi.

⁵⁷ Tan yacan cuenda ña cuñí ñi tyaa yahvi ñi tsi ra. Maa tyin ra Jesús catyí ra tsihin ñi:

—Tandihí nyívi tandihí ñi ityi jahá ñi tsa ñayívi tsi ra ndusu yuhu Nyoo, maa tyin nyívi ñuu ra ña tyaá yahvi ñi tsi ra tan ndi nyívi vehe ra —catyí ra Jesús.

⁵⁸ Tan ña cuaha tsa iyo javahá ra ñuu ra tsa cuenda tyin ña tsinú iñi ñi tsi ra.

14

Nu catyí tsi nácaa tsihi ra Juan, ra jacoondutyá tsi nyívi

(Mr. 6.14-29; Lc. 9.7-9)

¹ Quívi can ra Herodes, ra ndacá ñaha nicahnu nu cuví Galilea, ñihí tuhun ra tsa javahá ra Jesús. ² Tan catyí ra tsihin ra yucú tsihin ra:

—Ra ican cuví ra Juan, ra jacoondutyá tsi nyívi, ra tsa tsihi tan vityin nandotó nyico ra. Yacan cuenda iyó tunyee iñi tsi ra tsa javahá ra tsa iyo.

³⁻⁴ Tacan catyí ra tyin juvin ñi maa ra tavá tyiñu tyin tiin ra naha tsi ra Juan. Tan cuhñi ra naha tsi ra tsihin cadena, tan tyihí ra naha tsi ra vehe caa. Tacan javahá ra Herodes tyin xaan cuñí ra tyin catyí ra Juan tyin ña vaha tsa cumí ra tsi ña Herodias tyin ña ican cuví ñasihi ra Felipe, yañi ra.

⁵ Yacan cuenda ra Herodes cuñí ra cahñi ra tsi ra Juan, maa tyin yuuhví ra tsi nyívi, tyin tandihí ñi tsinú iñi ñi tyin ra Juan, ndusu yuhu Nyoo cuví ra. ⁶ Tan iin quívi iyó vico ra Herodes, tan sehe ña Herodias quitsahá tsañí ña yaa nu yucú ñi vico can. Tan tahán xaan iñi ra Herodes. ⁷ Tan catyí ra:

—Naha Nyoo tyin cua cuhva yu náa cua ndacan ñaha tyuvaa ihya tsi yu —catyí ra Herodes.

⁸ Tacan tan natyuhú sihi ña tsi ña, na cahan ña tsihin ra Herodes. Tacan tan catyí ña tyehen tsihin ra:

—Cuhva jiñi ra Juan, ra jacoondutyá tsi nyívi, tsi yu nu iin coho —catyí ña.

⁹ Tsa tsiñi ra rey Herodes tsa cahán ña, nducuihiya cuñí ra. Maa tyin tsa cuenda tsa cahán ra tyin tandihí tsa cua ndacan ña tan cua cuhva ra, yacan cuenda ña cuví jandaví ñaha ra tyin tandihí nyívi yucú vico can tan tsiñi ñi tsa cahán ra. Yacan cuenda tavá tyiñu ra na cuhva ra naha jiñi ra Juan tsi ña nu iin coho. ¹⁰ Tan tavá tyiñu ra na cucahya ra naha jucun ra Juan nu nyíi ra vehe caa. ¹¹ Tacan tan tsindacá ra naha jiñi ra Juan tsi ña, nyíi tsi nu iin coho. Tan tsaahá ra naha tsi ñaha tyuvaa can. Tan maa ña nacuhvá cuenda ña tsi sihi ña.

¹² Tacan tan tsaá ra nyicun tsi ra Juan naha ra tan naquihín ra naha cuñu ñuhu ra, tan tyihí ra naha tsitsi ñuhu. Yahá can tan tsaahán ra naha tsijacotó ra naha tsi ra Jesús.

Nu jacatsí ra Jesús tsi uhun mil rayii

(Mr. 6.30-44; Lc. 9.10-17; Jn. 6.1-14)

¹³ Tsa tsitó ra Jesús tsa tahán ra Juan, quihín ra iin yutun ndoo, tan cuahán in-tuhun ñi maa ra nu taxin caa. Tan tsa tsitó nyívi, quita ñi ñuu ñi, tan cuahán tsihin tsaha ñi nu nyíi ra. ¹⁴ Tsa quita ra Jesús tsitsi yutun ndoo can, tan nyehe ra tyin cuaha xaan nyívi nyicún tsi ra. Tan cundaahví iñi

ra nyehe ra tsi ñi. Tan janduvaha ra tsi nyivi cuuhvi tsa tsaq tsihin ñi. ¹⁵ Tan tsa cuñi cuaq, tacan tan natuhva ra tsicá tsihin ra Jesús nu nyaá ra, tan catyí ra naha tsihin ra:

—Tsa cueñi xaan, tan yoñi nyivi iyó yatyin ñi ihya. Yacan cuenda vaha ca çahan un tsihin nyivi ihya na cunuhu ñi nda ñuu cujata ñi tsa catsi ñi —catyí ra naha tsihin ra Jesús.

¹⁶ Tan ra Jesús catyí ra:

—Nduve náa nducu ñi cuhun ñi. Cuhva nyooho tsa catsi ñi.

¹⁷ Tan nacahan ra naha tan catyí ra naha:

—Nduve maa náa iyó ihya. Uhun taahan ñi paan, tan uvi taahan ñi tyaca iyó.

¹⁸ Tan catyí ra Jesús:

—Ndaca ndo can tsi yu.

¹⁹ Tacan tan catyí ra tsihin nyivi tyin na cunyecu ñi nu cuhu can. Yaha tsa tsinyecu ñi tan quihñ ra uhun taahan paan can, tan nduvi tyaca can. Tan nanyehé ndaa ra ityi siqui, tan nacuhva ra tyahvi nyoo tsi Nyoo tan tsahnú cuatyí ra paan can. Tan tsaha ra tsi ra tsicá tsihin ra, na tsatsa ra naha tsi nyivi can. ²⁰ Tan tandihi nyivi tsatsj ñi tan ndaha vaha iñi ñi. Yaha can tan ndoo ca tsa ñahñu, tan jacutu ra naha utsi uvi tyica tsihin tsa ñahñu ican. ²¹ Tan tsa tandihi ñi tsa tsatsj can, quitá maa tumaa uhun mil tsa maa ñi maa rayii. Tan sñn maa ñiñaha tan tsa nyihi.

Nu tsicá ra Jesús nu ndutya

(Mr. 6.45-52; Jn. 6.16-21)

²² Tsa yaha can tan catyí ra Jesús tsihin ra tsicá tsihin ra, na quihvi ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tsihin nyivi tyin na cuhun ñi. ²³ Tsa yaha tsa jacunuhu ra tsi ñi, tan ndaa ra yucu can cua ndacan tahvi intuhun ñi maa ra tsi Nyoo. Maa tyin tsitsi tsa nyii ra can tan cuaq. ²⁴ Tan tsitsi tsa tsicán tahvi ra tsi Nyoo, yutun ndoo can tsa cuahán cuii tsi nda mahñu miñi. Tan ndutya miñi can cañi tsi tsi yutun ndoo can tsa cuenda tyin ñihi xaan yihí tatyí nu cuahán ra naha. ²⁵ Tan tsa cua tuvi cuahán ndihi ra Jesús nu cuahán ra naha tsihin yutun ndoo can, tan tsicá tsihin tsaha ra cuahán ra nu ndutya. ²⁶ Tan cuhva tsa nyehe ra naha tsi ra, tsicá ra nu ndutya can, nayuhvi xaan ra naha. Tan caná tsa ra naha, tan catyí ra naha:

—jihna ndo xin. Tatyí vatsí can!

²⁷ Maa tyin nacahan ra Jesús tsihin ra naha, tan catyí ra:

—iÑa nayuhvi ndo tyin maa yu cuví —catyí ra.

²⁸ Tacan tan nacahan ra Pedro tan catyí ra:

—Jutu Mañi yu, tatun maa un vatsí juven, cuhva tsa quitsi ndihi yu nu vatsí un.

²⁹ Tan ra Jesús catyí ra tsihin ra:

—Naha jiin.

Tacan tan quitá ra Pedro tsitsi yutun ndoo can, tan quitsaha tsicá ra nu ndutya tan cuahán ra nda nu vatsí ra Jesús. ³⁰ Maa tyin cuhva tsa tuvi iñi ra tyin ñihi xaan quitsaha yihí tatyí, nayuhvi xaan ra, tacan tan quitsaha cuñi nyee ra, tan quitsaha caná tsa ra tan catyí ra:

—jácacu tsi yu, Jutu Mañi yu!

³¹ Tan iin yaha ñi tñn ra Jesús ndaha ra, tan catyí ra tsihin ra:

—¿Nacuenda tsa nayuhvi un, yooho tsa luxu xaan tsinú iñi tsi yu? —catyí ra Jesús tsihin ra.

³² Tan cuhva tsa quihvi ra naha tsitsi yutun ndoo can, cutaxñ tatyí can. ³³ Tacan tan ra yucú tsitsi yutun ndoo can tsicuiñi tsiñi ra naha nuu ra Jesús, tan catyí ra naha tsihin ra:

—Nditsa nditsa tyin Sehe Nyoo cuví tsi yooho —catyí ra naha.

Nu janduvaha ra Jesús tsi nyivi cuuhvi tsa iyó Genesaret

(Mr. 6.53-56)

³⁴ Tsa yaha sava ra naha miñi can, tsaq ra naha ñuhu Genesaret. ³⁵ Tan cuhva tsa nacotó nyivi iyó ican tsi ra Jesús tyin juven ra cuví, jacotó ñi tsi tandihi nyivi iyó taniñ cahnu can. Tan tsindaca ñi tandihi nyivi cuuhvi nu nyii ra. ³⁶ Tan caahán ndaahvi ñi tsihin ra, na cuhva ra tsa tñn ñi vasu luxu jahma ra. Tan tandihi ñi tsa tñn jahma ra, nduvaha ñi.

15

Tsa jativi tsi nyivi nuu Nyoo

(Mr. 7.1-23)

¹ Tacan tan juhva ra cuví fariseo tan ra cuví maestro cuenda ley vehe ñuhu quee ra naha ñuu Jerusalén. Tan tsahan ra naha nu nyii ra Jesús tan tsicá tuhun ra naha tsi ra, tan catyí ra naha:

² —¿Nacuenda ña javahá ra tsicá tsihin un naha ra cuhva nacotó tsi saahnu yo?, tyin catyí ra ican naha ra tyin iyó iin cuhva ndoo ndaha yo tsa ndi cumañi ca catsi yo, maa tyin ra tsicá tsihin un ña tyaá yahvi ra naha tuhun tsahnú can —catyí ra naha.

³ Tan tsicá tuhun ra Jesús tsi ra naha, tan catyí ra:

—¿Nacuenda tyaá yahvi xaan ca ndo tuhun tsahnú tsa iyó ndo tan ña cuñi ndo tyaá yahvi ndo tsa caahán Nyoo? ⁴ Tyin Nyoo catyí ra: “Tyaá yahvi ndo tsi jutu ndo tan tsi sihi ndo, tyin tandihi nyivi tsa caahán ndavaha ñi siqui jutu ñi o sihi ñi, cua cúu ñi”, catyí Nyoo. ⁵ Maa tyin nyooho catyí ndo tyin cuví catyí ndo tsihin jutu ndo o tsihin sihi ndo tyehen: “Ña cuví jatyinyee yu tsi un tyin tsa tsaha yu tandihi tsa iyó tsi yu tsi

Nyoo.”⁶ Tatum tsa catyí ndo yacan, ña cuñí tsi tsa jatinyee ndo tsi jutu ndo o tsi sihi ndo, catyí ndo. Tan yacan cuví tsa javahá ndo vityin, tyaá tsiyo ndo tsa caahán Nyoo tan tyaá yahví xaan ca ndo tuhun tsahnu tsa iyó ndo.⁷ ¡Nyooho cuñí ndo tyin vaha xaan ndo, maa tyin ña nditsa ndo! Nditsa tsa cahán ra Isaías, ra cuví ndusu yuhu Nyoo, siqui ndo jahá Nyoo. Tan catyí ra tyehen:⁸ Nyívi ihya, jacahnú ñi tsi yu tshin yuhu ñi. Maa tyin ñavin tshin tsa nñi iñi ñi.

⁹ Yacan cuenda nduve yahví nyaá jacahnú ñi tsi yu.

Tyin maa ñi tuhun caahán jacuahá ñi, tan ñavin tuhun yu jacuahá ñi.

Catyí ra Isaías tuhun ndo jahá Nyoo, catyí ra Jesús tshin ra ican naha ra.

¹⁰ Tacan tan caná ra Jesús tsi nyívi tan catyí ra tshin ñi:

—Tyaá soho ndo tsa caahán yu, tan nducu ndo cuhva cutuñi iñi ndo.¹¹ Tyin nyívi tsa tiví nuu Nyoo, ñavin tsa quihví yuhu ñi jatíví tsi ñi. Tyin tiví ñi jahá tsa quitá yuhu ñi.

¹² Tacan tan natuhvá ra tsa tsicá tshin ra Jesús tan catyí ra naha tshin ra:

—¿A tsitó un? Ra fariseo naha ra ndasi xaan cuñí ra naha tsa tsiñí ra naha tsa cahán un.

¹³ Tan maa ra Jesús nacahan ra tan catyí ra:

—Tandihí yutun tsa ña tatsí Jutu yu, ra nyaá gloria, cua tuhun ra nda cuanda yoho tun.¹⁴ Jaña ndo tsa ra fariseo naha ra tyin ra cuaa cuví ra naha, tan janahá ra naha ityi tsi inga ra cuaa. Tan tatun iin ra cuaa tan janahá ra ityi tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

¹⁵ Tacan tan quitsahá catyí ra Pedro tshin ra Jesús:

—Çatyí tuhun tshin ndi náa cuñí tsi catyí tsa cahán un nañi.

¹⁶ Tacan tan ra Jesús catyí ra tshin ra naha:

—Ndi nyooho tan ña cutuñí ndihí iñi ndo.

¹⁷ ¿A ña cutuñí iñi ndo tyin tsa tsatsí yo, tsitsi yo cuahán tsi? Yahá can tan cua quita nyico tsi.¹⁸ Maa tyin tuhun tsa quitá yuhu yo, tsitsi añima yo queé can tan nyívi tiví ñi nuu Nyoo jahá tsa caahán ñi.¹⁹ Tyin tsa caquiñi tsicá iñi ñi tsitsi añima ñi quitá can, tan cuñí ñi cahñi ñi nyívi. Cuñí ñi suhu ñi. Yihí nyívi caahán ñi cuendu, o jacuñi nyaá ñi tsi inga ca nyívi. Yihí ra cuñí ra coo inga ñaha ra, o ñiñaha iyó yá tsicá nuu ñi tshin inga rayíi. Yihí ra tsicoó ra tshin ñaha tan ña tindaha ra tshin ña. Tan yihí rayíi quixí ra tshin juvin ñi maa rayíi. Tan ñiñaha yihí ñi quixí ñi tshin juvin ñi maa ñaha. Tan tandihí ca maa tsa caquiñi tsa javahá ñi tshin cuñu

ñuhu ñi.²⁰ Yacan cuví tsa jatíví tsi nyívi nuu Nyoo. Tyin tsa ña nacatyaá ñi ndaha ñi tsa ndi cumañi ca catsi ñi, ña jatíví can tsi ñi —catyí ra Jesús.

Nu tsinú iñi iin ñaha inga ñuu tsi ra Jesús (Mr. 7.24-30)

²¹ Quitá ra Jesús ñuu can tan cuahán ra ityi ñuu Tiro tan Sidón.²² Tan ityi can iyó iin ñaha Canaán. Tan tsa nyehé ña tsi ra Jesús natuhvá ña nu nyaá ra tan caná tsaá ña tan catyí ña:

—Jutu Mañi yu, tata ra David, cundaahvi iñi tsi yu, tyin sehe yu yihí tatyí ña vaha tsi ña, tan nyehé xaan ña tundoho jahá nu —catyí ña tshin ra Jesús.

²³ Maa tyin tumaa tsa ña tsiñí ñi ra Jesús jahá ra tsi ra tan ña nacahan ra tsa iin yaha ñi. Tacan tan natuhvá ra tsicá tshin ra tan catyí ra naha tshin ra:

—Cahan tshin ña na cunuhu ña tyin ut-san xaan yo tsa caná tsaá ña tsata yo.

²⁴ Tacan tan catyí ra Jesús tshin ra naha:

—Vatsí yu jahá Nyoo ñuu Israel tyin naquihin ndaahvi yu nyívi ñuu can tsa cuví ñi tumaa mbee tsa cuanaá. Tan tsa cuenda nyívi can vatsí yu.

²⁵ Tan ñaha can natuhvá ña nu nyaá ra tan tsicuñí tsi ña nuu ra, tan catyí ña tshin ra:

—Jutu Mañi yu, ¡jatinyee tsi yu!

²⁶ Tan ra Jesús catyí ra tshin ña:

—Ña vaha tsa quihin nyaá yo paan yuhu sehe yo, tan cuhva yo catsi ina —catyí ra tshin ña.

²⁷ Maa tyin ña ndasi cuñí ña tsa cahán ra, tan catyí ña tshin ra:

—Nditsa, Jutu Mañi yu. Maa tyin nda cuanda ina tan tsatsí ti titsehe tsa cucoyo xuu mesa tsitoho ti —catyí ña.

²⁸ Tacan tan catyí ra Jesús tshin ña:

—Yooho ñaha, tsinú xaan iñi un tsi yu. Na cuví maa cuhva tsicá iñi un.

Tan juvin ñi cuhva can tan nduvahá sehe ña.

Nu cuaha xaan nyívi cuuhví janduvahá ra Jesús

²⁹ Tsa yaha yacan tan ra Jesús cuahán ra ityi yuhu miñi Galilea, tan ndaa ra iin jiñi yucu tan ican tsinyaá ra.³⁰ Tan cuaha xaan nyívi cuahán ñi nu nyaá ra cuandacá ñi nyívi cuuhví tyin janduvaha ra tsi ñi. Yihí ñi coxo ñi, cuaa ñi, ñiñi ñi, lundu ñi. Tan yihí ñi yihí inga ca nu cuehe tsi ñi. Tan tsaquin nyecu ñi tsi tandihí ñi cuuhví can nu nyaá ra Jesús. Tan janduvahá ra tsi ñi.³¹ Tan iyo xaan cuñí nyívi can nyehé ñi tyin nacahan ñi ñiñi tan nduvahá ñi lundu, tan nacacá ñi coxo, tan nanyehé ñi cuaa. Tan quitsahá jacahnu xaan ñi tsi Nyoo ñi, tsa cuví ñi nyívi Israel.

Nu tsahá ra Jesús tsa catsi cumi mil rayíi (Mr. 8.1-10)

³² Tacan tan cana ra Jesús tsi ra tsicá tsihin ra, tan catyí ra tsihin ra naha:

—Ndaahvi xaan cuñí yu nyehé yu tsi nyívi ihya, tyin tsa uñí quívi yucú ñi ihya tsihin yo, tan nduve náa catsi ñi. Tan ña cuñí yu jacunuhu yu tsi ñi yuvehe ñi tyin ñaha ca catsi ñi, tan coto cúu naaha ñi ityi cuanuhú ñi —catyí ra Jesús.

³³ Tacan tan ra tsicá tsihin ra catyí ra naha tsihin ra:

—¿Tan numaa cua ñihi yo tsa catsi nyívi cuaaha ihya, tyin ihya nduve nyívi iyó?

³⁴ Tacan tan ra Jesús tsicá tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihi.

³⁵ Tan catyí ra tsihin nyívi na cunyecu ñi nu ñihu. ³⁶ Tacan tan quihín ra tsa utsa paan can tan tyaca can, tan nacuhva ra tyahvi nyoo tsi Nyoo. Tan quitsaha tsahnú cuatyí ra paan tsihin tyaca, tan tsaha ra tsi ra tsicá tsihin ra tyin na tsatsa ra naha tsi nyívi. ³⁷ Tandihí ñi tsatsí ñi, tan ndaha vaha iñi ñi. Tan tsa ndihí tsatsí ñi tan naquihín ra naha tsa ñahñu tsa ndoo can tan quita utsa tyica cuví tsi. ³⁸ Tan ra tsa tsatsí can naha ra quita maa cumi mil ra naha tan sñin maa ñiñaha tan tsa nyihi. ³⁹ Yahá can tan jacunuhu ra tsi ñi, tan quihvi ra tsitsi yutun ndoo, tan cuahán ra ityi Magdala.

16

Ra cuví fariseo naha ra tan ra cuví saduceo naha ra tsicán ra naha tsi ra Jesús na javaha ra iin tsa iyo

(Mr. 8.11-13; Lc. 12.54-56)

¹ Tacan tan ra fariseo naha ra tan ra saduceo naha ra tsahan ra naha nu nyíi ra Jesús, tyin cuñí ra naha nducu cuhva ra naha tsi ra. Tan catyí ra naha na javaha ra iin tsa iyo tsihin tunyee iñi Nyoo. ² Maa tyin nacahan ra Jesús tan catyí ra tsihin ra naha:

—Tsa cueñi, tuhvá ndo catyí: “Sñi xaan caa ityaan cua cuvi tyin cuaaha xaan nu vico”.

³ Tan tsa tuvi catyí tucu ndo tyin ña sñi maa caa cua cuvi, tyin iñi naaha xaan tan cuaaha xaan vico, catyí ndo. ¿Nacuenda tyin tsitó tucu ndo yacan tan tsa cuví vityin ña cuví nacoto ndo, nyooho ra jandaví ñaha? ⁴ Nyívi tsa iyó vityin, quíñi xaan iyó ñi tan ña tsinú iñi ñi tsi Nyoo. Maa ñi tsa iyo cuñí ñi nyehe ñi. Maa tyin yuhu ña cua javaha yu tsa iyo nyehe ñi, tyin tumaa tsa cuví tsi ra Jonás, yacan ña cua nyehe ñi —catyí ra Jesús tsihin ra naha; tsahan cuahán ra.

Tuhun caahán ra fariseo naha ra cuví tsi tumaa yutsan iya

(Mr. 8.14-21)

⁵ Cuhva tsa yahá ra tsicá tsihin ra Jesús inga tsiyo miñi can, nducuhun iñi ra naha tyin nduve paan tsa catsi ra naha ndahá ra naha. ⁶ Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo tan ra saduceo naha ra —catyí ra tsihin ra naha.

⁷ Tacan tan quitsaha natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan cuenda caahán ra tyehen tsihin yo? —catyí ra naha.

⁸ Tan tsa tuví iñi ra Jesús tsa tsicá iñi ra naha, catyí ra tsihin ra naha:

—Nyooho tsa luxu ñi tsinú iñi tsi yu, ¿nacuenda tyin tsicá xaan iñi ndo tyin nduve tsa catsi ndo ndahá ndo? ⁹ ¿A ñaha ca cutuñi iñi ndo? ¿A ña nducuhún iñi ndo quívi tsa jacatsí yu tsi uhun mil rayii tsihin uhun taahan ñi paan, tan najava taahan tyica jacutu ndo tsihin tsa ñahñu tsa ndoo can? ¹⁰ ¿A tsa naá ndihí tucu iñi ndo quívi tsa jacatsí yu cumi mil rayii, tan najava taahan tyica jacutu ndo tsihin tsa ndoo tsa utsa taahan ñi paan? ¹¹ ¿Nacuenda ña tuví iñi ndo tyin ñavin tuhun paan caahán yu tsa catyí yu tyin na jaha ndo cuenda tsi ndo tsihin yutsan iya ra fariseo tan ra saduceo naha ra? —catyí ra Jesús tsihin ra naha.

¹² Tacan tan cutuñi iñi ra naha tyin ñavin tsa cuenda yutsan iya paan can caahán ra, maa tyin na jaha ra naha cuenda tsi ra naha tsihin tsa jacuahá ra fariseo tan ra saduceo naha ra.

Nu catyí ra Pedro tyin ra Jesús cuví ra Cristo, ra jacacú tsi yo

(Mr. 8.27-30; Lc. 9.18-21)

¹³ Cuhva tsa tsaá ra Jesús ityi ñuu Cesarea Filipino, tsicá tuhun ra tsi ra tsicá tsihin ra tan catyí ra:

—¿Náa catyí nyívi? ¿Yóo ra cuví yu, Rayii tsa quee nda gloria? —catyí ra.

¹⁴ Tan nacahan ra naha tan catyí ra naha:

—Yihí nyívi catyí ñi tyin ra Juan ra jacoondutyá tsi nyívi cuví un. Tan inga nyívi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tahan tsanaha cuví un.

¹⁵ Tacan tan catyí ra tsihin ra naha:

—Tan nyooho, ¿yóo ra cuví yu, catyí ndo?

¹⁶ Tacan tan nacahan ra Simón Pedro tan catyí ra:

—Yooho cuví ra Cristo, Sehe Nyoo nyitó —catyí ra.

¹⁷ Tan nacahan ra Jesús tan catyí ra:

—Sñi xaan cuví tsi yooho, Simón, sehe ra Jonás, tyin ñavin nyívi janaha tuhun ihya tsi un, tyin maa Jutu yu, ra nyaá gloria janaha tsi un. ¹⁸ Tan yuhu catyí yu tsihin un tyin yooho cuví ra Pedro. Tan siqui cava ihya,

cua javaha yu vehe ñuhu yu. Tan ña cua tani tsi jaha tuhun tsihi. ¹⁹ Yuhu cua cuhva yu ndaha tucu tsa cuenda nu ndacá ñaha Nyoo tsi un. Tan tandihi tsa cuhñi un ihya nu ñuhu ñayivi, tsa nuuhñi jahá Nyoo nda gloria. Tan tandihi tsa ndatsi un ihya nu ñuhu ñayivi, tsa ndatsi maa Nyoo nda gloria.

²⁰ Tacan tan catyí ra Jesús tshin ra tsicá tshin ra tyin ña cahan ra naha tshin nyivi tun juvin ra cuví ra Cristo ra tsa quee nu nyaá Nyoo.

Nu caahán ra Jesús tyin cua cahñi nyivi tsi ra

(Mr. 8.31—9.1; Lc. 9.22-27)

²¹ Nda quivi can quitsahá catyí ra Jesús tshin ra tsicá tshin ra, tyin cuñi tsi tsa cuhun ra ñuu Jerusalén. Tan ra cuví mandoñi naha ra, tan ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoho tsi ra. Tan catyí ra tyin cua cahñi ra naha tsi ra, maa tyin tsa tsinu uñi quivi cua nandoto ra inga tsaha. ²² Tacan tan quihñ ra Pedro tsi ra tan quitá sñin ra tshin ra tan quitsahá caahán ra tshin ra Jesús tyin ña vaha tsa caahán ra tan catyí ra:

—Na ña cuhva Nyoo tsa tahan un tacan, Jutu Mañi yu —catyí ra.

²³ Tan nanyico coo ra Jesús, tan quitsahá caahán ra tshin ra Pedro:

—jatsiyo nyaha tsi un, cuhna! Tyin cuñi un casi un tsi yu. Tyin yooho ña tsicá iñi un cuhva cuñi Nyoo, tyin cuhva cuñi nyivi tsicá iñi un —catyí ra.

²⁴ Tacan tan ra Jesús catyí ra tshin ra tsicá tshin ra:

—Tatun ndáa nyooho cuñi cunyicun tsi yu, cahnya iñi ndo tsa cuñi maa ndo javaha ndo, tacan tan cuví javaha ndo tsa cuñi Nyoo. Tan ña cua ndu uvi iñi ndo tsa yihí ndo cuenda yu, vasu tandihi quivi nyehé ndo tundoho. Tyin yacan cuví cruu tsa taahán tsi cuiso ndo tatun cua cunyicun ndo tsi yu. ²⁵ Tan nyooho tsa ña cuñi nyehé tundoho, tan ña cuñi ndo cuhva ndo ñayivi iyó ndo tsa cuenda yu, cua nyehé ndo tundoho anyaya. Maa tyin nyooho tsa cua cuhva ñayivi ndo tsa cuenda yu, cua cacu ndo.

²⁶ Tyin nduve yahvi nyaá tsa cua ñihi ndo tandihi tsa iyó nu ñuhu ñayivi tun añima ndo tan ña cua cacu tsi. Tyin nduve maa náa tshin tan cuví tyahvi ndo tan ña cua cunaa añima ndo. ²⁷ Tyin yuhu, Rayi tsa quee nda gloria, cua quitsi nyico yu inga tsaha, maa tyin tshin tsa cahnucuví Jutu yu, tan cua quitsi ángel tshin yu. Tacan tan cua tyahvi yu tsi intuhun intuhun ndo tsa cuenda tsa javahá ndo. ²⁸ Tan tsa nditsa catyí yu tshin ndo, tyin yihí nyooho tsa yucú ihya vityin, cua nyehé ndo nu vatsí yu tsa cua cundaca

ñaha yu, tsa ndi cumañi ca cúu ndo —catyí ra Jesús.

17

Nu nyehé uñi taahán ra tsicá tshin ra Jesús nácaa tsa sñi caá xiñu ra Jesús nu ndacá ñaha ra nda gloria

(Mr. 9.2-13; Lc. 9.28-36)

¹ Tan tsa yahá iñu quivi, tan quihñ ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iin yucu sucun xaan tshin ra naha. ² Tan ican nasama cuhva caá ra Jesús nuu ra yucú tshin ra. Tan xiñu xaan nuu ra cuví tumaa xiñu ñicanyii. Tan jahma ra cuitsin xaan tsi cuví tumaa cuitsin ñuhu. ³ Tacan tan nyehé ra naha tsi ra Moisés tan ra Elías, natuhún ra naha tshin ra Jesús. ⁴ Tan quitsahá caahán ra Pedro tshin ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñi un, javaha ndi uñi taahan tyahva, iin tsi tsi maa un, tan inga tsi tsi ra Moisés, tan iin tsi tsi ra Elías —catyí ra Pedro tshin ra Jesús.

⁵ Tsitsi tsa caahán ra Pedro, quitsi iin vico tsa xiñu xaan siqui ra naha. Tan tyasi tsi tsi ra naha. Tan tsiñi ra naha iin ndusu tsa caahán tsitsi vico can tan catyí tsi tyehen:

—Ra ihya cuví Sehe yu, tan cuñi xaan yu tsi ra. Tan sñi xaan cuñi yu tshin ra. Tyaga yahvi ndo tsa caahán ra —catyí ndusu can.

⁶ Tsa tsiñi ra tsicá tshin ra Jesús tuhun ihya, tsicava tshin nuu ra naha nda nu ñuhu, tyin nayuhví xaan ra naha. ⁷ Tacan tan natuhvá ra Jesús nu cayucú ra naha, tan tñin ra tsi ra naha, tan catyí ra:

—Nduvita ndo, tan ña nayuhvi ndo.

⁸ Tan cuhva tsa nanyehe ra naha, intuhun ña ra Jesús nyaá, tan nduve inga uvi ca ra naha.

⁹ Tan cuhva tsa vatsí nuu ra naha yucu can, catyí ra Jesús tshin ra naha:

—Ña cahan ndo tsa nyehé ndo ihya tshin nyivi. Tsa yaha tsa cúu Rayi tsa quee nda gloria tan nandoto ra, tacan tan cua cahan ndo can —catyí ra.

¹⁰ Tacan tan tsicá tuhun ra tsicá tshin ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

¹¹ Tan nacahan ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandihi. ¹² Maa tyin yuhu catyí yu tshin ndo tyin tsa yahá quitsi ra Elías, tan ña nacoto nyivi tsi ra, tan javahá ñi tshin ra tandihi cuhva cuñi maa ñi. Tan tacan tucu yuhu, Rayi tsa quee nda gloria, cua janyehe ñi tundoho tsi yu —catyí ra tshin ra naha.

¹³ Tacan tan cutuñi iñi ra naha tyin tuhun ra Juan, ra jacoondutya, caahán ra Jesús.

Nu janduvaha ra Jesús tsi iin ra luhlu tsa tsihi naaha jahá tatyí ña vaha
(Mr. 9.14-29; Lc. 9.37-43)

¹⁴ Cuhva tsa tsaq ra naha nu yucú nyívi, natuhvá iin ra tan tsiuñi tsiiti ra nuu ra Jesús, tan catyí ra tsihin ra:

¹⁵ —Tata, cundaahvi iñi tsi sehe yu, tyin yihí cuehe tsihi naaha tsi ra, tan tuhvá ra nduva ndasava, tan cuaha xaan tundoho nyehé ra jahá cuehe can. Tan yihí tsaha nduvá ra nu ñuhu tan cayú ra, tan nduvá tucu ra nu yihí ndutya. ¹⁶ Tan tsindaca yu tsi ra tsi ra tsicá tsihin un, maa tyin ña cuví janduvaha ra naha tsi ra —catyí ra.

¹⁷ Tan nacahan ra Jesús tan catyí ra:

—jNyooho, nyívi tsa ña tsinú iñi cuví ndo! jTan caquiñi ndo! ¿Ndáa nda quívi cua cunyii yu tsihin ndo? ¿Tan ndáa nda quívi cua cunyeé iñi yu tsihin ndo, tyin nyoooho ña tsinú vaha maa iñi ndo tsi yu? Tjindaca ndo tsi ra luhlu tsi yu —catyí ra.

¹⁸ Tacan tan tavaq ra Jesús tsi nu tatyí ña vaha can, tan quitá nu tsi ra luhlu can. Tan juvin ñi cuhva can nduvaha ra.

¹⁹ Tsa yahaq can tan tsicá tuhun siin ra tsicá tsihin ra Jesús tsi ra tan catyí ra naha:

—¿Nacuenda tyin nyuhu ña cuví tava ndi tatyí ña vaha can?

²⁰ Tan ra Jesús nacahan ra tan catyí ra:

—Tyin luxu cuii ñi tsinú iñi ndo tsi yu. Tsa nditsa catyí yu tsihin ndo tyin tun tsinú iñi ndo tsi yu, tumaa iin tsiiti mostaza, cuví catyí ndo tsihin yucu ihya na catsiyo tsi tan cuhun tsi inga ityi, tan yucu ihya cuhun tsi inga ityi. Tan nduve tsa ña cua cuví javaha ndo tatun nditsa tsa tsinú iñi ndo tsi yu. ²¹ Maa tyin tahan tatyí ña vaha can, quita nu maa ñi tsihin tsa coonyitya yo tan ndacan tahvi yo tsi Nyoo —catyí ra Jesús tsihin ra naha.

Inga tsaha cahan ra Jesús tsa cua cahñi nyívi tsi ra

(Mr. 9.30-32; Lc. 9.43-45)

²² Yucú ra naha Galilea can, tan ra Jesús catyí ra tsihin ra naha:

—Yuhu, Rayii tsa quee nda gloria, iin ra cua nacuhva cuenda ra tsi yu tsi ra xaan iñi tsi yu naha ra. ²³ Tan cua cahñi ra naha tsi yu. Maa tyin tsa tsinu uñi quívi tan cua nandoto yu —catyí ra.

Tsa tsinú ra naha tuhun ihya, cuiihya xaan cuñi ra naha cuví.

Nu tyahví ra naha cuenda tsa nduvaha vehe ñuhu cahnu

²⁴ Cuhva tsa tsaq ra Jesús tan ra tsicá tsihin ra ñuu Capernaum, ra tavá xuhun cuenda vehe ñuhu naha ra, tsahan ra naha tsinyehé

ra naha nu nyíi ra Pedro tan tsicá tuhun ra naha tsi ra tan catyí ra naha:

—¿A ña tuhvá ra jacuahá tsi ndo tyahví xuhun tsa cuenda vehe ñuhu cahnu? —catyí ra naha tsihin ra Pedro.

²⁵ Tan nacahan ra Pedro tan catyí ra:

—Tuhvá ra.

Tan tsa quihvi ra Pedro tsitsi vehe nu iyó ra naha, jihna ca ra Jesús nacahan tan catyí ra:

—¿Nacaa cuñi yooho, Simón? ¿Yóo tsi quihín ra cuví rey tsa iyó nu ñuhu ñayivi ihya yahvi? ¿A tsi nyívi ñuu maa ra o tsi inga nyívi?

²⁶ Nacahan ra Pedro tan catyí ra:

—Tsi inga nyívi.

Tan catyí ra Jesús tsihin ra:

—Tun tacan, nyívi ñuu maa ra ña taahán tsi tyahvi ñi. ²⁷ Maa tyin ña cuñi yo tsa cahan ra naha siqui yo, yacan cuenda vaha ca tsa cuhun un yuhu miñi can, tan jacuhun un yiqui tucu un tsitsi ndutya. Tan tyaca tsa cua ñihi un tsa jihna ñi, tsitsi yuhu ti cua ñihi un xuhun. Tan tsihin yacan ñi cua tyahvi un tsa cuenda yo —catyí ra Jesús tsihin ra Pedro.

18

Nu janahaq ra Jesús yóo ra cahnu ca cuví nuu tandihi nyívi tsa ndacá ñaha Nyoo
(Mr. 9.33-37; Lc. 9.46-48)

¹ Quívi can natuhvá ra tsicá tsihin ra Jesús nu nyaá ra, tan tsicá tuhun ra naha tsi ra tan catyí ra naha:

—¿Yóo ra cahnu ca cuví nu ndacá ñaha Nyoo?

² Tacan tan ra Jesús cana ra tsi iin ra luhlu, tan tyaq ra tsi ra mahñu ra naha. ³ Tan catyí ra:

—Tsa nditsa catyí yu tsihin ndo, tyin tatun nyoooho tan ña cua nasama ndo cuhva iyó ndo tan ña janduluhlu ndo tsi ndo tumaa ra nyihi, ña cua cuví quihvi ndo nu ndacá ñaha Nyoo. ⁴ Tyin ra tsa cahnu ca cuví nuu Nyoo, juvin ra cuví ra tsa janduluhlu tsi, tumaa ra luhlu ihya. ⁵ Nyívi tsa naquihín tsi iin nyívi tumaa ra luhlu ihya, tyin tsinú iñi ñi tsi yu, yuhu naquihín cuenda ñi.

Nu caahán ra Jesús tsihin yo nacaa jaha cuenda yo tsi yo coto javaha yo tsa ña vaha
(Mt. 5.29-30; Mr. 9.42-48; Lc. 17.1-2)

⁶ Tatun yóo nyívi natyuhú tsi iin nyívi tsa ñaha ca tsinú vaha iñi tsi yu, na javaha ñi tsa caquiñi, vaha ca na cunuhñi iin yuu yoso vee jucun ñi natyuhú can, tan cujanehñi nyívi tsi ñi nu cunu ndutya ñuhu. ⁷ jNdahvi nyívi ñuu ñayivi, tyin tacan iyó tsa jatívi tsi ñi! jTan ndahvi tucu ra ndaahvi tsa jatívi tsi ñi!

⁸ Yacan cuenda tatun ndaha un o tsaha un javahá tsa ña vaha, cahnya can tan javita un. Tyin vaha ca quihvi un nu coo un

tsihin Nyoo tsihin tsa lundu ndaha un o lundu tsaha un, tan ñavin ca tsa nani un tan jacuhun Nyoo tsi un nu cayú ñuhú tsa ña cua ndahva maa. ⁹ Tun javahá un tsa ña vaha jahá tinuu un, tava can tan javita un. Tyin vaha ca quihvi un nu coo un tsihin Nyoo tsihin intuhun tinuu un, tan ñavin ca tsa jacuhun Nyoo tsi un tsihin nduvi tinuu un nu cayú ñuhú tsitsi anyaya.

Nu cahān ra Jesús tyin tumaa mbee tsa cunaa, tacan cuví yo
(Lc. 15.3-7)

¹⁰ Ña caca iñi ndo tyin ra nyihi cuenda yu ihya nduve yahvi nyaá ra naha nuu Nyoo, tyin yuhu catyí yu tsihin ndo tyin cahnu ca cuví ra naha tyin ángel jahá cuenda tsi ra naha nduvi tan niñu, nyecú ra naha nuu Jutu yu, ra nyaá gloria. ¹¹ Tyin yuhu, Rayi tsa quee nda gloria, vatsí jacacu yu tsi nyivi tsa cuanaa.

¹² ¿Nacaa cuñi nyooho? Tatum iin ra tan iyó iin cientu mbee jana ra, tan cunaa intuhun ti, ¿a ña nacoo ra tsa cumi xico tsahun cumi ti nu yucú ti, tan cuhun ra cunanducu ra tsi quiti tsa cuanaa can? ¹³ Tan tatum nañihi ra tsi ti, tsa nditsa tyin si ca cua cuñi ra tsihin quiti can, tan ñavin ca tsihin tsa cumi xico tsahun cumi quiti tsa ña tsinaa. ¹⁴ Tan tacan tucu, Jutu yo ra nyaá gloria, ña cuñi ra tsa cunaa ndi intuhun nyivi tsa cuví tumaa ra nyihi ihya.

Nacaa taahán tsi jahá tahan yo tucahnu iñi tsi yo
(Lc. 17.3)

¹⁵ Tatum ra yañi un tan javahā ra tsa ña vaha tsi un, cahān tsihin intuhun ñi maa ra tan catyí un tsihin ra tyin ña vaha cuhva javahā ra. Tan tatum tyaa yahvi ra tuhun caahán un, tsa jahā canaa un tsi ra inga tsaha cuenda Nyoo cuví can. ¹⁶ Maa tyin tatum ña tyaa yahvi ra tsi un, tacan tan cana un tsi iin o uvi ra tyin cuví ra naha tsa ndaa tsa cuenda tsa cua cahān un tsihin ra can. ¹⁷ Tatum ña tyaa yahvi ra ndi maa tsi ra tsa tsahān tsihin un naha ra, tacan tan cahān tsihin tandihi nyivi yucú vehe ñuhu. Tan tatum ña tyaa yahvi ra tsi ñi vehe ñuhu, tacan tan jahā ndo tumaa tsa ñavin ra yihí tuhun Nyoo cuví ra tan cuví ra tumaa ra caquiñi tsa tavá xuhun cuenda ra ndacá ñaha nda ñuu Roma.

¹⁸ Tsa nditsa catyí yu tsihin ndo, tyin tandihi tsa cuñi ndo ihya nu ñuhu ñayivi, tsa nuuhñi tsi jahā maa Nyoo nda gloria. Tan tandihi tsa ndatsi ndo ihya nu ñuhu ñayivi, tsa ndatsi maa Nyoo nda gloria.

¹⁹ Tan juvin ñi catyí tucu yu tsihin ndo, tatum uvi ndo ihya nu ñuhu ñayivi, tan tsa natuhun tahan ndo tan tsicán ndo tsi Jutu yu, ra nyaá gloria, cua cuhva ra yacan tsi ndo. ²⁰ Tyin nu yucú uvi o uñi nyivi tan

jacahnú ñi tsi yu, ican nyaá yu mahñu ñi —catyí ra Jesús.

²¹ Tacan tan tsahān ra Pedro tsindaca tuhun ra tsi ra Jesús tan catyí ra:

—Jutu Mañi yu, tatum ra yañi yu tan javahā ra tsa ña vaha tsihin yu, ¿nájava taahan tsaha taahán tsi jaha yu tucahnu iñi tsi ra? ¿A utsa taahan tsaha?

²² Tan nacahān ra Jesús tan catyí ra:

—Catyí yu tsihin un tyin ñavin utsa taahan ñi tsaha; nda cumi cientu cumi xico utsi tsaha taahán tsi jaha un tucahnu iñi.

Nu cahān ra Jesús iin cuhva cuenda iin ra tsa ña cuñi jaha tucahnu iñi

²³ Yacan cuenda tsa ndacá ñaha Nyoo tsi nyivi cuví tsi tumaa iin rey tsa nacana tsi tandihi musu ra tyin cua nyehe ra nacaa nyaá cuenda ra naha tsi ra. ²⁴ Tan cuhva tsa quitsahā natavá ra cuenda, tan tsindaca ra tsi iin musu tsa cuaha millón pesu nyaá cuenda tsi ra. ²⁵ Tan musu can nduve náa tsihin tyahvi ra tsi tsitoho ra, yacan cuenda tsitoho ra catyí: “Xico ndo tsi ra iin cahnu ñi tsihin ñasihí ra, tan tsihin sehe ra tan tandihi tsa iyó tsi ra tan tsihin xuhun quita can cua tyahvi ra tsa nyaá cuenda ra tsi yu.”

²⁶ Tacan tan musu can tsicuiñi tsiti ra nuu tsitoho ra, tan cahān ndaahvi ra tsihin ra, tan catyí ra: “Tata, jahā tumañi iñi, cuatu un luxu, tan tyahvi yu tandihi tsa nyaá cuenda yu tsi un nda ñihi yu xuhun”, catyí ra. ²⁷ Tan cundahvi iñi tsitoho ra tsi ra, tan jahā ra tucahnu iñi tsi ra, tan janaa ra tandihi tsa nyaá cuenda ra, tan jandoo nuña ra tsi ra. ²⁸ Maa tyin cuhva tsa quita musu can, nañihí ra tsi iin ra vaha iñi tsi ra tsa cuví musu tumaa maa ra. Tan ra vaha iñi can nyaá cuenda ra luxu ñi tsi ra. Tan tñin ra tsi ra can, tan quitsahā tñin ra jucun ra, tan catyí ra tsihin ra: “Tyahvi iñi tsitoho ra tsi ra can nuu ra, tan cahān ndaahvi ra tsihin ra tan catyí ra: “Cuatu luxu tan nda ñihi yu xuhun tan cua tyahvi yu tandihi tsa nyaá cuenda yu tsi un”, catyí ra. ³⁰ Maa tyin maa ra ña cuñi ra cuatu ra, tan tsahān ra tsityihí ra tsi ra can vehe caa nda cuanda tsa tyahvi ra tsa nyaá cuenda ra tsi ra. ³¹ Tsa nyehe inga ca musu tsa javahā ra, cuihaya xaan cuñi ra naha, tan tsahān ra naha tsinacatyí tuhun ra naha tsihin tsitoho ra naha tsa ña vaha tsa javahā ra can. ³² Tacan tan tsitoho ra can tava tyiñu ra na quitsi ra can. Tan tsa tsaq ra, tan catyí ra tsihin ra: “Musu ña vaha cuví un. Yuhu jahā yu tucahnu iñi tandihi tsa nyaá cuenda un tsi yu, tyin cahān ndaahvi un tsihin yu. ³³ Tacan cuñi tsi tsa cundaahvi iñi un tsi ra vaha iñi tsi un tumaa tsa cundaahvi iñi maa yu nyehe yu tsi un”, catyí ra tsihin ra. ³⁴ Tan cuxaan xaan tsitoho ra, tan tava tyiñu ra

na tatsi tuñi ra naha tsi ra nda cuanda tsa tyahvi ra tandihi tsa nyaá cuenda ra.

³⁵ Tan nu ndihi cahān ra Jesús, tan catyí ra tyehen:

—Tacan cua javaha tucu Jutu yu, ra nyaá gloria, tsihin nyooho tatun ña jaha ndo tuc-ahnu iñi tsi nyivi ndo tsihin tsa nñi iñi añima ndo.

19

Nu caahán ra Jesús tyin ña vaha tsa nacoo ihñi rayi tsi ñasiñi ra

(Mr. 10.1-12; Lc. 16.18)

¹ Tsa yahā tsa cahān ra Jesús tuhun ihya, tan quitā ra cuenda Galilea can, tan cuahán ra cuenda Judea inga tsiyo yutya cahnu Jordán, ityi nu caná ñicanyii. ² Cuaha xaan nyivi tsinyicun tsi ra, tan janduvahā ra tsi nyivi cuuhvi.

³ Tacan tan juhva ra fariseo naha ra natuhvā ra naha nu nyaá ra Jesús, tyin cuñi ra naha nducu cuhva ra naha tsi ra tyin tacan tan cuvi tyaa ra naha cuatyí siqui ra. Tan tsicā tuhun ra naha tsi ra tan catyí ra naha:

—¿A vaha tsa nacoo rayi tsi ñasiñi ra tsa cuenda náa ñi tisihi tsañā ña tsi ra?

⁴ Tan nacahān ra tan catyí ra:

—¿A ña tuhvā ndo cahvi nu tutu Nyoo nu catyí tsi tyin ra tsa javahā tsi ndo nda quivi jihna ñi, javahā ra rayi tan ñaha? ⁵ Tan catyí tsi tyehen: “Taahán tsi nacoo rayi tsi jutu ra tan sihi ra, tan ndu iin ra tsihin ñasiñi ra. Tan tsa nduvi taahan ñi cua cuvi ñi tumaa tsa intuhun ña nyivi.” ⁶ Yacan cuenda, ñavin ca uvi taahan ñi, maa tyin nduvi ñi intuhun ña nyivi cuvi ñi. Yacan cuenda, ña taahán tsi tsa nacoo tahan ñi tsi ñi tyin maa Nyoo tsa jandu iin tsi ñi —catyí ra.

⁷ Tacan tan tsicā tuhun ra naha tsi ra Jesús tan catyí ra naha:

—¿Nacuenta tsa tyaa ra Moisés tyin cuvi caní iin rayi tutu cuenda ley ra tan nacoo ra ñasiñi ra?

⁸ Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsañā ra Moisés ndatu tsa nacoo ndo ñasiñi ndo. Maa tyin quivi jihna ñi ñavin tacan tsicoo nyivi. ⁹ Yuhu catyí yu tsihin ndo tyehen: Ra tsa nacoo ñasiñi, tan ñavin tsa cuenda tsa quituvj ña tsihin inga rayi, tan tindahā ra tsihin inga ñaha, tsicoó cuatyí ra nuu Nyoo. Tan ra tsa tindahā tsihin ñaha tsa nacoo rayi can, juvin ñi tsicoó tucu cuatyí ra can —catyí ra.

¹⁰ Tacan tan ra tsicā tsihin ra, catyí ra naha tsihin ra:

—Tatun tacan taahán tsi coo rayi tsihin ñasiñi ra, vaha ca ña tindaha yo.

¹¹ Tan ra Jesús catyí ra tsihin ra naha:

—Ña tandihi nyivi cuvi naquihin cuenda tuhun ihya. Maa tyin nyivi tsa tsañā Nyoo cuvi naquihin cuenda ñi can. ¹² Tsa ña tindaha nyivi, cuaha ñi cuenda cuvi tsi. Yihí ñi ña cuñi ñi tindaha ñi tyin iin cuhva caa maa ñi nda cacū ñi. Tan inga ñi ña cuñi ñi tindaha ñi tyin tsa nducapūn ñi jahā nyivi. Tan yihí ñi ña tindahā ñi tsa cuenda tsa cuñi ñi javaha ñi maa ñi maa tyiñu Nyoo, na nducuaha ca añima tsa ndacá ñaha Nyoo. Tandihí nyivi tsa cuvi javaha yacan na javaha ñi —catyí ra Jesús.

Nu nasocó ra Jesús tsi tsa nyihi

(Mr. 10.13-16; Lc. 18.15-17)

¹³ Tacan tan quitsj ndaca nyivi juhva tsa nyihi tsi ra Jesús tyin na tyiso ndaha ra jiñi tsi naha tsi, tan ndacan tahvi ra tsa cuenda tsi. Maa tyin ra tsicá tsihin ra quitsahā caahán ra naha tsi nyivi tsa cuahán tsihin tsa nyihi can. ¹⁴ Maa tyin ra Jesús catyí ra:

—Jaña ndo tsi tsa nyihi na quitsi maa tsi naha tsi nu nyaá yu. Tan ña casi ndo. Tyin nyivi ndacá ñaha Nyoo cuvi ñi tumaa tsa nyihi ihya —catyí ra.

¹⁵ Tacan tan tyiso ndaha ra jiñi tsi naha tsi. Yahā can tan cuahán ra.

Nu tsañā ra Jesús cuhva tyin yñi xaan nacuhva cuenda iin ra cuca tsi ra tsi Nyoo

(Mr. 10.17-31; Lc. 18.18-30)

¹⁶ Iin ra tyuvaa tsañā ra tsindacā tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuvi coo yu ñayivi nyito tsa ña cua naa maa?

¹⁷ Tan ra Jesús catyí ra tsihin ra:

—¿Nacuenta catyí un tyin ra vaha cuvi yu? Intuhun ñi maa Nyoo cuvi ra vaha. [Tan tsa catyí un tyin vaha yu, nacotó un tyin Nyoo cuvi yu.] Maa tyin tatun cuñi un coo un ñayivi tsa ña cua naa maa, javaha tandihi tuhun tsa tsañā Nyoo tyin javaha yo —catyí ra tsihin ra.

¹⁸ Tan ra tyuvaa can catyí ra:

—¿Ndáa tsa cuvi can?

Tan ra Jesús catyí ra tsihin ra:

—Ña cahñi un nyivi. Ña coo inga ñaha tsi un. Ña suhu un tsa tsii nyivi. Ña cahān un cuendu siqui nyivi. ¹⁹ Tyaa yahvi tsi jutu un tan tsi sihi un. Tan cuñi tsi nyivi, tumaa tsa cuñi un tsi maa un.

²⁰ Tan ra tyuvaa can, catyí ra tsihin ra:

—Tandihí maa yacan tan tyaa yahvi yu nda tahan luhlu yu tan nda cuanda vityin. ¿Náa ca cumañi tsi yu?

²¹ Tan ra Jesús catyí ra tsihin ra:

—Tatun cuñi un tsa iin ndaha ñi cuvi un iin ra cuiñi nuu Nyoo, cyaahan tan xico un tsa iyó tsi un, tan cuhva un tsi nyivi ndaahvi, tan quitsi nyicun un tsi yu. Tacan tan coo tsa cuca tsi un nda gloria —catyí ra.

²² Maa tyin cuhva tsa tsiñi ra tyuvaa can tsa cahān ra Jesús tsihin ra, cuihiya xaan cuñi ra cuvī tan cuanuhū ra tyin cuca xaan ra.

²³ Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yīi xaan tan cuvī nacuhva cuenda nyivi cuca tsi ñi na cundaca ñaha Nyoo tsi ñi. ²⁴ Catyí yu tsihin ndo inga tsaha, tyin vasu yīi xaan yaha iin camellu xuu iin yiqui tucu, maa tyin yīi xaan ca tsa quihvi iin nyivi cuca nu ndacá ñaha Nyoo —catyí ra Jesús.

²⁵ Tsa tsiñi ra tsicá tsihin ra Jesús tsa cahān ra, iyo xaan cuñi ra naha, tan quitsahā tsicá tuhun tahan ra naha, tan catyí ra naha:

—Tun tacan, yoñi cua cuvī cacu

²⁶ Tacan tan nanyehē ra Jesús nu nyecú ra naha tan catyí ra:

—Nyivi ña cuvī javaha ñi yacan, maa tyin Nyoo cuvī javaha ra tandihī.

²⁷ Tacan tan quitsahā caahán ra Pedro tsihin ra:

—Jutu Mañi yu, nyuhu tandihī maa tsa iyó tsi ndi nacoō ndi tan nyicún ndi tsi un. ¿Ñaa cua ñihī ndi? —catyí ra tsihin ra.

²⁸ Tan nacahān ra Jesús tan catyí ra:

—Tsa nditsa catyí yu tsihin ndo, tyin quivi tsa cua ndutsaa tandihī tsa iyó, yacan cuvī quivi cua cunyaa yuhu Rayi tsa queē nda gloria nu tyayu sīi xaan caá tan cua cundaca ñaha yu. Tan nyooho tsa nyicún tsi yu, cua cunyecu ndihī ndo nu utsi uvi taahan tyayu sīi caá. Tan cua cundaca ñaha ndo tsi tandihī nyivi cuvī tata tsa utsi uvi taahan sehe ra Israel. ²⁹ Tan tandihī nyooho tan tandihī inga nyivi tsa nacoō vehe, o yañi ñi, o cuhva ñi, o jutu ñi, o sīhi ñi, o ñasihī ñi, o sehe ñi, o ñuhu ñi, tsa cuenda yuhu, cua ñihī ñi iin cientu ca tsaha siquī can, tan cua ñihī tucu ñi ñayivi nyito tsa ña cua naa maa coo ñi. ³⁰ Cuaaha xaan nyivi cuahán ityi nuu vityin, ñi ican cua cuhun nu ndihī ña. Tan cuaha xaan nyivi cuahán nu ndihī vityin, ñi ican cua cuhun ityi nuu.

20

Nu jacuahā ra Jesús iin cuhva cuenda ra jahá tyiñu

¹ Tsa ndacá ñaha Nyoo tsi nyivi, cuvī tsi tumaa iin ra iyó cora uvas. Tan tuvi ñi quita ra cuahán ra cuanducú ra musu jaha tyiñu nu tyiñu jahá ra. ² Tan ndoō ra tuhun tsihin musu can tyin cua tyahvi ra yahvi tsa iin quivi. Tan jacuhūn ra tsi ra naha cua jaha tyiñu ra naha nu iyó tyiñu jahá ra. ³ Yahā can tan cuahán ra inga tsaha cuhva caa iin tsa tuvi. Tan nyehē ra tsi juhva ca ra yucú taxin nuyahvi can. ⁴ Tan catyí ra tsihin ra naha: “Cuaahan ndihī tucu nyooho jahā tyiñu ndo

nu tyiñu jahá yu, tan cua tyahvi maa yu tsi ndo nácaa taahán tsi tsi ndo.” Tacan tan cuahán ndihī tucu ra can naha ra. ⁵ Tan tsitoho cora can quita ra inga tsaha tsa ora. Tan juvin ñi musu nducú ra. Tan caa uñi tsa tseñi, quita ra inga tsaha nducú ra musu. ⁶ Yahā can tan quita nyico ra caa uhun tsa tseñi tan nyehē ra yucú taxin juhva ca ra naha nuyahvi can. Tan catyí ra tsihin ra naha: “¿A nduve tyiñu jahá ndo? tyin nduvi nduvi yucú taxin ndo nuyahvi ihya.” ⁷ Tan nacahān ra can naha ra tan catyí ra naha: “Yucú taxin maa ndi tyin nduve tyiñu jahá ndi tan yoñi tavá tyiñu tsi ndi.” Tacan tan catyí ra tsihin ra naha: “Cuaahan ndihī ndo jahā tyiñu ndo nu tyiñu jahá yu. Tan tyahvi maa yu tsi ndo nácaa taahán tsi tsi ndo”, catyí ra. ⁸ Tan cuhva tsa cua cuaa, tsitoho tyiñu can catyí ra tsihin ra yihī ndaha musu can: “Na cana un tsi musu, tan tyahvi un tsi ra naha. Quitsaha tyahvi un tsi ra tsa quihvi nu ndihī naha ra, tan nu cua ndihī tan tyahvi un tsi ra tsa quihvi tsa jihna ñi naha ra”, catyí ra. ⁹ Tacan tan tsaā ra tsa quihvi caa uhun tsa tseñi can naha ra. Tan intuhun intuhun ra naha quihūn ra naha yahvi nanii iin quivi. ¹⁰ Yahā can, tan cuhva tsa tahān tsi tsi ra tsa quihvi tsa jihna ñi can naha ra, cuñi maa ra naha tyin cuaha ca cua tyahvi ra tsi ra naha. Maa tyin inducu ñi yahvi iin quivi quihūn ra naha. ¹¹ Tan cuhva tsa quihūn ra naha, quitsahā caahán ra naha tsi tsitoho tyiñu can. ¹² Tan catyí ra naha: “Ra tsa tsaā nu ndihī ihya naha ra, intuhun ñi hora jahā tyiñu ra naha. Tan iin ñi yahvi tyahvi un tsi ra naha tsihin tucu nyuhu tan nduvi nduvi jahā tyiñu ndi nu ihñi”, catyí ra naha. ¹³ Maa tyin nacahān tsitoho tyiñu can, tan catyí ra tsihin iin ra can: “¡Tsaal, nduve tsa ña vaha javahā yu tsihin un. ¿A ñavin yahvi tsa iin quivi ndoō yu tuhun tyin cua tyahvi yu tsi un? ¹⁴ Quihūn yahvi un, tan cuanuhu. ¿A nduve ndatu iyó tsi yu tsa tyahvi yu tsi ra tsa quihvi nu ndihī iin ñi cuhva tsa tyahvi yu tsi yooho? ¹⁵ ¿A nduve ndatu iyó tsi yu tsa javaha yu náa cuñi maa yu tsihin xuhun yu? ¿A ndasi cuñi un tyin vaha iñi yu tsihin inga ra can naha ra?” catyí ra. ¹⁶ Tacan nyivi quihvi nu ndihī, cuhun ñi ityi nuu. Tan nyivi cuahán ityi nuu, nda nu ndihī ña cua cuhun ñi. Tyin cuaha xaan nyivi nacaná Nyoo, maa tyin juhva ñi ñi nacatsí ra.

Inga tsaha jacotó ra Jesús cuhva ca cahñi nyivi tsi ra

(Mr. 10.32-34; Lc. 18.31-34)

¹⁷ Cuhva tsa cuñi cuhun ra Jesús nda ñuu Jerusalén, canā sīn ra tsi tsa utsi uvi ra tsicá tsihin ra tan catyí ra tsihin ra naha:

¹⁸ —Nyehē ndo tyin cuahán yo Jerusalén vityin. Tan ndacan cua nacuhva cuenda nyivi tsi yuhu, Rayi tsa queē nda gloria, tsi

ra jutu tsa cuví ityi nuu naha ra, tan tsi ra maestro cuenda ley vehe ñuhu naha ra, tan cua catyi ra naha tyin taahán tsi cúu yu. ¹⁹ Tan cua nacuhva cuenda ra naha tsi yu tsi ra ñuu Roma naha ra, tyin vacu nducu ra naha tsi yu. Tan cañi ra naha tsi yu. Tan cahñi ra naha tsi yu nu cruu. Maa tyin tsa tsinu uñi quivi cua nandoto yu —catyi ra Jesús tsihin ra naha.

Nu tsicán sihi ra Jacobo tan ra Juan iin tumañi iñi tsi ra Jesús
(Mr. 10.35-45)

²⁰ Tacan tan ñasihi ra Zebedeo natuhva ña nu nyii ra Jesús tsihin nduvi sehe ña, ra Jacobo tan ra Juan. Tan tsicuiñi tsiiti ña nuu ra tyin cua ndacan ña iin tumañi iñi tsi ra.

²¹ Tan tsicā tuhun ra Jesús tsi ña tan catyi ra:
—¿Náa cuñi un?

Tan catyi ña:

—Quivi tsa cunyaa un nu ndacá ñaha un nda gloria, cuhva tsa cunyaa nduvi sehe yu xiin un. Na cunyaa iin ra tsiyo cuaha un, tan inga ra tsiyo satyin un.

²² Maa tyin nacahan ra Jesús tan catyi ra:
—Nyooho ña tsitó ndo tsa tsicán ndo. ¿A cuví nyehe nyooho tundoho tsa cua nyehe yuhu? ¿A cuví huhun ndo tuhun tsihihi tuma-maa cua huhun yuhu? —catyi ra.

Tan nacahan ra naha tan catyi ra naha:

—Cuví maa.

²³ Tan catyi ra Jesús tsihin ra naha:

—Tsa nditsa tyin cua nyehe ndo tundoho, tan cua huhun ndo tuhun tsihihi tumaa huhun yuhu tuhun tsihihi. Maa tyin tsa cunyaa ndo tsiyo cuaha yu tan tsiyo satyin yu, ñavin yuhu taahán tsi huhva yacan tsi ndo, tyin tsa tsitó maa Jutu yu yóo cua huhva ra can —catyi ra Jesús tsihin ra naha.

²⁴ Tan tsa tsiñi tsa utsi ca ra tsicá tsihin ra Jesús yacan, cuxaqañ ra naha tsi nduvi ra can naha ra. ²⁵ Maa tyin cana ra Jesús tsi ra naha tan catyi ra tsihin ra naha:

—Tsa tsitó maa ndo, tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. Tan ra cuví ityi nuu tsihin ra naha nduyaa xaan ra naha. ²⁶ Maa tyin ñavin tacan taahán tsi javaha nyooho. Tyin ra tsa cuñi nducahnu ca cuví nu Nyoo, cuñi tsi cuví ra musu tandihi nyooho. ²⁷ Tan ndáa nyooho tsa cuñi ndo cuví ndo ityi nuu, cuñi tsi cuví ndo musu tandihi ca ra naha. ²⁸ Tumaa yuhu. Rayii tsa quee nda gloria, ña vatsi yu tyin jatyinyee nyivi tsi yu. Maa tyin yuhu vatsi yu vatsi jatyinyee yu tsi maa ñi, tan cua huhva yu ñayivi yu tsa cuenda ñi. Tyin tsihin yacan cua tyahvi yu cuatyti tandihi ñi.

Nu janduvaha ra Jesús tsi uvi taahan ra cuaa
(Mr. 10.46-52; Lc. 18.35-43)

²⁹ Cuhva tsa cua quita ra Jesús ñuu Jericó tsihin ra tsicá tsihin ra, cuaha xaan nyivi cuahán cua nyicun tsi ra naha. ³⁰ Tan yuhu ityi can nyecú uvi taahan ra cuaa. Tan huhva tsa tsiñi ra naha tyin cua yaha ra Jesús, quitsaha caná tsa ra naha. Tan catyi ra naha:

—Jutu Mañi yu, tata ra David, cundaahvi iñi tsi ndi! —catyi ra naha.

³¹ Tan nyivi quitsaha caahán ñi tsihin ra naha na casi ra naha yuhu ra naha. Maa tyin ñihi ca cana tsa ra naha:

—Jutu Mañi yu, tata ra David, cundaahvi iñi tsi ndi!

³² Tacan tan tsicuiñi ra Jesús tan cana ra tsi nduvi taahan ra cuaa can, tan tsicā tuhun ra tsi ra naha tan catyi ra:

—¿Náa cuñi ndo javaha yu tsi ndo?

³³ Tan nacahan ra naha tan catyi ra naha:

—Jutu Mañi yu, jananyehe tsi ndi.

³⁴ Tacan tan cundaahvi iñi ra Jesús tsi ra naha, tan tñin ra tinuu ra naha. Tan iin yaha ñi nanyehé ra naha, tan cuiti cuanyicún ndihi ra naha tsi ra Jesús.

21

Nu cuahán ra Jesús ñuu Jerusalén
(Mr. 11.1-11; Lc. 19.28-40; Jn. 12.12-19)

¹ Tsa cua tsa ra naha ñuu Jerusalén, tan tsañ ra naha ñuu Betfagé, yatyin ñi yucú Olivo nu iyó yutun olivo. Tacan tan tava tyiñu ra Jesús tsi uvi ra tsicá tsihin ra. ² Tan catyi ra tsihin ra naha:

—Cuaahan ndo ñuu tsa canyivi ityi nuu ihya. Tan ican cua ñihi ndo iin urru sihi, nuuhñi ti. Tan ndacá ti iin urru luhlu. Ndatsi ndo tsi ti, tan quitsi ndaca ndo tsi ti naha ti tsi yu. ³ Tan tatun yóo tsicá tuhun tsi ndo: “¿Náa cuú ndo tsi ti naha ti?”, tan catyi ndo tsihin ñi: “Tyin tsiñi ñuhu ti naha ti tsi maa ra ndacá ñaha, maa tyin numi ñi cua quitsi ndaca nyico ndi tsi ti naha ti”, catyi ndo tsihin ñi —catyi ra.

⁴ Tacan cuví tyin cundaa tsa cahan ra cuví ndusu yuhvi Jutu Mañi yo tahañ tsanaha nu catyi ra tyehen:

⁵ Cahan ndo tsihin nyivi ñuu Sión:

“Nyehe ndo, vatsi rey ndo nu iyó ndo.

Ndaahvi ñi vatsi ra yosó ra iin urru luhlu, sehe iin quiti tsa tuhvá nyisó carga”, catyi ra cuví ndusu yuhu Nyoo can.

⁶ Tacan tan cuahán ra tsicá tsihin ra Jesús, tan javaha ra naha tumaa tsa cahan ra tsihin ra naha. ⁷ Quitsi ndaca ra naha tsi ti tsihin sihi ti. Tan tyiso ra naha jahma ra naha tsata ti, tan ndaa ra Jesús tsi ti. ⁸ Tan cuaha xaan nyivi tsaquñ ñi jahma ñi nu ñuhu ityi nu cuahán ra, tan inga ñi tsahnya ñi ndaha yutun tsaquñ ñi tsitsi ityi. ⁹ Tan nyivi tsa cuahán ityi nuu tan ityi tsata, quitsaha caná tsa ñi tan catyi ñi:

—¡Cahnu xaan cuví ra cuví tata ra rey David! ¡Cahnu xaan cuví ra tsa jaquitsi Jutu Mañi yo Nyoo! ¡Tan na jacahnu yo tsi Nyoo ra nyaá gloria! —catyí ñi.

¹⁰ Cuhva tsa tsaá ra Jesús ñuu Jerusalén can, tandihi maa nyivi ñuu quitsaha cuvaá jahá ñi, tan cuaha xaan ñi tsicá tuhun tahan ñi tsi ñi, tan catyí ñi:

—¿Yóo ra cuví ra ihya?

¹¹ Tan catyí ñi:

—Ra Jesús, ra cuví ndusu yuhu Nyoo, ra ñuu Nazaret tsa canyí Galilea cuví ra —catyí ñi.

Nu tava ra Jesús tsi nyivi xicó tsitsi vehe ñuhu cahnu

(Mr. 11.15-19; Lc. 19.45-48; Jn. 2.13-22)

¹² Yahá can tan quihví ra Jesús tsitsi vehe ñuhu cahnu Nyoo. Tan tava ra tsi tandihi nyivi jatá tan xicó ícan. Tan janduvá ra mesa nu nasamá ñi xuhun. Tan janduvá ra tyayu nu xicó ñi paloma. ¹³ Tan catyí ra tsihin nyivi:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi, tan tacan cua cunañi tsi. Tan nyoocho jananduví ndo vehe ihya, vehe ñasuhu —catyí ra tsihin ñi.

¹⁴ Tan tsa tsitó juhva ra cuaa tan ra coxo naha ra tyin nyí ra Jesús tsitsi vehe ñuhu cahnu, quihví ra naha tan janduvahá ra Jesús tsi ra naha. ¹⁵ Tan nyehe ra jutu tsa cuví ityi nuu naha ra tan ra maestro cuenda ley vehe ñuhu cahnu naha ra tyin javahá ra Jesús tsa iyo. Tan tsiñi ra naha tyin caná tsa tsa nyihi tsitsi vehe ñuhu, tan catyí tsa nyihi can:

—¡Cahnu xaan cuví ra cuví tata ra rey David! —catyí tsi naha tsi.

Tacan tan cuxaan ra naha tsa tsiñi ra naha tsa caahán tsa nyihi can. ¹⁶ Tan catyí ra naha tsihin ra Jesús:

—¿A tsiñi un tsa caahán tsa nyihi can?

Tan nacahan ra Jesús tan catyí ra:

—Tsiñi yu. Maa tyin ¿a ñaha ca cahvi nyoocho nu tutu Nyoo nu catyí tsi tyehen? Jutu Mañi yu, tsa nyihi tan lee tsa ndi tyaxín sií xaan tsitá tsi naha tsi jahá un.

Tan vaha xaan jacahnú tsi tsi un, catyí tsi, —catyí ra Jesús.

¹⁷ Tacan tan nacoo ra tsi ra naha, tan quita ra ñuu can cuahán ra ñuu Betania. Tan ícan ndoo ra tsacuaa can.

Nu cahan ra Jesús tsi yutun higo tsa ña tsahá tsiti

(Mr. 11.12-14, 20-26)

¹⁸ Tan tsa tuví cuií ñi inga quivi can, vatsi nyico ra Jesús nda ñuu Jerusalén, tan tsaá socio tsi ra. ¹⁹ Tan nyehe ra nyaá iin yutun higo yatyin ñi yuhu ityi can. Tan natuhvá ra nu nyaá tun, maa tyin nduve maa náa nañihí ra nuu tun. Maa ñi ndaha tun iñi. Tacan tan catyí ra tsihin tun:

—¡Ndi inga tsaha ña cua cuhva ca un tsiti!

Tan juvin ñi cuhva can na ityi tun. ²⁰ Tan tsa nyehe ra tsicá tsihin ra tsa javahá ra tsi tun, iyo xaan cuñi ra naha, tan tsicá tuhun ra naha tsi ra tan catyí ra naha:

—¿Nacuenda tsa numi xaan na ityi yutun higo can?

²¹ Tan nacahan ra Jesús tan catyí ra:

—Tsa nditsa catyí yu tsihin ndo, tyin tatun tsinú iñi ndo tan ña ndu uvi iñi ndo, ñavin tsa javahá yu tsihin yutun higo ihya ñi cuví javaha tucu nyoocho, tyin cuví ndihi tucu catyí ndo tsihin yucu ihya: “Cuaitsiyo ihya tan cuhun un nda tsitsi ndutya ñuhu.” Tan cua cuhun tsi. ²² Tan tandihi tsa cua ndacan ndo nu cua ndacan tahvi ndo tsi Nyoo, tatun tsinú iñi ndo tyin cua cuhva ra, cua ñihi ndo —catyí ra Jesús.

Nu tsicá tuhun ra cumi tyiñu vehe ñuhu naha ra tsi ra Jesús yóo tava tyiñu tsi ra tyin cahan ra tsihin nyivi

(Mr. 11.27-33; Lc. 20.1-8)

²³ Yahá can tan quihví ra Jesús tsitsi vehe ñuhu cahnu, tan tsitsi tsa jacuahá ra ícan, natuhvá ra jutu tsa cuví ityi nuu naha ra nu nyaá ra, tan ra cuví mandoñi ñuu Israel naha ra. Tan tsicá tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen? —catyí ra naha.

²⁴⁻²⁵ Tan nacahan ra Jesús tan catyí ra:

—Yuhu tucu cuñi yu ndaca tuhun yu tsi nyoocho. ¿Yóo jaquitsi tsi ra Juan tyin ja-coondutya ra tsi nyivi? ¿A Nyoo jaquitsi tsi ra, o nyivi? Tatun catyí tuhun ndo tsihin yu, cua catyí tuhun tucu yuhu tsihin ndo yóo tava tyiñu tsi yu tsa javahá yu tyehen —catyí ra Jesús tsihin ra naha.

Tacan tan ra ícan naha ra quitsaha caahán yuhu tahan ra naha, tan catyí ra naha:

—Tatun catyí yo tyin Nyoo jaquitsi tsi ra Juan, cua catyí ra tsihin yo: “Tun tacan, ¿nacuenta ña tsinú iñi ndo tsi ra?” ²⁶ Tan tatun catyí yo tyin nyivi jaquitsi tsi ra, yu-uhví yo coto cuxaan nyivi tsi yo, tyin tandihi ñi tsinú iñi ñi tyin ra Juan, cuenda Nyoo cahan ra —catyí ra naha.

²⁷ Tacan tan catyí ra naha tsihin ra Jesús:

—Ña tsitó ndi.

Tacan tan ra Jesús catyí ra tsihin ra naha: —Tan ndí yuhu, tan ña catyí tuhun yu tsihin ndo yóo tava tyiñu tsi yu.

Nu caahán ra Jesús iin cuhva cuenda uvi taahan sehe iin rayi

²⁸ Ra Jesús catyí ra tsihin ra cumi tyiñu vehe ñuhu naha ra:

—¿Nacaa catyí ndo cuenda tsa cua cahan yu ihya? Iin rayi, iyó uvi taahan sehe ra. Tan catyí ra tsihin iin sehe ra: “Cuaahan cua jaha tyiñu nu iyó tyiñu jahá yu.” ²⁹ Tan

nacahan sehe ra tan catyí ra: “iÑa cahun yu!” Maa tyin yaha can tan nasama cuhva tsicá iñi ra tan tsahan ra tsijaha tyiñu ra. ³⁰ Yaha can tan jutu ra cahan ra tsihin inga sehe ra. Tan catyí tucu ra tsihin ra na cahun ra cujaha tyiñu ra. Tan ra ican numi ñi quihñ ra tyiñu tan catyí ra: “Vaha, tyaa, cahun maa yu.” Maa tyin ña tsahan ra. ³¹ Tsitsi tsa nduvi taahan ra can naha ra, ¿ndáa ra javaha tsa cahan jutu ra? —catyí ra Jesús.

Tan nacahan ra naha tan catyí ra naha:

—Ra tsa cahan ra tsihin tsa jihna ñi.

Tan catyí ra Jesús tsihin ra naha:

—Tsa nditsa catyí yu tsihin ndo, tyin nyivi caquiñi tumaa ra tsa tavá xuhun cuenda ra ndacá ñaha tan ñi sñi iñi caca nuu, jihna ca ñi cua quihvi nu ndacá ñaha Nyoo tan ñavin ca nyooho. ³² Tyin ra Juan, ra jacoondutya tsi nyivi, quitsi ra jacuahá ra tsi ndo nácaa taahán tsi coo cuiñi ndo, tan nyooho ña tsinú iñi ndo tsi ra. Maa tyin ra tavá xuhun naha ra tan ñi sñi iñi caca nuu tsinú iñi ñi tsi ra. Tan nyooho vasu ndi maa nyehé ndo yacan, maa tyin ña nasama ndo cuhva iyó ndo, tan ña tsinú iñi ndo tsi ra.

Nu caahán ra Jesús tyin tumaa cuví juhva nu caquiñi nahnu, tacan cuví ra tsa cua cahñi tsi ra

(Mr. 12.1-12; Lc. 20.9-19)

³³ Tyaa soho ndo inga cuhva ihya: Tsicoo iin rayi, tan iyó ñuhu ra. Tan tatsi ra yoho yucu vixi tsa nañi uvas, tan tyihñ ra cora. Tan javaha ra iin nu cua tava ra ndutya uvas can. Tan javaha tucu ra iin vehe sucun tyin cuví jaha cuenda ra tandihí.

Yaha can tan tsaha nuu ra ñuhu can tsi juhva ra cua jaha tyiñu naha ra, tan cuahán ra inga ñuu. ³⁴ Tan tsa tsaá quivi tsa iyó uvas can, jacuhun ra tsi juhva musu ra, na ndacan ra naha tsi ra jahá tyiñu can naha ra, na cuhva ra naha juhva uvas tsa taahán tsi tsi ra. ³⁵ Maa tyin ra jahá tyiñu can tñin ra naha tsi musu can naha ra, tan cañi ra naha tsi iin ra. Tan inga ra tsahñi ra naha, tan cañi ra naha yuu tsi inga ra. ³⁶ Tacan tan tsa inga tsaha, cuaha ca musu jacuhun tsitoho cora can tan ñavin ca tsa jihna ñi. Maa tyin tumaa tsa javaha ra naha tsihin ra tsa tsahan jihna naha ra, tacan ñi javaha nyico ra naha tsihin ra ihya naha ra.

³⁷ Nu ndihí jacuhun ra tsi maa maa sehe ra, tyin cuiñi maa ra tyin cua tyaa yahvi ra naha tsi sehe ra. ³⁸ Maa tyin cuhva tsa nyehé ra jahá tyiñu can naha ra tsi sehe ra, natuhun tahan ra naha tan catyí ra naha: “Ra ihya cua ndoo tsihin tandihí tsa iyó ihya. Na cahñi yo tsi ra tan ndoo maa yo tsihin cora ihya”, catyí ra naha. ³⁹ Tacan tan tñin ra naha tsi ra, tan tavá ra naha tsi ra ityi tsata

cora can, tan tsahñi ra naha tsi ra —catyí ra Jesús.

⁴⁰ Tacan tan tsicá tuhun ra Jesús tsi ra naha tan catyí ra:

—Quivi cua quitsi ra jatsii ñuhu can, ¿náa cua javaha ra tsihin ra jahá tyiñu can naha ra?

⁴¹ Tan nacahan ra naha tan catyí ra naha:

—Ña cua cuatu ra, tyin cua cahñi ra tsi ra caquiñi can naha ra. Tan cua cuhva nuu ra ñuhu can tsi inga ra jaha tyiñu naha ra, tan quivi coo uvas, cua nacuhva cuenda ra naha juhva tsa taahán tsi tsi ra cuví tsitoho cora can.

⁴² Tacan tan catyí ra Jesús tsihin ra naha:

—¿A ñaha ca cahvi nyooho nu tutu Nyoo nu catyí tsi tyehen?

Yuu tsa javitá ihñi ra javahá vehe,

Yacan cuví yuu tsa ñiñi ca.

Jutu yo Nyoo cuví ra tsa javaha tandihí can. Tan iyo xaan cuiñi yo nyehé yo, catyí tsi.

⁴³ Yacan cuenda catyí yu tsihin ndo tyin ña cua cuhva Nyoo cahun ndo nu ndacá ñaha ra. Tan cua cuhva ra tsi nyivi tsa javahá cuhva cuiñi ra tyin nditsa tsahá ñi tsi ñi cundaca ñaha ra. ⁴⁴ Tan tsa cuenda yuu can, yóo nyivi tsa nduva siqui tsi, cua tahnu cuatyí ñi. Tan tatun yuu can tan canacava tsi siqui yóo nyivi, cua taxin nyihi ñi —catyí ra Jesús.

⁴⁵ Cuhva tsa tuví iñi ra jutu tsa cuví ityi nuu can naha ra tan ra fariseo naha ra tyin cuenda maa ra naha cahan ra Jesús cuhva ihya, ⁴⁶ cuiñi ra naha tñin ra naha tsi ra, maa tyin yuuhvi ra naha tsi nyivi tyin tsinú iñi ñi tyin ra Jesús caahán ra cuenda Nyoo.

22

Nu cahan ra Jesús iin cuhva cuenda vico tindaha

(Lc. 14.15-24)

¹ Quitsaha caahán ra Jesús tsihin nyivi inga tsaha tsihin cuhva, tan catyí ra:

² —Tsa ndacá ñaha Nyoo tsi nyivi cuví tsi tumaa iin rey tsa javaha iin vico tsa cuenda tsa cua tindaha sehe ra. ³ Tan jacuhun ra tsi musu ra na cucana ra naha tsi nyivi tsa jacoto ra tyin cahun ñi, maa tyin ñi ican, ña cuiñi ñi cahun ñi. ⁴ Tan jacuhun nyico ra inga ca musu ra, tan catyí ra tsihin ra naha: “Cahan ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahñi yu indiqui tan inga quiti xaahan. Tan tsa iyó vaha tandihí. Yacan na quitsi ñi”, catyí ra. ⁵ Maa tyin ñi ican ña tyaa yahvi ñi tsa cahan ra. Iin ra tsahan ra nu iyó cora ra, inga ra tsahan ra nu jahá tyiñu ra. ⁶ Tan inga ra naha tñin ra naha tsi musu rey can naha ra tan cañi xaan ra naha tsi ra naha nda cuenda tsahñi ra naha tsi ra naha. ⁷ Tacan tan ra rey can cuxaagn xaan

ra, tan jacuhun ra tsi andaru ra na cucahñi ra naha tsi ra tsa tshañi tsi musu can naha ra, tan cahmi ra naha ñuu ra naha. ⁸ Tacan tan catyí ra rey can tsihin musu ra: “Tandihí tan tsa iyó vaha tsa cuenda vico tindaha, maa tyin ñi cana yu, ña taahán tsi tsa quitsi ñi. ⁹ Cuaahan ndo ityi cahnu tan cana ndo tsi tandihí nyivi tsa nañihi ndo na quitsi ñi vico tindaha”, catyí ra rey can. ¹⁰ Musu can cuahán ra naha tandihí ñi ityi, tan jandu iin ra naha tsi tandihí nyivi nañihí ra naha: ñi caquiñi tan ñi vaha iñi. Tacan tan tsitu tsitsi vehe ra tsihin nyivi.

¹¹ Tacan tan quihví ra rey can cua nyehe ra tsi tandihí nyivi tsa yucú vico yuvehe ra. Tan nyehe ra tyin nyaá iin ra tsa nduve jahma vico tindaha nditsi. ¹² Tan catyí ra rey tsihin ra: “Tsa, ¿nacuenda nyii un ihya tan nduve jahma vico tindaha nditsi un?” Tan ña nacahan maa ra can. ¹³ Tacan tan catyí ra rey can tsihin ra tyihí mesa can naha ra: “Cuhñi ndo tsa ra tan ndaha ra, tan tava ndo tsi ra nu naa ityi tsata vehe. Ican cua vacu ra, tan catsan ña cua cuvi nuhu ra”, catyí ra. ¹⁴ Tyin cuaha xaan nyivi nacana Nyoo, maa tyin juhva ñi ñi nacatsi ra —catyí ra Jesús.

Nu caahán ra Jesús tsa cuenda tsa tyahví nyivi xuhun tsi ra ndacá ñaha nda ñuu Roma
(Mr. 12.13-17; Lc. 20.20-26)

¹⁵ Tacan tan cuahán ra fariseo naha ra tan ndoo ra naha tyiñu tyin cua jacahan ra naha tsi ra Jesús iin tsa ña vaha, tyin tacan tan cuvi tyaa ra naha cuatyí siqui ra. ¹⁶ Tan jacuhun ra naha tsi juhva ra yihí cuenda ra naha, iin caa ñi tsihin juhva ra yihí cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahán un. Tan tsihin tsa nditsa janahá un ityi Nyoo. Tan inducu ñi cuñi un nyehe un tsi nyivi cuca tan nyivi ndaahvi. ¹⁷ ¿Nacaa tsicá tucu iñi yooho: A vaha tyahví yo tsa tsicán ra ndacá ñaha nda ñuu Roma, o ña vaha?

¹⁸ Tan ra Jesús tuvj iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyooho tsa jahá tyin vaha xaan ndo, tan ña nditsa. ¿Nacuví tyin nducú cuhva ndo tsi yu? ¹⁹ Janaha jihna ndo iin xuhun tsa tuhvá yo tyahví tsi ra ndacá ñaha tsi yu —catyí ra.

Tan tsindacá ra naha iin xuhun tsa nañi denario tsi ra. ²⁰ Tan tsa nyehe ra Jesús xuhun can, tsicá tuhun ra tsi ra naha tan catyí ra:

—¿Yóo nuu tan yóo sivi nyaá ihya?

²¹ Tan nacahan ra naha tan catyí ra naha:

—Nuu ra ndacá ñaha.

Tacan tan catyí ra Jesús tsihin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

²² Tsa tsiñi ra naha tsa cahan ra Jesús, iyo xaan cuñi ra naha. Tan cuahán ra naha.

Nu cuñi ra cuvi saduceo naha ra jandavi ñaha ra naha tsi ra Jesús

(Mr. 12.18-27; Lc. 20.27-40)

²³ Juvín ñi quivi can juhva ra cuvi saduceo naha ra tsahan ra naha nu nyii ra Jesús. Tan ra cuvi saduceo can ña tsinú iñi ra naha tsa cua nandoto ndiyi quivi tsa cua naa ñuu ñayivi. Yacan cuenda tsicá tuhun ra naha tsi ra Jesús, tan catyí ra naha:

²⁴ —Maestro, ra Moisés catyí ra tyin tatun iin ra tindaha tan tsihi ra tan ña tsicoo sehe ra, taahán tsi tsa tindaha yañi ra tsihin ñasihi ra. Tacan tan cua coo sehe ra tsihin ña tsa cuenda ra yañi ra tsa tsihi. ²⁵ Vaha. Tun iin ra tan iyó utsa sehe yii ra, tan ra tsa jihna ñi tindaha ra. Tan nduve sehe ra tsicoo tsihin ñasihi ra tan tsihi ra. Ndoq ñasihi ra tsi yañi ra tsa tsinu uvi. ²⁶ Tan juvín ñi tsihi ndihi ra can. Tan ndoo ñaha can tsihin ra tsa tsinu uñi, maa tyin juvín ñi tacan tahán ndihi ra. Tan inducu ñi tahán tandihí tsa utsa ra naha. ²⁷ Tan nu ndihi ña tsihi ndihi maa ñaha can. ²⁸ Tatun nditsa tsa cua nandoto nyivi tsihi, ¿ndáa tsa utsa taahan ra can naha ra cua cuvi yii ña? Tyin tandihí maa ra naha tindaha tsihin ña —catyí ra naha.

²⁹ Tan nacahan ra Jesús tsihin ra naha tan catyí ra:

—Nyooho, caahán soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nácaa tsa cahnu cuvi tunyee iñi tsa iyó tsi Nyoo. ³⁰ Tyin quivi cua nandoto nyivi tsihi, ndi ña cua tindaha ñi, tan ndi ña cua cuhva ñi sehe sihi ñi tindaha, tyin cua cuvi ñi tumaa cuvi ángel tsa iyó gloria. ³¹ Tyin tuhun Nyoo tsahá cuenda tsi nácaa cuvi tuhun tsa cua nandoto nyivi tsa tsihi. ¿O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tyehen:

³² “Yuhu cuvi Nyoo cuenda ra Abraham, tan ra Isaac tan ra Jacob.”

Ihya nyehé yo tyin nyito añima ra can naha ra, vasu tsanaha tsihi ra naha. Tyin Nyoo ñavin Nyoo cuenda nyivi tsihi cuvi ra, tyin Nyoo cuvi ra Nyoo cuenda nyivi nyito —catyí ra.

³³ Tan tsa tsiñi nyivi tsa caahán ra Jesús, iyo xaan cuñi ñi.

Ley tsa ñiñi ca tsa tsaha Nyoo

(Mr. 12.28-34)

³⁴ Tsa tsito ra fariseo naha ra tyin ra Jesús tyasi ra yuhu ra saduceo naha ra, ndu iin ra naha. ³⁵ Tan iin ra tsa nyii tsihin ra naha cuvi ra maestro cuenda ley vehe ñuhu tan

cuñi ra nducu cuhva ra tsi ra Jesús. Tan tsica tuhun ra tsi ra, tan catyi ra:

³⁶ —Maestro, ¿ndáa ley cuví tsa ñiñi ca?

³⁷ Tan catyi ra Jesús tsihin ra:

—“Cuñi tsi Jutu Mañi yo Nyoo tsihin tsa ñi ñi un tan tsihin tsa ñi ñi aña un, tan tsihin tandihi tsa tsiñi tuñi jiñi un.” ³⁸ Ley ihya cuví tsa ñiñi ca, tan tsa jihna ñi taahán tsi javaha yo. ³⁹ Tan tsa tsinu uvi, tsa yatyin inducu ñi caahán tsi tumaa caahán tsa jihna ñi tan catyi tsi tyehen: “Cuñi tsi nyivi tahan un tumaa cuñi un tsi maa un.” ⁴⁰ Tatun tyaá yahvi ndo nduvi taahan ley ihya, tsa tyaá yahvi ndihi ndo tandihi ca ley tsa tyaá ra Moisés jahá Nyoo, tan tandihi tuhun tsa jacuahá ra cuví ndusu yuhu Nyoo tañan tsanaha.

Ra Cristo cuví ra Sehe Nyoo tan juvin ñi cuví ra tata ra David

(Mr. 12.35-37; Lc. 20.41-44)

⁴¹ Tsitsi tsa ndi yucú ra fariseo naha ra nu ndu ñiñ ra naha, ⁴² ra Jesús tsica tuhun ra tsi ra naha, tan catyi ra:

—¿Nacaa tsicá ñi nyooho cuenda ra cuví Cristo? ¿Yóo tata cuví ra, cuñi maa ndo?

Tan nacahan ra naha tan catyi ra naha:

—Tata ra David cuví ra.

⁴³ Tacan tan ra Jesús catyi ra tsihin ra naha:

—Tun tacan, ¿nacuenta jacahan Tatyí Ii Nyoo tsi ra David tyin ra ndacá ñaha tsi ra cuví ra Cristo tan catyi ra tyehen?:

⁴⁴ Nyoo cahan tsihin Jutu Mañi yu, ra Cristo, tan catyi ra tsihin ra:

“Cunya xiin cuaha yu nda cuanda caquin yu tsi ra xaan ñiñi un naha ra tsaha un”, catyi ra David.

⁴⁵ ¿Nacaa cuví cuú tucu ra Cristo tata ra David, tan juvin ñi maa ra David catyi ra tyin ra Cristo Jutu Mañi ra cuví tsi ra? —catyi ra Jesús.

⁴⁶ Tan yofi maa cuví nacahan nu cahan ra ndi intuhun maa tuhun. Tan nda quivi can, yofi ca maa cuñi nducu tuhun tsi ra.

23

Nu caahán ra Jesús tyin cuaha xaan cu- atyi ra maestro cuenda ley vehe ñuhu naha ra tan ra fariseo naha ra

(Mr. 12.38-40; Lc. 11.37-54; 20.45-47)

¹ Tacan tan ra Jesús catyi ra tsihin tandihi nyivi, tan tsihin ra tsicá tsihin ra:

² —Ra cuví maestro cuenda ley naha ra tan ra cuví fariseo naha ra taahán tsi tsa jacuahá ra naha cuhva catyi ley tsa tyaá ra Moisés. ³ Yacan cuenda tyaá yahvi ndo tsa caahán ra naha tan javaha ndo tandihi cuhva caahán ra naha tsihin ndo. Maa tyin ña javaha ndo cuhva javahá ra naha, tyin maa ra naha, siin tsa jacuahá ra, tan siin tsa javahá ra naha. ⁴ Janducuahá ca ra naha ley

tsa tsahá Nyoo tañan tsanaha. Tan cuñi ra naha tsa javaha nyivi tandihi can. Maa tyin ña cunyee ñi javahá ñi tandihi can, tan ndi maa ra naha tan ña cuñi ra naha javaha ra naha can. ⁵ Tyin maa ra naha tyaá ra naha caha ñi nu yihí tuhun Nyoo nutyahan ra naha tan soco ra naha, maa tyin nahnu ca can tan ñavin ca tsa nyecú tsi inga ca nyivi. Tan tsinditsi ra naha jahma nañi ca tan ñavin ca tsa iyó tsi inga ca nyivi. Javahá ra naha tandihi can tyin na nyehe nyivi tyin vaha xaan ca ra naha. ⁶ Tan nu vaha ca, cuñi ra naha cunyecu ra naha nu iyó vico tan catsi ra naha. Tan nu vaha ca cuñi ra naha cunyecu ra naha tsitsi vehe ñuhu. ⁷ Tan nu tsicá nuu ra naha cuñi ra naha tyin cuhva nyivi nacumi tsi ra naha tyin jahá ñi tsa ñayivi tsi ra naha. Tan cuñi tucu ra naha tsa catyi ñi “maestro” tsihin ra naha.

⁸ Maa tyin nyooho, ña cuhva ndo tsa cahan nyivi “maestro” tsihin ndo. Tyin intuhun ñi maa ra Cristo cuví maestro tsa nyii tsihin ndo, tan tandihi ca maa ra naha yañi ndo cuví tsi ra naha. ⁹ Tan ña cahan ndo Jutu ndo tsihin ndi intuhun rayii ñuu ñayivi ihya, tyin intuhun ñi ra nyaá gloria cuví Jutu ndo. ¹⁰ Tan ña cahan ndo tyin ra cuví ityi nuu cuví ndo, tyin intuhun ñi maa ra Cristo cuví nuu tsihin ndo. ¹¹ Ra tsa jahá tyiñu tyiñu tandihi ca ra naha, ra ican cuví ra cahnú ca nu yucú ndo. ¹² Tyin ra cahnú jahá tsi ra, cua janduluhlu Nyoo tsi ra. Tan ra ña cahnú jahá tsi ra cua nducahnú ra jaha Nyoo.

¹³ ¿Ndahvi nyooho ra cuví maestro cuenda ley vehe ñuhu tan nyooho ra cuví fariseo tyin jahá ndo tyin vaha xaan ndo, tan ña nditsa! Tyin tyasí ndo yuvehe nu ndacá ñaha Nyoo, tan ña cuví quihvi nyivi. Tan ndi maa ndo ña quihvi ndo, tan ndi ña tsahá ndo tsa quihvi nyivi tsa cuñi quihvi.

¹⁴ ¿Ndahvi nyooho ra cuví maestro cuenda ley tan nyooho ra cuví fariseo. Jahá ndo tyin vaha xaan ndo, tan ña nditsa! Iyo ña cuahán tucu ndo cua ndacan tahvi ndo tsi Nyoo nu tuvi nyivi tyin jahá ndo tyin vaha xaan ndo. Maa tyin nduve náa catyi tyin quihín nyaa ndo vehe ñi ndaahvi tsa tsihi yá tyin ña cuví tyahvi ñi xuhun tsa tsicán ndo tsi ñi. Yacan cuenda cahnú ca tundoho ca nyehe ndo jaha Nyoo.

¹⁵ ¿Ndahvi nyooho ra maestro cuenda ley vehe ñuhu tan nyooho ra fariseo! ¡Jahá ndo tyin vaha xaan ndo, tan ña nditsa! Tyin nanducú ndo ñi cahnú nu ñuhu ñayivi tyin cuñi ndo nañihi ndo vasu intuhun nyivi cun- yicun tsi ndo. Tatun tsa quihvi ñi cuenda ndo, quihvi ca iyó ñi jahá ndo, tan ñavin ca maa ndo. Tan cua cahun ñi anyaya tsihin ndo.

¹⁶ ¿Ndahvi nyooho ra ndaahvi! Tyin cuñi ndo jaquihin ityi ndo tsi nyivi, ¡maa tyin

cuaa ndo! Caahán ndo tyin yóo nyívi cua cahan “Naha Nyoo” tsa cuenda vehe ñuhu, nduve ñi náa cua cuvi tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun cuaan tsa iyó vehe ñuhu, tacan tan taahán tsi javaha ñi tsa cahan ñi, catyí ndo. ¹⁷ ¡Soho xaan ndo tan cuaa ndo! ¿Ndáa tsa cahnu ca cuví? ¿A xuhun cuaan can, a vehe ñuhu tsa jandu íí tsi xuhun cuaan can? ¹⁸ Tan juvin ñi catyí tucu ndo tyin yóo nyívi cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuvi tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda tsa jamañí ñi nu altar, tacan tan taahán tsi javaha ñi tsa cahan ñi, catyí ndo. ¹⁹ ¡Soho xaan ndo tan cuaa ndo! ¿Ndáa tsa cahnu ca cuví? ¿A tsa jamañí ndo nu altar can, o maa altar tsa jandu íí tsa jamañí ndo? ²⁰ Tyin nyívi caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndíhi ñi tsa cuenda tandíhi tsa yosó nu altar can. ²¹ Tan nyívi caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuanda cuenda Nyoo caahán ñi tuhun, tyin iyó ra ican. ²² Tan tacan tucu nyívi tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan.

²³ ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! Jahá ndo tyin vaha xaan ndo tyin cahví ndo ndaha menta tan tsítí anis tsihin tsítí comino, tacan tan tavá ndo intuhun tsi tsa iin iin utsí, tan tsahá ndo tsi Nyoo. Maa tyin ña tyaa yahvi ndo ley nahnu ca tsa taahán tsi javaha yo: tsa javahá yo tsa vaha tsihin tandíhi nyívi, tsa cundaahvi íñi yo tsi ñi, tsa tsinú íñi yo tsi Nyoo tan ña nacoo yo tsi ra. Cuñí tsi javaha ndo tandíhi can, tan ña cua jandíhi ndo tsa cuhva ndo diezmo can. ²⁴ Nyooho ra cuaa, cuñí ndo jaquihin ityí ndo tsi nyívi, maa tyin ña cuví, tyin maa ndo ña jahá ndo cuenda cuatyí nahnu tsa javahá ndo, tan numi xaan nyehé ndo cuatyí nyíhi ñi. Tan cuví tsi tumaa tsa tavá ndo tyucun luhlu nu tsa tsatsí ndo tan coco ndo iin camellu.

²⁵ ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin tumaa nacatyá ndo vasu tan coho, tan ityí tsata ñi tsi nacatyá ndo tan ña nacatyá ndo ityí tsitsi, tyin ityí tsitsi can, nu ña nacatyá ndo, ican cuví añaíma ndo tan tsitu tsi tsihin tsa caquiñi: tsa suhú ndo tan tsa tsicá íñi ndo tsa coo cuaha ndaha tyíñu ndo. ²⁶ ¡Nyooho ra fariseo cuaa! Nacatyá jihna

ndo ityí tsitsi vasu tan coho, tacan tan cua ndoo ndíhi ityí tsata.

²⁷ ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha ndo, tan ña nditsa! Tyin cuví ndo tumaa iin ñaña ndíyi tsa nacahyi, tyin ityí tsata tsi sñi xaan caá, maa tyin ityí tsitsi tsitu yiqui ndíyi, tan tandíhi nuu tsa caquiñi. ²⁸ Tacan cuví nyooho, tyin cuñí nyívi tyin vaha xaan íñi ndo, maa tyin añaíma ndo ican quitá tsa jandaví ñaha ndo tan tandíhi tsa caquiñi ndo.

²⁹ ¡Ndahvi nyooho ra cuví maestro cuenda ley vehe ñuhu, tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutyacuí ndo ñaña ra cuví ndusu yuhu Nyoo, tan nacahyi ndo ñaña nyívi vaha tsicoq tahañ tsanaha. ³⁰ Tacan tan catyí ndo: “Tun tsatyin tsicoq yo quívi tsicoq tsii tsaahnu yo, ña cua jatyinyee yo tsi ra tsahñí tsi ra cuví ndusu yuhu Nyoo”, catyí ndo. ³¹ ¡Tsihin yacan ñi tan nacotó ndo tyin cuví ndo tata nyívi tsahñí tsi ra cuví ndusu yuhu Nyoo! ³² ¡Yacan vityin nyehé maa ndo na jaha ndo, javaha ndíhi ndo tsa javahá tsii tsaahnu ndo, tun cuñí ndo!

³³ ¡Nyooho nyívi caquiñi cuví ndo, tan nyívi cuví tata cool! ¿Nacaa cua cacu ndo tan ña cua cuhun ndo anyaya? Ña cua cuví. ³⁴ Yacan cuenda cua jaquitsi yu tsi ra cuví ndusu yuhu Nyoo nu yucú ndo, cua jaquitsi tucu yu tsi ra tsitó xaan naha ra nu yucú ndo, tan ra maestro naha ra cua tsa ra naha nu yucú ndo. Maa tyin nyooho cua cahñi ndo tsi juhva ra, tan cua tyaa ndo tsi inga ra naha nu cruu. Tan inga ra naha cua cañi ndo tsi ra naha tsitsi vehe ñuhu. Tan cunyaa ndaha ndo tsi ra naha tan iin tan iin ñuu. ³⁵ Yacan cuenda, tsata nyooho cua cun-yaac cuatyí tsa cuenda tandíhi ra vaha tsa tsahñí tsii tsaahnu ndo nda cuanda tsihí ra Abel tan nda cuanda quívi tsihí ra Zacarías, sehe ra Berequías, tsa tsahñí ra naha tsitsi vehe ñuhu yatyin nu nyaá altar tsa yosó tsa jamañí yo tsi Nyoo. ³⁶ Tsa nditsa catyí yu tsihin ndo, tyin tandíhi cuatyí can cua coso siqui nyooho, nyívi tsa iyó vityin —catyí ra Jesús tsihin ra naha.

Nu nducuihya cuñí ra Jesús nyehé ra tsi nyívi ñuu Jerusalén

(Lc. 13.34-35)

³⁷ ¡Ñuu Jerusalén! ¡Ndahvi nyooho nyívi ñuu Jerusalén! Tyin tsahñí ndo tsi ra cuví ndusu yuhu Nyoo. Tan cañi ndo yuu tsi tandíhi ra tsa jaquitsi Nyoo nu yucú ndo. Tan yuhu cuaha xaan tsaha cuñí yu jaha cuenda yu tsi ndo, tumaa iin ndívi sñi tsa jahá cuenda tsi sehe ti, tan naquihín vaha ti sehe ti tsitsi nditsin ti, maa tyin ña cuñí ndo. ³⁸ Nyehé ndo vityin, tyin tsa nacooq ihñi Nyoo tsi ndo. ³⁹ Tan catyí yu tsihin ndo, tyin

ña cua nyehe ca ndo tsi yu nda cuanda quita quivi tsa cua catyi ndo tyin cahnu xaan cuvi ra vatsi tsihin sivi Nyoo Jutu yo —catyi ra Jesús.

24

Nu caahán ra Jesús tyin cua tani vehe ñuhu cahnu

(Mr. 13.1-2; Lc. 21.5-6)

¹Quita ra Jesús tsitsi vehe ñuhu cahnu can, tan tsa cuñi cahun ra, tan natuhva ra tsicá tsihin ra nu nyaá ra, tan quitsaha caahán ra naha cuhva caá vehe ñuhu can tsihin ra.

²Maa tyin nacahan ra Jesús tan catyi ra:

—¿A nyehé ndo tandihi tsa iyó ihya? Tsa nditsa catyi yu tsihin ndo, tyin ihya ndi intuhun ca yuu tan ña cua coso tsata inga tsi. Tandihi maa can tan cua tani —catyi ra.

Nu caahán ra Jesús náa cua cuvi tsa ndi cumañi ca naa ñuhu ñayivi

(Mr. 13.3-23; Lc. 21.7-24; 17.22-24)

³Tacan tan cuahán ra naha yucu Olivo. Tan cuhva tsa nyaá ra Jesús ican, ra tsicá tsihin ra tsahan ra naha nu nyaá ra tan nducú tuhun xeehe ra naha tsi ra tan catyi ra naha:

—Cuñi ndi tsa catyi tuhun un tsihin ndi, ama cua cuvi tandihi tsa cahán un. ¿Nacaa tan coto ndi tatun tsa cuyatyin tsa cua quitsi un inga tsaha tan tsa cua naa ñuhu ñayivi?

⁴Tacan tan nacahan ra Jesús:

—Jaha vaha ndo cuenda coto jandavi ñaha nyivi tsi ndo. ⁵Tyin cuaha xaan ra cua quitsi, tan cua cutyiñu ra naha sivi yu, tan cua catyi ra naha: “Yuhu cuvi ra Cristo, ra tsa jaquitsi Nyoo.” Tan cuaha nyivi cua jandavi ñaha ra naha. ⁶Tan cua ñihi tuhun ndo tyin iyó cuatyí tan cañi tahan nyivi ityi can tan ityi ihya. Maa tyin ña ngayuhvi ndo, tyin tacan taahán maa tsi cua cuvi tsa ndi cumañi ca naa ñuhu ñayivi. ⁷Tyin nyivi iin ñuu cua cañi tahan ñi tsihin nyivi inga ñuu. Tan cua coo cuatyí iin ñuu tsihin inga ñuu. Tan cua coo tama, tan cua coo cuehe, tan cuaha ñi ityi cua taan ñihi. ⁸Tandihí yacan cua cuvi nu ndi cua quitsaha nyehe nyivi tundoho.

⁹Tacan tan cua cuhva cuenda nyivi tsi ndo tsi ra cumi tyiñu naha ra na tatsi tuñi ra naha tsi ndo. Tan cua cahñi ra naha tsi ndo. Tan tandihí nyivi iyó nu ñuhu ñayivi ndasi cua cuñi ñi nyehe ñi tsi ndo tsa cuenda yuhu.

¹⁰Quivi can cuaha xaan nyivi cua jaña ñi tsa tsinú iñi ñi tsi yu, tan ndasi cua cuñi ñi nyehe tahan ñi tsi ñi. Tan cua naxico ñaha tahan ñi tsi ñi. ¹¹Tan cuaha xaan ra caahán cuendu cua coo, tan cua catyi ra naha tyin cuenda Nyoo caahán ra naha. Tan cuaha xaan nyivi cua jandavi ñaha ra naha. ¹²Tan cuaha xaan tsa caquiñi cua coo. Yacan cuenda cua jandihí ñi tsa cuñi tahan ñi tsi ñi. ¹³Maa tyin

nyivi tsa tsinú iñi tsi yu nda cuanda nu ndihi, tan ña cua ndu uvi iñi ñi, cua cacu ñi. ¹⁴Tan tanñi cahnu ñuhu ñayivi cua nacutya tuhun vaha tsa cuenda cuhva tsa ndacá ñaha Nyoo. Tan quivi cua coto nyivi tandihí ñuu tuhun vaha ihya, tacan tan cua naa ñayivi.

¹⁵‘Ra Daniel, ra cuvi ndusu yuhu Nyoo, tyaq ra nu tutu Nyoo tyin coo tsa cua janducaquiñi, tsa cua jativi. Quivi tsa cua nyehe ndo can tsitsi vehe ñuhu Nu Ii, (nyooho tsa cahvi, na cutuñi iñi ndo). ¹⁶Tyin quivi can, nyivi tsa iyó Judea taahán tsi tsa quita ñi ican tan cahun ñi ityi yucu. ¹⁷Tan nyivi yucú jiñi vehe, cua nuu ñi, maa tyin ña cua quihvi ñi tsitsi vehe ñi tan tava ñi tsa iyó tsitsi vehe ñi. ¹⁸Tan nyivi yucú tsitsi cuhu ña cua cunuhu jihna ñi cunaquihin ñi jahma ñi. ¹⁹¡Ndahvi ñiñaha tsa ñuhú sehe quivi can! O tatun iyó sehe ñi tsa tyaxín, ¡ndahvi ñi can! ²⁰Ndacan ndo tsi Nyoo na ña tahan tsi cunu ndo quivi vitsin, tan ndi quivi quitatú yo. ²¹Tyin tundoho tsa cua nyehe nyivi quivi can, ñaha ca maa coo can nda quivi tsa tsinú ñuhu ñayivi. Tan ndi ityi nuu ca ña cua nyehe nyivi tundoho tacan inga tsaha. ²²Tyin tatun ña cua janducuiti Nyoo quivi can, yoñi maa cua cacu. Maa tyin cua janducuiti ra tsa cuenda tsa cuñi ra tsi nyivi nacatsi maa ra.

²³Tatun yóo cua cahan tsihin ndo: “Jihna ndo, ihya nyaá ra Cristo” o “Nyehe ndo, ndacan nyaá ra Cristo”, ña tsinu iñi ndo.

²⁴Tyin cua quitsi ra jandavi ñaha naha ra tan cua catyi ra naha tyin ra Cristo cuvi ra naha. Cua catyi ra naha tyin ndusu yuhu Nyoo cuvi ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda cuanda nyivi tsa nacatsi maa Nyoo tun tsatyn cuvi jaha ra naha. ²⁵Vaha tyin tsa tsitó ndo vityin ihya, jaha ndo cuenda tsi ndo quivi can. ²⁶Yacan cuenda tatun catyi nyivi tsihin ndo: “Nyehe ndo, va ra Cristo nyii nu tsiqui can”, Ña cuhun ndo. O tatun catyi ñi tsihin ndo: “Nyehe ndo, nyii ra tsitsi cuarto ihya”, ña tsinu iñi ndo. ²⁷Tyin tumaa tsa cañi tatsa savi nyehe yo xiñu xaan nda ityi nu caná ñicanyii tan nda cuanda ityi nu tsiyó ñicanyii, tacan cua cuvi quivi quitsi yuhu, Rayii tsa queq̄ nda gloria. ²⁸Tumaa nataká nditsii nu cayucú tsa iñi, tacan cua nataka nyivi yihí cuenda yu quivi quitsi yu inga tsaha.

Nacaa cua quitsi Rayii tsa queq̄ nda gloria inga tsaha

(Mr. 13.24-37; Lc. 21.25-33; 17.26-30, 34-36)

²⁹Tan tsa yaha tsa cua nyehe nyivi tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihí tsa iyó andivi cua nacanda. ³⁰Tacan tan cua quituvi seña ityi andivi tyin vatsí yuhu Rayii tsa queq̄ nda gloria. Cua

quitsi yu nu vico ityi andívi tsihin tunyee ifi cahnú tan tsihin tsa cahnú cuví Nyoo. Tan tandíhi nyívi iyó nu ñuhu ñayívi, cua vacu tsaá xaan ñi tsa cua nyehé ñi tsi yu. ³¹ Tan cuaha ángel cuenda yu cua jaquitsi yu tyin ñihi cua tiví ra naha cutu tan cua jandu iin ra naha tsi nyívi nacatsí maa Nyoo. Cua quita ñi taní cahnú nu ñuhu ñayívi, nda cuanda nu ndíhi ñuhu ñayívi tan nda cuanda nu ndíhi andívi.

³² Cutuñi ifi ndo iin cuhva yutun tsa nañi higo: Tatun tsa yutya soco tun, tan tsa cana ndaha yutya tun, nyooho tsitó ndo tyin tsa cua coo tsiti tun. ³³ Tan juvin ñi tacan, tatun tsa cuví tandíhi yacan nyehé ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi. ³⁴ Tsa nditsa catyí yu tsihin ndo tyin tandíhi yacan cua cuví jihna, tsa ndi cumañi ca cúu nyívi iyó nu ñuhu ñayívi. ³⁵ Tan coo quívi cua cuna andívi tan tsihin ñuhu ñayívi, maa tyin tuhun caahán yuhu, ña cua cundíhi tsi tyin cua cundaa tandíhi tsi.

³⁶ Maa tyin quívi tan hora tsa cua cuví yacan, yoñi tsitó, ndi ángel iyó gloria tan ña tsitó ra naha. Intuhun ñi maa Nyoo Jutu yo tsitó.

³⁷ Tumaa cuví quívi tsa tsicoo ra Noé, tacan cua cuví quívi tsa cua quitsi nyico yuhu Rayí tsa quee nda gloria. ³⁸ Quívi tsa ndi cumañi ca cuun saví xaan, nyívi can, tsatsí ñi, tsihí ñi, tindahá ñi, tan tsahá ñi tsi sehe siíhi ñi tindaha nda cuanda quívi quihví ra Noé tsitsi yutun ndoo. ³⁹ Tan sana ifi ñi tan tsaá saví tan tañi tandíhi ñi. Tan tacan sana ifi ñi tan cua tahan tsi quívi quitsi nyico yuhu Rayí tsa quee nda gloria. ⁴⁰ Tan tatun yucú uvi taahan rayí tsitsi huhu quívi can, intuhun ñi ra cua quihín yu, tan cua nacoo yu tsi inga ra. ⁴¹ Tan quívi can uvi taahan ñaha cua nyico ñi. Intuhun ña cua naquihín yu, tan inga ña cua ndoo ña. ⁴² Cúatu vaha ndo tyin ña tsitó ndo náa hora cua quitsi ra ndacá ñaha tsi ndo. ⁴³ Tan coto ndo tuhun ihya tyin tatun iin tsitoho vehe tan tsitó ra náa cuhva cua quihví ñasuhu tsitsi vehe ra, cua cuatu vaha ra tan ña cua cuhva ra tsa quihví ñasuhu can. ⁴⁴ Yacan cuenda nyooho, cúatu vaha ndo. Tyin sana ifi ndo, tan cua quitsi nyico yuhu Rayí tsa quee nda gloria.

*Musu vaha tan musu ña vaha
(Lc. 12.41-48)*

⁴⁵ Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandíhi ca musu. ⁴⁶ Tan sií xaan cuñi ra cuví musu vaha can, tatun cuhva tsa jahá tyiñu ra tan tsaá tsitoho ra. Tyin tyaá yahví ra tandíhi tsa taahán tsi ica ra. ⁴⁷ Tan tsa nditsa catyí yu tsihin ndo, tyin

tsitoho ra cua nacuhva ra tandíhi cuii tsa cumí ra, cua quíhi ndaha ra, tyin vaha tyaá yahví ra tsihin tyiñu jahá ra. ⁴⁸ Maa tyin iin musu ña vaha tsicá ifi ra tyin cua cucuee tsitoho ra. ⁴⁹ Tacan tan quitsaha cañi ra tsi inga musu, tan tsatsí ra tan tsihí ra nyixi tsihin ra tsiñi naha ra. ⁵⁰ Tacan tan sana ifi ra tan cua tsaá tsitoho ra quívi tsa ña ndatú ra tsi ra, tan hora tsa ña tsitó ra. ⁵¹ Tacan tan tsitoho ra ñihi xaan cua tatsi tuñi ra tsi ra tumaa tuhvá maa ra ica tsihin nyívi tsa jahá tyin vaha xaan ñi tan ña ica ñi tsa vaha. Tacan tan cua vacu ra cuví musu ña vaha can tan cahyu ña cua cuví nuhu ra tsa nyehé ra tundoho.

25

Nu cahan ra Jesús iin cuhva cuenda utsi taahan ñaha yoco

¹ Tsa ndacá ñaha Nyoo tsi nyívi cuví tsi tumaa utsi taahan ñaha yoco tsa quihín lámpara tsa yihí acetye tan cuahán ñi iin vico tindaha tyin cua jatahan ñi tsi ra tsa cua tindaha. ² Uhun taahan ñi, soho xaan ñuhú ifi ñi, tan inga uhun taahan ñi can catsi xaan tsicá ifi ñi. ³ Ñi tsa soho ñuhú ifi can, nyisó ñi lámpara ñi maa tyin ña quihín ñi juhva ca acetye tsa natyihí ñi tsitsi lámpara ñi tatun ndíhi tsi. ⁴ Tan ñi tsa catsi tsicá ifi can, nyisó siín ñi inga yutyí acetye tsa cua natyihí ñi tsitsi lámpara can tatun ndíhi acetye tsa yihí tsitsi lámpara can. ⁵ Tan ra tsa cua tindaha can cucuee xaan ra, tacan tan tñin ñumaahna tsi tandíhi ñi, tan quixí ñi. ⁶ Tacan tan maa ñuu tsiñí ñi iin ndusu tsa catyí tyehen: “¡Tsa vatsí ra tsa cua tindaha! ¡Quita ndo, jatahan ndo tsi ra!” ⁷ Tandíhi ñi can nduvita ñi tan quitsaha janduvahá ñi lámpara ñi. ⁸ Tacan tan quitsaha caahán tsa uhun ñi soho ñuhú ifi can tsihin inga uhun ñi can tan catyí ñi: “Cuhva ndo juhva acetye ndahá ndo tsi ndi, tyin cuñi ndahva lámpara ndi”, catyí ñi. ⁹ Maa tyin ñi yoco tsa catsi tsicá ifi can nacahan ñi tyehen: “Ña cua cuhva ndi tyin coto ña cua cutahan tsi tsa cuenda ndi tan ndi tsa cuenda nyooho. Vaha ca cuhun maa ndo kujata ndo nu cuyahví tsi.” ¹⁰ Maa tyin tsitsi tsa cuahán tsa uhun ñi soho ñuhú ifi can cuajata ñi acetye, tan tsaá ra tsa cua tindaha can. Tan ñi yoco tsa ndatú vaha can, quihví ñi tsihin ra tsitsi vehe nu cua coo vico tindaha. Tan tsicundañi yuvehe can. ¹¹ Yahá can tan tsaá nyico ñi soho ñuhú ifi can, tan catyí ñi: “¡Yooho tata! ¡Nuña yuvehe na quihví ndi!”, catyí ñi. ¹² Maa tyin maa ra nacahan ra, tan catyí ra: “Tsa nditsa catyí yu tsihin ndo tyin ña nacotó yu tsi ndo.”

¹³ Tacan tan quitsaha caahán ra Jesús:

—Cúatu vaha ndo, tyin ña tsitó ndo ndáa quívi tan náa hora cua quitsi nyico yuhu Rayí tsa quee nda gloria.

Nu caahán ra Jesús tsihin yo na jaha tyiñu yo tsihin tsa tsahá Nyoo tsi yo
(Lc. 19.11-27)

¹⁴ Tsa ndacá ñaha Nyoo tsi nyivi cuví tsi tumaa iin rayi tsa nyaá cua quita cuhun inga ñuu nu cañi. Tan caná ra tsi musu ra, tan tsahá cuenda ra xuhun ra tsi ra naha tyin jaha cuenda ra naha.

¹⁵ Iin ra tsahá ra uhun mil xuhun, tan inga ra tsahá ra uvi mil xuhun, tan inga ra tsahá ra iin mil. Tsahá ra tsi intuhun intuhun ra nácaa cuhva tsitó ra jaha tyiñu ra naha tan cua nandaa siqui xuhun can. Tacan tan cuahán ra. ¹⁶ Musu tsa quihín uhun mil xuhun can, ñihi jahá tyiñu ra tsihin xuhun can, tan jahá canaa ra inga uhun mil ca siqui tsi. ¹⁷ Tan juvin ñi tacan tucu ra tsa quihín uvi mil can, jahá canaa ra uvi mil ca tsihin xuhun can. ¹⁸ Maa tyin ra tsa quihín intuhun ñi mil can, tsahan ra tan tsatyá ra iin yavi tsitsi ñuhu tan tyihí xeehe ra xuhun tsitoho ra.

¹⁹ Cuaha quivi yahá tan tsaá nyico tsitoho musu can. Tan quitsahá natavá cuenda ra tsihin intuhun intuhun ra naha. ²⁰ Jihna ca ra tsa quihín uhun mil xuhun can tsaá, tan nacuhvá cuenda ra uhun mil ca siqui can, tan catyí ra: “Taa, uhun mil tsahá un tsi yu, juhun inga uhun mil ihya tsa jahá canaa yu siqui tsi.” ²¹ Tan tsitoho ra catyí ra tsihin ra: “Vaha. Iin musu vaha xaan cuví un. Tan javahá un tandihí tsa cahán yu tsihin un. Luxu ñi xuhun tsahá yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan sii cuñi un tsihin yu.” ²² Yahá can tan tsaá musu tsa quihín uvi mil xuhun can, tan catyí ra: “Taa, uvi mil ñi tsahá un tsi yu, juhun uvi mil ca ihya tsa jahá canaa yu siqui tsi.” ²³ Tan catyí tsitoho ra tsihin ra: “Vaha. Iin musu vaha xaan cuví un, tan javahá un tandihí tsa cahán yu tsihin un. Luxu ñi xuhun tsahá yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quihvi nu vaha ihya, tan sii cuñi un tsihin yu”, catyí ra. ²⁴ Tan cuhva tsa tsaá musu tsa quihín intuhun ñi mil xuhun can, catyí ra tsihin tsitoho ra: “Taa, yuhu tsitó yu tyin xaan xaan un tan cuñi un naquihín un xuhun nu ña jahá tyiñu un, tan cuñi un naquihín un cosecha nu ña tatsí un. ²⁵ Yacan cuenda nayuhví yu tan tsahan yu tan tyihí xeehe yu xuhun un tsitsi ñuhu. Juhun xuhun ihya tsa tsahá un tsi yu”, catyí ra. ²⁶ Tacan tan nacahan tsitoho ra, tan catyí ra tsihin ra: “Musu ña vaha cuví un, tan musu jutsan cuví yooho. Tatun tsitó un tyin naquihín yu nu ña jahá tyiñu yu, tan quihín yu cosecha nu ña tatsí yu, ²⁷ ¿nácaa tyin ña tsityihí un xuhun yu nu banco? Tun tsatyin tacan javahá un, tsa cua quitsi nyico yu cuví naquihín yu xuhun can

tsihin xuhun siqui tsa jahá canaa tsi”, catyí ra. ²⁸ Tacan tan quitsahá caahán ra tsihin ra tsa yucú can naha ra: “Quihin nyaa ndo tsa iin mil tsa ndahá ra, tan cuhva ndo tsi ra tsa ndahá utsi mil. ²⁹ Tyin nyivi jahá tyiñu vaha tsihin tsa iyó tsi ñi, cua cuhva ca yu tsi ñi, tan cua coo cuaha tsi ñi, nda cuanda ndoo ca. Maa tyin nyivi tsa ña cuñi jaha tyiñu tsihin tsa tsahá yu, nda cuanda tsa luxu tsa cumí ñi, cua quihin nyaa ndihi yu. ³⁰ Tan musu tsa ña tsiñi ñuhu tsi yu ihya, tava ndo tsi ra nacuhun ra nu naa itiy tsata, tan ndacan cua vacu tsa ra, tan cahyu ña cua cuví nuhu ra tsihin tsa nyehé ra tundoho.”

Nu cahán ra Jesús tyin cua cutuñi tandihí nyivi

³¹ Quivi cua quitsi nyico yuhu Rayi tsa quee nda gloria, cua quitsi yu tsihin cuaha ángel cuenda yu. Tan cua cunyaa yu tyayu sii caá tan cua cundaca ñaha yu. ³² Tandihí cuñi nyivi iyó naní cahnú nu ñuhu ñayivi cua nataca ñi nuu yu. Tan cua natava siin yu tsi intuhun intuhun ñi, tumaa ra jahá cuenda mbee tavá siin ra tsi mbee ticatyí tan tavá siin tucu ra tsi mbee chivo. ³³ Tan cua tyaa yu tsi mbee ticatyí can tsiyo cuaha yu, tan inga mbee can cua tyaa yu tsiyo satyin yu. ³⁴ Tacan tan yuhu tsa cuví yu Rey cua catyí yu tsihin nyivi nyecú tsiyo cuaha yu: “Ñaha nyooho nyivi tsa nasoco Jutu yu. Na quihín cuenda ndo nu cua cunyecu ndo nu ndacá ñaha Nyoo, tyin tsa cuenda maa ndo javahá ra ihya quivi javahá ra ñuhu ñayivi. ³⁵ Tyin quivi tsiyoco yu, nyooho tsahá ndo tsa tsatsí yu. Quivi na ityi ñi yu, tsahá ndo ndutya tsihí yu. Tan quivi tsicá nuu yu cuví yu ra inga ñuu, tsahá ndo nu quixí yu. ³⁶ Quivi cumañi jahma yu, tsahá ndo jahma tsinditsí yu. Quivi cuhví yu, tsinyehé ndo nu canyí yu. Tan quivi tsinyí yu vehe caa, tsinyehé ndo nu nyí yu”. Tacan cua cahán yu tsihin ñi. ³⁷ Tan ñi tsa vaha ñi can cua ndaca tuhun ñi tsi yu, tan catyí ñi: “Jutu Mañi yu, ¿ama nyehé ndi tsiyoco un, tan tsahá ndi tsa tsatsí un? ¿Ama nyehé ndi na ityi ñi un tan tsahá ndi tsa tsihí un? ³⁸ ¿Ama nyehé ndi tsi un tsicá nuu un cuví un ra inga ñuu tan tsahá ndi vehe nu quixí un? ¿Ama cumañi jahma un, tan tsahá ndi jahma tsinditsí un? ³⁹ ¿Ama nyehé ndi cuhví un, o tsinyí yu vehe caa, tan tsahan ndi tsinyehé ndi tsi un?” cua catyí ñi. ⁴⁰ Tan yuhu tsa cuví Rey cua catyí yu tsihin ñi: “Tsa nditsa catyí yu tsihin ndo, tyin tandihí tumañi ñi tsa javahá ndo tsi ra ndaahvi, ra yañi yu, tsi yuhu javahá ndo tumañi ñi”, cua catyí yu tsihin ñi.

⁴¹ Tacan tan yuhu tsa cuví Rey cua cahán yu tsihin nyivi tsa yucú tsiyo satyin yu tyehen: “Catsiyo ndo nuu yu, nyooho, nyivi taahán tsi cuhun anyaya. Cuaahan ndo nu ñuhu tsa ña cua ndahva maa. Tsinu anyaya

can tyin ican cua coo nu ña vaha tan tatyí ña vaha cuenda nu. ⁴² Tyin tsisoco yu tan nyooho ña tsahá ndo tsa catsi yu. Na ityj íñi yu tan ña tsahá ndo ndutya coho yu. ⁴³ Tsicá nuu yu cuví yu iin ra inga ñuu, tan ña tsahá ndo nu cusu yu. Cumañi jahma yu tan ña tsahá ndo jahma cunditsi yu. Nacuhvi yu tan tsinyij yu vehe caa, maa tyin ña tsahá ndo tsinyehé ndo tsi yu nu tsinyij yu”, cua catyí yu tsihin ñi. ⁴⁴ Tacan tan cua catyí ñi tsihin yu: “Jutu Mañi yu, ¿ama nyehe ndi tsisoco un, o na ityj íñi un, o tsicá nuu un cuví un ra inga ñuu, o nduve jahma un, o nacuhvi un, o tsinyij un vehe caa, tan ña jatyinyee ndi tsi un?” cua catyí ñi. ⁴⁵ Tan yuhu tsa cuví yu Rey cua catyí yu tsihin ñi: “Tsa nditsa caahan yu tsihin ndo tyin tandihi maa tsa ña javahá ndo tsihin nyivi ndaahvi ihya, ña javahá ndihí ndo tsihin yu, cuví can”, cua catyí yu tsihin ñi. ⁴⁶ Tacan tan ñi can cua cuhun ñi nu cayú ñuhu tsa ña cua ndahva maa. Tan nyivi vaha can cua cuhun ñi coo ñi ñayivi nyito tsa ña cua naa maa.

26

Nu nducú ra mandoñi naha ra cuhva nácaa tan tñin ra naha tsi ra Jesús

(Mr. 14.1-2; Lc. 22.1-2; Jn. 11.45-53)

¹ Cuhva tsa ndihí cahan ra Jesús tandihi tuhun can, tan quitsahá catyí ra tsihin ra tsicá tsihin ra:

² —Nyooho tsitó ndo tyin ndi cumañi uvi ca quivi tan tahan tsi vico pascua. Tan yuhu, Rayi tsa quee nda gloria, cua cuhva cuenda nyivi tsi yu na tyaa ra cumi tyiñu tsi yu nu cruu —catyí ra.

³ Quivi can jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu iin ra naha nuquehe vehe tyiñu ra Caifás, ra jutu tsaahnu tsa cuví ityi nuu. ⁴ Tan jandaq ra naha tyiñu nácaa cua jandavi ñaha ra naha tsi ra Jesús tan tñin ra naha tsi ra tan cahñi ra naha tsi ra. ⁵ Tan catyí ra naha:

—Ña cua cahñi yo tsi ra quivi maa vico, coto nduvaa xaan nyivi —catyí ra naha.

Nu tyosó iin ñaha ndutya tami jiñi ra Jesús

(Mr. 14.3-9; Jn. 12.1-8)

⁶ Ra Jesús nyii ra ñuu Betania, vehe ra Simón, ra tsa yihí cuehe tyaaahyu. ⁷ Tan natuhvá iin ñaha nu nyaá ra Jesús, ndahá ña iin yutyi yuu vaha tsitú can yihí ndutya tami. Tan yahvi xaan nyaá ndutya tami can. Tan ra Jesús nyaá ra yuhu mesa, tan ñaha can tyoso ña ndutya can jiñi ra. ⁸ Tsa nyehe ra tsicá tsihin ra, nduxaan ra naha tan catyí ra naha:

—¿Nacuenda jativi ña ndutya tami can?

⁹ Vaha ca tun tsatyin xico ña can, tan ñihi cuaha ña xuhun tsihin can. Tan cuví

jatyinyee ña tsi nyivi ndaahvi tsihin xuhun can —catyí ra naha.

¹⁰ Tan tsa tsiñi ra Jesús tsa caahan ra naha, tacan tan catyí ra tsihin ra naha:

—¿Nacuenda cuñi ndo jandu uvi iñi ndo tsi ñaha ihya? Tan tsa javahá ñi tsihin yu, tsa vaha cuví tsi. ¹¹ Tyin nyivi ndaahvi tandihi ñi quivi cua coo ñi tsihin ndo, maa tyin yuhu, ña naha ca cua cunyi yu tsihin ndo. ¹² Tyoso ña ndutya tami siqui cuñu ñuhu yu, tyin janduvahá ña itsi tyin cua cuhun tsi tsitsi ñuhu. ¹³ Tsa nditsa catyí yu tsihin ndo, tyin tandihi ñi nu cua cahan nyivi tuhun Nyoo tani cahnu ñuhu ñayivi, cua nacatyí tuhun tucu ñi tsa javahá ñaha ihya, na nducuhun iñi nyivi tsi ña —catyí ra Jesús.

Nu xico ra Judas Iscariote tsi ra Jesús

(Mr. 14.10-11; Lc. 22.3-6)

¹⁴ Tacan tan iin ra tsicá tsihin ra Jesús, ra tsa nañi Judas Iscariote, tsahan ra tsicahan ra tsihin ra jutu tsa cuví ityi nuu naha ra.

¹⁵ Tan catyí ra tsihin ra naha:

—¿Nacaa cua tyahvi ndo tsi yu tatun cuhva cuenda yu tsi ra Jesús tsi ndo?

Tacan tan ra jutu can naha ra tsahá ra naha oco utsi xuhun cuitsin tsi ra. ¹⁶ Tan nda quivi can tan quitsahá nducú ra Judas cuhva cua nacuhva cuenda ra tsi ra Jesús tsi ra jutu can naha ra.

Nu cuxiñi ra Jesús tsihin ra tsicá tsihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Quivi jihna ñi tsa quitsahá vico nu tsatsi nyivi paan tsa nduve yutsan iya yihí, ra tsicá tsihin ra Jesús natuhvá ra naha nu nyaá ra tan quitsahá tsicá tuhun ra naha tsi ra tan catyí ra naha:

—¿Numaa cuñi un tsa cujanduvaha ndi tsa cuxiñi un cuenda vico pascua ihya?

¹⁸ Tan catyí ra Jesús tsihin ra naha:

—Cuaahan ndo tsitsi ñuu nda vehe rayi ihya. Tan catyí ndo tsihin ra: “Ra Maestro catyí ra tyin tsa yatyin cua cúu ra, tan vehe maa un cua jacahnu ndi vico pascua”, catyí ndo tsihin ra —catyí ra Jesús.

¹⁹ Tacan tan javahá ra naha cuhva cahan ra Jesús tsihin ra naha. Tan janduvahá ra naha tsa cuxiñi ra naha vico pascua can.

²⁰ Tsa cunaaha tan tsicunyaq ra Jesús nu mesa tsihin tandihi utsi uvi ra tsicá tsihin ra. ²¹ Tan tsitsi tsa tsatsi ra naha, catyí ra Jesús tsihin ra naha:

—Tsa nditsa catyí yu tsihin ndo tyin iin nyooho cua xico ndo tsi yu tsi ra xaan iñi tsi yu.

²² Tan nducuihyá xaan cuñi ra naha, tan quitsahá tsicá tuhun tan iin tan iin ra naha tsi ra tan catyí ra naha:

—Jutu Mañi yu, ¿a ñavin yuhu cuví can?

²³ Tan nacahan ra Jesús tan catyí ra:

—Ra tsa tsatsi iin ñi coho tsihin yu, ra ican cua xico tsi yu. ²⁴ Yuhu, Rayii tsa quee nda gloria, cua tahan yu tumaa tsa caahán nu tutu Nyoo. Maa tyin ndahvi ra ndaahvi tsa cua xico tsi yu. Vaha vihi ca tun tsatyin ña cacu ra —catyí ra Jesús.

²⁵ Tacan tan nacahan ra Judas, ra tsa xico tsi ra, tan catyí ra:

—Maestro, ¿a yuhu cuví can?

Tan nacahan ra Jesús, tan catyí ra:

—Juvín un.

²⁶ Tsitsi tsa tsatsi ra naha, ra Jesús quihín ra paan tan nacuhva ra tyahvi nyoo tsi Nyoo, tan tsahnú sava ra, tan tsaḥa ra tsi ra tsicá tsihin ra, tan catyí ra tsihin ra naha:

—Çatsi ndo. Paan ihya cuví tumaa cuñu ñuhu yu.

²⁷ Yahá can tan quihín tucu ra vasu vinu, tan nacuhva ra tyahvi nyoo tsi Nyoo, tan jahyahá ra tsi tandihi ra naha tan catyí ra:

—Çoho tandihi ndo vinu ihya. ²⁸ Tyin cuví tsi tumaa ñiñi yu. Tan tsihin ñiñi yu cua cundaa tyiñu tsa ndoo Nyoo tsihin ndo, tyin cua cati ñiñi yu tsa cuenda tsa vaha tsi nyivi cuaha, tyin tsihin ñiñi yu cua coo tucahnu iñi cuatyí ñi. ²⁹ Tan catyí yu tsihin ndo, tyin ña cua coho ca yu tahan vinu tsa cuví ndutya uvas ihya, nda cuanda tsa coho yu vinu tsa tsihin ndo nda nu ndacá ñaha Jutu yu gloria —catyí ra.

Nu cahan ra Jesús tyin cua cahan ra Pedro tyin ña nacotó ra tsi ra

(Mr. 14.26-31; Lc. 22.31-34; Jn. 13.36-38)

³⁰ Tsa yahá tsa tsita ra naha iin yaa Nyoo, tan cuahán ra naha yucu Olivo. ³¹ Tacan tan quitsaha caahán ra Jesús tsihin ra naha:

—Tandihi nyooho tan cua nacoo ihñi ndo tsi yu vityin tsacuaa ihya. Tyin nu tutu Nyoo catyí tsi tyehen: “Cua cahñi yu tsi ra jahá cuenda mbee ticatyí jana yu, tan mbee can cua natsatsa ti naha ti”, catyí tsi. ³² Maa tyin tsa yahá nandoto yu, jihna ca yu cua cuhun Galilea, tsa ndi cumañi ca cuhun nyooho.

³³ Tacan tan nacahan ra Pedro tan catyí ra:

—Vasu ndi maa tandihi ra tan ndu uvi iñi ra naha tsa nyicún ra naha tsi un, maa tyin yuhu ña cua ndu uvi iñi yu.

³⁴ Tacan tan catyí ra Jesús tsihin ra:

—Tsa nditsa catyí yu tsihin un tyin juvín ñi maa tsacuaa vityin, tsa ndi cumañi ca vacu tsitooho, uñi tsaha cua cahan un tyin ña nacotó un tsi yu —catyí ra Jesús.

³⁵ Tan ra Pedro catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra.

Tan juvín ñi can catyí tandihi ca ra tsicá tsihin ra.

Nu tsicán tahvi ra Jesús tsi Nyoo nda Getsemani

(Mr. 14.32-42; Lc. 22.39-46)

³⁶ Tacan tan tsaḥa ra Jesús tsihin ra tsicá tsihin ra iin nu iyó cuaha yutun nu nañi Getsemani, tan catyí ra tsihin ra naha:

—Çunyecu ndo ihya tsitsi tsa cuahán yu ndacan cua ndacan tahvi yu.

³⁷ Tan quihín ra tsi ra Pedro tan nduvi sehe ra Zebedeo cuahán tsihin ra. Tan quitsi tucuihaya iñi cahnu tsi ra, tan tsa tuñu cuñi ra. ³⁸ Tacan tan catyí ra tsihin ra naha:

—Cahnu xaan tucuihaya iñi nyaá añima yu, nda cuanda cuñi cahñi ña can tsi yu. Ndoo ndo ihya tan çoo nyito ndo tsihin yu —catyí ra.

³⁹ Tacan tan cuahán ra Jesús luxu ca ityi nuu tan tsicuiñi tsiti ra tan tsaquín ra nuu ra nda nu ñuhu, tan tsicán tahvi ra tsi Nyoo tan catyí ra:

—Tyaa, tun tsatyin cuvi jatsiyo nyaha un tundoho ihya siqui yu, vaha xaan. Maa tyin na ña cuvi cuhva cuñi maa yu, tan na cuvi cuhva cuñi maa un —catyí ra.

⁴⁰ Tacan tan tsaḥa ra nu yucú ra tsicá tsihin ra, tan nyehe ra tyin quixí ra naha. Tan catyí ra tsihin ra Pedro:

—¿A ña cuví coo nyito ndo tsihin yu vasu tan intuhun hora? ⁴¹ Çoo nyito ndo, tan ndacan tahvi ndo tsi Nyoo; tacan tan ña cua javaha ndo cuhva cuñi nu ña vaha. Tsa nditsa tyin añima ndo, cuñi xaan tsi nanducu tsi tsi Nyoo, maa tyin cuñu ñuhu ndo cuví tsa vita cuñi —catyí ra Jesús.

⁴² Tan tsa saḥan ra tsa tsinu uvi tsaha, tsicán tahvi ra tyehen:

—Tyaa, tatun ña cuvi tsa jatsiyo nyaha un tundoho ihya siqui yu, na cuvi cuhva cuñi maa un —catyí ra.

⁴³ Tacan tan tsaḥa ra inga tsaha tan nyehe ra tyin quixí nyico ra tsicá tsihin ra, tyin tsicundasí maa tinuu ra naha tsihin tsa cuñi xaan ra naha cusu ra naha. ⁴⁴ Tacan tan nacoḥa ra tsi ra naha, tan cuahán ra tsa tsinu uñi tsaha cua ndacan tahvi ra. Tan tsicán tahvi ra tsi Nyoo juvín ñi maa tsihin tuhun tsa tsa yahá cahan ra. ⁴⁵ Tacan tan tsaḥa nyico ra nu yucú ra tsicá tsihin ra, tan catyí ra tsihin ra naha:

—Vityin çusu ndo tan quitatu ndo. Tyin tsa tsaḥa cuhva tsa cua nacuhva cuenda ra can tsi Rayii tsa quee nda gloria tsi ra iyó cuatyí naha ra. ⁴⁶ Ndúvita ndo, çohon ndo. Tyin tsa vatsí ra tsa xico tsi yu —catyí ra Jesús.

Nu tsaḥa cuenda ra Judas tsi ra Jesús tsi nu xaan iñi tsi ra nahnu

(Mr. 14.43-50; Lc. 22.47-53; Jn. 18.2-11)

⁴⁷ Ndi caahán ca ra Jesús yacan, tan tsaḥa ra Judas, ra tsa cuví iin ra tsicá tsihin ra Jesús. Tan tsihin ra Judas tsaḥa tucu cuaha

xaan nyivi ndahá mityi tan yutun jacuhun ra cuví jutu tsa cuví ityi nuu naha ra tan ra cuví mandoñi nyivi Israel naha ra. ⁴⁸ Tan ra Judas, ra tsa tsahá cuenda tsi ra Jesús, tsa yahá tsahá ra iin seña tsi ra can naha ra, tyin coto ra naha yóo cua tiin ra naha. Tyin tsa yahá cahán ra tshin ra naha:

—Ra tsa cua tyayuhu yu, ra ican cuví ra tsa cua tiin ndo.

⁴⁹ Tacan tan natuhvá ra Judas nu nyaá ra Jesús tan catyí ra:

—Nacumi tsi un, Maestro.

Tan tyayuhu ra tsi ra.

⁵⁰ Tacan tan nacahan ra Jesús tan catyí ra tshin ra:

—¿Náa tyiñu vatsi un ñih?

Tacan tan natuhvá ra can naha ra tan tiin ra naha tsi ra Jesús.

⁵¹ Tacan tan iin ra cutahán tshin ra Jesús, tavá ra mityi tan tsahnyá ra soho musu jutu tsaahnu tsa cuví ityi nuu. ⁵² Tan catyí ra Jesús tshin ra:

—Natylhi mityi un tsitsi vena un. Tyin tandihi nyivi tsa cañi tahan tshin mityi, juvin ñi tshin mityi cua cúu ñi. ⁵³ ¿A ña tsitó un tyin tatun yuhu tan cuñi yu, cuví ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mül ángel, tan jacacu ra naha tsi yu? ⁵⁴ Maa tyin tatun tacan javaha yu, ¿nácaa cua cundaa tsa nyaá nu tutu Nyoo nu catyí tsi tyin taahán maa tsi tsa tahan yu tyehen? —catyí ra.

⁵⁵ Tacan tan catyí ra Jesús tshin tandihi nyivi:

—¿A vatsi tiin ndo tsi yu tumaa cua tiin ndo iin ñasuhu? tyin ndahá ndo mityi tan yutun. Tandihí quivi tsinyij yu jacuhá yu tsi ndo tsitsi vehe ñuhu cahnu, tan ña tiin ndo tsi yu. ⁵⁶ Tandihí yacan cuví tyin tacan tan cundaa kuhva catyí tuhun Nyoo, tsa tyaa ra cuví ndusu yuhu Nyoo tahán tsanaha.

Tacan tan tandihí ra tsicá tshin ra, tsinu ra naha. Tan ndoq intuhun ña maa ra.

Nu tsicá tuhun ra mandoñi naha ra tsi ra Jesús tatun Sehe Nyoo cuví tsi ra

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Tan ra tsa tiin tsi ra Jesús, tsindaca ra naha tsi ra nuu ra Caifás, ra jutu tsaahnu tsa cuví ityi nuu. Tan iin cahnu ñi yucú ra maestro cuenda ley vehe ñuhu naha ra ican tan ra mandoñi naha ra. ⁵⁸ Tan ra Pedro cuahán ra tsata ra naha, tan tsaq ra náa nuquehe vehe ra Caifás can. Tan quihvi ra tan ndoq ra nyíi ra tshin vitya can naha ra, tyin cua nyehe ra nácaa cua quita tuhun can.

⁵⁹ Ra jutu tsa cuví ityi nuu naha ra, tan ra mandoñi naha ra, tan tandihí ra cumí tyiñu naha ra, nducú ra naha tsi ra cahan cuendu siqui ra Jesús. Tyin tacan tan cuví cahñi ra naha tsi ra. ⁶⁰ Maa tyin ña ñihí maa ra naha

cuatyí tyaa ra naha siqui ra, vasu ndi maa cuaha nyivi tsahan ñi tsicahan ñi cuendu siqui ra. Tan nu ndihí tuhun, tsaq uvi ca tsa ndaa tsa caahán cuendu. ⁶¹ Tan catyí ra naha:

—Ra ihya, catyí ra tyin cuví caní ra vehe ñuhu cahnu Nyoo, tan tsitsi tsa uñi quivi cua janduvita ra tsi inga tsaha —catyí ra naha.

⁶² Tacan tan ra jutu tsa cuví ityi nuu can, nduvita ra, tan catyí ra tshin ra Jesús:

—¿A ña nacahan un nu caahán ra ihya naha ra? ¿A nditsa tsa caahán ra ihya naha ra, o ña nditsa?

⁶³ Maa tyin ra Jesús ña nacahan ra. Tacan tan catyí ra jutu tsaahnu tsa cuví ityi nuu tshin ra:

—Tshin siivi Nyoo nyitó, catyí yu tshin un tyin catyí un tsa nditsa vaha. ¿A ra Cristo Sehe Nyoo cuví tsi un? —catyí ra.

⁶⁴ Tan catyí ra Jesús tshin ra:

—Juvín yu cuví. Tan catyí tucu yu tshin ndo, tyin cua nyehe ndo tsi yuhu, Rayii tsa quee nda gloria, cunyaa yu xiin cuaha Nyoo ra iyó tandihí tunyee iñi, tan cua nyehe ndo nu cua quitsi yu nu vico ityi andivi inga tsaha —catyí ra.

⁶⁵ Tacan tan ra jutu tsaahnu tsa cuví ityi nuu can tsahnyá ra jahma ra tumaa iin seña tyin cuñi maa ra tyin ña vaha tsa caahán ra Jesús, tan catyí ra tshin tandihí ca ra naha:

—Ra ihya tsicoq cuatyí ra nuu Nyoo tshin tsa caahán ra. ¡Nyehe ndo vityin! Ña cuñi ca tsi tsa nducu yo inga tsa ndaa tyin tsa tsiiñi maa ndo tsa ña vaha tsa cahán ra. ⁶⁶ ¿Náa catyí ndo vityin?

Tan nacahan ra naha tan catyí ra naha:

—Iyó cuatyí ra, yacan taahán tsi tsa cúu ra.

⁶⁷ Tacan tan tiví sií ra naha nuu ra tan cañi ra naha tsi ra. Inga ra cañi ra naha nuu ra tshin tsiqui. ⁶⁸ Tan catyí ra naha tshin ra:

—Tatun nditsa tyin ra Cristo cuví un, ¡ñacoto yóo cañi tsi un!

Nu cahán ra Pedro tyin ña nacotó ra tsi ra Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Tsitsi tsa ndi nyíi ra Pedro nuquehe ityi tsata vehe can, tan iin ñaha tsa cuví musu jutu can, natuhvá ña nu nyaá ra tan catyí ña tshin ra:

—Yooho tucu tsicá un tshin ra Jesús, ra Galilea can.

⁷⁰ Tan ra Pedro catyí ra nuu tandihí nyivi yucú can:

—Ña tsicá yu tshin ra can. Ña tsitó yu náa caahán un.

⁷¹ Tacan tan cuahán ra Pedro ityi yuvehe nu cuví yuhu cora, tan nyehe inga ña tsi ra, tan catyí ña tshin ra yucú can:

—Juvín ñi tsicá ndihí tucu ra ihya tshin ra Jesús, ra ñuu Nazaret —catyí ña.

⁷² Tan inga tsaha tyihj xeehe ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

⁷³ Tañi cuii ca, tan ra yucú can natuhva ra naha nu nyaá ra Pedro tan catyí ra naha tsihin ra:

—Nditsa tyin ra vaha ifi tsi ra can cuví yooho, tyin cuhva caahán ra Galilea naha ra, caahán un.

⁷⁴ Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cahñi maa Nyoo tsi yu tatun ña nditsa tsa caahán yu —catyí ra.

Tan juvin ñi cuhva can navacu tsitooho.

⁷⁵ Tacan tan nducuhun ifi ra Pedro tsa cahán ra Jesús tsihin ra: “Tsa ndi cumañi ca vacu tsitooho, yooho tsa yahá cahán un uñi tsaha tyin ña nacotó un tsi yu”, catyí ra Jesús, nducuhun ifi ra. Tacan tan quita ra ican, tan tsacu xaan ra tsa cuihya cuñi ra tsa javahá ra tacan.

27

Nu nacuhva cuenda ra naha tsi ra Jesús tsi ra Pilato

(Mr. 15.1; Lc. 23.1-2; Jn. 18.28-32)

¹ Tan tsa tuví inga quivi, tandihi ra jutu tsa cuví ityi nuu naha ra tan ra mandoñi ñuu can naha ra, ndoo ra naha tyiñu tsa cua cahñi ra naha tsi ra Jesús. ² Tan nu-uhñi ra jahá ra naha. Tan tsahán ra naha tsinacuhva cuenda ra naha tsi ra nuu ra Poncio Pilato, ra ndacá ñaha tsa quee nda ñuu Roma.

Nu tsihi ra Judas

³ Tsa nyehe ra Judas, ra tsa xico tsi ra Jesús, tyin cua cúu ra, tan ndu uví ifi ra tsa javahá ra, tan nacuhva ra tsa oco utsi xuhun cuitsin can tsi ra jutu tsa cuví ityi nuu naha ra, tan tsi ra mandoñi ñuu naha ra. ⁴ Tan catyí ra:

—Tsicoo cuatyí yu, tyin tsahá cuenda yu tsi iin ra nduve cuatyí na cúu ra.

Tan nacahán ra naha tan catyí ra naha:

—¿Nacuenda nyuhu? ¡Nyehe maa yooho!

⁵ Tacan tan tyoso ihñi ra Judas xuhun can tsitsi vehe ñuhu cahnu, tan quita ra cuahán ra tsityihj ra yoho jucun ra tan ticaá ra tsi ra iin nu yutun, tan tsihi ra.

⁶ Ra cuví ityi nuu tsihin jutu can naha ra naquihñi ra naha xuhun can tan catyí ra naha:

—Ña cuví tyihi yo xuhun ihya tsitsi caja nu yihí xuhun tsa tsahá nyivi tsi Nyoo tyin xuhun tsa cuyahví ra tsa cua cati niñi cuví can.

⁷ Tacan tan ndoo ra naha tyiñu, tyin cua jata ra naha ñuhu tsa nañi “Ñuhu Ra Javahá Quisi” tsihin xuhun can. Tyin coo nu cucutsi ra naha tsi nyivi inga ñuu tun tsihi ñi ñuu

can. ⁸ Yacan cuenda nañi ñuhu can nda cuanda vityin “Ñuhu Cuenda Tsa Tsatí Niñi Nyivi”. ⁹ Tacan cuví tyin cundaá tsa tyaá ra Jeremías, ra cuví ndusu yuhu Nyoo tahán tsanaha nu catyí tsi tyehen: “Juvín ñi maa ra naha quihñi nyico tsa oco utsi xuhun cuitsin, tsa jata ra naha tsi ra Cristo. ¹⁰ Tan tsihin can, jata ra naha ñuhu tsa nañi ‘Ñuhu Ra Javahá Quisi’, tacan catyí Jutu Mañi yo tsihin yu”, catyí tsi.

Nu nyehe ra Pilato tyin nduve cuatyí ra Jesús

(Mr. 15.2-5; Lc. 23.3-5; Jn. 18.33-38)

¹¹ Tsiñacá ra mandoñi can naha ra tsi ra Jesús nuu ra ndacá ñaha, tan ra can tsica tuhun ra tsi ra, tan catyí ra:

—¿A yooho cuví rey cuenda nyivi Israel?

Tan ra Jesús catyí ra tsihin ra:

—Juvín yu, tumaa cuhva catyí maa un.

¹² Tan cuhva tsa tyaá ra jutu can naha ra tan ra mandoñi naha ra cuatyí siqui ra, ña nacahán maa ra. ¹³ Tacan tan catyí ra Pilato tsihin ra:

—¿A ña tsiñi un tandihi tsa caahán ra naha siqui un?

¹⁴ Maa tyin ra Jesús ña nacahán maa ra. Tan iyo xaan cuñi ra ndacá ñaha can tyin ña nacahán ra.

Nu cahán ra cumi tyiñu tyin taahán tsi cúu ra Jesús

(Mr. 15.6-20; Lc. 23.13-25; Jn. 18.38—19.16)

¹⁵ Tan vico pascua tuhvá ra ndacá ñaha jañá intuhun ra yucú vehe caa. Ndáa ra tsa nacatsi maa nyivi, juvin ra cua quita nuña.

¹⁶ Tan quivi can nyí iin ra tsa nañi Barrabás vehe caa. Tan tandihi nyivi tsitó tuhun ra. ¹⁷ Tan cuhva tsa ndu iin nyivi, ra Pilato tsica tuhun ra tsi ñi, tan catyí ra:

—¿Ndáa ra cuñi ndo tsa tava nuña yu? ¿A ra Barrabás, o ra Jesús, ra tsa nañi Cristo? —catyí ra.

¹⁸ Tyin tsitó ra tyin tsa cuenda tsa ndasi cuñi ra jutu can naha ra nyehe ra naha tsi ra Jesús, yacan cuenda tsahá cuenda ra naha tsi ra tsi ra Pilato.

¹⁹ Tsitsi tsa nyaá ra Pilato nu tyayu ra, nu jahá tyiñu ra, jacuhun ñasihi ra tyiñu tsi ra tan catyí ña: “Ña tyihi un tsi un tsihin ra vaha can. Tyin cuñi nyehe yu ñumaahna tsa cuenda ra. Tan jayuhví xaan tsi tsi yu”, catyí ña.

²⁰ Maa tyin ra jutu can naha ra tan ra mandoñi naha ra, cuñihj ra naha natyuhú ra naha tsi nyivi na ndacan ñi tsa jaña ra Pilato tsi ra Barrabás, tan na cúu ra Jesús. ²¹ Tacan tan ra ndacá ñaha catyí ra tsihin ñi inga tsaha:

—Tsitsi tsa nduvi ra naha, ¿ndáa ra cuñi ndo tsa jaña yu?

Tan nacahán ñi, tan catyí ñi:

—Jaña tsi ra Barrabás.

²² Tan ra Pilato tsicã tuhun ra tsi ñi, tan catyí ra:

—¿Tan náa cua javaha yu tsihin ra Jesús tsa nañí Cristo ihya?

Tandihí ñi nacahan ñi tan catyí ñi:

—¡Tyaã tsi ra nu cruu na cúu ra!

²³ Tacan tan catyí ra Pilato tsihin ñi:

—Tan çnáa tsa ña vaha javaha ra?

Maa tyin maa ñi canã tsaa ñi inga tsaha tan catyí ñi:

—¡Tyaã tsi ra nu cruu na cúu ra!

²⁴ Tsa nyehe ra Pilato tyin ña cuví jaha ra tsi nyívi, tyin ñihi xaan cuvá jahá ñi. Tacan tan tsican ra ndutya, tan nacatyã ra ndaha ra nuu nyívi can, tan catyí ra:

—Ña cua ndoo cuatyí tsa cua cúu ra vaha ihya siqui yuhu, tyin siqui nyoooho cua ndoo cuatyí can.

²⁵ Tan tandihí nyívi nacahan ñi, tan catyí ñi:

—Na ndoo maa tsi siqui ndi tan siqui sehe ndi.

²⁶ Tacan tan ra Pilato jaña ra tsi ra Barrabás, tan tavã tyiñu ra na ndoho ra Jesús, tan nacuhvã cuenda ra tsi ra tsi ra andaru naha ra na cúu ra nu cruu.

²⁷ Tacan tan ra andaru cuenda ra Pilato, ra ndacá ñaha can tsindacã ra naha tsi ra Jesús nda vehe tyiñu ra Pilato, tan jandu iin ra naha tsi tandihí ca andaru nu nyaá ra. ²⁸ Tacan tan tavã ra naha jahma ra tan jacunditsí ra naha iin jahma cuaaha tsi ra. ²⁹ Tan tyihí ra naha iin corona tsa tsiní tsihin iñu jiñi ra. Tan tsaha ra naha iin yutun tatun na cundaha ra tsihin ndaha cuaaha ra. Tacan tan tsicuñí tsi ra naha nuu ra, tan tsacú nducu ra naha tsi ra tan catyí ra naha:

—¡Nacumi tsi un, yooho Rey cuenda nyívi Israel!

³⁰ Tan tiví sã ra naha tsi ra. Tan quihín ra naha yutun tatun can tan cañí ra naha jiñi ra. ³¹ Tsa yaha tsa tsacú nducu ra naha tsi ra tan tavã ra naha jahma cuaaha tsa nditsí ra, tan jacunditsí nyico ra naha jahma maa ra tsi ra. Tacan tan cuahán ra naha tsihin ra cua cahñi ra naha tsi ra nu cruu.

Nu tyaã ra naha tsi ra Jesús nu cruu

(Mr. 15.21-32; Lc. 23.26-43; Jn. 19.17-27)

³² Tsa quitã ra naha ican, tahañ ra naha tsi iin ra ñuu Cirene, tsa nañí Simón. Tan jañiñí ra naha tsi ra na cuiso ra cruu ra Jesús.

³³ Tan tsaa ra naha iin nu nañí Gólgota, tan cuñí tsi catyí “Yiqui Jiñi Ndiyí”. ³⁴ Tan ican tsaha ra naha vinu nasacã tsihin ndutya uva xaan coho ra Jesús. Tan tsa yaha tsa tsihí ra luxu can, ña cuñí ca ra coho ra.

³⁵ Tan tsa yaha tsa tyaã ra naha tsi ra nu cruu, tacan tan ra andaru can quihín ra naha jahma ra tan tavã cuenda ra naha

tyin cua nyehe ra naha ndáa ra jaha canaa intuhun intuhun jahma ra. Tacan cuví tyin cundaã tuhun tsa tyaã iin ra cuví ndusu yuhu Nyoo tahañ tsanaha nu catyí tsi tye-hen: “Tavã cuenda ra naha tan tsatsã ra naha jahma yu”, catyí tsi. ³⁶ Tacan tan tsinyecú ra naha ican tyin jaha cuenda ra naha tsi ra. ³⁷ Tan ityi jiñi ra tyaã ra naha letra tsa catyí nacuenta cua cúu ra. Tan catyí tsi tye-hen: “Ra ihya cuví ra Jesús, rey cuenda nyívi ñuu Israel.”

³⁸ Tan tyaã tucu ra naha uvi taahan ra suhu tsihin ra nu uvi taahan ca cruu. Iin ra tyaã ra naha xiin cuaaha ra, tan inga ra xiin satyin ra. ³⁹ Tan nyivi tsa yaha ican, caahán ñi tsi ra, tan javicó ñi jiñi ñi tsa tsacú nducu ñi tsi ra. ⁴⁰ Tan catyí ñi tsihin ra:

—¡Yooho tsa cahan un tyin cua caní un vehe ñuhu cahnu, tan tsitsi tsa uñi quívi tan cua janduvaha nyico un itsi, jacacu tsi maa un vityin nu cruu juvin, tatun nditsa tyin Sehe Nyoo cuví tsi un! —catyí ñi tsihin ra.

⁴¹ Tan juvin ñi tacan tsacú nducu ra jutu tsa cuví ityi nuu naha ra tsi ra, tan ra maestro cuenda ley vehe ñuhu naha ra tan ra fariseo naha ra, tan ra mandoñi ñuu naha ra. Tan natuhún tahan ra naha tan catyí ra naha:

⁴² —Jacacú ra tsi inga nyívi, maa tyin ña cuví jacacu ra tsi maa ra. Tun nditsa tyin Rey cuenda nyívi Israel cuví ra, na nuu ra nu cruu can, tan cua tsinu iñi yo tsi ra. ⁴³ Nditá xaan iñi ra tsi Nyoo, vityin na jacacu Nyoo tsi ra, tatun nditsa tyin cuñi ra tsi ra. Tyin catyí ra tsihin yo tyin Sehe Nyoo cuví tsi ra.

⁴⁴ Tan nda cuanda nu ñasuhu nahnu tsa nyaá nu cruu xiin ra tan tsacú nducu ndihí nahnu tsi ra.

Nu tsihí ra Jesús

(Mr. 15.33-41; Lc. 23.44-49; Jn. 19.28-30)

⁴⁵ Tacan tan ndunaã taní cahnu ñuhu ñayívi tsa ora tan nda cuanda caa uñi tsa tseñi. ⁴⁶ Tan juvin ñi cuhva can, ñihi xaan canã tsaa ra Jesús. Tan catyí ra:

—Elí, Elí, ¿lama sabactani? —tan cuñí tsi catyí: Nyoo Jutu yu, Nyoo Jutu yu, ¿nacuenta nacoó ihñi un tsi yu?

⁴⁷ Juhva ra yucú can naha ra, tsiñí ra naha tsa cahan ra, tan catyí ra naha:

—Ra Elías, ra cuví ndusu yuhu Nyoo tsanaha, canã tsaa ra.

⁴⁸ Tan juvin ñi cuhva can, cuahán iin ra cua quihín ra iin yahma cuhva caá catyí, tan jatyií ra tsihin vinu iya, tan tyaã ra nu yutun, tan jatuhvã ra yuhu ra Jesús tyin na coho ra. ⁴⁹ Maa tyin inga ra naha catyí ra naha:

—Ña cuhva naha un can tsi ra; na nyehe jihna yo tatun cua quitsi jacacu ra Elías tsi ra.

⁵⁰ Inga tsaha cana tsaa ñihi ra Jesús, tacan tan tsihi ra. ⁵¹ Tan juvin ñi cuhva can ndata sava jahma tsa ticaá tsitsi vehe ñuhu cahnú tyasi Nu li Xaan, nda cuanda ityi siqui tan nda cuanda ityi tsaha. Tan ñihi xaan taan. Tan tahvi cuatyí cava nahnú. ⁵² Tan nuña yuhu ñaña. Tan cuaha nyivi tsa tsinú iñi tsi Nyoo tan tsihi ñi, nandoto ñi. ⁵³ Tan tsa yaha nandoto ra Jesús quita ñi nu ñaña tan quihvi ñi tsitsi ñuu Jerusalén, tan cuaha nyivi nyehe tsi ñi. ⁵⁴ Tacan tan ra capitán tan ra andaru tsa jahá cuenda tsi ra Jesús, nayuhvi xaan ra naha tsa taan, tan tsa nyehe ra naha inga ca tsa cuví. Tan catyí ra naha:

—Nditsa nditsa cuii, tyin Sehe Nyoo cuví tsi ra ihya.

⁵⁵ Cuaha ñiñaha tsa tsinyicun tsi ra Jesús nda Galilea tan jatyinyee ñi tsi ra, yucú ñi nyehe ñi ndasava. ⁵⁶ Tan juhva ñi ican cuví ñi ihya: ña María tsa quee Magdala, tan ña María sibi ra Jacobo tan ra José, tan ñasihi ra Zebedeo.

Nu tsicutsi ra naha tsi ra Jesús

(Mr. 15.42-47; Lc. 23.50-56; Jn. 19.38-42)

⁵⁷ Cuhva tsa cuñi cuaa, quitesí iin ra cuca tsa nañi José, ra ñuu Arimatea. Tan tsinú iñi ra tsi ra Jesús. ⁵⁸ Tan tsahan ra tsicahan ra tsihin ra Pilato, tan tsican ra cuñu ñuhu ra Jesús. Tacan tan tava tyiñu ra Pilato na cuhva ra andaru naha ra cuñu ñuhu ra Jesús tsi ra. ⁵⁹ Tacan tan quihñi ra José cuñu ñuhu ra, tan cava nuu ra iin jahma cuitsin vaha tsi ra. ⁶⁰ Tan tyihí ra cuñu ñuhu ra Jesús tsitsi iin ñaña tsa tsa cuví iin yavi yuu tsa tava tyiñu ra tsatyá ra naha. Tan tsa yaha tsa nacasi ra yuhu ñaña can tsihin iin yuu cahnú, tan cuahán ra. ⁶¹ Tan ña María tsa quee Magdala, tan inga ña María, ndoo ñi yucú ñi yuhu ñaña can.

Nu jahá cuenda ra andaru ñaña ra Jesús

⁶² Tan tsa inga quivi, quivi quitatú nyivi cuví can, tan ra jutu tsa cuví ityi nuu naha ra, tan ra fariseo naha ra tsahan ra naha tsicahan ra naha tsihin ra Pilato. ⁶³ Tan catyí ra naha tsihin ra:

—Yooho taa, nducuhun iñi ndi tyin ra vatya can, catyí ra tsahan nyito ra tyin tsa yaha tsa uñi quivi tsa cua cúu ra tan cua nandoto ra. ⁶⁴ Yacan cuenda tava tyiñu na jaha cuenda vaha ra andaru naha ra ñaña can, nda yaha tsa uñi quivi, coto cuhun ra tsica tsihin ra tsa tsacuaa, tan suhu ra naha cuñu ñuhu ra. Yaha can tan cua catyí ra naha tsihin nyivi tyin tsa nandoto ra. Tatun tacan cua cuví, yaha ca cuhva cua cuví tan ñavin ca tsa jihna ñi —catyí ra naha.

⁶⁵ Tan ra Pilato catyí ra:

—Quihin ndo andaru ihya. Cuaahan ndo, tan jaha cuenda vaha ndo ñaña can, nácaa cunye maa ndo jaha cuenda ndo —catyí ra.

⁶⁶ Tacan tan cuahán ra naha, tan jahá cuenda vaha ra naha ñaña can, tan tyaa ra naha iin tsa tyaa ra naha tsata yuu tsa ndasi can tyin tatun nacanda yuu can coto ra naha. Tan nacoq ra naha tsi ra andaru jahá cuenda ra naha ican.

28

Nu nandoto ra Jesús

(Mr. 16.1-8; Lc. 24.1-12; Jn. 20.1-10)

¹ Tsa yaha quivi tsa quitatú nyivi, cuhva tsa cuñi cunditsin, nu quitsaha tsaha vitya, tan ña María tsa quee Magdala can, tan inga ña María tsahan ñi nu ñaña. ² Tan ñihi xaan taan tyin quitesí iin ángel Jutu Mañi yo quee ra andivi, tan tsaq ra nu ñaña can. Tan jatsiyó ra yuu tsa ndasi yuhu can, tan tsicun-yaq ra tsata can. ³ Tan xiñu xaan ra, tumaa tsa cañi tatsa. Tan cuitsin xaan jahma ra. ⁴ Cuhva tsa nyehe ra andaru can naha ra tsi ra, nayuhvi xaan ra naha tan quitsaha ñihí ra naha, tan nda cuanda tsihi naaha ra naha tsihin tsa yuhvi ra naha. ⁵ Tacan tan catyí ángel can tsihin ñiñaha can:

—Ña nayuhvi ndo. Yuhu tsitó yu tyin ra Jesús tsa tsihi nu cruu nanducú ndo. ⁶ Yoñi ca ra nyii ihya, tyin tsa nandoto ra, tumaa catyí ra. Naha ndo tan nyehe ndo nu tinyii ra naha tsi ra. ⁷ Janumi xaan ndo cuhun ndo cucatyí tuhun ndo tsihin ra tsica tsihin ra tyin tsa nandoto ra, tan tsa cuahán ra nda Galilea, cua cuatu ra tsi ra naha ndacan. Yacan cuví tsa catyí tuhun yu tsihin ndo —catyí ángel can tsihin ñi.

⁸ Tacan tan numi ñi quita ñi nu ñaña can. Yuhvi ñi, tan sii xaan cuñi tucu ñi. Tan tsinú xaan ñi cuahán ñi cua catyí tuhun ñi tsihin ra tsica tsihin ra Jesús. ⁹ Tan cuhva can quituví ra Jesús nuu ñi tan tsaha ra nacumi tsi ñi. Tacan tan natuhva ñi nu nyaá ra tan tsicuiñi tsiti ñi nuu ra tan jacahnú ñi tsi ra, tan tsicumumj nyaá ñi tsaha ra. ¹⁰ Tan catyí ra tsihin ñi:

—Ña nayuhvi ndo. Cuaahan ndo cuja-coto ndo tsi yañi yu tyin na cuhun ra naha nda Galilea, tan ndacan cua ñihi tahan ndi —catyí ra tsihin ñi.

Tuhun tsa nacatyí tuhun ra andaru naha ra

¹¹ Tsitsi tsa cuahán ñi can, juhva andaru tsa jahá cuenda ican, cuahán ra naha nda ñuu, cua nacatyí tuhun ra naha tsa cuví can tsihin ra jutu tsa cuví ityi nuu naha ra. ¹² Tacan tan ra jutu can naha ra tsahan ra naha tsicahan ra naha tsihin ra mandofi ñuu naha ra na natuhun tahan ra naha nácaa cua javaha ra naha. Tacan tan cuaha xaan xuhun tsaha ra naha tsi ra andaru can naha ra. ¹³ Tan catyí ra naha tsihin ra naha:

—Nyooho cua cahan ndo tyin tsa tsacuaa tsitsi tsa quixí ndo, tsahan ra tsicá tsihin ra Jesús tan quih̄in ra naha cuñu ñuhu ra. ¹⁴ Tan tatun cua coto ra ndacá ñaha tuhun ihya, cua nyehe maa ndi nácaa cua cahan ndi tsihin ra, tan nyooho ña caca iñi ndo. Nduve náa cua tahan ndo. ¹⁵ Tacan tan quih̄in ra andaru can xuhun can, tan cuahán ra naha cuajavahá ra naha cuhva catȳi ra naha tsihin ra naha. Tan nda quivi vityin tan tacan caahán nyivi ñuu Israel.

Nu tav̄a tyiñu ra Jesús tsi ra tsicá tyiñu ra (Mr. 16.14-18; Lc. 24.36-49; Jn. 20.19-23)

¹⁶ Tan tacan, tandih̄i tsa utsi iin ra tsicá tsihin ra, cuahán ra naha nda Galilea nda yucu nu catȳi maa ra Jesús tsihin ra naha tyin cuhun ra naha. ¹⁷ Tan cuhva tsa nyehe ra naha tsi ra Jesús, jacahn̄u ra naha tsi ra, maa tyin juhva ra naha uvi ñi tsicá iñi ra naha. ¹⁸ Tacan tan natuhv̄a ra Jesús nu nyecú ra naha tan catȳi ra tsihin ra naha:

—Nyoo tsah̄a ra tsa cundaca ñaha yuhu tandih̄i andivi tan nu ñuhu ñayivi ihya. ¹⁹ Yacan cuenda, c̄uahuan ndo tandih̄i nu iyó nyivi, tandih̄i ñi ñuu, tan çatȳi ndo tsihin ñi na cunyicun ñi tsi yu. Tan j̄acondutya ndo tsi ñi tsihin sivi Jutu yo Nyoo tan tsihin sivi yuhu Sehe ra, tan tsihin sivi Tatȳi Ii ra. ²⁰ Tan j̄acuaha ndo tsi ñi na tyaa yahvi ñi tandih̄i tsa catȳi yu tyin javaha ndo. Tan coto ndo tyin yuhu cunyaa yu tsihin ndo tandih̄i quivi nda cuanda naa ñayivi —catȳi ra Jesucristo tsihin ra tav̄a tyiñu ra.

Tan na cuvi tsi tacan ñi.

Tuhun Nyoo Tsa Tyaa ra Marcos

Nu caahán ra Juan, ra jacoondutya tsi nyívi, tuhun Nyoo

(Mt. 3.1-12; Lc. 3.1-9, 15-17; Jn. 1.19-28)

¹ Tyehen quitsaha tuhun ra Jesucristo, Sehe Nyoo. ² Tsanaha ra Isaías, ra cuví ndusu yuhu Nyoo, tyaa ra nácaa cua quitsi ra Jesucristo, Sehe Nyoo. Tan catyí tsi tyehen:

Cua jacuhun yu iin ra cua jacoto tsi nyívi na janduvaha ñi tsi ñi tsa ndí cumañi ca chuhun un nu yucú ñi, catyí Nyoo tsihin ra Cristo.

³ Cua tyaa soho yo ndusu ra nu cana tsa ra nu tsiquí, tan catyí ra:

“Nuña ndo iin ityi cuiti

tan natyiso vaha ndo tsi ndo tyin tsa vatsi Jutu Mañi yo”, catyí tuhun tsa tyaa ra Isaías.

⁴ Tacan cuví; quitsi ra Juan nu tsiquí, tan javahá ra cuhva tyaa ra Isaías. Catyí ra tsihin nyívi tyehen: “Ndu uvi ñi ndo cuatyí ndo tan cõndutya ndo tyin tacan tan jaha Nyoo tucahun ñi tsi ndo tsa cuenda cuatyí ndo.” ⁵ Tan tandihí nyívi iyó ñuu tsa cayucú Judea tumaa ñuu Jerusalén tan inga ca ñuu tsahan ñi tsityaa soho ñi tuhun caahán ra Juan. Tsa tsiñí ñi tsa caahán ra, ndu uvi ñi ñi cuhva iyó ñi tan nahmá ñi cuatyí ñi nu Nyoo. Tacan tan tsicoondutya ñi yutya Jordán.

⁶ Tan jahma ra Juan tsinu tsi tsihin ixi camellu. Tan cinturón ra cuví ñii. Tan maa ñi tica xama tsatsi ra, tan tsihí ra ndutya ñuhu tsa iyó tsitsi cuhu. ⁷ Caahán ra tuhun Nyoo tsihin nyívi tan catyí ra:

—Tsa yatyin cuí quitsi ra tsa cahnu ca cuví tan ñavin ca yuhu. Tan ndí ña taahán tsi tsi yu tsa ndatsi yu ñii nditsan ra, tyin cahnu ca cuví maa ra tan ñavin ca yuhu.

⁸ Yuhu jacoondutya yu tsi ndo tsihin ndutya ñi. Maa tyin maa ra cua jacoondutya ra tsi ndo tsihin Tatyí Ii Nyoo —catyí ra Juan.

Nu tsicoondutya ra Jesús

(Mt. 3.13-17; Lc. 3.21-22)

⁹ Quívi can quitá ra Jesús ñuu Nazaret, tsa canyí Galilea, tan cuahán ra nu nyí ra Juan yutya Jordán tyin jacoondutya ra tsi ra. ¹⁰ Tsa quitá ra Jesús tsitsi ndutya tsa yahá tsicoondutya ra, nuña andívi tan nyehe ra vatsi nuú Tatyí Ii Nyoo siquí ra tan caá tsi tumaa caá iin paloma. ¹¹ Tan nacahan iin ndusu ityi andívi tan catyí tsi tsihin ra tyehen:

—Yooho cuví Sehe yu tan cuñi xaan yu tsi un. Tan sii xaan cuñi yu nyehe yu tsi un —catyí ndusu can.

Nu nducú cuhva nu ña vaha tsi ra Jesús

(Mt. 4.1-11; Lc. 4.1-13)

¹² Tsa yahá tsa tsicoondutya ra Jesús tan tsindaca Tatyí Ii Nyoo tsi ra nu tsiquí. ¹³ Tan tsinyí ra ican uvi xico quívi nu nduve nyívi iyó, maa ñi quiti xaan iyó. Tan nducú cuhva nu ña vaha tsi ra. Yahá can tan tsaá ángel Nyoo tan jatyinyee ra naha tsi ra.

Nu quitsaha caahán ra Jesús tuhun Nyoo tsihin nyívi iyó Galilea

(Mt. 4.12-17; Lc. 4.14-15)

¹⁴ Tsa yahá tsa tyihí nyívi tsi ra Juan vehe caa, tan tsinuhá ra Jesús Galilea tan caahán ra tsihin nyívi nácaa ndacá ñaha Nyoo. ¹⁵ Tan catyí ra:

—Tsa tsaá quívi tsa cua cundaca ñaha Nyoo tsi nyívi iyó nu ñuhu ñayívi ihya. Yacan cuenda ndu uvi ñi ndo cuatyí ndo, tan tsinu ñi ndo tuhun tsa jacacú Nyoo tsi nyívi —catyí ra Jesús.

Nu caná ra Jesús cumi taahan ra tñin tyaca

(Mt. 4.18-22; Lc. 5.1-11)

¹⁶ Iin quívi cuahán ra Jesús tsicá ra yuhu miñi tsa nañi Ndutya Ñuhu Galilea. Tan nyehe ra tsi ra Simón tan ra Andrés, yañi ra Simón, cañi ra naha traya ra naha nu ndutya, tyin ra tñin tyaca cuví ra naha. ¹⁷ Tan catyí ra Jesús tsihin ra naha:

—Ñaha ndo, quitsi nyicun ndo tsi yu, tan yuhu cua jatyinyee yu tsi ndo tyin tumaa tsa tñin ndo tyaca ihya, tacan cua ñihi ndo nyívi cua cuví nyívi Nyoo —catyí ra Jesús tsihin ra Simón tan tsihin ra Andrés.

¹⁸ Juvín ñi cuhva can tan nacoq ra naha traya can, tan cuahán ra naha cuanyicún ra naha tsi ra.

¹⁹ Ña cuaha ñi tsicá ra naha, tan nyehe ra Jesús tsi uvi taahan sehe ra Zebedeo, ra Jacobo tan ra Juan. Yucú ra naha tsitsi iin yutun ndoo naquicú ra naha traya. ²⁰ Caná ra tsi nduvi taahan ra naha. Tan nacoq ra naha tsi ra Zebedeo, jutu ra naha, tsitsi yutun ndoo can tsihin ra cuví musu ra naha. Tan cuahán ra naha tsihin ra Jesús.

Nu quitá tatyí ña vaha tsi iin rayí

(Lc. 4.31-37)

²¹ Tsa tsaá ra Jesús ñuu Capernaum tsihin ra tsicá tsihin ra, quíhvi ra Jesús tsitsi vehe ñuhu quívi quitatú nyívi. Tacan tan quitsaha jacuahá ra tuhun Nyoo tsi nyívi. ²² Tan iyo xaan cuñi ñi tsa tsiñi ñi tsa caahán ra, tyin jacuahá ra tumaa iin ra iyó vaha ndatu. Ña caahán ra cuhva caahán ra maestro cuenda ley vehe ñuhu naha ra. ²³ Tan tsitsi vehe ñuhu can nyíi iin ra yihí tatyí ña vaha. Tan caná tsa ra tan catyí ra:

²⁴ —¿Nacuvi tyihí un tsi un tsihin nyuhu, yooho Jesús, ra ñuu Nazaret? ¿A vatsi un vatsi janaa un tsi ndí? Yuhu nacotó vaha yu

tsi un, tan tsitó yu tyin Sehe li Nyoo cuví un —catyí ra can tsihin ra Jesús jahá nu tatyí ña vaha can.

²⁵ Tacan tan nduxaḡan ra Jesús tsi nu tan catyí ra tsihin nu:

—Ñá caḡan ca un! ¡Quita tsi ra ihya! —catyí ra tsihin nu.

²⁶ Tacan tan quitsahá ñihi rayii can jahá nu. Tan ñihi xaán caná tsaá ra jahá nu, tan quitaḡ nu tsi ra. ²⁷ Tandihí nyívi iyo xaán cuñí ñi tan tsicá tuhun tahañ ñi tsi ñi, tan catyí ñi:

—¿Náa cuví tsa nyehé yo ihya? ¿Náa tuhun tsaá jacuahá ra ihya? ¡Tyin iyó vaha tunyee iñi tsi ra, nda cuanda tatyí ña vaha tan tyaá yahví tsi ra! —catyí ñi.

²⁸ Tan numi ñi tsitó nyívi iyó tandihí ñuu tsa cayucú Galilea tuhun ra Jesús.

Nu nduvahá tyiso ra Simón Pedro
(Mt. 8.14-15; Lc. 4.38-39)

²⁹ Tsa ndihí jacuahá ra Jesús tsi nyívi tsitsi vehe ñuhu, quitaḡ ra cuahán ra vehe ra Simón tan ra Andrés. Tan cuahán ndihí ra Jacobo tan ra Juan tsihin ra. ³⁰ Tan ña tyiso ra Simón cuuhví ña tsihin cañi canyí ña nu tsito. Tan catyí tuhun nyívi ña tsihin ra Jesús tyin cuuhví ña. ³¹ Tacan tan natuhvá ra Jesús yuhu tsito nu canyí ña, tiñ ra ndaha ña, tan cañihí ra tsi ña. Juvín ñi cuhva can, quitaḡ cañi tsi ña, tan quitsahá nanducú ña tsa catsi ra naha.

Nu cuaha xaán nyívi cuuhví janduvahá ra Jesús

(Mt. 8.16-17; Lc. 4.40-41)

³² Tsa tsa cuñi cuaa tsa tsa yahá tyiso ñicanyii, tandihí nyívi cuuhví tan nyívi yihí tatyí ña vaha tsindaca nyívi tsi ñi nu nyíi ra Jesús. ³³ Tan ndu iin tandihí nyívi ñuu can nu yucú ra naha. ³⁴ Tan janduvahá ra tsi tandihí ñi tsa yihí siin siin cuehe, tan cuaha tatyí ña vaha tavaḡ ra. Maa tyin ña tsaḡa ra tsa cahan tatyí ña vaha can, tyin tsitó nahnu yóo ra cuví ra.

Nu tsicá ra Jesús caahán ra tuhun Nyoo tandihí ñuu tsa cayucú Galilea

(Lc. 4.42-44)

³⁵ Ra Jesús nduvitá ra tsa ndi naa ca inga quívi, quitaḡ ra ñuu can tan cuahán ra iin nu taxin caá cuandacán tahví ra tsi Nyoo.

³⁶ Tsa nyehé ra Simón tyin nduve ra, tacan tan cuahán ra tsihin tandihí ca ra naha cuandanducú ra naha tsi ra. ³⁷ Tan tsa nañihí ra naha tsi ra, catyí ra naha tsihin ra:

—Tandihí nyívi tan nanducú ñi tsi un —catyí ra naha.

³⁸ Maa tyin catyí ra tsihin ra naha:

—Cohon ndo ñuu tsa cayucú yatyin ñi ihya, tyin cuñi tsi cahan ndihí yu tuhun Nyoo ican, tyin yacan tyiñu vatsi yu —catyí ra Jesús tsihin ra naha.

³⁹ Tan tacan tsicá ra Jesús caahán ra tuhun Nyoo tsihin nyívi tsitsi vehe ñuhu tan iin tan iin ñuu tsa cayucú Galilea. Tan tavaḡ ra tatyí ña vaha tsi nyívi.

Nu janduvahá ra Jesús tsi ra ndohó cuehe tyaahyú

(Mt. 8.1-4; Lc. 5.12-16)

⁴⁰ Tsa ndi cuahán ra Jesús tsicá ra tan quitaḡ iin ra ndohó cuehe tyaahyú tsicuiñi tsiti ra nuu ra, tan catyí ra tsihin ra:

—Tun yooho tan cuñi un, cuví janduvaha un tsi yu —catyí ra.

⁴¹ Tan cundaahví iñi ra Jesús nyehé ra tsi ra, tan tyisó ndaha ra jiñi ra, tan catyí ra tsihin ra:

—Cuñi yu janduvaha yu tsi un. Tan vityin tsa nduvahá un —catyí ra tsihin ra.

⁴² Tsa caḡan ra Jesús tacan tsihin ra, juvín ñi cuhva can tan nduvahá ra. ⁴³ Tacan tan catyí ra Jesús tyin tsa cuví cunuhu ra, maa tyin caḡan vaha xaán ra tsihin ra na javaha ra tyehen:

⁴⁴ —Coto caḡi tuhun un tsihin nyívi yóo janduvahá tsi un. Maa tyin cūaahan nu nyaá ra cuví jutu, tan janaha un tsi un tsi ra. Tan cūhva tsa catyí ra Moisés tyin cuhva ndo tsa cuenda tsa nduvahá ndo tun cuhví ndo. Yacan cua cuví tsa ndaa tsi ra jutu tan tsi nyívi tyin tsa nduvahá un —catyí ra Jesús tsihin ra.

⁴⁵ Maa tyin ra ican cuahán ra, tan quitaḡa catyí tuhun ra tsihin tandihí nyívi nácaa nduvahá ra. Yacan cuenda ña cuví ca quihví nditsin ra Jesús tsitsi ndi intuhun maa ñuu. Tan tsicá ra ityí tsaḡa ñuu ñi nu nduve nyívi iyó, maa tyin tandihí ñi ityí tan quitaḡ nyívi, tan tsinyehé ñi tsi ra.

2

Nu janduvahá ra Jesús tsi iin ra xii

(Mt. 9.1-8; Lc. 5.17-26)

¹ Tsa yahá juhva quívi tan cuahán ra Jesús ñuu Capernaum inga tsaḡa. Tan tsa tsitó nyívi tyin tsaḡa nuhu ra yuvehe ra, ² iin yaha ñi ndu cuaha ñi yuvehe ra tan ña tsitahan maa ñi tsitsi vehe tan ndi yuvehe. Tan caahán ra tuhun Nyoo tsihin ñi. ³ Tacan tan tsaḡa cumi taahan rayii nyisó ra naha iin ra xii. Cuñi ra naha cuhun ra naha tsihin ra nda nu nyaá ra Jesús. ⁴ Maa tyin ña cuví yaha ra naha yuvehe tan cuhun ra naha nu nyaá ra Jesús tyin cuaha xaán nyívi nyecú yuvehe can. Yacan cuenda ndaaḡ ra naha jiñi vehe, tan jatsiyó ra naha juhva tyiyo ndihí cuhva nu nyaá ñi ra Jesús. Tacan tan januuḡ ra naha tsi ra cuuhví can nu nyaá ra Jesús tsihin iin tsito. ⁵ Tsa nyehé ra Jesús tyin tsinú xaán iñi ra can naha ra, catyí ra tsihin ra cuuhví can:

—Vityin, tsa jahā yu tucahnu iñi tsi un tsa cuenda tandihi cuatyí un —catyí ra Jesús tsihin ra.

⁶Tan nyecú juhva ra cuví maestro cuenda ley vehe ñuhu naha ra ican, tacan tan quitsahā tsicá iñi ra naha tuhun ihya: ⁷“¿Nacuenda tyin caná iñi ra ihya caahán ra tyehen? Tan intuhun ñi maa Nyoo cuví ra jahā tucahnu iñi tsi yo. Tsioco cuatyí ra nuu Nyoo tsa cuenda tsa caahán ra tacan”, cuñí ra naha, tsicá iñi ra naha. ⁸Maa tyin ra Jesús iin yaha ñi tuvj iñi ra kuhva tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan? ⁹¿Náa yíi ca cahān yo; “Cuatyí un tsa yaha ndatsj”, o catyí yo: “Nduvita, naquihin tsito un tan çaçā”? ¹⁰Vaha. Cua janaha yu tsi ndo tyin yuhu, tsa cuví yu Rayíi quee nda gloria, iyó ndatu tsi yu nu ñuhu ñayívi ihya tsa jaha yu tucahnu iñi tsi nyívi tsa cuenda cuatyí ñi —catyí ra Jesús tsihin ra naha.

Tacan tan nacahān ra tsihin ra cuuhví can:

¹¹—Catyí yu tsihin un; nduvita, naquihin tsito un, tan çuanuhu yuvehe un —catyí ra Jesús tsihin ra.

¹²Tan iin yaha ñi nduvitā ra cuuhví can, naquihin ra tsito ra, tan çuanuhū ra. Tan iyo xaan cuñí tandihi maa nyívi tsa nyehe can, tan quitsahā jacahnú ñi tsi Nyoo, tan catyí ñi:

—Ndi iin tsaha maa tan ñaha ca nyehe yo tsehe —catyí ñi.

Nu canā ra Jesús tsi ra Leví
(Mt. 9.9-13; Lc. 5.27-32)

¹³Tsa yaha yacan tan cuahán ra Jesús yuhu miñi inga tsaha. Tacan tan tsaā cuaha nyívi nu nyíi ra, tan quitsahā jacuahā ra tsi ñi. ¹⁴Tsa ndihí jacuahā ra tsi ñi, tan çuanuhū ra. Tan tsa cuahán ra yaha ra nu nyaá vehe nu tyahví nyívi xuhun cuenda ra ndacá ñaha ñuu Roma, tan ican nyaá ra Leví, sehe ra Alfeo, naquihin cuenda ra xuhun can. Nyehe ra Jesús tsi ra, tan catyí ra tsihin ra:

—Çohon tsihin yu.

Tacan tan nduvitā ra Leví, tan cuahán ra tsihin ra.

¹⁵Yaha can tan cuahán ra Jesús cuacatsi ra yuvehe ra Leví tsihin ra tsicá tsihin ra. Tsinyaā ra nu mesa tan tsinyecū ndihí tucu ra tavá xuhun cuenda ra ndacá ñaha tan inga ca nyívi iyó cuatyí. Tyin cuaha xaan nyívi nyicún tsi ra. ¹⁶Maa tyin tsa nyehe ra cuví maestro cuenda ley vehe ñuhu tan ra cuví fariseo naha ra tyin tsatsí ra Jesús tsihin ra tavá xuhun tan ra iyó cuatyí, catyí ra naha tsihin ra tsicá tsihin ra:

—¿Nacuenda tyin tsatsí tan tsihí ra maestro ndo tsihin ra tavá xuhun tan ra iyó cuatyí?

¹⁷Tsa tsiñí ra Jesús tsa cahān ra naha tan catyí ra:

—Yuhu ña vatsí yu vatsí jatyinyee yu tsi nyívi cuñí tyin vaha iyó ñi; vatsí yu vatsí jatyinyee yu tsi nyívi tsitó tyin iyó cuatyí ñi tumaa nyívi cuuhví, tyin nyívi cuuhví tsiñí ñuhu doctor tsi ñi. Maa tyin nyívi vaha cuñí, ña tsiñí ñuhu doctor tsi ñi —catyí ra Jesús tsihin ra naha.

Nu tsicā tuhun nyívi tsi ra Jesús tun taahán tsi coo nyitya ñi

(Mt. 9.14-15; Lc. 5.33-35)

¹⁸Iin tsaha tsa iyó nyitya ra tsicá tsihin ra Juan tan ra tsicá tsihin ra fariseo naha ra, tsahān juhva nyívi nu nyíi ra Jesús, tan tsicā tuhun ñi tsi ra, tan catyí ñi:

—¿Nacuenda tyin tsioco nyitya ra tsicá tsihin ra Juan tan ra tsicá tsihin ra fariseo naha ra, tan ra tsicá tsihin yooho ña tsioco nyitya ra naha? —catyí ñi.

¹⁹Nacahān ra Jesús tan catyí ra:

—¿A cuví coo nyitya nyívi yucú nu iyó vico tindaha tun ndi nyíi ra cua tindaha tsihin ñi? Ña cuví coo nyitya ñi tun ndi nyíi ra tsihin ñi. ²⁰Maa tyin coo quivi ña cua cunyi ca ra tsihin ñi. Tacan tan cua coo nyitya ñi —catyí ra Jesús tsihin ñi.

Nu caahán ra Jesús tyin ña nacatsi tahan tuhun tsahnú tsa iyó nyívi tsihin tuhun tsaā tsa jacuahā ra tsi ñi

(Mt. 9.16-17; Lc. 5.36-39)

²¹Tan catyí ra Jesús:

—Ña tuhvá nyívi natyaá jahma tsaā iin jahma tuuhu, tyin jahma tsaā can cua nandiyi can tan cua nducahnu ca nu ndatā jahma tuuhu can jaha can. ²²Tacan tucu ñi ñi yihí vinu tun tyihí yo vinu tsaā tsitsi ñi tsahnú can ndata ñi can, tan cua cati vinu can tan cua tiví can. Yacan cuenda cuñí tsi tsa tyihí yo vinu tsaā tsitsi ñi tsaā —catyí ra Jesús.

Nu jocón ra tsicá tsihin ra Jesús yoco trigu quivi quitatú nyívi

(Mt. 12.1-8; Lc. 6.1-5)

²³Iin tsaha yaha ra Jesús tsitsi tsa tatsj nyívi tan cuví tsi quivi quitatú ñi. Tan tsa yaha ra tsicá tsihin ra quitsahā tuhún ra naha yoco trigu. ²⁴Tacan tan tsa nyehe ra fariseo naha ra can quitsahā caahán ra naha tsihin ra Jesús:

—¿Nyehe tsa javahá ra tsicá tsihin un naha ra! Jahá tyiñu ra naha tan ña taahán tsi jahá tyiñu yo quivi ihya —catyí ra naha.

²⁵Tan nacahān ra Jesús tsihin ra naha:

—¿A ñaha ca cahví ndo nu tutu nu tsahá cuenda tsi tsa javahá ra David tan ra cutahán tsihin ra quivi tsioco ra naha? ²⁶Ra David quihví ra tsitsi vehe Nyoo quivi cuví ra Abiatar jutú tsaahnu cuví ityi nuu. Tan quihñ ra paan ii, tsa taahán tsi catsi maa

ñi maa ra jutu naha ra. Maa ra tan tandihi ra cutahán tsihin ra tsatsi ra naha paan can —catyí ra Jesús.

²⁷ Tacan tan catyí ra Jesús tsihin ra naha:

—Nyoo javahá ra quivi quitatú yo tyin tacan tan cuví quitatú cuñu ñuhu yo; tan ñavin maa yo tsinu tsa cuenda quivi quitatú yo. ²⁸ Yacan cuenda yuhu tsa cuví yu Rayi quee nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo quivi quitatú yo —catyí ra Jesús.

3

Nu nduvahá ra na ityi iin ndaha
(Mt. 12.9-14; Lc. 6.6-11)

¹ Tsa quihvi ra Jesús inga tsaha tsitsi vehe ñuhu, nyíi iin ra na ityi iin ndaha ican. ² Tan ra cuví fariseo naha ra nducú cuhva ra naha tsi ra Jesús tan nducú ra naha cuhva nyehé ra naha tun cua janduvaha ra tsi ra na ityi ndaha can tyin cuví tsi quivi quitatú nyivi. Tyin tun cua janduvaha ra tsi ra can, tacan tan cua cuví tyaa ra naha cuatyí siqui ra. ³ Tacan tan catyí ra Jesús tsihin ra na ityi ndaha can:

—Nduvita nyityi tan cunyaa un mahñu ihya.

⁴ Tacan tan tsicá tuhun ra tsi ra tsa yucú ican naha ra, tan catyí ra tsihin ra naha:

—¿Náa taahán tsi javaha yo quivi quitatú yo? ¿A taahán tsi javaha yo tsa vaha o tsa ña vaha? ¿A taahán tsi janduvaha yo nyivi, o cahñi yo tsi ñi? —catyí ra Jesús.

Maa tyin ña nacahán ra naha. ⁵ Tacan tan nanyehé xaan ra Jesús nuu ra naha, tan nducuiihya cuñi ra tyin ña cuñi ra naha cutuñi iñi ra naha. Tan catyí ra tsihin ra cuhvi can:

—Jandundoo ndaha un.

Tacan tan jandundoq ra can ndaha ra, tan iin yaha ñi nduvahá ndaha ra. ⁶ Tacan tan quitá ra fariseo naha ra, tan quitsahá natuhún tahan ra naha tsihin ra yihí cuenda ra rey Herodes, nácaa cua cahñi ra naha tsi ra Jesús.

Nu cuaha xaan nyivi cuahán cuanyehé nu nyii ra Jesús yuhu miñi

⁷ Maa tyin ra Jesús tan ra tsicá tsihin ra cuahán ra naha yuhu miñi, tan cuaha nyivi iyó Galilea cuahán cuanyicún tsi ra naha.

⁸ Tsa tsito nyivi tyin nahnu xaan tsa iyo javahá ra, cuaha ñi tsahán nu nyii ra tyin cuñi ñi nyehe ñi tsi ra. Quee ñi ñuu tsa cayucú Judea tumaa ñuu Jerusalén tan inga ca ñuu, tan ñuu tsa cayucú Idumea, tan ñuu tsa cayucú inga tsiyo yutya Jordán. Tan quee tucu juhva ñi ñuu Tiro tan ñuu Sidón tan tandihi ca ñuu tsa cayucú yatyin nu cayucú nduvi ñuu can. ⁹ Tsa nyehe ra Jesús tsaa nyivi, catyí ra tsihin ra tsicá tsihin ra na

caquin nyaa vaha ra naha iin yutun ndoo tyin tun cua ndutuvi ca nyivi, cuví quihvi ra tsitsi yutun ndoo can tyin tacan tan ña cua tindahñi ñi tsi ra. ¹⁰ Tsa cuaha xaan nyivi janduvahá ra, yacan cuenda tsahán cuaha ca nyivi cuhvi nu nyii ra. Tsicá iñi maa ñi tyin tun nañi luxu ndaha ñi tsi ra tan cua nduvaha ñi. ¹¹ Yihí ñi cuhvi can yihí tatyí ña vaha tsi ñi. Tan tsa natuhvá ñi tsa yihí tatyí ña vaha nu nyaá ra Jesús tsicuiñi tsiti ñi, tan nu tatyí ña vaha tsa yihí tsi ñi caná tsaa nu tan catyí nu tsihin ra:

—¡Yooho cuví Sehe Nyoo!

¹² Tan tandihi ñi cuhva tsa caahán tatyí ña vaha yóo ra cuví ra, tyasi ra nu cahan nu.

Nu nacatsi ra Jesús tsi utsi uvi ra caca tyiñu ra

(Mt. 10.1-4; Lc. 6.12-16)

¹³ Tsa yahá yacan tan ndaq ra Jesús iin yucu tan caná ra tsi ra tsa cuñi maa ra cana ra. Tacan tan cuahán ra naha nu nyii ra. ¹⁴ Tan tsitsi tsa tandihi ra tsa caná ra, nacatsi ra utsi uvi ra naha tyin caca ra naha tsihin ra, tan caca ra naha cahan ra naha tuhun Nyoo. ¹⁵ Tan tsahá ra ndatu tsi ra naha tsa janduvaha ra naha tsi nyivi cuhvi, tan tava ra naha tatyí ña vaha yihí tsi nyivi. ¹⁶ Ihya nycú sivi ra naha: ra Simón, tsa jacunañi tucu ra Jesús Pedro; ¹⁷ tan nduvi sehe ra Zebedeo, ra Jacobo tan ra Juan. Juvín ra tsa jacunañi ra Jesús Boanerges. Tan tuhun ihya cuñi tsi catyí: “ra caahán tumaa ñihi caahán savi”. ¹⁸ Tan tandihi ca ra naha nañi ra naha tyehen: Andrés; Felipe; Bartolomé; Mateo; Tomás; tan ra Jacobo, sehe ra Alfeo; ra Tadeo; tan inga ra nañi tucu Simón, iin ra tsa cuñi cahun cuatyí siqui ñuu Roma tsa ndacá ñaha tsi ñi; ¹⁹ tan ra Judas Iscariote, tsa xicq tsi ra Jesús.

Tsa yahá yacan tan cuahán ra Jesús tsitsi iin vehe tsihin ra tsicá tsihin ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo
(Mt. 12.22-32; Lc. 11.14-23; 12.10)

²⁰ Tan nducuahá nyivi nu yucú ra naha inga tsaha, tan nda cuanda ña cuyatyí ca ra naha catsi ra naha. ²¹ Tsa tsito nyivi ra Jesús tyin nyii ra ican, tsahán ñi tsiquihñi ñi tsi ra tyin cunuhu ra tsihin ñi, tyin catyí nyivi tsihin ñi tyin ndusaná iñi ra.

²² Juhva ra maestro cuenda ley vehe ñuhu naha ra quee ra naha nda ñuu Jerusalén tan tsaa ra naha nu nyii ra Jesús tan catyí ra naha:

—Ra ihya tavá ra tatyí ña vaha tsi nyivi tsihin tunyee iñi nu Beelzebú, tsa cuví ityi nuu tsihin tandihi tatyí ña vaha —catyí ra naha.

²³ Tsa tuví iñi ra Jesús tyin tacan caahán ra naha, caná ra tsi ra naha tan tsahá ra

iin cuhva tsi ra naha, tan catyí ra tsihin ra naha:

—¿A cuví tavá nu ña vaha juvin ñi maa tahan nu? Ña cuví. ²⁴ Tyin tun ra ndacá ñaha naha ra tan cua natahvi sava ra naha, tan cua quítsaha cañi tahan ra naha, cua cundihi tsa ndacá ñaha ra naha. ²⁵ Tacan tucu ñi tun nyivi iyó iin caa ñi iin vehe tan cañi tahan ñi, cua cusin ñi tan ña cua cuví coo vaha ñi. ²⁶ Tan tun nu ña vaha tan ndusiin nu tan nduvita iin nu siqui inga nu, ¿náa cua tahan nahnu? Cua ndusiin nahnu tan cua cundihi nahnu.

²⁷ Yoñi cuví quihvi tsitsi vehe iin ra xaan tan suhu ra tsa iyó tsi ra, tun ña cuhñi jihna ra tsi ra. Maa ñi cuñi tsi cuhñi jihna ra tsi ra jatsii vehe can tan cuví quihvi ra suhu ra tsa tsii ra.

²⁸ Tsa nditsa catyí yu tsihin ndo tyin cuví coo tucahnu iñi tsi nyivi tsa cuenda tandihi nuu cuatyí javahá ñi, tan tsa cuenda tucu tsa caahán ñi tsa ña vaha. ²⁹ Maa tyin tun cahan ñi ndavaha ñi siqui Tatyí Ii Nyoo, ña cua jaha maa Nyoo tucahnu iñi tsi ñi; cua coo cuatyí ñi yoso cuahan quivi —catyí ra Jesús.

³⁰ Tacan cahan ra Jesús tsihin ra maestro cuenda ley vehe ñuhu naha ra, tyin catyí ra naha tyin tatyí ña vaha yihí tsi ra.

Nu catyí ra Jesús tyin nyivi tyaa yahvi tuhun Nyoo, juvin ñi cuví yañi ra, tan sihi ra
(Mt. 12.46-50; Lc. 8.19-21)

³¹ Tacan tan tsaá sihi ra Jesús tan yañi ra nu nyii ra, maa tyin ndoo ñi ityi tsata vehe, tan catyí ñi tsihin ra nyecú ican naha ra tyin cana ra naha tsi ra Jesús. ³² Tan catyí nyivi nyecú nani canduvi xiin ra Jesús tsihin ra:

—Sihi un, yañi un tan cuhva un nanducú ñi tsi un nyecú ñi tsata vehe can —catyí ñi tsihin ra.

³³ Maa tyin catyí ra:

—¿Yóo cuví sihi yu tan yañi yu?

³⁴ Tacan tan nanyehé ra nani canduvi nu nyaá ra, tan catyí ra:

—Nyivi nyecú iha cuví sihi yu, yañi yu tan cuhva yu. ³⁵ Tyin tandihi nyivi javahá cuhva cuñi Nyoo, juvin ñi cuví yañi yu, cuhva yu tan sihi yu —catyí ra Jesús.

4

Nu caahán ra Jesús tyin ra caahán tuhun Nyoo cuví ra tumaa iin ra tatsí
(Mt. 13.1-9; Lc. 8.4-8)

¹ Quítsaha jacuahá ra Jesús inga tsaha yuhu miñi. Tan cuaha xaan nyivi ndu iin nu nyii ra. Tan tsa cuenda tsa cuaha xaan ñi cuví, quihvi ra tsitsi yutun ndoo tsa canyií nu ndutya yuhu miñi can, tan tsinyaá ra tsitsi can. Tan ndoo tandihi maa nyivi nu nyiti. ² Tacan tan cuaha xaan tsa jacuahá ra tsi ñi tsihin cuhva. Tan tsitsi tsa jacuahá ra tsi ñi, catyí ra tsihin ñi:

³ —Tyaa soho ndo tsa cua cahan yu. Iin ra quita ra yuvehe ra. Tan cuahán ra cua tatsi ra trigu nu ñuhu ra. ⁴ Tan cuhva tsa quiti ra tsiti trigu can, cucoyo juhva tsi yuhu ityi. Maa tyin quítsi saa tan tsatsj ti naha ti itsi. ⁵ Tan juhva ca tsiti can cucoyo tsi nu yuu nu ña cuaha nyahyu yihí. Tan numi ñi cana tsiti can tyin ña cuaha nyahyu yihí tyañu yuu can. ⁶ Maa tyin tsa cana ñicanyii, iin yaha ñi na ityi tsi tyin ña cunu cuahán yoho tsi. ⁷ Tan juhva ca tsiti can cucoyo tsi tyañu iñu. Quivi cana tsiti can, tsahnú tsi iin caa ñi tsihin iñu can. Maa tyin iñu can numi ca tsahnú can tan tsahnú can trigu can. Yacan cuenda ña tsaha trigu can tsiti. ⁸ Maa tyin juhva ca tsiti can cucoyo tsi nu ñuhu vaha. Cana tsi tan tsahnú tsi, tan cuaha tsiti tsaha tsi. Tyin tsa intuhun tsiti can, tsaha tsi oco utsi tsiti tsitsi yoco tsi. Tan inga tsiti can tsaha tsi uñi xico, tan inga tsi tsaha tsi iin cientu —catyí ra Jesús tsihin ñi.

⁹ Tan catyí nyico ra tsihin ñi:

—Nyooho tsa iyó soho, tyaa soho ndo tsa caahán yu.

Nu tsahá cuenda ra Jesús nacuenda jacuahá ra tsi nyivi tsihin cuhva
(Mt. 13.10-17; Lc. 8.9-10)

¹⁰ Tsa yaha yacan tan ndoo maa ña ra Jesús tsihin ra tsicá tsihin ra tan nyivi nyicun tsi ra. Tan tsica tuhun ñi:

—¿Náa cuñi tsi catyí tsa cahan un nañi?

¹¹ Tan catyí ra tsihin ñi:

—Maa Nyoo catyí tyin jacotó yu tsi ndo tuhun xeehe náca ndacá ñaha ra. Maa tyin inga ca nyivi jacotó yu can tsi ñi tsihin cuhva ñi tyin ña cuñi ñi cunycun vaha ñi tsi yu.

¹² Tyin vasu ndi maa nyehé ñi tsa javahá yu, cua cuví tsi tumaa tsa ña nditsin nyehé ñi; vasu ndi maa tsiñi ñi, ña cua cutuñi iñi ñi tsa caahán yu. Tan ndi ña cua nasama ñi cuhva iyó ñi tan ndi ña cua jaha Nyoo tucahnu iñi tsi ñi tsa cuenda cuatyí ñi —catyí ra Jesús tsihin ñi.

Nu tsahá cuenda ra Jesús tsa cuñi tsi catyí tuhun ra tatsí
(Mt. 13.18-23; Lc. 8.11-15)

¹³ Tan catyí ndihi ra tsihin ñi:

—Tun ña cutuñi iñi ndo tuhun cahan yu nañi, ndi ña cua cutuñi iñi ndo tandihi ca tsa cua jacuahá yu tsi ndo tsihin cuhva ñi.

¹⁴ Ra tatsí trigu can cuví ra caahán tuhun

Nyoo. ¹⁵ Yihí nyivi cuví ñi tumaa nu cucoyo tsiti trigu yuhu ityi tyin tsiñi ñi tuhun Nyoo, maa tyin yaha can, tan iin yaha ñi naá nyico iñi ñi tsa caahán Nyoo tsihin ñi tyin quihín nyaa nu ña vaha tuhun Nyoo tsa tatsj ra añima ñi.

¹⁶ Tan juhva nyivi cuví ñi tumaa nu cucoyo tsiti trigu tsata yuu tyin sii xaan cuñi ñi tsiñi ñi tuhun Nyoo juhva ñi quivi.

¹⁷ Maa tyin ña ndoo tsi añima ñi tan ña cuví

cuahnu ñi tan juhva ñi quivi tsinú iñi ñi, yacan cuenda cuví ñi tumaa nu cucoyo tsiti tsata yuu tyin tsata yuu can luxu cuii ñi nyahyu yihí. Yacan cuenda ña tsahnú tsi tyin ña ñihí tsi nu cuhun yoho tsi. Tacan cuví nyivi can, tyin quivi vatsí tundoho siqui ñi, tan caahán nyivi tsi ñi tsa cuenda tuhun Nyoo, ndu uví iñi ñi tan jandihí ñi tsa tsinú iñi ñi tsi Nyoo. ¹⁸ Tan juhva nyivi cuví ñi tumaa nu cucoyo tsiti tyañu iñu tyin tsiñi ñi tuhun Nyoo, ¹⁹ maa tyin tsicá xaan iñi ñi tundoho ñayivi ihya tan ña tsicá iñi ñi tuhun Nyoo. Nyiyo iñi ñi tsa cuca, tan cuñi ñi coo tandihí tsa iyó nu ñuhu ñayivi ihya tsi ñi. Tan tandihí yacan jatyañu can tsi ñi, tan cuví ñi tumaa cuví yutun tsa ña tsahá tsiti. ²⁰ Maa tyin nyivi tsa tsiñi tuhun Nyoo tan naquihín vaha ñi itsi, tan javahá ñi tandihí tsa caahán tsi, juvin ñi cuví tumaa ñuhu vaha nu cucoyo tsiti can tyin tsiti tsa cucoyo can caná vaha tsi, tsahnú tsi, tan yihi tsi tsahá tsi oco utsi tsiti. Inga tsi tsahá tsi uñi xico tsiti, tan inga tsi tsahá tsi cientu tsiti.

Nu cahán ra Jesús tyin ña taahán tsi tyihi xeehe yo ñuhu Nyoo tsa jandunditsín añima yo coto quihin nyaa ra itsi

(Lc. 8.16-18)

²¹ Tan catyí tucu ra tyehen tsihin ñi:

—¿A tsicán yo ñuhu tyuma tan tyihí xeehe yo can tsitsi iin caja o xuu tsito? Ñavin. Tyin tyuma can tinyí yo can iin nu sucun tyin tacan tan janditsin can naní tsitsi vehe. ²² Tyin nduve tsa yihí xeehe tan ña cua quituvi, tan ndí tsa xeehe tan ña cua coto nyivi. Tyin tandihí maa tan cua quita nu nditsin tan coto yo can. ²³ Nyooho tsa iyó soho, tyaá soho ndo tsa caahán yu —catyí ra Jesús tsihin ñi.

²⁴ Tan catyí tucu ra:

—Tyaá soho vaha ndo tsa caahán yu tyin tun tyaá yahvi ndo tuhun tsiñi ndo, cuaha ca tsa cua cuhva Nyoo tsi ndo. ²⁵ Tyin nyivi tyaá soho tsa caahán yu, cuaha ca cua cuhva Nyoo tsi ñi. Maa tyin nyivi tsa ña tyaá soho, cua quihin nyaa ra nda cuanda tsa luxu tsa iyó tsi ñi tsa tsa yaha ñihí ñi.

Nu tsahá ra Jesús iin cuhva nácaa tsahnú iin tsiti

²⁶ Tan catyí tucu ra Jesús:

—Tsa ndacá ñaha Nyoo tsi nyivi cuví tsi tumaa tsiti tsa tatsí nyivi. ²⁷ Tyin nyivi tatsí ñi maa ñi tsiti can tan cuanuhú ñi yuvehe ñi. Tan tatun tsa yaha cuaha quivi tsa tatsí ñi, tacan tan cuahán ñi cuanyehé ñi inga tsaha. Tsa tsaá ñi tsa caná tsi, tsa tsahnú tsi. Maa tyin ña tsitó ñi nácaa caná tsi tan tsahnú tsi, ²⁸ tyin juvin ñi maa ñuhu jacuahnú itsi. Tsa jihna ñi caná nuu tsi, yaha can tan quita yoco tsi. Tsa yaha quita yoco tsi, tacan tan tsahá tsi tsiti. ²⁹ Tan tatun tsa tsitsa tsiti tsi,

tacan tan jocón ñi itsi tyin tsa tahán maa tsi quivi coyo tsi —catyí ra Jesús.

Nu caahán ra Jesús tyin tumaa cuví tsiti mostaza, tacan cuví tsa ndacá ñaha Nyoo tsi yo

(Mt. 13.31-32; Lc. 13.18-19)

³⁰ Tan catyí tucu ra Jesús:

—¿Nacaa cuví tsa ndacá ñaha Nyoo tsi nyivi? ¿A cuví jandu inducu yo itsi tsihin náa tsihin? Cuví. ³¹ Tyin cuví tsi tumaa iin tsiti mostaza tsa tatsí nyivi. Tsiti can cuví tsa nyihi ca tan ñavin ca tandihí ca tsiti tsa iyó nu ñuhu ñayivi. ³² Maa tyin tsa yaha tatsi tsi, caná tsi tan ndunahnú tsi, tan cuví tsi yutun tumaa nducuaya. Ndunahnú soco tun, tan cuahán saa cua quitatu ti naha ti nuu tun.

Nu tsahá cuenda ra Jesús nacuenda jacuahá ra tsi nyivi tsihin cuhva ñi

(Mt. 13.34-35)

³³ Tacan jacuahá ra Jesús tsi nyivi, tsihin cuaha cuhva, ndihí cuhva cuví cutuñí iñi ñi. ³⁴ Tan tandihí tsaha tsa cahán ra tsihin ñi maa ñi maa tsihin cuhva cahán ra. Maa tyin cahán catsi ra tsihin ra tsicá tsihin ra.

Nu jacutaxín ra Jesús tatyí xaan nu miñi

(Mt. 8.23-27; Lc. 8.22-25)

³⁵ Tsa tseñi juvin ñi maa quivi can, catyí ra Jesús tsihin ra tsicá tsihin ra:

—Cohon ndo inga tsiyo miñi.

³⁶ Tacan tan ra Jesús tan ra tsicá tsihin ra nacoo ra naha tsi nyivi tan quihví ra naha tsitsi yutun ndoo nu nyaá maa ra Jesús, tan cuahán ra naha. Tan cuanyicún tucu inga ca yutun ndoo nu yihí juhva nyivi tsi ra naha.

³⁷ Tan quitsahá yihí tatyí xaan nu miñi can, tan jacuhún tsi ndutya tsitsi yutun ndoo nu yucú ra naha, tan quitsahá cuñi cutu yutun ndoo can. ³⁸ Tan ra Jesús canyí ra quixí ra tsa yatyin xuu yutun ndoo can, tan nyanaá iin jahma jiñi ra. Jandotó ra naha tsi ra, tan catyí ra naha tsihin ra:

—¡Maestro! ¿a ña jahá un cuenda tyin cuñi nyee yo?

³⁹ Tacan tan nduvitá ra Jesús tan jacutaxín ra tatyí xaan can. Tan catyí ra tsihin ndutya:

—¡Taxin ñi!

Tan cutaxín tatyí can tan ndutya can. Tacan tan taxin cuii ñi cuví. ⁴⁰ Tacan tan catyí ra Jesús tsihin ra tsicá tsihin ra:

—¿Nacuenda yuuhví xaan ndo? ¿A ña tsinu iñi ndo? —catyí ra tsihin ra naha.

⁴¹ Maa tyin iyo xaan cuñi ra naha tsa nyehé ra naha tsa cuví. Tan tsicá tuhun tahan ra naha tan catyí ra naha:

—¿Yóo ra cuví ra ihya? Tyin nda cuanda tatyí tan ndutya tyaá yahvi tsi naha tsi tsi ra —catyí ra naha.

5

Nu caahán ra Jesús tyin ra caahán tuhun Nyoo cuví ra tumaa iin ra tatsi Nu nduvaha iin ra Gadara tsa yihí tatyí ña vaha

(Mt. 8.28-34; Lc. 8.26-39)

¹ Tsaq ra naha inga tsiyo miñi nda nu ñuhu cuenda Gadara. ² Tsa quitá ra Jesús tsitsi yutun ndoo, tan quitá iin ra yihí tatyí ña vaha nu ndaa cumi santu, tan tsaq ra nu nyaá ra. ³ Tan nu ndaa can iyó maa ra can. Tsaahñi ñi tsi ra, maa tyin ña cuví maa ndoo taxin ra. Ndi tsihin cadena tan ña cuví cunuhñi ra. ⁴ Cuaha xaan tsaha tsahñi nyivi tsaha ra tan ndaha ra tsihin cadena, maa tyin tsaahnyá cuatyí ra can. Tan yoñi maa cuví cunyeet tsi ra. ⁵ Tan tsicá nuu maa ra caná tsaa ra jiñi yucu tan nu ndaa cumi santu tsa tsa cuaa tan tsa tsinu cahñi. Tan jañicueehé ra tsi ra tsihin yuu. ⁶ Maa tyin ndi cañi ca quitá ra Jesús, tan nyehe ra can tsi ra, tan tsinú xaan ra tsahán ra, tsicuiñi tsiti ra nuu ra. ⁷ Tan caná tsaa ra tan catyí ra:

—¿Nacuenda tyihí un tsi un tsihin yuhu, yooho Jesús, Sehe Nyoo, nyaá gloria? Tsihin sivi Nyoo caahán ndaahvi yu tsihin un, ña janyehe un tundoho tsi yu.

⁸ Tacan catyí nu tatyí ña vaha can tsihin ra Jesús tyin tsa yaha cahan ra tsihin nu tyehen:

—¡Yooho tatyí ña vaha, jaña tsi ra ihya! —catyí ra.

⁹ Tan ra Jesús tsicá tuhun ra tsi nu, tan catyí ra:

—¿Náa nañi un?

Tan catyí nu tatyí ña vaha can tsihin ra:

—Yuhu nañi yu Legión, tyin cuaha xaan ndi.

¹⁰ Tan caahán ndaahvi nu tsihin ra Jesús na ña jacuhun cañi ra tsi nahnu. ¹¹ Yatyin ñi yucu can yucú cuaha quini tsatsi ti naha ti. ¹² Tacan tan catyí tandihí nahnu tsihin ra Jesús:

—Jacuhun tsi ndi tsitsi quini nyecú ican, tan cuhva ndatu tsa quihvi ndi tsitsi ti naha ti —catyí nahnu.

¹³ Tacan tan tsaha ra Jesús ndatu tsi nahnu, tan quihvi nahnu tsitsi quini can. Quitá nahnu tsi ra can tan quitá tumaa uvi mil quini yucú can. Tsa quihvi nahnu tsitsi ti naha ti, quitsaha tsinú ti naha ti, tan yaha ti naha ti yuhu xahva tan cucoyo ti naha ti tsitsi miñi, tan tsihi ti naha ti tsitsi ndutya.

¹⁴ Tacan tan ra jahá cuenda quini can naha ra, nayuhvi xaan ra naha tan tsinú xaan ra naha cuahán ra naha cuanuhú ra naha cuacatyí tuhun ra naha tsa cuví can tsihin nyivi ñuu can tan inga ca nyivi tsa taahán ra naha ityi cuhu. Tan tandihí nyivi tsa cahan ra naha tsihin, tsahán ñi tsinyehé ñi tsa cuví can. ¹⁵ Cuhva tsa tsaq ñi nu nyii ra Jesús, nayuhvi xaan ñi tsa nyehe ñi tsi ra tsa

yihí tatyí ña vaha can. Nyaá taxin ra, nditsi ra jahma, tan vaha cuñi ra. ¹⁶ Tan tandihí maa nyivi tsa nyehe tsa tahañ ra can tan tsa tahañ quini can, catyí tuhun ñi can tsihin inga ca nyivi. ¹⁷ Tacan tan quitsaha caahán ndaahvi ñi tsihin ra Jesús, na ña ndoo ra nu ñuhu ñi.

¹⁸ Tsa tsa cua quihvi nyico ra Jesús tsitsi yutun ndoo can, ra tsa yihí tatyí ña vaha can caahán ndaahvi ra tsihin ra Jesús na cuhva ra cuhun ra tsihin ra. ¹⁹ Maa tyin ña tsaha ra Jesús cuhun ra tsihin ra, tan catyí ra tsihin ra:

—Cuanuhu yuvehe un nu iyó nyivi un, tan catyí tuhun tsihin ñi tandihí tsa javaha Jutu Mañi yo Nyoo tsihin un, tan nácaa cundaahvi iñi ra tsi un.

²⁰ Tacan tan cuanuhú ra tan quitsaha catyí tuhun ra tsihin nyivi iyó tandihí ñuu tsa cayucú Decápolis tandihí tsa javaha ra Jesús tsihin ra. Tan iyo xaan cuñi ñi.

Nu nduvaha sehe ra Jairo tan ñaha tsa tñin jahma ra Jesús

(Mt. 9.18-26; Lc. 8.40-56)

²¹ Tsa tsaq ra Jesús tsihin yutun ndoo nda inga tsiyo miñi can, tsaq cuaha nyivi nu tsaq ra. Tan ndoo ra yuhu miñi ican. ²² Tacan tan tsaq iin ra nyisó tyiñu vehe ñuhu, nañi ra Jairo. Cuhva tsa nyehe ra tsi ra Jesús, tsicuiñi tsiti ra nuu ra. ²³ Tan caahán ndaahvi ra tsihin ra tan catyí ra:

—Cohon tsihin yu yuvehe yu tan tyiso ndaha un jiñi ñaha sehe yu, na nduvaha ña tyin tsa cuñi cúu cuiñi ña ña.

²⁴ Tacan tan cuahán ra Jesús tsihin ra, tan cuaha xaan nyivi cuahán cuanyicún tsi ra, nda cuanda catyihí tahañ ña maa ñi.

²⁵ Tsihin nyivi can cuahán ndihí iin ñaha cuhvi. Ñaha ihya tsa quitá maa utsi uvi cuiya ndohó ña cuehe tsa cuún niñi ña. ²⁶ Tan cuaha xaan tundoho nyehe ña tsihin tsa cuaha doctor. Tandihí xuhun ña janaq ña tsihin ra naha, maa tyin nduve maa náa catyí janaq ña xuhun ña tyin vihi ca nduñihí cuuhvi ña. ²⁷ Tsa tsiñi ña caahán nyivi tyin tsaq ra Jesús, natuhva ña ityi tsata ra tan tñin ña jahma ra. ²⁸ Tyin tsicá iñi maa ña: “Tatun tñin yu vasu tan jahma ra, cua nduvaha yu”.

²⁹ Tsa tñin ña jahma ra iin yaha ñi cutaxin tsa cuún niñi ña. Tan tuví iñi cuñu ñuhu ña tyin tsa janduvaha ra tsi ña. ³⁰ Tsa tuví iñi ra Jesús tyin nduvaha iin nyivi tsihin tunyee iñi tsa iyó tsi ra. Tacan tan nanyico coo ra ityi tsata ra tan tsicá tuhun ra tan catyí ra:

—¿Yóo tñin jahma yu?

³¹ Tacan tan catyí ra tsicá tsihin ra:

—¿Nacuenda tsicá tuhun ca un: yóo tñin jahma un? tan nyehe vaha un tyin cuaha xaan nyivi nyicún tsi un tan tyañu xaan jahá ñi —catyí ra naha tsihin ra.

³² Maa tyin ra Jesús nanyehę ra naniü ñi tyin cuñi ra coto ra yoo tijn jahma ra. ³³ Tacan tan ñaha can tsahan ña tsicuiñi tsiti ña nuu ra Jesús tyin tsitó vaha ña tyin tsa nduvahę ña. Yuuhvi ña tan nihi ña tsahan ña tsicatyí tuhun ña tandihi tsa nditsa tsihin ra. ³⁴ Tan catyí ra Jesús tsihin ña:

—Nduvahę un tyin tsinü iñi un. Na cahun vaha un, tan na ña cuhvi ca un —catyí ra Jesús tsihin ña.

³⁵ Ndi caahán ca ra Jesús tan tsaę nyivi queę yuvehe nu cuahán ra, tan catyí ñi tsihin ra jatsii vehe can, ra nyisó tyiñu vehe ñuhu:

—Tsa tsihi ñaha luhlu sehe un. Ña cahan yuhu ca un tan ña jatyañu ca un tsi ra Maestro ihya —catyí ñi tsihin ra.

³⁶ Maa tyin ra Jesús ña tyaę yahvi ra tsa caahán ñi, tan catyí ra tsihin ra nyisó tyiñu vehe ñuhu:

—Ña nayuhvi un; tsinu iñi yooho —catyí ra tsihin ra.

³⁷ Tan ña tsahę ra cahun cuaha nyivi tsihin ra. Tan quihñin ra tsi ra Pedro tan ra Jacobo tan ra Juan, yañi ra Jacobo cuahán ra naha tsihin ra. ³⁸ Tsa tsaę ra naha yuvehe ra nyisó tyiñu vehe ñuhu, nyehe ra Jesús tyin tsacü xaan nyivi tan caná tsaa ñi. ³⁹ Quihvü ra tsitsi vehe tan tsicá tuhun ra tsi ñi:

—¿Nacuvi tyin iyo xaan jacuvaá ndo, tan tsacü xaan ndo? Ñaha luhlu ihya quixi ña; ñavin tsihi ña —catyí ra tsihin ñi.

⁴⁰ Maa tyin ña tsinu iñi ñi tan tsacü naaha ñi nyehé ñi tsi ra. Tacan tan tava ra tsi tandihi ñi nuquehe, tan quihñin ra tsi jutu ñaha luhlu tsa tsihi can tan sihi ña tan ra tsa tsaę tsihin ra, tan quihvi tandihi ñi nu canyií ña. ⁴¹ Tan tijn ra ndaha ña, tan catyí ra tsihin ña:

—Talita cumi —tan cuñi tsi catyí tsi tye-hen: Catyí yu tsihin yooho ñaha luhlu, jnduvita!

⁴² Juvin ñi cuhva can tan nduvitę ña, tan nacacę ña. Utsi uvi cuiya ña. Tan tsa nyehe nyivi tsa iyo tsa javahę ra Jesús, iyo xaan cuñi ñi cuvü. ⁴³ Maa tyin ra Jesús ñihi tsahę cuenda ra tsi ñi tyin na ña cahan ñi tsa nyehe ñi tsihin ndi intuhun maa nyivi. Tan tava tyiñu ra tsi sihi ña na cuhva ña tsa catsi ña.

6

Nu tsinuhü ra Jesús ñuu Nazaret nu tsahnü ra

(Mt. 13.53-58; Lc. 4.16-30)

¹ Tacan tan quita ra Jesús ican, tan cuanuhü ra nda ñuu ra. Tan ra tsicá tsihin ra cuahán ndihi ra naha tsihin ra. ² Tan tsa tahañ tsi quivi quitatú nyivi, tacan tan cuahán ra naha vehe ñuhu tan quitsahę jacuahá ra Jesús tsi nyivi. Tan cuaha ñi yucü

tyaa soho ñi tsa caahán ra. Iyo cuñi ñi tsa tsiñi ñi tsa caahán ra, tan catyí ñi:

—¿Numaa tahan cutuhvę ra ihya tandihi tsa tsitó ra? ¿Yoo tsahę tsa tsiñi tuñi iñi ra? ¿Tan nácaa cutuhvę ra javahá ra tsa iyo?

³ Tan ra tahvi yutun cuvü ra. Tan sehe ña Maria cuvü ra. Tan yañi ra cuvü ra Jacobo, ra José, ra Judas, tan ra Simón, tan ñiñaha cuhva ra iyó ñi nu iyó yo ihya —catyí ñi.

Tan ña cuñi ñi tyaa yahvi ñi tsi ra. ⁴ Maa tyin catyí ra tsihin ñi:

—Tandihi ñi ityi tan jahá tandihi nyivi tsa ñayivi tsi ra cuvü ndusu yuhu Nyoo, maa tyin nyivi ñuu ra, tan nyivi ra, tan nyivi vehe ra ña tyaę yahvi ñi tsi ra —catyí ra Jesús.

⁵ Tan tyiso ndaha ra jiñi juhva nyivi cuuhvi, tan janduvahę ra tsi ñi, maa tyin ña cuvü javahę ra inga ca tsa iyo. ⁶ Tan iyo cuñi ra tyin ña tsinü iñi ñi tsi ra. Tacan tan cuahán ra cuajacuahá ra tsi nyivi iyó tandihi ñi ñuu nyihi tsa cayucü yatyin ñi ñuu can.

Nu jacuhun ra Jesús tsi ra tsicá tsihin ra cucahan ra naha tuhun Nyoo
(Mt. 10.5-15; Lc. 9.1-6)

⁷ Tsa yahę yacan tan canę ra tsi tsa utsi uvi ra tsicá tsihin ra, tyin jacuhun ra tsi ra naha cucahan ra naha tuhun Nyoo. Tacan tan quitsahę jacuhún ra uvi uvi ra naha. Tan tsahę ra ndatu tsi ra naha tsa tava ra naha tatyí ña vaha tsi nyivi. ⁸ Tan catyí ra tsihin ra naha tyin ña cundaha ra naha tsa cundaha ra naha; ndi marali, ndi tsa catsi ra naha, tan ndi kahun. Nduve náa cundaha ra naha; maa tyin cuvü cundaha ra naha yutun ñi. ⁹ Tan cunyaa nditsan tsaha ra naha. Tan ña cundaha ra naha inga nditsi jahma, na cahun ra naha tsihin cuhva nditsi ñi maa ra naha. ¹⁰ Tan catyí ra tsihin ra naha:

—Cuhva tsa tsaa ndo iin ñuu, quihvi ndo iin vehe, tan ndoo ndo ican nda cuanda quita ndo ñuu can. ¹¹ Tan tatun tsaa ndo iin ñuu tan ña naquihñin cuenda nyivi iyó ñuu can tsi ndo, tan ña cuñi ñi tyaa soho ñi tsa cua cahan ndo, quita ndo ican tan naquisi ndo nyaca tsaha ndo tan yacan janaha tyin ndoo cuatyí ñi siquü ñi. Tsa nditsa catyí yu tsihin ndo, tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra —catyí ra Jesús tsihin ra naha.

¹² Tacan tan cuahán ra naha cuacahán ra naha tuhun Nyoo tsihin nyivi. Tan catyí ra naha tyin na ndu uvi iñi ñi cuatyí ñi, tan na nanducu ñi tsi Nyoo. ¹³ Tan cuaha ñi nyivi tava ra naha tatyí ña vaha. Tan tyihñi ra naha acetye tsi nyivi cuuhvi tan nduvahę ñi.

Nu tsahá cuenda tsi nácaa tsihi ra Juan, ra jacoondutyę tsi nyivi
(Mt. 14.1-12; Lc. 9.7-9)

¹⁴ Ra rey Herodes tsitó ra tsa javahá ra Jesús tyin tandihi nyivi tan caahán ñi tsa javahá ra, tan tsicá ñi ra tyehen:

—Ra ihya cuví ra Juan, ra jacoondutyá tsi nyivi, ra tsa tsihi. Vityin nandoto ra. Juvín ra cuví can, yacan cuenda iyó tunyee ñi ra —cuñí ra Herodes, tsicá ñi ra.

¹⁵ Yihí nyivi catyí ñi:

—Ra Elías, ra cuví ndusu yuhu Nyoo tahān tsanaha, cuví ra.

Tan catyí tucu inga ñi:

—Ndusu yuhu Nyoo cuví ra, tumaa ra tsicoo tahān tsanaha naha ra —catyí ñi.

¹⁶ Tsa tsiñí ra Herodes tandihi tsa caahán nyivi, tan catyí ra:

—Ra ihya cuví ra Juan tsa tava tyiñu yu tyahnya jucun. Vityin nandoto ra —catyí ra Herodes.

¹⁷ Tacan catyí ra tyin juvín ñi maa ra tava tyiñu na tyihí ra naha tsi ra Juan vehe caa tan cuhñi ra naha tsi ra tsihin carena. Tacan javahā ra Herodes tsihin ra Juan tsacatyí ña Herodías tsa cuví ñasihí ra Felipe yañi ra. Ra Herodes quihín ra tsi ña Herodías tyin cuví ña ñasihí ra ¹⁸ Tan tsa tacan javahā ra, catyí ra Juan tsihin ra tyin ña vaha tsa quihín ra tsi ña Herodías tyin ñasihí yañi ra cuví ña.

¹⁹ Yacan cuenda ndasi cuñí ña Herodías nyehé ña tsi ra Juan. Cuñí ña cahñi ña tsi ra, maa tyin ña cuví, ²⁰ tyin ña tsahá ra Herodes tyin tsitó ra tyin ra vaha cuví ra Juan tan cuti iyó ra nuu Nyoo, tan yuuhví ra Herodes tsi ra. Yacan cuenda jahá cuenda vaha ra tsi ra. Vasu ndi maa ña cutuñí ñi ra Herodes tandihi tsa caahán ra Juan, maa tyin vaha cuñí ra tyaá soho ra tsa caahán ra. ²¹ Maa tyin tsa tahān tsi quivi cacu ra Herodes javahā ra iin vico. Tan cana ra tsi ra cumí tyiñu naha ra, tan ra yihí ndaha andaru naha ra, tan nyivi cuca tsa iyó ityi Galilea. Quivi ihya tsican ña Herodías tsa cuñí ña tsi ra Herodes. ²² Tyin ñaha sehe ña tsahān ña tsicuañí ña yaa nu iyó vico ra Herodes. Tan tahān xaan ñi ra Herodes tan ra nyecú cuxiñí tsihin ra cuhva tsañí ña. Tacan tan catyí ra Herodes tsihin ña:

—Ndācan tsi yu náa cuñí maa un. Náa tahan ñi maa tsi cua ndacan un tsi yu cua cuhva maa yu can tsi un. ²³ Tsitó maa Nyoo tyin cua cuhva yu tsa cua ndacan un. Tun ndacan un sava ñuhu tsa ndacá ñaha yu, cua cuhva yu can tsi un —catyí ra tsihin ña.

²⁴ Tacan tan quita ña, cuahán ña cuandacá tuhun ña tsi sihi ña tan catyí ña:

—¿Náa ndacan yu tsi ra?

Tan catyí sihi ña:

—Ndācan jiñi ra Juan, ra jacoondutyá tsi nyivi tsi ra —catyí ña.

²⁵ Tacan tan numí ñi quihví nyico ñaha tyuvaa can nu nyii ra rey Herodes, tan catyí ña tsihin ra:

—Cuñí yu jiñi ra Juan, ra jacoondutyá tsi nyivi. Cahnya jucun ra tan tinyii un jiñi ra nuu iin coho, cuhva un tsi yu vityin vityin ñi —catyí ña tsihin ra.

²⁶ Tacan tan cuihya xaan cuñí ra rey can cuví. Maa tyin tsa cuenda tsa cahān ra tyin cua cuhva maa ra tsa cua ndacan ña, ña cuñí ra jandaví ñaha ra tsi ña tyin tandihi maa nyivi yucú vico can tan tsiñí ñi tsa cahān ra, yacan cuenda tsahā ra tsa tsican ña. ²⁷ Numí ñi tava tyiñu ra rey can tsi iin andaru na cuquihín ra jiñi ra Juan. ²⁸ Tsahān andaru can tsitsi vehe caa, tan tsahnya ra jucun ra Juan. Tan tsindaca ra jiñi ra Juan tsi ñaha tyuvaa can, nyii tsi nu iin coho. Tan nacuhva cuenda ña can tsi sihi ña.

²⁹ Tsa tsitó ra nyicún tsi ra Juan tsa cuví, tsahān ra naha tsiquihín ra naha cuñu ñuhu ra, tan tsicutsí ra naha can.

Nu jacatsi ra Jesús uhun mil rayñi

(Mt. 14.13-21; Lc. 9.10-17; Jn. 6.1-14)

³⁰ Tsa yaha yacan tan ndu iin ra tsicá tyiñu ra Jesús tsihin ra, tan catyí tuhun ra naha tsihin ra tandihi tsa javahā ra naha, tan tsa jacuahā ra naha nu tsahān ra naha tsicahān ra naha tuhun Nyoo tsihin nyivi. ³¹ Tan catyí ra Jesús tsihin ra naha:

—Cohon ndo iin nu taxin caa, quitatu yo luxu.

Tacan catyí ra tsihin ra naha tyin cuaha xaan nyivi cuahán tan vatsí, tan ndi ña cuyatyí ra naha catsi ra naha jahá ñi. ³² Tacan tan quihví ra Jesús tsihin ra naha tsitsi iin yutun ndoo tan cuahán ra naha iin nu taxin caa. ³³ Maa tyin cuaha xaan nyivi nyehé ñi cuahán ra naha. Tan nacoto ñi tsi ra Jesús. Tacan tan cuahán ñi tsihin tsaha ñi, quita ñi tandihi ñi ñuu tan jihna ca ñi tsaq nu cua tsa ra Jesús. ³⁴ Cuhva tsa tsaq ra naha, quita ra Jesús tsitsi yutun ndoo tan nyehé ra tyin cuaha xaan nyivi yucú ican. Tan cundaahví ñi ra nyehé ra tsi ñi, tyin yucú ñi tumaa tsiyucú mbee tun nduve ra jahá cuenda tsi ti naha ti. Tacan tan quitsahā jacuahá ra cuaha xaan tuhun vaha tsi ñi. ³⁵ Tsa tsa cua cuiso ñicanyii, tan natuhva ra tsicá tsihin ra Jesús xiin ra tan catyí ra naha tsihin ra:

—Tsa cueñi xaan, tan nduve nyivi iyó yatyin ñi ihya. ³⁶ Vaha ca jacunuho un tsi nyivi tyin ihya nduve tsa catsi ñi. Tan na cujata ñi paan catsi ñi vehe tsa iyó tsitsi cuhu ihya tan ñuu tsa cayucú yatyin ñi —catyí ra naha tsihin ra.

³⁷ Maa tyin nacahān ra Jesús, tan catyí ra:

—Cuhva nyooho tsa catsi ñi.

Tacan tan nacahān ra naha tan catyí ra naha:

—Vasu ndi maa jaha tyiñu ndi iñu yoo, ña cua ñihi ndi xuhun jata ndi paan catsi tandihi nyivi ihya.

³⁸ Tan catyí ra Jesús tsihin ra naha:

—Nyehe jihna ndo najava paan ndahá ndo —catyí ra.

Cuhva tsa tsitö ra naha najava paan ndahá ra naha, tacan tan tsicahān ra naha tsihin ra tan catyí ra naha:

—Ndahá ndi uhun taahan ñi paan tan uvi taahan ñi tyaca.

³⁹ Tacan tan catyí ra tsihin nyivi na cunyecü ñi nu cuhu can. ⁴⁰ Tan tsinyecü cuenda cientu tan cuenda uvi xico utsi ñi tsa iin cuhva tsinyecü ñi. ⁴¹ Tacan tan quihñ ra Jesús tsa uhun paan can tan nduvi tyaca can. Tan nanyehē ndaa ra ityi siqui, tan nacuhva ra tyahvi nyoo tsi Nyoo, tsa yaha tan tsahnü cuatyí ra paan can, tan tsahā ra can tsi ra tsicá tsihin ra tyin tsatsa ra naha can tsi nyivi. Tsa ndihí tsatsā ra naha paan can, tan tsatsā ndihí ra naha tyaca. ⁴² Tsatsj tandihí ñi tan ndahā iñi ñi. ⁴³ Tan jacutu ra naha utsi uvi tyica tsihin paan tan tyaca tsa ndoq. ⁴⁴ Tan uhun mil rayñ tsatsj paan can.

Nu tsicá ra Jesús nu ndutya
(Mt. 14.22-27; Jn. 6.16-21)

⁴⁵ Tacan tan catyí ra Jesús tsihin ra tsicá tsihin ra na yaha sava ñi ra naha nu miñi can tan cuhun cuee ñi ra naha nda ñuu Betsaida tsitsi tsa ndi jacunuhu ra tsi nyivi yuvehe ñi. ⁴⁶ Tsa yaha cuanuhu nyivi, tacan tan cuahán ra Jesús cuandacán tahvi ra tsi Nyoo iin jiñi yucu. ⁴⁷ Tsa tsa cuñi cuaa, yutun ndoo nu cuahán ra tsicá tsihin ra Jesús tsa cuahán can nda mahñu miñi, tan maa ra ndi nyii ra yuhu miñi can. ⁴⁸ Tan tsa nyehe ra tyin ña cuví jacacá vaha ra naha yutun ndoo jahá tatyí, tacan tan cuahán tsihin tsaha ra nu ndutya nu cuahán ra naha tsa tsa cuñi tuvi, nyicún tsicá nyicún tsicá ñi ra tsi ra naha. Tan tsa cua yaha tsiyo ra nu cuahán ra naha. ⁴⁹ Maa tyin tsa nyehe ra naha tsicá ra nu ndutya, tsicā iñi ra naha tyin tatyí cuví ra, tacan tan quitsahā caná tsa ra naha ⁵⁰ tyin tandihí ra naha nyehe ra naha tsi ra tan nayuhvi ra naha. Maa tyin nacahān ra tan catyí ra tsihin ra naha:

—ñNa nayuhvi ndo tyin maa yu cuví!

⁵¹ Tacan tan quihvi ra tsitsi yutun ndoo nu yucú ra naha, tan tsa yaha quihvi ra, iin yaha ñi cutaxñ tatyí can. Tan iyo xaan cuñi ra naha cuví ⁵² tyin ñaha ca cutuñi iñi ra naha tsa iyo tsa javahā ra tsihin paan, tyin ndi ndava añima ra naha.

Nu janduvahā ra Jesús nyivi cuuhvi tsa iyó nduhva tsa nañi Genesaret
(Mt. 14.34-36)

⁵³ Yaha sava ra naha nu miñi can tan tsaq ra naha Genesaret inga tsiyo yuhu miñi can, tan tsahñj ra naha yutun ndoo can yatyin ñi yuhu ndutya. ⁵⁴ Cuhva tsa quitā ñi ra naha tsitsi yutun ndoo can, tan nacoto nyivi tsi ra Jesús. ⁵⁵ Tacan tan tsinú xaan ñi cuahán ñi cuajacotó ñi tsi nyivi iyó naniñ cahnu ityi

can tyin tsaq ra Jesús. Tan tsaq cuaha nyivi quee tandihí ñi ñuu nu nyii ra, tan yucú nyivi cuuhvi nu tsitö tsaq tsihin ñi. ⁵⁶ Tan tandihí ñi ityi nu cuahán ra tsitsi ñuu nyihí o tsitsi ñuu nahnu, o tsitsi cuhu, tsaquín nyivi nyivi cuuhvi yuhu ityi. Tan caahán ndaahvi ñi tsihin ra na cuhva ra tññ ñi cuuhvi can vasu tan yuhu jahma ra tan nduvaha ñi. Tan tandihí maa nyivi tsa tññ jahma ra nduvahā ñi.

7

Tsa jativi tsi nyivi nu Nyoo
(Mt. 15.1-20)

¹ Tacan tan tsaq juhva ra fariseo tan juhva ra maestro cuenda ley vehe ñuhu tsa quee ñuu Jerusalén naha ra nu nyii ra Jesús. ² Ra ihya naha ra nyehe ra naha tyin juhva ra tsicá tsihin ra Jesús ña nacatyā ra naha ndaha ra naha tan tsatsí ra naha tumaa catyí maa costumbre ra naha. Tsa cuenda yacan catyí ra naha tyin ña vaha javahā ra can naha ra. ³ Tyin ra fariseo naha ra javahā ra naha tumaa catyí costumbre tsii tsaahnu ra naha tacan tucu ñi tandihí ca nyivi Israel ña cuví catsi ñi tun ña nacatyā ñi ndaha ñi cuaha tsaha tumaa iyó maa ñi. ⁴ Tan tatun ña nacatyā ñi ndaha ñi tsa tsaá ñi quee ñi nuyahvi, ña cuví catsi ñi. Iyó cuaha ca costumbre tsa tuhvá ñi javahá tumaa tsa nacatyā ñi vasu, jarra, tan tandihí ndaha tyiñu tsa tsinú tsihin caa tsa iyó tsi ñi tan nda cuanda cama ñi. ⁵ Tacan tan tsicā tuhun ra fariseo tan ra maestro cuenda ley naha ra tsi ra Jesús, tan catyí ra naha:

—¿Nacuenda tyin ña javahá ra tsicá tsihin un naha ra cuhva nacoq tsii tsaahnu yo naha ra? Tyin ña nacatyā jihna ra naha ndaha ra naha tumaa iyó maa yo tan tsatsí ra naha —catyí ra naha tsihin ra.

⁶ Tan nacahān ra Jesús, tan catyí ra:

—Nditsa tsa cahān ra Isaías, ra cuví ndusu yuhu Nyoo tuhun nyoooho tsa jahá ndo tyin vaha xaan ndo tan ña nditsa ndo. Tyin catyí ra tyehen:

Nyivi ihya jacahnú ñi tsi yu tsihin yuhu ñi. Maa tyin ñavin tsihin tsa ñi iñi añima ñi.

⁷ Yacan cuenda nduve yahvi nyaá jacahnú ñi tsi yu,

tyin maa ñi maa tuhun caahán nyivi jacuahá ñi tan ñavin tuhun yu jacuahá ñi, catyí ra Isaías tuhun ndo jahā Nyoo, catyí ra Jesús tsihin ra naha.

⁸ Tyin nyoooho nacoq ndo cuhva caahán Nyoo, tan nyicún ndo cuhva caahán nyivi ñi, tumaa tuhvá ndo nacatyā ndaha tyiñu ndo, tan inga ca tsa tuhvá ndo javahá. ⁹ Nyoooho tyaq tsiyo ndo tuhun caahán Nyoo, tacan tan javahá ndo tuhun tsahnü tsa nacoq tsii tsaahnu ndo. ¹⁰ Tyin catyí ley Nyoo tsa tyaq ra Moisés: “Tyaq yahvi ndo tsi jutu ndo tan tsi sihi ndo, tyin tandihí nyivi tsa cua cahān

ndavaha ñi tsi jutu o tsi sihi, cua cúu ñi” catyí ley Nyoo tsa tyaá ra Moisés. ¹¹ Maa tyin nyooho catyí ndo tyin cuví catyí iin nyívi tsihin jutu ñi o sihi ñi tyeheh: “Ña cuví jatyinyee yu tsi un tyin tandihi tsa iyó tsi yu cuví tsi Corbán.” (Tuhun ihya cuñí tsi catyí: “Tsa ndihi can tsahá cuenda yu tsi Nyoo.”) ¹² Tan tatun catyí nyívi tacan, ña cuñí ca tsi jatyinyee ñi tsi jutu ñi o tsi sihi ñi, catyí ndo. ¹³ Yacan cuví tsa javahá ndo vityin, tyaá tsiyo ndo tuhun caahán Nyoo, tsahan tyaá yahvi ca ndo tuhun tsahnu cuhva iyó maa ndo. Tan cuaha ca tsa tacan caá javahá ndo —catyí ra Jesús.

¹⁴ Tacan tan caná nyico ra Jesús tsi nyívi tan catyí ra tsihin ñi:

—Tyaá soho vaha tandihi ndo tsa cua cah-an yu, tan nducu ndo cuhva cutuñi iñi ndo.

¹⁵ Tsa quihví yuhu nyívi, ña cuví jatívi tsi tsi ñi. Tsa jatívi tsi ñi cuví tsa quitá añima ñi.

¹⁶ Nyooho tsa iyó soho, tyaá soho ndo tsa caahán yu —catyí ra Jesús tsihin ñi.

¹⁷ Tsa yahá nacoó ra Jesús tsi nyívi, tan quihví ra tsitsi vehe, tacan tan tsicá tuhun ra tsicá tsihin ra náa cuñí tsi catyí tsa cahan ra. ¹⁸ Tan catyí ra tsihin ra naha:

—¿A ndi nyooho tan ña cutuñi iñi ndo? ¿A ña tsitó ndo tyin tsa quihví tsitsi yo ña cuví jatívi tsi tsi yo? ¹⁹ Tyin tsitsi yo quihví tsi tan ñavin añima yo. Yaha can tan quitá tsi tsitsi cuñi ñuhu yo —catyí ra Jesús.

Tsihin tsehe janaha ra tyin tandihi nyayu tan vaha catsi yo itsi. ²⁰ Tan catyí tucu ra:

—Tsa quitá añima nyívi, yacan jatívi tsi ñi. ²¹ Tyin tsa caquiñi tsa tsicá iñi ñi tsitsi añima ñi quitá can, tacan tan rayii cuñi ra coo inga ñaha tsi ra, o ñiñaha cuñi ñi coo inga rayii tsi ñi. Yihí ra tsicoó ra tsihin inga ñaha tan ña tindaha ra tsihin ña. Yihí rayii tsicoó ra tsihin ra ndusihi. Tan yihí ñiñaha tsicoó ñi tsihin ñi nduyii. Tan yihí ñi cuñi ñi cahñi ñi nyívi, ²² o cuñi ñi suhu ñi. Yihí ñi cuñi ñi coo tsa tsii inga nyívi tsi ñi; yihí ñi javahá ñi tsa caquiñi; yihí ñi jandaví ñaha ñi; yihí ñi iyó inga viciu tsi ñi; yihí ñi nyiyo iñi ñi; yihí ñi caahán ñi cuendu; yihí ñi cahnu jahá ñi tsi ñi; yihí ñi soho javahá ñi. ²³ Tandihí tsa ña vaha ihya, quitá can tsitsi añima nyívi, tan jatívi can tsi ñi —catyí ra Jesús tsihin ra naha.

Nu tsiny iñi iin ñaha inga ñuu tsi ra Jesús (Mt. 15.21-28)

²⁴ Tsa yahá yacan tan quitá ra Jesús ñuu can, tan cuahán ra ñuhu nu canyii ñuu Tiro tan ñuu Sidón. Tsa tsaá ra ican, quihví xeehe ra tsitsi iin vehe tyin ña cuñi ra coto nyívi numaa nyii ra. Maa tyin ña cuví cunyii xeehe ra ²⁵ tyin yatyi xaan tsitó sihi iin ñaha tyuvaa tsa yihí tatyí ña vaha nu nyii ra.

Tacan tan cuahán ña nu nyii ra. Tsa tsaá ña tan tsicuiñi tsiti ña nuu ra. ²⁶ Ñaha can, ñavin ñaha Israel cuví ña, tyin ñaha ñuu Sirofenicia cuví ña. Tsaá ña nu nyii ra Jesús tan caahán ndaahvi ña tsihin ra tyin na tava ra tatyí ña vaha yihí tsi sehe ña. ²⁷ Maa tyin catyí ra Jesús tsihin ña:

—Ña cahan yuhu ca un; na catsi jihna nyívi Israel, ñi cuví sehe Nyoo, tyin ña vaha quihín nyaa yo paan yuhu sehe yo tan cuhva yo itsi catsi ina —catyí ra Jesús tsihin ña.

²⁸ Tan nacahan ña tan catyí ña:

—Nditsa, Jutu Mañi yu, maa tyin nda cuanda ina cuví ndatú ti tan tsatsi ti titsehe tsa cucoyó xuu mesa jahá sehe tsitoho ti —catyí ña tsihin ra.

²⁹ Tacan tan catyí ra Jesús tsihin ña:

—Vaha caahán un. Tan tsa cuenda tsa caahán un tacan tsa yahá quitá tatyí ña vaha tsi sehe un. Cuanuhu vityin —catyí ra tsihin ña.

³⁰ Tan cuhva tsa tsaá ña yuvehe ña, canyii taxin sehe ña nu cama, tyin tsa yahá quitá tatyí ña vaha tsi ña.

Nu janduvahá ra Jesús tsi ra soho tan ñiñi

³¹ Quitá nyico ra Jesús ñuhu nu canyii ñuu Tiro, tan yahá ra ñuu Sidón, tan cuahán ra inga ca ñuu tsa cayucú Decápolis. Yahá ra ican tan tsaá ra miñi Galilea. ³² Tsa tsaá ra Jesús ican, tsahan nyívi tsindaca ñi iin ra soho tsa ña cuví cahan nu nyii ra. Cahán ndaahvi ñi tsihin ra na tyiso ra ndaha ra jiñi ra can. ³³ Tacan tan quihín ra tsi ra can cuahán tsiyo tsihin ra nu nduve nyívi. Tan tyaxín ra nundaha ra tsitsi soho ra can, tan tiví sii ra, tan tijn ra nu yaa ra can. ³⁴ Tacan tan nanyehé ndaa ra ityi andivi. Tan ixta tatyí ra, tan catyí ra:

—¡Efata! —tan tuhun ihya cuñi tsi catyí: ¡Nuñá!

³⁵ Tan tsihin can nuñá soho ra can, tan nduvahá yaa ra, tan cuví nacahan ra. ³⁶ Tan catyí ra Jesús tsihin ñi tyin ña cahan ñi can tsihin nyívi, maa tyin vasu ndi maa caahán ra tacan tsihin ñi, cuñihí ca ñi caahán ñi tsa javahá ra. ³⁷ Iyo cuñi ñi tan catyí ñi:

—Tandihí tsa javahá ra tan vaha javahá ra itsi. Nyívi soho nacuñi ñi jahá ra tan nyívi ñiñi nacahan ñi.

8

Nu tsahá ra Jesús tsa catsi cumi mil nyívi (Mt. 15.32-39)

¹ Quivi can nataca cuaha nyico nyívi nu nyii ra Jesús. Tan nduve maa tsa catsi ñi iyó. Tacan tan caná ra Jesús tsi ra tsicá tsihin ra, tan catyí ra tsihin ra naha:

² —Ndaahvi xaan cuñi yu nyehé yu nyívi ihya, tyin tsa uñi quivi yucú ñi tsihin yo, tan

nduve ca tsa catsi ñi. ³ Tyin tun jacuhun yu tsi ñi yuvehe ñi tsa ndi cumañi ca catsi ñi, cua cūu naaha ñi ityi cuhun ñi, tyin yihí ñi cañi xaan quee ñi —catyí ra Jesús tsihin ra naha.

⁴ Tan nacahañ ra tsicá tsihin ra, tan catyí ra naha:

—¿Maa tyin nácaa cuhva yo tsa catsi nyivi ihya, tan nduve nyivi iyó ihya tan xico ñi tsa catsi yo?

⁵ Tan tsicá tuhun ra Jesús tsi ra naha, tan catyí ra:

—¿Najava paan ndahá ndo?

Tan catyí ra naha:

—Utsa taahan ñi.

⁶ Tacan tan catyí ra tsihin nyivi na cunyecuc ñi nu ñuhu. Tsa yaha cahañ ra yacan, tacan tan quihñ ra tsa utsa paan can, tan nacuhva ra tyahvi nyoo tsi Nyoo tsa cuenda can. Tsahan tsahnú cuatyí ra can tan tsaha ra can tsi ra tsicá tsihin ra, tyin tsatsa ra naha can tsi nyivi. ⁷ Tan ndahá tucu ra naha juhva tyaca nyihi. Tsahañ ndihi ra Jesús tyahvi nyoo tsi Nyoo tsa cuenda can, tacan tan tsaha ra can tsi ra naha tyin tsatsa ra naha tsi nyivi. ⁸ Tandihí ñi tsatsj ñi, tan ndahá vaha iñi ñi. Tsa ndihí tsatsj ñi tan jacutu ra naha utsa tyica tsihin tsa ndoo. ⁹ Tan quitá maa cumi mil nyivi jacatsj ra. Yaha can tan jacunuhu ra tsi ñi. ¹⁰ Tsa yaha cuanuhu ñi, tacan tan quihvi ra tsihin ra tsicá tsihin ra tsitsi iin yutun ndoo. Tan cuahán ra naha ityi Dalmanuta.

Nu tsicán ra fariseo naha ra tsi ra Jesús tyin javaha ra iin tsa iyo

(Mt. 16.1-4; Lc. 12.54-56)

¹¹ Tsañ ra fariseo naha ra nu nyii ra Jesús, tan quitsaha caahán yuhu tahan ra naha tsihin ra. Nducú cuhva ra naha tsi ra tun nditsa tyin Nyoo jaquitsj tsi ra, yacan cuenda catyí ra naha tsihin ra tyin javaha ra iin tsa iyo nyehe ra naha. ¹² Tacan tan ra Jesús ñihi xaan ixtá tatyí ra, tan catyí ra:

—¿Nacuenda tyin tsicán nyivi iyó vityin tsa iyo? Tsa nditsa catyí yu tsihin ndo tyin ña cua nyehe ndo ndi intuhun tsa iyo —catyí ra tsihin ra naha.

¹³ Tacan tan nacoñ ra tsi ra naha, tan quihvi nyico ra tsitsi yutun ndoo tan cuahán ra inga tsiyo miñi.

Nu catyí ra Jesús tyin tsa jacuahá ra fariseo naha ra cuví can tumaa yutsan iya

(Mt. 16.5-12)

¹⁴ Ra tsicá tsihin ra Jesús nañ iñi ra naha cundaha ra naha tsa catsi ra naha. Tan intuhun ñi paan ndahá ra naha yucú ra naha tsitsi yutun ndoo can. ¹⁵ Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo naha ra tan ra Herodes —catyí ra tsihin ra naha.

¹⁶ Tan ra tsicá tsihin ra quitsaha natuhñ tahan ra naha tan catyí ra naha:

—Caahán ra tyehen tsihin yo tyin nduve paan ndahá yo catsi yo —catyí ra naha.

¹⁷ Tsa tuvj iñi ra Jesús tsa tsicá iñi ra naha, tan catyí ra tsihin ra naha:

—¿Nacuenda tsicá xaan iñi ndo tyin nduve tsa catsi ndo ndahá ndo? ¿A ñaha ca cutuñi iñi ndo? ¿A ñaha ca coto ndo? ¿Nacuenda ndi ndava xaan añima ndo? ¹⁸ Nyecú tinuu ndo, tan ña nyehé ndo. Nyecú soho ndo, tan ña tsiñi ndo. ¿A ña nducuhñ iñi ndo tsa javaha yu ¹⁹ quivi tsa jacatsj yu uhun mil rayi tsihin uhun taahan ñi paan? ¿A ña ñuhú iñi ndo najava tyica jacutu ndo tsihin tsa ndo? —catyí ra Jesús, tsicá tuhun ra tsi ra tsicá tsihin ra.

Nacahañ ra naha tan catyí ra naha:

—Utsi uvi tyica.

²⁰ Tan catyí nyico ra Jesús tsihin ra naha:

—Tan quivi jacatsj yu cumi mil nyivi tsihin utsa taahan ñi paan, ¿najava tyica jacutu ndo tsihin tsa ndoo?

Nacahañ ra naha tan catyí ra naha:

—Utsa taahan tyica.

²¹ Tacan tan catyí ra Jesús tsihin ra naha:

—¿A ñaha ca cutuñi iñi ndo? —catyí ra tsihin ra naha.

Nu janduvaha ra Jesús iin ra cuaa nda ñuu Betsaida

²² Tsa yaha yacan tan cuahán ra Jesús tsihin ra tsicá tsihin ra nda ñuu Betsaida. Tsa tsañ ra naha ican, tsindacañ nyivi ñuu can iin ra cuaa nu yucú ra naha. Tan cahañ ndaahvi ñi tsihin ra Jesús tyin tñin ra tsi ra cuaa can tan janduvaha ra tsi ra. ²³ Tacan tan tñin ra ndaha ra cuaa can, tan quihñ ra tsi ra cuahán tsihin ra ityi tsata ñuu. Tyañ sñi ra nu ndaha ra tan tñin ra tinuu ra can, tan tyiso ra ndaha ra soco ra can, tan tsicá tuhun ra tsi ra tun nditsin nyehé ra luxu. ²⁴ Ra cuaa can nanyehé ra tan catyí ra:

—Nyehé yu juhva nyivi, tan caá ñi tumaa caá yutun, maa tyin tsicá ñi —catyí ra.

²⁵ Tacan tan tñin nyico ra Jesús tinuu ra inga tsaha, tan nanyehé vaha ra tan nduvaha ra. Nanyehé catsi vaha ra tandihí tsa iyó. ²⁶ Tacan tan jacunuhu ra Jesús tsi ra yuvehe ra, tan catyí ra tsihin ra:

—Ña quihvi un tsitsi ñuu ihya tan ña nacatyí tuhun tsehe tsihin nyivi —catyí ra Jesús tsihin ra.

Nu cahañ ra Pedro tyin ra Jesús cuví Cristo, ra jacacú tsi yo

(Mt. 16.13-20; Lc. 9.18-21)

²⁷ Yaha can tan cuahán ra Jesús tsihin ra tsicá tsihin ra ñuu tsa cayucú yatyin ñi ñuu Cesarea tsa javaha ra Felipe. Tsitsi tsa cuahán ra naha, tan tsicá tuhun ra Jesús tsi ra naha, tan catyí ra:

—¿Náa caahán nyívi tuhun yu? ¿Yóo ra cuví yu catyí ñi? —catyí ra tsihin ra naha.

²⁸ Nacahán ra naha tan catyí ra naha:

—Yihí nyívi catyí ñi tyin ra Juan, ra jacoon-dutyá tsi nyívi, cuví un. Inga ñi catyí ñi tyin ra Elías. Yihí ñi catyí tucu ñi tyin inga ra cuví ndusu yuhu Nyoo cuví un —catyí ra naha tsihin ra.

²⁹ Tacan tan tsicá tuhun ra tsi maa ra naha, tan catyí ra:

—Tan nyooho, ¿yóo ra cuví yu, cuñi ndo? Tan nacahán ra Pedro tsihin ra:

—Yooho cuví ra Cristo, ra jacacú tsi nyívi.

³⁰ Maa tyin cahán ra Jesús tsihin tandihí ra naha tyin ña cahán ra naha can tsihin ndi intuhun maa nyívi.

Nu cahán ra Jesús tyin cua cúu ra
(Mt. 16.21-28; Lc. 9.22-27)

³¹ Tacan tan quitsahá jacuahá ra tyin Rayíi tsa quee nda gloria cua nyehe xaan ra tundofo. Tan ña cua tsinu ifi ra mandoñi naha ra tan ra jutu cuví ityí nuu tsihin ra jutu naha ra tsi ra tan ndi ra maestro cuenda ley vehe ñuhu naha ra tan ña cua naquihin cuenda ra naha tsi ra. Catyí ra Jesús tsihin ra naha tyin cua cahñi nyívi tsi ra maa tyin cua nandoto ra tsa tsinu uñi quívi. ³² Tacan cahán catsi ra tsihin ra naha. Tacan tan quihín ra Pedro tsi ra cuahán tsihin ra tsata vehe tan quitsahá caahán ra tsihin ra Jesús tyin ña vaha tsa cahán ra. ³³ Maa tyin ra Jesús nanyico coo ra, tan nanyehe ra nu nyecú inga ra tsicá tsihin ra. Tan quitsahá caahán ra tsihin ra Pedro, tan catyí ra:

—¿Cuatsiyo nuu yu ihya, cuihna! Tyin yooho ña tsicá ifi un tumaa tsicá ifi Nyoo, tyin tsicá ifi un tumaa tsicá ifi nyívi —catyí ra Jesús tsihin ra Pedro.

³⁴ Tacan tan caná ra Jesús tsi nyívi tan tsi ra tsicá tsihin ra tan catyí ra:

—Tatun ndáa nyooho cuñi cunyicun tsi yu, cahnya ifi ndo nacoo ndo tsa cuñi maa ndo javaha ndo, tyin tacan tan cuví javaha ndo cuhva cuñi Nyoo. Tan ña cua ndu uvi ifi ndo tsa yihí ndo cuenda yu, vasu ndi maa tandihí quívi nyehé ndo tundofo tsa cuenda yu. Tyin yacan cuví cruu tsa taahán tsi cuiso ndo tun cunyicun ndo tsi yu. ³⁵ Tyin nyooho tsa ña cuñi nyehe tundofo tan cuhva ndo ñayívi ndo tsa cuenda yu, cua nyehe ndo tundofo anyaya. Maa tyin nyooho tsa cua cuhva ñayívi tsa cuenda yu tan tsa cuenda tuhun Nyoo, cua cacu ndo. ³⁶ Tyin nduve yahvi nyaá cua ñihi ndo tandihí tsa iyó nu ñuhu ñayívi ihya tun ña cua cacu añima ndo.

³⁷ Tyin nduve maa náa tsihin tyahvi ndo tan cuví cacu añima ndo tan ña cunaa tsi. ³⁸ Tyin nyívi cua nducahan nuu tsa cuenda yu tan tsa cuenda tuhun caahán yu quívi cahán ñi tsihin nyívi caquifí tsa ña tyáa yahvi tuhun

Nyoo, yuhu Rayíi tsa quee nda gloria cua nducahan nuu yu nyehe yu tsi ñi quívi quitsi yu tsihin ángel cuenda Nyoo Jutu yu tan tsihin tsa sñi caá ra.

9

¹ Tan tsa nditsa catyí yu tsihin ndo, tyin yihí nyooho tsa yucú ihya vityin, cua nyehe ndo nácaa ndacá ñaha Nyoo tsihin tunyee ifi ra tsa ndi cumañi ca cúu ndo.

Nu nyehe uñi ra tsicá tsihin ra Jesús nu nasamá cuhva caá ra

(Mt. 17.1-13; Lc. 9.28-36)

² Tsa yahá ifu quívi, tacan tan quihín ra Jesús tsi ra Pedro, ra Jacobo, tan ra Juan cuahán tsihin ra iin yucu sucun. Ican nasamá cuhva caá ra tan nyehe ra yucú tsihin ra can. ³ Xiñu xaan tan cuitsin xaan jahma ra cuví tumaa cuitsin vico. Ndi intuhun maa nyívi iyó nu ñuhu ñayívi ihya tan ña cuví janducuitsin ñi jahma tumaa cuitsin jahma ra. ⁴ Tan nyehe ra naha tyin nyaá ra Elías tan ra Moisés tsihin ra, natuhún ra naha tsihin ra. ⁵ Tacan tan catyí ra Pedro tsihin ra Jesús:

—Maestro, ¡vaha xaan tyin yucú ndi ihya! Cua javaha ndi uñi taahan tyahva; iin tsa cuenda un, iin tsa cuenda ra Moisés, tan iin tsa cuenda ra Elías —catyí ra Pedro. ⁶ Cahán ra tacan tyin ña tsitó ra náa cahán ra tyin maa ra tan ra yucú tsihin ra nayuhví xaan ra naha.

⁷ Tacan tan nuu iin vico siquí ra naha tan tyasi tsi tsi ra naha. Tan tsitsi vico can nacahán iin ndusu tan catyí tsi:

—Ra ihya cuví Sehe yu, tan cuñi xaan yu tsi ra. Tyáa yahvi ndo tsa caahán ra —catyí ndusu can.

⁸ Tan cuhva tsa nanyehe ra naha, nduve ca ra Elías tan ra Moisés nyaá, intuhun ña maa ra Jesús nyaá.

⁹ Tan cuhva tsa vatsí nuu ra naha yucu can, catyí ra Jesús tsihin ra naha tyin ña cahán naha ra naha tsa nyehe ra naha. Cuví cahán maa ra naha can nda yaha nandoto Rayíi quee nda gloria, tan rayíi can cuví maa ra. ¹⁰ Yacan cuenda ña cahán maa ra naha tuhun can, tan natuhún tahan ra naha náa cuñi tsi catyí tuhun tsa cua nandoto ra. ¹¹ Tacan tan tsicá tuhun ra naha tsi ra Jesús tan catyí ra naha:

—¿Nacuenda tyin catyí ra cuví maestro cuenda ley vehe ñuhu naha ra tyin jihna ca ra Elías taahán tsi quitsi nu ñuhu ñayívi ihya inga tsaha?

¹² Tan nacahán ra, tan catyí ra:

—Nditsa tyin jihna ca ra Elías taahán tsi quitsi tsa ndi cumañi ca quitsi yuhu tyin janduvaha ra tandihí. ¿Tan náa catyí tuhun Nyoo cuenda yuhu Rayíi quee nda gloria? Catyí tsi tyin cua nyehe yu tundofo, tan ña

cua cuñi nyivi nyehe ñi tsi yu. ¹³ Maa tyin yuhu catyí yu tsihin ndo tyin tsa yaha quítsi ra Elías. Tan nyivi javaha ñi tsihin ra cuhva cuñi maa ñi, tumaa catyí maa tutu Nyoo tyin cua tahan ra —catyí ra Jesús tsihin ra naha.

Nu janduvaha ra Jesús iin ra tyuava tsa yihí tatyí ña vaha

(Mt. 17.14-21; Lc. 9.37-43)

¹⁴ Tsa yaha yacan tan cuahán ra naha nu yucú tandihí ca ra tsicá tsihin ra naha. Tsa tsaá ra naha ican, nyehe ra naha tyin yucú cuaha nyivi nanií canduvi. Tan yucú tucu ra maestro cuenda ley vehe ñuhu naha ra, tan caahán yuhu tahan ra naha tsihin ra tsicá tsihin ra Jesús. ¹⁵ Tsa nyehe nyivi can tsi ra Jesús, iyo xaan cuñi tandihí ñi cuví. Tacan tan tsahan ñi nu nyaá ra tsicuhvá ñi nacumi tsi ra. ¹⁶ Tacan tan tsicá tuhun ra tsi ñi tan catyí ra:

—¿Nacuenda caahán yuhu tahan ndo? —catyí ra.

¹⁷ Tacan tan nacahan iin ra tsa nyaá tyañu tandihí nyivi can, tan catyí ra:

—Maestro, vatsí yu vatsí ndacá yu sehe yu tsi un tyin yihí tatyí ña vaha tsi ra tan nduñihí ra jahá nu. ¹⁸ Tyin tandihí ñi nu tñin tatyí can tsi ra, janduvá nu tsi ra, tan quita tiñuu yuhu ra, tan jacahyú ra nuhu ra, tan janduyutún nu tsi ra. Tsa yaha cahan yu tsihin ra tsicá tsihin un naha ra tyin tava ra naha tatyí ña vaha can, maa tyin ña cuví tava ra naha tsi nu —catyí ra can tsihin ra Jesús.

¹⁹ Nacahan ra Jesús tan catyí ra:

—¿Nyooho nyivi ña tsinú iñi tan caquiñi! ¿Ndáa nda quivi cua cunyi yu tsihin ndo? ¿Tan najava ca quivi cua cunyeet iñi yu nyehe yu tsi ndo tyin ña tsinú vaha iñi ndo tsi yu? Ndáca ndo tsi ra luhlu can tsi yu ihya —catyí ra.

²⁰ Tacan tan tsindacá jutu ra luhlu can tsi ra tsi ra Jesús. Tan cuhva tsa nyehe nu tatyí ña vaha can tsi ra Jesús, janduvá nu tsi ra luhlu can tan quitsahá tsicó tui ra nu ñuhu jahá nu. Tan quita tiñuu yuhu ra. ²¹ Tacan tan tsicá tuhun ra Jesús tsi jutu ra luhlu can tan catyí ra:

—¿Ama quitsahá taahán ra tyehen?

Tan nacahan jutu ra luhlu can, tan catyí ra:

—Nda ndi luhlu xaan ra. ²² Tan cuaha tsaha tyihí tatyí ña vaha can tsi ra nu cayú ñuhú, tan nu ndutya. Cuñi nu cahñi nu tsi ra. Maa tyin tun cuví javaha un náa javaha un tsihin ra, cundaahvi iñi tsi ndi, tan jatyinyee tsi ndi —catyí jutu ra luhlu can tsihin ra Jesús.

²³ Tan catyí ra Jesús tsihin ra:

—Tun tsinú iñi un, tandihí tan cua cuví tyin tsa cuenda ra tsa tsinú iñi tandihí tan cuví —catyí ra Jesús.

²⁴ Tacan tan caná tsaá jutu ra tan catyí ra tsihin ra Jesús:

—¿Tsinú iñi yu! ¿Jatyinyee tsi yu na tsinu ca iñi yu! —catyí ra tsihin ra.

²⁵ Cuhva tsa nyehe ra Jesús tyin cuaha nyivi ndu iñ nu nyaá ra, tacan tan tava ra tatyí ña vaha can, tan catyí ra tsihin nu:

—Yooho tatyí ña vaha tsa janduñihí tan jasohó tsi ra ihya, quita tsi ra catyí yu tsihin un. Jaña tsi ra, tan ña quihvi ca un tsi ra —catyí ra Jesús tsihin nu tatyí ña vaha can.

²⁶ Tacan tan quifñi xaan caná tsaá nu tatyí can tan janduvá nu tsi ra inga tsaha, tan quita nu tsi ra. Tan jacúu naaha nu tsi ra. Tan cuñi maa nyivi tyin tsa tsihi ra. ²⁷ Maa tyin ra Jesús tñin ra ndaha ra luhlu can, tan cañihí ra tsi ra, tan tsinyaá nyityi ra.

²⁸ Tacan tan quihvi ra Jesús tsitsi iin vehe, tan tsicá tuhun ra tsicá tsihin ra tsi ra tan catyí ra naha:

—¿Nacuenda tyin ña cuví tava nyuhu tatyí ña vaha can?

²⁹ Tacan tan catyí ra Jesús:

—Tsa cuenda tyin tahan tatyí ña vaha ihya ña cuví quita nu jaha yo tun ña coonyitya yo tan ña ndacan tahvi yo tsi Nyoo —catyí ra tsihin ra naha.

Nu cahan ra Jesús inga tsaha tyin cua cahñi nyivi tsi ra

(Mt. 17.22-23; Lc. 9.43-45)

³⁰ Quivi tsa quita ra Jesús ican, tan ra tsicá tsihin ra yaha ra naha ñuhú Galilea. Tan ña cuñi ra Jesús tsa coto nyivi iyó ican tyin nyí ra nu iyó ñi. ³¹ Tyin jacuahá ra tsi ra tsicá tsihin ra tan catyí ra tsihin ra naha:

—Yuhu Rayií tsa quee nda gloria cua nacuhva cuenda nyivi tsi yu tsi ra xaan iñi tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi. ³² Maa tyin ra ican naha ra ña cutuñi iñi ra naha tsa caahán ra tsihin ra naha. Tan ña cuñi ra naha ndaca tuhun ra naha tsi ra tyin yuuhvi ra naha.

Nu janahá ra Jesús yóo ra cahnu ca cuví tsitsi tsa tandihí nyivi tsa ndacá ñaha Nyoo

(Mt. 18.1-5; Lc. 9.46-48)

³³ Tan tsa tsaá ra Jesús ñuu Capernaum tan ra tsicá tsihin ra, tsa tsa yucú ra naha tsitsi vehe, tan tsicá tuhun ra Jesús tsi ra naha tan catyí ra:

—¿Náa natuhún xaan ndo ityi vatsí yo? —catyí ra tsicá tuhun ra.

³⁴ Tsa cahan ra Jesús tacan, taxin ña cuví ra naha, tyin ityi vatsí ra naha natuhun ra naha yóo ra cahnu ca cuví tsa nuu tandihí ra naha. ³⁵ Tacan tan tsinyaá ra Jesús tan caná ra tsi tandihí tsa utsi uvi ra tsicá tsihin ra, tan catyí ra tsihin ra naha:

—Nyooho tsa cuñi cuví ityi nuu, cuñi tsi cuví ndo nda nu ndihí ña tsa nuu tandihí

ndo, tan jatinyee ndo tsi tandihi nyivi —catyí ra Jesús tsihin ra naha.

³⁶ Tacan tan quihin ra iin ra luhlu tyaa ra mahñu ra naha. Tan tyihj jucun ndaha ra tsi ra luhlu can, tan catyí ra:

³⁷ —Nyivi naquihin iin nyivi tumaa ra luhlu ihya, yuhu naquihin cuenda ñi. Tyin naquihin cuenda ñi tsi ñi tsa cuenda tsa cuñí ñi tsi yu. Tan nyivi naquihin cuenda tsi yuhu, naquihin cuenda tucu ñi tsi ra tsa jaquitsj tsi yu tan ñavin maa ñi maa yu naquihin cuenda ñi.

Nyivi tsa ña cuxaán tsi yo, juvin ñi ican jatinyeeé tsi yo

(Mt. 10.42; Lc. 9.49-50)

³⁸ Tacan tan catyí ra Juan tsihin ra Jesús: —Maestro, nyehé ndi iin ra tavá tatyí ña vaha tsi nyivi tsihin sivi un. Maa tyin tyasi ndi nu javaha ra tacan tyin ñavin tsihin yo tsicá ra —catyí ra Juan tsihin ra Jesús.

³⁹ Maa tyin catyí ra Jesús tsihin ra:

—Ña çasi ndo nu javaha nyivi tacan. Tyin ndi intuhun ñi tsa javaha tsa iyo tsihin sivi yu tan ña cua cana ifi ñi cahan ñi ndavaha ñi tsi yu. ⁴⁰ Tyin nyivi tsa ña xaan ifi tsi yo, tsihin yo cutahán ñi. ⁴¹ Tan nyivi tsa cua cuhva vasu tan iin yatsin ndutya coho ndo tyin tsinú ifi ndo tsi yu, cua cuhva Nyoo tsa cua cuhva ra tsi ñi.

Nu tsahá cuenda ra Jesús tsi yo nácaajaha cuenda yo tsi yo tan ña javaha yo tsa ña vaha
(Mt. 18.6-9; Lc. 17.1-2)

⁴² Nyivi cua natyuhu tsi iin nyivi tsa ñaha ca tsinú vaha ifi tsi yu tyin javaha ñi tsa caquiñi, vaha ca cehñi nyivi yuu yoso vee jucun ñi tan cujanehñi ñi tsi ñi tsitsi nu cunu ndutya ñuhu. ⁴³ Tatun ndaha un javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca quihvi un coo un tsihin Nyoo tsihin tsa nduve iin ndaha un tan ñavin ca tsa cuhun un anyaya nu cayú ñuhu tsa ña cua ndahva maa tsihin nduvi ndaha un. ⁴⁴ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. ⁴⁵ Tatun tsaha un tan javahá tsa ña vaha, çasi nu javahá can tacan. Tatun ña cuví, çahnya can tan javita un, tyin vaha ca cuhun un coo un tsihin Nyoo tsihin tsa intuhun ñi tsaha un tan ñavin ca tsa cuhun un tsihin nduvi tsaha un anyaya nu ña cua ndahva maa ñuhu. ⁴⁶ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha. ⁴⁷ Tun tinuu un javahá tsa ña vaha, çasi nu javahá can tacan. Tatun ña cuví, tava can tan javita un tyin vaha ca quihvi un nu ndacá ñaha Nyoo tsihin iin tinuu un tan ñavin ca tsa jacuhun Nyoo tsi un anyaya tsihin nduvi tinuu un. ⁴⁸ Tyin tindacu tsa iyó ican ña cua cúu maa can, tan ña cua ndahva maa ñuhu ndi iin tsaha.

⁴⁹ Maa tyin tandihi nyivi nyicún tsi yuhu, ñi tsa nyehé tundoho tsa cuenda yu cuví tsi tumaa tsa cayú ñi tsihin ñuhu, tyin tsihin yacan cua nduvaha ñi jahá Nyoo, tumaa tuhvá nyayu nduvahá tsihin ñii. ⁵⁰ Vaha xaan ñii. Maa tyin tun ndihi tsa uhva tsi, ña jandu uhva ca tsi tan ña cuví ca cuatyíñu nyivi itsi. Yacan cuenda nyoocho, ña jandihi ndo tsa coo tuhun Nyoo añima ndo tyin cuví tsi tumaa ñii. Tyin tacan tan cuví coo taxin ndo tsihin tahan ndo.

10

Nu caahán ra Jesús tyin ña vaha nacoo rayii ñasihi ra

(Mt. 19.1-12; Lc. 16.18)

¹ Quita ra Jesús ñuu Capernaum tan cuahán ra cuenda Judea inga tsiyo yutya Jordán. Tan ndu iin cuaha nyico nyivi nu nyii ra, tacan tan quitsaha jacuahá ra tsi ñi tumaa tuhvá maa ra javahá. ² Tacan tan natuhva juhva ra fariseo naha ra nu nyaá ra Jesús, tan nducú ra naha cuhva tyaa ra naha cuatyí tsi ra. Tan tsicá tuhun ra naha tsi ra tatun vaha nacoo rayii ñasihi ra. ³ Tacan tan nacahan ra Jesús tan catyí ra:

—¿Náa catyí ra Moisés tyin javahá ndo?

⁴ Tan nacahan ra naha tan catyí ra naha:

—Ra Moisés catyí ra tyin cuví cani ndi tutu cuenda ley ndi, tacan tan cuví nacoo ndi ñasihi ndi —catyí ra naha tsihin ra.

⁵ Tacan tan catyí ra Jesús tsihin ra naha:

—Catyí ra Moisés tyin cuví javaha ndo tacan tsa cuenda tsa ndava añima ndo. ⁶ Maa tyin quivi jilna ñi, quivi javaha Nyoo tandihi maa tsa iyó, catyí nu tutu ra tyin javaha ra rayii tan ñaha. ⁷ “Yacan cuenda taahán tsi nacoo rayii jutu ra tan sihi ra tan ndu iin ra tsihin ñasihi ra. ⁸ Tan nduvi ñi cua cuví ñi tumaa intuhun ña nyivi.” Yacan cuenda ñavin ca uvi taahan ñi, tyin intuhun ña nyivi cua cuví ñi. ⁹ Yacan cuenda, ña cuví jasiin nyivi tsa jandu iin Nyoo —catyí ra Jesús tsihin ra naha.

¹⁰ Yahá can tan cuanuhú ra nda yuvehe, tan quitsaha nducú tuhun nyico ra tsicá tsihin ra siqui tuhun can. ¹¹ Tan catyí ra Jesús tsihin ra naha:

—Ra tsa cua nacoo ñasihi tan quihin ra inga ñaha, cua coo cuatyí ra nu Nyoo. ¹² Tacan tucu ñi ñaha: Tun nacoo ña tsi yí ña tan tindaha ña tsihin inga rayii, juvin ñi cua coo tucu cuatyí ña —catyí ra Jesús.

Nu nasoco ra Jesús tsi tsa nyihi

(Mt. 19.13-15; Lc. 18.15-17)

¹³ Tacan tan tsindaca nyivi juhva tsa nyihi tsi ra Jesús tyin tyiso ra ndaha ra jiñi tsi naha tsi tan nasoco ra tsi naha tsi. Maa tyin ra tsicá tsihin ra quitsaha cuxaán ra naha tsi nyivi cuahán cuandacá tsa nyihi. ¹⁴ Maa tyin

tsa nyehe ra Jesús tsa javahá ra naha tacan, cuxaan ra tsi ra naha, tan catyí ra:

—Cuhva ndo tsa quitsi tsa nyihi nu nyaá yu. Ña çasi ndo itsi naha tsi tyin nyivi ndacá ñaha Nyoo cuví ñi tumaa cuví tsa nyihi tyin tsinú ñi ñi tsi Nyoo. ¹⁵ Tan tsa nditsa catyí yu tsihin ndo tun ña cuita ñi nyivi tsi Nyoo tumaa nyitá ñi iin ra luhlu tsi jutu ra, ña cua cuví quihvi ñi nu ndacá ñaha Nyoo —catyí ra Jesús tsihin ra naha.

¹⁶ Tacan tan quihñ ra intuhun intuhun tsa nyihi can tan tyiso ndaha ra jiñi tsi naha tsi, tan tsican tahvi ra tsi Nyoo na nasoco ra itsi naha tsi.

Nu tsaha cuenda ra Jesús tyin yíi xaan nacuhva cuenda iin ra cuca tsi ra tsi Nyoo (Mt. 19.16-30; Lc. 18.18-30)

¹⁷ Yahá yacan tan cuahán ra Jesús. Tan tsinú xaan iin rayii cuahán ra cuanyicún ra tsi ra. Tsa tahañ ra tsi ra, tsicuññ tsi ra nuu ra, tan tsicá tuhun ra tsi ra, tan catyí ra:

—Maestro, vaha xaan un. ¿Ñáa taahán tsi javaha yu tan cuví coo yu ñayivi nyito tsa ña cua naa maa? —catyí ra tsihin ra Jesús.

¹⁸ Tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi ra vaha iyó tan ra ican cuví Nyoo. Tan tsa catyí un tyin vaha yu, nacotó un tyin Nyoo cuví yu. ¹⁹ Yooho tsitó un tsa catyí Nyoo tyin javaha yo: “Ña coo inga ñaha tsi un. Ña cahñi un nyivi. Ña suhu un. Ña cahan un cuendu. Ña jandavi ñaha un tsi nyivi. Tyaa yahvi tsi jutu un tan tsi sihi un” —catyí ra Jesús tsihin ra.

²⁰ Nacahañ ra tan catyí ra:

—Maestro, tandihi tuhun ihya tan tyaá yahvi yu itsi nda ndi luhlu yu tan nda cuanda vityin —catyí ra.

²¹ Tacan tan sii cuñi ra Jesús nyehé ra tsi ra. Tan catyí ra tsihin ra:

—Intuhun ña tsa cumañi javaha un. Cuaahan yuvehe un tan xico un tandihi tsa iyó tsi un, tan cuhva un xuhun can tsi nyivi ndaahvi. Tacan tan coo tsa cuca tsi un nda gloria. Yaha can tan quitsi un quitsi nyicun un tsi yu vasu ndi maa nyehe un tundoho tan cahñi nyivi tsi un —catyí ra Jesús tsihin ra.

²² Tsa tsiñi ra tyuvañ can tsa cahañ ra Jesús tacan, cuiihya xaan cuñi ra cuví, tan tsihin tucuiihya ñi cuanuhú ra yuvehe ra tyin cuca xaan ra.

²³ Tacan tan nanyehe ra Jesús nanii canduvi nu nyaá ra, tan catyí ra tsihin ra tsicá tsihin ra:

—¡Yíi xaan tan cuví nacuhva cuenda nyivi cuca tsi ñi tsi Nyoo na cundaca ñaha ra tsi ñi! —catyí ra tsihin ra naha.

²⁴ Tsa tsiñi ra tsicá tsihin ra tsa caahán ra, iyo xaan cuñi ra naha cuví. Maa tyin catyí tucu ra tsihin ra naha inga tsaha:

—¡Sehe yu, nyivi tyaá xaan jiñi tandihi tsa cuca, yíi xaan tan quihvi ñi nu ndacá ñaha Nyoo! ²⁵ Yatyí ca cuví yaha iin camellu xuu iin yiquí tucu, tan ñavin ca tsa quihvi iin nyivi cuca nu ndacá ñaha Nyoo —catyí ra Jesús.

²⁶ Tsa tsiñi ra naha tuhun ihya, iyo xaan cuñi ra naha cuví, tan quitsahañ tsicá tuhun tahañ ra naha, tan catyí ra naha:

—Tun tacan, ¿yóo cua cacu? —catyí ra naha.

²⁷ Tacan tan nanyehe ra Jesús tsi ra naha tan catyí ra tsihin ra naha:

—Nyivi ña cuví javaha ñi tsehe, maa tyin Nyoo cuví javaha ra tyin tsa cuenda Nyoo nduve maa tsa yíi.

²⁸ Tacan tan catyí ra Pedro tsihin ra:

—Jutu Mañi yu, tandihi maa tsa iyó tsi ndi nacoó ndi can tan nyicún ndi tsi un.

²⁹ Nacahañ ra Jesús tan catyí ra:

—Tsa nditsa catyí yu tsihin ndo tyin tandihi nyooho tan tandihi inga ca nyivi tsa cua nacoó vehe, o yañi, o cuhva, o jutu, o sihi, o ñasihi, o sehe, o ñuhu, tsa cuenda yuhu tan tsa cuenda tsa jacoto ñi tsi nyivi tyin cuñi Nyoo jacacu ra tsi ñi, ³⁰ cua ñihi ñi cientu ca tsaha siqui tsa nacoó ñi nu ñuhu ñayivi ihya. Cua ñihi ñi vehe, cua ñihi ñi nyivi cua cuví yañi ñi, cuhva ñi, sihi ñi, sehe ñi, tan cua ñihi tucu ñi ñuhu ñi, vasu ndi maa cua janyehe nyivi tundoho tsi ñi. Tan nu inga ñuhu ñayivi tsa tsa vatsí, cua ñihi ñi ñayivi nyito tsa ña cua naa maa coo ñi. ³¹ Cuaha ñi nyivi cuahán ityi nuu vityin, cua cuhun ñi nda nu ndihi ña. Tan nyivi cuahán nu ndihi ña vityin, cuaha ñi cua cuhun ityi nuu —catyí ra Jesús.

Nu jacotó nyico ra Jesús nácaa cua cahñi nyivi tsi ra

(Mt. 20.17-19; Lc. 18.31-34)

³² Tsa tsa cuñi cuhun ra Jesús tan ra tsicá tsihin ra ñuu Jerusalén, cuahán ra Jesús ityi nuu tandihi nyivi tsa cuahán cuanyicún tsi ra. Iyo xaan cuñi ñi tan tsihin tsa yuuhvi ñi cuahán ñi. Tacan tan tavañ siin ra tsi tsa utsi uvi ra tsicá maa tsihin ra. Tan quitsahañ catyí tuhun ra tsihin ra naha tsa cua tahañ ra. ³³ Tan catyí ra:

—Vityin tsa cua cuyatyin yo ñuu Jerusalén nu cua nacuhva cuenda nyivi tsi yuhu, Rayii queeñ nda gloria. Cua cuhva cuenda ñi tsi yu tsi ra jutu cuví ityi nuu naha ra, tan tsi ra maestro cuenda ley vehe ñuhu naha ra. Ra ihya naha ra cua catyí ra naha tyin taahán tsi cúu yu tan cua nacuhva cuenda ra naha tsi yu tsi ra ñuu Roma naha ra. ³⁴ Cua vacu nducu ra naha tsi yu, cua cañi ra naha tsi yu, cua tiví sii ra naha tsi yu. Tan cua cahñi ra naha tsi yu. Maa tyin cua nandoto yu tsa tsinu uñi quivi —catyí ra Jesús.

Nu tsicán ra Jacobo tan ra Juan iin tumañi iñi tsi ra Jesús
(Mt. 20.20-28)

³⁵ Tacan tan ra Jacobo tan ra Juan, sehe ra Zebedeo, natuhva ra naha nu nyaá ra Jesús, tan catyí ra naha tsihin ra:

—Maestro, jaha tumañi iñi tan javaha un tsa cua ndacan ndi tsi un —catyí ra naha.

³⁶ Tacan tan tsicá tuhun ra Jesús tsi ra naha tan catyí ra:

—¿Náa cuñi ndo javaha yu?

³⁷ Tan nacahan ra naha tan catyí ra naha:

—Cuñi ndi tsa cuhva un cunyecu ndi tsihin un nu ndacá ñaha un, iin ndi xiin cuaha un, tan inga ndi xiin satyin un —catyí ra naha tsihin ra Jesús.

³⁸ Tacan tan catyí ra Jesús tsihin ra naha:

—Nyooho ña tsitó ndo náa tsicán ndo. ¿A cuví nyehe ndo tundoho tsa cua nyehe yuhu? ¿A cuví cúu ndo tumaa cua cúu yu? —catyí ra tsihin ra naha.

³⁹ Tan nacahan ra naha:

—Cuví maa.

Tan catyí ra Jesús

—Nditsa tyin cua nyehe ndo tundoho tan cua cúu ndo tumaa cua tahan yuhu. ⁴⁰ Maa tyin tsa cunyaa iin ndo xiin cuaha yu tan iin ndo xiin satyin yu, ñavin yuhu taahán tsi cuhva yacan, tyin maa Nyoo cua catyí yóo cua ñihi can —catyí ra Jesús tsihin ra naha.

⁴¹ Tsa tsiñi tsa utsi ca ra tsicá tsihin ra Jesús yacan, cuxaḡn ra naha tsi ra Jacobo tan ra Juan. ⁴² Maa tyin cana ra Jesús tsi ra naha tan catyí ra tsihin ra naha:

—Tsa tsitó ndo tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. ⁴³ Maa tyin ñavin tacan taahán tsi javaha nyooho tyin ra tsa cuñi cuví ra cahnu ityi nuu Nyoo, cuñi tsi cuví ra musu tandihi ndo. ⁴⁴ Tan nyooho tsa cuñi cuví ityi nuu, cuñi tsi cuví ndo musu tandihi ca ndo. ⁴⁵ Tyin yuhu, Rayi tsa quee nda gloria, ña vatsi yu tyin cuñi yu jatyinyee nyivi tsi yu. Yuhu vatsi yu vatsi jatyinyee yu tsi maa ñi tan cuhva yu ñayivi yu tsa cuenda ñi tumaa iin tsa tyahvi yu tan jacacu yu cuaha ñi —catyí ra Jesús.

Nu jananyehé ra Jesús tsi ra Bartimeo
(Mt. 20.29-34; Lc. 18.35-43)

⁴⁶ Tacan tan tsaḡ ra naha ñuu Jericó. Tan yaha ñi ra naha ñuu can. Tan cuhva tsa cua quita ra Jesús ñuu can tsihin ra tsicá tsihin ra, cuaha nyivi cuahán cua nyicun tsi ra naha. Tan ityi yahḡ ra naha nyaá iin ra cuaa nañi Bartimeo, sehe ra Timeo, tsicán ra caridaa. ⁴⁷ Tan cuhva tsa tsito ra cuaa can tyin tsa cua cuyatyin yaha ra Jesús, ra ñuu Nazaret, nu nyaá ra, quitsahḡ caná tsa ra, tan catyí ra:

—¡Jesús, tata ra David, cundaahvi iñi tsi yul! —catyí ra caná tsa ra.

⁴⁸ Tacan tan quitsahḡ cuxaan nyivi tsi ra tan catyí ñi tsihin ra na cutaxin ra, maa tyin cuñihij ca ra caná tsa ra tan catyí ra:

—¡Tata ra David, cundaahvi iñi tsi yul! —catyí ra.

⁴⁹ Tacan tan tsicuiñi ra Jesús tan catyí ra:

—Cuaquihin ndo tsi ra.

Tan tsiquihin ra naha tsi ra cuaa can tan catyí ra naha tsihin ra:

—Jandu iin iñi un. Nduvita, cōhon tyin caná ra tsi un —catyí ra naha tsihin ra.

⁵⁰ Tacan tan janehñi ra jahma ndasi ra nda sava. Tan cuahan ra iin yaha ñi nda nu nyaá ra Jesús. ⁵¹ Tacan tan tsicá tuhun ra Jesús tsi ra:

—¿Náa cuñi un javaha yu?

Tan nacahan ra cuaa can tan catyí ra:

—Maestro, cuñi yu janduvaha un tinuu yu na nanyehé nyico yu —catyí ra.

⁵² Tan catyí ra Jesús tsihin ra:

—Cuanuhu. Tsa nduvahḡ un tyin tsinú iñi un tsi yu.

Juvin ñi cuhva can tan nanyehé ra can. Tan cueta cuahán ra cuanyicún ra tsi ra Jesús.

11

Nu quihvi ra Jesús ñuu Jerusalén
(Mt. 21.1-11; Lc. 19.28-40; Jn. 12.12-19)

¹ Tsa tsa cuñi tsa ra Jesús tan nyivi nyicún tsi ra nda ñuu Jerusalén, yatyin nu canyí ñuu Betfagé tan ñuu Betania, tan yatyin ñi yucu nu iyó yutun Olivo, tan catyí ra Jesús tsihin uvi ra tsicá tsihin ra:

² —Cuaahan ndo ñuu tsa canyí ityi nuu ihya. Tsa tsa ndo ican cua nañihi ndo iin urru. Quiti yoco cuví ti, nyaá ti nuuhñi ti, tan ñaha ca quihí tyayu ti. Ndatsi ndo tsi ti, tan quihin ndo tsi ti quitsi ndaca ndo tsi yu.

³ Tatun cusana ndaca tuhun nyivi tsi ndo: “¿Nacuu ndo urru ihya?” Tacan tan catyí ndo tsihin ñi: “Tsiñi ñuhu ti tsi Jutu Mañi yo, maa tyin cua jaquitsi nyico ñi maa ra tsi ti”, catyí ndo tsihin ñi —catyí ra Jesús tsihin ra naha.

⁴ Tacan tan cuahán ra naha, tan tsa tsaḡ ra naha, nañihij ra naha urru can nuuhñi ti tsitsi ityi tsata yuhu iin cora. Tan ndatsi ra naha tsi ti. ⁵ Tan catyí juhva ra yucú ican naha ra tsihin ra naha:

—¿Náa javahá ndo? ¿Nacuenda ndatsi ndo urru can? —catyí ra naha tsihin ra naha.

⁶ Tacan tan nacahan ra naha tumaa cahan ra Jesús tsihin ra naha. Tan tsaḡ ra can naha ra quihin ra naha urru can. ⁷ Tacan tan tsindacḡ ra naha urru can tsi ra Jesús. Tyiso ra naha jahma ra naha tsata ti, tan tsicoso ra Jesús tsi ti. ⁸ Tan tsaquín cuaha nyivi jahma ñi tsitsi ityi nu yahḡ ra, tan inga ñi tshahya ñi ndaha yutun tan tsaquín ñi tsitsi ityi.

⁹ Tacan tan nyivi tsa cuahán ityi nuu ra tan ityi tsata ra, quitsahá caná tsaá ñi tan catyí ñi:

—¡Cahnu xaan cuví Nyoo! ¡Na jacahnu yo tsi Jutu Mañi yo, ra tsa jaquitsí Nyoo!
¹⁰ ¡Na jacahnu yo tsi ra vatsí cundaca ñaha tumaa tsindaca ñaha ra Davíd, tsi tsaahnu yo! ¡Cahnu xaan cuví ra nyaá gloria! —catyí ñi.

¹¹ Tacan tan quihví ra Jesús tsitsi ñuu Jerusalén, tan cuahán ra vehe ñuhu cahnu. Tan tsa yahá nyehe ra tandihi tsa iyó nuquehe vehe ñuhu can, cuahán ra ñuu Betania tsihin tsa utsi uvi ra tsicá tsihin ra tyin tsa cueñi xaan.

Nu cahán ra Jesús tsi yutun higo tsa ña tsahá tsiti

(Mt. 21.18-19)

¹² Tsa tuvi inga quivi tsa quitá ra Jesús tan ra tsicá tsihin ra ñuu Betania, tsaá soco tsi ra Jesús. ¹³ Tsa quitá ra naha ndasava nyehe ra Jesús nu nyaá iin yutun higo tsa iyó numa. Tsaahán ra tsinyehé ra tun ñi tsi tun, maa tyin nduve tsi tun, maa ñi maa ndaha tun ñi, tyin ñaha ca tahan tsi quivi cuhva tun tsi. ¹⁴ Tacan tan cahán ra Jesús tsi tun, tan catyí ra:

—Ndi iin sava ca quivi ña cua quee ca tsiti catyí nyivi nuu un —catyí ra tsihin tun.

Tan tsiñi ra tsicá tsihin ra tsa caahán ra.

Nu jacunú ra Jesús nyivi xicó nuquehe vehe ñuhu cahnu

(Mt. 21.12-17; Lc. 19.45-48; Jn. 2.13-22)

¹⁵ Tsa tsaá ra naha ñuu Jerusalén, cuahán nyico ra Jesús vehe ñuhu cahnu tan quitsahá jacunú ra nyivi xicó tan jatá tsa yucú nuquehe yuvehe ñuhu can. Janduvá ra mesa nu nyecú nyivi samá xuhun nyivi. Tan janduvá tucu ra tyayu nu nyecú nyivi xicó paloma. ¹⁶ Tan ña tsahá ca ra yaha sava ñi nuquehe vehe ñuhu can tsihin ndaha tyiñu. ¹⁷ Tan quitsahá jacuahá ra tsi nyivi, tan catyí ra:

—¿A ña tsitó ndo tyin nu tutu Nyoo catyí tsi tyin vehe Nyoo cua cunañi tsi tyehen: “vehe nu cua ndacan tahvi nyivi queé nani ñi ñuhu ñayivi tsi Nyoo”? Tan nyooho janduvá ndo itsi vehe ñasuhu —catyí ra tsihin ñi.

¹⁸ Tsa tsiñi ra jutu cuví ityi nuu naha ra tan ra maestro cuenda ley vehe ñuhu naha ra tsa caahán ra, tan quitsahá nducú ra naha cuhva cahñi ra naha tsi ra tyin yuuhví ra naha nyehe ra naha tsi ra tsa cuenda tsa janahá ra tsi nyivi tan yuuhví tucu ra naha tyin tsa cuaha xaan nyivi nyicún tsi ra. ¹⁹ Maa tyin tsa tsa cuñi cuaa, quitá ra Jesús ñuu can tsihin ra tsicá tsihin ra.

Nu na ityi yutun higo

(Mt. 21.20-22)

²⁰ Tsa tuvi inga quivi, yahá nyico ra naha nu nyaá yutun higo tsa cahán ra Jesús. Tan nyehe ra naha tyin na ityi tun tan nda cuanda yoho tun na ityi. ²¹ Tacan tan tsa nyehe ra Pedro yutun higo can, nducuhún ñi ra tsa javahá ra Jesús tan catyí ra tsihin ra Jesús:

—¡Maestro, jihna! Tsa na ityi yutun tsa cahán un —catyí ra.

²² Nacahán ra Jesús, tan catyí ra:

—Tsinu ñi ndo tsi Nyoo. ²³ Tyin tsa nditsa catyí yu tsihin ndo tyin nyivi cua cahán tsihin yucu ihya tyehen: “Cuatsiyo ihya tan cuaahan tsitsi ndutya ñuhu”, tan tatun tsinú ñi ñi tyin cua cundaa tsa cahán ñi tan ña uvi tsicá ñi ñi, cua cundaa tsi. ²⁴ Yacan cuenda catyí yu tsihin ndo tyin tandihi tsa cua ndacan ndo tsi Nyoo tsa cua ndacan tahvi ndo tsi ra, tun tsinú ñi ndo tyin tsa naquihín cuenda ndo can, cua naquihín ndo can. ²⁵ Tan tsa cua ndacan tahvi ndo tsi Nyoo, tun nducuhún ñi ndo tyin xaan cuñi ndo tsihin nyivi, jaha ndo tucahnu ñi tsi ñi, tyin tacan tan jaha Jutu ndo, ra nyaá gloria, tucahnu ñi tsi maa ndo tsa cuenda cuatyí ndo. ²⁶ Maa tyin tun ña jaha ndo tucahnu ñi tsi nyivi, ndi Jutu ndo, ra nyaá gloria, tan ña cua jaha ra tucahnu ñi tsi maa ndo.

Nu tsicá tuhun ra cumi tyiñu vehe ñuhu naha ra tsi ra Jesús yóo tavá tyiñu tsi ra tsa cahán ra tsihin nyivi

(Mt. 21.23-27; Lc. 20.1-8)

²⁷ Tacan tan tsaá nyico ra naha ñuu Jerusalén. Tsa nyii ra Jesús tsicá nuu ra nuquehe vehe ñuhu cahnu, natuhvá ra jutu cuví ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra nu nyaá ra. ²⁸ Tan tsicá tuhun ra naha tsi ra tan catyí ra naha:

—¿Yóo tavá tyiñu tsi un tsa javahá un tyehen? —catyí ra naha.

²⁹⁻³⁰ Tan nacahán ra Jesús, tan catyí ra:

—Cuñi tucu yuhu ndaca tuhun yu tsa ndaca tuhun yu tsi nyooho. ¿Yóo jaquitsí tsi ra Juan tyin jacoondutya ra tsi nyivi? ¿A Nyoo o nyivi? Tatun catyí tuhun ndo tsihin yu yóo jaquitsí tsi ra, cua catyí tuhun tucu yuhu tsihin nyooho yóo tavá tyiñu tsi yu javahá yu tyehen —catyí ra Jesús tsihin ra naha.

³¹ Tacan tan quitsahá caahán yuhu tahan ra naha, tan catyí ra naha:

—Tun catyí yo tyin Nyoo jaquitsí tsi ra Juan, cua catyí ra tsihin yo tyehen: “Tun Nyoo jaquitsí tsi ra, ¿nacuenta ña tsinú ñi ndo tsa cahán ra?” ³² ¿A vaha tun catyí yo tyin nyivi jaquitsí tsi ra? Ña cuví —catyí ra naha, tyin yuuhví ra naha tsi nyivi, tyin tandihi ñi tan tsinú ñi ñi tyin ndusu yuhu Nyoo cuví ra.

³³ Tacan tan catyí ra naha tsihin ra Jesús:

—Ñá tsitó ndi.

Tacan tan catyí ra Jesús tsihin ra naha:

—Tun ña tsitó ndo, ndi yuhu tucu, tan ña cua catyí tuhun yu tsihin ndo yóo tava tyiñu tsi yu tsa javahá yu tyehen —catyí ra Jesús tsihin ra naha.

12

Nu caahán ra Jesús tuhun ra ña vaha jaha tyiñu

(Mt. 21.33-46; Lc. 20.9-19)

¹ Tacan tan quitsahá caahán ra Jesús tsihin ra naha tsihin cuhva ihya, tan catyí ra:

—Tsicoo iin rayi tsa tatsj yoho yucu vixi tsa nañi uva, ra ican tyasi ra iin cora nani canduvi nu tatsj ra yucu vixi can. Tan javahá ra iin nu cua tava ra ndutya uvas can. Tan javahá tucu ra iin vehe sucun tyin tacan tan cuvi jaha cuenda ra nani cahnu nu ndaha tyiñu ra.

“Tsa yahá yacan tan tsahá nuu ra ñuhu can tsi juhva rayi tyin jaha tyiñu ra naha tsihin tsi. Tacan tan cuahán ra inga ñuu. ² Tsa tahán tsi quivi yóo uvas can, jacuhun ra iin musu ra tyin ndacan ra juhva tsa taahán tsi tsi ra tsi ra jahá tyiñu can naha ra. ³ Maa tyin ra ican naha ra tñin ra naha tsi ra. Tan cañi ra naha tsi ra. Tan jacunuh yu ra naha tsi ra tsihin ndaha ndi ra. ⁴ Tacan tan tsitoho ñuhu can jacuhun nyico ra inga musu, maa tyin cañi ra naha tsi ra can tsihin yuu, tan tahvi ra naha jiñi ra, tan cahán nyaa ra naha tsi ra. ⁵ Tsi toho ñuhu can jacuhun nyico ra inga musu. Tan tsahñi ra naha tsi ra. Yahá yacan tan cuaha ca ra naha jacuhun ra. Maa tyin cañi ra naha tsi juhva ra naha tan tsahñi ra naha juhva ca ra naha.

⁶ “Tan cumañi intuhun ña ra tsa cuvi jacuhun ra. Tan ra ican cuvi sehe ra tsa cuñi xaan ra. Nu ndiñi tuhun jacuhun ra sehe ra tyin cuñi maa ra tsicá iñi ra: “Tun jacuhun yo sehe yo, cua tyaa yahvi ra naha tsi ra tyin sehe yo cuvi ra”, cuñi ra. ⁷ Maa tyin tsa nyehe ra jahá tyiñu can naha ra tsi ra sehe ra, natuhun tahan ra naha tan catyí ra naha: “Ra ihya cua naquihin cora ihya. Yacan vaha ca cahñi yo tsi ra, tan ndoo maa yo tsihin can”, catyí ra naha. ⁸ Tacan tan tñin ra naha tsi ra tan tsahñi ra naha tsi ra. Tan tava ra naha cuñi ñuhu ra ityi tsata cora can —catyí ra Jesús.

⁹ Tacan tan tsicá tuhun ra Jesús tsi ra naha tan catyí ra:

—¿Náa cua javaha tsitoho ñuhu can? Cua cuhun ra tan cua cahñi ra tsi ra jahá tyiñu can naha ra. Tan cua cuhva nuu ra ñuhu can tsi inga ca ra naha tyin jaha tyiñu ra naha tsihin can. ¹⁰ ¿A ñaha ca cahvi ndo nu tutu Nyoo nu catyí tsi tyehen? Yuu tsa javitá ra javahá vehe naha ra, yacan cuvi yuu tsa tsifñi ñuhu ca.

¹¹ Maa Nyoo Jutu yo jahá tsa cahnu ca cuvi yuu ihya. Tan iyo xaan cuñi yo nyehe yo can, catyí tsi —catyí ra Jesús tsihin ra naha.

¹² Tacan tan ra jutu cuvi ityi nuu naha ra, tan ra maestro cuenda ley vehe ñuhu naha ra, tan ra mandoñi naha ra nducú ra naha cuhva tyihi ra naha tsi ra Jesús vehe caa tyin tsitó ra naha tyin tuhun maa ra naha caahán ra tsa tsatyiñu ra cuhva can. Maa tyin ña tñin ra naha tsi ra tyin yuuhvi ra naha nyehe ra naha tsi nyivi. Nacoq ra naha tsi ra, tan cuahán ra naha.

Nu caahán ra Jesús siqui tuhun tsa tyahvi nyivi xuhun tsi ra ñuu Roma tsa ndacá ñaha tsi nyivi Israel

(Mt. 22.15-22; Lc. 20.20-26)

¹³ Tacan tan jacuhun ra naha juhva ra yihí cuenda ra Herodes tan juhva ra fariseo naha ra nu nyii ra Jesús tyin nducu ra naha cuhva cahan ra Jesús iin tsa ña vaha tyin tacan tan cuvi tyaa ra naha cuatyí tsi ra. ¹⁴ Tsa tsaá ra can naha ra tan quitsahá caahán ra naha tsihin ra Jesús tan catyí ra naha:

—Maestro, tsitó ndi tyin tsa nditsa caahán un. Tan inducu ñi cuñi un nyehe un nyivi cuca tan nyivi ndaahvi. Tan nditsa tyin ityi Nyoo janahá un. Yacan cuenda cuñi ndi ndaca tuhun ndi tsehe tsi un: ¿A vaha cuhva yo tsa tsicán ra ndacá ñaha tsi yo, ra tsa nyaá nda ñuu Roma, o ña vaha? ¿A taahán tsi tyahvi yo can, o ña taahán tsi? —catyí ra naha tsihin ra Jesús.

¹⁵ Tan tsitó ra Jesús tyin ñavin tsa vaha tsicá iñi ra naha, yacan cuenda catyí ra tsihin ra naha:

—¿Nacuvi tyin nducú cuhva ndo tsi yu? Ndaca ndo iin xuhun tsi yu ihya, na nyehe yu —catyí ra.

¹⁶ Tsindacá ra naha xuhun can tsi ra. Tsa nyehe ra can tan tsicá tuhun ra tsi ra naha, tan catyí ra:

—¿Yóo nuu tan yóo sivi nyaá tsata xuhun ihya? —catyí ra tsihin ra naha.

Nacahan ra naha tan catyí ra naha:

—Nuu ra ndacá ñaha tan sivi ra.

¹⁷ Tacan tan catyí ra Jesús tsihin ra naha:

—Tun tacan, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi Nyoo —catyí ra Jesús tsihin ra naha.

Tan iyo xaan cuñi ra naha tsihin tsa nacahan ra.

Nu cuñi ra saduceo naha ra jandavi ñaha ra naha tsi ra Jesús

(Mt. 22.23-33; Lc. 20.27-40)

¹⁸ Tacan tan cuahán juhva ra saduceo naha ra nu nyii ra Jesús. Tan ra saduceo can naha ra catyí ra naha tyin ña cua nandoto nyivi. Yacan cuenda cahan ra naha tyehen tan catyí ra naha tsihin ra Jesús:

¹⁹ —Maestro, ra Moisés tyaq ra nácaa taahán tsi javaha yo tatun iin rayii tsihi tan ndoq ñasihi ra tan nduve sehe ña tsicoq tsihin ra. Catyi ra tyin taahán tsi tindaha yañi ra tsihin ñaha can. Tyin tacan tan cua coo sehe ra tsihin ña tsa cuenda ra yañi ra tsa tsihi. ²⁰ Iin tsaaha iin rayii tsicoq utsa sehe yii ra. Ra tsa jihna ñi tindaha ra tsihin iin ñaha, maa tyin nduve sehe ra tsicoq tsihin ña, tan tsihi ra. ²¹ Tacan tan tindaha ra yañi ra tsa tsinu uvi tsihin ñaha tsa ndoq can. Maa tyin juvin ñi ña tsicoq sehe ra tsihin ña tan tsihi ra. Juvín ñi tacan tahañ tucu ra tsa tsinu uñi. ²² Tandihí tsa utsa ra naha tindaha ra naha tsihin ñaha can. Tan ndi intuhun ra naha tan ña tsicoq sehe ra naha tsihin ña. Tan nu ndihí tuhun, tsihi ndihí maa ña. ²³ Tan vityin, tun nditsa tsa cua nandoto nyivi, ¿ndáa tsa utsa taahan ra can naha ra cua cuvi yii ña quivi cua nandoto ñi? Tyin tandihí maa ra naha tan tindaha ra naha tsihin ña —catyi ra naha tsihin ra Jesús.

²⁴ Tacan tan nacahan ra Jesús tan catyi ra tsihin ra naha:

—Caahán soho ñi maa nyooho, tyin ña tsitó ndo tsa catyi tuhun Nyoo, tan ndi ña tsitó ndo nácaa tsa cahnu cuvi tunyee iñi tsa iyó tsi Nyoo. ²⁵ Quivi cua nandoto nyivi, ndi ña cua tindaha ñi tan ndi ña cua tindaha sehe ñi, tyin cua cuvi ñi tumaa ángel iyó gloria. ²⁶ Tan tuhun tsa cua nandoto nyivi, ¿a ñaha ca cahvi ndo nu libro tsa tyaq ra Moisés nu catyi tsi nácaa cahan Nyoo tsihin ra nu cayú yutun iñu? Tyin catyi ra tsihin ra tyehen: “Yuhu cuvi Nyoo ra Abraham, ra Isaac, tan ra Jacob”, catyi Nyoo tsihin ra Moisés. ²⁷ Ihya nyehé yo tyin nyito añima ra can naha ra vasu ndi maa tsanaha tsihi ra naha tyin Nyoo ñavin Nyoo nyivi tsihi cuvi ra, tyin Nyoo cuvi ra Nyoo nyivi nyito. Yacan cuenda catyi yu tyin nyooho caahán soho ñi maa ndo —catyi ra Jesús tsihin ra naha.

*Ley tsa ñiñi ca tsa tsaha Nyoo
(Mt. 22.34-40)*

²⁸ Ña naha ñi tan tsaq iin ra maestro cuenda ley vehe ñuhu, tan tsiñi ra tsa caahán ra Jesús tsihin ra saduceo can naha ra. Tan cuhva tsa tsito ra tyin ra Jesús vaha nacahan ra tsihin ra naha, tsicq tuhun ra tsi ra tan catyi ra:

—Tsitsi tsa tandihí ley, ¿ndáa tsa ñiñi ca cuñi tsi javaha yo? —catyi ra.

²⁹ Tan nacahan ra Jesús tan catyi ra:

—Ley tsa jihna ñi tan ñiñi ca cuñi tsi javaha yo tsa nuu tandihí ley, cuvi ley ihya: “Nyooho nyivi Israel, tyaq soho ndo: intuhun ñi maa Nyoo Jutu yo iyó. ³⁰ Cuñi ndo tsi Jutu Mañi yo Nyoo tsihin tsa ñi iñi ndo, tan tsihin tsa ñi iñi añima ndo, tan tsihin tandihí tsa tsiñi tuñi jifi ndo, tan tsihin

tandihí tunyee iñi tsa iyó tsi ndo.” Ley ihya cuvi tsa ñiñi ca tan tsa jihna ñi taahán tsi javaha yo. ³¹ Tan tsa tsinu uvi tsa yatyin inducu ñi caahán tsi tsihin tsa jihna ñi tan catyi tsi tyehen: “Cuñi tahañ ndo tsi ndo tumaa cuñi ndo tsi maa ndo.” Nduve ca ley tsa ñiñi ca javaha yo tsa nuu nduvi tsehe —catyi ra Jesús.

³² Tacan tan ra maestro cuenda ley can catyi ra tsihin ra:

—Vaha xaan nacahan un, Maestro. Nditsa tsa caahán un. Intuhun ñi Nyoo iyó, tan nduve inga ca Nyoo iyó. ³³ Tan tsa cuñi yo tsi Nyoo tsihin tsa ñi iñi yo, tan tsihin tandihí tsa tsiñi tuñi jifi yo, tan tsihin tsa ñi iñi añima yo, tan tsihin tandihí tunyee iñi iyó tsi yo, tan tsa cuñi tahañ yo tsi yo tumaa cuñi yo tsi maa yo, tandihí yacan tan cahnu ca cuvi can tan ñavin ca tsa jamañi yo tsi Nyoo, tsa tsahñi yo quiti tan tsahmí yo can nu altar —catyi ra maestro cuenda ley can tsihin ra Jesús.

³⁴ Tsa nyehé ra Jesús tyin vaha nacahan ra tsihin tsa catsi jifi ra, tan catyi ra tsihin ra:

—Luxu cuñi ña tan ñiñi un cuhva nácaa nacuhva cuenda un añima un tsi Nyoo na cundaca ñaha ra tsi un —catyi ra Jesús tsihin ra.

Ndi intuhun ca maa nyivi tan ña canq ca iñi ñi ndaca tuhun ñi náa ndaca tuhun ñi tsi ra Jesús.

Ra Cristo Sehe Nyoo tsi ra tan juvin ñi cuvi tucu ra tata ra David

(Mt. 22.41-46; Lc. 20.41-44)

³⁵ Jacuahá ra Jesús tsitsi vehe ñuhu cahnu, tan catyi ra:

—¿Nacuenda tyin catyi ra maestro cuenda ley vehe ñuhu naha ra tyin tata ra David cuvi ra Cristo? ³⁶ Tan juvin ñi maa ra David catyi tuhun ra Cristo tyehen:

Nyoo cahan ra tsihin Jutu Mañi yu, tan catyi ra:

“Cunyaa xiin cuaha yu ihya nda cuanda caquin yu tsi ra xaan iñi tsi un naha ra tsaha un”, catyi ra David tahañ tsanaha jahq Tatyí li Nyoo.

³⁷ ¿Nacaa cuvi cuú tucu ra Cristo tata ra David, tan juvin ñi maa ra David catyi tyin ra Cristo cuvi Jutu Mañi ra? —catyi ra Jesús.

Tan cuaha nyivi yucú tyaá soho tsa caahán ra tan sñi xaan cuñi ñi.

Nu caahán ra Jesús tyin iyó cuaha cuatyí ra maestro cuenda ley vehe ñuhu naha ra

(Mt. 23.1-36; Lc. 11.37-54; 20.45-47)

³⁸ Quitsaha jacuahá ra Jesús tan catyi ra tyehen:

—Jaha ndo cuenda tsi ndo tsihin ra maestro cuenda ley vehe ñuhu naha ra, tyin taahán xaan iñi ra naha cunditsí ra naha jahma nañi tan caca nuu ra naha nuyahvi na jaha ndo tsa ñayivi tsi ra naha, tan cuhva

ndo nacumi tsi ra naha. ³⁹ Tan nanducú ra naha tyayu vaha ca cunyecu ra naha tsitsi vehe ñuhu. Tan tsa cua catsi ra naha nu iyó vico, nanducú ra naha nu vaha ca cunyecu ra naha. ⁴⁰ Tan quihín nyaá ra naha vehe ñi ndaahvi tsa tsihí yíi tyin ña cuví tyahvi ñi xuhun tsa tsicán ra naha tsi ñi. Tan cuñí ra naha tsa vaha cahan nyiví tuhun ra naha. Yacan cuenda naha tsicán tahvi ra naha tsi Nyoo nu tuvi nyivi. Maa tyin nduve náa catyí javahá ra naha tacan tyin ñihi ca cua tatsi tuñi Nyoo tsi ra naha —catyí ra Jesús.

Tsa tsahá ñaha ndaahvi tsihí yíi
(Lc. 21.1-4)

⁴¹ Iin tsaha nyíi ra Jesús tsitsi vehe ñuhu cahnu tan nyaá ra yatyin ñi nu nyíi tsatun nu tyihí nyiví xuhun tsa tsahá ñi tsi Nyoo. Tan nyehé ra nu tyihí nyiví xuhun tsitsi tsatun can. Tan cuaha nyiví cuca tyihí ñi cuaha xaan xuhun. ⁴² Tsitsi tsa nyaá ra ican tsaá iin ñaha ndaahvi tsihí yíi, tan tyihí ña uvi taahan ñi xuhun nyihí tsa caaha xaan nyaá. ⁴³ Tacan tan cana ra Jesús tsi ra tsicá tsihin ra, tan catyí ra tsihin ra naha:

—Tsa nditsa catyí yu tsihin ndo tyin nuu Nyoo cuaha ca xuhun tsahá ñaha ndaahvi ihya tan ñavin ca inga nyivi. ⁴⁴ Tyin tsahá ñi tsa ndoq siquí xuhun ñi. Maa tyin ñaha ihya tyihí ña tandihí tsa iyó tsi ña —catyí ra Jesús.

13

Nu caahán ra Jesús tyin cua tani vehe ñuhu cahnu

(Mt. 24.1-2; Lc. 21.5-6)

¹ Cuhva tsa cua quita ra Jesús tsitsi vehe ñuhu cahnu can, iin ra tsicá tsihin ra catyí ra tsihin ra:

—¡Maestro, nyehé jihna tsa sii caá yuu yihí vehe ihya! ¡Nyehé tsa nahnu vehe ihya! —catyí ra tsihin ra Jesús.

² Maa tyin nacahan ra Jesús, tan catyí ra tsihin ra:

—Nditsa nahnu vehe ihya tan sii caá tsi nyehé yo vityin. Maa tyin catyí yu tsihin un tyin coo quiví nduve ca maa náa cua ndoo ihya. Ndi intuhun yuu tan ña cua coso tahan tsi tsihin inga tsi, tyin tandihí maa tsi tan cua tani tsi —catyí ra Jesús.

Nu tsahá cuenda ra Jesús náa cua cuví tsa ndi cumañi ca naa ñuhu ñayiví

(Mt. 24.3-28; Lc. 21.7-24; 17.22-24)

³ Tacan tan cuahán ra Jesús tsihin ra tsicá tsihin ra yucu yutun Olivo tsa canyíi inga tsiyo nu nditsin nyehé tsi vehe ñuhu cahnu. Tsa tsinyaá ra Jesús ican, ra Pedro, ra Jacobo, ra Juan, tan ra Andrés tsicá tuhun xeehe ra naha tsi ra tan catyí ra naha:

⁴ —Cuñí ndi tsa catyí tuhun un tsihin ndi ama cua cuví tandihí tsa cahán un. ¿Nacaa tan coto ndi tatun tsa cuyatyin cundaa tandihí can? —catyí ra naha.

⁵ Nacahan ra Jesús tan catyí ra:

—Jaha ndo cuenda tsi ndo coto jandavi ñaha nyiví tsi ndo. ⁶ Tyin cuaha xaan nyiví cua quitsi, tan cua cuatyí ñu ñi siví yu, tan cua catyí ñi: “Yuhu cuví ra Cristo, ra tsa jaquitsi Nyoo.” Tan cuaha xaan nyiví cua jandavi ñaha ñi.

⁷ ‘Maa tyin tun ñihi tuhun ndo tyin iyó cuatyí tan cañi tahan nyiví ityi can tan ityi ihya, ña nayuhvi ndo tyin tacan taahán maa tsi cuví tsa ndi cumañi ca naa ñuhu ñayiví. ⁸ Tyin nyiví iin ñuu cua cañi tahan ñi tsihin nyiví inga ñuu, tan cua coo cuatyí iin ñuu tsihin inga ñuu. Tan cuaha ñi ityi cua taan ñihi, tan cua coo tama, tan cua nduvaa nyivi. Vasu ndi maa nyehé nyiví tundoho ihya, ña cua naa naha ñuhu ñayiví tyin ndi nyaa ca cua nyehé ñi tundoho.

⁹ ‘Maa tyin jaha ndo cuenda tsi ndo tyin cua cuhva cuenda nyiví tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu. Cua cuhva cuenda ñi tsi ndo tsi ra cumí tyiñu tan tsi ra cuví rey tsacatyí yuhu. Tyin tacan tan cuví cahan ndo tuhun yu nuu ra naha. ¹⁰ Tyin tsa ndi cumañi ca naa ñuhu ñayiví, cuñí tsi coto tandihí nyiví inga ñuu tyin Nyoo jacacá ra tsi nyivi. ¹¹ Tan cuhva tsa cua cundaca ñi tsi ndo nuu ra cumí tyiñu naha ra, ña caca iñi ndo náa cua cahan ndo. Tyin juven ñi maa hora can tan cua cuhva Nyoo tsa cahan ndo. Tyin ñavin maa ndo cua cahan; tyin maa Tatyí li Nyoo cua cahan. ¹² Yihí ra naha cua nacuhva cuenda ra naha juven ñi maa yañi ra naha tan cua ndacan ra naha tsa cúu ra can naha ra. Yihí nyiví cua nacuhva cuenda ñi juven ñi maa sehe ñi. Tan yihí ñi cua nacuhva cuenda ñi nda cuanda jutu ñi tan sihi ñi tyin cúu ñi. ¹³ Tandihí nyiví iyó nu ñuhu ñayiví ndasi cua cuñi ñi nyehé ñi tsi ndo tsacatyí yuhu. Maa tyin nyoocho tsa cua cunyehe iñi tsinú iñi tsi yu nda nu ndihí, cua cacu ndo.

¹⁴ ‘Tandihí nyoocho tsa cahví nu tutu Nyoo nu tyaá ra Daniel, ra cuví ndusu yuhu Nyoo tsa tsicoq tahan tsanaha, cutuñi iñi ndo tyin iyó tsa janducaquihí tan tsa jativi. Quiví tsa nyehé ndo tyin tsa nyíi yacan nu ña taahán tsi cunyíi can, nyoocho nyiví iyó Judea, quita ndo ñuu ndo tan cahun ndo ityi yucu. ¹⁵ Nyoocho tsa cua cuyucu jifí vehe quiví can, cua nuu ndo, maa tyin ña cua nuu ndo tsa quihví ndo tsitsi vehe ndo tan tava ndo tsa iyó tsi ndo. ¹⁶ Nyoocho tsa cua cuyucu tsitsi cuhu, ña cua cunuhu jihna ndo cuquihin ndo jahma ndo. ¹⁷ ¡Ndahvi ñiñaha tsa ñuhú sehe quiví can! ¡Tan ndahvi ñi iyó sehe lee tsa ndi tyaxin! ¡Ndahvi ñi! ¹⁸ Ndacan tahvi ndo tsi Nyoo na ña tahan tsi cunu ndo quiví vitsin. ¹⁹ Tyin tundoho tsa cua nyehé nyiví quiví can, ñaha ca maa coo can ndaha tsinú maa ñuhu ñayiví nda

cuanda vityin. Tan ndi ityi nuu ca tan ña cua nyehe nyivi tahan tundoho can inga tsaha. ²⁰ Tun tsatyin Jutu Mañi yo tan ña jandihí ra tsa cua nyehe yo tundoho quivi can, yoñi maa cua cacu. Maa tyin cua jandihí ra can tsa cuenda tsa cuñi ra tsi nyivi yihí cuenda ra, nyivi nacatsj vaha maa ra.

²¹ Tatun catyi nyivi tsihin ndo: “Jihna ndo, ihya nyaá ra Cristo” o “Nyehe ndo, ican nyaá ra Cristo”, ña tsinu iñi ndo. ²² Tyin cua quitsi nyivi jandavi ñaha tan cua catyi ñi tyin ra Cristo cuví ñi. Cua catyi ñi tyin ndusu yuhu Nyoo cuví ñi. Maa tyin ña nditsa ñi. Cua javaha ñi tsa nyityi, tan tsa iyo nahnu tyin cua jandavi ñaha ñi nda cuanda nyivi nacatsj maa Nyoo, tatun cunye ñi javaha ñi tacan. ²³ Maa tyin nyoocho jaha cuenda vaha ndo tsi ndo vityin tsa tsa tsitó ndo tandihí yacan tsa ndi cumañi ca tahan tsi quivi can —catyi ra Jesús.

Nu jacoto ra Jesús nácaa cua quitsi nyico ra inga tsaha

(Mt. 24.29-35, 42-44; Lc. 21.25-36)

²⁴ Tan catyi nyico ra Jesús tyehen:

—Maa tyin tsa cua yaha nyehe nyivi tundoho quivi can, cua ndunaa ñicanyii, yoo ña cua jandunditsin ca tsi, ²⁵ tan cua cucoyo tiñuu. Tan tandihí tsa iyó andivi tan cua nacanda tsi naha tsi. ²⁶ Tacan tan cua nyehe ndo tsi yuhu, Rayii tsa quee nda gloria, vatsi yu nu vico tsihin tunyee iñi cahnu tan tsihin tsa cahnu cuví Nyoo. ²⁷ Tan cuaha ángel cuenda yu cua jaquitsi yu tyin jandu iin ra naha nyivi nacatsj maa Nyoo. Cua quita ñi nanií cahnu nu ñuhu ñayivi, nda nu ndihí ñuhu ñayivi tan nda nu ndihí andivi.

²⁸ Cufuñi iñi ndo cuhva iyó yutun tsa nañi higo: Tun tsa nduyutyá socio tun tan cana ndaha yutya tun, tsitó ndo tyin tsa cua quee tsiti tun. ²⁹ Tan juven ñi tacan, tatun tsa cuví tandihí tsa iyo tsa caahán yu tuhun tsihin ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi. ³⁰ Tsa nditsa catyi yu tsihin ndo tyin tsa ndi cumañi ca cúu nyivi iyó nu ñuhu ñayivi ihya tan cua cuví tandihí tsa caahán yu tuhun tsihin ndo. ³¹ Tan coo quivi cua cundihi andivi tan cua cundihi ñuhu ñayivi, maa tyin tuhun caahán yuhu, ña cua cundihi maa tsi tyin tandihí tsi tan cua cundaa tsi.

³² Maa tyin quivi tan hora tsa cua cuví tandihí yacan, yoñi maa tsitó can, ndi maa ca ángel tan ña tsitó ra naha, ndi yuhu tsa cuví yu Sehe Nyoo tan ña tsitó yu. Intuhun ñi maa Nyoo Jutu yo tsitó ama cua javaha ra tandihí.

³³ Yacan cuenda coo nyito vaha ndo, tan jaha cuenda ndo tsi ndo, tan ndacan tahvi ndo tsi Nyoo, tyin ña tsitó ndo náa quivi tan náa cuhva cua quitsi nyico yu. ³⁴ Tumaa iin rayii tsa cua kuhun nu cañi. Ra ican tsa

ndi cumañi ca kuhun ra, tsahá cuenda ra vehe ra tsi musu ra. Tan tsahá ra tyiñu tsi intuhun intuhun ra naha. Tan tava tyiñu ra tsi ra jahá cuenda yuvehe na jaha cuenda vaha ra. ³⁵ Yacan cuenda nyoocho coo nyito ndo tyin ña tsitó ndo náa cuhva cua quitsi yu tsa cuví yu tumaa tsitoho vehe can, tyin cuví quitsi yu tsa cua cunaaha, maa ñuu, o cuhva tsacú tsitoocho, o tsa cua cana ñicanyii. ³⁶ Yacan cuenda coonyito vaha ndo tan ña cusu ndo tyin sana iñi ndo tan cua quitsi yu. ³⁷ Tsa caahán yu tsihin nyoocho, caahán tucu yu tsihin tandihí ca nyivi: Coo nyito ndo.

14

Nu nducy ra jutu cuví ityi nuu naha ra cuhva tiin ra naha tsi ra Jesús

(Mt. 26.1-5; Lc. 22.1-2; Jn. 11.45-53)

¹ Tsa ndi cumañi uvi quivi ca tan tahan tsi vico pascua tan vico nu tuhvá nyivi tsatsi paan tsa nduve yutsan iya yihí. Ra jutu tsa cuví ityi nuu naha ra tan ra maestro cuenda ley vehe ñuhu naha ra nducy ra naha cuhva tiin xeehe ra naha tsi ra Jesús tan cahñi ra naha tsi ra. ² Maa tyin natuhun tahan ra naha tan catyi ra naha:

—Ña cua tiin naha yo tsi ra quivi maa vico tyin coto nduvaa xaan nyivi —catyi ra naha.

Nu tyihí iin ñaha ndutya tami jiñi ra Jesús

(Mt. 26.6-13; Jn. 12.1-8)

³ Tsa ndi cumañi ca tahan tsi vico can, nyii ra Jesús ñuu Betania, vehe ra Simón, ra tsa tsindoho cuehe tyaahyu. Tsitsi tsa nyaá ra Jesús tsatsi ra, tsaá iin ñaha ndahá ña iin yutyi tsa tsinú tsihin yu tsa nañi alabastro. Tsiñu can yihí ndutya tami tsa nañi nardo. Tan yahvi xaan nyaá ndutya tami can. Nuñá ña yuhu yutyi can tan tava ña ndutya tami can tan tyihí ña can jiñi ra Jesús. ⁴ Maa tyin juhva ra tsa yucú ican naha ra nduxaán ra naha tan catyi ra naha:

—¿Nacuenda tyin jativi ñaha ihya ndutya tami can? ⁵ Tun tsatyin xico ña can, cuaha xaan xuhun cua ñihi ña tsihin can, tan cuví jatinyee ña tsi nyivi ndaahvi tsihin xuhun can —catyi ra naha.

Tan cuxaán ra naha tsi ña.

⁶ Maa tyin ra Jesús catyi ra:

—¡Jaña ndo tsi ña! ¿Nacuenda cuñi ndo jandu uvi iñi ndo tsi ña? Tan tsa vaha javahá ña tsihin yu. ⁷ Tyin nyivi ndaahvi tandihí ñi quivi cua cuyucu ñi tsihin ndo, maa tyin yuhu, ña naha ca cunyii yu tsihin ndo. ⁸ Ñaha ihya javahá ña ndihí cuhva cuví ñi javahá ña. Tyihí ña ndutya tami cuñu ñuhu yu, tumaa tuhvá maa yo javahá tsihin cuñu ñuhu nyivi tsa ndi cumañi ca quihvi ñuhu ñi. ⁹ Tsa nditsa catyi yu tsihin ndo, tyin tandihí ityi nu cua cahan nyivi tuhun Nyoo nanií cahnu nu ñuhu ñayivi, cua cahan ñi

tuhun ñaha ihya tan tsa javahā ña, tyin tacan tan ña naa iñi nyivi tsi ña —catyí ra Jesús.

*Nu xico ra Judas tsi ra Jesús
(Mt. 26.14-16; Lc. 22.3-6)*

¹⁰ Tsa yahā yacan tan quitā iin ra tsitsi tsa utsi uvi ra tsicá tsihin ra Jesús. Ra ihya cuví ra Judas Iscariote. Tsaḥān ra tsicahān ra tsihin ra jutu cuví ityi nuu naha ra, tan jandaq ra tyiñu tsihin ra naha tyin cua cuhva cuenda ra tsi ra Jesús tsi ra naha. ¹¹ Cuhva tsa tsiñi ra naha tsa caahān ra, sií xaan cuñi ra naha cuví, tan catyí ra naha tsihin ra tyin cuhva ra naha xuhun tsi ra. Tacan tan quitsahā nducú ra Judas cuhva cuhva cuenda ra tsi ra Jesús tsi ra naha.

*Nu cuxiñi ra Jesús tsihin ra tsicá tsihin ra
(Mt. 26.17-29; Lc. 22.7-23; Jn. 13.21-30; 1 Co. 11.23-26)*

¹² Quivi jihna ñi tsa quitsahā vico nu tsatsi nyivi paan tsa nduve yutsan iya yihí tan quivi tuhvá ñi tsaññi mbee lee tan jamañi ñi tsi Nyoo, ra tsicá tsihin ra Jesús tsicá tuhun ra naha tsi ra, tan catyí ra naha:

—¿Numaa cuñi un cuhun ndi janduvaha ndi tsa cuxiñi un cuenda vico pascua ihya?

¹³ Tacan tan tavā tyiñu ra tsi uvi taahan ra naha tan catyí ra tsihin ra naha:

—Cuaahan ndo tsitsi ñuu, tan ican cua nañihi ndo iin rayií yosó soco iin quiyi ndutya. Tsa nyehe ndo tsi ra, cūanyicun ndo tsi ra. ¹⁴ Tsa tsaā ndo yuvehe nu cua quihvi ra, catyí ndo tyehen tsihin tsitoho vehe can: “Ra Maestro cuñi ra coto ra numaa nyaá cuarto nu cua jacahnu ra vico tsihin ra tsicá tsihin ra”, catyí ndo. ¹⁵ Tan cua janaha ra iin cuarto cahnu nu tsinu uvi pisu tsi ndo. Tsa nduvahā maa tsitsi tsi jahā ra, javaha ndo tsa cuxiñi yo tsitsi vehe can—catyí ra Jesús tsihin ra naha.

¹⁶ Tacan tan cuahān ra naha. Tsa tsaā ra naha tsitsi ñuu can, nañihi ra naha tandihí maa cuhva catyí ra Jesús tsihin ra naha. Tan javahā ra naha tsa cua cuxiñi ra naha cuenda vico pascua. ¹⁷ Tsa ndihí javahā ra naha tsa cua cuxiñi ra naha, tacan tan cuahān nyico ra naha nu nyií ra Jesús. Tan tsa cunaaha, cuahān ra Jesús, cuacuxiñi ra tsihin tsa utsi uvi ra tsicá tsihin ra. ¹⁸ Tan cuhva tsa nyecú ra naha tsatsí ra naha nu mesa, tan catyí ra Jesús:

—Tsa nditsa catyí yu tsihin ndo tyin iin nyooho tsa tsatsí tsihin yu cua xico tsi yu tsi ra xaan iñi tsi yu.

¹⁹ Tacan tan nducuihyā xaan cuñi ra naha, tan quitsahā tsicá tuhun tan iin tan iin ra naha tsi ra, tan catyí ra naha:

—¿A yuhu?

Tacan tan tsicá tuhun tucu inga ra tan catyí ra:

—¿A yuhu?

²⁰ Tan nacahān ra Jesús tan catyí ra:

—Ña tandihí ndo. Intuhun ñi ra tsitsi tsa utsi uvi ndo. Tan ra ican cuví ra tsa jatyií paan iin ñi tsitsi coho tsihin yu. ²¹ Tyin yuhu, Rayií tsa quee nda gloria, cua tahan yu tumaa caahān maa nu tutu Nyoo tyin cua tahan yu. Maa tyin jndahvi ra ndaahvi tsa cua xico tsi yu! Vaha ca tun tsatyin ña cacú ra —catyí ra Jesús.

²² Tan tsitsi tsa tsatsí ra naha, tacan tan quihñi ra Jesús iin paan tan nacuhvā ra tyahvi nyoo tsi Nyoo tsa cuenda can, tan tsahnu sava ra can, tan tsaḥā ra can tsi ra tsicá tsihin ra, tan catyí ra:

—Çatsi ndo paan ihya tyin tsehe cuví tumaa cuñu ñuhuh yu —catyí ra tsihin ra naha.

²³ Tsa yahā yacan quihñi ndihí ra vasu nu yihí vinu. Tsa yahā tsaḥā ra tyahvi nyoo tsi Nyoo, tacan tan tsaḥā ra can tsi ra naha. Tandihí ra naha tan tsiñi ra naha vinu tsa yihí tsitsi vasu can. ²⁴ Tan catyí ra tsihin ra naha:

—Vinu ihya cuví tumaa ñiñi yu tyin tsihin ñiñi yu cua ndoo Nyoo tuhun tsaā tsihin ndo tyin cua cati ñiñi yu tsa cuenda tsa vaha tsi nyooho tan tsa vaha tsi cuaha nyivi. ²⁵ Tsa nditsa catyí yu tsihin ndo tyin ña cua coho ca yu vinu tsa cuví ndutya yucu vixi uva, nda cuanda coho yu vinu tsaā nda nu ndacá ñaha Nyoo quivi tsaā yu ndacan —catyí ra Jesús tsihin ra naha.

Nu jacotó ra Jesús tyin cua cahan ra Pedro tyin ña nacotó ra tsi ra

(Mt. 26.30-35; Lc. 22.31-34; Jn. 13.36-38)

²⁶ Tsa ndihí tsitā ra naha yaa Nyoo, tan cuahān ra naha yucu yutun Olivo. ²⁷ Tacan tan catyí ra Jesús tsihin tandihí ra naha:

—Tandihí maa ndo tan cua nacoo ihñi ndo tsi yu tsa cuaa vityin tyin catyí nu tutu Nyoo tyehen: “Tandihí mbee ticatyí jana yu cua cuhun tsiyo ti naha ti siin tyin ityi tyin cua cahñi yu tsi ra jahá cuenda tsi ti naha ti”, catyí tsi. ²⁸ Maa tyin tsa yaha nandoto yu, jihna ca yu cua cuhun Galilea tsa ndi cumañi ca cuhun nyooho —catyí ra Jesús tsihin ra naha.

²⁹ Tacan tan catyí ra Pedro tsihin ra:

—Vasu ndi maa nacoo ihñi tandihí ra naha tsi un, maa tyin yuhu ña cua nacoo ihñi maa yu tsi un —catyí ra tsihin ra Jesús.

³⁰ Maa tyin ra Jesús catyí ra tsihin ra:

—Tsa nditsa catyí yu tsihin un, tyin tsa cuaa vityin, tsa ndi cumañi ca vacu tsiitooho tsa tsinu uvi tsaḥa, uñi tsaḥa cua cahan un tyin ña nacotó un tsi yu —catyí ra Jesús tsihin ra Pedro.

³¹ Maa tyin jañiñi ra Pedro tan catyí ra:

—Vasu ndi maa cúu yu tsihin un, maa tyin ña cua catyí yu tyin ña nacotó yu tsi un —catyí ra Pedro.

Tan juvin ñi tacan catyí tandihí ca ra naha.

Nu nyii ra Jesús Getsemaní tsicán tahvi ra tsi Nyoo

(Mt. 26.36-46; Lc. 22.39-46)

³² Tacan tan tsaq ra Jesús tan ra tsicá tsihin ra iin nu nañi Getsemaní. Tan catyí ra Jesús tsihin ra naha:

—Ndoo ndo ihya tsitsi tsa cuahán yu ndacan cua ndacan tahvi yu tsi Nyoo —catyí ra Jesús.

³³ Tan quihñ ra tsi ra Pedro, ra Jacobo tan ra Juan cuahán tsihin ra. Tan tsaq tucuiihya iñi cahnu tsi ra tan tuñu cuñi ra. ³⁴ Tan catyí ra tsihin ra naha:

—Cuiihya xaan cuñi yu; cahñi ña maa tucuiihya iñi ihya tsi yu, cuñi yu. Ndoo ndo ihya, tan ña cusu ndo —catyí ra.

³⁵ Tacan tan cuahán ra luxu ca ityi nuu. Tan tsicuiñi tsiti ra nu ñuhu tan tsaquñ ra nuu ra nda nu ñuhu. Tan tsicān tahvi ra tsi Nyoo tan catyí ra:

—Tun tsatyin cuvi ña cuhva un nyehe yu tundoho tsa cua nyehe yu —catyí ra tsicān tahvi ra.

³⁶ Tan tsa tsicān tahvi ra, catyí ra:

—Jutu Mañi yu, tsa cuenda yooho nduve tsa ña cuvi javaha un. Tun yooho tan cuñi un cuvi jatsiyo un tundoho ihya siqui yu. Maa tyin na cuvi maa cuhva cuñi maa un, tan ñavin cuhva cuñi maa yu —catyí ra Jesús tsicān tahvi ra.

³⁷ Tacan tan cuahán ra nu nacoq ra tsi uñi ra tsicá tsihin ra. Tsa tsaq ra nu yucú ra naha, nyehe ra tyin quixí ra naha. Tan catyí ra tsihin ra Pedro:

—Simón, ¿a quixí un? ¿Nacuenda ña cunyeq iñi un coo nyito un tsihin yu ndi intuhun hora? ³⁸ Ña cusu ndo; ndācan tahvi ndo tsi Nyoo, tyin tacan tan ña cua javaha ndo cuhva cuñi nu ña vaha. Tsa nditsa tyin añima ndo cuñi xaan tsi nanducu tsi tsi Nyoo, maa tyin cuñu ñuhu ndo cuvi tsa vita cuñi —catyí ra Jesús tsihin ra naha.

³⁹ Tacan tan cuahán nyico ra inga tsaha. Tan tsicān tahvi ra tsi Nyoo juvin ñi tsihin tuhun tsa cañan ra tsa jihna ñi. ⁴⁰ Tacan tan tsaq nyico ra inga tsaha, nu yucú ra naha tan nyehe ra tyin quixí nyico ra naha, tyin tsindaş maa tinuu ra naha jahā ñumaahna. Tan ña tsitó ra naha náa nacahan ra naha tsihin ra. Ndi maa ra tan ña cañan ca ra. ⁴¹ Tan cuahán nyico ra. Tsa tsaq ra nu yucú ra naha tsa tsinu uñi tsaha, catyí ra:

—Cusu vaha ndo vityin, tan quitatu ndo tyin tsa cundaq tyiñu. Ra tsa cua cuhva cuenda tsi yu tsi ra xaan iñi tsi yu naha ra tsa vatsí ra tyin tsa tahañ tsi hora tsa cua cuhva cuenda ra tsi yuhu, Rayi tsa queq nda gloria. ⁴² Nduvita ndo, cōhon ndo tyin tsa vatsí ra tsa xico tsi yu —catyí ra Jesús tsihin ra naha.

Nu tsaq cuenda ra Judas tsi ra Jesús tsi nu xaan iñi tsi ra nahnú

(Mt. 26.47-56; Lc. 22.47-53; Jn. 18.2-11)

⁴³ Ra jutu cuvi ityi nuu naha ra, tan ra maestro cuenda ley vehe ñuhu naha ra, tan ra mandoñi nyivi Israel naha ra; cuaha xaan nyivi jacuhñ ra naha tsihin ra Judas, iin ra tsicá tsihin ra Jesús, tyin tñi ñi tsi ra Jesús. Juhva ñi ndahá mityi tan juhva ñi ndahá yutun. Ndi caahán ca ra Jesús nyaá ra tan tsaq ra Judas tsihin nyivi cuaha can. ⁴⁴ Tsa ndi cumañi ca cuhun ra Judas, ra tsa xico tsi ra Jesús, tsa catyí maa ra tsihin nyivi náa cua javaha ra tan coto ñi ndáa ra cuvi ra Jesús. Tan cañan ra tyehen:

—Ra tsa cua tyaa yuhu yu, ra ican cuvi ra Jesús tsa cua quihñ ndo. Quihñ ndo tsi ra tan jahā cuenda vaha ndo coto cunu ra —catyí ra nu quitsi tsi.

⁴⁵ Tsa tsaq ra Judas nu nyii ra Jesús natuhva ra nu nyaá ra tan catyí ra tsihin ra: —Maestro.

Tan tyaq yuhu ra tsi ra. ⁴⁶ Tacan tan quihñ ra naha tsi ra Jesús cuahán tsihin ra naha.

⁴⁷ Maa tyin iin ra nyii tsihin ra Jesús, tava ra mityi ra tan tsahnya ra soho musu ra jutu tsaahnu cuvi ityi nuu. ⁴⁸ Tacan tan catyí ra Jesús tsihin ra quihñ tsi ra:

—¿A ñasuhu cuvi yuhu? tyin vatsí ndo vatsi quihñ ndo tsi yu tsihin mityi tan yutun. ⁴⁹ Ndihi quivi tsinyii yu jacuaha yu tsi ndo tsitsi vehe ñuhu cahnu, tan ña quihñ ndo tsi yu. Tandihñ tsehe cuvi tyin tacan tan cundaa tsa catyí nu tutu Nyoo —catyí ra Jesús tsihin ra naha.

⁵⁰ Tacan tan tsinñ tandihñ ra tsicá tsihin ra, tan ndoo intuhun ña maa ra jahā ra naha. ⁵¹ Maa tyin ndoo intuhun ca ra tyuvaa tan cuahán ra cuanyicún ra tsi ra, ndasi ra tsihin iin ticatyí tan tñi ndihñ ra naha tsi ra. ⁵² Maa tyin nacoq ihñi ra ticatyí can tan tsinñ tandihñ ra.

Nu tsicā tuhun ra mandoñi naha ra tsi ra Jesús tun juvin Sehe Nyoo tsi ra

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Tacan tan tsindacaq ra naha tsi ra Jesús tsi ra jutu tsaahnu cuvi ityi nuu tan ndu iñi tucu tandihñ ra jutu cuvi ityi nuu naha ra tan ra cuvi mandoñi nyivi Israel naha ra, tan ra maestro cuenda ley vehe ñuhu naha ra. ⁵⁴ Ra Pedro nyicún tsica nyicún tsica ñi ra tsi ra naha cuahán ra. Tan tsaq ra nda nuquehe yuvehe ra jutu tsaahnu cuvi ityi nuu can. Tan ndoo ra tuñu ra ñuhñ tsihin ra vitya naha ra.

⁵⁵ Ra cuvi jutu ityi nuu naha ra, tan tandihñ ca ra cumi tyiñu naha ra nducú ra naha cuatyí tyaa ra naha siqui ra Jesús, tyin tacan tan cuvi cahñi ra naha tsi ra. Maa tyin

ña ñihj maa ra naha cuatyí tyaa ra naha tsi ra. ⁵⁶ Cuaha xaan nyivi caħan cuendu siqui ra, maa tyin ña nacatsí tahan maa tuhun caahán ndi intuhun ñi. ⁵⁷ Yihí ñi nduvitá ñi tan caħan ñi maa ñi maa cuendu siqui ra, tan catyí ñi:

⁵⁸ —Nyuhu tsiñj ndi tsa caħan ra tan catyí ra tyehen: “Yuhu cua caní yu vehe ñuhu cahnu tsa javahá nyivi. Tan cua janduvita yu inga vehe ñuhu tsitsi tsa uñi quivi ñi. Maa tyin ñavin tahan vehe ñuhu tsa javahá nyivi” catyí ra —catyí ñi.

⁵⁹ Vasu ndi maa tacan caahán ñi, maa tyin ña nacatsj tahan maa tsa caħan ñi.

⁶⁰ Tacan tan nduvitá ra jutu tsaahnu cuví ityi nuu mahñu tandihí ra yucú ican naha ra, tan tsicá tuhun ra tsi ra Jesús, tan catyí ra:

—¿A ña cua nacahan un nu caahán nyivi ihya? ¿A nditsa tsa caahán ñi, o ña nditsa? —catyí ra

⁶¹ Maa tyin ña nacahan maa ra Jesús tan nduve maa náa caħan ra. Tacan tan ra jutu tsaahnu cuví ityi nuu tsicá tuhun ra tsi ra inga tsaha, tan catyí ra:

—¿A yooħo cuví ra Cristo, Sehe Nyoo ii tsa tsahá tsa vaha?

⁶² Tan ra Jesús catyí ra tsihin ra:

—Juvín. Nyooħo cua nyehe ndo tsi yuhu, Rayii tsa quee nda gloria, nyaá yu xiin cuaha Nyoo, ra iyó tandihí tunyee iñi, tan cua nyehe tucu ndo nu quitsí yu nu vico ityi andivi —catyí ra tsihin ra.

⁶³ Tacan tan tsahnyá ra jutu tsaahnu cuví ityi nuu jahma ra tumaa iin seña tyin ña taahán iñi ra tsa caahán ra Jesús tyin cuñí maa ra tyin ña vaha tsa caahán ra, tan catyí ra:

—Ña tsiñí ñuhu ca tsa nducu yo tsi ra cuví tsa ndaa. ⁶⁴ Tyin tsa tsiñj maa ndo tsa caħan ra. Tsicoq cuatyí ra nuu Nyoo tsihin tuhun caħan ra. ¿Náa catyí ndo vityin? —catyí ra.

Tacan tan nacahan tandihí ra naha tan catyí ra naha tyin taahán tsi cúu ra.

⁶⁵ Tacan tan quitsahá tiví sñi juhva ra naha tsi ra. Tyasj ra naha nuu ra, tan cañj ra naha tsi ra tsihin tsiqui tan catyí ra naha tsihin ra:

—¿Cahan tsihin ndi yóo cañj tsi un! —catyí ra naha tsihin ra.

Tan cañj tucu ra vitya naha ra nuu ra.

Nu caħan ra Pedro tyin ña nacotó ra tsi ra Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Tsitsi tsa ndi nyíí ra Pedro nuquehe tsata vehe ra jutu tsaahnu cuví ityi nuu, tsaq iin ñaha cuví musu ra jutu can. ⁶⁷ Cuhva tsa nyehe ñaha can tsi ra Pedro nyaá ra tuñú ra ñuhu, quitsahá nyehé xaan ña tsi ra, tan catyí ña tsihin ra:

—Tsicá tucu yooħo tsihin ra Jesús, ra ñuu Nazaret can —catyí ña tsihin ra.

⁶⁸ Maa tyin ra Pedro tyihj xeehe ra, tan catyí ra:

—Yuhu ña nacotó yu tsi ra can, tan ndi ña tsitó yu náa caahán un —catyí ra tsihin ña.

Tacan tan quitá ra ityi yuhu cora. Tan tsacu ñi tsitooħo. ⁶⁹ Tacan tan ñaha can nanyehe nyico ña nu nyaá ra inga tsaha tan catyí ña tsihin ra nyecú ican naha ra:

—Ra vaha iñi tsi ra can cuví ra ihya —catyí ña.

⁷⁰ Maa tyin tyihj xeehe nyico ra inga tsaha. Tacan tan ña naha ñi tan catyí ra yucú ican naha ra tsihin ra Pedro:

—Nditsa tyin ra vaha iñi tsi ra can cuví yooħo, tyin ra Galilea cuví un, tan caahán un tumaa caahán nyivi Galilea —catyí ra naha tsihin ra.

⁷¹ Tacan tan iyo xaan caahán ra Pedro, tan catyí ra:

—¿Tsitó vaha maa Nyoo tyin ña nacotó yu tsi ra tsa caahán ndo tuhun! ¿Na cahñi maa Nyoo tsi yu tun ña nditsa yu tsa caahán yu! —catyí ra.

⁷² Juvín ñi cuhva can navacu tsitooħo tsa tsinu uvi tsaha. Tacan tan nducuhun iñi ra Pedro tsa caħan ra Jesús tsihin ra: “Tsa ndi cumañi ca vacu tsitooħo uvi tsaha, yooħo tsa yahá caħan un uñi tsaha tyin ña nacotó un tsi yu.” Tsa nducuhun iñi ra Pedro tsehe, quitsahá ra tsacú ra.

15

Nu jaqueé yuhu ra Pilato tsi ra Jesús

(Mt. 27.1-2, 11-14; Lc. 23.1-5; Jn. 18.28-38)

¹ Tan tsa tuvj inga quivi ndu ijin ra jutu cuví ityi nuu naha ra tsihin ra mandofi naha ra tsihin ra maestro cuenda ley vehe ñuhu naha ra, tan tandihí ca ra cumí tyiñu tsa yihí ndaha tsi nyivi Israel. Nuuhñi ñi maa ra Jesús tan tsindaca ra naha tsi ra nuu ra Pilato. ² Tan tsicá tuhun ra Pilato tsi ra, tan catyí ra:

—¿A juvín un cuví rey nyivi Israel?

Nacahan ra Jesús tan catyí ra:

—Juvín yu, tumaa caahán maa un.

³ Tan cuaha xaan cuendu caħan ra cuví jutu ityi nuu naha ra siqui ra Jesús. ⁴ Tacan tan tsicá tuhun nyico ra Pilato tsi ra inga tsaha, tan catyí ra:

—¿A ña cua nacahan maa un? Nyehe, cuaha xaan cuatyí tyaa ra naha siqui un —catyí ra.

⁵ Maa tyin ra Jesús ña nacahan maa ra. Yacan cuenda ña ñihj ra Pilato náa cahan ra.

Nu tsahá ra Pilato ndatu tsa cúu ra Jesús

(Mt. 27.15-31; Lc. 23.13-25; Jn. 18.38—19.16)

⁶ Vico pascua tuhvá ra Pilato nacoó nuña iin ra yucú vehe caa. Tan tavá ra ndáa ra cuñi maa nyivi tyin tava ra. ⁷ Quivi can nyii iin ra nañi Barrabás vehe caa, tsihin inga ca ra tsahñi nyivi nu cuvaá nyivi siqui ra ndacá ñaha. ⁸ Tan tsahān nyivi tsicahān ñi tsihin ra Pilato na jaña ra iin ra yucú vehe can tumaa tuhvá maa ra javahá. ⁹ Tan nacahān ra Pilato, tan catyí ra:

—¿A cuñi ndo tsa jaña yu tsi ra cuví Rey ndo?

¹⁰ Tacan cahān ra tyin tuví iñi ra tyin tsahā cuenda ra jutu cuví ityi nuu naha ra tsi ra Jesús tsi ra tsa cuenda tsa ndasi cuñi ra naha nyehe ra naha tsi ra tyin cuaha nyivi nyicún tsi ra. ¹¹ Maa tyin ra jutu cuví ityi nuu can naha ra natyuhū ra naha tsi nyivi tsa cahān ñi na tava ra Pilato tsi ra Barrabás vehe caa. ¹² Tacan tan tsicā tuhun ra Pilato tsi ñi, tan catyí ra:

—¿Tun tacan, náa cuñi ndo javaha yu tsihin ra tsa jacunañi ndo Rey cuenda ndo? —catyí ra tsihin ñi.

¹³ Tacan tan canā tsaa ñi, tan catyí ñi:

—¡Tyāa tsi ra nu cruu na cúu ra! —catyí ñi.

¹⁴ Tan catyí ra Pilato tsihin ñi:

—Maa tyin, ¿náa tsa ña vaha javahā ra? —catyí ra.

Ñi ican quitsahā caná tsaa nyico ñi tan catyí ñi:

—¡Tyāa tsi ra nu cruu na cúu ra! —catyí ñi.

¹⁵ Tacan tan tsa cuñi ra Pilato ndoo vaha ra nuu nyivi, tavā ra tsi ra Barrabás vehe caa. Tsa yahā tavā ra tsi ra can, tavā tyiñu ra na ndoho ra Jesús. Tsa yahā ndoho ra Jesús, tan tsahā cuenda ra tsi ra tsi andaru na ticaa ra naha tsi ra nu cruu.

¹⁶ Tacan tan tsindacā ra andaru can naha ra tsi ra nuquehe vehe tyiñu. Tan jandu iin ra naha tandihi ca andaru. ¹⁷ Tan jacunditsi ra naha iin jahma cuaaha tuun tsi ra. Tan javahā ra naha iin corona iñu. Tan tyihj ra naha can jiñi ra. ¹⁸ Tsa yahā yacan tan quitsahā caná tsaa ra naha tsata ra tan tsacū nducu ra naha tsi ra, tan catyí ra naha:

—¡Nacumi tsi un, yooho Rey nyivi Israel! —catyí ra naha.

¹⁹ Tan cañi ra naha jiñi ra tsihin yutun, tan tiví si ra naha tsi ra. Tan tsiuñi tsi ra naha nuu ra jahá ra naha tyin jacahnú ra naha tsi ra. ²⁰ Tsa yahā tsacū nducu ra naha tsi ra, tavā ra naha jahma cuaaha tuun tsa jacunditsi ra naha tsi ra. Tacan tan jacunditsi nyico ra naha jahma maa ra tsi ra. Tan cuahān ra naha tsihin ra cuaticaá ra naha tsi ra nu cruu.

Nu tyāa ra naha tsi ra Jesús nu cruu

(Mt. 27.32-44; Lc. 23.26-43; Jn. 19.17-27)

²¹ Ityi cuahān ra naha tahān ra naha iin ra ñuu Cirene tsa nañi Simón. Tan cuví ra jutu ra Alejandro tan ra Rufo. Ndi vatsi nuhu ra

quee ra cuhu. Cuhva tsa cua yaha ra, jañiñi ra andaru naha ra tsi ra na cuiso ra cruu ra Jesús.

²² Tan tsindacā ra naha tsi ra Jesús iin nu nañi Gólgota, tan cuñi tsi catyí Yiqui Jiñi Ndiyi. ²³ Tan ican jacohō ra naha vinu sacā nuu tsihin numeri tsa nañi mirra tsi ra. Maa tyin ra Jesús ña cuñi ra coho ra can. ²⁴ Tsa yahā tyāa ra andaru naha ra tsi ra nu cruu, quihj ra naha jahma ra tan tavā cuenda ra naha tyin cuñi ra naha coto ra naha yóo cua jaha canaa intuhun intuhun jahma can.

²⁵ Tyāa ra naha tsi ra nu cruu caa iin tsa tuvi. ²⁶ Tan letra tsa tyāa ra naha jiñi cruu ra, catyí tsi nacuenta cua cúu ra. Tan catyí tsi tyehen: “Ra ihya cuví Rey nyivi Israel.” ²⁷ Tan tyāa ndihi ra naha uvi taahan ñasuhu tsihin ra. Iin iin ra naha tsa iin nu cruu. Iin ra xiin cuaha ra, tan inga ra xiin satyin ra. ²⁸ Tacan cuví tan cundaā cuhva catyí nu tutu Nyoo tyehen: “Javahā nyivi tsihin ra tumaa javahá ñi tsihin ra caquiñi.” ²⁹ Tan nyivi yahā ican jacuñi nyaa ñi tsi ra, tan javicó ñi jiñi ñi tsa tsacū nducu ñi tsi ra, tan catyí ñi:

—¡Jaan! ¡Yooho tsa cahān tyin cua caní un vehe ñuhu cahnu, tan tsitsi tsa uñi quiivi cua janduvaha nyico un itsi, ³⁰ jacacu tsi un vityin tan nūu nu cruu juven! —catyí ñi.

³¹ Tan juven ñi tacan tsacū nducu tucu ra jutu cuví ityi nuu naha ra tsi ra tan ra maestro cuenda ley vehe ñuhu naha ra, tan natuhun tahan ra naha tan catyí ra naha:

—¡Jacacu ra tsi inga ca nyivi, maa tyin ña cuví jacacu ra tsi maa ra! ³² Tun nuu ra nu cruu vityin nyehe yo, tacan tan cua tsinu iñi yo tyin juven ra cuví ra Cristo, Rey cuenda yo tsa cuví yo nyivi Israel —catyí ra naha.

Tan nda cuanda nu ñasuhu tsa ticaá nu cruu nduvi tsiyo xiin ra tan tsacū nducu ndihi nahnu tsi ra.

Nu tsihi ra Jesús

(Mt. 27.45-56; Lc. 23.44-49; Jn. 19.28-30)

³³ Cuhva tsa cua tahan hora, ndunaā nani cahnu nda cuanda caa uñi tsa tseñi. ³⁴ Tan juven ñi cuhva can canā tsaa ra Jesús tsihin tandihi tunyee iñi ra, tan catyí ra:

—Eloi, Eloi, ¿lama sabactani? —tan cuñi tsi catyí: Nyoo Jutu yu, Nyoo Jutu yu, ¿nacuenta nacoó ihñi un tsi yu? —catyí ra.

³⁵ Juhva ra yucú ican naha ra tsiñi ra naha tsa cahān ra tan catyí ra naha:

—¡jihna ndo! Caná tsaa ra tsi ra Elías, ra cuví ndusu yuhu Nyoo tahān tsanaha —catyí ra naha.

³⁶ Tacan tan tsinú xaan iin ra tsiquihj ra iin yahma tsa caá tumaa caá catyí, tan jatyi ra can tsihin vinu iya. Tan tyāa ra can iin nu yutun tan jatuhvā ra yuhu ra Jesús tyin coho ra vinu can, tan catyí ra:

—Na cuatu nuu yo. Nyehe yo tun quitsi ra Elías januu ra tsi ra nu cruu can —catyí ra.

³⁷ Tacan tan ñihi xaan cana tsaa ra Jesús, tan tsihi ra. ³⁸ Tan jahma tsa ticaá tsitsi vehe ñuhu cahnu ndatá sava tsi, nda siqui tan nda cuanda ityi tsaha. ³⁹ Tan ra capitán tsa yihí ndaha andaru tsa nyaá yatyin ñi nu ticaá ra Jesús nyehe ra nácaa cana tsaa ra, tan nácaa tsihi ra, tacan tan catyí ra:

—Nditsa nditsa cuii tyin Sehe Nyoo tsi ra ihya —catyí ra.

⁴⁰ Tan ndasava ñi nyecú tucu juhva ñiñaha nyehé ñi. Tan mahñu ñi can nyii ña María tsa quee ñuu Magdala, tan ña María sihi ra José tan ra Jacobo ra tyuvaa ca. Tan nyii tucu ña Salomé. ⁴¹ Ñiñaha ihya tsinyicun ñi tsi ra Jesús, tan jatyinyee ñi tsi ra quivi tsiçá nuu ra ityi Galilea. Tan yucú cuaha tucu ñiñaha inga ñuu tsa tsaq tsihin ra ñuu Jerusalén ican.

Nu tsiçutši ra naha tsi ra Jesús

(Mt. 27.57-61; Lc. 23.50-56; Jn. 19.38-42)

⁴² Quivi tsa tuhvá nyivi janduvaha tsa catsi ñi cuenda inga quivi tuhvá ñi quitatu, juvin ñi tseñi can ⁴³ tsaq ra José ra ñuu Arimatea nu nyii ra Pilato. Ra José can cuví ra iin ra nyisó tyiñu cahnu vehe tyiñu, tan ndatú tucu maa ra tsi ra tsa cua jaquitsi Nyoo tyin cundaca ñaha nu ñuhu ñayivi. Ña nayuhvi ra tan tsañan ra tsindacan ra cuñu ñuhu ra Jesús tsi ra Pilato. ⁴⁴ Tsa tsiçó ra Pilato tyin tsa yahá tsihi ra Jesús, iyo xaan cuñí ra. Tacan tan cana ra tsi iin capitán tan tsiçá tuhun ra tsi ra tun nditsa tyin tsa tsihi ra Jesús. ⁴⁵ Tan tsa tsiçó vaha ra Pilato tyin tsa yahá tsihi ra Jesús, tavá tyiñu ra na cuhva ra andaru naha ra cuñu ñuhu ra tsi ra José. ⁴⁶ Tacan tan tsijatá ra José iin jahma cuitsin tsa tsinu tsihin jahma vaha tsa nañi linu, tan januu ra cuñu ñuhu ra Jesús nu cruu. Yaha can tan cavá nuu ra jahma can cuñu ñuhu ra. Tacan tan tyihí ra cuñu ñuhu ra tsitsi iin ñaña tsa nyaá nduvahá tsitsi iin cava. Tan tyasí ra yuhu ñaña can tsihin iin yu cahnu. ⁴⁷ Tan ña María, tsa quee ñuu Magdala, tan ña María, sihi ra José, tsañan ñi, tsinyehe ñi nu tinyij ra José can cuñu ñuhu ra Jesús.

16

Nu nandoto ra Jesús

(Mt. 28.1-10; Lc. 24.1-12; Jn. 20.1-10)

¹ Tsa yahá quivi quitatú nyivi, ña María ñuu Magdala, tan ña María sihi ra Jacobo, tan ña Salomé jatá ñi ndutya tami tyin cuñí ñi cuhun ñi cutyihí ñi can cuñu ñuhu ra Jesús. ² Tacan tan cuahán ñi nu nyaá ñaña ra tsa cunditsin cuii ñi quivi quitsahá vitya. Tan tsaq ñi ican cuhva tsa cua cana cuii ñi ñicanyii. ³ Tan ityi cuahán ñi natuhun tahan ñi tan catyí ñi:

—¿Yóo cua jatsiyo yuu yuhu ñaña can? —catyí ñi.

⁴ Maa tyin cuhva tsa tsaq ñi nyehe ñi tyin tsa catsiyo yuu cahnu tsa ndasí yuhu ñaña can. ⁵ Tan cuhva tsa quihvi ñi tsitsi cava nu nyaá ñaña can, nyehe ñi nyaá iin ángel tsiyo cuaha. Tan caá ra tumaa caá iin ra tyuvaa. Nditsí ra jahma cuitsin cañi. Tan nayuhvi xaan ñi. ⁶ Maa tyin catyí ra tsihin ñi:

—Ña nayuhvi ndo. Tsiçó yu tyin nanducú ndo tsi ra Jesús, ra ñuu Nazaret, ra tsa tsihi nu cruu. Maa tyin nduve ca ra nyii ihya vityin tyin tsa nandoto ra. Nyehe ndo nu tinyij ra naha tsi ra. ⁷ Cuaahan ndo tan jacoto ndo tsi ra Pedro tan tsi inga ca ra tsiçá tsihin ra Jesús. Tan catyí ndo tsihin ra naha tyin tsa cuahán ra Galilea tan cua cuatu ra tsi ra naha ndacan, tumaa catyí maa ra tsihin ra naha tsa ndi cumañi ca cúu ra —catyí ángel can tsihin ñi.

⁸ Tacan tan tsinú xaan ñi cuahán ñi, tyin nihi ñi jahá tsa yuuhvi ñi. Tan ña cañan maa ñi tsa cañan ñi tsihin ndi intuhun maa nyivi tyin yuuhvi xaan ñi.

Nu quituvi ra Jesús nuu ña María quee ñuu Magdala

(Jn. 20.11-18)

⁹ Ra Jesús nandoto ra quivi quitsahá vitya. Tan quituvi ra jihna cuii ca nuu ña María ñuu Magdala. Juvín ña cuví ña tsa tavá ra utsa tatyí ña vaha. ¹⁰ Tsañan ña tsijacotó ña tsi ra tsiçá tsihin ra, tyin yucú ra naha tsihin tucuiihya iñi tan tsacú ra naha. ¹¹ Maa tyin cuhva tsa tsiñi ra naha tyin nyito ra Jesús tan nyehe ña tsi ra, ña tsinu iñi ra naha.

Nu quituvi ra Jesús nuu uvi ra tsiçá tsihin ra

(Lc. 24.13-35)

¹² Tsa yahá yacan, tan quituvi ra Jesús nuu uvi ra tsa cuahán ityi cuhu naha ra. Maa tyin siin cuhva caá ra nyehe ra naha. ¹³ Tan tsinuhú ra naha tsijacotó ra naha tsi tandihí ca ra naha. Maa tyin juvin ñi ña tsinu iñi ra naha tsa cañan ra can naha ra.

Nu tsañá ra Jesús tyiñu tsi ra tsa tsiçá tsihin ra

(Mt. 28.16-20; Lc. 24.36-49; Jn. 20.19-23)

¹⁴ Yaha yacan tan quituvi ra Jesús nuu tandihí tsa utsi iin ra tsa tsiçá tsihin ra, tsitsi tsa nyecú ra naha nu mesa. Tan cuxağan ra tsi ra naha tsa cuenda tsa ña tsinú iñi ra naha, tan tsa cuenda tucu tsa ndava añima ra naha tan ña tsinu iñi ra naha tsa cañan nyivi tsa nyehe tsi ra tsa yahá nandoto ra. ¹⁵ Tan catyí ra tsihin ra naha:

—Cuaahan ndo nani cahnu nu ñuhu ñayivi, tan cañan ndo tuhun Nyoo tsihin tandihí nyivi, tan catyí ndo tsihin ñi nácaa jacacú Nyoo tsi ñi. ¹⁶ Tan nyivi tsa cua tsinu iñi tan coondutya ñi, cua cacu ñi. Maa tyin

ñi tsa ña cua tsinu iñi cua ndoo cuatyí ñi siqui ñi tan cua cunaa ñi. ¹⁷ Tan tandihí tsa iyo ihya cua javaha nyiví tsa cua tsinu iñi tsi yu: Tsihin sivi yu cua tava ñi tatyí ña vaha, tan cua cahan ñi inga yuhu tsa ña tuhvá ñi cahan. ¹⁸ Cua tiin ñi coo, tan tatun coho ñi o catsi ñi tsa yihí venenu, ña cua jacuehe can tsi ñi. Cua tyiso ndaha ñi jiñi nyiví cuuhví, tan cua nduvaha nyiví.

*Nu ndaa ra Jesús andiví
(Lc. 24.50-53)*

¹⁹ Tsa ndihí cahan Jutu Mañi yo Jesús tsihin ra naha, tacan tan ndaa ra andiví, tan tsinyaq ra xiin cuaha Nyoo. ²⁰ Tacan tan ra tsicq tsihin ra quitq ra naha tan tsahan ra naha tandihí ñi ityi tsicahan ra naha tuhun Nyoo nácaa jacacú ra tsi yo. Juvín ñi maa Jutu Mañi yo jatyinyeé tsi ra naha tyin tsaha ra tsa javaha ra naha cuaha tsa iyo. Tan tsihin yacan nyehe nyiví tyin nditsa tsa caahán ra naha.

Tan na cuvi tsi tacan ñi.

Tuhun Nyoo Tsa Tyaá Ra Lucas

Nu quitsahá jacotó ra Lucas tuhun ra Cristo tsi ra Teófilo

¹ Cuaha ñi nyivi nducú ñi cuhva tyaá ñi nuu tutu tandihí tsa cuví nu yucú ndi ihya. Tyaá ñi cuhva ² nacatyí tuhun nyivi tsihin yo, ñi tsa nyehe tan cahán tuhun ra Jesús nda quivi jihna ñi. ³ Tan yuhu tucu tsa yaha cahví yu tan nducú tuhun vaha yu tandihí tsa cuví nda nu quitsahá. Yacan cuenda cuñí yu tyaá yu tuhun ihya tsa cuenda un, yooho Teófilo, nda nu quitsahá tan nda nu ndihí. ⁴ Tyin tacan tan coto un tyin nditsa tsa jacuahá nyivi tsi un.

Nu jacotó iin ángel tsi ra Zacarías ama cua cacu ra Juan, ra cua jacoondutya tsi nyivi

⁵ Quivi tsa cuví ra Herodes rey tanií cahnu cuenda Judea, tsicoq iin ra cuví jutu, nañi ra Zacarías. Tan yihí ra cuenda ra cuví jutu naha ra tsa nañi Abías. Tan ñasihí ra nañi ña Elisabet. Tata ra Aarón, ra cuví jutu tahan tsanaha, cuví ña. ⁶ Tan nduve maa cuatyí ñi nuu Nyoo. Tyin vaha xaan tyaá yahvi ñi tuhun caahán Nyoo Jutu yo. Tan yoñi maa cuví tyaá cuatyí tsi ñi. ⁷ Tan nduve maa sehe ñi tsicoq. Tyin ña Elisabet, ña cuví coo sehe ña. Tan tsa tsahnu xaan nduvi taahan ñi.

⁸ Iin quivi taahán tsi tandihí ra jutu tsa cutahan tsihin ra Zacarías, tsa jaha tyiñu ra naha tyiñu Nyoo. ⁹ Tan cuhva iyó maa ra cuví jutu naha ra, tavá ra naha suerte, ndáa ra cua tahan tsi quihvi tsitsi vehe ñuhu Jutu Nyoo, tyin cahmí ra tsi. Quivi can tahan tsi tsi ra Zacarías. ¹⁰ Tan cuaha nyivi yucú ityi tsata vehe ñuhu tsicán tahvi ñi tsi Nyoo, tsitsi tsa tsahmí ra cutu can. ¹¹ Tan tsitsi tsa ndi nyii ra ican tan quituví iin ángel Jutu Nyoo nu nyii ra. Tan nyaá nyityí ángel can ityi xiin cuaha nu nyaá altar nu tsahmí ra cutu. ¹² Tan tsa nyehe ra Zacarías tsi ángel ican, iyo xaan cuñi ra. Tan nayuhvi xaan ra. ¹³ Tan ángel ican catyí ra tsihin ra:

—Zacarías, ña nayuhvi un. Tyin Nyoo tsiñi ra tsa cahán un tsihin ra. Tan cua coo iin sehe ña Elisabet ñasihí un. Tan cua cunañi ra Juan. ¹⁴ Sii xaan cua cuñi un. Tan cuaha xaan nyivi cua cusii ndihí iñi quivi cua cacu ra. ¹⁵ Tyin sehe un, cahnu xaan cua cuví ra nuu Nyoo Jutu yo. Ña cua coho ra vinu tan ndi nyixi. Tan ñihi xaan cua quihí Tatyí Ii Nyoo tsi ra tsa ndi cunañi ca cacu ra tan tandihí tyambu tsa cua coo ra. ¹⁶ Tan cuaha xaan nyivi Israel cua cunyicun ñi tsi Jutu yo Nyoo jaha ra. ¹⁷ Juvín ra cua cuhun ityi nuu Jutu Mañi yo. Tan cua coo tunyee iñi Nyoo tsi ra. Tan cua quihí xaan Tatyí Ii Nyoo tsi ra. Tyin cua cuví ra tumaa ra Elías,

ra cuví ndusu yuhu Nyoo tahan tsanaha. Tan cua cuhva cuenda ra nácaa coo vaha nyivi iyó sehe tsihin sehe ñi. Tan cua janaha ra tsi nyivi caquiñi, na tyaá yahvi ñi tuhun caahán Nyoo. Tacan cua janduvaha ra tsi nyivi tan cua cuatu vaha ñi tsi Nyoo —catyí ángel tsihin ra Zacarías.

¹⁸ Tan tsicá tuhun ra Zacarías tsi ángel can, tan catyí ra:

—¿Nacaa tan coto yu tyin nditsa tsa cua coo sehe ñasihí yu? Tyin yuhu tsa tsahnu xaan yu. Tan tacan tucu ñasihí yu —catyí ra.

¹⁹ Tan ángel can nacahan ra tan catyí ra:

—Yuhu Gabriel nañi yu. Tan tsicá yu tyiñu Nyoo. Maa ra tavá tyiñu tsi yu tyin jacoto yu tyiñu ihya tsi un tan jacoto yu tuhun vaha ihya tsi un. ²⁰ Tan vityin cua nduñihí un. Tyin ña tsinú iñi un tsa caahán yu tsihin un. Tan ña cua cuví cahán un nda cuanda tsa yaha cacu sehe ñasihí un. Tan nda quivi cundaa tandihí tsa cahán yu tsihin un —catyí ángel ican tsihin ra.

²¹ Tan nyivi tsa ndatú tsi ra Zacarías ityi tsata vehe ñuhu, iyo xaan cuñi ñi tyin cucuee xaan ra tsitsi vehe ñuhu can. ²² Tan cuhva tsa quitá ra Zacarías, ña cuví maa cahán ra tsihin ñi. Tan tuví iñi ñi tyin iyó tsa nyehe ra tsitsi vehe ñuhu can. Tacan tan quitsahá caahán ra tsihin ñi tsihin ndaha ra. Tyin ña cuví cahán ra.

²³ Tan quivi ndihí tyiñu jahá ra Zacarías vehe ñuhu can, tan cuanuhu ra yuvehe ra. ²⁴ Tsa yaha quivi can tan tsicuhun sehe ñasihí ra, ña Elisabet. Tan ña quitá maa ña tsata vehe tsa tandihí tsa uhun yoo. Tan tsicá iñi ña: ²⁵ “Tyehen javahá Jutu Mañi yu tsihin yu, tyin tacan tan ña cahán nyaá ca nyivi tsi yu”, cuñi ña tsicá iñi ña.

Nu jacotó iin ángel tsi ña María tyin cua cacu ra Jesús

²⁶ Tsa quitá iñu yoo tsa ñuhú sehe ña Elisabet, tan jacuhun Nyoo tsi ra ángel Gabriel ñuu Nazaret tsa canyí Galilea. ²⁷ Tyin cahán ra tsihin iin ñaha yoco tsa nañi María. Tan tsa nyaá maa tsa cua tindaha ña tsihin ra nañi José, ra cuví tata ra rey David. ²⁸ Tan quihvi ángel ican nu iyó ña María. Tan catyí ra tsihin ña:

—Nacumi tsi un, María. Ñihí un tumañi iñi nuu Nyoo. Maa ra iyó tsihin un. Tan nasocó xaan ca ra tsi un tan ñavin ca tandihí ca ñaha —catyí ángel ican tsihin ña.

²⁹ Tan tsa tsiñi ña tsa cahán ra, iyo xaan cuñi ña tsa cahán ra. Tan tsicá iñi ña: “¿Nacuenda tacan caahán ra ihya nacumi tsi yo?” tsicá iñi ña.

³⁰ Tan catyí ángel ican:

—Ña nayuhvi un, María, tyin ñihí un tumañi iñi Nyoo. ³¹ Vityin cua cuhun sehe un. Tan cua cunañi ra Jesús. ³² Cahnu xaan ra cua cuví ra. Tan Sehe Nyoo cahnu ca

cuví ra. Tan cua cuví ra rey jaha Nyoo Jutu yo, tumaa cuví ra David, tsii tsaahnu ra. ³³ Tyin cua cundaca ñaha ra tsi nyívi Israel tandihi maa tyembu. Tan ña cua ndíhi maa tsa cundaca ñaha ra —catyí ángel can tshin ña.

³⁴ Tacan tan tsicá tuhun ña María tsi ángel, tan catyí ña:

—¿Nacaa cua cuví can? Tyin yuhu, ñaha ca coo yíi yu.

³⁵ Tan nacahan ángel tan catyí ra:

—Maa Tatyí Ii Nyoo cua quítsi síqui un. Tan tunyee íñi Nyoo, ra nyaá gloria, cua quítsi tan cua casi tsi síqui un tumaa iin vico. Yacan cuenda Ra Ii tsa cua cacu cua cunañi ra Sehe Nyoo. ³⁶ Tacan tucu ña Elisabet ña tsatsin un cua cacu iin sehe ña vasu tsa tsahnu ña. Tan catyí nyívi tyin ñaha can ña cuví coo sehe ña. Maa tyin vityin tsa ñuhú sehe ña. Tsa íñu yoo tsa ñuhú sehe ña. ³⁷ Tyin Nyoo nduve tsa ña cuví jaha ra —catyí ángel tshin ña.

³⁸ Tan catyí ña María:

—Yuhu cuví yu musu Jutu Mañi yo. Na javaha maa ra cuhva catyí un —catyí ña.

Tacan tan cuahán ángel can.

Nu cuahán ña María cuanyehé ña nu nyíi ña Elisabet

³⁹ Tan iin quívi can, numi ñi cuahán ña María iin ñuu tsa canyíi Judea nu maa ñi maa yucu iyó. ⁴⁰ Tan quíhví ña tsitsi vehe ra Zacarías. Tan nacuhva ña nacumi tsi ña Elisabet. ⁴¹ Tan tsa tsiñí ña Elisabet tsa cahán ña María, tan natuñu sehe ña tsitsi ña. Tan ñihi nyaá Tatyí Ii Nyoo tshin ña. ⁴² Tan ñihi xaan nacahan ña, tan catyí ña:

—Nyoo nasocó xaan ra tsi un, María, tan ñavin ca tandihi ca ñiñaha. Tan nasocó ra tsi sehe un. ⁴³ ¿Tan yóo cuví yuhu? Tyin quítsi síhi Jutu Mañi yu quítsi nyehe ña nu nyaá yu. ⁴⁴ Cuhva tsa tsiñí yu tsa cahán un, tan natuñu sehe yu tsitsi yu. Tyin síi xaan cuñí ra. ⁴⁵ Tan síi xaan cuñí tucu maa añima un tyin tsinú íñi un. Tyin cua cuví cuhva tsa cahán Nyoo tshin un —catyí ña Elisabet.

⁴⁶ Tan catyí ña María:

—Jacahnú yu tsi Nyoo tshin tandihi añima yu.

⁴⁷ Tan síi xaan cuñí añima yu tshin Nyoo ra jacacú tsi yu.

⁴⁸ Tyin cuví yuhu iin ñaha ndaahvi tan Nyoo nyehe ndaahvi ra tsi yu.

Tan vityin tandihi quívi cua cahán nyívi tyin cahnu xaan tumañi íñi ñihí yu.

⁴⁹ Tyin Nyoo, cahnu xaan cuví ra. Tan cahnu tsa javahá ra tshin yu.

Tan ii xaan sívi ra.

⁵⁰ Tan ndaahvi cuñí ra tshin tandihi nyívi tsa cua coo tan tyaa yahví ñi tsi ra.

⁵¹ Cahnu xaan tsa javahá ra tshin tunyee íñi tsa iyó tsi ra.

Jatsiyó ra tsi nyívi tsa cahnu xaan tsicá íñi ñi. ⁵² Quinyaa ra tunyee íñi iyó tsi nu cuví rey.

Tan cua janducahnu ra tsi nyívi ndaahvi.

⁵³ Tshahá Nyoo tsa vaha tsi nyívi cuñí coto tsa vaha.

Tan nyívi cuca tsa cuñí tyin nduve tsa tsiñí ñuhu tsi ñi, tshin ndaha ndii ñi, jacuhún ra tsi ñi.

⁵⁴ Jatyinyeé ra tsi nyívi Israel tsa cuví ñi musu ra.

Tan ña naá íñi ra tsi ñi. Nyehe ndaahvi ra tsi ñi.

⁵⁵ Tumaa cuhva catyí Nyoo tshin ra Abraham, tsi tsaahnu yo, tan tshin sehe ra, tacan ñi javahá maa Nyoo —catyí ña María.

⁵⁶ Tan ña María ndog ña tshin ña Elisabet uñi yoo. Tan tsa yahá uñi yoo can tan cuanuñu ña nda yuvehe ña.

Quívi cacú ra Juan, ra tsa jacoondutyá tsi nyívi

⁵⁷ Tsa tsaá quívi tsa cacú sehe ña Elisabet, jacacú ña iin rayíi. ⁵⁸ Tan nyívi vehe ña tshin nyívi tsa iyó yatyin ñi yuvehe ña, síi xaan cuñí ñi. Tacan tucu maa ña. Tyin vaha xaan tsa javahá Nyoo tshin ña. ⁵⁹ Tan tsa quitá una quívi tsa cacú ra, tan tyaa ra naha tuñi Nyoo tsi ra tumaa cuhva iyó maa ñi. Tan cuñí ra naha tsa cunañi ra Zacarías tumaa nañi maa jutu ra. ⁶⁰ Maa tyin síhi ra catyí ña:

—Ña cuví. Tyin Juan cua cunañi ra.

⁶¹ Tan catyí ra naha:

—¿Nacuenda jacunañi un Juan tsi ra? Tan yoñi nyívi ndo nañi tacan —catyí ra naha.

⁶² Tan quítsahá tsicá tuhun ra naha tshin ndaha ra naha tsi jutu ra. Tyin coto ra naha náa sívi cuñí ra tsa cunañi ra. ⁶³ Tan tsican jutu ra iin vitu, tan nuu vitu ican tyaa ra: “Juan cua cunañi ra”, tyaa ra.

Tan tandihi maa ra ican naha ra iyo xaan cuñí ra naha tsa tacan. ⁶⁴ Juvín ñi maa hora can nacahan ra Zacarías. Tan quítsahá jacahnú ra tsi Nyoo. ⁶⁵ Tan tandihi maa nyívi iyó yatyin yuvehe ñi, iyo xaan cuñí ñi cuví. Tan tandihi maa nyívi tsa iyó yucu iyó Judea ican nacatyí tuhun tahan ñi tsa cuví can. ⁶⁶ Tan tandihi maa nyívi tsa tsito can, tsicá íñi ñi, tan tsicá tuhun tahan ñi tsi ñi:

—¿Yóo ra cua cuví ra lee ihya? —catyí ñi.

Tyin nditsa, Nyoo nasocó xaan ra tsi ra.

Nu jacahnú ra Zacarías tsi Nyoo

⁶⁷ Ra Zacarías jutu ra Juan, ñihi nyaá Tatyí Ii Nyoo tshin ra. Tan tshahá cuenda ra tsa caahan Nyoo tshin ra, tan catyí ra:

⁶⁸ —Cahnú xaan ra cuví Jutu yo Nyoo cuenda yo nyívi Israel.

Tyin quítsi ra nu yucú yo, tsa cuví yo nyívi maa ra. Tan jacacú ra tsi yo.

⁶⁹ Tan tshahá ra iin ra tsa cahnu xaan cuví tsi yo, ra cua jacacu tsi yo.

Tata ra David, ra tsa cuvĭ musu Nyoo cuvĭ ra.

⁷⁰ Tacan cua javaha ra, catyĭ Nyoo taħan tsanaha, quĭvĭ caħan ra cuvĭ ndusu yuhu ra, tan catyĭ ra naha tyehen:

⁷¹ Cua jacacu Nyoo tsi yo ndaha nu xaan ĩni tsi yo, tan nuu tandiħi nu tsa ndasi cuñĭ nyehe tsi yo.

⁷² Tan cua cundaahvĭ ĩni ra nyehe ra tsi nyĭvĭ yo tsa tsicoġ taħan tsanaha.

Tan cua nducuhun ĩni ra tsa caħan ra tsihin ĩni taħan tsanaha.

⁷³ Caħan maa Nyoo tsihin ra Abraham, tsii tsaahnu yo,

⁷⁴ tan catyĭ ra tyin cua jacacu ra tsi yo ndaha nu xaan ĩni tsi yo.

Tyin ĩna cua nayuhvĭ ca yo jacahnu yo tsi ra.

⁷⁵ Tan maa ra cua janaha ra cuhva coo yo.

Tan vaha cua coo yo nuu ra tan coo yo maa ĩni tsa cuenda maa ra tandiħi quĭvĭ tsa cua coo yo ĩnayĭvĭ —catyĭ ra Zacarĭas.

⁷⁶ Tan catyĭ ra Zacarĭas tsihin lee can:

—Sehe luhlu yu, yooho cua cuvĭ un ndusu yuhu Nyoo, ra nyaá gloria.

Tyin cahun un ityĭ nuu Jutu Mañi yo. Tan cua caħan un tuhun ra tsihin nyĭvĭ tyin tsa cuñĭ quĭtsi ra.

⁷⁷ Tan cua jacoto un tsi nyĭvĭ tyin cua jaha Nyoo tucahnu ĩni tsi ĩni.

Tacan tan cacu añima ĩni.

⁷⁸ Tyin Jutu yo Nyoo cuñĭ ra tsi yo. Tan cundaahvĭ xaan ĩni ra tsi yo.

Tan cua jaquĭtsi ra ĩin ra jatyinyee tsi yo. Tan cuvĭ ra tumaa ĩnuħy ĩncanyĭ.

⁷⁹ Tyin cua janaha ra ĩnuħy nditsin nu iyó nyĭvĭ nu naa, nu ndatú tuhun tsihi tsi ĩni.

Cua janaha ra ityĭ ra tsi yo, ityĭ vaha —catyĭ ra Zacarĭas.

⁸⁰ Tan ra luhlu can cua cuahnu ca ra. ĩnihi xaan tsicoġ tunyee ĩni tsi ra tsihin Tatyĭ ĩi Nyoo. Tan tsicoġ ra ĩin tsiquĭ ndiĭ nda cuanda quĭvĭ tsa nacotoġ nyĭvĭ Israel tsi ra.

2

Quĭvĭ cacu ra Jesús (Mt. 1.18-25)

¹ Quĭvĭ ican tsicoġ ĩin ra ndacá ĩnaha, ra cuvĭ rey cahnu, nañĭ ra Augusto. Tava tyiñu ra tsi ra nyisó tyiñu naha ra na tyaa ra naha sĭvĭ tandiħi nyĭvĭ taniĭ cahnu ĩnu ĩnayĭvĭ. ² Ilya cuvĭ tsa ĭihna ĩni tsinyaá sĭvĭ nyĭvĭ. Tan ra Cirenio cuvĭ ra ra ndacá ĩnaha tandiħi ĩnu nu cuvĭ Siria. ³ Tan tandiħi nyĭvĭ cuanuhy ĩni ĩnu ĩni, tyin cua ndaca ĩni sĭvĭ ĩni. ⁴ Yacan quee ra José ĩnu Nazaret tsa canyĭ Galilea. Tan cuahán ra ĩnu Belén tsa canyĭ Judea, nu cacu ra rey David, tyin tata ra David cuvĭ ra. ⁵ Cuahán ra cuandacá ra sĭvĭ ra tsihin ĩna María, tan tsa nyaá maa tsa cua tindaha ĩni. Tan ĩnuħú sehe ĩna. ⁶ Tan tsa

ndi yucú ca ĩni ĩnu Belén ican tan quĭtsaha cuuhvĭ tsitsi ĩna tyin tsa cua cacu sehe ĩna. ⁷ Tan ican cacu sehe nuu ĩna. Tan cavá nuu ĩna jahma tsi ra. Tan nacaquĭn ĩna tsi ra tsitsi ĩin canuva nu tsatsĭ quĭti itya. Tyin ĩna ĩni ĩni ĩin vehe coo ĩni.

Cuhva caħan ángel tsihin ra jahá cuenda mbee

⁸ Yatyin ĩni ĩnu Belén can yucú ra jahá cuenda mbee tsa tsacuaa. ⁹ Tan sana ĩni ra naha quĭtuvĭ ĩin ángel Nyoo. Tan jandunditsĭn Jutu yo Nyoo taniĭ cahnu nu yucú ra naha. Tan nayuhvĭ xaan ra naha.

¹⁰ —Ña nayuhvĭ ndo —catyĭ ángel can—. Tyin vatsĭ caħan yu ĩin tsa vaha xaan tsihin ndo. Sii xaan cua cuñĭ tandiħi cuĭi maa nyĭvĭ tsa cuenda tsi. ¹¹ Vityin nda ĩnu ra David cacu ĩin ra cua jacacu tsi nyĭvĭ. Cuvĭ ra Cristo, ra cuvĭ Jutu Mañi yo. ¹² Tan tsihin cuhva iħya cua nacoto ndo tsi ra: cua nañĭhi ndo tsi ra lee ican, cavá nuu ra jahma tan canyĭ ra tsitsi ĩin canuva nu tsatsĭ quĭti —catyĭ ángel can tsihin ra jahá cuenda mbee can.

¹³ Tan juvin ĩni cuhva ican quĭtuvĭ cuaha xaan ángel tsihin ángel can, tan jacahnú xaan ra naha tsi Nyoo, tan catyĭ ra naha:

¹⁴ Cahnu xaan cuvĭ Nyoo, ra nyaá gloria.

Tan nu ĩnuħu ĩnayĭvĭ, na coo tsa vaha añima nyĭvĭ tsa ĩnihi tumañĭ ĩni Nyoo, catyĭ ra ángel naha ra.

¹⁵ Tacan tan tsa cuanuhy ángel ican nda gloria. Tan catyĭ ĩin tan inga ra jahá cuenda mbee can naha ra:

—Cohon ndo Belén. Cunyahe yo náa cuvĭ. Tyin maa Jutu yo Nyoo jacotoġ tsi yo —catyĭ ra naha.

¹⁶ Tacan tan numi xaan cuahán ra naha, tan nañĭhi ra naha tsi ra lee can tsihin ĩna María tan tsihin ra José. Tan canyĭ ra lee can tsitsi ĩin canuva nu tsatsĭ quĭti itya.

¹⁷ Tan cuhva tsa nyeħe ra naha tsi ra, quĭtsaha natuhún ra naha tandiħi tuhun caħan ángel tsihin ra naha tsa cuenda lee ican tsihin ĩni. ¹⁸ Tan tandiħi nyĭvĭ tsa tsiñĭ tuhun caahán ra naha, iyo xaan cuñĭ ĩni. ¹⁹ Maa tyin ĩna María naquĭħin cuenda ĩna tuhun ican tsitsi añima ĩna, tan tandiħi tuhun ican tsicá ĩni ĩna. ²⁰ Tan cuanuhy ra jahá cuenda mbee ican naha ra. Tan jacahnú xaan ra naha tsi Nyoo tsa cuenda tandiħi tsa nyeħe ra naha tan tsa tsiñĭ ra naha. Tyin cundaá cuhva tsa catyĭ ángel ican tsihin ra naha.

Nu tyaa cuenda ĩni tsi ra Jesús ndaha Nyoo tsitsi vehe ĩnuħu cahnu

²¹ Tsa ndu uná quĭvĭ ra Jesús, tan tyaa ĩni tuñĭ Nyoo tsi ra tyin tacan catyĭ tuhun tsahnu maa ĩni. Tan jacunañĭ ĩni Jesús tsi ra. Juvĭn ĩni maa sĭvĭ tsa catyĭ ángel tsihin ĩna María quĭvĭ tsa ndi cumañĭ ca cahun ra Jesús tsitsi ĩna.

²² Tan tsa yaha quivi cuhva catyí ley Nyoo tsa tyaa ra Moisés tsa cuenda tsa nduvaha ña nuu Nyoo tsa cacu sehe ña; tacan tan cuahán ñi tsihin ra lee nda ñuu Jerusalén, tyin tyaa cuenda ñi tsi ra ndaha Nyoo. ²³ Tacan ñi javaha ñi tyin catyí ley Nyoo tyin: “Tandihí sehe nuu ñi tsa cuví rayíi, cua tyaa cuenda ñi tsi ra ndaha Jutu yo Nyoo”, catyí ley ican. ²⁴ Tan tsahan ñi tsijamañi ñi uvi taahan quití, tyin tacan catyí maa ley Jutu yo Nyoo, nu catyí tsi tyehen: “Cuhva ndo uvi taahan curuu a uvi taahan paloma”, catyí ley can.

²⁵ Tan quivi can iyó iin ra ñuu Jerusalén nañi ra Simeón. Iin ra cuiti xaan cuví ra, tan jacahnú ra tsi Nyoo. Ndatú ra nda cacu ra cua jacacu tsi ra tsihin tandihí ca nyívi ñuu Israel ican. Tan nyaá Tatyí Ii Nyoo tsihin ra Simeón. ²⁶ Tan jacoto Tatyí Ii tsi ra tyin ña cúu naha ra tsa ndi cumañi ca nyehe ra tsi ra Cristo, ra cua jaquitsi Jutu yo Nyoo. ²⁷ Tan Tatyí Ii jacuhn ra tsi ra Simeón can nda vehe ñuhu. Tan juvin ñi cuhva can tsaq jutu ra tan sihi ra Jesús tsihin maa ra nu cuví vehe ñuhu cahnu can, tyin javaha ñi cuhva catyí maa ley. ²⁸ Tan cuhva tsa tsaq ñi nu nyaá ra Simeón tan quihín ra Simeón tsi ra Jesús. Tan tyihí jucun ndaha ra tsi ra. Tacan tan quitsaha jacahnú ra tsi Nyoo, tan catyí ra:

²⁹ —Jutu Mañi yu, vityin tsa cundaq cuhva tsa catyí maa un tsihin yu, tsa cuví yu musu un,

cuví jaña ndaha un tsi yu vityin, tan na cúu yu tsihin tsa vaha.

³⁰ Tyin tsa nyehe tsihin nuu yu tsi ra cua jacacu tsi ndi.

³¹ Tsa iyó ra ihya ityi nuu tandihí nyívi.

³² Tan cua cuví ra ñuhq tsa cua jandunditsin añima nyívi tsa ñavin nyívi Israel cuví. Tan cahnu ca cua jaha ra tsi nyívi Israel, tsa cuví ndi nyívi cuenda maa un —catyí ra Simeón.

³³ Tan ra José tsihin sihi ra Jesús, iyo xaan cuñí ñi tsa tsiñi ñi tsa cahan ra Simeón tsa cuenda lee ican. ³⁴ Tacan tan tsicán tahvi ra Simeón tsa cuenda ñi. Tan catyí ra tsihin ña María sihi ra Jesús:

—Nyehe tsi lee ihya. Cuaaha xaan nyívi Israel ñuu Nyoo cua tsinu iñi tsi ra quivi coto ñi tuhun ra, tan cua cacu ñi. Maa tyin cuaaha ñi ña cua tsinu iñi ñi tsi ra. Nyoo tsahaq ra tsi ra tan cuví ra tumaa seña tsa cuenda yo. ³⁵ Tacan tan coto tandihí yo náa tsicá iñi nyívi tun tsinú iñi ñi o ña tsinú iñi ñi tsi ra. Maa tyin tsa cuenda yoocho, María, tsehe cuví tumaa iin mityi xaan tsa cua yaha añima un —catyí ra Simeón tsihin ña.

³⁶ Tan ican, tsitsi vehe ñuhu cahnu can, nyíi tucu iin ñaha tsa cuví ndusu yuhu Nyoo. Nañi ña Ana, tan sehe ra Fanuel, iin ra cuví tata ra Aser, cuví tsi ña. Tan tsa tsahnu

xaan ña. Tan nda luhlu ña tan tindahaq ña, maa tyin utsa cuiya ñi tsicoo ña tsihin yíi ña tan tsihi ra. ³⁷ Tan vityin tsa cumi xico cumi cuiya ña. Tan ña quitá maa ña tsitsi vehe ñuhu cahnu can, tyin nduvi tan ñiñu jacahnú ña tsi Nyoo, tan cuanuhq ñi ña tan iyó nyitya ña. ³⁸ Tan juvin ñi tsa ndi nyíi ca ra José tan ña María tsihin lee ican, tan tsaq ña Ana nu yucú ñi. Tan quitsahaq nacuhvá ña tyahvi nyoo tsi Nyoo. Tan cahan ña tuhun ra Jesús tsihin tandihí nyívi tsa yucú ican, nyívi tsa ndatú tsa cacu ñuu Jerusalén.

Nu cuanuhq ñi nda ñuu Nazaret

³⁹ Tacan tan tsa yaha tsa javaha ñi tandihí maa tsa taahán tsi javaha ñi cuhva catyí ley Jutu yo Nyoo, tan cuanuhq ñi nda ñuu Nazaret tsa canyí Galilea nu cuví ñuu maa ñi. ⁴⁰ Tan ra luhlu Jesús vatsi cuahnu ca ra. Tan cua ndunyeec ca ra, tan tsihin tsa tsiñi tuñi tsi maa ra. Tan Nyoo nasoco xaan ra tsi ra.

Nu cahan ra luhlu Jesús tsihin ra maestro cuenda ley vehe ñuhu naha ra

⁴¹ Ra José tsihin sihi ra Jesús tuhvá ñi tsicá vico pascua nda ñuu Jerusalén ndihí ñi cuiya. ⁴² Tan tsa quitá tsa utsi uvi cuiya ra Jesús, tan tsahan tandihí ñi nda ñuu Jerusalén, cuhva tuhun tsa iyó maa ñi. ⁴³ Tan quivi ndihí vico, tan vatsi nuhu ñi, maa tyin ra luhlu Jesús ndoo ra ñuu Jerusalén can. Tan ña jahaq jutu ra tan sihi ra cuenda. ⁴⁴ Tsicá iñi maa ñi tyin vatsi maa ra tyañu tandihí nyívi ican. Tan ndihí iin quivi tsicá ityi ñi. Tacan tan quitsahaq nanducú ñi tsi ra tyañu nyívi nandocó tsi ñi. ⁴⁵ Maa tyin ña nañihí ñi tsi ra. Tacan tan cuahán ñi nda ñuu Jerusalén inga tsaha cuananducú ñi tsi ra.

⁴⁶ Tan tsa yaha uñi quivi tan nañihí ñi tsi ra tsitsi vehe ñuhu cahnu ican. Nyaá ra tyañu ra cuví maestro cuenda ley vehe ñuhu naha ra. Tyaá soho ra tuhun caahán ra naha. Tan tsicá tuhun ra tsi ra naha. ⁴⁷ Tan tandihí nyívi tsiñi tsa caahán ra, iyo xaan cuñí ñi tsihin tsa tsiñi tuñi tsa iyó tsi ra, tan tsihin tsa nacatyí tuhun ra. ⁴⁸ Cuhva tsa nyehe jutu ra tan sihi ra tsi ra, iyo xaan cuñí ñi, tan sihi ra catyí ña tsihin ra:

—Sehe luhlu yu. ¿Nacuvi tyin javaha un tyehen? Jutu un tan yuhu tuñú xaan cuñí ndi tan nanducú xaan ndi tsi un —catyí ña.

⁴⁹ Tacan tan catyí ra Jesús:

—¿Nacuenda nanducú ndo tsi yu? ¿A ña tsitó ndo tyin ñiñi ca cuñí tsi nyehe yu tyiñu Jutu yu? —catyí ra.

⁵⁰ Maa tyin ña cutuñi iñi ñi tsa caahán ra tsihin ñi.

⁵¹ Tacan tan cuanuhq ra tsihin ñi nda ñuu Nazaret. Tan vaha javahá ra tyin tyaá yahvi ra tsi ñi. Tan sihi ra naquihín vaha ña tandihí tuhun ihya tsitsi añima ña. ⁵² Tan ra Jesús cua cuahnu ca ra tan tsaá ca tsa tsiñi

tuñi jiñi ra. Tan sii xaan cuñi Nyoo tsihin ra, tacan tucu nyivi, sii xaan cuñi ñi tsihin ra.

3

Nu cahan ra Juan, ra jacoondutyā tsi nyivi, tuhun Nyoo nuu tsiqui

(Mt. 3.1-12; Mr. 1.1-8; Jn. 1.19-28)

¹ Tsa quita tsahun cuiya tsa cuví ra Tiberio rey cahnu, tan ra Poncio Pilato ndacá ñaha Judea. Tan ra Herodes ndacá ñaha ra Galilea. Tan yañi ra, ra Felipe ndacá ñaha ra Iturea tsihin Traconite. Tan ra Lisaniás ndacá ñaha ra Abilinia quivi can. ² Tan ra Anás tsihin ra Caifás cuví ra naha jutu tsaahnu tsa cuví ityi nuu. Quivi can cahan Nyoo tsihin ra Juan sehe ra Zacarías iin nu tsiqui. ³ Tan ra Juan tsicá nuu ra tandihi ñuu tsa cayucú yatyin ñi yutya cahnu Jordán, caahán ra tuhun Nyoo tsihin nyivi. Tan catyí ra tsihin ñi tyin na ndu uvi iñi ñi cuatyí ñi tan coondutya ñi. Tacan tan Nyoo cua jaha ra tucahnu iñi cuatyí ñi, catyí ra. ⁴ Tumaa caahán tuhun tsa nyaá nu libru tsa tyaa ra Isaías, ra cuví ndusu yuhu Nyoo tahañ tsanaha. Tan catyí ra:

Cua tyaa soho yo ndusu ra nu caná tsaa ra nu tsiqui tan catyí ra:

“Ñuñá ndo iin ityi cuiti tan natyiso vaha ndo tsi ndo tyin tsa vatsi Jutu Mañi yo.

⁵ Tumaa tsa tahví ndo yucu tan jandutú ndo xahva cunu,

jandoo ndo ityi yacua, tan janduvahá ndo nu quíñi.

⁶ Tacan tan tandihi nyivi cua nyehe ñi tsi ra tsa cua jaquitsi Nyoo tyin jacacu ra tsi yo.”

Tacan tan cahan ra Juan tsihin nyivi.

⁷ Tan tsa cuahán nyivi tsa cuñi ñi jacoondutya ra tsi ñi, tan catyí ra tsihin ñi:

—jNyooho cuví ndo tumaa tata cool! ¿A cuñi ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví. ⁸ Yacan ñasama ndo kuhva iyó ndo, na nyehe yo tyin tsa ndu uvj iñi ndo cuatyí ndo nuu Nyoo. Tan ña nduyaa ndo cahan ndo tyin nyivi tata ra Abraham cuví ndo. Tyin cuanda tsihin yuu ihya, Nyoo cuví jananduvi ra iin nyivi ra Abraham. ⁹ Tsa ndatú yatsa Nyoo tsi tandihi ndo tyin cuví ndo tumaa yutun tsa ña tsahá tsiti vaha, cua tyahnya tun tan cua cayu tun, tacan cua javaha Nyoo tsihin ndo —catyí ra Juan.

¹⁰ Tacan tan nducú tuhun ñi tsi ra tan catyí ñi:

—¿Tan nácaa javaha ndi? —catyí ñi.

¹¹ Tacan tan nacahan ra Juan:

—Ra tsa iyó uvi taahan jahma, taahán tsi kuhva ra intuhun tsi tsi ra tsa nduve jahma. Tan ra tsa iyó tsa catsi, taahán tsi kuhva ra luxu catsi ra tsa nduve tsa catsi —catyí ra.

¹² Tan tsaq tucu ra tsa tavá xuhun cuenda ra ndacá ñaha nda ñuu Roma, tsa cuñi ra naha coondutya ra naha. Tan nducú tuhun ra naha tsi ra Juan:

—Maestro, ¿nácaa javaha tucu nyuhu? —catyí ra naha.

¹³ Tan catyí ra Juan tsihin ra naha:

—Cuhva catyí ley ñi tava ndo xuhun. Tan ña jandaa ca ndo yahvi.

¹⁴ Tacan tan tsicá tuhun tucu andaru naha ra tsi ra:

—Tan nyuhu tucu, ¿nácaa javaha ndi? —catyí ra naha.

Tan nacahan ra Juan tan catyí ra:

—Ña quinyaa ca ndo tsa tsii nyivi. Tan ña jayuhvi ca ndo tsi ñi. Ña tyaa ndo cuatyí tsi ñi tatun nduve cuatyí ñi. Tan ndoqo ndo vaha tsihin yahvi ndo —catyí ra Juan.

¹⁵ Tan quivi can tandihi nyivi ndatú ñi tsi ra Cristo. Tan tsicá iñi ñi tun juven ra Juan cuví Cristo. ¹⁶ Maa tyin ra Juan catyí ra tsihin tandihi ñi:

—Tsa nditsa tyin jacoondutya yu tsi ndo tsihin ndutya. Maa tyin vatsi inga ra tsa cahnu ca cuví, tan iyó ca tunyee iñi Nyoo tsi ra tan ñavin ca yuhu. Yacan cuenda ña taahán tsi tsi yu ndi tsa cuví yu musu ra tan ndatsi yu ñi nditsan ra. Tan ra ican cua jacoondutya ra tsi ndo tsihin Tatyí Ii Nyoo, tan tsihin ñuhú ihñi. ¹⁷ Tan ra ican ndahá ra pala tyin cua jandava ra trigu. Cua natava siin ra trigu vaha tan cua naquihvi vaha tsi jaha ra. Tan cua cahmi ra tsahan tsa quita tsihin trigu can tsihin ñuhú tsa ña cua ndahva maa —catyí ra Juan tsihin ñi.

¹⁸ Tan tacan cahan ra Juan tsihin nyivi can. Tan náa ndihi ca maa kuhva cahan ra tan jacoto ra tsi ñi nácaa tsa cua quitsi Sehe Nyoo. ¹⁹ Tacan tucu ñi nduxaan ra Juan tsi ra Herodes, ra ndacá ñaha Galilea, tsa cuenda tsa naquihñ ra tsi ña Herodías, ñasihi ra Felipe, yañi ra, tsihin tsa cuenda náa ndihi tsa ña vaha javahá ra. ²⁰ Maa tyin ña tyaa yahvi maa ra Herodes tuhun cahan ra Juan. Nu ndihi tuhun tinyi ra tsi ra Juan tsitsi vehe caa.

Nu jacoondutya ra Juan tsi ra Jesucristo
(Mt. 3.13-17; Mr. 1.9-11)

²¹ Tsa ndi cumañi ca cahun ra Juan vehe caa tan jacoondutya ra tsi tandihi nyivi. Tan jacoondutya ndihi ra tsi ra Jesús. Tsa yahá tsicoondutya ra, tsican tahvi ra tsi Nyoo, tacan tan nuña andivi. ²² Tan nuu Tatyí Ii Nyoo siqui ra tumaa iin paloma. Tan cahan iin ndusu ityi siqui andivi, tan catyí tsi tyehen:

—Yooho cuví Sehe yu, tan cuñi xaan yu tsi un. Tan sii xaan cuñi yu nyehé yu tsi un —catyí ndusu ican tsihin ra.

Cuhva quitsi tata ra Jesucristo
(Mt. 1.1-17)

²³ Tan tsa iyó maa tan oco utsi cuiya ra Jesús tan quitsahá jahá tyiñu ra tyiñu Nyoo. Tan tandihi nyivi cuñí maa ñi tyin sehe ra José cuví tsi ra. Tan ra José, sehe ra Elí cuví tsi ra. ²⁴ Tan ra Elí, sehe ra Matat cuví tsi ra. Tan ra Matat, sehe ra Leví cuví tsi ra. Tan ra Leví, sehe ra Melqui cuví tsi ra. Tan ra Melqui, sehe ra Jana cuví tsi ra. Tan ra Jana, sehe ra José cuví tsi ra. ²⁵ Tan ra José, sehe ra Matatías cuví tsi ra. Tan ra Amós cuví tsi ra. Tan ra Amós, sehe ra Nahum cuví tsi ra. Tan ra Nahum, sehe ra Esli cuví tsi ra. Tan ra Esli, sehe ra Nagai cuví tsi ra. ²⁶ Tan ra Nagai, sehe ra Maat cuví tsi ra. Tan ra Maat, sehe ra Matatías cuví tsi ra. Tan ra Matatías, sehe ra Semei cuví tsi ra. Tan ra Semei, sehe ra José cuví tsi ra. Tan ra José, sehe ra Judá cuví tsi ra. ²⁷ Tan ra Judá, sehe ra Joana cuví tsi ra. Tan ra Joana, sehe ra Resa cuví tsi ra. Tan ra Resa, sehe ra Zorobabel cuví tsi ra. Tan ra Zorobabel, sehe ra Salatiel cuví tsi ra. Tan ra Salatiel, sehe ra Neri cuví tsi ra. ²⁸ Tan ra Neri, sehe ra Melqui cuví tsi ra. Tan ra Melqui, sehe ra Adi cuví tsi ra. Tan ra Adi, sehe ra Cosam cuví tsi ra. Tan ra Cosam, sehe ra Elmodam cuví tsi ra. Tan ra Elmodam, sehe ra Er cuví tsi ra. ²⁹ Tan ra Er, sehe ra Josué cuví tsi ra. Tan ra Josué, sehe ra Eliezer cuví tsi ra. Tan ra Eliezer, sehe ra Jorim cuví tsi ra. Tan ra Jorim, sehe ra Matat cuví tsi ra. ³⁰ Tan ra Matat, sehe ra Leví cuví tsi ra. Tan ra Leví, sehe ra Simeón cuví tsi ra. Tan ra Simeón, sehe ra Judá cuví tsi ra. Tan ra Judá, sehe ra José cuví tsi ra. Tan ra José, sehe ra Jonán cuví tsi ra. Tan ra Jonán, sehe ra Eliaquim cuví tsi ra. ³¹ Tan ra Eliaquim, sehe ra Melea cuví tsi ra. Tan ra Melea, sehe ra Mainán cuví tsi ra. Tan ra Mainán, sehe ra Matata cuví tsi ra. Tan ra Matata, sehe ra Natán cuví tsi ra. ³² Tan ra Natán, sehe ra David cuví tsi ra. Tan ra David, sehe ra Isaí cuví tsi ra. Tan ra Isaí, sehe ra Obed cuví tsi ra. Tan ra Obed, sehe ra Booz cuví tsi ra. Tan ra Booz, sehe ra Salmón cuví tsi ra. Tan ra Salmón, sehe ra Naasón cuví tsi ra. ³³ Tan ra Naasón, sehe ra Aminadab cuví tsi ra. Tan ra Aminadab, sehe ra Aram cuví tsi ra. Tan ra Aram, sehe ra Esrom cuví tsi ra. Tan ra Esrom, sehe ra Fares cuví tsi ra. Tan ra Fares, sehe ra Judá cuví tsi ra. ³⁴ Tan ra Judá, sehe ra Jacob cuví tsi ra. Tan ra Jacob, sehe ra Isaac cuví tsi ra. Tan ra Isaac, sehe ra Abraham cuví tsi ra. Tan ra Abraham, sehe ra Taré cuví tsi ra. Tan ra Taré, sehe ra Nacor cuví tsi ra. ³⁵ Tan ra Nacor, sehe ra Serug cuví tsi ra. Tan ra Serug, sehe ra Ragau cuví tsi ra. Tan ra Ragau, sehe ra Peleg cuví tsi ra. Tan ra Peleg, sehe ra Heber cuví tsi ra. Tan ra Heber, sehe ra Sala cuví tsi ra. ³⁶ Tan ra Sala, sehe ra Cainán cuví tsi ra. Tan ra Cainán, sehe ra Arfaxad cuví tsi ra. Tan ra

Arfaxad, sehe ra Sem cuví tsi ra. Tan ra Sem, sehe ra Noé cuví tsi ra. Tan ra Noé, sehe ra Lamec cuví tsi ra. ³⁷ Tan ra Lamec, sehe ra Matusalén cuví tsi ra. Tan ra Matusalén, sehe ra Enoc cuví tsi ra. Tan ra Enoc, sehe ra Jared cuví tsi ra. Tan ra Jared, sehe ra Mahalaleel cuví tsi ra. Tan ra Mahalaleel, sehe ra Cainán cuví tsi ra. ³⁸ Tan ra Cainán, sehe ra Enós cuví tsi ra. Tan ra Enós, sehe ra Set cuví tsi ra. Tan ra Set, sehe ra Adán cuví tsi ra. Tan ra Adán, sehe Nyoo cuví tsi ra.

4

Nu nducú cuhva nu ña vaha tsi ra Jesús (Mt. 4.1-11; Mr. 1.12-13)

¹ Tan ñihi nyaá Tatyí Ii Nyoo tsihin ra Jesús tsa yaha tsiicoondutyá ra, quita ra yutya Jordán tan cuanuhu ra. Tan quihñ Tatyí Ii Nyoo tsi ra, tan tsahan ra iin nu cuví nu tsiqui ² nu tsinyí ra uví xico nduvi. Tan ña tsatsí maa ra tandihi quivi ican. Yaha can tan quitsí tsa tsiocó ra. Tan nducú cuhva nu ña vaha tsi ra. ³ Tan catyí nu tsihin ra:

—Tatun juvin Sehe Nyoo cuví tsi un, çahan tsihin yuu ihya, na nanduvi tsi paan catsi un.

⁴ Tan ra Jesús nacahan ra tan catyí ra:

—Tuhun Nyoo tsa nyaá nu tutu, catyí tsi tyin ña maa ñi tsihin tsa catsi nyivi coonyito ñi, tyin coonyito ñi tsihin tandihi tuhun caahan Nyoo —catyí ra Jesús tsihin nu ña vaha.

⁵ Tacan tan quihñ nu ña vaha tsi ra Jesús, cuahán ra iin jiñi yucu sucun. Tan iin yaha ñi janaha nu tandihi tsa cuca nu ndacá ñaha nu ñuu ñayivi ihya tsi ra Jesús. ⁶ Tan catyí nu tsihin ra:

—Cuhva yu tandihi tsa nyehé un tun cuñí un tyin maa Nyoo tsaha tsa cundaca ñaha yu tandihi can, tan ndáa ra cuñí yu cuhva yu can, cuvi tsi ra. ⁷ Tatun yooho tan cuiñi tsiiti un nuu yu ihya tan jacahnu un tsi yu, tandihi can cua cuhva yu tsi un —catyí nu ña vaha tsihin ra.

⁸ Tan nacahan ra Jesús, tan catyí ra:

—Jatsiyo nyaha tsi un nuu yu, cuihna. Tyin nu tutu Nyoo catyí: “Jacahnu tsi intuhun ñi maa Jutu Nyoo. Tan tyiñu intuhun ñi maa ra taahan tsi javaha un.”

⁹ Tacan tan quihñ nu ña vaha tsi ra Jesús inga tsaha. Tan cuahán nu tsihin ra nda ñuu Jerusalén. Tan jandaá nu tsi ra iin nu sucun xaan nda jiñi vehe ñuu cahnu. Tan catyí nu tsihin ra:

—Tatun Sehe Nyoo cuví tsi un, ndava nu nyaá un ihya nda cuanda nu ñuu. ¹⁰ Tyin catyí tsi nu tutu Nyoo tyin: Nyoo cua tava tyiñu ra tsi ángel ra tan jaha cuenda ra naha tsi un.

¹¹ Cua janahndi ra naha tsi un. Tan ña cua nañi tsaha un nu yuu.

¹² Tacan tan nacahan ra Jesús tan catyí ra:
—Tan juven ñi catyí tuhun Nyoo: “Ña nducu cuhva xaan un tsi Nyoo un” —catyí ra Jesús.

¹³ Tan tsa ndihí nducu cuhva nu ña vaha tsi ra Jesús, tacan tan nacoq nuu nu tsi ra.

Nu quitsahaq caahán ra Jesús tuhun Nyoo tsihin nyívi

(Mt. 4.12-17; Mr. 1.14-15)

¹⁴ Tan tsa yahá tsa nducu cuhva nu ña vaha tsi ra Jesús tan cuanuhu ra nda Galilea tsihin tsa tsitú tunyee ñi Tatyí Ii Nyoo tsi ra. Tan tsitó nyívi tuhun ra ñi cahnu Galilea can. ¹⁵ Tan jacuahá ra tsi nyívi nu cuví vehe ñuhu tandihí ñi ñuu. Tan tandihí ñi jacahnu ñi tsi ra.

Tsa tsaq nyico ra Jesús ñuu Nazaret nu tsahnú ra

(Mt. 13.53-58; Mr. 6.1-6)

¹⁶ Tacan tan tsaq nyico ra Jesús ñuu Nazaret nu tsahnú ra. Tan iin quívi quitatú nyívi, quihví ra tsitsi vehe ñuhu, tumaa tsa tuhvá maa ra tsicá. Tan nduvitá ra cua cahvi ra tuhun Nyoo. ¹⁷ Tan tsahá ra naha iin libru tsa tyaq ra Isafas ra cuví ndusu yuhu Nyoo. Tan cuhva tsa nuñá ra, nañihí ra iin nu catyí tsi:

¹⁸ Iyó Tatyí Ii Nyoo tsihin yu, tyin maa Nyoo tava tyíñu tsi yu cahan yu tuhun ra tsihin nyívi ndaahvi.

Tan janduvaha yu tsi nyívi tsa uhvi añima. Tan maa ra tava tyíñu tsi yu tyin jacoto yu tsi nyívi yihí ndaha nu ña vaha, tyin tsa cua quita nuña ñi tan maa ra cua jacacu tsi ñi.

Tan cua jananyehe yu tsi nyívi cuaa.

Tan cua nacoq nuña yu tsi nyívi tsa iyó tundoho.

¹⁹ Tan jacoto yu tsi nyívi tyin tsa quita quívi tsa nyaá Nyoo tumañi ñi tsihin ñi.

²⁰ Tacan tan ndihí cahví ra tan nacasí ra nuu libru can. Tan nacuhvá ra tsi iin ra tsa jatyinyeé tsihin tyíñu vehe ñuhu can. Tan tsinyaáq ra Jesús. Tacan tan tandihí nyívi tsa nyecú ican, ndoq ñi tsa nyehé ñi tsi ra.

²¹ Tacan tan catyí ra tsihin ñi:

—Vityin quívi ihya tsa cundaq cuhva catyí tuhun Nyoo tsa cahví yu tsiñí ndo —catyí ra Jesús tsihin ñi.

²² Tan tandihí nyívi tsa nyecú can, vaha xaan cahán ñi tuhun ra. Tan iyo xaan cuñí ñi tsihin tandihí tsa vaha tsa cahán ra. Tacan tan quitsahaq tsicá tuhun tahan ñi:

—¿A ñavin ra ihya cuví sehe ra José?

²³ Tan nacahan ra Jesús:

—Tsa nditsa tyin tyehen tsicá ñi ndo nyehé ndo tsi yu: “Yooho ra janduvahá tsi nyívi, janduvaha jihna tsi maa un.” Tan cuñí tucu ndo catyí ndo: “Tandihí tsa javahá un ñuu Capernaum tsitó ndi, javaha ndihí tucu can ñuu maa un ihya.”

²⁴ Tan cahán ra Jesús inga tsaha, tan catyí ra:

—Tsa nditsa tyin ndi intuhun ra cuví ndusu yuhu Nyoo, tan ña tsinú ñi nyívi ñuu ra naha tsi ra naha. ²⁵ Tan tsa nditsa tyin cuaha xaan ñi ndaahvi tsa tsiñi yí tsicoq Israel ihya quívi tsa tava Nyoo tyíñu tsi ra Elías, ra cuví ndusu yuhu ra, tan ra ican cuví iin ra Israel ihya tsicá ra cahán ra tuhun Nyoo. Tan quívi can ña cuyn maa savi uñi cuiya sasava. Tan tsicoq tama cahnu xaan. ²⁶ Tan ñavin tsa cuenda ndi intuhun maa ñi Israel ihya tava Nyoo tyíñu tsi ra Elías cuahán ra. Maa tyin tsahan ra jatyinyeé ra tsi iin ñaha ndaahvi tsiñi yí tsa tsicoq ñuu Sarepta tsa canyí Sidón.

²⁷ Tacan tucu quívi tsicá inga ra cuví ndusu yuhu Nyoo cuenda nyívi Israel, ra Eliseo. Cuaha xaan ra cuuhví tsihin cuehe tyaahyú tsicoq Israel ihya, tan ndi intuhun ra naha tan ña nduvahá ra naha. Nduvahá intuhun ñi ra Naamán ra queq ñuu Siria —catyí ra Jesús.

²⁸ Tsa yahá tsiñi ñi tandihí tuhun can, tandihí nyívi tsa yucú tsitsi vehe ñuhu can xaan xaan cuñí ñi cuví. ²⁹ Tan nduvitá ñi. Tan tava ñi tsi ra Jesús nda jiñi yucu sucun nda yuhu ñuu, tsa cuñí ñi janacava ñi tsi ra ican. ³⁰ Maa tyin ra Jesús yahá ra tyañu ñi tan cuahán ra.

Nu quita tatyí ña vaha tsa yihí tsi iin rayíi
(Mr. 1.21-28)

³¹ Tan cuahán ra Jesús ñuu Capernaum tsa canyí Galilea. Tan jacuahá ra tsi nyívi tsitsi vehe ñuhu tandihí sauru, quívi tuhvá nyívi quitatú. ³² Tan iyo xaan cuñí ñi tsihin tsa cahán ra. Tyin ñihi xaan cahán ra tumaa tuhvá ra cumi tyíñu caahán. ³³ Tan iin quívi nyíi ra Jesús vehe ñuhu tan iin ra yihí tatyí ña vaha catyí ra caná tsaa ra jahá tatyí ña vaha can:

³⁴ —Yooho Jesús, ra ñuu Nazaret, jaña tsi ndi. ¿Náa nducú un tyihí un tsi un tsihin ndi? ¿A vatsí un vatsí janaa un tsi ndi? Yuhu nacotó vaha yu tsi un. Yooho cuví Sehe Ii Nyoo.

³⁵ Tacan tan nduxaán ra Jesús tsi tatyí ña vaha tsa yihí tsi ra can tan catyí ra:

—Taxin ñi coo yooho. Quita tsi ra ihya —catyí ra Jesús tsihin nu.

Tacan tan nyehé ñi nyívi nduva ra can nu ñuhu jahá tatyí ña vaha can, tan nduve ca náa javahá nu tsi ra can. Tan quita nu cuahán nu. ³⁶ Tandihí nyívi tsa nyehé can, iyo xaan cuñí ñi tan yuuhví ñi cuví. Tan quitsahaq tsicá tuhun tahan ñi:

—¿Náa tuhun cuví tsa caahán ra ihya? Tyin nda cuando tsihin tatyí ña vaha tan ñihi caahán ra, tan quita tatyí ña vaha ican —catyí ñi.

³⁷Tacan tan tandihí ñi ityi quita natuhun nyivi tuhun ra Jesús.

Nu janduvahá ra Jesús tsi ña tyiso ra Simón Pedro

(Mt. 8.14-15; Mr. 1.29-31)

³⁸Tacan tan quita ra Jesús tsitsi vehe ñuhu can. Tan cuahán ra vehe ra Simón. Tan nu tsaá ra can, canyí ña tyiso ra Simón cuuhví ña tan ñihi xaan yihí cahñi tsi ña. Tacan tan caahán ndaahvi ñi tsihin ra na janduvaha ra tsi ña. ³⁹Tacan tan natuhvá ra nu canyí ña tan nacañi nuu ra jiñi ra tan cahan ra tsihin cahñi can na quita tsi. Tacan tan quita cahñi can iin yaha ñi, tan nduvita ña can, quitsaha nanducú ña tsa catsi ra Jesús.

Nu cuaha xaan nyivi cuuhví janduvahá ra Jesús

(Mt. 8.16-17; Mr. 1.32-34)

⁴⁰Tan tsa tyiso ñicanyii, tandihí nyivi tsa iyó ñi cuuhví vehe ñi tsihin siin siin nuu cuehe, quitsi ndaca ñi tsi ñi can tsi ra Jesús. Tan tyiso ndaha ra jiñi intuhun intuhun ñi cuuhví can tan janduvahá ra tsi ñi. ⁴¹Tan cuaha xaan nyivi quita tatyí ña vaha tan caná tsaá nahnu, tan catyí nahnu:

—Yooho cuví Sehe Nyoo.

Maa tyin ra Jesús nduxaán ra tsi nahnu tan ña tsaá ra tsa cahan nahnu, tyin tsitó nahnu tyin juvin ra cuví Cristo.

Nu tsicá ra Jesús cahan ra tuhun Nyoo tandihí nuu cayucú Galilea

(Mr. 1.35-39)

⁴²Tsa tuvi inga quivi, tan quee ra Jesús ñuu can. Tan cuahán ra iin nu taxin caá. Tan nyivi nanducú ñi tsi ra. Tan tsaá ñi nda nu nyii ra ican. Tan cuñi ñi tsa ña cuhun ca ra.

⁴³Tacan tan catyí ra Jesús tsihin ñi:

—Ndi cuñi ca tsi jacoto yu tsi nyivi tandihí ca ñuu nácaa tan quihvi Nyoo añima ñi tan cundaca ñaha ra tsi ñi. Tyin yacan cuenda vatsi yu nu ñuhu ñayivi ihya.

⁴⁴Tan tacan ñi tsicá ra Jesús caahán ra tuhun Nyoo vehe ñuhu tandihí ñi ñuu tsa cayucú Galilea.

5

Nu tsaá ra Jesús ndatu tsa cuaha xaan tyaca ñihi ra naha

(Mt 4.18-22; Mr. 1.16-20)

¹Iin quivi nyaá ra Jesús yuhu miñi nu cuví Genesaret. Tan tsaá cuaha xaan nyivi, tyin cuñi ñi tyaa soho ñi tuhun Nyoo. Tan tihin xaan nyii ra Jesús tyañu ñi. ²Tan nyehe ra uvi taahan yutun ndoo yatyin ñi yuhu miñi ican. Yoñi yucú tsitsi yutun ndoo can tyin tsa quita ra tiin tyaca. Tan nacatyá ra naha traya. ³Tacan tan quihvi ra Jesús tsitsi iin yutun ndoo tsa cuví tsi ra Simón. Tan catyí ra Jesús tsihin ra Simón tyin na jacuhun ra can nda mahñu miñi. Tacan tan

tsinyaá ra Jesús tsitsi yutun ndoo can. Tan quitsaha caahán ra tsihin nyivi. ⁴Cuhva tsa ndihí cahan ra tsihin ñi, tan catyí ra tsihin ra Simón:

—Jacuhun yutun ndoo nda nu cunu ca. Tan jacuhun traya tyin tacan tan tiin ndo tyaca.

⁵Tan nacahan ra Simón tan catyí ra:

—Maestro, tsa jahá tyiñu xaan ndi ñiñu maa tan ndi intuhun maa tyaca ña ñihi ndi. Maa tyin tatun maa un catyí, cua jacuhun nyico ndi traya.

⁶Cuhva tsa jacuhun nyico ra naha traya ra, tan cuaha xaan tyaca ñihi ra naha. Ndihi maa traya can quitsaha tyaañyá tsihin tsa vee tyaca can. ⁷Tacan tan jandahá ra naha tsi ra tsa yucú inga yutun ndoo tyin quitsi ra naha cutahan ra naha tsihin ra naha. Tacan tan tsaá ra can naha ra. Tan jacutu ra naha nduvi taahan yutun ndoo can tsihin tyaca. Tan cuñi nyee yutun ndoo ra naha tsihin tsa tsitú tyaca. ⁸Tsa nyehe ra Simón Pedro tsa cuví tacan, tan tsicuiñi tsiti ra nuu ra Jesús, tan catyí ra tsihin ra:

—Jatsiyo tsi un nuu yu, Jutu Mañi yu, tyin yuhu ra iyó cuatyí cuví yu —catyí ra Simón.

⁹Tyin ra Simón tsihin tandihí ra yucú tsihin ra, nayuhvi xaan ra naha tsa cuenda tsa cuaha xaan tyaca ñihi ra naha. ¹⁰Tacan tucu ra cutahan tsihin ra Simón: ra Jacobo tan ra Juan, sehe ra Zebedeo, nayuhvi xaan ra naha. Tan ra Jesús catyí ra tsihin ra Simón:

—Ña nayuhvi un, tyin vityin tan nda nu cuahán ca tsi ityi nuu, tumaa tsa tiin ndo tyaca ihya, tacan ca ñihi un nyivi cua cuví nyivi Nyoo, tan cua tava un tsi ñi nu caquiñi, na quihvi ñi cuenda Nyoo —catyí ra Jesús tsihin ra Simón.

¹¹Tacan tan tava ra naha yutun ndoo can nda nu ñuhu ityi. Tan nacoq ra naha tandihí tsa iyó tsi ra naha. Tan cuahán ra naha tsihin ra Jesús.

Nu janduvahá ra Jesús tsi iin ra ndohó cuehe tyaañyá

(Mt 8.1-4; Mr. 1.40-45)

¹²Iin quivi nyii ra Jesús iin ñuu nu iyó iin ra ndohó cuehe tyaañyá. Tan tsa nyehe ra tsi ra Jesús, tan tsicuiñi tsiti ra nuu ra. Tan nacañi nuu ra jiñi ra nda nu ñuhu. Tan caahán ndaahvi ra tsihin ra Jesús, tan catyí ra:

—Jutu Mañi yu, tun yooho tan cuñi un, cuví janduvaha un tsi yu —catyí ra.

¹³Tacan tan tyiso ndaha ra Jesús jiñi ra cuuhví can, tan catyí ra:

—Cuñi yu janduvaha yu tsi un. Cua nduvaha un vityin —catyí ra Jesús tsihin ra cuuhví can.

Tan iin yaha ñi nduvahá ra. ¹⁴Tacan tan catyí ra Jesús tsihin ra:

—Coto catyi tuhun un tsihin nyivi. Intuhun ñi tsa cua cahan yu tsihin un, cūaahan nu nyaá ra cuví jutu. Tan janaha tsi un tsi ra. Tan cūhva tsa taahán tsi jamañi un tumaa tsa caahán ley tsa tyaá ra Moisés, tan cua cuví tsi iin tsandaa tsi ra jutu can tan tsi nyivi tyin tsa nduvahá un —catyí ra Jesús tsihin ra.

¹⁵ Vasu ndi maa tsa ña cuñi ra Jesús tsa coto nyivi, ñihi ca quitá tuhun ra. Tan cuaha xaan nyivi ndu iin tyin cuñi ñi tyaá soho ñi tsa caahán ra tan janduvaha ra tsi ñi. ¹⁶ Maa tyin ra Jesús, jatsiyó, jatsiyó ñi ra tsi ra nu iyó nyivi. Tan cuahán ra nu taxin caá, cua ndacan tahvi ra tsi Nyoo Jutu ra.

Nu janduvahá ra Jesús tsi iin ra xii
(Mt. 9.1-8; Mr. 2.1-12)

¹⁷ Iin quivi jacuahá ra Jesús tsi nyivi. Tan yucú juhva ra fariseo, ra tyaá yahvi xaan ley Nyoo tsa tyaá ra Moisés tsanaha. Tan yucú tucu juhva ra maestro cuenda ley vehe ñuhu ican. Quitá ra naha ñuu Jerusalén, tan inga ñuu nyihi tanñi cahnu Galilea tan Judea. Tan iyó xaan tunyee iñi Nyoo tsi ra Jesús tsa janduvaha ra tsi nyivi cuuhví. ¹⁸ Tacan tan tsaá ra naha tan nyisó ra naha iin ra cuuhví tsihin cuehe xii nu tsito. Tan cuñi ra naha quihvi ra naha tsitsi vehe tan caquin ra naha tsi ra cuuhví can nu nyii ra Jesús. ¹⁹ Maa tyin ña ñihi ra naha nu quihvi ra naha tyin tuvi xaan nyivi. Tacan tan ndaa ra naha ityi jiñi vehe. Tan jatsiyó ra naha tyiyo. Tacan tan januu ra naha tsi ra cuuhví can nu nyii ra Jesús tyañu nu tuvi nyivi can. ²⁰ Tan nyehe ra Jesús tyin tsinú xaan iñi ra naha tsi ra. Tan catyí ra tsihin ra cuuhví can:

—Tsa tsicoq tucahnu iñi tsi un, tsa cuenda cuatyí un —catyí ra Jesús tsihin ra can.

²¹ Tacan tan ra maestro cuenda ley vehe ñuhu tsihin ra cuví fariseo, quitsahá tsicá iñi ra naha: “¿Yóo ra cuví ra ihya? Tsicoq cuatyí ra nuu Nyoo tsa cuenda tsa caahán ra. Tyin catyí ra tyin tsa tsicoq tucahnu iñi tsi ra can, tan intuhun ñi maa Nyoo cuví jaha tucahnu iñi tsi yo”, cuñi ra naha tsicá iñi ra naha.

²² Maa tyin ra Jesús tsitó ra tsa tsicá iñi ra naha. Tan catyí ra tsihin ra naha:

—¿Nacuenda tsicá iñi ndo tacan? ²³ ¿Náa tsa yii ca catyí yo? ¿A yii catyí yo: “Cuatyí un tsa yahá ndatsi”, a yii ca catyí yo tsihin iin nyivi xii: “Nduvita tan çaca un?” ²⁴ Maa tyin vityin cua janaha yu tsi ndo tyin yuhu Rayii tsa quee nda gloria iyó ndatu tsi yu tsa jahá yu tucahnu iñi tsi ndo —catyí ra Jesús.

Tsa yahá cahán ra tacan, tan catyí ra tsihin ra cuuhví can:

—Nduvita. Naquihin tsito un tan cuanuhu yuvehe un.

²⁵ Tan nduvitá ra can, tan naquihin ra tsito ra. Tan cuanuhu ra yuvehe ra, juvin

ñi jacahnú ra tsi Nyoo. ²⁶ Tandihí nyivi iyo xaan cuñi ñi. Tan yuuhví xaan ñi. Tan jacahnú ñi tsi Nyoo, tan catyí ñi:

—Vityin nditsa nyehé yo tsa iyo xaan —catyí ñi.

Nu cana ra Jesús tsi ra Leví
(Mt. 9.9-13; Mr. 2.13-17)

²⁷ Yahá can tan quitá ra Jesús vehe can. Tan nanyehe ra tsi iin ra tsa tavá xuhun cuenda ra ndacá ñaha iyó nda ñuu Roma. Tan nañi ra Leví. Tan nyaá ra nu tyahví nyivi. Tan catyí ra Jesús tsihin ra:

—Cohon tsihin yu —catyí ra.

²⁸ Tacan tan nduvitá ra Leví. Tan nacoq ra tandihí tsa iyó tsi ra. Tan cuahán ra tsihin ra Jesús.

²⁹ Tacan tan javahá ra Leví iin vico cahnu vehe ra cuenda ra Jesús. Tan cuaha xaan ra tavá xuhun cuenda ra ndacá ñaha nyecú ra naha nu mesa. Tan nyecú tucu inga nyivi. ³⁰ Tan ra fariseo naha ra tsihin ra cuví maestro cuenda ley vehe ñuhu naha ra, quitsahá caahán nyaa ra naha tsi ra tsicá tsihin ra Jesús:

—¿Nacuvi tsatsi ndo tan tsihi ndo tsihin ra tavá xuhun naha ra tan tsihin ra iyó cuatyí naha ra? —catyí ra naha.

³¹ Tan ra Jesús nacahan ra, tan catyí ra:

—Ña tsiñi ñuhu doctor tsi ra tsa vaha maa. Ra cuuhví, cuví ra tsiñi ñuhu doctor. ³² Yuhu ña vatsi yu jatyinyee yu tsi nyivi tsa tsicá iñi tyin vaha ñi, vatsi yu jatyinyee yu tsi nyivi tsitó tyin iyó cuatyí ñi, tan cuví nasama ñi cuhva iyó ñi —catyí ra Jesús tsihin ra naha.

Nu janahá ra Jesús tyin tatun tsa cuahán ra cua coo nyitya nyivi nyicún tsi ra
(Mt. 9.14-15; Mr. 2.18-20)

³³ Tacan tan tsicá tuhun ra naha tsi ra Jesús, tan catyí ra naha:

—Ra tsicá tsihin ra Juan tsicoó nyitya ra naha, tan ña tsatsi ra naha tan nanducú ra naha tsi Nyoo, tan tacan tucu ra cuví fariseo naha ra. Maa tyin ra tsicá tsihin yooho, ndihí quivi tsatsi ra naha tan tsihi ra naha. ¿Nacuvi? —catyí ra naha.

³⁴ Tan nacahan ra Jesús, tan catyí ra:

—¿A cuví coonyitya nyivi yucú vico tindaha jaha ndo tatun nyii ra tsa cua tindaha tsihin ñi? Ña cuví. [Tyin si cuñi ñi, tan cuñi ñi catsi ñi.] ³⁵ Maa tyin cua quita quivi tsa cua jatsiyó ra tindaha ican tsi ra nu yucú ñi. Tacan tan cua coonyitya ñi.

Nu jacuahá ra Jesús tyin ña nacatsi tahan tuhun tsahnu tsa iyó nyivi tsihin tuhun tsaa tsa jacuahá ra

(Mt. 9.16-17; Mr. 2.21-22)

³⁶ Tacan tan cahán tucu ra Jesús iin cuhva tsihin nyivi, tan catyí ra:

—Yofñi tsaahnyá iin jahma tsaa, tan naquicú ñi tsihin jahma tuuhu. Tyin tatun

javaha ñi tacan, nandiyi jahma tsaac can. Tan ña ndoo vaha tsi tsihin jahma tuuhu can.

³⁷ Tan tacan tucu, ña cuví tyihí nyívi vinu tsaac tsitsi ñi tsaahnu. Tyin cua tyahnya ñi can tsihin vinu tsaac can. Tan cua tiví vinu can tan tiví ndíhi tucu ñi tsaahnu can.

³⁸ Yacan cuenda taahán tsi tyihí yo vinu tsaac tsitsi ñi tsaac. Tyin tacan tan nduvi taahan tsi tan cua jaha cuenda tahan tsi tsi.

³⁹ Tan yoñi tsihí vinu tsahnu, tan cuñí ñi coho ñi vinu tsaac. Tyin catyí ñi, vaha ca vinu tsahnu. [Vinu tsahnu can cuñí tsi catyí tyin cuví tsi cuhva iyó maa ñi.]

6

Nu tuhun ra tsicá tsihin ra Jesús yoco itya trigu quivi quitatú nyivi

(Mt. 12.1-8; Mr. 2.23-28)

¹ Iin quivi quitatú nyivi, yahá ra Jesús mahñu tsa tatsi nyivi. Tan ra tsicá tsihin ra tuhún ra naha yoco trigu. Tan jooçon ra naha can tsihin ndaha ra naha. Tan tsatsi ra naha tsiti can. ² Tacan tan catyí ra fariseo naha ra tsihin ra naha:

—¿Nacuenda javahá ndo iin tyiñu tsa ña taahán tsi javaha yo quivi quitatú yo? ³ Tan nacahan ra Jesús, tan catyí ra:

—¿A ñaha ca cahvi ndo nu tsahá cuenda tsi tsa javahá ra David tan ra cutahán tsihin ra quivi tsa tsisocó ra naha? ⁴ Quihví ra tsitsi vehe Nyoo. Tan quihín ra paan tsa tyiso nyivi nuu altar Nyoo. Tan tsatsi ra. Tan tsahá ndíhi ra tsi ra tsa cutahán tsihin ra. Tan maa ñi maa ra cuví jutu naha ra taahán tsi catsi paan can —catyí ra Jesús.

⁵ Tacan tan catyí ra Jesús:

—Rayi tsa quee nda gloria iyó ndatu tsi ra tsa cahan ra tsihin intuhun intuhun ndo náa taahán tsi javaha ndo quivi quitatú yo —catyí ra.

Nu janduvahá ra Jesús tsi iin ra na ityi ndaha

(Mt. 12.9-14; Mr. 3.1-6)

⁶ Inga quivi quitatú nyivi quihví ra Jesús tsitsi vehe ñuhu. Tan quitsahá jacuahá ra tsi nyivi. Tan nyehé ra tsi iin ra tsa na ityi ndaha cuaha. ⁷ Tan ra cuví maestro cuenda ley vehe ñuhu naha ra tsihin ra cuví fariseo naha ra, nducú cuhva ra naha tsi ra Jesús, tatun janduvaha ra tsi ra cuuhví ican quivi quitatú nyivi, tyin tacan tan cuví tyaa ra naha cuatyí tsi ra Jesús. ⁸ Maa tyin ra Jesús tsitó ra tsa tsicá ñi ra naha. Tan catyí ra tsihin ra na ityi ndaha can:

—Nduvita. Cunya nyityi mahñu ra naha ihya.

Tacan tan ra na ityi ndaha can nduvita ra. Tan tsinya nyityi ra mahñu ra naha. ⁹ Tacan tan catyí ra Jesús tsihin ra nyecó ican naha ra:

—Cua nducu tuhun yo iin cuhva tsi ndo. ¿Náa taahán tsi javaha yo quivi quitatú yo? ¿A taahán tsi javaha yo tsa vaha, a tsa ña vaha? ¿A taahán tsi jacacu yo tsi nyivi, o cahñi ndíhi yo tsi ñi?

¹⁰ Tacan tan ra Jesús nyehé ra intuhun intuhun ra naha. Yahá can tan catyí ra tsihin ra tsa na ityi ndaha can:

—Cañihi ndaha un.

Tacan tan ra na ityi ndaha ican cañihi ra ndaha ra. Tan nduvahá ndaha ra. ¹¹ Maa tyin ra yucú ican naha ra, cuxaon ra naha. Tan quitsahá tsicá tuhun tahan ra naha tsi ra naha:

—¿Nacaa javaha yo tan cuví casi yo nu caahán ra Jesús ihya? —catyí ra naha.

Nu nacatsi ra Jesús tsa utsi uvi taahan ra cua caca tyiñu ra

(Mt. 10.1-4; Mr. 3.13-19)

¹² Quivi ican ndaa ra Jesús iin yucu. Tan ñiñu maa tsican tahvi ra tsi Nyoo. ¹³ Tan tsa tuvi, caná ra tsi tandíhi ra nyicún tsi ra. Tan nacatsi ra utsi uvi taahan ra naha. Tan jacunañi ra tsi ra naha apóstol, tan cuñí tsi catyí tsi “ra tsa tavá tyiñu Nyoo”. ¹⁴ Tan ihya nyaá sivi tandíhi tsa utsi uvi ra naha: ra Simón, ra tsa jacunañi ra Cristo “Pedro”; tan yañi ra, ra Andrés; tan ra Jacobo; ra Juan; ra Felipe; ra Bartolomé; ¹⁵ ra Mateo; ra Tomás; ra Jacobo, sehe ra Alfeo; tan ra Simón ra nyanaá cuví ra cuenda partido tsa cuñí cuhun cuatyí siqui ñuu Roma tsa ndacá ñaha tsi ñi; ¹⁶ tan ra Judas, yañi ra Jacobo; tan ra Judas Iscariote, ra tsa xicó tsi ra Jesús.

Nu jacuahá ra Jesús tsi nyivi cuaha

(Mt. 4.23-25)

¹⁷ Tacan tan nuu ra Jesús yucu ican tsihin tsa utsi uvi ra naha. Tan ndu iin nyivi tsa nyicún tsi ra tsaha yucu can. Tan tsaá cuaha tucu nyivi quee ñuu Jerusalén tsihin tandíhi ca ñuu cayucú Judea, tsihin tucu nyivi quee ityi yuhu ndutya ñuhu tsa cayucú yatin ñi ñuu Tiro tsihin ñuu Sidón. Tan tsaá ñi tyin tyaa soho ñi tuhun caahán ra Jesús. Tan tandíhi nyivi cuuhví cuñí ñi tsa janduvaha ra tsi ñi. ¹⁸ Tan tandíhi nyivi tsa yihí tatyí ña vaha janduvahá ra tsi ñi. ¹⁹ Tan tandíhi ñi cuñí ñi tsi ra, tyin janduvaha ra tsi ñi tsihin tunyee ñi tsa iyó tsi ra.

Tsehe cahán ra Jesús tsihin nyivi tsa naquihín ndaahvi ra

(Mt. 5.1-12)

²⁰ Tacan tan nanyehé ra Jesús tsi ra tsicá tsihin ra. Tan catyí ra tsihin ra naha:

—Tandíhi nyooho tsa ndaahvi, sii xaan cua cuñi ndo, tyin taahán tsi cundaca ñaha Nyoo tsi ndo.

²¹ Tandíhi nyooho tsa tsisocó vityin, sii xaan cua cuñi ndo. Tyin coo quivi ña cua cusoco ca maa ndo. Tan tandíhi nyooho tsa

tsacú tsa cuihuya cuñí ndo, sii xaan cua cuñi ndo tyin ña cua coo ca ndo tucuihuya iñi. Tan cua vacu naaha xaan ndo tshin tsa sii cuñi ndo.

²² 'Cusiñi iñi ndo, quivi ndasi cuñi nyivi nyehe ñi tsi ndo, quivi tava ñi tsi ndo nu iyó ñi, quivi nduxaan ñi tsi ndo, quivi catyi ñi tyin nyivi ña vaha cuví ndo tyin tsinú iñi ndo tsi maa yu tsa cuví yu Rayi quee nda gloria. ²³ Sii cuñi ndo quivi can tyin tacan tucu javaha nyivi ñi tahān tsanaha. Cuxaan ñi tsi ra cuví ndusu yuhu Nyoo. Ndava ndo tshin tsa sii cuñi ndo. Tyin cahnu xaan ndatu cua ñihi ndo nda gloria.

Tshehe cahān ra Jesús tshin nyivi ña tsinú iñi tsi ra

²⁴ 'Maa tyin ndahvi nyooho, ñi cuca. Tyin vityin sii xaan cuñi ndo tshin tandihí tsa cuca ndo. Maa tyin cua coo quivi maa ñi maa tundoho cua nyehe ndo. Tyin nduve tsa cua ñihi ndo nu nyaá Nyoo.

²⁵ 'Tan ndahvi nyooho tsa cuñi maa ndo tyin nduve tsa cumañi tsi ndo tsa vityin, tyin coo quivi cua cusoco ndo. Nyooho tsa sii cuñi vityin, ndahvi nyooho, tyin coo quivi cua coo ndo tucuihuya iñi. Tan cua vacu xaan ndo. ²⁶ Tan ndahvi nyooho tsa vaha caahān nyivi tuhun ndo. Tyin tacan caa tucu nyivi tsicoq tsanaha, vaha xaan cahān ñi tuhun ra tsa cahān tsa ña nditsa tshin ñi.

Cuñi ndo tsi nyivi xaan iñi tsi ndo
(Mt. 5.38-48; 7.12)

²⁷ 'Tandihí nyooho tsa tsinú tsa caahān yu, catyi yu tshin ndo tyin: Cuñi ndo tsi nyivi xaan iñi tsi ndo. Javaha ndo tsa vaha tshin nyivi tsa ndasi cuñi nyehe tsi ndo. ²⁸ Cahān ndo tsa vaha tshin nyivi tsa caahān ndavaha ñi tsi ndo. Tan ndācan tahvi ndo tsi Nyoo tsa cuenda nyivi caahān nya tsi ndo. ²⁹ Tatun iin ra cañi iin tsiyo nuu ndo, cuhva ndihí ndo inga tsiyo, nacañi ndihí maa ra. Tatun iin ra quinyaá tsaqueta nditsi ndo, cuhva ndihí ndo camiseta ndo. ³⁰ Cuhva ndo náa ndihí tsicán nyivi tsi ndo. Tatun quinyaá ñi náa tsa iyó tsi ndo, ña ndacan ca ndo can tsi ñi. ³¹ Tumaa cuñi ndo tsa javaha nyivi tsa vaha tshin ndo, tacan javaha tucu maa ndo tsa vaha tshin ñi.

³² 'Tatun cuñi ndo tsi maa ñi maa nyivi tsa cuñi tsi ndo, nduve tsa vaha javahá ndo. Tyin tacan icá tucu nyivi quiñi iyó. ³³ Tan tatun tshin nyivi tsa vaha icá tshin ndo, tan icá ndo tsa vaha, tan ña icá ndo tsa vaha tshin inga nyivi, nduve tsa vaha icá ndo cuví can, tyin nyivi caquiñi, tacan icá tucu ñi can. ³⁴ Tatun javahá ndo tumañi iñi tsi iin nyivi, tan nyitá iñi ndo tyin cua javaha tucu ñi can tumañi iñi tsi ndo, nduve tsa vaha icá ndo. Tyin nyivi caquiñi, tacan icá ñi. Tatun náa tumañi iñi javahá ñi tsi nyivi vaha iñi tsi ñi, ndatú ñi tsa nacuhva tucu ñi can

tumañi iñi tsi ñi. ³⁵ Maa tyin nyooho, cuñi ndo tsi nyivi xaan iñi tsi ndo. Tan javaha ndo tsa vaha tshin ñi. Tan cuhva nuu ndo náa nducú ñi. Maa tyin ña cuatu ndo náa tumañi iñi cua nacuhva ñi tsi ndo. Tacan tan cahnu xaan tsa cua ñihi ndo nuu Nyoo tan cua cuvi ndo sehe maa Nyoo, ra nyaá gloria. Tyin Nyoo vaha iñi ra nda cuanda tshin nyivi tsa ña nacuhvá tyahvi nyoo tsi ra, tan tshin nyivi caquiñi. ³⁶ Cú uhvi iñi ndo tsi nyivi, tumaa uhvi cuñi Nyoo Jutu yo nyehé ra tsi yo.

Ña cahan nyaay tsi inga nyivi
(Mr. 7.1-5)

³⁷ 'Ña cahan nyaay ndo tsi nyivi, tacan tan Nyoo ña cua cahan nyaay ra tsi maa ndo. Ña catyi ndo tsa cuhvan ñi anyaya, tacan tan ña cua jacuhun Nyoo tsi ndo anyaya. Jaha ndo tucahnu iñi tsi nyivi. Tan Nyoo cua jaha ra tucahnu iñi tsi maa ndo. ³⁸ Cuhva ndo tsa tsinú ñuhu tsi nyivi. Tacan tan cua cuhva tucu maa Nyoo tsa tsinú ñuhu tsi maa ndo. Cuaha cua cuhva ra tsi ndo. Tyin tumaa cuhva cua cuhva ndo tsi nyivi, tacan cuhva cua cuhva Nyoo tsi ndo —catyi ra Jesús.

³⁹ Tan tsahā ra Jesús cuhva ihya tsi ñi, tan catyi ra:

—Iin ra cuaa ña cuví janaha ra ityi tsi inga ra cuaa. Tyin nduvi taahan ra naha ña nyehé ra naha ityi cuahān ra naha. Tan cuví canacava ra naha tsitsi iin xahva. ⁴⁰ Ndi intuhun ra cutuhvá ña cua cuvi coto ra tsa tsitó ra jacuahá tsi ra. Tyin ndi quitsahā cahvi ra. Cua coto ra nda ndihí cahvi ra.

⁴¹ '¿Nacaa tyin nyehé un tsahan luhlu tsa nyii tinuu yañi un, tan ña jahá un cuenda yutun cahnu tsa nyii tinuu maa un? ⁴² Tatun tinuu maa un nyii iin yutun cahnu, ¿nácaa cua cuvi catyi un tshin ra yañi un: "Ñaha, na tava yu tsahan luhlu tsa nyii tinuu un.?" ¡Yooho tsa jahá tyin vaha xaan un! Tava jihna yutun cahnu tsa nyii tinuu maa un. Tyin tacan tan cuvi nyehe vaha un tsahan luhlu tsa cua tava un tinuu yañi un.

Tshin tsa javahá nyivi tan nacoto yo tsi ñi tatun ñi vaha, a ñi ña vaha cuví ñi
(Mt. 7.17-20; 12.34-35)

⁴³ 'Iin yutun vaha tsahá tun yucu vixi, yucu vaha. Tan iin yutun ña vaha tsahá tun yucu ña vaha. ⁴⁴ Tandihí yutun nacotó yo tsi tun tshin tsiti tun. Tyin tñata, ña cua cuhva tun mangu. Tan ndi intuhun iñu nduuhva ña cua cuhva tun uvas [tsa cuví yucu vixi]. ⁴⁵ Tan tacan tandihí nyivi vaha, vaha caahān ñi, tyin yihí tsa vaha añima ñi. Maa tyin nyivi ña vaha, maa ñi maa tsa ña vaha caahān ñi tyin yihí tsa caquiñi añima ñi. Tyin tshin yuhu yo caahān yo tandihí tsa quitá tsitsi añima yo.

Cua cacu nyivi tsa tyaá yahvi tuhun caahán ra Jesús, tan nyivi ña tyaá yahvi tsa caahán ra, ña cua cacu ñi

(Mt. 7.24-27)

⁴⁶ '¿Nacuenda catyí ndo tsihin yu, "Jutu Mañi yu, Jutu Mañi yu", tan ña javahá ndo tsa caahán yu? ⁴⁷ Vityin cua catyí yu tsihin ndo yóo ndacú nyoooho tsa vatsí ndo tsi maa yu, tan tyaá soho ndo tsa caahán yu, tan javahá ndo cuhva catyí yu. ⁴⁸ Cuví ndo tumaa cuví iin ra tsitó janduvita vehe. Tyin jihna ca tahví cunu xaan ra tan tahañ ra yuu. Tan tyaá ra tyihyo tsaha vehe can tsata yuu can. Tan quivi nduñihí cuñ saví, ndutya can tsatyá xaan tsi tsaha vehe, maa tyin vehe can ña taní maa tsi tyin vaha xaan quitá tyihyo tsaha tsi. ⁴⁹ Maa tyin nyivi tsa tsiñí tsa caahán yu tan ña javahá ñi tsa caahán yu, cuví ñi tumaa iin ra javahá vehe tan ña vaha javahá ra itsi. Tyin nduve tyihyo tsaha tsi javahá ra. Tan quivi tsaá saví, tan cuñihí cuñ saví, tan yahá ndutya cuaha tsaha vehe can. Tan vehe can, iin yaha ñi taní tsi —tacan catyí ra Jesús.

7

Nu janduvahá ra Jesús musu iin ra capitán andarú

(Mt. 8.5-13)

¹ Ndihi cahan ra Jesús tsihin nyivi, tacan tan cuanuhú ra inga tsaha nda ñuu Capernaum. ² Tan ñuu can iyó iin ra capitán. Tan iyó iin musu ra tsa cuñi xaan ra. Tan cuuhví ra can. Tan tsa cuñi cúu ra. ³ Tan tsa tsitó ra capitán can tuhun ra Jesús, tacan tan tava tyiñu ra tsi juhva ra cuví ra tsahnu ñuu Israel naha ra na cahan ra naha tsihin ra Jesús, tyin na quitsi ra janduvaha ra tsi musu ra. ^{4,5} Tacan tan tsaá ra tsahnu ican naha ra nu nyii ra Jesús. Tan quitsahá caahán ndaahvi ra naha tsihin ra tan catyí ra naha:

—Iyó iin ra capitán cuenda ñuu Roma. Tan vaha xaan nyivi cuví ra tsihin yo tsa cuví yo nyivi Israel. Nda cuanda javahá ña ra iin vehe ñuhu yo. Tan taahán tsi tyin jatinyee un tsi ra. Tyin cuuhví xaan musu ra. Tan cuñi ra tyin janduvaha un tsi ra.

⁶ Tacan tan cuahán ra Jesús tsihin ra naha. Maa tyin tsa ndi cumañi ca tsaa ra nda vehe ra capitán can, tan ra capitán can tava tyiñu ra tsi ra vaha iñi tsi ra. Tacan tan tsaá ra naha nu nyii ra Jesús. Tan catyí ra naha tsihin ra Jesús:

—Taa, catyí ra capitán tyin ña jatyañu un tsi un tsa cahun un nda yuvehe ra. Tyin ña cahnú cuví ra tan cahun un vehe ra, catyí ra. ⁷ Yacan ña cana iñi ra quitsi ra nu nyii un. ¿A ña jaha un tumañi iñi tsi ra, tyin ihya cahan un iin tuhun, tan cua nduvaha musu ra, catyí ra? ⁸ Tyin maa ra, capitán cuví ra. Tan ndacá ñaha rey tsi ra. Tan maa ra ndacá

ñaha ra tsi ra cuatyí cutahán tsihin ra. Tatun tava tyiñu ra tsi iin ra cuatyí ican, na cahun ra, cuahán ra. Tatun catyí ra tsihin inga ra, na quitsi ra, vatsi ra. Tatun jacuhún ra tsi inga ra, na jaha tyiñu ra, cua jaha tyiñu ra. Tan tacan tucu yooho, tatun catyí un na nduvaha musu ra, tacan tan cua nduvaha ra —catyí ra vaha iñi tsi ra capitán can naha ra tsihin ra Jesús.

⁹ Tsa tsiñi ra Jesús tsa cahan ra can naha ra, tan iyo xaan cuñi ra. Tan nanyehé ra tsi nyivi tsa nyecú tsihin ra, tan catyí ra:

—Nditsa nditsa tyin tsiñú xaan iñi ra capitán can. Ñaha ca nañihi yu tsi ndi intuhun ra Israel tsa tsiñú xaan iñi tumaa ra ican —catyí ra Jesús.

¹⁰ Tacan tan cuanuhú ra vaha iñi tsi ra capitán can naha ra. Tan tsa tsaá ra naha nda yuvehe, tan nyehé ra naha tyin tsa nduvahá musu ra.

Nu janandotó ra Jesús tsi sehe iin ñaha ndaahvi tsiñi yí

¹¹ Tsa yahá yacan tan cuahán ra Jesús iin ñuu tsa nañi Nain. Tan cuahán tucu ra tsicá tsihin ra. Tan cuahán ndihi tucu cuaha xaan nyivi. ¹² Tacan tan cuhva tsa cua tsaa ra yatyin ñuu ican, nyehé ra tyin cuaha xaan nyivi quitá ñi ñuu ican. Tan nyisó ra naha iin ndiyi, cua cutsi ra naha sehe iin ñaha ndaahvi tsa tsiñi yí. Tan intuhun ñi maa ra cuví sehe ña, tan tsiñi ra. ¹³ Tan tsa nyehé ra Jesús tsi ña, tan cundaahví iñi ra nyehé ra tsi ña. Tan catyí ra tsihin ña:

—Ña vacu un.

¹⁴ Tsahan natuhvá ra tan tiñ ra tsatun tsa nyii ndiyi can. Tacan tan ra nyisó tsi ndiyi can naha ra tsicuiñi ra naha. Tan catyí ra Jesús tsihin ndiyi can:

—Nduvita, yooho ra tyuvaa —catyí ra.

¹⁵ Tacan tan nduvitá ndiyi can. Tan nacunyaá ra. Tacan tan quitsahá caahán ra. Tan ra Jesús nacuhvá cuenda ra tsi ra tsi sihi ra. ¹⁶ Tsa nyehé ñi tsa tacan nandotó ra jahá ra Jesús tan yuuhví xaan ñi, tan quitsahá jacahnú ñi tsi Nyoo. Tan catyí ñi:

—Cahnu xaan ra cuví ndusu yuhu Nyoo tsaá nu yucú yo ihya.

Tan catyí tucu ñi:

—Maa Nyoo cuví ra vatsi nu iyó yo, vatsi jatinyee ra tsi yo —catyí ñi.

¹⁷ Tan tandihi maa nyivi tani cahnú Judea, tsitó ñi tsa javahá ra Jesús.

Nu jacuhun ra Juan uvi taahan ra tsa tsicá tsihin ra nu nyii ra Jesús

(Mt. 11.2-19)

¹⁸ Tan ra tsicá tsihin ra Juan naha ra nacatyí tuhun ra naha tsa javahá ra Jesús. Tacan tan caná ra Juan tsi uvi taahan ra naha. ¹⁹ Tan tava tyiñu ra tsi ra naha na cahun ra naha nu nyii ra Jesús, tan ndaca tuhun ra naha tsi ra tatun juvin ra cuví

Cristo, ra tsa cua jaquitsi Nyoo. Tyin tatun ñavin ra Cristo cuví ra, cuatu ra naha tsi inga ra. ²⁰ Tacan tan ra tsa jacuhun ra Juan, cuahán ra naha. Tan tsaq ra naha nu nyii ra Jesús. Tan catyí ra naha:

—Ra Juan, ra jacoondutyá, tava tyiñu ra tsi ndi tyin ndaca tuhun ndi tsi un tatun juvin un cuví Cristo, ra tsa cua jaquitsi Nyoo. Tyin tatun ñavin un, cuatu ndi tsi inga ra —catyí ra naha tsihin ra Jesús.

²¹ Tan tsa ndi yucú ra tsa jacuhun ra Juan naha ra tan cuaha xaan nyivi cuuhví janduvaha ra Jesús. Tan tacan tucu nyivi yihí tatyí ña vaha. Tan cuaha tucu nyivi cuaa nanyehé ñi jahá ra. ²² Tacan tan catyí ra Jesús tsihin ra tsa jacuhun ra Juan naha ra:

—Cuahaan ndo. Tan ñacatyí tuhun ndo tsihin ra Juan tandihi tsa nyehe ndo, tan tandihi tsa tsiñi ndo. Tan çatyí ndo tsihin ra: ra cuaa nanyehé ra, ra coxo nacacá ra, ra ndoho cuehe tyaahyú nduvaha ra, ra soho nacuñi ra, ndiyi nandoto, tan caahán yu tuhun Nyoo tsihin ñi ndaahvi nácaa cacu ñi. Tan çatyí ndo tsihin ra tyin ²³ sii xaan cuñi ñi nyicún tsi yu tun ña ndu uví ñi —catyí ra Jesús tsihin ra naha.

²⁴ Cuahán ra tsa jacuhun ra Juan naha ra, tan quitsaha caahán ra Jesús tuhun ra Juan tsihin nyivi. Tan catyí ra:

—¿Naa nyehe ndo quivi tsañan ndo nuu tsiqui ndi ican? ¿A nyehe ndo iin ndoo tsa janduvá tatyí? ²⁵ ¿A iin ra tsa nditsí jahma vaha nyehe ndo? Ñavin. Tyin tsitó ndo tyin ra nditsí jahma vaha, iyó ra tsihin tsa vaha tan iyó ra vehe ra cuví rey. ²⁶ ¿A ña nyehe ndo tsi iin ra cuví ndusu yuhu Nyoo? Juvín. Cahnu ca cuví ra tan ñavin ca ra ndusu yuhu Nyoo. ²⁷ Juvín ñi tuhun ra Juan cuví tsa nyaá nuu tutu tsa tyaq ra Isaías tahañ tsanaha. Tan caahán Nyoo tuhun ra tyehen:

Yuhu cua jacuhun yu iin ra cua cahan tuhun yu tsa ndi cumañi ca cahun un.

Na natyiso vaha ra ityi nu cua cahun un.

²⁸ Tan catyí yu tsihin ndo tyin tsitsi tsa tandihi ra tsa cacu jahá ñiñaha, yofi ra cuví ndusu yuhu Nyoo tsa cahnu ca tumaa ra Juan, ra jacoondutyá. Maa tyin ra tsa ndacá ñaha Nyoo añaima vasu iin ra luhlu cuii ñi cuví ra, maa tyin cahnu xaan ca cuví ra tan ñavin ca ra Juan.

²⁹ Tandihí nyivi tan ra tavá xuhun naha ra, tsa tsicoondutyá jahá ra Juan, nacoto ñi tyin cuhva javahá Nyoo, cuiti xaan tsi. ³⁰ Maa tyin tandihí ra fariseo tsihin ra maestro cuenda ley vehe ñuhu, ña cuñi ra naha tsa jacoondutyá ra Juan tsi ra naha, tyin ña cuñi ra naha quihin ra naha tsa tsahá Nyoo tsi ra naha —catyí ra Jesús. ³¹ Tan catyí tucu ra:

—¿Naa cua jandu inducu yu tsihin nyooho, nyivi iyó quivi ihya? ¿Yóo caá tumaa

caá ndo? ³² Tumaa ra nyihi cuví nyooho. Tyin ra nyihi jasiquí nuyahvi. Tan caná tsaá tahañ ra naha, tan catyí ra naha: “Tivi ndi tiyoo tan ña tsañi ndo yaa. Tan tsita ndi yaa cuihya, tan ña tsacu ndo”. catyí ra nyihi. [Tan tacan ñi cuví nyooho tyin ndi intuhun cuhva ña taahán ñi ndo.] ³³ Tyin ra Juan, ra jacoondutyá, quitsi ra tan ña tsatsi vaha ra. Tan ña tsihi ra vinu. Tan nyooho catyí ndo tyin tatyí ña vaha yihí tsi ra. ³⁴ Tan quitsi tucu yuhu tan cuví yu Rayii tsa quee nda gloria. [Tan tsatsi yu tan tsihi yu.] Tan nyooho catyí ndo tyin tsatsi xaan yu tan tsihi xaan yu vinu. Tan ña taahán ñi ndo tsa cutahán yu tsihin ra iyó cuatyí naha ra, tan tsihin ra tavá xuhun naha ra. ³⁵ Maa tyin catyí yu tsihin ndo tyin tsa tsiñi tuñi Nyoo tsahá ra tsi nyivi naquihín tuhun caahán yu tan tuhun caahán ra Juan. Tan maa ñi cua janaha tsi ndo tyin vaha tsa tsiñi tuñi Nyoo —catyí ra Jesús.

Nu nyii ra Jesús vehe ra Simón ra cuví fariseo

³⁶ Iin ra fariseo tsa nañi Simón jacoto ra tsi ra Jesús tyin cahun ra cucatsi ra nda yuvehe ra. Tan tsaq ra Jesús vehe ra, tan tsicunyaq ra nu mesa. ³⁷ Tacan tan iin ñaha sii ñi ñuu ican tsito ña tyin nyii ra Jesús ican. Tan tsaq ña tsihin iin yutyi yuu xiñu tsitú tsi ndutya tami. ³⁸ Tan tsinyaq ña yatyin ñi tsaha ra. Tan quitsaha tsacú ña tyin ndu uví ñi ña cuatyí ña. Tan cuñn ndutya nuu ña. Tan tsihin ndutya nuu ña nacatyá ña tsaha ra Jesús. Yaha can tan jana ityi ña tsaha ra tsihin xixi jiñi ña. Tan tyayuhu ña tsaha ra. Tacan tan tyosq ña ndutya tami ican tsata tsaha ra. ³⁹ Tsa nyehe ra fariseo can tsa tacan icá ña, tan tsicá ñi ra: “Tatun nditsa tsa Nyoo jaquitsi tsi ra ihya, cua nacoto ra yóo ñaha tiñ tsaha ra, tyin ñaha ican, ñaha iyó cuatyí cuví ña.”

⁴⁰ Tacan tan ra Jesús catyí ra tsihin ra fariseo ican:

—Yooho Simón, iyó iin tsa cua cahan yu tsihin un —catyí ra tsihin ra.

Tacan tan nacahan ra Simón, tan catyí ra:

—Vaha, çahan tsihin yu, Maestro —catyí ra.

⁴¹ Tan catyí ra Jesús tyehen tsihin ra:

—Uvi taahan rayii nyaá cuenda ra xuhun tsi iin ra tsa tuhvá tsahá nuu xuhun. Tan iin ra ican nyaá cuenda ra uhun cientu denario. Tan inga ra nyaá cuenda ra uvi xico utsi ñi denario. ⁴² Tan nduvi taahan ra, ña cuví tyahvi ra naha. Tan ra tuhvá tsahá nuu xuhun ican, jahá ra tucahun ñi tsi nduvi taahan ra naha. Tan vityin çatyí tsihin yu, yooho Simón, ¿ndaa ra cua cuñi ca tsi ra tsa tsahá nuu xuhun ican? —catyí ra Jesús.

⁴³ Tacan tan nacahan ra Simón, tan catyí ra:

—Ra tsa cuaha ca jahá ra tucahnu iñi tsi —catyí ra.

Tacan tan catyí ra Jesús:

—Nditsa tsa caahan un —catyí ra.

⁴⁴ Tacan tan nanyehé ra Jesús tsi ñaha ican, tan catyí ra tsihin ra Simón:

—¿A nyehé un tsi ñaha ihya? Yuhu quihví yu tsitsi vehe un, tan ña tsaḥa un ndutya tsa ndoo tsaḥa yu tumaa cuhva tsa iyó yo. Tan ñaha ihya nacatya ña tsaḥa yu tsihin ndutya nuu ña. Tan jana ityi ña tsihin ixi jiñi ña. ⁴⁵ Yooho ña tyayuhú un ndaha yu, tumaa cuhva tsa iyó yo, maa tyin maa ña nda cuanda tsa quihví yu ihya tan ña jandihí ña tsa tyayuhú ña tsaḥa yu. ⁴⁶ Tan yooho ña tyihí un acetye jiñi yu, maa tyin ñaha ihya tyihí ña ndutya tamí tsaḥa yu. ⁴⁷ Tan catyí yu tsihin un, yooho Simón, vasu cahnu xaan cuatyí ña, maa tyin jahá yu tucahnu iñi tsi ña. Yacan cuenda cuñi xaan ña tsi yu. Tan nyivi tsa jahá yu tucahnu iñi luxu ñi cuatyí ñi, luxu ñi cuñi ñi tsi yu —catyí ra Jesús.

⁴⁸ Tacan tan catyí ra Jesús tsihin ña can:

—Cuatyí un tsa yahá catsiyó, tyin tsa jahá Nyoo tucahnu iñi tsi un —catyí ra Jesús tsihin ña.

⁴⁹ Tacan tan ra yucú tsihin ra quitsaha tsicá iñi ra naha: “¿Yóo ra cuví ra ihya? tyin jahá ra tucahnu iñi cuatyí nyivi.”

⁵⁰ Tacan tan catyí ra Jesús tsihin ñaha ican:

—Cuaahan vityin, tsa cacú un tyin tsinú iñi un tsi yu. Cuaahan tsihin tsa vaha —catyí ra tsihin ña.

8

Ññaha tsa jatyinyeé tsi ra Jesús

¹ Tsa yahá can, tan cuahán ra Jesús tsicá ra iin iin ñuu nahnu tan iin iin ñuu nyihí. Tan caahan ra tsihin nyivi. Tan jacotó ra tsi ñi tuhun vaha nácaa cuñi Nyoo cundaca ñaha ra tsi ñi. Tan tsa utsi uvi taahan ra tsa tava tyiñu ra, cuahán ra naha tsihin ra. ² Tan cuahán tucu juhva ññaha tsa janduvaha ra: ñi cuhví tan ñi yihí tatyí ña vaha. Tan tsihin ñi cuahán ña María tsa quee ñuu Magdala, tan juvin ña cuví ña yihí utsa tatyí ña vaha tan nduvaha ña. ³ Tan cuahán tucu ña Juana, ñasihi ra Chuza, ra cumí tyiñu cuenda ra Herodes, tan ña Susana tsihin tandihí ca ññaha tsa jatyinyeé tsi ra Jesús tsihin tsa iyó tsi ñi.

Nu caahan ra Jesús tyin tumaa iin ra tatsí tacan cuví ra caahan tuhun Nyoo

(Mt. 13.1-9; Mr. 4.1-9)

⁴ Tan cuaha xaan nyivi quee ñi iin iin ñuu, tyin cua nyehé ñi nu caahan ra Jesús tuhun Nyoo. Tan tuvi xaan ñi nyecú, tan quitsaha caahan ra tsihin ñi tsihin iin cuhva tsaḥa cuenda ra, tan catyí ra:

⁵ —Quitá iin ra vehe ra. Cuahán ra nu iyó tyiñu jahá ra, tyin cua tatsi ra tsiti trigu nu ñuhu ra. Tan cuhva tsa tatsi ra quitá ra tsiti can, tan cucuyo juhva yuhu ityi. Tan tsañi nyivi tsata can. Tan quitsí saa tan tsatsí ti.

⁶ Tan juhva ca tsiti can cucuyo tyañu yuu. Caná tsiti ican. Maa tyin na ityi tsi tyin luxu cuii ñi ñuhu yihí tsaḥa tsi. Tan nduve catsin.

⁷ Tan juhva ca tsiti cucuyo tyañu iñu. Maa tyin quivi caná trigu iin caa ñi tsihin iñu can, iñu can tsañi tsi trigu can. ⁸ Maa tyin juhva ca tsiti cucuyo nu ñuhu vaha. Tan quivi tsañu tsi, vaha xaan tsaḥa tsi tsiti. Tyin tsa iin ñi tsiti ican, cientu tsiti quitá tsihin tsi —catyí ra Jesús.

Tan tsa yahá tsaḥa ra cuhva can, tan quitsaha caná tsa ra tyin na tyaa soho nyivi, tan catyí ra:

—Tatun iyó soho ndo, tyaa soho ndo tuhun caahan yu —catyí ra.

Nu jacotó ra Jesús nacuenta jacuahá ra tsi nyivi tsihin cuhva caahan ra tsihin ñi

(Mt. 13.10-17; Mr. 4.10-12)

⁹ Yahá can tan ra tsicá tsihin ra, nducú tuhun ra naha tsi ra náa cuñi tsi catyí cuhva tsa cahan ra tsihin nyivi. ¹⁰ Tacan tan catyí ra tsihin ra naha:

—Tsi nyooho jacotó Nyoo tuhun xeehe, nácaa ndacá ñaha ra. Maa tyin tandihí ca ñi ican, tsihin cuhva ñi caahan yu tsihin ñi. Tacan tan nyehé ñi tan cuví tsi tumaa tsa ña nditsin nyehé ñi, tan tsiñi ñi maa tyin ña cua cutuñi iñi ñi náa tuhun cuví can.

Nu tsaḥa cuenda ra Jesús cuenda ra tsa tatsí

(Mt. 13.18-23; Mr. 4.13-20)

¹¹ Cuhva tsa tsaḥa yu tsi ñi, cuñi tsi catyí tsi tyehen: tsiti can, tuhun Nyoo cuví tsi.

¹² Tan nu cucoyo tsiti trigu ican yuhu ityi, nyivi tsa tsiñi tuhun Nyoo cuví can. Maa tyin quitsí nu ña vaha tan quinyaa nu tuhun Nyoo tsi ñi tan coto tsinu iñi ñi tan cacu ñi. ¹³ Tan nu cucoyo tsiti can tyañu yuu, juvin ñi nyivi tsa tsiñi tuhun Nyoo cuví can. Siñ xaan naquihñ vaha ñi itsi juhva ñi quivi. Maa tyin ña yihí vaha yoho ñi, juhva ñi quivi tsinu iñi ñi, tan quivi tsa quitsaha nyehé ñi tundoho, tan jandihí ñi tsa tsinu iñi ñi. ¹⁴ Tan nu cucoyo tsiti tyañu iñu, juvin ñi nyivi tsiñi tuhun Nyoo cuví can. Tsiñi ñi tuhun Nyoo maa tyin ña nasama ñi cuhva iyó ñi. Tyin yihí ñi, tyaa ca iñi ñi tuhun tundoho tan ñavin ca tuhun Nyoo. Tan inga ñi, nyiyo ca iñi ñi tsa cuca. Tan inga tucu ñi siñ ca cuñi ñi tsihin tsa siñ caá tsa iyó nu ñuhu ñayivi. Tan cuví ñi tumaa cuví yutun tsa ña tsaḥa tsiti.

¹⁵ Maa tyin nu cucoyo tsiti nu ñuhu vaha, yacan cuví nyivi tsa tsiñi tuhun Nyoo, tan vaha añima ñi tyin tsinu iñi ñi tsihin tanñ añima ñi. Tan vaha tyaa soho ñi tuhun Nyoo,

tan ña naá maa iñi ñi tuhun ra. Tan javahá ñi tandihí tuhun caahán ra.

Nu cahan ra Jesús tyin ña cua tyihi xeehe yo ñuhú tsa jandunditsín Nyoo añima yo coto quinyaa ra itsi

(Mr. 4.21-25)

¹⁶ Ndi intuhun yo ña tyaá yo ñuhú tyuma tan tyihí xeehe yo xuu tsito a inga nu xeehe. Tyaá yo ñuhú tyuma maa tyin tsaquín nyaa yo can iin nu sucun, tacan tan quihví nyívi tsitsi vehe maa tyin nditsin. ¹⁷ Tyin nduve iin tsa nyíi xeehe, tan ña cua quituvi can. Tan ndi intuhun tsa xeehe, tan ña cua quita tsi nu nditsin, tan tsahan nacoto yo. ¹⁸ Yacan cuenda tyaá soho ndo tuhun caahán yu. Tyin tatun tyaá yahvi ndo tuhun caahán yu, cuaha ca cua janaha yu tsi ndo. Maa tyin tatun ña cua tyaá soho ndo, tacan tan cua quinyaa Nyoo nda cuanda tsa luxu ñi tsa cuñi maa ndo tyin cumí ndo.

Nu tsaha cuenda ra Jesús tyin tumaa yañi ra, tan tumaa sihi ra, tacan cuví nyívi tyaá yahvi tuhun Nyoo

(Mt. 12.46-50; Mr. 3.31-35)

¹⁹ Tacan tan tsaá sihi ra Jesús tsihin yañi ra nu nyíi ra. Maa tyin ña cuví tsaá ñi tyin tui xaan nyívi. ²⁰ Tacan tan jacotó nyívi nyecú ican tsi ra Jesús, tan catyí ñi:

—Sihi un tsihin ra yañi un naha ra nyecú ñi tsata vehe. Tan cuñi ñi cahan ñi tsihin un.

²¹ Tacan tan nacahan ra Jesús, tan catyí ra:

—Tandihí maa nyívi tsa tyaá soho tuhun Nyoo tsa caahán yu tan tyaá yahvi ñi itsi, juvin ñi cuví sihi yu, tan juvin ñi cuví yañi yu —catyí ra Jesús.

Nu jacutaxín ra Jesús tatyí ñihi nu miñi

(Mt. 8.23-27; Mr. 4.35-41)

²² Cuví tsi iin quívi quihví ra Jesús tsitsi iin yutun ndoo tsihin ra tsicá tsihin ra. Tan catyí ra tsihin ra naha:

—Cqhon ndo inga tsiyo miñi ihya.

Tacan tan cuahán ra naha tsihin yutun ndoo ican. ²³ Tan tsa ndi cuahán ca ra naha mahñu miñi ican, quixí ra Jesús. Tacan tan sana iñi ra naha tan tsaá tatyí ñihi xaan. Tan quitsahá tyihí tsi ndutya tsitsi yutun ndoo ican. Tan cuñi nyee yutun ndoo can tyin cuaha xaan ndutya quihví. ²⁴ Tacan tan jandotó ra naha tsi ra Jesús. Tan catyí ra naha tsihin ra:

—¡Maestro! ¡Maestro! Tsa cuñi nyee yo tsitsi ndutya —catyí ra naha.

Tacan tan nduvitá ra Jesús. Tan caahán ra tsihin tatyí can tan tsihin ndutya can, na cutaxin tsi. Tan cutaxin tsi. ²⁵ Tacan tan catyí ra tsihin ra tsicá tsihin ra:

—[¿Nacuvi yuuhví ndo?] ¿Numaa cuahán tsa tsinú iñi ndo? —catyí ra tsihin ra naha.

Maa tyin ra ican naha ra, nayuhví xaan ra naha. Tan iyo xaan cuñi ra naha. Tan quitsahá tsicá tuhun tahan ra naha:

—¿Yóo ra cuví ra ihya? Tyin nda cuanda tatyí tan ndutya tan tyaá yahvi tsi tsa caahán ra.

Nu nduvahá iin ra yihí tatyí ña vaha nda Gadara

(Mt. 8.28-34; Mr. 5.1-20)

²⁶ Tacan tan tsaá ra naha nda Gadara tsa canyíi yuhu miñi ityi nuu Galilea tsa canyíi inga tsiyo miñi can. ²⁷ Tan quita ra Jesús tsitsi yutun ndoo ican. Tan ican tsaá iin ra ñuu tsa canyíi Gadara can tsijatahan ra tsi ra. Tan tsanaha xaan yihí tatyí ña vaha tsi ra, tan ña nditsí ca maa ra jahma. Tan ña iyó ra vehe ra. Tsicá nuu ñi maa ra nu ñaña cumí santu. ²⁸⁻²⁹ Tan tuhvá tatyí ña vaha ican jacunú sana nu tsi ra. Tan yacan cuenda tuhvá ñi tsahhí ndaha ra tan tsaha ra tsihin cadena. Maa tyin tatyí ña vaha ican tsahá tunyee iñi tsi ra tsa cahnya ra can. Tan jacunú nu tsi ra. Tan tsindacá nu tsi ra iin nu nduve maa nyívi iyó. Ra ican tsaá ra nu nyíi ra Jesús. Tan cuhva tsa nyehe ra can tsi ra Jesús, tsicuñi tsi tsi ra nuu ra. Tan caná tsaá ra tan catyí ra:

—¿Nacuvi tyihí un tsi un tsihin yuhu, yooho Jesús, Sehe Nyoo nyaá gloria? Tsicán yu tsi un ña janyehe un tundoho tsi yu —catyí ra yihí tatyí ña vaha ican tsihin ra Jesús, tyin ra Jesús tava tyiñu ra tsi nu tsa quita nu tsi ra ndaahvi ican.

³⁰ Tan nducú tuhun ra Jesús tsi tatyí ña vaha ican, tan catyí ra:

—¿Náa nañi un?

Tan tatyí ña vaha ican jacahan nu tsi ra can, tan catyí ra:

—Nyuhu nañi ndi, Legión.

Tacan catyí ra tyin cuaha xaan tatyí ña vaha yihí tsi ra. [Cuenda mil nahnu yihí tsi ra.] ³¹ Tacan tan catyí nahnu tsihin ra Jesús tyin ña jacuhun ra tsi nahnu tsitsi Yavi Cunu nu cua nyehe nahnu tundoho tan ña cuví maa quita nahnu. ³² Tan tsicán nahnu tsi ra Jesús na cuhva ra quihví nahnu tsitsi quini tsa yucú yuhu miñi ican tsatsi ti naha ti. Tacan tan tsahá ra Jesús ndatu tsa quihví nahnu tsitsi quini ican naha ti. ³³ Tan quita nahnu tsi ra ndaahvi can. Tan quihví nahnu tsitsi quini ican naha ti. Tacan tan tsinú quini can naha ti. Tan yatyin ican nyaá iin xahva cunu yuhu miñi ican. Ican cucoyo ti naha ti tsitsi miñi ican. Tan tsihí ti naha ti tsitsi ndutya.

³⁴ Tacan tan ra jahá cuenda tsi quini ican naha ra, nayuhví xaan ra naha. Tan tsinú ra naha cuahán ra naha cua nacatyí tuhun ra naha tsa cuví can tsihin nyívi nda ñuu. Tan tandihí ñi nyívi tsa nyehe ra naha, tan nacatyí tuhun ra naha tsa cuví ican.

³⁵ Tacan tan tsaḥan nyivi tsiyehē ñi náa tsa cuvī, tan tsaā ñi nu nyii ra Jesús. Tan nañihī ñi tsi ra tsa tsa yahā quitā tatyī ña vaha can. Nyaá ra tsaha ra Jesús. Tan tsa ñuhú ra jahma. Tan tsa vaha cuñi jifi ra. Tan nayuhvi xaan ñi cuvī. ³⁶ Tacan tan tandihī ñi tsa nyehe tsa cuvī ican, nacatyí tuhun ñi tsihin tandihī ca nyivi nácaa quitā tatyī ña vaha tsi ra ndaahvi can, tan nduvahā ra. ³⁷⁻³⁹ Tacan tan tandihī nyivi iyó Gadara can quitsahā caahán ñi tsihin ra Jesús na cunuḥu ra ityi nu quee ra. Tyin nayuhvi xaan ñi tsa javahā ra tsihin nu tatyī ña vaha ican. Tacan tan ra tsa quitā nu tatyī ña vaha can nahnu, caḥan ndaahvi ra tsihin ra Jesús, na cuhva ra cuhun ndihī ra tsihin ra. Maa tyin catyí ra Jesús tsihin ra:

—Cuanuhu yuvehe un. Tan cuhva cuenda un tsi nyivi vehe un náa ndihī tsa javahā Nyoo tsihin un —catyí ra.

Tacan tan ra Jesús quihvi ra tsitsi yutun ndoo ican. Tan cuanuhu ra tsihin ra tsicá tsihin ra. Tacan tan ra ndaahvi tsa nduvahā ican, cuanuhu ra nda ñuu ra. Tan ityi cuahán ra nacatyí tuhun ra tsihin tandihī nyivi ñuu ican nácaa janduvahā ra Jesús tsi ra.

Nu nduvahā ña sehe ra Jairo tan ñaha tsa tñin jahma ra Jesús

(Mt. 9.18-26; Mr. 5.21-43)

⁴⁰ Quivi tsa tsaā ra Jesús inga tsaha tsa tsaḥan ra inga tsiyo miñi can, cuaha xaan nyivi ndatú tsi ra. Tan sii xaan cuñi ñi tyin tsaā nyico ra. ⁴¹ Tacan tan tsaā iin ra tsa nañi Jairo, ra cuvī ityi nuu vehe ñuhu, tan tsicuiñi tsi ra nuu ra Jesús. Tan quitsahā caahán ndaahvi ra tsihin ra na cuhun ra vehe ra. ⁴² Tyin iyó iin ñaha sehe ra, tan iyó utsi uvi cuiya ña. Tan tsa cuñi cúu ña jahá cuehe. Tacan tan cuahán ra Jesús vehe ra. Tan cuaha xaan nyivi cuahán tsihin ra, tan tyañu xaan nu cuahán ra tyañu ñi. ⁴³ Tan tsihin nyivi ican cuahán iin ñaha cuuhvi. Tsa iyó utsi uvi cuiya ndohó ña cuehe tsa cuñi niñi ña. Tan tsa ndihī maa xuhun ña janaā ña tsihin doctor tan ña nduvahā ña. ⁴⁴ Maa tyin tsaā ña nu cuahán ra Jesús, ityi tsata ra. Tan tñin ña jahma ra. Tan iin yaha ñi, tan tsicuiñi tsa cuñi niñi ña.

⁴⁵ Tacan tan catyí ra Jesús:

—¿Yóo tñin jahma yu?

Tan tandihī ñi cuahán tsihin ra catyí ñi:

—Yoñi.

Tan ra Pedro tsihin ra cutahan tsihin ra, catyí ra naha tsihin ra Jesús:

—Maestro, cuaha xaan nyivi cuahán tsihin un, tan tyañu xaan nu cuahán un. Tan juvin ñi maa ñi tyandahñi tsi un. Tan nducú tuhun ca un “¿Yóo tñin jahma yu?” —catyí ra naha.

⁴⁶ Maa tyin ra Jesús catyí ra:

—Tsitó maa yu tyin iyó iin nyivi tñin jahma yu, tyin tuvī iñi yu cuahán juhva tunyee iñi tsa iyó tsi yu —catyí ra.

⁴⁷ Tacan tan ñaha can nyehé ña tyin tsa tsitó ra. Tan quitsahā niñi ña tsihin tsa yuuhvi ña. Tan tsicuiñi tsi ña nuu ra. Tan nacatyí tuhun ña tsihin ra nacuenta tñin ña jahma ra, tan nácaa nduvahā ña iin yaha ñi ican. Tan tsiñi tandihī nyivi tsa nacatyí tuhun ña. ⁴⁸ Tacan tan catyí ra Jesús tsihin ña:

—Tsa nduvahā un tyin tsinú iñi un tsi yu. Cuaahan tsihin tsa vaha —catyí ra.

⁴⁹ Ndi caahán ca ra Jesús, tan tsaā ñi iin ra quee vehe ra Jairo, ra cuvī ityi nuu vehe ñuhu. Tan catyí ra tsihin ra Jairo:

—Sehe un tsa yahā tsihi ña. Ña cuhva ca un tsihi tsi ra Maestro ihya —catyí ra.

⁵⁰ Maa tyin tsa tsiñi ra Jesús tsa caḥan ra ican, tan catyí ra tsihin ra Jairo:

—Ña nayuhvi un. Tsinu iñi. Tan ña sehe un cua nduvaha ña —catyí ra.

⁵¹ Tan cuhva tsa tsaā ra Jesús vehe ra Jairo, ña tsaḥā ra quihvi nyivi tsitsi vehe. Maa ñi maa ra Pedro tan ra Jacobo tan ra Juan tan jutu ñaha luhlu can tsihin sihi ña quihvi ñi tsitsi vehe nu canyi ñaha luhlu tsa tsihi can. ⁵² Tan tandihī ñi tsacú xaan ñi tsa cuenda tyin tsihi ña. Maa tyin ra Jesús catyí ra tsihin ñi:

—Ña vaçu ca ndo. Tyin ña tsihi ña. Quixi ña —catyí ra.

⁵³ Maa tyin tsacú naaha ñi tsa caahán ra tacan. Tan ña tsinú iñi ñi, tyin tsitó ñi tyin tsa tsihi ña. ⁵⁴ Tacan tan tñin ra Jesús ndaha ña. Tan tsaā nacahán ra tan catyí ra tsihin ña:

—Nduvita, ñaha luhlu —catyí ra.

⁵⁵ Tacan tan nandoto ña. Tan iin yaha ñi nduvita ña. Tan catyí ra Jesús:

—Cuhva ndo tsa catsi ña.

⁵⁶ Tan jutu ña tsihin sihi ña, iyo xaan cuñi ñi. Maa tyin catyí ra Jesús tsihin ñi tyin yoñi maa tsihin ca caḥan ñi tsa cuvī ican.

9

Nu tava ra Jesús tyiñu tsi tsa utsi uvi taahan ra tsicá tsihin ra tyin cahan ra naha tuhun Nyoo

(Mt. 10.5-15; Mr. 6.7-13)

¹ Canā ra Jesús tsa utsi uvi taahan ra tsicá tsihin ra. Tan tsaḥā ra tunyee iñi cahnu tsi ra naha tyin cuvī tava ra naha tatyí ña vaha tsi nyivi, tan cuvī janduvaha ra naha tsi nyivi cuuhvi.

² Tan tava tyiñu ra tsi ra naha na cahan ra naha nácaa ndacá ñaha Nyoo tsi nyivi. Tan tava tucu ra tyiñu tsi ra naha na janduvaha ra naha tsi nyivi cuuhvi. ³ Tan catyí ra tsihin ra naha:

—Nduve tsa cuisio ndo ityi cuhun ndo, ndi tatun ña cundaha ndo. Ndi marali tan ndi tsa catsi ndo tan ña cundaha ndo. Tan ndi xuhun ña cundaha ndo. Tan iin nditsi ñi jahma ñuhú ndo cuhun tsihin ndo. ⁴ Tan ndáa cuví ñi vehe tsaá ndo, ndoqo ndo ican nda cuanda quita quivi tsa cuhun ndo inga ñuu. ⁵ Tan nu ña cuñí nyivi tyaa soho ñi tsa caahán ndo, quita ndo ñuu ican. Tan naquisi ndo nyaca ñuhu tsaha ndo. Tan yacan janahá tyin ndoó cuatyí ñi siqui ñi —catyí ra Jesús tsihin ra naha.

⁶ Tacan tan cuahán ra naha tandíhi maa ñuu. Tan caahán ra naha tuhun Nyoo tan nácaa cuñí tsi tan cacu ñi. Tan janduvahá ra naha tsi nyivi cuuhví.

Nu cuñí ra Herodes coto ra yóo ra cuví ra tsicá nuu caahán tuhun Nyoo tan janduvahá ra nyivi

(Mt. 14.1-12; Mr. 6. 14-29)

⁷ Ra Herodes, ra cuví ra ndacá ñaha [tanií cahnu Galilea], ñihí tuhun ra tsa javahá ra Jesús. Tan ña ñihí vaha ra cuhva yóo ra cuví ra. Tyin yihí nyivi catyí ñi tyin ra Juan nandotó. ⁸ Tan yihí ñi catyí ñi tyin ra Elías quituví nyico. Tan yihí ñi catyí ñi tyin inga ra cuví ndusu yuhu Nyoo tsanaha nandotó. ⁹ Maa tyin catyí ra Herodes:

—Maa maa yu tyihí tyiñu tsa tyahnya jucun ra Juan. Tun tacan, ¿yóo ra cuví ra tsa caahán xaan nyivi tuhun catyí ñi tsiñí yu tyin cuaha xaan tsa iyo javahá ra? —catyí ra.

Tan ra Herodes can nducú xaan ra cuhva nyehe ra tsi ra.

Nu tsaahá ra Jesús tsa catsi uhun mil rayií
(Mt. 14.13-21; Mr. 6.30-44; Jn 6.1-14)

¹⁰ Tan cuhva tsa tsaá nyico ra tava tyiñu ra Jesús, tan nacatyí tuhun ra naha tsihin ra Jesús tandíhi maa tsa cuví nu tsaahán ra naha. Tacan tan tava siin ra Jesús tsi ra naha tan cuahán ra naha yatyin ñi iin ñuu tsa nañi Betsaida. ¹¹ Maa tyin cuhva tsa ñihí tuhun nyivi tyin cuahán ra Jesús ndacan, tan cuahán ñi nda nu nyii ra. Tan naquihín cuenda ra tsi ñi. Tacan tan quitsahá caahán ra tsihin ñi nácaa ndacá ñaha Nyoo tsi ñi. Tan janduvahá ra tsi nyivi cuuhví.

¹² Tan tsa tseñi cuii ña, tsa utsi uvi taahan ra tsicá tsihin ra Jesús catyí ra naha tsihin ra:

—Cahan tsihin nyivi ihya, na cunuhu ñi na quitatu ñi, na nanducu ñi tsa catsi ñi ñuu tsa canyí yatyin ñi ihya, tyin ihya nduve maa tsa catsi yo iyó —catyí ra naha.

¹³ Tacan tan catyí ra Jesús tsihin ra naha:

—Cuhva nyooho tsa catsi ñi —catyí ra.

Tacan tan catyí ra naha:

—Nduve maa tsa iyó ihya. Uhun taahan ñi paan, tan uvi taahan ñi tyaca iyó. Maa

tyin ña ñihí tsa catsi tandíhi nyivi ihya. Ndi maa cuhun ndi cujata ndi, maa tyin ña cua ñihí tsa catsi ñi tyin cuaha xaan ñi —catyí ra naha.

¹⁴ Tyin vasiqui quitá maa uhun mil rayií yucú ican. Tan siin maa ñiñaha tsihin sehe ñi. Tacan tan ra Jesús catyí ra tsihin ra naha:

—Na cunyecu nyivi tsa uvi xico utsi taahan ñi iin nu cunyecu ñi.

¹⁵ Tacan tan tsicunyecu tandíhi ñi jahá ra naha. ¹⁶ Tan quihín ra Jesús uhun taahan paan ican tsihin uvi taahan tyaca ican. Tan nanyehe ndaa ra ityi andiví, tan nacuhva ra tyahví nyoo tsi Nyoo tsa cuenda can. Tan tsahnya sava ra paan tan tyaca ican. Tan tsaahá ra tsi ra tsicá tsihin ra, na tsatsa ra naha can tsi nyivi. ¹⁷ Tacan tan tandíhi ñi tsatsí ñi, tan ndaha vaha iñi ñi. Yahá can tan ndoq ca tsa ñahñu, tan jacutu ra naha utsi uvi taahan tyaca tsihin tsa ñahñu ican.

Nu catyí ra Pedro tyin ra Jesús cuví ra Cristo, ra jacacú tsi yo

(Mt. 16.13-19; Mr. 8.27-29)

¹⁸ Iin quivi quitaá siin ra Jesús tsihin ra tsicá tsihin ra. Tan tsican tahvi ra tsi Nyoo. Tan nu ndihí tsican tahvi ra, tan tsicá tuhun ra tsi ra tsicá tsihin ra tan catyí ra tsihin ra naha:

—¿Náa catyí nyivi tuhun yu, yóo ra cuví yu, catyí ñi?

¹⁹ Tan nacahan ra tsicá tsihin ra, tan catyí ra naha:

—Yihí ñi catyí ñi tyin ra Juan, ra jacoondutyá tsi nyivi, cuví un. Tan yihí ñi catyí ñi tyin ra Elías cuví un. Tan yihí ñi catyí ñi tyin inga ra cuví ndusu yuhu Nyoo tahañ tsanaha cuví un —catyí ra naha.

²⁰ Tacan tan nducú tuhun ra Jesús tsi ra naha, tan catyí ra:

—Tan nyoooho, ¿yóo ra cuví yuhu, cuñí maa ndo?

Tan nacahan ra Pedro, tan catyí ra:

—Yoooho cuví ra Cristo, ra tsa quee nu nyaá Nyoo.

²¹ Tan catyí ra Jesús tsihin ra naha tyin ña cahan ra naha can tsihin nyivi.

Nu jacoto ra Jesús nácaa cua cahñi nyivi tsi ra

(Mt. 16.20-28; Mr. 8.30—9.1)

²² Tacan tan catyí ra tsihin ra naha inga tsaahá:

—Yuhu Rayií tsa quee nda gloria cuví yu. Tan taahán tsi tyin cuaha xaan tundoho cua nyehe yu. Tan ra cuví mandoñi naha ra, tan ra cuví jutu tsa cuví ityi nuu naha ra, tsihin ra maestro cuenda ley naha ra ña cua tsinu iñi ra naha tsi yu. Tan cua cahñi ra naha tsi yu. Maa tyin tsa tsinu uñi quivi cua nandoto yu —catyí ra Jesús.

²³ Tacan tan catyí ra tsihin ra naha:

—Nyooho tsa cuñí cunyicun tsi yu, cahnya iñi ndo tsa cuñí maa ndo javaha ndo, tacan tan cuvi javaha ndo tsa cuñí Nyoo. Ña ndu uvi iñi ndo tsa yihí ndo cuenda yu vasu tandihí quivi nyehé ndo tundoho. Tyin yacan cuví tumaa cruu tsa taahán tsi cuiiso ndo tatun cua cunyicun ndo tsi yu. ²⁴ Tan nyooho tsa ña cuñí nyehé tundoho tan ña cuñí ndo cuhva ndo ñayivi iyó ndo tsa cuenda yu, cua nyehé ndo tundoho anyaya. Maa tyin nyooho tsa cua cuhva ñayivi iyó ndo tsa cuenda yu, cua cacu ndo. ²⁵ Nduve yahvi nyaá cua ñihi ndo tandihí tsa iyó nu ñuhu ñayivi ihya, tun ña cua cacu añima ndo. ²⁶ Tyin tatun cahan nuu ndo tsa xaan cuñí nyivi nyehé ñi tsi ndo tsacatyí yuhu, tan tsacatyí tuhun caahán yu, cua nducahan tucu nuu maa yu nyehé yu tsi ndo na tsaa quivi quitsi yu inga tsaha. Tyin cua quitsi nyico yuhu Rayii tsa quee nda gloria tshin tsa cahnu cuví yu, tan tsa cahnu cuví Nyoo Jutu yo, tan ángel tsa cuenda ra. ²⁷ Tan tsa nditsa catyí yu tshin ndo tyin yihí ndo tsa nyecú ndo ihya vityin, ña cua cúu ndo nda cuenda yaha nyehé ndo nácaa cuví nu ndacá ñaha Nyoo.

Nu uñi taahan ra tsicá tshin ra Jesús nyehé ra naha ndacá cuví nu ndacá ñaha Nyoo (Mt. 17.1-8; Mr. 9.2-8)

²⁸ Una quivi yahá tsa cahan ra Jesús yacan, tan ndaa ra iin yucu tyin cua ndacan tahvi ra tsi Nyoo. Tan cuahán ra Pedro, ra Jacobo tan ra Juan tshin ra. ²⁹ Tan tsa ndi tsicán tahvi ca ra Jesús, tan nasama cuhva caá nuu ra tan jahma ra. Sií xaan cuitsin tsi tan xiñu tsi. ³⁰ Tacan tan quituvj uvi taahan ra natuhún tshin ra, ra Moisés tan ra Elías. ³¹ Tan nditsin xaan nu yucú ra naha. Tan caahán ra naha cuenda tsa cua nyehé ra Jesús tundoho ñuu Jerusalén tan cua cúu ra. ³² Tan vasu cuñí xaan ra Pedro naha ra cusu ra naha, maa tyin ña quixi maa ra naha tyin nyehé ra naha tsa nditsin cuví nu nyaá ra Jesús tshin ra nyecú tshin ra. ³³ Cuhva tsa cuahán ra tsinyecú tshin ra Jesús, tan catyí ra Pedro:

—Maestro, vaha xaan tsa yucú ndi ihya. Na javaha ndi uñi taahan tyahva, iin tsi maa un, iin tsi ra Moisés, tan iin tsi ra Elías —catyí ra Pedro, maa tyin ña tsitó ra tsa caahán ra.

³⁴ Tan tsa ndi caahán ca ra tan quitsj iin vico siqui ra naha. Tan nayuhvi xaan ra naha tsa quihvi ra naha tsitsi vico ican. ³⁵ Tacan tan tsitsi vico ican tsiñi ra naha iin ndusu tsa catyí:

—Juvín ra ihya cuví Sehe yu, tan cuñí xaan yu tsi ra. Tyaa soho ndo tsa caahán ra —catyí ndusu ican.

³⁶ Tan tsa yahá cahan ndusu ican, tan nanyehé ra naha tyin intuhun ña maa ra

Jesús nyaá ican. Tan yoñi maa tshin cahan ra naha tsa nyehé ra naha.

Nu janduvahá ra Jesús tsi iin ra luhlu tsa yihí tatyí ña vaha

(Mt. 17.14-21; Mr. 9.14-29)

³⁷ Tan tsa inga quivi tsa nuu ra Jesús yucu ican, cuaha xaan nyivi tsijatahan tsi ra. ³⁸ Tacan tan caná tsaa iin ra cuahán tshin nyivi cuaha tsa tsijatahan tsi ra Jesús, tan catyí ra:

—Maestro, jaha tumañi iñi. Cundaahvi iñi tsi sehe yu. Tyin intuhun ñi maa ra cuví sehe yu. ³⁹ Tan tuhvá tatyí ña vaha quihvi tsi ra. Tan tuhvá ra caná tsaa jahá nu. Tan janduvá nu tsi ra ndasava. Tan quitá tiñuu yuhu ra. Quiñi xaan taahán ra jahá nu. Tan ña cuñí maa nu tatyí ña vaha ican jaña nu tsi ra. ⁴⁰ Tsa cahan yu tshin ra tsicá tshin un na tava ra naha tsi nu tatyí ña vaha ican, maa tyin ña cuví tavá ra naha tsi nu —catyí ra.

⁴¹ Tacan tan nacahan ra Jesús tan catyí ra: —Nyooho, nyivi ña tsinú vaha iñi. Tan caquiñi ndo. ¿Najava taahan ca quivi cunyaa yu tshin ndo tan cunyeé iñi yu nyehé yu tsi ndo nda cuenda cutuhva ndo tan tsinu iñi ndo tsi yu?

Tan catyí ra tshin ra ican:

—Ndaca sehe un tsi yu.

⁴² Tan cuhva tsa natuhvá ra luhlu can nu nyaá ra Jesús, tan janduvá nu tatyí ña vaha ican tsi ra ndasava. Maa tyin ra Jesús tavá ra tsi nu tatyí ña vaha ican. Tan janduvahá ra tsi ra. Tacan tan nacuhvá cuenda ra tsi ra tsi jutu ra. ⁴³ Tan tandihí nyivi, iyo xaan cuñí ñi tsa cahnu tsa javahá Nyoo nu yucú ñi.

Tsitsi tsa iyo cuñí nyivi tsa javahá ra Jesús, tan catyí ra tshin ra tsicá tshin ra:

Nu cahan ra Jesús inga tsaha tyin cua cahñi nyivi tsi ra

(Mt. 17.22-23; Mr. 9.30-32)

⁴⁴ —Tyaa soho vaha ndo tuhun caahán yu. Tan ña naa iñi ndo. Tyin Rayii tsa quee nda gloria, cua cuhva cuenda nyivi tsi ra tsi ra xaan iñi tsi ra —catyí ra Jesús.

⁴⁵ Maa tyin ra tsicá tshin ra ña cutuñi iñi ra naha nacuenta cahan ra tacan. Tyin Nyoo ña tsahá ra tsa cutuñi iñi ra naha. Tan yuhvi ra naha nducu tuhun ra naha tsi ra Jesús náa cuví tsa caahán ra.

Nu janahá ra Jesús yóo ra tsa cahnu ca cuví nu ndacá ñaha Nyoo

(Mt. 18.1-5; Mr. 9.33-37)

⁴⁶ Tacan tan ra tsicá tshin ra quitsaha caahán yuhu tahan ra naha, ndaa ra cahnu ca cuví tsitsi tsa utsi uvi taahan ra naha.

⁴⁷ Tan tsitó ra Jesús tsa tsicá iñi ra naha, tan quihñ ra iin ra luhlu. ⁴⁸ Tan catyí ra tshin ra naha:

—Tatun tsihin sivi yu naquihín cuenda ndo tsi iin nyivi tsa ña cahnu jahá ñi tsi ñi tumaa ra luhlu ihya, tsi yuhu naquihín cuenda ndo cuví can. Tan tatun naquihín cuenda ndo tsi yu, tsi maa Nyoo tsa jaquitsi tsi yu, naquihín cuenda ndo. Tyin nu yucú ndo, ra tsa ña cahnu cuví, juvin ra cuví ra cahnu cuví nuu Nyoo —catyí ra Jesús.

Nyivi tsa ña cuxaán tsi yo, juvin ñi ican jatyinyeé tsi yo

(Mr. 9.38-40)

⁴⁹ Tacan tan ra Juan catyí ra tsihin ra Jesús:

—Maestro, nyehé ndi tsi iin ra tavá tatyí ña vaha. Caahán ra sivi un tan tavá ra tatyí ña vaha. Maa tyin ña tsahá ca ndi javaha ra tacan. Tyin ñavin tsihin yo tsicá ra —catyí ra.

⁵⁰ Tacan tan catyí ra Jesús tsihin ra:

—Ña casi ndo tsi ra. Tyin ra ican, ñavin ra xaan iñi tsi yo cuví ra, juvin ra cutahán tsihin yo cuví ra —catyí ra.

Nu cahan ra Jesús tsihin ra Juan tan tsihin ra Jacobo tyin ña vaha tsa tsicá iñi ra naha

⁵¹ Tuví iñi ra Jesús tyin tsa nyaa naa yatyín quivi tsa cunuhu ra gloria. Tan jandu iin ra iñi ra, tan quihín ra ityi tan cuahán ra ñuu Jerusalén. ⁵² Tan tavá tyiñu ra na cuhun ra tsicá tsihin ra ityi nuu ca. Tan cuahán ra naha nda iin ñuu cuenda Samaria, tyin nducú ra naha nu quitatu ra Jesús. ⁵³ Maa tyin nyivi Samaria ican, ña cuñí ñi tsa ndoo ra ndacan, tyin tuví iñi ñi tyin Jerusalén cuahán ra, tan nyivi Samaria ndasi cuñí ñi nyehé ñi tsi nyivi ñuu Jerusalén. ⁵⁴ Tan tsa tsitó ra Jacobo tan ra Juan tsa ña tsahá ñi Samaria ican tsa ndoo ra ican, catyí ra naha tsihin ra Jesús:

—Jutu Mañi ndi, ¿A cuñí un tsa ica yo tumaa ica ra Elías? Cua ndacan yo tsi Nyoo na jaquitsi ra ñuhu andivi tyin cayu ñi Samaria ican tyin ña cuñí ñi tsa ndoo yo ñuu ñi —catyí ra naha.

⁵⁵ Tacan tan nyehé ra Jesús nuu ra naha. Tan cuxaan ra tsi ra naha tan catyí ra:

—Taxin ñi ndo. Ña vaha tsicá iñi ndo tyin ña cutuñí iñi ndo náa tyiñu vatsí yuhu. ⁵⁶ Tyin Rayii tsa quee nda gloria, ña vatsí ra tyin janaa ra tsi nyivi, maa tyin vatsí ra tyin jacacu ra tsi ñi —catyí ra.

Tacan tan cuahán ra naha inga ñuu.

Nyivi tsa cuñí quihvi cuenda ra Jesús

(Mt. 8.19-22)

⁵⁷ Tan tsitsi tsa tsicá ityi ra naha, quitá iin ra, tan catyí ra tsihin ra Jesús:

—Jutu Mañi yu, cuñí yu cunyicun yu tsi un. Tan cuhun yu tsihin un tandihí ñi ityi cuhun un —catyí ra.

⁵⁸ Tacan tan catyí ra Jesús tsihin ra:

—¿A nditsa un? Tyin ñicuii iyó vehe ti. Tan saa iyó taca ti. Maa tyin Rayii tsa quee

nda gloria ndi nu cava jiñi ra tan nduve iyó —catyí ra tsihin ra ican.

⁵⁹ Tacan tan catyí ra Jesús tsihin inga ra:

—Cohon tsihin yu.

Tacan tan nacahan ra ican, tan catyí ra:

—Taa, cūatu nuu tsi yu, na cuhun jihna yu cucutsi yu tsi jutu yu —catyí ra.

⁶⁰ Tacan tan ra Jesús nacahan ra tan catyí ra tsihin ra:

—Ñacoo tsi nyivi ña iyó Nyoo añima na cucutsi tahan maa ñi tsi ñi tsitsi ñuhu tun tsihi ñi. Maa tyin yooho cūaahan cahan un tuhun Nyoo tsihin nyivi na cūhva cuenda ñi tsi ñi tsi Nyoo na cundaca ñaha ra tsi ñi —catyí ra.

⁶¹ Tacan tan catyí inga ra tsihin ra Jesús:

—Cuñí yu cunyicun yu tsi un, tata. Maa tyin cūhva na cuhun jihna yu cucahan yu tsihin nyivi vehe yu —catyí ra.

⁶² Tan ra Jesús catyí ra tsihin ra:

—Tumaa iin ra tahví ñuhu tsihin indiqui, tatun nanyehe tsata ra, ña quita vaha yucun nu jahá tyiñu ra. Tan tacan cuví iin ra nyicún tsi yu, tatun cuñí nyico ra tsa tsa nacoo ra, ña cuví cūhva ra tsi ra cundaca ñaha Nyoo —catyí ra Jesús tsihin ra.

10

Nu tavá ra Jesús tyiñu tsi uñi xico utsi taahan ra cua cahan tuhun Nyoo tsihin nyivi

¹ Tsa yahá can tan nacatsi Jutu Mañi yo Jesús tsi inga uñi xico utsi ca ra naha. Tan jacuhun ra tsi ra naha tandihí ñi ñuu, uvi uvi ra cuahan tsa iin nu cuahán ra nu cua cuhun ra Jesús. ² Tan catyí ra tsihin ra naha:

—Tumaa iin itu cahnu xaan, tacan cuví tyiñu jahá yu. Maa tyin cumañi xaan musu. Yacan cuenda ndacan ndo tsi Nyoo na jaquitsi ca ra musu, tyin jatyinyee ra naha tsi ndo cahan ndo tuhun Nyoo tsihin nyivi. ³ Tan cūaahan ndo tan nyehé ndo tyin cua jacuhun yu tsi ndo tumaa mbee mahñu lobo tsa cuví quiti xaan. Tyin lobo tuhvá ti tsahñí tsi mbee. Tan tacan tucu cua cuñi nyivi cahñi ñi tsi ndo. ⁴ Tan ña cua cuiso ndo ndi marali tan ndi nu yihí xuhun ndo, tan ndi inga pari nditsan ndo ña cuiso ndo. Janumi ndo. Tun taahán ndo nyivi ityi cuahán ndo cūhva ndo nacumi tsi ñi tan ña cucuñi ndo natuhun ndo tsihin ñi. ⁵ Cūhva tsa quihvi ndo tsitsi vehe iin nyivi, cahan ndo tsihin ñi. Tan catyí ndo, na coo tsa vaha añima ñi. ⁶ Tan tacan tucu tatun iyó nyivi vaha iñi vehe ican, cua ndoo tsa vaha can tsihin ñi. Maa tyin tatun yoñi ñi vaha añima, ña cua ndoo tsa vaha tsihin ñi. ⁷ Tan ndoo ndo juvin ñi maa vehe ican. Tatun tsahá ñi tsa catsi ndo, çatsi ndo. Tatun tsahá ñi tsa coho ndo, cōho ndo itsi. Tyin ra jahá tyiñu, iyó ndatu tsi ra tsa catsi ra tsa jahá canaa ra. Iin ñi maa vehe ican cuyucu ndo nda

cuanda tsa tsaá quiví tsa cuhun ndo inga ñuu. ⁸ Tan nu tsaá ndo iin ñuu tan vaha cahan ñi tshin ndo, çatsi ndo tandihí tsa cuhva ñi catsi ndo. ⁹ Tan janduvaha ndo tsi ñi cuuhví ñuu ican. Tan catyí ndo tshin ñi: “Tsa nyanaá yatyn Nyoo, ra cuñí quihví añima ndo cundaca ñaha ra tsi ndo.” ¹⁰ Maa tyin tatun tsaá ndo iin ñuu tan ña cuñí nyiví tyaá soho ñi tsa caahán ndo, quita ndo ityi cahnu. Tan çatyí ndo tshin ñi: ¹¹ “Nda cuanda nyaca ñuhu ñuu ndo tsa iñi tsaha ndi, tan cua naquisi ndi. Tyin cuñí tsi catyí tyin cuatyí ndo ndoo can siqui ndo. Tyin Nyoo nyanaá yatyn ra tshin ndo tan ña tyaá soho ndo tsa caahán ra nácaa cuñí tsi tsa cundaca ñaha ra tsi ndo.” Tacan çatyí ndo tshin ñi —catyí ra Jesús tshin ra tsa uñi xico utsi can naha ra.

¹² Tan catyí tucu ra tshin ra naha:

—Quiví cua tatsi tuñi Nyoo tsi nyiví, yaha ca cuhva cua nyehe nyiví ñuu ican tundoho tan ñavin ca nyiví tsiçoo taħan tsanaha ñuu Sodoma, —catyí ra Jesús.

*Nyiví ña tyaá soho tuhun caahán ra Jesús
cua nyehe ñi tundoho
(Mt. 11.20-24)*

¹³ Tan catyí ra Jesús:

—jNdahví nyoocho, nyiví ñuu Corazin! Tan jndahví nyoocho nyiví ñuu Betsaida! Tyin nyehé ndo tsa iyo javahá yu, tan ña cuñí ndo nasamá ndo cuhva iyó ndo. Maa tyin nyiví ñuu Tiro tan ñuu Sidón nduve tsa nyehe ñi. Maa tyin tun tsatyn nyehé ñi tsa nyehé nyoocho vityin, numi xaan cua cunditsi ñi jahma tucuiihya iñi tan cunyecu ñi nu nyaa: tsa ndu uvi iñi ñi cuatyí ñi cuví can. ¹⁴ Yacan cuenda, nyoocho nyiví ñuu Corazin tshin ñuu Betsaida, ñihi ca cua tatsi tuñi Nyoo tsi ndo tan ñavin ca nyiví ñuu Tiro tan nyiví ñuu Sidón can. ¹⁵ Tan nyoocho nyiví ñuu Capernaum, cuñí maa ndo tyin cundaa ndo nda cuanda andiví. Maa tyin cua nuu ndo nda cuanda nu yucú ndiyí anyaya, tyin ña tyaá yahví ndo tuhun Nyoo —catyí ra Jesús.

¹⁶ Tan catyí ra tshin tsa uñi xico utsi taahan ra can naha ra:

—Nyiví tsa tyaá soho tsa caahán nyoocho, tsa caahán yuhu tyaá soho ñi. Tan nyiví ña tyaá soho tsa caahán nyoocho, tsa caahán yuhu ña tyaá yahví ñi. Tan ñi ña tyaá yahví tsa caahán yuhu, tsa caahán ra tsa jaquitsi tsi yu, ña tyaá yahví ñi —catyí ra Jesús tshin ra naha.

*Nu tsaá nyico tsa uñi xico utsi ra tsa
tsahañ tsicahañ tuhun Nyoo*

¹⁷ Ihya cuví nu tsaá nyico tsa uñi xico utsi ra tsa tsahañ tsicahañ tuhun Nyoo tshin nyiví. Tan sií xaan cuñí ra naha. Tan catyí ra naha tshin ra Jesús:

—Jutu Mañi nyuhu, nda cuanda nu tatyn ña vaha tan tyaá yahví nahnu tsa caħan ndi tshin sivi un —catyí ra naha.

¹⁸ Tacan tan catyí ra Jesús tshin ra naha:

—Tacan tyin yuhu nyehe yu andiví nu canacavañ nu ña vaha, nu nañi Satanás. Tu-maa cañi iin tatsa savi, tacan canacavañ nu. ¹⁹ Tan maa yuhu, tsahañ tunyee iñi tsi ndo tyin cuví cañi tahan ndo tshin nu ña vaha. Tan cuví cuañi ndo tsata coo tan tujuhma, tan nduve tsa cua jaha ti naha ti tsi ndo. ²⁰ Maa tyin ña cusí xaan iñi ndo tyin cuví tava ndo tatyn ña vaha ican. Cusi ca iñi ndo tyin nyaá sivi ndo nu libro Nyoo nda gloria —catyí ra Jesús tshin ra naha.

*Nu jacahnú ra Jesús tsi Nyoo tsa sií cuñí
ra tyin janahá Nyoo tsa vaha tsi nyiví ndaahví
(Mt. 11.25-27; 13.16-17)*

²¹ Tacan tan sií xaan cuñí ra Jesús jahá Tatyí li Nyoo, tan catyí ra:

—Jacahnú yu tsi un, Jutu yu, tyin yooho cuví ra ndacá ñaha andiví tan nu ñuhu ñayiví ihya. Tyin maa un janahá un tuhun maa un tsi nyiví ndaahví ihya. Tan ña janahá un tsi un tsi ra tsitó tan ra nyityi. Tacan cuví tsi Jutu yu tyin tacan cuñí maa un —catyí ra Jesús.

²² Tan catyí ra Jesús tshin tandihí ra naha:

—Tandihí maa tsahañ Jutu yu tsi yu. Yoñi tsitó tsi yu, intuhun ñi maa Jutu yu tsitó tsi yu. Tan yoñi tsitó yoo ra cuví Sehe Nyoo, intuhun ñi maa Jutu ra tsitó tsi ra. Tan yoñi tsitó yoo ra cuví Nyoo Jutu, intuhun ñi Sehe ra tsitó tsi ra. Tan coto tucu nyiví tsa cuñí Sehe Nyoo jacoto ra tsi ñi —catyí ra Jesús.

²³ Tacan tan nanyehe ra nu nyecú ra tsicá tshin ra. Tan caahán xeehe ra tshin ra naha:

—Sií xaan cuñí nyoocho tan nyiví tsa iyó vityin tyin nyehé ndo tsa javahá yu. ²⁴ Tyin cuaha xaan rey tan ra cuví ndusu yuhu Nyoo taħan tsanaha, cuñi ra naha nyehe ra naha tsa nyehé nyoocho vityin. Maa tyin ña nyehe ra naha. Tan cuñi ra naha tyaá soho ra naha tsa tsiñi nyoocho vityin. Maa tyin ña tsiñi ra naha —catyí ra Jesús tshin ra tsa tsicá tshin ra.

*Nu jacuahá ra Jesús tsi yo tyin taahán tsi
jatynyee yo tsi tandihí ñi maa nyiví*

²⁵ Tacan tan tsaá iin ra maestro cuenda ley vee ñuhu. Tan quitsahañ tsicá tuhun ra tsi ra Jesús, tyin nducú cuhva ra tsi ra. Tan catyí ra:

—Maestro, ¿nácaa cua javaha yu tan cuhun yu coo yu ñayiví nyito tsa ña cua naa maa?

²⁶ Tacan tan nacahañ ra Jesús, tan catyí ra tshin ra:

—¿Náa catyí nu ley? ¿Nacaa catyí tsa cahví un?

²⁷ Tacan tan nacahan ra maestro cuando ley ican tan catyí ra:

—Catyí ley tyin cuñi yo tsi Nyoo tsihin taniñ añima yo tan tsihin tandihi cuhva tsicá iñi yo, tan tsihin tandihi tunyee iñi tsa iyó tsi yo, tan tsihin tandihi tsa tsiñi tuñi tsa iyó tsi yo. Tan cuñi yo tsi nyivi tumaa tsa cuñi yo tsi maa yo. Tacan catyí ley —catyí ra ican.

²⁸ Tacan tan catyí ra Jesús tsihin ra:

—Nditsa tsa caahan un. Tacan javaha un tan coo un ñayivi nyito tsa ña cua naa maa —catyí ra Jesús.

²⁹ Maa tyin ra maestro cuando ley can cuñi ra cuví ra ra vaha nuu ra Jesús, tan catyí ra tsihin ra:

—¿Tan yóo nyivi cuñi yu? —catyí ra.

³⁰ Tacan tan nacahan ra Jesús, tan catyí ra:

—Iin ra quee ñuu Jerusalén cuahán ra nda ñuu Jericó. Tan tahañ ra tsi nu ñasuhu nahnu. Tan suhú nahnu tandihi maa tsa nyisó ra, nda cuando jahma ra. Tan cañi nahnu tsi ra nda cuando tsaquin taxin ña nahnu tsi ra. Tan nacoq ihñi nahnu tsi ra ican. ³¹ Tacan tan yaha iin ra cuví jutu ityi can. Maa tyin tsa nyehe ra tsi ra canyií ican, ndasava ñi yaha tsiyo ra. ³² Tacan tan yaha tucu iin ra yihí cuando vehe ñuhu, ra cuví tata ra Levi. Maa tyin tsa nyehe ra tsi ra canyií ican, juvin ñi ndasava yaha ra. ³³ Tacan tucu iin ra Samaria yaha ra juvin ñi ityi can. Tan nyehe ra tsi ra canyií ican, tan quitsj tsa ndaahvi cuñi ra nyehé ra tsi ra. ³⁴ Tan natuhva ra nu canyií ra, tan quitsaha tyaá ra numeri tsi ra, tyihj ra acetye tsihin vinu nu uhvi can. Tan tyaq ra iin jahma vita nu uhvi can. Yaha can tan jandaq ra tsi ra tsata burru jana ra, tan quihñ ra tsi ra, cuahán tsihin ra nu nyaá iin vehe. Tan jahá cuando ra tsi ra. ³⁵ Tan tsa inga quivi tsa cuñi cuhun ra Samaria. Tan tava ra uvi taahan xuhun. Tan tsahá ra tsi ra jatsii vehe can. Tan catyí ra tsihin ra: “Jaha cuando vaha tsi ra ihya. Tan cuhva tsa catsi ra. Tan jata un numeri tsi ra na nduvaha ñi ra. Tatun cuñi ca tsi xuhun, tyahvi maa yu tsi un tsa quitsi nyico yu”, catyí ra. Tacan tan cuahán ra —catyí ra Jesús.

³⁶ Nu ndihj nacatyí tuhun ra Jesús, tan nducuj tuhun ra tsi ra maestro can, tan catyí ra:

—Vaha. ¿Tsa uñi taahan ra naha, tan ndáa ra cuví ra vaha iñi tsi ra ndaahvi tsa tsinyaa ndaha nu ñasuhu nahnu? —catyí ra Jesús.

³⁷ Tacan tan catyí ra maestro ican:

—Ra tsa cundaahvj iñi tsi ra —catyí ra.

Tacan tan catyí ra Jesús:

—Cuaahan tan jca tucu yooho tacan tsihin nyivi tsa nyehé tundoho —catyí ra.

Nu tsinyaaq ra Jesús vehe ña Marta tsihin ña María

³⁸ Tan quihñ ra Jesús ityi cuahán ra. Tan tsaq ra iin ñuu. Tan ican iyó iin ñaha tsa nañi Marta. Tan tsaq ra vehe ña. Tan tsahá ña quihvi ra tsitsi vehe ña. ³⁹ Tan ña Marta, iyó iin tahañ ña nañi María. Tan ña María tsicunyaa ña yatyin ñi tsaha ra Jesús, tyin tyaa soho ña tsa caahan ra. ⁴⁰ Tan ña Marta cuaha xaan tyiñu javahá ña. Tan tsaq ña nu nyaá ra Jesús, tan catyí ña tsihin ra:

—Yooho tata. ¿A ña tsicá iñi yooho tyin ña tahañ yu nacoq ña tsi intuhun ñi maa yu tsihin tyiñu ihya? Cahan tsihin ña na jatinyee ña tsi yu —catyí ña tsihin ra.

⁴¹ Maa tyin ra Jesús catyí ra tsihin ña:

—Marta, Marta, tsicá xaan iñi un tan tuñu xaan cuñi un tsihin tyiñu can. ⁴² Maa tyin iyó intuhun tsa ñiñi ca taahán tsi caca iñi yo. Tan ña María ihya nacatsj ña tyiñu vaha ca javahá ña. Tan yoñi cuví quinyaa can tsi ña —catyí ra Jesús tsihin ña Marta.

11

Nu jacuahq ra Jesús tsi ra tsicá tsihin ra nácaa ndacan tahvi ra naha tsi Nyoo (Mt. 6.9-15; 7.7-11)

¹ Cuví iin tsaha tsa tsicán tahvi ra Jesús. Tsa ndihj tsicán tahvi ra, tan catyí iin ra tsicá tsihin ra:

—Janaha nácaa ndacan tahvi ndi tsi Nyoo, tumaa janaha ra Juan tsi ra tsicq tsihin ra —catyí ra.

² Tacan tan catyí ra Jesús tsihin ra:

—Cua cuhva yu cuhva tsi ndo nácaa. Tye-hen ndacan tahvi ndo, catyí ndo:

Jutu Mañi ndi, yooho tsa nyaá un gloria. Jacahnú xaan ndi tsi un.

Na quitsi quivi tsa ndaca ñaha un nu ñuhu ñayivi ihya.

Na javaha nyivi nu ñuhu ñayivi ihya tandihi cuhva cuñi maa un, tumaa cuhva cuví nda gloria.

³ Cuhva tsa catsi ndi tan yaha ndi iin iin quivi.

⁴ Jaha tucahnu iñi tsi ndi tsa cuando cuatyí ndi. Tyin nyuhu jahá tucu maa ndi tucahnu iñi tsi nyivi xaan iñi tsi ndi.

Ña cua cuhva un tsa nducu cuhva nu ña vaha tsi ndi. Tan jacacu tsi ndi tan ña cua cunye nu ña vaha tsihin ndi.

Tacan ndacan tahvi ndo —catyí ra Jesús.

⁵ Tan catyí tucu ra:

—Na catyí yo tyin iin nyooho iyó iin ra vaha iñi tsi ndo, tan tsaq ra vehe ndo tsa tsa cuaa tan catyí ra tsihin ndo: “Jaha tumañi iñi tsi, xin. Cuhva nuu uñi taahán paan tsi yu. ⁶ Tyin iin ra vaha iñi tsi yu ndi tsaq ra yuvehe yu. Tan cañi xaan quee ra. Tan nduve tsa cuhva yu catsi ra.” ⁷ Tan nyooho cua nacahan ndo tan catyí ndo tsihin ra: “Ña jatyañu un tsi yu, xin. Tyin ndasí yuvehe yu. Tan ndi quixí yu tsihin sehe yu. Tan

ña cuví nduvita yu tan cuhva yu tsa cuhva yu tsi un tsa vityin.” Tacan cua catyí ndo tsihin ra. ⁸ Tan catyí yu tsihin ndo. Vasu ra vaha iñi ndo cuví tsi ra can, ña cua nduvita ndo tan cuhva ndo tsa nducú ra tsa numi ñi. Maa tyin tatun caahán yuhu ra tsihin ndo, jandatsan ra yuvehe ndo tan caná tsa ra tsi ndo tsa ña cua cuví cusu ndo, tacan tan cua nduvita ndo tan cuhva ndo tsa nducú ra. Tacan tan ña cua jatyañu ca ra tsi ndo. ⁹ Tan tacan tucu nyooho tsihin Nyoo, ndacan ndo tsi ra. Tan cua cuhva ra tsi ndo. Nanducu ndo tan cua ñihi ndo. Jandatsan ndo yuvehe tan cua nuña. ¹⁰ Tyin tatun ndacan ndo, cua ñihi ndo. Tatun nanducu ndo, cua nañihi ndo. Tatun cua jandatsan ndo yuvehe, cua nuña tsi.

¹¹ Tacan tucu nyooho tsa iyó sehe. Tuhvá ndo tsahá tsa vaha tsi sehe ndo. Ña tuhvá ndo cuhva iin yuu itsi tun tsicán tsi paan. Tan ña tuhvá ndo cuhva iin coo itsi tun tsicán tsi tyaca. ¹² Tan ña tuhvá ndo cuhva tujhuma tsi sehe ndo tatun tsicán tsi ndivi catsi tsi. ¹³ Nyooho quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu Mañi yo, ra nyaá gloria, cuhva ra Tatyí lí ra cunyaa añima ndo tun ndacan ndo tsi ra.

Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo (Mt. 12.22-30; Mr. 3.20-27)

¹⁴ Ra Jesús tavá ra tatyí ña vaha tsa jan-duñihí tsi iin rayi. Tsa quitá nu tatyí can tsi ra can, cuví nacahán ra. Tacan tan iyo xaan cuñí nyivi tsa nyehé ñi tsa cuví. ¹⁵ Tan yihí ñi catyí ñi:

—Ra ihya, tavá ra tatyí ña vaha tsihin tunyee iñi nu Beelzebú nu cuví ityi nuu tsihin tandihí tatyí ña vaha —catyí ñi.

¹⁶ Tan yihí ñi cuñí ñi nducu cuhva ñi tsi ra, tan tsicán ñi tsi ra Jesús na javaha ra iin tsa iyo tsa quita andivi. ¹⁷ Maa tyin ra Jesús tsitó ra tsa tsicá iñi ñi. Tan catyí ra tsihin ñi:

—Tatun ra ndacá ñaha naha ra tan natahvi ra naha, tan cañi tahan ra naha, tacan tan cundihi tyiñu tsa ndacá ñaha ra naha. Tan tatun iin vehe tan natahvi nyivi tsihin tahan ñi, tacan tan cua tiví nu yucú ñi. ¹⁸ Tan tacan tucu nu ña vaha, tatun natahvi nahnu, cua cundihi tunyee iñi tsa iyó tsi nahnu. Caahán yu tyeheh tsihin ndo, tyin catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. ¹⁹ Maa tyin tun tsatyin tavá yu tsi nahnu tumaa cuhva catyí ndo, ndaca tuhun ndo tsi ra nyecú tsihin ndo yóo tsahá tunyee iñi tsi ra naha tan tavá ra naha tsi nahnu. Maa ra naha cua cahan tsa nditsa tsihin ndo tyin nyooho soho xaan tsicá iñi ndo. ²⁰ Maa tyin catyí yu tsihin ndo tyin yuhu tavá yu tatyí ña vaha tsihin tunyee iñi Nyoo. Tan cuñí tsi

catyí yacan tyin nditsa tyin Nyoo, ra taahán tsi cundaca ñaha tsi nyivi, tsa tsaá ra nu yucú ndo.

Nu jacuahá ra Jesús tyin ñihi ca tunyee iñi Nyoo tan ñavin ca tunyee iñi nu ña vaha

²¹ Tatun iin ra tan iyó xaan tunyee iñi tsi ra tan nyisó ra mityí ra, tan jahá cuenda ra vehe ra, nu yihí xeehe vaha ndaha tyiñu ra tsitsi vehe ra, tsa ña cua cuví quinyaa ñasuhu. ²² Maa tyin tatun quitsi iin ra tsa cuaha ca tunyee iñi iyó, tan cañi tahan ra tsihin ra, tan cuví jaha canaa ra tsi ra, tacan tan quinyaa ra ndaha tyiñu ra tan natsatsa ra tsi ra vaha iñi tsi ra.

²³ Nyivi ña jahá tyiñu tsihin yu, javí ñi tyiñu jahá yu. Tan tatun ña caahán ñi tuhun Nyoo tsihin nyivi, tyin cunyicun ñi tsi yu; cuñí tsi catyí tsi tyin ña tsahá ñi tsa cunyicun nyivi tsi yu.

Nu jacuahá ra Jesús tsi yo nácaa quihvi tatyí ña vaha tsi yo inga tsaha tatun naa iñi yo

²⁴ Tatun iin nu tatyí ña vaha quitá nu tsi iin nyivi, tsicá nuu nu iin ñuhu ityi, nanducú nu nu quitatu nu. Maa tyin ña nañihí maa nu nu quitatu nu, tacan tan tsicá iñi nu; “Cunuhu nyico yu nda vehe yu nu quee yu.”

²⁵ Tacan tan tsaá nyico nu añima nu quee nu. Tan nyehé nu tyin ndii xaan tan sii xaan caá.

²⁶ Tacan tan cua quihín nu utsa taahan ca tatyí ña vaha tsa yaha ca caquiñi tan ñavin ca maa nu. Tacan tan iin caa ñi cua quihvi tandihí nahnu añima ñi ican. Yacan cuenda yaha ca caquiñi ñi tan ñavin ca tsa jihna ñi —catyí ra Jesús.

Nyivi tsa nditsa iyó vaha ñi nu ñuhu ñayivi

²⁷ Tsitsi tsa ndi caahán ca ra Jesús yacan, tan caná tsaá iin ñaha tsa nyii mahñu nyivi ican. Tan catyí ña:

—¡Náa tsa sii cuñí ñaha tsa jacacú tsi un, ñaha tsa jacaxín tsi un! —catyí ña.

²⁸ Maa tyin ra Jesús catyí ra:

—Sii xaan ca cuñí nyivi tsa tsifí tuhun caahán Nyoo tan tyaá yahvi ñi itsi —catyí ra.

Nyivi ña vaha, maa ñi maa tsa iyo cuñí ñi nyehé ñi

(Mt. 12.38-42; Mr. 8.12)

²⁹ Tacan tan tsaá ca nyivi nu nyii ra Jesús. Tan catyí ra tsihin ñi:

—Nyivi tsa iyó vityin quiñi xaan iyó ñi. Tan nyiyo xaan iñi ñi. Cuñí ñi nyehé jihna ñi tsa iyo. Maa tyin intuhun ñi tsa iyo cua nyehé ñi, yacan cuví tsa javahá Nyoo tsihin ra Jonás, ra cuví ndusu yuhu Nyoo tsanaha. Nduve inga ca tsa iyo cua nyehé ñi. ³⁰ Tumaa tsa janahá ra Jonás tsi nyivi ñuu Ninive tahan tsanaha tyin ii Nyoo, tacan tucu yuhu, Rayi tsa quee nda gloria, janahá yu tsi nyivi tsa iyó vityin tyin ii Nyoo.

³¹ Quiví cua tatsi tuñi Nyoo tsi nyívi, cua nandoto ñaha cuví reina ityi sur tahān tsanaha, tan cua catyi ña tyin cahun ndo anyaya tyin maa ña vasu cañi ñuu ña, maa tyin quítsi ña, quítsi tyaa soho ña tsa tsiñi tuñi tsa cahān ra Salomón. Tan vityin cahnu ca cuví ra nyaá tsihin ndo tan ñavin ca ra Salomón. ³² Tan quívi cua cutuñi tandihí nyívi, cua nandoto nyívi tsicoq ñuu Nínive tahān tsanaha, tan cua catyi ñi tyin nyooho nyívi tsa iyó vityin cahun ndo anyaya, tyin nyívi Nínive ican, nasama ñi cuhva iyó ñi quívi cahān ra Jonás tuhun Nyoo tsihin ñi. Tan vityin cahnu ca cuví ra nyaá tsihin ndo tan ñavin ca ra Jonás.

Nu janaha ra Jesús tyin najaha yo cuenda añima yo na coo tsa nditsin jahá Nyoo
(Mt. 5.15; 6.22-23)

³³ Ndi intuhun ndo tan ña tuhvá ndo tyaa ñuhú tyuma tan tyihí xeehe ndo can, a tinyí ndo can tsitsi iin caha. Tyin ñuhú can taahán tsi cunyi can nu sucun. Tyin tatun quívi nyívi tsitsi vehe ndo, nditsin. ³⁴ Tinuu yo, iin ñuhú nditsin cuví tsi tsa cuenda cuñu ñuhu yo. Tan tacan tucu tsa nditsin Nyoo, tsa cuenda añima yo. Tatun iyó tsa nditsin jahá Nyoo añima yo, vaha nyívi cuví yo. Tatun nduve tsa nditsin jahá Nyoo añima yo, tumaa iin ra cuaa cuví yo, ña cuví nyehe yo ityi vaha tsa cuahān nu nyaá Nyoo. ³⁵ Yacan cuenda jaha ndo cuenda tsi ndo, na coo tsa nditsin jahá Nyoo añima ndo, tan ña coo tsa naa. ³⁶ Tatun tsitú añima ndo tsihin tsa nditsin jahá Nyoo, nduve ca maa tsa naa iyó tsihin ndo, tyin jandunditsin tsi tanií cahnu ndo. Tumaa tsa nyaá iin ñuhú tyuma jandunditsin tsi tanií cahnu ndo cuví can —catyi ra Jesús.

Nu cuxaān ra Jesús tsihin ra maestro cuenda ley vehe ñuhu naha ra tan tsihin ra fariseo naha ra

(Mt. 23.1-36; Mr. 12.38-40; Lc. 20.45-47)

³⁷ Tsa ndihí cahān ra Jesús tsihin nyívi, iin ra fariseo, catyi ra tsihin ra, na cahun ra cucatsi ra yuvehe ra. Tan tsaā ra Jesús vehe ra. Tan quíhví ra tsicunyaā ra nu mesa.

³⁸ Tacan tan ra fariseo ican iyo cuñi ra tyin ña nacyatya ra Jesús ndaha ra tsa ndi cumañi ca catsi ra, tumaa cuhva iyó maa ra naha. ³⁹ Maa tyin Jutu Mañi yo Jesús catyi ra tsihin ra:

—Nyooho, ra cuví fariseo, tumaa tsa tsata ñi vasu tan coho nacuhvá ndo. Maa tyin ityi tsitsi, quiñi xaā caā can tyin ña nacyatya ndo can. Tacan cuví nyooho. Tyin cuñi nyívi tyin vaha ndo. Maa tyin xeehe ñi suhú ndo tan javahá ndo tsa ña vaha. ⁴⁰ Ndava xaān iñi ndo. ¿A ña tsitó ndo tyin ra tsa javahā ityi tsata ndo, juvin ñi maa ra javahā ityi tsitsi ndo? ⁴¹ Taahán tsi javaha ndo tumañi iñi tsi nyívi ndaahví, tan jatyinyee ndo tsi ñi tsihin

tanií añima ndo. Javaha ndo tsa vaha tsihin ñi, tacan tan nduvaha tucu ityi tsitsi ndo.

⁴² ¡Ndahvi nyooho ra fariseo! tyin nyooho, cahví ndo ndaha menta tan ndaha lura tan náa ndihí ca yucu tsa tsatsi ndo, tan tavá ndo intuhun tsi tsa iin utsi tan tsahá ndo tsi Nyoo, maa tyin ña tyaa yahvi ndo tsa vaha tsa cuñi Nyoo javaha yo tan tsa cuñi yo tsi ra. Taahán tsi tsa cuñi vaha ca ndo tsi Nyoo tan javaha ndo cuhva cuñi ra, tan ña jandihí ndo tsa cuhva ndo diezmo can. ⁴³ ¡Ndahvi nyooho tsa cuví ndo fariseo! tyin cuñi ndo cunyaā ndo nu tyayu vaha tsitsi vehe ñuhu. Tan cuñi ndo tsa tyaa yahvi nyívi tsi ndo nuyahví. ⁴⁴ ¡Ndahvi nyooho ra maestro cuenda ley, tan nyooho ra fariseo! Vaha xaān jahá ndo tsi ndo tan ña nditsa ndo. Cuví ndo tumaa iin ñaña ndi tsa ña nditsin ca canyií. Tyin tsañi nyívi tsata can tan ña tsitó ñi tyin nyii ndiyi tsitsi ñaña ican. Tyin nduve ca cuhva canyií nu nyii ndiyi ican. Cuñi maa nyívi tyin vaha ndo, tan ña tsitó ñi tyin ña vaha añima ndo —catyi ra Jesús.

⁴⁵ Tacan tan nacahān iin ra maestro cuenda ley vehe ñuhu, tan catyi ra:

—Maestro, tsa catyi un tacan, caahān nyaa ndihí un tsi ndi —catyi ra.

⁴⁶ Tacan tan catyi ra Jesús tsihin ra naha:

—¡Ndahvi tucu nyooho ra maestro cuenda ley vehe ñuhu! tyin jacuahá ca ndo ley tsa tsahā Nyoo tahān tsanaha. Tan ña taahán tsi. Tan yoñi ndoyó carga can, tan jañiñi ca ndo na javaha nyívi can, tan maa ndo ndi luxu ña jatyinyee ndo tsi ñi. ⁴⁷ ¡Ndahvi nyooho! tyin janduvahá vaha ndo ñaña nu ñuhú yiqui ra cuví ndusu yuhu Nyoo tsa tsañi ra cuví tsi tsaahnu ndo tahān tsanaha. ⁴⁸ Yacan cuñi tsi catyi tyin ndoó ndo vaha tsa javahā tsi tsaahnu ndo naha ra. Tyin tsi tsaahnu ndo tsañi ra naha tsi ra cuví ndusu yuhu Nyoo. Tan nyooho janduvahá ca ndo ñaña ra naha. ⁴⁹ Yacan cuenda catyi Nyoo tahān tsanaha tsihin tsa tsiñi tuñi ra tyin cua jaquitsi ra tsi ra cua cuví ndusu yuhu ra tan ra caca tyiñu ra nu iyó ndo. Tan cua cahñi ndo juhva ra naha tan inga ra cua jacunu ndo tsi ra naha. ⁵⁰ Tan nditsa tyin tacan javahá ndo. Nyoo ca tatsi tuñi ra tsi ndo tan tsi nyívi iyó vityin tsa cuenda tandihí ra cuví ndusu yuhu ra tsa tsañi tsi tsaahnu ndo naha ra nda cuanda tsinú ñuhu ñayivi tan nda cuanda vityin. ⁵¹ Nda cuanda niñi ra Abel tsa tsatí tsa tsañi ra Cañ yañi ra tsi ra, tan nda cuanda niñi ra Zacarías tsa tsañi nyívi tsitsi vehe ñuhu yatyin nu nyaá altar. Yacan cuenda catyi Nyoo tyin cua tatsi tuñi ra tsi nyívi tsa iyó vityin tsa catyi cuatyí nyívi tsa tsicoq tahān tsanaha. ⁵² ¡Ndahvi nyooho ra maestro cuenda ley vehe ñuhu! tyin tumaa tsa tyihí xeehe ndo ndaha tucu yuvehe nu

quihví nyívi ityi nu nyaá Nyoo. Tan ndi maa ndo ña quihví ndo nu nyaá Nyoo. Tan ndi ña tsahá ndo tsa quihví inga nyívi tsa cuñi quihví —catyí ra Jesús.

⁵³ Ndihi cahan ra Jesús tacan. Tan ra maestro cuenda ley vehe ñuhu naha ra tsihin ra fariseo naha ra, nduxaagn xaan ra naha tan quitsaha nducú tuhun xaan ra naha tsi ra Jesús. ⁵⁴ Tyin cuñi ra naha tsa cahan ra Jesús iin tsa ña vaha, tyin tacan tan cuvi tyaa ra naha cuatyí tsi ra.

12

Nu jacuahá ra Jesús tyin ña cuví tyihi xeehe yo cuatyí yo

¹ Cuenda mil nyívi ndu iin nda cuanda catyihí tahan ña ñi, tyin cuaha xaan ñi. Tacan tan ra Jesús cahan jihna ra tsihin ra tsicá tsihin ra:

—Jaha ndo cuenda tsi ndo tsihin ra fariseo naha ra tsihin cuatyí ra tsa cuví tumaa yutsan iya. Tyin ndaá paan jahá yutsan iya, tan tacan cuví cuatyí ra can naha ra. Tyin jahá ra naha tyin vaha ra. Maa tyin ña cuví tyihi xeehe ra naha cuatyí ra naha. ² Tyin nduve iin tsa yihí xeehe tan cuñi yo, tyin ña cua quituvi. Tan nduve tsa xeehe tan cuñi yo, tyin ña cua coto nyívi. ³ Yacan cuenda, náa ndihi tsa caahán ndo nu xeehe, cua quita tsi nu nditsin. Tan náa ndihi tsa caahán ndo tsitsi vehe ndo, cua cana tsa nyívi jiñi vehe.

¿Yóo taahán tsi nayuhviyo, a tsi nyívi a tsi Nyoo?

(Mt. 10.28-31)

⁴ Tan catyí yu tsihin ndo tsa cuví ndo ra vaha iñi tsi yu, tyin ña nayuhvi ndo tsi nu tsahñi cuñu ñuhu yo. Tyin yaha can tan nduve ca tsa cuví javaha nu tsi yo. ⁵ Maa tyin cua catyí yu tsihin ndo yóo taahán tsi nayuhvi ndo. Nayuhvi ndo tan tyaa yahvi ndo tsi Nyoo, ra cuví quinyaa tsa nyito ndo. Tan yaha yacan tan cuví tyihi ra tsi ndo anyaya.

⁶ Saa, ña yahvi nyaá tí. Cuví jata yo uhun taahan tí tsihin uvi ñi xuhun. Vasu ndi maa nyihí ñi tí, Nyoo ña naá iñi ra tsi ndi intuhun tí. ⁷ Tan nyooho, nyaá yahvi ca ndo nu Nyoo tan ñavin ca tsa cuaha saa can, tan nda cuanda íxi jiñi ndo tan tsitó Nyoo najava taahan tsi iyó tyin tsa nacahví ra intuhun intuhun tsi. Yacan cuenda ña nayuhvi ndo.

Na ña nayuhviyo cahan yo tuhun ra Jesucristo tsihin nyívi

(Mt. 10.32-33; 12.32; 10.19-20)

⁸ Catyí yu tsihin ndo tyin tandihí nyoooho tsa janahá ndo tsi nyívi tyin tsinú iñi ndo tsi yu, tacan tucu maa yu, cua cahan yu tuhun ndo nuu ángel Nyoo nda gloria. Tyin yuhu Rayii nda gloria quee yu. ⁹ Maa tyin nyoooho

tsa janahá ndo tyin ña tsinú iñi ndo tsi yu, tacan tucu maa yu, cua cahan yu nuu ángel Nyoo tyin ñavin nyívi cuenda yu cuví ndo. ¹⁰ Tan vasu cuxaan nyívi tsi yuhu, Rayii tsa quee nda gloria, Nyoo cua jaha ra tucahnu iñi tsi ñi. Maa tyin nyívi caahán tsa ndavaha ñi siqui Tatyí Ii Nyoo ña cua coo tucahnu iñi tsi ñi cuenda yacan.

¹¹ Quívi tsa cua cundaca nyívi tsi ndo tsitsi vehe ñuhu, nu juez, a nuu ra cumí tyiñu naha ra, ña caca iñi ndo náa tuhun cua nacahan ndo. ¹² Tyin cuhva tsa cua nacahan ndo, cua cuhva maa Tatyí Ii Nyoo náa tuhun taahán tsi cahan ndo —catyí ra Jesús.

Nu tsahá cuenda ra Jesús tyin ña taahán tsi nyíyo iñi yo tsa cuca

¹³ Iin ra tsa nyii tsihin nyívi cuaha tsa ndu iin nu nyii ra Jesús, catyí ra tsihin ra Jesús:

—Maestro, cahan tsihin ra yañi yu na natahvi ra tsa tsii jutu ndi, cuhva ra tsa taahán tsi tsi yu.

¹⁴ Tacan tan catyí ra Jesús tsihin ra:

—¿Tsaa, yóo tsahá tsi yu tsa cuví yu juez tan natahvi yu ndaha tyiñu ndo? —catyí ra.

¹⁵ Tan yahá can tan catyí ra nuu nyívi cuaha can:

—Jaha xaan ndo cuenda tan ña nyíyo xaan iñi ndo tyin ña tsinú ñuhu tsa coo cuaha ndaha tyiñu yo tan coonyito yo.

¹⁶ Tacan tan tsahá cuenda ra Jesús iin cuhva tsi tandihí nyívi, tan catyí ra:

—Tsicoq iin ra cuca. Tan cuaha xaan ndaha tyiñu ñihí ra nu jahá tyiñu ra.

¹⁷ Tacan tan tsicá iñi ra: “¿Nacaa javaha yu? Nduve nu quihí tandihí ndaha tyiñu ihya.” ¹⁸ Tan catyí ra: “Tsa tsitó yu nácaa cua javaha yu. Cua caní yu tandihí yaca nyihí yu, tan cua javaha yu tsa nahnu ca, tan natyihí yu tandihí ndaha tyiñu can tsihin tandihí ca tsa iyó tsi yu tsitsi can. ¹⁹ Tacan tan cua catyí yu tsihin yu: Cuaha xaan ndaha tyiñu naquihñin vaha un, tan vityin cuahán maa cuiya, quitatu, çatsi vaha, çoho vaha, tan çusi iñi.” ²⁰ Tan Nyoo catyí ra tsihin ra can: “Ra soho, tsacuaa vityin cua cúu un, tan tsa naquihñin vaha un ¿Yóo tsii cua cuví yacan?” catyí Nyoo tsihin ra can.

²¹ Tacan cuví iin ra tsa jatácá tan tyihí vaha ra tsa cuca tsi ra; maa tyin nuu Nyoo ra ndaahvi cuví ra —catyí ra Jesús.

Ña caca xaan iñi yo náa ndihi tsa tsinú ñuhu tsi yo

(Mt. 6.25-34)

²² Tacan tan catyí ra Jesús tsihin ra tsicá tsihin ra:

—Tacan ñi catyí yu tsihin ndo, ña caca xaan iñi ndo nácaa ñihí ndo tsa catsi ndo, tan ndi jahma tsa cunditsi ndo. ²³ Tyin nyaá yahvi ca ñayivi tsa nyito yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca tsa nditsí yo. ²⁴ Jaha ndo cuenda saa

tyin ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti, tyin Nyoo tsahá ra tsa catsi ti. Tan nuu Nyoo nyaá yahvi ca nyooho tan ñavin ca saa. ²⁵ Tan vasu ndi maa tsicá xaan iñi ndo maa tyin ña cuví jandusucun ndo luxu ca tsi ndo. ²⁶ Tatun ndi luxu can tan ña cuví jahá ndo, ¿nacuenda tsa tsicá xaan iñi ndo tandihí ca tsa tsiñí ñuhu tsi ndo?

²⁷ Jaha ndo cuenda nácaa iyó yutun ita tyin ña jahá tyiñu tun tan ndi ña tavi tun yuhva. Maa tyin catyí yu tsihin ndo tyin ndi ra rey Salomón tsihin tandihí tsa cuca ra tan ña sii cáá tsa tsinditsi ra tumaa tsa jacunditsi Nyoo tsi yutun ita ícan. ²⁸ Tatun tacan ñi jacunditsi Nyoo tsi yutun ita tsa iyó nu tsiqui vityin, tan ityaan cua cayu tun tsitsi horno, tan nyooho cahnu ca cuví ndo nuu ra tan ñavin ca yutun ita. ¿A ña cua cuhva ra tsa cunditsi ndo? Maa tyin maa ndo ña tsinú vaha iñi ndo tsi ra. ²⁹ Ña caca xaan iñi ndo tuhun tsa catsi ndo tan tsa coho ndo. ³⁰ Tyin nyívi tsa ña tsinú iñi tsi Nyoo tsicá iñi ñi yacan. Maa tyin Jutu yo Nyoo tsitó ra náa tsiñí ñuhu tsi ndo. ³¹ Vaha ca tsa nducu ndo nácaa cuhva cuenda ndo tsi ndo tsi Nyoo na cundaca ñaha ra tsi ndo. Tan cuhva tucu ra tandihí tsa tsiñí ñuhu tsi ndo.

Tsa vaha tsa iyó gloria
(Mt. 6.19-21)

³² Ña nayuhvi nyooho, mbee jana yu. Ña cuaha ndo maa tyin Jutu yo Nyoo cuñi ra tsi ndo. Yacan cuenda cua cuhva ra quihvi ndo nu ndacá ñaha ra. ³³ Xico ndo tsa iyó tsi ndo. Tan jatyinyee ndo tsi nyívi ndaahvi. Tatun javahá ndo tacan, jacayá ndo tsa vaha nuu nyaá Nyoo. Tyin nuu nyaá Nyoo ña ndihí tsa vaha. Tyin yofi yóo jatívi can ndacan, ndi nu ñasuhu, tan ndi quiti. ³⁴ Tyin nuu iyó tsa cuca ndo, ícan cuví nu nyita iñi ndo. Tan ndacan cua coo ndihí añima ndo —catyí ra.

Nu jacuahá ra Jesús tsi yo nácaa cuatu yo tsi ra quivi quitsi ra inga tsaha

³⁵ Cúatu vaha ndo tsi yu tsihin ñuhu nditsin Nyoo quivi quitsi yu inga tsaha. ³⁶ Tan cuví ndo tumaa musu tsa ndatú tsi tsi-toho ra naha náa cuhva quitsi ra tsa cuahán ra iin vico tindaha. Tan ndatú ra naha, tyin tacan tan numi ñi cua nuña ra naha yuvehe cuhva tsa jandatsan tsi-toho ra naha tsa tsaa ra. ³⁷⁻³⁸ Tan sii xaan cua cuñi ra naha nyehé ra naha tsi ra cuví tsi-toho ra naha. Tyin ndatú ra naha tsi ra nda cuanda tsa tsaa ra, vasu ñuu taxin, vasu tsa naha ca. Tan cua tyaa ra tsi ra musu ícan naha ra yuhu mesa tan cuhva ra tsa catsi ra naha. Tacan tan sii xaan cua cuñi musu can naha ra. ³⁹ Tan coto ndo tyin tatun tsi-toho vehe, tan tsitó ra náa cuhva cua quihvi ñasuhu vehe ra, cua jaha ra cuenda vehe ra. Tan ña cua cuhva ra quihvi nu ñasuhu ícan tsitsi vehe ra. ⁴⁰ Tan tacan

cuví tucu nyooho, cúatu ndo. Tyin yuhu, Rayii tsa quee nda gloria, sana iñi ndo tan cua quitsi yu —catyí ra Jesús.

Musu vaha tan musu ña vaha
(Mt. 24.45-51)

⁴¹ Tacan tan quitsahá nducú tuhun ra Pedro tsi ra Jesús:

—Jutu Mañi yu, ¿yóo cuenda caahan un yacan? ¿A tsa cuenda maa ñi maa ndi, a tsa cuenda tandihí nyívi?

⁴² Tacan tan nacahan ra Jesús, tan catyí ra tsihin ra:

—Musu tsa tyaa soho tsa caahán tsi-toho ra, juvin ra cuví musu vaha. Tyin jahá cuenda ra vehe tsi-toho ra. Tan vaha cuhva tsahá ra tsa catsi tandihí ca musu ícan. ⁴³ Tan sii xaan cuñi musu ícan tatun cuhva tsa jahá tyiñu ra, tan cua tsaa tsi-toho ra. Tyin tyaa yahvi ra tandihí tsa taahán tsi íca ra. ⁴⁴ Tan catyí yu tsihin ndo tyin tsa nditsa. Tyin tsi-toho ra cua nacuhva ra tandihí tsa cumí ra, cua quihí ndaha ra. Tyin vaha tyaa yahvi ra tsihin tyiñu jahá ra. ⁴⁵ Maa tyin tatun tsicá iñi musu ícan tyin naha xaan cuahán tsi-toho ra, tan quitsahá cañi ra tsi inga musu tsa cutahán tsihin ra tan ñiñaha jahá tyiñu ícan, tan ña cuñi ra jaha tyiñu ra. Tyiñu tsatsi ñi tan tyiñu tsiñí nyixi ñi iyó ra. ⁴⁶ Tacan tan sana iñi ra cua tsaa tsi-toho ra quivi tsa ña ndatú ra tsi ra, tan cuhva tsa ña tsitó ra. Tacan tan ñihí xaan cua tatsi tuñi tsi-toho ra tsi ra, tumaa tuhvá maa ra ícá tsihin nyívi tsa ña tsiñú iñi tsa caahán ra.

⁴⁷ Tan iin musu tsa tsitó nácaa iyó tsi-toho ra tan ña javahá ra cuhva cuñi tsi-toho ra, cuaha xaan tundocho cua nyehé ra. ⁴⁸ Maa tyin tatun iin musu tsa ña tsitó, tan javaha ra tsa ña vaha, cua tatsi tuñi tsi-toho ra tsi ra, maa tyin luxu ñi. Tyin ña tsitó ra can, tan javahá ra. Tatun iin musu tan cuaha tsa tsahá tsi-toho ra tsi ra, cuaha tyiñu taahán tsi nacuhva cuenda ra tsi tsi-toho ra. Tan ra tsa cuaha xaan yihí ndaha can, cuaha xaan tyiñu taahán tsi nacuhva cuenda ra tsi tsi-toho ra.

Nu cahán ra Jesús tyin tsacatyí ra cua cañi tahan nyívi tsihin nyívi ñi
(Mt. 10.34-36)

⁴⁹ Tumaa tsa jatahán yu ñuhu nu ñuhu ñayívi, tacan cuví tyiñu vatsí yu. ¡Tan cuñí xaan yu tsa nacayu catyin ña ñuhu ihya! ⁵⁰ Tyin nyaá cua yaha yu iin tundocho cahnu, tan cahnu xaan tundocho iyó yu nda cuanda ndihí tyiñu jahá yu. ⁵¹ Cuñi maa ndo tyin tsa vatsí cuhva yu tsa taxin coo ndo nu ñuhu ñayívi ihya. Maa tyin yuhu vatsí yu tyin jasín yu tsi ndo. ⁵² Tyin tsa vityin tan ityí nuu ca, uhun taahan nyívi iin vehe ñi cua cusín ñi. Uñi taahan ñi cua cañi tahan tsihin uvi taahan ñi. Tan uvi taahan ñi cua cañi tahan tsihin uñi taahan ñi. ⁵³ Tan ra iyó

sehe, cua cañi tahan ra tsihin sehe ra. Tan ra cuví sehe can cua cañi tahan ra tsihin jutu ra. Tan ñaha iyó sehe sihi cua cañi tahan ña tsihin sehe sihi ña. Tan ña cuví sehe sihi can cua cañi tahan ña tsihin sihi ña. Tan ñaha cuví tyiso cua cañi tahan ña tsihin tsanu ña. Tan ñaha cuví tsanu can cua cañi tahan ña tsihin tyiso ña —catyí ra Jesús.

Nu cahán ra Jesús tsihin nyivi tyin ña naco to ñi tyin tsa tsaq Sehe Nyoo nu yucú ñi (Mt. 16.1-4; Mr. 8.11-13)

⁵⁴ Catyí tucu ra Jesús tsihin nyivi cuaha tsa yucú ican:

—Tatun nyehé ndo tyin tsa yihí vico, catyí ndo tyin tsa cua cuun savi. Tan tacan tsa cuii cuví. ⁵⁵ Tatun tsa nyehé ndo tyin tsa yihí tatyí quee ityi ndutya ñuhu, catyí ndo tyin tsa cua ndu ihñi. Tan quita tsa cuii nu caahán ndo. ⁵⁶ Nyooho jahá ndo tsa tsitó xaan ndo, tan nacotó ndo tandihi tsa cuví andivi, tan tandihi tsa cuví nu ñuhu ñayivi ihya. Tan ¿nacuenda tsa ña nacotó ndo náa tymbu iyó ndo vityin?

Nducu yo kuhva nácaa coo vaha yo tsihin ra tsicán cuatyí tsaha yo coto kuhun yo anyaya

(Mt. 5.25-26)

⁵⁷ ¿Nacuenda ña jahá ndo cuenda, ndáa tsa vaha tan ndáa tsa ña vaha? ⁵⁸ Tatun iin ra tsicán cuatyí tsaha ndo tan cuahán ndo tsihin ra nu nyaá ra cumí tyiñu, ityi cuahán ndo nducu ndo kuhva coo vaha ndo tsihin ra tsa ndi cumañi ca tsa ndo nu nyaá ra cumí tyiñu. Coto nacuhva cuenda ra tsi ndo tsi juez. Tan juez ican cua nacuhva cuenda ra tsi ndo tsi ra vitya naha ra. Tan ra vitya naha ra cua tyihi ra naha tsi ndo tsitsi vehe caa. ⁵⁹ Tatun tacan cua cuví, catyí yu tsihin ndo tyin ña cua quita ndo nda cuanda tyahvi ndo tandihi tsa taahán tsi tyahvi ndo —catyí ra Jesús.

13

Cuñi tsi tsa nasama yo kuhva iyó yo, tun ña cuñi yo kuhun yo anyaya

¹ Tacan tan juvin ñi quivi can nyecu juhva ra naha. Tan quitsahá nacatyí tuhun ra naha tsihin ra Jesús tsa javahá ra Pilato tsihin juhva ra Galilea naha ra. Tyin tava ra tyiñu na cahñi andaru naha ra tsi ra Galilea tsa tsijamañi quiti jana ra naha tsi Nyoo. Tan tacan sacá nuu niñi ra ican naha ra tsihin niñi quiti tsa tsijamañi ra ican naha ra. ² Tan nacahán ra Jesús tan catyí ra tsihin ra naha:

—¿A tsicá iñi nyooho tyin cahnu xaan ca cuatyí ra Galilea ican naha ra tan ñavin ca tandihi ca ra ñuu ra naha, tan yacan tsihi ra naha? ³ Ñavin. Tyin tatun nyooho tan ña nasama ndo kuhva iyó ndo, tacan cua cunaa

ndo. ⁴ Tan tsa tsahun uñi taahan ra tsihi can naha ra tsa canacava torre Siloé ican tsata ra naha, ¿a cuaha ca cuatyí ra naha tan ñavin ca inga ra tsa tsicoo ñuu Jerusalén, cuñi maa ndo? ⁵ Ñavin. Tyin tatun nyooho tan ña nasama ndo kuhva iyó ndo, cua cunaa ndo.

Nu tsaha cuenda ra Jesús iin kuhva nácaa ndatú Nyoo tsa nasama yo kuhva iyó yo

⁶ Tacan tan tsaha cuenda ra Jesús iin kuhva ihya. Tan catyí ra:

—Iin ra iyó yutun tsa nañi higuera tsi ra. Tan nyaá tun nu ñuhu ra. Tan tsahan ra tsinyehé ra tatun iñi tsiti tun. Tan nyehé ra tyin nduve. ⁷ Tan catyí ra tsihin ra jahá cuenda tsi tun: “Tsa uñi cuiya tsa tyito ñi quitsi nyehé yu tatun iyó tsiti tun. Tan nduve maa tsiti tun iñi. Cahnya tsi tun. Tyin nyaá cuatu ñi maa tun nu ñuhu ihya. Tyin nduve tsiti tsahá tun”, catyí ra. ⁸ Maa tyin ra tsa jahá cuenda ñuhu ican catyí ra: “Taa, ña cua cahnya naha yo tsi tun vityin. Na cunyaá nuu maa tun inga cuiya ihya. Cua janduvita yu ñuhu tsaha tun tan cua tyihi yu ñuhu tyahyí. ⁹ Vasiqui tacan tan cua kuhva tun tsiti. Maa tyin tatun ña kuhva tun tsiti, tacan tan cahnya yo tsi tun”, catyí ra tsa jahá cuenda ñuhu can —catyí ra Jesús.

Quivi quitatú nyivi janduvahá ra Jesús tsi iin ñaha tihí tsata

¹⁰ Iin quivi tsa quitatú nyivi, jacuahá ra Jesús tsi nyivi tsitsi vehe ñuhu. ¹¹ Tan ican nyaá iñi ñaha tsa yihí tatyí ña vaha. Tan tsa tsahun uñi cuiya cuuhvi ña tsa tihí tsata ña. Tan ña cuví ndundo ña. ¹² Tacan tan nyehé ra Jesús tsi ña. Tan caná ra tsi ña. Tan quitsahá caahán ra tsihin ña, tan catyí ra:

—Tsa nduvahá un. Nduve ca cuehe ndohó un —catyí ra tsihin ña.

¹³ Tacan tan tyisó ra ndaha ra jiñi ña. Tan iin yaha ñi tan ndundo ña. Tacan tan quitsahá jacahnú ña tsi Nyoo. ¹⁴ Maa tyin ra cuví ityi nuu vehe ñuhu, cuxaagn xaan ra tsi ra. Tyin quivi quitatú janduvahá ra tsi ña. Tan catyí ra tsihin nyivi nyecú ican:

—Iyó iñu taahan quivi taahán tsi jaha tyiñu yo. Tacan quivi quitsi ndo cuví ndo numeri. Tan ña quitsi ndo quivi quitatú yo —catyí ra.

¹⁵ Tacan tan Jutu Mañi yo Jesús catyí ra tsihin ra:

—Nyooho tsa jahá ndo tyin vaha ndo. ¿A ña ndatsi tucu nyooho quiti jana ndo tan jacohó ndo ndutya tsi ti quivi quitatú yo? ¹⁶ Tan tacan tucu ñaha ihya, tata ra Abraham cuví tsi ña. Tan tsa tsahun uñi cuiya tsa nuuhñi ña tsihin cuehe ihya jahá nu ña vaha. Tan yoñi ndatsi tsi ña. ¿A ña taahán tsi ndatsi yo tsi ña vasu ndi maa quivi quitatú yo cuví vityin? —catyí ra Jesús.

¹⁷ Tacan tan cuhva tsa cahān ra Jesūs ya-can, tandihī maa nu xaan iñi tsi ra nducahan nuu nahnu. Maa tyin tandihī ca maa nyivi sīi xaan cuñi ñi tsihin tsa cahnu tsa iyo javahā ra Jesūs.

Nu cahān ra Jesūs tyin tumaa iin tsiti mostaza cuvī tsa ndacá ñaha Nyoo tsi yo

¹⁸ Tacan tan catyí ra Jesūs:

—¿Náa cuvī tsa ndacá ñaha Nyoo tsi yo? ¿Tan náa tsihin jandu inducu yo itsi? ¹⁹ Tumaa iin tsiti mostaza, tacan cuvī tsi. Tyin iin ra tatsj ra iin tsiti ican nu ñuhu ra, tan canā iin yutun luhlu, tan tsahnū tun. Tan cuvī tun iin yutun cahnu xaan. Tacan tan tsaā saa naha ti nuu yutun ican. Tan javahā ti taca ti nuu tun.

Nu cahān ra Jesūs tyin tumaa yutsan iya, tacan cuvī tsa ndacá ñaha Nyoo tsi yo
(Mt. 13.33)

²⁰ Tacan tan catyí ra Jesūs inga tsaha:

—¿Náa ca tsihin jandu inducu yu nácaa ndacá ñaha Nyoo tsi yo? ²¹ Cuvī tsi tumaa yutsan iya tsa nasacá nuu iin ñaha tsihin uñi jahma yutyi paan. Tyin tumaa ndaá taniī yutsan paan ican jahā yutsan iya ican, tacan cuvī tsa ndacá ñaha Nyoo tsi yo —catyí ra.

Yuvehe tihin tan ityí cuiñi tsa cuahán nu nyaá Nyoo

(Mt. 7.13-14, 21-23)

²² Ityí cuahán ra Jesūs ñuu Jerusalén caahán ra tuhun Nyoo tsihin nyivi tandihī ñi ñuu nu yahá ra. ²³ Tan iin ra tsicá tuhun ra tsi ra:

—Jutu Mañi yu, ¿a cuaha maa nyivi cua cacu? —catyí ra.

Tacan tan nacahān ra Jesūs, tan catyí ra:

²⁴ —Nanducu ndo cuhva quihvi ndo yuvehe tihin. Tyin tacan cuvī quihvi ndo nu ndacá ñaha Nyoo. Tyin cuaha xaan ndo cuiñi ndo quihvi ndo ndacan, tan ña cuvī. ²⁵ Tyin tumaa tsitoho iin vehe, tacan cuvī Nyoo. Tan tsitoho vehe ican cua nacasi ra yuvehe. Tacan tan nyooho tsa nyecú ndo ityí tsata ca jandatsan ndo yuvehe, tan cua catyí ndo: “Nuña yuvehe.” Tan ra ican cua catyí ra tsihin ndo: “Ña tsitó yu ndáa ityí quee nyooho.” ²⁶ Tacan tan nyooho cua catyí ndo: “Nyuhu tsatsj ndi tan tsihī ndi tsihin un. Maa un jacuahā un tuhun Nyoo tsi ndi ityí nu nyecú vehe ndi”, cua catyí ndo tsihin ra. ²⁷ Maa tyin ra ican cua nacahan ra tsihin ndo tan catsan ña cua cuvī nuhu ndo tsa cua nyehē ndo tsi ra Abraham tsihin ra Isaac tan ra Jacob, tan tsihin tandihī ra cuvī ndusu yuhu Nyoo tsa tsicoq tahān tsanaha. Tyin nyecú ra naha nu ndacá ñaha Nyoo. Tan

nyooho ndoq ndo ityí tsata. ²⁹ Tan cua quitsi nyivi ityí ndutya ñuhu, tan ityí norte, tan ityí nu caná ñicanyii, tan ityí nu tyisó ñicanyii. Tan cua cunyecu ñi catsi ñi tsihin Nyoo nu ndacá ñaha ra. ³⁰ Tan juhva nyivi tsa cuahán ityí nuu vityin, ñi can cahun nu ndihī. Tan juhva nyivi tsa cuahán nu ndihī ña, ñi can cua cahun ityí nuu —catyí ra.

Nu cuiñi xaan cuiñi ra Jesūs nyehé ra tsi nyivi ñuu Jerusalén
(Mt. 23.37-39)

³¹ Juvín ñi maa quivi can tsaā juhva ra fariseo. Tan catyí ra naha tsihin ra Jesūs:

—Quita ihya tyin ra Herodes cuiñi ra cahñi ra tsi un —catyí ra naha.

³² Tan catyí ra Jesūs tsihin ra naha:

—Cuaahan ndo tan cahan ndo tsihin ra tsa cuvī tumaa ñicuii, tyin nda cuanda quita quivi tsa ndihī tyiñu jahā yu tsa tavá yu tatyí ña vaha tsi nyivi tan tsa janduvahā yu tsi nyivi cuuhví tsihin cuehe, tacan tan cundiñi tyiñu jahā yu. ³³ Maa tyin nda cuanda tahan tsi tsa ndihī maa tyiñu jahā yu, tacan tan cahun maa yu cua cúu yu nda ñuu Jerusalén. Tyin ña cuvī cúu iin ra cuvī ndusu yuhu Nyoo ityí tsata ñuu Jerusalén.

³⁴ ¡Ndahvi nyooho nyivi Jerusalén! tyin tsahñi ndo tsi ra cuvī ndusu yuhu Nyoo. Tan cañi ndo yuu tsi tandihī ra tsa jaquitsj Nyoo nu yucú ndo. Tan yuhu cuaha xaan tsaha cuiñi yu jaha cuenda yu tsi ndo, tumaa jahā cuenda iin ndivi sīihī sehe ti, tan naquihín vaha ti tsi ti naha ti tsitsi nditsin ti. Maa tyin maa ndo ña cuiñi ndo. ³⁵ Nyehē ndo vityin tyin tsa nacog yu tsi ndo. Tan catyí yu tsihin ndo tyin ña cua nyehē ca ndo tsi yu nda cuanda quita quivi tsa cua catyí ndo tyin cahnu xaan ra vatsi tsihin sivi Nyoo Jutu yo —catyí ra Jesūs.

14

Nu janduvahā ra Jesūs tsi iin ra cuuhví tsa iyó cuiñu quivi quitatú nyivi

¹ Cuvī tsi iin quivi quitatú nyivi. Tan ra Jesús cuahán ra cua catsi ra vehe iin ra cuvī ityí nuu tsihin ra fariseo naha ra. Tan juhva ca ra fariseo ican ndatú ra naha nyehé ra naha náa cuatyí cuvī tyaa ra naha tsi ra Jesús. ² Tacan tan yatyin ñi nuu ra Jesús nyaá iin ra cuuhví tsa iyó cuiñu. ³ Tan catyí ra Jesús tsihin ra maestro cuenda ley vehe ñuhu naha ra tan tsihin ra fariseo naha ra:

—¿A vaha janduvaha yo nyivi cuuhví quivi quitatú yo? ¿Náa catyí ley Nyoo? —catyí ra.

⁴ Tacan tan tandihī ra naha, taxin ña tsinyecu ra naha. Tacan tan tyisq ndaha ra Jesús jiñi ra cuuhví can. Tan janduvahā ra tsi ra. Tan catyí ra tsihin ra na cunuhu ra. ⁵ Tacan tan catyí ra Jesús tsihin ra fariseo naha ra:

—Tatun nyooho tan canacava iin burru jana ndo, a inga quiti jana ndo, tsitsi xahva, ¿a ña cua tava ndo tsi ti tsa numi ñi, vasu ndi maa quivi quitatú yo cuví? —catyí ra.

⁶ Tacan tan taxin ña tsinyecú ra fariseo naha ra. Tyin ña ñihí ca ra naha náa nacahan ra naha.

Nu jacuahá ra Jesús tsi yo tyin ña vaha tsa cahnu jaha yo tsi yo

⁷ Nyehe ra Jesús tyin tandihí ra nyecú vico ican nacatsí ra naha tyayu vaha ca cunyecu ra naha. Tacan tan tsaḥa cuenda ra tyehen tsi ra naha:

⁸ —Ndáa quivi cahun ndo vico tindaha, ña nanducu ndo tyayu vaha ca cunyecu ndo. Tyin coto quitsi inga ra tsa cahnu ca cuví tan ñavin ca maa ndo, ⁹ tan coto quitsi ra tsa caná tsi ndo tan catyí ra tsihin ndo: “Cuhva tyayu can tyin cunyata ra ihya.” Tacan tan nyooho tsihin tsa cahan nuu ndo, tan cua kuhva ndo tyayu can. Tacan tan cua cunyecu ndo nu ndihí ña. ¹⁰ Maa tyin catyí ra tsihin ndo, tyin ndáa quivi cana ra tsi ndo, cúaahan ndo, tan ñavin nu vaha cunyecu ndo. Tyin tacan tan cua quitsi maa ra tsa caná tsi ndo tan cua cahan ra tsihin ndo: “Amigos, naha ndo, cunyecu ndo nu tyayu vaha ihya.” Tan tacan cua jacahnu ca ra tsi ndo nu nyivi nyecú yuhu mesa tsihin ndo. ¹¹ Tyin ra tsa cahnu jahá tsi maa ra, cua tahan ra ticanuu. Tan ra tsa ndahví jahá tsi ra, cahnu ca cua cuví ra —catyí ra Jesús.

¹² Tacan tan catyí tucu ra tsihin ra caná tsi ra nu iyó vico can:

—Ndáa quivi coo vico vehe un, ña cua cana un tsi ra vaha iñi tsi un, ndi tsi ra yañi un, ndi tsi ra cuví nyivi un, ndi tsi nyivi nyecú yuvehe un, ñi cuca. Tyin ñi ican cuví cana tucu ñi tsi maa un, na coo tucu vico vehe maa ñi. Tacan tan nacahnya ñi cuenda tsa tsaḥan ñi vico vehe un. ¹³ Maa tyin catyí ra tsihin un tyin ndáa quivi coo vico vehe un, cana tsi nyivi ndaahví, nyivi cuuhví, nyivi coxo, tan tsihin nyivi cuaa. ¹⁴ Tacan tan sii cua cuñí un, tyin ñi ican ña cua cuví natyahví ñi tsi un. Maa tyin cua natyahví Nyoo tsi un quivi cua nandoto un tsihin nyivi vaha.

Nu tsaḥa cuenda ra Jesús iin kuhva nácaa caná ra tsi yo na quihvi yo nu ndacá ñaha Nyoo

(Mt. 22.1-10)

¹⁵ Tan tsiñj iin ra tsa nyaá yuhu mesa ican tsa caahán ra Jesús. Tan catyí ra tsihin ra:

—Sii xaan cua cuñi nyivi tsa cua catsi nu ndacá ñaha Nyoo —catyí ra.

¹⁶ Tacan tan catyí ra Jesús tsihin ra:

—Iin ra ican jacoḡ ra iin vico cahnu xaan vehe ra. Tan caná ra cuaha xaan nyivi. ¹⁷ Tacan tan tsaḡ kuhva tsa cua cuxiñi ñi, tan jacuhún ra tsi musu ra na cuquihin ra

tsi ñi, tyin tsa tahañ tsi kuhva cuxiñi ñi. ¹⁸ Maa tyin tandihí ñi ican quitsahá caahán ñi tyin ña cua cahun ñi. Tan iin ra ican catyí ra: “Ndi jatá yu iin ñuhu. Tan cuñí tsi cahun yu cunyehe yu itsi. Yacan tsicán yu na jaha ra tucahun iñi tsi yu tyin ña cua cahun yu.” ¹⁹ Tacan tan inga ra ican catyí ra: “Ndi jatá ñi yu uhun taahan yunta. Tan cahun yu cunyehe yu tatun vaha ti naha ti. Yacan tsicán yu tumañi iñi tsi ra na jaha ra tucahun iñi tsi yu, tyin ña cua cuví cahun yu.” ²⁰ Tacan tan inga tucu ra ican catyí ra: “Ndi tindahá cuñi ñi yu, tan ña cua cuví cahun yu”, catyí ra. ²¹ Tacan tan musu ra ican cuanuhu ra. Tan catyí tuhun ra tandihí tsa cuví ican tsihin ra tsitoho ra. Tsa tsiñj tsitoho ra tsa tacan, tan cuxaḡn xaan ra. Tan catyí ra tsihin musu ra: “Cúaahan vityin tandihí maa ityi. Tan quitsi ndaca un tsi nyivi ndaahví, nyivi cuuhví, nyivi coxo, tan tsihin nyivi cuaa”, catyí ra. ²² Tan tsa yaha tsaḡ nyico musu ican tan catyí ra tsihin ra tsitoho ra: “Tsa javahá yu tandihí maa tsa cahan un tsihin yu. Tan nuña ca tsitsi vehe”, catyí ra. ²³ Tacan tan tsitoho ra catyí ra tsihin ra: “Cúaahan cua nducu ca nyivi tandihí maa ityi. Tan jañiñi un tsi ñi na quitsi ñi, tyin na cutu tsitsi vehe yu. ²⁴ Tyin catyí yu tsihin un tyin ndi intuhun ñi tsa caná yu tsa jihna, ña cua catsi ñi tsihin yu”, catyí ra —catyí ra Jesús.

Cuaha xaan tundoho nyehé yo tatun cuenda ra Jesús yihí yo

(Mt. 10.37-38)

²⁵ Cuaha xaan nyivi nyicún tsi ra Jesús. Tacan tan nanyehé ra tsi ñi, tan catyí ra tsihin ñi:

²⁶ —Tandihí nyooho tsa nyicún tsi yu, tatun cuñi ca ndo tsi nyivi ndo tan ñavin ca tsi yuhu, ñavin cuenda yu yihí ndo. Tan tatun cuñi ca ndo tsi maa ndo tsa nuu yuhu, ñavin cuenda yu yihí ndo. ²⁷ Tyin nyooho tsa ña cuñi nyehe tundoho tsa cunyicun ndo tsi yu, ña taahán tsi cuví ndo nyivi cuenda yu, tyin tsa nyehé ndo tundoho, yacan cuví cruu tsa taahán tsi cuiso ndo. ²⁸ Tyin tun cua javaha ndo iin vehe, nacañi nuu jihna ndo jiñi ndo tan tyihí tuñi iñi ndo tun quita vehe cahnu can tsihin xuhun tsa nyí tsi ndo. ²⁹ Tyin tatun quitsahá jandaá ndo vehe ican, tan ña cuví jandihí ndo tyin nduve ca xuhun ndo, cua vacu nducu nyivi tsi ndo. ³⁰ Tan cua catyí ñi: “Ra ican quitsahá javahá ra vehe ra, tan ndi ña cuví jandihí ra can”, cua catyí ñi. ³¹ A tatun iin rey tan cuñi ra cañi tahan ra tsihin inga rey ¿a ña cunyata jihna ra tan nyehe ra tatun ñihí tsa utsi mil ñi andaru tsa cuahán tsihin ra cua cañi tahan ra naha tsihin inga rey tsa vatsí tsihin oco mil andaru ican? ³² Tan tatun tsitó ra tyin ña cua cuví jaha canaa ra tsi inga rey ican,

tacan tan cañi ca vatsi inga rey ican, tan cua jacuhun ra tsi musu ra tyin na catyi tuhun ra naha tsihin inga rey ican na jandihî taxin ra itsi. ³³ Tan tacan cuvî nyooho. Tatun ña cahnya iñi ndo tandihî maa tsa cuñî ndo tan tandihî tsa cumi ndo, ña cua cuvî cunycun ndo tsi yu.

Nu jacuahq̄ ra Jesús tyin tumaa ñii tsa ndihî tsa uhva, tacan cuvî yo tatun ndu uvi iñi yo tsa tsinú iñi yo tsi ra

(Mt. 5.13; Mr. 9.50)

³⁴ Vaha ñii tyin jacu uhvâ tsi tsa catsi yo. Maa tyin tatun ndihî tsa uhva tsi, ña vaha ca tsi. ³⁵ Nduve ca tyiñu cuvî javaha tsi. Ndi ña cuvî jatyinyee tsi tsi ñuhu. Tan javitâ yo itsi tyin ña vaha ca tsi. Nyooho tsa iyó soho, tyaa soho ndo tuhun caahán yu —catyî ra Jesús.

15

Nu jacuahq̄ ra Jesús tyin tumaa mbee tsa cuanaá tacan cuvî yo

(Mt. 18.10-14)

¹ Tandihî ra tavâ xuhun cuenda ra ndacá ñaha nda ñu Roma, tan ra iyó cuatyî naha ra, natuhvâ ra naha nu nyîi ra Jesús, tan tyaa soho ra naha tsa caahán ra. ² Tacan tan ra fariseo naha ra tsihin ra maestro cuenda ley vehe ñuhu naha ra quitsahâ caahán nyaa ra naha tsi ra Jesús, tan catyî ra naha:

—Ra ihya, caahán ra tsihin ra iyó cuatyî naha ra. Tan tsatsî ra tsihin ra naha —catyî ra naha.

³ Tacan tan ra Jesús tsahâ cuenda ra cuhva ihya, tan catyî ra:

⁴ —Nyooho tsa iyó iin cientu mbee jana, tun cunaa intuhun ti, ¿a ña cua nacoo ndo tsi tandihî ca ti, tan cunanducu ndo tsi mbee tsa cunaa can nda cuanda tsa nañihî ndo tsi ti? ⁵ Tan tsa yaha nañihî ndo tsi ti, tyiso soco ndo tsi ti. Tan sîi xaan cua cuñî ndo. ⁶ Tan tsa tsaa nyico ndo vehe ndo, tan ndu iin ndo tsihin ra vaha iñi tsi ndo tan tsihin nyivî iyó yatyin yuvehe ndo, tacan tan catyî ndo tsihin ñi tyin na cusîi ndihî iñi ñi tsihin ndo tyin nañihî ndo mbee jana ndo tsa tsinaq̄. ⁷ Tan catyî yu tsihin ndo, tyin tacan tucu sîi xaan ca cuñî ángel Nyoo tsa iyó gloria tsacatyî intuhun ra tsa iyó cuatyî tan nasamá ra cuhva iyó ra, tan ñavin ca tsa cumi xico tsahun cumi taahan nyivî tsa nduve cuatyî tan ña cuñî ca tsi tsa nasama ñi cuhva iyó ñi.

Ñaha tsa tsinaq̄ xuhun tan nañihî ña

⁸ Tan catyî yu tsihin ndo, tyin tatun iin ñaha tan iyó utsi taahan xuhun ña, tan cuanaá iin xuhun ña, cua tyaa ña iin candili. Tan cua tihvî ña taniî tsitsi vehe ña. Tan cua nanducu ña xuhun can nda cuanda tsa nañihî ña can. ⁹ Tan tsa yaha nañihî ña, cua cuhun ña cunanducu ña tsi ñi vaha iñi

tsi ña, tsihin nyivî tsa iyó yatyin yuvehe ña, tan cua cahan ña tsihin ñi: “Cusîi ndihî iñi ndo tsihin yu tyin tsa nañihî yu xuhun yu tsa tsinaq̄”, cua catyî ña. ¹⁰ Tan catyî yu tsihin ndo tyin tacan tucu sîi cuñî ángel Nyoo tsacatyî intuhun ra iyó cuatyî tan ndu uvi iñi ra cuatyî ra —catyî ra Jesús.

Nu jacuahq̄ ra Jesús nácaa cuñî Nyoo tsi iin ra ndu uvi iñi cuatyî

¹¹ Tacan tan tsahâ cuenda ra Jesús inga cuhva ihya tan catyî ra:

—Iin ra, iyó uvi taahan sehe ra. ¹² Tan ra tsa luhlu ca caahán ra tsihin jutu ra tyin na nacuhva ra tsa taahán tsi tsi ra. Tacan tan jutu ra natahvî sava ra tsa tsii ra tan tsahâ ra tsi nduvi taahan sehe ra. ¹³ Tan ña cuaha ñi quivî tan ra luhlu ican xico ra tandihî maa tsa tsahâ jutu ra tsi ra. Tan jandu iin ra xuhun ra, tan quihîin ra ityi, cuahán ra iin ñuu cañi xaan. Tan ndacan tsicoq̄ ra tan janaq̄ ra tandihî maa xuhun ra tsihin tusîi iñi. Tan quihîi xaan icâ ra tsicá nuu ra. ¹⁴ Tacan tan tsaa tama ityi nu iyó ra. Tan quitsahâ tsisocó ra tyin tandihî xuhun ra janaq̄ ra. ¹⁵ Tacan tan tsahan ra tsinducu ra tyiñu jaha ra tsihin iin ra ñuu ican. Tan ra can jacuhun ra tsi ra iin nu iyó quini jana ra, tyin jaha cuenda ra tsi ti naha ti. ¹⁶ Tan cuvî tsi iin tsaha tsisocó xaan ra can. Tan nduve maa tsa catsi ra iyó, ndacua cuñî ra catsi ra tsa tsatsî quini ican naha ti. Tan yoñi maa tsahâ tsa catsi ra. ¹⁷ Tacan tan nducuhun iñi ra tsi jutu ra. Tan nacañî jîñi ra: “¿Náa tsa cuaha ra naha jahâ tyiñu tsihin jutu yo? Tan nduve tsa cumañî tsi ra naha. Tan yoo vityin cuñî cúu yo jahâ soco. ¹⁸ Vityin cua cunuhu yo nu nyaá jutu yo. Tan cua catyî yo tsihin ra tyin tsicoq̄ cuatyî yo nuu Nyoo tan tacan tucu nuu maa ra. ¹⁹ Tan ña taahán ca tsi tsi yo tsa cuvî yo sehe ra, tan na jaha ra tyin iin musu ña ra cuvî tsi yo” cuñî ra tsicá iñi ra.

²⁰ Tacan tan quihîin ra ityi cuanuhî ra nda vehe jutu ra. Tan cañi ca vatsî ra tan nyehê jutu ra tsi ra, tan cundaahvi iñi ra nyehê ra tsi sehe ra. Tan tsinû xaan ra tsijatahan ra tsi ra. Tan tsinumî nyaa ra tsi ra. ²¹ Tacan tan catyî ra tsihin jutu ra: “Tyatya, tsicoq̄ cuatyî yu nuu Nyoo tan tsicoq̄ cuatyî yu nuu tucu maa un. Tan yacan ña taahán ca tsi tsi yu tsa cuvî yo sehe un”, catyî ra tsihin jutu ra. ²² Maa tyin jutu ra tavâ tyiñu ra, tan catyî ra tsihin musu ra: “Tava ndo jahma vaha tan jacunditsi ndo tsi ra ihya. Tan tyihî ndo iin xehe nundaha ra. Tan tyihî ndihî ndo zapatu tsaha ra. ²³ Tan cahñi ndo iin becerru tsa xaahan vaha ca, tyin catsi yo tsi ti. Tyin vityin cua coo yo vico. ²⁴ Tyin ra sehe yu ihya tsa tsihî ra cuñî maa yu, tsicâ iñi yu. Cuñî maa yu tyin ña cua nyehê ca yu tsi ra, tan tsaa nyico ra”, catyî jutu ra can.

Tacan tan quitsahá tsicoo ñi vico. Tan sii xaan cuñi ñi tyin tsaá nuhu nyico ra.

²⁵ Tacan tan inga sehe ra, ra tsa tsitsa, nyii ra tsicuhu. Tan tsa cua tsaá nuhu ra nda yuvehe ra, tan tsiñi ra tyin iyó yaa. Tan tuvj iñi ra tyin tsañi ñi yaa. ²⁶ Tacan tan tsa cuyatyin ra nda yuvehe ra tan cana ra tsi iin musu ra. Tan tsicá tuhun ra tsi ra can náa cuví xaan can. ²⁷ Tacan tan musu can catyí ra: “Ra yañi un tsaá nuhu ra. Tan yacan tava jutu un tyiñu tyin na cahñi ra naha iin becerra xaahan. Tyin vaha tsaá ra yañi un, tan nduve náa tahán ra”, catyí musu can tsihin ra. ²⁸ Tacan tan nduxaan xaan cuñi ra can. Tan ña cuñi ra quihvi ra tsitsi vehe. Tan jutu ra tsahan ra tsicahan ndaahvi ra tsihin ra, tyin na quihvi ra tsitsi vehe. ²⁹ Tacan tan nacahan ra can tan catyí ra tsihin jutu ra: “¿Náa tsa cuaha cuiya jahá tyiñu yu tsihin un? Tan tyaá yahvi xaan yu tsa caahán un. Maa tyin ndi intuhun mbee luhlu ñaha ca cuhva un tsi yu tyin coo vico jaha yu tsihin ra vaha iñi tsi yu. ³⁰ Maa tyin vityin tsaá nuhu nu sehe un ihya, nu tsa janaá xuhun tsihin ñaha sii iñi. Tan tsahá un iin becerra quiti xaahan tsi nu”, catyí ra tsihin jutu ra. ³¹ Tacan tan nacahan jutu ra tan catyí ra tsihin ra: “Sehe yu, yooho tsihin maa yu nyaá un tandihí quivi. Tan tandihí tsa cumí yu, tsi un cuví can. ³² Tan vityin taahán tsi tyin javaha yo vico ihya, tan cusii iñi yo. Tyin tsaá nuhu ra yañi un, ra tsa tsihí, cuñi maa yu. Tumaa tsa nandoto nyico ra cuví can, tyin tsinaá ra, tan nañihí yo tsa inga tsaha”, catyí ra tsihin sehe ra —catyí ra Jesús.

16

Nu jacuahá ra Jesús tsi yo nácaa javaha yo tumañi iñi tsihin tsa iyó tsi yo

¹ Tacan tan catyí ra Jesús tsihin ra tsicá tsihin ra:

—Iyó iin ra, cuca xaan ra. Tan iyó iin ra yihí ndaha tandihí tyiñu jahá ra cuca can. Tan tsahan iin musu ra tsicatyi tuhun ra tsihin ra cuca ican, tyin ra yihí ndaha tyiñu ican, janaá ra tandihí tsa iyó tsi ra. ² Tacan tan cana ra cuca ican tsi ra tan catyí ra tsihin ra: “Tsa cuaha xaan cuatyí javahá un quitsj nu nyaá yu. Vaha ca nacuhva cuenda un tandihí tyiñu tsa javahá un tsi yu. Tyin ña cua jaha tyiñu ca un tsihin yu”, catyí ra cuca can tsihin ra. ³ Tacan tan ra yihí ndaha tyiñu can tsicá iñi ra: “¿Nacaa cua javaha yu vityin? Tsi toho yu ña cuñi ca ra tsa jaha tyiñu yu tsihin ra. Tan nduve tunyee iñi iyó tsi yu tsa jaha tyiñu yu tsihin ñuhu. Tan cahán xaan nuu yu caya yu tsitsi ñuu. ⁴ Maa tyin tsa tsitó yu nácaa cua javaha yu, tacan tan vaha cua cuñi nyivi tsihin yu quivi tsa nduve ca tyiñu cua jaha yu, tan vaha cua

tsaa yu vehe ñi”, tsicá iñi ra can. ⁵ Tacan tan cana ra tsi intuhun intuhun ra tsa nyaá cuenda tsi tsi toho ra. Tan catyí ra tsihin iin ra ican: “¿Náa nyaá cuenda un tsi tsi toho yu?” catyí ra. ⁶ Tacan tan nacahan ra ican tan catyí ra: “Yuhu nyaá cuenda yu cumi mil litru acetey.” Tacan tan ra yihí ndaha tyiñu ican catyí ra tsihin ra: “Quihin un inga tutu ihya. Tan tyaa un uvi mil ñi. Tan javita un tutu tsaahnu ican”, catyí ra. Tacan ica ra can, tan cuahán ra. ⁷ Tacan tan tsaá inga ra. Tan tsicá tuhun tucu ra tsi ra ican: “¿Náa nyaá cuenda un tsi tsi toho yu?” Tan nacahan ra ican: “Nyaá cuenda yu iin mil arroba trigu”, catyí ra. Tacan tan catyí ra yihí ndaha tyiñu ican: “Quihin inga tutu, tan tyaa un una cientu ñi arroba. Tan javita un tutu tsaahnu can”, catyí ra. ⁸ Tacan tan tsi toho tsi toho ra tsa ña vaha tsa javahá ra. Tan iyo xaan cuñi ra cuca can, tyin yatyi xaan ñihí ra cuhva ica ra —catyí ra Jesús.

Tan catyí ra tsihin ra tsicá tsihin ra:

—Nyivi nu ñuhu ñayivi ihya tsa ña tyaá yahvi tsi Nyoo yatyi xaan ca jahá ñi tsi ñi tan ñavin ca nyivi tsa iyó ñuhu nditsin Nyoo añima.

⁹ Tan catyí yu tsihin ndo, tyin cuatyíñu ndo tsa cuca tsa iyó nu ñuhu ñayivi ihya, tan jatynyee ndo tsi nyivi. Tan quivi tsa cua ndihí tsa cuca, cua ñihi ndo coo ndo nu ña cua naa maa.

¹⁰ Tatan tsitó ndo cuatyíñu vaha ndo tsa luxu ñi tsa iyó tsi ndo, tacan tucu tatan cuaha coo tsi ndo cua cuatyíñu vaha ndo itsi. Tyin tatan ña tsitó ndo cuatyíñu ndo tsa luxu ñi tsa iyó tsi ndo, tacan ña cua coto tucu ndo cuatyíñu ndo tatan cuaha coo tsi ndo.

¹¹ Tan catyí yu tsihin ndo, tatan ña javahá ndo tsa vaha tsihin tsa iyó tsi ndo nu ñuhu ñayivi ihya, Nyoo ña cua cuhva ra tsa vaha tsa iyó gloria tsi ndo. ¹² Tyin tandihí tsa iyó tsi ndo, maa Nyoo tsahá nuu itsi tsi ndo. Tan tatan ña javahá ndo tumañi iñi tsihin tsi, ña cua cuhva ra tsa cuví tsi ndo.

¹³ Tin musu ña cuví coo uvi taahan tsi toho ra. Tyin musu ican cua cuñi ca ra tsi iin ra, tan ñavin ca tsi inga ra. Tan vaha ca cua tyaa yahvi ra tsa cahan iin ra, tan inga ra, ña cua tyaa yahvi ra tsa cahan ra can. Ña cua cuví cuñi ndo tsi Nyoo tatan cuñi tucu ndo tsa cuca —catyí ra Jesús. ¹⁴ Tan tsa tsiñi ra fariseo naha ra tandihí tsa cahan ra Jesús, tacan tan quitsahá tsacú nducu ra naha tsi ra. Tyin maa ra fariseo naha ra cuñi xaan ra naha xuhun. ¹⁵ Tacan tan catyí ra Jesús tsihin ra naha:

—Vaha xaan jahá maa ndo tsi ndo nuu nyivi. Maa tyin tsa tsitó Nyoo tyin ña vaha añima ndo. Tandihí tsa cahnu cuñi maa nyivi, Nyoo ña cuñi ra nyehé ra yacan.

Ley Nyoo tsa tyaa ra Moisés, tan tsihin tsa ndacá ñaha Nyoo tsiyo

¹⁶ Ley tsa tsaha Nyoo tsi ra Moisés tyin tyaa ra, tan tsihin tuhun tsa tyaa ra cuvı ndusu yuhu Nyoo tahān tsanaha, yacan cuvı tsa janahā ityi tsi nyıvi nda cuanda quıvi tsa quıtsı ra Juan. Tan ra Juan quit-sahā caahān ra tuhun vaha tyin tsa cuñı quıtsı Nyoo tyin cua cundaca ñaha ra. Tan tandihı nyıvi nducú xaan ñi cuhva tsa quıhvi ñi nu ndacá ñaha ra.

¹⁷ Tan catyı yu tsihin ndo, tyin vasu cunaa andıvi tan nu ñuhu ñayıvi ihya, maa tyin tsa cuvı ley Nyoo tsa tyaa ra Moisés, ña cua cunaa tsi tyin cua cundaa tandihı tsi.

Nu jacuahā ra Jesús tyin ña vaha tsa nacoo ihñi rayıi ñasıhi ra

(Mt. 19.1-12; Mr. 10.1-12)

¹⁸ Tatun iin rayıi tan iyó ñasıhi ra, tan nacoo ihñi ra tsi ña, tan tindaha ra tsihin inga ñaha, coo cuatyı ra nuu Nyoo. Tan tatun tindaha inga rayıi tsihin ñaha tsa nacoo yıi, coo tucu cuatyı ra can nuu Nyoo.

Nu jacuahā ra Jesús tsi nyıvi cuenda ra cuca tsihin ra Lázaro

¹⁹ Tsioco iin ra cuca. Tan vaha xaan jahma tsındıtsı ra. Tan tandihı quıvi iyó vıco jahá ra tan tsatsı vaha ra. ²⁰ Tan tsioco tucu iin ra ndaahvi tsa tsinañı Lázaro. Tan ra ihya cuaha xaan ndihyı iñi tsi ra. Tan nyaá ra yuvehe ra cuca ıcan. ²¹ Ra ndaahvi can, cuñı ra catsı ra, vasu tsa cucoyó xuu mesa ra cuca can. Tan nda cuanda ina tan tsaá ti naha ti nu nyaá ra, tan tsacayaá ti nu uhvi ra. ²² Tan iin quıvi tsihi ra ndaahvi can. Tan ángel maa Nyoo na quıhın tsi ra tan tsındacá ra naha tsi ra nda nu nyaá ra Abraham gloria. Tacan tan tsihi tucu ra cuca can. Tan tsicutsı ñi tsi ra. ²³ Tacan tan ra cuca ıcan nyehé xaan ra tundoho nu nyıi ra anyaya. Tan nanyehé ra nu cañi xaan nu nyaá ra Abraham tsihin ra Lázaro. ²⁴ Tacan tan canā tsaa ra cuca can tan catyı ra: “Tyatya Abraham, cundaahvi iñi tsi yu. Jaquıtsı tsi ra Lázaro tan na jatıı ra luxu nundaha ra. Tan na jatoo ra ndutya nu yaa yu. Tyin nyehé xaan yu tundoho nu cayú ñuhu ihya”, catyı ra. ²⁵ Tan ra Abraham catyı ra tsihin ra: “Nduchun iñi tyin vaha xaan tsioco un nu ñuhu ñayıvi. Tan ra Lázaro, tuhun ndaahvi tsioco ra. Tan vityin vaha iyó ra ihya, tan yooho nyehé un tundoho. ²⁶ Tan inga tucu tuhun, tyin mahñu nu yucú yo ihya cunu xaan xahva. Tan ra yucú nyehé ña cuvı cuhun ra naha nu nyıi un. Tan ndi ra yucú nu nyıi un, ña cuvı quıtsı ra naha nyehé”, catyı ra Abraham tsihin ra cuca can. ²⁷ Tacan tan catyı ra cuca ıcan: “Tyatya Abraham, jaha tumañı iñi tsi yu. Jacuhun tsi ra Lázaro nda vehe jutu yu. ²⁸ Tyin iyó uhun taahan ca ra yañı yu naha

ra. Tan cuñı yu tyin catyı tuhun ra Lázaro tsihin ra naha nácaa nyıi yu nyehé yu tundoho ihya, coto quıtsı ndihı ra naha ihya”, catyı ra. ²⁹ Tacan tan catyı ra Abraham: “Iyó ley tsa tyaa ra Moisés. Tan iyó tuhun tsa tyaa ra cuvı ndusu yuhu Nyoo tahān tsanaha. Na tyaa yahvi ra yañı un naha ra, tun cuñı ra naha”, catyı ra Abraham. ³⁰ Tacan tan catyı ra cuca ıcan: “Tyatya Abraham. Ña cua tyaa yahvi ra naha. Maa tyin tatun yóo tsa nandoto, tan cuhun cucahan tsihin ra naha, tacan tan cua tyaa soho ra naha tan cua nasama ra naha cuhva iyó ra naha”, catyı ra cuca ıcan. ³¹ Tan ra Abraham catyı ra: “Tatun ña cuñı ra naha tyaa yahvi ra naha tuhun tsa tyaa ra Moisés tan tuhun tsa tyaa ra cuvı ndusu yuhu Nyoo tahān tsanaha, vasu ndi maa nandoto iin nyıvi tan cahan ñi tsihin ra naha ña cua tsinu iñi ra naha.”

17

Nu jacuahá ra Jesús tsi yo nácaa jaha cuenda yo tsiyo coto javaha yo tsa ña vaha
(Mt. 18.6-7, 21-22; Mr. 9.42)

¹ Tyehen catyı ra Jesús tsihin ra tsiacá tsihin ra:

—Tacan ñi iyó tsa quıñi caá tsa jatıvi tsi nyıvi. Maa tyin ndahvi ra ndaahvi tsa jatıvi tsi nyıvi. ² Vaha taxın ca na cunuhñı iin yuu jucun ra, tan jacuhun nyıvi tsi ra nu ndutya ñuhu. Coto jatıvi ca ra tsi nyıvi ndi nasama cuhva iyó.

³ Jaha vaha ndo cuenda tsi ndo. Tatun iin ra cutahān tsihin ndo tan javaha ra tsa ña vaha tsihin ndo, cāhan ndo tsihin ra tyin ña vaha tsa javahā ra. Tun nasama ra cuhva iyó ra, jaha ndo tucahnu iñi tsi ra. ⁴ Tan ndi maa javaha ra tsa ña vaha tsihin ndo utsa tsaha tsa iin quıvi, tatun tandihı tsa utsa tsaha tan catyı ra tsihin ndo tyin ndu uvi iñi ra tsa javahā ra; tandihı tsa utsa taahan tsaha can, jaha ndo tucahnu iñi tsi ra.

Nu jacuahá ra Jesús tsi yo tyin tatun tsınú iñi yo tsi ra, cuvı javaha yo cuaha tsa vaha

⁵ Tacan tan catyı ra tavā tyiñu ra Jesús tsihin ra:

—Cuhva tsa tsinu ca iñi ndi tsi un —catyı ra naha.

⁶ Tan catyı ra Jesús tsihin ra naha:

—Tatun tsınú iñi ndo tsi yu vasu tumaa cuhva iin tsıti mostaza tsa luhlu cuii ñi tsi, cua cahan ndo tsihin yutun cahnu tsa nañı sicómoro tsa nyaá ihya: “Na tuhun tsi un, tan cunyaa un nda nu ndutya ñuhu.” Tan cua tyaa yahvi tun tsa cua cahan ndo —catyı ra Jesús.

Nacaa taahán tsi tyaa yahvi yo tsi Nyoo

⁷ Tan catyı ra Jesús:

—Tatun iin nyooho tan iyó iin musu ndo, tan tsaa ra tsa tsahān ra tsiucu tsıjahā tyiñu ra, a tsıjahā cuenda ra quıti jana ndo,

¿a catyí ndo tsihin ra: “Cunya tan catsi un”? Ña tuhvá ndo cahan tacan tsihin ra.⁸ Maa tyin tyehe tuhvá ndo caahán tsihin ra: “Javaha tsa cuxiñi yu. Tan tyjhi un tsa catsi yu. Tsa yaha tsa catsi yu, tacan tan catsi tucu maa un”, tacan tuhvá ndo caahán tsihin ra.⁹ Ndi ña tuhvá ndo nacuhvá tyahvi nyoo tsi ra tyin javahá ra náa tyiñu tava ndo tsi ra.¹⁰ Tacan tucu maa ndo tsihin Nyoo. Quivi ndihí javaha ndo tandihí tsa cahan ra tsihin ndo, taahán tsi catyí ndo tsihin ra: “Nyuhu nduve náa ca tyiñu cuaha xaan javahá ndi. Tyiñu tsa tava ñi un tsi ndi, yacan ñi javahá ndi. Tan ña yaha ca javahá ndi.”

Nu janduvahá ra Jesús tsi utsi taahan ra ndohó cuehe tyahyú

¹¹ Cuahán ra Jesús ityí ñuu Jerusalén tan yahá ra nu cuví xahñu Samaria tsihin Galilea.¹² Tan nu tsaá ra iin ñuu, quita utsi taahan ra cuuhví tsihin cuehe tyahyú. Tan tsicuiñi ra naha ndasava.¹³ Tan caná tsa ra naha tan catyí ra naha:

—Yooho, Maestro Jesús, cundaahvi iñi tsi ndi —catyí ra naha.

¹⁴ Tan tsa nyehe ra Jesús tsi ra naha tan catyí ra tsihin ra naha:

—Cuaahan ndo, cujanaha ndo tsi ndo tsi ra jutu tyin tsa nduvahá ndo.

Tacan tan cuahán ra naha. Tan ityí cuahán ra naha tan nduvahá ra naha.¹⁵ Tacan tan tsa nyehe iin ra ican tyin tsa nduvahá ra, vatsí tsihin tsata nyico ra nu nyíi ra Jesús. Tan quitsahá caná tsa ra, jacahnú ra tsi Nyoo.¹⁶ Tan tsa tsaá ra nu nyíi ra Jesús, tsicuiñi tsiti ra, tan nacañi nuu ra jiñi ra nda nu ñuhu nuu ra Jesús. Tan nacuhvá ra tyahvi nyoo tsi ra. Ra tsa nduvahá ihya, ra Samaria cuví ra.

¹⁷ Tacan tan catyí ra Jesús:

—¿A ñavin utsi taahan ndo nduvahá? ¿Náa inga iin taahan ca ra naha? ¹⁸ ¿A intuhun ñi maa ra inga ñuu ihya vatsí, vatsí jacahnú tsi Nyoo? —catyí ra Jesús.

¹⁹ Tacan tan catyí ra tsihin ra tsa nduvahá ican:

—Nduvita, cuaahan. Nduvahá un tyin tsinú iñi un tsi Nyoo —catyí ra Jesús tsihin ra.

Cuhva cua quitsi Nyoo cua cundaca ñaha ra nu iyó yo ihya

(Mt. 24.23-28, 36-41)

²⁰ Tsicá tuhun ra fariseo naha ra tsi ra Jesús, tan catyí ra naha:

—¿Ama cua quitsi Nyoo cua cundaca ñaha ra?

Tacan tan catyí ra Jesús:

—Ñavin tsa nyehé yo cuví tsa ndacá ñaha Nyoo ihya nu ñuhu ñayivi.²¹ Ña cua cuví catyí nyivi: “Juvín ra nyíi ihya, juvín ra nyíi

ityi ican.” Tyin Nyoo tsa tsaá ra mahñu ndo, tan ndacá ñaha ra tsi nyávi yihí cuando ra —catyí ra tsihin ra naha.

²² Yahá yacan tan catyí ra tsihin ra tsicá tsihin ra:

—Cua tsa quivi tsa cua cuñi ndo nyehe ndo tsi yuhu Rayí quee nda gloria. Maa tyin ña cua nyehe ndo tsi yu.²³ Yihí ñi cua catyí ñi tsihin ndo: “Ihya nyíi ra.” Inga ñi cua catyí ñi: “Ndacan nyíi ra.” Maa tyin coto cuhun ndo cunyehe ndo. Tan ña cunyican ndo tsi ra can tyin ñavin yu cuví can.²⁴ Tyin tandihí nyívi cua nyehe tsi yuhu, Rayí tsa quee nda gloria, quivi cua quitsi nyico yu inga tsaha. Tumaa tsa nyehé tandihí nyívi nu cañi tatsa savi can quituvi ñuhú tatsa can ñi canduvi andivi, tacan cua cuví quivi cua quitsi yu inga tsaha.²⁵ Maa tyin cua nyehe jihna yu tundoho cahnu xaan. Tyin nyívi tsa iyó vityin, ndasi cua cuñi ñi nyehe ñi tsi yu.²⁶ Tumaa quivi tsa tsicoo ra Noé, tacan cua cuví quivi cua quitsi nyico yuhu Rayí quee nda gloria.

²⁷ Quivi tsicoo ra Noé, tsatsi nyívi. Tsihi ñi. Tindahá ñi. Tan tsahá ñi sehe sihi ñi tindaha, nda cuando quivi quihvi ra Noé tsitsi yutun ndoo tan cuñ savi xaan. Tan tandihí ñi can tsihi ñi jahá ndutya.²⁸ Tacan tucu cuví quivi tsicoo ra Lot. Tsatsi ñi. Tsihi ñi. Jatá ñi. Xicó ñi. Tatsi ñi itu. Tan javahá ñi vehe ñi.²⁹ Tan quivi tsa quita ra Lot ñuu Sodoma ican, cuñ ñuhú tsihin azufre tsa quee nda andivi. Tan tsahá ñi ñuhu can tandihí nyívi Sodoma.³⁰ Tacan cua cuví quivi quitsi nyico yu tsa cuví yu Rayí quee nda gloria.

³¹ Tatun nyecú ndo nuquehe quivi quitsi yu, ña quihvi ndo tsitsi vehe tan tava ndo ndaha tyiñu ndo. Tan tatun yucú ndo tsitsi cuhu, ña cunuhu ca ndo yuvehe ndo.³² Nducuhun iñi ndo tsa tahañ ñasihi ra Lot.³³ Tandihí nyooho tsa cuñi tsa iyó nu ñuhu ñayivi ihya, cua cunaa ndo. Tan tandihí nyooho tsa ña tyaá yahvi tsa iyó nu ñuhu ñayivi ihya, cua cacu ndo.

³⁴ “Tan catyí yu tsihin ndo tyin tsacuaa can, uvi taahan nyivi cua cava iin nu tsito. Iin ñi cua naquihin yu. Tan inga ñi cua ndoo ñi.³⁵ Tan uvi taahan ñiñaha, iin caa ñi cua nyico ñi quivi can. Intuhun ña cua naquihin yu. Tan inga ña cua ndoo ña.³⁶ Tan catyí yu tsihin ndo tyin uvi taahan ra cua cuyucu tsicuhu. Intuhun ra cua naquihin yu, tan inga ra cua ndoo ra —catyí ra Jesús.

³⁷ Tsa tsiñi ra naha tsa cahan ra Jesús tacan, tsicá tuhun ra naha tsi ra:

—¿Numaa tahan cua cuví yacan, Jutu Mañi yu? —catyí ra naha.

Tacan tan nacañi ra Jesús, tan catyí ra:

—Nu canyíi ndiyi, ican cua nataca nditsii.

18

Nu jacuahq̄ ra Jesús tyin tumaa tsa caḥan yuhu iin ñaha tsihi yí tsihin juez, tacan taahán tsi ndacan yo tsi Nyoo

¹ Tshá cuenda ra Jesús iin cuhva ihya. Tyin iin nyita ñi cuñí tsi tsa ndacan tahvi ra naha tan ña cundihi iñi ra naha. ² Tan catyí ra:

—Iyó iin ñuu tsa nyaá iin ra cuví juez. Tan juez ican ña tyaá yahvi maa ra tsi Nyoo. Tan ndi nyivi tan ña tyaá yahvi ra. ³ Tan juvin ñuu ican iyó iin ñaha ndaahvi tsa tsihi yí. Tan tsaahán ña tsicahán ña tsihin ra can, tyin tsicán ña cuatyí tsaaha iin nu xaan iñi tsi ña. ⁴ Tan juez ican ña tyaá yahvi nu tsa caahán ña. Ña jandaa maa nu tyiñu tsicán ña. Tan tsanaha xaan tsicán ña. Tacan tan quitsahq̄ tsicá iñi nu juez can: “Vasu ndi maa ña tsinú iñi yu tsi Nyoo, tan nduve náa cuenda yu tsi nyivi, ⁵ maa tyin ñaha ihya tshá xaan ña tsihi tsi yu. Tan yacan cuenda vaha ca cua jacacu yu tsi ña. Tyin coto ña jaña ña tsa vatsí ña, tan cuhva ca ña tsihi tsi yu”, cuñí ra tsicá iñi ra.

⁶ Tacan tan catyí Jutu Mañi yo, ra Jesús:

—Tacan catyí ra juez caquiñi can. Ra juez can ra caquiñi xaan cuví ra maa tyin jatyinyee ra tsi ñaha ndaahvi ican. ⁷ Tan vihi ca cuví Nyoo tsihin yo, ¿a ña cua jatyinyee ra tsi nyivi tsa nacatsí ra tsa tsicán ñi tsi ra nduvi tan ñiñu? ¿A cuatu xaan ca ra tan jatyinyee ra tsi ñi? ⁸ Catyí yu tsihin ndo, tyin numi ca cua jatyinyee ra tsi ñi. Maa tyin quivi tsa cua quitsi nyico yu tsa cuví yu Rayí tsa quee nda gloria, tsitó Nyoo tun nañihi ca yu tsi nyivi tsa tsinú tsa cuii iñi tsi yu —catyí ra Jesús.

Iin cuhva cuenda ra tavá xuhun cuenda ra ndacá ñaha nda ñuu Roma tan cuenda ra fariseo naha ra

⁹ Tacan tan tsaḥq̄ cuenda ra Jesús iin cuhva cuenda ra tsa vaha xaan jahá tsi maa ra naha, tan ndasi cuñí ra naha nyehé ra tsi inga nyivi. Tan catyí ra:

¹⁰ —Iyó uvi taahan ra cuahán vehe ñuhu cua ndacan tahvi ra naha tsi Nyoo. Iin ra ican ra fariseo cuví ra. Tan inga ra can ra tavá xuhun cuenda ra ndacá ñaha nda ñuu Roma cuví ra. ¹¹ Tan ra fariseo ican nduvita nyityi ra, tan quitsahq̄ caahán ra tsihin Nyoo. Tan catyí ra: “Jutu Mañi yu, nacuhvá yu tyahvi nyoo tsi un tyin yuhu ñavin tumaa inga nyivi cuví yu. Tyin iyó ñi suhú ñi. Quiñi icá ñi. Tan yihí ra naha iyó ñasihi ra tan iyó inga ñaha ra naha. Tan ña cuví yu tumaa ra tavá xuhun ihya. ¹² Tyin yuhu uvi tsaḥq̄ tsicó nyitya yu tsa iin vitya. Tan tshá yu utsi taahan xuhun tsa iin iin cientu tsa jahá canaa yu tsi un”, catyí ra can. ¹³ Tan ra tsa tavá xuhun can tsa cañi luxu nyaá ra. Tan ña canq̄ iñi ra nanyehé ndaa

ra. Tan cañi ndaha ra yiqui nyica ra tyin ndu uvi iñi ra cuatyí ra. Tan catyí ra: “Jutu Mañi yu, cundaahvi iñi tsi yu tyin cuaha xaan cuatyí yu iyó”, catyí ra —catyí ra Jesús.

¹⁴ Tan catyí nyico ra Jesús tyehen:

—Catyí yu tsihin ndo tyin Nyoo jahq̄ ra tucahnu iñi tsi ra tavá xuhun ican. Janaq̄ Nyoo cuatyí ra tan cuanuhq̄ ra nda yuvehe ra. Maa tyin ra fariseo ican, nduve tucahnu iñi tsicóq̄ tsi ra, tyin nyivi tsa cahnú xaan jahá ñi tsi ñi, ña cahnú cuví ñi jahá Nyoo, tan nyivi tsa ndaahvi jahá tsi, cua jacahnú Nyoo tsi ñi —catyí ra Jesús.

Nu nasocó ra Jesús tsi tsa nyihi

(Mt. 19.13-15; Mr. 10.13-16)

¹⁵ Tacan tan quitsí ndaca nyivi tsa nyihi tsi ra Jesús tyin tyiso ndaha ra jiñi tsi naha tsi. Maa tyin cuhva tsa nanyehé ra tsicá tsihin ra tyin cuaha tsa nyihi tsaá nu nyaá ra, cuxaan ra naha tan ña tsaḥq̄ ra naha cuhun tsa nyihi can. ¹⁶ Tacan tan canq̄ ra Jesús tsi ra naha, tan catyí ra tsihin ra naha:

—Jaña ndo na quitsi maa tsi naha tsi nu nyaá yu. Tan ña casi ndo. Tyin nyivi tsa ndacá ñaha Nyoo, cuví ñi tumaa tsa nyihi ihya. ¹⁷ Tan catyí yu tsihin ndo tyin tatun ña nyitá iñi ndo tsi Nyoo, tumaa nyitá iñi iin tsa luhlu ihya tsi jutu tsi, ña cua cuví quihvi ndo nu ndacá ñaha Nyoo.

Nu tsaḥq̄ ra Jesús cuhva tyin yí xaan nacuhva cuenda iin ra cuca tsi ra tsi Nyoo

(Mt. 19.16-30; Mr. 10.17-31)

¹⁸ Tacan tan iin ra tsa cuví ityi nuu cuenda vehe ñuhu tsicq̄ tuhun ra tsi ra Jesús, tan catyí ra:

—Maestro, ra vaha cuví un. ¿Nacaa cua javaha yu tan coo yu ñayivi tsa ña cua naa maa? —catyí ra.

¹⁹ Tacan tan catyí ra Jesús tsihin ra:

—¿Nacuenda catyí un tyin ra vaha cuví yu? Tan intuhun ñi maa Nyoo cuví ra vaha. ²⁰ Yooho tsitó un tandihí tuhun tsa tsaḥq̄ Nyoo tyin javaha yo: “Tsa ña coo inga ñaha tsi un. Ña cahñi un nyivi. Ña suhu un. Ña cahan un cuendu siqui nyivi. Tan tyaá yahvi un tsi jutu un tan sihi un” —catyí ra Jesús.

²¹ Tacan tan ra ican catyí ra:

—Tandihí maa yacan tan tyaá yahvi yu nda taḥan luhlu yu tan nda cuanda vityin —catyí ra.

²² Tsa tsiñi ra Jesús tsa caḥan ra can, tacan tan catyí ra tsihin ra:

—Maa tyin cumañi javaha un inga tsa taahán tsi javaha yo. Xico tandihí tsa iyó tsi un. Tan cuhva un xuhun can tsi nyivi ndaahvi. Tan quitsi nyicun un tsi yu. Tacan tan coo tsa cuca tsi un nda gloria —catyí ra.

²³ Maa tyin tsa tsiñi ra tsa caḥan ra Jesús, nducuihya xaan cuñí ra, tyin cuca xaan ra. ²⁴ Tan tsa nyehé ra Jesús tyin nducuihya cuñí ra, tan catyí ra:

—Yii xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi.
²⁵ Yatyí xaan ca cuví yaha iin camellu xuu iin yiqui tucu, tan ñavin ca tsa quihvi iin nyivi cuca nu ndacá ñaha Nyoo —catyí ra.

²⁶ Tan nyivi tsa tsiñi tsa cahān ra catyí ñi:
 —Tatun tacan, ¿yóo cua cuví cacu? —catyí ñi.

²⁷ Tacan tan ra Jesús catyí ra:
 —Tandihi tsa ña cuví javahá nyivi, Nyoo cuví javahá ra tandihi —catyí ra.

²⁸ Tacan tan ra Pedro catyí ra:
 —Jutu Mañi yu, nyuhu tandihi maa tsa iyó tsi ndi nacoḡ ndi, tan nyicún ndi tsi un —catyí ra.

²⁹ Tacan tan catyí ra Jesús tsihin ra:
 —Tsa nditsa catyí yu tsihin ndo, tyin tandihi nyooho tsa nacoḡ vehe, a ñasihi ndo, a yañi ndo, a jutu ndo, a sehe ndo tsacatyí tsa tsahá ndo tsa cundaca ñaha Nyoo tsi ndo,
³⁰ cuaha xaan tsa vaha cua ñihi ndo ñuu ñayivi ihya tan inga ñayivi tsa cua coo, cua ñihi ndo ñayivi tsa ña cua naa maa —catyí ra Jesús.

Inga tsaha jacoto ra Jesús cuhva cua cahñi nyivi tsi ra

(Mt. 20.17-19; Mr. 10.32-34)

³¹ Tan canā siin ra Jesús tsi tsa utsi uvi taahan ra tsicá tsihin ra, tan catyí ra tsihin ra naha:

—Vityin cahun yo nda ñuu Jerusalén. Tyin ndacan cua cundaa tyiñu Rayii tsa queḡ nda gloria: tandihi tyiñu tsa tyaa ra cuví ndusu yuhu Nyoo tahañ tsanaha. ³² Tyin ra xaan iñi tsi yu naha ra cua nacuhva cuenda ra naha tsi yu tsi ra inga ñuu, ra tsa ñavin ra ñuu Israel cuví. Tan cua vacu nducu ra naha tsi yu. Tan cua cahān nyaa ra naha tsi yu. Tan cua tiví sii ra naha nuu yu. ³³ Tan cua cañi ra naha tsi yu, tan cua cahñi ra naha tsi yu, maa tyin tsa tsinu uñi quivi tan cua nandoto yu inga tsaha —catyí ra Jesús.

³⁴ Maa tyin ña cutuñi iñi ra tsicá tsihin ra tsa cahān ra, tan ndi ña tsitó ra naha náa tuhun cahān ra tsihin ra naha. Tyin ña cuví cutuñi iñi ra naha.

Nu janduvahā ra Jesús iin ra cuaa ñuu Jericó

(Mt. 20.29-34; Mr. 10.46-52)

³⁵ Cuhva tsa cua tsaa ra Jesús ñuu Jericó, tan yuhu ityi ican nyaá iin ra cuaa, cayá ra. ³⁶ Tacan tan tsiñi ra cuvaa tsa yahá cuaha nyivi. Tan tsicā tuhun ra náa cuenda ñihi xaan cuvaa. ³⁷ Tan catyí tuhun nyivi tsihin ra tyin ra Jesús, ra ñuu Nazaret, vatsí.
³⁸ Tacan tan quitsahā caná tsaa ra tan catyí ra:

—¡Yooho Jesús, tata ra rey David! ¡Cundaahvi iñi tsi yu! —catyí ra.

³⁹ Tan ra tsa cuahán ityi nuu ican naha ra, catyí ra naha tsihin ra, nacasi ra yuhu ra. Maa tyin tsaa ca canā tsaa ra, tan catyí ra:

—¡Yooho, tata ra rey David! ¡Cundaahvi iñi tsi yu! —catyí ra.

⁴⁰ Tacan tan tsiñiñi ra Jesús. Tan tava tyiñu ra na cahun ra naha cuquihin ra naha tsi ra. Tan cuhva tsa tsaa ra nu nyaá ra Jesús, tan nducú tuhun ra Jesús tsi ra:

⁴¹ —¿Náa cuñi un javaha yu tsihin un?
 Tacan tan ra cuaa ican nacahān ra, tan catyí ra:

—Jutu Mañi yu, cuñi yu nanyehe yu —catyí ra.

⁴² Tacan tan catyí ra Jesús tsihin ra:
 —Nanyehe. Tsa nduvahā tinuu un tyin tsinú iñi un tsi yu —catyí ra.

⁴³ Tan iin yaha ñi, nanyehe ra cuaa can. Tan cueta cuahán ra nyicún ra tsi ra Jesús. Tan jacahnú ra tsi Nyoo. Tan tandihi nyivi tsa nyehe tsa cuví can, jacahnú ndihi tucu maa ñi tsi Nyoo.

19

Nu cuahán ra Jesús vehe ra Zaqueo

¹ Tacan tan quihvi ra Jesús ñuu Jericó. Tan cua yaha ra tsitsi ñuu. ² Tan ñuu can iyó iin ra cuca xaan, nañi ra Zaqueo. Tan cuví ra ityi nuu tsihin ra tava xuhun cuenda ra ndacá ñaha nda ñuu Roma. ³ Ra ihya cuñi xaan ra nacoto ra tsi ra Jesús. Tan ña cuví nyehe ra tsi ra tyin cuaha xaan nyivi cuahan tsihin ra. Tan maa ra ndiqui xaan ra. ⁴ Tacan tan tsinú xaan ra cuahán ra ityi nuu, tan ndaa ra iin nu yutun cahnu tsa nañi sicómoro tsa nyaá yuhu ityi nu cua yaha ra Jesús, tan cuví nyehe ra tsi ra Jesús. ⁵ Tan cuhva tsa quita ra Jesús nu nyaá yutun can, nanyehe ndaa ra ityi siqui tan nyehe ra tsi ra Zaqueo. Tan catyí ra tsihin ra:

—Zaqueo, janumi nḡu un nu yutun juven. Tyin vityin cuñi tsi tsa cahun yu yuvehe un —catyí ra tsihin ra.

⁶ Tacan tan numi xaan nuu ra Zaqueo. Tan sii xaan cuñi ra. Tan quihñ ra tsi ra Jesús cuahán tsihin ra yuvehe ra. ⁷ Tan tsa nyehe nyivi tsa tacan cuví, tandihi ñi quitsahā caahán nyaa ñi tsi ra Jesús. Tan catyí ñi tyin ndoo ra vehe iin ra iyó cuatyí. ⁸ Tan nu nyecú ra naha tsitsi vehe, ra Zaqueo tsinyaa nyityi ra. Tan catyí ra tsihin ra Jesús:

—Jutu Mañi yu, yuhu cua cuhva yu sava tsa iyó tsi yu tsi nyivi ndaahvi. Tan tatun jandaví ñaha yu tsi nyivi tan suhḡ yu tsa tsii ñi, vityin cua nacuhva cuenda yu cumi taahan ca tsaha tsi ñi —catyí ra tsihin ra.

⁹ Tacan tan catyí ra Jesús:
 —Vityin cacḡ un, tan nyivi ra Abraham cuví tsi un. [Tyin nacuhvā cuenda un tsi un tsi Nyoo tumaa nacuhvā cuenda ra Abraham tsi ra tsi Nyoo.] ¹⁰ Tyin yuhu, Rayii tsa

quee nda gloria, vatsí yu vatsí nanducu yu tan vatsí jacacu yu tsi nyivi tsa cuanaa maa —catyí ra Jesús.

Nu jacuahā ra Jesús tsi yo na jaha tyiñu yo tsihin tsa tsahā Nyoo tsi yo
(Mt. 25.14-30)

¹¹ Tan tsitsi tsa tsiñi nyivi tsa caahán ra Jesús, tan quitsahā tsahá cuenda ra inga cuhva ihya tsi ñi. Tyin tsa cuñí tsa ra ñuu Jerusalén. Tan nyivi cuñí maa ñi tyin tsa cua quitsaha cundaca ñaha ra ndacan. ¹² Tacan tan catyí ra:

—Tsicoo iin ra cuca tan tsa cuñí cuhun ra iin ñuu cañi. Tyin ndacan cua quihin cuenda ra tyiñu tsa cuvi ra rey, tyin tacan tan cua quitsi nuhu nyico ra ñuu ra. ¹³ Tsa ndi cumañi ca cuhun ra, cana ra utsi taahan musu ra. Tan tsahā cuenda ra iin xuhun tsi iin iin ra naha. Tan catyí ra tsihin ra naha: “Jaha tyiñu ndo tsihin xuhun ihya nda cuanda quitsi nyico yu”, catyí ra. ¹⁴ Maa tyin nyivi ñuu ra, ndasi cuñí ñi nyehé ñi tsi ra tan ña cuñí ñi tsa cundaca ñaha ra tsi ñi. Tan jacuhun ñi tsi ra cuhun cunyicun tsi ra, tyin cahan ra naha tyin ña cuñí ñi tsa cundaca ñaha ra tsi ñi. ¹⁵ Maa tyin ra ican cuvi maa ra rey. Tacan tan tsaā nyico ra nda ñuu ra. Tan quivi tsa tsaā ra, cana ra tsi musu ra, ra tsa nacoō ra xuhun tsihin. Tyin cuñí ra coto ra nácaa xuhun jahā canaa xuhun ra tsa nacoō ra. ¹⁶ Tan tsaā iin ra ican. Tan catyí ra: “Yooho taa, jahā canaa yu utsi taahan ca siqui xuhun tsa nacoō un tsi yu”, catyí ra. ¹⁷ Tacan tan catyí ra rey can tsihin ra: “Vaha xaan. Yooho cuvi musu vaha. Tyin javahā un ndihi tyiñu tsa tava yu tsi un. Tan vityin cua cundaca ñaha un utsi taahan ñuu”, catyí ra rey can tsihin ra. ¹⁸ Tacan tan tsaā tucu inga ra tsa tsahā ra xuhun. Tan catyí ra: “Juhun xuhun ihya. Jahā canaa yu uhun taahan ca siqui xuhun tsa nacoō un tsi yu”, catyí ra. ¹⁹ Tacan tan catyí ra rey tsihin ra: “Yooho cua cundaca ñaha un uhun taahan ñuu”, catyí ra. ²⁰ Tacan tan tsaā tucu inga ra can. Tan catyí ra: “Juhun xuhun tsa tsahā un tsi yu. Yuhu naquihin vaha yu itsi tsitsi pañitu. ²¹ Tyin yuuhvi xaan yu tsi un, tyin yooho xaan xaan un. Tyin tuhvá un naquihin tsa ñavin tsa tatsj un. Tan naquihin un ndaha tyiñu quitā nu jahā tyiñu inga nyivi”, catyí ra can. ²² Tacan tan ra rey ican catyí ra tsihin ra: “Yooho musu ña vaha cuvi un. Vityin juven ñi tsihin tsa cahan un tsi yu, cua cahan yu tsi un. Tatun tsitó un tyin yuhu xaan yu, tan tsitó un tyin naquihin yu tsa ña tatsj yu, tan naquihin yu ndaha tyiñu inga nyivi, ²³ ¿nacuvi tyin ña tsityihj un xuhun yu banco tyin tsaā yu maa tyin tsa ndaa xuhun yu?” catyí ra rey can. ²⁴ Tan catyí ra tsihin ra nyecú ican: “Quinyaa ndo xuhun tsa tsahā yu tsi ra ihya, tan cuhva

ndo tsi ra tsa jahā canaa utsi taahan ca siqui tsa tsahā yu tsi ra”, catyí ra. ²⁵ Tacan tan catyí ra naha tsihin ra rey can: “Maa tyin ra ican, tsa iyó utsi taahan tsi ra”, catyí ra naha. ²⁶ Tacan tan ra rey ican catyí ra: “Maa tyin catyí yu tsihin ndo tyin ra tsa vaha ca jahā tyiñu tsihin tsa tsahā yu tsi ra, cuaha ca cua cuhva yu tsi ra. Tan ra tsa tsahā yu luxu ñi, tan ña cuñí ra jahā tyiñu ra tsihin tsi, cua quinyaa yu tandihi can tsi ra. ²⁷ Tan tandihi nyivi xaan iñi tsi yu, ñi tsa ña cuñí tsa cundaca ñaha yu tsi ñi, ndaca ndo tsi ñi nyehé, tan cahñi ndo tsi ñi nuu yu ihya”, catyí ra rey can —catyí ra Jesús.

Nu tsaā ra Jesús ñuu Jerusalén
(Mt. 21.1-11; Mr. 11.1-11; Jn. 12.12-19)

²⁸ Tsa yahā cahan ra Jesús yacan, tan jañihi ra cuahán ra ñuu Jerusalén. ²⁹ Tacan tan tsa cuñí tsa ra ñuu Betfagé tsihin ñuu Betania, yatyin ñi iin yacu tsa nañí Olivo, [tyin maa ñi maa yutun olivo iyó ican]. Tava tyiñu ra tsi uvi taahan ra tsicá tsihin ra. ³⁰ Tan catyí ra tsihin ra naha:

—Cuaahan ndo ñuu tsa canyí yatyin ñi ihya. Ican cua nañihi ndo iin burru luhlu, quiti tsa ñaha ca quihí tyayu. Nuuhñi ti. Ndatsi ndo tsi ti. Tan quitsi ndaca ndo tsi ti tsi yu. ³¹ Tatun yóo tsicá tuhun tsi ndo: “¿Nacuenda ndatsi ndo tsi ti?” catyí ndo tsihin ñi: “Ndatsi ndi tsi ti tyin tsiñi ñuhu ti tsi ra ndacá ñaha.”

³² Tacan tan ra tsicá tsihin ra, cuahán ra naha. Tan nañihi ra naha tsi ti tumaa tsa cahan maa ra tsihin ra naha. ³³ Tan cuhva tsa ndatsi ra naha tsi ti, tsaā tsitoho ti. Tan nducu tuhun ra can naha ra tsi ra naha tan catyí ra:

—¿Nacuenda ndatsi ndo burru ihya? —catyí ra naha. ³⁴ Tacan tan nacahan ra can naha ra:

—Ndatsi ndi tsi ti tyin tsiñi ñuhu ti tsi ra ndacá ñaha —catyí ra naha.

³⁵ Tacan tan quihin ra naha tsi ti. Tan tsindacā ra naha tsi ti nu nyii ra Jesús. Tan tyiso ra naha jahma ra naha tsata ti. Tacan tan jandaā ra naha tsi ra Jesús tsata ti. ³⁶ Tacan tan cuahán ra Jesús. Tan cuaha xaan nyivi cuahán tsihin ra tsaquín ñi jahma ñi nu ñuhu ityi nu cua yaha ra, yosó ra burru ican. ³⁷ Tsa tsa cua cuyatyin tandihi nyivi tan ra Jesús nu iñi nuu yucu Olivo, quitsahā caná tsaā tandihi ñi tsinú iñi tsi ra tsihin tsa sii cuñí ñi. Tan jacahnú ñi tsi Nyoo tyin cuaha xaan tsa iyo javahā ra nyehé ñi. ³⁸ Tan catyí ñi:

—¡Na jacahnu yo tsi ra Rey ihya tyin vatsí ra tsihin sivi Nyoo Jutu yo! ¡Tan na coo tsa taxin andivi! ¡Tan na jacahnu yo tsi Nyoo! —catyí ñi.

³⁹ Tacan tan juhva ra fariseo tsa cuahán tsihin ñi, catyí ra naha:

—Maestro, jaceutaxin tsi nyivi ihya —catyi ra naha.

⁴⁰ Tan nacahan ra Jesús tan catyi ra:

—Tatun nyivi ihya tan cutaxin ñi, yuu cua cana tsa, tan cua jacahnu tsi tsi yu —catyi ra Jesús.

⁴¹ Tacan tan tsa tsaq ra Jesús yatyin ñi yuhu ñuu Jerusalén, nanyehé ra ñuu can tan quitsaha tsacú ra tsa cuihya cuñi ra. ⁴² Tan catyi ra:

—Vaha xaan tun tsatyin cuvi coto ndo tan cutuñi ñi ndo nácaa ñihi ndo tsa taxin coo añima ndo vityin ihya. Maa tyin xeehe xaan yihí tsa vaha can, tan ña cuvi nañihi ndo can. ⁴³ Coo quivi cua nyehe ndo tundoho jaha nu xaan ñi tsi ndo cua tyihi cutu nahnu tsi ndo. Tandihí ityi cua quitsi nahnu. Tan cañi tahan nahnu tsihin ndo. ⁴⁴ Tan cua caquin nahnu tsi ndo nu ñuhu tan cua cahñi nahnu tsi ndo. Tan ndi intuhun ca yuu tsa yosó toto tan ña cua nacoo ca nahnu. Tacan cua cuvi tyin maa ndo ña cuñi ndo nacoto ndo tyin tsa vatsí Nyoo, vatsí jacacu ra tsi ndo.

Nu tavá ra Jesús tsi nu xicó tsitsi vehe ñuhu cahnu nahnu

(Mt. 21.12-17; Mr. 11.15-19; Jn. 2.13-22)

⁴⁵ Tacan tan quihvi ra Jesús tsitsi cora vehe ñuhu cahnu. Tan quitsaha tavá ra tandihí nyivi xicó tan nyivi jatá tsa yucú nu quehe. ⁴⁶ Tan catyi ra tsihin nahnu:

—Nu tutu Nyoo catyi tyin vehe Nyoo, nu tsicán tahvi yo tsi ra cuvi tsi. Tan nyooho jananduví ndo itsi vehe ñasuhu —catyi ra Jesús.

⁴⁷ Tan tandihí quivi tsaahán ra Jesús tsi-jacuahá ra tsi nyivi tsitsi vehe ñuhu cahnu can. Maa tyin ra jutu tsa cuvi ityi nuu naha ra, tan ra maestro cuenda ley vehe ñuhu naha ra, tan ra cuvi mandoñi ñuu Jerusalén can, nducú ra naha cuhva cahñi ra naha tsi ra. ⁴⁸ Maa tyin ña ñihí maa ra naha nácaa javaha ra naha tyin tandihí nyivi tan vaha tyaa soho ñi tsa caahán ra Jesús.

20

Nu tsicá tuhun ra cumi tyiñu vehe ñuhu naha ra tsi ra Jesús yóo tavá tyiñu tsi ra tsa cahán ra tsihin nyivi

(Mt. 21.23-27; Mr. 11.27-33)

¹ Iin quivi jacuahá ra Jesús tsi nyivi tsitsi vehe ñuhu cahnu, tan caahán ra nácaa jacacú Nyoo tsi ñi. Tan tsaq ra jutu tsa cuvi ityi nuu naha ra tsihin ra maestro cuenda ley vehe ñuhu naha ra, tan tsihin tucu ra cuvi mandoñi naha ra. ² Tan catyi ra naha tsihin ra Jesús:

—Catiyí tuhun tsihin ndi ¿yóo tavá tyiñu tsi un javaha un tyiñu ihya? —catyi ra naha.

³ Tacan tan ra Jesús catyi ra tsihin ra naha:

—Yuhu cuñi tucu yu nducu tuhun yu tsi ndo. ⁴ ¿Yóo jaquitsi tsi ra Juan tyin jacoondutya ra tsi nyivi? ¿A Nyoo jaquitsi tsi ra, a nyivi?

⁵ Tacan tan ra ican naha ra quitsaha caahán yuhu tahan ra naha tan catyi ra naha:

—Tun catyi yo tyin Nyoo jaquitsi tsi ra Juan, cua catyi ra tsihin yo nacuenta ña tsinú ñi yo tsa cahán ra Juan. ⁶ Tun catyi tucu yo tyin nyivi jaquitsi tsi ra, tandihí nyivi cua cahñi ñi tsi yo tsihin yuu. Tyin tandihí ñi, tan cuñi ñi tyin ndusu yuhu Nyoo cuvi ra Juan —catyi ra naha.

⁷ Tacan tan nacahan ra naha tsihin ra Jesús tyin ña tsitó ra naha yóo tavá tyiñu tsi ra Juan jacoondutya ra tsi nyivi. ⁸ Tacan tan ra Jesús catyi ra tsihin ra naha:

—Ndi yuhu, tan ña cua catyi tuhun yu tsihin ndo yóo tavá tyiñu tsi yu tsa javaha yu tyiñu ihya.

Nu jacuahá ra Jesús tyin tumaa cuvi juhva ra caquiñi naha ra, tacan cuvi ra tsa cua cahñi tsi ra

(Mt. 21.33-44; Mr. 12.1-11)

⁹ Tacan tan tsaq cuenda ra Jesús iin cuhva ihya tsi nyivi:

—Iin ra, tatsi cuaha ra nu ñuhu ra yoho tsiti yucu tsa cua cuvi vinu. Yaha can tan tsaq nuu ra ñuhu can tsi juhva ra jahá tyiñu. Tacan tan naha cuahán ra inga ñuu. ¹⁰ Tan quivi tsa ñiñ tsiti nu yoho can, tacan tan jacuhun ra iin musu tyin naquihin ra juhva tsiti tsa taahán tsi tsi maa ra. Maa tyin cañi xaan ra jahá tyiñu ican naha ra tsi musu can. Tan nundí ra jacunuhú ra naha tsi ra. ¹¹ Tacan tan tsitoho yoho can jacuhun ra inga musu. Juvín ñi cañi xaan ra can naha ra tsi ra. Tan cahán nyaa ra naha tsi ra. Tan jacunuhú ra naha tsi ra. Tan juvín ñi nduve tsa tsaq ra naha cuiso ra cunuhu ra. ¹² Tacan tan ra cuvi tsitoho yoho can jacuhun nyico ra inga ra. Maa tyin juvín ñi tacan javahá nyico ra naha tsihin ra can. Tan jañicuehe ra naha tsi ra. Tan tavá ra naha tsi ra.

¹³ Yaha can tan catyi tsitoho ñuhu ican: “¿Nacaa cua javaha yu vityin? Vaha ca cua jacuhun yu sehe yu, ra tsa cuñi xaan yu. Vasiqí cua tyaa yahvi ra naha tsi ra, tyin sehe yu cuvi tsi ra”, catyi ra. ¹⁴ Maa tyin tsa nyehe ra jahá tyiñu can naha ra tsi ra sehe ra, natuhún tahan ra naha: “Juvín ra ihya cua ndoo tsihin ñuhu ihya tatun cúu jutu ra. Vaha ca na cahñi yo tsi ra. Tacan tan ndoo maa yo tsihin ñuhu ihya”, catyi ra naha. ¹⁵ Tacan tan tavá ra naha tsi sehe tsitoho ñuhu ican ityi tsata cora, tan tsañi ra naha tsi ra —catyi ra Jesús.

Tacan tan catyi ra Jesús tsihin nyivi nyecú ican:

—¿Náa cua javaha tsitoho ñuhu ican tsihin ra can naha ra tyin tsaññi ra naha sehe ra?
 16 Catyi yu tsihin ndo tyin cua quitsi ra tan cua cahñi ra tsi ra jahá tyiñu ican naha ra. Tan cua cuhva ra ñuhu ican tsi inga ra naha —catyi ra Jesús.

Tan tsa tsiñi nyivi tsa caahán ra, nayuhvi xaan ñi cuvı. Tan catyi ñi:

—¡Na cuñi Nyoo tahan yo tacan! —catyi ñi.

17 Maa tyin ra Jesús nanyehę ra nuu ñi tan catyi ra:

—Tun tacan tsicá iñi ndo ¿náa cuñi tsi catyi tsa nyaá nu tutu Nyoo? Tyin catyi tsi tyehen:

Yuu tsa ña cuñi ra javaha vehe cuatyinu ra, yacan cuvı yuu tsa tsiñi ñuhu ca.

18 Yoo nyivi cua canacava tsata yuu can, cua tahnu cuatyı ñi. Tan tatun maa yuu can canacava tsata ñi cua taxin nyihi ñi —catyi ra Jesús.

19 Tan ra jutu tsa cuvı ityi nuu naha ra tan ra maestro cuenda ley vehe ñuhu naha ra, tuvı iñi ra naha tyin tsa cahan ra Jesús tacan, tsi maa ra naha nañi can. Tan cuñi ra naha tiin ra naha tsi ra tyin cahñi ra naha tsi ra. Maa tyin ña tsitó maa ra naha náca javaha ra naha, tyin nayuhvi ra naha tsi nyivi.

Nu jacuahara Jesús tsa cuenda tsa tyahvi nyivi xuhun tsi ra ndacá ñaha ñuu Roma (Mt. 22.15-22; Mr. 12.13-17)

20 Tacan tan jacuhun ra naha tsi juhva ra nducu cuhva tsi ra Jesús. Tan jahá ra naha tyin ra vaha cuvı ra naha. Tyin tacan tan coto ra naha náa tsa ña vaha cua cahan ra Jesús tan cuvı tiin ra naha tsi ra. Tan cuhva cuenda ra naha tsi ra tsi ra ndacá ñaha. 21 Yacan tsicá tuhun ra naha tsi ra Jesús:

—Maestro, tsitó ndi tyin vaha tsa caahán un. Tan jacuahá un tsa vaha tsi nyivi. Tan ñavin cuhva iyó ñi nyehé un maa tyin nyehé un cuhva iyó añima ñi. Tan maa ñi maa tsa nditsa tyin ityi Nyoo janahá un. 22 Catyi tsihin ndi ¿a vaha tsa tyahvi yo tsa tsicán ra ndacá ñaha nda ñuu Roma tsi yo, a ña vaha? —catyi ra naha.

23 Tan ra Jesús tuvı iñi ra tyin nducu cuhva ra naha tsi ra. Tan catyi ra tsihin ra naha:

—¿Nacuenda cuñi ndo nducu cuhva ndo tsi yu? 24 Janaha jihna ndo iin xuhun tsi yu, na nyehę yo. ¿Yoo nuu nyaá xuhun can tan yoo sivi nyaá can? —catyi ra.

Tacan tan nacahan ra naha:

—Nuu ra ndacá ñaha, ra cuvı rey cahnu, nyaá can tan juven ñi sivi ra nyaá can —catyi ra naha.

25 Tacan tan catyi ra Jesús:

—Tun tacan, cuhva ndo xuhun can tsi ra ndacá ñaha tyin tsi maa ra cuvı tsi. Tan

cuhva ndo tsi Nyoo tsa taahán tsi tsi ra —catyi ra Jesús tsihin ra naha.

26 Tan ña cuvı maa jandavi ñaha ra naha tsi ra Jesús tsihin tsa caahán ra tacan tsihin nyivi. Tan iyo xaan cuñi ra naha tsa nacahan ra. Tan taxin ña cuvı ra naha.

Nu cuñi ra cuvı saduceo naha ra jandavi ñaha ra naha tsi ra Jesús

(Mt. 22.23-33; Mr. 12.18-27)

27 Tsa yaha can tan tsa juhva ra cuvı saduceo nu nyi ra Jesús. Maa ra naha cuvı ra tsa catyi tyin ña nandoto nyivi tun tsa tsihi ñi.

28 Tacan tan catyi ra naha tsihin ra Jesús:

—Maestro, jandoo ra Moisés tyiñu ihya tyin tatun iin ra tsihi tan nandoo ñasihi ra, tatun nduve sehe ra tsicoo tsihin ña, taahán tsi tsa tindaha ra cuvı yañi ra tsihin ña, tan coo sehe ra tsihin ña tsa cuenda ra yañi ra.

29 Maa tyin cuñi ndi coto ndi náca, tyin tsicoo iin ra tan tsicoo utsa sehe ra. Tan ra tsa ñihi ca tsicoo ñasihi ra, maa tyin nduve sehe ñi tsicoo, tan tsihi ra. 30 Tacan tan naquihın ra tsa tsinu uvi tsi ña can. Tan nduve tucu sehe ñi tsicoo. Tan tsihi tucu ra can. 31 Tan juven ñi tacan javaha ra tsinu uñi. Tandihı tsa utsa ra naha javaha tacan. Ndi intuhun ra tan ña tsicoo sehe ra tsihin ña. 32 Tan nu ndihı tuhun tsihi ndihı maa ña. 33 Tan cuñi ndi coto ndi yoo ra cua cuvı yii ña tsitsi tsa tandihı tsa utsa taahan ra naha quivi cua nandoto nyivi —catyi ra saduceo naha ra.

34 Tacan tan nacahan ra Jesús, tan catyi ra:

—Ihya nu ñuhu ñayivi, rayı tan ñaha tindahá ñi. 35 Maa tyin nyivi tsa nacatsı Nyoo tyin nandoto ñi tan coo ñi nu ndacá ñaha ra, ña tindaha ca ñi tan ndi ña cua cuhva ca ñi sehe ñi tindaha. 36 Tan nduve tuhun tsihi iyó ndacan tyin cua cuvı ñi tumaa ángel. Tan cua cuvı ñi sehe Nyoo tyin nandoto ñi. 37 Tan tsa cuenda tuhun tsa nandoto ndiyi. Tsa nditsa cuvı tsi tyin yacan jacoto ra Moisés nu nacatyı tuhun ra náca cayú taca iñu can. Tsihin can jacoto ra tsi yo tyin nyivi tsihi cua nandoto ñi. Tyin catyi ra: “Jutu yo Nyoo cuenda ra Abraham, tan cuenda ra Isaac, tan cuenda ra Jacob”, catyi ra Moisés. 38 Tacan catyi ra tyin Nyoo, ñavin Nyoo cuenda nyivi tsihi cuvı ra. Nyoo cuenda nyivi nyito cuvı ra. Tyin tsa cuenda Nyoo tandihı yo tan nyito añima yo vasu tsa tsihi cuñu ñuhu yo —catyi ra Jesús.

39 Tacan tan juhva ra maestro cuenda ley vehe ñuhu naha ra catyi ra naha:

—Vaha xaan nacahan un, Maestro —catyi ra naha.

40 Tacan tan ña caná ca maa iñi ra naha nducu tuhun ra naha náa inga ca nducu tuhun ra naha tsi ra.

Ra Cristo cuví ra tata ra David, tan juvin ñi cuví tucu ra Sehe Nyoo

(Mt. 22.41-46; Mr. 12.35-37)

⁴¹ Tacan tan tsicã tuhun ra Jesús tsi ra naha:

—¿Nacuenda catyí yo tyin ra Cristo tata ra David cuví tsi ra? ⁴²⁻⁴³ Tyin juvin ñi maa ra David catyí ra nu libro Salmo:

Caahán Nyoo Jutu yu tsihin Jutu Mañi yu, ra Cristo, tan catyí ra tsihin ra:

“Cunya xiiin cuaha yu nda cuanda cuhva yu tsi nu xaan iñi tsi un tyin cuhvi tsaha un tsi nahnu”, catyí Nyoo tsa tsatyíñu ra yuhu ra David tahan tsanaha.

⁴⁴ ¿Nacaa tsa tata ra David cuví tucu ra Cristo, tan juvin ñi maa ra David catyí tyin Jutu Mañi ra cuví tsi ra Cristo? —catyí ra Jesús.

Nu cahan ra Jesús tyin cuaha xaan cuatyí ra maestro cuenda ley vehe ñuhu iyó

(Mt. 23.1-36; Mr. 12.38-40, Lc. 11.37-54)

⁴⁵ Tandihí nyívi tsiñí ñi tsa cahan ra Jesús tsihin ra tsicá tsihin ra nu cahan ra tyehe:

⁴⁶ —Jaha ndo cuenda tsi ndo tsihin ra maestro cuenda ley vehe ñuhu naha ra. Tyin taahán xaan iñi ra naha cunditsi ra naha jahma nañi. Tan cuahan ra naha nuyahvi, cuñi ra naha tsa cuhva nyívi yucú nuyahvi nacumi tsi ra naha tsihin tsa jaha ñi tsa ñayívi tsi ra naha. Tan nanducú ra naha tyayu vaha cunyeu ra naha tsitsi vehe ñuhu, tan nu cuahán ra naha vico. ⁴⁷ Tan naha tsicán tahvi ra naha tsi Nyoo nu tuví, tsa cuñi ra naha tsa nyehe nyívi tan catyí ñi tyin vaha xaan nyívi cuví ra naha. Maa tyin juvin ñi maa ra naha cuví ra quinyaá vehe ñi ndaahvi tsa tsiñí yá tyin ña cuví tyahvi ñi xuhun tsa tavá ra naha tsi ñi. Yacan ñihi xaan cua tatsi tuñi Nyoo tsi ra naha —catyí ra Jesús.

21

Tsa jamañi iin ñaha ndaahvi tsa tsiñí yá

(Mr. 12.41-44)

¹ Tan nyehe ra Jesús tyin cuaha xaan nyívi cuca tyihí ñi xuhun tsitsi caja tsa nyíi tsitsi vehe ñuhu cahnu. ² Tan nyehe tucu ra tsi iin ñaha ndaahvi tsa tsiñí yá. Tan tyihí ña uvi taahan ñi xuhun nyihí. ³ Tan catyí ra:

—Tsa nditsa catyí yu tsihin ndo tyin nuu Nyoo cuaha ca xuhun tyihí ñaha ndaahvi ihya tan ñavin ca tandihí ñi cuca can. ⁴ Tyin tsa ndoo ña tyihí ñi. Tan ñaha ihya tyihí ña tandihí tsa iyó tsi ña —catyí ra.

Nu cahan ra Jesús tyin cua tani vehe ñuhu cahnu

(Mt. 24.1-2; Mr. 13.1-2)

⁵ Tacan tan juhva nyívi natuhún ñi tuhun cuenda vehe ñuhu cahnu ican. Tan catyí ñi tyin sii xaan caá yuu. Tan sii xaan caá tsa jamañi nyívi. Tacan tan catyí ra Jesús:

⁶ —Coo quívi tan cua tani tandihí tsa nyehé ndo ihya. Tan ndi intuhun ca yuu tan ña cua coso ca siqui inga tsi. Ndhí tsi cua caní nu xaan iñi tsi ndo.

Tsa cua cuví tsa ndi cumañi ca naa ñuhu ñayívi

(Mt. 24.3-28; Mr. 13.3-23)

⁷ Tacan tan nducú tuhun nyívi tsi ra Jesús, tan catyí ñi:

—Maestro, ¿ama cua cuví tandihí tsa caahán un ihya? ¿Nacaa tan coto ndi tatun tsa cuyatyin tsa naa ñuhu ñayívi? —catyí ñi.

⁸ Tacan tan catyí ra Jesús:

—Jaha vaha ndo cuenda, coto jandavi ñaha nyívi tsi ndo. Tyin cuaha xaan ra cua quitsi, tan cua cuatyíñu ra naha sivi yu, tan cua catyí ra naha: “Yuhu cuví Cristo, ra tsa jaquitsi Nyoo. Tyin tsa cuñi naa ñuu ñayívi”, cua catyí ra. Maa tyin ña cunyicun ndo tsi ra naha. ⁹ Tan quívi cua ñihi tuhun ndo tyin tsa iyó cuatyí tan ñihi cañi tahan nyívi, ña nayuhvi ndo. Tyin tandihí can taahán tsi cuví tsa jihna ñi. Maa tyin cumañi ca tsa quívi tsa cua naa ñuhu ñayívi.

¹⁰ Tan catyí tucu ra:

—Nyívi iyó iin ñuu cua cañi tahan ñi tsihin nyívi inga ñuu. Tan cua coo cuatyí. ¹¹ Tan ñihi xaan cua taan. Tan cua coo tama. Tan cua coo cuehe tandihí ñi ityi. Tan cua nyehe nyívi tsa yuuhví ityi andívi. Tan cuaha xaan tsa iyo nahnu tsa ña tuhvá nyívi nyehe tan cua nyehe ñi. ¹² Maa tyin tsa ndi cumañi ca cuví yacan, cua cuxaan iñi nyívi tsi ndo. Tan cua ndacan ñi cuatyí tsaha ndo. Tyin cua cutuñi ndo tan cua cuhva cuenda ñi tsi ndo tsi ra jutu. Tan cua tyihí ñi tsi ndo tsitsi vehe caa. Tan cua cundaca ñi tsi ndo nuu rey tan nuu ra ndacá ñaha tsacatyí sivi yuhu.

¹³ Tacan tan cuví cahan ndo tuhun yu tsihin ñi. ¹⁴ Maa tyin jaha ndo cuenda tan ña cua caca iñi ndo náa tuhun cua nacahan ndo tsihin ra ndacá ñaha ican. ¹⁵ Tyin yuhu cua cuhva yu tuhun cua cahan ndo. Tan cua cuhva yu tsa nyityi jiñi ndo nu cua cahan ndo. Ndi intuhun nu xaan iñi tsi ndo tan ña cuví jaha nahnu tsi ndo. ¹⁶ Maa tyin nyívi cua cuhva cuenda ñi tsi ndo tsi nu xaan iñi tsi ndo. Nda cuanda jutu ndo tan sihi ndo, ra cuví yañi ndo, nyívi ndo, tan ra vaha iñi tsi ndo cua cuhva cuenda ra naha tsi ndo tsi nu xaan iñi tsi ndo. Tan yihí nyooho cua cahñi nyívi tsi ndo. ¹⁷ Tandihí nyívi tan ndasi cua cuñi ñi tsi nyehe ñi tsi ndo tsacatyí yuhu. ¹⁸ Maa tyin ndi intuhun ixi jiñi ndo tan ña cua cunaa. ¹⁹ Tatun ña ndu uvi iñi ndo tsa nyicun ndo tsi yu, cua cacu ndo.

²⁰ Quívi cua nyehe ndo tyin ñi canduvi yuhu ñuu Jerusalén ihya nyecú andarú, coto ndo tyin tsa cuñi naa ñuu ihya. ²¹ Tan nyívi iyó ñuu tsa cayucú Judea, cua cunu ñi tan cuhun xeehe ñi ityi yucu. Tan nyívi iyó ñuu

Jerusalén ihya, cua quita ñi. Tan nyivi iyó tsitsi cuhu, ña cua quitsi nuhu ñi ñuu ihya. ²² Tyin yacan cuví quivi tsa cua tatsi tuñi Nyoo tsi nyivi ñuu ihya. Tyin tsa cua cuvi tandihi cuhva catyí nu tutu Nyoo. ²³ Tan ndahvi ñiñaha tsa ñuhu sehe quivi can. Tan ndahvi ñi tsa iyó sehe lee tsa ndi tyaxín. Tyin cuaha xaan tundoho cua nyehe ñi tan tandihi nyivi. Tyin cahnu xaan tsa uhvi cua nyehe nyivi ñuu Jerusalén ihya cua jaha Nyoo. ²⁴ Andaru cua cahñi ra naha tsi juhva nyivi tsihin mityi. Tan cua tñin ra naha juhva ñi tan cundaca ra naha tsi ñi ñuu nahnu. Tan nyivi tsa ñavin nyivi Israel cuví, cua cuyucu ñi ñuu Jerusalén ihya nda cuanda quivi tsa catyí maa Nyoo.

Nacaa cua quitsi Rayi tsa quee nda gloria inga tsaha

(Mt. 24.29-35, 42-44; Mr. 13.24-37)

²⁵ Tacan tan cuaha tsa iyo cua nyehe nyivi nu ñicanyii, tan nu yoo, tan nu tiñuu. Tan ihya nu ñuhu ñayivi cua nayuhvi ñi tsihin tsa iyo cua nacatyin ndutya ñuhu. ²⁶ Tan cua cúu naaha ñi tsihin tsa yuuhvi ñi tsa tsicá iñi ñi náa ndihi tsa cua cuví ihya nu ñuhu ñayivi. Tyin nda cuanda tsa iyo andivi cua nacanda tan taan. ²⁷ Tacan tan cua nyehe ñi tsi yuhu, Rayi tsa quee nda gloria, vatsi nuu yu tsitsi vico tsihin tunyee iñi Nyoo, tan tsihin tsa cahnu cuví ra. ²⁸ Tan cuhva tsa cua quitsaha yacan tan jandu iin ndo iñi ndo tan cusñi iñi ndo tyin numi xaan cua cacu ndo —catyí ra.

²⁹ Tacan tan tsaha cuenda ra Jesús iin cuhva ihya, tan catyí ra:

—Jaha ndo cuenda yutun higuera, tsihin tandihi ca yutun. ³⁰ Tatun tsa nduyutyá numa tun tsa cuyatyin cuun savi. ³¹ Tan tacan tucu nyooho, tatun tsa nyehe ndo tyin tsa quitsaha cuví tandihi tsa cahán yu tsihin ndo, coto ndo tyin tsa nyanaá quivi tsa cundaca ñaha Nyoo nu ñuhu ñayivi ihya.

³² Maa tyin tsa nditsa catyí yu tsihin ndo tyin yacan cua cuví jihna tsa ndi cumañi ca cúu nyivi tsa iyó nu ñuhu ñayivi. ³³ Coo quivi cua naa andivi tan ñuhu ñayivi, maa tyin tuhun caahán yu, ña cua cundihí tsi.

³⁴ Tan jaha ndo cuenda tsi ndo coto ndundava iñi ndo tsihin tsa cua javaha ndo tsa caquiñi, a tsa coho ndo nyixi, a tsa caca xaan iñi ndo tundoho ñayivi ihya. Jaha ndo cuenda coto ndundava iñi ndo tsihin yacan. Tan coto sana iñi ndo tan quita quivi cua quitsi yu tan cua quitsi tundoho cua nyehe ndo. ³⁵ Tyin tacan cua cuvi, tandihi nyivi iyó nu ñuhu ñayivi, sana iñi ñi tan tumaa iin tsa cua nacasi Nyoo nu yucú ñi tan ña cua cuvi quita ñi. ³⁶ Maa tyin nyooho cūatu ndo. Ndaçan tahvi ndo tsi Nyoo tandihi quivi, na jacacu ra tsi ndo. Tan ña nyehe ndo tandihi tundoho tsa cua coo. Ndaçan tahvi ndo,

tacan tan cua cuvi tsa ndo nu nyaá yuhu, Rayi tsa quee nda gloria —catyí ra Jesús.

³⁷ Tan tandihi quivi jacuahá ra Jesús tsi tandihi nyivi tsitsi vehe ñuhu cahnu. Tan tsa tsacuaa tsicá ra yucu Olivo. ³⁸ Tan tandihi nyivi tsaá ñi tsitsi vehe ñuhu cahnu ndihi tsa tuvi, tyin tyaa soho ñi tsa caahán ra.

22

Nu cua xico ra Judas Iscariote tsi ra Jesús
(Mt. 26.1-5, 14-16; Mr. 14.1-2, 10-11; Jn. 11.45-53)

¹ Tan tsa nyanaá yatyin quivi tsa cua coo vico pascua, vico nu tuhvá nyivi tsatsí paan tsa nduve yutsan iya yihí. ² Tan ra jutu tsa cuví ityí nuu naha ra tsihin ra maestro cuenda ley vehe ñuhu naha ra, nducú xaan ra naha cuhva cahñi ra naha tsi ra Jesús. Maa tyin yuuhvi ra naha tsi nyivi.

³ Tacan tan quihvi nu ña vaha tsi nu Judas Iscariote. Tan nu ihya cuví iin tsa utsi uvi taahan ra tsa nacatsí ra Jesús. ⁴ Tan nu ihya, tsahan nu tsicahan nu tsihin jutu tsa cuví ityí nuu tan tsihin ra yihí ndaha tsi ra jahá cuenda vehe ñuhu cahnu naha ra. Tan natuhun tahan ra naha nácaa cua cuhva cuenda nu Judas tsi ra Jesús tsi ra naha. ⁵ Tan ra ican naha ra sñi xaan cuñí ra naha. Tan tyihí ra naha cuhva tyin cuhva ra naha xuhun tsi ra Judas. ⁶ Tan ra Judas ndoo ra vaha. Tan quitsaha nducú ra cuhva ama cua nacuhva cuenda ra tsi ra Jesús tsi ra can naha ra, cuhva tsa nduve nyivi yucú tsihin ra Jesús.

Nu cuxiñi ra Jesús tsihin ra tsicá tsihin ra
(Mt. 26.17-29; Mr. 14.12-25; Jn. 13.21-30; I Co. 11.23-26)

⁷ Tan tsaá quivi tsa cuví vico tsa tsatsí nyivi paan tsa nduve yutsan iya yihí. Tan juvin ñi quivi ican tuhvá ñi tsahñi iin mbee luhlu tsa vico pascua can. Tyin catsi ñi tsi ti.

⁸ Tan ra Jesús jacuhun ra tsi ra Pedro tsihin ra Juan, tan catyí ra tsihin ra naha:

—Cuaahan ndo cūanduvaha ndo mbee tsa cua cuxiñi yo cuenda vico pascua —catyí ra.

⁹ Tacan tan nducú tuhun ra naha tsi ra:

—¿Numaa cuñi un javaha ndi tsa cuxiñi yo? —catyí ra naha.

¹⁰ Tacan tan catyí ra Jesús tsihin ra naha:

—Cuaahan ndo tsitsi ñuu. Ican cua nañihi ndo tsi iin ra nyisó iin quivi ndutya. Cuaahan ndo tsata ra tan quihvi ndo vehe nu quihvi ra. ¹¹ Tan catyí ndo tsihin tsitoho vehe can: “Ra cuví Maestro, cuñi ra coto ra numaa nyaá cuarto nu cua cuxiñi ra tsihin ra tsicá tsihin ra, tyin jacahnu ra vico pascua.” Tacan catyí ndo tsihin ra. ¹² Tacan tan cua janaha ra iin cuarto cahnu ityí siqui, nu tsinu uvi pisu tsi ndo. Tan tsa nduvahá maa

tsi. Tan ndacan cua javaha ndo tsa cuxiñi yo —catyí ra tsihin ra naha. ¹³ Tacan tan cuahán ra naha. Tan nañihí ra naha tandihí tumaa tsa cahán ra Jesús. Tacan tan na iça vaha ra naha tsa cuxiñi ra naha cuenda vico pascua.

¹⁴ Tacan tan tsa tahán tsi cuhva tsa cuxiñi ra Jesús tsihin tandihí ra tava tyiñu ra, tsinyecu ra naha yuhu mesa. ¹⁵ Tacan tan catyí ra Jesús:

—Cuñí xaan yu cuxiñi yu tsihin ndo cuenda vico pascua ihya tsa ndí cumañi ca nyehe yu tundoho tan cúu yu. ¹⁶ Tan catyí yu tsihin ndo tyin ña cua catsi ca yu inga tsaha tsa cuenda vico ihya, nda cuanda tahan tsi inga tsaha nda nu ndacá ñaha Nyoo —catyí ra.

¹⁷ Tacan tan quiñin ra iin vasu vinu. Nacuhva ra tyahvi nyoo tsi Nyoo. Yahá can tan catyí ra tsihin ra nyecú tsihin ra:

—Quiñin ndo tsehe. Tan coho ndo luxu luxu. ¹⁸ Tyin catyí yu tsihin ndo tyin ña cua coho ca yu vinu nda cuanda quitsi Nyoo tan quitsaha cundaca ñaha ra nu ñuhu ñayivi ihya —catyí ra.

¹⁹ Yahá can tan quiñin ra paan, tan tsahá ra tyahvi nyoo tsi Nyoo, tan tsahnya sava ra can. Tsahan tsahá ra can tsi ra naha. Tan catyí ra tsihin ra naha:

—Paan ihya cuví tumaa cuñu ñuhu yu. Tyin cua cuhva cuenda yu tsi yu tan cúu yu tsa cuenda tsa vaha tsi maa ndo. Tacan cuñí tsi nducuhun iñi ndo tsi yu tan cuxiñi ndo tyehen —catyí ra.

²⁰ Tan tsa yahá cuxiñi ra naha, tacan tan quiñin ra vasu vinu, tan catyí ra:

—Tsihin vinu ihya ndoo Nyoo tyiñu tsihin ndo vityin. Tyin vinu tsa yihí tsitsi vasu ihya, tumaa niñi yu cuví tsi. Tan tsa vaha tsi nyooho tan cua cati niñi yu. Tan cua cúu yu.

²¹ Maa tyin vityin, ra tsa cua nacuhva cuenda tsi yu tsi ra xaan iñi tsi yu, iin ñi nu yosó ndaha ra tsihin ndaha yu nu mesa ihya. ²² Tyin yuhu, Rayi tsa quee nda gloria, cua tahan yu tumaa tsa nyaá maa tsa cua tahan yu. Maa tyin ñdahvi ra tsa cua nacuhva cuenda tsi yu! —catyí ra Jesús.

²³ Tacan tan ra tsicá tsihin ra Jesús quitsahá nducú tuhun tahan ra naha, ndáa ra cua nacuhva cuenda tsi ra Jesús tsi ra xaan iñi tsi ra.

Nu cahán yuhu tahan ra tsicá tsihin ra Jesús, yóo ra cahnu ca cuví

²⁴ Yahá can tan quitsahá caahán yuhu tahan ra tsicá tsihin ra Jesús, ndáa ra cahnu ca cuví. ²⁵ Tan ra Jesús catyí ra:

—Tsitó nyooho tyin ra ndacá ñaha tsi nyivi iyó nu ñuhu ñayivi, ñihi xaan ndacá ñaha ra naha tsi ñi. Tan cuñí ra naha tyin catyí nyivi tyin jatyinyeé ra naha tsi ñi. ²⁶ Maa tyin nyooho ña taahán tsi javaha ndo tumaa javahá

ra ican naha ra. Tyin tatun cuñí ndo cuví ndo ra cuví ityi nuu, taahán tsi janduluhlu ndo tsi ndo. Tan tatun cuñí ndo cundaca ñaha ndo, cuñí tsi tsa cuví ndo musu tandihí ndo. ²⁷ Tyin nu ñuhu ñayivi ihya, ra cuví ityi nuu cuví ra tsa ña jahá tyiñu. Tan nyaá ra yuhu mesa tan musu ra tsahá tsa catsi ra. Maa tyin yuhu, ra cuví ityi nuu cuví yu, tan cuví yu musu ndo.

²⁸ Tan nyooho cuví ndo tsa nyecú tsihin yu tandihí nu nyehe yu tundoho. ²⁹ Yacan cuenda, yuhu tsahá yu iin nu cua cundaca ñaha ndo tumaa tsa tsahá Jutu yu tsa cundaca ñaha yu. ³⁰ Tyin cua catsi ndo tan cua coho ndo nu mesa tsihin yu nda nu ndacá ñaha yu. Tan ndacan cua cunyecu ndo cundaca ñaha ndo nyivi cuví tata tsa utsi uvi sehe ra Israel.

Nu caahán ra Jesús tyin cua catyí ra Pedro tyin ña nacoto ra tsi ra

(Mt. 26.31-35; Mr. 14.27-31; Jn. 13.36-38)

³¹ Tacan tan catyí ra Jesús tsihin ra Pedro:

—Nyehe vaha un, yooho Simón. Tyin nu ña vaha tsa tsicán ndatu nu tsi Nyoo tsa nducu cuhva nu tsi ndo tyin cuñí nu tsa ndu uvi iñi ndo tsa tsinú iñi ndo tsi Nyoo. ³² Maa tyin tsicán tahvi xaan yu tsi ra tsa cuenda un, na ña jandihí un tsa tsinú iñi un tsi yu. Tan tsa ndu uvi iñi un cuatyí un, tan natsinu vaha nyico iñi un tsi yu, cua jatyinyee un tsi ra yañi un naha ra tsa ña cua jandihí ra naha tsa tsinú iñi ra naha tsi yu —catyí ra Jesús tsihin ra Simón.

³³ Tan ra Simón catyí ra tsihin ra:

—Jutu Mañi yu, tsa ndú iin vaha iñi yu tsa cuhun yu tsihin un vasu vehe caa, vasu cúu yu tsihin un —catyí ra.

³⁴ Tacan tan catyí ra Jesús tsihin ra:

—Pedro, catyí yu tsihin un tyin vityin tsa ndi cumañi ca vacu tsitooho, yooho cua catyí un uñi tsaha tyin ña nacoto un tsi yu —catyí ra Jesús tsihin ra.

Nu tsa cuñí tsa cuhva tsa cua nacuhva cuenda ra Judas tsi ra Jesús

³⁵ Tacan tan tsicá tuhun ra Jesús tsi ra tsicá tsihin ra tan catyí ra tsihin ra naha:

—Nducuhun iñi ndo quivi tsa jacuhun yu tsi ndo tsa cahán ndo tsihin nyivi, tan nduve tsa tsindahá ndo, ndi marali, ndi xuhun, ndi inga pari nditsan ndo. ¿A cumañi tsa cumañi tsi ndo quivi can? —catyí ra Jesús.

—Nduve —catyí ra naha.

³⁶ Tacan tan catyí ra Jesús tsihin ra naha:

—Maa tyin vityin, tatun iyó marali ndo, cundaha ndo. Tan tatun iyó xuhun ndo, cundaha ndo. Tatun nduve mityi ndo, xico ndo iin jahma ndo tan jata ndo mityi ndo.

³⁷ Tyin catyí yu tsihin ndo, tyin tandihí tuhun yu tsa nyaá nu tutu Nyoo cua cundaa tsi, tyehen catyí tsi: “Cua tatsi tuñi nyivi tsi

ra tumaa tsa cuví ra iin ra caquiñi.” Tacan catyí tuhun yu nu tutu Nyoo. Tan tandihí tsa catyí tsi tsa cuenda yu cua cundaa tsi —catyí ra.

³⁸ Tacan tan catyí ra tsicá tsihin ra:

—Ihya nyecú uvi taahan mitiyí —catyí ra naha.

—Tsa iyó vaha ñi —catyí ra Jesús.

Nu tsican tahvi ra Jesús tsi Nyoo nda Getsemani

(Mt. 26.36-46; Mr. 14.32-42)

³⁹ Tacan tan quitã ra Jesús vehe nu nyii ra. Tan cuahán ra yucu Olivo, cuhva tuhvá maa ra tsicá. Tan ra tsicá tsihin ra cuahán ra naha nyicún ra naha tsi ra. ⁴⁰ Tan tsa tsaã ra naha ndacan, catyí ra tsihin ra naha:

—Ndacan tahvi ndo tsi Nyoo tyin tacan tan ña cuví jaha canaa nu ña vaha tsi ndo.

⁴¹ Tacan tan cuahán ra Jesús tsa cañi luxu ca, tumaa tsa cañi tsaã iin yuu tun cañi yo can. Tacan tan tsicuñi tsi ra. Tan quitsaha caahán ra tsihin Nyoo, ⁴² tan catyí ra:

—Tyatya Jutu yu, tun yooho tan cuñí un, jatsiyo tundoho tsa cua nyehé yu ihya. Maa tyin na ña cuví cuhva cuñí maa yu. Na cuví cuhva cuñí maa un —catyí ra Jesús.

⁴³ Tacan tan quituví iin ángel Nyoo, tyin cuhva ra tunyee ñi tsi ra Jesús. ⁴⁴ Tan tsitsi tsa nyehé xaan ra Jesús tundoho tsa cuihya xaan cuñí ra, tan ñihi ca tsican tahvi ra tsi Nyoo. Tan cuaha xaan tyeen ra quitã tan tsatí tsi nu ñuhu, tan caá tsi tumaa caá ñihi.

⁴⁵ Tacan tan nduvitã ra tsa ndihí cahán ra tsihin Nyoo. Tan cuahán nyico ra nu yucú ra tsicá tsihin ra. Tan nyehe ra tyin quixí ra naha, tsa cuenda tsa cuihya xaan cuñí ra naha, ña cunyeé ñi ra naha ñumaahna tan quixí ra naha.

⁴⁶ Tacan tan catyí ra Jesús tsihin ra naha:

—¿Nacuenda quixí ndo? Nduvita ndo. Tan ndacan tahvi ndo tsi Nyoo, tyin tacan tan ña cuví jaha canaa nu ña vaha tsi ndo.

Nu tsaã cuenda ra Judas tsi ra Jesús tsi nu xaan ñi tsi ra

(Mt. 26.47-56; Mr. 14.43-50; Jn. 18.2-11)

⁴⁷ Ndi caahán ca ra Jesús yacan, tan tsaã cuaha ra catsaa. Tan itiyí nuu, vatsí nu Judas, iin ra tsicá tsihin ra Jesús. Tan natuhvã nu nu nyaá ra Jesús tyin tyayuhu nu tsi ra.

⁴⁸ Tacan tan cahán ra Jesús tsihin nu:

—Yooho Judas, ¿a tsihin tsa cua tyayuhu un tsi yu, tan cua nacuhva cuenda un tsi yuhu Rayii tsa quee nda gloria tsi nu xaan ñi tsi yu nahnu? —catyí ra Jesús.

⁴⁹ Tan ra nyecú tsihin ra Jesús quitsaha nducú tuhun ra naha tsi ra:

—Jutu Mañi ndi ¿a vaha cahnya ndi tsi ra naha tsihin mitiyí? —catyí ra naha.

⁵⁰ Tacan tan iin ra can, tsahnya ra soho tsiyo cuaha iin ra tsa cuví musu ra jutu tsaahnu tsa cuví itiyí nuu.

⁵¹ Maa tyin ra Jesús catyí ra tsihin ra:

—Jaña ndo. Vaha ñi —catyí ra.

Tacan tan tñin ra Jesús soho ra ican tan janduvahã ra itsi. ⁵² Tan ra jutu tsa cuví itiyí nuu naha ra tsihin ra yihí ndaha tsi ra jahá cuenda vehe ñuhu naha ra, tan ra cuví mandoñi naha ra, juven ra naha cuví ra tsaahán tsitiin tsi ra Jesús. Tan catyí ra Jesús tsihin ra naha:

—¿A vatsí tñin ndo tsi yu tumaa tñin ndo iin ñasuhu? tyin ndaha ndo mitiyí tan yu-tun. ⁵³ Ndihi quiví tsinyiñ yu tsitsi vehe ñuhu cahnu, tan ña tñin ndo tsi yu ndacan. Maa tyin vityin tsaã cuhva tsa ndunaã tyin nu ña vaha ndacá ñaha. Yacan cuenda vatsí tñin ndo tsi yu.

Nu cahán ra Pedro tyin ña nacotó ra tsi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Tacan tan tñin ra naha tsi ra Jesús. Tan tsindacã ra naha tsi ra nda vehe ra jutu tsaahnu tsa cuví itiyí nuu. Tan ra Pedro ndasava ñi cuahán ra nyicún ra. ⁵⁵ Tan tsa tsaã ra naha vehe ra jutu tsaahnu tsa cuví itiyí nuu, jatahán ra tsa cuví musu naha ra ñuhu nuquehe. Tan tsinyecú ra naha tani canduvi nu cayú ñuhu can. Tan tsinyaa ndihí ra Pedro tyañu ra naha. ⁵⁶ Tan tsa ndunditsín tsa cayú ñuhu ican, tacan tan iin ñaha tsa cuví musu jutu can, nyehe ña tsi ra Pedro. Tan catyí ña:

—Ra ihya tsicá tucu ra tsihin ra can —catyí ña.

⁵⁷ Maa tyin ra Pedro catyí ra:

—Yuhu ña nacotó yu tsi ra can.

⁵⁸ Tañi ñi tan nyehe tucu inga nyivi tsi ra Pedro, tan catyí ñi tsihin ra:

—Yooho, cuenda ra ican cuví un —catyí ra.

Tan ra Pedro catyí ra:

—Ña nditsa

⁵⁹ Tan tsa yahã iin hora, tan nyehe tucu inga ra tsi ra Pedro tan catyí ra tsihin ra:

—Tsa nditsa tyin juven ra ihya cuví ñi ra tsa tsicá tsihin ra can. Tyin juven ra Galilea cuví ra —catyí ra.

⁶⁰ Tacan tan catyí ra Pedro:

—Ña tsitó yu náa caahán un —catyí ra.

Tan juven ñi cuhva can, tsitsi tsa ndi caahán ca ra Pedro tan navacú ñi iin tsi-tooho.

⁶¹ Tacan tan ra Jesús nanyehe ra nuu ra Pedro. Tan ra Pedro nducuhun ñi ra tsa cahán ra Jesús tsihin ra: “Tsa ndi cumañi ca navacu tsitooho, yooho tsa cahan un uñi tsa tyin ña nacotó un tsi yu.”

⁶² Tacan tan quitã ra Pedro itiyí tsata vehe. Tan tsacú xaan ra tsa cuihya cuñí ra.

Nu tsacü nducu nyaa ra naha tsi ra Jesús tan cañi ra naha tsi ra

(Mt. 26.67-68; Mr. 14.65)

⁶³ Tacan tan ra jahá cuenda tsi ra Jesús, quitsahá tsacü nducu ra naha tsi ra. Tan cañi ra naha tsi ra. ⁶⁴ Tсахñi ra naha jahma nuu ra, tan quitsahá cañi ra naha nuu ra. Tan catyí ra naha tsihin ra:

—Náčoto yóo ra cañi tsi un —catyí ra naha tsihin ra.

⁶⁵ Tan cuaha xaan ca maa tsa cahán nyaa ra naha tsi ra.

Nu tsicá tuhun mandoñi naha ra tsi ra Jesús tatun Sehe Nyoo cuví tsi ra

(Mt. 26.59-66; Mr. 14.55-64; Jn. 18.19-24)

⁶⁶ Tan tsa cunditsin inga quivi, tan ndu ijin ra cuví mandoñi tsahnu ñuu can tsihin ra jutu tsa cuví ityi nuu naha ra, tan tsihin ra maestro cuenda ley vehe ñuhu naha ra. Tan quihin ra naha tsi ra Jesús, cuahán tsihin ra nda nu cua coo Junta Cahnu. Tan nducü tuhun ra naha tsi ra Jesús:

⁶⁷ —Catyí tuhun tsihin ndi tun juven ra Cristo cuví un —catyí ra naha tsihin ra.

Tan ra Jesús nacahan ra tan catyí ra:

—Tatun catyí yu tsihin ndo tyin juven yu cuví, ña cua tsinu iñi ndo tsa cahán yu.

⁶⁸ Tan tatun nducu tuhun tucu maa yu tsi ndo, ña cua nacahan ndo, tan ndi ña cua jaña ndo tsi yu. ⁶⁹ Maa tyin vityin tan ityi nuu ca, Rayii tsa quee nda gloria cua cunyata ra xiin cuaha Nyoo, ra tsa iyó tandihi tunyee iñi —catyí ra Jesús.

⁷⁰ Tacan tan tandihi ra naha tsicá tuhun ra naha tsi ra:

—Tun tacan, Sehe Nyoo cuví tsi un —catyí ra naha.

Tacan tan nacahan ra Jesús tan catyí ra:

—Juvín, sehe Nyoo tsi yu tumaa catyí maa ndo.

⁷¹ Tacan tan natuhun tahan ra naha:

—Tsiñi ndo tsa caahán ra. Ña cuñi ca tsi tsandaa. Tyin tsa tsiñi maa yo tsa cahán ra —catyí ra naha.

23

Nu nyehe ra Pilato tyin nduve cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

¹ Tacan tan nduvita tandihi ra naha. Tan tsindaca ra naha tsi ra Jesús nda nu nyaá ra Pilato, [ra ndacá ñaha quee nda ñuu Roma].

² Tacan tan quitsahá tyaá ra naha cuatyí tsi ra Jesús nuu ra Pilato tan catyí ra naha tsihin ra:

—Ra ihya, jativí ra tsi nyivi tsihin tsa caahán ra tsihin ñi, tyin caahán ra tyin ña vaha tsa tyahvi ndi xuhun tsi ra ndacá ñaha nda ñuu Roma. Tan caahán tucu ra tyin cuví

ra Cristo, ra tsa jaquitsi Nyoo tyin cuví ra rey —catyí ra naha tsihin ra Pilato.

³ Tacan tan ra Pilato tsicá tuhun ra tsi ra Jesús:

—¿A yooho cuví Rey cuenda nyivi Israel? —catyí ra.

Tan nacahan ra Jesús tan catyí ra:

—Juvín, tumaa catyí maa un.

⁴ Tacan tan catyí ra Pilato tsihin ra jutu tsa cuví ityi nuu naha ra, tan tsihin nyivi:

—Nduve cuatyí ra ihya —catyí ra tsihin ñi.

⁵ Maa tyin jañihj ca ñi caahán ñi. Tan catyí nyico ñi:

—Cahnu xaan cuatyí ra. Tyin cuaha xaan tsihi tsahá ra, tyin jacuahá ra tsi nyivi. Tsa jihna ñi quitsahá caahán ra tsihin nyivi iyó ñuu tsa cayucü Galilea. Tan nanii ityi vatsi ra, jacuahá ra tsi nyivi. Tan vityin tsa tsaá ra Judea ihya tan juven ñi yacan javahá ra —catyí ñi.

Nu jacuhun ra Pilato tsi ra Jesús nu nyaá ra Herodes, ra cuví rey nyivi iyó Galilea

⁶ Cuhva tsa tsiñi ra Pilato yacan, tan nducü tuhun ra tatun ra Galilea cuví ra Jesús. ⁷ Tan catyí nyivi tsihin ra tyin juven.

Tacan tan jacuhun ra Pilato tsi ra nda nu nyaá ra Herodes. Tyin ra Herodes cuví ra ndacá ñaha Galilea can. Tan quivi can nyii ra ñuu Jerusalén. ⁸ Tan cuhva tsa nyehe ra Herodes tsi ra Jesús, sii xaan cuñi ra. Tyin tsanaha xaan cuñi ra nyehe ra tsi ra. Tyin ñihj tuhun ra tyin cuaha xaan tsa iyo javahá ra. Tan cuñi xaan ra nyehe ra iin tsa iyo tsa cua javaha ra Jesús. ⁹ Tan cuaha xaan tsa nducü tuhun ra Herodes tsi ra Jesús. Maa tyin ra Jesús ña nacahan maa ra. ¹⁰ Ican nyecü ndihi tucu ra jutu tsa cuví ityi nuu naha ra, tan ra maestro cuenda ley vehe ñuhu naha ra. Tan tyaá xaan ra naha cuatyí tsi ra Jesús. ¹¹ Tacan tan ra Herodes tsihin andaru cuenda ra, tsacü nducu ra naha tsi ra. Tan jacunditsi nuu ra naha iin jahma yahvi tan sii caá tsi ra Jesús, tumaa caá tsa tuhvá rey tsinditsi. Tacan tan jacuhun nyico ra Herodes tsi ra nda nu nyaá ra Pilato. ¹² Tan quivi can ra Pilato tsihin ra Herodes nduvahá iyó ra naha. Tyin nu quitsi quivi, ña cuví nyehe tahan ra naha tsi ra naha.

Nu cutuñi ra Jesús tyin cua cúu ra

(Mt. 27.15-26; Mr. 15.6-15; Jn. 18.39-19.16)

¹³ Tacan tan ra Pilato jandu ijin ra tsi ra jutu tsa cuví ityi nuu naha ra, tan ra cumí tyiñu vehe ñuhu naha ra, tan tsihin tandihi nyivi. ¹⁴ Tan catyí ra tsihin ñi:

—Nyooho quitsi ndaca ndo tsi ra ihya nu nyaá yu. Tan catyí ndo tyin jativí ra tsi nyivi. Maa tyin yuhu tsa jacutuñi yu tsi ra nuu ndo. Tan nduve cuatyí ra tumaa cuhva cahán ndo can nañihj yu. ¹⁵ Tan ndi ra Herodes tan ña nañihj ra ndi intuhun cuatyí

ra. Yacan jaquitsj nyico ra tsi ra inga tsaha nu nyaá yu. Nyehe ndo tyin nduve cuatyí ra. Tan yacan ña taahán tsi tsa cúu ra. ¹⁶ Yacan cuenda cua tatsi tuñi yu tsi ra. Yaha can tan cua jaña yu tsi ra —catyí ra Pilato.

¹⁷ Tacan catyí ra Pilato tyin tsitsi vico ican, taahán tsi tsa jaña ra iin ra yucú vehe caa, tumaa tuhvá maa ra icá. ¹⁸ Maa tyin tandihi nyivi iin caa ñi cana tsaa ñi tan catyí ñi:

—Cahñi tsi ra Jesús. Tan jaña tsi ra Barrabás —catyí ñi.

¹⁹ Tan ra Barrabás can nyii ra vehe caa tsa cuenda tsa cañi tahan ra tsihin ra cumí tyiñu ñuu can. Tan inga tuhun tyin tsahñi ra nyivi. ²⁰ Tan ra Pilato cuñi ra jaña ra tsi ra Jesús. Tan quitsaha caahán ra tsihin nyivi can inga tsaha tyin cua jaña ra tsi ra. ²¹ Maa tyin nyivi tsaa ca cana tsaa ñi:

—¡Tyaá tsi ra nu cruu. Na cúu ra nu cruu!

²² —¿Náa tsa ña vaha javaha ra ihya? Tan nyehé yu tyin ña taahán tsi tsa cúu ra. Cua tatsi tuñi ñi yu tsi ra, tan cua jaña yu tsi ra —catyí ra Pilato.

²³ Maa tyin nyivi cana tsaa ca ñi, tan catyí ñi tyin nacahñi ra tsi ra Jesús nu cruu. Tan maa ñi tan tsihin ra jutu tsa cuví ityi nuu naha ra, ñihí ñi tsa cuñi ñi tyin cana tsaa xaan ñi. ²⁴ Tacan tan javaha ra Pilato cuhva cahan ñi. ²⁵ Tan jaña ra tsi ra Barrabás, ra tsa nyii vehe caa tsa cuenda tsa cañi tahan ra tsihin ra cumí tyiñu tan tsa cuenda tsa tsahñi ra nyivi. Tan nacuhva cuenda ra Pilato tsi ra Jesús tsi ñi cuhva cuñi maa ñi.

Nu tyaá ra naha tsi ra Jesús nu cruu

(Mt. 27.32-44; Mr. 15.21-32; Jn. 19.17-27)

²⁶ Tacan tan quihñ andaru tsi ra Jesús. Tan cuahán ra tsihin ra naha. Tan tññ tucu ra naha tsi iin ra ñuu Cirene nañi Simón. Ra ican ndi vatsí nuhu ra quee ra cuhu. Tan jañiñi ra naha tsi ra tsa cuiso ra cruu ra Jesús. Tan cuhun ra ityi tsata ra.

²⁷ Tan cuaha xaan nyivi cuahán ityi tsata ra Jesús. Tan cuaha xaan ñiñaha tsacú xaan ñi tsa cuihya cuñi ñi tsacatyí tundoho tahan ra. ²⁸ Maa tyin ra Jesús nanyehé ra nuu ñi. Tan catyí ra tsihin ñi:

—Tandihí nyooho, ñiñaha ñuu Jerusalén ihya, ña vacu ndo tsacatyí yuhu. Vácu ndo, tsacatyí maa ndo tan tsacatyí sehe ndo. ²⁹ Tyin cua quitsi quivi cua nyehé xaan ndo tundoho. Tan cua cahan nyivi tsi tandihí ndo tsa cuví ndo ñaha tsa ña cuví coo sehe. Tan cua cahan ñi tsihin ndo: “Vaha xaan tyin nduve sehe ndo tsicoo tyin cuaha xaan tundoho nyehé yo vityin”, cua catyí ñi tsihin ndo. ³⁰ Tyin quivi can cua cuñi ñi nduva yucu tsata ñi tan quihvi xeehe ñi. ³¹ Tyin tatun tyehen icá nyivi tsihin iin yutun vaha, yaha ca cuhva cua ica ñi tsihin yutun ityi

—catyí ra Jesús tsihin ñiñaha ñuu Jerusalén can.

³² Tan quihñ tucu andaru can naha ra tsi uvi taahan ra iyó cuatyí, tyin cahñi ndihí ra naha tsi ra naha iin caa ñi tsihin ra Jesús.

³³ Tacan tan tsaá ra naha iin nu nañi Yiqui Jiñi Ndiyi. Tan ican tyaá ra naha tsi ra Jesús nu cruu. Tan tacan tyaá ndihí tucu ra naha tsi nduvi taahan ra iyó cuatyí can naha ra. Iin ra tyaá ra naha nuu cruu xiin cuaha ra Jesús. Tan inga ra can tyaá ra naha nuu cruu xiin satyin ra. ³⁴ Tan cuhva tsa nyaá ra Jesús nu cruu can, tan catyí ra:

—Tyatya, Jutu yu, jaha tucahnu iñi tsi ra naha. Tyin ña tsitó ra naha náa javahá ra naha tsihin yu —catyí ra.

Tacan tan andaru can naha ra tava ra naha suerte tsihin jahma ra Jesús, tyin nyehé ra naha ndáa ra cua jaha canaa jahma can. ³⁵ Tan nyivi nyecú ñi nyehé ñi. Tan ra cumí tyiñu vehe ñuhu naha ra, tsacú nducu ra naha nyehé ña naha tsi ra Jesús. Tan catyí ra naha:

—Jacacu ra tsi inga nyivi. Na jacacu ndihí tucu maa ra tsi ra vityin, tun nditsa tsa ra Cristo, ra tsa jaquitsj Nyoo, cuví ra —catyí ra naha.

³⁶ Tan juvin ñi cahan nyaá ra andaru can naha ra tsi ra. Tan natuhva ra naha nu ticaá ra. Tan tsaha ra naha vinu iya tsihi ra. ³⁷ Tan catyí ra naha tsihin ra:

—Tatun rey cuenda nyivi Israel cuví un, jacacu tsi un —catyí ra naha.

³⁸ Tan jiñi cruu nu nyaá ra Jesús nyaá iin tsa tyaá ra Pilato tsihin sahan griego, sahan latín, tan sahan hebreo. Tyehen caahán letra can: “Juvín ra ihya cuví Rey cuenda nyivi ñuu Israel” —catyí letra can.

³⁹ Tan iin ra tsa iyó cuatyí tsa nyaá nu cruu xiin ra Jesús, quitsaha caahán nyaá ra tsi ra:

—Tatun nditsa tyin ra Cristo cuví un, jacacu tsi un. Tan jacacu ndihí tsi nyuhu —catyí ra can.

⁴⁰ Maa tyin inga ra can catyí ra tsihin ra:

—¿A ña yuuhví un tsi Nyoo? Tyin juvin ñi tundoho tsa taahán ra ihya, tan taahán un vityin. ⁴¹ Maa yo nyehé yo tundoho maa tyin iyó cuatyí yo. Tan ra ihya nduve cuatyí ra iyó —catyí ra can.

⁴² Tacan tan catyí ra can tsihin ra Jesús:

—Yooho Jesús, nducuhun iñi tsi yu quivi cundaca ñaha un —catyí ra.

⁴³ Tacan tan ra Jesús nacahan ra tsihin ra tan catyí ra:

—Tsa nditsa caahán yu tsihin un tyin juvin ñi vityin tan cua cunya un tsihin yu nda paraíso [nu yucú añima nyivi tsinú iñi tsi Nyoo] —catyí ra Jesús tsihin ra.

Nu tsihi ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tacan tan cuhva ora quitsahá ndunaá nu ñuhu ñayivi, nda cuanda caa uñi tsa tseñi.

⁴⁵ Tyin ndunaá ñicanyii. Tan jahma tsa ticaá tsitsi vehe ñuhu cahnu, ndata sava tsi.

⁴⁶ Tacan tan caná tsaá ra Jesús tan catyí ra: —Tyatya, Jutu yu, tyaa cuenda yu aña ma yu ndaha un —catyí ra.

Tan cuhva tsa cahán ra tacan, tan tsihi ra.

⁴⁷ Tan ra cuví capitán cuenda andaru can naha ra, nyehé ra tandihi tsa cuví. Tan jacahná ra tsi Nyoo, tan catyí ra:

—Nduve tsa cuii cuatyí ra ihya tsicoo —catyí ra.

⁴⁸ Tan tandihi nyivi tsa nyecú ican, nyehé ñi tsa cuví. Tan cuahán ñi tan quitsahá cañi ndaha ñi yiqui nyica ñi. Tyin tsitó ñi tyin ña vaha tsa javahá ñi tsihin ra Jesús.

⁴⁹ Tan tandihi nyivi tsa nacotó tsi ra Jesús, tan ñiñaha tsa tsinyicun tsi ra nda Galilea, nyecú ñi ndasava. Tan nyehé ñi tandihi tsa cuví can.

Nu cua cutsi ra naha tsi ra Jesús

(Mt. 27:57-61; Mr. 15:42-47; Jn. 19:38-42)

⁵⁰ Tan iyó iin ra vaha, nañi ra José. ra ñuu Arimatea tsa canyii Judea. Tan cuví ra iin ra cuví ityi nuu cuenda Junta Cahnu nyivi Israel. ⁵¹ Tan ra José can ndatú ra quivi tsa cua cundaca ñaha Nyoo. Tan ña ndoo ra vaha tsihin tsa javahá ra cutahán tsihin ra, ra cuví jutu tsa cuví ityi nuu naha ra.

⁵² Tacan tan tsahán ra José can tsindacan ra cuñu ñuhu ra Jesús tsi ra Pilato. ⁵³ Tan yahá tsa januq ra José can cuñu ñuhu ra Jesús nu cruu, cavá nuu ra iin jahma tsi ra. Tan cuahán ra cua cutsi ra tsi ra tsitsi iin ñaña tsa tsa cuví yavi yuu tsa javahá nyivi tan ñaha ca quihvi ndiyi tsitsi can. ⁵⁴ Tan viernes cuví can, quivi tsa janduvahá nyivi tsa catsi ñi tsa sabaru, quivi quitatú ñi. Tan tsa cua tahan tsi quivi can.

⁵⁵ Tan tandihi ñiñaha tsa quee tsihin ra Jesús Galilea, cuahán ñi cua nyehé ñi tsitsi yavi yuu can. Tan nyehé ñi cuhva canyii cuñu ñuhu ra. ⁵⁶ Tan cuanuhú ñi nda yuvehe ñi. Tan janduvahá ñi ndutya tami tyin cua tyihi ñi cuñu ñuhu ra Jesús. Tacan tan quitatú ñi inga quivi can tumaa catyí maa tuhun tsa tsahá cuenda Nyoo tsi yo.

24

Nu nandoto ra Jesús

(Mt. 28:1-10; Mr. 16:1-8; Jn. 20:1-10)

¹ Tsa tuví tumingu quivi nu quitsahá vitya, cuahán ñiñaha can nu ñaña ra Jesús. Tan nyisó ñi ndutya tami tsa janduvahá ñi.

² Tan cuhva tsa tsaá ñi, nyehé ñi tyin tsa cuatsiyó yuu tsa ndasí yuhu ñaña can. ³ Tan quihvi ñi tsitsi ñaña can, maa tyin ña nañihí ñi cuñu ñuhu Jutu Mañi yo Jesús. ⁴ Tan yucú ñi tsihin tsa yuuhví ñi. Tan ña tsitó ñi náa

cua javaha ñi. Tan sana iñi ñi quituví uvi taahan rayii nuu ñi. Tan xiñu xaan jahma nditsí ra naha. ⁵ Tan tsihin tsa yuuhví ñi, tan tsaquin ñi jini ñi nda nu ñuhu. Tacan tan catyí ra can naha ra tsihin ñi:

—¿Nacuenda nanducú ndo tsi ra nyito nu yucú ndiyi? ⁶ Nduve ca ra nyii ihya, tyin tsa nandoto ra. Nducuhun iñi ndo tsa cahán ra tsihin ndo quivi tsicá ra Galilea. ⁷ Catyí ra tyin taahán tsi nacuhva cuenda nyivi tsi ra ndaha ra iyó cuatyí naha ra. Tyin cuví ra Rayii tsa quee nda gloria. Tan taahán tsi tyin cañi ra can naha ra tsi ra nu cruu. Maa tyin tsa tsinu uñi quivi cua nandoto ra. Tacan catyí ra tsihin ndo —catyí ángel can naha ra tsihin ñi.

⁸ Tacan tan nducuhun iñi ñi tsa cahán ra Jesús quivi can. ⁹ Tan cuanuhú ñi. Tan nacatyí tuhun ñi tsihin tsa utsi iin ra tsa tavá tyiñu ra Jesús tan tsihin tandihi ca nyivi tsa tsinyicun tsi ra. ¹⁰ Tan ñiñaha tsa tsicatyí tuhun tsihin ra naha cuví ñi: ña María Magdalena, ñaha quee Magdala, tan ña Juana, tsihin ña María sihi ra Jacobo, tan tsihin juhva ca ñiñaha. ¹¹ Maa tyin ra tavá tyiñu ra Jesús cuñi maa ra naha tyin caahán ñi maa ñi. Tan ña tsinú iñi ra naha tsa caahán ñi.

¹² Maa tyin ra Pedro nduvitá ra tan tsinú xaan ra cuahán ra cua nyehé ra tsitsi ñaña nu tinyii ra naha ra Jesús tatun nditsa. Tan nyehé ra tsitsi yavi yuu can tyin jahma tsa tsindasí ña ra canyii nda sava. Tacan tan cuanuhú ra yuvehe nu yucú tandihi ca ra naha. Tan iyo xaan cuñi ra tsa cuví.

Tsa cuví ityi cuahán ñuu Emaús
(Mr. 16:12-13)

¹³ Juvín ñi maa quivi can, uvi taahan ra tsinyicun tsi ra Jesús cuahán ra naha ñuu Emaús, tumaa utsi iin kilómetro tsa quee yo ñuu Jerusalén. ¹⁴ Tan cuahán ra naha tan natuhún tahan ra naha náa ndihi tsa cuví. ¹⁵ Tan tsitsi tsa natuhún ra naha, tan ra Jesús tahán ra tsi ra naha ityi cuahán ra naha. ¹⁶ Maa tyin vasu nyehé ra naha tsi ra Jesús, maa tyin ña nacotó ra naha tsi ra. Tyin tumaa iin tsa tyasí tsi nuu ra naha, tan ña cuví nacoto ra naha tsi ra Jesús. ¹⁷ Tacan tan nducú tuhun ra Jesús tsi ra naha:

—¿Náa natuhún xaan ndo? ¿Nacuenda cui-ihya xaan cuñi ndo? —catyí ra tsihin ra naha.

¹⁸ Tan iin ra tsa nañi Cleofas nacahán ra tan catyí ra:

—Tandihí nyivi tsitó tsa cuví ñuu Jerusalén. ¿A ra inga ñuu cuví yooho tyin ña tsi un tsa cuví? —catyí ra.

¹⁹ Tacan tan catyí ra Jesús tsihin ra naha: —¿Náa cuví?

Tan nacatyí tuhun ra naha tsihin ra:

—Tuhun ra Jesús ra ñuu Nazaret. Tyin cuví ra iin ra cuví ndusu yuhu Nyoo. Tan

tsihin tunyee ifi cahnu Nyoo javaha ra tsa cahnu tan cahān ra tsa vaha nuu Nyoo tan nuu tandihi nyivi. ²⁰ Maa tyin ra jutu tsa cuvī ityi nuu naha ra tan ra cumī tyiñu cuenda vehe ñuhu, tsaḥā cuenda ra naha tsi ra tsi ra ndacá ñaha cuenda ñuu Roma. Tan tsaññi ra naha tsi ra. Tan tsihi ra nu cruu. ²¹ Tan vityin tsa quitā uñi quivi tsa cuvī yacan. Tan nyuhu cuñi maa ndi tyin juvin ra cua jacacu tsi yo tsa cuvī yo nyivi Israel. ²² Maa tyin vityin iyo xaan cuñi ndi tsa nacatyī juhva ñiñaha tsihin ndi. Tyin maa ñi tsaḥān ñi nu ñaña ra tsa tuvī. ²³ Tan nduve ca cuñu ñuhu ra canyīi. Tan nacatyī tuhun ndihi ñi tyin nyehe ñi uvi taahan ángel. Tan catyī ángel can naha ra tsihin ñi tyin ra Jesús nyito ra. ²⁴ Yaha yacan tan tsaḥān tucu juhva ra cutahān tsihin ndi tsinyehe ra naha nu ñaña. Tan nyehe ra naha tyin tsa nditsa cuvī tsa cahān ñiñaha can. Maa tyin ña nyehe ra naha tsi ra Jesús —catyī ra naha tsihin ra Jesús.

²⁵ Tacan tan catyī ra Jesús tsihin ra naha: —Luxu xaan cutuñi ifi ndo. Tan cuee xaan tan tsinu ifi ndo tuhun tsa cahān ra cuvī ndusu yuhu Nyoo taḥān tsanaha. ²⁶ ¿A ña tsitō ndo tyin taahān tsi tsa nyehe jihna ra Cristo tundoho? Yaha can tan tahan tsi cua ñihi ra tyiñu tsa cua cundaca ñaha ra —catyī ra Jesús tsihin ra naha.

²⁷ Tacan tan quitsaha tsahā cuenda ra nácaa cuahān tuhun maa ra nu tutu Nyoo. Tan quitsaha caahān ra tuhun tsa tyaā ra Moisés taḥān tsanaha. Tan yaha can tan cahān ra tuhun tandihi libru tsa tyaā ra cuvī ndusu yuhu Nyoo.

²⁸ Tan cuhva tsa tsaā ra naha nda ñuu Emaús, nu cuahān ra naha, tan jahā ra Jesús tyin cañi ca cuahān ra. ²⁹ Tacan tan catyī ra naha tsihin ra na ndoo ra tsihin ra naha. Tan catyī ra naha:

—Ndqo tsihin ndi tyin tsa cua cuiso ñicanyii —catyī ra naha.

Tacan tan cuahān ra Jesús tsihin ra naha. ³⁰ Tan cuhva tsa tsinyaa ra yuhu mesa tsihin ra naha, quihñ ra paan. Tan tsaḥā ra tyahvi nyoo tsi Nyoo. Tan tsaññu sava ra, tan tsaḥā ra tsi ra naha. ³¹ Tan iin yaha ñi nuñā nuu ra naha tan nacoto ra naha tsi ra Jesús. Maa tyin ra Jesús naā ihñi ñi ra. ³² Tacan tan quitsaha natuhñn tahan ra naha tan catyī ra naha:

—Yacan cuenda vaha xaan cuñi añima yo tsa vatsi ra tsihin yo, tan tsaḥā cuenda ra tuhun Nyoo tsa nyaā nu tutu Nyoo tsi yo —catyī ra naha.

³³ Ña ndatu ca ra naha, tan cuanuhyu ra naha nda ñuu Jerusalén. Tan ñihñ tahan ra naha tsihin tsa utsi iin ra tsa tava tyiñu ra Jesús, ndu iin ra naha tsihin juhva ra nyecú tsihin ra naha. ³⁴ Tacan tan tsa utsi iin ra can

naha ra nacatyī tuhun ra naha tsihin ra tsa ndi tsaā can naha ra:

—Nditsa tyin Jutu Mañi yo nandoto ra. Tyin ra Simón nyehe ra tsi ra —catyī ra naha.

³⁵ Tacan tan ra tsa ndi tsaā can nacatyī tuhun ndihi ra naha nácaa natuhñn ra Jesús tsihin ra naha ityi cuahān ra naha ñuu Emaús, tan nácaa nacoto ra naha tsi ra nu tsaññu sava ra paan.

Nu quituvī ra Jesús nu yucú ra tsicā tsihin ra

(Mt. 28.16-20; Mr. 16.14-18; Jn. 20. 19-23)

³⁶ Ndi natuhñn ca ra naha yacan tan quituvī ra Jesús tyañu ra naha. Tan tsaḥā ra nacumi tsi ra naha, tan catyī ra:

—Na coo tsa vaha añima ndo.

³⁷ Tacan tan nayuhvi xaan ra naha. Tan cuñi ra naha tyin tatyī ndiyi cuvī can.

³⁸ Tacan tan catyī ra Jesús tsihin ra naha:

—¿Nacuenda yuuhvi xaan ndo? ¿Tan nacuenda tsicā xaan ifi ndo? ³⁹ Nyehe ndo ndaha yu. Tan nyehe ndo tsaḥā yu. Tyin juvin ñi maa yu cuvī. Tyin ndo tsi yu tan coto ndo. Tyin tatyī ndiyi nduve cuñu ñuhu can iyó. Tan nduve yiqui can tumaa tsa nyehe ndo tsi yuhu —catyī ra Jesús.

⁴⁰ Tan cuhva tsa cahān ra yacan, tan janaha ra ndaha ra tsihin tsaḥā ra tsi ra naha. ⁴¹ Maa tyin maa ra naha, tsa cuenda tsa iyo cuñi ra naha tan si cuñi ra naha, nda cuenda ña cuvī ca tsinu vaha ifi ra naha. Yacan nacahān ra Jesús tsihin ra naha:

—¿A iyó tsa catsi yo? —catyī ra.

⁴² Tacan tan tsaḥā ra naha luxu tyaca tyi-hyo tsihin ndutya ñuñu tsi ra. ⁴³ Tan quihñ ra. Tan quitsaha tsatsi ra nu nyecú ra naha.

⁴⁴ Tan catyī ra tsihin ra naha:

—Tandihñ tsa taḥān yu, yacan cuvī tsa catyī yu tsihin ndo quivi can. Tan catyī yu tsihin ndo tyin tacan cua cuvī, tumaa cuhva nyaā tuhun tsa tyaā ra Moisés tan ra cuvī ndusu yuhu Nyoo tan tsihin tsa nyaā nu libru salmo —catyī ra tsihin ra naha.

⁴⁵ Tacan tan tsaḥā cuenda ra Jesús cuhva catyī nu tutu Nyoo. Tan cutuñi ifi tandihñ ra naha jahā ra. ⁴⁶ Tacan tan catyī ra Jesús tsihin ra naha tyin tacan nyaā nu tutu Nyoo tyin taahān tsi tsa cúu ra Cristo. Tan tsa tsinu uñi quivi cua nandoto ra. ⁴⁷ Tan taahān tsi coto nyivi tuhun ra Cristo, tyin tatun ndu uvi ifi ñi cuatyī ñi, cua coo tucahnu ifi tsi ñi. Tan jihna ñi cua cahan ra naha tsihin sivi ra Cristo ñuu Jerusalén, yaha can tan tandihñ ca ñuu taniñ cahnu nu ñuhu ñayivi.

⁴⁸ Tan catyī tucu ra Jesús tsihin ra naha:

—Tan nyooho cuvī tsandaa tsa cuenda tandihñ tsehe. ⁴⁹ Tan cua jaquitsi maa yu Tatyī Ii Nyoo siqui ndo tumaa tsa catyī Jutu yu tyin cuhva ra tsi ndo. Maa tyin ndqo

ndo Jerusalén ihya. Tan ña quita ndo nda cuanda tsa ñihi ndo tunyee ñi Nyoo tsa cua quitsi tsi ndo —catyí ra Jesús.

Nu cuanuhu ra Jesús gloria

(Mr. 16.19-20)

⁵⁰ Tacan tan ra Jesús cuahán ra tsihin tandihi ra tsica tsihin ra nda ñuu Betania. Tan cañihí ra ndaha ra. Tan nasoco ra tsi ra naha. ⁵¹ Tan tsitsi tsa nasocó ra tsi ra naha, nandaá ra andivi. ⁵² Tacan tan tandihi ra naha quitsaha jacahnú ra naha tsi ra. Tan sii xaan cuñí ra naha, cuanuhú ra naha nda ñuu Jerusalén. ⁵³ Tan tandihi quivi tsiyucu ra naha tsitsi vehe ñuhu cahnu, jacahnú xaan ra naha tsi Nyoo.

Tan na cuvi tsi tacan ñi.

Tuhun Nyoo tsa Tyaá Ra Juan

Tuhun tsa Caahán Nyoo nanduvj tsi iin rayii, tan rayii can cuví ra Cristo

¹ Nda quiví jihna ñi, nda ndi cumañi ca coo tandihí tsa iyó, tan tsa iyó maa ra cuví Tuhun tsa Caahán Nyoo. Nyíí ra tsihin Nyoo. Tan Nyoo cuví ra. ² Tan iyó ra tsihin Nyoo nda quiví jihna ñi. ³ Tan tsihin ra, javahá Nyoo tandihí cuii maa tsa iyó. Tan nduve tsa javahá Nyoo tsa intuhun ñi maa ra. ⁴ Ra tsa cuví Tuhun tsa Caahán Nyoo iyó ñayivi nyito tsa ña cua naa maa tsi ra. Tan juvin ñayivi can, cuví ñuhu tsa jandunditsín añaima nyivi. ⁵ Tan ñuhu can, jandunditsín tsi nu naa. Tan tsa naa can ña cuví jandahva can ñuhu nditsin can.

⁶ Tsiocoq iin ra tsa jaquitsj Nyoo, nañi ra Juan. ⁷ Quitsj ra cuví ra tsa ndaa. Tyin cahán ra tumañi iñi cuenda ra cuví ñuhu can, tyin tacan tan tsinu iñi tandihí nyivi tsi ra. ⁸ Ra Juan, ñavin ñuhu can cuví ra. Iin tsa ndaa cuenda ra cuví ñuhu can cuví ra. ⁹ Tyin ñuhu nditsa can, ndi cua quitsi tsi nu ñuhu ñayivi, tan cua jandunditsín tsi añaima tandihí nyivi tsa iyó nu ñuhu ñayivi ihya.

¹⁰ Ra cuví Tuhun tsa Caahán Nyoo quitsj ra nu ñuhu ñayivi. Tan juvin ñi maa ra tsihin Jutu ra javahá ra naha ñuhu ñayivi. Maa tyin nyivi iyó nu ñuhu ñayivi ihya, ña nacotq ñi tsi ra tsa ra Cristo cuví ra. ¹¹ Quitsj ra nu iyó nyivi ñuu ra, nyivi Israel, tan ña naquihñ vaha ñi tsi ra. ¹² Maa tyin tandihí nyivi tsa naquihñ vaha tsi ra, tan tsinú iñi ñi tyin ra Cristo cuví ra, tsahá ra ndatu tsi ñi tsa cuví ñi sehe Nyoo. ¹³ Juvin ñi nacacq tsa. Maa tyin ñavin tumaa tsa cacq ñi tsa culeq ñi cuenda cuñu ñuhu ñi. Tan ndi ñavin tsa cuenda tsa cuñi iin rayii coo ra tsihin iin ñaha. Ñavin tsa cuenda tsa cuñi nyivi coo sehe ñi. Maa tyin nacacq tsa ñi jahá maa Nyoo.

¹⁴ Tan ra cuví Tuhun tsa Caahán Nyoo nanduvj ra iin rayii. Tan tsiocoq ra tsihin yo. Tan nyehé ndi tsa cahnu cuví ra. Tan cahnu cuví ra tyin Sehe mañi Jutu Nyoo cuví tsi ra. Tsiṭu ra tsihin tsa nditsa tan tsa vaha. ¹⁵ Tan ra Juan can cahán ra tumañi iñi tsa cuenda ra, tan catyí ra:

—Juvín ra ihya cuví ra tsa cahán yu tuhun quiví can, tyin ra tsa vatsí ityí tsata yu, cahnu ca cuví ra tan ñavin ca maa yu. Tyin nda quiví cacq yu tan tsa iyó maa ra —catyí ra Juan.

¹⁶ Tandihí yo naquihñ yo tumañi iñi cahnu tsa tsahá ra tsi yo, tyin nasocó xaan ra tsi yo. ¹⁷ Ra Moisés tsahá cuenda ra ley Nyoo tsi yo. Maa tyin ra Jesucristo tsahá ra tsa naquihñ yo tsa vaha Nyoo. Tan caahán

ra tsa nditsa tsihin yo. ¹⁸ Tan nduve maa iyó nyehé tsi Nyoo. Intuhun ñi maa Sehe mañi maa ra tsa iyó iin caa ñi tsihin ra nyehé tsi ra. Juvín ra cuví ra tsa tsahá tsa coto yo tsi Jutu ra.

Nu caahán ra Juan, ra jacoondutyá, tumañi iñi cuenda ra Jesucristo
(Mt. 3.11-12; Mr. 1.7-8; Lc. 3.15-17)

¹⁹ Ra cuví ityí nuu tsihin nyivi Israel tsa iyó ñuu Jerusalén, tava tyiñu ra naha tsi ra jutu naha ra tsihin inga ca ra cuenda vehe ñuhu naha ra, ra cuví tata ra Leví, na cahun ra naha nu nyíí ra Juan tan ndaca tuhun ra naha tsi ra yóo ra cuví ra. ²⁰ Tan tsicq tuhun ra naha tsi ra Juan tan catyí ra tsihin ra naha:

—Yuhu ñavin ra Cristo ra tsa cua jaquitsi Nyoo cuví yu —catyí ra tan ña tyihj xeehe ra.

²¹ Tacan tan tsicq tuhun nyico ra naha tsi ra Juan:

—¿Yóo ra cuví un? ¿A ra Elías, ra cuví ndusu yuhu Nyoo tahán tsanaha cuví un? —catyí ra naha tsihin ra.

Tan ra Juan nacahan ra:

—Ñavin ra ican cuví yu.

Tan cuñihj ca ra naha tsicq tuhun ra naha tsi ra, tan catyí ra naha:

—Tun tacan, ¿a ra cuví ndusu yuhu Nyoo tsa nyaá tsa cua quitsi cuví un?

Tan nacahan nyico ra Juan tan catyí ra:

—Ñavin.

²² Tan tsicq tuhun nyico ra naha tsi ra Juan inga tsaha:

—¿Yóo ra cuví un? Tyin cuñi tsi catyí tuhun ndi tsihin ra tsa tava tyiñu tsi ndi yóo ra cuví un —catyí ra naha tsihin ra.

²³ Tan nacahan ra Juan:

—Yuhu cuví ndusu iin ra tsa cana tsaá nu tsiquí, tsa catyí: “Nuña ndo tsitsi añaima ndo tyin tsa vatsí Jutu Mañi yo.” Tumaa cahán ra Isaías ra cuví ndusu yuhu Nyoo tuhun yu tahán tsanaha —catyí ra Juan tsihin ra naha.

²⁴ Ra fariseo naha ra cuví ra tava tyiñu tsi ra can naha ra, na ndaca tuhun ra naha tsi ra Juan. ²⁵ Tan tsicq tuhun nyico ra naha tsi ra:

—Tatun ñavin ra Cristo, ra tsa cua jaquitsi Nyoo cuví un, ¿nacavi tyin jacoondutyá un tsi nyivi? tan ndi ñavin ra Elías cuví un, tan ndi ñavin ra cuví ndusu yuhu Nyoo cuví un —catyí ra naha tsihin ra Juan.

²⁶ Tan nacahan ra Juan tan catyí ra:

—Yuhu jacoondutyá yu tsi nyivi tsihin ndutyá. Maa tyin mahñu ndo nyíí iin ra tsa ña nacotó ndo. ²⁷ Tan cahnu ca cuví ra can tan ñavin ca yuhu. Ña cahnu cuví yuhu ndi tsa cuví yu musu ra tan cuví ndatsi yu ñii nditsan ra —catyí ra Juan.

²⁸ Tandihí yacan cuví nu nañí Betábara tsa canyíi inga tsiyo yutya cahnu Jordán nu tsinyíi ra Juan jacoondutya ra.

Ra Jesucristo, Mbee Ticatyí Luhlu jana Nyoo

²⁹ Tsa inga quívi nyehe ra Juan tsi ra Jesús cuahán ra nu nyíi ra, tacan tan catyí ra Juan:

—Nyehe jihna ndo, ra ihya cuví Mbee Ticatyí Luhlu jana Nyoo ra tsa quihín nyaa cuatyí nyívi iyó nu ñuhu ñayívi ihya.

³⁰ Tuhun ra cahan yu quívi catyí yu tsihin ndo tyin ityí tsata yu vatsi inga ra tsa cahnu ca cuví tan ñavin ca maa yu, tyin tsa iyó maa ra tan tsicoq yu. ³¹ Ndi yuhu tan ña nacoto yu tsi ra quívi can. Maa tyin vityin vatsí yu jacoondutya yu tsihin ndutya tyin tacan tan nacoto nyívi Israel ñuu yu tsi ra —catyí ra Juan.

³² Tan catyí nyico ra Juan:

—Yuhu nyehe yu Tatyí Ii Nyoo tsa quítsi ityí andívi tan quítsi tsi tumaa iin paloma, tan ndoo tsi tsihin ra. ³³ Yuhu ñaha ca nacoto yu yóo ra cuví ra quívi can. Maa tyin Nyoo, ra tsa tava tyínu tsi yu jacoondutya yu tsi nyívi tsihin ndutya, catyí ra tsihin yu: “Quívi nyehe un Tatyí Ii, vatsi nuú tsi síqui iin rayíi, tan ndoo tsi tsihin ra, juven ra can cuví ra tsa cua jacoondutya tsi nyívi tsihin Tatyí Ii yu”, catyí Nyoo tsihin yu. ³⁴ Yuhu tsa yahá nyehe yu tsi ra. Tan cuví yu tsa ndaa tyin juven ra cuví Sehe Nyoo —catyí ra Juan.

Ra tsa quítsaha nyicún jihna tsi ra Jesús

³⁵ Tsa inga quívi nyíi nyico ra Juan nu nyíi ra tan yucú ndihí uvi taahan ra tsicá tsihin ra. ³⁶ Tan nyehe ra naha, yahá ra Jesús, tan catyí ra Juan:

—Nyehe jihna ndo, ra ican cuví Mbee Ticatyí Luhlu jana Nyoo —catyí ra.

³⁷ Tsa tsiñí nduvi taahan ra nyicún tsi ra Juan tsa cahan ra, tacan tan cuahan ra naha cuanyicun ra naha tsi ra Jesús. ³⁸ Tacan tan nanyehe ra Jesús ityí tsata ra, tan nyehe ra tyin nyicún ra naha tsi ra, tan catyí ra:

—¿Náa nanducú ndo?

Tacan tan nacahan ra naha tan catyí ra naha:

—Maestro, ¿numaa iyó no?

³⁹ Tan catyí ra Jesús tsihin ra naha:

—Cohon ndo tsihin yu, tan nyehe ndo —catyí ra tsihin ra naha.

Tacan tan cuahán ra naha tsihin ra. Tan nyehe ra naha nu iyó ra. Tan ican yucu ra naha tan caaa, tyin tsaq ra naha ndacan tumaa caa cumi tsa tseñi.

⁴⁰ Iin ra tsa tsiñí tsa cahan ra Juan tan tsinyicun ra tsi ra Jesús ra ican cuví ra Andrés, yañi ra Simón Pedro. ⁴¹ Tan ra Andrés numi xaan tsinanducú ra tsi yañi ra, ra Simón Pedro, tan catyí ra tsihin ra:

—Nañihí ndi tsi ra tsa cuví Mesías —catyí ra.

Tan tuhun Mesías can cuñí tsi catyí, ra Cristo, o cuñí tucu tsi catyí, ra tsa nacatsi vaha Nyoo tyin quítsi ra cuví ra rey tsa cuenda yo.

⁴² Tacan tan quihín ra Andrés tsi ra Simón yañi ra cuahán tsihin ra nu nyíi ra Jesús. Tsa nyehe ra Jesús tsi ra Simón, tan catyí ra tsihin ra:

—Yooho Simón, sehe ra Jonás cuví tsi un. Maa tyin cua cunañi un Cefas —catyí ra tsihin ra.

Tan Cefas cuví tsi yuhu griego, tan cuñí tsi catyí tsi “Pedro”, tan tsa nduvi sivi can, cuñí tsi catyí tsi “cava”, [tumaa iin yuu cahnu].

Nu cana ra Jesús tsi ra Felipe tan ra Natanael

⁴³ Tsa inga quívi tyaa ra Jesús cuhva tsa cuhun ra Galilea. Tacan tan nañihí ra tsi ra Felipe. Tan catyí ra tsihin ra:

—Ñaha quítsi nyicun un tsi yu —catyí ra.

⁴⁴ Ra Felipe ihya, ra ñuu Betsaida cuví ra. Tan ican iyó tucu ra Andrés tan ra Pedro.

⁴⁵ Tacan tan tsañan ra Felipe tsinanducú ra tsi ra Natanael. Tan catyí ra tsihin ra:

—Nyehe ndi tsi ra tsa tyaa ra Moisés tuhun nu libru ley Nyoo, ra tsa cahan tucu ra cuví ndusu yuhu Nyoo tuhun tahañ tsanaha. Tan nañi ra Jesús. Sehe ra José ra ñuu Nazaret cuví tsi ra —catyí ra Felipe tsihin ra Natanael.

⁴⁶ Tan catyí ra Natanael:

—¿A cuví quíta tsa vaha ñuu Nazaret can? —catyí ra tsihin ra Felipe.

Tan nacahan ra Felipe tan catyí ra:

—Ñaha tan nyehe un —catyí ra.

⁴⁷ Tacan tan tsa cua cuyatyin ra Natanael nu nyíi ra Jesús. Tan nanyehe ra Jesús tyin vatsi ra, tan quítsaha catyí ra:

—¡Jihna ndo! Ihya vatsi iin ra tsa nditsa nditsa tyin ra ñuu Israel cuví ra, tyin ña tuhvá ra jandaví ñaha —catyí ra Jesús.

⁴⁸ Tacan tan tsicá tuhun ra Natanael tsi ra:

—¿Nacaa tsa tsitó un tsi yuhu?

Tan nacahan ra Jesús tan catyí ra:

—Yuhu tsa nyehe maa yu tsi un tsa ndi cumañi ca cana ra Felipe tsi un, tsa ndi nyíi un tsaaha yutun higo can —catyí ra Jesús tsihin ra.

⁴⁹ Tacan tan quítsaha catyí ra Natanael:

—Jutu Mañi yu, yooho cuví Sehe Nyoo. Tan juven un cuví rey cuenda nyuhu tsa cuví yo nyívi Israel.

⁵⁰ Tan catyí ra Jesús tsihin ra Natanael:

—¿A tsinú iñi un tsi yu tsa cuenda tyin catyí yu tyin nyehe yu tsi un tsaaha yutun higo? Maa tyin nahnu ca tsa cua nyehe un tan ñavin ca yacan —catyí ra tsihin ra.

⁵¹ Tan catyí ra Jesús tsihin ra naha:

—Tsa nditsa catyí yu tsihin ndo tyin nyoo ooho cua nyehe ndo cua nuña andívi tan cuaha xaan ángel Nyoo cua ndaa, tan cua

nuu ra naha siqui yuhu Rayii tsa quee nda gloria —catyí ra Jesús tshin ra naha.

2

Nu iyó vico tindaha ñuu Caná iin ñuu tsa canyí Galilea

¹ Tsa yahá uñi quivi tan tsicoo iin vico tindaha ñuu Caná tsa canyí Galilea. Tan ican nyíi sihi ra Jesús. ² Tan nyivi javaha vico can caná ndihi ñi tsi ra Jesús tan tshin tandihi ra tsicá tshin ra tyin cuhun ra naha. ³ Tacan tan cuahán ra naha. Tan tsitsi tsa yucú ra naha nu iyó vico can, tan ndihi vinu ñi javaha vico can. Tacan tan catyí sihi ra Jesús tshin ra:

—Nduve ca vinu ñi —catyí ña.

⁴ Tan catyí ra Jesús tshin ña:

—¿Náa tsa ndihi iñi yo yacan, Miyan? Tyin ñaha ca tsa hora yu —catyí ra tshin ña.

⁵ Maa tyin sihi ra cahan ña tshin ra tsa tyihí mesa nu iyó vico can naha ra:

—Javaha nyooho tandihi tsa cua cahan ra tshin ndo —catyí ña tshin ra naha.

⁶ Tan nyecú iñu quisi yuu nahnu tsa yihí ndutya tsa tuhvá ra Israel naha ra tsatyíñu nu nacatá xaan ra naha ndaha ra naha cuhva tsa iyó maa ra naha. Tan intuhun intuhun quisi can tsitahan uvi xico utsi, a uñi xico utsi, litru ndutya tsitsi can. ⁷ Tacan tan catyí ra Jesús tshin ra tsa tyihí mesa can naha ra:

—Jacutu ndo quisi ihya tshin ndutya —catyí ra tshin ra naha.

Tacan tan tsityú cuii quisi can jahá ra naha.

⁸ Tacan tan catyí ra Jesús tshin ra naha:

—Vityin tava ndo juhva tan cundaca ndo tsi ra cuví ityi nuu cuenda vico ihya —catyí ra Jesús tshin ra naha.

Tan tacan ica ra naha. ⁹ Ra cuví ityi nuu cuenda vico can tshihí ra naha ndutya tsa nanduvj vinu. Maa tyin ña tsitó ra naha nu maa quee can. Maa ñi maa ra tsa tyihí mesa can naha ra tsitó, tyin maa ra naha tava ndutya can. Tacan tan ra cuví ityi nuu cuenda vico can cana ra tsi ra tsa tandaha can. ¹⁰ Tan catyí ra tshin ra:

—Tandihí nyivi, jihna ca vinu vaha tuhvá ñi tava. Yaha can tan tatun tsa tshihí xaan nyivi, tacan tan tava ñi vinu ndaahvi. Maa tyin yooho tsicumj vaha un vinu vaha. Tan nda vityin tava un can —catyí ra tshin ra.

¹¹ Tsa javaha ra Jesús ñuu Caná tsa canyí Galilea, yacan cuví tsa iyo tsa jihna ñi javaha ra tan janaha ra tsa cahnu cuví ra tsi nyivi. Tan ra tsicá tshin ra tsinu iñi ra naha tsi ra tyin ra ican cuví ra tsa jaquitsj Nyoo.

¹² Tsa yahá yacan tan cuahán ra ñuu Capernaum tshin sihi ra tan tshin yafi ra. Tan cuahan ndihi ra tsicá tshin ra. Tan ican tsiyucú ñi juhva quivi.

Nu jacunu ra Jesús tsi nyivi xico nuquehe yuvehe ñuhu cahnu

(Mt. 21.12-13; Mr. 11.15-18; Lc. 19.45-46)

¹³ Tsa cua tahan tsi quivi vico pascua tsa jacahnú nyivi Israel. Yacan cuenda cuahán ra Jesús ñuu Jerusalén. ¹⁴ Tsa tsaá ra ñuu can, quihvi ra nuquehe vehe ñuhu cahnu, tan nyehe ra yucú cuaha nyivi xicó ñi nuquehe can. Yihí ñi xicó ñi indiqui, mbee ticatyí, tan paloma. Tan yucú ndihi tucu nyivi nasamá xuhun. ¹⁵ Tsa nyehe ra Jesús tandihi yacan, tacan tan javaha ra iin yoho. Tan tshin yoho can jacunú ra tsi tandihi nyivi nuquehe vehe ñuhu iin cahnu ñi tshin mbee tan tshin indiqui jana ñi. Tan ñi nasamá xuhun can, jatucuatyí ra xuhun ñi nu ñuhu tan janduvá ra mesa ñi. ¹⁶ Tan catyí ra tshin ñi xicó paloma:

—¡Tava ndo paloma can ihya! ¡Ña javaha ndo vehe Jutu yu tumaa iin nuyahvi! —catyí ra tshin ñi.

¹⁷ Tacan tan ra tsicá tshin ra, nducuhun iñi ra naha tsa catyí nu tutu Nyoo tyehen: “Cuiñu xaan yu vehe un”, catyí tsi, nducuhun iñi ra naha.

¹⁸ Tacan tan ra cuví ityi nuu tshin nyivi Israel quitsaha tsicá tuhun ra naha tsi ra Jesús:

—¿Náa seña javaha un nyehe ndi tan janaha un tyin nditsa tsa tsaá Nyoo ndatu tsi un tsa javaha un yacan? —catyí ra naha tshin ra.

¹⁹ Tan nacahan ra Jesús tan catyí ra:

—Caní ndo vehe ñuhu ihya, tan tsitsi tsa uñi quivi ñi tan cua janduvita nyico yu itsi inga tsaha —catyí ra tshin ra naha.

²⁰ Tacan tan quitsaha catyí ra nyecú ican naha ra tshin ra:

—Uvi xico iñu cuiya jahá tyiñu ra naha tan tsinu vehe ñuhu ihya. ¡Tan yooho catyí un tyin tsitsi tsa uñi quivi ñi tan cua janduvita un itsi inga tsaha! —catyí ra naha tshin ra.

²¹ Maa tyin ñavin tuhun vehe ñuhu can cahan ra Jesús, tyin cahan ra tuhun cuñu ñuhu ra. ²² Yacan cuenda tandihi ra tsicá tshin ra nducuhun iñi ra naha yacan quivi nandoto ra. Tan cutuñj iñi ra naha tyin tuhun tsa nyaá nuu tutu Nyoo caahán tsi cuenda ra Jesús. Tan tsinu iñi ra naha tsa cahan ra Jesús tan tsa nyaá nu tutu Nyoo.

Ra Jesús tsitó ra tsa iyó añima nyivi

²³ Tsitsi tsa ndi nyii ra Jesús ñuu Jerusalén, quivi iyó vico pascua, cuaha xaan nyivi quitsaha tsinú iñi tsa caahán ra tsa cuenda tsa cuaha tsa iyo javaha ra. ²⁴ Maa tyin ra Jesús ña ñi cuñi ra nyehé ra tsi tandihi ñi tyin tsitó ra cuhva tsicá iñi ñi. ²⁵ Ña tsifiñuhú tsa nacatyí tuhun yo tshin ra náca iyó nyivi, tyin tsa tsitó maa ra náca iyó tsitsi añima yo.

3

Nu jacuahā ra Jesús tsi ra Nicodemo

¹ Tsicoq iin ra cuví fariseo tsa nañi Nicodemo. Tan cuví ra iin ra cuví ityi nuu tsihin ra Israel naha ra. ² Ra Nicodemo ihya, tsaḥan ra nu nyíi ra Jesús iin tsacuaa. Tan catyí ra tsihin ra:

—Maestro, tsitó ndi tyin Nyoo tavaḥ tyiñu tsi un tsa quitsi un jacuahā un tsi ndi. Tyin yoñi nyívi tan cuví javaha ñi tsa iyo tsa javahá un, tatun nduve Nyoo iyó tsihin ñi —catyí ra tsihin ra Jesús.

³ Tacan tan catyí ra Jesús tsihin ra:

—Tsa nditsa catyí yu tsihin un tyin tatun ña cua nacacu tsa nyívi inga tsaha, ña cua cuví nyehe ñi nu ndacá ñaha Nyoo —catyí ra.

⁴ Tacan tan tsicá tuhun ra Nicodemo tsi ra Jesús tan catyí ra tsihin ra:

—¿Nacaa cuví cacu iin rayi inga tsaha tatun tsa tsahnu ra? ¿A cuví quihvi nyico ra tsitsi sihi ra tan nacacu tsa inga tsaha? —catyí ra.

⁵ Nacahan ra Jesús tan catyí ra:

—Tsa nditsa catyí yu tsihin un tyin ñavin tsihin tsa cacu nyívi tsihin cuñu ñuhu ñi tan cuví quihvi ñi nu ndacá ñaha Nyoo. Maa tyin ñiñi xaan cuñi tsi nacacu tsa ñi tsihin Tatyí Ii Nyoo. ⁶ Tyin nyívi cacu tsihin cuñu ñuhu, cuñu ñuhu ñi cuví ñi. Tan nyívi nacacu tsa tsihin Tatyí Ii Nyoo, Tatyí Ii Nyoo iyó añima ñi. ⁷ Ña cu iyo iñi un tsa caahán yu tsehe tsihin un tyin tandihi nyívi cuñi tsi nacacu tsa ñi. ⁸ Tumaa tsa yihí tatyí tandihi ñi ityi tan tsiñi un cucayú vatsí tsi, maa tyin ña tsító un numaa ityí quee tsi, tan ndáa ityi cuahán tsi; tacan cuví tandihi nyívi nacacu tsa tsihin Tatyí Ii Nyoo —catyí ra Jesús tsihin ra.

⁹ Tacan tan nducú tuhun nyico ra Nicodemo tsi ra inga tsaha tan catyí ra:

—¿Nacuenda caahán un tacan? —catyí ra tsihin ra.

¹⁰ Nacahan ra Jesús tan catyí ra:

—Yooho tsa cuví un maestro cuenda nyívi Israel, taahán tsi coto un tsehe. ¹¹ Tsa nditsa catyí yu tsihin un tyin caahán ndi tsa tsitó ndi tan cuví ndi tsa ndaa tsa cuenda tsa nyehe ndi. Maa tyin nyooho ña tsinú iñi ndo tsa caahán ndi tsihin ndo. ¹² Tatun ña tsinú iñi ndo tsa caahán yu tuhun nu ñuhu ñayívi ihya tsihin ndo, ¿nacaa cua tsinu iñi ndo tatun cua cahan yu tuhun gloria tsihin ndo?

¹³ Yoñi tsaḥan gloria tsinyeḥe nacaa iyó. Intuhun ñi maa yuhu Rayi tsa quee nda gloria nyeḥé yu nacaa iyó gloria, tyin ndacan quee yu. ¹⁴ Tumaa tsa ticaa ra Moisés iin coo tsa tsinú tsihin caa nu yutun iin nu tsiqui, tacan cua ticaa nyívi tsi yuhu Rayi tsa quee nda gloria nuu cruu. ¹⁵ Tacan tan tandihi

nyívi tsa tsinú iñi tsi yu, ña cua cunaa ñi. Tan cua coo ñi ñayívi nyito tsa ña cua naa maa.

Nyoo cuñi xaan ra tsi tandihi nyívi

¹⁶ Nyoo cuñi xaan ra tsi tandihi nyívi iyó nu ñuhu ñayívi. Yacan cuenda tsaḥā ra tsa cúu Sehe mañi ra nu cruu tsa cuenda ñi. Tyin tacan tan tandihi ñi tsa tsinú iñi tsi Sehe ra, ña cunaa ñi, tan coo ñi ñayívi nyito tsa ña cua naa maa. ¹⁷ Tyin Nyoo jaquitsi ra tsi Sehe ra nu ñuhu ñayívi tyin jacacu ra tsi nyívi, tan ña jaquitsi ra tsi ra tsa jacunaa ra tsi ñi.

¹⁸ Yacan cuenda nyívi tsa tsinú iñi tsi yu tsa cuví yu Sehe Nyoo ña cua cunaa ñi, maa tyin nyívi tsa ña tsinú iñi tsi yu, tsa cunaq ñi tyin ña tsinú iñi ñi tsi yu tsa cuví yu Sehe mañi Nyoo. ¹⁹ Nyívi ña tsinú iñi, tsa cunaq ñi. Tyin quívi quitsi yu jandunditsin yu nu ñuhu ñayívi, ña naquihñi cuenda ñi tsi yu tyin taahán xaan ca maa iñi maa ñi iyó ñi nu naa tyin maa ñi tsa ña vaha javahá ñi. ²⁰ Tandihi nyívi javahá tsa ña vaha, ña taahán iñi ñi coo ñi nu nditsin, tyin ña cuñi ñi tsa quituvi tsa ña vaha javahá ñi. ²¹ Maa tyin nyívi taahán iñi tsa nditsa, naquitá ñi nu nditsin tyin tacan tan nyehe nyívi tyin javahá ñi cuhva cuñi Nyoo tyin nyaá ra tsihin ñi —catyí ra Jesús.

Nu caahán ra Juan, ra jacoondutyá tsi nyívi, tuhun ra Jesús inga tsaha

²² Tsa yahā yacan, ra Jesús tan ra tsicá tsihin ra cuahán ra naha nu cuví Judea. Tan ndoq ra naha ican juhva quívi, tyin jacoondutyá ra naha tsi nyívi. ²³ Tacan tucu ra Juan nyíi ra jacoondutyá ra tsi nyívi nu cuví Enón yatyn ñi nu cuví Salim, tyin ican ñuhú cuaha ndutya. Tan tsaá nyívi tan tsicoondutyá ñi. ²⁴ Yacan javahā ra Juan tsa ndi cumañi ca quihvi ra vehe caa.

²⁵ Tacan tan quitsahā caahán yuhu tahan juhva ra tsicá tsihin ra Juan tsihin inga ca ra naha tsa cuenda tsa janduvaha nyívi tsi ñi nuu Nyoo. ²⁶ Tacan tan cuahán ra naha nu nyíi ra Juan. Tan catyí ra naha tsihin ra:

—Maestro, ra tsa tsinyi tsihin un inga tsiyo yutya cahnu Jordán, ra tsa caḥan un tuhun tsihin ndi, vityin jacoondutyá ndihi ra tsi nyívi tan tandihi nyívi nyicún tsi ra —catyí ra naha tsihin ra.

²⁷ Tacan tan catyí ra Juan tsihin ra naha:

—Ndi intuhun yo tan nduve náa cuví javaha yo, tun tsatyn ña tsahá Nyoo tunyee iñi ra tsi yo. ²⁸ Nyooho tsa tsító maa ndo tyin ñavin yuhu cuví ra Cristo tyin tsiñi maa ndo tsa caḥan yu quívi catyí catsi yu tyin ra jaquitsi Nyoo ityi nuu ra Cristo cuví yu. ²⁹ Tyin nu iyó vico tandaha, ra tsa nyaá xiin ñaha yoco can, juvin ra cuví ra cua tindaha tsihin ña. Tan ra vaha iñi tsi ra nyíi ra ican. Tan cusí iñi ra tsiñi ra tsa caahán ra tsa cua tindaha. Tan tacan tucu yuhu, sií cuñi yu

tyin naquihín nyivi tuhun caahán ra Jesús tan nyicún ñi tsi ra. ³⁰ Maa ra cuví ra cahnu ca cuví. Tan yuhu cua nduluhlu yu nuu ra tyin tacan taahán maa tsi.

Ra quee nda gloria tan quitsi ra nu ñuhu ñayivi

³¹ 'Ra tsa quee nda gloria, cahnu ca cuví ra tan ñavin ca tandihi nyivi. Tyin nyivi iyó nu ñuhu ñayivi ihya, cuenda nu ñuhu ñayivi cuví ñi. Tan caahán ñi tuhun tsa iyó nu ñuhu ñayivi. Maa tyin ra tsa quee nda gloria, cahnu cuví ra. ³² Tan caahán ra tsa nyehé ra tan tsa tsifí ra, maa tyin yoñi tsinú ñi tsa caahán ra. ³³ Tatun yoo tan tsinú ñi yo tsa caahán ra, cua cuví yo tsa ndaa tyin Nyoo ña vatya ra. ³⁴ Tyin ra tsa jaquitsi Nyoo, tuhun Nyoo caahán ra tyin Nyoo ña tyihí cuhva ra Tatyí li ra tan tsahá ra itsi tsi ra. Tsahá ra naní Tatyí li ra tsi ra. ³⁵ Nyoo Jutu yo cuñí ra tsi Sehe ra. Tan nacuhva cuenda ra tandihi maa tsi ra. ³⁶ Nyivi tsa tsinú ñi tsa caahán Sehe Nyoo, iyó ñi ñayivi nyito tsa ña cua naa maa. Maa tyin nyivi tsa ña cuñí tsinu ñi tsi ra, ña cua coo ñi ñayivi nyito. Tan cua tatsi tuñi Nyoo tsi ñi.

4

Nu natuhun ra Jesús tsihin iin ñaha Samaria

¹ Tsa tsito ra cuví fariseo naha ra tyin cuaha xaan ca nyivi nyicún tsi ra Jesús tan ñavin ca ra Juan. Tan cuaha xaan ñi tsi-coondutya. ² Maa tyin ñavin maa ra Jesús jacoondutya tsi ñi, tyin ra tsicá tsihin ra jacoondutya tsi ñi. ³ Tan quivi tsa tsito ra Jesús tyin tsito ra naha yacan, quee ra Judea can tan cuanuhú ra nda nu cuví Galilea.

⁴ Tsa cuahán ra, yaha ra nu cuví Samaria tyin cuñí tsi yaha ra ican. ⁵ Tacan tan tsaq ra iin ñuu tsa canyí Samaria tsa nañi Sicar yatyin ñi nu cuví ñuhu ra Jacob nu tsahá ra tsi ra tsaq sehe ra. ⁶ Ican nyaá iin soco pila tsa catyí nyivi tyin tsii ra Jacob cuví. Tsa quita ra Jesús nu nyaá soco can tan tsinyaq ra yuhu soco can tyin tatu xaan ra tyin cañi xaan ityi tsicá ra tan maa hora cuví. ⁷⁻⁸ Ra tsicá tsihin ra, yoñi ra naha nyecú tsihin ra tyin cuahán ra naha tsitsi ñuu, cua jata ra naha tsa catsi ra naha. Juvín ñi cuhva can tan tsaq iin ñaha Samaria tyin cua tava ña ndutya tsitsi soco can. Tacan tan catyí ra Jesús tsihin ña:

—Cuhva luxu ndutya coho yu —catyí ra tsihin ña.

⁹ Tacan tan ñaha Samaria can catyí ña tsihin ra:

—Yooho tsa cuví un iin ra ñuu Israel, ¿nacuvi tyin tsicán un ndutya coho un tsi yuhu tsa cuví yu ñaha Samaria? —catyí ña.

(Tacan catyí ña tyin nyivi Israel ña vaha iyó ñi tsihin nyivi Samaria.) ¹⁰ Tacan tan nacahan ra Jesús tan catyí ra:

—Tun tsatyin tsitó un tsa tsahá Nyoo, tan tsitó un yóo ra cuví ra tsicán ndutya tsi un, maa un cua ndacan ndutya tsi yu. Tan cua cuhva yu ndutya nyito tsi un —catyí ra tsihin ña.

¹¹ Tacan tan catyí ña tsihin ra:

—Tatta, cunu xaan soco ihya. ¿Nacaa tava tucu un ndutya cuhva un tsi yu? tan ndi nduve náa ndaha un ¿Nu maa cua quihin un ndutya nyito can cuhva un coho yu? ¹² Ra Jacob tsii tsahnu yo, nacoq ra soco ihya tsi ndi. Juvín ihya tsihi maa ra ndutya tan tsihin tandihi sehe ra. Tan juvín ñi ihya tsihi tucu quiti jana ra naha. ¿A cahnu ca ra cuví yooho tan ñavin ca ra can? —catyí ña tsihin ra.

¹³ Tacan tan nacahan ra Jesús tan catyí ra tsihin ña:

—Tandhi nyivi tsihi ndutya ihya, cua na ityi nyico ñi ñi. ¹⁴ Maa tyin nyivi tsihi ndutya tsa tsahá yuhu, ña cua na ityi ca ñi ñi. Tyin ndutya tsa tsahá yuhu cua cana tsi tsitsi añima ñi tumaa caná ndutya iin ndohyo, tyin iin ndohyo ña tuhvá tsi ndoco. Tan tacan cua coo ñi ñayivi nyito —catyí ra tsihin ña.

¹⁵ Tacan tan quitsaha caahán ña tsihin ra:

—Yooho tatta, cuhva ndutya can coho yu na ña na ityi ca ñi yu, tan ndi ña quitsi ca yu quitsi tava yu ndutya tsitsi soco ihya —catyí ña tsihin ra.

¹⁶ Tacan tan catyí ra Jesús tsihin ña:

—Cuaahan cua quihin yí un tan quitsi ndo —catyí ra tsihin ña.

¹⁷ Tan nacahan ña tan catyí ña:

—Nduve yí yu iyó.

Tacan tan catyí ra Jesús tsihin ña:

—Nditsa tsa caahán un, tyin nduve yí un iyó. ¹⁸ Tyin tsa uhun yí un tsicoq, tan ra cumí tsi un vityin ñavin yí un tsi ra. —catyí ra tsihin ña.

¹⁹ Tsa tsifí ña tsa cahan ra tacan, quitsaha catyí ña tsihin ra:

—Yooho tatta, tuví ñi yu tyin ra cuví ndusu yuhu Nyoo cuví un. ²⁰ Tsii tsahnu ndi, ra ñuu ihya naha ra, jacahnú ra naha tsi Nyoo yucu ihya. Maa tyin nyooho tsa cuví nyivi Israel catyí ndo tyin nda Jerusalén taahán tsi jacahnú yo tsi Nyoo —catyí ña tsihin ra.

²¹ Tacan tan nacahan ra Jesús tan catyí ra tsihin ña:

—Tsinu ñi tsa caahán yu tsihin un. Tyin vatsi hora tsa cua jacahnú ndo tsi Jutu yo Nyoo. Maa tyin ña tsifíñuhú ca tsa quitsi ndo yucu ihya, a cuhun ndo nda Jerusalén. ²² Nyooho nyivi Samaria, ña tsitó ndo yóo jacahnú ndo. Maa tyin nyuhu tsitó ndi yóo jacahnú ndi. Tan tsitó ndi tyin cua jacacu

iin ra Israel tsi nyivi jaha Nyoo. ²³ Maa tyin cua tsaah hora, tan hora can iyó yo vityin tyin nyivi tsa nditsa jacahnú tsi Nyoo Jutu yo, cua jacahnu ñi tsi ra tshihin añima ñi tan tshihin tsa nditsa. Tumaa jaquihín ityi maa Tatyí li Nyoo tsi ñi. Tyin Nyoo Jutu yo tacan cuñi ra javaha ñi tsa jacahnú tsi ra. ²⁴ Tyin Nyoo Tatyí li cuví ra. Tan nyivi jacahnú tsi ra cuñi tsi jacahnú ñi tsi ra tshihin tsa nditsa tumaa jaquihín ityi maa Tatyí li tsi ñi —catyí ra tshihin ña.

²⁵ Tan nacahan ña tan catyí ña tshihin ra:

—Yuhu tsitó yu tyin cua quitsi ra cuví Mesias, ra Cristo, ra Cuví rey tsi yo. Tan quívi quitsi ra, maa ra cua nacatyí tuhun tandíhi tshihin yo —catyí ña tshihin ra.

²⁶ Tacan tan nacahan ra Jesús tan catyí ra tshihin ña:

—Ra tsa caahán un tuhun can, juvin ra caahán tshihin un —catyí ra tshihin ña.

²⁷ Tacan tan tsaá nyico ra tsicá tshihin ra, tan iyo xaan cuñi ra naha tyin natuhún ra Jesús tshihin iin ñaha. Maa tyin ndi intuhun ra naha tan ña caná iñi ra naha ndaca tuhun ra naha náa cuñi ra, o ndaca tuhun ra naha tsi ra nacuenta natuhún ra tshihin ñaha can. ²⁸ Tacan tan nacoó ña quívi ña tan cuanuhu ña nda ñuu. Tan catyí ña tshihin nyivi:

²⁹ —Cohon ndo cunyehe ndo tsi iin ra tsa cahan tandíhi cuhva iyó yu. ¿A ñavin ra Cristo tsa cua jaquitsi Nyoo cuví ra? —catyí ña tshihin ñi.

³⁰ Tacan tan quitá nyivi ñuu can tan cuahán ñi cua nyehe ñi nu nyíi ra Jesús. ³¹ Tan tsa ndi cumañi ca tsaá ñi nu nyíi ra, ra tsicá tshihin ra, jañiñi ra naha tsi ra na catsi ra luxu. Tan catyí ra naha tshihin ra:

—Maestro, catsi luxu —catyí ra naha.

³² Maa tyin catyí ra Jesús tshihin ra naha:

—Yuhu iyó iin tsa tsatsi yu tan nyoocho ña tsitó ndo náa cuví can —catyí ra tshihin ra naha.

³³ Tacan tan ra tsicá tshihin ra, quitsaha natuhún tahan ra naha, tan catyí ra naha:

—¿A iyó yoo quitsi quitsi ndaca tsa catsi ra? —catyí ra naha.

³⁴ Maa tyin ra Jesús catyí ra tshihin ra naha:

—Tsa tsatsi yuhu juvin tsi cuví tsa javahá yu cuhva cuñi ra tsa jaquitsi tsi yu, tan javahá yu tyiñu tsaahá ra tsi yu. ³⁵ Nyoocho catyí ndo: “Ndi cumañi cumi yoo ca tan tahan tsi naquihin vaha yo tsa tatsi yo.” Maa tyin yuhu catyí yu tshihin ndo: Nyehe ndo tyin tsa ndíhi tsa tatsi ndo cuaan tan tsa nyecú vaha tsi tsa cua naquihin vaha yo itsi. ³⁶ Ra tsa naquihín vaha can ñihí ra yahví ra. Tan tsa naquihín vaha ra, cuví tsi nyivi tsa cua coo ñayivi nyito tsa ña cua naa maa. Tacan tan ra tsa tatsi tan ra tsa naquihín cusii iñi ra naha. ³⁷ Tan iyó iin cuhva tuhvá nyivi caahán tan catyí ñi tyin siin nyivi tatsi tan siin nyivi naquihin vaha. Tan nditsa

yacan. ³⁸ Yuhu jacuhun yu tsi ndo tyin cua cahnu ndo ñiñi tsa iyó nu ña jahá tyiñu ndo, nu jahá tyiñu inga ra. Tan nyoocho cucahnu ndo tan cua naquihin vaha ndo ñiñi can —catyí ra Jesús tshihin ra naha.

³⁹ Tan cuaha xaan nyivi ñuu Samaria can quitsaha tsinú iñi ñi tsi ra Jesús tsa cuenda tsa cahan ñaha can, tyin catyí ña: “Cahan ra tshihin yu tandíhi cuhva iyó yu”, catyí ña. ⁴⁰ Cuhva tsa tsaá ñi nu nyíi ra Jesús, tan cahan ndaahvi ñi tshihin ra na ndoo ra tshihin ñi. Tan ndoo ra tshihin ñi uvi quívi. ⁴¹ Tan cuaha ca nyivi quitsaha tsinú iñi ñi tsa tsiñi ñi tsa caahán ra. ⁴² Tacan tan quitsaha catyí ñi tshihin ñaha can:

—Vityin tsinú iñi ndi, maa tyin ñavin tsa cuenda tsa cahan un tshihin ndi, tyin tsiñi maa ndi tshihin soho ndi tsa caahán ra, tan tsitó vaha ndi tyin juvin ra na cuví ra Cristo ra jacacú tsi nyivi iyó nu ñuhu ñayivi ihya —catyí ñi.

Nu janduvahá ra Jesús sehe iin ra cumí tyiñu

⁴³ Tsa yahá uvi quívi tan quee ra Jesús nu cuví Samaria tan cuahán ra ityi nu cuví Galilea, nu cacu ra. ⁴⁴ Vasu ndi maa juvin ñi maa ra cahan tyin iin ra cuví ndusu yuhu Nyoo, nyivi ñuu ra ña jahá ñi tsa ñayivi tsi ra. ⁴⁵ Tacan tan tsa tsaá ra Galilea, nyivi iyó ican, vaha caahán ñi tshihin ra, tyin tsaahan ñi vico Jerusalén, tan nyehe ñi tsa vaha tsa javahá ra.

⁴⁶ Tacan tan cuanuhu nyico ra Jesús nda ñuu Caná tsa canyií Galilea nu nanduví ndutya vinu jahá ra. Tan iyó iin ra nyisó tyiñu cahnu nuu rey. Ra ican iyó iin sehe ra tsa cuuhvi nda ñuu Capernaum. ⁴⁷ Quívi tsa tsitó ra can tyin tsa tsaá nyico ra Jesús nda Galilea tsa tsaahan ra nda Judea, tsaahan ra tsinyehe ra tsi ra Jesús. Tan tsican ra tumañi iñi tsi ra na cuhan ra vehe ra tan janduvaha ra tsi sehe ra, tyin tsa cuñi cúu cuii ña sehe ra. ⁴⁸ Tacan tan catyí ra Jesús tshihin ra:

—Nyoocho ña cua tsinu iñi ndo tatun ña nyehe jihna ndo tsa iyo —catyí ra tshihin ra.

⁴⁹ Maa tyin ra can catyí ra tshihin ra Jesús: —Yoocho taa, cohon ñi tshihin yu tsa ndi cumañi ca cúu sehe yu —catyí ra tshihin ra Jesús.

⁵⁰ Tacan tan catyí ra Jesús tshihin ra:

—Cuanuhu yuvehe un. Sehe un nyito ra, tsa nduvahá ra —catyí ra tshihin ra.

Tacan tan ra can tsinu iñi ra tsa cahan ra Jesús tan cuanuhu ra. ⁵¹ Tsa tsa cuyatyin ra yuvehe ra, quitá musu ra tan caahán ra naha tshihin ra:

—¡Taa, sehe un nyito ra; tsa nduvahá ra!

⁵² Tacan tan quitsaha tsicá tuhun ra tsi ra naha náa hora quitsaha vaha cuñi ra. Tan catyí ra naha tshihin ra:

—Icu cuhva caa iin tsa yaha hora quita cahñi tsi ra —catyí ra naha.

⁵³ Tacan tan tsito ra can, tyin hora can cahān ra Jesús tsihin ra, “Cuānuhu tyin sehe un nyito ra, tsa nduvahā ra.” Tan maa ra can tsihin tandihí nyivi ra quitsahā tsinú iñi ñi tsi ra Jesús.

⁵⁴ Yacan cuví tsa iyo tsa tsinu uvi javahā ra Jesús tsa tsaq nyico ra Galilea tsa yaha tsaḥān ra Judea.

5

Nu janduvahā ra Jesús iin ra cuuhví

¹ Tsa yaha can tan cuahán ra Jesús ñuu Jerusalén inga tsaha tyin nyivi ñuu Israel jacahnú ñi iin vico. ² Tan yuhu cora cahnu ñuu can iyó iin yuvehe tsa nañi Yuvehe Cuenda Mbee Ticatyí. Tan yatyin ñi nyaá iin vehe cahnu. Tan tsitsi vehe can ñuhú ndutya. Tan tsa tsihin yuhu hebreo nañi vehe can Betesda. Tan iyó uhun corredor. ³ Tan ican yucú cuaha nyivi cuuhví: ñi cuaa, ñi coxo, tan ñi ndohó cuehe xii. Ndatú ñi náa hora nacanda ndutya can. ⁴ Tyin nda naha nda naha ñi tan nuú iin ángel tan jacandá ra ndutya can. Tan nyivi tsa quihví jihna tsa yaha ñi nacandá ndutya can, nduvahá ñi vasu ndi maa cuehe cahnu ndohó ñi. ⁵ Tan ican canyí iin ra cuuhví tan tsa iyó oco tsaḥun uñi cuiya cuuhví ra. ⁶ Tsa nyeḥe ra Jesús tsi ra ican canyí ra, tuví iñi ra tyin tsa cuaha xaan cuiya cuuhví ra. Tan tsicā tuhun ra tsi ra ndaahvi can, tan catyí ra:

—¿A cuñi un nduvaha un?

⁷ Tan ra cuuhví can nacahān ra tan catyí ra:

—Tata, yoñi maa tyihí tsi yu tsitsi ndutya ihya tatun tsa nacandá tsi. Tyin tahán ñi tsaha tsa cuñi yu quihví yu, inga nyivi quihví jihna —catyí ra cuuhví can tsihin ra Jesús.

⁸ Tacan tan catyí ra Jesús tsihin ra:

—Nduvita, naquihin yuvi un tan çaça un —catyí ra tsihin ra.

⁹ Juvín ñi hora can tan nduvahā ra, naquihin ra yuvi ra, tan nacacā ra. Maa tyin quivi quitatú nyivi cuví quivi can. ¹⁰ Yacan ra cuví ityi nuu tsihin nyivi Israel catyí ra naha tsihin ra tsa nduvahā can:

—Quivi quitatú yo cuví vityin, yacan cuenda ña taahán tsi cuisio un yuvi un —catyí ra naha tsihin ra.

¹¹ Tan ra tsa nduvahā can nacahān ra tan catyí ra:

—Ra tsa janduvahā tsi yu, catyí ra tsihin ra: “Naquihin yuvi un tan çaça un”, catyí ra tsihin ra.

¹² Tacan tan quitsahā tsicá tuhun ra naha tsi ra, tan catyí ra naha:

—¿Yóo ra cahān tsihin un tyin naquihin un yuvi un tan çaça un? —catyí ra naha.

¹³ Maa tyin ra tsa nduvahā can ña tsitó ra yóo janduvahā tsi ra. Tyin cuaha xaan nyivi nyecú ican, tan ra Jesús nduve ca ra nyaá tyin tsa cuahán ra. ¹⁴ Yaha can tan nañihí ra Jesús tsi ra tsa nduvahā can tsitsi vehe ñuu cahnu, tan catyí ra tsihin ra:

—Jihna, vityin tsa nduvahā un, ña javaha ca un tsa ña vaha, tyin coto quitsi inga tundoho cahnu ca siqui un —catyí ra tsihin ra.

¹⁵ Tacan tan tsaḥān ra tsicahān ra tsihin ra Israel naha ra tyin ra Jesús cuví ra janduvahā tsi ra. ¹⁶ Tsa cuenda tsa janduvahā ra Jesús tsi ra can quivi quitatú nyivi, xaan xaan cuñi ra Israel naha ra nyehe ra naha tsi ra. Tan cuñi ra naha cahñi ra naha tsi ra.

¹⁷ Maa tyin ra Jesús catyí ra tsihin ra naha:

—Maa Jutu yu, nda vityin tan jahá tyiñu ra. Tan jahá tyiñu tucu yuhu —catyí ra.

¹⁸ Tan tsa cuenda tsa cahān ra yacan, xaan ca cuñi ra Israel can naha ra. Tan ñihí ca cuñi ra naha cahñi ra naha tsi ra tyin cuñi maa ra naha tyin ña jahá ra Jesús tsa cahnu cuví quivi quitatú nyivi, tan inga tucu tuhun, iin ñi cuví ra tsihin Nyoo jahá ra tsi ra tyin catyí ra tyin jutu ra cuví tsi Nyoo.

Sehe Nyoo iyó xaan ndatu tsi ra cundaca ñaha ra

¹⁹ Tacan tan catyí ra Jesús tsihin ra naha:

—Tsa nditsa caahán yu tsihin ndo tyin yuhu, Sehe Nyoo cuví tsi yu, tan nduve tsa javahá yu tsa maa ñi maa yu. Tyin javahá yu tsa nyeḥe yu javahá Jutu yu. Tandihí tsa javahá Jutu yu tan javahá tucu maa yu.

²⁰ Tyin cuñi xaan ra tsi yu, tyin Sehe ra cuví tsi yu, tsa cuenda yacan janahá ra tandihí tsa javahá ra tsi yu. Tan nahnu ca tsa cua janaha ra tsi yu, tan nyooho iyo cua cuñi ndo nyehe ndo can. ²¹ Tumaa janandotó Nyoo Jutu yu ndiyi, tan tsahá ra ñayivi coo ñi, tacan tucu yuhu tsa cuví yu Sehe ra, tsahá yu ñayivi coo nyivi cuñi maa yu cuhva yu.

²² Tacan Nyoo Jutu yu, ña jandaa ca ra cuatyí ndi intuhun nyivi tyin tsa tsaḥān ra ndatu tsi yuhu tsa cuví yu Sehe ra tyin jandaa yu cuatyí nyivi. ²³ Yacan icá Nyoo Jutu yu tsa cuñi ra jacahnú nyivi tsi Sehe ra tumaa tsa jacahnú maa ñi tsi maa ra. Nyivi tsa ña jacahnú tsi yuhu tsa cuví yu Sehe Nyoo, ndi Jutu yu tan ña jacahnú ñi. Tyin maa ra jaquitsí tsi yu.

²⁴ Tan tsa nditsa caahán yu tyin nyivi tyaaá soho tsa caahán yu tan tsinú iñi ñi tsi ra tsa jaquitsí tsi yu, iyó ñi ñayivi nyito tsa ña cua naa maa. Tan ña cua cuhun ca ñi anyaya tsa catyí cuatyí ñi tyin tsa jacacū Nyoo tsi ñi tan ña yihí ndaha ca tuhun tsihihí tsi ñi, tan tsaḥān ra ñayivi nyito iyó ñi. ²⁵ Nyivi; tumaa ndiyi cuví ñi. Tan tsa nditsa caahán yu tsihin ndo tyin vatsí quivi cua cuñi ñi ndusu Sehe Nyoo. Tan nyivi tsa cua tyaa yahvi tsa caahán ra, cua coo ñi ñayivi nyito tsa ña cua naa maa.

Tan vityin cuví quívi tsa caahán yu tuhun. ²⁶ Tyin Nyoo Jutu yu iyó ra ñayívi nyito tsa ña cua naa maa. Tan tsaḥá ra ndatu can tsi yuhu tsa cuví yu Sehe ra tyin cuhva yu ñayívi can coo nyívi. ²⁷ Tan tsaḥá tucu Nyoo ndatu tsi yu tsa jandaa yu cuatyí nyívi, tyin Rayíi quee nda gloria cuví yu. ²⁸ Ña iyo cuñi ndo tsa caahán yu tyeheh, tyin cua tsaḥá quívi tsa cuñi ndiyí yucú tsitsi ñaña ndusu Sehe Nyoo. ²⁹ Tan cua quita ñi tsitsi ñaña ñi. Tacan tan nyívi tsa javahá tsa vaha cua nandoto ñi tyin coo ñi ñayívi nyitó. Maa tyin nyívi tsa javahá tsa ña vaha cua nandoto ñi tyin cuhuh ñi anyaya nu cua tatsi tuñi Nyoo tsi ñi.

Nu janahá tsi tyin ra Jesús iyó ndatu tsi ra tsa cuhva ra ñayívi nyito coo nyívi

³⁰ 'Yuhu ña cuví javaha yu tsa javahá yu tsa intuhun ñi maa yu. Yuhu jandaa yu cuatyí nyívi tumaa cuhva tava tyiñu maa Jutu yu tsi yu. Tan cuhva jandaa yu cuatyí, vaha tsi, tyin ña javahá yu cuhva cuñi maa yu, tyin javahá yu cuhva caahán maa Jutu yu, ra tsa jaquitsí tsi yu. ³¹ Tan tatun juvin ñi maa yu cuví tsa ndaa tsa cuenda yu, nduve yahví nyaá tsa ndaa can. ³² Maa tyin iyó inga ra cuví tsa ndaa cuenda yu. Tan yuhu tsitó yu tyin tsa caahán ra cuenda yu, yacan cuví tsa ndaa tan tsa nditsa. ³³ Nyooho tava tyiñu ndo na ndaca tuhun ra naha tsi ra Juan. Tan tuhun tsa cahán ra, tsa nditsa cuví tsi. ³⁴ Maa tyin yuhu ña tsiñiñuhú tsa cuví rayíi tsa ndaa tsa cuenda yu. Maa tyin caahán yu tuhun tsa cahán ra Juan tsihin ndo tsa cuenda tsa vaha tsi maa ndo, tyin tacan tan tsinu iñi ndo tsi yu tan cacu ndo. ³⁵ Ra Juan cuví ra tumaa iin lámpara tsa cayú tan jandunditsin tsi. Tan nyooho juhva ñi quívi cusí iñi ndo tsihin ñuhú nditsin can. ³⁶ Maa tyin yuhu iyó iin tsa ndaa vaha ca tsi yu tan ñavin ca tsa caahán ra Juan. Tyin tandihí tsa javahá yuhu, maa Jutu yu catyí tsihin yu na javaha yu can. Tan yacan cuví tsa ndaa tsa nyehé ndo tyin nditsa tyin maa Jutu yu jaquitsí tsi yu. ³⁷ Tacan tucu Jutu yu, ra tsa jaquitsí tsi yu, cuví ra tsa ndaa tsa cuenda yu. Nyooho ñaha ca cuñi ndo ndusu ra, tan ndi ñaha ca nyehé ndo tsi ra. ³⁸ Tan ña ndoó tuhun ra tsa caahán yu tsihin ndo tsitsi añima ndo tyin ña tsinú iñi ndo tyin Nyoo jaquitsí tsi yu. ³⁹ Nyooho tsihin cuenda xaan cahví ndo nu tutu Nyoo, tyin cuñi maa ndo tyin nuu tsi cua ñihi ndo ñayívi nyito tsa ña cua naa maa coo ndo. Maa tyin tutu Nyoo can, tuhun yuhu caahán tsi. ⁴⁰ Tan nyooho ña cuñi ndo quitsi ndo nu nyaá yu tan cuhva yu ñayívi nyito coo ndo. ⁴¹ 'Yuhu ña nducú yu tsa jacahnu nyívi tsi yu. ⁴² Tyin yuhu tsitó yu tsi ndo tan tsitó yu tyin ña cuñi ndo tsi Nyoo. ⁴³ Yuhu vatsí yu cuenda Jutu yu tan nyooho ña naquihín

ndo tsa caahán yu. Maa tyin tatun inga ra cua quitsí tsa cuenda maa ra, ra ican cua tsinu iñi ndo. ⁴⁴ Nyooho ña cuví tsinu iñi ndo tsi yu tyin cuñi ndo nduvaha ndo nuu nyívi tahan ndo. Tan ña nducú ndo nduvaha ndo nuu Nyoo, tan intuhun ñi maa ra cuví Nyoo tsa iyó. ⁴⁵ Ña caca iñi ndo tyin cua ndacan yu cuatyí tsaḥa ndo nuu Jutu yu. Nyooho cuñi maa ndo tyin ley tsa tyaḥ ra Moisés cua cundaca tsi ndo gloria. Maa tyin ra Moisés cuví ra tsicán cuatyí tsaḥa ndo tyin ña jacuví ndo ley tsa tyaḥ ra. ⁴⁶ Tyin tun tsatyin nditsa tsa tsinú iñi ndo tsa cahán ra Moisés, tacan cua tsinu ndihí iñi ndo tsa caahán yuhu. Tyin tuhun yuhu cuví tsa tyaḥ ra. ⁴⁷ Maa tyin tatun ña tsinú iñi ndo tuhun tsa tyaḥ ra, ¿nácaa cua tsinu iñi ndo tsa caahán yuhu? —catyí ra Jesús tsihin ra cuví ityí nuu tsihin ra Israel naha ra.

6

Nu jacatsí ra Jesús uhun mil rayíi
(Mt. 14.13-21; Mr. 6.30-44; Lc. 9.10-17)

¹ Tsa yahá yacan, tan cuahán ra Jesús inga tsiyo miñi cahnu tsa nañi Nduhya Ñuhu Galilea. Tan juvin ñi nañi tucu tsi Miñi Tiberias. ² Cuaha xaan nyívi cuahán nyicun tsi ra tyin nyehé ñi tsi iyo tsa javahá ra tyin janduvahá ra tsi nyívi cuuhví. ³ Tacan tan ra Jesús ndaa ra iin yucu tan tsinyaḥ ra ican tsihin ra tsicá tsihin ra. ⁴ Tan tsa cuyatyn cuii tahan tsi quívi vico pascua tsa jacahnú nyívi Israel. ⁵ Tan nyehé ra Jesús tyin cuaha xaan nyívi nyicún tsi ra, tacan tan quitsahá caahán ra tsihin ra Felipe:

—¿Numaa cua jata yo tsa catsi nyívi cuaha ihya? —catyí ra tsihin ra.

⁶ Caahán ñi maa ra tsihin ra Felipe tyin nducú cuhva ra tsi ra náa cua cahán ra, tyin tsa tsitó maa ra Jesús náa cua javaha ra. ⁷ Tacan tan nacahán ra Felipe tan catyí ra:

—Xuhun tsa quihín yo tsa jahá tyiñu yo tsa uvi cientu quívi, ndi ña cua cutahan can jata yo luxu tsa catsi nyívi ihya —catyí ra Felipe.

⁸ Tan inga ra tsa nyicún tsi ra Jesús, ra Andrés, yañi ra Simón Pedro, catyí ra tsihin ra Jesús:

⁹ —Ihya nyíi iin ra luhlu ndaha uhun taahan paan cebada tan uvi taahan tyaca. Maa tyin ndi nduve náa cuví yacan tyin cuaha xaan nyívi ihya —catyí ra Andrés.

¹⁰ Tacan tan catyí ra Jesús tsihin ra naha: —Cahán ndo tsihin tandihí nyívi na cun-yecu ñi —catyí ra.

Tan cuaha xaan itya ican tan tsinyecu ñi, uhun mil rayíi, [tan sín maa ñi ñaha tsihin tsa nyihí]. ¹¹ Tacan tan quihín ra Jesús paan can tan tsa yahá tsaḥá ra tyahví nyoo tsi Nyoo, tan tsaḥá ra can tsi ra tsicá tsihin ra. Tan ra can naha ra, tsaḥá ra naha can tsi

tandihí nyívi tsa nyecú can. Juvín ñi tacan icá nyico ra tsihin tyaca can. Tan tsatsj ndaha iñi ñi. ¹² Tan cuhva tsa ndaha iñi ñi, ra Jesús catyí ra tsihin ra tsicá tsihin ra:

—Naquihín vaha ndo tsa ñahñu tsa ndoo tyin tacan tan ña tiví tsi —catyí ra tsihin ra naha.

¹³ Naquihín vaha ra naha can, tan jacutú ra naha utsí uvi tyica tsihin tsa ñahñu tsa ndoo tsa uhun taahan paan can. ¹⁴ Tacan tan tsa yahá nyehe nyívi can tsa iyo tsa javahá ra Jesús, tan catyí ñi:

—Nditsa tsa cuii tyin ndusu yuhu Nyoo cuví ra ihya, juvín ra nyaá tsa quítsi maa nu ñuhu ñayívi ihya —catyí ñi.

¹⁵ Maa tyin tsa tuví iñi ra Jesús tyin cuñí ñi tsa quihín ñi tsi ra tsihin tsa ñiñi tyin cuví ra rey cuenda ñi, tacan tan cuahán nyico ra jiñi yucu nu sucun ca tyin cunyií intuhun ñi maa ra.

Nu tsicá ra Jesús nu ndutya
(Mt. 14.22-27; Mr. 6.45-52)

¹⁶ Tsa cunaaha, nuú ra tsicá tsihin ra Jesús yuhu miñi can. ¹⁷ Tan quihví ra naha tsitsi yutun ndoo tyin cua yaha sava ra naha mahñu miñi can tan cua tsaá ra naha ñuu Capernaum. Tsa cunaaha tan ra Jesús ñaha ca maa tsaá ra. ¹⁸ Tacan tan tsaá tatyí ñihi. Tan iyo nduvitá ndutya miñi can. ¹⁹ Tsa tsa yahá ra naha uhun a iñu kilómetro tsihin yutun ndoo can tan nyehe ra naha vatsí ra Jesús tsicá ra nu ndutya. Tsa nyehe ra naha tyin tsa cua cuyatyin ra nu cuahán yutun ndoo can, nayuhví xaan ra naha. ²⁰ Maa tyin catyí ra Jesús tsihin ra naha:

—¡Maa yu cuví, ña nayuhví ndo!

²¹ Tacan tan tsahá ra naha quihví ra Jesús tsitsi yutun ndoo can. Tan iin yaha ñi tsaá tan naha yuhu miñi nu cuahán ra naha.

Nu nanducú nyívi tsi ra Jesús

²² Tsa tuví inga quívi tan tsito nyívi tsa ndoo inga tsiyo miñi can tyin ra tsicá tsihin ra Jesús tsa cuahán ra naha tsihin iin yutun ndoo tsa iyó ican. Intuhun ñi maa can iyó. Tan tsito ñi tyin ña cuahán ra Jesús tsihin ra naha. ²³ Maa tyin tsaá taahan ca yutun ndoo tsa quee ñuu Tiberias yatyin ñi nu nacuhva Jutu Mañi yo tyahví nyoo tsi Nyoo tan tsatsj nyívi paan. ²⁴ Tacan tan tsa nyehe nyívi tyin nduve ra Jesús tan ndi ra tsicá tsihin ra, quihví ñi tsitsi yutun ndoo tsa tsaá tan cuahán ñi nda ñuu Capernaum cua nanducu ñi tsi ra.

Ra Jesús cuví paan tsa tsahá ñayívi nyito coo yo

²⁵ Tsa tsaá ñi inga tsiyo miñi can, nañihí ñi tsi ra Jesús. Tan tsicá tuhun ñi tsi ra:

—Maestro, ¿náa cuhva tsaá un ihya? —catyí ñi tsihin ra.

²⁶ Maa tyin catyí ra Jesús tsihin ñi:

—Tsa nditsa catyí yu tsihin ndo tyin nyoo nanducú ndo tsi yu maa tyin ñavin cuenda tsa nyehe ndo tsa iyo tsa javahá yu. Nanducú ndo tsi yu tyin tsatsj ndo tan ndaha iñi ndo. ²⁷ Ña jaha tyiñu ndo cuenda tunyee iñi tsa tsatsj ndo tsa cua ndihí ñi maa, jaha tyiñu ndo cuenda tunyee iñi tsa catsi ndo tsa ña cua ndihí tan tsahá tsi ñayívi nyito tsa ña cua naa maa coo ndo. Yacan cuví tsa catsi ndo tsa cua cuhva yuhu tsi ndo tyin Nyoo Jutu yu tava tyiñu ra tsi yu tyin yuhu cuví Rayíi tsa quee nda gloria —catyí ra Jesús.

²⁸ Tacan tan quitsahá tsicá tuhun ñi tsi ra tan catyí ñi:

—¿Náa taahán tsi javaha ndi tan cuví javaha ndi cuhva cuñi Nyoo? —catyí ñi.

²⁹ Tacan tan catyí ra Jesús tsihin ñi:

—Tsa cuñi Nyoo javaha ndo, cuví tsa tsinu iñi ndo tsa caahán yuhu, ra tsa jaquitsj ra —catyí ra Jesús tsihin ñi.

³⁰ Tan tsicá tuhun nyico ñi tsi ra, tan catyí ñi:

—¿Náa tsa iyo javaha un nyehe ndi tan tsinu iñi ndi tsa caahán un? ³¹ Tsii tsahnu ndi tsatsj ñi maná nu tsiqui, tumaa tsa caahán tuhun Nyoo tyehen: “Andiví quee paan tsatsj nyívi jaha Nyoo” —catyí ñi tsihin ra Jesús.

³² Tan nacahan ra Jesús tan catyí ra:

—Tsa nditsa caahán yu tsihin ndo. Ñavin ra Moisés tsahá paan tsa quee andiví tsatsj ñi, tyin maa Nyoo Jutu yu cuví ra tsahá paan nditsa tsa quee andiví. ³³ Tyin paan tsa tsahá Nyoo, yacan cuví ra tsa quee andiví. Tan juvín ra cuví ra tsahá ñayívi nyito coo nyívi iyó nu ñuhu ñayívi —catyí ra Jesús.

³⁴ Tacan tan quitsahá catyí ñi tsihin ra:

—Taa, cuhva paan can catsi ndi tandihí ñi quívi —catyí ñi.

³⁵ Tan nacahan ra Jesús tan catyí ra tsihin ñi:

—Yuhu cuví paan tsa tsahá tsa coo nyito añima ndo. Nyívi nyicún tsi yu ña cua cusoco ca ñi, tan ñi tsinú iñi tsa caahán yu ña cua na ityí iñi ñi. ³⁶ Maa tyin tumaa tsa caahán yu tsihin ndo, nyehe vaha ndo tsi yu, maa tyin ña cuñí ndo tsinu iñi ndo tyin juvín yu cuví ra tsa cuví jatynyee tsi ndo. ³⁷ Tandihí nyívi tsa tsahá Nyoo Jutu yu tsi yu, nyicún ñi tsi yu, tan ñi tsa nyicún tsi yu, naquihín vaha yu tsi ñi. ³⁸ Tyin yuhu tsa quee andiví; vatsí yu vatsí javahá yu cuhva cuñí ra tsa jaquitsj tsi yu. Ña vatsí yu vatsí javaha yu cuhva cuñí ñi maa yu. ³⁹ Tan cuhva cuñí ra tsa jaquitsj tsi yu, yacan cuví tsehe: tsa ña cunaa ndi intuhun nyívi tsa tsahá ra tsi yu, tan janandoto yu tsi ñi nu cua cundihí quívi. ⁴⁰ Jutu yu, ra tsa jaquitsj tsi yu, cuñí ra tyin tandihí nyívi tsa cutuñi iñi tyin Sehe Nyoo cuví tsi yu, tan tsinu iñi ñi tsa caahán yu,

cua coo ñi ñayivi nyito tsa ña cua naa maa. Tan juvin ñi yu cua janandoto tsi ñi nu cua cundihi quivi —catyí ra Jesús tshin ñi.

⁴¹ Tsa cuenda tsa cahan ra Jesús yacan, tan quitsaha caahan nyaa nyivi Israel tsi ra tyin catyí ra: “Yuhu cuví paan tsa quee andivi”, catyí ra. ⁴² Tacan tan quitsaha catyí ñi:

—¿A ñavin ra Jesús sehe ra José cuví ra ihya? Yoo tsitó vaha yo tsi jutu ra tan tsi sihi ra. ¿Nacaa tsa catyí ra tyin andivi quee ra? —catyí ñi.

⁴³ Tacan tan catyí ra Jesús tshin ñi:

—Jandihí ndo tsa caahán nyaa ndo. ⁴⁴ Yoñi maa nyivi cuví quitsi quitsi nyicún tsi yu tatun ñavin Jutu yu, ra tsa jaquitsí tsi yu, caná tsi ñi. Tan cua janandoto yu tsi ñi nu cua cundihi quivi. ⁴⁵ Nu libru tsa tyaá ra cuví ndusu yuhu Nyoo caahán tsi tyehen: “Nyoo cua jacuaha ra tsi tandihí nyivi” catyí tsi. Yacan cuenda nyivi tsa tyaá soho tuhun tsa caahán Nyoo Jutu yu tan cutuhvá ñi tsa caahán ra, juvin ñi nyicún tsi yu.

⁴⁶ Ñavin tsa tyin nyehe ñi tsi Nyoo Jutu yu, tyin yoñi nyehe tsi ra. Intuhun ñi maa yu nyehe tsi ra. Tan juvin yu cuví ra tsa quee nu nyaá ra. ⁴⁷ Tsa nditsa catyí yu tshin ndo tyin nyivi tsa tsinú ñi tsa caahán yu tsa iyó ñi ñayivi nyito tsa ña cua naa maa. ⁴⁸ Yuhu cuví paan tsa tsahá tsa coo nyito añima ñi. ⁴⁹ Tsi tsaahnu ndo tsatsí ñi maná nu tsiqui, maa tyin juvin ñi tsihi ñi. ⁵⁰ Maa tyin yuhu, tuhun paan tsa quee andivi caahán yu tshin ndo, tyin nyivi tsa cua catsi paan can, ña cua cúu ñi. ⁵¹ Juvin ñi maa yu cuví paan nyito tsa quee andivi. Nyivi tsa cua catsi paan ihya ña cua cundihi tsa coo ñi, tyin paan tsa cua cuhva yu, yacan cuví cuñu ñuhu yu. Tan cua cuhva yu ñayivi tsa iyó yu tsa cuenda tandihí nyivi iyó nu ñuhu ñayivi —catyí ra Jesús tshin ñi.

⁵² Tacan tan nyivi Israel can quitsaha natuhún tahan ñi tan catyí ñi:

—¿Nacaa cua cuhva ra tsa catsi yo cuñu ñuhu ra?

⁵³ Tan catyí ra Jesús:

—Tsa nditsa catyí yu tshin ndo, tyin yuhu cuví Rayi tsa quee nda gloria, tan tatun nyoocho tan ña cua catsi ndo cuñu ñuhu yu, tan ña coho ndo niñi yu, ña cuví coo ndo ñayivi nyitó. ⁵⁴ Nyivi tsatsí cuñu ñuhu yu tan tsihi ñi niñi yu, iyó ñi ñayivi nyito tsa ña cua naa maa. Tan yuhu cua janandoto yu tsi ñi nu cua cundihi quivi. ⁵⁵ Tyin cuñu ñuhu yu yacan cuví paan tsa nditsa tsa taahán tsi catsi ñi, tan niñi yu cuví vinu tsa nditsa tsa taahán tsi coho ñi. ⁵⁶ Nyivi tsatsí cuñu ñuhu yu tan tsihi ñi niñi yu, iin ñi cuví ñi tshin yu. Tan iin ñi cuví yu tshin ñi. ⁵⁷ Jutu yu, ra tsa jaquitsí tsi yu, Nyoo nyito cuví ra. Tan yuhu iyó yu tshin tunyee ñi ra. Tan juvin ñi tacan tucu nyivi tsatsí cuñu ñuhu yu, cua coo

ñi tshin tunyee ñi tsa iyó tsi yu. ⁵⁸ Tuhun paan tsa quee andivi caahán yu. Paan ihya ñavin tumaa maná tsa tsatsí tsi tsaahnu yo cuví tsi, tyin juvin ñi tsihi ñi. Nyivi tsatsí paan tsa cuví cuñu ñuhu yu, ña cua cundihi maa tsa coo ñi —catyí ra Jesús.

⁵⁹ Juvin yacan jacuaha ra Jesús nu ndu iin nyivi tsitsi vehe ñuhu ñuu Capernaum.

⁶⁰ Cuaha xaan nyivi nyicún tsi ra Jesús. Tan cuhva tsa tsiñi ñi yacan catyí ñi:

—Tuhun tsa caahán ra ihya, yi xaan naquihin vaha yo itsi. Yoñi maa cua tsinu ñi tsa caahán ra —catyí ñi.

⁶¹ Tacan tan tuvji ñi ra Jesús tyin ña cuñi ñi naquihin ñi tsa caahán ra. Tan tsicá tuhun ra tsi ñi:

—¿A ndasi cuñi ndo tsa caahán yu ihya?

⁶² Tan ¿náa cua javaha ndo tatun nyehe ndo tsi yuhu Rayi tsa quee nda gloria nandaa nyico yu inga tsaha ityi nu quee yu? ⁶³ Tatyí li Nyoo tsahá ñayivi nyito. Tan cuñu ñuhu, ña jatinyeé tsi tsa coo yo ñayivi can. Tan tsa caahán yuhu tshin ndo, Tatyí li Nyoo cuví tsi tan tsahá tsi tsa coo nyitó añima ndo.

⁶⁴ Maa tyin yihí ndo ña tsinú ñi ndo tsi yu —catyí ra Jesús.

Tyin nda quivi jihna tan tsa tsitó maa ra yoo ña cua tsinú ñi tsi ra tan yoo cua xico tsi ra. ⁶⁵ Tan catyí ra:

—Yacan cuenda catyí yu tshin ndo tyin yoñi nyivi cuví quitsi nyicun tsi yu tatun ñavin maa Nyoo Jutu yu caná tsi ñi —catyí ra Jesús.

⁶⁶ Nda quivi can, tan cuaha xaan nyivi nyicún tsi ra Jesús nacoo ñi tsi ra. Tan ña tsicá ca ñi tshin ra. ⁶⁷ Tacan tan tsicá tuhun ra Jesús tsi tsa utsi uvi ra tsicá tshin ra, tan catyí ra:

—¿A cuñi ndihí tucu nyoocho cuhun ndo? —catyí ra tshin ra naha.

⁶⁸ Maa tyin nacahan ra Simón Pedro tan catyí ra:

—Jutu Mañi yu, ¿yoo cunycun ndi? Tan intuhun ñi maa nu caahán tuhun ñayivi nyito tsa ña cua naa maa. ⁶⁹ Nyuhu tsinú ñi ndi, tan tsitó ndi tyin yocho cuví ra Cristo Sehe Nyoo nyito.

⁷⁰ Tan nacahan ra Jesús tan catyí ra:

—¿A ñavin yuhu nacatsí tsi tandihí tsa utsi uvi ndo? Tan intuhun ndo yihí nu ña vaha —catyí ra.

⁷¹ Tuhun tsa caahán ra Jesús ihya, tuhun ra Judas Iscariote sehe ra Simón cuví can. Tyin ra Judas cuví ra cua cuhva cuenda tsi ra Jesús tsi nu xaan ñi tsi ra, vasu iin ra tsa utsi uvi can cuví ra.

7

Nu ña tsinú ñi yañi ra Jesús tsi ra

¹ Tsa yahá yacan, tan nyi ra Jesús tsicá nuu ra nu cuví Galilea. Ña cuñi ra cuhun

ra nu cuví Judea tyin ra cuví ityi nuu tsihin nyívi Israel can naha ra cuñí ra naha cahñi ra naha tsi ra. ² Tan tsa cuyatyin quívi vico tsa jacahnú nyívi Israel ndihi ñi cuiya. Tan nañí tsi Vico Tyahva. ³ Yacan cuenda catyí ra yañi ra Jesús tsihin ra:

—Ña ndoo un ihya. Cuaahan Judea tyin nyívi nyicún tsi un tsa iyó ndacan nyehe ñi tyiñu javahá un. ⁴ Tyin tatun cuñí yo tsa coto nyívi tsi yo, ña javahá xeehe yo tsa javahá yo. Tan yooho tatun nditsa tsa javahá un, javaha can nuu tandihi nyívi —catyí tandihi yañi ra.

⁵ Tacan catyí ra naha tyin ndi tsa cuví ra naha yañi ra tan ña tsinú iñi ra naha tsi ra. ⁶ Tacan tan catyí ra Jesús tsihin ra naha:

—Ñaha ca tsa hora tsa cahun yuhu. Maa tyin nyooho ndáa quívi ñi cuví cahun ndo. ⁷ Tyin vaha cuñí nyívi nyehé ñi tsi ndo, maa tyin yuhu ndasi cuñí ñi nyehé ñi tsi yo tsa cuenda tyin caahán catsi yo tsihin ñi tyin ña vaha tsa javahá ñi. ⁸ Cuaahan nyooho vico can. Yuhu ña cahun yo tyin ñaha ca tsa hora tsa taahán tsi cahun yo —catyí ra.

⁹ Yahá can tan ndoo ra nu cuví Galilea.

Nu nyíi ra Jesús nu iyó vico Tyahva

¹⁰ Tsa yahá cuahán yañi ra Jesús vico can, tsahan cuahán ndihi ra, maa tyin cuahán xeehe ñi ra. ¹¹ Tan ra cuví ityi nuu tsihin nyívi Israel nanducú ra naha tsi ra nu iyó vico can, tan nducú tuhun tahan ra naha tsi ra naha:

—¿Numaa nyíi ra can? —catyí ra naha.

¹² Tan caahán nyívi yucú vico can tuhun ra. Yihí ñi catyí ñi: “Iin ra vaha cuví ra.” Tan inga ñi catyí ñi: “Na vaha ra, jandaví ñaha ra tsi nyívi”, catyí ñi.

¹³ Maa tyin yoñi caahán nditsin tuhun ra tsa cuenda tsa yuuhví ñi tsi ra cuví ityi nuu can naha ra.

¹⁴ Tsa cusava iyó vico tan tsaá ra Jesús tsitsi vehe ñuhu cahnu tan quitsahá jacuaha ra tsi nyívi. ¹⁵ Tan ra cuví ityi nuu can iyó cuñí ra naha tan quitsahá natuhun tahan ra naha:

—¿Nacaa tyin tsitó ra ihya tan ña cahví ra? —catyí ra naha.

¹⁶ Tan nacahan ra Jesús tan catyí ra:

—Tuhun tsa jacuahá yu, ñavin tsa cuenda maa yu cuví tsi, maa tyin cuenda ra tsa jaquitsj tsi yo cuví tsi. ¹⁷ Tatun yihí nyooho tsa cuñí javaha cuhva cuñí Nyoo, cua coto ndo tyin cuenda Nyoo jacuahá yu tan ñavin tsa cuenda maa yu. ¹⁸ Nyívi tsa caahán cuenda maa ñi, caahán ñi tyin cuñí ñi tsa jacahnú nyívi tsi ñi. Maa tyin ra nducú tsa jacahnú nyívi tsi Nyoo, ra tsa jaquitsj tsi ra, ra ican caahán tsa nditsa. Tan ña jandaví ñaha ra.

¹⁹ ¿A ña nditsa tyin ra Moisés tsahá ra ley tsi ndo? Maa tyin ndi intuhun nyooho tan

ñá tyaá yahvi ndo ley can. ¿Nacuenda cuñí ndo cahñi ndo tsi yu? —catyí ra.

²⁰ Tan nacahan nyívi tan catyí ñi tsihin ra:

—Tatyí ña vaha yihí tsi yooho. Yoñi cuñí cahñi tsi un —catyí ñi tsihin ra.

²¹ Tan catyí ra Jesús:

—Tscatatyí tsa javahá yu tsa iyo quívi quitatu yo, yacan ndasi cuñí ndo nyehé ndo tsi yu. ²² Maa tyin ra Moisés catyí ra tsihin ndo tyin coo ndo tsihin tsa cunyaa tuñi Nyoo tsi sehe yíi ndo. Vasu ñavin ra quitsahá tsihin tuhun can, maa tyin nyívi cuví nyívi ra ityi tsata, jihna ca ñi javahá taan. Yacan cuenda javahá ndo can vasu taahán tsi quívi quitatu yo. ²³ Tan vityin, vaha tatun tsa cuenda tsa ña cuñí ndo cumañi ndo ley ra Moisés tan javahá ndo tuhun can vasu quívi quitatu yo cuví. Maa tyin tatun taan javahá ndo, ¿nacuenta tyin cuxaan ndo tsi yu tsa janduvahá yu tsi ra can quívi quitatu yo? ²⁴ Na tyaá ndo cuatyi siqui nyívi tatun ña tsitó vaha ndo náa javahá ñi. Cúatu ndo nda nyehe vaha ndo, taan can coto ndo nácaa tatsi tuñi ndo tsi ñi tsihin tsa ndaa tan tsihin tsa nditsa.

Nu cahán ra Jesús tuhun maa ra

²⁵ Tacan tan juhva nyívi iyó Jerusalén, quitsahá tsicá tuhun ñi:

—¿A ñavin ra ihya nanducú xaan ra naha tyin cua cahñi ra naha tsi ra? ²⁶ Caahán nditsin ra tsihin nyívi. Tan yoñi caahán náa caahán tsihin ra. Vasiqui tsinú ndihi maa iñi ra cuví ityi nuu naha ra tyin juvin ra ihya cuví ra Cristo ra cuví rey tsa jaquitsj Nyoo. ²⁷ Yoo tsitó vaha yo nu quee ra ihya, tan quívi quitsi ra Cristo yoñi maa cua coto numaa ityi cua quee ra —catyí ñi.

²⁸ Ra Jesús nyíi ra tsitsi vehe ñuhu jacuahá ra, tan tsitó ra tsa natuhún nyívi, yacan cuenda ñihi cahán ra tan catyí ra:

—iNyooho cuñí maa ndo tyin nacotó ndo tsi yu tan tsitó ndo numaa quee yu! Maa tyin yuhu ña vatsi yu cuenda maa yu. Yuhu vatsi yu cuenda ra tsa jaquitsj tsi yu, ra tsa cuví tsa nditsa. Nyooho ña nacotó ndo tsi ra. ²⁹ Yuhu nacotó yu tsi ra tyin cuenda ra vatsi yu, tan maa ra jaquitsj tsi yu —catyí ra Jesús.

³⁰ Tacan tan cuñí ra naha tyihí ra naha tsi ra tsitsi vehe caa. Maa tyin ndi intuhun ra naha tan ña caná iñi ra naha tñin ra naha tsi ra tsa cuenda tyin ñaha ca tahan tsi quívi tsa taahán maa tsi tñin ra naha tsi ra. ³¹ Maa tyin cuaha xaan nyívi tsinú iñi tsi ra. Tan catyí ñi: —Ra ihya cuví ra Cristo. ¿A cuaha ca tsa iyo cua javaha inga ra tatun quitsi ra tan ñavin ca ra ihya? —catyí ñi.

Nu jacuhun ra cuví fariseo naha ra tsi ra vitya tyin tñin ra naha tsi ra Jesús

³² Tsa tsifj ra fariseo naha ra tsa caahán nyívi tuhun ra Jesús, maa ra naha tan ra cuví ityi nuu tsihin ra jutu naha ra, jacuhun

ra naha vitya cuenda vehe ñuhu, na tñn ra naha tsi ra Jesús. ³³ Tacan tan catyí ra Jesús:

—Juhva cuii ña quivi cua cunyaa yu tsihin ndo. Yahá can tan cuacunuhu yu nu nyaá ra tsa jaquitsj tsi yu. ³⁴ Nyooho cua nanducu ndo tsi yu. Maa tyin ña cua nañihi ndo tsi yu. Tyin ña cua cuvi cuhun ndo nu cua cunyaa yu —catyí ra Jesús.

³⁵ Tacan tan quitsahá natuhún tahan ra cuvi ityi nuu tsihin nyivi Israel naha ra:

—¿Numaa cua cuhun ra ihya tsa ña cua nañihi yo tsi ra? ¿A cuhun ra nu iyó ra Israel ñuu Grecia naha ra tyin jacuaha ra tsi nyivi iyó Grecia can? ³⁶ ¿Náa cuñi tsi catyí tsa caahán ra tsihin yo? Tyin catyí ra: “Cua nanducu ndo tsi yu maa tyin ña cua nañihi ca ndo tsi yu tyin ña cua cuvi cuhun ndo nu cua cunyaa yu” —tacan caahán yuhu tahan ra naha tuhun ra Jesús.

Nyivi tsinú iñi tsi Nyoo cua coo Tatyí Ii ra añima ñi

³⁷ Quivi ndihi tsicoo vico, yacan cuvi quivi tsa ñiñi ca. Tan quivi can nduvitá ra Jesús tan ñihi caahán ra tan catyí ra:

—Tatun ndáa nyooho na ityi iñi ndo, ñaha ndo tan tsjnu iñi ndo tsa caahán yu. ³⁸ Tyin nyivi tsa tsinú iñi tsa caahán yu, cua cunu ndutya nyito tsitsi añima ñi tumaa tsinú ndutya iin yutya, tumaa catyí maa nu tutu Nyoo —catyí ra Jesús.

³⁹ Maa tyin tsihin yacan cuñi ra catyí ra tyin ñi tsinú iñi tsi ra cua ñihi ñi Tatyí Ii Nyoo, tyin quivi can ñaha ca quitsi Tatyí Ii Nyoo tyin ra Jesús, ñaha ca cunuhu ra nda gloria nu cua jacahnu Jutu ra tsi ra.

Nu natahvj sava nyivi tsa cuenda ra Jesús

⁴⁰ Juhva nyivi tsa tsiñi yacan, catyí ñi: —Nditsa tsa cuii tyin ra ihya cuvi ndusu yuhu Nyoo tsa nyaá tsa cua quitsi —catyí ñi.

⁴¹ Tan inga ñi catyí ñi:

—Ra ican cuvi ra Cristo ra tsa jaquitsj Nyoo —catyí ñi.

Maa tyin inga nyivi catyí ñi:

—¿Nacaa tyin ra Galilea cua cuvi ra Cristo? ⁴² Tyin nu tutu Nyoo catyí tsi tyin ra Cristo cua cuvi ra nyivi tata ra rey David, tan ra ñuu Belén tsa canyii nu cuvi Galilea cua cuvi ra, tumaa ra David —catyí ñi.

⁴³ Tacan tan nyivi can natahvj sava ñi tsa cuenda ra Jesús. ⁴⁴ Yihí ñi cuñi ñi quihin ñi tsi ra tan tyihí ñi tsi ra tsitsi vehe caa. Maa tyin yoñi tñn tsi ra.

Ra cuvi ityi nuu vehe ñuhu naha ra ña tsinú iñi ra naha tsi ra Jesús

⁴⁵ Tacan tan ra vitya tsa iyó vehe ñuhu cahnu can, cuanuhu ra naha nu yucú ra fariseo naha ra tsihin ra cuvi ityi nuu tsihin ra jutu naha ra. Tan tsicá tuhun ra naha tsi ra vitya can naha ra tan catyí ra naha:

—¿Nacuenda ña quihin ndo tsi ra?

⁴⁶ Tan catyí ra vitya can naha ra:

—¿Ndi intuhun tsaaha tan yoñi tuhva caahán tumaa caahán ra can! —catyí ra naha.

⁴⁷ Tacan tan catyí ra fariseo naha ra tsihin ra vitya can naha ra:

—¿A jandavj ñaha ndihi ra can tsi nyooho?

⁴⁸ Nyehé ndo tyin ndi intuhun ra cuvi ityi nuu tsihin ndi, tan ra cuvi fariseo naha ra, tan ña tsinú iñi ra naha tsi ra can. ⁴⁹ Maa ñi maa nyivi ña tsitó ley nyicún tsi ra. Tan ña vaha ñi nuu Nyoo —catyí ra naha.

⁵⁰ Tacan tan ra Nicodemo, ra tsa tsahan nu nyii ra Jesús tsa tsacuaa, cuvi ndihi tucu ra fariseo, tan catyí ra tsihin ra naha:

⁵¹ —Catyí ley tyin ña cuvi tatsi tuñi yo tsi iin nyivi tatun ñaha ca cuñi jihna yo tsa caahán ra, tan coto yo náa javahá ra —catyí ra tsihin ra naha.

⁵² Tacan tan nacahan ra naha tan catyí ra naha tsihin ra:

—¿A juvin ñi ra Galilea cuvi ndihi tucu yooho? Cahvi nu tutu Nyoo tan nyehé un, tyin ndi intuhun ra cuvi ndusu yuhu Nyoo tan ña nyaá tsi tsa quitsi ra nda Galilea —catyí ra naha.

Ñaha tsa quituvj tsihin rayii tsa ñavin yii ña cuvi

⁵³ Tacan tan cuanuhu intuhun intuhun ra naha nda yuvehe ra naha.

8

¹ Maa tyin ra Jesús cuahán ra yucu Olivo.

² Tsa cunditsin inga quivi, cuahán nyico ra Jesús inga tsaaha vehe ñuhu cahnu. Tan tandihi nyivi natuhvā ñi nu nyii ra. Tan tsinyaa ra tan quitsahá caahán ra tsihin ñi.

³ Tacan tan ra jacuahá ley vehe ñuhu tan ra cuvi fariseo naha ra tsaá ra naha tsihin iin ñaha iyó yii tyin tñn ra naha tsi ña nu tsicoo cuatyí ña tsihin inga rayii. Tan tyaa ra naha tsi ña mahñu nyivi tsa nyecú can. ⁴ Tan quitsahá catyí ra naha tsihin ra Jesús:

—Maestro, tñn ndi tsi ñaha ihya nu tsicoo cuatyí ña tsihin inga rayii. ⁵ Tyin ley tsa tyaa ra Moisés catyí tsi tyin ñiñaha tsa javahá tacan taahán tsi cahñi yo tsi ñi tsihin yuu. Tan yooho, ¿nacaa catyí un? —catyí ra naha tsihin ra.

⁶ Caahán ra naha yacan tsihin ra Jesús tsa cuenda tsa nducú cuhva ra naha tsi ra tan tyaa ra naha cuatyí sigui ra. Tacan tan tsinyaa tyayii ra Jesús nu ñuhu tan quitsahá tyaa ra letra nu ñuhú tsihin nundaha ra. ⁷ Maa tyin nducú tuhun ca ra naha tsi ra, tacan tan nduvitá nyityi ra tan catyí ra tsihin ra naha:

—Nyooho tsa nduve cuatyí jihna ca ndo quihin yuu tan cañi ndo tsi ña —catyí ra tsihin ra naha.

⁸ Tan tsinyaꝝ tyayꝝ nyico ra tan quitsahꝝ jañihí ca ra tyaá ra letra nu ñuhu. ⁹ Tsa tsiñi ra naha tsa caahán ra tacan, tuvꝝ iñi ra naha tyin iyó tucu cuatyí maa ra naha. Tan quitsahꝝ quitá intuhun intuhun ra naha, jihna ca ra tsahnu naha ra quitá. Cuhva tsa ndihí ra naha quitá cuahán tan ndoo intuhun ña maa ra Jesús tsihin ñaha can mahñu nu nyecú nyiví can. ¹⁰ Tacan tan nduvitꝝ nyityi ra Jesús tan nyehe ra tyin tsa cuahán ra naha tan ndoo intuhun ña ñaha can. Tacan tan catyí ra tsihin ña:

—¿Numaa cuahán ra tsa tyaꝝ cuatyí siqui un naha ra vityin? ¿Yoñi, ndi intuhun ca ra tsa catyí tyin taahán tsi cúu un? —catyí ra tsihin ña.

¹¹ Tan nacahꝝn ña tan catyí ña:

—Ndi intuhun ra, Tatta.

Tacan tan catyí ra Jesús tsihin ña:

—Ndi yuhu tan ña catyí yu tyin taahán tsi cúu un. Cuaahan vityin. Tan ña javaha ca un cuatyí —catyí ra tsihin ña.

Ra Jesús cuví tsa nditsin tsa jandunditsin añima nyiví

¹² Tacan tan cahꝝn nyico ra Jesús tsihin nyiví inga tsaha, tan catyí ra tsihin ñi:

—Yuhu cuví ra tsa jandunditsin añima nyiví iyó nu ñuhu ñayiví. Yoo nyiví tsa nyicún tsi yu, cua coo ñi iin ñayiví nyito nu nditsin. Tan ña cua caca nuu ñi nu naa —catyí ra Jesús tsihin ñi.

¹³ Tacan tan ra cuví fariseo naha ra catyí ra naha tsihin ra:

—Yooho, caahán un tumañi iñi tsa cuenda maa un. Yacan cuenda nduve yahvi nyaá can —catyí ra naha tsihin ra.

¹⁴ Nacahꝝn ra Jesús tan catyí ra:

—Vasu juvin ñi maa yu caahán tumañi iñi tsa cuenda yu, maa tyin tsa caahán yu iyó yahvi tsi tyin yuhu tsitó yu numaa ityi queꝝ yu tan numaa ityi cua cuhun yu. Maa tyin nyooho ña tsitó ndo numaa ityi queꝝ yu tan numaa ityi cua cuhun yu. ¹⁵ Nyooho yatyi xaan caahán ndo tsa caa nyiví. Maa tyin yuhu, ña caahán yu tsa caa ñi. ¹⁶ Tyin tatun cahꝝn yu tsa caa nyiví, tsa nditsa cua cahꝝn yu. Tyin ñavin intuhun ñi maa yu nyehé tsa iyó añima ñi, tyin Jutu yu ra tsa jaquitsꝝ tsi yu, ra ican nyehé iin caa ñi tsihin yu. ¹⁷ Nu ley nyooho nyaá tyin tatun uvi ra tsahá tsa ndaa, cuñí tsi tsinú iñi yo tsa caahán ra naha. ¹⁸ Tan vityin vaha tyin juvin ñi maa yu cuví tsa ndaa tsa cuenda maa yu. Tan Jutu yu, ra tsa jaquitsꝝ tsi yu, cuví inga tsa ndaa —catyí ra Jesús tsihin ra naha.

¹⁹ Tacan tan tsicꝝ tuhun ra naha tsi ra:

—¿Numaa nyíi jutu un?

Tan catyí ra Jesús:

—Nyooho ña tsitó ndo tsi yuhu. Tan ndi Jutu yu tan ña tsitó ndo. Tun tsatyin tsitó

ndo tsi yu, coto ndihí ndo tsi Jutu yu —catyí ra.

²⁰ Tuhun ihya cahꝝn ra Jesús tsitsi tsa jacuahá ra tsitsi vehe ñuhu cahnu, nu nyíi caja nu tyihí nyiví xuhun. Maa tyin yoñi tyihí tsi ra vehe caa, tyin ñaha ca tahan tsi quiví tsa taahán tsi cuhun ra.

“Nu cuhun yuhu ña cua cuví cuhun ndo”, catyí ra Cristo

²¹ Tacan tan quitsahꝝ caahán nyico ra Jesús tsihin ra Israel naha ra tan catyí ra:

—Yuhu cua cuhun yu, tan ca nanducu ndo tsi yu, maa tyin cua cúu ndo tan ca ndoo cuatyí ndo siqui ndo. Tyin nu cua cuhun yuhu, nyooho ña cua cuví cuhun ndo —catyí ra Jesús tsihin ra naha.

²² Tacan tan catyí ra Israel naha ra:

—¿A cua cahñi maa ra tsi ra? tyin catyí ra tyin ña cua cuví cuhun yo nu cuahán ra —catyí ra naha.

²³ Tacan tan catyí ra Jesús:

—Nyooho ra cuenda nu ñuhu ihya cuví ndo. Maa tyin yuhu nda ityi siqui queꝝ yu. Nyooho cuenda ñuhu ñayiví ihya cuví ndo. Maa tyin yuhu ñavin cuenda nu ñuhu ñayiví ihya cuví yu. ²⁴ Yacan cuenda catyí yu tsihin ndo tyin cua cúu ndo tan cua ndoo cuatyí ndo siqui ndo. Tyin tatun ña tsinú iñi ndo tsa yuhu cuví ra jatsiyó cuatyí ndo, cua ndoo cuatyí ndo siqui ndo quiví cúu ndo —catyí ra Jesús tsihin ra naha.

²⁵ Tacan tan quitsahꝝ tsicá tuhun ra naha tsi ra, tan catyí ra naha:

—¿Yoo ra cuví yooho?

Nacahꝝn ra Jesús tan catyí ra:

—Tsa yaha cahꝝn yu tsihin ndo nda quiví jihna. ²⁶ Cuaha xaan ca tsa ndi cumañi cahꝝn yu tsihin ndo, tan ndi cumañi cahꝝn yu cuhva iyó ndo. Maa tyin tsa caahán yu tsihin nyiví iyó nu ñuhu ñayiví, cuví tsi tsa tsiñi yu tsa caahán ra tsa jaquitsꝝ tsi yu. Tan maa ra caahán tsa nditsa —catyí ra Jesús.

²⁷ Maa tyin ra Israel naha ra ña cutuñi iñi ra naha tatun tuhun Nyoo Jutu yo cahꝝn ra tsihin ra naha. ²⁸ Yacan cuenda catyí ra tsihin ra naha:

—Cua tyaa ndo tsi yuhu, ra cuví Rayꝝ tsa queꝝ nda gloria, nu cruu. Tacan tan cua coto ndo tyin yuhu cuví yu tsa caahán yu tyin cuví yu, tan cua coto ndo tyin tyiñu jahá yu ñavin tsa cuenda maa yu javahá yu can, maa tyin caahán yu tsa janahá Jutu yu tsi yu. ²⁹ Tyin Jutu yu, ra tsa jaquitsꝝ tsi yu, nyíi ra tsihin yu. Tan ña nacoó ra tsi yu tsa maa ñi maa yu. Tyin yuhu javahá yu maa ñi maa cuhva cuñí ra —catyí ra Jesús.

³⁰ Tsa cahꝝn ra Jesús yacan, cuaha xaan ra naha quitsahꝝ tsinú iñi tsi ra.

Nyiví cuví sehe Nyoo tan nyiví javahá tsa caquiñi

³¹ Tacan tan catyí ra Jesús tsihin nyívi Israel, tsa quitsaha tsinú ifi tsi ra:

—Tatun nyooho tan jañihi ca ndo tyaa yahvi ndo kuhva jacuahá yu tsi ndo, cua tsaá ndo cuví ndo nyívi tsa nditsa yíhi cuenda yu. ³² Tan cua coto ndo tsa nditsa. Tan tsa nditsa can cua tava nuña tsi ndo —catyí ra.

³³ Tan nacahan ra naha tan catyí ra naha: —Nyuhu nyívi tata ra Abraham cuví ndi. Ndi iin tsaha tan ñaha ca cuví ndi musu nyívi. ¿Nacaa tsa catyí yooho tyin quita nuña ndi? —catyí ra naha tsihin ra.

³⁴ Tan catyí ra Jesús:

—Tsa nditsa catyí yu tsihin ndo tyin tandihi nyívi javahá tsa caquiñi, musu cuenda tsa caquiñi cuví ñi. ³⁵ Iin musu ña ndoo cuí ra vehe tsitoho ra. Maa tyin ra cuví sehe tsitoho vehe can, ndoo cuí ra vehe jutu ra. ³⁶ Yacan cuenda tatun yuhu tsa cuví yu Sehe Nyoo tan jacacu yu tsi ndo, tsa nditsa cuí tyin ña cua cundaca ñaha ca tsa ña vaha tsi ndo. ³⁷ Tsa tsitó yu tyin tata ra Abraham cuví ndo. Maa tyin yíhi ndo cuí ndo cahñi ndo tsi yu, tyin ña naquihín vaha ndo tsa caahán yu. ³⁸ Yuhu caahán yu tsa janaha Jutu yu tsi yu. Tan nyooho javahá ndo tsa caahán ra cuví jutu ndo tsihin ndo —catyí ra tsihin ra naha.

³⁹ Tan nacahan ra naha tan catyí ra naha: —Jutu ndi cuví tsi ra Abraham —catyí ra naha.

Maa tyin ra Jesús catyí ra tsihin ra naha:

—Tun tsatyin nditsa tsa tata ra Abraham cuví tsi ndo, cua javaha ndo tsa javahá ra. ⁴⁰ Maa tyin nyooho, vasu caahán yu tsihin ndo tsa nditsa tsa janaha Nyoo tsi yu, nyooho cuí ndo cahñi ndo tsi yu. ¡Ra Abraham ña javahá ra tacan! ⁴¹ Nyooho javahá ndo tumaa javahá jutu ndo —catyí ra tsihin ra naha.

Tacan tan nacahan ra naha tan catyí ra naha:

—Nyuhu ñavin sehe ndaahvi tsi ndi. Iyó intuhun jutu ndi tan ra ican cuví Nyoo —catyí ra naha.

⁴² Tacan tan catyí ra Jesús:

—Tun tsatyin nditsa tyin Nyoo cuví jutu ndo, cua cuí ndo tsi yu. Tyin yuhu quee yu nu nyaá ra tan tsaá yu ihya. Ña vatsí yu cuenda maa yu, tyin maa Nyoo jaquitsí tsi yu. ⁴³ ¿Nacuenda ña cutuñi ifi ndo tsa caahán yu tsihin ndo? Tsa cuenda tyin ña cuí ndo tyaa soho ndo tsa caahán yu. ⁴⁴ Cuihna cuví jutu ndo. Tan sehe nu tsi ndo. Tan cuí ndo javaha ndo kuhva cuí nu. Tan nu ña vaha can cuví nu tsañi nyívi nda quívi jihna. Tan ña javahá nu tsa nditsa. Ndi iin tsaha ña caahán nu tsa nditsa. Maa ñi maa tsa jandavi ñaha nu tsi nyívi tyin cuí nu tsa coo ñi kuhva iyó nu tyin vatya xaan nu. Tan

jutu nyívi vatya cuví nu. ⁴⁵ Tan yuhu caahán yu tsa nditsa, maa tyin nyooho ña tsinú ifi ndo tsa caahán yu. ⁴⁶ ¿Ndáa nyooho tan cuví janaha ndo tyin iyó cuatyí yu? Ndi intuhun ndo. Tan tsa tacan caahán yu tsa nditsa, ¿nácaa tsa ña tsinú ifi ndo tsi yu? ⁴⁷ Nyívi cuenda Nyoo tyaa soho ñi tuhun caahán ra. Maa tyin nyooho ñavin nyívi cuenda Nyoo cuví ndo, yacan cuenda ña cuí ndo tyaa soho ndo tsa caahán yu —catyí ra Jesús.

Ra Cristo, tsa iyó maa ra nda ndi cumañi ca coo ra Abraham,

⁴⁸ Tacan tan catyí ra Israel naha ra tsihin ra:

—¿A ña nditsa tyin yooho ra ñuu Samaria cuví un, tan yíhi tatyí ña vaha tsi un? —catyí ra naha tsihin ra.

⁴⁹ Tan nacahan ra Jesús tan catyí ra:

—Nduve tatyí ña vaha yíhi tsi yuhu. Tsi Jutu yu jacahnú yu. Tan nyooho caahán ndo ndavaha ñi tsi yu. ⁵⁰ Yuhu ña nducú yu tsa jacahnu nyívi tsi yu, maa tyin iyó iin ra nanducú tsa jacahnu ñi tsi yu. Tan maa ra cua jandaa cuatyí ndo tatun ña jacahnú ndo tsi yu. ⁵¹ Tsa nditsa catyí yu tyin nyívi tsa tyaa yahvi tsa caahán yu ña cua tsaá tuhun tsihi añima ñi —catyí ra Jesús tsihin ra naha.

⁵² Tacan tan nacahan ra Israel can naha ra tan catyí ra naha:

—Vityin tsitó vaha ndi tyin yíhi tatyí ña vaha tsi un. Tyin ra Abraham tan tandihi ca ra cuví ndusu yuhu Nyoo tsihi ra naha. Tan yooho catyí un tyin nyívi tyaa yahvi tsa caahán un ña cua cúu ñi. ⁵³ ¿A cahnu ca ra cuví yooho tan ñavin ca ra Abraham jutu yu? Maa ra tsihi ra tan tacan tucu ra cuví ndusu yuhu Nyoo. ¿Yóo ra cuví yooho cuí maa un? —catyí ra naha tsihin ra.

⁵⁴ Tan nacahan ra Jesús tan catyí ra:

—Tatun juvin ñi maa yu jacahnú tsi yu, nduve yahvi nyaá yacan. Maa tyin ra jacahnú tsi yu, juvin ra cuví Jutu yu. Tan juvin ra cuví ra tsa caahán nyooho tuhun tyin Nyoo ndo cuví tsi ra. ⁵⁵ Maa tyin ña nacotó ndo tsi ra. Tan yuhu, nacotó yu tsi ra. Tun tsatyin catyí yu tyin ña nacotó yu tsi ra, cuví yu iin ra vatya tumaa nyooho. Maa tyin yuhu nditsa tsa nacotó yu tsi ra, tan tyaa yahvi yu tsa caahán ra. ⁵⁶ Ra Abraham tsi tsaahnu yo sii xaan cuí ra tyin cua nyehe ra quívi cua quitsí yuhu nu ñuhu ñayivi. Nyehe ra quitsí yu tan sii xaan cuí ra —catyí ra Jesús tsihin ra naha.

⁵⁷ Tacan tan catyí ra Israel can naha ra tsihin ra Jesús:

—Ndi ñaha ca quita uvi xico utsi cuiya un, ¡tan catyí un tyin nyehe un tsi ra Abraham!

⁵⁸ Tan nacahan ra Jesús tan catyí ra:

—Tsa nditsa catyí yu tsihin ndo tyin nda ndi cumañi ca coo ra Abraham tan tsa iyó maa yuhu —catyí ra Jesús tsihin ra naha.

⁵⁹ Tacan tan quihın ra naha yuu tyin cua cañi ra naha tsi ra Jesús. Maa tyin iin yaha ñi quihvi xeehe ra tan yaha ra mahñu ra naha tan quitã ra tsitsi vehe ñuhu can cuahán ra.

9

Nu janduvaha ra Jesús tsi iin ra cuaa nda cacu ra

¹ Cuhva tsa yaha ra Jesús iin nu yaha ra, nyehẽ ra tsi iin ra cuaa nda cacu ra. ² Tan quitsaha tsicã tuhun ra tsicã tsihin ra tsi ra:

—Maestro, ¿nacuvi tyin cuaa ra ihya cacu ra? ¿A tsa cuenda cuatyí jutu ra tan sihi ra, o tsa cuenda cuatyí maa ra? —catyí ra naha tsihin ra.

³ Tan nacahan ra Jesús tan catyí ra:

—Ñavin tsa cuenda cuatyí maa ra, tan ndi ñavin tsa cuenda cuatyí jutu ra tan sihi ra. Cuaa maa ra tyin tacan tan cuví janaha Nyoo tunyee iñi ra tsi nyivi tsa cuenda ra can. ⁴ Tsa tsinu cahñi, cuñi tsi tsa javaha yu tyiñu ra tsa jaquitsj tsi yu. Tyin tsa yatyn cuii cua cuaa tan ña cua cuví ca jaha tyiñu yo. ⁵ Tsa ndi nyiñ yu nu ñuhu ñayivi ihya, ñuhu jandunditsin [cuenda nyivi iyó] nu ñuhu ñayivi ihya cuví yu.

⁶ Tsa yaha tsa cahan ra Jesús tacan, tan tiví si ra nu ñuhu. Tan jatyi ra luxu nyahyu tsihin si ra tan tyaã ra tinuu ra cuaa can. ⁷ Tacan tan catyí ra tsihin ra cuaa can:

—Cuaahan cua nacatya nuu un nda tanque Siloé. —Sivi can cuñi tsi catyí: “Jacuhun Yu Tsi Un.”

Tacan tan ra cuaa can tsahan ra tsi-nacatya ra nuu ra. Tan cuhva tsa tsaã nyico ra, tsa nyehé ra. ⁸ Tacan tan nyivi iyó yatyn yuvehe ra, tan nyivi tsa nyehé tsi ra tsa ndi cuaá ra catyí ñi:

—¿A ñavin ra ihya cuví ra tuhvã tsinyaã tsicán xuhun? —catyí ñi.

⁹ Tan yihí ñi catyí:

—Juvín ra.

Inga ñi catyí ñi:

—Ñavin ra cuví can, maa tyin tacan caá ra.

Maa tyin maa ra catyí ra:

—Juvín yu cuví —catyí ra.

¹⁰ Tacan tan quitsaha tsicã tuhun ñi tsi ra:

—¿Tan nácaa tyin cuví nyehé un vityin? —catyí ñi.

¹¹ Tan catyí ra:

—Ra tsa nañi Jesús, ra ican jatyi nyahyu tan tyaã ra tinuu yu tan catyí ra tsihin yu: “Cuaahan cua nacatya nuu un nda tanque Siloé.” Tacan tan tsahan yu. Tan tsa yaha nacatya yu nuu yu tan nanyehẽ yu —catyí ra tsihin ñi.

¹² Tacan tan quitsaha tsicã tuhun ñi tsi ra:

—¿Tan numaa nyi ra can vityin?

Tan catyí ra tsihin ñi:

—Ña tsitó yu —catyí ra.

Nujanahma ra cuví fariseo naha ra tsi ra cuaa tsa nduvaha

¹³ Tacan tan tsindaca ñi tsi ra tsa nduvaha can nuu ra cuví fariseo naha ra. ¹⁴ Tyin quivi tsa jatyi ra Jesús nyahyu tan janduvaha ra tsi ra can, cuví tsi quivi quitatú nyivi. ¹⁵ Yacan cuenda ra cuví fariseo naha ra tsicã tuhun nyico ra naha tsi ra nácaa tyin nyehé ra. Tan catyí ra tsihin ra naha:

—Tyaã ra nyahyu tinuu yu, tan nacatya nuu yu tan vityin nditsin nyehé yu —catyí ra tsihin ra naha.

¹⁶ Tacan tan catyí juhva ra fariseo naha ra:

—Ra tsa javaha yacan ñavin cuenda Nyoo cuví ra, tyin ña tyaã yahvi ra quivi quitatú yo —catyí ra naha.

Maa tyin catyí inga ra naha

—¿Nacaa tsa cuví javaha ra tsa iyo ihya tatun ra iyó cuatyí cuví ra? —catyí ra naha.

Tan siin siin tsa caahán ra naha. Tan natahvi sava ra naha. ¹⁷ Tan tsicã tuhun nyico ra naha tsi ra nduvaha can inga tsaha, tan catyí ra naha tsihin ra:

—¿Tan yoocho, náa catyí un tuhun ra tsa janduvaha tinuu un? —catyí ra naha.

Tan nacahan ra tan catyí ra:

—Yuhu catyí yu tyin ra cuví ndusu yuhu Nyoo cuví ra —catyí ra.

¹⁸ Maa tyin ra cuví ityi nuu tsihin nyivi Israel ña cuñi ra naha tsinu iñi ra naha tsa cuaa ra can tan nanyehẽ ra. Nda cuanda canã ra naha tsi jutu ra tan tsi sihi ra. ¹⁹ Tan tsicã tuhun ra naha tsi ñi, tan catyí ra naha:

—¿A ra ihya cuví sehe ndo tsa catyí ndo tyin cuaá ra cacu ra? ¿Nacaa tsa cuví nyehé ra vityin? —catyí ra naha.

²⁰ Nacahan jutu ra tan sihi ra tan catyí ñi:

—Tsitó ndi tyin ra ihya cuví sehe ndi. Tan cuaa ra quivi cacu ra. ²¹ Maa tyin ña tsitó ndi nácaa tsa cuví nyehé ra vityin. Tan ndi ña tsitó ndi yóo janduvaha tinuu ra. Ndãca tuhun maa ndo tsi ra. Tsa iyó tucu maa cuiya ra. Tan cuví nacatyi tuhun maa ra tsihin ndo —catyí ñi tsihin ra naha.

²² Jutu ra tan sihi ra caahán ñi tacan tsa cuenda tyin yuuhvi ñi tsi ra cuví ityi nuu tsihin nyivi Israel naha ra, tyin tsa natuhun tahan ra naha tyin cua tava cuii ra naha tsi nyivi vehe ñuhu, tun cahan ñi tyin ra Jesús cuví ra Cristo, ra tsa jaquitsj Nyoo. ²³ Yacan cuenda catyí ñi: “Ndãca tuhun ndo tsi maa ra. Ra tsa ñihí cuví ra.”

²⁴ Tacan tan canã nyico ra naha tsi ra tsa nduvaha can inga tsaha. Tan catyí ra naha tsihin ra:

—Nda nuu Nyoo cahan tsa nditsa tsihin ndi. Tyin nyuhu tsitó ndi tyin ra ican, ra iyó cuatyí cuví ra —catyí ra naha.

²⁵ Tacan tan nacahan ra tsa nduvaha can tan catyí ra:

—Yuhu ña tsitó yu taton ra iyó cuatyí cuví ra, a ñavin. Intuhun ñi tsa tsító yu tyin yuhu ra cuaa cuví yu, maa tyin vityin nditsin nyehé yu —catyí ra.

²⁶Tan tsicá tuhun nyico ra naha tsi ra inga tsaha tan catyí ra naha:

—¿Náa icá ra tsihin un? ¿Nacaa icá ra tan nanyehe un? —catyí ra naha tsihin ra.

²⁷Tan catyí ra:

—Tsa cahān yu tsihin ndo, tan ña tyaá yahvi ndo tsi yu. ¿Náa cuenda cuñí ndo tsa cahān yu inga tsaha? ¿A cuñí ndihi ndo cunyicun ndo tsi ra can?

²⁸Tacan tan nduxaḡan ra naha tsi ra, tan catyí ra naha:

—Yooho tsa yihí un cuenda ra, maa tyin nyuhu cuenda ra Moisés ra tsa tsicoḡ tsa naha yihí ndi. ²⁹Nyuhu tsitó ndi tyin Nyoo cahān tsihin ra Moisés tahān tsa naha. Maa tyin ra can, ndi ña tsító ndi numaa quee ra —catyí ra naha.

³⁰Tacan tan nacahān ra tsa nduvahā can tan catyí ra:

—¡Naa tsa iyo cahnu cuví tsehe! Nyooho ña tsító ndo numaa quee ra, tan jananyehe ra tsi yu. ³¹Tsitó vaha yo tyin Nyoo ña tyaá soho ra nu caahān ra iyó cuatyí. Maa tyin ra jacahnú tsi ra tan icá ra ruhva cuñí ra, tyaá soho Nyoo tsa caahān ra. ³²Ndi iin tsaha tan ñaha ca cuñi yo taton iyó iin ra jananyehe tsi iin ra cuaa nda cacu ra. ³³Tun tsatyin ra ihya tan ñavin cuenda Nyoo vatsí ra, nduve tsa cuví javaha ra —catyí ra tsihin ra naha.

³⁴Tacan tan catyí ra naha tsihin ra:

—Yooho ra iyó cuatyí cuví un nda cacu un. ¿Tan cuñí un jacuaha un tsi nyuhu? —catyí ra naha.

Tan tavaḡ cuii ra naha tsi ra vehe ñuhu.

Nyivi tsa nduve tuhun Nyoo iyó añima tumaa tsa cuaa ñi

³⁵Tsitó ra Jesús tyin tavaḡ ra naha tsi ra tsa janduvahā ra vehe ñuhu. Tan tsa ñihj tahan ra tsihin ra tan catyí ra tsihin ra:

—¿A tsinú iñi yooho tsa caahān Rayi tsa quee nda gloria? —catyí ra tsihin ra.

³⁶Tan nacahān ra tan catyí ra:

—Catyí tuhun tsihin yu, taa, yóo ra cuví ra tyin tsinú iñi yu tsi ra —catyí ra tsihin ra.

³⁷Tan catyí ra Jesús:

—Tsa nyehe un tsi ra. Tan juven ra natuhún tsihin un —catyí ra tsihin ra.

³⁸Tacan tan tsicuiñi tsi ra tsaha ra Jesús tan catyí ra tsihin ra:

—Tsinú iñi yu tsi un, Jutu Mañi yu —catyí ra tsihin ra Jesús.

³⁹Tan catyí ra Jesús:

—Yuhu vatsí yu tyin catyí tuhun yu tsa iyó añima nyivi iyó nu ñuhu ñayivi ihya. Tyin nyivi cuaa, ñi ña tsító tuhun Nyoo cua nanyehe ñi tyin coo tuhun Nyoo añima ñi. Tan nyivi cuñí tyin nditsin nyehe ñi, catyí ñi

tyin tsító ñi tuhun Nyoo, coto ñi tyin cuaa ñi tyin ña tsinú iñi ñi tsi yu —catyí ra Jesús.

⁴⁰Tacan tan juhva ra fariseo tsa nyecú tsihin ra Jesús tsiñi ra naha tsa caahān ra, tan catyí ra naha tsihin ra:

—¿A cuaa ndihi tucu nyuhu? —catyí ra naha.

⁴¹Tacan tan catyí ra Jesús tsihin ra naha:

—Tun tsatyin cuaa ndo cua coto ndo tyin tsiñi ñuhu tuhun Nyoo tsi ndo, tan ña cua coo cuatyí ndo. Maa tyin catyí ndo tyin nyehé ndo tan tsító ndo, yacan cuenda ndoó cuatyí ndo siqui ndo —catyí ra tsihin ra naha.

10

Mbee ticatyí jana Nyoo cuví nyivi yihí cuenda ra, tan tsító ñi tsi ra tsa jaquitsi Nyoo tyin jahá cuenda ra tsi ñi

¹Caahān nyico ra Jesús tan catyí ra:

—Tsa nditsa catyí yu tsihin ndo, taton iin ra cua quihvi tsitsi cora mbee ticatyí, tan ñavin yuhu cora quihvi ra, ra ican cuví ñasuhu. ²Maa tyin ra tsa quihvi ityi yuhu cora, ra jahá cuenda mbee can cuví ra. ³Ra nyii yuhu cora can nuña ra tyin quihvi ra jahá cuenda mbee can. Tan mbee can nacotó ti naha ti ndusu ra. Intuhun intuhun ti tan iyó sivi ti jahá ra, caná ra tsi ti tan tavaḡ ra tsi ti ityi tsata cora. ⁴Tsa yahaḡ tavaḡ ra tsi ti, tan cuahān ra ityi nuu tan nyicún ti naha ti tsi ra, tyin nacotó ti ndusu ra. ⁵Maa tyin taton nyivi tsa ña nacotó ti ndusu, tsinú ti nuu ñi tan ña cuahān ti cuanyicún ti tsi ñi.

⁶Tyehen cahān ra Jesús tsihin nyivi. Maa tyin maa ñi ña cutuñi iñi ñi náa tuhun caahān ra tsa caahān ra tacan.

Ra Jesús cuví ra jahá cuenda vaha mbee ticatyí

⁷Tacan tan catyí ra Jesús tsihin nyivi inga tsaha:

—Tsa nditsa catyí yu tsihin ndo, yuhu cuví tumaa iin yuhu cora nu quihvi nyivi yihí cuenda yu tan cuví ñi tumaa mbee ticatyí jana yu. ⁸Tandihí ra tsa quitsi tsa ndi cumañi quitsi yu, ra suhu cuví ra naha. Maa tyin mbee jana yu ña tyaá yahvi ti naha ti tsa cahān ra naha. ⁹Yuhu cuví yuvehe gloria. Nyivi tsa cua quihvi yuvehe can, cua cacu ñi tan ña cua cahun ca ñi anyaya. Tan cuví ñi tumaa mbee tsa quihvi tan quitá tsitsi cora can. Tan ñihí ti cuhu tsatsí ti.

¹⁰Iin ra ñasuhu, vatsí ra, vatsí suhu ra, vatsí cahñi ra, vatsí javivi ra. Maa tyin yuhu vatsí yu tyin coo vaha ndo ñayivi nyitó tsa ña cua naa maa. ¹¹Yuhu cuví ra vaha jahá cuenda mbee. Tyin ra jahá cuenda mbee tsahá ra ñayivi ra tsa cuenda mbee can. ¹²Maa tyin ra cuví musu, taton nyehé ra vatsí lobo tsa cuví quiti xaan, nacoó ra mbee jana tsitoho ra. Tan tsinú ra. Tyin ñavin jana

maa ra cuví tsi ti naha ti. Tacan tan cua tiin quiti xaan can tsi mbee can. Tan jacunu ti tsi mbee can ityi can tan ityi ihya. ¹³ Musu can tsinú ra tyin jahá tyiñu ra tsa cuenda xuhun ñi. Tan ña jahá cuenda vaha ra tsi mbee can, tyin ñavin jana ra cuví tsi ti naha ti.

¹⁴ Yuhu cuví ra jahá cuenda vaha mbee jana yu. Tan nacotó yu tsi ti naha ti. Tan nacotó tucu maa ti naha ti tsi yu, ¹⁵ tumaa tsa nacotó Jutu yu tsi yu, tan yuhu nacotó yu tsi ra. Yuhu tsahá yu ñayivi yu cuenda mbee jana yu. ¹⁶ Iyó tucu inga mbee jana yu tsa ña yihí tsitsi cora ihya. Cuñi tsi tsa cuhun yu cunaquihin yu tsi ti naha ti. Tan cua tyaa yahvi ti tsi yu. Tan iin ñi nu cua quihí tandihí ti. Tan cua coo intuhun ñi ra cua jaha cuenda tsi ti naha ti.

¹⁷ Jutu yu cuñi ra tsi yu tyin tsahá yu ñayivi yu tsacatyí nyivi. Maa tyin yaha can, tan cua nacuhva nyico ra ñayivi yu. ¹⁸ Yoñi cuví quihin nyaá ñayivi yu, tyin tsa iyó ñi maa yu tan tsahá yu can. Iyó ndatu tsi yu tsa cuhva yu ñayivi yu tan cúu yu, tan iyó tucu ndatu tsi yu tsa naquihin nyico yu can inga tsaha. Yacan cuví tyiñu tsa tyaa Jutu yu tsi yu —catyí ra Jesús.

¹⁹ Tsa tsiñi nyico ra tsa cuví ityi nuu tsihin nyivi Israel naha ra tsa caahán ra Jesús tahaan, natahvi sava nyico ra naha inga tsaha. ²⁰ Tan cuaha xaan ra naha catyí:

—¿Nacuenda tyaa yahvi ndo tsi ra can? Tan tatyí ña vaha yihí tsi ra, sana jiñi ra —catyí ra naha.

²¹ Tan inga tucu ra naha catyí:

—Yoñi nyivi yihí tatyí ña vaha tan cuví cahan ñi tacan. ¿A cuví jananyehe tatyí ña vaha can tsi iin ra cuaa? —catyí ra naha.

Nu ña cuñi ra cuví ityi nuu tsihin nyivi Israel tyaa yahvi ra naha tsi ra Jesús

²² Yoo vitsin cuví tan nyivi iyó ñuu Jerusalén jacahnú ñi vico tsa cuenda nu natsinú cuiya nu nacuhva cuenda ñi vehe ñuhu cahnu. ²³ Tan ra Jesús tsicá nuu ra vehe ñuhu can ityi nu nañi corredor ra Salomón. ²⁴ Tan tsinu nduvi ra cuví ityi nuu tsihin nyivi Israel naha ra tsi ra Jesús. Tan quitsahá tsicá tuhun ra naha tsi ra:

—¿Ama cua cahan catsi un tsihin ndi tatun juvin un cuví ra Cristo ra tsa jaquitsi Nyoo? Cahan catsi tsihin ndi vityin ihya —catyí ra naha.

²⁵ Tan catyí ra Jesús:

—Tsa yahá cahan yu tsihin ndo, tan ña tsinu ñi ndo tsa cahan yu. Tyiñu javahá yu nuu Jutu yu yacan cuví tsa ndaa tsa cuenda yu. ²⁶ Maa tyin nyooho ña tsinú ñi ndo tsi yu tyin ñavin mbee jana yu cuví tsi ndo. Tumaa cuhva tsa cahan jihna yu tsihin ndo. ²⁷ Mbee jana yu nacotó ti naha ti ndusu yu, tan yuhu nacotó yu tsi ti naha ti. Tan nyicún ti tsi yu. ²⁸ Yuhu tsahá yu ñayivi nyito tsa ña

cua naa maa coo ti. Tan ña cua cunaa ti. Tan ndi yoñi cuví quihin nyaá tsi ti naha ti tsitsi ndaha yu. ²⁹ Maa Jutu yu tsahá tsi ti naha ti tsi yu. Tan cahnu ca cuví maa ra tan ñavin ca tandihí nyivi. Tan yoñi cuví quihin nyaá tsi ti tsitsi ndaha ra. ³⁰ Yuhu tan Nyoo Jutu yu, iin ñi cuví ndi —catyí ra Jesús.

³¹ Tacan tan ra cuví ityi nuu tsihin nyivi Israel can quihin nyico ra naha yuu tyin cañi ra naha tsi ra. ³² Tan catyí ra Jesús tsihin ra naha:

—Cuaha xaan tsa vaha javahá yu nuu ndo tsihin tunyee ñi Jutu yu. ¿Tan ndaa tsa ña taahán ñi ndo tyin cua cañi ndo tsi yu tsihin yuu? —catyí ra Jesús tsihin ra naha.

³³ Tan catyí ra cuví ityi nuu tsihin nyivi Israel can naha ra:

—Ñavin tsa cuenda tsa vaha javahá un cua cañi ndi tsi un tsihin yuu, cua cañi ndi tsi un tsa cuenda tyin tsicoo cuatyí un nuu Nyoo tsihin tsa caahán un. Tyin iin rayi ñi cuví un, tan jahá un tumaa tsa Nyoo cuví un —catyí ra naha tsihin ra.

³⁴ Tacan tan catyí ra Jesús tsihin ra naha:

—Nu tutu Nyoo nyaá tyin Nyoo catyí ra: “Nyooho nyoo cuví ndo”, catyí Nyoo.

³⁵ Tsitó yo tyin tsa caahán tuhun Nyoo, ña cua cuví catyí yo tyin ña nditsa. Tan Nyoo jacunañi ra nyoo tsi nyivi naquihin tsa caahán ra. ³⁶ Tatun maa Nyoo nacatsi tsi yuhu tan jaquitsi ra tsi yu nu ñuhu ñayivi ihya ¿nácaa tsa catyí nyooho tyin iyó cuatyí yu nuu Nyoo tsa caahán yu tyin Sehe Nyoo cuví tsi yu?

³⁷ Tatun ña javahá yu tsa javahá Jutu yu, ña tsinu ñi ndo tsi yu. ³⁸ Maa tyin tatun javahá yu, vasu ña cua tsinu ñi ndo tsi yu, maa tyin tsinu ñi ndo tyiñu javahá yu. Tacan tan coto catsi ndo tyin Nyoo Jutu yu iin ñi cuví ra tsihin yu. Tan iin ñi cuví yu tsihin Nyoo Jutu yu —catyí ra Jesús.

³⁹ Inga nyico tsaha cuñi ra naha tyihi ra naha tsi ra vehe caa, maa tyin ra Jesús cuahán ñi ra.

⁴⁰ Tacan tan cuanuhu ra ityi nu caná ñicanyii inga tsiyo yutya cahnu Jordán nu jacoondutya ra Juan tsa jihna, tan ndoo ra ican. ⁴¹ Cuaha nyivi tsahan tsinyehe tsi ra, tan catyí ñi:

—Nditsa, vasu ndi intuhun tsa iyo ña javahá ra Juan, maa tyin tandihí tsa cahan ra cuenda ra ihya tan nditsa —catyí ñi.

⁴² Tan cuaha xaan nyivi tsa iyó ityi can tsinu ñi tsa caahán ra Jesús.

11

Nu tsihi ra Lázaro

¹ Ñuu Betania tsicoo iin ra cuuhvi tsa nañi Lázaro. Tan ñuu can iyó ña María tsihin ña Marta tahan ña. ² Ña María, cuhva ra Lázaro, juvin ña cuví ñaha tsa tyoso ndutya tami tsaha Jutu Mañi yo, tan jana ityi ña tsaha ra

tsihin ixi jñi ña. ³ Tacan tan nduvi taahan ñi, ña María tan ña tahan ña, jacoto ñi tsi ra Jesús tan catyí ñi:

—Ra vaha iñi tsi un, cuuhví xaan ra.

⁴ Tsa tsiñi ra Jesús yacan tan catyí ra:

—Cuehe can ña cua cahñi can tsi ra. Cuuhví ra tyin quivi nduvaha ra cua nyehe nyivi tyin cahnu xaan cuví Nyoo tan tacan tucu Sehe ra —catyí ra Jesús.

⁵ Cuñi xaan ra Jesús tsi ña Marta tan ña tahan ña, tan ra Lázaro cuhva ñi. ⁶ Maa tyin quivi tsa tsiñi ra tyin cuuhví ra Lázaro, ndoo ra uvi quivi ca nu nyii ra. ⁷ Tacan tan catyí ra tsihin ra tsicá tsihin ra:

—Cohon nyico ndo inga tsaha nda Judea —catyí ra.

⁸ Tacan tan ra tsicá tsihin ra catyí ra naha tsihin ra:

—Maestro, ñaha ca ndunaha tsa cuñi ra cuví ityi nuu tsihin nyivi Israel naha ra cahñi ra naha tsi un tsihin yuu. Tan vi-tyin, cuñi nyico un cuhun un inga tsaha ¿Nacuenta?

⁹ Tan catyí ra Jesús:

—¿A ñavin utsi uvi hora iyó tsa iin quivi? Tyin tatun tsinu cahñi tsicá nuu iin ra, ña cua nduva ra tyin nditsin nyehé ra ñuhu tsa jandunditsín nu ñuhu ñayivi ihya. ¹⁰ Maa tyin tatun tsacuaa tsicá nuu ra, cuví nduva ihñi ra tyin nduve ñuhu Nyoo jandunditsín nu cuahan ra.

¹¹ Tacan tan quitsahá catyí nyico ra Jesús:

—Ra vaha iñi tsi yo, ra Lázaro, quixí ra. Maa tyin cuhun yu jandoto yu tsi ra —catyí ra tsihin ra naha.

¹² Tacan tan catyí nyico ra tsicá tsihin ra:

—Taa, tatun quixí ra, cuñi tsi catyí can tyin cua nduvaha ra —catyí ra naha.

¹³ Maa tyin ra Jesús cuñi ra catyí ra tyin ra Lázaro tsa tsiñi ra. Tan ra tsicá tsihin ra, cuñi maa ra naha tyin nditsa tsa quixí ra. ¹⁴ Tacan tan cahān catsi ra Jesús tsihin ra naha:

—Ra Lázaro tsa tsiñi ra. ¹⁵ Tan cusii iñi yu tyin yofi yu nyii ndacan. Tyin tacan vaha ca tsa cuenda nyooho na tsinu iñi ndo tsa caahān yu. Cohon ndo cunyehe yo tsi ra —catyí ra Jesús tsihin ra naha.

¹⁶ Tacan tan ra Tomás, tsa jacunañi ra naha “tñihí”, catyí ra tsihin inga ra tsicá tsihin ra Jesús:

—Cohon ndihí yo tyin cúu yo iin caa ñi tsihin ra —catyí ra.

Ra Jesús cuví ra janandotó tsi yo tan tsahá ra ñayivi nyito coo yo

¹⁷ Tsa tsaā ra Jesús Betania, ñihí tuhun ra tyin tsa cumi quivi nyii ra Lázaro tsitsi ñuhú. ¹⁸ Ñuu Betania can canyii tsi yatyin ñi nu canyii ñuu Jerusalén, tumaa iin cuhva tsa uvi kilómetro sasava. ¹⁹ Tan cuaha ra cuví ityi nuu tsihin nyivi Israel cuahan cua

nyehe nu nyii ña Marta tan ña María cua jatynyee ra naha tsi ñi tyin tsiñi cuhva ñi. ²⁰ Tan ñihí tuhun ña Marta tyin tsa cua tsaā ra Jesús. Tan cuahān ña cua jatahan ña tsi ra. Maa tyin ña María ndoo ña yuvehe. ²¹ Tan catyí ña Marta tsihin ra Jesús:

—Jutu mañi yu, tun tsatyn ihya nyii maa un, ña cua cúu cuhva yu. ²² Maa tyin yuhu tsitó yu tyin Nyoo cua javaha ra tandihí tsa ndacan un tsi ra —catyí ña tsihin ra.

²³ Tan catyí ra Jesús tsihin ña:

—Cuhva un cua nandoto ra.

²⁴ Tan catyí ña Marta:

—Nditsa, tsitó yu tyin cua nandoto ra quivi nandoto ndiyi nu cua cundihí quivi —catyí ña.

²⁵ Tacan tan catyí ra Jesús tsihin ña:

—Yuhu cuví ra janandotó ndiyi. Tan tsahá yu tsa coo nyitó nyivi. Nyivi tsinú iñi tsa caahān yu, vasu tsa tsiñi ñi maa tyin coo nyico ñi. ²⁶ Tan tandihí ñi nyitó tan tsinú iñi ñi tsi yu, ña cua cúu ñi. ¿A tsinú iñi un tsa caahān yu ihya? —catyí ra tsihin ña.

²⁷ Tan catyí ña:

—Tsinú iñi yu, Jutu Mañi yu, tyin yooho cuví ra Cristo Sehe Nyoo, ra tsa nyaá tsa quitsi nu ñuhu ñayivi ihya —catyí ña.

Nu tsacū ra Jesús nu ñaña ra Lázaro

²⁸ Tsa yahā tsa cahān ña Marta tacan, tan tsahān ña tsiquihñ ña tsi ña María tahan ña, tan xeehe ñi cahān ña tsihin ña:

—Tsa tsaā Ra Maestro ihya. Tan caná ra tsi un —catyí ña.

²⁹ Tsa tsiñi ña María tsa caahān ña, numi xaan ña nduvitā ña, tan cuahān ña nu nyii ra Jesús. ³⁰ Tan ñaha ca quihvi ra Jesús tsitsi ñuu hora can, ndi nyii ra nu nañihí ña Marta tsi ra. ³¹ Tan nda yuvehe ña María, yucú ra cuví ityi nuu tsihin nyivi Israel jatynyee ra naha tsi ñi. Tan nyehé ra naha tyin numi quitā ña. Tan cuñi maa ra naha tyin cuahān ña nu ñaña cua vacu ña. Tan cuahān ndihí ra naha tsata ña.

³² Tan cuhva tsa tsaā ña María nu nyii ra Jesús tsicuiñi tsiti ña tsaha ra, tan catyí ña:

—Jutu Mañi yu, tun tsatyn nyii un ihya, ña tsiñi ra cuhva yu —catyí ña.

³³ Tsa nyehé ra Jesús tyin tsacú ña María tan tsacú ra Israel tsa cuahan tsihin ña, nducuihya xaan cuñi ra. ³⁴ Tan tsicā tuhun ra tsi ñi:

—¿Nu maa tinyii ndo tsi ra? —catyí ra.

Tan catyí ñi:

—Jutu Mañi yu, cohon tan nyehé un —catyí ñi tsihin ra.

³⁵ Tan tsacū ra Jesús.

³⁶ Tacan tan catyí ra Israel can naha ra:

—Nyehé ndo tyin yahā xaan cuñi ra tsi ra —catyí ra naha.

³⁷ Maa tyin catyí juhva ra naha:

—Ra ihya jananyehę tsi ra cuaa. ¿Nacuvi tyin ña cuvı ica ra iin cuhva tan ña cıu ra Lázaro ihya? —catyı ra naha.

Nu janandoto ra Jesús tsi ra Lázaro

³⁸ Nducuihya xaan cuñi nyico ra Jesús inga tsaha tan natuhva ra nu ñaña can. Tyin tsitsi yavi yuu cuvı can. Tan ndası iin yuu yuhu can. ³⁹ Tan catyı ra Jesús:

—Jatsiyo ndo yuu can —catyı ra.

Tan ña Marta, cuhva ndiyi can, catyı ña:
—Maa tyin tsa caná xico iñi, Jutu Mañi yu, tyin tsa cumi quivi tsa nyii ra ican —catyı ña.

⁴⁰ Maa tyin catyı ra Jesús tsihin ña:

—¿A ña caahán yu tsihin un tyin tatun tsinú iñi un, cua nyehe un tsa cahnu cuvı Nyoo? —catyı ra tsihin ña.

⁴¹ Tacan tan jatsiyę ra naha yuu can. Tan nanyehę ndaa ra Jesús ityi andivi, tan catyı ra:

—Tyatya, Jutu Mañi yu, tyahvi nyoo tsi un tyin tsiñi un tsa caahán yu. ⁴² Yuhu tsitó yu tyin maa ñi maa tsiñi un tsa caahán yu. Maa tyin tyehen caahán yu tsa cuenda tsa vaha tsi nyivi nyecú ihya, na tsinu iñi ñi tyin maa un jaquitsı tsi yu —catyı ra Jesús tsihin Nyoo.

⁴³ Tsa yahá tsa cahán ra tacan, caná tsa ra, tan catyı ra:

—¡Lázaro, quita nu nyii un juven!

⁴⁴ Tan quita ra tsa tsihi can, cavá nuu iin jahma tsi ra, tan nuuhñi ndaha ra tan tsaha ra tsihin jahma. Tan nuuhñi nuu ra tsihin iin jahma tumaa javahá nyivi Israel tsihin ndiyi. Tan catyı ra Jesús tsihin nyivi nyecú ican:

—Ndatsi ndo tsi ra. Tan jaña ndo tsi ra na cuhun ra —catyı ra Jesús tsihin ñi.

*Nu nducú cahñi ra naha tsi ra Jesús
(Mt. 26.1-5; Mr. 14.1-2; Lc. 22.1-2)*

⁴⁵ Tan cuaha xaan ra cuvı ityi nuu tsihin nyivi Israel tsa tsahan tsihin ña María quit-sahá tsinú iñi ra naha tsa nyehe ra naha tsa javahá ra Jesús. ⁴⁶ Maa tyin juhva ra naha tsahan ra naha tsijacoto ra naha tsi ra fariseo naha ra tsa javahá ra Jesús. ⁴⁷ Tacan tan ra fariseo can naha ra tan ra cuvı ityi nuu tsihin ra jutu naha ra jatitahan ra naha tsi ra tuhvá ndu iin naha ra tan catyı ra naha:

—¿Nacaa cua javaha yo? Tyin cuaha xaan tsa iyo javahá ra can. ⁴⁸ Tatun cuhva yo tsa javaha ca ra tacan, tandihi nyivi tan cua tsinu iñi ñi tsi ra. Tan ra cumi tyiñu nda ñuu Roma cua quitsi ra naha tan cua cani ra naha vehe ñuhu yo tan ñuu yo —catyı ra naha.

⁴⁹ Maa tyin ra Caifás ra tsahnu tsa cuvı ityi nuu tsihin ra jutu naha ra cuiya can, cahán ra tan catyı ra tsihin ra naha:

—Nyooho nduve maa náa tsitó ndo. ⁵⁰ Ndi ña cutuñi iñi ndo tyin vaha ca tsa cıu in-tuhun ñi rayi tsa cuenda tandihi nyivi ñuu, tan ñavin ca tsa cıu tandihi yo —catyı ra Caifás.

⁵¹ Ra Caifás can ñavin tsa cuñi maa ra tan caahán ra, tyin ra cuvı ityi nuu tsihin tandihi jutu cuvı ra cuiya can, yacan cuenda maa Nyoo jacahan tsi ra nu catyı ra tyin ra Jesús cua cıu ra tsa cuenda tandihi nyivi ñuu Israel. ⁵² Tan ñavin tsa cuenda maa ñi maa nyivi can, maa tyin cua jandu iin ra tsi tandihi nyivi cuvı sehe Nyoo tsa iyó tandihi ca ñuu. ⁵³ Tacan tan nda quivi can tan ra cuvı ityi nuu tsihin nyivi Israel can naha ra, nducú ra naha cuhva cahñi ra naha tsi ra Jesús.

⁵⁴ Yacan cuenda ña tsicá nuu nditsin ca ra Jesús nu iyó nyivi Israel. Queę ra Judea can. Tan cuahán ra iin ñuu tsa nañi Efraín tsa canyiı yatyin ñi nu tsiqui, nu cuvı ñuhu ityi. Tan ndoo ra ican tsihin ra tsicá tsihin ra.

⁵⁵ Ña cuaha ca quivi tan tahan tsi vico cuenda nyivi Israel, vico tsa nañi pascua. Tan cuaha xaan nyivi queę ñi ñuu ñi tan cuahán ñi nda ñuu Jerusalén cua javaha ñi tsa tuhvá maa ñi javahá tsa janduvahá ñi tsi ñi nuu Nyoo tsa ndi cumañi ca tahan tsi quivi vico can. ⁵⁶ Nanducú ñi tsi ra Jesús. Tan cuhva tsa nyecú ñi tsitsi vehe ñuhu cahnu can tan tsicá tuhun tahan ñi, tan catyı ñi:

—¿Nacaa cuñi nyooho? ¿A cua quitsi ra can vico ihya, o ña cua quitsi ra? —catyı ñi.

⁵⁷ Tan ra cuvı fariseo tan ra cuvı ityi nuu tsihin jutu, catyı ra naha tyin tatun ndaa nyivi tsitó nu nyii ra Jesús, na catyı tuhun ñi. Tyin cuquihin ra naha tsi ra tyin cunyi ra vehe caa.

12

Nu tyosó ña María ndutya tami tsaha ra Jesús

(Mt. 26.6-13; Mr. 14.3-9)

¹ Cumañi iñu quivi ca tsa tahan tsi vico pascua, tan tsaę ra Jesús ñuu Betania nu iyó ra Lázaro, ra tsa janandoto ra. ² Ican javahá ñi tsa cuxiñi ra Jesús. Ña Marta tyihı ña coho nu mesa. Tan tsinyaę ra Jesús nu mesa. Tan nyaá ndihi tucu ra Lázaro tsihin ra. ³ Tacan tan quihın ña María tumaa sava litru ndutya tami tsa tsinú tsihin maa ñi maa yucu tsa nañi nardo, iin tsa yahvi xaan nyaá. Tan tyisó ña ndutya tami can tsaha ra Jesús. Yahá can tan jana ityi ña tsaha ra tsihin ixi jiñi ña. Nanñi cahnu maa tsitsi vehe can tsity xico ndutya tami can. ⁴ Tan ican nyii tucu ra Judas Iscariote, sehe ra Simón. Cuvı ra iin ra tsicá tsihin ra Jesús. Tan juven ñi maa ra cuvı ra tsa cua xico tsi ra Jesús tsi

nu xaan iñi tsi ra nahnū. Tan quitsahā catyí ra Judas can tsihin ñi can:

⁵ —¿Nacuenta ña xicō ndo ndutya tami ihya tsi nyivi, tan cuhva ñi cuenda mil tsi ndo tsa cuenda can, (uñi cientu denario) tan jatyinyee ndo tsi nyivi ndaahvi? —catyí ra.

⁶ Caahán ra Judas yacan tyin ra ñasuhu cuví ra, ñavin tsa cundaahví iñi ra nyehé ra tsi nyivi ndaahvi. Tyin maa ra yihí ndaha yitin nu yihí xuhun ra naha, tan tuhvá ra suhu tsa tyihí ra naha tsitsi yitin can. ⁷ Tacan tan catyí ra Jesús tsihin ra:

—Jaña tsi ña, tyin ñaha ihya javahā ña tye-
hen tsa cuenda tsa cua quihví cuñu ñuhu yu
tsitsi ñuhu. ⁸ Nyivi ndaahvi tacan ñi nyecú
maa ñi tsihin ndo, maa tyin yuhu ña cua
cunyaa ca yu tsihin ndo tacan —catyí ra
Jesús tsihin ra Judas.

*Nu nducú cahñi ndihi ra Israel naha ra tsi
ra Lázaro*

⁹ Cuaha xaan nyivi Israel ñihí tuhun ñi
tyin ra Jesús nyii ra Betania, tan tsahān ñi
ican. Ñavin intuhun ñi ra Jesús cuñí ñi nyehe
ñi tyin cuñí ndihi tucu ñi nyehe ñi tsi ra
Lázaro, ra tsa janandotó ra Jesús. ¹⁰ Tacan
tan ra cuví ityi nuu tsihin jutu natuhun
tahan ra naha tyin cua cahñi ndihi ra naha
tsi ra Lázaro. ¹¹ Tyin tsa cuenda ra tan cuaha
xaan nyivi Israel quitá tsiyo ñi tan quitsaha
tsinú iñi ñi tsi ra Jesús.

*Nu quihví ra Jesús ñuu Jerusalén
(Mt. 21.1-11; Mr. 11.1-11; Lc. 19.28-40)*

¹² Cuaha xaan nyivi tsaā ñi ñuu Jerusalén
tsa cuví vico pascua. Tan tsa inga quivi tsitō
ñi tyin ra Jesús cua tsaā ra ñuu can. ¹³ Tacan
tan tsahnyā ñi ndaha ndicaha tan cuahán ñi
cua jatahan ñi tsi ra Jesús. Tan caná tsaā ñi,
tan catyí ñi:

—¡Cahnu xaan cuví Nyoo! ¡Nasoco xaan
Nyoo tsi ra vatsí ihya tsihin tunyee iñi Nyoo!
¡Nasoco xaan Nyoo tsi Rey cuenda yo nyivi
Israel! —catyí ñi, caná tsaā ñi.

¹⁴ Tan ñihí ra Jesús iin burru tan tsicosō ra
tsi ti tumaa catyí maa nu tutu Nyoo tyehen:

¹⁵ Ña ñayuhvi ndo nyivi ñuu Sión

Nyehe ndo, vatsí Rey ndo.

Yosó ra iin burru —catyí tsi nu tutu Nyoo.

¹⁶ Quiví can ra tsicá tsihin ra Jesús, ña
cutuñí iñi ra naha tsa nyaá nu tutu Nyoo.
Maa tyin tsa yahā cuanuhu ra Jesús nda
gloria, nducuhun iñi ra naha tyin tandihí
yacan nyaá can nu tutu Nyoo tyin tacan cua
tahan ra. Tan tacan tsa cuii tahān ra.

¹⁷ Nyivi tsa nyehé quivi tsa canā ra Jesús
tsi ra Lázaro tsitsi ñaña, quiví janandotó ra
tsi ra, nacatyí tuhun ñi tsa nyehé ñi. ¹⁸ Tacan
cuenda cuaha xaan nyivi tsijatahan tsi ra
Jesús, tyin tsitō ñi tsa iyo tsa javahā ra.
¹⁹ Tacan tan ra cuví fariseo catyí ra naha
natuhun tahan ra naha:

—Tsa nyehé maa ndo tyin nduve maa náa
cuví javahā yo, tyin tandihí nyivi tan cuahán
ñi cuanyicún ñi tsi ra —catyí ra naha.

*Nu nducú juhva ra tsa quee Grecia tsi
ra Jesús*

²⁰ Yucú tucu juhva ra Grecia mahñu nyivi
tsa tsahān tsijacahnū vico ñuu Jerusalén.
²¹ Tacan tan natuhvā ra Grecia can naha ra
nu nyaá ra Felipe, ra quee ñuu Betsaida tsa
canyí Galilea, tan cahān ndaahvi ra naha
tsihin ra tan catyí ra naha:

—Taa, cuñí ndi cahan ndi tsihin ra Jesús
—catyí ra naha.

²² Tan tsahān ra Felipe tsicahān ra tsi-
hin ra Andrés. Tan tsahān nduvi ra naha
tsicatyí tuhun ra naha tsihin ra Jesús tyin
ra Grecia can cuñí ra naha cahan ra naha
tsihin ra. ²³ Tan nacahān ra Jesús, tan catyí
ra:

—Vityin tsa tsaā hora tsa cunuhu nyico
yu nda nu quee yu, tan cua jacahnū jutu
yu tsi yu, tsa cuví yu Rayí tsa quee nda
gloria. ²⁴ Tsa nditsa catyí yu tsihin ndo tyin
tatan iin tsiti tan ña cua quihví tsi ñuhu tan
ñi tyahyu tsi, intuhun ñi tsiti cua cuví tsi.
Maa tyin tatan tyahyu tsi, ndutsaa tsi inga
tsaha tan cua coo cuaha ca tsiti tsi. ²⁵ Nyivi
tsa cuñí xaan ñayivi iyó ñi, cua cunaa ñi.
Maa tyin nyivi ña cuñí ñayivi iyó ñi nu ñuhu
ñayivi ihya, cua ñihí ñi ñayivi nyitó tsa ña cua
naa maa coo ñi. ²⁶ Ndáa nyooho nyivi cuñí
javaha tyiñu nuu yu, naha ndo quitsi nyicun
ndo tsi yu. Tan nu cunyaa yu, cunyaa ndihi
nyooho tsa jahá tyiñu tyiñu yu. Tyin nyivi
jahá tyiñu tyiñu yu, cua jacahnū jutu yu tsi
ñi.

Nu caahán ra Jesús nácaa cua cúu ra

²⁷ Vityin tsicá xaan iñi yu. Tan ¿náa cua
cahan yu? ¿A catyí yu tsihin Jutu yu na
jatsiyo ra tundoho tsa nyaá cua nyehe yu?
Ña cua cahan yu tacan tyin tsa cuenda ya-
can vatsí yu nu ñuhu ñayivi ihya. ²⁸ Vaha ca
cahan yu tsihin Jutu yu tan catyí yu: “Jutu
Mañi yu, jacahnū sivi un” —catyí ra Jesús.

Tacan tan cahān iin ndusu ityi andivi tan
catyí tsi tyehen:

—Tsa yahā jacahnū yu sivi yu, tan cua
jacahnū nyico yu inga tsaha —catyí ndusu
can.

²⁹ Tan nyivi nyecú ican, tsiní ñi ndusu can,
tan catyí ñi tyin savi cahān. Tan inga ñi catyí
tyin iin ángel cahān tsihin ra.

³⁰ Tacan tan catyí ra Jesús tsihin ñi:

—Ñavin tsa cuenda tsa vaha tsi yuhu
cahān ndusu can, tyin tsa cuenda tsa vaha
tsi maa ndo cuví can. ³¹ Vityin cuví cuhva
tsa cua tatsi tuñi Nyoo tsi nyivi iyó nu ñuhu
ñayivi. Tan vityin cuví cuhva cua tava cuii
Nyoo tsi nu ndacá ñaha nu ñuhu ñayivi ihya.
³² Tan cuhva tsa cua ticaa nyivi tsi yu nu

cruu, yacan cuví cuhva cua ixta yu tandihí nyívi cahun ñi tsihin yu —catyí ra Jesús.

³³ Caahán ra tacan tsa cuenda tsa cuñí ra cutuñí iñi ñi tyin tacan cua cúu ra. ³⁴ Tan nacañan nyívi tan catyí ñi tsihin ra:

—Tuhvá ndi tsiñí cahví ra naha nu libro ley yo tyin ra cuví Cristo cua coo nyitó ra tan ña cua cúu maa ra. ¿Nacaa tsa catyí yooho tyin cua ticaa nyívi tsi Rayí quee nda gloria nu cruu? Tan ¿yóo ra cuví Rayí tsa quee nda gloria tsa caahán un tuhun? —catyí ñi, tsicá tuhun ñi tsi ra.

³⁵ Tacan tan catyí ra Jesús tsihin ñi:

—Ñuhu tsa jandunditsin nu nyecú ndo, juhva ña quívi iyó tsi. Caca ndo ityi nu nditsin tsitsi tsa ndi iyó tsa nditsin. Coto sana iñi ndo tan ndunaa. Tyin nyívi tsicá nu naa ña tsitó ñi nu maa cuahán ñi. ³⁶ Tsinu iñi ndo tsi yuhu ra cuví ñuhu nditsin, tsitsi tsa ndi nyívi yu tsihin ndo. Tacan tan cuví ndo nyívi iyó nu nditsin.

Tsa yahá cañan ra Jesús tacan tan jatsiyó ñi ra tsi ra nuu ñi.

Nu caahán tsi náa cuenda ña tsinú iñi ra cuví ityi nuu tsihin nyívi Israel naha ra tsi ra Jesús

³⁷ Vasu ndi maa cuaha xaan tsa iyo javahá ra Jesús nuu nyívi maa tyin ña tsinú maa iñi ñi tsa caahán ra. ³⁸ Tyin taahán tsi tsa cuví tumaa tsa cañan ra Isaías ra cuví ndusu yuhu Nyoo, nu cañan ra tyehen:

Jutu Mañi yu, yoñi cuñí tsinu iñi tsa caahán ndi.

Yoñi cutuñí iñi tunyee iñi tsa iyó tsi un, Jutu Mañi yu, catyí ra Isaías tahañ tsanaha.

³⁹ Tsa cuenda tsa nyaá nu tutu, yacan cuenda ña cuví tsinu iñi ñi tyin juvin ñi tyaa nyico tucu ra Isaías tyehen:

⁴⁰ Nyoo jacuaa ra tsi ñi. Tan jandundava ra añima ñi,

tan ña cua nyehe ñi tsihin tinuu ñi, tan ña cua cutuñí iñi ñi tsihin añima ñi, tan ndi ña cua nacuhva cuenda ñi tsi ñi tsi ra tan janduvaha ra tsi ñi.

⁴¹ Ra Isaías cañan ra tyehen tyin nyehe ra tsa cahnu cuví Jutu Mañi yo Jesús, tan cañan ra tuhun ra.

⁴² Cuaha xaan nyívi Israel tsinú iñi tsi ra Jesús. Tan nda cuenda juhva ra cuví ityi nuu naha ra. Maa tyin ña jandunditsin ra naha tsi ra naha nuu nyívi tyin yuuhví ra naha tsi ra cuví fariseo naha ra. Coto tava cuii ra can naha ra tsi ra naha vehe ñuhu. ⁴³ Tyin cuñí ra naha nduvaha ra naha nuu nyívi tan ñavin nuu Nyoo.

Tuhun cañan ra Jesús cua tatsi tuñi tsi nyívi

⁴⁴ Ñihi caahán ra Jesús, tan catyí ra:

—Nyívi tsa tsinú iñi tsi yu, ñavin tsi maa ñi maa yu tsinú iñi ñi, tyin tsinú ndihí iñi

ñi tsi ra tsa jaquitsj tsi yu. ⁴⁵ Tan nyívi tsa nyehé tsi yu, nyehé ndihí ñi tsi ra tsa jaquitsj tsi yu. ⁴⁶ Yuhu cuví tumaa ñuhu nditsin tan vatsí yu jandunditsin yu nu ñuhu ñayívi ihya, tyin nyívi tsinú iñi tsi yu ña cua ndoo ñi nu naa.

⁴⁷ Maa tyin tatun yihí ndo tsiñí ndo tsa caahán yu, tan ña javahá ndo tsa caahán yu, ñavin yuhu tatsi tuñi tsi ndo. Tyin ña vatsí yu nu ñuhu ñayívi ihya tyin tatsi tuñi yu tsi nyívi. Vatsí yu tyin vatsí jacacú yu tsi ñi.

⁴⁸ Nyívi tsa ña cuñí ñi javaha ñi tumaa cuhva cuñi yu, iyó tsa cua tatsi tuñi tsi ñi. Tuhun tsa caahán yu, yacan cua tatsi tuñi tsi ñi nu cua cundihi quívi. ⁴⁹ Tyin ñavin cuenda maa yu caahán yu. Jutu yu, ra tsa jaquitsj tsi yu, tsahá ra tyiñu tsi yu caahán ra náa cua cahan yu tan náa cua jacuaaha yu. ⁵⁰ Tan tsitó yu tyin tyiñu tsa tsahá ra, tsahá tsi ñayívi nyitó tsa ña cua naa maa coo nyívi. Yacan cuenda, tandihí tsa caahán yu, caahán yu cuhva catyí maa Jutu yu tsa cahan yu.

13

Nu nacatyá ra Jesús tsaha ra tsicá tsihin ra

¹ Tsa ndi cumañi ca iin quívi tan tahan tsi vico pascua, tsa tsitó maa ra Jesús tyin tsa cua tsaa hora tsa cua quita ra nu ñuhu ñayívi ihya tan cunuhu ra nu nyaá Jutu ra. Tacan ñi maa cuñí xaan ra tsi nyívi cuenda ra tsa iyó nu ñuhu ñayívi ihya. Tan vityin cua janaha ra tsi ñi tyin cuñí xaan ra tsi ñi tyin cua cúu ra tsa cuenda ñi.

² Tan cuxiñi ra Jesús tsihin ra tsicá tsihin ra. Tan quihví nu ña vaha añima ra Judas Iscariote sehe ra Simón tan natyuhú nu tsi ra na xico ra tsi ra Jesús tan cuhva cuenda ra tsi ra Jesús tsi nu xaan iñi tsi ra. ³ Maa tyin ra Jesús tsitó ra tyin tsahá Jutu ra tandihí tyiñu tsi ra tyin quihí ndaha ra. Tan tsitó ra tyin nu nyaá Nyoo quee ra tan juvin ñi ndacan cua cunuhu nyico ra. Tan nyaá ra Jesús cuxiñi ra. ⁴ Tacan tan nduvitá ra tan tavá ra jahma tsa nditsí ra ityi tsata, tan tsahñi ra iin toalla tsitsi ra. ⁵ Tacan tan tyihí ra ndutya tsitsi iin tsicoho tan quitsaha nacatyá ra tsaha ra tsicá tsihin ra. Tan jana ityi ra tsaha ra naha tsihin toalla can.

⁶ Tan tsa cua nacatya ra tsaha ra Simón Pedro tan catyí ra Simón tsihin ra:

—Jutu Mañi yu, ¿a yooho cua nacatya tsaha yu?

⁷ Tacan tan catyí ra Jesús:

—Vityin ña cutuñí iñi un tsa javahá yu, maa tyin cutuñí iñi maa un nu cuahán ca tsi quívi.

⁸ Maa tyin ra Pedro catyí ra tsihin ra:

—Ndi iin tsaha tan ña cua cuhva yu nacatya un tsaha yu.

Tan catyí ra Jesús tsihin ra:

—Tatun ña cua nacatya yu tsaha un, ñavin ca cuenda yu cua cuví un.

⁹Tacan tan catyí ra Pedro tsihin ra Jesús:

—Tun tacan, Jutu Mañi yu, ñavin tsaha ñi yu nacatya un. Nacatya nda cuanda ndaha yu tan jiñi yu —catyí ra.

¹⁰Maa tyin catyí ra Jesús tsihin ra:

—Nyivi tsa ndi tsityí, ña cuñi tsi tsa ndoo naniñi cahnu cuñu ñuhu ñi. Tsaha ña ñi cuñi tsi ndoo, tyin tsa ndoo maa naniñi ñi. Nyooho tsa ndoo maa ndo, vasu ña tandihí ndo ndoo —catyí ra Jesús.

¹¹Cahan ra tsa ña tandihí ra naha ndoo tyin tsitó ra yoo cua xico tsi ra tsi nu xaan iñi tsi ra nahnu.

¹²Tsa yahá nacatya ra Jesús tsaha ra tsicá tsihin ra, tan tsinditsj nyico ra jahma ra, tan tsinyaá nyico ra inga tsaha nu mesa tan catyí ra tsihin ra naha:

—¿A cutuñi iñi nyooho tsa javaha yu tsihin ndo? ¹³Nyooho caahán ndo tsihin yu, “Maestro tan Jutu Mañi yu”, tan nditsa tyin yacan cuví yu. ¹⁴Yuhu tsa cuví yu Ra Jacuahá tan Jutu Mañi ndo, nacatya yu tsaha ndo, tan tacan cuñi tsi tsa nacatya tahan maa ndo tsaha ndo. ¹⁵Yuhu tsaha yu iin cuhva tsi ndo tyin javaha ndo tumaa cuhva javaha maa yu. ¹⁶Tsa nditsa catyí yu tsihin ndo tyin ndi iin musu tan ña cahnu ca cuví ra tan ñavin ca tsitoho ra. Tan ndi iin ra tsa cuahán tyiñu, tan ña cahnu ca cuví ra tan ñavin ca ra tsa tava tyiñu tsi ra. ¹⁷Tatun cutuñi iñi ndo yacan, tan javahá ndo can, si xaan cua coo ndo.

¹⁸Ñavin tsa cuenda tandihí ndo caahán yu. Yuhu tsitó maa yu yoo nacatsj yu. Maa tyin cuñi tsi tsa cuví tumaa caahán tuhun Nyoo tyehen: “Ra tsa tsatsj paan tsihin yu, juvin ra cua xico ñaha tsi yu tsi nu xaan iñi tsi yu”, catyí tsi nu tutu Nyoo. ¹⁹Caahán yu tyehen tsihin ndo tsa ndi cumañi ca cuví can tyin quivi cua cuví yacan, cua tsinu iñi ndo tyin yuhu cuví ra tsa iyó nda ndi cumañi ca coo tandihí tsa iyó. ²⁰Tsa nditsa catyí yu tsihin ndo tyin nyivi naquihín vaha tsi nyivi tsa jacuhún yu tsi ñi, maa yu naquihín vaha ñi cuví can. Tan nyivi tsa naquihín vaha tsi yuhu, naquihín vaha ndihí ñi tsi ra tsa jaquitsj tsi yu —catyí ra Jesús.

Nu jacotó ra Jesús tyin cua xico ra Judas tsi ra tsi nu xaan iñi tsi ra nahnu

(Mt. 26.20-25; Mr. 14.17-21; Lc. 22.21-23)

²¹Tsa yahá tsa cahan ra Jesús yacan, tan quitsaha nducuihyá xaan cuñi añima ra, tan catyí catsi ra:

—Tsa nditsa catyí yu tsihin ndo, tyin iin nyooho cua xico ndo tsi yu tsi nu xaan iñi tsi yu —catyí ra Jesús.

²²Tacan tan ra tsicá tsihin ra, quitsaha nyehé nuu tahan ra naha, tan ña tsitó ra

naha yoo tuhun caahán ra Jesús. ²³Iin ra tsicá tsihin ra Jesús nyanaá ra tsi ra nu nyaá ra cuxiñi ra. Tan ra ican cuví ra tsa cuñi xaan ra Jesús. ²⁴Tan ra Simón Pedro javaha ra seña tsi ra can, na ndaca tuhun ra yoo tuhun caahán ra Jesús. ²⁵Tacan tan ra ican tsinyaá naa ca ra tsi ra Jesús, tan tsicá tuhun ra tsi ra:

—Jutu Mañi yu, ¿yoo ra cuví ra tsa caahán un tuhun?

²⁶Tan nacahan ra Jesús tan catyí ra:

—Cua jatyií yu luxu paan, tan ra tsa cua cuhva yu itsi, ra ican cuví ra —catyí ra.

Tacan tan quihín ra luxu paan tan jatyií ra, tan tsaha ra tsi ra Judas Iscariote, sehe ra Simón. ²⁷Tsa quihín ra Judas paan can tan quihvi nu ña vaha añima ra. Tacan tan ra Jesús catyí ra tsihin ra:

—Tsa tsicá iñi un javaha un, janumi javaha can —catyí ra Jesús tsihin ra Judas.

²⁸Maa tyin ndi intuhun ra tsa nyecú nu mesa can, ña cutuñi iñi ra naha nacuenda cahan ra tacan tsihin ra can. ²⁹Ra Judas cuví ra yihí ndaha yitin nu yihí xuhun, yacan cuenda yihí ra naha cuñi maa ra naha tyin cuñi ra Jesús tsa cujata ra tsa tsiñi ñuhu tsi ra naha tsa cuenda vico can, a cuhva ra juhva xuhun can tsi nyivi ndaahvi, cuñi maa ra naha. ³⁰Tsa yahá quihín ra Judas paan can, tacan tan quitá ra. Tan tsacuaa cuví can.

Tyiñu tsa tsa tava ra Jesús tsi yo: tsa cuñi tahan yo tsi yo

³¹Tsa yahá tsa cuahán ra Judas, tan catyí ra Jesús:

—Vityin cua nyehe nyivi tsa cahnu cuví yuhu Rayiñi tsa quee nda gloria. Tan cua nyehe ñi tsa cahnu cuví Nyoo tsa cuenda yu. ³²Tatun Rayiñi tsa quee nda gloria jacahnú ra tsi Nyoo, tacan tucu Nyoo ca jacahnu ra tsi ra. Tsa tsaá quivi cua jacahnu ra tsi ra. ³³Sehe yu, ña naha ca cua cunyií yu tsihin ndo. Nyooho cua nanducu ndo tsi yu, maa tyin tumaa tsa cahan yu tsihin ra cuví ityi nuu tsihin yo nyivi Israel can naha ra, caahán yu tsihin ndo vityin, tyin ña cua cuví cuhún ndo nu cua cuhún yu. ³⁴Tsahá yu iin tyiñu tsa tsi ndo: Cuñi tahan ndo tsi ndo. Tumaa tsa cuñi maa yu tsi ndo, tacan cuñi tsi tsa cuñi tahan ndo tsi ndo. ³⁵Tatun cuñi tahan ndo tsi ndo, tandihí nyivi tan cua coto ñi tyin nyivi nyicún tsi yu cuví ndo.

Nu caahán ra Jesús tyin ra Pedro cua cahan ra tyin ña nacotó ra tsi ra

(Mt. 26.31-35; Mr. 14.27-31; Lc. 22.31-34)

³⁶Ra Simón Pedro tsicá tuhun ra tsi ra Jesús tan catyí ra:

—Jutu Mañi yu, ¿nu maa cua cuhún un? —catyí ra.

Tan nacahan ra Jesús tan catyí ra:

—Nu cahun yuhu, ña cua cuvi cunyicún un tsi yu vityin. Maa tyin nu cuahán ca tsi quívi, tan cunyicun un tsi yu —catyí ra Jesús.

³⁷ Tacan tan catyí ra Pedro tsihin ra:

—Jutu Mañi yu, ¿nácaa tsa ña cua cuvi cunyicun yu tsi un vityin? Tan tsa iyó vaha iñi yu tsa cuhva yu ñayívi yu tsa cuenda un —catyí ra.

³⁸ Tan nacahan ra Jesús tan catyí ra:

—¿A nditsa tsa cuhva un ñayívi un tsa cuenda yu? Tsa nditsa catyí yu tsihin un, tyin tsa ndi cumañi ca vacu tsa tsitooho, yooho cua cahan un uní tsaha tyin ña nacotó un tsi yu —catyí ra Jesús tsihin ra Pedro.

14

Ra Jesús cuví ityi cahun yo nu nyaá Nyoo Jutu yo

¹ Tan catyí ra Jesús:

—Ña caca xaan iñi ndo. Tsjnu iñi ndo tsi Nyoo, tan tsjnu ndihi iñi ndo tsi yu. ² Vehe Jutu yu cuaha xaan nu coo ndo iyó. Tun tsatyin ñavin tacan, tsa naha catyí tuhun yu tsihin ndo. Tan cua cahun yu cua janduvaha yu iin nu coo ndo. ³ Tsa yahá tsa cahun yu janduvaha yu nu coo ndo, tan cua quitsi nyico yu inga tsaha, quitsi naquihin yu tsi ndo tyin cuyucu ndo nu cua cunyata yu. ⁴ Nyooho tsa tsitó maa ndo nu maa cahun yu, tan tsa tsitó ndo ityi.

⁵ Tan catyí ra Tomás tsihin ra:

—Jutu Mañi yu, ña tsitó ndi nu maa cua cahun un. Tan ¿nácaa coto ndi ityi? —catyí ra.

⁶ Tan catyí ra Jesús:

—Yuhu cuví ityi tsa cuahán gloria. Tan yuhu cuví tsa nditsa. Tan juvin ñi yuhu cuví ra tsahá ñayívi coo ndo. Tan tsa cuenda yuhu ñi, tan cuví tsa ndo nu nyaá Jutu yu. ⁷ Tan tsa nacotó ndo tsi yu, tan tsa cuenda yacan nacotó ndihi ndo tsi Jutu yu. Nda vityin tan nu cuahán ca tsi ityi nuu, cua nacoto ndihi ndo tsi ra, tyin tsa nyehé ndo tsi ra —catyí ra Jesús.

⁸ Tacan tan catyí ra Felipe tsihin ra:

—Jutu Mañi yu, cuhva jihna nyehe ndi tsi Nyoo Jutu yo, tan tsihin yacan ñi tan ndoo ndi vaha.

⁹ Tan nacahan ra Jesús, tan catyí ra:

—Yooho Felipe, tsa naha xaan nyí yu tsihin ndo, tan ¿nácaa tsa caahán un tsa ña nacotó un tsi yu? Nyívi tsa nyehé tsi yu, nyehé ndihi ñi tsi Nyoo Jutu yu. Tan ¿nácaa tsa caahán un tsihin yu: “Cuhva jihna nyehe ndi tsi Nyoo Jutu yo?” ¹⁰ ¿A ña tsinú iñi un tyin iin ñi cuví yu tsihin Nyoo Jutu yu? Tan maa ra iin ñi cuví ra tsihin yu. Tsa caahán yu tsihin ndo, ñavin yuhu caahán yacan. Jutu yu tsa iyó tsihin yu, maa ra javahá tyínu ra tsihin yu. ¹¹ Tsjnu iñi ndo tsi yu tyin iin ñi ra cuví yu tsihin Nyoo Jutu yu. Tan Nyoo

Jutu yu iin ñi cuví ra tsihin yu. Tatun ña tsinú iñi ndo yacan, cuví tsinu iñi ndo tsi yu tsa cuenda tyínu Nyoo Jutu yu tsa javahá yu. ¹² Tsa nditsa caahán yu tsihin ndo tyin nyívi tsinú iñi tsi yu, cua javaha ndihi ñi tsa javahá yu. Tan cahun ca tsa cua javaha ñi, tyin yuhu cahun yu nu nyaá Nyoo Jutu yu. ¹³ Tan tandihi tsa cua ndacan ndo tsi jutu yu tsihin sivi yu, cua ñihi ndo can tyin tacan tan jacahnu cuaha ca nyívi tsi Nyoo Jutu yu tsa cuenda yuhu tsa cuví yu Sehe ra. ¹⁴ Yuhu cua javaha yu náa ndihi tsa ndacan ndo tsa cuenda yu.

Nu caahán ra Jesús tyin cuhva ra Tatyí Ii ra tsi yo

¹⁵ Tatan cuñi ndo tsi yu, tyáa yahvi ndo tsa caahán yu. ¹⁶⁻¹⁷ Tan ndacan tahvi maa yu tsi Nyoo Jutu yu na jaquitsi ra iin ra cua cuhva tunyee iñi tsi ndo. Tan ra ican cuví Tatyí Ii Nyoo, ra tsa caahán tsa nditsa. Tan iin nyita ñi maa cua cunyata ra tsihin ndo. Maa tyin nyívi tsa taahán ca iñi tsa iyó nu ñuhu ñayívi ihya, ña cua cuvi naquihin ñi Tatyí Ii Nyoo tyin ña nyehe ñi tsi ra. Tan ndi ña tsitó ñi tsi ra. Maa tyin nyooho tsitó ndo tsi ra tyin nyaá ra tsihin ndo tan tacan ñi cua ndoo ra tsihin ndo. ¹⁸ Ña cua nacoo cuii yu tsi ndo. Cua quitsi nyico yu nu yucú ndo. ¹⁹ Juhva cuii ña quívi, tan nyívi cuenda nu ñuhu ñayívi ña cua nyehe ca ñi tsi yu. Maa tyin nyooho cua nyehe ndo tsi yu. Tyin yuhu nyito yu, yacan cuenda nyooho cua coo ndihi ndo. ²⁰ Quívi can cua coto ndo tyin yuhu iin ñi cuví yu tsihin Jutu yu. Tan nyooho iin ñi cuví ndo tsihin yu. Tan yuhu iin ñi cuví yu tsihin ndo. ²¹ Nyívi tsa tyáa yahvi tsa caahán yu, tan javahá ñi cuhva caahán yu, ñi ican cuví ñi tsa cuñi tsi yu. Tan ñi tsa cuñi tsi yu, Jutu yu cua cuñi ra tsi ñi. Tan cuñi ndihi tucu maa yu tsi ñi tan cua janaha yu tsi ñi yóo ra cuví yu —catyí ra Jesús.

²² Tan catyí ra Judas, ñavin ra Judas Iscariote, inga ra.

—Jutu Mañi yu, ¿nácaa tsa nyuhu ñi cua janaha un tsi un, tan ñavin tsi tandihi nyívi iyó nu ñuhu ñayívi?

²³ Nacahan ra Jesús tan catyí ra:

—Nyívi cuñi tsi yu, javahá ñi tsa caahán yu. Tan Jutu yu cuñi ra tsi ñi. Tan quitsi ndi nu yucú ñi tan coo ndi tsihin ñi. ²⁴ Nyívi ña cuñi tsi yu, ña javahá ñi tsa caahán yu. Tan tuhun tsa caahán yu tsa tyáa soho ndo, ñavin tuhun maa yu cuví tsi, tyin tuhun caahán Jutu yu, ra tsa jaquitsi tsi yu, cuví tsi.

²⁵ Caahán yu tandihi tuhun ihya tsihin ndo tsitsi tsa ndi nyí yu tsihin ndo. ²⁶ Maa tyin nu cuahán ca tsi ityi nuu cua jaquitsi Jutu yu Tatyí Ii ra tsihin sivi yu. Tan cua jatinyee ra ican tsi ndo, tan cua cuhva ra tunyee iñi tsi ndo, tan cua janaha ra tandihi

tsi ndo. Tan cua janducuhun iñi ra tsi ndo tsa tsa yaha cahan yu tsihin ndo.

²⁷ Jandoó yu iin tsa taxin coo añima ndo, tumaa tsa taxin cuñi añima maa yu. Yacan tshahá yu tsi ndo. Ñavin tumaa tsa taxin tsa ñihí ndo nu ñuhu ñayivi ihya. Ña caça xaan iñi ndo tan ña nayuhvi ndo. ²⁸ Tsiñj ndo tsa cahan yu nu catyi yu tyin cua cuhun yu tan cua quitsi nyico yu nu yucú ndo. Tatun cuñi ndo tsi yu, cua cusii iñi ndo tyin catyi yu tyin cuahan yu nu nyaá Jutu yu. Tyin cahnu ca cuvi Jutu yu tan ñavin ca maa yu. ²⁹ Caahán yu tyehen tsihin ndo tsa ndi cumañi ca cuhun yu, tyin quivi cuhun yu, cua tsinu iñi ndo tsi yu.

³⁰ Ña cuaha ca cua cahan yu tsihin ndo. Tyin vatsi nu ndacá ñaha nu ñuhu ñayivi ihya. Maa tyin ña ndacá ñaha nu tsi yu. ³¹ Tyin tacan tan coto nyivi iyó nu ñuhu ñayivi, tyin yuhu cuñi yu tsi Nyoo Jutu yu, tan javahá yu tyiñu tava ra tsi yu.

Nduvita ndo, tan cõhon ndo, na cua tsiyo yu ihya.

15

Nu cahan ra Jesucristo tyin cuvi ra tumaa yoho tsa cuvi uvas

¹ Yuhu cuvi yoho tsa cuvi uvas tsa nditsa. [Tsa cuvi uvas cuvi tsi tumaa yoho nditsaahan ndivi maa tyin yucu vixi cuvi tsi.] Tan Jutu yu cuvi ra jahá cuenda yoho can. ² Tsaahnyá ra soco tsa ña tshahá tsiti. Tan nacahnyá ra nuu yoho yucu tsa tshahá tsiti, tan janduvahá ra can, tyin tacan tan cuhva cuaha ca tsi tsiti. ³ Tsa yaha janduvahá Jutu yu tsi nyooho tsihin tsa jacuahá yu tsi ndo. ⁴ Jañihi ca ndo ndu iin ndo tsihin yu, tumaa tsa iin ñi cuvi yu tsihin ndo. Tumaa iin soco yoho can ña cuvi cuhva tsi tsiti tsa maa ñi maa tsi, tun ña nyanaá tsi tsata yoho cahnu can, tacan nyooho, ña cua cuvi javaha ndo tsa vaha tatun ña iin ñi cuvi ndo tsihin yu.

⁵ Yuhu cuvi yoho cahnu. Tan nyooho cuvi soco yoho can. Nyivi tsa nyanaá tsi yu, tan nyanaá yu tsi ñi, cuaha tsa vaha javahá ñi. Tyin nduve náa cuvi javaha ñi tatun ña nyanaá ñi tsi yu. ⁶ Nyivi tsa ña nyanaá tsi yu, cua javita Jutu yu tsi ñi, tumaa javitá yo soco yutun tsa ña tshahá tsiti. Na ityi can tan jatacá yo can, tsahan tsahmí yo.

⁷ Tatun tacan ñi nyanaá maa ndo tsi yu, tan ña naa iñi ndo tsa jacuahá yu tsi ndo, tacan tan cuvi ndacan ndo náa cuñi maa ndo tsi yu, tan yuhu cua cuhva yu tsa cua ndacan ndo. ⁸ Tatun cuaha tsa vaha javahá ndo, jacahnú xaan ndo tsi Jutu yu cuvi can. Tan tsihin yacan janahá ndo tyin cuvi ndo nyivi tsa nditsa nyicún tsi yu. ⁹ Yuhu cuñi yu tsi ndo, tumaa tsa cuñi Jutu yu tsi yu. Ña naa iñi ndo cuhva cuñi yu tsi ndo. ¹⁰ Tatun tyaá yahvi ndo tsa caahán yu, ña cua naa iñi ndo

tyin cuñi yu tsi ndo. Tumaa tsa javahá maa yu, tyaá yahvi yu tsa caahán Jutu yu. Ña naa iñi yu tsa cuñi xaan ra tsi yu.

¹¹ Caahán yu tyehen tsihin ndo tyin na cusii iñi ndo tsihin yu. Tan cusii ca iñi ndo. ¹² Tuhun tsa caahán yu tsihin ndo, yacan cuvi tsehe: cuñi tahan ndo tsi ndo, tumaa tsa cuñi maa yu tsi ndo. ¹³ Tatun yaha xaan cuñi tahan yo tsi yo, cana maa iñi yo cuhva yo ñayivi iyó yo tsa cuenda inga yo. ¹⁴ Nyooho cuvi ra vaha iñi tsi yu tatun javahá ndo tsa caahán yu tsihin ndo. ¹⁵ Ña caahán ca yu tyin musu yu cuvi tsi ndo, tyin iin musu ña tsitó ra náa javahá tsitoho ra. Caahán yu tyin ra vaha iñi tsi yu cuvi ndo, tyin tandihi tsa caahán Jutu yu tsihin yu tan jacotó yu itsi tsi ndo. ¹⁶ Ñavin nyooho nacatsj tsi yuhu tyin maa yu nacatsj tsi ndo. Tan tava tyiñu yu tsi ndo tsa cuhun ndo tan jaha tyiñu ndo. Tan tyiñu jahá ndo cua quita vaha tsi, tumaa iin itu tsa vaha xaan cuvaha. Tan cuaha xaan ñihí cua coo, tan ña cua tiví maa tsi. Tacan tan cua cuhva Jutu yu tandihi tsa ndacan ndo tsi ra tsihin sivi yu. ¹⁷ Tyehen caahán yu tsihin ndo: Cuñi tahan ndo tsi ndo.

Nyivi taahán iñi tsa iyó nu ñuhu ñayivi, ndasi cuñi ñi nyehé ñi tsi ra Jesús tan tsi nyivi nyicún tsi ra

¹⁸ Tatun ndasi cuñi nyivi taahán iñi tsa iyó nu ñuhu ñayivi ihya nyehé ñi tsi ndo, cõto ndo tyin jihna ca maa yu ndasi cuñi ñi nyehé ñi. ¹⁹ Tun tsatyn nyivi cuenda nu ñuhu ñayivi ihya cuvi ndo, cua cuñi nyivi tsi ndo tumaa tsa cuñi tahan maa ñi tsi ñi. Maa tyin nyooho tsa nacatsj yu tsi ndo mahñu ñi. Yacan cuenda ndasi cuñi ñi nyehé ñi tsi ndo, tyin ñavin ca nyivi cuenda nu ñuhu ñayivi ihya cuvi ndo. ²⁰ Nducuhun iñi ndo tsa cahan yu tsihin ndo, tyin ndi iin musu tan ña cahnu ca cuvi ra tan ñavin ca tsitoho ra. Tatun tyaá yahvi nyivi tsa caahán yu tsihin ñi, tacan cua tyaá yahvi ndihi ñi tsa jacuahá ndo tsi ñi. Tan tatun ndasi icá ñi tsihin yu, ndasi cua ica ndihi ñi tsihin ndo. ²¹ Tandihí yacan cua ica ñi tsihin ndo tsa catyi yuhu, tyin ña nacotó ñi tsi ra tsa jaquitsj tsi yu.

²² Tun tsatyn ña quitsj yo cahan yu tsihin ñi, nduve cuatyí ñi. Maa tyin vityin nduve náa siqui cua tyaá ñi cuatyí ñi, tyin tsa yaha cahan yu tsihin ñi. ²³ Nyivi tsa ndasi cuñi nyehé tsi yu, ndasi cuñi ndihi ñi nyehé ñi tsi Jutu yu. ²⁴ Nduve cuatyí ñi, tun tsatyn ña javahá yu tsa ña cuvi javaha inga nyivi. Maa tyin tsa nyehé ñi tandihí yacan. Vasu ndi maa tsa nyehé ñi can maa tyin ndasi cuñi ñi nyehé ñi tsi yu, tan tsi Jutu yu. ²⁵ Maa tyin tandihí yacan cuvi, tyin cuñi tsi cundaa tumaa cuhva caahán nu tutu ley tsa jacuahá ñi tsa caahán tyehen: “Nduve vihi náa tsaha, tan ndasi cuñi ñi nyehé ñi tsi yu”, catyi tsi.

²⁶ Maa tyin cua quitsi Tatyí Ii, ra tsa caahán tsa nditsa. Ra ícan cuví ra tsa cua cuhva tunyee íñi tsi ndo. Quiví cua tsaá yu nu nyaá Jutu yu tan cua jaquitsi ndi Tatyí Ii nu yucú ndo. Tan cua cahan ra tumañi íñi tsa cuenda yu. ²⁷ Tan nyooho tucu cua cahan ndo tumañi íñi tsa cuenda yu, tyin yucú ndo tsihin yu nda quiví quitsahá jahá tyiñu yu.

16

¹ Caahán yu tyehen tsihin ndo tyin tacan tan ña jandihí ndo tsa tsinú íñi ndo tsi yu. ² Cua tava cuii nyiví tsi ndo vehe ñuhu. Tan coo quiví cua cahñi ñi tsi ndo, tan cua cuñi ñi tyin tyiñu Nyoo javahá ñi. ³ Tacan cua ica ñi tyin ña nacoto ñi tsi Jutu yu tan ndi tsi maa yu. ⁴ Caahán yu tsehe tsihin ndo tyin quiví tsa cua cuví tumaa cuhva caahán yu tsihin ndo, cua nducuhun íñi ndo tyin tsa yaha cahan yu tuhun ihya tsihin ndo.

Ña cahan yu tyehen tsihin ndo nda jihna tyin ndi nyíi maa yu tsihin ndo.

Tyiñu jahá Tatyí Ii Nyoo

⁵ Maa tyin vityin cua cuhun yu tyin cun-yaá yu tsihin ra tsa jaquitsí tsi yu. Ndi intuhun ndo tan ña tsicá tuhun ndo tsi yu nu maa cua cuhun yu. ⁶ Tyin tsa nducuiihya cuñi ndo tsa caahán yu tyehen tsihin ndo. ⁷ Caahán yu tsa nditsa tsihin ndo tyin vaha ca tsa cuhun yu cuenda tsa vaha tsi maa ndo. Tyin tatun ña cuhun yu, ña cua quitsi Tatyí Ii tsa cua cuhva tunyee íñi tsi ndo. Maa tyin tatun cuhun yu, cua jaquitsi yu tsi ra. ⁸ Tan quiví quitsi ra, cua jacoto ra tsi nyiví iyó nu ñuhu ñayiví ihya tyin iyó cuatyí ñi. Tan cua janaha ra ityi vaha tsi ñi, cuhva coo vaha ñi. Tan cua jacoto ra tsi ñi tyin cua cutuñi ñi nuu Nyoo. ⁹ Cua jacoto ra tsi ñi tyin iyó cuatyí ñi tyin ña tsinú íñi tsi yu. ¹⁰ Cua jacoto ra tsi ñi tyin iyó ityi vaha, cuhva coo vaha ñi tyin yuhu cua cuhun yu nu nyaá Jutu yu tan ña cua nyehe ca ndo tsi yu. ¹¹ Tan cua coto ñi tyin cua jandaa Nyoo cuatyí ñi tyin tsa yaha cundaa cuatyí nu cuví cuihna, nu ndacá ñaha nu ñuhu ñayiví ihya.

¹² Tan cuaha ca tsa nyaá cahan yu tsihin ndo, maa tyin ña cua cutuñi íñi ndo can vityin. ¹³ Quiví quitsi Tatyí Ii tsa caahán tsa nditsa, maa ra cua janaha tandihí tsa nditsa tsi ndo. Tyin ñavin cuenda maa ra cua cahan ra, tyin cua cahan ra tandihí tsa tsiñí ra. Tan cua jacoto ra náa cua cuví nu cuahán ca tsi ityi nuu. ¹⁴ Cua jacahnu ra tsi yu, tyin cua naquihin ra tuhun yu tan cua janaha ra can tsi ndo. ¹⁵ Tandihí tsa iyó tsi Jutu yu, tsii maa yu cuví ndihí can. Yacan cuenda caahán yu tyin Tatyí Ii cua naquihin ra tuhun yu, tan cua janaha ra tsi nyooho.

Ra tsicá tsihin ra Jesús cuiihyá xaan cuñí ra naha, maa tyin nu cuahán ca tsi quiví cua cusí íñi ra naha, catyí ra Jesús

¹⁶ Ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu, tyin yuhu cua cuhun yu nu nyaá Jutu yu —catyí ra Jesús.

¹⁷ Tacan tan juhva ra tsicá tsihin ra, tsicá tuhun tahan ra naha tan catyí ra naha:

—¿Náa cuñi tsi cahan yacan? Catyí ra tsihin yo tyin ña naha cuii ca tan ña cua nyehe ca yo tsi ra, tan yaha can tan cua nyehe nyico yo tsi ra inga tsaha tyin cua cuhun ra nu nyaá Jutu ra. ¹⁸ ¿Náa cuñi tsi catyí tsa “ñá naha cuii ca” can? Ña cutuñi íñi yo náa tuhun caahán ra —catyí ra naha.

¹⁹ Tan tuví íñi ra Jesús tyin cuñí ra naha ndaca tuhun ra naha tsi ra, tan catyí ra:

—Yuhu cahan yu tsihin ndo tyin ña naha cuii ca tan ña cua nyehe ca ndo tsi yu, maa tyin yaha can tan cua nyehe nyico ndo tsi yu. ¿A yacan cuví tsa tsicá tuhun tahan ndo tsi ndo? ²⁰ Tsa nditsa caahán yu tsihin ndo tyin nyooho cua nducuiihya íñi ndo tan cua vacu ndo, maa tyin nyiví cuenda nu ñuhu ñayiví cua cusí íñi ñi. Vasu cuiihya cuñí ndo vityin, tucuiihya íñi can cua nanduví tsi tsa síi. ²¹ Cuhva tsa cua cacu sehe iin ñaha, nyehé ña tundoho. Maa tyin tsa yaha cacu lee can, ndi ña ñuhu ca íñi ña tsa uhvi can tsa cuenda tsa síi cuñí ña tyin cacu iin lee sehe ña. ²² Tacan tucu nyooho vityin, cuiihya xaan cuñí ndo. Maa tyin cua nyehe nyico yu tsi ndo inga tsaha. Tacan tan cua cusí nyico íñi añima ndo. Tan yofíi cuví quihin nyaa tsa síi can tsi ndo.

²³ Quiví can nduve ca tsa cua ndaca tuhun ndo tsi yu. Tsa nditsa caahán yu tsihin ndo tyin Nyoo Jutu yu cua cuhva ra tandihí tsa ndacan ndo tsi ra tsihin sívi yu. ²⁴ Nda vityin tan ñaha ca ndacan ndo tsa ndacan ndo tsihin sívi yu. Ndacan ndo tan cua ñihi ndo tan cusí xaan íñi ndo.

Ra Jesucristo cuví jaha canaa ra tsa ña vaha iyó nu ñuhu ñayiví

²⁵ Maa ñi maa tsihin tsa jandu inducú yu tuhun jacuahá yu tsi ndo. Maa tyin nu cuahán ca tsi, ñavin ca tsihin cuhva can cua jacuahá yu tsi ndo, maa tyin cua catyí tuhun catsi yu tuhun Jutu yu tsihin ndo. ²⁶ Quiví can tsihin sívi yu cua ndacan ndo tsa ndacan ndo tsi ra. Tan ña tsiñí ñuhu ca tsa cahan ndaahví yu tsihin Jutu yu tsa cuenda ndo. ²⁷ Tyin maa Nyoo Jutu yu cuñí ra tsi ndo. Cuñí ra tsi ndo tyin nyooho cuñí ndo tsi yu, tan tsinú íñi ndo tyin nu nyaá Nyoo quee yu. ²⁸ Nu nyaá Jutu yu quee yu tyin quitsí yu nu ñuhu ñayiví ihya. Maa tyin vityin cua nacoo yu ñuhu ñayiví ihya tyin cua cunuhu nyico yu nu nyaá ra —catyí ra Jesús.

²⁹ Tacan tan catyí ra tsicá tsihin ra:

—Vityin nditsa, caahán catsi un tsihin ndi. Ñavin ca tsihin cuhva caahán un tsihin ndi.
³⁰ Vityin nyehé ndi tyin tsitó un tandihi cuii maa, tan ña tsiñi ñuhu ca tsa ndaca tuhun ndi tsi un tan coto un tsa tsicá iñi ndi. Yacan cuenda tsinú iñi ndi tyin nu nyaá Nyoo quee un —catyí ra naha tsihin ra Jesús.

³¹ Tan catyí ra Jesús:

—Tan vityin ¿a tsinú iñi ndo tsi yu? ³² Maa tyin caahán yu tsihin ndo tyin tsa vatsí hora. Tan vityin cuví hora tsa cua cuhun ndo siin siin ityi. Tan cua nacoo ndo tsi yu. Maa tyin ñavin intuhun ñi yu cua ndoo, tyin Jutu yu nyaá ra tsihin yu. ³³ Caahán yu tandihi tsehe tsihin ndo na coo tsa taxin añima ndo tsa cuenda tsa iin ñi cuví ndo tsihin yu. Nu ñuhu ñayivi ihya cua nyehé ndo tundoho, maa tyin janyee ndo iñi ndo, tyin yuhu tsa jahā canaa yu tsa ña vaha tsa iyó nu ñuhu ñayivi ihya.

17

Nu tsicán tahvi ra Jesús tsi Nyoo tsa cuenda ra tsicá tsihin ra

¹ Tsa yahā cahān ra Jesús yacan, nanyehē ndaa ra ityi andivi tan catyí ra:

—Jutu Mañi yu, tsa tsaā hora vityin. Jacahnu tsi yu tsa cuví yu sehe un, tyin tacan tan jacahnu tucu maa yu tsi un. ² Tyin tava tyiñu un tsi yu tsa quihí ndaha yu tandihi nyivi, tan cuhva yu ñayivi nyitó tsa ña cua naa maa tsi tandihi nyivi tsa tsahā un tsi yu. ³ Tatun nacotó ñi tsi un tyin intuhun ñi maa un cuví Nyoo tsa nditsa, tan nacotó ñi tsi yuhu ra Jesucristo ra tsa jaquitsj un, tacan tan cuví coo ñi ñayivi nyitó tsa ña cua naa maa.

⁴ Tsa jacahnu yu tsi un nu ñuhu ñayivi ihya tan tyiñu tsa tava tyiñu un tsi yu tsa ndihi tsi javahā yu. ⁵ Tan vityin, Jutu Mañi yu, cua quitsi nuhu nyico yu nu nyaá un, tan cuñi yu tyin nacuhva un tsa cahnu cuví yu tsihin un tsi yu, tumaa tsa tsicoo maa tsi yu nda ndi cumañi ca tsinu ñuhu ñayivi.

⁶ Tandihí ra tsa tsahā un tsi yu naha ra, ra tsa natava vaha un mahñu nyivi iyó nu ñuhu ñayivi ihya, jacoto yu tsi ra naha yoo ra cuví yooho. Tsi maa un cuví tsi ra naha tan tsahā un tsi ra naha tsi yu. Tan tyaá yahvi ra naha tsa caahán un. ⁷ Vityin tsitó ra naha tyin tandihí tsa tsahā un tsi yu, nu nyaá un quee tsi. ⁸ Tyin catyí tuhun yu tsihin ra naha tsa cahān un tsihin yu, tan naquihñ vaha ra naha itsi. Tan tsitó ra naha tyin nditsa tsa quee yu nu nyaá un, tan tsinú iñi ra naha tyin maa un jaquitsj tsi yu.

⁹ Yuhu tsicán tahvi yu tsi un tsa cuenda ra naha. Ña tsicán tahvi yu tsa cuenda tandihí nyivi, maa tyin tsicán tahvi yu tsa cuenda ra tsa tsahā un tsi yu naha ra, tyin tsi maa un cuví ra naha. ¹⁰ Tandihí nyivi tsa cuví tsi un,

tsahā tucu un tsi ñi tsi yu. Tan maa ñi janahá tsa cahnu cuví yu.

¹¹ Yuhu ña cua ndoo ca yu nu ñuhu ñayivi ihya, maa tyin maa ra naha cua ndoo ra naha nu ñuhu ñayivi ihya. Tan yuhu cua cunaa nyico yu tsihin un. Jaha cuenda tsi ra tsa tsahā un tsi yu tsihin tunyee iñi tsa iyó tsi maa un, Jutu Mañi yu. Tan na iin ñi cuví ra naha, tumaa tsa iin ñi cuví maa yu.

¹² Quivi tsinyij yu nu ñuhu ñayivi ihya tsihin ra naha, jahā cuenda yu tsi ra tsa tsahā un tsi yu naha ra tsihin tunyee iñi tsa iyó tsi un. Tan jahā cuenda yu tsi ra naha. Tan ndi intuhun ra naha tan ña tsinaa ra naha. Maa tyin ra tsa tsa nyaá maa tsa cunaa, ra ican ñi cuví ra cuanaq tan quitā cuhva tumaa tsa catyí nu tutu maa un.

¹³ Vityin tsa cua quitsi yu nu nyaá un, maa tyin tsitsi tsa ndi nyii yu nu ñuhu ñayivi ihya, caahán yu tsehe, tyin na cusii iñi ra naha tumaa tsa sii cuñi maa yu. ¹⁴ Yuhu cahān yu tsihin ra naha tsa caahán un, maa tyin nyivi cuenda nu ñuhu ñayivi ndasi cuñi ñi nyehé ñi tsi ra nyicún tsi yo naha ra, tsa cuenda tyin ñavin ra cuenda nu ñuhu ñayivi cuví ra naha. Tumaa yuhu, ñavin ra cuenda nu ñuhu ñayivi cuví yu. ¹⁵ Ña tsicán yu tsi un tsa tava un tsi ra nyicún tsi yo naha ra nu ñuhu ñayivi ihya, maa tyin jahā cuenda tsi ra naha coto náa jaha nu ña vaha tsi ra naha. ¹⁶ Tumaa yuhu ñavin ra cuenda nu ñuhu ñayivi cuví yu, tacan tucu ra ihya naha ra, ñavin ra cuenda nu ñuhu ñayivi cuví ra naha. ¹⁷ Jacu ii tsi ra naha tsihin tsa nditsa, na javaha ra naha maa ñi maa cuhva cuñi maa un. Tyin tsa caahán un, yacan cuví tsa nditsa. ¹⁸ Tumaa tsa jaquitsj un tsi yuhu nu yucú nyivi iyó nu ñuhu ñayivi, tacan cua jacuhun ndihi tucu yuhu tsi ra tsa nyicún tsi yo, nacahan ra naha tuhun yo tsihin nyivi tsa ñaha ca coto tuhun yo. ¹⁹ Tan tsa cuenda tsa vaha tsi maa ra naha, jacu ii maa yu tsi yu tyin tacan tan cuví jacu ii tucu maa ra naha tsi ra naha tsihin tsa nditsa.

²⁰ Ñavin tsa cuenda ra ihya ñi naha ra tsicán tahvi yu tsi un. Tsicán tahvi ndihi tucu yu tsi un tsa cuenda nyivi tsa cua tsinu iñi tsi yu, tsa cuenda tsa cua cahān ra ihya naha ra ityi nuu ca. ²¹ Tsicán yu tsi un na iin ñi cuví ñi tsihin inga ñi. Tan na iin ñi cuví ñi tsihin yo, Jutu Mañi yu. Tumaa yooho nyaá un tsihin yu tan yuhu nyaá yu tsihin un, na iin ñi cuví ñi tsihin yo, tyin tacan tan tandihí nyivi iyó nu ñuhu ñayivi cua tsinu iñi ñi tyin maa un jaquitsj tsi yu. ²² Yuhu tsahā yu tsa cahnu cuví un tsi ñi nyicún tsi yo. Juvín ñi maa tsa cahnu cuví un tsa tsahā un tsi yu tyin tsihin yacan na iin ñi cuví ñi, tumaa yooho tsihin yuhu, iin ñi cuví yo. ²³ Yuhu nyii yu tsihin ñi. Tan yooho nyaá un tsihin yu tyin tacan tan iin ña nyivi cua cuví ñi. Tan coto tandihí nyivi iyó nu ñuhu ñayivi tyin

maa un jaquitsi tsi yu, tan cuñi xaan un tsi ñi nyicún tsi yo, tumaa tsa cuñi maa un tsi yu.

²⁴ Jutu Mañi yu, maa un tsaḡ tsi ñi tsi yu. Tan cuñi yu tsa cunyaa ñi tsihin yu nu cua cunyaa yu, tan na nyehe ñi tsa cahnu cuví tsa tsaḡ un tsi yu, tyin cuñi un tsi yu nda ndi cumañi ca tsinu ñuhu ñayivi. ²⁵ Jutu Mañi yu, ra vaha cuví un, tan nyivi cuenda nu ñuhu ñayivi ña tsitó ñi tsi un, maa tyin yuhu tsitó yu tsi un. Tan ra nyicún tsi yo ihya tsitó ra naha tyin maa un jaquitsi tsi yu. ²⁶ Tsa caḡan yu tsihin ra naha yóo ra cuví un, tan cua caḡan nyico tucu yu inga tsaha, tyin tumaa cuḡa cuñi un tsi yu, tacan cua cuñi tahan ra naha tsi ra naha. Tan yuhu cunyaa yu añima ra naha.

18

Nu cua tyihi ra Israel naha ra tsi ra Jesús vehe caa

(Mt. 26.47-56; Mr. 14.43-50; Lc. 22.47-53)

¹ Tsa yahḡ tsa caḡan ra Jesús yacan, tacan tan cuahán ra tsihin ra tsicá tsihin ra inga tsiyo yutya Cedrón. Tan ican iyó iin cora yutun tata. Tan ican quihvi ra Jesús tsihin ra tsicá tsihin ra. ² Tan ra Judas, ra tsa xico tsi ra, tsitó ra nu cuahán ra Jesús tyin ican tuhvá ra Jesús tsaahán tsihin ra tsicá tsihin ra. ³ Tan ican tsaḡ ra Judas tsihin andaru cuaha tan cuaha ra vitya cuenda vehe ñuhu tsa jacuhun ra cuví ityi nuu tsihin jutu naha ra tan ra cuví fariseo naha ra. Tsaḡ ra naha ican, nyisó ra naha mityi, tan nyisó ra naha lámpara tan ñuhu yiti. ⁴ Tan ra Jesús tsa tsitó maa ra tandihi tsa cua tahan ra. Quita ra tan tsicḡ tuhun ra tsi ra naha:

—¿Yóo nanducú ndo? —catyi ra.

⁵ Tan catyi ra naha tsihin ra:

—Ra Jesús ra ñuu Nazaret.

Tan catyi ra Jesús:

—Yuhu cuví —catyi ra.

Tan ra Judas, ra tsa xico tsi ra Jesús tsi nu xaan iñi tsi ra nahnu, nyii ndihi ra tsihin ra naha. ⁶ Cuhva tsa caḡan ra Jesús: “Yuhu cuví”, tandihi ra naha nacacḡ tsata ra naha tan nduḡa ra naha nu ñuhu. ⁷ Tacan tan tsicḡ tuhun nyico ra Jesús tsi ra naha inga tsaha, tan catyi ra:

—¿Yóo nanducú ndo?

Tan catyi ra naha:

—Ra Jesús ra ñuu Nazaret.

⁸ Tan catyi ra Jesús:

—Tsa caḡan yu tsihin ndo tyin yuhu cuví. Tatun yuhu nanducú ndo, jaña ndo tsi ra tsicá tsihin yu naha ra na cunuhun ra naha —catyi ra Jesús tsihin ra naha.

⁹ Yacan caḡan ra Jesús tyin na cundaa tsa caḡan ra nda ityi tsata ca nu catyi ra: “Ra tsa tsaḡ Jutu yu tsi yu, ndi intuhun ra naha

tan ña tsinaá ra naha.” ¹⁰ Tacan tan tava ra Simón Pedro mityi tsa ndahá ra tan tsaḡnya ra soho cuaha iin ra tsa nañi Malco. Ra ican cuví musu ra jutu tsaahnu tsa cuví ityi nuu tsihin ra jutu naha ra. ¹¹ Maa tyin ra Jesús catyi ra tsihin ra Pedro:

—Natyihí mityi un tsitsi vena un. Tatun Nyoo Jutu yu tan cuñi ra tsa nyehe yu tundo, taahán tsi tsa nyehe yu can —catyi ra Jesús tsihin ra.

Nu tsindacḡ ra naha tsi ra Jesús nuu ra cuví ityi nuu tsihin jutu naha ra

(Mt. 26.57-58; Mr. 14.53-54; Lc. 22.54)

¹² Tacan tan andaru can tsihin capitán ra naha, tan vitya cuenda vehe ñuhu naha ra, tñin ra naha tsi ra Jesús, tan tsaññi ra naha tsi ra, ¹³ tacan tan tsindacḡ ra naha tsi ra yuvehe ra Anás, tyin ra Anás can tyiso ra Caifás cuví tsi ra. Tan cuiya can ra Caifás can cuví ra jutu tsaahnu cuví ityi nuu tsihin jutu. ¹⁴ Ra Caifás can cuví ra tsa caḡan tsihin ra cuví ityi nuu tsihin nyivi Israel naha ra tyin vaha ca tsa cúu intuhun ñi rayii tsa cuenda tandihi nyivi ñuu.

Nu caahán ra Pedro tyin ña nacotó ra tsi ra Jesús

(Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro tan inga ra tsa tsicḡ tsihin ra Jesús, nyicún ra naha tsi ra Jesús nu cuahán ra nuquehe yuvehe ra Anás, ra jutu tsaahnu cuví ityi nuu tsihin jutu. Tan nacotó ra jutu can tsi inga ra can. Yacan cuenda quihvi ra can tsihin ra Jesús nuquehe ra jutu can. ¹⁶ Maa tyin ra Pedro ndoo ra ityi tsata vehe. Yacan cuenda quita ra tsa nacotó ra jutu can, tan caḡan ra tsihin ñaha tsa nyaá yuvehe can. Tan jayahḡ ra tsi ra Pedro ityi tsitsi nuquehe can. ¹⁷ Tacan tan ñaha tsa nyaá yuvehe can tsicḡ tuhun ña tsi ra Pedro, tan catyi ña:

—¿A ñavin yooho cuví iin ra tsicḡ tsihin ra can?

Tan catyi ra Pedro:

—Ñavin. Ñavin yu cuví —catyi ra tsihin ña.

¹⁸ Tacan tan ra cuví musu tan ra vitya naha ra tsa yucú ican, jataḡan ra naha ñuhu tyin vitsin xaan. Tan nyecú nyityi ra naha tuñu ra naha ñuhu. Tan nyii ndihi tucu ra Pedro tuñu ra ñuhu tsihin ra naha ican.

Nu janahma ra jutu tsaahnu tsi ra Jesús

(Mt. 26.59-66; Mr. 14.55-64; Lc. 22.66-71)

¹⁹ Tacan tan ra jutu tsaahnu can quitsaha tsicá tuhun ra tsi ra Jesús yoo ra cuví ra tsicá tsihin ra, tan náa jacuahá ra tsi nyivi. ²⁰ Tan catyi ra Jesús tsihin ra:

—Yuhu nuu tandihi nyivi caḡan yu. Tan jacuahḡ yu tsi ñi tsitsi vehe ñuhu ñuu tan ñuu tan tsitsi vehe ñuhu cahnu ñuu ihya nu tuhvá

tandihí nyívi Israel ndu iin. Tan nduve nu caħan xeehe yu. ²¹¿Nacuenda tsicá tuhun un tsi yuhu? Vaha ca ndaça tuhun un tsi nyívi tsa tsiñi tsa caħan yu, tan maa ñi cua catyi tuhun náa caħan yu tsihin ñi tyin maa ñi tsitó náa caħan yu —catyi ra Jesús tsihin ra.

²²Cuhva tsa caahán ra Jesús yacan, tan iin vitya vehe ñuhu tsa yucu ican, cañi ra iin tsiyo nuu ra Jesús tan catyi ra:

—¿A tacan taahán tsi nacahan un nu caahán ra jutu tsaahnu cuví ityi nuu? —catyi ra tsihin ra Jesús.

²³Tan catyi ra Jesús:

—Tatun caħan yu iin tsa ña vaha, caħan tsihin yu nda tsa ña vaha caħan yu. Maa tyin tatun caħan yu tsa vaha, ¿nacuvi tyin cañi un tsi yu? —catyi ra Jesús tsihin ra can.

²⁴Yaha can tan nuuhñi ra Jesús, tan jacuhun ra Anás tsi ra nu nyaá ra Caifás, ra jutu tsaahnu cuví ityi nuu tsihin jutu [cuiya can].

Nu caahán nyico ra Pedro inga tsaha tyin ña nacotó ra tsi ra Jesús

(Mt. 26.71-75; Mr. 14.66-72; Lc. 22.58-62)

²⁵Tan nyaá nyityi ra Pedro tuñu ra ñuhu. Tan catyi ra ñaha tsihin ra:

—¿A ñavin yooho cuví iin ra tsicá tsihin ra can? —catyi ra ñaha tsihin ra.

Tan ra Pedro tyihí xeehe ra, tan catyi ra:

—Ñavin. Ñavin yu cuví —catyi ra.

²⁶Tacan tan iin ra cuví musu ra jutu tsaahnu cuví ityi nuu tsihin jutu, iin ra tsa cuví nyívi ra tsa tsahnya ra Pedro soho, quitsaha tsicá tuhun ra tsi ra tan catyi ra:

—¿Atu ñavin un cuví tsa nyehe yu tsihin ra can tsitsi cora yutun tata can? —catyi ra tsihin ra Pedro.

²⁷Tan tyihí xeehe nyico ra Pedro inga tsaha. Juvín ñi cuhva can tan navacu ñi iin tsitooho.

Nu cutuñi ra Jesús nuu ra Pilato

(Mt. 27.1-2, 11-14; Mr. 15.1-5; Lc. 23.1-5)

²⁸Yaha can tan quita ra ñaha tsihin ra Jesús yuvehe ra Caifás tan tsindaca ra ñaha tsi ra vehe tyiñu ra ndacá ñaha. Tsa cua cunditsin tan ra Israel ña quihvi ra ñaha tsitsi vehe tyiñu can tyin ñavin vehe nyívi Israel cuví can. Tyin ica tsa quihvi ñi Israel vehe ndavaha ñi tyin coto ña cua cuví cuxiñi ñi quivi vico pascua. ²⁹Yacan cuenda quita ra Pilato tyin cahan ra tsihin ra ñaha, tan catyi ra:

—¿Náa cuatyí tyaá ndo siqui ra ihya? —catyi ra Pilato tsihin ra cuví ityi nuu tsihin nyívi Israel ñaha ra.

³⁰Tan nacahañ ra Israel ñaha ra tan catyi ra ñaha:

—Tun tsatyin ñavin iin ra iyó cuatyí cuví ra, ña cua cuhva cuenda ndí tsi ra tsi un —catyi ra ñaha tsihin ra Pilato.

³¹Tacan tan catyi ra Pilato tsihin ra ñaha: —Quihin ndo tsi ra, tan tatsi tuñi ndo tsi ra tumaa catyi maa ley ndo.

Tan nacahañ ra Israel can ñaha ra tan catyi ra ñaha:

—Maa tyin nyuhu nyívi Israel nduve ndatu iyó tsi ndi tsa cañi ndi tsi nyívi —catyi ra ñaha.

³²Tacan cundaça tsa caħan ra Jesús nácaa cua cúu ra. ³³Yaha can tan quihvi nyico ra Pilato tsitsi vehe tyiñu can inga tsaha. Tan cana ra tsi ra Jesús tan tsicá tuhun ra tsi ra:

—¿A yooho cuví rey cuenda nyívi Israel? —catyi ra tsihin ra.

³⁴Tan catyi ra Jesús:

—¿A tsa cuñi ñi maa un tsicá tuhun un tsehe tsi yu o iyó inga nyívi natyuhu tsi un cuhva caħan un tsihin yu? —catyi ra Jesús tsihin ra Pilato.

³⁵Tan catyi ra Pilato:

—Ñavin ra ñuu Israel cuví yuhu. Juvín ñi maa ra ñuu maa un ñaha ra tan ra cuví ityi nuu tsihin jutu ñuu maa un cuví ra tsaha cuenda tsi un tsi yu. ¿Náa javaha un? —catyi ra tsihin ra Jesús.

³⁶Tacan tan nacahañ ra Jesús tan catyi ra:

—Nu ndacá ñaha yu ñavin cuenda nu ñuhu ñayivi ihya cuví tsi. Tun tsatyin ndacá ñaha yu nu ñuhu ñayivi ihya, ra nyicún tsi yu cañi tahan ra ñaha tyin tacan tan yoñi cua cuhva cuenda tsi yu ndaha ra Israel ñaha ra. Maa tyin nu ndacá ñaha yu, ñavin cuenda ihya cuví tsi —catyi ra Jesús tsihin ra Pilato.

³⁷Tacan tan catyi ra Pilato tsihin ra:

—¿Tun tacan, rey cuví maa un? —catyi ra Pilato tsihin ra Jesús.

Tan nacahañ ra Jesús tan catyi ra:

—Rey cuví yu tumaa tsa caahán maa un. Yacan cuenda cacu yu tan vatsí yu nu ñuhu ñayivi ihya, tyin cahan yu tsa nditsa. Tandihí nyívi tsa tyaá yahvi tsa nditsa, tyaá soho ñi tsa caahán yu —catyi ra Jesús.

³⁸Tan catyi ra Pilato tsihin ra:

—¿Tan náa cuví tsa nditsa? —catyi ra.

Tsa yaha tsa tsicá tuhun ra Pilato yacan, quita ra tsicahañ nyico ra tsihin ra Israel ñaha ra inga tsaha tan catyi ra:

—Yuhu ña nañihi maa yu ndi intuhun cuatyí ra ihya.

Nu cua cañi ra ñaha tsi ra Jesús

(Mt. 27.15-31; Mr. 15.6-20; Lc. 23.13-25)

³⁹Maa tyin nyooho iyó ndo tuhun tsa tsicán ndo na tava yu tsi iin ra nyii vehe caa tsa iyó vico pascua ihya. ¿A cuñi ndo tava yu tsi ra tsa cuví rey cuenda ndo tsa cuví ndo nyívi Israel? —catyi ra Pilato tsihin ra ñaha.

⁴⁰Tacan tan quitsaha cana tsaa tandihí ra ñaha tan catyi ra ñaha:

—¡Ña tava un tsi ra can! ¡Tava tsi ra Barrabás! —catyi ra ñaha.

Tan ra Barrabás can cuví ra iin ñasuhu.

19

¹ Tacan tan quihñin ra Pilato tsi ra Jesús tan tava tyiñu ra na cañi andaru tsi ra. ² Tan andaru can javaha ra naha iin corona iñu tan tyihñi ra naha jiñi ra Jesús. Tan jacunditsi ra naha iin jahma tunduuhva tsi ra, tahan tsa tuhvá ra cuví rey tsinditsí. ³ Tacan tan natuhvá ra naha nu nyáá ra tan caahán nyaa ra naha tsi ra, tan catyí ra naha:

—¡Nacumi tsi un yooho Rey cuenda nyivi Israel! —catyí ra naha, tan cañi ra naha nuu ra.

⁴ Tacan tan quita nyico ra Pilato inga tsaha tan catyí ra tsihin ra naha:

—Nyehe ndo tyin cua tava yu tsi ra ityi nuu ndo tyin nyehe ndo tyin ndi iin cuatyí ra ña nañihí yu —catyí ra Pilato tsihin ra naha.

⁵ Tan quita ra Jesús yihí corona iñu jiñi ra, tan nditsi ra jahma tunduuhva can. Tacan tan catyí ra Pilato tsihin ra naha:

—¡Ma ra nyaá ihya! —catyí ra tsihin ra naha.

⁶ Cuhva tsa nanyehé ra cuví ityi nuu tsihin jutu naha ra tan ra vitya naha ra tsi ra, quit-saha caná tsaa ra naha tan catyí ra naha:

—¡Tyaa tsi ra nu cruu na cúu ra! —catyí ra naha.

Maa tyin catyí ra Pilato tsihin ra naha:

—Quihñin ndo tsi ra tan cãhñi maa ndo tsi ra nu cruu tyin yuhu ndi intuhun cuatyí ra tan ña nañihí yu.

⁷ Maa tyin nacahan ra Israel can naha ra tan catyí ra naha:

—Iyó iin ley tsi ndi, tan cuhva catyí ley ndi, cuñí tsi tsa cúu ra tyin jahá ra tsa Sehe Nyoo cuví tsi ra —catyí ra naha.

⁸ Tsa tsiñi ra Pilato yacan, tan nayuhvi xaan ca ra. ⁹ Tan quihvñi nyico ra inga tsaha tsitsi vehe tyiñu, tan tsicã tuhun ra tsi ra Jesús:

—¿Nu maa quee yooho? —catyí ra tsihin ra.

Maa tyin ra Jesús ña nacahan maa ra.

¹⁰ Tacan tan catyí ra Pilato tsihin ra:

—¿Nacuenda ña caahán un tsa caahán yu? ¿A ña tsitó un tyin ra cumi tyiñu cuví yu tan iyó ndatu tsi yu tsa tyaa yu tsi un nu cruu, tan iyó tucu ndatu tsi yu tsa tava nuña yu tsi un? —catyí ra Pilato tsihin ra Jesús.

¹¹ Tan nacahan ra Jesús tan catyí ra:

—Tun tsatyin ña tsahã Nyoo tyiñu can tsi un, nduve ndatu cua coo tsi un tsa tatsi tuñi un tsi yu. Yacan cuenda, ra tsa quitsi ndaca tsi yu ndaha un, cahnu ca cuatyí ra can naha ra iyó tan ñavin ca yooho —catyí ra Jesús tsihin ra Pilato.

¹² Tsa ndihí cahan ra Jesús yacan, tan quitsahã nducú ra Pilato cuhva jaña ra tsi ra, maa tyin ra Israel caná tsaa ra naha tsata ra, tan catyí ra naha:

—¡Tatun jaña un tsi ra, ñavin amigo ra César, ra cuví rey cahnu, cuví tsi un! Tyin tandihí ra tsa caahán tyin rey cuví ra naha, ra xaan iñi tsi rey cahnu cuví ra naha —catyí ra naha.

¹³ Tacan tan tsa tsiñi ra Pilato yacan, tava tyiñu ra na quita ra Jesús ityi tsata vehe. Tan tsinyaa ra Pilato nu nañi Gabata nu tuhvá ra jandaá cuatyí nyivi. Tan tsihin yuhu hebreo cuñí tsi catyí: “Nu canyii yuu”. ¹⁴ Tan cuví tsi iin quivi tsa ndi cumañi ca coo vico pascua, cuhva tsa cua tahan hora. Tacan tan catyí ra Pilato tsihin ra Israel can naha ra:

—¡lhya nyaá rey ndo!

¹⁵ Maa tyin canã tsaa ra Israel naha ra tan catyí ra naha:

—¡Na cúu ra! ¡Na cúu ra! ¡Tyaa tsi ra nu cruu! —catyí ra naha.

Tan catyí ra Pilato tsihin ra naha:

—¿A tyaa yu tsi ra cuví rey ndo nu cruu?

Maa tyin ra cuví ityi nuu tsihin jutu catyí ra naha:

—Yofi ca rey iyó. Intuhun ñi maa ra César, ra cuví rey cahnu —catyí ra naha.

¹⁶ Tacan tan tsahã cuenda ra Pilato tsi ra Jesús tsi ra naha na tyaa ra naha tsi ra nu cruu. Tan quihñin andaru tsi ra, cuahán ra tsihin ra naha.

Nu tsihi ra Jesucristo nu cruu

(Mt. 27.32-44; Mr. 15.21-32; Lc. 23.26-43)

¹⁷ Tan nyisó ra Jesús cruu ra, cuahán ra iin nu nañi: “Yiqui Jiñi Ndiyi”. Tan tsihin yuhu hebreo nañi tsi Gólgota. ¹⁸ Ndacan tyaa ra naha tsi ra nu cruu tsihin nduyu. Tan tyaa ra naha uvi taahan ca ra naha xiin ra. Ticaã ra naha iin ra nu cruu tsa nyaá tsiyo cuaha ra. Tan inga ra tyaa ra naha tsiyo satyin ra. Tan ticaã ra naha tsi ra Jesús mahñu. ¹⁹ Tan tava tyiñu ra Pilato na cunyaa letra jiñi cruu can. Tan catyí tsi tyehen: “Ra Jesús ra ñuu Nazaret, Rey cuenda nyivi ñuu Israel.” ²⁰ Tan cuaha nyivi Israel cahvi ñi tsa caahán can, tyin yatyin ñi ñuu ñi cuví nu tsaquinyaa ra naha cruu ra Jesús. Tan nyaá letra can tsihin yuhu hebreo, tan yuhu griego, tsihin yuhu latin. ²¹ Yacan cuenda ra cuví ityi nuu tsihin jutu cahan ra naha tsihin ra Pilato:

—Ña tyaa un: “Rey cuenda nyivi ñuu Israel”, vaha ca tyaa un: “Ra ihya catyí ra tyin rey cuenda nyivi ñuu Israel cuví ra” —catyí ra naha.

²² Maa tyin catyí ra Pilato:

—Tsa tsa yaha tyaa yu, nandoo maa tsi tacan —catyí ra tsihin ra naha.

²³ Tsa yaha tyaa ra andaru can naha ra tsi ra Jesús nu cruu, naquihñin ra naha jahma ra. Tsa cumi taahan ra naha quihñin luxu luxu jahma ra. Tan ndoo jahma ra tsa quicú

cañi ñi tsa tsindasí ra. ²⁴ Tan andaru can natuhún tahan ra naha:

—Ña cua cahnya yo itsi. Jasiqúi suuhva jihna yo na nyehe yo yóo cua jaha canaa jahma can —catyí ra naha.

Tacan cuvî tumaa caahán nu tutu Nyoo nu catyí tsi tyehen: “Tsatsá tahan ra naha luxu luxu jahma yu tan jasiqúi suuhva ra naha tsihin tsi, nyehe ra naha yóo ra jaha canaa itsi.” Tan yacan cuvî tsa javahá ra andaru can naha ra.

²⁵ Tan nyáá síhi ra Jesús yatyin ñi nu nyaá cruu ra. Tan nyaá tucu tahan ña, tan ña María ñasihi ra Cleofas, tan ña María quee ñuu Magdala. ²⁶ Tan nanyehé ra Jesús tsi síhi ra, nyaá ña yatyin ñi. Tan nanyehé tucu ra tsi ra tsa tsicá tsihin ra, ra tsa cuñí xaan ra. Tan catyí ra tsihin síhi ra:

—Miya, va ra sehe un nyaá tsihin un juvin —catyí ra.

²⁷ Tacan tan catyí ra tsihin ra tsa cuñí xaan ra:

—Tsaa, va síhi un nyaá tsihin un juvin —catyí ra tsihin ra.

Nda quivî can tan quihîn ra tsi ña, cuahan tsihin ra yuvehe ra. Tan jahá cuenda ra tsi ña.

Nu tsihi ra Jesús

(Mt. 27.45-56; Mr. 15.33-41; Lc. 23.44-49)

²⁸ Tsa yahá yacan, tsa nyehe ra Jesús tyin tsa ndihî tyiñu jahá ra. Tacan tan catyí ra:

—Na ityi iñi yu —catyí ra.

Tan tsihin yacan cundaá tsa nyaá nu tutu Nyoo nu caahán tsi náca cua cúu ra.

²⁹ Tan ican nyaá iin quiyî nu yihî vinu iya. Tacan tan jatyiî ra naha tsa cuvî yahma tumaa caa catyí tsihin vinu iya can. Tan tyaa ra naha yacan nu iin yutun hisopo. Tan jandaá ra naha tan tyanaá ra naha can yuhu ra. ³⁰ Tsihi ra Jesús vinu can tan catyí ra:

—Tsa iyó vaha tandihî vityin —catyí ra.

Tacan tan nacañi nuu ra jiñi ra tan tsihi ra.

Nu tutsî ra andaru yoco xaan yiqui naha ra Jesús

³¹ Tsa ndi cumañi intuhun ña quivî tan tahan tsi quivî vico cahnú pascua, tan ra cuvî ityi nuu tsihin nyivî Israel ña cuñí ra naha tsa ndoo cuñu ñuhu ra tsa tsihi can naha ra nu cruu quivî quitatú, tyin quivî quitatú, quivî ii cuvî tsi tsa cuenda ra naha. Yacan cuenda tsicán ra naha tumañi iñi tsi ra Pilato na tava tyiñu ra na cahnú andaru síhin ra tsa ticaa nu cruu can naha ra, tyin tacan tan numi ñi cúu ra naha, tan jatsiyo ra naha cuñu ñuhu ra naha. ³² Tacan tan cuahán andaru nu nyecú cruu can. Tan tsahnú ra naha síhin iin ra ticaá iin tsiyo xiin ra Jesús. Tan tsahnú nyico ra naha síhin inga ra tsa ticaa inga tsiyo xiin ra. ³³ Maa tyin cuhva tsa natuhvá ra naha nu ticaá ra Jesús,

nyehé ra naha tyin tsa tsihi maa ra. Yacan cuenda ña tsahnú ca ra naha síhin ra.

³⁴ Maa tyin iin andaru can tutsî ra yoco xaan yiqui naha ra Jesús. Tan quitá ñiñi tan ndutya. ³⁵ Ra tsa nacatyí tuhun yacan, ra tsa nyehe vaha cuvî ra. Tan tsa nditsa caahán ra, tyin maa ra tsitó tyin tsa nditsa caahán ra, tacan tan tsinu ndihi tucu iñi nyooho. ³⁶ Tacan cuvî tyin tacan tan cundaá tsa catyí tuhun Nyoo nu catyí tsi: “Ndi intuhun yiqui ra tan ña tahnu.” ³⁷ Tan iyó inga nyico nu catyí tsi nu tutu Nyoo tyehen: “Cua nyehe nyivî tsi ra tsa tutsî ra naha yoco xaan.”

Nu quihvi ñuhu ra Jesús

(Mt. 27.57-61; Mr. 15.42-47; Lc. 23.50-56)

³⁸ Tsa yahá yacan, ra José ra ñuu Arimatea tsicán ndatu ra tsi ra Pilato na cuhva ra tsa naquihin ra cuñu ñuhu ra Jesús. Tan ra José can cuvî ra iin ra yihî cuenda ra Jesús vasu tsa xeehe ñi tsa cuenda tsa yuuhví ra tsi ra cuvî ityi nuu tsihin nyivî Israel. Tacan tan tsahá ra Pilato ndatu tsi ra, tan tsahan ra José tsinaquihîn ra cuñu ñuhu ra Jesús. ³⁹ Tsahan ndihi tucu ra Nicodemo, ra tsa tsahan tsicahán tsihin ra Jesús tsa tsa cuaa. Tsaá ra tsihin ndutya tami. Tan iin ndutya tami tsa nañi mirra nasacá nuu tsihin inga tsa nañi áloe. Tan quitá tsi tumaa oco utsi kilu tsa tandihî tsi. ⁴⁰ Tacan tan ra José tsihin ra Nicodemo quihîn ra naha cuñu ñuhu ra Jesús tan cavá nuu ra naha tsi ra tsihin jahma cuñi tsa tyihî ra naha ndutya tami can, tumaa iyó maa nyivî Israel tun cua cutsi ñi ndiyî tsitsi ñuhu. ⁴¹ Yatyin nu tsahñi ra naha tsi ra Jesús nu cruu iyó iin cora yutun tata. Tan tsitsi cora can nyaá iin ñaña tsaa nu ñaha ca cuyucu ndi intuhun ndiyî. ⁴² Ican ñi tinyiî ra naha cuñu ñuhu ra Jesús tyin yatyin ñi nyaá ñaña can tan tsa cua tahan tsi quivî quitatú nyivî Israel.

20

Nu nandotó ra Jesús

(Mt. 28.1-10; Mr. 16.1-8; Lc. 24.1-12)

¹ Tsa naa ca tsa cuvî tumingu, ña María quee ñuu Magdala tsahan ña nu ñaña ra Jesús. Tan nyehe ña tyin nduve ca yuu ndasí yuhu ñaña can. ² Tacan tan tsinú xaan ña cuahán ña nu nyií ra Simón Pedro tan inga ra tsicá tsihin ra Jesús, ra tsa cuñí xaan ra Jesús. Tan catyí ña tsihin ra naha:

—Quihîn nyivî cuñu ñuhu Jutu Mañi yo tsitsi ñaña, tan ña tsitó yo nu maa tsindacá ñi itsi —catyí ña María tsihin ra Pedro tan tsihin inga ra can.

³ Tacan tan ra Pedro tan inga ra can cuahán ra naha nu ñaña. ⁴ Tan cuahán nduvi taahan ra naha iin caa ñi, tsinú ra naha. Maa tyin ñihi ca tsinú inga ra can tan ñavin ca ra Pedro, jihna ca ra can tsaá nu

ñaña. ⁵ Quitsaha nyehé ihñi ra tsitsi ñaña, tan nyehe ra jahma cuiñi tsa cava nuu cuñu ñuhu ra Jesús, canyí can. Maa tyin ña quihví ra tsitsi ñaña. ⁶ Yahá can tan tsaá ndihi ra Simón Pedro tsata ra, tan ra ican quihví ra tsitsi ñaña can. Juvín ñi nyehe ndihi ra can jahma can canyí tsi. ⁷ Tan juvín ñi nyehe ndihi ra tyin jahma tsa tsindasi jiñi ra Jesús, ña iin ñi nu canyí can tsihin inga jahma can, yihí tahuu can tan cayucú sñn can. ⁸ Tacan tan quihví ndihi inga ra tsicá tsihin ra Jesús can, ra tsa tsaá tsa jihna nu ñaña can. Tan nyehe ra tsa cuví can, tan tsinuñi ra. ⁹ Tyin tsa jihna, ña cutuñiñi ra naha tsa caahán nu tutu Nyoo, tyin ra Jesús cuñi tsi tsa nandoto ra tsa yaha cúu ra. ¹⁰ Tacan tan cuanuhu ra tsicá tsihin ra Jesús nda yuvehe ra naha.

Nu quituví ra Jesús nuu ña María queé ñuu Magdala

(Mr. 16.9-11)

¹¹ Maa tyin tsa tsaá nyico ña María, ndoo ña nyaá ña tsacú xaan ña ityi tsata ñaña can. Tan tsitsi tsa tsacú ña, nyehe ihñi ña tsitsi ñaña can. ¹² Tan nyehe ña uvi taahan ángel nditsí ra naha jahma cuitsin, nyecú ra naha nu tsicava cuñu ñuhu ra Jesús. Iin ra nyaá ityi nu tsicava jiñi ra, tan inga ra nyaá ityi nu tsicava tsaha ra. ¹³ Tan tsicá tuhun ra ángel can naha ra tsi ña tan catyí ra naha:

—¿Nacuví tsacú xaan un?

Tan catyí ña:

—Tsacú maa yu tyin quihñin nyivi tsi Jutu Mañi yu, tan ña tsitó yu nu maa tinyí ñi tsi ra —catyí ña tsihin ángel can.

¹⁴ Ndi caahán ca ña yacan, tan nanyico coo ña tan nyehe ña tsi ra Jesús ican. Maa tyin ña tsitó ña tatun ra Jesús cuví ra. ¹⁵ Tacan tan tsicá tuhun ra Jesús tsi ña:

—¿Nacuenda tsacú un? ¿Yóo nanducú un? —catyí ra tsihin ña.

Cuñi maa ña tyin ra jahá cuenda cora yutun tata can cuví ra. Tan catyí ña:

—Tatta, tatun yooho quihñin tsi ra Jesús, cahan tsihin yu nu maa tsindaca un tsi ra, tyin cunaquihñin yu tsi ra —catyí ña tsihin ra.

¹⁶ Tacan tan catyí ra Jesús tsihin ña:

—¡María! —catyí ra tsihin ña.

Tan nanyehe ña tan cahan ña tsihin ra tsihin yuhu hebreo, tan catyí ña:

—¡Raboní! —Tan cuñi tsi catyí can: “Mae-tro”.

¹⁷ Tan catyí ra Jesús tsihin ña:

—Ña tñin un tsi yu, tyin ñaha ca cahun yu nu nyaá Jutu yu. Maa tyin cúaahan tan cahan un tsihin tandihí yañi yu tyin cuahan yu nu nyaá Jutu yu, tan juvín ñi Jutu ndihi ndo cuví tsi ra. Cuahan yu nu nyaá Nyoo yu, tan juvín ñi Nyoo ndo cuví tsi ra —catyí ra Jesús tsihin ña.

¹⁸ Tacan tan tsahan ña María ñuu Magdala can tsijacotó ña tsi ra tsicá tsihin ra Jesús

tyin nyehe ña tsi ra tan cahan ra yacan tsihin ña.

Nu quituví ra Jesús nuu ra tsicá tsihin ra
(Mt. 28.16-20; Mr. 16.14-18; Lc. 24.36-49)

¹⁹ Juvín ñi maa quivi can nu quitsaha vitya, tsa cua cuaa tan ndu ijin ra tsicá tsihin ra Jesús. Tan ndasi vaha yuvehe nu yucú ra naha tsa cuenda tsa yuuhví ra naha tsi ra cuví ityi nuu tsihin nyivi Israel. Tan ra Jesús quituví ra tan tsinyaa nyityi ra mahñu ra naha. Tan tsahá ra nacumí tsi ra naha, tan catyí ra:

—Na coo tsa taxin añima ndo —catyí ra.

²⁰ Tsa yahá tsa cahan ra yacan tan janahá ra ndaha ra tan xiin ra tsi ra naha. Tan ra ican naha ra sñi xaan cuñi ra naha tsa nyehe ra naha tsi Jutu Mañi yo. ²¹ Tan catyí nyico ra Jesús inga tsaha tsihin ra naha:

—Na coo tsa taxin añima ndo. Tumaa tsa tava Jutu yu tyiñu tsi yu, tacan tava nyico tucu yuhu tyiñu tsi nyooho —catyí ra tsihin ra naha.

²² Tacan tan tiví ra tsi ra naha tan catyí ra tsihin ra naha:

—Naquihñin ndo Tatyí Ii Nyoo. ²³ Nyivi tsa jahá ndo tucahnu iñi, iyó tucahnu iñi tsi ñi. Tan nyivi tsa ña jahá ndo tucahnu iñi, nduve tucahnu iñi iyó tsi ñi —catyí ra Jesús tsihin ra naha.

Nu nyehe ra Tomás tsi Jutu Mañi yo tsa yaha nandoto ra

²⁴ Maa tyin ra Tomás, iin rq tsicá tsihin ra Jesús, ra tsa catyí ñi: “ra tinihi”, yoñi ra nyii tsihin ra naha tsa tsahan ra Jesús. ²⁵ Yahá can tan nacatyí tuhun ra tsicá tsihin ra Jesús tsihin ra:

—Nyehe ndi tsi Jutu Mañi yo —catyí ra naha tsihin ra.

Maa tyin ra Tomás catyí ra:

—Tun ña nyehe yu ndaha ra nu caahví nu quihví nduyu, tan ña cuaxin yu nundaha yu nu yihí nduyu can, tan ña cuaxin yu ndaha yu yiqui naha ra, ña cua tsinu iñi yu —catyí ra Tomás.

²⁶ Tsa yahá una quivi yucú nyico ra tsicá tsihin ra Jesús tsitsi iin vehe. Tan nyii ra Tomás tsihin ra naha. Tacan tan vasu ndi maa ndasi vaha yuvehe, maa tyin ra Jesús quihví ra tan tsinyaa nyityi ra mahñu ra naha. Tan tsahá ra nacumí tsi ra naha tan catyí ra:

—Na coo tsa taxin añima ndo.

²⁷ Tacan tan quitsaha catyí ra tsihin ra Tomás:

—Cuaxin nundaha un nu caahví ndaha yu ihya. Tan cuaxin ndaha un yiqui naha yu. Tan ña cuví un ra ndava iñi. Tsinu iñi —catyí ra Jesús tsihin ra Tomás.

²⁸ Tacan tan nacahan ra Tomás tan catyí ra:

—Jutu Mañi yu! ¡Tan Nyoo yu! —catyí ra Tomás.

²⁹ Tan catyí ra Jesús tshin ra:

—Yooho Tomás, vityin tsinú iñi un tyin nyehé un tsi yu. Sií ca cuñi nyivi tsa nduve tsa nyehé tan tsinú iñi ñi —catyí ra Jesús tshin ra Tomás.

Nu jacoto ra Juan nacuenda tsinu libru ihya

³⁰ Cuaha ca tsa iyo javaha ra Jesús nuu ra tsica tshin ra, maa tyin ña tandihi tsi nyaá nu libru ihya. ³¹ Tsinyaa tsa nyaá tyin tacan tan tsinu iñi ndo tyin ra Jesús cuví ra Cristo, ra cuví Sehe Nyoo, tan coo ndo ñayivi nyitó tsa ña cua naa maa.

21

Nu quituvi ra Jesús nuu utsa taahan ra tsica tshin ra

¹ Tsa yaha can tan quituvi ra Jesús nuu ra tsica tshin ra inga tsaha. Tyehen quituvi ra yatyin ñi yuhu miñi Tiberias: ² Iin ñi nu yucú ra Simón Pedro tan ra Tomás tsa nañi: “ra tñihí”, tan ra Natanael, ra ñuu Caná nu cuví Galilea. Tan yucú ndihi sehe ra Zebedeo naha ra tan uvi taahan ca ra tsica tshin ra Jesús. ³ Tan catyí ra Simón Pedro tshin ra naha:

—Cuahan yu cua tñin yu tyaca —catyí ra.

Tan catyí ra naha tshin ra:

—Cuhun ndihi ndi tshin un —catyí ra naha.

Cuahán ra naha tan quihvi ra naha tsitsi iin yutun ndoo, maa tyin tsacuaa can ndi intuhun maa tyaca ña ñihí ra naha. ⁴ Tsa cuñi cunditsin tan quituvi ra Jesús nu nyiti yuhu miñi can. Maa tyin ra tsica tshin ra, ña nacotó ra naha tsi ra. ⁵ Tacan tan catyí ra tshin ra naha:

—Nyooho ra cuatyí, ¿a ñaha ca ñihi ndo tyaca?

Tan nacahañ ra naha tan catyí ra naha:

—Ñaha ca ñihi ndi.

⁶ Tacan tan nacahañ ra Jesús tan catyí ra:

—Cuaxin ndo traya ndo tsiyo cuaha yutun ndoo juven, tan cua ñihi ndo tyaca —catyí ra Jesús tshin ra naha.

Tacan ica ra naha. Yaha can tan ndacua ña cuví ca tava ra naha traya can nu ndutya, tsa cuenda tsa cuaha tyaca yihí tsitsi can. ⁷ Tan ra tsa cuñi xaan ra Jesús catyí ra tshin ra Pedro:

—Jutu Mañi yo cuví ra! —catyí ra tshin ra Pedro.

Tsa tsifí ra Simón Pedro tyin Jutu Mañi yo cuví ra, tsinditsi ra jahma ra, tyin tava ra can tsa cua tñin ra tyaca, tan quihvi ra cuahán ra tsitsi ndutya can. ⁸ Tan inga ra tsa tsica tshin ra Jesús tsaq ra naha nda yuhu miñi can tshin yutun ndoo, ixtá ra naha traya can tyin tsitu cuii can tshin tyaca,

tyin yatyin ñi yuhu miñi can yucu ra naha tumaa iin cientu metru ñi. ⁹ Tsa nuu ra naha nu ñuhu, nyehé ra naha iin nu cayú tuun ñuhu. Tan canyii iin tyaca tshin paan nuu tuun ñuhu can. ¹⁰ Tan catyí ra Jesús tshin ra naha:

—Ndaqa ndo taahan tyaca tsa ndi tñin ndo —catyí ra Jesús tshin ra naha.

¹¹ Tan ndaq ra Simón Pedro nu yutun ndoo tan quitsaha ixtá caa ra traya tyin tsitu cuii can yihí tyaca nahnu. Cientu uvi xico utsi uñi ti yihí tsitsi can. Tan vasu cuaha xaan ti, maa tyin ña taní traya can. ¹² Tacan tan catyí ra Jesús tshin ra naha:

—Ñaha ndo tyin curumusa ndo —catyí ra Jesús tshin ra naha.

Tan ndi intuhun ra tsica tshin ra, ña cana iñi ra naha ndaca tuhun ra naha yoo ra cuví ra tyin tsitó ra naha tyin Jutu Mañi yo cuví ra. ¹³ Tacan tan natuhva ra Jesús tan quihñin ra paan can, tan tsaha ra tsi ra naha. Tan juven ñi tacan ica ra tshin tyaca.

¹⁴ Yacan cuví nu tsinu uñi tsaha quituvi ra Jesús nuu ra tsica tshin ra tsa yaha nandoto ra.

Nu caahán ra Jesús tshin ra Simón Pedro

¹⁵ Tsa yaha tsa curumusa ra Jesús, tan tsica tuhun ra tsi ra Simón Pedro:

—Simón, sehe ra Jonás, ¿a cuñi ca un tsi yu tan ñavin ca ra ihya naha ra?

Nacahañ ra Pedro tan catyí ra:

—Tacan Jutu Mañi yu, maa un tsitó tyin cuñi yu tsi un —catyí ra Pedro.

Tan catyí ra Jesús tshin ra:

—Cuhva tsa catsi mbee nyihi jana yu —catyí ra Jesús tshin ra Pedro.

¹⁶ Tsica tuhun nyico ra Jesús tsi ra inga tsaha:

—Simón sehe ra Jonás, ¿a cuñi un tsi yu? —catyí ra Jesús tshin ra.

Nacahañ ra Pedro tan catyí ra:

—Jutu Mañi yu, maa un tsitó tyin cuñi yu tsi un —catyí ra Pedro tshin ra.

Tan catyí ra tshin ra:

—Jaha cuenda mbee jana yu —catyí ra Jesús tshin ra.

¹⁷ Tan tsinu uñi tsaha tsica tuhun nyico ra tsi ra:

—Simón, sehe ra Jonás, ¿a cuñi un tsi yu? —catyí ra Jesús tshin ra.

Cuhva tsa tsica tuhun ra tsi ra tsa tsinu uñi tsaha tatun cuñi ra tsi ra, ra Pedro nducui-ihya xaan cuñi ra, tan catyí ra tshin ra:

—Jutu Mañi yu, maa un tsitó nácaa añima yu tan maa un tsitó tyin cuñi yu tsi un —catyí ra.

Tan catyí ra Jesús tshin ra:

—Jaha cuenda mbee jana yu. ¹⁸ Tsa nditsa caahán yu tshin un tyin tsa ndi tyuvaa un tsinditsi maa un jahma un tan cuahán maa un nu cuñi un cuhun un. Maa tyin tatun

tsa tsahnu un, cua janacaa un ndaha un tan inga ra cua jacunditsi jahma un tsi un. Tan cua cundaca ra tsi un nu ña cuñí un cuhun un —catyí ra Jesús tsihin ra Pedro.

¹⁹ Tsa cahān ra Jesús yacan, cuñí ra cahan ra nácaa cua cúu ra Pedro tan cua jacahnu ra tsi Nyoo tacan. Yahā can tan catyí ra Jesús tsihin ra Pedro:

—¡Naha quitsi nyicun un tsi yu! —catyí ra tsihin ra.

Nu caahán ra Juan tuhun maa ra

²⁰ Tacan tan natsico coo ra Pedro tan nyehe ra tyin nyicún inga ra tsa tsicā tsihin ra Jesús tsi ra naha, ra tsa cuñí xaan ra Jesús. Juvín ra tsinyanaā tsi ra Jesús tsa cuxiñi ra quivi can. Tan tsicā tuhun ra tsi ra tan catyí ra: “Jutu Mañi yu, iyóo ra cua xico tsi un?” catyí ra, tsicā tuhun ra quivi tsa ndi cumañi ca cúu ra Jesús. ²¹ Cuhva tsa nyehe ra Pedro tsi ra, tsicā tuhun ra tsi ra Jesús:

—Jutu Mañi yu, tan ra ihya, ¿náa cua tahan ra? —catyí ra tsihin ra.

²² Nacahān ra Jesús tan catyí ra:

—Tatun cuñí maa yu tsa coo ra nda cuanda quitsi yu inga tsaha, ¿náa cuenda yooho? Cqhon yooho tsihin yu —catyí ra Jesús tsihin ra Pedro.

²³ Tacan tan iin yaha ñi tsinū tuhun ihya nu nyecú yañi yo tyin ra ican, ña cua cúu ra. Maa tyin ña catyí ra Jesús tsa ña cua cúu ra can. Tyin catyí ra: “Tatun cuñi yuhu tsa coo ra nda cuanda quitsi yu inga tsaha, ¿náa cuenda yooho?”

²⁴ Yuhu cuví ra can, ra tsa cahān ra Jesús tuhun. Tan nyehe yu tandihí cuii maa tsa cuví tan tyaā yu nu libru ihya. Yuhu tsitó yu tyin tandihí tsa tyaā yu, tsa nditsa caahán tsi.

²⁵ Iyó cuaha ca tsa javahā ra Jesús. Tun tsatyin tsicunyaā tandihí can nu libru, tsicá iñi yu tyin ndi ña cua cutahan can nani cahnú nu ñuhu ñayivi.

Tan na cuví tsi tacan ñi.

Tyiñu Tsa Javaha Ra Apóstol: Ra Tsa Tava Tyiñu Ra Jesucristo

Nu catyí ra Jesús tyin cua quitsi Tatyí Ii Nyoo

¹ Yooho Teófilo, quivi tsa jacuhun yu tutu tsa jihna ñi can tsi un, tyaá yu tandihi tsa quitsaha javahá ra Jesús tan tandihi tsa jacuahá ra nda quivi jihna ñi, ² tan nda quivi nandaá ra andivi. Tan tsa ndi cumañi ca nandaá ra andivi, nacatsi ra tsi ra apóstol cuenda ra. Tan tsihin tunyee iñi Tatyí Ii Nyoo tava tyiñu ra tsi ra naha tyin caca ra naha tyiñu ra. ³ Tan cuaha xaan tundoho nyehe ra Jesús tan tsihi ra. Tan tsa yaha tsa tsihi ra, nandoto ra tan quituvj ra nu yucú ra tsa tava tyiñu ra. Tan tsitsi tsa uvi xico quivi, cuaha xaan tsaha quituvj ra nu yucú ra naha, tyin na coto ra naha tyin nditsa tsa nyito ra. Tan cahan ra Jesús tsihin ra naha nácaa ndacá ñaha Nyoo tsi yo.

⁴ Tsa ndi nyii ra Jesús tsihin ra naha, tan catyí ra tsihin ra naha:

—Ña cua quita ndo Jerusalén ihya, nda cuanda naquihin ndo tsa catyí Jutu yu tyin cuhva ra tsi ndo, tumaa tsa cahan yu tsihin ndo quivi can. ⁵ Nditsa tyin tsihin ndutya jacoondutya ra Juan tsi nyivi. Maa tyin nyooho ña cuaha ca quivi tan coondutya ndo tsihin Tatyí Ii Nyoo —catyí ra Jesús tsihin ra naha.

Nu nandaá ra Jesús andivi

⁶ Tsa ndu iin ra tava tyiñu ra Jesús, tan tsicá tuhun ra naha tsi ra tan catyí ra naha: —Jutu Mañi yu, ¿a vityin ñi cua jacacu un tsi ñuu Israel ihya tsa ña cua cundaca ñaha ca ra ñuu Roma tsi yo? —catyí ra naha.

⁷ Tan nacahan ra Jesús tan catyí ra tsihin ra naha:

—Ña taahán tsi coto nyooho ndaa quivi cua cuvi tsa cua javaha Nyoo Jutu yo. In-tuhun ñi maa ra cua cahan ama cua cuvi tsi. ⁸ Tyin quivi tsa cua quitsi Tatyí Ii Nyoo siqui ndo cua naquihin ndo tunyee iñi ra, tan cua quita ndo tan cua cahan ndo tuhun yu ñuu Jerusalén ihya tan tandihi ñuu tsa cayucú Judea tan Samaria, tan nda cuanda nani cahnú ñuhu ñayivi —catyí ra Jesús tsihin ra naha.

⁹ Tan tsa yaha tsa cahan ra Jesús tuhun ihya, tan tsitsi tsa nyehé ra naha tsi ra, nandaá ra andivi, tan quihvj ra tsitsi vico. Tacan tan ña nyehe ca ra naha tsi ra. ¹⁰ Tan cuhva tsa nyehé ndaa ra naha andivi, quituvj uvi taahan ángel Nyoo tsa nditsi jahma cuitsin yatyin ñi nu nyecú ra naha. ¹¹ Tan catyí

ángel can naha ra tsihin ra tava tyiñu ra Jesús:

—Nyooho ra Galilea, ¿nacuenta nyehé ndaa xaan ndo andivi? Ra Jesús tsa nyehe ndo nandaá ihya, juvin ra cua quitsi inga tsaha, tan tyehen cua nyehe nyico ndo tsi ra —catyí ángel tsihin ra naha.

Nu nacatsi ra tava tyiñu ra Jesús tsi ra Matías tyin jaha tyiñu ra tyiñu tsa javahá ra Judas

¹² Tacan tan quita ra tava tyiñu ra Jesús nu tsiyucu ra naha yucu nu iyó yutun olivo. Tan cuanuhu ra naha ñuu Jerusalén. Tan yatyin ñi canyiñ ñuu can, tumaa sava hora ñi tan tsaa yo. Tyin sava hora ñi cuvi caca nyivi quivi quitatú ñi, tyin tacan catyí maa ley tsa tyaá ra Moisés. ¹³ Tsa tsaá ra naha ñuu Jerusalén can, ndaa ra naha nu tsinu uvi pisu vehe nu iyó ra naha. Tan ra tsa yucú can, cuvi ra ihya naha ra: ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, tan ra Simón ra tsa cuñi tsa nasama ra ndacá ñaha, tan tsihin ra Judas yañi ra Jacobo. ¹⁴ Tan tandihi ra ican naha ra ndu iin ra naha tandihi quivi tan tsicán tahvi ra naha tsi Nyoo. Tan yucú ndihi tucu yañi ra Jesús tsihin ra naha, tan tsihin ña María sihi ra, tan cuaha ca maa ñiñaha.

¹⁵ Tan tsa tandihi nyivi tsa ndu iin quivi can quita maa cientu oco ñi. Tacan tan nduvita ra Pedro. Tan catyí ra tsihin ñi:

¹⁶ —Nyooho yañi, tsa nyaá tucu maa tsa tahañ ra Jesús cuhva ihya tan vityin tsa cundaá tsa cahan ra David jahá Tatyí Ii Nyoo nu catyí ra tyin ra Judas cua cuhva cuenda ra tsi ra Jesús tsi ra xaan iñi tsi ra. ¹⁷ Tan ra Judas cuvi ra iin ra tsa tsinyi tsihin yo. Tan iin caa ñi jahá tyiñu ra tsihin yo. ¹⁸ Maa tyin tsaahan ra, tan jatá ra ñuhu tsihin xuhun tsa ñihj ra tsa xico ra tsi ra Jesús. Yaha can tan canacava ra tsihin jiñi ra, tan ndatá tsitsi ra tan quita tandihi tsiti ra. ¹⁹ Tan quivi tsa tsito nyivi iyó Jerusalén ihya tsa tsihi ra, jacunañi ñi ñuhu can Acéldama. Tan tsa tsihin yuhu maa ñi cuñi tsi catyí Ñuhu cuenda tsa Tsatj Niñi Nyivi. ²⁰ Tyin nu libro Salmo catyí tsi cuenda ra Judas tyehen:

Na ndoo maa vehe ra.

Tan ña coo nyivi tsitsi vehe can.

Tan catyí tucu tsi:

Inga ra cua jaha tyiñu tyiñu tsa javahá ra.

²¹⁻²² Tan vityin yucú ra tsa cutahan tsihin yo quivi tsinyi Jutu Mañi yo Jesucristo tsihin yo; nda quivi jacoondutya ra Juan tsi ra, tan nda quivi nandaá ra cuahán ra andivi. Tan vityin ñiñi cuñi tsi tsi inga ra cuvi tsandaa tsihin yo tsa cuenda tsa nandoto ra Cristo —catyí ra Pedro.

²³ Tacan tan caná ra naha tsi uvi taahan ra naha. Caná ra naha tsi ra José tsa nañi

Barsabás, tan juvin ñi nañi tucu ra Justo; tan cana tucu ra naha tsi ra Matías. ²⁴ Tan tsicān tahvi ra naha tsi Nyoo tan catyí ra naha tyehen:

—Jutu Mañi yu, yooho tsitó un tsa tsicá iñi ndi tsihin añima ndi. Janaha tsi ndi tsitsi tsa uvi taahan ra ihya naha ra, ndáa ra tsa nacatsj maa un, ²⁵ tyin cuiso ra tyiñu tsa jacunaq ra Judas tsa cuenda cuatyí ra, tan cuahán ra nu taahán maa tsi cahun ra —catyí ra naha, tsicān tahvi ra naha tsi Nyoo.

²⁶ Tacan tan tava cuenda ra naha ndáa ra cua tahan tsi cuiso tyiñu can. Tan tahan tsi tsi ra Matías. Ra ícan cuví ra tahan tsi cutahan tsihin tsa utsi iin ra tsa tava tyiñu ra Jesús.

2

Nu nuu Tatyí Ii Nyoo

¹ Tsaq quivi vico Pentecostés, tan ndu iin tandihi nyivi tsa tsinú iñi tsi ra Jesús. ² Tan sana iñi ñi tan tsiñi ñi cucayu ityi andivi. Tumaa cucayu tsa vatsí tatyí xaan. Tan iyo xaan cuví tsitsi vehe nu yucú ñi. ³ Tacan tan quituvj tumaa iin ñuhj tan tsaq tsi siqui intuhun intuhun ñi. ⁴ Tan tandihi ñi tsitú ñi tsihin Tatyí Ii Nyoo. Tan quitsaha caahán ñi inga yuhu cuhva tsa jacahan maa Tatyí Ii Nyoo tsi ñi.

⁵ Tan quivi can cuaha xaan ra ñuu Israel tsaq ra naha ñuu Jersualén. Ra vaha tsicá tsihin Nyoo cuví ra naha. Quee ra naha tandihi ñuu tsa cayucú nu ñuhu ñayivi. ⁶ Tan tsa tsiñi ra can naha ra tsa iyo xaan cuví nu yucú nyivi cuenda ra Cristo, tan cuahán ra naha tan ndu iin ra naha tsihin ñi. Tan ña tsitó ra naha náa tsa caca iñi ra naha, tyin intuhun intuhun ra naha tsiñi ra yuhu ra naha tsa caahán ñi jahá Tatyí Ii Nyoo. ⁷ Iyo xaan cuñi ra naha tan quitsaha natuhún tahan ra naha tan catyí ra naha:

—¿A ñavin nyivi ñuhu Galilea cuví tandihi ñi tsa caahán ihya? ⁸ ¿Nacuenda tyin tsiñi yo caahán ñi cuhva caahán intuhun intuhun yo? ⁹ Ihya yucú yo tsa cuví yo nyivi quee Partia, Media, Elam, Mesopotamia, Judea, Capadocia, Ponto, Asia, ¹⁰ Frigia, Panfilia, Egipto, tan nyivi quee ityi nuu ca Cirene ityi Africa. Tan yucú tucu yo tsa cuví yo nyivi ñuu Roma tan iyó yo ñuu ihya. Tan juhva yo cuví yo nyivi Israel nda quivi cacú yo. Tan inga yo cuví yo nyivi nanduvj cuenda nyivi Israel tan nyicún yo ley tsa tyaq ra Moisés. ¹¹ Iyó tucu yo tsa cuví yo nyivi quee Creta tan Arabia. Maa tyin tandihi yo tan tsiñi yo tyin tsihin yuhu tsa caahán maa yo caahán ñi. Tan nacatyí tuhun ñi tsa cahnu tsa javahá Nyoo —catyí ra naha.

¹² Tandihi ra naha, iyo xaan cuñi ra naha, tan tsicá tuhun tahan ra naha tan catyí ra naha:

—¿Náa cuñi tsi catyí tandihi tsa cuví ihya? —catyí ra naha.

¹³ Maa tyin inga ra jacuñi nyaa ra naha tsi ñi, tan catyí ra naha tyin tsiñi ñi.

Nu caahán ra Pedro tsihin nyivi

¹⁴ Tacan tan nduvitá ra Pedro tsihin tsa utsi iin ca ra tava tyiñu ra Jesús. Tan ñihi cahān ra tan catyí ra:

—Nyooho yañi, tsa cuví ndo ra ñuu Israel, tan tandihi nyooho tsa iyó ñuu Jerusalén ihya. Cuñi tsi tsa coto ndo tuhun ihya. Tan tyaa soho vaha ndo tsa cua cahān yu tsihin ndo. ¹⁵ Tyin cuñi maa ndo tyin tsiñi ndi. Maa tyin ñavin nyixi tsihi ndi, tyin ña tuhvá nyivi coho nyixi hora ihya, tyin ndi jatyaan. ¹⁶ Maa tyin tsa cuví ihya cuví tsa cahān ra Joel, ra cuví ndusu yuhu Nyoo tahan tsanaha. Tyin catyí ra:

¹⁷ Nu cua ndihi quivi, catyí Nyoo, cua jaquitsi yu Tatyí Ii yu siqui tandihi nyivi. Tan cua cahān sehe ndo tsa cuenda yu.

Tan ra cuatyí tan ñi cuatyí cua janaha yu tsa iyo tsi ñi.

Tan nyivi tsahnu cua nyehe ñi ñumaahna jaha yu.

¹⁸ Cua jacuhun yu Tatyí Ii yu siqui ñi tsa jaha tyiñu tsa cuenda yu.

Tan cua cahān ñi tsa cuenda yu, catyí Nyoo.

¹⁹ Tan catyí ra tyin cua janaha ra tsa iyo cua nyehe nyivi ityi andivi.

Tan ityi nu ñuhu ñayivi cua javaha ra tsa iyo, seña niñi, seña ñuhj, tan vico yuhma.

²⁰ Tan ñicanyii cua ndunaa tsi.

Tan yoo cua nducuaaha tsi tumaa cuaaha niñi.

Tandihi tuhun caahán ra ihya cua cuví tsi tsa ndi cumañi ca tahan tsi quivi quitsi Jutu Mañi yo.

Tan quivi cua quitsi ra, iyo xaan cua cuví.

²¹ Tan tandihi nyivi tsa tsicán tahvi tsi ra cua cacú ñi, catyí ra Joel jahá Nyoo.

²² Tsa yaha nacatyí tuhun ra Pedro yacan, tacan tan catyí ra tsihin ra naha:

—Nyooho ra Israel, tyaa soho ndo tsa cua cahān yu ihya. Ra Jesús, ra ñuu Nazaret, maa Nyoo nacatsj tsi ra, tan tsa janahá Nyoo tsi yo tyin nditsa tsa nacatsj ra tsi ra, tsahā ra tunyee iñi tsi ra tan cuaha xaan tsa iyo tan tsa nyityi tan seña javahā ra. Tan tsa tsitó maa ndo tandihi tsa caahán yu ihya.

²³ Maa tyin quivi nacuhvā cuenda ndo tsi ra, javahā ndo tumaa cuhva tyaa maa Nyoo cuhva nda quivi jihna ñi. Tyin tsahā cuenda ndo tsi ra tsi ra caquiñi. Tan ticaq ra naha tsi ra nu cruu. Tsahñj ra naha tsi ra jahā ndo. ²⁴ Maa tyin Nyoo janandotq ra tsi ra. Jacacú ra tsi ra tyin ña cuví cundaca ñaha tuhun tsihi tsi ra. ²⁵ Tyin ra David cahān

ra tuhun cahān ra Cristo taḥan tsanaha, tan catyí ra:

Tacan ñi nyehé yu tsi Nyoo Jutu yu ityi nuu yu.

Maa ra nyaá ra ityi xiin cuaha yu tan nduve náa cuví jayuhvi tsi yu.

²⁶ Yacan cuenda sii xaan cuñi yu. Tan jacahnú yu tsi Nyoo tsihin tsa sii cuñi yu.

Tan cuñu ñuhu yu cua quitatu tsi tyin tsitó yu tyin cua nandoto yu inga tsaha.

²⁷ Tyin yoocho, Nyoo Jutu yu, ña cua nacoo ihñi un añaima yu nu yucú añaima nyivi tsa tsihi,

tan ndi ña cua cuhva un tsa tyahyu cuñu ñuhu yu.

Tyin sehe ii maa un cuví tsi yu.

²⁸ Tan jahanā un tsi yu ityi nu coo yu ñayivi ña cua naa maa.

Tan cua jacutu un tsi yu tsihin tusii iñi tyin maa un nyaá tsihin yu, catyí ra David caḥan ra tsa caḥan ra Cristo taḥan tsanaha.

²⁹ 'Nyoocho yañi, tsitó vaha yo tyin ra David tsii tsaahnu yo tsihi ra tan quihvi ra tsitsi ñuhu. Tan ñaña ra ndi nyaá tsi ihya vityin. ³⁰ Maa tyin ra David cuví ra iin ndusu yuhu Nyoo. Tan tsitó ra tyin Nyoo catyí ra tyin juvin ñi tata maa ra cua cuví ra Cristo.

Tan ra Cristo, cuví ra cua cundaca ñaha tumaa tsa tsindacā ñaha ra David. ³¹ Tan ra David tumaa tsa tyin nyehé ra tsa cua cuví nu cuahān ca tsi ityi nuu. Tan caḥan ra tuhun tsa caḥan ra Cristo. Tan catyí ra tyin ña cua ndoo añaima ra nu yucú añaima nyivi tsa tsihi.

Tan ndi ña cua tyahyu cuñu ñuhu ra, catyí ra. ³² Tan ra Jesús can janandoto Nyoo tsi ra. Tan tandihi maa ndi cuví ndi tsandaa tsa cuenda tsa nandoto ra. ³³ Jutu Nyoo jacahnú ra tsi ra Jesús, tan tsihin ndaha cuaha ra cañihi ra tsi ra nda gloria. Tan ra Jesús naquihin cuenda ra Tatyí Ii tsa catyí Jutu yo Nyoo taḥan tsanaha tyin cuhva ra tsi yo.

Tan yacan cuví tsa tsahā ra tsi ndi vityin. Juvin tsi cuví tsa nyehé ndo tan tsiñi ndo. ³⁴ Tyin ñavin ra David nandaā ityi andivi. Maa tyin maa ra David caḥan ra tuhun ra Jesús, tan catyí ra:

Jutu Mañi yo Nyoo catyí ra tsihin Jutu Mañi yu ra Cristo: "Cunya xiin cuaha yu

³⁵ tsitsi tsa cua caquin yu tsi ra xaan iñi tsi un tsaha un", catyí ra David jahā Nyoo.

³⁶ Tacan caḥan ra Pedro tsihin ra naha, tan catyí tucu ra:

—Nyoocho tan tandihi ca nyivi Israel, coto vaha ndo tyin tuhun ra Jesús, yacan cuví tsa caahān yu tsihin ndo ihya. Ticaā ndo tsi ra nu cruu. Maa tyin cuví ra Jutu Mañi yo, tan cuví tucu ra Cristo ra ndacā ñaha tsi yo jahā Nyoo —catyí ra Pedro.

³⁷ Cuhva tsa tsiñi ra naha tsa caḥan ra Pedro tuhun ihya, cuiihya xaan cuñi ra naha cuví. Tan tsicā tuhun ra naha tsi ra Pedro

tan tsi tandihi ca ra tava tyiñu ra Jesús, tan catyí ra naha:

—Yañi, ¿nácaa javaha ndi vityin? —catyí ra naha tsihin ra tava tyiñu ra Jesús.

³⁸ Tacan tan catyí ra Pedro tsihin ra naha: —Intuhun intuhun ndo ndu uvi iñi ndo cuatyí ndo tan naśama ndo cuhva iyó ndo.

Tan coondutya ndo tsihin sivi ra Jesucristo. Tan cua jaha ra tucahnu iñi cuatyí ndo.

Tacan tan cua cuhva Nyoo Tatyí Ii ra tsi ndo. ³⁹ Tyin taḥan tsanaha catyí Nyoo tyin cuhva ra Tatyí Ii ra tsi yo, tan tsi sehe yo, tan tsi nyivi tsa cañi iyó. Tyin tandihi nyivi tsa cua nacana Jutu Nyoo cua cuhva ra Tatyí Ii ra tsi ñi —catyí ra Pedro.

⁴⁰ Tsihin tuhun ihya tan tsihin inga ca tuhun, ra Pedro tsahaā cuenda ra tsi ra naha tan catyí ra tsihin ra naha:

—Nducu ndo cuhva na jacacu Nyoo tsi ndo, coto cunaa ndo tsihin nyivi caquiñi iyó nu ñuhu ñayivi ihya —catyí ra tsihin ra naha.

⁴¹ Tacan tan tandihi ra tsa tyaā yahvi tuhun caḥan ra Pedro tsicoondutya ra naha. Tan quitá tumaa uñi mil nyivi tsa tandihi ñi, tan ndu iin ñi tsihin nyivi yihí cuenda ra Jesucristo. ⁴² Tan tandihi quivi ndu iin tandihi ñi, tan nū iñi ñi tyaá soho ñi tsa jacuahá tandihi ra tava tyiñu ra Jesucristo tsi ñi. Tan iin ñi cuví ñi tsihin tahan ñi, tan tsicān tahvi ñi tan tsatsí ñi paan tan tsihi ñi vinu tyin tacan tan ña cua naa iñi ñi tyin tsihi ra Cristo tsa cuenda cuatyí ñi.

Cuhva iyó nyivi yihí cuenda Jutu Mañi yo Jesucristo quivi can

⁴³ Tan cuaha tsa iyo javahā tandihi ra tsa tava tyiñu ra Jesucristo jahā Nyoo. Tan tandihi ñi iyo cuñi ñi. ⁴⁴ Tandihi ñi yihí cuenda ra Cristo iin caa ñi iyó ñi tsihin tsa iyó tsi ñi. ⁴⁵ Xicó ñi tsa iyó tsi ñi. Tan tsatsá ñi xuhun ñi tsi nyivi tahan ñi cuhva tsa tsiñi ñuhu tsi intuhun intuhun ñi. ⁴⁶ Tandihi quivi tan ndu iin ñi nda vehe ñuhu cañu. Tan nda yuvehe ñi iin caa ñi tsatsí ñi paan tan tsihi ñi vinu. Tan sii cuñi ñi tsatsí ñi tyin iin ñi cuví ñi. ⁴⁷ Tan jacahnú ñi tsi Nyoo. Tan vaha caahān tandihi nyivi tuhun ñi. Tan iin tan iin quivi tan nducuahá ca nyivi quihvi cuenda Jutu Mañi yo Jesús tyin jacacú ra tsi ñi.

3

Nu nduvahā iin ra coxo

¹ Iin quivi cuahān ra Pedro tsihin ra Juan vehe ñuhu cañu. Cuví tsi cuhva caa uñi tsa tseñi, cuhva tsa tuhvá nyivi Israel cuahān cuandacān tahvi tsi Nyoo. ² Tan iin ra ndaahvi, coxo ra nda quivi cacú ra, nyaá ra yuhu cora vehe ñuhu cañu can tandihi maa quivi. Tyin tsindacá ñi tsi ra na ndacan ra xuhun tsi nyivi quihvi yuhu cora can, tan nañi tsi Yuhu Cora Sii Caá. ³ Tacan tan

nyehę ra coxo can tsi ra Pedro tsihin ra Juan tsa cua quihvi ra naha yuhu cora can. Tan tsican ra xuhun tsi ra naha. ⁴Tan nyehę ra Pedro tan ra Juan tsi ra. Tan ra Pedro catyi ra tsihin ra:

—Nyehe tsi ndi —catyi ra.

⁵Tacan tan quitsaha nyehę ra coxo can tsi ra naha. Cuñi maa ra tyin iyó tsa cua cuhva ra naha tsi ra. ⁶Maa tyin ra Pedro catyi ra tsihin ra:

—Nduve xuhun cuitsin tan xuhun cuaan iyó tsi yu, tan cuhva yu tsi un. Maa tyin tsa iyó tsi yu cua cuhva yu tsi un. Tsihin sivi ra Jesucristo ra ñuu Nazaret, nduvita tan caça —catyi ra Pedro tsihin ra.

⁷Tacan tan tijn ra Pedro ndaha cuaha ra tan cañihj ra tsi ra. Tan juvin ñi cuhva can nacoq tunyee iñi nduvi taahan tsaha ra tan jucun tsaha ra. ⁸Tacan tan ra coxo can ndava ra, tan nduvita ra tsinyaq nyityi ra. Tan quitsaha tsicá ra. Tan quihvi ra tsihin ra naha tsitsi cora vehe ñuhu can, tsicá ra, tan ndava ra, jacahnú ra tsi Nyoo. ⁹Tandihj nyivi nyehę ñi tsi ra tyin tsicá ra tan jacahnú ra tsi Nyoo. ¹⁰Tan iyo xaan cuñi ñi tan yuuhvi ñi tsa cuenda tsa nduvaha ra can. Tyin nacotó ñi tsi ra. Tyin juvin ra cuvi ra tsa tuhvá tsinyaq Yuhu Cora Si Caá can tsicán ra xuhun tsi nyivi.

*Nu caahán ra Pedro tuhun ra Cristo tsi-
hin nyivi nu cuvi corredor cuenda ra Salomón*

¹¹Ra coxo tsa nduvaha can, ña jaña maa ra tsi ra Pedro tan ra Juan. Tan tandihj nyivi iyo cuñi ñi, tan tsinú xaan ñi tsaq ñi nu cuvi corredor cuenda ra Salomón tyin cua nyehę ñi tsi ra coxo can tyin tsa nduvaha ra. ¹²Tsa nyehę ra Pedro yacan, tan catyi ra tsihin nyivi can:

—Nyooho ra Israel, çnacuenda iyo xaan cuñi ndo? Tan çnacuenda nyehę xaan ndo tsi nyuhu? ¿A cuñi maa ndo tyin tsihin tunyee iñi maa ndi, a tsa cuenda tsa catsi iyó ndi nuu Nyoo, tan cuvi janduvaha ndi tsi ra coxo ihya? ¹³Ñavin maa nyuhu janduvaha tsi ra. Nyoo ra cuvi Nyoo tsi tsaañu yo, ra Abraham, ra Isaac tan ra Jacob, ra ican jacahnú tsi Sehe ra tan tsaha ra tunyee iñi tsi ra, ra tsa tsaha cuenda ndo tsi ra Pilato, ra cumi tyiñu. Tan ra Pilato cuñi ra jaña ra tsi ra. Maa tyin nyooho ña tsaha ndo. ¹⁴Tahan tsi tsa ndacan ndo tsa jaña ra tsi ra vaha, tan ra ii can, maa tyin nyooho tsican ndo tsa jaña ra tsi iin ra tsahñi ndiyi. ¹⁵Tan nyooho tsahñi ndo tsi ra tsa tsahá ñayivi nyito coo yo tsihin Nyoo. Maa tyin Nyoo Jutu yo janandoto ra tsi ra. Tan ña ndooq ra nu yucú añima nyivi tsa tsihj. Tan nyuhu cuvi ndi tsandaa tsa cuenda tsa nandotoq ra. ¹⁶Tan juvin ra Jesús cuvi ra tsa tsaha tunyee iñi tsi ra coxo ihya tan nduvaha tsaha ra, tyin tsinú iñi ndi tyin iyó tunyee iñi tsi ra Jesús.

Yacan cuenda nduvaha tsaha ra ihya, tan nacotó vaha ndo tsi ra. Tan tandihj nyooho nyehę ndo tyin nduvaha ra tsa cuenda tsa tsinú iñi ndi.

¹⁷Tsitó yu, —catyi ra Pedro— tyin quivi tsa tsahñi ndo tsi ra Jesús, ña tsitó ndo tyin ña vaha tsa javahá ndo. Tan tacan tucu ra cuvi ityi nuu tsihin ndo, ña tsitó ra naha. ¹⁸Maa tyin tacan jacuvi ndo tan cundaa tsa cahan ra cuvi ndusu yuhu Nyoo tahan tsanaha, tyin catyi ra naha tyin ra Cristo cua nyehę ra tundoho. ¹⁹Yacan cuenda ndy uvi iñi ndo cuatyí ndo, tan nacuhva cuenda ndo añima ndo tsi Nyoo, na ndatsi cuatyí ndo. Tacan tan sii xaan cua cuñi añima ndo jaha tunyee iñi Jutu Mañi yo. ²⁰Tacan tan cua jaquitsi ra tsi ra Jesús ra cuvi Cristo, na quitsi ra inga tsaha. Tyin nda quivi jihna ñi tyaa Nyoo cuhva tyin quitsi ra tsa cuenda yo. ²¹Taahán tsi tsa ndooq ra Jesucristo gloria tsa vityin nda cuenda quivi cua jandutsaa Nyoo tandihj maa tsa iyó. Tumaa cuhva catyi ra cuvi ndusu yuhu Nyoo tahan tsanaha. ²²Tyin tacan catyi ra Moisés tsihin tsi tsaañu yo: “Cua jaquitsi Jutu yo Nyoo tsi ra tsa cua cahan tuhun ra. Tan juvin ñi nyivi yo cua cuvi ra. Tan cua cahan ra tuhun Nyoo tsihin ndo tumaa caahán yuhu. Tyaa yahvi ndo tandihj tsa cua cahan ra tsihin ndo. ²³Tyin tandihj nyivi tsa ña cua tyaa soho tsa cua cahan ra, cua cunaa ñi, tyin ña cua cutahan ñi tsihin nyivi tsa nacatsi Nyoo”, catyi ra Moisés.

²⁴“Tan tacan tucu tandihj ra cuvi ndusu yuhu Nyoo nda quivi tsicoq ra Samuel tan nda cuanda vityin, jacotoq ra naha tsa cuvi vityin. ²⁵Tandihj tsa catyi Nyoo tyin cuhva ra tsi yo, cahan ra cuvi ndusu yuhu Nyoo tahan tsanaha. Tandihj can tsi maa ndo cuvi can. Tan tyiñu tsa ndooq Nyoo tsihin ra Abraham tsi tsaañu yo, juvin ñi tsa cuenda maa ndo cuvi yacan. Tyin catyi Nyoo tsihin ra Abraham: “Tandihj nyivi tsa iyó nu ñuhu ñayivi cua nasoco yu tsi ñi tsa cuenda nyivi tata un.” ²⁶Tan yacan cuenda quivi janandotoq Nyoo tsi Sehe ra, jilna ca nu yucú ndo jacuhun ra tsi ra, tyin nasoco ra tsi ndo, tan intuhun intuhun ndo nacoq ndo tsa caquiñi iyó ndo —catyi ra Pedro tsihin ñi.

4

*Nu tijn ra cuvi ityi nuu vehe ñuhu cahnu
naha ra tsi ra Pedro tan ra Juan*

¹Ndi caahán ca ra Pedro tan ra Juan tsihin nyivi, tan tsaq ra cuvi jutu naha ra tsihin ra cuvi ityi nuu tsihin ra jahá cuenda vehe ñuhu, tan tsihin ra cuvi saduceo naha ra. ²Nduxaq xaan ra naha tyin ra Pedro tan ra Juan jacuahá ra naha tsi nyivi tan catyi ra naha tyin nditsa tsa cua nandoto nyivi tsa tsa tsihj, tyin ra Jesús nandotoq ra. ³Tacan

tan tijn ra naha tsi nduvi taahan ra tava tyiñu ra Jesús can naha ra. Tan tyihj ra naha tsi ra naha vehe caa. Tan ndoq ra naha nda cuanda inga quivi tyin tsa cueñi cuví cuhva can. ⁴ Maa tyin cuaha ñi tsa tsiñi tuhun caahán ra Pedro quitsaha tsinú iñi ñi. Tan ndu ijn ñi tsihin nyivi yihí cuenda ra Jesús. Tan tsa tandihí ñi quitá maa uhun mül cuví tsa maa ñi maa rayii naha ra.

⁵ Tsa tuvi inga quivi, nda ñuu Jerusalén ndu iin tandihí ra cumi tyiñu cuenda nyivi Israel, tan tsihin ra tsahnu, tan tsihin ra cuví maestro cuenda ley tsa tyaa ra Moisés. ⁶ Tan nyii tucu ra Anás ra jutu tsahnu cuví ityi nuu. Tan nyii tucu ra Caifás, tan ra Juan, tan ra Alejandro. Tan yucú ndihí tucu tandihí rayii tsa cuví nyivi ra jutu tsahnu cuví ityi nuu. ⁷ Tacan tan tava tyiñu ra naha na cuquihin ra naha tsi ra Pedro tan ra Juan. Tan tsindaca ra naha tsi ra naha nda mahñu nu yucú ra naha. Tan tsica tuhun ra naha tsi ra naha, tan catyí ra naha:

—¿Yóo tsaha ndatu tsi ndo tsa janduvaha ndo tsi ra can? ¿Yóo tsaha tunyee iñi tsi ndo tsa javaha ndo tyehen? —catyí ra naha tsihin ra Pedro tan ra Juan.

⁸ Tan ra Pedro tsitú ra tsihin Tatyí Ii Nyoo. Tan nacahan ra tsihin ra naha:

—Nyooho ra ndacá ñaha Israel ñuu yo ihya, tan nyooho ra tsahnu. ⁹ Vityin tsicá tuhun ndo tsi ndi tsa cuenda tsa vaha tsa cuví tsi ra coxo ihya, tyin cuñi ndo coto ndo nácaa nduvaha ra. ¹⁰ Yacan cuenda cua catyí tuhun ndi tsihin ndo na coto tandihí nyivi Israel. Tyin ra ihya nyaá ra nuu tandihí ndo, tyin nduvaha ra tsihin tunyee iñi tsi ra Jesucristo, ra ñuu Nazaret, ra tsa tsaha cuenda ndo na cúu ra nu cruu. Maa tyin Nyoo janandotó ra tsi ra. ¹¹ Tan juvin ra Jesús cuví yuu tsa tsiñi ñuhu ca tsa ña cuñi ra javahá vehe cuatyíñu ra, tumaa cuhva catyí nuu tutu Nyoo. Tan nyooho cuví ra javahá vehe tan ña cuñi ndo yuu tsa tsiñi ñuhu ca can. ¹² Yoñi inga ra cuví jacacú tsi yo. Tyin intuhun ñi maa ra tsaha Nyoo tyin jacacu ra tsi yo —catyí ra Pedro tsihin ra can naha ra.

¹³ Tan ra cumi tyiñu can naha ra iyo xaan cuñi ra naha tsiñi ra naha tsa caahán ra Pedro tan ra Juan tyin ñi xaan iñi ra naha caahán ra naha, tan ñavin ra cahví scuela cuví ra naha. Tacan tan nacotó ra naha tsi ra naha tyin ra ican naha ra cuví ra tsa tsicá tsihin ra Jesús quivi can. ¹⁴ Tan ra tsa nduvaha can, nyaá nyityi ra tsihin ra naha. Yacan cuenda ña cuví cahan ra cumi tyiñu can naha ra tsa ndavaha ñi siquí ra Pedro tan ra Juan. ¹⁵ Tacan tan catyí ra cumi tyiñu naha ra tsihin ra naha:

—Quita nduñi taahan nyooho tsata vehe.

Tan quitá ra naha. Tan ndoq ra cumi tyiñu can naha ra natuhún tahan ra naha. ¹⁶ Tan catyí ra naha:

—¿Náa javaha yo tsihin ra ihya naha ra? Tyin tandihí maa nyivi Jerusalén tsitó ñi tsa iyo tsa javahá ra naha. Tan ña cua cuví catyí yo tyin ña nditsa. ¹⁷ Maa tyin ña cuñi yo tsa cuaha ca nyivi coto tuhun ihya, yacan cuenda vaha ca tsa casi yo tsi ra naha, tan cahan yo tsihin ra naha na ña cahan ca ra naha tuhun ra Jesús tsihin nyivi —catyí ra cumi tyiñu naha ra.

¹⁸ Tacan tan caná ra cumi tyiñu tsi ra Pedro tan ra Juan. Tan catyí ra naha tsihin ra naha tyin ndi luxu ca maa tan ña cahan ca ra naha tuhun ra Jesús. Tan na ña jacuaha ca ra naha tsi nyivi. ¹⁹ Maa tyin ra Pedro tan ra Juan nacahan ra naha tan catyí ra naha:

—Tyihí tuñi ndo iñi ndo tan nyehe ndo tatun vaha ca tsa tyaa yahvi ndi tsi maa ndo o vaha ca tsa tyaa yahvi ndi tsi Nyoo. ²⁰ Tyin nyuhu ña cuví tsa jandihí ndi tsa nacatyí tuhun ndi tsa nyehe ndi tan tsa tsiñi ndi —catyí ra naha.

²¹ Tacan tan tyasí nyico ra cumi tyiñu naha ra tsi ra Pedro tan ra Juan. Tan jañá ra naha tsi ra naha tyin ña ñihí ra naha nácaa tatsi tuñi ra naha tsi ra naha. Tyin tandihí nyivi tan jacahnú ñi tsi Nyoo tsa cuenda tsa cuví can. ²² Tyin rayii tsa nduvaha can, tsa yahá uvi xico cuiya ra, tan tacan cuiya tahañ ra tundoho tan nduvaha ra jahá Nyoo.

Nu tsicán nyivi yihí cuenda ra Cristo tunyee iñi Nyoo

²³ Tan tsa quitá ra Pedro tan ra Juan, cuahán ra naha nu yucú nyivi yihí cuenda ra Jesús. Tan nacatyí tuhun ra naha tandihí tsa cahan ra tsahnu naha ra tan ra jutu tsa cuví ityi nuu naha ra tsihin ra naha. ²⁴ Cuhva tsa tsiñi tandihí ñi, tan iin caa ñi quitsaha tsicán tahvi ñi tsi Nyoo. Tan catyí ñi:

—Jutu Mañi yu, yooho javahá un andivi tan ñuhu ñayivi. Javahá un ndutyá ñuhu. Tan tandihí ca tsa iyó, maa un javahá. ²⁵ Tan yooho tsihin Tatyí Ii un jacahan un tsi ra David tahañ tsanaha. Tan catyí ra:

¿Nacuenda tsa nduxaán nyivi ña tsitó tsi Nyoo?

¿Nacuenda tsicá iñi ñi tuhun tsa nduve yahvi nyaá?

²⁶ Rey naha ra tan tsihin ra tsa ndacá ñaha nu ñuhu ñayivi ihya nduvitá ra naha siquí un, Jutu Mañi yu, tan siquí ra Cristo, ra nyisó tyiñu maa un, catyí ra David.

²⁷ Jutu Mañi yu, nditsa tyin ra Herodes, tan ra Poncio Pilato ndu ijn ra naha ñuu Jerusalén ihya tsihin ra ñuu Roma naha ra tan tsihin ra ñuu Israel naha ra tyin cahñi ra naha tsi ra Jesús Sehe ii un, tsa nacatsj vaha maa un. ²⁸ Tan tacan javahá ra naha, tumaa

cuhva tsa catyí maa un tahañ tsanaha tyin cua cuví. ²⁹ Tan vityin, Jutu Mañi yu, nyehe tyin cuñí ra naha casi ra naha tsi ndi. Tan cuhva tsa nii coo iñi ndi tyin tyiñu maa un javahá ndi, Jutu Mañi yu. Tan na ña nayuhví ndi cahan ndi tuhun maa un. ³⁰ Tan tsihin tunyee iñi maa un tan cua nduvaha nyivi cuuhví, tan cua nyehe ndi seña tan tsa iyo tsa cuenda tunyee iñi ra Jesús Sehe ii un —catyí ñi, tsicán tahvi ñi tsi Nyoo.

³¹ Tan cuhva tsa ndihí tsicán tahvi ñi tsi Nyoo tan tañ nu yucú ñi. Tan tandihí ñi tsiñu ñi tsihin Tatyí Ii Nyoo tan cahañ ñi tuhun Nyoo tsihin tsa ña yuuhví ñi.

Nduve tsa cumañi tsi nyivi yihí cuenda ra Cristo

³² Tandihí ñi tsa tsinú iñi, iin ñi cuví ñi, tan iin ñi cuhva tsicá iñi ñi. Ndi intuhun ñi tan ña catyí ñi tyin tsa tsii maa ñi cuví tsa iyó tsi ñi, tyin tsii tandihí ñi cuví can. ³³ Tan tsihin tunyee iñi cahnu, caahán ra tava tyiñu ra Jesús tuhun tsa nandoto Jutu Mañi yo Jesús. Tan Nyoo nasocó xaan ra tsi tandihí ra naha. ³⁴ Tan ndi intuhun ñi tan nduve tsa cumañi tsi ñi tyin tandihí ñi tsa iyó vehe o ñuhu ñi, xicó ñi can. Tan cua ndaca ñi xuhun can ³⁵ tsi ra tava tyiñu ra Jesús. Tan maa ra naha natsatsá xuhun can tsi intuhun intuhun nyivi cuhva tsa tsiñi ñuhu tsi ñi. ³⁶ Tacan javahá iin ra tsa nañi José. Ra ican cuví ra tata ra Leví. Tan cacú ra ñuhu Chipre tsa canyí mahñu ndutya ñuhu. Tan ra tava tyiñu ra Jesús jacunañi ra naha tsi ra Bernabé. Tan sivi can cuñí tsi catyí: ra jandu iin iñi nyivi. ³⁷ Tan ra Bernabé can xicó ra ñuhu ra. Tan tsañ ra xuhun can tsi ra tava tyiñu ra Jesús.

5

Cuatyi ra Ananías tsihin ña Safira

¹ Maa tyin iin ra tsa nañi Ananías tsihin ña Safira, ñasiihi ra, xicó ñi iin ñuhu. ² Tan tyihí xeehe ñi juhva xuhun. Tacan tan ra Ananías tsindaca ra xuhun tsa ndoo ña tsi ra tava tyiñu ra Jesús. Tan catyí ra tyin tandihí xuhun tsa cuyahví ñuhu cuví can. ³ Tacan tan catyí ra Pedro tsihin ra:

—Yooho Ananías, ¿nacuenda tsa tsañ un tsa quihví nu ña vaha aña un? Tyin cuñí un jandavi ñaha un tsi Tatyí Ii Nyoo, tan catyí un tyin tandihí xuhun tsa cuyahví ñuhu can cuví tsehe, tan ña nditsa un tyin ndoo juhva xuhun can tsi un. ⁴ Tsii un cuví ñuhu can, tan tsii un cuví xuhun tsa ñihí un cuenda ñuhu can. ¿Nacuenda tsa cuñí un jandavi ñaha un tsi Nyoo tan catyí un tyin tandihí xuhun can tsañ un? Maa tyin ñavin tsi nyuhu jandavi ñaha un, tyin tsi maa Nyoo jandavi ñaha un —catyí ra Pedro tsihin ra Ananías.

⁵ Tsa tsiñi ra Ananías tuhun tsa cahañ ra Pedro, nduva ra tan tsiñi ra. Tan tsa tsito nyivi tuhun ihya tan nayuhví xaan ñi. ⁶ Tacan tan tsañ ra cuatyí naha ra tan cava nuu ra naha jahma cuñu ñuhu ra Ananías. Tan tsañ ra naha tsindaca ra naha tsi ra nu ndaa cumi santu. ⁷ Yahá uñi hora tan tsañ ñasiihi ra Ananías tan quihví ña nu yucú ra tava tyiñu ra Jesús, tyin ña tsito ña tsa cuví. ⁸ Tan quitsahá tsicá tuhun ra Pedro tsi ña tan catyí ra tsihin ña:

—¿A tyehen ñi cuví xuhun tsa cuyahví ñuhu ndo? —catyí ra Pedro tsihin ña.

Tacan tan nacañ ña tan catyí ña tsihin ra:

—Tacan ñi cuví xuhun tsa cuyahví tsi —catyí ña tsihin ra.

⁹ Tacan tan catyí ra Pedro tsihin ña:

—¿Nacuenda tsa natuhun tahan ndo tan cuñi ndo jandavi ñaha ndo tsi Tatyí Ii Jutu Mañi yo Nyoo? Ican vatsí ra tsa tsañ tsindaca tsi yí un nu ndaa cumi santu. Tan vityin cua cundaca ndihí ra naha tsi un —catyí ra Pedro tsihin ña Safira.

¹⁰ Tan juvin ñi cuhva can tan nduva ña tsañ ra Pedro, tan cueta tsiñi ña. Tan quihví ra cuatyí can naha ra, tan nyehe ra naha tyin canyí ña tsiñi ña. Tan cañihí ra naha tsi ña, tan tsindaca ra naha tsi ña nu ndaa cumi sandu. Tan tinyi ra naha tsi ña xiin yí ña. ¹¹ Tan tandihí nyivi yihí cuenda ra Cristo, tan tandihí nyivi tsa tsito tuhun can, nayuhví xaan ñi.

Cuaha xaan tsa iyo tan seña javahá ra tava tyiñu ra Jesús

¹² Cuaha seña tan tsa iyo javahá ra tava tyiñu ra Jesús nu yucú nyivi. Tan tandihí ñi yihí cuenda ra Cristo ndu iin ñi nu cuví corredor cuenda ra Salomón. ¹³ Tan nyivi tsa inga cuenda ña caná iñi ñi cutahan ñi tsihin ñi yihí cuenda ra Cristo. Maa tyin nyivi can vaha caahán ñi siqui ñi yihí cuenda ra Cristo. ¹⁴ Tan cuaha xaan nyivi quitsahá tsinú iñi tsi Jutu Mañi yo Jesús, tahañ ñi rayi tan ñaha. ¹⁵ Tan nda cuenda tava ñi tsi nyivi cuuhví ityi cahnú, tsaquin ñi tsi ñi nu tsito. Tyin tatun cua yaha ra Pedro tan yaha tixahñu ra siqui ñi cua nduvaha ñi. ¹⁶ Tacan tucu nyivi iyó yatin ñi ñuu Jerusalén can, cuandacá ñi tsi nyivi cuuhví tan nyivi tsa yihí tatyí ña vaha. Tan nduvahá tandihí ñi.

Nu nyehe ra Pedro tan ra Juan tundoho

¹⁷ Tacan tan ra jutu tsaahnu tsa cuví ityi nuu, tan ra yihí cuenda ra cuví saduceo naha ra, ndasi cuñi ra naha nyehe ra naha tsi ra tava tyiñu ra Jesús tsa cuenda tsa vaha tsa javahá ra naha tsihin tunyee iñi tsa tsañ Nyoo tsi ra naha. ¹⁸ Tacan tan tñin ra naha tsi ra naha. Tan tyihí ra naha tsi ra naha vehe caa. ¹⁹ Maa tyin tsa cuac can

quitsj iin ángel tsa jaquitsj Jutu Mañi yo, tan nuñá ra yuvehe caa can. Tan tava ra tsi ra naha. Tan catyí ra tsihin ra naha:

²⁰—Cuaahan ndo tan cunyacu nyityi ndo vehe ñuhu cahnu. Tan nacatyí tuhun ndo tsihin nyivi nácaa coo ñi ñayivi nyito tsa iyó ndo —catyí ángel can tsihin ra naha.

²¹Tsa tsiñi ra naha tsa cahān ra ángel can, tan cuahān ra naha. Tan tsa tuvi inga quivi can nañihj nyivi tsi ra naha vehe ñuhu cahnu. Tan quitsahā jacuahá ra naha tsi ñi.

Tan tsitsi tsa jacuahá ra naha tsi ñi, tan ndu iin ra jutu tsaahnu tsa cuví ityi nuu tan ra tsa yucú tsihin ra. Tan canā ra naha tsi ra cumi tyiñu cuenda nyivi Israel tyin coo ra naha junta. Tacan tan tava tyiñu ra naha na cuquihin ra naha tsi ra tava tyiñu ra Jesús nu yucú ra naha vehe caa can. ²²Maa tyin cuhva tsa tsaā ra vitya naha ra tsitsi vehe caa can, ña nañihj ra naha tsi ra naha. Tan cuanuhj ra naha cua nacatyí tuhun ra naha tsihin ra jutu tsaahnu tsa cuví ityi nuu.

²³Tan catyí ra naha tsihin ra:

—Ndasí yuvehe caa can tan tsaā ndi. Tan andaru, yucú ra naha yuvehe jahá cuenda ra naha. Maa tyin cuhva tsa nuñá ndi yuvehe can, yofñi maa nañihj ndi —catyí ra naha tsihin ra jutu tsaahnu tsa cuví ityi nuu.

²⁴Tacan tan ra jutu tsaahnu tsa cuví ityi nuu can tsihin ra yihí ndaha tsi tandihí ra tsa jahá cuenda vehe ñuhu can tan tsihin ra jutu tsa cuví ityi nuu naha ra, tsiñi ra naha tsa cahān ra vitya naha ra tsihin ra naha tan iyo xaan cuñí ra naha. Tan natuhj tahan ra naha nácaa javaha ra naha tan cundihi tuhun can. ²⁵Tacan tan tsaā iin ra tan catyí ra:

—Ra tsa tyihj ndo vehe caa can naha ra, yucú ra naha vehe ñuhu jacuahá ra naha tsi nyivi —catyí ra.

²⁶Tacan tan ra yihí ndaha tsi ra jahá cuenda vehe ñuhu can, tsahān ra tsihin ra vitya naha ra, tan tsiquihj ra naha tsi ra tava tyiñu ra Jesús tsihin tsa vii ñi tan ña cañi ra naha tsi ra naha, tyin yuuhví ra naha tsi nyivi coto cañi ñi yuu tsi ra naha.

²⁷Tsindacā ra naha tsi ra tava tyiñu ra Jesús nuu ra cumi tyiñu vehe ñuhu cahnu. Tan ra jutu tsaahnu tsa cuví ityi nuu catyí ra tsihin ra tava tyiñu ra Jesús:

²⁸—Nyuhu tsa cahān vaha xaan ndi tsihin ndo tyin ña cahan ca ndo tuhun ra Jesús. Maa tyin nyooho ña tyaā soho ndo tsa cahān ndi. Tan tsa ndihí maa tsitsi ñuu Jerusalén jacotó ndo tuhun ra. Tan cuñi ndo tyaā ndo cuatyí can siqui ndi tyin tsihi ra —catyí ra jutu tsaahnu tsa cuví ityi nuu tsihin ra naha.

²⁹Tacan tan nacahān ra Pedro tan inga ra tava tyiñu ra Jesús, tan catyí ra naha:

—Taahān tsi tyaā yahvi jihna ndi tsi Nyoo tan ñavin ca tsi nyooho. ³⁰Nyoo cuenda tsi

tsaahnu yo juvin ra janandotó tsi ra Jesús, ra tsa ticaā ndo nu cruu tan tsahñi ndo. ³¹Tan ra Jesús cuví ra tsa jacahnu xaan Nyoo, tan tyaā ra tsi ra xiin cuaha ra, tyin cua cundaca ñaha ra tandihí maa. Tan intuhun ñi maa ra cuví ra jacacú tsi yo. Tyin tacan tsahá ra cuhva tsi yo tsa cuví yo nyivi Israel na ndu uvi iñi yo cuatyí yo tan jaha ra tucahnu iñi cuatyí yo. ³²Tan nyuhu cuví ndi tsandaa tsa cuenda tandihí yacan. Tan tacan cuví tucu Tatyí Ii Nyoo tsa tsahā Nyoo cunyaa añima nyivi tyaā yahvi tsi ra —catyí ra Pedro tsihin ra naha.

³³Tan tsa tsiñi ra naha tsa cahān ra Pedro, nduxaān xaan ra naha. Tan cuñi ra naha cahñi ra naha tsi ra naha. ³⁴Maa tyin tsihin ra cumi tyiñu can naha ra nyii iin ra cuví fariseo tsa nañí Gamaliel. Tan cuví ra maestro cuenda ley Nyoo tsa tyaā ra Moisés. Tan nyivi tyaā yahvi xaan ñi tsi ra. Tan ra Gamaliel can, nduvitā nyityi ra. Tan caahān ra na quita ra tava tyiñu ra Jesús tañi ñi. Tacan tan quita ra naha. ³⁵Tan quitsahā caahān ra Gamaliel can tsihin tandihí ca ra cumi tyiñu naha ra, tan catyí ra:

—Yoo, ra tsa ndacá ñaha tsi nyivi Israel, jaha yo cuenda tsi yo tsihin tsa cua javaha yo tsi ra ican naha ra. ³⁶Nducuhun iñi ndo tyin tsa iyó juhva quivi nduvitā iin ra tsa tsinañi Teudas. Tan catyí ra tyin cuví ra iin ra vaha. Tan quita maa tumaa cumi cientu rayii tsinyicun tsi ra. Maa tyin yaha can tsahñi nyivi tsi ra. Tan tandihí ra tsa tsinyicun tsi ra cuanuhj ra naha ñuu ra naha. Tan tsindihí tuhun can. ³⁷Yahā can tan nu cuahān ca tsi ityi nuu, quivi nacahvj ra gobiernu tsi nyivi, tan nduvitā ra Judas ra ityi Galilea. Tan cuaha xaan nyivi tsinyicun tucu tsi ra can. Maa tyin juvin ñi tsahñi nyivi tsi ra. Tan tandihí ñi tsa tsinyicun tsi ra cuanuhj ñi ñuu ñi. ³⁸Yacan cuenda jaña yo tsi ra ihya naha ra. Tan ña cua tyihj yo tsi yo tsihin ra naha tyin tatun tuhun iin rayii ñi cuví tsa jacuahá ra naha, cua cundihi tuhun can. ³⁹Maa tyin tatun nditsa tyin tuhun Nyoo cuví tsa jacuahá ra naha, ña cua cuví casí yo. Jaha yo cuenda tsi yo tyin ña vaha cañi tahan yo tsihin Nyoo —catyí ra Gamaliel tsihin ra naha.

⁴⁰Tandihí ra naha ndoō ra naha vaha tsa ña cua cahñi ra naha tsi ra naha. Tacan tan canā ra naha tsi ra tava tyiñu ra Jesús. Tan catyí ra cumi tyiñu naha ra tsihin ra vitya naha ra na cañi ra naha tsi ra naha. Tan tyasj ra naha nu cahan ra naha tuhun ra Jesús. Tacan tan jañā ra naha tsi ra naha. ⁴¹Tan quita ra naha nuu ra cumi tyiñu. Tan si xaan cuñi ra naha tyin tsahā Nyoo ndatu tyin nyehé ra naha tundoho tsa cuenda ra Jesús. ⁴²Tan ña jandihj ra naha tsa caahān ra naha. Tan tandihí quivi

jacuahá ra naha tuhun ra Jesucristo vehe ñuhu tan vehe nyivi.

6

Nu nacatsí nyivi yihí cuenda ra Jesús utsa taahan ra naha tyin jaha cuenda ra naha nda tsa tsiñi ñuhu tsi ñi

¹ Tan nu cuahán ca tsi quivi cuaha xaan nyivi yihí cuenda ra Cristo cuví. Tacan tan nyivi tsa caahán yuhu griego quitsaha caahán ñi siqui nyivi tsa caahán yuhu hebreo tan catyí ñi tyin cuhva tsa tsatsá ra naha tsa catsi ñi tandihí quivi ña jahá vaha ra naha cuenda tsi ñi ndaahvi grecia tsa tsihí yíi. ² Tacan tan tandihí tsa utsi uvi taahan ra tava tyiñu ra Jesús jandu ijin ra naha tsi tandihí nyivi yihí cuenda ra Cristo. Tan catyí ra naha tsihin nyivi can:

—Ña vaha tsa jandihí ndi tsa caahán ndi tuhun Nyoo tan tsa tsatsá ndi tsa catsi ndo. ³ Yacan cuenda, nyooho yañi, nanducu ndo utsa taahan ra nu yucú yo ihya, ra vaha iyó tsihin Nyoo, ra tsa iyó tsa tsiñituñi iñi, ra tsitú tsihin Tatyí li Nyoo. Tan cuhva yo tyiñu ihya tsi ra naha. ⁴ Tan nyuhu ca jañihí ndi ndacan tahvi ndi tsi Nyoo, tan cua jacuahá ca ndi tuhun Nyoo —catyí ra naha.

⁵ Tandihí ñi tan ndoo ñi vaha. Tan nacatsí ñi tsi ra Esteban. Tyin tsinú xaan iñi ra tsi Nyoo. Tan tsitú ra tsihin Tatyí li Nyoo. Tan nacatsí tucu ñi tsi ra Felipe, tan ra Prócoro, tan ra Nicanor, tan ra Timón, tan ra Parmenas, tan ra Nicolás tsa cuví ra iin ra ñuu Antioquía, tan nanduví ra iin ra Israel. ⁶ Tacan tan tsindaca ñi tsi ra naha nu nyecú ra tava tyiñu ra Jesús. Tan tyiso ndaha ra naha jiñi intuhun intuhun ra naha tan tsican tahvi ra naha tsi Nyoo tsa cuenda ra can naha ra.

⁷ Tan tsityá ca tuhun Nyoo. Tan nducuaha ca ñi yihí cuenda ra Cristo ñuu Jerusalén. Tan cuaha xaan ra cuví jutu cuenda nyivi Israel natsinú ndihí iñi ra naha tuhun ra Cristo.

Nu tyihí ra naha tsi ra Esteban vehe caa

⁸ Ra Esteban cuví ra iin ra tsa tsitú tsihin tunyee iñi Nyoo. Tan vaha xaan nyivi cuví ra tyin tsitú aña tsa tsihin tsa vaha tsi Nyoo. Tan cuaha xaan tsa iyo tan seña javahá ra nu yucú nyivi. ⁹ Tacan tan juhva ra tsa tsicá vehe ñuhu ñuu Israel tsa nañi Vehe Ñuhu Cuenda Nyivi Ndoó Nuña cutahan ra naha tsihin juhva ra ñuu Cirene naha ra, tan cutahan ndihí juhva ra ñuu Alejandría naha ra, tan ra ityi Cilicia naha ra, tan ra ityi Asia naha ra. Tan quitsaha caahán yuhu tahan ra naha tsihin ra Esteban. ¹⁰ Maa tyin ña cuví jahá canaa ra naha tsi ra, tyin ra Esteban caahán ra tsihin tsa tsiñituñi jiñi ra tsa tsaha Tatyí li Nyoo tsi ra. ¹¹ Tacan tan tyahví ra can naha ra tsi juhva

ra naha cuenda siqui ra Esteban tan catyí ra naha tyin ra Esteban caahán ra ndavaha ñi siqui ra Moisés, tan siqui Nyoo.

¹² Yacan cuenda tandihí nyivi can quitsaha cuvaá ñi tan tsihin ra tsahnu naha ra tan ra cuví maestro cuenda ley Nyoo. Tacan tan tñin ra naha tsi ra Esteban. Tan tsahan ra naha tsindaca ra naha tsi ra nu ndu iin ra cumí tyiñu cuenda vehe ñuhu nyivi Israel. ¹³ Tan nducu ra naha tsi ra cahan cuendu siqui ra Esteban. Tan maa ra naha catyí ra naha tyehen:

—Ra Esteban ihya, ña jandihí ra tsa caahán ra ndavaha ñi siqui vehe ñuhu yo tan siqui ley Nyoo tsa tyaq ra Moisés. ¹⁴ Tan tsiñi ndi tsa caahán ra tyin ra Jesús, ra Nazaret can, cua caní ra vehe ñuhu cahnu ihya. Tan cua nasama ra cuhva iyó yo tsa jacuahá ra Moisés tsi yo —catyí ra tsa caahán cuendu siqui ra Esteban.

¹⁵ Tacan tan ra cumí tyiñu naha ra tan ra nyecú ican nyehé ra naha tsi ra Esteban tyin tumaa caá nuu iin ángel, tacan caá nuu ra.

7

Nu caahán ra Esteban tuhun Nyoo tsihin nyivi nducú cahñi tsi ra

¹ Tacan tan ra jutu tsaahnu tsa cuví ityi nuu tsicá tuhun ra tsi ra Esteban, tan catyí ra:

—¿A nditsa tsa caahán ra ihya naha ra siqui un?

² Tacan tan nacahan ra Esteban tan catyí ra:

—Nyooho yañi, tan nyooho ra tsahnu, tyaq soho ndo tuhun tsa cua cahan yu. Jutu yo Nyoo, ra cahnu ca, quituví ra nuu tsi tsaahnu yo, ra Abraham, quivi nyíi ra ityi Mesopotamia tsa ndi cumañi ca cuhun ra coo ra nda ñuu Harán. ³ Tan catyí ra tsihin ra: “Ñacoo ñuu un, tan tsi tandihí nyivi un. Tan cuhun cun inga ñuu tsa cua janaha yu tsi un” catyí Nyoo tsihin ra Abraham. ⁴ Tacan tan ra Abraham quitá ra nu iyó nyivi Caldea ityi Mesopotamia, tan cuahán ra nda ñuu Harán. Tan ndacan cuví nu tsihí jutu ra. Yaha can jaquitsí Nyoo tsi ra ñuhu nu iyó yo ihya vityin. ⁵ Maa tyin nduve ñuhu tsaha Nyoo tsi ra quivi can. Ndi luxu maa nu cuañi ra tan ña tsaha Nyoo. Maa tyin catyí ra tsihin ra Abraham tyin cua cuhva ra. Tan tsa cua cúu ra tan Nyoo cua cuhva ra ñuhu tsi sehe ra. Tacan cahan Nyoo tsihin ra Abraham, vasu tsa ñaha ca coo sehe ra quivi can. ⁶ Tan inga tucu tuhun cahan Nyoo tsihin ra tyin nyivi tata ra cua coo ñi inga ñuu. Tan cua cuví ñi musu nyivi ñuu can. Tan maa nyivi ñuu can cua quihí ndaha ñi tsi ñi. Tan cua nyehé ñi tundoho cumi cientu cuiya. ⁷ Maa tyin cahan tucu Nyoo tsihin ra tyehen: “Nyivi tata un cua nyehé ñi

tundoho jaha nyivi ñuu can. Yacan cuenda yuhu cua tatsi tuñi yu tsi nyivi ñuu can. Tan tsa cua yaha yacan tan cua quita nyivi cuvi tata un ñuu can tan cua quitsi ñi ihya. Tan cua jacahnu ñi tsi yu” catyí Nyoo tsihin ra Abraham.

⁸ Tacan natuhun Nyoo tsihin ra. Tan ndoq ra tuhun tsihin ra. Tan Nyoo tsaḥa ra iin cuhva tsa cua javaha ñi coto naa iñi ñi tsa caḥan ra. Tsaḥa cuenda ra tyin tandiḥi ñi sehe yí ñi tsa cua coo tan cuñi tsi cunyaa tuñi ra itsi naha tsi. Tan tsa yaha una quivi tsa cacu ra Isaac, sehe ra Abraham, tacan javaha ra tsi ra. Tan juvin ñi tacan javaha ndiḥi tucu ra Isaac tsi ra Jacob, sehe ra. Tan ra Jacob tucu tsihin utsi uvi taahan sehe ra, tyaḥa ra tuñi can tsi intuhun intuhun sehe yí ra. Tan ra ican naha ra cuvi tsi tsaahnu yo.

⁹ Tan tsa utsi iin taahan ca sehe ra Jacob ndasi cuñi ra naha nyeḥe ra naha tsi ra José yañi ra naha, tsa cuenda tyin cuñi ca jutu ra naha tsi ra can. Yacan cuenda xico ra naha tsi ra José na cuvi ra iin musu nda Egipto. Maa tyin ra José, ña nacoq Nyoo tsi ra. ¹⁰ Tan jacacu ra tsi ra nu nyehé ra tundoho. Tan tsaḥa ra tsa nyityi jiñi ra tsi ra José. Tan tsaḥa ra tsa vaha coo ra nuu ra Faraón, ra cuvi rey Egipto. Tan rey can tsaḥa ra tsa cuvi ra José na cumi tyiñu ñuu tsa cayucu Egipto can. Tan tsindaca ñaha ndiḥi tucu ra vehe maa rey.

¹¹ Tacan tan tsicoq tama naniḥi cahnu ityi Egipto tan ityi Canaán. Tan nyeḥe xaan nyivi tundoho. Tan tandiḥi tsi tsaahnu yo ña ñiḥi ra naha tsa catsi ra naha. ¹² Maa tyin quivi tsitq ra Jacob tyin iyó tsa catsi ra naha nda Egipto, tan jacuhun ra tsi sehe ra na cunducu ra naha tsa catsi ra naha. Tan tsaḥan ra naha iin tsaḥa. ¹³ Tan tsa tsinu uvi tsaḥa tsa tsaḥan ra naha, ra José jacoto ra tsi ra naha tyin yañi ra naha cuvi tsi ra. Tacan tan tsitq ra Faraón yóo tata cuvi ra José. ¹⁴ Tacan tan tava tyiñu ra José na quitsi ra Jacob jutu ra, tsihin tandiḥi nyivi ra. Tan cuvi ñi uñi xico tsaḥun taahan nyivi. ¹⁵ Tan tacan cuvi tsa cuahán ra Jacob cua coo ra ñuhu Egipto can. Yaha can tan tsiḥi ra ndacan. Tan tsiḥi ndiḥi tucu tandiḥi sehe ra, ra cuvi tsi tsaahnu yo naha ra. ¹⁶ Tacan tan tsaq quivi tsa tsindaca ñi yiqui ra Jacob tan yiqui sehe ra nda Siquem. Tan ican quihvi yiqui tandiḥi ra naha tsitsi ñuhu nu jatq ra Abraham iin ñaña tsi sehe ra Hamor taḥan tsanaha.

¹⁷ Maa tyin tsa ndi cumañi ca quita nyivi Egipto, nyivi ra Abraham tsa iyó Egipto can cuaha xaan ñi cuvi. Tan tsa nyanaa yatyin quivi tsa cua cuhva Nyoo ñuhu tsi ñi tumaa tsa caḥan catsi ra tsihin ra Abraham. ¹⁸ Tacan tan quitsaha ndaca ñaha iin rey tsa ña nacoto tsi ra José. ¹⁹ Rey can jandavi ñaha ra nyivi yo. Tan janyeḥe xaan ra tundoho tsi

ñi, tan jañiñi ra tsi ñi na nacoq ñi tsi sehe ñi tsa ndi cacú tyin na cūu tsi. ²⁰ Tan juvin ñi quivi can cacu ra Moisés. Tan taḥan xaan iñi Nyoo tsi ra. Tan uñi yoo jacuahnu sihi ra tsi ra nda yuvehe ña. ²¹ Yaha can ña cuvi ca tyihi xeehe sihi ra tsi ra. Tan nacoq ña tsa tsitsi iin tyica yuhu yutya. Tacan tan sehe sihi ra rey Egipto can nañiñi ña tsi ra. Tan naquihñi ña tsi ra. Tan jacuahnu ña tsi ra, tumaa tsa sehe maa ña cuvi tsi ra. ²² Yacan cutuhva ra Moisés tandiḥi tsa tsitq ñi Egipto. Tan vaha xaan caḥan ra tan vaha javaha ra jaha tunyee iñi tsa tsaḥa Nyoo tsi ra.

²³ Tan tsa quita uvi xico cuiya ra Moisés cuñi ra ruhun ra cunyehe ra nu iyó nyivi Israel, nyivi ra. ²⁴ Tacan tan iin quivi nyeḥe ra nu cañi iin ra Egipto can tsi iin ra Israel. Tacan tan tsaḥñi ra Moisés tsi ra Egipto can tyin cañi xaan ra tsi ra Israel, ra ñuu ra. ²⁵ Cuñi maa ra Moisés can tyin nyivi Israel can cutuñi iñi ñi tyin Nyoo jaquitsi tsi ra tyin jacacu ra tsi ñi. Maa tyin ña tuvj iñi ñi tsa tacan cua cuvi. ²⁶ Tacan tan tsa inga quivi can nyeḥe ra Moisés tsi uvi taahan ra Israel, cañi taḥan ra naha. Tan ra Moisés, cuñi ra tsa ña cañi taḥan ca ra naha, tan quitsaha catyí ra: “Ña vaha tsa cañi un tsi ra yañi un” catyí ra tsihin ra naha. ²⁷ Tacan tan ra tsa cañi tsi inga ra can tindaḥñi ra tsi ra Moisés, tan catyí ra tsihin ra: “¿Yóo tava tyiñu tsi un tyin cundaca ñaha un tan cuvi un juez tsa cuenda ndi? ²⁸ ¿A cuñi un cañi un tsi yu tumaa tsa tsaḥñi un tsi ra Egipto icu?” catyí ra tsihin ra Moisés. ²⁹ Cuhva tsa tsiñi ra Moisés tsa caḥan ra can, tsinḥu ra. Tan cuahán ra nda ñuu Madián. Ndacan ñiḥi ra ñasihi ra. Tan ndacan tsicoq uvi taahan sehe ra.

³⁰ Yaha uvi xico cuiya. Tacan tan iin quivi tsi ca nuu ra Moisés nu tsiqui yatyin yucu tsa nañi Sinaí. Tan nyeḥe ra cayú iin yutun iñu. Tacan tan quituvj iin ángel tsitsi ñuhu tsa cayú can. ³¹ Iyo xaan cuñi ra Moisés tsa nyehé ra yacan. Tan natuhva ra nu cayú iñu can tyin nyehe vaha ra, tan tsiñi ra ndusu Jutu Mañi yo. Tan catyí ndusu can tyehen: ³² “Yuhu cuvi Nyoo cuenda tsi tsaahnu un, Nyoo cuenda ra Abraham, tan ra Isaac, tan ra Jacob” catyí ndusu can tsihin ra. Tacan tan ra Moisés quitsaha ñiḥi ra tsihin tsa yuuhvi ra. Tan ña cana iñi ra nanyehe ra. ³³ Tan quitsaha catyí tucu Jutu Mañi yo tsihin ra: “Tava nditsan tsaḥa un tyin ñuhu nu tsañi un, ñuhu ii cuvi tsi. ³⁴ Yuhu nyehé yu tandiḥi tundoho tsa nyehé nyivi cuenda yu ñuhu Egipto can. Tan tsiñi yu ndusu ñi tsa tsacu tsa ñi. Yacan vatsi nuú yu tyin jacacu yu tsi ñi. Naha, tyin jacuhun yu tsi un nda Egipto” catyí Nyoo tsihin ra Moisés.

³⁵ Quivi can ña cuñi nyivi Israel tsi ra Moisés tsa cundaca ñaha ra tsi ñi, tan catyí

ñi tsihin ra: “¿Yóo tavá tyiñu tsi un tyin cundaca ñaha un tan cuvi un juez tsa cuenda ndi?”, catyí ñi tsihin ra. Vasu ña cuñí ñi tsa cundaca ñaha ra tsi ñi, maa tyin Nyoo tavá tyiñu ra tsi ra tyin cuvi ra nuu tsihin ñi, tan jacacu ra tsi ñi. Tyin tacan catyí ángel tsa quituví nuu ra nu iñu tsa cayú can. ³⁶ Tan ra Moisés can tavá tsi nyivi Israel ñuhu Egipto can tsihin tsa javahá ra tsa iyo tan seña ñuu can, tan nu yahá ñi nda nu Nduya Ñuhu Cuaaha, tan nu tsicá nuu ñi nu tsiquí tsitsi tsa uvi xico cuiya.

³⁷ Tan juvin ñi maa ra Moisés can cuvi ra tsa cahán tsihin nyivi Israel tan catyí ra tyehen: “Nyoo cua jaquitsi ra tsi iin ra cuvi ndusu yuhu ra tumaa jaquitsi ra tsi maa yu. Tan cua cuvi ra iin ra Israel tumaa maa yo. Tan taahán tsi tyaa yahvi yo tsi ra” catyí ra Moisés. ³⁸ Tan maa ra Moisés can cuahán ra tsihin nyivi tsii tsaahnu yo nu tsicá nuu ñi nu tsiquí can. Tan ra ican cuvi ra tsa cahán ángel tsihin nda yucu Sinaí. Tan ra ican naquihín cuenda ra tuhun Nyoo nácaa coo nyivi, tan tyaa ra tuhun can nu tutu tyin tacan tan coto yo.

³⁹ Maa tyin nyivi tsii tsaahnu yo ña tyaa yahvi ñi tsi ra. Tavá tsiyo ñi tsi ra. Tan cuñí ñi cunuhu ñi nda Egipto. ⁴⁰ Yacan cuenda cuhva tsa nyii ra Moisés yucu Sinaí, tan cahán nyivi tsihin ra Aarón tan catyí ñi: “Javaha taahan nyoo cuhun ityi nuu ndi. Tyin ña tsitó yo náa tahán ra Moisés, ra tsa tavá tsi yo Egipto” catyí ñi. ⁴¹ Tacan tan javahá ñi iin indiquí xuhun cuaan. Tan tsañí ñi quiti tyin cuhva cuenda ñi tsi tsi-toho can. Tan sii xaan cuñí ñi tsicoq ñi vico cuenda tsitoho tsa javahá ñi tsihin ndaha ñi. ⁴² Tacan tan Nyoo jatsiyo ra tsi ñi. Tan jañá ndaha ra tsi ñi tyin cua jacahnu ñi ñicanyii, tan yoo, tan tandihí tiñuu tsa iyó ityi andivi. Tyin tyehen tyaa ra cuví ndusu yuhu Nyoo nu libru tahán tsanaha:

Nyooho nyivi Israel, ¿A tsañí ndo quiti tyin cuhva cuenda ndo tsi maa yu tsitsi tsa uvi xico cuiya tsa tsicá nuu ndo nu tsiquí? Ñavin.

⁴³ Tyin jacahnu ndo tsi nyoo tsa nañí Moloc, tan jacahnu ndihí tucu ndo tsi nyoo tsa nañí Renfán tsa caá tumaa caá iin tiñuu tsa iyó andivi.

Juvin ñi maa ndo javahá tsitoho can, tan jacahnu tucu ndo.

Yacan cuenda yuhu cua tava yu tsi ndo ñuu ndo, tan cua jacuhun yu tsi ndo iin nu cañi ca ityi nuu ñuu Babilonia, catyí Nyoo tsihin ñi.

⁴⁴ Nu tsicá nuu tsii tsaahnu yo nu tsiquí can, tsicumí ra naha iin vehe ñuhu tsa tsinu tsihin ñi quiti. Tan tsitsi vehe can tsicumí ra naha tabla yuu tsa nyaá ley Nyoo nuu. Tan ra Moisés tavá tyiñu ra na javaha ñi vehe

ñuhu can ityi tsata, tumaa cuhva janahá maa Nyoo tsi ra. ⁴⁵ Yaha can tan ra Josué cuví ra ityi nuu tsihin ñi. Tacan tan quihín ñi vehe ñuhu can tan vatsí ñi tsihin tsi nu iyó yo ihya vityin. Tyin Nyoo tavá ra tsi nyivi tsicoq ñuhu ihya tan nacuhvá cuenda ra ñuhu ihya tsi ñi Israel, nyivi yo. Tan tsatyíñu ñi vehe ñuhu can nda cuanda quivi tsicoq ra rey David. ⁴⁶ Tan ra rey David ñihí ra tumañi iñi nuu Nyoo. Tan cuñí ra javaha ra iin vehe vaha nu coo Nyoo. Juvin ñi Nyoo jacahnu ra Jacob tahán tsanaha. ⁴⁷ Maa tyin ra Salomón javahá ra vehe Nyoo. ⁴⁸ Vasu ña iyó Nyoo tsitsi vehe ñuhu tsa javahá nyivi. Tumaa cahán ra cuví ndusu yuhu Nyoo tahán tsanaha tyehen:

⁴⁹ Andivi cuví tyayu nu nyaá yu ndacá ñaha yu.

Tan ñuhu ñayivi, yacan cuví nu tsañí tsaha yu.

Tatun javaha nyooho iin vehe ¿a cuñí maa ndo tyin coo yu tsitsi can?

¿Tan maa nda cua na ica vaha ndo tyin quitatu yu, cuñí maa ndo?

⁵⁰ ¿A ña tsitó ndo tyin maa yu javahá andivi tan ñuhu ñayivi? catyí ra cuví ndusu yuhu Nyoo jaha Nyoo.

⁵¹ Maa tyin nyooho —catyí ra Esteban— tacan ñi tuhvá maa ndo jandavá ndo iñi ndo. Tan ña cuñí ndo naquihín ndo tuhun caahán Nyoo. Tacan ñi ña tyaa yahvi ndo tsi Tatyí Ii Nyoo. Inducu ñi caá ndo tsihin tsii tsaahnu yo. ⁵² Tsii tsaahnu yo cuxaḡn ra naha tan tsañí ra naha tsi tandihí ra cuví ndusu yuhu Nyoo tahán tsanaha. Tan ra ican naha ra catyí tyin cua quitsi iin ra vaha. Tan tsa quitsi ra vityin, nyooho xico ñaha ndo tsi ra tsi ra xaan iñi tsi ra, tan tsañí ndo tsi ra. ⁵³ Nyooho naquihín cuenda ndo ley Nyoo tsa tsahá ángel tsi ndo, maa tyin ña cuñí ndo tyaa yahvi ndo tsa caahán ley can —catyí ra Esteban.

Nu tsiñí ra Esteban

⁵⁴ Tsa tsiñí ra cumí tyiñu vehe ñuhu cahnu naha ra tuhun ihya, xaan xaan cuñí ra naha, ndacua jacahyu nuhu ra naha nyehé ra naha tsi ra Esteban. ⁵⁵ Maa tyin ra Esteban tsitú ra tsihin Tatyí Ii Nyoo tan nanyehé ra ityi andivi. Tan nyehé ra tsa cahnu cuví Nyoo. Tan nyehé tucu ra tsi ra Jesús nyaá nyityi ra xiin cuaha Nyoo. ⁵⁶ Tacan tan catyí ra Esteban:

—jijhna ndo! Nyehé yu andivi tan ticohó tsi. Tan nyehé yu tsi ra Jesús, Rayí tsa quee nda gloria, nyaá nyityi ra xiin cuaha Nyoo —catyí ra Esteban.

⁵⁷ Maa tyin ra can naha ra tyasi ra naha soho ra naha, tsa ña cua tyaa soho ra naha tsa caahán ra Esteban. Tacan tan iin vaa ñi caná tsaa ra naha. Tan tandihí ra naha cuahán ra naha siqui ra Esteban. ⁵⁸ Tacan

tan tavaḡ ra naha tsi ra yuhu ñuu. Tan tsaḡñi ra naha tsi ra tsihin yuu. Tan ra tsa javahá tsa ña vaha can naha ra, nacoḡ ra nahá jahma tsa nyaá tsata ra naha tyin jaha cuenda iin ra tyuvaa tsa nañi Saulo. ⁵⁹ Tan tsitsi tsa cañi ra naha yuu tsi ra Esteban, quitsahaḡ tsicán tahvi ra Esteban tsi Nyoo, tyin tuvi iñi ra tyin tsa cua cúu ra. Tan catyí ra tyehen:

—Jutu Mañi yu Jesús, naquihin añima yu —catyí ra.

⁶⁰ Yahá can, tan tsicuiñi tsiti ra, tan tsaa caná tsaa ra tan catyí ra:

—Jutu Mañi yu, ña tyin cuenda un cuatyí tsa javahá ra naha —catyí ra.

Tsa yahá caḡan ra tacan, tan tsihḡ ra.

8

Nu tsinyaa ndaha ra Saulo tsi nyivi yihí cuenda ra Cristo

¹ Tan ra Saulo ña tsinú iñi ra tsi ra Jesús, tan ndoḡ ra vaha tsa tsaḡñi ra naha tsi ra Esteban.

Tan juven ñi quivi can quitsahaḡ nducú xaan nyivi tsi ñi yihí cuenda ra Cristo ñuu Jerusalén tyin cañi ñi tsi ñi. Tan tandiḡ ñi yihí cuenda ra Cristo tsinú ñi, cuahán ñi cua coo ñi tandiḡ ñuu tsa cayucú Samaria, tan tandiḡ ñuu tsa cayucú Judea. Maa tyin ra tavaḡ tyiñu ra Jesús ña quitaḡ ra naha. Ndoḡ ra naha Jerusalén. ² Tan juhva ra tsa nyicún vaha tsi Nyoo ñuu Jerusalén can, tsaḡan ra naha tsicutsi ra naha cuñu ñuhu ra Esteban nda nu ndaa cumi santu. Tan tsacuḡ xaan ra naha tsa cuenda tsa tsihḡ ra. ³ Tan ra Saulo can quitsahaḡ nyaá ndaha ra tsi nyivi yihí cuenda ra Cristo. Tan tsaḡan ra tan iin tan iin vehe ñi. Tan ixtá caa ra tsi ñi, tan tsaḡa cuenda ra tsi ñi tyin cuhun ñi vehe caa, tahan ñi rayi tan ñaha.

Nu caahán ra Felipe tuhun ra Cristo nu cuví Samaria

⁴ Tan tandiḡ ñi tsa quitaḡ ñuu Jerusalén can, caahán ñi tuhun Nyoo nácaa jacacú ra Cristo tsi yo, tandiḡ ñi ityi nu cuahán ñi. ⁵ Iin ra tsa nañi Felipe tsaḡ ra iin ñuu canyií Samaria. Tan quitsahaḡ caahán ra tuhun ra Cristo tsihin nyivi iyó ícan. ⁶ Tan tandiḡ ñi ñi cuñi ñi tan tyaá soho ñi tsa caahán ra. Tyin nyehé ñi tsa iyo tsa javahá ra. ⁷ Tyin cuaha xaan nyivi tsa yihí tatyí ña vaha tan nduvahá ñi; tatyí ña vaha tsa yihí tsi ñi, quitaḡ nahnu tan caná tsaa nahnu cuahán nahnu. Tan cuaha xaan nyivi coxo tan nyivi tsa ña cuví canda tan ña cuví caca, nduvahá ñi. ⁸ Yacan cuenda nyivi ñuu can, si xaan cuñi ñi.

⁹ Tan Samaria can iyó iin ra tasi nañi Simón. Tuhvá ra jandaví ñaha tsi nyivi. Catyí ra tyin cahnu xaan cuví ra. ¹⁰ Tandihí maa

nyivi, ñi cuca tan ñi ndaahvi, tyaá soho ñi tsa caahán ra. Tan catyí ñi:

—Nditsa nditsa, tyin tunyee iñi Nyoo iyó tsihin ra ihya —catyí ñi.

¹¹ Tyaá yahvi xaan ñi tsa caahán ra tyin tsa naha xaan jandaví ñaha ra tsi ñi tsihin tsa tasi. ¹² Tacan tan quitsi ra Felipe. Tan jacotoḡ ra tsi ñi nácaa ndacá ñaha Nyoo, tan nácaa cuhva tsa cahnu cuví ra Jesucristo. Tacan tan quitsahaḡ tsinú iñi tsi ra Cristo, rayi tan ñaha. Tan tsicoondutyá ñi. ¹³ Nda cuanda ra Simón can, tan natsinú iñi ra tsi ra Cristo, tan tsicoondutyá ra. Tan quitsahaḡ tsicá nuu ra tsihin ra Felipe. Tan iyo xaan cuñi ra nyehé ra tsa iyo tan seña tsa javahá ra Felipe.

¹⁴ Tacan tan ra tavaḡ tyiñu ra Jesús tsa iyó ñuu Jerusalén can ñihí tuhun ra naha tyin tsinú iñi nyivi Samaria tuhun Nyoo. Tacan tan jacuhun ra naha tsi ra Pedro tan ra Juan nda Samaria. ¹⁵ Tan tsa tsaḡ ra naha, quitsahaḡ tsicán tahvi ra naha tsi Nyoo tsa cuenda nyivi tsa yihí cuenda ra Cristo nda Samaria can tyin na quihin ñi Tatyí Ii Nyoo. ¹⁶ Tyin ñi can, ñaha ca nuu Tatyí Ii Nyoo siqui ñi. Maa tsa tsicoondutyá ñi ñi tsihin siyi Jutu Mañi yo Jesús. ¹⁷ Tacan tan ra Pedro tan ra Juan tyisoḡ ndaha ra naha jiñi ñi, tan naquihin ñi Tatyí Ii Nyoo. ¹⁸ Tan ra Simón can nyehé ra nu tyisoḡ ndaha ra tavaḡ tyiñu ra Jesús jiñi ñi, tan naquihin ñi Tatyí Ii Nyoo. ¹⁹ Tan quitsahaḡ caahán ra Simón tan catyí ra:

—¿Najava xuhun cuñi ndo tan cuhva ndo tunyee iñi tsi yo, cuví tyisoḡ ndaha yu jiñi nyivi, tan naquihin ñi Tatyí Ii Nyoo? —catyí ra Simón tsihin ra naha.

²⁰ Tacan tan nacahḡan ra Pedro tan catyí ra:

—Jaha cuenda coto cunaa un tsihin xuhun cun. ¿Nacuenda tsicá iñi un tyin cuví jata yo ndatu tsa tsaḡa Nyoo tsi yo? Ña cuví.

²¹ Yooḡo, ña taahán tsi tyihí un tsi un tsihin tyiñu ihya. Tyin añima un ña vaha nuu Nyoo. ²² Ndu uvi iñi cuhva tsicá iñi un, tyin cahnu xaan tsa caquiñi tsicá iñi un. Tan ndacan tahvi tsi Nyoo na jaha ra tucahnu iñi tsi un tsa cuenda tsa tsicá iñi un tsitsi añima un. ²³ Tyin nyehé yu tyin tsitsi añima un iyó cuaha tsa caquiñi tan nyiyo iñi un. Tan tsa caquiñi can ña tsaḡa coto un tsa vaha —catyí ra Pedro tsihin ra Simón.

²⁴ Tacan tan nacahḡan ra Simón tan catyí ra:

—Ndacan tahvi maa ndo tsi Jutu Mañi yo tsa cuenda yu, na ña quitsi tandiḡ tsa caahán un tsihin yu siqui yu —catyí ra Simón tsihin ra Pedro.

²⁵ Tsa yahá can tan ra tavaḡ tyiñu ra Jesús tsaḡa cuenda ra naha tandiḡ tsa nyehé ra naha tsa javahá ra Cristo nu tsicá ra

nu ñuhu ñayivi. Tan cahān ra naha tuhun Nyoo. Tacan tan cuanuhū ra naha nda ñuu Jerusalén. Tan tandihī ñuu tsa cayucú Samaria nu yahā ra naha jacotō ra naha nácaa javahá yo tan cacu yo.

Nu caahán ra Felipe tuhun Nyoo tshin iin ra ñuu Etiopía

²⁶ Tsa yahā yacan tan cahān iin ángel Nyoo tshin ra Felipe, tan catyí ra:

—Ndqvita tan cūhun cun ityi sur, ityi queé nda Jerusalén tan cuahán nda Gaza —catyí ángel can tshin ra.

Yacan cuví ityi tsa yahá nu tsiqui. ²⁷ Tacan tan ra Felipe nduvitā ra tan cuahán ra. Tan ityi cuahán ra ñihj tahan ra tshin iin ra ñuu Etiopía. Tan cuví ra can eunuco [tyin ña cuví coo ñasihī ra]. Tan cuví ra iin ra cumí tyiñu cahnu ñuu Etiopía, tyin yihí ndaha ra xuhun ña Candace, ñaha tsa cuví reina ñuu Etiopía can. Tan tsahan ra Etiopía can tsijacahnu ra tsi Nyoo nda ñuu Jerusalén. ²⁸ Tan ityi cuanuhū ra nda ñuu ra nyaá ra siqui carreta ra. Tan cahví ra nu libru tsa tyaā ra Isaías, ra cuví ndusu yuhu Nyoo tahañ tsanaha. ²⁹ Tacan tan Tatyí li Nyoo cahān tshin ra Felipe:

—Nātuhva nu carreta can.

³⁰ Tan cuhva tsa natuhvā ra Felipe nu carreta can, tsifñj ra tyin cahví ra Etiopía can nu libru tsa tyaā ra Isaías. Tan tsicā tuhun ra Felipe tsi ra tan catyí ra:

—¿A cutuñí iñi un tsa caahán tsi? —catyí ra.

³¹ Tacan tan nacahān ra Etiopía can tan catyí ra:

—¿Nacaa cutuñí iñi yu tan yoñi jacuahá tsi yu? —catyí ra tshin ra Felipe.

Tan tsicān ra tsi ra Felipe na ndaa ra tan cunyaa ra tshin ra.

³² Tan nu cuahán cahví ra, catyí tsi tye-hen:

Tsahñj ra naha tsi ra tumaa tuhvā ra naha tsahñi mbee ticatyí.

Tyin tumaa ña tsacú mbee tatun cua xatya ra naha ixi ti, tan tumaa tsa ña tsacú ti tun cua cahñi ra naha tsi ti,

tacan cuví ra can tyin nyehe ra tundoho tan nduve náa cahān ra.

³³ Janduluhū ra tsi ra nuu ra naha tan yoñi cuñí javaha iin tsa vaha tshin ra.

Tan tsa cuenda nyivi cuví tata ra, yoñi caahán tsa cuenda ñi.

Tyin ña tsicoq sehe ra tan tshij ra.

Tacan catyí tsi nu tutu tsa cahví ra can.

³⁴ Tacan tan ra Etiopía quitsahā tsicā tuhun ra tsi ra Felipe, tan catyí ra:

—Jaha tumañi iñi tsi yu, tan catyí tuhun un luxu tshin yu, ¿yóo tuhun caahán ra ndusu yuhu Nyoo ihya? ¿A tuhun maa ra, o yóo tuhun caahán ra? —catyí ra tshin ra Felipe.

³⁵ Tacan tan ra Felipe quitsahā caahán ra siqui tuhun tsa tsa yahā cahví ra can, tan tsahā cuenda ra tsi ra tyin tuhun ra Jesús caahán ra ndusu yuhu Nyoo can. Tan tsahā cuenda ra tyin ra Jesús cuví ra jacacú tsi yo.

³⁶ Tacan tan tsa cua yaha ra naha nu yihí ndutya. Tan ra Etiopía can quitsahā caahán ra tshin ra Felipe tan catyí ra:

—Ihya yihí ndutya. ¿A ña cuví coondutya yu ihya? —catyí ra.

³⁷ Tacan tan nacahān ra Felipe tshin ra Etiopía, tan catyí ra:

—Tatun tsinú iñi un tshin tsa nii añima un, cuví coondutya un —catyí ra tshin ra.

Tacan tan nacahān ra can, tan catyí ra:

—Tsinú iñi yu tyin Sehe Nyoo cuví tsi ra Jesucristo —catyí ra.

³⁸ Tacan tan ra can caahán ra tshin musu ra na jacuñi ra carreta can. Tan nduvi taahan ra naha nuu ra naha. Tan quihvī ra naha tsitsi ndutya. Tacan tan jacoondutya ra Felipe tsi ra Etiopía. ³⁹ Tan cuhva tsa quitā ra naha tsitsi ndutya can, tan Tatyí li Jutu Mañi yo naquihñj ra tsi ra Felipe. Tan ra Etiopía can ña nyehe ra numaa ityi cuahán ra Felipe. Maa tyin si xaan cuñí ra, cuanuhū ra. ⁴⁰ Tan ra Felipe tsaā ra ñuu Azoto. Tan cuahán ra tan iin tan iin ñuu, tan caahán ra tuhun ra Cristo tshin nyivi nda cuanda tsa tsaā ra ñuu Cesarea.

9

Nu natsinū iñi ra Saulo tsi ra Cristo (Hechos 22.6-16; 26.12-18)

¹ Tan tsicā ra Felipe caahán ra tuhun ra Cristo tshin nyivi, tan ra Saulo ña jandihí maa ra tsa nducú cahñi ra tsi nyivi yihí cuenda Jutu Mañi yo. Tan tsahan ra nu nyaá ra jutu tsaahnu cuví ityi nuu, ² tsindacān ra iin tutu tsi ra jutu, tyin nacuhva ra ndatu tsa cūhun ra vehe ñuhu ñuu Damasco, tan tñin ra tsi ñi nyicún tsi ra Cristo, tan quitsi ndaca ra tsi ñi vehe caa ñuu Jerusalén, tahan ñi rayi tan ñaha. Ñihj ra Saulo tutu can tan cuahán ra. ³ Tan tsa cua tsaā ra ñuu Damasco, sana iñi ra, tan quitsj ñuhj ityi andiví, jandunditsjn tsi tani# cahnu maa nu cuahán ra. ⁴ Tacan tan ra Saulo nduvā ra nu ñuhu. Tan tsifñj ra iin ndusu tsa catyí tye-hen:

—Saulo, Saulo, ¿nacuvi tyin nyaá ndaha un tsi yu? —catyí ndusu can tshin ra.

⁵ Tacan tan nacahān ra Saulo:

—¿Yóo cuví yooho, taa? —catyí ra, tsicā tuhun ra.

Tacan tan nacahān ndusu can tshin ra, tan catyí tsi:

—Yuhu cuví ra Jesús, ra tsa nyaá ndaha un. Juvñi ñi tsi maa un jañicueehé un, tumaa jañicueehé indiqui tsi ti tsa tsañi ihñi ti nu tsa tutsi ra naha tsi ti —catyí ra Jesús tshin ra.

⁶ Tacan tan quitsahā nihí ra Saulo tsihin tsa yuuhví ra. Tan catyí ra:

—Jutu Mañi yu, ¿náa cuñi un tyin javaha yu? —catyí ra.

Tacan tan Jutu Mañi yo nacahan ra tsihin ra tan catyí ra:

—Nduvita tan cahun un tsitsi ñuu Damasco. Tan ican cua cahan iin ra tsa cua cahan tsihin un náa taahán tsi javaha un —catyí ra Jesús tsihin ra Saulo.

⁷ Tan ra tsa cuahán tsihin ra Saulo, nayuhví xaan ra naha. Tan ña ñihí ra naha náa tuhun cahan ra naha tyin tsiñi ra naha ndusu can maa tyin yoñi nyehe ra naha.

⁸ Tacan tan ra Saulo nduvita ra. Tan tsa nuñā ra tinuu ra, ña cuví maa nanyehé ra tyin cuaā ra jahā Nyoo. Yacan cuenda, ra tsa cuahán tsihin ra tñin ra naha ndaha ra tan tsindaca ra naha tsi ra ñuu Damasco.

⁹ Ican tsinyi ra uñi quivi. Tan ña cuví maa nanyehé ra. Tan ña tsatsj ra, tan nduve maa náa tsihi ra.

¹⁰ Ñuu Damasco can iyó iin ra tsinú iñi tsi Nyoo, nañi ra Ananías. Tan nyehe ra iin tsa nyehe ra nu cahan Jutu Mañi yo tsihin ra tan catyí ra:

—¡Ananías! —catyí Jutu Mañi yo tsihin ra.

Tacan tan nacahan ra Ananías, tan catyí ra:

—Ihya nyaá yu, Jutu Mañi yu —catyí ra tsihin ra.

¹¹ Tacan tan Jutu Mañi yo catyí ra:

—Nduvita, tan cahun cun ityi cahnú tsa nañi Ndoó ñi. Tan nanducu un vehe ra tsa nañi Judas. Tan ndāca tuhun un nu maa tahan iyó ra tsa nañi Saulo, ra ñuu Tarso. Tyin tsicán tahvi ra tsi yu. ¹² Tan nyehe ra iin tsa nyehe ra, tan nyehe ra tsi yooho, Ananías, tyin tsaā un nu nyaá ra, tan tyiso ndaha un jiñi ra tyin tacan tan nanyehe ra inga tsaha —catyí Jutu Mañi yo tsihin ra Ananías.

¹³ Tacan tan nacahan ra Ananías tan catyí ra:

—Jutu Mañi yu, cuaha xaan nyivi caahán ñi tsihin yu tyin nyivi yihí cuenda un ñuu Jerusalén cuaha xaan tsa ña vaha javaha ra Saulo can tsihin ñi. ¹⁴ Tan vityin vatsí ra ihya tyin tsahā ra jutu tsahnu tsa cuví ityi nuu ndatu tsi ra tsa tyihí ra tsi nyivi tsicán tahvi tsi un vehe caa —catyí ra Ananías tsihin Jutu Mañi yo.

¹⁵ Maa tyin Jutu Mañi yo catyí ra tsihin ra Ananías:

—Cuaahan tyin yuhu tsa nacatsj vaha yu tsi ra Saulo can, tyin cua cahan ra tuhun yu tsihin nyivi inga ñuu, tan tsihin rey nyivi can, tan juvin ñi cahan ndihi ra tuhun yu tsihin nyivi Israel. ¹⁶ Yuhu cua jacuaha yu tsi ra nácaa tsa cuaha tundocho cua nyehe ra

tsa cuenda yu —catyí Jutu Mañi yo tsihin ra Ananías.

¹⁷ Tacan tan cuahán ra Ananías vehe nu nyii ra Saulo. Tsaā ra yuvehe can tan quihví ra tsitsi vehe. Tan tyiso ndaha ra jiñi ra Saulo, tan catyí ra tsihin ra:

—Yañi Saulo, Jutu Mañi yo ra Jesús, ra tsa quituvj nuu un ityi vatsi un, ra ican jaquitsj tsi yu tyin nanyehe un inga tsaha. Tan cua jacutu ra tsi un tsihin Tatyí Ii ra —catyí ra Ananías tsihin ra Saulo.

¹⁸ Tan juvin ñi cuhva can tan coyō tsa caá tumaa caa yaa tyaca tsa tyasj tinuu ra Saulo. Tacan tan cuví nanyehé ra. Yaha can tan tsicoondutyā ra. ¹⁹ Yaha can tan nacatsj ra, tan ndunyeē cuñu ñuhu ra inga tsaha. Tan ndoō ra juhva quivi tsihin nyivi tsa yihí cuenda ra Cristo ñuu Damasco.

Nu quitsahā caahán ra Saulo tuhun ra Cristo tsihin nyivi ñuu Damasco

²⁰ Tacan tan numi ñi quitsahā caahán ra Saulo tuhun ra Cristo tsihin nyivi tandihí vehe ñuhu nyivi Israel ñuu Damasco. Tan catyí ra tyin ra Jesús, Sehe Nyoo cuví tsi ra.

²¹ Tandihí maa nyivi tsa tsiñi tsa caahán ra, iyo xaan cuñi ñi. Tan natuhún tahan ñi tan catyí ñi:

—¿A ñavin ra ihya cuví ra tsa tsinyaa ndaha tsi nyivi tsicán tahvi sivi ra Jesús ityi ñuu Jerusalén? ¿A ñavin juvin ra cuví ra tsa vatsi tñin tsi nyivi iyó ihya tyin cuhva cuenda ra tsi ñi tsi ra jutu tsa cuví ityi nuu naha ra? —catyí ñi.

²² Maa tyin ra Saulo ñihi ca caahán ra tuhun ra Cristo tsihin tsa ñi iñi ra. Tan janahá ra tsi nyivi Israel tsa iyó ñuu Damasco tyin ra Jesús cuví ra Cristo, tan Sehe Nyoo cuví tsi ra. Tan ñi Israel ña ñihí ñi nácaa nacahan ñi tsihin ra.

Nu tsinū xeehe ra Saulo nuu ra Israel naha ra

²³ Tsa yaha juhva quivi, tan ra Israel tsa ña tsinú iñi tsi ra Cristo natuhun tahan ra naha tyin cua cahñi ra naha tsi ra Saulo.

²⁴ Ñiñu tan nduvi ndatú ra naha tsi ra yuvehe cahnú ñuu can. Maa tyin ra Saulo tsito ra tuhun can. ²⁵ Tacan tan nyivi tsa tsinú iñi tsi ra Cristo ñuu can tyihj ñi tsi ra tsitsi iin tyica cahnú. Tan tsacuaa januñ ñi tsi ra ityi ventana iin vehe tsa nyaá yuhu cora ñuu can. Tacan tan tsinū ra cuahán ra.

Nu nyii ra Saulo ñuu Jerusalén

²⁶ Quivi tsa tsaā ra Saulo ñuu Jerusalén, cuñi ra ndu iin ra tsihin nyivi tsa yihí cuenda ra Cristo. Maa tyin tandihí maa ñi tan yuuhví ñi nyehe ñi tsi ra. Tyin ña tsinú iñi ñi tsa yihí ra cuenda ra Jesús. ²⁷ Maa tyin iin ra tsa nañi Bernabé, quihñ ra tsi ra. Tan tsahā cuenda ra tsi ra tsi ra tava tyiñu ra Jesús. Tan nacatyj tuhun ra tsihin ra naha

nácaa nyehē ra Saulo tsi Jutu Mañi yo ra Cristo itiyi ñuu Damasco; tan nacatȳi tuhun ra nácaa cahan̄ Jutu Mañi yo tsihin ra. Tan nácaa cahan̄ ra tuhun ra Cristo tsihin tsa ña yuuhví ra nda ñuu Damasco. ²⁸ Tacan tan ndoō ra Saulo ñuu Jerusalén tsihin nyivi tsa yihí cuenda ra Cristo. ²⁹ Tan caahán ra tuhun Jutu Mañi yo tsihin tsa ña yuuhví ra. Tan natuhún xaan ra tuhun ra Cristo tsihin ra Israel tsa caahán yuhu griego. Maa tyin ra can naha ra nducú cahñi ra naha tsi ra. ³⁰ Maa tyin tsitō ra hermano can naha ra tyin tacan tsicá iñi ra can naha ra. Yacan cuenda tsindacá ra hermano naha ra tsi ra Saulo nda ñuu Cesarea. Tacan tan jacuhun̄ ra naha tsi ra nda Tarso, ñuu ra.

³¹ Tacan tan nyivi yihí cuenda ra Cristo tsa iyó tandihí ñuu tsa cayucú Judea, tan Galilea, tan Samaria, sii xaan cuñi ñi tyin ña cuxaán ca nyivi tsi ñi. Tan ndunyeē ca iñi ñi tsihin tunyee iñi tsi Nyoo tyin tyaá yahví vaha ñi cuhva cahan̄ ra, tyin yuuhví ñi coto ña cua javaha ñi cuhva cuñi ra. Iyó ñi tsihin tsa jatyinyeē Tatyí li Nyoo tsi ñi. Tan nducuahá ca ñi tan iin tan iin quivi.

Nu nduvahá ra Eneas

³² Tacan cuv̄i tan ra Pedro tuhvá ra cuahán cua nyehe nácaa yucú ra hermano naha ra tan iin tan iin ñuu. Tan tsahan̄ tucu ra tsinyehē ra nu iyó nyivi yihí cuenda ra Jesucristo ñuu Lida. ³³ Ican nañih̄i ra tsi iin ra cuuhví, nañi ra Eneas. Tan tsa una cuiya canyiī ra tan ña cuv̄i maa nacandá ra tyin naxij̄i cuñu ñuhu ra. ³⁴ Tan ra Pedro catyí ra tsihin ra:

—Yooho Eneas, ra Jesucristo janduvahá ra tsi un. Nduvita tan natuvi yuvi un —catyí ra tsihin ra.

Tan juvin̄ ñi cuhva can tan nduvitā ra Eneas. ³⁵ Tan nyehē tandihí nyivi ñuu Lida can tyin tsa nduvahá ra. Tan nyehē tucu nyivi ñuu Sarón. Tacan tan ñi can, natsinú iñi ñi tsi Jutu Mañi yo. Tan nacō ñi tuhun tsahnu tsa tsinu iñi ñi nda ndó cumañi ca coto ñi tuhun ra Cristo.

Nu nandotō ña Dorcas

³⁶ Quivī can tsicoō iin ñaha tsinú iñi tsi ra Cristo ñuu Jope. Tan nañi ña Tabita, tan tsihin̄ yuhu griego, nañi ña Dorcas. Tan tuhvá ña javahá tsa vaha tsihin nyivi, jatyinyeē ña tsi nyivi ndaahví. ³⁷ Tan quivī can ña Dorcas quih̄in̄ cuhehe tsi ña tan tsih̄i ña. Tan tsa yahá jacutȳi ñi tsi ña, tsicaqūin̄ ñi tsi ña tsitsi cuarto nu tsinu uvi pisu. ³⁸ Yatyin̄ ñi canyiī ñuu Jope tsihin̄ ñuu Lida, nu nyiī ra Pedro. Tan nyivī tsa yihí cuenda ra Cristo ñuu Jope can tsitō ñi tyin nyiī ra Pedro ñuu Lida. Tacan tan jacuhun̄ ñi tsi uvi taahan̄ ra na cucana ra naha tsi ra Pedro tyin na cuhun̄ ra ñuu Jope tsa numi ñi. Tan tsaá ra naha nu nyiī ra tan catyí ra naha tsihin ra:

—Janumi ñi tan cuhun̄ un tsihin̄ ndi nda ñuu Jope —catyí ra naha tsihin ra.

³⁹ Tacan tan ra Pedro nduvitā ra tan cuahán ra tsihin ra naha. Tan cuhva tsa tsaá ra naha, tsindacá ra naha tsi ra nda cuarto nu canyiī ndiyi can. Tan tandihí maa ñiñaha tsa tsih̄i yiī natuhv̄a ñi tsata ra, tan tsacú tsa ñi. Tan janahá ñi jahma tsa quicū ña Dorcas tsa tsicoō ña. ⁴⁰ Tacan tan ra Pedro tavā ra tsi tandihí nyivi cuarto can. Tan tsicuiñī tsiti ra tan quitsahá tsicán tahvi ra tsi Nyoo. Tacan tan nanyehē ra tsi ñaha tsa tsih̄i can canyiī ña. Tan quitsahá catyí ra tsihin̄ ña:

—Hermana Tabita, nduvita —catyí ra tsihin̄ ña.

Tacan tan nanyehē ña. Tan tsa nyehē ña tsi ra Pedro, tsinyaá ña. ⁴¹ Tacan tan ra Pedro tiīn ra ndaha ña tan janduvitā ra tsi ña. Tacan tan caná ra tsi ra hermano naha ra, tan tsihin̄ ñiñaha tsa tsih̄i yiī. Tan nacuhv̄a cuenda ra tsi ña tsi ñi tyin tsa nandotō ña. ⁴² Yahá can tan tandihí maa nyivi ñuu Jope tsitō ñi tyin nandotō ña can. Tan cuaha xaan ñi natsinú iñi tsi Jutu Mañi yo. ⁴³ Tan ra Pedro ndoō ra juhva quivī ñuu can, nyiī ra yuvehe iin ra tsa janduvitā ñīī quiti, nañi ra Simón.

10

Ra Pedro tsihin ra Cornelio

¹ Ñuu Cesarea iyó iin ra tsa nañi Cornelio. Tan cuv̄i ra ra yihí ndaha iin ciento andaru. Tan tsa tandihí andaru tsa yihí ndaha ra can nañi tsi Italiano. ² Tan ra Cornelio can yuuhví ra tsi Nyoo. Maa ra tan tsihin tandihí nyivi ra vaha xaan jacahnú ñi tsi Nyoo. Tan inga tucu tuhun, cuaha xaan xuhun tsahá ra tsi nyivi ndaahví ñuu Israel, tan tandihí quivī tsicán tahvi ra tsi Nyoo. ³ Tan iin quivī cuhva caa uñi tsa tseñi, nyehē ra iin tsa nyehē ra. Tan ican cuv̄i nu catsi xaan nyehē ra iin ángel tsa jacuhun̄ Nyoo nu nyiī ra, tan catyí tsi tsihin ra:

—iYooho Cornelio! —catyí ángel can tsihin ra.

⁴ Tacan tan nanyehē ra Cornelio tsi ángel can. Tan nayuhví xaan ra. Tan quitsahá tsicá tuhun ra tan catyí ra:

—¿Náa tsa cuv̄i ihya, taa? —catyí ra tsihin ángel can.

Tacan tan ángel can quitsahá caahán ra tsihin ra:

—Nyoo tsiñī ra tsa caahán un tan tsa tsicán un tsi ra. Tan taahán iñi ra tyin jatyinyeē xaan tsi nyivi ndaahvi. ⁵ Tan vityin cuñi tsi tsa tava tyiñu un na cuquih̄in̄ tyiñu tsi iin ra tsa nañi Simón Pedro nda ñuu Jope. ⁶ Ra ican cua cahan̄ tsihin un náa taahán tsi javaha un. Iyó ra vehe ra tsa nañi tucu Simón, cuv̄i ra ra janduvitā ñīī quiti. Tan iyó vehe ra yuhu ndutya ñuhu —catyí

ángel can tsihin ra Cornelio, tan cuahán ángel can.

⁷ Tsa yahá cuahán ángel can, ra Cornelio caná ra tsi uvi taahan musu ra, tan tsihin iin andaru tsa jahá cuenda tsi ra. Tan yihí andaru can cuenda Nyoo. ⁸ Tandihí maa tsa cahán ángel can tsihin ra Cornelio tan nacatyí tuhun ra tsihin nduñí taahan ra can naha ra. Tan jacuhun ra tsi ra naha ñuu Jope.

⁹ Tuvj inga quivi tan cuahán ra can naha ra. Tan tsa ndi cumañi ca tsaa ra naha ñuu Jope, tan ra Pedro ndaa ra jiñi vehe tyin cua ndacan tahvi ra tsi Nyoo, tan tsa cua tahan hora cuví cuhva can. ¹⁰ Tan tsaá soco tsi ra tan tsiocó xaan ra. Maa tyin tsitsi tsa tsinú tsa catsi ra, quitsahá nyehé ra iin tsa janahá Nyoo tsi ra. ¹¹ Tan nyehe ra tyin ticohó andivi. Tan nyehe ra andivi tyin vatsi nuú iin jahma cahnu xaan ityi nu ñuhu. Tan tandihí tsa cumí tutun tsi nuuhñi nuuhñi ñi. ¹² Tan tsitsi jahma can yihí tandihí maa nuu quiti tsa cumi taahan tsaha, tan tandihí nuu coo, tan saa. ¹³ Tacan tan tsiñj ra iin ndusu tsa caahán tsihin ra:

—Pedro, ndúvita tan cahñi quiti ihya, tan catyi un —catyi ndusu can tsihin ra.

¹⁴ Maa tyin ra Pedro nacahan ra tan catyi ra:

—Ña cua catsi yu, Jutu Mañi yu. Yuhu ña tuhvá yu catsi quiti tsa catyi ley tyin ña vaha catsi ndi —catyi ra Pedro.

¹⁵ Tacan tan quitsahá caahán nyico ndusu can tsihin ra inga tsaha:

—Ña catyi un tyin ña catsi un tsa tsa janduvahá yu —catyi ndusu can tsihin ra.

¹⁶ Uñi taahan tsaha nyehe ra yacan jahá Nyoo. Tacan tan jahma cahnu can nandaa nyico can ityi andivi. ¹⁷ Tan tsitsi tsa tsicá iñi ra Pedro náa cuñi tsi catyi tsa nyehe ra can, tsaá musu tsa jacuhun ra Cornelio naha ra. Tan tsicá tuhun ra naha numaa tahan iyó vehe ra nañi Simón. ¹⁸ Tan tsa tsaá ra naha ityi yuvehe tsicá tuhun ra naha tatun ican iyó iin ra tsa nañi Simón Pedro. ¹⁹ Tan ra Pedro tsicá xaan iñi ra náa cuñi tsi catyi tsa nyehe ra. Tacan tan Tatyí Ii Nyoo quitsahá caahán tsihin ra, tan catyi tsi:

—Nyehe Pedro, uñi taahan ra vatsi nanducú tsi un. ²⁰ Ndúvita tan cuhun can tsihin ra naha, tan ña çaça iñi un tyin maa yu jaquitsi tsi ra ihya naha ra —catyi Tatyí Ii Nyoo tsihin ra Pedro.

²¹ Tacan tan ra Pedro nuu ra nu yucú ra tsa jacuhun ra Cornelio, tan catyi ra tsihin ra naha:

—Yuhu cuví ra tsa nanducú ndo. ¿Náa tyiñu vatsi ndo?

²² Tacan tan nacahan musu ra Cornelio tan catyi ra naha:

—Ra Cornelio, ra yihí ndaha tsi ndi, ra ican jaquitsi tsi ndi. Vaha xaan nyivi cuví ra. Tan tyaa yahvi xaan ra tsi Nyoo. Tan tandihí maa ra ñuu Israel tsa iyó ityi Judea ihya cuñi ra naha tsi ra tsa cuenda tsa vaha nyivi cuví ra. Tan iin ángel Nyoo cahán tsihin ra tyin na cana ra tsi un, tyin cuhun un yuvehe ra tyin tacan tan tyaa soho ra tuhun tsa cua cahán un tsihin ra —catyi musu ra Cornelio tsihin ra Pedro.

²³ Tacan tan tsaá ra Pedro quihvi ra naha tsitsi vehe. Tan ndoo ra naha tsihin ra tsacuaa can. Tan tsa tuvi inga quivi tan cuahán ra tsihin ra naha. Tan cuahán juhva ra hermano tsa iyó ñuu Jope can tsihin ra naha.

²⁴ Tsa inga quivi tsaá ra naha nda ñuu Cesarea un ndatú ra Cornelio tsi ra naha tsihin tandihí nyivi ra, tan tsihin tandihí ra vaha iñi tsi ra. ²⁵ Cuhva tsa tsaá ra Pedro yuvehe ra Cornelio, quita ra Cornelio tan caahán ra tsihin ra. Tan tsiñj tsi ra nuu ra Pedro tan quitsahá jacahnú ra tsi ra. ²⁶ Maa tyin ra Pedro cañihí ra tsi ra, tan catyi ra tsihin ra:

—Ndúvita tyin tahan ñi cuví yooho cuví tucu yuhu; ñavin Nyoo cuví yu —catyi ra tsihin ra.

²⁷ Tan tsitsi tsa caahán ra Pedro tsihin ra, tan quihvi ra tsitsi vehe tan nanyehe ra tyin cuaha xaan nyivi ndu iin tsitsi vehe can.

²⁸ Tacan tan catyi ra Pedro tsihin ñi:

—Nyooho tsitó ndo tyin ley nyuhu tsa cuví ndi nyivi Israel, catyi tsi tyin ña taahán tsi tsa ndu iin ndi tsihin nyivi tsa ñavin nyivi Israel cuví. Tan ndi tsitsi vehe ñi ña cuví quihvi ndi. Maa tyin Nyoo janahá ra tsi yu, tan catyi ra: “Yooho, ña catyi un tsihin nyivi tyin ndi intuhun ñi tan ña vaha ñi” catyi Nyoo tsihin yu. ²⁹ Yacan cuenda quivi tsa caná ndo tsi yu, numi ñi vatsi yu. Tan vityin cuñi yu coto yu nacuenta caná ndo tsi yu —catyi ra Pedro.

³⁰ Tacan tan nacahan ra Cornelio, tan catyi ra:

—Tsa iyó cumi quivi vityin, tumaa cuhva ihya tsa nyaá yu yuvehe tan ña tsatsi yu tan tsicán tahvi yu tsi Nyoo tsa tseñi. Tan quituvj iin rayi nuu yu. Nditsi ra jahma xiñu. ³¹ Tan catyi ra tsihin yu: “Yooho Cornelio, Nyoo tsiñi ra tsa tsicán tahvi un tsi ra. Tan nducuhun iñi ra tsa javahá un tyin jatyinyeé xaan un tsi nyivi ndaahvi. ³² Tava tyiñu tsi musu un na cuhun ra naha nda ñuu Jope cuquihin ra naha tsi ra Simón Pedro na quitsi ra ihya. Nyií ra yuvehe ra tsa nañi Simón, iin ra tsa janduvitá ñi quiti. Tan vehe ra can nyaá tsi yatin ñi yuhu ndutya ñuhu. Tan na quitsi ra Simón Pedro tan cahan ra tsihin un” catyi ángel can tsihin yu. ³³ Tacan tan numi ñi tava tyiñu yu tyin na cuquihin tyiñu tsi un. Tan vaha tyin vatsi

un. Tan vityin tandihí yo ndu iín yo nuu Nyoo. Tan cuñí ndi tyaá soho ndi tandihí tsa catyí Jutu Mañi yo tsihin un tyin cuhva cuenda un tsi ndi —catyí ra Cornelio tsihin ra Pedro.

Nu caahán ra Pedro tuhun ra Cristo yu-vehe ra Cornelio

³⁴Tacan tan quitsahá caahán ra Pedro tan catyí ra:

—Vityin cutuñí iñi yu tyin Nyoo cuñí ra tsi tandihí nyívi, tahañ ñi nyívi Israel, tan nyívi tsa ñavin nyívi Israel cuví. Ña tava tsiyo ra tsi ndi intuhun maa yo. ³⁵Tyin naquihín ra tsi yo tatun tyaá yahvi yo tsi ra, tan javahá yo tsa vaha. ³⁶Nyoo cahañ ra tsihin nyuhu tsa cuví ndi tata ra Israel, tan jacoto ra tyin cuví coo vaha yo tsihin ra tsa cuenda ra Jesucristo. Tan maa ra ndacá ñaha tsi tandihí maa yo. ³⁷Nyooho tsitó vaha ndo tandihí tsa cuví ñuu nyívi Israel ñuu yu, nácaa quitsahá tsi nu cuví Galilea tsa yaha tsa cahañ ra Juan tuhun Nyoo tsihin nyívi, tan jacoondutya ra tsi ñi. ³⁸Tsitó ndo nácaa tsahá Nyoo tunyee iñi Tatyí Ii ra tsi ra Jesús, ra ñuu Nazaret. Tan tsicá ra javahá ra tsa vaha, janduvahá ra tsi tandihí nyívi tsa nyehé tundocho jahá nu ña vaha. Tyehen javahá ra Jesús tyin Nyoo nyaá ra tsihin ra. ³⁹Nyuhu cuví ndi tsandaa tsa cuenda tandihí tsa javahá ra Jesús ñuu Jerusalén tsihin tandihí ca ñuu tsa cayucú Judea. Yaha can tan ticaá ra naha tsi ra nu cruu tan tsahñi ra naha tsi ra. ⁴⁰Maa tyin tsa tsinu uñi quívi janandoto Nyoo tsi ra. Tan quituvj ra nuu ndi. ⁴¹Ña quituvj ra nuu tandihí nyívi. Maa tyin quituvj ra nuu nyuhu tyin nacatsj ra tsi ndi nda tsanaha tyin cuví ndi tsandaa cuenda ra. Nyuhu tsatsj ndi tan tsihí ndi tsihin ra tsa yaha tsa nandoto ra. ⁴²Tan tava tyiñu ra tsi ndi tyin cahan ndi tuhun ra tsihin nyívi. Tan cuví ndi tsandaa tyin Nyoo tava tyiñu ra tsi ra Jesús tyin cuví ra juez tsi nyívi tsa nyito tan nyívi tsa tsihí. ⁴³Tan tacan tucu nda tsanaha, cahañ tandihí ra cuví ndusu yuhu Nyoo tuhun ra Jesús. Tan catyí ra naha tyin tandihí nyívi tsa tsinú iñi tsi ra Jesús, cua jaha Nyoo tucahnu iñi cuatyí ñi tsa cuenda maa ra.

Nu naquihín nyívi Tatyí Ii Nyoo tan ñavin nyívi Israel cuví ñi

⁴⁴Ndi caahán ca ra Pedro tan nuñ Tatyí Ii Nyoo siqui tandihí ñi tsa tyaá soho tsa caahán ra. ⁴⁵Tan ra Israel tsa yihí cuenda ra Jesús tsa tsaá tsihin ra Pedro iyo xaan cuñí ra naha tyin tsahá ndihí tucu Nyoo Tatyí Ii ra tsi nyívi tsa ñavin nyívi Israel cuví. ⁴⁶Tyin tsiñi ra naha caahán ñi inga yuhu tan jacahnú ñi tsi Nyoo. ⁴⁷Tacan tan quitsahá caahán ra Pedro tsihin ra tsa tsaá tsihin ra:

—Ña cuví casi yo nu coondutya nyívi ihya. Tyin tsa naquihín ñi Tatyí Ii Nyoo tumaa tsa naquihín tucu maa yo —catyí ra tsihin ra naha.

⁴⁸Tacan tan tava tyiñu ra Pedro tsi ñi tsa ndi ñihí Tatyí Ii Nyoo na coondutya ñi tsihin sívi ra Jesucristo. Tacan tan caahán ndaahvi ñi tsihin ra Pedro na ndoo ra taahan quívi tsihin ñi.

11

Nu nacatyí tuhun ra Pedro tsihin ra yihí ndaha vehe ñuhu ñuu Jerusalén nácaa nducuahá tuhun ra Jesucristo inga ñuu

¹Ra tava tyiñu ra Jesús tan inga ra yihí cuenda ra Jesús tsa iyó Judea, ñihí tuhun ra naha tyin nda cuenda nyívi tsa ñavin nyívi Israel cuví tan naquihín ñi tuhun Nyoo. ²Tacan tan tsaá nyico ra Pedro ñuu Jerusalén. Tan ra tsa catyí tyin tsiñi ñuhu tsa cunyaa tuñi Nyoo tsi tandihí rayí, xaan xaan cuñí ra naha nyehé ra naha tsi ra Pedro. ³Tan catyí ra naha tsihin ra:

—¿Nacuenda tsahañ un yuvehe nyívi tsa ñavin nyívi Israel cuví tan tsatsj un tsihin ñi? —catyí ra naha.

⁴Tacan tan ra Pedro nacatyí tuhun ra nda nu quitsahá tandihí tsa cuví tsi ra, tan catyí ra:

⁵—Yuhu nyíi yu ñuu Jope. Tan tsa tsicán tahvi yu tsi Nyoo tan nyehé yu iin tsa janahá Nyoo tsi yu tyin iin jahma cahnu queé ityi andívi. Tan tandihí tsa cumi tutun tsi nuuhñi nuuhñi ñi tan vatsí nuú tsi ityi nu ñuhu nu nyíi yu. ⁶Tan nyehé vaha yu tsa yihí tsitsi jahma can. Tan nyehé yu quiti tsa cumi tsaha, quiti cuuhu, coo, tan saa. ⁷Tan tsiñi yu iin ndusu tsa caahán tsihin yu: “Ndúvita Pedro. Cahñi quiti ihya tan catsi un” catyí ndusu can tsihin yu. ⁸Tan nacahan yu tan catyí yu tyehen: “Jutu Mañi yu, ña catsi yu, tyin ña tuhvá yu catsi quiti tsa catyí ley tyin ña vaha catsi ndi.” ⁹Tacan tan ndusu can nacahan tsi tsihin yu inga tsaha, tan catyí tsi: “Ña vaha tsa cahan un tyin ña catsi un tsa tsa yaha janduvahá yu” catyí ndusu can tsihin yu. ¹⁰Uñi tsaha cuví yacan. Yaha can tan nandaá nyico tandihí quiti can tsihin jahma can ityi andívi. ¹¹Tan juven ñi cuhva can tsaá uñi taahan ra naha yuvehe nu nyíi yu, queé ra naha ñuu Cesarea tan nanducú ra naha tsi yu. ¹²Tan Tatyí Ii Nyoo cahañ tsihin yu na cuhun yu tsihin ra naha. Tan catyí ra tsihin yu tyin ña caca iñi yu tsa ñavin ra ñuu Israel cuví ra naha. Yacan cuahán yu. Tan cuahán ndihí iñu taahan ra yañi yo ihya naha ra tsihin yu. Tan tsa tsaá ndi nda ñuu Cesarea, quihví ndi tsitsi vehe iin ra tsa nañí Cornelio. ¹³Tan nacatyí tuhun ra can tsihin ndi nácaa nyehé ra tsi iin ángel tsitsi vehe ra. Nyaá nyityi ángel can tan catyí ra tsihin

ra tyin na jacuhun ra musu ra ñuu Jope na cucana ra naha tsi yu. ¹⁴ Tyin yuhu cua cuhva cuenda yu tsi ra nácaa cuví cacu ra tsihin tandihí nyívi ra, catyí ángel can tsihin ra, catyí ra tsihin ndi. ¹⁵ Tan javahá ra can tumaa cuhva catyí ángel can tsihin ra. Tan tsa tsaá yu yuvehe ra quítsahá caahán yu tsihin nyívi tsa ndu iin yuvehe ra. Tan quítsi Tatyí li Nyoo síqui ñi tumaa tsa nuú tsi síqui yo tsa jihna ñi. ¹⁶ Tan tsa tan nducuhun iñi yu tsa catyí Jutu Mañi yo quívi can. Tan catyí ra tyehen: “Ndítsa tyin ra Juan jacoondutya ra tsi nyívi tsihin ndutya. Maa tyin nyooho cua coondutya ndo tsihin Tatyí li Nyoo”, catyí ra. ¹⁷ Nyoo tsaá ndihí tucu ra Tatyí li ra tsi ñi can tumaa tsa tsaá ra Tatyí li ra tsi yo quívi tsa natsinu iñi yo tsi Jutu Mañi yo Jesucristo. Tan tsa tacan zyóo ra cuví yuhu tan casi yu tsa javahá Nyoo? —catyí ra Pedro tsihin ra hermano can naha ra.

¹⁸ Tacan tan tsa tsiñi ra ñuu Jerusalén tuhun can, ña cahán ca ra naha. Tan jacahnú ra naha tsi Nyoo, tan catyí ra naha:

—Tun tacan cuví, cuñi tsi catyí tyin Nyoo tsaá ndihí tucu ra ndatu tsi nyívi tsa ñavin nyívi Israel cuví tyin na ndu uvi iñi ñi cuatyí ñi, tan coo ñi ñayívi nyito tsa ña cua naa maa —catyí ra naha.

Nyívi yihí cuenda ra Cristo ñuu Antioquía

¹⁹ Quívi tsa tsañi ra naha tsi ra Esteban, quítsahá nyaá ndaha ra naha tsi inga ca nyívi yihí cuenda ra Cristo. Tan yihí ñi tsinu ñi tan cuahán ñi ityi Fenicia. Tan yihí ñi cuahán ñi iin ñuu tsa nañi Chipre tsa canyí mahñu ndutya ñuu. Tan yihí ñi tsaá ñi ñuu Antioquía. Tan tandihí ñi caahán ñi tuhun ra Cristo tsihin nyívi, maa tyin iin ñi maa tsihin nyívi Israel. ²⁰ Tan tsihin ñi tsa cuahán can, yihí nyívi ñuu Chipre, tan yihí tucu juhva nyívi ñuu Cirene. Tan tsa tsaá ñi ñuu Antioquía, tan quítsahá caahán ñi can tuhun ra Cristo tsihin nyívi tsa ñavin nyívi Israel cuví. Tan jacoto ñi tuhun vaha Jutu Mañi yo ra Jesús. ²¹ Tan tunyee iñi Jutu Mañi yo iyó tsihin ñi. Tan yacan cuenda cuaha nyívi nacoó ñi tuhun tsañu. Tan quítsahá tsínú iñi ñi tsi Jutu Mañi yo. ²² Tacan tan tsaá tuhun can nda ñuu Jerusalén. Tan nyívi yihí cuenda ra Cristo jacuhun ñi tsi ra Bernabé na cuhun ra nda ñuu Antioquía. ²³ Tan tsa tsaá ra Bernabé Antioquía can, nyehe ra nácaa nasocó Nyoo tsi ñi. Tan si xaan cuñi ra. Tan catyí ra tsihin ñi na cunyicun ñi tsi Jutu Mañi yo tsihin tsa ñi iñi ñi. ²⁴ Tacan javahá ra Bernabé tyin cuví ra iin ra vaha. Tsitú ra tsihin Tatyí li Nyoo, tan tsínú xaan iñi ra tsi Nyoo. Yacan cuenda cuaha xaan nyívi quíhví cuenda Jutu Mañi yo. ²⁵ Tsa yahá can tan cuahán ra Bernabé cua nanducu ra tsi ra Saulo nda ñuu Tarso. Tan

tsa nañihí ra tsi ra, tsindacá ra tsi ra nda ñuu Antioquía. ²⁶ Tan tsiyucu ra naha tsihin nyívi yihí cuenda ra Cristo ñuu can iin cuiya tan cuaha xaan nyívi jacuahá ra naha tuhun Nyoo. Tan juvin ñi ñuu Antioquía can cuví nu quítsahá catyí nyívi tyin nyívi Cristiano cuví ñi, o ñi yihí cuenda ra Cristo.

²⁷ Tan quívi can tsaá taahan ra cuví ndusu yuhu Nyoo. Quee ra naha ñuu Jerusalén tan tsaá ra naha ñuu Antioquía. ²⁸ Tan iin ra can nañi ra Agabo tsiyuncyáa nyityi ra tyañu nyívi yihí cuenda ra Cristo tan cahán ra tsa tsaá Tatyí li Nyoo tsi ra. Tan catyí ra tyin cua quítsi iin tama ñi cahnu nu ñuu ñayívi. Tan tacan cuví quívi tsa cuví ra Claudio rey cahnu. ²⁹ Tacan tan nyívi yihí cuenda ra Cristo nda ñuu Antioquía natuhun tahan ñi tyin cua cuhva ñi nácaa iyó iñi intuhun intuhun ñi, tyin cua jatynyee ñi tsi nyívi yihí cuenda ra Cristo tsa iyó ñuu tsa cayucú Judea. ³⁰ Tacan javahá ñi tan jacuhun ñi juhva xuhun tsi ra tsa cuví ityi nuu tsihin nyívi yihí cuenda ra Cristo nda ñuu Jerusalén. Tan ra Bernabé tsihin ra Saulo tsindacá ra naha xuhun can.

12

Nu tsiñi ra Jacobo tan nu quíhví ra Pedro vehe caa

¹ Tan quívi can quítsahá nyaá ndaha ra cuví rey Herodes tsi juhva nyívi yihí cuenda ra Cristo. ² Tan tava tyiñu ra tyin na cahñi ra naha tsi ra Jacobo, yañi ra Juan, tsihin mityi. ³ Tan nyehe ra Herodes tyin tahan xaan iñi nyívi Israel tsa javahá ra tacan, tan tava tyiñu ra tyin tin ndihí ra naha tsi ra Pedro. Tan cuví tsi quívi vico pascua nu tuhvá nyívi tsatsi paan tsa nduve yutsan iya yihí. ⁴ Tsa yahá tsa tñn ra naha tsi ra Pedro, tyihí ra naha tsi ra vehe caa. Tan cumi taahan andaru jahá cuenda tsi ra tsa iin cuhva. Tan tahan iñu hora tan nasamá ra naha, quíhví tucu inga cumi taahan andaru. Tan tyaá ra Herodes cuhva tyin cua cuhva cuenda ra tsi ra Pedro tsi nyívi tsa yaha vico Pascua. ⁵ Tan tacan nyi ra Pedro vehe caa. Tan andaru can jahá cuenda vaha xaan ra naha tsi ra. Maa tyin tsitsi tsa nyi ra ican, nyívi yihí cuenda ra Cristo iyó nyitya ñi tan tsicán tahvi xaan ñi tsi Nyoo tsa cuenda ra tsihin tsa ñi iñi ñi.

Nu jacacu Nyoo tsi ra Pedro vehe caa

⁶ Tan tyaá ra Herodes cuhva tyin inga quívi can cua tava ra tsi ra Pedro nuu nyívi. Tan juvin ñi tsacuaa can, tan ra Pedro quixi xaan ra tyañu uvi andaru can. Nuuhñi ra tsihin uvi cadena. Tan yucú uvi taahan ca andaru jahá cuenda nda yuvehe. ⁷ Tan sana iñi ra tan quituví iin ángel tsa jacuhun Jutu Mañi yo. Tan ndunditsin tsitsi vehe caa can.

Tan ángel can t̄in ra xiin ra Pedro, jandot̄o ra tsi ra. Tan catyí ra tsihin ra:

—Janumi. Nd̄uvita —catyí ángel can tsihin ra.

Tacan tan ndats̄j cadena tsa nuuh̄ni ndaha ra. ⁸ Tan ángel can catyí ra tsihin ra:

—N̄acuh̄ni vaha tsitsi un tan tȳih̄i nditsan un tsa ha un —catyí ángel can tsihin ra.

Tacan javah̄a ra Pedro. Tan catyí ángel tsihin ra:

—Quihin jahma un cunditsi un tan quitsi nȳicun un tsi yu —catyí ángel can tsihin ra.

⁹ Tan ra Pedro cuahán ra cuanyicún ra tsi ángel can. Maa tyin ña tsitó ra tatun tsa nditsa o tsa ña nditsa cuví can, tan cuñí maa ra tyin iyó iin tsa janah̄a Nyoo tsi ra. ¹⁰ Maa tyin cuahán ra tsata ángel can tan yah̄a ra naha iin nu jahá cuenda ra andaru. Tacan tan yah̄a tucu ra naha inga nu jahá cuenda ra naha. Yah̄a can tacan tan tsāa ra naha yuvehe caa cahnu nu quitá nyiví. Tan yuvehe can nuñ̄a maa tsi. Tan quit̄a ra naha. Tan tsa yah̄a yah̄a ra naha iin ityí, tan nacōo ángel can tsi ra. ¹¹ Tacan tan nacot̄o ra Pedro tyin nditsa, tan quitsah̄a tsicá ñi ra:

—Vityin tsitó yu tyin tsa nditsa cuví tsi. Maa Jutu Mañi yu jaquits̄j iin ángel tyin jacac̄u ra tsi yu ndaha ra Herodes tan ndaha ra ñuu Israel naha ra —cuñí ra Pedro.

¹² Tsicá ñi ra yacan ityí cuahán ra, tan tsāa ra yuvehe ña María sihi ra Juan Marcos. Tan cuaha xaan nyiví yucú ican tsicán tahvi ñi tsi Nyoo. ¹³ Tan tsa cañi ndaha ra Pedro yuvehe nuquehe, tan quit̄a iin ñaha tyuvaa tsa nañi Rode, tsinyeh̄e ña yóo cañi ndaha yuvehe can. ¹⁴ Maa tyin cuhva tsa tsiñi ña ndusu ra Pedro, si xaan cuñí ña, tan nāa ñi ña nuñ̄a ña yuvehe can, tyin tsinú ña cuahán ña cua cahan ña tsihin nyiví tsa yucú tsitsi vehe can. Tan catyí ña tyin ra Pedro nyaá ra yuvehe. ¹⁵ Tacan tan quitsah̄a catyí ñi tsihin ña:

—Iñi yooho ña vaha cuñí —catyí ñi tsihin ña.

Tan catyí ña tyin nditsa tsa caahán ña. Maa tyin ñi can catyí ñi tyin ñavin ra Pedro cuví ra, iin ángel cuenda ra cuví, catyí ñi tsihin ña.

¹⁶ Tan ra Pedro jañihí ca ra cañi ndaha ra yuvehe. Tan cuhva tsa nuñ̄a ñi yuvehe tan nyeh̄e ñi tsi ra, iyo xaan cuñi ñi tan nayuhvi ñi. ¹⁷ Maa tyin javah̄a ra seña tsihin ndaha ra na cutaxin ñi. Tan nacatyí tuhun ra tsihin ñi nácaa tav̄a Jutu Mañi yo tsi ra vehe caa. Tan catyí ra tsihin ñi:

—Cahan ndo tuhun ihya tsihin ra Jacobo tan tsihin inga ra yafi yo naha ra —catyí ra Pedro.

Tan quit̄a ra tan cuahán ra.

¹⁸ Cuhva tsa cundits̄in, iyo xaan cuñi ra andaru tsa jahá cuenda tsitsi vehe caa can

naha ra, tyin ña tsitó ra naha nácaa quit̄a ra Pedro. ¹⁹ Tacan tan tav̄a tyiñu ra Herodes na cunanducu ra naha tsi ra, tan ña nañih̄i ra naha tsi ra. Tacan tan tav̄a tyiñu ra tsi ra naha na cahñi ra naha tsi ra jahá cuenda vehe caa can naha ra. Yah̄a can tan quit̄a ra Herodes Judea can tan cuahán ra cua coo ra ñuu Cesarea.

Nu tsih̄i ra Herodes

²⁰ Tan ra Herodes cuxaán xaan ra tsihin nyiví ñuu Tiro tan nyiví ñuu Sidón. Maa tyin cuñi ñi tsa coo vaha ñi tsihin ra tyin ñuu tsa ndacá ñaha ra, ican queé tsa tsatsi ñi. Tacan tan ndu iin ñi tan cuahán ñi cua cutahan ñi tsihin iin ra tsa nañi Blasto. Ra ican cahnu tyiñu jahá ra, tyin jahá cuenda ra tsi ra Herodes. Tan tsicán ñi tsa na coo vaha ñi tsihin ra Herodes. ²¹ Tacan tan catyí ra Herodes tyin cuhun ñi nu nyaá ra iin quivi. Tan tsāa quivi can tan tsicundits̄j ra jahma si caá ra tsa jahá tyiñu ra. Tan tsicunyāa ra nu tyayu ra. Tan cah̄an ra tsihin ñi. ²² Tacan tan quitsah̄a caná tsa ñi, tan catyí ñi:

—Ra tsa caahán ihya ñavin rayi cuví ra, tyin Nyoo cuví ra —catyí ñi.

²³ Tan juven ñi cuhva can tan t̄in cuehe tsi ra Herodes jah̄a ángel Jutu Mañi yo tyin tsāa ra tsa catyí nyiví tyin Nyoo cuví ra. Tan quihvi tindacu tsi ra, tan tsih̄i ra.

²⁴ Maa tyin tuhun Nyoo nducuah̄a ca tsi. Tan jañih̄i ca nyiví caahán ñi tuhun Nyoo tandih̄i ñi ityí. ²⁵ Quivi tsa ndih̄i tyiñu jahá ra Bernabé tsihin ra Saulo nda ñuu Jerusalén, cuanuh̄u ra naha ñuu Antioquia. Tan cuahán ndih̄i tucu ra Juan Marcos tsihin ra naha.

13

Nu quitsah̄a tsicá ra Saulo tan ra Bernabé tyiñu Nyoo

¹ Tsihin nyiví tsa yihí cuenda ra Cristo ñuu Antioquia yihí ra tsa cuví ndusu yuhu Nyoo. Tan yucú tucu ra tsa jacuahá tuhun Nyoo tsi nyiví. Tan ra ican naha ra cuví ra ihya naha ra: Ra Bernabé, ra Simón Tuun, ra Lucio ra ñuu Cirene, ra Manaén tsa tsahn̄u iin nducu ñi tsihin ra Herodes tsa cuví rey ityí Galilea, tan ra Saulo. ² Tan iin quivi yucú tandih̄i ra naha tan jacahnú ra naha tsi Jutu Mañi yo. Tan iyó nyitya ra naha. Tacan tan cah̄an Tatyí Ii Nyoo tsihin ra naha:

—Tava sin ndo tsi ra Bernabé tsihin ra Saulo tsa cuenda tyiñu tsa caná yu tsi ra naha —catyí Tatyí Ii Nyoo can tsihin ra naha.

³ Tacan tan tsa ndih̄i tsiocōo nyitya ra naha, tan tyisōo ndaha ra naha jiñi ra Bernabé tsihin ra Saulo, tan tsic̄an tahvi ra naha tsi Nyoo tsa cuenda ra naha. Tan cah̄an tsihin tahan ra naha, tsahan cuahán ra naha.

Nu caahán ra tavq tyiñu ra Jesús tuhun Nyoo ñuhu Chipre

⁴ Yahá can tan jacuhun Tatyí li Nyoo tsi ra Bernabé tan tsihin ra Saulo ñuu Seleucia. Tacan tan cuahán ra naha. Tan ican quihví ra naha tsitsi iin yutun ndoo tan cuahán ra naha nda ñuhu Chipre tsa canyií mahñu ndutya ñuhu. ⁵ Tacan tan tsaq ra naha ñuu Salamina tsa canyií yuhu ndutya ñuhu. Tan quitsahá caahán ra naha tuhun Nyoo vehe ñuhu ra Israel. Cuahán tucu ra Juan tsihin ra naha tyin cua jatyinyee ra tsi ra naha. ⁶ Tacan tan cuahán ra naha caahán ra naha tuhun Nyoo tan iin tan ñuu tsa cayucú Chipre can nda cuanda tsa tsaq ra naha ñuu tsa nañi Pafos. Tan ican nañihí ra naha tsi iin ra ñuu Israel tsa nañi Barjesús. Tan tsitó ra tuhun tasi. Cuví ra iin ra jandaví ñaha tyin catyí ra tyin cuenda Nyoo caahán ra. ⁷ Tan ra tasi can nyaá ra tsihin ra cumí tyiñu Sergio Paulo. Tan ra Sergio cuví ra iin ra catsi iñi. Tan cana ra tsi ra Bernabé tsihin ra Saulo, tyin cuñí ra tyaa soho ra tuhun Nyoo tsa caahán ra can naha ra. ⁸ Tan ra tasi can nañi tucu ra Elimas, tan tyasí xaan ra nu tsinu iñi ra cumí tyiñu can tsi ra Cristo. ⁹ Tacan tan ra Saulo tsa nañi tucu Pablo, tsitú ra tsihin Tatyí li Nyoo. Tan ñihi xaan nanyehe ra tsi ra Elimas can. ¹⁰ Tan catyí ra tsihin ra:

—Yooho ra jandaví ñaha, ra vatya. Sehe cuihna cuví tsi un. Tan cuñi un jatívi un tandihí tsa vaha. Tan tacan ñi tyasí un ityi vaha Jutu Mañi yo. ¹¹ Tan vityin Jutu Mañi yo cua tatsi tuñi ra tsi un, tyin cua cuaa un. Tan ña cua cuví nyehe un ñuhú ñicanyii juhva quívi —catyí ra Pablo tsihin ra Elimas.

Tacan tan juvin ñi cuhva can cuaa ra. Tan ndoo ra nu naa. Tan nducú ra iin ra tñin ndaha ra tyin ña nditsin nyehé ra. ¹² Tsa nyehe ra cumí tyiñu can tsa cuví tsi ra Elimas, tan natsinu iñi ra tsi ra Jesucristo. Tyin iyo cuñi ra nyehé ra tsa javahá Jutu Mañi yo.

Nu cuahán ra Pablo tan ra Bernabé nda ñuu Antioquia tsa canyií Pisidia

¹³ Ra Pablo tan ra vaha iñi tsi ra quihví ra naha tsitsi iin yutun ndoo ñuu Pafos. Tan cuahán ra naha nda ñuu Perge tsa canyií Panfilia. Maa tyin ra Juan Marcos nacoq ihñi ra tsi ra naha tan cuanuhú ra nda ñuu Jerusalén. ¹⁴ Yahá can tan queq ra naha Perge can, tan cuahán ra naha ñuu Antioquia tsa canyií Pisidia. Ican quihví ra naha tsitsi vehe ñuhu nyívi Israel tan cuví tsi iin quívi quitatú ñi. Tan tsinyecuq ra naha. ¹⁵ Tacan tan quitsahá cahví nyívi nu libru ley Nyoo tsa tyaa ra Moisés. Tan cahví tucu ñi libru tsa tyaa ra cuví ndusu yuhu Nyoo tahán tsanaha. Yahá can tan ra cuví ityi nu vehe ñuhu naha ra catyí ra naha tsihin ra hermano tsa nyecú ican, tyin tatun cuñi ra

naha cahan ra naha tsihin nyívi, cuví cahan ra naha. ¹⁶ Tacan tan nduvitá ra Pablo tan javahá ra iin seña tsihin ndaha ra tyin na cutaxin ñi. Tan catyí ra:

—Tyaa soho nyoocho, ra ñuu Israel, tan nyoocho nyívi tsa tyaa yahvi tsi Nyoo. ¹⁷ Nyoo cuenda yo, tsa cuví yo nyívi Israel, nacatsj vaha ra tsi tsii tsaahnu yo. Tan quívi tsa iyó ca ra naha Egipto, javahá ra iin ñuu cahnu tsi ra naha. Vasu ñavin nyívi ñuu can cuví ra naha, maa tyin janducuahá ra tsi ra naha. Yahá can tan tavá ra tsi ra naha ityi can tsihin tunyee iñi tsa iyó tsi ra. ¹⁸ Tan cunyeq iñi Nyoo tandihí cuhva tsicoq ra naha nu tsicá nuu ra naha nu tsiquí tsitsi tsa uvi xico cuiya. ¹⁹ Tan janaq ra utsa taahan ñuu nahnu tsa cayucú ñi cahnu Canaán, tyin tsaqá ra ñuhu can tsi tsii tsaahnu yo. ²⁰ Yahá can tan quitsahá ndacá ñaha juez tsi nyívi can jahá Nyoo. Tumaa cumi cientu sasava cuiya tsindacá ñaha juez tsi ñi, nda cuanda quívi tsindacá ñaha ra Samuel ra cuví ndusu yuhu Nyoo tsi ñi. ²¹ Tacan tan maa ñi tsicán ñi iin rey tsa cundaca ñaha tsi ñi. Tan Nyoo tsaqá ra tsi ra Saúl, sehe ra Cis tsi ñi, tyin cundaca ñaha ra tsi ñi. Tan ra Saúl cuví ra tata ra Benjamín. Tan uvi xico cuiya tsindacá ñaha ra tsi ñi. ²² Yahá can tan Nyoo tavá ra tsi ra Saúl tsa cuví ra rey. Tan tsaqá ra tyiñu can tsi ra David. Tan catyí ra: “Nyehé yu tyin ra David, sehe ra Isaí, cuví ra iin rayí tsa taahán iñi yu cuhva iyó. Tan cua javaha ra tandihí tsa cuñi yu” catyí Nyoo tuhun ra David. ²³ Tan iin ra tsa cuví tata ra David can, juvin ra cuví ra Jesús. Tan maa Nyoo jaquitsj tsi ra tyin jacacu ra tsi yo tsa cuví yo nyívi Israel, tumaa catyí ra tsihin tsii tsaahnu yo tahán tsanaha. ²⁴ Tan ndi cumañi ca quitsi ra Jesús, ra Juan, ra jacoondutyá tsi nyívi, cahan ra tsihin tandihí nyívi Israel. Tan catyí ra tsihin ñi tyin cuñi tsi tsa ndu uvi iñi ñi cuatyí ñi, tan coondutya ñi. ²⁵ Tan tsa cua ndihí tyiñu jahá ra Juan tan catyí ra: “¿A cuñi maa ndo tyin yuhu cuví ra cahnu xaan tsa ndatú ndo? Ñavin yuhu cuví ra cahnu can. Tyin tsata tsa vaha yuhu tan vatsi inga ra. Tan ndi nditsan tsa nyaá tsaha ra, nduve yahvi nyaá yu tan tava yu itsi. Tyin cahnu xaan ra cuví ra”, catyí ra Juan.

²⁶ Tan caahán ca ra Pablo tan catyí ra:

—Yañi, nyoocho nyívi tata ra Abraham tan tandihí inga ndo tsa tyaa yahvi tsi Nyoo. Tsa cuenda nyoocho cuví tuhun ihya tyin jacuahá Nyoo tsi yo nácaa cacu yo. ²⁷ Nyívi ñuu Jerusalén tan ra cuví ityi nuu tsihin ñi ña tsitó ñi tyin ra Jesús jacacú ra tsi yo. Tan ndi ña cutuñi iñi ñi tuhun tsa tyaa ra cuví ndusu yuhu Nyoo tahán tsanaha, vasu jacuahá xaan ñi tuhun can tandihí quívi tsa quitatu ñi, maa tyin ña cutuñi iñi ñi. Tan quívi tsañi ñi tsi ra Jesús cuví tsi tumaa cuhva catyí ra

cuví ndusu yuhu Nyoo. ²⁸ Tyin vasu nduve cuatyí ra Jesús nañihí ñi, maa tyin tsicán ñi tsi ra Pilato na tyihí ra tyiñu tyin cahñi ra naha tsi ra Jesús. ²⁹ Tan tsa yahá janyehé ñi tundoho tsi ra tumaa catyí maa tuhun ra nu libro, tan tsihí ra. Tacan tan januu ñi tsi ra nu cruu. Tan tsicutsí ñi tsi ra. ³⁰ Maa tyin Nyoo janandotó ra tsi ra inga tsaha. ³¹ Tan tsitsi tsa cuaha quivi tan quituví ra nuu ra tsa cuahán tsihin ra quivi quitá ra ityi Galilea, tan tsaá ra Jerusalén. Tan ra ican naha ra cuví ra tsa caahán tuhun ra tsihin nyivi vityin. ³² Tan yacan cuenda nyuhu caahán ndi tuhun vaha tsa catyí Nyoo tsihin tsii tsaahnu yo tyin cuhva ra tsi yo. ³³ Tyin tsa cuenda tsa vaha tsi maa yo tsa cuví yo nyivi tata ñi, javahá maa Nyoo tsa catyí ra. Tyin janandotó ra tsi ra Jesús tumaa cuhva nyaá nu tsinu uvi salmo nu catyí ra tyehen: “Sehe yu cuví tsi un, tan yuhu tsahá yu ñayivi coo un vityin” catyí Nyoo tsihin ra. ³⁴ Nyoo tyaá ra cuhva tyin janandotó ra tsi ra, tyin tacan tan ña cua tyahyu cuñu ñuhu ra. Tyin catyí nu tutu Nyoo: “Tsi nyooho cua cuhva yu tsa vaha tsa cahán yu tsihin ra David tyin cua cuhva yu tsi ndo.” ³⁵ Yacan cuenda catyí tucu nu inga salmo tyehen. “Ña cua cuhva un tsa tyahyu cuñu ñuhu Sehe ii un” catyí tsi. ³⁶ Ra David jahá tyiñu ra tsa cuenda nyivi tsa tsicoó quivi tsicoó ra, tandihí tsa catyí Nyoo tsihin ra tyin javaha ra, javahá ra. Yahá can tan tsihí ra tan tsicutsí ñi tsi ra tumaa tsicutsí ñi tsi jutu ra. Tan tyahyu cuñu ñuhu ra. ³⁷ Maa tyin ra tsa janandotó Nyoo, ña tyahyu cuñu ñuhu ra. ³⁸ Yañi, cuñí tsi tsa coto ndo tyin tsa cuenda cuatyí yo tan quitsí ra Jesús tan tsihí ra tyin jahá ra tucahnu iñi cuatyí yo. ³⁹ Tan tsa cuenda ra Jesús jahá Nyoo tucahnu iñi tsi tandihí ñi tsa tsinú iñi tsi ra, tyin ley Nyoo tsa tyaá ra Moisés ña cuví janduvaha tsi tsi yo nuu Nyoo. ⁴⁰ Jaha ndo cuenda coto ndoo tsa tyaá ra cuví ndusu yuhu Nyoo siqui ndo. Tyin catyí ra naha tyehen:

⁴¹ Nyehe nyooho, ra tsa tsacú nducu, taahán tsi tsa nayuhvi ndo tan taahán tsi cuna ndo.

Tyin yuhu cuví Nyoo, tan javahá yu iin tsa cahnu quivi tsa iyó ndo vityin.

Maa tyin ña cua tsinu iñi ndo tandihí tsa javahá yuhu vasu nacatyí tuhun nyivi tsihin ndo, catyí Nyoo.

⁴² Ndiñi cahán ra Pablo tan quitá ra tsata vehe ñuhu can tsihin ra vaha iñi tsi ra. Tacan tan nyivi tsa ñavin nyivi Israel cuví quitsahá catyí ñi tsihin ra, tyin na cahan nyico ra tuhun can tsihin ñi inga vitya quivi tsa quitatú ñi. ⁴³ Cuhva tsa ndihí ndu iin ñi, cuaha xaan nyivi Israel tan nyivi tsa yihí cuenda ñi Israel, tsinyicun ñi tsi ra Pablo tan tsi ra Bernabé. Tan catyí ra naha tsihin ñi tyin na cahun ca ñi ityi nuu tsihin Nyoo. Tan na

naquihin vaha ñi tumañi iñi tsa tsahá Nyoo tsi ñi.

⁴⁴ Tsa inga vitya quivi quitatú ñi, ndu iin nyico ñi. Tan tsa yatyin tandihí ña maa nyivi ñuu can ndu iin tsihin ñi tan tyaá soho ñi tuhun Nyoo. ⁴⁵ Maa tyin cuhva tsa nyehe ra Israel naha ra, cuxaán ra naha tyin nyehé ra naha tyin cuaha nyivi nyicun tsi ra hermano can naha ra. Tan quitsahá caahán ra naha tsi ra Pablo, tan cahán ra naha ndavaha ñi siqui ra. ⁴⁶ Maa tyin ra Pablo tan tsihin ra Bernabé ña yuuhvi maa ra naha tan quitsahá caahán ñihi ra naha tsihin ra Israel can naha ra. Tan catyí ra naha:

—Cuñí tsi tsa cahan jihna ndi tuhun Nyoo tsihin nyooho tsa cuví ndo nyivi Israel. Maa tyin ña cuñí ndo naquihin ndo tsa caahán ndi. Tan nyooho ña cuñí ndo tsa coo ñayivi nyito tsa ña cua naa maa tsi ndo. Yacan cuenda cua cahun ndi cucahan ndi tsihin nyivi tsa ñavin nyivi Israel cuví. ⁴⁷ Tyin tacan catyí Jutu Mañi yo tsihin ndi tan catyí ra tyehen:

Tyaá yu tsi un tumaa iin ñuhu tsa jandunditsín nu iyó nyivi nanií cahnu nu ñuhu ñayivi.

Tyin tacan tan cua jacuaha un tsi ñi nácaa jacacu yu tsi ñi, catyí Nyoo.

⁴⁸ Tsa tsiñi ra tsa ñavin ra Israel cuví naha ra, sií xaan cuñí ra naha. Tan quitsahá catyí ra naha tyin tuhun Nyoo vaha xaan tsi. Tan natsinú iñi tandihí nyivi tsa nacatsí maa Nyoo, tyin coo ñi ñayivi nyito tsa ña cua naa maa. ⁴⁹ Tacan tan nducuahá ca tuhun Nyoo tandihí ityi ñuu can. ⁵⁰ Maa tyin ra Israel cahán ra naha tsihin juhva ñaha cuca tsa nyicun ley Nyoo tsa tyaá ra Moisés. Catyí ra naha tsihin ñi tyin ña vaha tuhun caahán ra Pablo. Tan caahán tucu ra naha tsihin ra cumí tyiñu ñuu can. Tan ican cuví nu quitsahá nyaá ndaha nyivi tsi ra Pablo tan ra Bernabé, nda cuanda tsa tava ñi tsi ra naha ñuu can. ⁵¹ Tacan tan naquisií ra naha nyaca tsaha ra naha tumaa iin seña tyin ndoo cuatyí nyivi can siqui maa ñi. Tan cuahán ra naha ñuu Iconio. ⁵² Maa tyin ñi yihí cuenda ra Cristo ñuu Antioquía can sií xaan cuñí ñi. Tan tsitú ñi tsihin Tatyí Ii Nyoo.

14

Nu nyii ra Pablo tan ra Bernabé ñuu Iconio

¹ Ra Pablo tan ra Bernabé yucú ra naha ñuu Iconio. Tan quihvi ra naha tsitsi vehe ñuhu nyivi Israel. Tan vaha xaan cahán ra naha tuhun Nyoo tsihin nyivi can. Tan cuaha xaan ñi natsinú iñi ñi tsi ra Cristo, nyivi Israel tan nyivi tsa ñavin nyivi Israel cuví. ² Maa tyin ra Israel tsa ña tsinú iñi tsi ra Cristo natyuhú ra naha tsi nyivi tsa ñavin

nyivi Israel cuví tyin na caca ña vaha iñi ñi nyehe ñi tsi ra yihí cuenda ra Cristo. ³ Yacan cuenda ra Pablo tan ra Bernabé ndoo ra naha ican cuaha quivi. Tan tsihin tsa ñi iñi ra naha caahán ra naha tuhun ra Cristo, tyin tsinú xaan iñi ra naha tsi Jutu Mañi yo. Tan Jutu Mañi yo jatyinyee ra tsi ra naha tsa caahán ra naha tuhun ra, nácaa tsa cuñí ra tsi yo. Tan tsahá Jutu Mañi yo tunyee iñi tsi ra naha tyin javaha ra naha seña tan tsa iyo na coto nyivi tyin nditsa tsa caahán ra naha. ⁴ Maa tyin nyivi ñuu ña iin tsicá iñi ñi, tyin juhva ñi yihí cuenda ra Israel naha ra, tan juhva ñi nyicún tsi ra tavá tyiñu ra Jesús. ⁵ Tacan tan ra Israel tan ra tsa ñavin ra Israel cuví, natuhun tahan ra naha tsihin ra cumí tyiñu, tyin cua cahan ra naha ndavaha ñi siqui ra tavá tyiñu ra Jesús, tan cua cañi ra naha yuu tsi ra naha. ⁶ Maa tyin ra Pablo tan ra Bernabé ñihí tuhun ra naha tyin tacan cua javaha ra can naha ra tsi ra naha, tan cuahán ra naha nda ñuu Lистра, tan nda ñuu Derbe ityi Licaonia. Tan tsicá nuu ra naha ityi ñuu can. ⁷ Tan cahan nyico tucu ra naha tuhun Nyoo nácaa jacacú ra tsi yo.

Nu cañi nyivi yuu tsi ra Pablo nda ñuu Lистра

⁸ Nda Lистра iyó iin rayií tsa coxo tyin nda quivi cacú ra tan ña cuví caca ra, tyin pehe nduvi taahan tsaha ra. ⁹ Tan ra pehe tsaha can tyaá soho ra tsa caahán ra Pablo. Tan ra Pablo, tuvj iñi ra tyin tsinú iñi ra can tyin cuví nduvaha ra. ¹⁰ Tacan tan ra Pablo caahán ra tsihin tsa ñihí ndusu ra, tan catyí ra:

—Nduvita tan cunyaa nyityi un —catyí ra Pablo tsihin ra.

Tan ra ican, intuhun ñi ndava ra, tan tsinyaa nyityi ra. Tan quitsahá tsicá ra. ¹¹ Tsa nyehé nyivi tyin javahá ra Pablo tacan, quitsahá caná tsa ñi tsihin yuhu Licaonia, tan catyí ñi:

—Ra tsa tsaá nu yucú yo ihya, nyoo cuví ra naha, maa tyin tumaa caá rayií, caá ra naha —catyí ñi.

¹² Tan catyí ñi tyin ra Bernabé cuví ra nyoo tsa nañi Júpiter, tan ra Pablo cuví nyoo tsa nañi Mercurio, tyin ra ican cuví ra tsa caahán. ¹³ Tan iyó iin ra cuví jutu tsa jahá cuenda vehe ñuhu tsa nyaá yuhu ñuu ñi can nu jacahnú nyivi tsitoho Júpiter. Tan quitsj ndaca ra indiqui tan ita tyin maa ra tan nyivi cuñí ñi jacahnu ñi tsi ra Pablo tsihin ra Bernabé. Tan cua cahñi ñi indiqui can tyin cua cuhva cuenda ñi tsi ra naha, tyin cuñí ñi tyin nyoo cuví ra naha. ¹⁴ Maa tyin cuhva tsa tuvj iñi ra naha tsa tsicá iñi ñi, quitsahá tsaahnyá ra naha jahma ra naha. Tan javahá ra naha tacan tumaa iin seña tyin ña ndoo ra naha vaha. Tan quihví ra

naha tyañu nu tuvi nyivi, tan caná tsa ra naha, ¹⁵ Tan catyí ra naha:

—Nyooho tata, ¿nácaa tsa javahá ndo tye-hen? Nyuhu juvin ñi rayií ñuu ñayivi ihya cuví ndi. Tumaa cuví nyooho cuví tucu nyuhu. Tan vatsí cahan ndi tsihin ndo tyin na jaña ndo tsa javahá ndo tyehe tyin ña tsiñi ñuhu yacan tsi ndo, tan na cunyicun ndo tsi Nyoo nyito. Juvin ra tsa javahá andivi tan ñuhu ñayivi. Tan javahá ra ndutya ñuhu tan tandihí maa tsa iyó tsitsi ndutya ñuhu can. ¹⁶ Tan tahan tsanaha nda cuanda vityin, Nyoo jañá ndaha ra tsi nyivi na javaha maa ñi cuhva cuñí ñi, ¹⁷ vasu tandihí quivi jacuhá ra tsi ñi tyin ra vaha cuví ra tan javahá ra tsa vaha. Maa ra jacuún ra savi nu yucú yo. Tsahá ra tsa coo vaha tsa tatsí yo quivi taahán tsi. Tan tsahá ra tsa catsi yo. Tan tsahá ra tsa cusii cuñí yo —catyí ra naha tsihin nyivi can.

¹⁸ Maa tyin vasu catyí ra naha tacan, yii xaan tan tyasí ra naha tsa cahñi ñi indiqui can, tyin cuñí ñi jacahnu ñi tsi ra naha tsihin can.

¹⁹ Tacan tan tsaa juhva ra Israel, ra tsa ña tsinú iñi tsi ra Cristo, ra ñuu Antioquia, tan ra ñuu Iconio. Tan natyuhú ra naha tsi nyivi, na cañi ñi yuu tsi ra Pablo. Tan tacan javahá ñi, tan cuñí maa ñi tyin tsa tsiñi ra. Tacan tan ixtá caa ñi tsi ra tan tsindaca ñi tsi ra nda yuhu ñuu. ²⁰ Maa tyin ndu iin ra yihí cuenda ra Cristo nu canyí ra Pablo. Tan nduviti nyico ra. Tan quihví nyico ra inga tsaha tsitsi ñuu can. Tan tsa inga quivi can cuahán ra ñuu tsa nañi Derbe tan cuahán ra Bernabé tsihin ra.

²¹ Tan cahan tucu ra naha tuhun Nyoo nda ñuu Derbe nácaa jacacú Nyoo tsi yo. Tan cuaha nyivi nacuhvá ñi tsi ñi tsi Nyoo. Yahá can tan cuanuhú ra naha ityi quitsj ra naha. Tan yahá nyico ra naha ñuu Lистра tan ñuu Iconio inga tsaha, tan tsaa nyico ra naha nda ñuu Antioquia. ²² Tan tandihí ñuu can jandu iin ra naha iñi nyivi tsa yihí cuenda ra Cristo. Tan catyí ra naha tsihin ñi na cuhan ñi ityi nuu ca tsihin tsa tsinú iñi ñi tsi Nyoo. Tan catyí tucu ra naha tsihin ñi tyin tatun cuñí yo tsa cundaca ñaha Nyoo tsi yo, cuñí tsi tsa nyehe yo tundoho. ²³ Tan natyiso ra naha tsi ra cua cuví ityi nuu tsihin nyivi tsa yihí cuenda ra Cristo tan iin tan iin vehe ñuhu. Tan tsicoo nyitya ra naha tan tsican tahvi ra naha tsi Nyoo tsa cuenda ra tsa cua cuví ityi nuu tsihin nyivi vehe ñuhu can naha ra. Yahá can tan catyí ra Pablo naha ra tsihin ra cuví ityi nuu vehe ñuhu can naha ra:

—Tsjnu iñi ndo tsi Jutu Mañi yo. Tyin maa ra cua jaha cuenda tsi ndo —catyí ra Pablo naha ra tsihin ra naha.

Nu cuanuhu nyico ra Pablo tan ra Bernabé ñuu Antioquía itiyi Siria

²⁴ Yaha can tan yaha ra Pablo tshin ra Bernabé ñuu tsa cayucú Pisidia, tan tsaq ra naha nda cuanda Panfilia. ²⁵ Cahān ra naha tuhun Nyoo ñuu Perge. Yaha can tan tsaḥn ra naha ñuu Atalia. ²⁶ Ican quihvi ra naha tsitsi iin yutun ndoo tan cuanuhu ra naha nda ñuu Antioquía. Ican cuví ñuu nu natyiso ñi tsi ra naha tyin cua javaha ra naha tyiñu Nyoo, tan vityin tsa tsaq nuhu ra naha. ²⁷ Tsa tsaq nyico ra naha ñuu Antioquía jandu iin ra naha tsi nyivi yihí cuenda ra Cristo. Tan nacatyí tuhun ra naha tshin ñi tandihí tsa javaha Nyoo tshin ra naha, tan nácaa nuñā Jutu Mañi yo itiyi tyin tsinú tucu iñi ñi tsa ñavin nyivi Israel cuví. ²⁸ Tan naha xaan ndoo ra Pablo tan ra Bernabé tshin ñi yihí cuenda ra Cristo ñuu can.

15

Nu jandaa ra tava tyiñu ra Jesús tyiñu nda ñuu Jerusalén

¹ Ndi nyii ca ra Pablo tan ra Bernabé ñuu Antioquía, tan tsaq taahan ra naha quee ra naha nda Judea. Tan quitsaha jacuaha ra naha tsi ra yihí cuenda ra Cristo. Tan catyí ra naha tyin cuñí tsi tsa cunyaa tuñi Nyoo tsi ra naha, tumaa cuhva catyí ra Moisés, tyin tacan tan cua cacu ra naha. ²⁻³ Tan ñihi xaan cahān yuhu tahan ra Pablo tan ra Bernabé tshin ra can naha ra tsa cuenda yacan. Tacan tan natyiso ra hermano Antioquía can naha ra tsi ra Pablo tan ra Bernabé tshin taahan ca ra naha tyin chuhun ra naha ñuu Jerusalén, cujandaa ra tyiñu can tshin ra tava tyiñu ra Jesús tan tshin ra cuví itiyi nuu tshin nyivi vehe ñuhu ñuu Jerusalén can naha ra. Tacan tan cuahán ra naha. Tan itiyi cuahán ra naha, yaha ra naha itiyi Fenicia tan Samaria. Tan nacatyí tuhun ra naha tshin nyivi yihí cuenda ra Cristo nácaa jañá nyivi tsa ñavin nyivi Israel cuví tuhun tsaḥnu tsa tsinú iñi ñi, tyin nacuhvá cuenda ñi tsi ñi tsi Nyoo. Tan tandihí ra hermano sii xaan cuñí ra naha tsa tsito ra naha yacan.

⁴ Quivi tsaq ra Pablo tan ra Bernabé ñuu Jerusalén, cuahán ra naha nu ndu iin nyivi yihí cuenda ra Cristo. Tan tandihí ñi tan ra cuví itiyi nuu tshin ñi, tan tshin ra tava tyiñu ra Jesús, tsaḥā ñi yaha ra naha tyin nacatyí tuhun ra naha tsa javaha Nyoo tshin ra naha. ⁵ Maa tyin juhva ra fariseo tsa tsinú iñi tsi ra Cristo, nduvitā ra naha tan catyí ra naha:

—Tandihí ra tsa ñavin ra Israel cuví tan tsinú iñi ra naha tsi ra Jesús, cuñí tsi tsa cunyaa tuñi Nyoo tsi ra naha. Tan cuñí tucu tsi tsa javaha ra naha cuhva catyí ley Nyoo tsa tyaq ra Moisés —catyí ra naha.

⁶ Tacan tan ndu iin ra cuví itiyi nuu tshin ñi yihí cuenda ra Cristo tan ra tava tyiñu ra Jesús tyin natuhun tahan ra naha tuhun can. ⁷ Tsa yaha tsa cahān yuhu xaan ra naha, tan nduvitā ra Pedro, tan catyí ra:

—Yañi, tsitó ndo tyin tsitsi tsa tandihí yo, nacatsi Nyoo tsi yuhu ra ndaahvi quivi can, tyin cahān yu tuhun ra tsa jacacú tsi yo tshin nyivi tsa ñavin nyivi Israel cuví, tan na tsinu iñi ñi tsi Jutu Mañi yo. ⁸ Tan Nyoo, ra tsitó añima tandihí nyivi, janaha ñi tsi yo tyin cuñí ra tsi ñi ican. Yacan cuenda tsaḥā ra Tatyí li ra tsi ñi, tumaa tsa naquihñin tucu maa yo Tatyí li ra tahān tsanaha. ⁹ Nyoo inducu ñi cuñí ra tsi nyivi. Yacan cuenda ña tyaá tsiyo ra tsi ñi ican tan ndi tsi yoo. Janduvahá ra tsi ñi tsa cuenda tsa tsinú iñi ñi tsi ra tumaa maa yo. ¹⁰ Vityin cñacuenda ña tsinú iñi ndo tsa javaha Nyoo tshin ñi can? Tyin ña vaha tsa tyisó yo ley Nyoo tsa tyaq ra Moisés siqui ñi. Tyin ndi maa tsii tsaahnu yo tan ndi maa yo tan ña cuví naquihñin vaha yo ley can. ¹¹ Ñavin tacan cacú yo. Yoo tsitó yo tyin cacú yo tshin tumañi iñi tsa javahá Jutu Mañi yo ra Jesús tshin yo. Tan tacan tucu ñi can —catyí ra Pedro tshin tandihí ra can naha ra.

¹² Tacan tan taxin ñi cuví tandihí ra naha. Tan tyaq soho ra naha tsa caahán ra Bernabé tan ra Pablo. Tyin nacatyí tuhun ra naha seña tan tsa iyo tsa javaha Nyoo nu cahān ra naha tuhun ra nu yucú nyivi tsa ñavin nyivi Israel cuví. ¹³ Tsa ndihí cahān ra naha, quitsaha caahán ra Jacobo, tan catyí ra:

—Nyooho yañi, tyaq soho ndo tsa cua cahān yu tshin ndo. ¹⁴ Tsa catyí tuhun ra Simón Pedro tshin yo nácaa quitsaha tsaḥā Nyoo tumañi iñi tsi ñi tsa ñavin nyivi Israel cuví. Tyin nacatsi tucu ra tsi juhva ñi tyin cuví ñi nyivi cuenda ra. ¹⁵ Tan ndu iin tuhun ihya tshin tuhun tsa cahān ra cuví ndusu yuhu Nyoo tahān tsanaha, tumaa cuhva nyaá maa nu tutu Nyoo nu catyí ra:

¹⁶ Yaha tandihí tuhun ihya tan cua quitsi nyico yu nu yucú ndo.

Quivi tsa tsicoq ra David, vaha xaan jacahnu nyivi tsi yu.

Maa tyin yaha can jandihí nyivi tsa jacahnú ñi tsi yu.

Maa tyin cua quitsi nyico yu inga tsaha tan cua cañihí yu vehe ñuhu ra David.

Tyin cua jacahnu nyico nyivi tsi yu.

¹⁷ Tyin tacan tan cuví nanducu tandihí inga ca nyivi tsi yu,

tandihí ñi tsa ñavin nyivi Israel cuví tan tsinú iñi tsi yu.

¹⁸ Tacan catyí Jutu Mañi yo, tan jacuaha ra tuhun ihya tsi nyivi tsicoq tahān tsanaha tan tshin nyivi tsa iyó vityin.

¹⁹ Yacan cuenda catyí yu tyin ña vaha tsa jatyañu yo tsi nyivi tsa ñavin nyivi Israel cuví, ñi tsa nacoq tuhun tsahnu ñi tan quihví ñi cuenda ra Cristo. Ña vaha catyí yo tyin cuñí tsi tsa tyaa yahví ñi ley tsahnu yo. ²⁰ Vaha ñi maa tsihin tsa jacuhun yo carta tsi ñi. Tan catyí yo tsihin ñi tyin ña cua catsi ñi cuñu tsa tsaha cuenda nyivi tsi tsitoho. Tan ña cuví coo rayí tsihin ñaha tun ña tindaha ra. Tan ndi ñiñaha ña cuví coo ñi tsihin rayí tun ña tindaha ñi. Rayí tsa iyó ñasiñi ña cuví coo ra tsihin inga ñaha, tacan tucu ñiñaha tsa iyó yí, ña cuví coo ñi tsihin inga rayí. Tan catyí tucu yo tsihin ñi quihví cuenda ra Cristo tan ñavin nyivi Israel cuví ñi tyin ña cua catsi ñi cuñu quiti tsa tsihí tsa cava ñi jucun tatan ña tsatí ñiñi ti. Tan ña cua catsi ñiñi quiti. ²¹ Tyin nda tyembu tsahnu tan nda cuanda vityin iyó maa ra jacuahá ley Nyoo tsa tyaa ra Moisés vehe ñuhu nyivi Israel. Tan jacuahá ra naha tuhun can tan iin tan iin ñuu, tan tahan tahan ana quivi, quivi tsa quitatú ñi —catyí ra Jacobo tsihin ra naha.

²² Tacan tan ra tava tyiñu ra Jesús tan ra cuví ityi nuu tsihin ñi vehe ñuhu tsihin tandihí ñi yihí cuenda ra Cristo, nacatsí ñi tsi taahan ra naha. Tan yahá can tan jacuhun ñi tsi ra naha tyin cahun ra naha ñuu Antioquia tsihin ra Pablo tan ra Bernabé. Tan ra tsa natyiso ñi cuví ra: Judas tsa nañí Barsabás, tan ra Silas. Ra ícan cuví iin ra tsa nyiso tyiñu vehe ñuhu nda ñuu Jerusalén. ²³ Tan tsihin ra naha jacuhun ñi iin carta. Tan catyí carta can tyehen:

“Nyuhu ra tava tyiñu ra Jesús, tan tsihin ra cuví ityi nuu tsihin ñi vehe ñuhu tan tsihin ra yañi ndo cuenda ra Cristo, tandihí ndi tsahá ndi nacumí tsi nyooho tsa ñavin ra Israel cuví ndo. Tyin yañi ndi cuví tsi ndo vasu ñavin nyivi Israel cuví ndo. Tandihí nyooho tsa iyó ndo ñuu Antioquia, tan nyooho nyivi Siria, tan tsihin nyooho nyivi Cilicia, jaquitsí ndi carta ihya tsi tandihí ñi ndo. ²⁴ Tsiót ndi tyin quita taahan ra ityi nuu yucú ndi ihya. Tan vatsí ra naha nuu yucú ndo. Maa tyin ña catyí nyuhu tyin quitsi ra naha jatyañu ra naha tsi ndo. Tan nasamá ra naha cuhva tsicá iñi ndo tyin catyí ra naha tyin cuñí tsi tsa cunyaa tuñi Nyoo tsi ndo, tan naquihin vaha ndo ley Nyoo tsa tyaa ra Moisés. Maa tyin ñavin nyuhu cahán tsihin ra naha tyin quitsí cahán ra naha yacan tsihin ndo. ²⁵ Yacan cuenda ndu iin ndi tan ndoo ndi tuhun cuenda tyiñu can tan tsicá iñi ndi tyin vaha tsa jaquitsí ndi tsi ra hermano ihya naha ra tsihin ra Pablo tan ra Bernabé nuu yucú ndo. ²⁶ Nduvi taahan ra ihya nyehé xaan ra naha tundoho tsa cuenda Jutu Mañi yo. Tan vasu cuñí nyivi cahñi ñi tsi ra naha, maa tyin ña jandihí ra

naha tsa jacotó ra naha tuhun Jutu Mañi yo ra Jesucristo. ²⁷ Yacan cuenda jaquitsí ndi tsi ra Judas tan ra Silas. Tan maa ra naha cua cahán ra naha tsihin yuhu ra naha tsihin ndo, tyin cua cuhva cuenda ra naha tandihí tsa tyaa ndi nuu tutu ihya. ²⁸ Tyin ndi Tatyí Ii Nyoo tan ndi nyuhu ña cuñí ndi tyiso ndi tundoho siqui ndo. Maa tyin ñiñi ca cuñí tsi tsa naquihin vaha ndo tuhun ihya: ²⁹ Ña cua catsi ndo cuñu tsa tsaha cuenda nyivi tsi tsitoho. Tan ña cua catsi ndo ñiñi quiti, ndi cuñu quiti tsa tsihí tsa cava ñi jucun tan ña tsatí ñiñi ti. Ña caca nuu ndo tsihin ñaha. Tan nyooho ñiñaha ña caca nuu ndo tsihin rayí. Tatan na quihin vaha ndo tuhun ihya, vaha xaan cua coo ndo. Tan Nyoo na ndoo ra tsihin ndo” catyí ra naha nuu carta can.

³⁰ Tan cuahán ra tsa jacuhun ra naha, tan tsaq ra naha ñuu Antioquia. Tan jandu iin ra naha tsi tandihí nyivi yihí cuenda ra Cristo tan nacuhva cuenda ra naha carta can. ³¹ Tsa cahví ñi carta can, si xaan cuñí ñi tyin vaha xaan caahán tsi. ³² Tan ra Judas tsihin ra Silas cuví tucu ra naha ndusu yuhu Nyoo. Tan jandu iin ra naha iñi nyivi can tsihin tsa cahán ra naha. ³³ Tan tsa yahá tsiyucú ra naha juhva quivi tan cuanuhu nyico ra naha nda nuu yucú nyivi tsa jacuhun tsi ra naha. Tan tandihí nyivi yihí cuenda ra Cristo ñuu Antioquia can catyí ñi tyin na cahun vaha ra naha. ³⁴ Maa tyin ra Silas catyí ra tyin cua ndoo ra. ³⁵ Tan ra Pablo tsihin ra Bernabé ndoo tucu ra naha ñuu Antioquia can. Tan maa ra naha tsihin inga ca ra jañihí ca ra naha cahán ra naha tuhun Jutu Mañi yo tsihin nyivi can tan jacuahá ra naha tsi ñi.

Nu tsinu uvi tsaha cuahán ra Pablo tuhun Nyoo, tan nu quita tsiyo ra nuu ra Bernabé

³⁶ Tan tsa yahá juhva quivi, tan cahán ra Pablo tsihin ra Bernabé:

—Cohon inga tsaha cunyehe yo nuu yucú nyivi yihí cuenda Jutu Mañi yo ra Cristo tandihí ñuu nu cahán yo tuhun ra, tyin nyehé yo nácaa yucú ñi —catyí ra Pablo tsihin ra.

³⁷ Tan ra Bernabé cuñí ra tsa cahun nyico ra Juan Marcos tsihin ra naha. ³⁸ Maa tyin ra Pablo ña taahán iñi ra tsa cahun ra Juan tsihin ra naha, tyin nacoq ihñi ra tsi ra naha nda Panfilia quivi tsa tsahán ra tsihin ra naha. Tan ña tsahán ca ra tsijahá tyiñu ra tsihin ra naha. ³⁹ Tan cahán yuhu tahan ra naha, tan ndusiin ra naha. Ra Bernabé cuahán ra tsihin ra Juan Marcos. Tan quihví ra naha tsitsi iin yutun ndoo tan cuahán ra naha ñuhu Chipre. ⁴⁰ Tan ra Pablo nacatsí ra tsi ra Silas. Tan tsa yahá tsicán tahvi ra hermano naha ra tsi Nyoo tsa cuenda ra naha tyin na jatyinyee Nyoo tsi ra naha, tacan tan cuahán ra naha. ⁴¹ Tan yahá ra

naha ñuu tsa cayucú Siria tan Cilicia, tan jandu iin ra naha iñi nyivi tsa yihí cuenda ra Cristo tan iin tan iin ñuu.

16

Nu cuahán ra Timoteo tshin ra Pablo tan ra Silas

¹ Ra Pablo tshin ra Silas tsaq ra naha ñuu Derbe, tan ñuu Liştra. Tan ican nañihí ra naha tsi iin ra yihí cuenda ra Cristo. Nañi ra Timoteo. Tan sihi ra cuví ña iin ñaha Israel. Tan yihí ndihi ña cuenda ra Cristo. Maa tyin jutu ra, ra Grecia cuví ra. ² Tan ra Timoteo vaha xaan tsicá ra tuhun Nyoo, catyí nyivi yihí cuenda ra Cristo ñuu Lистра tan ñuu Iconio. ³ Tan ra Pablo cuñi ra tsa cuhun ra Timoteo tshin ra. Tan tyaq ra naha tuñi Nyoo tsi ra Timoteo jahá ra Pablo. Tyin coto ndasi cuñi nyivi Israel nyehe ñi tsi ra. Tyin tandihí ñi tsitó ñi tyin jutu ra cuví ra ra Grecia. ⁴ Tacan tan cuahán ra naha tan iin tan iin ñuu. Tan caahán ra naha tshin nyivi yihí cuenda ra Cristo tsahá cuenda ra naha tuhun tsa tsahá ra tavá tyiñu ra Jesús tan tshin ra cuví ityi nuu tshin nyivi vehe ñuhu Jerusalén tsi ra naha. ⁵ Tacan tan ndu iin iñi nyivi yihí cuenda ra Cristo tan ñihi ca tsinú iñi ñi tsi ra Cristo. Tan iin tan iin quivi tan cuahán nducuahá ca ñi.

Nu janahá Nyoo iin tsa janahá ra tsi ra Pablo cuenda iin ra Macedonia

⁶ Ña tsahá Tatyí Ii Nyoo tsa cahan ra naha tuhun Nyoo ñuu tsa cayucú Asia. Yacan cuenda yahá sava ra naha ñuhu cuenda Frigia tan Galacia. ⁷ Tan tsaq ra naha Misia. Tan cuñi ra naha cuhun ra naha Bitinia, maa tyin Tatyí Ii ra Jesucristo ña tsahá cuhun ra naha. ⁸ Tacan tan nda sava ñi yahá ra naha ñuu tsa cayucú Misia tan cuahán ra naha ñuu Troas tsa canyíi yuhu ndutya ñuhu. ⁹ Tan yucú ra naha ñuu Troas can, tan iin tsacuaa nyehe ra Pablo iin tsa nyehe ra. Nyehe ra tsi iin rayi tsa iyó iin ñuu tsa canyíi Macedonia. Nyaá nyityi ra nuu ra tan caahán ndaahvi ra tshin ra, tan catyí ra: “Ñaha ihya, tyin jatynyee un tsi ndi” catyí ra. ¹⁰ Tan tsa nyehe ra Pablo can, yuhu ra Lucas tshin ra Pablo tan inga ra janduvahá ndi tsi ndi tan cuahán ndi nda Macedonia can. Tyin tsitó vaha ndi tyin Nyoo caná ra tsi ndi, tyin cahan ndi tuhun ra nácaa jacacú ra tsi yo tshin nyivi ityi can.

Nu nyii ra Pablo tshin ra Silas ñuu Filipos

¹¹ Quihvi ndi iin yutun ndoo ñuu Troas. Tan cuahán ndoo ityi ñi ndi nda Samotracia, iin ñuhu luhlu tsa canyíi mahñu ndutya ñuhu. Tan tsa inga quivi tsaq ndi ñuu Neápolis. ¹² Tan ican queq ndi tan cuahán ndi ñuu Filipos tsa cuví iin ñuu cuenda nyivi Roma. Tan cuví tsi iin ñuu cahnu ca tsa

nuu tandihí ñuu tsa cayucú Macedonia. Tan ican tsiyucú ndi taahan quivi. ¹³ Iin quivi tsa quitatú nyivi, tan quitá ndi ityi tsata ñuu, yatyn iin yutya nu tuhvá nyivi tsicán tahvi tsi Nyoo. Tsinyecú ndi, tacan tan cahán ndi tuhun Nyoo tshin ñiñaha tsa ndu iin ican. ¹⁴ Iin ñaha nañi ña Lidia. Tan ñuu ña cuví Tiatira. Tan tuhvá ña xicó jahma vaha, tsa tunduhva. Yacan cuví tyiñu jahá ña. Tan jacahnú ña tsi Nyoo tumaa jacahnú nyivi Israel. Tan tsiniñi ña tsa caahán ra Pablo. Tan Nyoo nuñá ra añima ña na tyaá yahvi ña tsa caahán ra. ¹⁵ Tan tsicoondutya ña tshin nyivi ña. Tan yahá can tan cahán ndaahvi ña tshin ndi, tan catyí ña:

—Tatun nyehe ndo tyin nditsa tsa tsinú iñi yu tsi Jutu Mañi yo, çohon ndo, ndoqo ndo yuvehe yu —catyí ña tshin ndi.

Tan jañiñi xaan ña tsi ndi na ndoo ndi yuvehe ña.

¹⁶ Tan cuví iin tsaha tsa cuahán ndi nu tsicán tahvi ndi. Tan tsitsi tsa cuahán ndi, tahañ ndi tsi iin ñaha tyuvaa tsa yihí tatyí ña vaha tsi. Yacan cuenda cuví nacoto ña náa ndihi tsa cua cuví ityi nuu. Tan iyó ra cuví tsitoho ña. Tan cuaha xaan xuhun jahá canaa ña tsa cuenda ra naha, tyin cuví nacotó ña. ¹⁷ Tan ñaha tyuvaa can quitsahá nyicún ña tsi ndi, nyuhu tshin ra Pablo. Tan caná tsaá ña tan catyí ña:

—Rayi ihya ra jahá tyiñu tyiñu Nyoo cahnu, cuví ra naha. Tan caahán ra naha tuhun nácaa cuví cacu yo —catyí ña.

¹⁸ Cuaha quivi javahá ñaha tyuvaa can tacan. Tacan tan ra Pablo ña cunyeq ca iñi ra, tan nanyicó coo ra tan catyí ra tshin tatyí ña vaha tsa yihí tsi ña:

—Tshin si vi ra Jesucristo, catyí yu tshin un tyin quita un tsi ñaha tyuvaa ihya —catyí ra.

Tan nu tatyí ña vaha can quitá nu tsi ña juvin ñi cuhva can.

¹⁹ Maa tyin tsa nyehe ra cuví tsitoho ña tyin ña cua cuví ca jaha canaa ra naha xuhun tshin ña, tññ ra naha tsi ra Pablo tshin ra Silas tan tsindaq ra naha tsi ra naha nda vehe tyiñu. ²⁰ Tan tsican ra naha cuatyí tsaha ra naha nuu ra cumí tyiñu naha ra. Tan catyí ra naha:

—Ra Israel ihya cuaha xaan tsa caahán ra naha tshin nyivi ñuu yo tan jatívi ra naha ñuu yo. ²¹ Tyin jacuahá ra naha iin cuhva tsa ña cuví coo yo, ndi ña cuví javahá yo tyin nyivi cuenda ñuu Roma cuví yo —catyí ra naha.

²² Tacan tan nduxaḡn nyivi tsi ra Pablo tan ra Silas. Tan ra cumí tyiñu can tsahnyá ra naha jahma ra Pablo naha ra tan tavá tyiñu ra cumí tyiñu na cañi ra vitya tsi ra Pablo naha ra tshin yutun. ²³ Tsa yahá tsa cañi xaan ra naha tsi ra Pablo tan ra Silas, tan

tsindacā ra vitya can tsi ra naha vehe caa. Tan tavā tyiñu ra vitya tsi ra jaha cuenda tsi ra naha. ²⁴ Quihñ ra cua jaha cuenda can tyiñu tan tyihñ ra tsi ra naha nda tsitsi cuii vehe caa. Tan tyihñ vaha ra tsaha ra naha tyañu vitu. ²⁵ Yahā can tan maa ñuu ra Pablo tan ra Silas quitsahā tsicān tahvi ra naha tsi Nyoo. Tan quitsahā tsitā xaan ra naha cantu Nyoo. Tan ra yucú vehe caa can naha ra tyaá soho ra naha. ²⁶ Tan saná iñi ra naha tan quitsj tsa taán ñihi xaan. Tan naquisj tsi tsaha vehe caa can, tan juvin ñi culva can tan nuñā tandihñ yuvehe, tan ndatsj cadena tsa yihí tsi tandihñ ra tsa yucú vehe caa can naha ra. ²⁷ Tan tsa ndotō ra tsa jahá cuenda vehe caa can, nyehē ra tyin ticohó tandihñ maa yuvehe can. Tacan tan tavā ra mityi ra tyin cua cahñi ra tsi ra. Tyin tsicā iñi maa ra tyin tandihñ ra tsa yucú vehe caa can quitā. ²⁸ Maa tyin ra Pablo canā tsaa ra tsi ra, tan catyí ra:

—Ña cahñi un tsi un, tyin tandihñ ndi tan yucú ndi ihya —catyí ra tsihin ra.

²⁹ Tacan tan ra jahá cuenda vehe caa can tsicān ra ñuhñ. Tan tsinñ ra quihvñ ra nu yucú ra naha. Tan nihí ra tsihin tsa yuuhvñ ra. Tan tsicuiñ tsiti ra nuu ra Pablo tan ra Silas. ³⁰ Numi xaan tavā ra tsi ra naha nu yucú ra naha ican. Tan tsicá tuhun ra tsi ra naha tan catyí ra:

—Nyooho tata, ¿nácaa javaha yu tan cacu yu? —catyí ra tsihin ra naha.

³¹ Tan ra Pablo tsihin ra Silas nacahan ra naha tan catyí ra naha:

—Tsjnu iñi tsi Jutu Mañi yo ra Jesucristo tan cacu un, maa un tan tsihin tandihñ nyivi un —catyí ra naha tsihin ra jahá cuenda vehe caa can.

³² Tan cahān ra naha tuhun Jutu Mañi yo tsihin ra tan tsihin tandihñ nyivi tsa yucú yuvehe ra. ³³ Tan juvin ñi maa tsacuaa can ra jahá cuenda vehe caa can nacatyā ra nu uhvi nu cañi ra vitya tsi ra naha. Yahā can tan juvin ñi tsacuaa can tsicoondutyā ra tsihin tandihñ nyivi ra. ³⁴ Tacan tan tsindacā ra tsi ra naha nda vehe ra. Tan tsahā ra tsa catsi ra naha. Tan maa ra tsihin nyivi ra sñi xaan cuñi ñi tyin tsinú iñi ñi tsi Nyoo. Tacan tan cuanuhñ ra Pablo tsihin ra Silas nda vehe caa can coto cuxaan ra cumí tyiñu tsi ra jahá cuenda vehe caa can.

³⁵ Tsa tuvñ inga quivi tan tavā tyiñu ra cumí tyiñu tsi ra vitya na cunyehe ra naha nu nyii ra jahá cuenda vehe caa can, tan catyí ra naha tyin na jaña ra tsi ra Pablo tsihin ra Silas. ³⁶ Tacan tan ra jahá cuenda vehe caa can catyí ra tsihin ra Pablo:

—Tsaq tyiñu tsi yu jahā ra cumí tyiñu, tsa jaña yu tsi ndo. Yacan cuenda vityin tsa cuví quita ndo —catyí ra tsihin ra naha.

³⁷ Maa tyin ra Pablo catyí ra:

—Nyuhu tsa cuví ndi ra cuenda ñuu Roma cañi ra naha tsi ndi nu tuvi nyivi. Tan ndi ña tatsj tuñi ra naha tsi ndi tumaa cuhva taahán tsi. Tan tyihñ ra naha tsi ndi vehe caa. Tan vityin cuñi ra naha tava xeehe ra naha tsi ndi. Maa tyin ña cuñi ndi. Na quitsi tava maa ra naha tsi ndi —catyí ra Pablo tsihin ra jahá cuenda vehe caa can.

³⁸ Tan ra vitya nacatyj tuhun ra tsihin ra cumí tyiñu naha ra. Tan ra ican naha ra nayuhvj xaan ra naha tsa tsito ra naha tyin ra cuenda ñuu Roma cuví ra Pablo. ³⁹ Tan tsahan ra cumí tyiñu naha ra tsindacān ra naha tucahnu iñi nuu ra Pablo tan ra Silas. Tacan tan ra cumí tyiñu tavā ra naha tsi ra Pablo naha ra tan caahán ndaahvi ra naha tsihin ra Pablo naha ra na quita ra naha ñuu can. ⁴⁰ Tan tsa quitā ra naha vehe caa can, tsahan ra naha vehe ña Lidia. Tan yahā can tan tsinyehē ra naha tsi ra hermano naha ra tan jandu iñi ra naha iñi ra naha tan cuahán ra naha.

17

Nu quitsahā caahán yuhu tahan nyivi ñuu Tesalónica

¹ Nu cuahán ra Pablo tsihin ra Silas, yahā ra naha ñuu Anfipolis, tan ñuu Apolonia. Yahā can tan tsaq ra naha ñuu Tesalónica nu nyaá iin vehe ñuhu nyivi Israel. ² Tan tsahan ra Pablo vehe ñuhu can, tumaa cuhva tuhvá maa ra tsahán tan iin tan iin ñuu. Tan cahān ra tyin Nyoo tsihin nyivi tsicá vehe ñuhu can uñi taahan quivi quitatú ñi. ³ Tan cahvj ra nu libru Nyoo tan tsahā cuenda ra tuhun ra Cristo tsi ñi nu catyí tsi tyin cua nyehe ra tundoho tan cua cúu ra. Yahā can tan cua nandoto ra. Tan catyí ra tsihin ñi:

—Ra Jesús tsa caahán yu tuhun tsihin ndo juvin ra cuví ra Cristo.

⁴ Tan juhva nyivi Israel can tsinñ iñi ñi tsa caahán ra. Tan ndu iñi ñi tsihin ra naha. Tan cuaha xaan nyivi Grecia tsa tuhvá jacahnú tsi Nyoo tan natsinñ ndihñ iñi ñi. Tan cuaha ñiñaha cuca tsa iyó ñuu can natsinñ ndihñ iñi ñi tsa caahán ra tuhun ra Cristo. ⁵ Maa tyin ra ñuu Israel tsa ña tsinú iñi, ndasi cuñi ra naha nyehé ra naha tyin cuaha xaan nyivi nyicún tsi ra Pablo. Tan jandu iñi ra naha tsi taahan ra caquiñi tsa tsicá nuu jutsan ñi maa. Tan quitsahā caahán yuhu tahan nyivi ñuu can jahā ra naha. Tan quihvj ra caquiñi can vehe ra Jasón, tyin nanducú ra naha tsi ra Pablo tan ra Silas, tyin cuñi ra naha tsa quita ra Pablo naha ra. Tyin ra caquiñi can cuñi ra naha nacuhva cuenda ra naha tsi ra Pablo naha ra tsi nyivi. ⁶ Maa tyin tsa ña nañihñ ra naha tsi ra Pablo tan ra Silas ican, quihñ ra naha tsi ra Jasón. Tan ixtā caa ra naha tsi ra. Tan quihñ ndihñ ra naha tsi taahan ca ra hermano tan cuahán ra naha

nuu ra cumí tyiñu ñuu can. Tan cana tsa ra caquiñi can naha ra tan catyí ra naha:

—Ra ihya naha ra cuví ra tsicá nuu jasaná iñi tandihí nyivi nani cahnu ñuhu ñayivi. Tan vityin tsa ndihí tucu ra naha ihya.⁷ Tan ra Jasón can tsahá ra yuvehe ra na cuyucu ra naha. Tan tandihí maa ra naha tan ña tyaá yahvi ra naha tsi ra cuví rey cahnu nda ñuu Roma. Tyin catyí ra naha tyin iyó inga rey tsa nañi Jesús —catyí ra naha.

⁸ Tsa tsiñi nyivi tan ra cumí tyiñu tsa caahán ra caquiñi can naha ra quitsaha caahán yuhu tahan ñi. ⁹ Maa tyin ra Jasón tan inga ra naha tsahá ra naha xuhun tan jañá ra cumí tyiñu tsi ra naha.

Nu cuahán ra Pablo tsihin ra Silas ñuu Berea

¹⁰ Tan juvin ñi tsacuaa can jacuhun ra hermano naha ra tsi ra Pablo tsihin ra Silas ñuu Berea. Tan tsa tsaá ra naha, tsahán ra naha vehe ñuhu nyivi Israel. ¹¹ Tan nyivi Israel tsa iyó ñuu Berea can vaha ca nyivi cuví ñi tan ñavin ca nyivi ñuu Tesalónica tyin tsihin tsa ñi iñi ñi tan naquihin ñi tuhun Nyoo. Tan tandihí quivi nanducú ñi nuu tutu Nyoo, nyehé ñi tatun nditsa tsa caahán ra Pablo. ¹² Yacan cuenda cuaha xaan ñi natsinu iñi ñi tsi ra Cristo tsihin tucu nyivi Grecia tahan ñi ñiñaha cuca tan rayi naha ra. ¹³ Maa tyin tsa tsito ra Israel tsa iyó ñuu Tesalónica tyin ra Pablo nyii ra Berea caahán ra tuhun Nyoo, tan cuahán ra naha tan natyuhu ra naha tsi nyivi Berea can. ¹⁴ Maa tyin ra hermano numi ñi jacuhun ra naha tsi ra Pablo nda ityi yuhu ndutya ñuhu. Maa tyin ra Silas tsihin ra Timoteo ndoq ra naha ñuu Berea. ¹⁵ Tan ra tsa cuahán tsihin ra Pablo tsindacá ra naha tsi ra nda ñuu Atenas. Tacan tan cuanuhu ra naha nda Berea cua nacatyí tuhun ra naha tsihin ra Silas tan ra Timoteo tyiñu tsa cahan ra Pablo tsihin ra naha, tyin na janumi ra naha tan cuhun ra naha nu nyii ra.

Nu nyii ra Pablo ñuu Atenas

¹⁶ Tsitsi tsa ndatú ra Pablo tsi ra Silas tan ra Timoteo ñuu Atenas can, ndasi cuñi añima ra tsa nyehé ra tyin cuaha xaan tsitoho iyó ñuu can. ¹⁷ Yacan cuenda cahan ra tsihin ra Israel naha ra, tan tsihin inga ra tsa tuhvá jacahnú tsi Nyoo tsitsi vehe ñuhu can. Tan tandihí quivi caahán ra tsihin nyivi tsa cuahán nuyahvi. ¹⁸ Tan ñihj tahan ra tsihin nyivi tsa cahví tuhun tsa jacuahá nyivi tsa nañi epicúreo. Tan ñihj tahan tucu ra tsihin nyivi tsa cahví tuhun tsa jacuahá nyivi tsa nañi estoico. Tan cahan ñi tsihin ra. Tan yihí ra catyí ra naha:

—Ra tsa caahán xaan ihya, ¿náa cua cahan ra tsihin yo? —catyí ra naha.

Tan inga ra naha catyí ra naha:

—Inga nyoo caahán ra ihya tuhun —catyí ra naha.

Tacan cahan ra naha tyin ra Pablo caahán ra tuhun ra Jesús, tan caahán tucu ra tuhun tsa cua nandoto nyivi tatun cua túu ñi. ¹⁹ Tacan tan tsindacá ra naha tsi ra Pablo iin nu nañi Areópago, nu tuhvá ra cumí tyiñu naha ra ndu iin. Tan catyí ra naha tsihin ra:

—Cuñi ndi coto ndi tuhun tsa tsa jacuahá un. ²⁰ Tyin jacotó un tuhun tsa ña tsitó ndi. Tan cuñi tucu ndi coto ndi náa cuñi tsi catyí tandihí tuhun ihya —catyí ra naha tsihin ra.

²¹ Tyin tandihí nyivi Atenas tan nyivi inga ñuu tsa iyó ican taahán xaan iñi ñi tyaá soho ñi tan nacatyí tuhun ñi náa ndihí tuhun tsa.

²² Tacan tan ra Pablo nduvitá nyityi ra tyañu nu yucú ra naha nu cuví Areópago, tan catyí ra:

—Nyooho ra ñuu Atenas, yuhu nyehé yu tyin cuaha xaan nyoo jacahnú ndo. ²³ Tyin tsahan yu tsinyehe yu nu tuhvá ndo ndu iin. Tan nyehé yu iin altar nu nyaá letra tsa catyí tyehen: “Tsehe cuví cuenda Nyoo tsa ña nacotó yo” catyí letra can. Nyooho jacahnú ndo tsi Nyoo tsa ña nacotó ndo. Juvin Nyoo can cuví tsa caahán yu tuhun tsihin ndo. ²⁴ Nyoo tsa javahá ñuhu ñayivi tan tandihí tsa iyó nu ñuhu ñayivi ihya, tsi maa ra cuví andivi tan ñuhu ñayivi. Tan ña iyó ra tsitsi vehe ñuhu tsa javahá nyivi.

²⁵ Tan ña nyitá iñi ra tsa jatinyeeé nyivi tsi ra. Tyin maa ra tsahá ñayivi coo tandihí yo. Tan tsahá ra tatyí tsa ixtá tatyí yo. Tan maa ra tsahá tandihí tsa tsiñi ñuhu tsi yo.

²⁶ Javahá Nyoo tsi intuhun rayi. Tan tsa yahá can tsicoq cuaha nyivi tata ra. Tan maa ra naha cuví tsi tsaahnu tandihí yo. Yacan cuenda intuhun ñi ñiñi nyisó tandihí yo. Tan tsahá Nyoo tsa coo yo nani cahnu ñuhu ñayivi. Tsa ndi cumañi ca coo yo tan catyí ra náa cuiya coo intuhun intuhun yo nu ñuhu ñayivi ihya. Tan catyí tucu ra maa nda cua coo intuhun intuhun yo. ²⁷ Tacan javahá ra tyin na quitsaha nanducu yo tsi ra. Tumaá iin ra cuaa nanducú tsihin ndaha ra tsa nanducú ra, tacan cua nanducu yo tsi ra tan cua nañihi yo tsi ra tyaá ra cuhva. Vasu ndi maa ña cañi nyaá ra tsihin intuhun intuhun yo. ²⁸ Tyin iyó yo tan candá yo jahá maa ra. Tumaá catyí tucu iin ra ñuu ndo, tyin catyí ra: “Tata Nyoo cuví tsi yo” catyí ra.

²⁹ Tatun tata Nyoo cuví tsi yo, ña taahán tsi caca iñi yo tyin Nyoo cuví ra iin tsitoho tsa tsinu tsihin xuhun cuaan, a xuhun cuisin, a tsihin yuu vaha. Tan ndi ñavin Nyoo tsa tsinu tsihin tsa tsiñituñi iñi nyivi cuví ra. ³⁰ Tahan tsanaha Nyoo ña cuxaan ra tsi nyivi tsa tsicá iñi tacan tyin ña tsitó ñi náa tsa javahá ñi. Maa tyin vityin catyí ra tsihin nyivi tandihí ñi ityi tyin na ndu uvi iñi ñi cuatyí ñi tan na nasama ñi cuhva iyó ñi.

³¹ Tyin tsa tyaá ra cuhva tyin cua coo iin

quivi tsa cua tatsi tuñi ra tsi nyivi iyó nu ñuhu ñayivi. Tan tsa cua tsa quivi can, ra tsa nacatsi vaha maa ra cua tatsi tuñi tsi ñi jaha ra. Tan tsa janaha ra tsi yo tyin nditsa tsa ra ihya cua tatsi tuñi tsi nyivi, tyin janandoto ra tsi ra can nu tsihi ra —catyí ra Pablo.

³² Tsa tsiñi nyivi tuhun tsa nandotó nyivi tsa tsihi, yihí ñi tsacú nducu ñi, tan yihí tucu nyivi catyí ñi:

—Quitsi un inga tsaha tan cahan un tuhun ihya tsihin ndi —catyí ñi.

³³ Tacan tan cuahán ra Pablo. ³⁴ Maa tyin yihí ñi ndu iin ñi tsihin ra, tan natsinu iñi ñi tsi ra Cristo. Tan iin ra tsa natsinu iñi, nañi ra Dionisio, tan cuví ra iin ra cumí tyiñu tsa tuhvá ndu iin nda Areópago can. Tan iin ñaha tsa nañi Dámaris natsinu ndihi tucu iñi ña, tan tsihin inga ca ñi.

18

Nu nyivi ra Pablo ñuu Corinto

¹ Yahá can tan quitá ra Pablo ñuu Atenas tan cuahán ra ñuu Corinto. ² Tan ican nañihí ra tsi iin ra Israel tsa nañi Aquila. Tan ñuu Ponto cacu ra. Tan maa ra tsihin ñasihi ra, ña Priscila, quitá ñi Italia nu tsicoo ñi, tyin ra Claudio, ra cuví rey cahnu ñuhu can, tava ra tsi tandihí nyivi Israel. Catyí ra tyin na quita ñi ñuu Roma can. Tan ra Pablo cuahán ra nu iyó ñi ñuu Corinto. ³ Tan iin ñi tyiñu javahá ra tsihin ñi. Javahá ñi vehe jahma. Tan ndoo ra tsihin ñi tyin javá tyiñu ra iin caa ñi tsihin ñi. ⁴ Tan quivi quitatú nyivi Israel tahan iin vitya, ra Pablo cuahán ra vehe ñuhu ñi. Tan natuhún tahan ra tsihin nyivi Israel tan tsihin nyivi tsa ñavin nyivi Israel cuví. Tyin nducu ra cuhva tsa tsinu iñi ñi tsi ra Jesucristo.

⁵ Tan quivi tsaá ra Silas tan ra Timoteo tsa quee ra naha Macedonia, ra Pablo nacoa ra tyiñu jahá ra tan intuhun ña tyiñu tsa caahán ra tuhun Nyoo jahá ra. Tan caahán catsi ra tsihin nyivi Israel tyin ra Cristo, tsa ndatú xaan ñi, juvin ra cuví ra Jesús. ⁶ Maa tyin ñi ican xaan cuñi ñi. Tan quitsaha caahán ñi ndavaha ñi siqui Jutu Mañi yo. Tacan tan ra Pablo naquisí ra jahma ra tumaa iin seña tyin ca ndoo cuatyí ñi siqui ñi. Tan catyí ra tsihin ñi:

—Cuatyí maa ndo cuví tatun cuhun ndo anyaya. Ñavin ca cuatyí yuhu tyin tsa cahan yu tsihin ndo tan maa ndo ña tsiñu iñi. Vityin tan ityi nuu ca cua cuhun yu cahan yu tuhun ihya tsihin nyivi tsa ñavin nyivi Israel cuví —catyí ra tsihin ñi.

⁷ Tan quitá ra vehe ñuhu can. Tan cuahán ra vehe ra tsa nañi Justo, iin ra tsa jacahnú tsi Nyoo. Tan yatyin ñi vehe ñuhu can nyaá vehe ra. ⁸ Tan iin ra tsa nañi Crispo, ra cuví ityi nu vehe ñuhu can, natsinu iñi ra tsi Jutu Mañi yo tan tacan tucu tandihí nyivi ra. Tan

cua ha ca nyivi iyó ñuu Corinto can, tsa yaha tsa tsiñi ñi tsa caahán ra Pablo, natsinu iñi ñi tsi ra Jesús, tan tsicoondutya ñi. ⁹ Tacan tan iin tsacuaa nyehe ra Pablo iin tsa janaha Nyoo tsi ra. Tan cahan Jutu Mañi yo tsihin ra, tan catyí ra:

—Ña nayuhvi un. Jañihi ca cahan un tuhun yu tan ña jandihí un tsa cahan un. ¹⁰ Tyin yuhu nyaá yu tsihin un, tan yoñi cuví javahá tsa caquiñi tsi un. Tyin cuaha xaan nyivi yu iyó ñuu ihya tan nyaá cua jacacu yu tsi ñi —catyí Jutu Mañi yo tsihin ra Pablo.

¹¹ Yacan cuenda ra Pablo ndoo ra iin cuiya sasava ñuu Corinto can, jacuahá ra tuhun Nyoo tsi nyivi.

¹² Maa tyin quivi tsa ndacá ñaha ra Galión tsi nyivi ñuu tsa cayucú Acaya, ndu iin ra Israel naha ra siqui ra Pablo. Tan tsičan ra naha cuatyí tsaha ra nuu ra Galión. ¹³ Tan catyí ra naha tsihin ra Galión can:

—Ra ihya natyuhú ra tsi nyivi na jacahnu ñi tsi Nyoo iin cuhva tsa ñavin cuhva catyí ley —catyí ra naha.

¹⁴ Tacan tan cuhva tsa cua nacahan ra Pablo, tan nacahan ñi ra Galión, tan catyí ra tsihin ra Israel can naha ra:

—Nyoo ra Israel, cuví jandaa yu cuatyí ra tatun cuatyí cahnu o cuatyí ndiyí cuví. ¹⁵ Maa tyin maa ñi maa tuhun caahán cuví tuhun ihya. Tan yuhu ña cuñi yu jandaa yu tyiñu ihya, tan inga tucu tuhun tyin cuenda ley maa ndo cuví. Nyehe maa ndo. Jandaa maa ndo tyiñu tyin yuhu ña cuñi yu cuví yu juez tsa cuenda tuhun ihya —catyí ra Galión can tsihin ra naha.

¹⁶ Tan tava ra tsi ra Israel naha ra nu cuví vehe tyiñu ra. ¹⁷ Tacan tan tandihí ra Grecia tñin ra naha tsi ra Sóstenes, ra cuví ityi nu vehe ñuhu nyivi Israel. Tan cañi ra naha tsi ra juvin ñi maa nuu ra Galión, ra yihí ndaha tsi nyivi Acaya. Tan ra Galión can ña cahan maa ra.

Nu cuanuhú ra Pablo ñuu Antioquia tan cuahán ra tsa tsinu uñi tsaha cua cahan ra tuhun Nyoo

¹⁸ Tan ra Pablo ndoo ra ñuu Corinto can cua ha quivi. Yahá can tan catyí ra tsihin ra hermano naha ra tyin tsa cua cuhun ra. Tan cuahán ra Aquila tan ña Priscila tsihin ra. Tacan tan tsaá ñi ñuu Cencrea. Tan ra Pablo xatyá ndi ra jiñi ra tumaa iin seña tyin tsa yaha javahá ra tsa catyí ra tyin cua javaha ra nuu Nyoo. Tacan tan quihvi ñi tsitsi iin yutun ndoo tsa cuahán nda Siria. ¹⁹ Tan tsa tsaá yutun ndoo can nda ñuu Éfeso, quitá ñi. Tan ra Aquila tsihin ña Priscila ndoo ñi ican. Tan ra Pablo cuahán ra vehe ñuhu nyivi Israel, tan cahan ra tsihin nyivi tsa ndu iin ican. ²⁰ Tan cahan ndaahvi ñi tsihin ra tyin na ndoo ra taahan ca quivi tsihin ñi.

Maa tyin ña cuñí ra. ²¹ Tan catyí ra tsihin ñi tyin tsa cuahán ra, tan catyí tucu ra tyehen:

—Cuñí tsi tsa cuhun yu ñuu Jerusalén tyin jacahnu yu vico tsa vatsí tahan. Maa tyin tatun Nyoo cuñí, cua quitsi yu inga tsaha nu yucú ndo —catyí ra tsihin ñi.

Tacan tan cuahán ra, quihví ra tsitsi iin yutun ndoo tsa cuahán nda Siria. ²² Quivi tsa tsaá nyico ra ñuu Cesarea cuenda Siria, tsahán ra ñuu Jerusalén tsicuhvá ra nacumi tsi nyivi yihí cuenda ra Cristo tsa iyó ican. Yahá can tan cuahán nyico ra ñuu Antioquía. ²³ Tan tsa yahá tsinyí ra juhva quivi ican, quee ra tan cuahán nyico ra tan iin tan iin ñuu tsa cayucú Galacia tan Frigia. Tan jandu iin ra iñi tandihi nyivi yihí cuenda ra Cristo.

Nu caahán ra Apolos tuhun Nyoo ñuu Éfeso

²⁴ Quivi can tsaá iin ra Israel ñuu Éfeso. Nañi ra Apolos, tan ñuu ra cuví Alejandría. Tan vaha xaan caahán ra tuhun Nyoo. Tan tsitó xaan ra tuhun Nyoo tuhun tsahnu tsa nyaá nu libru. ²⁵ Tan vaha xaan cutuhvá ra tuhun Jutu Mañi yo. Tan caahán ra tsihin tsa ñi iñi ra. Tan catsi xaan jacuahá ra tuhun ra Jesús. Vasu cuhva tsa jacoondutyá ra Juan ñi tsitó ra. ²⁶ Tan quitsahá caahán ra tsitsi vehe ñuhu tsihin tsa ñi iñi ra. Tan cuhva tsa tsiñi ra Aquila tan ña Priscila, tavá siin ñi tsi ra tan tsahá cuenda vaha ca ñi tuhun Nyoo tsi ra. ²⁷ Tacan tan quitsahá cuñi ra Apolos cuhun ra ityi Acaya. Tan ra hermano jatinyeé ra naha tsi ra. Tan jacuhun ra naha iin carta tsi nyivi yihí cuenda ra Cristo ityi can, tan catyí ra naha tsihin ñi tyin na vaha cahan ñi tsihin ra Apolos nu cua tsa ra. Tacan tan cuahán ra. Tan cuhva tsa tsaá ra Acaya can, jatinyeé xaan ra tsi nyivi yihí cuenda ra Cristo, ñi tsa natsinú iñi tsa cuenda tumañi iñi tsa javahá Nyoo tsi ñi. ²⁸ Tyin nu tuvi nyivi ñihi xaan cahan yuhu ra Apolos tsihin ra Israel naha ra tyin cuhva tsinú iñi nyivi Israel, ña nditsa. Tan jacuahá ra tsa catyí nu tutu Nyoo tyin ra Cristo, ra tsa ndatú xaan ñi, juven ra cuví ra Jesús.

19

Nu cuahán nyico ra Pablo ñuu Éfeso

¹ Tsitsi tsa nyí ra Apolos ñuu Corinto, ra Pablo yahá ra ityi yucu tan tsaá ra nda ñuu Éfeso. Tan ican nañihí ra tsi taahan ra yihí cuenda ra Cristo. ² Tan tsicá tuhun ra tsi ra naha:

—¿A naquihñin ndo Tatyí Ii Nyoo quivi tsa natsinú iñi ndo? —catyí ra Pablo tsihin ra naha.

Tan nacahan ra naha tan catyí ra naha:
—Ndi luxu ña tsitó ndi tsa iyó Tatyí Ii Nyoo.

³ Tacan tan ra Pablo tsicá tuhun ra tsi ra naha:

—¿Nacaa tsicoondutyá ndo? —catyí ra.

Tan nacahan ra naha tan catyí ra naha:

—Cuhva tsa jacoondutyá ra Juan, tacan tsicoondutyá ndi —catyí ra naha.

⁴ Tacan tan catyí ra Pablo tsihin ra naha:

—Ra Juan jacoondutyá ra tsi nyivi tsa ndu uví iñi cuatyí. Maa tyin catyí tucu ra tsihin ñi tyin cuñí tsi tsa tsinu iñi ñi tsi ra tsa cua quitsi. Tan ra ican cuví ra Cristo Jesús —catyí ra Pablo tsihin ra naha.

⁵ Tsa tsiñi ra naha tsa cahan ra Pablo tuhun ihya, tacan tan tsicoondutyá ra naha inga tsaha tsihin sivi Jutu Mañi yo Jesús.

⁶ Tan tsa tyiso ndaha ra Pablo jiñi ra naha, tacan tan naquihñin ra naha Tatyí Ii Nyoo. Tan quitsahá caahán ra naha inga yuhu. Tan tsahá cuenda ra naha tuhun tsa tsahá Tatyí Ii Nyoo tsi ra naha tsi nyivi. ⁷ Tan tsa tandihi ra naha quitá maa utsi uvi taahan ra naha.

⁸ Tan tsitsi tsa uñi yoo tsicá ra Pablo vehe ñuhu nyivi Israel ñuu Éfeso, tan caahán ra tuhun ra Cristo tsihin tsa ñi iñi ra. Tan jacuahá ra tsi ñi na nacuhva ñi tsi ñi tsi Nyoo na cundaca ñaha ra tsi ñi. ⁹ Maa tyin yihí ñi jandava ñi añima ñi, tan ña cuñí ñi tsinu iñi ñi. Tan caahán ñi ndavaha ñi siqui tuhun ra Cristo nuu nyivi, tan catyí ñi tyin ña vaha ityi ra Jesús. Tacan tan ra Pablo catsiyo nyaha ra nu yucú ñi. Tan tsindacá ra tsi ñi tsinú iñi tsi ra Cristo nda iin escuela ra tsa nañi Tiranno. Tan ican caahán ra tuhun ra Cristo tsihin nyivi tandihi quivi. ¹⁰ Tan tacan ñi tsicá ra tsitsi tsa uvi cuiya. Tan tandihi nyivi tsa iyó ñuu tsa cayucú Asia, tsiñi ñi tuhun Jutu Mañi yo ra Jesús, tahan ñi nyivi Israel tan nyivi tsa ñavin nyivi Israel cuví. ¹¹ Tan nahnu tsa iyo javahá ra Pablo jahá Nyoo. ¹² Tyin nda cuanda jahma tsa tñin ra Pablo tan tsindacá ñi tsi nyivi tan quitá cuehe tsi ñi, tan quitá ndihi tucu tatyí ña vaha tsi ñi.

¹³ Tan iyó juhva ra Israel tsa tsicá nuu tan iin tan iin ñuu tavá ra naha tatyí ña vaha tsi nyivi. Tan cuñi ra naha cuatyíñu ra naha sivi Jutu Mañi yo Jesús, tyin cua tava ra naha tsi nu tatyí ña vaha. Tan catyí ra naha tsihin nu tatyí ña vaha can nahnu:

—Tsihin sivi ra Jesús tsa caahán ra Pablo tuhun, catyí ndi tsihin ndo tyin quita ndo —catyí ra naha.

¹⁴ Tacan javahá tsa utsa taahan sehe iin ra Israel tsa nañi Esceva. Tan ra Esceva can cuví ra iin ra cuví ityi nuu tsihin ra jutu. ¹⁵ Tan tsa cahan ra can naha ra tsihin nu tatyí ña vaha, nacahan nu tsihin ra naha tan catyí nu:

—Tsitó yu tsi ra Jesús. Tan tsitó yu yóo ra cuví ra Pablo. Tan ¿yóo ra cuví tucu nyooho?

—catyí nu tatyí ña vaha can tshin sehe ra Escava naha ra.

¹⁶ Tacan tan ra tsa yihí tatyí ña vaha can ndava ra siqui ra can naha ra. Tan tshin tsa cuaha tunyee iñi nu tatyí ña vaha can tan cuví cunyeē ra tñin tahan ra tshin tandihí ra can naha ra. Tan tsahnya cuatyí ra jahma ra naha. Tan jañicueehē ra tsi ra naha. Tan jacuhun tandihí ra tsi ra naha jahā nu tatyí can. ¹⁷ Tacan tan tandihí nyivi Éfeso, tahan ñi nyivi Israel, tan nyivi tsa ñavin nyivi Israel cuví, tsito ñi tuhun can. Tan yuuhví xaan ñi cuví. Tan jacahnú ñi sivi Jutu Mañi yo Jesús.

¹⁸ Tan cuaha xaan nyivi tsa natsinu iñi tsi ra Jesús cuahán ñi cuanahmá ñi cuatyí ñi nuu ra tan nuu nyivi, tandihí maa tsa ña vaha tsa icā ñi tahān tsanaha. ¹⁹ Tan cuaha ñi tsa cahvī tuhun tasi, tsindacā ñi libru ñi. Tan tsahmī ñi libru can nuu tandihí nyivi. Tan tava cuenda ñi nácaa yahvi libru can. Tan yahvi tsa tandihí libru can quita tsi uvi xico utsi mil xuhun cuitsin. ²⁰ Tan tacan ñi tan cuahán nducuahā ca nyivi tsa yihí cuenda Jutu Mañi yo. Tan tacan nyehé nyivi tyin cahnu xaan tunyee iñi iyó tsi ra.

²¹ Tan tsa yahā tuhun ihya, ra Pablo tyaa ra kuhva tsa kuhun ra ñuu tsa cayucú Macedonia tan Acaya. Yahā can tan cua cunuhu ra nda ñuu Jerusalén, tyaa ra kuhva. Tan catyí ra tyin yahā can tan cuñi tsi tsa kuhun ra nda ñuu Roma. ²² Tacan tan jacuhun ra tsi uvi taahan ra jatyinyeē tsi ra nda Macedonia, ra Timoteo tan ra Erasto. Maa tyin tsitsi tsa cuahán ra can naha ra, ndoo maa ra Pablo juhva ca quivi Asia can.

Nu quitsahā cuvaá nyivi Éfeso

²³ Tan juvin ñi quivi can quitsahā cuvaá nyivi ñuu Éfeso tsa cuenda tuhun Nyoo, ²⁴ tyin iin ra tsa nañí Demetrio natyuhu ra tsi ñi. Tyin maa ra tuhvá ra jahá tyiñu tshin xuhun cuitsin. Javahá ra tsa cuví vehe ñuhu nyihí tsitoho Diana tshin xuhun cuitsin can. Tan cuaha xuhun jahá canaa ra tan tshin ra jatyinyeē tsi ra. ²⁵ Tan canā ra Demetrio can tsi ra tsa jahá tyiñu tshin ra. Tan canā tucu ra tsi ra tsa jahá tyiñu iin ñi tyiñu can naha ra. Tan catyí ra tshin ra naha:

—Nyooho tata, tsitó ndo tyin tshin tyiñu ihya tan iyó vaha xaan yo. ²⁶ Maa tyin nyooho nyehé ndo tan tsiñi ndo nácaa javahá nu Pablo can ñuu yo ihya, tan tandihí ñuu tsa cayucú Asia ihya. Tyin catyí nu tyin tsitoho tsa javahá yo tan tsa javahá inga ca nyivi ñavin Nyoo cuví can. Tan cuaha xaan nyivi tsinú iñi tsa caahán nu. ²⁷ Tan ña vaha tsa javahá nu tyin ña cua cuyahví ca tsitoho tsa javahá yo. Tan inga tucu tuhun, ña cua jacahnu ca nyivi tsi nyoo Diana tan ña cua jacahnu ñi vehe ñuhu ña, tan ña vaha tacan, tyin ñaha can cahnu xaan cuví ña.

Tan tandihí nyivi ñi cahnu Asia tshin nyivi nanñi cahnu ñuhu ñayivi jacahnú ñi tsi ña. Tan nu cuahán ca tsi quivi ña cua jacahnu ca ñi tsi ña tatun tsinú iñi ñi tsa caahán nu Pablo —catyí ra Demetrio.

²⁸ Tan kuhva tsa tsiñi ra naha tsa cahān ra, xaan xaan cuñi ra naha. Tan quitsahā caná tsa ra naha tan catyí ra naha:

—Cahnu xaan cuví ña Diana tsa cuví ña nyoo cuenda yo tsa cuví yo nyivi Éfeso ihya —catyí ra naha.

²⁹ Tan cuvaā tandihí nyivi ñuu can. Tan tñin ñi tsi ra Gayo, tan tshin ra Aristarco, uvi taahan ra tsa queē Macedonia tan tsicá ra naha tshin ra Pablo. Tan tandihí ñi can ixtā caa ñi tsi ra naha nda cuanda nu tuhvá ñi ndu iin. ³⁰ Tan ra Pablo cuñi ra quihví ra nu yucú ñi tyin cahan ra tshin ñi. Maa tyin ra hermano ña tsahā ra naha tsa kuhun ra. ³¹ Tan tacan tucu taahan ra cumí tyiñu cuenda Asia. Ra vaha iñi tsi ra Pablo cuví ra naha, tan tava tyiñu ra naha tsi ra tyin ña taahán tsi tyihí ra tsi ra ican. ³² Tan nu ndu iin nyivi ican, juhva ñi caná tsa iin tuhun, tan inga ñi caná tsa inga tuhun, tyin cuvaá ñi. Tan cuaha xaan ñi ndi ña tsitó ñi nacuada yucú ñi ican. ³³ Tacan tan nyivi Israel tava tyiñu ñi tsi iin ra tsa nañí Alejandro na yaha ra ityi nuu. Tan juhva ñi tsa yucú ican, tsahā cuenda ñi tsi ra nácaa cua cahan ra. Tacan tan javahā ra seña tshin ndaha ra tyin na cutaxin ñi tyin cuñi ra cahan ra tyin nduve cuatyí nyivi Israel. ³⁴ Maa tyin kuhva tsa tsito nyivi tyin ra Israel cuví ra, tandihí maa ñi canā tsa ñi. Tan tsitsi tsa uvi hora caná tsa ñi, tan catyí ñi:

—Cahnu xaan cuví ña Diana, tsa cuví ña nyoo cuenda yo tsa cuví yo nyivi Éfeso —catyí ñi, caná tsa ñi.

³⁵ Tacan tan ra secretario ñuu can cuví jacutaxin ra nyivi, tan caahán ra tshin ñi, tan catyí ra:

—Nyooho nyivi ñuu Éfeso ihya, tandihí nyivi tsitó ñi tyin nyaá tsi siqui yo tsa jahá cuenda yo vehe ñuhu ña Diana, tyin cahnu xaan cuví ña. Tan jahá cuenda yo tsitoho ña tsa queē andivi tan nacava nu ñuhu ihya. ³⁶ Tan yoñi cuví catyí tyin ña nditsa. Taxin ñi ndo, tan ña ica ndo tatun ña tsitó ndo náa tsa cua javaha ndo. ³⁷ Tyin ra tsa tsindacā ndo ihya nduve náa tsa suhū ra naha vehe ñuhu yo. Tan ndi ña caahán ra naha ndavaha ñi siqui nyoo yo. ³⁸ Tatun ra Demetrio tan ra tsa jahá tyiñu tshin ra, tsicán ra naha cuatyí tsaha iin ra, na kuhun ra naha nu nyaá ra juez. Cuví ndacan ra naha cuatyí nuu ra can, tan maa ra cuví jandaa ra cuatyí can. ³⁹ Tan tatun inga tuhun tsicán ndo, cuñi tsi tsa ndaca ndo can tsi ra cumí tyiñu, tumaa kuhva catyí ley. ⁴⁰ Tyin tatun coto ra ndacá ñaha tan cana ra tsi yo tsa cuenda tsa cuví

ihya, tan ña cua ñihi yo tuhun cahan yo tatun ndaca tuhun ra tsi yo nacuenda cuvaá yo —catyí ra cuví secretario can.

⁴¹ Tan tsa yaha cahan ra, tacan tan catyí ra tyin na cunuho ñi nda yuvehe ñi.

20

Nu yaha ra Pablo Macedonia tan cuahán nyico ra nda Grecia

¹ Tsa yaha tsa cuvaá nyivi ñuu Éfeso can, cana ra Pablo tsi tandihi nyivi tsa yihí cuenda ra Cristo, tyin cahan ra juhva tsihin ñi tan cuhva ra tunyee ifi tsi ñi, tyin tsa tsaá quivi tsa cua cuhun ra inga ñuu. Tan cahan ra tsihin ñi. Tacan tan cuahán ra Macedonia. ² Tan tsahan ra tandihi ityi can tan tsihin tuhun caahán ra jandu iin ra ifi tandihi nyivi yihí cuenda ra Cristo tsa iyó ityi can. Tacan tan tsaá ra ityi Grecia. ³ Tan ican ndoo ra uñi yoo. Tan tsa nyaá tsa cua quihin ra yutun ndoo tan cuhun ra Siria, tan tsito ra tyin nducú nyivi Israel tsi ra tyin cua cahñi ñi tsi ra. Yacan cuenda tyaá ifi ra tsa cua cuhun ra tsihin tsaha ra ityi nu ñuhu, tan cua yaha nyico ra inga tsaha ityi Macedonia. ⁴ Tan cuahán ra Sópater, ra ñuu Berea tsihin ra. Tan cuahán ndihi ra Aristarco tan ra Segundo. Tan uvi taahan ra ihya, Tesalónica cuví ñuu ra. Tan cuahán ndihi ra Gayo, ra ñuu Derbe, tan ra Timoteo, tan uvi taahan ra quee Asia, ra Tíquico tan ra Tróximo. ⁵ Ra hermano ihya yaha ra naha ityi nuu tan ndatú ra naha tsi ndi nda ñuu Troas. ⁶ Tan nyuhu ndatú ndi nda tsa yaha vico pascua nu tuhvá nyivi Israel tsatsí paan tsa nduve yutsan iya yihí. Tacan tan quee ndi ñuu Filípos tsihin yutun ndoo. Tan nu tsinu uhun quivi tan titahan ndi tsihin ra tsa cuahán ityi nuu nda ñuu Troas naha ra. Tan ican ndoo ndi utsa quivi.

Nu caahán ra Pablo tuhun Nyoo ñuu Troas

⁷ Tan tsa cuví tumingu can ndu iin ndi tsihin nyivi yihí cuenda ra Cristo ñuu Troas can. Tan quivi can cua catsi ndi paan tan coho ndi vinu tyin nducuhun ifi ndi tyin tsihi ra Cristo tsa cuenda cuatyí yo. Tan ra Pablo caahán ra tsihin ñi, tan tahañ ñuu, tyin tsa nyaá tsa cuhun ndi inga quivi can. ⁸ Yucú ndi iin cuarto nu tsinu uñi pisu. Tan nditsin xaan nu yucú ndi tsitsi vehe can tyin cuaha xaan ñuhu candili cayú. ⁹ Tan iin ra tyuvaa tsa nañi Eutico nyaá ra ventana tyaá soho ra, maa tyin ña cunyeé ifi ra ñumaahna, tyin ra Pablo, naha xaan caahán ra. Quixí ra Eutico, tan ña tsito ra canacava ra. Quee ra nda nu tsinu uñi pisu tan canacava ra nda nu ñuhu. Tan cañihí ra hermano naha ra tsi ra, maa tyin tsa tsihi ra. ¹⁰ Tacan tan ra Pablo nuu ra tan tsaá ra nu canyíi ra tyuvaa

can. Tan tyihí jucun ndaha ra tsi ra tyuvaa can, tan catyí ra tsihin tandihi ra hermano naha ra:

—Ña nayuhvi ndo, tyin ra ihya nyito ra —catyí ra.

¹¹ Tacan tan ndaa nyico ra Pablo tan tsatsi ndi paan tan tsihi ndi vinu. Tan ra Pablo caahán ca maa ra tuhun Nyoo nda cuanda cunditsin. Tsahan cuahán ra. ¹² Tan ra tyuvaa can nandoto ra tan cuanuhu ra nda yuvehe ra. Tan sii xaan cuñi ñi cuví.

Nu quita ra Pablo ñuu Troas tan cuahán ra nda ñuu Mileto

¹³ Nyuhu yaha ndi ityi nuu tan cuahán ndi tsihin yutun ndoo nda ñuu Asón. Tyin ican cua ñihi tahañ ndi tsihin ra Pablo, tyin tacan jandaá maa ndi tyiñu tsihin ra, tyin maa ra cuñi ra cuhun ra ityi nu ñuhu tsihin tsaha ra. ¹⁴ Tan tsa ñihí tahañ nyico ndi tsihin ra nda ñuu Asón, quihvi ra tsitsi yutun ndoo tsihin ndi tan cuahán ndi nda ñuu Mitilene. ¹⁵ Tsa quita ndi ñuu can tacan tan yaha ndi ityi nuu iin ñuhu luhlu tsa nañi Quío, canyíi tsi mahñu ndutya ñuhu. Tan tsa inga quivi can tsaá ndi inga ñuhu luhlu tsa nañi Samos. Yaha ndi ican tan tsaá ndi ñuu Troglilio nu quitatu ndi. Tan tsa inga quivi tsaá ndi nda ñuu Mileto. ¹⁶ Tacan cuví tyin ra Pablo ña cuñi ra tsa cunyíi naha ra ityi Asia. Tan ña cuñi ra cuhun ra ñuu Éfeso tyin numi ñi cuñi ra tsaá ra ñuu Jerusalén, tyin tatun cuhva tsi cuhva, ican nyii ra tan cua coo vico Pentecostés.

Nu caahán ra Pablo tsihin ra ñuu Éfeso naha ra tyin cua cuhun ra tan ña cua quitsi ca ra

¹⁷ Tan tsa yucú ndi ñuu Mileto, cana ra Pablo tsi ra cuví ityi nuu tsihin nyivi yihí cuenda Nyoo ñuu Éfeso. ¹⁸ Tan tsa tsaá ra naha, tan caahán ra Pablo tsihin ra naha tan catyí ra:

—Maa ndo tsitó ndo nácaa cuhva tsicá yu nda quivi jihna ñi tsa tsaá nuu yu Asia ihya. ¹⁹ Tandihí quivi tsa tsinyi yu tsihin ndo tan tyiñu Jutu Mañi yo jahá yu tsihin tsa nducú yu cuhva tsa ña cahnu xaan ñi cuví yu, vasu cuaha tundoho tan tucuiihya ifi nyehe yu. Tan cuaha tundoho quitsi siqui yu jahá nyivi Israel. ²⁰ Maa tyin ña jandihí yu tsa caahán yu tuhun Nyoo tsihin ndo. Tyin yacan cuví tandihí tsa tsiñi ñuhu tsi ndo tan coo vaha ndo tsihin Nyoo. Tan jacuahá yu tuhun Nyoo tsi ndo nu ndu iin ndo tan nda yuvehe ndo. ²¹ Tan jacuahá yu tuhun ihya tsi nyivi Israel tan tsi nyivi tsa ñavin nyivi Israel cuví, na nasama ñi cuhva iyó ñi nuu Nyoo tan na tsinu ifi ñi tsi Jutu Mañi yo, ra Jesucristo. ²² Tan vityin cua cuhun yu nda ñuu Jerusalén tyin maa Tatyí Ii Nyoo catyí. Tan ña tsitó yu náa cua cuví tsi yu

ndacan. ²³ Maa tyin intuhun ñi tsa tsitó yu tyin tandihí ñi nu cuahán yu, Tatyí li Nyoo caahán tsihin yu tyin ndatú vehe caa tsi yu, tan cuaha tundoho cua nyehe yu. ²⁴ Maa tyin ndi intuhun yacan tan ña tsicá iñi yu. Tan ndi ñayivi yu nduve yahvi nyaá can tsa cuenda yu, tyin tacan tan tsihin tsa sii cuñí yu tan cuví jañihi ca yu jaha tyiñu yu tsa cuenda Jutu Mañi yo Jesús, tumaa tava tyiñu ra tsi yu. Tan jañihi ca yu jacuaha yu tuhun vaha nácaa cuñí maa Nyoo tsi yo.

²⁵ Tan vityin tsitó vaha yu tyin tandihí nyooho tsa cahan yu tuhun Nyoo tsihin ndo, ña cua nyehe ca ndo tsi yu. ²⁶ Yacan cuenda cuñí yu cahan yu tsihin ndo vityin tyin nduve ca cuatyí yuhu tsa cuenda ndi intuhun ndo. ²⁷ Tyin ñiñi cuñí yu tan cahan yu tandihí tuhun Nyoo tsihin ndo tan nduve náa tsa tyihí xeehe yu. ²⁸ Yacan cuenda jaha cuenda ndo tsi ndo. Tan jaha cuenda ndihí ndo tsi tandihí nyivi yihí cuenda Nyoo. Tyin maa Tatyí li Nyoo tava tyiñu tsi ndo na jaha cuenda ndo tsi nyivi tsicá vehe ñuhu Jutu Mañi yo. Maa ra jatá ra tsi ñi tsihin ñiñi ra. ²⁹ Tan tsitó yu tyin quivi cuhun yu, cua quitsi inga ra naha. Tan cua cuñi ra naha jatívi ra naha tsi nyivi yihí cuenda Jutu Mañi yo. Tumaa lobo xaan tsa tsahí tsi mbee, tacan cua quitsi ra can naha ra. ³⁰ Tan juvin ñi nu yucú ndo, cua nduvita taahan ra. Tan cua jacuaha ra naha tsi ndo tuhun tsa ña nditsa tyin cunyicun ndo tsi ra naha. ³¹ Yacan cuenda jaha vaha ndo cuenda. Ndūcuhun iñi ndo tyin tsitsi tsa uñi cuiya ña jandihí yu tsa caahán yu tuhun Nyoo tsihin ndo. Tyin ñiñu tan nduvi caahán yu tsihin intuhun intuhun ndo, tan tsihin tsa cuihya cuñí yu, coto nacoo ihñi ndo tuhun Nyoo.

³² Tan vityin nyooho yañi, tyaá yu tsi ndo ndaha Nyoo. Naquihin vaha ndo tandihí tuhun caahán ra tsihin yo. Tyin jacotó ra tsi yo tyin cuñi xaan ra tsi yo. Tan tuhun ra jandunyeé xaan tsi iñi yo tan tsahá tsi tsa cuví yo nyivi vaha tsihin tandihí inga nyivi tsa nacuhva cuenda tsi ñi tsi ra. ³³ Yuhu ña nyiyó iñi yu tsa iyó tsi ndi intuhun ndo. Ndi xuhun ndo, ndi jahma ndo. ³⁴ Nyooho tsitó vaha ndo tyin jaha tyiñu xaan yu tsihin ndaha yu tan ñihí yu tsa tsiñí ñuhu tsi yu tsihin ra tsicá tsihin yu naha ra. ³⁵ Tacan ñi janahá yu tsi ndo tyin cuñí tsi tsa jaha tyiñu ndo tan jatyinyee ndo tsi nyivi iyó náa tsa tsiñí ñuhu tsi ñi. Tan ndūcuhun iñi ndo tsa caahán Jutu Mañi yo Jesús, nu catyí ra tyehen: “Sii ca cuñi nyivi tsa tsahá, tan ñavin ca nyivi tsa ñihí ndaahvi” catyí Jutu Mañi yo.

³⁶ Tsa yaha tsa cahan ra Pablo tuhun ihya, tsicuiñí tsiti ra. Tan tsican tahvi ra tsihin tandihí ra naha. ³⁷ Tan tandihí ra naha nducuihya xaan iñi ra naha tan tsacu xaan ra naha. Tan tsinumí nyaa ra naha tsi ra.

³⁸ Tyin ra Pablo catyí ra tyin cua cuhun ra inga ñuu tan ña cua cuhun ca ra nu yucú ra naha. Tacan tan tsindacá ra naha tsi ra nda nu quihvi ra tsitsi yutun ndoo.

21

Nu cuahán ra Pablo ñuu Jerusalén

¹ Tacan tan nacoo ndi tsi ra hermano naha ra tan quihvi ndi tsitsi yutun ndoo. Tan cuahán ndi ndoo ityi ñi nda Cos, iin ñuhu luhlu tsa canyí mahñu ndutya ñuhu. Tan tsa inga quivi tsaá ndi nda Rodas tsa cuví inga ñuhu luhlu ñi. Tacan tan cuahán ndi nda ñuu Pátara. ² Tan ñuu Pátara, nyehe ndi inga yutun ndoo tsa cuahán nda Fenicia. Tan quihvi ndi tsitsi can, tacan tan cuahán ndi. ³ Tan ityi nu cuahán ndi, nyehe ndi nu canyí ñuhu Chipre ityi ndaha satyin yo. Tan yaha ñi ndi cuahán ndi ityi nuu ca, nda ityi Siria. Tan tsaá ndi nda ñuu Tiro tyin ican cua tava ra naha ndaha tyiñu tsa yihí tsitsi yutun ndoo can. ⁴ Tan tsa nañihí ndi tsi nyivi yihí cuenda Nyoo ñuu can, ndoo ndi tsihin ñi utsa quivi. Tan catyí ñi tsihin ra Pablo tyin ña taahán tsi tsa cuhun ra ñuu Jerusalén tyin tacan cahan Tatyí li Nyoo tsihin ñi. ⁵ Maa tyin tsa quita utsa quivi can, quita ndi ñuu can. Tan nu cua quita ndi tandihí ra hermano naha ra tsihin ñasihi ra naha tan tsihin sehe ra naha tsindacá ñi tsi ndi nda cuenda yuhu ñuu. Tan nu nyiti yuhu ndutya ñuhu can tsicuiñí tsiti ndi, tan tsican tahvi ndi tsi Nyoo. ⁶ Tacan tan tsinumí nyaa tahan ndi tsi ndi. Tsahan quihvi ndi tsitsi yutun ndoo. Tan ra hermano can naha ra cuanuhá ra naha yuvehe ra naha.

⁷ Tan tsa quee ndi ñuu Tiro, cuahán ndi nda ñuu Tolemaida. Tan ican tsaha ndi nacumi tsi nyivi yihí cuenda ra Cristo. Tan ndoo ndi tsihin ñi iin quivi. ⁸ Tan tsa inga quivi quita ndi cuahán ndi nda ñuu Cesarea. Tan ican tsahan ndi vehe ra Felipe, ra tsa jacotó xaan tsi nyivi nácaa jacacú Nyoo tsi yo. Cuví ra iin ra nyisó tyiñu vehe ñuhu tsitsi tsa utsa taahan ra naha. Tan ndoo ndi yuvehe ra. ⁹ Ra Felipe, iyó cumi taahan ñi cuatyí sehe ra tsa ñaha ca tandaha. Tan ndusu yuhu Nyoo cuví ñi. ¹⁰ Tan tsa cuaaha ñi quivi tsa yucú ndi ican, tan tsaá iin ndusu yuhu nyoo tsa quee nda Judea. Nañi ra Agabo. ¹¹ Quitsí nyehe ra nu yucú ndi. Tan quihín ra cinturón ra Pablo, tsahíñi ra tsaha ra tan ndaha ra, tan catyí ra:

—Tatyí li Nyoo catyí tsihin yu tyin tyehen cua cunuhí tsitoho cinturón ihya nda ñuu Jerusalén. Tan cua cuhva cuenda nyivi Israel tsi ra tsi ra inga ñuu naha ra —catyí ra Agabo.

¹² Tsa tsiñí ndi tsa caahán ra, nyuhu tan ra ñuu Cesarea naha ra caahán ndaahvi ndi

tsihin ra Pablo na ña cahun ra ñuu Jerusalén.
 13 Maa tyin ra Pablo catyí ra:

—¿Nacuenda tsacú ndo tan janducuihyá ndo iñi yu? Yuhu nduve cuenda yu. Ndi maa tsa cua cunuhñi yu, ndi maa cahñi ra naha tsi yu, maa tyin cahun yu tyiñu tsa cuenda Jutu Mañi yo Jesús —catyí ra tsihin ndi.

14 Tan tsa nyehe ndi tyin ña cuví tsa jahá ndi tsi ra, jañá ndi. Tan catyí ndi:

—Na cuvi maa cuhva cuñi Jutu Mañi yo.

15 Tsa yaha yacan na ica vaha ndi tsi ndi tan cuahán ndi nda ñuu Jerusalén.
 16 Tan cuahán taahan ra ñuu Cesarea ra yihí cuenda ra Cristo, tsihin ndi. Tan cuahán tucu iin ra ñuhu Chipre. Nañi ra Mnasón. Cuaha xaan cuiya tsinú iñi ra tsi ra Cristo. Tan tsindaca ra tsi ndi yuvehe ra tsa iyó ñuu Jerusalén tyin cuyucu ndi.

Nu cua nyehe ra Pablo nu nyii ra Jacobo

17 Tsa tsaá ndi ñuu Jerusalén, nyivi yihí cuenda ra Cristo sii xaan cuñi ñi caahán ñi tsihin ndi. 18 Tan inga quivi can cuahán ndi tsihin ra Pablo cua nyehe ndi nu nyii ra Jacobo. Tan ican yucú tucu tandihí ra cuví ityi nuu tsihin nyivi vehe ñuhu. 19 Tsaahá ra Pablo nacumi tsi ra naha. Yaha can tan nacatyí tuhun ra tandihí nácaa tsatyifñu Nyoo tsi ra nu cahan ra tuhun Nyoo tsihin nyivi tsa ñavin nyivi Israel cuví. 20 Tsa tsiñi ra naha tuhun ihya, jacahnú ra naha tsi Nyoo, tan catyí ra naha tsihin ra Pablo:

—Vaha yañi, nyehe un tyin cuaha xaan nyivi Israel tsinú iñi tsi ra Cristo. Tan tandihí ñi catyí ñi tyin taahán tsi tsa javaha yo cuhva catyí ley tsa tyaá ra Moisés. 21 Tan ñihí tuhun ñi tyin yooho jacuahá un tsi tandihí nyivi Israel tsa iyó inga ñuu tyin na ña cuita ca iñi ñi ley tsa jacuahá ra Moisés, tan catyí tucu un tsihin ñi tyin ña cuñi ca tsi tsa cunyaa tuñi Nyoo tsi sehe yá ñi, tan ndi ña cua javaha ca ñi tuhun tsahnú cuhva tsa iyó maa yo tañan tsanaha. 22 ¿Nacaa javaha yo vityin? Tyin nyivi cua ñihí tuhun ñi tyin tsaá un ihya. 23 Vaha taxin ca tsa javaha un tsa cua cahan ndi tsihin un. Ihya iyó cumi taahan rayii tsa nyaá javaha tsa catyí ra tsihin Nyoo tyin cua javaha ra naha. 24 Cuaahan tsihin ra naha na nduvaha un nuu Nyoo tsihin ra naha. Tan tyahvi un tsa taahán tsi tyahvi ra naha. Tacan tan maa ra naha cua xatya ndi ra naha jiñi ra naha cuhva catyí ley. Tan tsa javaha un tacan, tan coto tandihí nyivi tyin ña nditsa tsa caahán ñi siqui un, tyin cua nyehe ñi tyin ña nacoq un ley tsa tyaá ra Moisés. 25 Tan tsa cuenda nyivi tsa ñavin nyivi Israel cuví, tan tsinú iñi ñi tsi ra Cristo, tsa jacuhun ndi tutu tsi ñi, tan catyí ndi tsihin ñi tyin ña taahán tsi caca xaan iñi ñi tsa cuenda ley can. Catyí ndi tyin ña cua catsi ñi cuñu tsa jamañi nyivi tsi tsitoho. Ndi

ña cua catsi ñi niñi quiti, tan ndi cuñu quiti tsa cava ñi jucun tan ña tsati niñi ti. Tan ndi intuhun ra naha tan ña caca nuu ra naha tsihin ñaha tan ndi ñiñaha tan ña caca nuu ñi tsihin rayii —catyí ra tsahnú vehe ñuhu can maa ra tsihin ra Pablo.

Nu quitsahá caahán yuhu tahan nyivi Israel siqui ra Pablo

26 Tacan tan tsa tuvj inga quivi tan cuahán ra Pablo tsihin tandihí tsa cumi taahan ra can naha ra. Tan janduvahá ra tsi ra nuu Nyoo iin caa ñi tsihin ra can naha ra. Tacan tan quihvi ra tsitsi vehe ñuhu cahnu tyin jacoto ra cuví jutu ama cundihi tsa utsa quivi tsa nduvaha tsa cumi taahan ra can naha ra, tan cua jamañi ra tsa jamañi ra nuu Nyoo. 27 Tacan tan tsa cuñi ndihí tsa utsa quivi can, tan taahan ra Israel tsa quee nda Asia nyehe ra naha tsi ra Pablo tsitsi vehe ñuhu. Tan cuvaá xaan tandihí nyivi jahá ra naha, tan tñn ra naha tsi ra Pablo. 28 Tan caná tsaá ra naha tan catyí ra naha:

—Nyooho nyivi Israel, jatyinyee ndo tsi ndi. Juvín ra ihya cuví ra tsa tsicá nuu tandihí ñi ityi. Tan jacuahá ra tsi tandihí nyivi. Catyí ra tyin ña vaha cuhva iyó yo. Tan catyí ra tyin ña vaha ley tsa tyaá ra Moisés, tan ña vaha vehe ñuhu ihya. Tan inga tucu tuhun tyin tyihí ra tsi juhva ra Grecia naha ra tsitsi vehe ñuhu yo tan ihya nu ii cuví tsi tan vatsí jatívi ra naha —catyí ra naha caná tsaá ra naha.

29 Tacan catyí ra naha tyin nda nu quitsi tsi nyehe ra naha tsi ra Pablo tsitsi ñuu, tsicá nuu ra tsihin iin ra ñuu Éfeso tsa nañi Trófimo. Tan cuñi maa ra naha tyin ra Pablo tsindaca tsi ra tsitsi vehe ñuhu. 30 Tan tandihí nyivi ñuu quitsahá cuvaá ñi. Tan tsinú xaan ñi tsaá ñi. Tacan tan tñn ñi tsi ra Pablo. Tan ictá caa ñi tsi ra cua ndaca ñi ityi tsata vehe ñuhu, tan numi ñi nacasá ñi yuvehe ñuhu can. 31 Tsa cuñi cahñi ñi tsi ra, tan ñihí tuhun ra comandante cuenda andaru tyin tandihí nyivi ñuu Jerusalén iyo xaan caahán yuhu tahan ñi. 32 Tacan tan ra comandante can jandu iin ra tsi ra capitán naha ra tan tsihin andaru naha ra. Tan tsinú ra naha cuahán ra naha nu yucú nyivi. Cuhva tsa nyehe ñi tsi ra comandante can tsihin andaru can naha ra, jañá ñi tsa cañi ñi tsi ra Pablo. 33 Tacan tan natuhvá ra comandante can nu nyii ra Pablo. Tan tava tyiñu ra tsi andaru naha ra tyin na tñn ra naha tsi ra, tan na cahní ra naha tsi ra tsihin uvi taahan cadena. Yaha can tan tsicá tuhun ra comandante can tsi ra yóo ra cuví ra, tan náa javahá ra. 34 Maa tyin nyivi siin siin tuhun caná tsaá ñi. Tan ra comandante can ña cutuñi maa iñi ra tsa cuenda tsatyn ñihí xaan cuvaá jahá ñi. Tan tava tyiñu ra tsi andaru tyin cundaca ra naha tsi ra Pablo

nda vehe nu yucú andaru. ³⁵ Cuhva tsa tsaq ra naha nu cuayi vehe can, tan quitsaha nducaña nyivi tan ña cuví ca caca ra Pablo jahá ñi. Yacan cuenda tyiso soco andaru can naha ra tsi ra. ³⁶ Tyin tandihí ñi nyicún ñi tsi ra naha, tan caná tsaá ñi tan catyí ñi:

—¡Na cúu ra! —catyí ñi.

Nu juvin ñi maa ra Pablo jacacú tsi ra nuu nyivi

³⁷ Cuhva tsa cua tyihi ra naha tsi ra Pablo tsitsi vehe can, tan quitsaha caahán ra tsihin ra comandante:

—¿A cuhva un tsa cahan yu tsihin un? —catyí ra tsihin ra.

Tan ra comandante can catyí ra tsihin ra:

—¿A cuví caahán un yuhu griego? ³⁸ Tun tacan caa, ñavin yooho cuví ra ñuu Egipto tsa quitsi quivi can tan jacañi tahan ra tsi nyivi siqui ra ndacá ñaha tan tava ra cumi mil ra tsañi ndiyi tsindaca ra tsi ra naha ityi ñuhu ityi —catyí ra comandante can tsihin ra Pablo.

³⁹ Tacan tan ra Pablo catyí ra tsihin ra:

—Yuhu ra Israel cuví yu tan cacú yu ñuu Tarso tsa cuví iin ñuu cahnú ityi Cilicia. Maa tyin jaha tumañi iñi cuhva un ndatu cahan yu luxu tsihin nyivi —catyí ra Pablo tsihin ra comandante.

⁴⁰ Tacan tan tsa tsaḥa ra comandante can ndatu tsi ra, nduvita nyityi ra nu cuayi can tan javahá ra iin seña tyin na cutaxin ñi. Tan tsa cutaxin nyivi quitsaha caahán ra tsihin yuhu hebreo, tan catyí ra:

22

1 —Nyooho tata, tan nyooho yañi, tyaa soho ndo tsa cua cahan yu tsihin ndo tyin cuñi yu tsa coto ndo tyin yuhu nduve cuatyí yu iyó —catyí ra Pablo tsihin nyivi can.

² Tsa tsiñi ñi tsa caahán ra tsihin ñi tsihin yuhu hebreo, taxin cuii ña tsinyacu ñi. Tan ra Pablo catyí ra:

³ —Yuhu ra Israel cuví yu tumaa maa ndo. Tan cacú yu ñuu Tarso tsa canyí Cilicia. Maa tyin Jerusalén ihya tsañu yu. Tan ra Gamaliel jacuahá ra tsi yu nácaa tyaa yahvi yu ley tsi tsaahnu yo. Tan tacan ñi nducú yu cuhva javahá yu tyiñu nuu Nyoo tsihin tsa nii iñi yu, tumaa tsa javahá ndo vityin ihya. ⁴ Yuhu, nu quitsi tsi tsinyaá ndaha yu tsi nyivi yihí cuenda ra Cristo. Tan tsindaca yu tsi ñi tsa cúu ñi. Tan cuaha ñi rayi tan ñaha tñin yu tsa cuhun ñi tsitsi vehe caa. ⁵ Ra jutu tsaahnu tsa cuví ityi nuu tsihin ra cuví mandoñi naha ra, cuví ra naha tsandaa tyin ra ican naha ra tsaḥa tutu tsi yu tyin cuví tñin yu tsi ra yañi yo, ra yihí cuenda ra Cristo ñuu Damasco. Tsaḥan yu ican tsinanducú yu tsi nyivi tsinú iñi tsi ra Cristo, tyin cua cunuhñi ñi tsihin cadena, tan cua quitsi ndaca yu tsi

ñi nda ñuu Jerusalén ihya tyin tatsi tuñi ra tsañu naha ra tsi ñi.

Nu nacatyí tuhun ra Pablo nácaa natsinu iñi ra tsi ra Cristo
(Hechos 9.1-19; 26.12-18)

⁶ Maa tyin cuhva tsa cuahán yu ityi tsa cua tsaá yu ñuu Damasco, maa ora cuví tsi. Tan sana iñi yu tan ndunditsin tanii cahnú nu cuahán yu jahá iin ñuhu tsa quitsi ityi andivi. ⁷ Tacan tan nduva yu nu ñuhu. Yahá can tan tsiñi yu iin ndusu tsa caahán tsihin yu tan catyí tsi: “Saulo, Saulo, ¿nacuenta nyaá ndaha un tsi yu?” catyí ndusu can tsihin yu. ⁸ Tacan tan tsaḥa tuhun yu tsi ra tan catyí yu: “¿Yóo yooho cuví un, taa?” Tan catyí ra tsihin yu: “Yuhu cuví ra Jesús, ra ñuu Nazaret, ra tsa nyaá ndaha un” catyí ra. ⁹ Tandihí ra tsa cuahán tsihin yu nyehe ra naha ñuhu can, tan nayuhvi xaan ra naha. Maa tyin ña tsiñi ra naha ndusu tsa cahan tsihin yu. ¹⁰ Tacan tan quitsaha caahán yu tsihin ra tan catyí yu: “Jutu Mañi yu, ¿náa taahán tsi javaha yu?” Tan catyí ra tsihin yu: “Nduvita tan cuhun un nda ñuu Damasco. Tan ican cua cahan iin ra tsihin un tandihí tsa taahán tsi javaha un” catyí Jutu Mañi yo tsihin yu. ¹¹ Tan cuaá yu jahá ñuhu can, yacan cuenda ra tsa cuahán tsihin yu tñin ra naha ndaha yu tan cuahán ndi nda ñuu Damasco.

¹² Tan ican iyó iin ra tsa nañi Ananías. Tan jacañú xaan ra tsi Nyoo cuhva catyí ley tsa tyaa ra Moisés. Tan tandihí nyivi Israel tsa iyó ñuu Damasco catyí ñi tyin vaha xaan iñi ra. ¹³ Tsaḥan ra can tsinyehe ra tsi yu. Tan cuhva tsa tsaá ra, catyí ra tsihin yu: “Yañi Saulo, nanyehe inga tsaḥa” catyí ra tsihin yu. Tan juvin ñi cuhva can tan nanyehe yu. Tan cuví nyehe yu tsi ra. ¹⁴ Tan catyí ra tsihin yu: “Nyoo cuenda jutu yo nacatsi ra tsi un nda tsanaha, tyin coto un cuhva cuñi ra, tan nyehe un tsi ra Jesucristo tyin ra vaha cuví ra, tan cuñi un ndusu ra. ¹⁵ Tyin yooho cua cahan un tuhun ra nuu tandihí nyivi. Cua nacatyí tuhun un tsa nyehe un tan tsa tsiñi un. ¹⁶ Tan vityin, ña cuatu ca un. Nduvita tan coonduya un. Tan ndacan tahvi un tsi Jutu Mañi yo tyin na jaha ra tucahnú iñi cuatyí un” catyí ra Ananías tsihin yu —catyí ra Pablo tsihin ñi.

Nu nacatyí tuhun ra Pablo nácaa tsaḥa Nyoo tyiñu tsi ra tyin cuhun ra inga ñuu cuahan ra tuhun ra Cristo

¹⁷ Yahá can tan vatsi nuhu yu ñuu Jerusalén ihya tan cuhva tsa tsaá yu, tsaḥan yu vehe ñuhu cahnú tsindacan tahvi yu tsi Jutu Mañi yo. Tan janahá ra iin tsa nyehe yu. ¹⁸ Nyehe yu tsi ra. Tan catyí ra tsihin yu: “Janumí. Quita ñi ñuu Jerusalén ihya tyin ña cua tsinu iñi nyivi tuhun yu tsa cahan un” catyí ra tsihin yu. ¹⁹ Tacan tan quitsaha

caahán yu tsihin ra tan catyí yu: “Jutu Mañi yu, maa ñi tsitó ñi tyin yuhu tsahán yu tandihí vehe ñuhu. Tan tñin yu tsi ñi tsa tsinú iñi tsi un, tan tyihí yu tsi ñi vehe caa tan cañi yu tsi ñi. ²⁰ Tan quivi tsa tsihí ra Esteban ra tsa cahán cuenda un, yuhu nyíi ndihí yu ican. Tan ndoq yu vaha tsa tsahñi ra naha tsi ra. Tan jahá cuenda yu jahma ra can naha ra” catyí yu tsihin Jutu Mañi yo. ²¹ Tacan tan catyí ra tsihin yu: “Cyaahan, tyin maa yu jacuhún tsi un. Cañi xaan cua cuhun un tyin cua cuhun un nda nu iyó nyivi tsa ñavin nyivi Israel cuví” catyí Jutu Mañi yo tsihin yu.

Nu nyaá ra Pablo ndaha ra comandante cuenda ñuu Roma

²² Tyaá soho ñi yacan ña tan quitsahá caná tsaa ñi tan catyí ñi:

—jCahñi ndo tsi ra! Tyin ña taahán ca tsi tsa coo ra ñayivi —catyí ñi.

²³ Tan caná tsaa ca ñi. Tan javicó ñi jahma ñi. Tan javitá ñi nyahyu nu tatyí tsa cuenda tsa xaan xaan cuñi ñi. ²⁴ Yacan cuenda ra comandante can catyí ra tsihin ra andaru can naha ra tyin na cundaca ra naha tsi ra Pablo tsitsi vehe can. Tan catyí ra tyin na cañi ra naha tsi ra, tyin tacan tan cua cahán ra tsa nditsa nacuenda tsa caná tsaa nyivi tsata ra. ²⁵ Maa tyin tsa yaha tsahñi ra naha tsi ra tan cua cañi ra naha tsi ra, tacan tan ra Pablo cahán ra tsihin ra capitán tsa nyaá nyityi ican tan catyí ra:

—¿A iyó ndatu tsi nyooho tsa cañi ndo tsi yu? Tan yuhu ra cuenda ñuu Roma cuví yu tan inga tucu tuhun, ñaha ca jaquee yuhu ra juez tsi yu, tan cuñi ndo cañi ndo tsi yu —catyí ra Pablo tsihin ra.

²⁶ Tsa tsiñi ra capitán tsa caahán ra Pablo, tsahán ra tsijacotó ra tsi ra cuví comandante. Tan catyí ra tsihin ra:

—Jaha cuenda tsi un tsihin tsa javahá un. Tyin ra can, ra ñuu Roma cuví ra —catyí ra tsihin ra.

²⁷ Tacan tan ra comandante can cuahán ra nu nyíi ra Pablo. Tan tsicá tuhun ra tsi ra tatun nditsa tyin ra ñuu Roma cuví ra. Tan ra Pablo catyí ra:

—Juvín.

²⁸ Tacan tan catyí ra comandante can tsihin ra:

—Yuhu cuaha xaan xuhun tyahví yu tan cuví cuq yu iin ra ñuu Roma.

Tan ra Pablo catyí ra:

—Tan yuhu ra ñuu Roma cuví yu tsa cuenda jutu yu —catyí ra.

²⁹ Tacan tan andaru tsa cua cañi tsi ra jatsiyó nyaha ra naha tsi ra naha nu nyíi ra Pablo. Tan nda cuenda ra comandante tan nayuhví ra tsa cuenda tsa tsahñi ra tsi ra tsihin cadena. Tyin tsa javahá ra tsa tacan tsihin iin ra ñuu Roma cuatyí cuví can.

Nu tsahán ra Pablo nu ndu iin ra ñuu Israel nahara

³⁰ Tan tsa tuví inga quivi can tan ra comandante can cuñi ra coto ra náa cuatyí tyaá nyivi Israel tsi ra Pablo. Tan jahá ra tsi ra Pablo. Tan tava tyiñu ra na ndu iin tandihí ra jutu tsa cuví ityi nuu naha ra, tan tsihin tandihí ra cumi tyiñu cuenda nyivi Israel. Tacan tan tava tyiñu ra na quita ra Pablo vehe caa tan cuhun ra nu iyó junta can.

23

¹ Tan ra Pablo nyehe ra tsi tandihí ra tsa ndu iin can naha ra, tan catyí ra tsihin ra naha:

—Nyooho yañi, tandihí quivi nda cuenda vityin nducú yu cuhva javaha yu cuhva cuñi Nyoo. Yacan cuenda vaha cuñi yu —catyí ra Pablo.

² Tacan tan ra Ananías, ra jutu tsaahnu tsa yihí ndaha tsi inga ca ra naha, tava tyiñu ra tsi ra nyecú yatyin ñi nu nyaá ra Pablo, na cañi ndaha ra naha yuhu ra. ³ Tan ra Pablo nacahán ra tan catyí ra:

—jIhna ca tsi maa un cua cañi Nyoo, tyin jahá xaan un tyin ra vaha cuví un nyaá un juvin! ¿A cutuñi yu nuu un tumaa cuhva catyí ley? ¿Nacuenda tsa tava tyiñu un na cañi ra naha tsi yu? Tan ñavin tacan catyí ley —catyí ra Pablo.

⁴ Tacan tan ra nyecú ican catyí ra naha tsihin ra:

—Ña vaha tsa caahán un tacan tsihin ra jutu tsaahnu tyin cahnú cuví ra nuu Nyoo —catyí ra naha tsihin ra Pablo.

⁵ Tacan tan ra Pablo catyí ra:

—Yañi, ña tsitó yu tatun ra ihya cuví ra jutu tsaahnu. Tyin catyí tuhun Nyoo tyin ña cahán nyaa yo tsi ra yihí ndaha ñuu yo —catyí ra.

⁶ Tacan tan tuví iñi ra Pablo tyin juhva ra cuenda junta can naha ra, yihí ra cuenda ityi ra cuví saduceo naha ra. Tan juhva ra naha yihí cuenda ra cuví fariseo naha ra. Tacan tan cahán ra tsihin tsa ñihi ndusu ra tan catyí ra:

—Nyooho yañi, yuhu ra fariseo cuví yu tumaa jutu yu. Tan tatsi tuñi ndo tsi yu tsatyin tsinú iñi yu tyin nyivi tsa tsihí nandoto ñi —catyí ra Pablo.

⁷ Cuhva tsa cahán ra tuhun ihya, ra tsa cuví fariseo naha ra tan ra saduceo naha ra, quitsahá caahán yuhu tahan ra naha tan natahví sava ra naha. ⁸ Tyin ra saduceo catyí ra naha tyin ña cua nandoto nyivi tsa tsihí. Tan catyí ra naha tyin nduve ángel tan ndi nduve tatyí ña vaha iyó. Maa tyin ra fariseo naha ra tsinú iñi ra naha tandihí tuhun ihya. ⁹ Tandihí ra naha quitsahá caná tsaa ra naha. Tan nduvitá juhva ra cuví

maestro cuenda ley tsa tyaq̄ ra Moisés tsa cutahán tsihin ra fariseo naha ra, tan catyí ra naha:

—Nyehē ndo, nduve tsa ña vaha javahá ra ihya, tyin tatun ángel cahan tsihin ra, jaha yo cuenda tyin ña vaha cahan yo siqui Nyoo —catyí ra naha.

¹⁰ Tsa tsiñi tandihi ra naha yacan, quit-saha nduvaá nyico ra naha. Nda cua nayuhvi ra comandante can coto cahnya cuatyí ra naha tsi ra Pablo. Yacan cuenda tava tyiñu ra na tava andaru tsi ra Pablo nu yucú ra naha, tan cundaca nyico ra naha tsi ra nda tsitsi vehe andaru. ¹¹ Tan tsacuaa can quituvj Jutu Mañi yo nuu ra Pablo tan catyí ra tsihin ra:

—Jandu iin iñi un, Pablo. Tyin tumaa caahán un tuhun yu ñuu Jerusalén ihya, tacan cua cahan tucu un nda ñuu Roma —catyí Jutu Mañi yo tsihin ra Pablo.

Nu ndoo ra Israel naha ra tyiñu tyin cua cahñi ra naha tsi ra Pablo

¹² Tsa inga quivi, juhva ra Israel natuhun tahan ra naha tan ndoo ra naha tyiñu. Tan catyí ra naha tyin ña cua catsi ra naha, tan ndi ña cua coho ra naha nda cuanda cahñi ra naha tsi ra Pablo. Tan ndáa ra tsa ña cua javaha tacan, na janaa Nyoo tsi ra naha, catyí ra naha. ¹³ Yaha uvi xico ra naha ndoo ra naha tyiñu ihya. ¹⁴ Tsañan ra naha nu yucú ra jutu tsa cuví ityi nuu naha ra tan tsihin ra cuví mandoñi cuenda nyivi Israel naha ra. Tan catyí ra naha tsihin ra naha:

—Nyuhu natuhun tahan ndi tan cahan ndi tsihin Nyoo tyin ña cua catsi ndi tan ndi ña cua coho ndi tsitsi tsa ña cua cahñi ndi tsi ra Pablo. Tan na janaa Nyoo tsi ndi tatun ña cua javaha ndi tumaa cuhva catyí ndi. ¹⁵ Tan vityin nyooho jacoto ndo tsi ra comandante. Catyí ndo tsihin ra na quitsi ndaca ra tsi ra Pablo nuu ndo ityaan. Catyí ndo tyin cua jandaa vaha ndo tyiñu, tan nyuhu cua cuatu xeehe ndi tsi ra tan tsa cua yaha ra, tsitsi tsa ndi cumañi ca tsa ra ihya, cua cahñi ndi tsi ra —catyí ra naha tsihin ra jutu naha ra.

¹⁶ Maa tyin sehe cuhva ra Pablo tsiñi ra tsa natuhun tahan ra naha. Tan tsañan ra vehe andaru nu nyii ra Pablo tsi catyí tuhun ra tsihin ra. ¹⁷ Tacan tan ra Pablo cana ra tsi iin ra capitán. Tan catyí ra tsihin ra:

—Cuandaca tsi ra luhlu ihya nuu ra comandante tyin iyó tsa cuñi ra cahan ra tsihin ra —catyí ra Pablo tsihin ra capitán.

¹⁸ Tacan tan tsindaca ra capitán can tsi ra luhlu can nuu ra comandante. Tan catyí ra tsihin ra:

—Ra Pablo tsa nyii vehe caa cana ra tsi yo tan catyí ra tsihin yu tyin quitsi ndaca yu tsi ra luhlu ihya tyin cuñi ra cahan ra tsihin un.

¹⁹ Tacan tan ra comandante tiñ ra ndaha ra luhlu can tan tava siin ra tsi ra tan catyí ra tsihin ra:

—¿Náa cuñi un cahan un tsihin yu?

²⁰ Tan ra luhlu can catyí ra tsihin ra:

—Ra Israel ndoo ra naha tyiñu tyin cua cahan ra naha tsihin un na cundaca un tsi ra Pablo nu ndu iin ra naha ityaan, tan cuñi maa un tyin cua jandaa ra naha tyiñu tsa cuenda ra Pablo. ²¹ Maa tyin ña cua tsinu iñi un tsa cahan ra naha tyin yaha uvi xico ra naha cua cuatu xeehe tsi ra nu cua yaha ra. Tan cahan ra naha tsihin Nyoo tyin tsitsi tsa ña cua cahñi ra naha tsi ra Pablo, ña cua catsi ra naha tan ña cua coho ra naha. Tan tatun ña cuvi cahñi ra naha tsi ra, vaha taxín ca na cúu tandihi maa ra naha, catyí ra naha. Tan vityin ndatú ra naha náca cuanda cahan un —catyí ra luhlu can.

²² Tacan tan catyí ra comandante tsihin ra luhlu can tyin na ña cahan ra tuhun tsa natuhun ra tsihin ra tsihin nyivi. Yaha can tan jacunuhu ra tsi ra luhlu can.

Nu cacu ra Pablo ndaha ra Israel naha ra tan cuahán ra nuu ra ndaca ñaha tsa nañi Félix

²³ Tacan tan ra comandante cana ra tsi uvi taahán capitán, tan catyí ra tsihin ra naha:

—Janduvaha ndo tsi ndo tyin cahun ndo ñuu Cesarea cuhva caa iin tsa tsacuaa. Cua cahun uvi cientu andaru tsihin tsaha ra naha, tan uñi xico utsi ra naha tsihin cuayu, tan uvi cientu ra naha cua cuiso lanza. ²⁴ Janduvaha ndo cuayu coso ra Pablo. Tan jaha cuenda vaha ndo tsi ra ityi cahun ndo na tsa vaha ra nu nyaá ra Félix, ra ndaca ñaha —catyí ra comandante tsihin ra capitán can naha ra.

²⁵⁻²⁶ Tacan tan javaha ra iin carta cundaha ra naha nacuhva ra naha tsi ra Félix. Tan tuhun tsa tyaq̄ ra nu carta, cuví tuhun ihya:

“Yuhu ra Claudio Lisias jaquitsí yu carta ihya tsi un, tyin vaha xaan nyivi cuví un. Ihya vatsi nacumi tsi un.

²⁷ Ra Pablo ihya, tiñ ra Israel naha ra tsi ra. Tan cuñi ra naha cahñi ra naha tsi ra. Maa tyin cuhva tsa tsito yu tyin ra ñuu Roma cuví ra, tsañan yu tsihin andaru tan jacacu yu tsi ra. ²⁸ Tan cuñi yu coto yu náa cuatyí tyaá nyivi tsi ra, tsindaca yu tsi ra nu iyó junta tandihi ra cuví mandoñi nyivi Israel. ²⁹ Tan nyehē yu tyin xaan xaan cuñi nyivi Israel nyehé ñi tsi ra tyin ña tyaá yahvi ra ley tsa iyó ñi. Maa tyin tsa cuenda ley yoo, nduve cuatyí ra tan cahñi yo tsi ra. Tan ndi ña taahán tsi tsa tyihi yo tsi ra vehe caa. ³⁰ Maa tyin ñihí tuhun yu tyin ra Israel nducú cahñi ra naha tsi ra, yacan cuenda jaquitsí yu tsi ra nuu yooho. Tan catyí tucu yu tsihin ra tsa xicó ñaha tsi ra, na quitsi ndihi ra naha nu nyaá un na cahan ra naha

cuatyí ra nuu maa un”, catyí ra Claudio tsihin ra Félix nu carta tsa javahá ra.

³¹ Tacan tan quihín ra naha tsi ra Pablo tumaa cuhva catyí ra Claudio tsihin ra naha, tan juvín ñi tsacuaa can tsindaca ra naha tsi ra nda ñuu Antípatris. ³²⁻³³ Tsa inga quivi, ra tsa cuahán tsihin tsaha, sava ityi ñi tsahan ra naha, tan tsaá nuhu ra nda vehe nu yucú ra naha. Tan ra tsa yosó cuayu can naha ra cuahán ra can naha ra tsihin ra Pablo nda ñuu Cesarea. Tan cuhva tsa tsaá ra naha, nacuhvá ra naha carta can tsi ra Félix, tan tsahá cuenda ndihi ra naha tsi ra Pablo tsi ra. ³⁴ Tsa yahá tsa cahví ra Félix carta can, quitsahá tsicá tuhun ra tsi ra Pablo nu maa cuví ñuu ra. Tan tsa tsitó ra tyin ra Cilicia cuví ra. ³⁵ Tan catyí ra tsihin ra:

—Na quitsi jihna ra tsa xicó ñaha tsi un. Tacan tan cua jandaa yu cuatyí un —catyí ra tsihin ra.

Tacan tan tava tyiñu ra na jaha cuenda andaru naha ra tsi ra nda vehe tyiñu tsa javahá ra Herodes tahán tsanaha.

24

Nu cutuñí ra Pablo nuu ra Félix

¹ Yahá uhun quivi tan ra Ananías, ra jutu tsaahnu tsa yihí ndaha inga ca ra jutu, tsaá ra ñuu Cesarea can tsihin taahan ra cuví mandoñi naha ra, tan tsihin iin ra tsa nañi Tértulo. Ra tsa caahán ndaahvi tsaha nyivi cuví ra. Tsaá ra can naha ra nuu ra Félix tyin cua ndacan ra naha cuatyí tsaha ra Pablo. ² Tacan tan tava tyiñu ra Félix na quitsi ndaca andaru tsi ra Pablo. Tacan tan quitsahá tsicán ra Tértulo cuatyí tsaha ra. Tan catyí ra tsihin ra Félix:

—Tyahvi nyoo tsi un, tata. Tyin taxin ñi iyó ñuu ndi, tan vaha iyó ndi tyin yihí ndaha vaha un nyivi ñuu ndi. ³ Nacuhvá xaan ndi tyahvi nyoo tsi yoocho tata Félix, tyin vaha xaan iñi un. ⁴ Tan ña cuñi yu jatyañu yu tsi un tsihin tsa cuaha tuhun cua cahan yu, yacan cuenda tsicán yu tumañi iñi tsi un na cuhva un ndatu cahan ndi luxu. ⁵ Tyin tsitó ndi tyin rayi ihya ñavin ra vaha cuví ra. Tandihí ñi ityi jacuvaá ra tsi nyivi Israel. Tan juvín ra cuví ityi nuu tsihin nyivi tsa nyicún tsi ra Jesús ra ñuu Nazaret. ⁶ Tan cuñi ra javaha ra tsa ndavaha ñi tsitsi vehe ñuhu cahnu. Tan yacan cuenda tiñ ndi tsi ra, tyin tatsi tuñi ndi tsi ra tumaa cuhva catyí ley maa ndi. ⁷ Maa tyin ra Licias, ra cuví comandante ñihi xaan tyasí ra tan quihín nyaa ra tsi ra tsi ndi. ⁸ Tan catyí ra tyin tun cuñi ndi ndacan ndi cuatyí tsaha ra, cuñi tsi tsa cahan jihna ndi tsihin un. Yacan nyehé maa un vityin. Janahma un tsi ra tan coto un tyin nditsa tsa caahán ndi —catyí ra Tértulo.

⁹ Tacan tan ra Israel tsa yucú ican, catyí ra naha tyin tandihí maa tsa caahán ra Tértulo tan nditsa. ¹⁰ Tacan tan ra Félix janahá ndaha ra nu nyaá ra Pablo tyin nacahan ra. Tan ra Pablo quitsahá caahán ra tan catyí ra:

—Sii xaan cuñi yu tyin nuu maa un cua cutuñi yu vityin tyin tsitó yu tyin tsa cuaha xaan cuiya ndacá ñaha un tsi nyivi iyó ñuu ihya. ¹¹ Tatun cua nducu tuhun un, cua coto un tyin tsa iyó ñi utsi uvi quivi tsa tsahan yu ñuu Jerusalén tsijacahnú yu tsi Nyoo. ¹² Tan ña cahan yuhu tahan yu tsihin ndi intuhun nyivi. Tan ndi ña jacuvaá yu tsi ñi tsitsi vehe ñuhu cahnu. Nduve maa náa javahá yu tandihí ca vehe ñuhu, tan ndi inga ca ityi tsitsi ñuu. ¹³ Tan cuatyí tsa tyaá ra ihya naha ra siqui yu, ña nditsa. Tyin tandihí maa tsa caahán ra tan ñavin tsa nditsa cuví tsi. ¹⁴ Maa tyin tsa cua catyí yu tsihin un cuví tsehe: tyin yuhu jacahnú yu tsi Nyoo. Juvín ra tsa jacahnú tsi tsaahnu yu. Tan jacahnú yu tsi ra tumaa cuhva jacuahá ra Jesucristo. Tan ra ihya naha ra catyí ra naha tyin ña nditsa. Maa tyin yuhu tsitó yu tyin tsa nditsa cuví tsi. Tyin tandihí tsa nyaá nu libru ley tsa tyaá ra Moisés, tan tsinú iñi yu. Tan tandihí tsa tyaá ra cuví ndusu yuhu Nyoo tan tsinú iñi yu. ¹⁵ Tan tsinú iñi yu tumaa tsa tsinú iñi ra ihya naha ra tyin nyivi tsa tsihi cua nandoto ñi inga tsaha, tahan ñi nyivi vaha tan nyivi caquiñi. ¹⁶ Tan yacan tacan ñi nducú yu cuhva tsa javaha yu tsa vaha nuu Nyoo, tan nuu nyivi.

¹⁷ Tan tsa yahá juhva cuiya tsa tsicá yu tandihí ñi ityi, tsahan tsaá nuhu yu nda Israel ñuu yu tyin nacuhva cuenda yu xuhun tsa tsahá nyivi tsi yu tsi nyivi ndaahvi tsa yihí cuenda ra Cristo ñuu Jerusalén. Tan iyó tucu tsa cua jamañi yu tsi Nyoo. ¹⁸ Yacan javahá yu tsitsi vehe ñuhu cahnu. Tan tsa yahá tsa janduvahá yu tsi yu tumaa catyí ley ndi, tan juhva ra Israel ra tsa quee ityi Asia, nyehé ra naha tsi yu ndacan. Maa tyin nduve nyivi cuaha yucú, tan nduve náa javahá ñi. ¹⁹ Tan ra tsa nyehé tsi yu ndacan naha ra, taahán tsi tsa quitsi maa ra naha cahan ra naha náa cuví tsa javahá yu o náa cuatyí tyaá ra naha siqui yu. ²⁰ Tatun ña tacan, na catyí tuhun ra tsa nyecú ihya naha ra tatun náa iin cuatyí yu nañihí ra naha quivi janahma ra cuví ityi nuu tsihin nyivi Israel naha ra tsi yu. ²¹ ¿A ñavin cuenda tsatyin cahan yu iin tuhun tsihin ra tsa yucú junta can? Tan catyí yu: “¿A tatsi tuñi ndo tsi yu tsa cuenda tyin tsinú iñi yu tsa nandoto nyivi tsa tsihi?” —catyí ra Pablo.

²² Tan tsa tsiñi ra Félix tsa cahan ra tacan, tan catyí ra tsihin ra tsa nyecú can:

—Ña cua jandaa naha yu tyiñu ndo vityin. Ndaha ñi nda quitsi ra comandante Lisias tan cua jandaa yu tuhun ihya —catyí ra.

Cahan ra tacan tyin tsitó ra nácaa cuahán tuhun nyivi nyicún tsi ra Cristo.

²³ Tacan tan tava tyiñu ra Félix tsi ra capitán na tinyii nyico ra tsi ra Pablo vehe caa. Maa tyin ña ñihi xaan cua jaha cuenda ra tsi ra. Tan na cuhva ra ndatu na cuhun ra vaha iñi tsi ra nu nyii ra, tan cahan ra naha tsihin ra.

²⁴ Tsa yaha juhva quivi tan tsaá nyico ra Félix inga tsaha tsihin ña Drusila ñasihi ra. Tan ñaha Israel cuví ña. Tan tava tyiñu ra na quitsi ra Pablo tyin cuñi ñi tyaa soho ñi nácaa tuhun tsa tsinú iñi ra tsi ra Jesucristo.

²⁵ Tan ra Pablo quitsaha caahán ra tuhun nácaa taahán tsi javaha yo tsa vaha cuhva cuñi Nyoo, tan ña cuví javaha yo tsa ña vaha tsa cuñi cuñu ñuhu yo. Tan coo quivi cua tatsi tuñi Nyoo tsi tandihi nyivi. Tan ra Félix nayuhvi xaan ra, tan catyí ra tsihin ra:

—Cuaahan vityin. Tan na nuña jihna yu, tan cana maa yu tsi un inga tsaha —catyí ra tsihin ra.

²⁶ Tan ra Félix cuñi maa ra tyin ra Pablo cua cuhva ra xuhun tsi ra, tyin tacan tan tava ra tsi ra vehe caa. Yacan cuenda cuaha tsaha caná ra tsi ra, tyin natuhun ra tsihin ra.

²⁷ Tan tsa yaha uvi cuiya, tacan tan nacoşo tyiñu tsi ra Porcio Festo tyin cundaca ñaha ra. Tyin tsa quita ra Félix. Tan ra Félix ña cuñi ra tsa cahan nyivi Israel tsi ra, yacan cuenda nacoşo ra tsi ra Pablo vehe caa.

25

Nu jandaá ra Festo cuatyí ra Pablo

¹ Tan tsa quihvi ra Festo tsa cua jaha tyiñu ra, tacan tan tsa tsinu uñi quivi quita ra ñuu Cesarea can tan cuahán ra nda ñuu Jerusalén. ² Tan tsa tsaá ra ñuu Jerusalén, tacan tan tsaá ra jutu tsa cuví ityi nuu, tan ra cumí tyiñu tsa yihí ndaha tsi nyivi Israel. Tan tsicán ra naha cuatyí tsaha ra Pablo. ³ Tan tsicán ra naha tumañi iñi cahnu tsi ra Festo. Tan catyí ra naha tyin na tava tyiñu ra Festo na quitsi nyico ra Pablo nda ñuu Jerusalén. Tyin ra ican naha ra cua tava tyiñu ra naha na cucañi ra naha tsi ra Pablo ityi cua quitsi ra. ⁴ Maa tyin ra Festo nacahan ra, tan catyí ra:

—Ra Pablo nyii ra vehe caa nda ñuu Cesarea. Tan yuhu tyaá yu cuhva tsa yatyi ñi cua cunuhu nyico yu. ⁵ Yacan cuenda, nyooho tsa cuví ndo ra cumí tyiñu ñuu ihya, cuví cuhun ndo tsihin yu, tan ndacan ndo cuatyí tsaha ra tatun iyó tsa ña vaha javaha ra —catyí ra Festo tsihin ra naha.

⁶ Tacan tan ra Festo ndoo ra ñuu Jerusalén una quivi o utsi quivi ñi tan cuanuhu nyico ra nda ñuu Cesarea. Tan tsa inga quivi tsaá ra tsitsi vehe tyiñu ra tan tsinyaá ra tsa cua tatsi tuñi ra tsi ra iyó cuatyí naha ra. Tacan tan tava tyiñu ra na quitsi ra

Pablo. ⁷ Cuhva tsa quihvi ra Pablo, nu yucú ra naha natuhva ra Israel tsa quee nda ñuu Jerusalén, tan quitsaha tyaá ra naha cuatyí cahnu siqui ra. Maa tyin nduve tsandaa tava ra naha. ⁸ Tacan tan cahan ra Pablo tan catyí ra:

—Yuhu ndi intuhun cuatyí ñaha ca javaha yu, ndi siqui ley nyivi Israel, ndi siqui vehe ñuhu cahnu ñuu Jerusalén, ndi siqui ra cuví rey cahnu tsa nyaá ñuu Roma —catyí ra.

⁹ Maa tyin ra Festo cuñi ra coo vaha ra tsihin ra Israel naha ra, yacan cuenda tsicá tuhun ra tsi ra Pablo:

—¿A cuñi un cuhun un ñuu Jerusalén tyin jandaa yu tyiñu un ndacan? —catyí ra tsihin ra.

¹⁰ Tan ra Pablo nacahan ra tan catyí ra:

—Tsa nyaá yu nu maa un. Tan maa un cuví ra cumí tyiñu cuenda rey cahnu tsa nyaá ñuu Roma. Ihya cuví nu taahán tsi tsa cutuñi yu tyin ra ñuu Roma cuví yu. Tan tsitó vaha un tyin nduve náa javaha yu tsi nyivi Israel. ¹¹ Tun tsatyn javaha yu iin cuatyí cahnu tsa taahán tsi cúu yu, ña cua nducu yu cuhva cacu yu. Maa tyin ña nditsa maa tuhun tsa caahán ra ihya naha ra. Ndi nyooho tan ndi intuhun nyivi nduve ndatu tsi ndo tsa nacuhva cuenda ndo tsi yu tsi ra ihya naha ra. Tan yacan tsicán yu tsi un tyin na tatsi tuñi ra cuví rey cahnu tsi yu —catyí ra Pablo tsihin ra Festo.

¹² Tacan tan ra Festo, tsa yaha tsa natuhun tahan ra tsihin ra jatynyeé tsi ra tsihin tyiñu, tan catyí ra tsihin ra Pablo:

—Tsicán un tsa cutuñi un nuu rey cahnu. Vaha. Cua cuhun un nuu maa ra —catyí ra tsihin ra.

Nu nacatyí tuhun ra Festo tuhun ra Pablo tsihin ra Agripa

¹³ Tsa yaha juhva quivi, tan cuahán ra Agripa, ra cuví rey cuenda nyivi Israel nda ñuu Cesarea. Cuahán ra tsihin ña Berenice nu nyii ra Festo tyin cua cuhva ñi nacumí tsi ra. ¹⁴ Tan ndoo ñi ican juhva quivi, tan ra Festo catyí tuhun ra tsihin ra cuví rey can tuhun ra Pablo. Tan catyí ra:

—Ra Félix nacoşo ra tsi iin ra vehe caa ihya. ¹⁵ Tan tsa tsahan yu ñuu Jerusalén, ra jutu tsa cuví ityi nuu, tan ra cuví mandoñi nyivi Israel, tsicán ra naha cuatyí tsaha ra can nuu yu tyin na cuhva yu ndatu tsa cúu ra. ¹⁶ Tan yuhu catyí yu tsihin tandihi ra naha tyin ña tuhva ra cumí tyiñu cuenda ñuu Roma cahñi tsi ndi intuhun nyivi tatun ñaha ca natuhun tahan ñi tsihin ra tsa tsicán cuatyí tsaha ñi, tan nducu ñi cuhva jacacu ñi tsi ñi. ¹⁷ Yacan cuenda, tsa quitsi ra cuví ityi nuu tsihin nyivi Israel can naha ra ihya, ña ndatu yu. Tan juvin ñi inga quivi can tan tsahan yu vehe tyiñu. Tan tsa yaha tsicunyaá yu tan caná yu tsi ra can.

¹⁸Maa tyin ra tyaá cuatyí siquí ra, nduve náa tuhun ñiñi cahan ra naha. Tsa cuñi maa yu tyin cahnu cuatyí cua tyaa ra naha siquí ra. ¹⁹Maa tyin tuhun tsa cahan ra naha cuví tsa cuenda cuhva iyó maa ra naha cuhva tsinú iñi ra naha. Tan cahan ra naha tuhun ra tsa nañi Jesús. Tan catyí ra naha tyin tsa tsihi ra. Maa tyin ra Pablo catyí ra tyin nyito ra. ²⁰Tan tsa ña ñihí yu nácaa tatsi tuñi yu tsi ra tsa cuenda tuhun can, tsicá tuhun yu tsi ra tan catyí yu tsihin ra tatun cuñi ra cahun ra cutuñi ra nda ñuu Jerusalén. ²¹Maa tyin catyí ra tyin vaha ca tatun cutuñi ra nuu ra Augusto nda ñuu Roma. Yacan cuenda tava tyiñu yu na cunyi ra juhva ca quivi tsitsi vehe caa, nda cuanda cuví jacuhun yu tsi ra nuu ra Augusto —catyí ra Festo tsihin ra Agripa.

²²Tacan tan ra Agripa catyí ra tsihin ra Festo:

—Cuñi tucu yuhu tyaa soho yu tsa caahán ra can —catyí ra.

Tan ra Festo catyí ra tsihin ra:

—Tyaan cua tyaa soho un tsa caahán ra —catyí ra tsihin ra.

²³Tsa inga quivi can tan tsaá ra Agripa tsihin ña Berenice. Iyo xaan caá ñi quihvi ñi tsitsi vehe, tyin rey cuví ñi. Tan quihvi ndihi tucu ra comandante tan ra cumí tyiñu ñuu can naha ra. Tacan tan ra Festo tava tyiñu ra na cuquihin ra naha tsi ra Pablo. ²⁴Tacan tan quitsaha catyí ra Festo:

—Yooho Rey Agripa, tan nyooho tata, tsa yucú ndo ihya. Nyehe ndo tsi ra ihya. Tandihí ra Israel ñuu Jerusalén tan ñuu Cesarea caahán ra naha tyin iyó cuatyí ra. Tan ña jandihí ra naha tsa catyí ra naha tsihin yu tyin taahán tsi cúu ra. ²⁵Maa tyin tsa cuenda yuhu, nduve cuatyí ra tsa taahán tsi cúu ra. Tan juvin ñi maa ra tsicán tsa cutuñi ra nuu ra Augusto. Yacan cuenda cua jacuhun yu tsi ra ndacan. ²⁶Maa tyin nduve náa cuatyí ra nañihí yu, yacan cuenda ña ñihí yu tuhun tyaa yu nu carta tsa cua jacuhun yu tsi ra ndacá ñaha tsi yo. Yacan cuenda tava yu tsi ra nuu ndo, tan nuu yooho Rey Agripa, tyin tacan tan ndaca tuhun un tsi ra tan coto yu náa taahán tsi jacoto yu tsi ra rey cahnu. ²⁷Tyin ña vaha tsa jacuhún yu tsi ra tatun nduve náa tuhun caahán yu náa cuatyí javaha ra.

26

Nu quitsaha caahán ra Pablo nuu ra rey Agripa

¹Tacan tan ra Agripa catyí ra tsihin ra Pablo:

—Cuví cahan un vityin —catyí ra tsihin ra.

Tan ra Pablo jandaá ra ndaha ra tan catyí ra tyeheh:

²—Siñ xaan cuñi yu tyin cuví cahan yu nuu yooho, rey Agripa, tan cuví catyí yu tsihin un nácaa tandihí cuatyí tsa tyaá ra Israel naha ra siquí yu. ³Tyin yooho tsitó un tandihí tuhun tsa iyó yo tsa cuví yo nyivi Israel. Tan tsitó un tuhun tuhvá yo caahán yuhu tahan. Yacan cuenda tsicán yu tsi un tyin tyaa soho vaha un tsa cua cahan yu.

Nu catyí tuhun ra Pablo tsihin ra Agripa nácaa ñayivi tsicoo ra tsa ndi cumañi ca quihvi ra cuenda ra Cristo

⁴Tandihí nyivi Israel tsitó ñi nácaa tsicoo yu nda ñuu yu quivi tsa ndi luhlu yu. Tan tsitó tucu ñi nácaa tsicoo yu nda ñuu Jerusalén. ⁵Cuaha xaan cuiya nacotó ñi tsi yu. Tatun cua cuhva cuenda ñi cua catyí ñi tyin fariseo cuví yu nda ndi luhlu yu. Tan ra fariseo cuví ra tsa vaha xaan tyaá yahvi ley tsahnu yo tan ñavin ca tandihí nyivi. ⁶Tan vityin cuñi nyivi Israel tatsi tuñi ñi tsi yu tsa cuenda tyin tsinú iñi yu tsa cua janandoto Nyoo tsi nyivi tsa tsihi, tumaa catyí ra tsihin tsi tsaahnu yo naha ra tahañ tsanaha. ⁷Tandihí nyivi tsa cuví tata tsa utsi uvi taahan sehe ra Israel ndatu tucu ñi nyehe ñi nu cua janandoto Nyoo tsi nyivi tsa tsihi. Tan yacan cuenda ña jandihí ñi tsa javahá ñi tyiñu nuu Nyoo. Nduvi tan ñiñu jacahnú ñi tsi ra. Tan tsa cuenda tuhun ihya, tyaá ra Israel naha ra cuatyí siquí yu vityin, yooho rey Agripa. ⁸¿A ña tsinú iñi nyooho tyin Nyoo cua janandoto ra tsi nyivi tsa tsa tsihi?

Nu tsaha cuenda ra Pablo tsi ra Agripa cuhva tsinyaq ndaha ra tsi nyivi yihí cuenda ra Cristo

⁹Tahañ tsanaha juvin ñi maa yu tsicá iñi yu tyin vaha tsa tatsi tuñi yu tsi nyivi tsinú iñi tsi ra Jesús, ra ñuu Nazaret. ¹⁰Tan tacan javahá yu nda ñuu Jerusalén tsihin ndatu tsa tsaha ra jutu tsa cuví ityi nuu naha ra. Tan cuaha nyivi tsa tsinú iñi tsi ra Cristo tyihí yu vehe caa. Tan tatun tsahní ra naha tsi ñi, vaha xaan cuñi yu. ¹¹Tan cuaha xaan tundoho nyehe ñi jahá yu. Tan nducú yu cuhva jafiñi yu tsi ñi na jaña ñi tuhun tsa tsinú iñi ñi tsi ra Jesús. Tacan javahá yu tandihí maa vehe ñuhu nyivi Israel. Javahá yu tacan tsa cuenda tsa xaan cuñi yu nyehé yu tsi ñi. Tan tandihí inga ñuu tsahañ yu tsinyaq ndaha yu tsi ñi.

Nu nacatyí tuhun nyico ra Pablo nácaa nanduví ra, ra yihí cuenda ra Cristo (Hechos 9.1-19; 22.6-16)

¹²Tan tsa cuenda yacan cuahán yu nda ñuu Damasco quivi can tyin tsaha ra jutu tsa cuví ityi nuu naha ra ndatu tsi yu. ¹³Maa tyin ityi cuahán yu cuhva ora cuví tsi, yooho Rey. Tan quitsj ñuhu ityi siquí. Tan jandunditsjin tsi nu cuahán yu tsihin tandihí ra tsa

cuahán tsihin yu. Maa tyin yaha ca nditsin tsi tan ñavin ca ñuhu ñicanyii. ¹⁴ Tacan tan tandihí ndi nduvá ndi nu ñuhu. Tan tsifñi yu iin ndusu tsa caahán tsihin yu, tsihin yuhu yo, tan catyí tsi tsihin yu: “Saulo, Saulo, ¿nacuenda nyaá ndaha un tsi yu? Tumaa iin quití tsañí nyaá ti tsata tsa xaan tsa jaquihín ityi ra tsi ti, tacan javahá un tyin juvin ñi tsi maa un jañicuehé un”, catyí ndusu can tsihin yu. ¹⁵ Tacan tan catyí yu: “¿Yóo yooho cuví un taa?” Tan Jutu Mañi yo catyí ra tsihin yu: “Yuhu cuví ra Jesús, juvin ra tsa nyaá ndaha un. ¹⁶ Nduvita nyityi. Tyin quituvj yu nuu un ihya tyin tacan tan cua jaha tyiñu un nuu yu, tan cua cuví un tsandaa tsa cuenda tsa nyehé un ihya tan tsa cuenda tsa cua nyehe un ityi nuu ca. ¹⁷ Yacan cuenda vityin jacuhún yu tsi un tyin nuña un nuu ñi, tan ña caca ca ñi nu naa, tyin cua caca ñi nu nditsin. Tan cua quita ñi ndaha nu ña vaha. Tyin cua tsinu iñi ñi tsi yu tan yuhu cua jaha yu tucahu iñi cuatyí ñi. Tan cua naquihín ndihí tucu ñi tsa vaha tsa tsahá Nyoo tsi nyivi tsa nacuhvá cuenda tsi ñi tsi yu”, catyí Jutu Mañi yo tsihin yu.

¹⁹ Yacan cuenda yooho rey Agripa, javahá yu tsa catyí Jutu Mañi yo ra Jesucristo tsihin yu nu janahá ra tsi ra tsi yu. ²⁰ Tacan tan tsa jihna ñi quitsahá caahán yu tuhun ra nda ñuu Damasco. Yaha can tan cahán yu tsihin nyivi ñuu Jerusalén tan tandihí ca ñuu tsa cayucú Judea. Tan caahán ndihí yu tsihin nyivi tsa ñavin nyivi Israel cuví. Tan catyí yu tsihin ñi tyin na ndu uvi iñi ñi cuatyí ñi, tan na tyaa yahvi ñi tsi Nyoo na javaha ñi tsa vaha tumaa javahá nyivi tsa tsinú iñi tsi ra Cristo. ²¹ Tan tsa cuenda tuhun ihya tñn ra Israel naha ra tsi yu tsitsi vehe ñuhu cahnu. Tan cuñi ra naha cahñi ra naha tsi yu. ²² Maa tyin maa Nyoo jatyinyeé xaan ra tsi yu. Tan iyó ca yu nda vityin. Tan caahán yu tuhun Nyoo tsihin tandihí nyivi, ñi ndaahvi tan ñi cuca. Tan ña caahán yu inga tuhun, tyin tsa catyí ra Moisés tan ra cuví ndusu yuhu Nyoo tyin cua cuví nu cuahán ca tsi, yacan caahán yu. ²³ Tyin catyí ra naha tyin taahán tsi tsa cua nyehe ra Cristo tundoho. Tan tsa yaha tsa cúu ra, cua nandoto ra. Tan jihna ca ra can cua nandoto. Tan cua jandunditsin ra añima nyivi tyin cua jacoto ra nácaa cua cacu ñi, tahan ñi nyivi Israel tan nyivi tsa ñavin nyivi Israel cuví —catyí ra Pablo.

Nu nducú ra Pablo cuhva tsa tsinu iñi ra rey Agripa tsi ra Cristo

²⁴ Cuhva tsa catyí ra Pablo tuhun ihya, ra Festo caná tsaa ra, tan catyí ra:

—ñiñi yooho ña vaha cuñi, Pablo!, tsa cuenda tsa cuaha xaan cahví un tan ndusaná iñi un —catyí ra Festo tsihin ra.

²⁵ Maa tyin ra Pablo catyí ra tsihin ra:

—Ñavin iñi yu ña vaha cuñi, yooho tata Festo. Tyin tsa caahán yu, maa ñi tsa nditsa tan tsa vaha cuví tsi. ²⁶ Ihya nyaá ra rey Agripa. Tan tsitó vaha ra tuhun ihya. Yacan cuenda ña yii caahán yu tuhun yu tsihin ndo. Tyin tsitó yu tyin tsitó tucu maa ra tuhun ihya, tyin ñavin tuhun xeehe cuví tsi. ²⁷ Yooho rey Agripa, ¿a tsinú iñi un tuhun tsa tyaa ra cuví ndusu yuhu Nyoo tahañ tsanaha? Yuhu tsitó yu tyin tsinú iñi un —catyí ra Pablo tsihin ra Agripa.

²⁸ Tacan tan ra Agripa catyí ra tsihin ra:

—¿A cuñi yooho tsa natsinu iñi yu tsa caahán un tan quihvi yu cuenda ra Jesús? —catyí ra rey Agripa tsihin ra Pablo.

²⁹ Tacan tan ra Pablo catyí ra:

—Na cuhva Nyoo tsa tsinu iñi un, a vityin a ndi cucuee ca. Maa tyin ñavin yooho ñi, tyin na tsinu ndihí tucu iñi tandihí nyivi tsa yucú tyaa soho tsa caahán yu ihya. Intuhun ñi tsa ña cuñi yu, tsa quihí cadena ndaha ndo tumaa maa yu vityin —catyí ra Pablo.

³⁰ Tan yaha tsa cahán ra Pablo tuhun ihya, nduvitá rey tan ra ndacá ñaha tan ña Berenice, tan tandihí ra yucú ican naha ra. ³¹ Tan tsa yaha quita ñi, tan quitsaha natuhún tahan ñi:

—Nduve cuatyí ra ihya tsa ñihí xaan. Ña taahán tsi cúu ra. Tan ndi ña taahán tsi cunyií ca ra vehe caa —catyí ñi.

³² Tan ra Agripa catyí ra tsihin ra Festo:

—Cuví jaña yo tsi ra, tun tsatyin ña tsican ra tsa cutuñi ra nuu ra cuví rey cahnu —catyí ra.

27

Nu jacuhún ra Festo tsi ra Pablo nda ñuu Roma

¹ Quivi tsa tyaa ra Festo tan ra Agripa cuhva tyin jacuhún ra naha tsi ndi nda ñuu Roma tsa canyí Italia, nacuhvá cuenda ra naha tsi ra Pablo tan tsi juhva ra tsa iyó cuatyí naha ra tsi iin ra capitán tsa nañi Julio. Yihí ra batallón andaru, tsa nañi Cuenda Ra Augusto. ² Tan cuahán ndihí tucu ra Aristarco tsihin ndi. Ra tsa quee ñuu Tesalónica tsa canyí ityi Macedonia cuví ra. Tacan tan quihvi ndi tsitsi iin yutun ndoo tsa quee ñuu Adramitio tyin tsa yatyin cuui cuhun nyico tsi ñuu tsa cayucú Asia yatyin ñi yuhu ndutya ñuhu. ³ Tsa inga quivi tsaá ndi puerto Sidón. Tan ra Julio vaha nyivi cuví ra tsihin ra Pablo. Tan tsaha ra tsa cuhun ra Pablo nu iyó ra vaha iñi tsi ra ñuu can tan jatyinyee ra naha tsi ra. ⁴ Yaha can tan quita ndi ñuu Sidón tan jandaá ra naha jahma tsa nyisó yutun ndoo can tan tsihin

tsa tandahñi tatyí jahma can tan cuahán ndi. Tan ñihi xaan yihí tatyí ityi nu cuahán ndi. Yacan cuenda yahá tsiyo ndi ityi xiin cuaha ñuhu Chipre, tyin ña ñihi xaan yihí tatyí ityi can. ⁵ Tacan tan yahá sava ndi nu ndutya ñuhu ityi nuu Cilicia tan Panfilia, tan tsaá ndi iin ñuu tsa nañi Mira tsa canyíi Licia. Tan quita ndi tsitsi yutun ndoo can.

⁶ Tan ican nañihí ra capitán cuenda andaru inga yutun ndoo tsa quee nda ñuu Alejandria tan cua cuhun tsi nda Italia. Tan catyí ra capitán can na quihvi ndi tsitsi yutun ndoo can tyin tsa cua cuhun ndi nda nu cuahán ndi. ⁷ Cuaha quivi tsiçá ndi tyin cuee ñi cuahán ndi. Tsihin tundoho tan tsaá ndi yatyin ñi ñuu Gnido. Tan tsa cuenda tsa ñihi xaan yihí tatyí tsa vatsí ityi tyisó ñicanyii, ña tsaçá tsi tsa cuhun ca ndi ityi nuu, tan yahá ndi yatyin ñi ñuu Salmón tsa canyíi ñuhu Creta. Tan navico ndi ityi yuhu ñuhu Creta. ⁸ Nduçu ndi cuhva tsa cuhun ndi yuhu ndutya ñuhu, maa tyin tsihin tundoho tan tsaá ndi nu nañi Buenos Puertos yatyin ñi ñuu Lasea.

⁹ Tsa cuaha xaan quivi yahá tyin cuee xaan tsiçá ndi tsa cuenda tatyí tan ica xaan nanduví tsa yaha ndi nu ndutya ñuhu. Tyin tsa yahá quivi vico nu iyó nyitya nyivi Israel. Tan tsa cua cuyatyin yoo vitsin. Yacan cuenda ra Pablo tsaçá cuenda ra tsi ra jacacá yutun ndoo can naha ra, ¹⁰ tan catyí ra:

—Tandihí nyoocho ra yucú ihya, tyaá soho ndo tuhun tsa cua cahan yu. Nyehé yu tyin ica xaan cuhva cuahán yo. Tan tuvi iñi yu tyin cua cunaa yutun ndoo tsihin tandihí tsa nyisó tsi, tan nda cuanda maa yo cuví cunaa yo. Vaha ca tatun ndoo yo ihya —catyí ra tsihin ra naha.

¹¹ Maa tyin ra capitán cuenda andaru can tyaá yahvi ca ra tsi ra jacacá yutun ndoo tan ra cuví tsiho yutun ndoo tan ñavin ca tsi ra Pablo. ¹² Ña cuví yaha ndi yoo vitsin ican tyin ñihi xaan tuhvá tatyí yihí, tan ica xaan cuenda yutun ndoo. Yacan cuenda catyí tandihí ra naha:

—Vaha ca tsa quita yo ihya tan nducu yo cuhva cuhun yo nda ñuu Fenice tsa canyíi juvin ñi ñuhu Creta ihya. Yacan cuví iin nu vaha cunaa yutun ndoo tyin ña ñihi xaan yihí tatyí tyin ñuu can canyíi tsi tsiyo cana ñicanyii —catyí ra naha.

Nu ñihi xaan yihí tatyí nu ndutya ñuhu

¹³ Tacan tan quitsahá yihí luxu tatyí tsa quitsí ityi sur. Tan cuñi maa ra naha tyin vaha xaan tyin ñavin tatyí ñihi cuví tsi. Tyin tacan tan cuví cuhun ndi tsihin yutun ndoo yatyin ñi yuhu ñuhu Creta can. ¹⁴ Ña cuaha ñi tsiçá ndi tan quitsahá yihí tatyí xaan tsa quitsí ityi norte. Tan tandahá tsi yutun

ndoo inga ityi. ¹⁵ Tan ña cuví ca cuhun ndi ityi nuu ca tsa cuenda tatyí can. Tan jaña ndaha ndi na cuhun maa yutun ndoo tsihin tatyí ndáa ityi cuñi maa tsi. ¹⁶ Tan yahá ndi ityi tsata iin ñuhu luhlu tsa nañi Claudia tyin ña ñihi xaan yihí tatyí ityi can. Tan tsihin tundoho naquihñin ndi yutun ndoo luhlu tsa ixtá caa yutun ndoo, tan natyihí ndi tsa luhlu can ityi tsitsi yutun ndoo cahnu coto nyee tsi tsitsi ndutya. ¹⁷ Tan tsa yahá natyihí ra naha yutun ndoo luhlu can, tacan tan sutya ra naha xuu yutun ndoo cahnu tan tsaññi ra naha yutun ndoo can tsihin taahan yoho tyin coo tunyee iñi itsi. Tan yuuhvi ra naha coto tahan ra naha nu yaxin ndutya tan vicun yutun ndoo can tsitsi nyiti vita iyó yuhu ndutya ñuhu nu nañi tsi Sirte. Yacan cuenda januu ra naha jahma yutun ndoo can tan tsaçá ra naha tsa cuhun tsi cuhva tandahá tatyí. ¹⁸ Tan tsa inga quivi juvin ñi ñihi xaan yihí tatyí. Yacan cuenda quitsahá tyihí ra naha carga tsa yihí tsitsi yutun ndoo can nuu ndutya ñuhu. ¹⁹ Tan tsa tsinu uñi quivi quihñin ndi ndaha tyiñu yutun ndoo can tan tyihí ndi nu ndutya ñuhu. ²⁰ Tan cuaha quivi ña nyehe ndi ñicanyii tan ndi tiñuu. Tan ñihi xaan tandahá tatyí tsi ndi. Yacan cuenda ña tyaá ca ndi cuhva tsa cua cacu ndi.

²¹ Cuaha quivi yahá tan ña tsatsí ndi. Tacan tan catyí ra Pablo tsihin tandihí ra naha:

—Nyehé ndo, vaha ca tun tsatyin tyaá yahvi ndo tuhun tsa cahan yu quivi can, tan ndoo yo ñuhu Creta. Tan vityin cuaha xaan tundoho nyehé yo tan cuaha xaan ndaha tyiñu jacunaa yo. ²² Tan cua cunaa ndihí yutun ndoo ihya, maa tyin ña caca iñi ndo tyin ndi intuhun yo tan ña cua cúu yo. ²³ Tyin Nyoo cuví ra yihí ndaha tsi yu, tan jahatyíñu yu tyiñu ra, juvin ra janaha ra iin tsa janaha tsi yu cuñi. Tan quituví iin ángel nuu yu. ²⁴ Tan catyí ángel can tsihin yu: “Ña nayuhvi un, Pablo. Tyin cuví tsi tsa cahan un tuhun Nyoo nuu ra rey cañni Augusto nda ñuu Roma. Tan tsa cuenda un cua jacacu Nyoo tandihí ra yucú tsihin un tsitsi yutun ndoo”, catyí ángel can tsihin yu. ²⁵ Yacan cuenda nyoocho tsa yucú tsitsi yutun ndoo ihya jandu iin ndo iñi ndo. Tyin yuhu tsinú iñi yu tsi Nyoo. Tan tsitó vaha yu tyin cua cuví tumaa cuhva catyí ángel can tsihin yu. ²⁶ Vasu cua nyee yutun ndoo ihya, maa tyin cua tsaá yo iin ñuhu luhlu —catyí ra Pablo tsihin tandihí ndi.

²⁷ Tan tsa ndihí tsaahun quivi tsa tsiçá ityi ndi. Iin tsacuaa yucú ndi nu ndutya ñuhu Adria. Tan tsata can tsata ihya tandahá tatyí yutun ndoo ndi nu ndutya ñuhu. Tan maa ñuu cuví cuhva can tan tuvi iñi ra jacacá yutun ndoo can naha ra tyin cua tsaá

ndi iin ñuhu. ²⁸ Tacan tan tyihj cuhva ra naha cuhva cunu yihí ndutya. Tan nyehe ra naha tyin oco tsahun iin taahan metru iyó. Cuahán ndi luxu ca ityi nuu ca. Tan tyihj cuhva ra naha inga tsaha. Tan iyó oco utsa metru. ²⁹ Tan yuuhvi ra naha coto nañi yutun ndoo can tsata yuu. Yacan cuenda januu ra naha cumi taahan caa vee tsa iyó cantsu nuu ityi tsata yutun ndoo tyin na ña cuhun ca tsi ityi nuu. Tan tsa cuñi ra naha tsa cunditsin. ³⁰ Tan ra jacacá yutun ndoo can naha ra tyaq ra naha cuhva cunu xeehe ra naha. Tan yacan cuenda quitsahá januu ra naha yutun ndoo luhlu can nu ndutya ityi nuu yutun ndoo can. Tan jahá ñi maa ra naha tyin inga caa cua januu ra naha. ³¹ Maa tyin ra Pablo jacotq ra tsi ra capitán tan tsi andaru tan catyí ra:

—Tatun ña cua ndoo ra can naha ra tsitsi yutun ndoo, nyooho ña cua cuvi cacu ndo —catyí ra tsihin ra naha.

³² Tacan tan andaru tsahnyá ra naha yoho yutun ndoo luhlu can. Tan jacanacavá ra naha can nu ndutya. ³³ Tan tsa naa ca ra Pablo catyí ra tsihin tandihi ra naha:

—Tsa iyó utsi cumi quivi tsa ña tsatsí ndo tan ña quixí ndo. ³⁴ Catyí yu tsihin ndo, çatsi ndo vityin. Ñiñi xaan cuñi tsi tsa catsi yo tyin tacan tan ndunyeec cuñi ñuhu yo. Tyin cua cacu yo tan ndi intuhun ixi jiñi yo tan ña cua cunaa.

³⁵ Tan tsa catyí ra Pablo tuhun ihya, quihjñ ra iin paan tan nacuhvá ra tyahvi nyoo tsi Nyoo nuu tandihi ra naha. Tacan tan tahvi ra tan quitsahá tsatsí ra. ³⁶ Tacan tan tandihi ra naha ndu iin ca iñi ra naha tan tsatsj ndihi ra naha. ³⁷ Tan tsa tandihi ndi tsa yucú ndi tsitsi yutun ndoo can, quitá uvi cientu uñi xico tsahun iin ndi. ³⁸ Cuhva tsa ndihi tsatsj ra naha cuhva cuñi ra naha tan jacuhun ra naha yitín tsa yihí trigu nu ndutya ñuhu na nduyama ca yutun ndoo tyin tacan tan cua nandaa tsi nu ndutya tan cua tsa tsi yatyin ñi yuhu ndutya.

Nu nyeec yutun ndoo

³⁹ Yahá can tan cunditsin. Tan nyehe ra tsa jacacá yutun ndoo iin ñuhu, maa tyin ña nacotó ra naha nu maa cuví can. Nyehe ra naha iin nu iyó nyiti. Tan tyaq ra naha cuhva nyehe ra naha tatun cuví jacuhun ra naha yutun ndoo ican. ⁴⁰ Tsahnyá ra naha yoho tsa nuuhñi caa vee can. Tan nacoq ra naha can tsitsi ndutya ñuhu. Tan jandutaya ra naha vitu tsa janavicó yutun ndoo. Tacan tan jandaq ra naha jahma tsa tuhvá ticaá ityi nuu tsi. Tan quitsahá quihñ tatyí jahma can, tan jacuhún tsi yutun ndoo nda nu iyó nyiti can. ⁴¹ Tan tsaq tsi nu tatahán ndutya. Tan nyeec jiñi tsi tsitsi nyiti. Tan ña cuví ca tava ra naha itsi. Tan ityi xuu tsi quitsahá tahvi cuatyí can tsa cuenda tsa ñihi xaan

cañi ndutya ñuhu can. ⁴² Tacan tan andaru cuñi ra naha cahñi ra naha tsi ra cuahán cua cutuñi naha ra tyin coto cunu ra naha. ⁴³ Maa tyin capitán andaru cuñi ra jacacu ra tsi ra Pablo. Yacan cuenda ña tsahá ra tsa cahñi ra naha tsi ra can naha ra. Tan catyí ra tyin ndáa ra tsitó sutya, na cuhun cuee ñi ra naha nu ndutya tan quita ra naha nda ñuhu ityi. ⁴⁴ Tan tandihi ca ra tsa ña cuví sutya, na cuhun ra naha nu vitu tsa nyisó yutun ndoo, tan juhva ra naha na cuhun ra naha tsihin vitu tsa tahvi cuatyí jahá ndutya ñuhu. Tan tacan cacu tandihi ndi tan quita ndi ñuhu ityi.

28

Nu nyii ra Pablo ñuhu Malta

¹ Cuhva tsa tsa yahá cacu ndi tan catyí nyivi iyó ñuhu can tyin nu yucú ndi can nañi tsi Malta, o Melita. ² Tan vaha xaan natuhún ñi tsihin ndi. Tan jatahan ñi ñuhu tyin cuññ savi tan vitsin xaan. Tan catyí ñi tsihin tandihi ndi, na natuhva ndi yuhu ñuhu can tyin quita tsa vitsin tsi ndi. ³ Tacan tan ra Pablo naquihñ ra juhva nducu ityi. Tan tsitsi tsa tyihí ra can nu ñuhu, quitá iin coo tsitsi nducu can, tsa cuenda tsa ihñi. Tan tsatsj yihí ti ndaha ra, tan ticaá tsico ti ndaha ra. ⁴ Cuhva tsa nyehe nyivi ñuhu can tyin ticaá coo can ndaha ra, quitsahá natuhún tahan ñi tan catyí ñi:

—Ra ihya nyivi tsahñi ra, tun cuvi, tyin vasu cacu ra nu ndutya ñuhu, maa tyin Nyoo ña tsahá ca ra tsa coo ra tsa cuenda cuatyí ra —catyí ñi.

⁵ Maa tyin ra Pablo naquisj ra tsi coo can, tan canacavá ti nu ñuhu, tan nduve náa tahañ ra. ⁶ Tandihí ñi ndatú ñi náa cuhva ndaa nu tyaq ti, a náa cuhva cua cúu ra. Maa tyin tsa yahá ndatu xaan ñi, tan nyehe ñi tyin nduve maa náa tahañ ra. Tacan tan nasamañ ñi cuhva tsicá iñi ñi, tan quitsahá catyí ñi:

—Ra ihya cuvi iin nyoo —catyí ñi.

⁷ Yatyin ñi can canyii ñuhu ra yihí ndaha ñuhu can. Tan nañi ra Publio. Tan vaha xaan caahán ra tsihin ndi. Tan vaha xaan tyanuu ra tsi ndi, tsa uñi quivi tsa yucú ndi vehe ra. ⁸ Tan jutu ra ñihi xaan cuhví ra tsihin cahñi tan tsa tsiyó ra. Tan tahañ ra Pablo tsinyehe ra nu canyii ra. Tan tsican tahvi ra tsa cuenda ra, tan tyiso ndaha ra jiñi ra. Tacan tan nduvahá ra. ⁹ Yahá can tan quitsahá tsaá cuaha nyivi cuhví tsa iyó ñuu can. Tan nduvahá ndihi ñi. ¹⁰ Tan tandihi ñi vaha xaan tyanuu ñi tsi ndi. Tan quivi quihvi ndi tsitsi iin yutun ndoo tsa cua cuhun ndi, tsahá ñi tandihi tsa cua cutyifñu ndi ityi cuhun ndi.

Nu tsaq ra Pablo ñuu Roma

¹¹ Uñi yoo tsiyucú ndi ñuhu Malta can. Tacan tan quihvi ndi tsitsi iin yutun ndoo tsa quee nda ñuu Alejandría tsa canyíi nu cuví Egipto. Tan ndoo tsi Malta nda yaha yoo vitsin. Tan jifi yutun ndoo can nyecú tsa caá tumaa caá nyoo Cástor tan nyoo Pólux. ¹² Tan tsaá ndi ñuu Siracusa. Tan ican ndoo ndi uñi quivi. ¹³ Tacan tan quita ndi tan cuahán ndi ityi yuhu ndutya ñuhu nda cuanda tsaá ndi ñuu Regio. Tan tsa inga quivi can ñihi xaan yihí tatyí tsa quitsi ityi sur tan tsica ndi uvi quivi tan tsaá ndi ñuu Puteoli. ¹⁴ Ican ñihí tahan ndi tsihin juhva ra hermano naha ra. Tan catyí ra naha tsihin ndi tyin ndoo ndi iin vitya tsihin ra naha. Yaha can tan cuahán ndi nda ñuu Roma. ¹⁵ Tan nyivi yihí cuenda ra Cristo ñuu Roma can ñihí tuhun ñi tyin cua tsaá ndi. Tan tsaahan ñi tsijatahan ñi tsi ndi ityi. Juhva ñi ndatu tsi ndi Nuyahví Apio. Tan inga ñi ñihí tahan ñi tsihin ndi nda nu nañi Tres Tabernas. Tan tsa nyehe ra Pablo tsi ñi, nacuhva ra tyahvi nyoo tsi Nyoo. Tan ndu iin ca iñi ra. ¹⁶ Cuhva tsa tsaá ndi ñuu Roma can, ra capitán can nacuhva cuenda ra tsi ra iyó cuatyí can naha ra tsi ra yihí ndaha vehe caa. Tan tsaá ra can tsa coo siin ra Pablo. Tan jahá cuenda intuhun ñi andaru tsi ra.

Nu caahán ra Pablo tuhun Nyoo ñuu Roma

¹⁷ Tsa yaha uñi quivi tsa tsaá ndi ican, tacan tan tava ra Pablo tyiñu na quitsi ra cuví ityi nuu tsihin nyivi Israel tsa iyó ñuu Roma can naha ra. Tan cuhva tsa ndu iin ra naha, quitsaha catyí ra tsihin ra naha:

—Nyooho yañi, vasu nduve náa javaha yu tsi nyivi Israel tahan yo, tan ndi nduve náa javaha yu siqui tuhun tsañu cuhva iyó yo, maa tyin tsaá cuenda ra Israel naha ra tsi yu tsi ra ñuu Roma naha ra. Tan tsinyi yu vehe caa ñuu Jerusalén ndaha ra ñuu Roma naha ra. ¹⁸ Tan tsa jaquee yuhu ra naha tsi yu, cuñi ra naha jaña ra naha tsi yu. Tyin ña taahán tsi cúu yu tyin nduve cuatyí javaha yu. ¹⁹ Maa tyin ra Israel tsa iyó nda ñuu Jerusalén naha ra nduxaan xaan ra naha tan yacan cuenda tsican yu tsa cutuñi yu nuu ra cuví rey cahnu. Vasu nduve cuatyí cua tyaa maa yu siqui ra naha. ²⁰ Yacan cuenda caná yu tsi nyooho tyin nacoto yu tsi ndo, tan catyí tuhun yu tsihin ndo tyin nuuhñi yu tsihin cadena vityin tsa cuenda tsa tsinú iñi yu tsi ra tsa ndatú xaan yo tsa cuví yo nyivi Israel —catyí ra Pablo.

²¹ Tacan tan catyí ra Israel naha ra tsihin ra Pablo:

—Ña tsitó ndi tuhun yoocho. Tan yoñi jacoto tsi ndi, ndi tsihin carta, tan ndi ra ñuu yo tsa quee nda Judea ña cahan ra naha tuhun yoocho, tan nduve náa cahan ra naha siqui un. ²² Maa tyin cuñi ndi tyaa soho ndi

tuhun tsicá iñi un. Tyin tsitó ndi tyin tandihí ñi ityi tan caahán nyivi siqui tuhun tsa ihya —catyí ra Israel naha ra tsihin ra Pablo.

²³ Tacan tan natuhun tahan ra naha ndaa quivi cua cuhun ra naha inga tsaha. Tsa tsaá quivi can, tsaá cuaha nyivi nu iyó ra Pablo. Tan quitsaha caahán ra nda tsa tuvi tan nda cuanda tsacuaa náca ndacá ñaha Nyoo. Tan tsihin ley Nyoo tsa tyaa ra Moisés tan tuhun tsa tyaa ra cuví ndusu yuhu Nyoo tahañ tsanaha, jacuahá ra tsi ñi tyin ra Jesús cuví ra tsa jacacú tsi yo. Tan tacan javaha ra Pablo tyin cuñi ra tsa tsinu iñi tsi ra Jesús.

²⁴ Yihí ñi tsinú iñi ñi tsa caahán ra. Tan inga ñi ña tsinú iñi ñi. ²⁵ Tan ña iin tsicá iñi ñi, siin siin tuhun caahán ñi. Tan quitsaha tsinuhú ñi. Tan ra Pablo catyí ra tsihin ñi:

—Nditsa tsa cahan Tatyí Ii Nyoo tsihin ra Isaías ra cuví ndusu yuhu ra tahañ tsanaha, tyin na cahan ra tsihin tsii tsaahnu yo. Tan catyí ra:

²⁶ Cuaahan tan cahan un tyehen tsihin nyivi ihya: Nyoocho cua cuñi ndo tuhun Nyoo, maa tyin ña cua cutuñi iñi ndo.

Cua nyehe ndo tsihin tinuu ndo tsa cua javaha Nyoo, maa tyin ña cua nacoto ndo tsa nyehe ndo.

²⁷ Tyin añima ñi tsa ndundava xaan tsi.

Tsiñi ñi, maa tyin ña tyaa yahvi ñi.

Tan ndasi tinuu ñi, tyin tacan tan ña cua cuví nyehe ñi.

Tan ña cua cuñi ñi tsihin soho ñi.

Tan ña cua cutuñi iñi ñi tsihin añima ñi.

Yacan cuenda ña cuñi ñi quihvi ñi tsitsi ndaha yu na janduvaha yu tsi ñi.

Tacan catyí ra Isaías jahá Tatyí Ii Nyoo tahañ tsanaha.

²⁸ Coto vaha nyoocho tyin vityin tan ityi nuu ca cuhun yu cua jacoto yu tsi nyivi tsa ñavin nyivi Israel cuví tyin jacacú Nyoo tsi ñi. Tan maa ñi cua tyaa soho ñi —catyí ra Pablo tsihin ñi.

²⁹ Cuhva tsa catyí ra Pablo tyehen, ra Israel cuahán ra naha juvin ñi caahán yuhu tahan ra naha tsa cuenda tuhun tsa cahan ra Pablo tsihin ra naha.

³⁰ Uvi cuiya ndoo ra Pablo vehe nu nyii ra cuenda yoo ñuu Roma can. Tan vaha caahán ra tsihin tandihí nyivi cuahán vehe ra. ³¹ Tan tsihin tsa ñi iñi ra tan caahán ra tuhun náca ndacá ñaha Nyoo tsi yo. Tan jacuahá ra tuhun Jutu Mañi yo ra Jesucristo. Tan yoñi tyasi nu caahán ra.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Roma

Nu quitsahá tyaá ra Pablo carta

¹ Yuhu ra Pablo cuví yu iin ra jahá tyiñu tyiñu ra Jesucristo. Caná Nyoo tsi yu, tan nacatsj ra tsi yu tyin caca yu jacoto yu tuhun tsa jacacú ra tsi yo tsi nyivi. ² Tan tuhun ihya cuví tsa cahán Nyoo tsihin ra cuví ndusu yuhu ra tahán tsanaha tyin tyaá ra naha nu tutu ra. ³ Juvín tuhun ihya caahán tyin Jutu Mañi yo Jesucristo, Sehe Nyoo, quítsj ra nu ñuhu ñayivi tan nanduvj ra tumaa maa yo. Tan cuvj ra tata ra rey David. ⁴ Tan Nyoo jacotó ra tsi yo tsihin Tatyí Ii ra tyin Sehe ra cuví tsi ra tsa cuenda tsa janandoto ra tsi ra tsihin tunyee iñi tsa iyó tsi ra. ⁵ Tan tsa cuenda ra Jesucristo tsaahá Nyoo tumañi iñi tsi ndi tsa caca ndi tyiñu ra, tyin na tsinu iñi nyivi iyó nanií cahnu nu ñuhu ñayivi tsi ra tan na tyaá yahvi ñi tsi ra. ⁶ Tan juhva ñi ican cuví tucu nyooho tyin tsa nacatsj ra Jesucristo tsi ndo tyin cuví ndo nyivi cuenda ra.

⁷ Jaquítsi yu carta ihya tsi tandihí nyooho tsa iyó ñuu Roma. Nyoo cuñi xaan ra tsi ndo tan caná ra tsi ndo tyin cuví ndo nyivi ra tan jacahnu ndo tsi ra. Naquihin ndo tsa vaha tan na coo tsa taxin añaíma ndo jahá Jutu yo Nyoo tan Jutu Mañi yo Jesucristo.

Nu catyí ra Pablo tyin cuñi ra cuhun ra ñuu Roma

⁸ Tsa jihna ñi, tsahá yu tyahvi nyoo tsi Nyoo tsihin sivi ra Jesucristo tsa cuenda tandihí nyooho tyin tandihí ñi ityi caahán nyivi tyin tsinú xaan iñi ndo tsi ra Jesucristo. ⁹ Jahá tyiñu yu tyiñu Nyoo tsihin tsa nñi iñi añaíma yu. Tan caahán yu tsihin nyivi nácaa jacacú Sehe ra tsi yo. Tsandaa cuví maa Nyoo tyin tsa tsicán tahvi yu tsi ra, tsicán tahvi yu tsa cuenda ndo. ¹⁰ Tan tsicán yu tsi ra na cuví cuhva cuñi ra, tan quítsi yu nu yucú ndo, tyin tsanaha xaan cuñi yu quítsi yu. ¹¹ Tyin cuñi yu jatyinyee yu tsi ndo, tan naquihin ndo tsa vaha tsa tsahá ra tsi yo tan cunycun ñihi ca ndo tsi ra. ¹² Tsa cuñi yu cahan yu tsihin ndo cuví tuhun ihya: tsa jandu iin tahan yo iñi yo tsihin tsa tsinú iñi yo tsi ra.

¹³ Yañi, cuñi yu tsa coto ndo tyin cuaha xaan tsaha cuñi yu quítsi yu quítsi nyehe yu nu yucú ndo, maa tyin nda cuenda vityin tan ñaha ca cuhva tsi cuhva tsi yu. Cuñi yu quítsi yu ñuu ndo tyin cuñi yu cahan ca yu tuhun Nyoo tsihin nyivi tyin tacan tan nducuhaha ca ñi tsinu iñi tsi ra, tumaa javahá yu tsihin nyivi inga ca ñuu. ¹⁴ Tyin tsa ñiñi

cuñi tsi cahan yu tuhun tsa jacacú ra Cristo tsi yo tsihin nyivi Grecia tan nyivi inga ñuu; tahan ñi nyivi tsa tsitó xaan tan nyivi soho. ¹⁵ Yacan cuenda, cuñi yu cahan yu tuhun ra Cristo tsihin nyooho tsa iyó ndo Roma ihya.

Tuhun Nyoo iyó xaan tunyee iñi itsi

¹⁶ Yuhu ña cahán nuu yu caahán yu tuhun ra Cristo, tyin tunyee iñi Nyoo cuví tsi tan jacacú tsi tsi tandihí nyivi tsa tsinú iñi tsi ra Cristo. Tsa jihna ñi maa ñi maa tsihin nyivi Israel cahán ndi tuhun ra Cristo, maa tyin vityin caahán ndihí tucu ndi tsihin nyivi tsa ñavin nyivi Israel cuví. ¹⁷ Tyin tuhun Nyoo ihya, janahá tsi tsi yo nácaa janduvahá Nyoo tsi yo. Tan juvín ñi tsahá cuenda tucu tsi tsi yo, tyin janduvahá ra tsi yo tsa cuenda tsa tsinú iñi yo tsi ra tan ñavin náa inga ca cuenda. Catyí nu tutu ra: “Nyivi tsa janduvahá Nyoo añaíma, iyó ñi ñayivi tsa tsihin tsa tsinú iñi ñi tsi ra.”

Tandihí nyivi tan iyó cuatyí ñi

¹⁸ Nyehe yu tyin Nyoo, ra nyaá gloria, tatsi tuñi ra tsi nyivi ña vaha tsa javahá tsa caquiñi, tyin tsa caquiñi tsa javahá ñi tyasí can nu tsinu iñi inga ca nyivi tsa nditsa. ¹⁹ Tsitó ñi tsa iyó Nyoo tyin juvín ñi maa ra janahá can tsi ñi. ²⁰ Ña cuví catyí yo tyin nduve Nyoo iyó tyin vasu ndi maa ña nyehe yu tsi ra, maa tyin cuví coto yo tsa iyó ra tsihin tsa nyehe yo tandihí tsa javahá ra. Tsanaha javahá ra ñuhu ñayivi tan yacan janahá tsi yo tyin iyó Nyoo tan iyó tunyee iñi tsi ra. Nyivi tsa ña cuñi coto tsi Nyoo ña cua coo tucahnu iñi tsi ñi. ²¹ Vasu ndi maa tsitó ñi tsa iyó Nyoo tsihin tsa nyehe ñi tandihí tsa javahá ra, ña cuñi ñi jacahnu ñi tsi ra tumaa taahán maa tsi jacahnu yo tsi ra. Ña tsahá ñi tyahvi nyoo tsi Nyoo tyin maa ñi maa tsa iyó nu ñuhu ñayivi tyaá jiñi ñi. Tan tsa cuenda yacan ndusohó ñi. ²² Vasu ndi maa catyí ñi tyin tsitó xaan ñi, maa tyin ña nditsa tyin nduve náa tsitó ñi. ²³ Ña jacahnú ñi tsi Nyoo nyito, ra vaha tsa ña cua cúu; maa tyin jacahnú ñi tsitoho tsa caá tumaa caá nyivi tuhvá tsihií, tan nda cuenda tsitoho tsa caá tumaa caá saa, tan coo, tan quiti iyó cumi tsaha.

²⁴ Yacan cuenda nacoó Nyoo tsi ñi nu tsa caquiñi tsa javahá ñi. Tan javahá ndihí tucu ñi tsa caquiñi tsihin cuñu ñuhu iin ñi tan inga ñi tan cuví can ticanuu. ²⁵ Ña cuñi ñi tsinú iñi ñi tuhun Nyoo tsa nditsa, maa tyin tsinú iñi ñi tsa ña nditsa. Tyaá yahvi ñi tsa javahá Nyoo tan jacahnú ñi can, tan ña jacahnú ñi tsi maa ra. Tan intuhun ñi maa ra cuñi tsi jacahnu yo tacan ñi maa. Na cuví tsi tacan.

²⁶ Yacan cuenda jaña ndaha Nyoo tsi ñi na javaha ñi tsa tsahá ticanuu tsi ñi. Tyin nda cuenda ñiñaha tan tsicoó ñi tsihin ñi nduyii, tan ña vaha tacan. ²⁷ Tan juvín ñi tacan

javahá tucu rayii, nacoó ra naha tsa iyó ra naha tsihin ñasiíhi ra naha, tan iyó ra naha tsihin ra ndusiíhi naha ra tan tsahá ra naha ticanuu tsi yañi ra naha. Tan tsa cuenda can tatsi tuñi Nyoo tsi ra naha tan tiví ra naha tsa cuenda tsa caquiñi tsa javahá ra naha.

²⁸ Tan tsa cuenda tsa ña cuñi ca ra can naha ra tan ñi ican naha ñi nacoto ñi tsi Nyoo, nacoó ra tsi ñi naha ñi na caca iñi ñi tsa cuñi maa ñi. ²⁹ Tyin tandihi nuu tsa ña vaha javahá ñi. Ñiñaha tsicoq ñi tsihin rayii tan ña tindaha ñi. Rayii tsicoq ra naha tsihin ñaha tan ña tindaha ra naha. Maa ñi tsa caquiñi javahá ñi. Cuñi ñi coo cuaha ndaha tyiñu ñi. Javahá ñi tsa ndavaha ñi. Nyiyo iñi ñi tsa iyó tsi inga nyivi. Tsahñi ñi nyivi. Cañi tahan ñi tsihin nyivi ñi. Jandavá ñaha ñi. Quiñi iyó ñi tan caahán ñi cuendu. ³⁰ Caahán ñi ndavaha ñi siqui inga nyivi. Ndasí cuñi ñi nyehe ñi tsi Nyoo. Caahán nyaa ñi tsi nyivi. Tan cahnu jahá ñi tsi ñi tan yaa xaan ñi. Janducuahá ca ñi tsa caquiñi. Ña tyaá yahvi ñi tsi jutu ñi, tan ndi tsi sihi ñi. ³¹ Ña cuñi ñi cutuñi iñi ñi. Ña javahá ñi tsa catyi ñi tyin cua javaha ñi. Ña cuñi maa ñi tsi ndi intuhun nyivi. Ña tsitó ñi jahá ñi tucahnu iñi tan ña cundaahví iñi ñi nyehe ñi tsi nyivi. ³² Tsitó vaha ñi tyin Nyoo ña cuñi ra tsa javahá ñi tacan. Tan tsitó tucu ñi tyin nyivi tsa javahá tsa caquiñi can, taahán tsi cúu ñi. Maa tyin ña jandihí ñi tsa javahá ñi can, tan tatun inga nyivi javahá tacan, si xaan cuñi ñi.

2

Tatsi tuñi Nyoo tsi nyivi maa tyin tsihin tsa nditsa

¹ Nyooho tsa nyehé cuatyí tsa javahá inga nyivi, iyó cuatyí ndo tyin jacutuñi ndo tsi ñi tsa cuenda cuatyí javahá ñi. Yoñi jaha ndáa nyooho cuví ndo. Tyin tsa jacutuñi ndo tsi ñi, juvin ñi tsi maa ndo jacanaá ndo. Tyin nda maa ndo tan javahá ndihi ndo cuatyí tsa javahá ñi. ² Tsitó yo tyin Nyoo tatsi tuñi ra tsi nyivi tsa javahá tacan, maa tyin tsihin tsa ndaa tan tsa nditsa cua tatsi tuñi ra. ³ Nyooho tsa jacutuñi tsi nyivi tan javahá ndo juvin ñi tsa javahá ñi, cua tatsi tuñi Nyoo tsi ndo. ⁴ ¿Nacuenda ña taahán iñi ndo tsa vaha iñi Nyoo? Tan cunyeé xaan iñi ra nyehe ra tsi yo tsa cuenda tsa cuñi ra tsa nasama ndo cuhva iyó ndo. ⁵ Maa tyin nyooho jandavá xaan ndo añima ndo. Tan ña cuñi ndo nasama ndo cuhva iyó ndo. Tan tsa javaha ndo tacan, Nyoo cuxaán ra tan ñihi ca cua tatsi tuñi ra tsi ndo tsa cuenda can quivi cua tatsi tuñi ra tsi nyivi tsihin tsa ndaa tan tsa nditsa. ⁶ Tan cua tyahvi ra tsi intuhun intuhun yo nácaa taahán maa tsi tsi yo tsa cuenda tsa javahá yo. ⁷ Nyoo cua cuhva ra ñayivi tsa ña cua naa maa coo

nyivi tsa javahá tsa vaha tan nducú ñi tsa cahnu cuví ra tan nducú ñi jacahnu ñi tsi ra, tan cuñi ñi coo cuñi ñi tsihin ra. Cua ñihi ñi tandihi yacan tyin nanducú ñi can. ⁸ Maa tyin cuaha ca tsa uhvi cua janyehe ra tsi nyivi tsa javahá tsa cuñi maa ñi, ñi tsa ña tyaá yahvi tuhun nditsa, tan javahá ñi tsa ña vaha. ⁹ Cuaha xaan tundoho tan tsa uhvi cua nyehe tandihi nyivi tsa javahá tsa ña vaha. Tsa jihna ñi cua tatsi tuñi ra tsi nyivi Israel, nyivi cuenda ra. Tan tsa tsinu uvi cua tatsi tuñi ndihi ra tsi nyivi tsa ñavin ñi Israel cuví. ¹⁰ Maa tyin tandihi nyivi tsa javahá tsa vaha, cua cuhva Nyoo tsa cahnu cuví ra tsi ñi. Cua jacahnu ra tsi ñi tan cua cuhva ra tsa taxin coo añima ñi. Jihna ca nyivi Israel cua ñihi tandihi tsa caahán ra tuhun. Tan tsa tsinu uvi, ñi tsa ñavin ñi Israel cuví, cua ñihi ndihi ñi tandihi can.

¹¹ Tyin Nyoo inducu ñi cuñi ra nyehé ra tsi iin yo tan tsi inga yo. Ña tavá tsiyo ra ndi intuhun yo. ¹² Tyin nyivi tsa ñavin ñi Israel cuví, ñi tsa ña tsitó ley Nyoo tsa tyaq ra Moisés, tan javahá ñi tsa ña vaha, cua cunaa ñi, maa tyin ñavin tsa cuenda tsa ña tyaá yahvi ñi ley can. Tan nyivi Israel tsa tsitó ley can, tan javahá ñi tsa ña vaha, cua tatsi tuñi Nyoo tsi ñi tumaa catyi maa ley can. ¹³ Tyin nyivi tsa javahá cuhva catyi ley Nyoo, ñi ican cuví nyivi vaha nuu ra. Maa tyin nyivi tsa tsitó ñi maa ley tan ña javahá ñi tsa catyi ley can, ña cua cacu ñi. ¹⁴ Nyivi tsa ñavin ñi Israel cuví ña tsitó ñi ley, maa tyin tun tacan ñi javaha maa ñi tsa catyi ley, juvin ñi maa ñi cuví ley ñi. ¹⁵ Tyin tsihin cuhva iyó ñi, janahá ñi tyin iyó ley Nyoo tsitsi añima ñi. Tsa tsíni tuñi tsa iyó tsi ñi cuví tsandaa tsa cuenda ñi, tyin tuvi iñi ñi tatun vaha o ña vaha javahá ñi. ¹⁶ Tacan cua cuví quivi cua jacutuñi ra Jesucristo cuatyí tandihi nyivi jaha Nyoo. Cua cutuñi tandihi maa nyivi tsa javahá xeehe cuhva tsicá iñi ñi. Tumaa catyi tuhun Nyoo tsa caahán yu tsihin ndo.

Nyivi Israel nyicún ñi ley Nyoo tsa tyaq ra Moisés

¹⁷ Maa tyin nyooho nyivi Israel cuví ndo, catyi ndo. Tan nyitá iñi ndo ley Nyoo tsa tyaq ra Moisés. Tan nduyaá ñi maa ndo tyin catyi ndo tyin nyivi Nyoo cuví ndo. ¹⁸ Tan tsitó ndo cuhva cuñi Nyoo tan ley can janahá tsi tsi ndo tsa nacatsi ndo tsa vaha. ¹⁹ Tan cuñi tucu ndo tyin vaha jaquihín ityi ndo tsi nyivi cuaa, ñi tsa ña tsitó ley. Jandunditsin ndo nu yucú nyivi nu naa, cuñi maa ndo. ²⁰ Tan cuñi tucu ndo tyin tsitó ndo tandihi ley Nyoo tan jaquihín ityi ndo tsi nyivi tsa ña tsitó, ñi tsa ñaha ca caca vaha tsihin Nyoo. ²¹ Tatun tsitó ndo jacuahá ndo tsi inga nyivi, ¿nacuenda ña jacuahá ndo tsi maa ndo? Catyi ndo tyin ña vaha suhu

yo, ¿nacuenda tyin suhú ndo? ²² Juvín ñi catyí ndo tyin ña vaha coo inga ñaha tsi iin rayíi, o inga rayíi tsi iin ñaha, ¿nacuenda tyin maa ndo javahá ndo tacan? Ndasí cuñí ndo nyehe ndo tsitoho, ¿nacuenda tyin suhú ndo ndaha tyíñu tsa iyó tsitsi vehe ñuhu can? ²³ Nduyaa ndo tshin tsa tsitó ndo ley Nyoo, tan tsahá ndo ticanuu tsi ra tyin ña tyaá yahvi ndo ley ra. ²⁴ Yacan cuenda catyí tuhun Nyoo tyehen: “Nyívi tsa ñavin nyívi Israel cuví, caahán ñi ndavaha ñi siqui Nyoo tsacatyí nyooho.”

²⁵ Ndsísa tyin circunciación tsa cuví tuñi Nyoo, tsa janahá tyin cuví yo nyívi ra, cuví jatyinyee tsi tsi ndo. Jatyinyee tsi tsi ndo tun tyaá yahvi ndo ley Nyoo tsa tyaá ra Moisés. Tun ña tyaá yahvi ndo tsa catyí ley can, nduve náa catyí nyisó ndo tuñi can. ²⁶ Maa tyin rayíi tsa nduve tuñi Nyoo nyisó, tan javahá ra cuhva catyí ley can, cua naquihin Nyoo tsi ra tumaa tsatyin nyisó ra tuñi can. ²⁷ Ra tsa ña nyisó tuñi can, tan tyaá yahvi ra ley Nyoo, cua jacutuñi ra tsi nyooho tsa tsitó ley tan ña tyaá yahvi ndo tsa catyí tsi, vasu ndi maa nyisó ndo tuñi Nyoo. ²⁸ Vasu ndi maa cuví ndo nyívi Israel tan nyisó ndo tuñi ra, ña cuví cuví ndo nyívi Nyoo tun nduve ley ra iyó añima ndo. ²⁹ Tyin nyívi iyó ley Nyoo añima, ñi ican cuví nyívi Nyoo. Tyin maa Tatyí Ii Nyoo tyaá tuñi ra añima ñi, tan ñavin cuñu ñuhu ñi. Tatyí Ii Nyoo javahá can, ñavin ley tsa tyaá ra Moisés. Nyívi ihya cua cuví nyívi vaha nuu Nyoo, tan ñavin nuu nyívi.

3

¹ ¿Nacaa jatyinyee tsa cuví yo nyívi Israel tsi yo? ¿O nácaa jatyinyee tuñi Nyoo tsi yo? ² Cuaha cuhva jatyinyee tsi tsi yo. Iin cuhva jatyinyee tsi tsi yo tyin Nyoo tsahá ra ley maa ra tsi yo tsa cuví yo nyívi Israel. ³ ¿Náa cua cuví? ¿A cua jandihí Nyoo tsa javaha ra tsa catyí ra tyin javaha ra tun juhva yoo tan ña tsinú iñi yo tsi ra? ⁴ ¿Ña cua jandihí ra! Na cutuñi iñi yo tyin Nyoo ña vatya ra. Vasu ndi maa tandihí nyívi vatya ñi, ra ican javahá ra tandihí tsa caahán ra. Tyin catyí nu tutu ra tyehen: Jutu Mañi yu, cua nyehe nyívi tyin ña vatya un.

Tan cua coto ñi tyin nditsa tsa caahán un.

⁵ Tsa caquiñi tsa javahá tandihí yoo, tsa iyó nu ñuhu ñayívi ihya, janahá tyin Nyoo vaha ra. [Tumaa iin jahma nyahyu tan iin jahma cuitsin; tsa nyahyu iin jahma can janahá tyin inga tsi ña nyahyu tsi. Tacan cuví yo tshin Nyoo.] Tun tacan ¿a cua catyí yo tumaa catyí nyívi tyin ña vaha tsa tatsi tuñi Nyoo tsi yo tyin janahá yo tyin vaha ra? ⁶ Nyívi catyí ñi tyin ña vaha tatsi tuñi Nyoo tsi yo. Maa tyin ña nditsa ñi tyin Nyoo iyó ndatu tsi ra tsa tatsi tuñi ra tsi tandihí yo.

⁷ Tatan javahá nyívi tsa ña vaha tan yacan janahá tyin Nyoo vaha ra, ¿a taahán tsi tatsi tuñi ra tsi ñi? Catyí ñi tyin ña taahán tsi, maa tyin ña nditsa. ⁸ Tun tsatyin nditsa tsa caahán ñi can, vaha ca javaha yo maa ñi maa tsa caquiñi tacan tan nyehe nyívi tyin Nyoo vaha ra. Yihí ñi catyí ñi tyin tacan jacuahá ndi. Tan ñi tsa caahán tyehen cua tatsi tuñi Nyoo tsi ñi tsacatyí tsa caahán ñi cuendu siqui ndi.

Tandihí yo tan iyó cuatyí yo

⁹ Tan nácaa ¿a vaha ca yoo tsa cuví yo nyívi Israel tan ñavin ca inga nyívi? Ña vaha ca yo. Tyin tsa yahá janahá yu tsi ndo tyin tandihí yo tan iyó cuatyí yo. An cuví yo nyívi Israel, o ña cuví yo nyívi Israel, maa tyin ndacá ñaha cuatyí tsi yo. ¹⁰ Tacan catyí nu tutu Nyoo, nu catyí tsi tyehen:

Ndi intuhun nyívi vaha nduve iyó.

¹¹ Nduve nyívi cuñi cutuñi iñi tuhun Nyoo.

Yoñi cuñi nanducu tsi ra.

¹² Tandihí ñi nacoq ñi tsi Nyoo, tan tandihí ñi tan cuanaq ñi.

Ndi intuhun ñi tan ña javahá ñi tsa vaha.

¹³ Jucun ñi cuví tsi tumaa iin ñañi ndiyi tsa ticohó.

Tan tshin yaa ñi caahán ñi cuendu.

Yihí venenu coo yuhu ñi tyin caahán ñi tsi tahan ñi.

¹⁴ Maa ñi tsa ndvaha ñi caahán ñi.

¹⁵ Yatyí xaan tsahñi ñi tsi tahan ñi.

¹⁶ Janyehé ñi tundoho tan tucuihya iñi tsi nyívi tshin cuhva iyó ñi.

¹⁷ Tan ña tsitó ñi nácaa coo taxin ñi tshin Nyoo, tan ndi tshin nyívi.

¹⁸ Ndi ña tsicá iñi ñi tatun coo iin quívi cua tatsi tuñi Nyoo tsi ñi, catyí tuhun Nyoo nu tutu ra.

¹⁹ Tsitó yo tyin tandihí tsa caahán ley Nyoo tsa tyaá ra Moisés, cuví tsi tsa cuenda nyívi tsa yihí ndaha ley can, tyin tacan tan ña cuví catyí ñi tyin nduve cuatyí ñi iyó. Maa tyin coto tandihí nyívi iyó nu ñuhu ñayívi tyin cua tatsi tuñi Nyoo tsi ñi tsa cuenda cuatyí ñi. ²⁰ Ley can ña cuví janduvaha tsi tsi ndi intuhun yo nuu Nyoo. Iyó tsi tyin tacan tan coto yo tyin iyó cuatyí yo.

Tsa cuenda tsa tsinú iñi yo tsi Nyoo tan nduvaha yo nuu ra

²¹ Maa tyin vityin Nyoo janahá ra tsi yo nácaa janduvahá ra tsi yo nuu ra. Tan janahá ra tsi yo tyin ñavin tsa cuenda ley tan nduvahá yo. Ley ihya tan ra cuví ndusu yuhu Nyoo janahá nácaa coo vaha yo tshin Nyoo. ²² Tyin tsa cuenda tsa tsinú iñi yo tsi ra Jesucristo tan naquihin Nyoo tsi yo tumaa tsatyin vaha yo. Tan ña nacatsí ra tsi yo an cuví yo nyívi Israel o ñavin. ²³ Tandihí yo tan iyó cuatyí yo, tan tsa cuenda yacan ña cuví quíhvi yo nu ndacá ñaha Nyoo. ²⁴ Maa

tyin tsahá maa ra tsa vaha ra tsi yo, tan yacan jahá tsa naquihin cuenda ra tsi yo tumaa tsatyin vaha yo, tyin tsa yahá tyahví ra Cristo Jesús tsa cuenda cuatyí yo. Tan yacan cuenda ña tsicán ca ra yahví tsi yo.²⁵ Nyoo jaquitsí ra tsi ra Cristo tyin cúu ra nu cruu tan cati ra ñivi ra tsa cuenda cuatyí yo. Tan vityin jaha Nyoo tucahnu iñi tsi yo tatun tsinú iñi yo tsi ra Cristo. Tacan cuví, tyin nyehe nyívi tyin Nyoo javahá ra tsa vaha. Tahān tsanaha, Nyoo ña tñin cuenda ra cuatyí nyívi tsa cuenda tyin cua quitsi ra Cristo tan janaa ra cuatyí ñi.²⁶ Tan tacan cuví tyin vityin nyehé nyívi tyin Nyoo tacan ñi maa vaha ra, tan naquihin ra tsi tandihí yo tsa tsinú iñi tsi ra Jesús tumaa tsatyin vaha yo.

²⁷ ¿A cuví nduyaa yo vityin? Ña cuví. ¿Nacuenda? Tsa cuenda tyin ña cuví catyí yo tyin javahá yo tandihí tsa catyí ley tan yacan cuenda vaha yo nuu Nyoo. Tyin nduvahá yo nuu ra tsa cuenda tsa tsinú iñi yo tsi ra.²⁸ Tsa tsitó yo vityin tyin Nyoo naquihin cuenda ra tsi yo tumaa tsatyin vaha yo tsa cuenda tsa tsinú iñi yo tsi ra Cristo, tan ñavin tsa cuenda tsa javahá yo tsa catyí ley o ña javahá yo itsi.

²⁹ ¿A Nyoo cuenda nyívi Israel ñi cuví Nyoo? ¿A ñavin juvin ñi cuví tucu ra Nyoo nyívi tsa ñavin ñi Israel cuví? Juvín ñi cuví tucu ra Nyoo ñi can.³⁰ Tyin intuhun ñi maa ra iyó. Tan naquihin cuenda ra tsi yo tumaa tsatyin vaha yo tsa cuenda tsa tsinú iñi yo tsi ra, a iyó tuñi ra cuñu ñuhu yo tumaa tsa iyó tsi tsi nyívi Israel, o nduve.³¹ Tatun tacan, ¿a cuñi tsi catyí tyin nduve ca yahví nyaá ley tsahnu can? ¿Ñavin tsa nduve yahví nyaá tsi! Cahnu cuví tsi, tan vityin tsihin tunyee iñi maa ra Cristo janahá yo tyin nditsa tsa cahnu cuví tsi.

4

Cuhva tsicoq ra Abraham janahá tsi tsi yo nácaa nduvahá yo nuu Nyoo

¹ ¿Náa catyí yo tsa cuenda ra Abraham, tsii tsaahnu yo? ¿Nacuenda naquihin cuenda Nyoo tsi ra tumaa tsatyin vaha ra? ² Tun tsatyin naquihin cuenda Nyoo tsi ra tsa cuenda tsa javahá ra tsa vaha, cuví nduyaa ra tsihin can, maa tyin ñavin nuu Nyoo.³ ¿Náa catyí nu tutu Nyoo? Catyí tsi tyin ra Abraham tsinú iñi ra tsi Nyoo, tan tsa cuenda yacan, Nyoo naquihin ra tsi ra tumaa tsatyin vaha ra.⁴ Vaha, vityin cua cuhva yu iin cuhva tsi ndo: Ra jahá tyiñu, quihín ra yahví tsa cuenda tyiñu jahá ra tan ña tuhvá nyívi cuhva maa xuhun tsi ra tun ña jahá tyiñu ra.⁵ Maa tyin iin ra tsa ña jahá tyiñu tan ñihi ra tsa ñihi ra, ñihi ndaahví ra itsi cuví can. Tacan cuví nyívi iyó cuatyí tsa ña nducú cacu tsihin tsa

jvahá ñi cuhva catyí ley, tan tsinú iñi ñi tyin Nyoo naquihin cuenda ra tsi yo tumaa tsatyin vaha yo tun tsinú iñi yo tsi ra.⁶ Ra David cahān ra siqui tsa sií cuví tsi nyívi tsa naquihin cuenda Nyoo tumaa tsatyin vaha ñi tan ña tñin cuenda ra cuatyí tsa javahá ñi.⁷ Tyehen catyí ra David:

Sií xaan cuví tsi nyívi tsa jahá Nyoo tucahnu iñi tsi

tan ña jahá ra cuenda cuatyí ñi.

⁸ Sií xaan cuví tsi ñi tsa ña tñin cuenda Nyoo cuatyí.

⁹ ¿A cuñi maa ndo tyin tsa cuenda nyívi nyisó tuñi Nyoo ñi cuví tusii iñi ihya, o cuví tucu tsi tsa cuenda nyívi ña nyisó tuñi can? Tsa yahá catyí yo tyin Nyoo jahá ra tyin vaha ra Abraham tsa cuenda tsa tsinú iñi ra tsi ra.¹⁰ ¿Ama javahá Nyoo yacan tsihin ra Abraham? ¿A tsa ndi cumañi ca cunyaa tuñi can tsi ra, o tsa tsa yahá? Ñavin tsa tsa yahá, tyin tsa ndi cumañi ca.¹¹ Yahá tsa naquihin Nyoo tsi ra Abraham tumaa tsatyin vaha ra, tacan tan tsinyaa tuñi can tsi ra tumaa iin seña tyin tsa yahá nduvahá ra nuu Nyoo tsa cuenda tsa tsinú iñi ra tsi ra. Tan tsa cuenda yacan cuví ra Abraham tumaa jutu tandihí yoo tsa tsinú iñi tsi Nyoo vasu ndi maa ña nyisó yo tuñi Nyoo. Tan yacan cuenda Nyoo jahá ra tyin vaha yo.¹² Nditsa tyin ra Abraham cuví tucu ra jutu nyívi Israel, tandihí ñi tsa nyisó tuñi Nyoo tan tsinú tucu iñi ñi tsi Nyoo tumaa tsa tsinú iñi maa ra Abraham, tsii tsahnu yo, quívi tsa ñaha ca cunyaa tuñi can tsi ra.

Tsihin tsa tsinú iñi yo ñihí yo tsa tsahá Nyoo tsi yo

¹³ Nyoo catyí ra tsihin ra Abraham tan tsihin tata ra tyin cua cuhva ra tsa cua cundaca ñaha ñi ñuhu ñayívi tsihin ra. Maa tyin tsa cahān Nyoo can tsihin ra, ñavin tsa cuenda tyin javahá ra tsa catyí ley, maa tyin tsa cuenda tyin tsinú iñi ra tsi Nyoo, tan Nyoo naquihin ra tsi ra tumaa tsatyin vaha ra.¹⁴ Tun tsatyin maa ñi maa nyívi tsa javahá cuhva catyí ley, cua ñihi tsa cua cuhva Nyoo, nduve náa catyí tsinú iñi yo tsi ra, tan nduve yahví nyaá tsa catyí ra tyin cuhva ra tsa cua cuhva ra tsi yo tun tsinú iñi yo tsi ra.¹⁵ Tyin ley can janahá tsi tyin taahán tsi tatsi tuñi Nyoo tsi yo tatun ña javahá yo cuhva catyí tsi. Maa tyin tun tsatyin nduve ley iyó, ña cua coo cuatyí yo.

¹⁶ Yacan cuenda ñihí yo tsa catyí Nyoo tyin cuhva ra tsi yo tsa cuenda tsa tsinú iñi yo tsi ra, tyin tacan tan cuví tsi tumañi iñi tsa tsahá ra tsi tandihí yoo tsa cuví tata ra Abraham. Ñavin maa ñi nyívi tsinú iñi tsi Nyoo tan tyaá yahví ley tsa tyaá ra Moisés cua ñihi tsa cua cuhva Nyoo, tyin cua ñihi ndihí tucu nyívi tsa ña nyitá iñi ley, tatun tsinú iñi ñi tsi ra tumaa tsa tsinú iñi ra

Abraham. Ra ihya cuví jutu tandihí nyívi tsa tsinú íñi tsi Nyoo. ¹⁷ Tyin catyí ra nu tutu ra tyehen: “Yooho cua cuví tumaa jutu nyívi cuaha tsa cua coo nu ñuhu ñayívi”, catyí ra tsihin ra Abraham. Tan tsa catyí ra tacan, cuñí tsi catyí tyin cuví yo tata ra Abraham nuu Nyoo. Tsinú íñi ra tsi Nyoo, tyin Nyoo janandotó ra ndiyí tan caahán ra tuhun tsa ñaha ca coo tumaa tsatyin tsa iyó tsi.

¹⁸ Ra Abraham tsa tsahnu xaan ra quívi tsa catyí Nyoo tyin cua coo sehe ñasihi ra, tan tsitó ra tyin ña cuví ca coo sehe ñi. Maa tyin tsinú íñi ra tan ñihí ra tsa cahan Nyoo tsihin ra. Tan cuví ra jutu nyívi cuaha, tumaa cahan maa Nyoo tsihin ra: “Tyehen cua nducuaaha nyívi tata un”. ¹⁹ Vasu ndi maa tsa yatyin ña iin cientu cuiya ra Abraham, ña jandihí ra tsa tsinú íñi ra. Tahan ñi maa ra tan ña Sara ñasihi ra, ña cuví ca coo sehe ñi, tyin tsa cuyatyin cuiú cúu ñi tyin tsahnu xaan ñi. ²⁰ Maa tyin ña ndu uví íñi ra tsa cua ñihí ra tsa catyí Nyoo tyin cuhva ra tsi ra. Tsinú íñi ra tsihin tsa nu íñi añima ra. Tan ña jandihí ra tsa nyitá íñi ra tsi Nyoo. Tan jacahnú ra tsi Nyoo, ²¹ tsa cuenda tyin tsitó vaha ra tyin Nyoo iyó tunyee íñi tsi ra tsa javaha ra tsa catyí ra tsihin ra. ²² Yacan cuenda Nyoo naquihín ra tsi ra tsa cuenda tsa tsinú íñi ra tsi ra.

²³ Tuhun tsa nyaá nu tutu Nyoo tsa catyí tyin naquihín Nyoo tsi ra Abraham tsa cuenda tsa tsinú íñi ra tsi ra, ñavin tsa cuenda ra Abraham ñi cuví tsi, ²⁴ tyin tsinyaá tucu tsi tsa cuenda yoo. Tyin naquihín Nyoo tsi yo tsa cuenda tsa tsinú íñi yo tsi ra, tyin juvin ra janandotó tsi ra Jesús, Jutu Mañi yo. ²⁵ Ra Jesús quítsi ra quítsi cúu ra tsa cuenda cuatyí yo, tan nandotó ra tyin tacan tan cuví nduvaha yo nuu Nyoo.

5

Tsa cua ñihí yo tsa cuenda tsa nacoq vaha yo tsihin Nyoo

¹ Tsa yahá nduvaha yo nuu Nyoo tsa cuenda tsa tsinú íñi yo tsi ra. Tan vityin iyó vaha yo tsihin ra jahá Jutu Mañi yo Jesucristo. ² Tyin tsa cuenda ra Cristo ñihí yo tsa vaha Nyoo tyin tsinú íñi yo tsi ra. Tan iin cuñí yo tyin tsa naquihín yo can. Tan sii cuñí yo tyin cua cuhva ra tsa cahnu cuví yo tan javaha yo tsa cuñí maa ra tyin javaha yo. ³ Tan ñavin tsa cuenda yacan ñi taahán tsi cusii íñi yo, tyin taahán tucu tsi cusii íñi yo tun nyehé yo tundoho. Tyin tsitó yo tyin tun cunyeé íñi yo nyehé yo tundoho, tacan cua cunyeé íñi yo cuatu yo nda cuanda ñihí yo tsa cua cuhva Nyoo tsi yo. ⁴ Tatun cunyeé íñi yo yahá yo tandihí tundoho, sii cuñí Nyoo tsihin yo. Tan tsa cuenda yacan tsitó vaha yo tyin cua quita vaha yo nuu ra. ⁵ Tatun tsitó yo tyin cua quita vaha yo nuu ra, ña

taahán tsi nducahan nuu yo nyehé yo tsi ra, tyin Tatyí li ra tsa tsaha ra coo añima yo janahá tsi tsi yo tyin cuñí xaan ra tsi yo.

⁶ Tsanaha yoo ña ñihí yo cuhva jacacu maa yo tsi yo. Tacan tan quívi tahan maa tsi quítsi ra Cristo, quítsi cúu ra tsa cuenda cuatyí yo. ⁷ Tsitó yo tyin ndi intuhun yo tan ña cana íñi yo cúu yo tsa cuenda inga nyívi, vasu ndi maa vaha ñi. Maa tyin tun vaha xaan íñi nyívi can vasiquí cahnya íñi iin yo cúu yo tsa cuenda ñi. ⁸ Maa tyin Nyoo jaquítsi ra tsi ra Cristo, tan yacan janahá tsi yo tyin cuñí xaan ra tsi yo. Quítsi ra quítsi cúu ra tsa cuenda yo vasu ndi maa iyó xaan cuatyí yo. ⁹ Tan tsa cuenda tsa tsihí ra Cristo, nacoq vaha yo tsihin Nyoo. Tan vityin tsitó vaha yo tyin cua cacu yo tan ña cua cuhun yo anyaya quívi cua tatsi tuñi Nyoo tsi nyívi ña tsinú íñi tsi ra. ¹⁰ Tahan tsanaha xaan íñi yo tsi Nyoo, maa tyin vityin iyó vaha yo tsihin ra tsa cuenda tsa tsihí ra Cristo, Sehe ra. Yacan cuenda tsa nyitá vaha íñi yo tyin cua jacacu ra tsi yo tsa cuenda tsa iyó yo ñayívi Sehe ra, tyin tsa iyó vaha yo tsihin ra. ¹¹ Tan ñavin yacan ñi, taahán tucu tsi cusii íñi yo tsihin Nyoo tyin tsa cuenda Jutu Mañi yo Jesucristo tan nduvaha iyó yo tsihin ra.

Ra Adán tan ra Cristo

¹² Tsanaha intuhun ñi rayii tsicoq cuatyí, tan tsa cuenda intuhun ñi ra can tsaq cuatyí nanii ñuhu ñayívi tan tsicoq tuhun tsiihí. Tan tuhun tsiihí can nacuña can tyin tandihí nyívi tan tsicoq cuatyí ñi. ¹³ Tsanaha tsa ndi cumañi ca cuhva Nyoo ley ra tsi ra Moisés tan tsa iyó maa cuatyí nyívi, maa tyin ña tiin cuenda Nyoo cuatyí ñi tsa cuenda tyin nduve ley iyó. ¹⁴ Maa tyin nda cuanda quívi tsicoq ra Adán tan nda cuanda quívi tsicoq ra Moisés, tsindaca ñaha tuhun tsiihí tsi tandihí nyívi tyin iyó cuatyí tandihí ñi, vasu ndi maa ña javahá ñi tumaa javahá ra Adán tsa ña tyaa yahvi ra tsa cahan Nyoo tsihin ra. Ra Adán quítsi ra tsihin cuatyí, maa tyin ra Cristo quítsi ra jacacu ra tsi yo.

¹⁵ Maa tyin cuatyí ra Adán ña cuví jandu inducu yo can tsihin tsa tsahá Nyoo tsi yo. Tyin tsa cuenda cuatyí intuhun ra can, tan tsihí cuaha nyívi. Tacan tuhun, Nyoo jacacu ra tsi yo tsa cuenda intuhun rayii, ra Jesucristo. Tan cahnu ca cuví tsa tsaha Nyoo tsi yo, tan tsa vaha tsi tandihí nyívi cuví tsi. ¹⁶ Cuatyí ra Adán ña cuví jandu inducu yo can tsihin tsa jacacu Nyoo tsi yo. Tyin tsa cuenda intuhun ñi cuatyí can, Nyoo tatsi tuñi ra tsi tandihí nyívi. Maa tyin vityin Nyoo ña cuñí ra yahvi tan jacacu ra tsi yo. Naquihín ra tsi yo tumaa tsatyin vaha yo, vasu ndi maa cuaha cuatyí yo tsicoq. ¹⁷ Nditsa tyin quítsaha ndacá ñaha tuhun tsiihí tsi tandihí nyívi jahá cuatyí tsa javahá ra can, maa tyin vityin ña cuví ca quíhi

ndaha can tsi ñi tsa tsa nduvahá nuu Nyoo, ñi tsa iin nyita ñi naquihín tsa vaha ra. Ñi ican iyó ñi ñayivi tsa tan yihí ndaha ñi tsi ñi tan tsi nu ña vaha jahá intuhun rayii, ra Jesucristo.

¹⁸ Nyoo tatsí tuñi ra tsi tandihí nyivi iyó nu ñuhu ñayivi tsa cuenda cuatyí ra Adán. Maa tyin vityin tsahá ra tsa coo vaha yo tsihin ra tan coo yo ñayivi nyito tsa cuenda tsa vaha tsa javahá ra Jesucristo. ¹⁹ Cuñí tsi catyí tyehen: Tsa cuenda tsa ña tyaá yahvi iin rayii tsa cahán Nyoo, cuaha xaan nyivi tsicoo cuatyí. Ra ican cuví ra Adán. Tan vityin cuaha xaan nyivi cu nduvaha nuu Nyoo tsa cuenda tsa tyaá yahvi inga ra tsa cahán Nyoo. Tan ra ican cuví ra Cristo.

²⁰ Nyoo tsahá ra ley tsi ra Moisés tyin tacan tan coto nyivi tyin iyó cuatyí ñi. Tan vasu ndi maa nducuahá ca cuatyí tsa cuenda ley can, tsa vaha Nyoo nducuahá tucu tsi tyin cahnu ca tucahnu iñi iyó tsi ra tsihin yo. ²¹ Tahán tsanaha, cuatyí yo quítsi ndaca tuhun tsihi, tan yacan yihí ndaha tsi yo. Maa tyin vityin tsa vaha Nyoo jahá tsa iyó vaha yo tsihin ra tan yihí ndaha tsi tsi yo. Tan tsa tacan yihí ndaha tsi tsi yo, tsahá Nyoo ñayivi nyito tsa ña cua naa maa coo yo tsa cuenda Jutu Mañi yo Jesucristo.

6

Ña cua javaha ca yo tsa caquiñi tyin cua javaha yo cuhva catyí ra Cristo

¹ ¿Náa cua javaha yo vityin? ¿A cua javaha ca yo cuatyí tyin tacan tan janaha Nyoo tyin iyó xaan tucahnu iñi tsi ra tsihin yo? ² Ña vaha. Tyin yoo tsa tsa ndu uví iñi cuatyí tumaa tsa tsihi cuatyí yo cuví can. Tan yacan cuenda, ña cuví ca javaha yo tsa caquiñi vityin. ³ ¿A ña tsitó ndo tyin tsa tsicoondutyá yo janahá tsi tyin ndu iin yo tsihin ra Cristo Jesús? Yacan cuñí tsi catyí tyin tsa yahá tsihi yo tsihin ra. ⁴ Tsa quihví yo tsitsi ndutya tsa tsicoo ndutya yo cuví tsi tumaa tsa tsihi yo tan quihví ñuhu yo tsihin ra Cristo tsa tsihi ra. Tan tumaa tsa nandoto ra Cristo jahá Nyoo tsihin tunyee iñi ra, tacan nandoto tucu yo tsa quitá yo tsitsi ndutya tsa tsicoondutyá yo. Tan vityin iyó yo ñayivi tsa tsihin ra.

⁵ Tumaa tsa tsihi ra Cristo, tacan tsihi tucu cuatyí yo, tyin tacan tan ña javahá ca yo tsa caquiñi. Tan tumaa tsa tsihi yo tsihin ra, tacan cua nandoto tucu yo tumaa nandoto ra. ⁶ Tan tsitó yo tyin tandihí cuhva tsicoo yo tahán tsanaha, tsa yahá tsihi can nu cruu tsihin ra Cristo, tyin tacan tan ña cundaca ñaha ca cuñu ñuhu cuatyí yo tsi yo, tan ña javaha ca yo cuatyí. ⁷ Tyin nyivi tsa tsa yahá tsihi, ña cuví ca javaha ñi tsa caquiñi. ⁸ Tan yoo tsa tsa tsihi tsihin ra Cristo, nyitá iñi

yo tyin cua coo yo tsihin ra. ⁹ Tsitó yo tyin ra Cristo nandoto ra tsa yahá tsihi ra, tan vityin ña cúu ca ra tyin nduve ca tunyee iñi iyó tsi tuhun tsihi tsa cahni can tsi ra. ¹⁰ Ra Cristo iin tsaha ñi tsihi ra, tan tsihi ra tsa cuenda cuatyí yo, tan ña cua cúu ca ra. Vityin iyó ra, tan iyó ra tsa cuenda maa Nyoo. ¹¹ Tan tacan tucu nyooho, ña javaha ca ndo tsa caquiñi. Ña naa iñi ndo tyin tsa yahá tsihi ndo tan tsa tsindihí cuatyí ndo. Tan coo ndo cuhva cuñi Nyoo tsihin tsa iin ñi cuví ndo tsihin ra Cristo Jesús Jutu Mañi yo.

¹² Yacan cuenda ña cuhva ca ndo tsa jaha canaa cuñu ñuhu cuatyí ndo tsi ndo. Ña cuhva ndo ndatu tsa jañiñi cuñu ñuhu ndo tsi ndo tan javaha ndo tsa ña vaha tsa cuñí tsi. ¹³ Ña cuhva ndo ndatu tsi cuñu ñuhu ndo tsa javaha ndo tsa caquiñi. Ñacuhva cuenda ndo tsi ndo tsi Nyoo, tyin tsa yahá tsihi yo tan nandoto yo. Cuhva cuenda ndo cuñu ñuhu ndo tsi Nyoo tyin tacan tan javaha ndo tsa vaha. ¹⁴ Tyin nduve ca tunyee iñi iyó tsi cuñu ñuhu cuatyí yo tsa cundaca ñaha can tsi yo. Tyin ñavin ca ley tsa tyaá ra Moisés yihí ndaha tsi yo; tyin vityin tsa vaha tsa tsahá Nyoo tsi yo, yacan yihí ndaha tsi yo.

Musu tsa javahá tsa vaha

¹⁵ ¿Náa cua javaha yo vityin? ¿A cua javaha ca yo cuatyí tsa cuenda tsa iyó yo tsihin tsa vaha Nyoo tan tsa cuenda tyin ña ndacá ñaha ca ley tsi yo? Ñavin. ¹⁶ Nyooho tsitó vaha ndo tyin iin musu, taahán tsi javaha ra tsa caahán tsitoho ra. Tan tacan cuví yo musu tsa tuhvá yo tyaá yahvi. Tun tyaá yahvi yo tsa caquiñi, musu tsa caquiñi can cuví yo, tan cua cunaa yo jahá tsa caquiñi can tyin tyaá yahvi yo tsi can. Maa tyin tun tyaá yahvi yo tsi Nyoo, cua cuví yo nyivi vaha nuu ra. ¹⁷ Tyahvi nyoo tsi Nyoo, tyin vasu ndi maa nu quítsi tsi cuví ndo musu tsa caquiñi maa tyin vityin tyaá yahvi ndo tuhun Nyoo tsa cutuhvá ndo tsihin tsa ñi iñi añima ndo. ¹⁸ Tsa yahá ndatsí cuatyí ndo, tan vityin ña ndacá ñaha ca can tsi ndo, tyin vityin ndacá ñaha tsa vaha Nyoo tsi ndo. ¹⁹ (Caahán yu tsihin ndo cuhva tsa ña yii ñi cutuñi iñi ndo tyin nyooho ñaha ca cutuñi vaha iñi ndo tuhun Nyoo.) Tumaa tsa tsahá cuenda ndo cuñu ñuhu ndo tsi tsa caquiñi tahán tsanaha tan javahá ndo tsa ña vaha; tacan tucu vityin cuhva cuenda ndo cuñu ñuhu ndo tsi Nyoo tyin tacan tan coo ndo ñayivi cuiti, tan javaha ndo maa ñi maa tsa vaha nuu ra.

²⁰ Quivi tsiquihí ndaha cuñu ñuhu cuatyí ndo tsi ndo, musu can cuví ndo, tan ña yihí ndaha tsa vaha Nyoo tsi ndo. ²¹ Maa tyin nduve náa ñihí ndo tsihin can, tan vityin cahán nuu ndo tsa cuenda tsa javahá ndo

tsanaha, tyin maa ñi tuhun tsiihí tsahá can. ²² Maa tyin vityin ña ndacá ñaha ca cuatyí tsi ndo tyin tsa tsahá cuenda ndo tsi ndo tsi Nyoo. Tan vaha xaan tyin maa ñi tsa cuñí Nyoo javahá ndo. Tan nu cua ndíhi tuhun cua coo cuii ndo tsihin Nyoo. ²³ Nyivi tsa javahá tsa caquiñi, cua cúu ñi. Maa tyin Nyoo tsahá maa ra ñayivi tsa ña cua naa maa coo yo tsa cuenda tsa iin ñi cuví yo tsihin ra Cristo Jesús, Jutu Mañi yo.

7

Ley tsahnu ña ndacá ñaha ca tsi tsi nyivi yihí cuenda ra Cristo

¹ Yañi, nyooho tsa tsitó ley, tsitó ndo tyin tsitsi tsa ndi nyito nyivi yihí ndaha ley tsi ñi. ²⁻³ Tumaa iin ñaha tsa iyó yíi, catyí ley tyin coo ña tsihin yíi ña nda cuanda cúu ra. Maa tyin juvin ñi catyí tucu ley tun cúu yíi ña tan nandoo ndaahvi ña, ña cua quihí ndaha ca ley can tsi ña. Tan cuví tindaha ña tsihin inga rayíi tan ña cua coo cuatyí ña. Maa tyin tsitsi tsa ndi iyó yíi ña, ña cuví coo ña tsihin inga rayíi, tyin tun cua javaha ña tacan, cua coo cuatyí ña nuu Nyoo.

⁴ Tan tacan tucu nyooho yañi. Tسانaha ley Nyoo tsa tyaá ra Moisés yihí ndaha tsi tsi ndo tumaa yihí ndaha iin rayíi tsi ñasihi ra. Maa tyin vityin tsa yahá tsihí ndo tan ña ndacá ñaha ca ley can tsi ndo. Tyin vityin ndacá ñaha inga rayíi tsi ndo tan juvin ra cuví ra Cristo, ra tsa nandoto jahá Nyoo. Tyehen cuví tsehe tyin tacan tan cuatyíñu Nyoo tsi yo. ⁵ Tahán tsanaha tsicoo yo cuhva cuñí cuñu ñuhu yo tan ley tsahnu tsa tyaá ra Moisés catyí tsi tyin ña vaha javaha yo tsa caquiñi. Tan tsa caahán tsi tacan, yoo quitsahá cuñí ca yo javaha yo tsa caquiñi tsa cuñí cuñu ñuhu yo. Tan yacan tsahá tuhun tsiihí tsi yo. ⁶ Maa tyin vityin ña ndacá ñaha ca ley tsahnu can tsi yo, tyin tsa yahá tsihí cuñu ñuhu cuatyí yo tsihin ra Cristo. Tan vityin tsa iyó yo ñayivi nyito tsa tsahá Tatyí Ii Nyoo tsi yo, na jaha tyíñu yo tyíñu Nyoo tan ña javaha ca yo tumaa javahá yo quivi yihí ndaha ley tsahnu tsi yo.

Ley Nyoo janahá tyin iyó cuatyí yo

⁷ ¿Náa cua catyí yo? ¿A catyí yo tyin ña vaha ley can? Ñavin tsa ña vaha tsi. Vaha tsi. Tyin tun tsa ña tsahá Nyoo ley can, ña cua coto yo náa cuví cuatyí. Tan ndi ña cua coto yo tyin ña vaha nyiyo iñi yo tsa tsii inga nyivi, tun tsatyin ña catyí ley can tyin ña vaha nyiyo iñi yo. ⁸ Tun tsatyin nduve ley can iyó, ña cua coto yo náa cuví cuatyí, tan ña cua cuñí yo javaha yo tsa ña vaha. Maa tyin quivi tsa tsitó yo ley Nyoo, quivi can quitsahá tsicá iñi yo javahá yo tsa ña vaha. Nu nduve ley iyó, ña tsitó nyivi náa cuví tsa ña vaha. ⁹ Quivi tsa ña tsitó yo náa

cuñí tsi catyí ley Nyoo tsa tyaá ra Moisés, nyito yu. Maa tyin quivi cutuñí iñi yo tsa caahán ley can, cutuñí iñi yo tyin nuu Nyoo tsa tsihí yo jahá cuatyí yo. ¹⁰ Catyí ley can tyin tatun tyaá yahvi nyivi itsi, cua coo cuii ñi ñayivi nyito. Maa tyin yuhu tsihí yo nuu Nyoo jahá ley can tyin ña tyaá yahvi yo itsi. Tyin catyí tsi tyin nyivi tsa ña tyaá yahvi itsi, taahán tsi cunaa ñi nuu Nyoo. ¹¹ Cuatyí yo tsatyíñu can ley can, tan jandaví ñaha can tsi yo, tyin catyí ley tyin tatun ña tyaá yahvi yo itsi, taahán tsi cunaa yo nuu Nyoo.

¹² Ley can ii xaan tsi tyin tuhun tsahá maa Nyoo cuví tsi, tan tandihi tsa catyí ra tyin javaha yo, vaha tsi, tan cuiti xaan tsi. ¹³ Tan ñavin ley vaha ihya jacunaá tsi yo. Tyin tsa ña vaha tsa javahá yo, yacan jacunaá tsi yo. Yacan cuenda cunaá yo nuu Nyoo tyin ley vaha can janahá tsi yo tyin cuatyí cuví tsa javahá yo tsa ña vaha. Tacan tucu vityin ley can janahá tsi tsi yo tyin yaha xaan ña vaha cuví cuatyí javahá yo.

Nu tsahá cuenda ra Pablo tsi yo cuhva iyó yo tun ña tsahá yo cundaca ñaha ra Jesucristo tsi yo

¹⁴ Tan tsitó yo tyin maa Tatyí Ii Nyoo tsahá ley can, yacan cuenda vaha tsi. Maa tyin yuhu iyó cuatyí yo tyin ra ñayivi cuví yo. Javahá yo tsa caquiñi tyin maa cuatyí can ndacá ñaha tsi yo. ¹⁵ Ña cutuñí iñi yo náa taahán yo, tyin tsa vaha tsa cuñí yo javaha yo, ña javahá yo can. Maa tyin javahá yo tsa ña vaha tsa ña cuñí yo javaha yo. ¹⁶ Tan tsa javahá yo tsa ña cuñí yo javaha yo, tsihin yacan nacotó yo tyin ley Nyoo vaha tsi. ¹⁷ Yacan cuñí tsi catyí tyin ñavin maa yo javahá tsa ña vaha, tyin cuatyí tsa iyó tsi yo, yacan javahá tsa ña vaha. ¹⁸ Yuhu tsitó yo tyin cuñu ñuhu yo nduve tsa vaha iyó. Vasu ndi maa cuñí yo javaha yo tsa vaha, ña cuví javaha yo can. ¹⁹ Ña javahá yo tsa vaha tsa cuñí yo javaha yo, jañihí ca yo javaha yo tsa ña vaha tsa ña cuñí yo javaha yo. ²⁰ Tan tatun javahá yo tsa ña cuñí yo javaha yo, ñavin ca maa yo javahá can, tyin cuatyí tsa yihí ndaha tsi yo, yacan javahá can.

²¹ Nacotó yo tsa taahán yo: tun cuñí yo javaha yo tsa vaha, yatyí xaan ca javahá yo tsa ña vaha. ²² Tsitsi añima yo taahán xaan iñi yo ley Nyoo. ²³ Maa tyin iyó inga ley tan yacan yihí ndaha cuñu ñuhu yo tsihin añima yo. Ña tsahá can tsa javahá yo tsa taahán iñi añima yo. Tan ñihi yihí ndaha can tsi yo tumaa yihí ndaha ra vitya tsi iin ra nyii vehe caa. ²⁴ ¡Ndahvi yuhu ra ndaahvi! ¿Yóo cua jacacu tsi yo ndaha tsa ña vahá tsa cuñí cuñu ñuhu yo tan ña cuhun yo anyaya? ²⁵ Tsahá yo tyahvi nyoo tsi Nyoo tsa cuenda ra Jesucristo tyin intuhun ñi maa ra cuví jacacu tsi yo. Vityin cutuñí iñi yo tyin cuñí

tsi tyaa yahvi yu ley Nyoo. Maa tyin tun ña tyaa yahvi yu tsi ra Jesucristo, tandihi tsa ña vaha tsa cuñi cuñi ñuhu yu javaha yu, yacan cua quihí ndaha tsi yu.

8

Tatyí li Nyoo jatyinyeé tsi tsi yo tan cuví coo yo ñayivi tsaá

¹ Maa tyin vityin, Nyoo ña tatsi tuñi ca ra tsi nyivi tsa iñ ñi cuví tsihin ra Cristo Jesús, ñi tsa ña iyó ca cuhva cuñi cuñi ñuhu ñi tyin iyó ñi cuhva cuñi Tatyí li ra. ² Tacan tucu yoo, ña ndacá ñaha ca cuatyí tan tuhun tsihi tsi yo tyin vityin ndacá ñaha Tatyí li Nyoo tsi yo. Tan juvin tsi tshahá ñayivi tsaá coo yo tsa cuenda tsa iin ñi cuví yo tsihin ra Cristo Jesús. ³ Nyoo javahá ra tsa ña cuví javaha ley tsa tyaa ra Moisés. Ley tsa tyaa ra Moisés ña cunyeé tsi jandihí tsi cuhva iyó nyivi. Yacan cuenda Nyoo jaquitsj ra tsi Sehe ra. Cuví ra tumaa rayí ñuu ñayivi tan tyahvi ra tsa cuenda cuatyí yo tyin tacan tan cundihi tsa javahá yo cuhva cuñi cuñi ñuhu yo. ⁴ Javahá ra tyehen tyin tacan tan cuví javaha yo cuhva catyí ley tan ñavin cuhva cuñi cuñi ñuhu yo tyin vityin iyó yo cuhva cuñi Tatyí li Nyoo.

⁵ Nyivi tsa iyó cuhva cuñi cuñi ñuhu, maa ñi cuhva cuñi cuñi ñuhu ñi tsicá iñi ñi, maa tyin nyivi tsa iyó cuhva cuñi Tatyí li Nyoo tsicá iñi ñi cuhva cuñi Tatyí li Nyoo. ⁶ Nyivi tsa tsicá iñi maa ñi maa tsa cuñi cuñi ñuhu ñi, cua cunaa ñi. Maa tyin yoo tsa tsicá iñi cuhva cuñi Tatyí li ra, cua coo yo ñayivi tsaá, tan cua coo tsa taxin añima yo. ⁷ Nyivi tsa tsicá iñi cuhva cuñi cuñi ñuhu ñi, ñi xaan iñi tsi Nyoo cuví ñi can, tyin ña cuñi ñi javahá ñi cuhva catyí ley ra tan ndi ña cuví javaha ñi can. ⁸ Yacan cuenda nyivi tsa nducú tsa cuñi cuñi ñuhu ñi, ña cuví javaha ñi cuhva taahán iñi Nyoo.

⁹ Maa tyin nyooho ña iyó ca ndo cuhva cuñi cuñi ñuhu ndo, tyin iin ñi cuví ndo tsihin Tatyí li Nyoo, tun nditsa tsa iyó Tatyí li Nyoo añima ndo. Nyivi tsa nduve Tatyí li ra Cristo iyó añima, ñavin nyivi cuenda ra Cristo cuví ñi. ¹⁰ Maa tyin tun iyó ra Cristo añima ndo, nyitó añima ndo tyin janduvahá Nyoo tsi ndo nuu ra. Maa tyin cuñi ñuhu ndo tumaa tsa tsihi tsi jahá cuatyí. ¹¹ Nyoo janandotó ra tsi ra Jesús tsa yahá tsihi ra. Tan tacan tucu nyooho, tatun iyó Tatyí li ra añima ndo, cua janandoto ra cuñi ñuhu ndo tsihin Tatyí li ra tsa iyó añima ndo.

¹² Tan tacan yañi, nyaá javaha yo tsa javaha yo, maa tyin ñavin tsa javaha yo cuhva cuñi cuñi ñuhu yo. ¹³ Tyin tatun maa ñi maa cuhva cuñi cuñi ñuhu ndo iyó ndo, cua cunaa ndo nuu Nyoo. Maa tyin tatun tsihin Tatyí li Nyoo tan cuahán jandihí ndo

tsa javahá ndo tsa caquiñi tsa cuñi cuñi ñuhu ndo, cua coo nyito ndo.

¹⁴ Tyin tandihi yoo tsa javahá cuhva jaquihín ityí Tatyí li Nyoo, sehe Nyoo cuví tsi yo. ¹⁵ Nyooho ña naquihín cuenda ndo Tatyí li Nyoo tsa cundaca ñaha tsi ndo tan cuví ndo tumaa musu. Tyin naquihín ndo Tatyí li Nyoo tsa tshahá tsa cuví ndo sehe Nyoo. Tan juvin ñi Tatyí li Nyoo tshahá tsa cahan yo tyehen tsihin Nyoo: "Tyatya". Yacan cuenda ña taahán tsi nayuhvi ndo. ¹⁶ Tan Tatyí li ra tsa naquihín yo ndú iin tsi tsihin tsa nyito yo tan jacotó tsi naha tsi tsi yo tyin cuví yo sehe Nyoo. ¹⁷ Tan tsa cuenda tsa cuví yo sehe ra, iyó ndatu tsi yo tsa naquihín yo tsa vaha tsa catyí Nyoo tyin cuhva ra tsi yo iin caa ñi tsihin ra Cristo. Tyin tun nyehé yo tundoho tumaa tsa nyehé ra Cristo tundoho, quivi cua tahan tsi, Nyoo cua jacahnu ra tsi yo iin caa ñi tsihin ra Cristo.

¹⁸ Tsitó yu tyin tundoho tsa nyehé yo vityin, luhlu cuí ñi cuví tsi tan ña cuví jandu inducu yo itsi tsihin tsa sñi caá tsa cua nyehé yo quivi tahan tsi. ¹⁹ Nyoo cua janaha ra tandihi sehe ra tsi tandihi tsa javahá ra tyin ndatu tsi tan cuñi tsi naha tsi nyehé tsi naha tsi tsi nyivi cuví sehe ra. ²⁰ Tandihí tsa javahá ra, tsa iyó nu ñuhu ñayivi tan andivi, tsa tiví tsi. Vasu ña cuñi tsi tiví tsi, maa tyin Nyoo tshahá ra tsa tiví tsi tsa cuenda cuatyí tsa javahá nyivi. Maa tyin catyí ra tyin coo quivi cua ndutsaa nyico tsi. ²¹ Tandihí tsa javahá Nyoo tan cua ndutsaa tsi inga tsaah, cua quita nuña tsi tan ña tsa cua tiví ca tsi, tyin cua nasama Nyoo cuhva caá tsi vityin. Tan sñi xaan cua cuñi tsi iin caa ñi tsihin tandihi sehe Nyoo tyin ña cua tiví ca tsi. ²² Tsitó yo tyin tandihí tsa javahá Nyoo tan nyehé xaan tsi tundoho tumaa tsa nyehé ñaha ñuhú sehe tundoho tun cua cacu sehe ña. ²³ Tacan tucu yoo tsa naquihín cuenda Tatyí li tsa tshahá jihna ñi Nyoo tsi yo, nyehé ndihí yo tundoho, maa tyin tsa cuenda tsa cuñi yo tsa tahan ñi tsi quivi tsa nasama Nyoo cuhva iyó cuñi ñuhu yo tan nyehé tandihí tsa javahá ra tyin cuví yo sehe ra. ²⁴ Vasu ndi maa ñaha ca ñihi yo tandihí can maa tyin tsitó yo tyin cua ñihi yo can tyin tsinú iñi yo. Tyin juvin ñi tsihin tsa tsinú iñi yo tan cacú yo. Tatun tsa nyehé yo tsa ndatu yo, nduve yahvi nyaá cuatu ca yo can tyin tsa iyó maa can tsi yo. ²⁵ Maa tyin ndita iñi yo tsa cua ñihi yo tsa ña nyehé yo, cuñi tsi tsa cunyeé iñi yo cuatu yo can.

²⁶ Tan juvin ñi tacan jatyinyeé Tatyí li Nyoo tsi yo tun nduve tunyeé iñi iyó tsi yo tan ña tsitó yo náca ndacan tahvi yo tsi Nyoo cuhva taahán maa tsi. Tatyí li tsa iyó añima yo tsicán tahvi tsi tsi Nyoo tsa cuenda yo tsihin tuhun tsa ña cutuñi iñi yo. ²⁷ Tsitó maa Nyoo náa iyó añima yo, tan tsitó ra náa tsicán Tatyí li ra, tsa cuenda yoo tsa cuví yo

nyivi ra tyin tsicán tsi cuhva cuñi maa ra ndacan yo tsi ra.

Tsa cuenda ra Cristo tan cuvi jaha canaa yo siqti tundoho

²⁸ Tsitó yo tyin tandihi tundoho tsa nyehé nyivi tsa cuñi tsi Nyoo jatyinyeé can tsi ñi, tyin maa Nyoo cuvi ra nacatsj tsi ñi, tumaa cuhva tyaá maa ra cuhva. ²⁹ Tyin nda quivi jihna ñi, tan tsa tsitó Nyoo yóo nyivi cua cunyicun tsi ra. Tan tyaá ra cuhva tyin cuvi ñi sehe ra tan coo ñi cuhva cuñi ra. Maa tyin ra Jesucristo cuvi ra cua cuvi ra tsitsa tsa nuu tandihi ca yañi ra. Tan yañi ra cuvi ñi yihí tuhun Nyoo. ³⁰ Tan ñi tsa tyaá Nyoo cuhva tyin cuvi ñi sehe ra, cana ra tsi ñi. Tan ñi tsa cana ra, naquihin cuenda ra tsi ñi tumaa tsatyin vaha ñi. Tan ñi tsa naquihin cuenda ra tsa ha ra tsa cahnu cuvi ñi tsihin ra.

³¹ Yacan cuenda, ¿náa cua catyi yo? Tatan Nyoo tan nyaá ra tumañi ñi tsihin yo, ¿yóo cuvi jaha canaa tsi yo? Yoñi. ³² Nyoo ña catyi ra tsa ña cua cuhva cuenda ra Sehe ra, tyin tsa ha cuenda ra tsi ra tyin cúu ra tsa cuenda tandihi yo. Tun tacan tsa ha ra Sehe ra tsa cuenda yo, ¿a ña cua cuhva ra tandihi ca tsa tsiñi ñuhu tsi yo? Cuhva ra. ³³ ¿Yóo cuvi xico ñaha tsi yo tsa cuvi yo nyivi nacatsj Nyoo? Yoñi. Tyin Nyoo tsa naquihin cuenda ra tsi yo tumaa tsatyin vaha yo. ³⁴ ¿Yóo cuvi catyi tyin cuhun yo anyaya? Yoñi. Tyin ra Cristo tsa tsihi ra tsa cuenda cuatyí yo, tan nandoto ra tan vityin nyaá ra xiin cuaha Nyoo, tan tsicán tahvi ra tsi Nyoo tsa cuenda yo. ³⁵ Nduve náa cuvi quihin nyaa tsa cuñi xaan ra Cristo tsi yo. ¿A cuvi quihin nyaa tundoho itsi, a tsihi, a tsa caahán nyivi tsi yo tsa cuenda tuhun Nyoo, a tama, a tun nduve jahma yo, a tsa yuuhvi, a tuhun tsihi? Ndi intuhun tsehe tan ña cuvi quihin nyaa can tsa cuñi ra Cristo tsi yo. ³⁶ Tumaa catyi nu tutu Nyoo tyehen:

Jutu Mañi yu, tandihi ñi quivi tan cuñi nyivi cahñi ñi tsi ndi tsa cuenda un.

Tumaa javahá ñi tsihin mbee tsa cua cahñi ñi, tacan javahá ñi tsihin ndi, catyi tsi.

³⁷ Vasu ndi maa cuaha tundoho yahá yo, maa tyin tandihi ñi tsa ha tsa nyehé yo tundoho tan jahá canaa yo, tyin ra tsa cuñi xaan tsi yo jatyinyeé tsi yo. ³⁸ Yacan cuenda tsitó vaha yo tyin nduve maa náa cuvi quihin nyaa tsa cuñi xaan Nyoo tsi yo. Ndi tuhun tsihi, ndi ñayivi iyó yo, ndi ángel, ndi tatyí ña vaha, ndi tsa cuvi vityin, ndi tsa cua cuvi ityi nuu ca, ndi intuhun can tan ña cuvi jandusiin can tsi yo tsihin Nyoo. ³⁹ Ndi tsa iyó nu sucun, ndi tsa iyó nu cunu, ndi inga tsa javahá Nyoo, ña cuvi jandusiin can tsi yo tsihin Nyoo, ra tsa cuñi xaan tsi yo tsa cuenda ra Cristo Jesús Jutu Mañi yo.

9

Nyoo nacatsj ra tsi nyivi Israel

¹ Yuhu tsinú ñi yu tsi ra Cristo tan caahán yu tsa nditsa. Ña jandavi ñaha yu, tyin maa Tatyí Ii Nyoo jaquihín ityi tsa tsicá ñi yu. Yacan cuenda tsitó vaha yu tyin tsa nditsa caahán yu tun catyi yu ² cuihya xaan cuñi yu tan uhvi xaan cuñi añima yu ³ tsa cuenda nyivi ñuu yu, ñi Israel. Cuñi xaan yu tsi ñi. Tan nda cuenda cuhva yu tsa cunaa añima yu tan cuhun tsi nu uhvi nu nduve ra Cristo tun tsatyin cuvi cacu ñi tsihin can. ⁴ Tata ra Israel cuvi ñi. Tan Nyoo naquihín cuenda ra tsi ñi tumaa tsa sehe ra tsi ñi. Tan janahá ra tsa cahnu cuvi ra tsi ñi, tyin tsinyaá ra tsihin ñi. Tan ndoo ra tuhun tsihin ñi, tan tsa ha ra ley ra tsi ra Moisés na cuhva ra tsi ñi. Tan janahá ra tsi ñi nácaa cuñi ra tsa jacahnu ñi tsi ra. Tan catyi ra tsihin ñi nácaa cua javaha ra tsa vaha tsihin ñi nu cuahán ca tsi. ⁵ Tata tsii tsaahnu yo cuvi tsi ñi, tan tacan tucu ra Cristo cuenda cuñu ñuhu ra. Ra ican cuvi Nyoo. Tan juven ra ndacá ñaha tandihi tsa iyó. ¡Na jacahnu yo tsi ra tacan ñi maa! ¡Tan na cuvi tsi tacan ñi!

⁶ ¿A catyi yu tyin ña javahá Nyoo tumaa cuhva catyi ra tsihin nyivi Israel tahañ tsanaha? Ñavin. Cuñi tsi coto yo tyin ña tandihi nyivi Israel tan cuvi ñi nyivi Israel tsa nditsa. ⁷ Tan tacan tucu ña tandihi tata ra Abraham tan cuvi ñi tata ra tsa nditsa. Tyin tsa cahan Nyoo tsihin ra, cahan tsi tuhun intuhun ñi sehe ra. Tyin catyi Nyoo tsihin ra tyehen: “Tsa cuenda ra Isaac sehe un tan cua coo nyivi tata un.” ⁸ Tsehe janahá tsi yo tyin ñavin tsa cuenda tsa cuvi ñi nyivi tata ra Israel tan cuvi ñi nyivi Nyoo. Tyin nyivi tsa tsinú ñi tsa cahan Nyoo tyin cua javaha ra, ñi ican cuvi sehe ra. Tumaa ra Abraham, tyin ra Abraham tsinú ñi ra tsa cahan Nyoo tsihin ra ⁹ Tan tyehen cahan Nyoo tsihin ra: “Tyembu vityin inga cuiya, cua quitsi nyico yu nu yucú ndo tan ña Sara tsa iyó iin sehe ña tacan”, catyi Nyoo tsihin ra.

¹⁰ Tan ñavin yacan ñi. Tyin cahan ndihi tucu ra tuhun ra Esaú tan ra Jacob, sehe ña Rebeca, iin ñi jutu ra naha, ra cuvi tsii tsaahnu yo, ra Isaac. ¹¹⁻¹² Maa tyin tsa ndi cumañi ca cacu ra naha tan tsa ndi ñaha ca javaha ra naha tsa vaha, tan tsa ña vaha, catyi Nyoo tsihin ña Rebeca tyin ra Esaú, sehe nuu ña, cua cuvi ra musu ra tsa tsinu uvi. Javahá Nyoo tacan tyin nacatsj ra tsi nyivi tsa cuñi maa ra nacatsj ra, tan ñavin tsa cuenda tsa javahá ñi. ¹³ Tumaa catyi ra nu tutu ra tyehen: “Cuñi ca yu tsi ra Jacob, tan ñavin ca ra Esaú.”

¹⁴ ¿Tun tacan náa cua catyi yo? ¿A catyi yo tyin ña vaha tsa javahá Nyoo? ¡Ña cuvi!

15 Tyin catyí ra tsihin ra Moisés: “Cua cundaahví íñi yu yóo nyívi cuñí maa yu cundaahví íñi yu.”¹⁶ Tacan javahá ra; cundaahví íñi ra tsi nyívi tsa cuñí maa ra cundaahví íñi ra. Tan ña cundaahví íñi ra tsi ñi tsa cuenda tsa javahá ñi tan ndi ñavin tsa cuenda tsa nducú ñi cuhva. Tyin maa ra cuví ra cundaahví íñi yóo cuñí maa ra.¹⁷ Tumaa catyí nu tutu ra, nu caahán ra tyehen tsihin ra rey ñuhu Egipto: “Tsaḥa yu tsa cuví un rey tyin tacan tan coto un tyin iyó tunyee íñi tsi yu. Tan nacoto tucu tandíhi nyívi yóo ra cuví yuhu”, catyí Nyoo.¹⁸ Tan tsihin tsehe tsitó yo tyin Nyoo cundaahví íñi ra tsi nyívi cuñí maa ra. Tan jandundavá tucu ra añima nyívi cuñí maa ra jandundavá ra añima.

¹⁹ Tan vasiqui yooho cua catyí un: “Yoñi cuví javaha tsa cuñí maa ñi javaha ñi tun ña tsaha Nyoo tyin javaha ñi can.” ¿Nacuenda tyin tyaá Nyoo cuatyí siqui ñi? ²⁰ Maa tyin ña vaha tun tsicá íñi un tacan. Tyin yoñi cuví catyí tyin ña vaha tsa javahá Nyoo. ¿Yóo ra cuví yooho tan nacahan un nu caahán Nyoo? ¿A cuví catyí iin quisi tsihin ra javahá itsi: “Ña taahán íñi yu cuhva javahá un tsi yu?” Ña cuví. ²¹ Tyin nyívi tsa javahá ndaha tyíñu, iyó ndatu tsi ñi tsa javaha ñi náa cuñí maa ñi tsihin ñuhu quisi can. Tan iin ñi ñuhu quisi can tsatyíñu ñi juvin ñi tsihin can javaha ñi quisi vaha tan quisi peehe.

²² Ña cuví catyí yo tyin ña vaha Nyoo tsa cuenda tsa tsatyíñu ra tsi nyívi tsa cua cuhun anyaya tan cunyeé íñi ra nyehé ra tsi ñi, tyin tsihin ñi can janahá ra tunyee íñi tsa iyó tsi ra tan janahá ra tyin cua tatsi tuñi ra tsi nyívi caquiñi. ²³ Javahá ra tacan tyin tacan tan coto yoo tsa cuví yo nyívi tsa cundaahví íñi ra tyin nda tsanaha tan tsa nacatsj maa ra tsi yo tyin cuhva ra tsa cahnu cuví ra tsi yo. ²⁴ Yacan cuenda nacatsj ra tsi yo. Tan yihí yo cuví yo nyívi Israel, tan nyívi tsa ñavin ñi Israel cuví. ²⁵ Tumaa catyí Nyoo nu tutu tsa tyaá ra Oseas:

Nyívi tsa ñavin nyívi ñuu yu cuví cua catyí yu tyin nyívi yu cuví ñi.

Ñi tsa ña cuñí yu, cua cuñi yu tsi ñi, catyí Nyoo.

²⁶ Tan nu catyí Nyoo: “Nyooho ñavin nyívi yu cuví ndo.” Juvín ñi ican cua catyí ra tsihin ñi: “Yuhu cuví Nyoo nyito, tan nyooho cuví sehe yu.” ²⁷ Maa tyin ra Isaías catyí ra tyehen tsa cuenda nyívi Israel: “Vasu ndi maa cuaḥa xaan nyívi tata ra Israel cua coo, tumaa tsa cuaḥa nyívi iyó yuhu ndutya ñuhu, juhva ñi ñi cua cacu. ²⁸ Tan tsa yatyin cuii cua jandaa Jutu Mañi yo tandíhi tsa caḥan ra tan cua tatsi tuñi ra tsi tandíhi nyívi iyó nu ñuhu ñayívi.” ²⁹ Tumaa catyí tucu ra Isaías tahān tsanaha:

Tun tsatyin Jutu Mañi yo, ra ndacá ñaha tandíhi tsa iyó andívi, tan ña jacacū ra tsi juhva yo, tsa naā tandíhi yo, Tumaa naā nyívi ñuu Sodoma tan ñuu Gomorra tahān tsanaha.

Nyívi Israel ña ñihí ñi cuhva nduvaha ñi nuu Nyoo,

³⁰ ¿Náa cua catyí yo? Nyívi tsa ñavin ñi Israel cuví, ña nducú ñi cuhva coo vaha ñi tsihin Nyoo, maa tyin Nyoo naquihín cuenda ra tsi ñi tumaa tsatyin vaha ñi tsa cuenda tsa tsinú íñi ñi tsi ra. ³¹ Tan nyívi Israel tsa nducú coo vaha tsihin Nyoo tsihin tsa javahá ñi cuhva catyí ley, ña cuví coo vaha ñi tsihin ra. ³² ¿Nacuenda? Tsa cuenda tyin cuñí ñi nduvaha ñi nuu Nyoo tsihin tsa javahá ñi, tan ñavin tsihin tsa tsinú íñi ñi tsi ra. Yacan cuenda tumaa tsa catyíñi tsaha ñi yuu tan nduva ñi cuví can. ³³ Yuu can caahán Nyoo tuhun nu tutu ra tan catyí ra: Tsaquín nyaa yu iin yuu nda ñuu Sión, tan janduvá tsi tsi nyívi.

Tan yuu can cuví ra Jesucristo.

Tan nyívi tsa tsinú íñi tsi ra tsa cuví yuu can, ña can nduva ñi, catyí Nyoo nu tutu ra.

10

¹ Yañi, tsihin tsa ñi íñi añima yu tan tsicán tahvi yu tsa cuenda nyívi Israel tyin cuñí yu tsa cacu ñi. ² Tsandaa cuví yu tyin cuñí ñi jacahnú ñi tsi Nyoo, maa tyin ña ñihí ñi cuhva javahá ñi can. ³ Tyin ña tsitó ñi tyin juvin ñi maa Nyoo cuví ra janduvahá tsi nyívi nuu ra, tan tsa cuenda tsa ña tsitó ñi yacan, nducú ñi cuhva janduvaha ñi tsi ñi. Tan ña tsahá cuenda ñi tsi ñi tsi ra na janduvaha maa ra tsi ñi. ⁴ Tyin ra Cristo tsa quítsj ra tan javahá ra tandíhi tsa catyí ley, tyin tacan tan tandíhi nyívi tsa cua tsinu íñi tsi ra, naquihín cuenda Nyoo tsi ñi tumaa tsatyin vaha ñi.

⁵ Catyí ra Moisés tyin cuví nduvaha nyívi nuu Nyoo, tatun tyaá yahvi ñi tandíhi tsa catyí ley, tyin tyaá ra tyehen: “Nyívi tsa tyaá yahvi tandíhi tsa catyí ley, cua coo ñi ñayívi tsa ña cua naa maa.” ⁶ Maa tyin tsa cuenda tsa nduvahá yo nuu Nyoo tsihin tsa tsinú íñi yo tsi ra Cristo, catyí tutu ra tyehen: “Ña catyí un: ¿Yóo cundaa andívi? tyin tun cahan un tacan cuñí tsi catyí tyin januu un tsi ra Cristo nda nu ñuhu ñayívi tan jacacu ra tsi yo.” Ña caḥan un tacan tyin ra Cristo tsa yahá quítsj ra. ⁷ Tan ndi ña catyí un: “Cuñí tsi tsa nuu iin ra nda nu yucú ndíyi tsitsi ñuhú tan janandoto ra tsi ra Cristo”. Ña cahan un tacan, tyin ra Cristo tsa yahá nandoto ra. ⁸ Ña catyí un tacan tyin tyehen catyí nu tutu Nyoo: “Tuhun Nyoo yatyin iyó tsi tsihin ndo, iyó tsi yuhu ndo tan tsitsi añima ndo.” Tuhun ihya taahán tsi tsinu íñi

ndo tyin juvin ñi tsi jacuahá tucu nyuhu.
⁹Tatun catyí un tsihin yuhu un tyin ra Jesús
 cuví Jutu Mañi yo, tan tsinu iñi un tsihin
 añima un tyin Nyoo janandoto tsi ra tsa yaha
 tsihi ra, cua cacu un. ¹⁰Tyin tsihin añima
 yo cuñi tsi tsinu iñi yo tsi ra Cristo tan cuví
 nduvaha yo nuu Nyoo, tan tsihin yuhu yo
 cuñi tsi catyí yo tyin tsinu iñi yo, tyin tacan
 tan cacu yo. ¹¹Tuhun Nyoo catyí tsi tyehen:
 “Ndi intuhun nyivi tsa tsinu iñi tsi ra tan ña
 cua tahan ñi ticanuu.” ¹²Tyin Nyoo inducu
 ñi cuñi ra nyehé ra tsi nyivi Israel tan nyivi
 inga ñuu. Tyin intuhun ñi maa ra ndacá
 ñaha tsi tandihi yo. Tan nasocó ra tsi tandihi
 nyivi tsa tsicán tahvi tsi ra. ¹³Tyin tyehen
 catyí tuhun Nyoo: “Tandihi nyivi tsa tsicán
 tahvi tsi Jutu Mañi yo cua cacu ñi.” ¹⁴Maa
 tyin ¿nácaa cua ndacan tahvi ñi tsi ra tatun
 ñaha ca tsinu iñi ñi tsi ra? Tan ¿nácaa cua
 tsinu iñi ñi tsi ra tatun ñaha ca cuñi ñi tuhun
 ra? Tan ¿nácaa cua cuñi ñi tuhun ra tatun
 yoñi cahan tuhun ra tsihin ñi? ¹⁵Tan ¿nácaa
 cahun nyivi cahan ñi nácaa coo taxin nyivi,
 tatun yoñi jacuhun tsi ñi? Tumaa catyí nu
 tutu Nyoo: “Sií xaan cuví nu tsa ñi caahán
 tuhun vaha.” ¹⁶Maa tyin ña tandihi nyivi tan
 tyaá yahvi ñi tuhun tsa jacacú Nyoo tsi yo.
 Tumaa catyí ra Isaías: “Jutu Mañi yu, yoñi
 cuñi tsinu iñi tuhun caahán ndi”, catyí ra.
¹⁷Yacan cuenda cuñi tsi tsa tyaa soho jlhna
 yo tuhun ra Cristo, tacan tan tsinu iñi yo tsi
 ra.

¹⁸Maa tyin tsicá tucu iñi yu: ¿A ña tsiñi
 nyivi Israel tuhun Nyoo? ¡Tsiñi ñi! Tumaa
 catyí nu tutu Nyoo:

Jutu Mañi yu, nyivi tsa jacotó tuhun un tsa
 jacotó ñi tuhun un naní cahnú nu
 ñuhu ñayivi,

tan ña nacoq ihñi ñi ndi intuhun ñuu luhlu,
 catyí tsi nu tutu Nyoo.

¹⁹Tan tsicá nyico tucu iñi yu: ¿A ña cutuñi iñi
 nyivi Israel tyin cua cacu nyivi tsa ñavin ñi
 Israel cuví? ¡Cutuñi iñi ñi! Tyin tsa jlhna ñi
 ra Moisés tyaá ra tuhun cahan Nyoo tsihin
 ñi Israel nu tutu tyehen:

Nyooho, ndasi cua cuñi ndo tyin cua cuhva
 yu tsa vaha tsi nyivi tsa ñavin nyivi ñuu
 yu cuví.

Tan cua cúu ndo tsihi nyehé ndo tsi ñi, catyí
 Nyoo.

²⁰Tan ra Isaías caná iñi ra cahan ra:

“Nyivi tsa ña nanducú tsi Nyoo, nañihí ñi tsi
 ra.

Tan janahá ra tsi ra tsi ñi tsa ña tsicá tuhun
 tuhun ra.”

²¹Tan tyaá tucu ra Isaías tuhun cahan Nyoo
 tsihin ñi Israel tyehen: “Tandihí ñi quivi
 caná yu tsi nyivi yu, na nacuhva cuenda ñi
 tsi ñi tsi yu, maa tyin ña tyaá yahvi ñi. Tan
 jandavá xaan ñi iñi ñi”, catyí Nyoo.

11

Nyivi Israel tsa ñihí cuhva cacu

¹¿A ña cuñi ca Nyoo tsi nyivi Israel? Ñavin
 tsa ña cuñi ca ra tsi ñi, tyin juvin ñi ra Israel
 cuví tucu yuhu. Tyin tata ra Abraham tan
 tata ra Benjamín cuví yu. ²Tahan tsanaha
 nacatsí Nyoo tsi ñi Israel tyin cuví ñi nyivi
 ra. Tan vityin ñavin tsa jatsiyó cuí ra tsi
 ñi. ¿A ña ñuhú iñi ndo tyin catyí nu tutu
 Nyoo tyin ra Elías, ra cuví ndusu yuhu Nyoo,
 catyí ra tyin ña vaha nyivi Israel tan tsicán
 tahvi ra tsi Nyoo tyehen? ³“Jutu Mañi yu,
 nyivi Israel tsañi ñi tsi ra cuví ndusu yuhu
 maa un naha ra, tan tsaní ñi nu jacahnú
 nyivi tsi un. Tan intuhun ña maa yu ndog,
 tan cuñi ndihí ñi cahní ñi tsi yu”, catyí ra.
⁴Maa tyin nacahan Nyoo tan catyí ra tsi-
 hin ra Elías: “Ñavin maa ñi maa un ndog.
 Tyin utsa mil ca nyivi naquihín vaha yu,
 ñi tsa ña jacahnú maa tsitoho Baal”, catyí
 Nyoo tsihin ra. ⁵Tan juvin ñi tacan vityin,
 ndog juhva nyivi jacahnú tsi Nyoo. Tan tsa
 cuenda tsa vaha Nyoo nacatsí ra tsi ñi tyin
 jaha ra tucahnú iñi tsi ñi. ⁶Tan ña jahá
 ra tucahnú iñi tsi yo tsa cuenda tsa javahá
 yo tsa vaha. Tyin tun tsatyin jahá Nyoo
 tucahnú iñi tsi yo tsa cuenda tsa javahá yo
 tsa vaha, cuñi tsi catyí tyin ña jacacú ra tsi
 yo tsihin tsa vaha ra.

⁷Tan ¿nácaa? Nyivi Israel nducú ñi cuhva
 nduvaha ñi nuu Nyoo, maa tyin ña ñihí ñi
 cuhva. Juhva ñi ñihí ñi cuhva. Tan ñi tsa ñihí
 cuhva can cuví ñi tsa nacatsí maa Nyoo. Tan
 ñi tsa ña ñihí cuhva cacu, ndundavá añima
 ñi. ⁸Tumaa catyí nu tutu Nyoo tyehen:
 “Nyoo tsañá ra tsa ña cutuñi iñi ñi. Tan vasu
 ndi maa iyó tinuu ñi, ña tsahá ra tsa nyehé
 ñi. Iyó soho ñi, maa tyin ña cutuñi iñi ñi tsa
 tsiñi ñi. Tacan iyó ñi nda cuenda vityin.”
⁹Tan juvin ñi catyí tucu ra David tyehen:
 Javahá ñi vico tan cusí iñi ñi, maa tyin
 yacan cua jatívi tsi ñi.

Tan cua tatsi tuñi Nyoo tsi ñi tyin cuví can
 tumaa iin trampa tsa cuenda ñi.

¹⁰Tan cua cuaa ñi na ña nyehé ca ñi tsa
 nditsa.

Tan nacosó tsa vee siquí ñi, catyí ra David
 tuhun nyivi Israel tsa ña tsinu iñi tsi
 Nyoo.

Nacaa nduvahá nyivi tsa ñavin ñi Israel cuví nuu Nyoo

¹¹Tan vityin tsicá tuhun yu: ¿A tsa cuenda
 tsa ña tyaá yahvi nyivi Israel tsa cahan
 Nyoo, tan ndoó cuí ñi tsa ña cua cacu ñi?
 Ñavin tsa ndoo cuí ñi. Ndog nuu ñi maa ñi,
 tyin jacacú jlhna Nyoo tsi nyivi tsa ñavin ñi
 Israel cuví. Tyin tacan tan tsa cua nyehé
 ñi yacan, ndasi cuñi ñi tan natsinu ndihí iñi
 ñi tsi Nyoo. ¹²Tatun cuaha nyivi tsa ñavin
 ñi Israel cuví tan natsinu iñi ñi tsi Nyoo tsa

cuenda cuatyí tsa javahá ñi Israel, cuaha ca ñi cua natsinu iñi quivi tsa cua cuví nyico tandihí nyivi Israel nyivi Nyoo.

¹³ Cuñí yu cahan yu juhva tsihin nyooho tsa ñavin ñi Israel cuví. Ra Jesús tavá tyiñu ra tsi yu tsa quitsi yu nu iyó ndo. Tan tsitó yu tyin cuñí tsi tsa javaha yu tyiñu ihya tyin cahnu xaan cuví tsi. Cahnu jahá yu itsi ¹⁴ tan caahán yu tuhun Nyoo tsihin ndo tyin na nyehe nyivi ñuu yu, ñi Israel, nácaa tsinú iñi ndo tsi Nyoo, tyin vasiquí tacan tan natsinu ndihí iñi ñi tan cacu ñi. ¹⁵ Tyin tun tsa cuenda tsa ña natin cuenda Nyoo tsi nyivi Israel tan nduvahá iyó nyivi inga ñuu tsihin Nyoo, quivi cua naquihin cuenda ra tsi ñi cua cuví tsi tumaa tsa cua nandoto ñi, tyin cuaha ca ñi cua tsinu iñi tan ñavin ca tsa jihna ñi. ¹⁶ Iin cuhva tatun vaha quitá paan tsa javahá yo tsa jihna ñi tsihin yutsan paan, vaha tandihí ca yutsan can. Tan tatun iin yoho yutun tan vaha tun, vaha tandihí ca soco tun. Tacan tucu nyivi Israel nyaá yahvi ñi nuu Nyoo tyin tsi tsaahnu ñi yihí ra naha cuenda ra.

¹⁷ Tan nyivi Israel cuví ñi tumaa soco yutun olivo. Tan nyooho cuví ndo tumaa soco yutun olivo cuuhu. Tumaa tuhvá nyivi tsaahnya iin soco yutun tan natyáa ñi inga soco yutun, tacan javahá Nyoo tyin jatsiyo ra tsi nyivi Israel tan tyaa ra tsi nyooho tsa cuví ndo nyivi inga ñuu. Tacan cuví tan tsaá ndo cuví ndo nyivi cuenda Nyoo tan naquihin ndo tandihí tsa vaha tsa iyó tsi ra. ¹⁸ Maa tyin na ña cuñí ndo tyin vaha ca ndo tan ñavin ca ñi Israel tsa cuví soco yutun olivo vaha. Tatun tsicá iñi ndo tacan nducuhun iñi ndo tyin ñavin maa ndo nyisó yoho yutun can, tyin yoho yutun can nyisó tsi ndo.

¹⁹ Vasiquí cua catyí ndo: “Juvín, maa tyin Nyoo tsaahnyá ra soco yutun can tan natyaa ra tsi nyuhu.” ²⁰ Ndiitsa. Maa tyin jatsiyo nuu ñi ra tsi nyivi Israel tsa cuenda tsa ña tsinú iñi ñi tsi ra. Tan tyacú ra tsi nyooho tsa cuenda tsa tsinú iñi ndo tsi ra. Yacan jaha ndo cuenda tsa ña nduyaa ndo tsihin can. ²¹ Tyin tatun ña jahá Nyoo tucahnu iñi tsi ñi tsa cuví soco vaha can, ndi nyooho tan ña cua jaha ra tucahnu iñi tatun ña tsinú vaha iñi ndo tsi ra. ²² Nyehé ndo tyin vaha xaan iñi Nyoo, maa tyin xaan tucu ra tsihin nyivi tsa ña naquihin cuenda tumañi iñi tsa tsahá ra tsi ñi. Vaha iñi ra tsihin nyooho yacan tyaa yahvi ndo tsa vaha tsa tsahá ra tsi yo. Tyin tatun ña tyaá yahvi ndo itsi, cua jatsiyo nyico ra tsi ndo tsaha yutun olivo ra. ²³ Tyin tatun natsinu nyico iñi nyivi Israel inga tsaha, cua cunyaa nyico ñi tsaha yutun olivo nu coyó ñi. Tyin Nyoo iyó tunyee iñi tsi ra tsa natyaa tahan nyico ra tsi ñi inga tsaha. ²⁴ Nyooho tsa ñavin Israel cuví, cuví ndo tumaa soco yutun olivo cuuhu, maa

tyin Nyoo naquihin ra tsi ndo tan tyaa tahan ra tsi ndo tsihin yutun olivo vaha tsa cumí ra. Tacan cua javaha ra quivi cua cuñi ra iin yaha ñi cua tyaa tahan nyico ra soco yutun vaha nu tsinyaa jihna maa tsi.

Nyivi Israel cua cacu nda nu ndihi

²⁵ Yañi, cuñí yu tsa coto ndo iin tsa xeehe tsa javahá Nyoo, tyin tacan tan ña cacu iñi ndo tyin tsitó xaan ndo. Cuaha xaan nyivi Israel ndundava añima ñi, nda cuanda cacu tandihí nyivi inga ñuu tsa nyaa tyin cacu.

²⁶ Tsa yaha cua cacu ñi, tacan tan cua cacu tandihí nyivi Israel tyin catyí nu tutu Nyoo tyehen:

Ra tsa jacacú tsi nyivi, nda Sión cua quee ra. Tan cua quihin nyaa ra cuatyí nyivi ra Jacob. ²⁷ Tuhun ihya cuví tsa cua ndoo yu tsihin ñi quivi cua quihin nyaa yu cuatyí ñi, catyí Nyoo nu tutu ra.

²⁸ Cuxaán xaan nyivi Israel tsihin Nyoo tsa cuenda tuhun vaha ra Cristo tsa cacú yo. Tyin tacan tan cuví tsinu iñi nyooho. Tahán tsanaha nacatsí Nyoo tsi ra Abraham, tan ra Isaac, tan ra Jacob tyin tsinú iñi ra naha tsi ra. Tan cuñí ndihí ra tsi nyivi Israel tyin tata ra naha cuví tsi ñi. ²⁹ Tyin tsa tsa tsahá Nyoo, ña quihin nyaa nyico ra can. Tyin yoo tsa cuví nyivi Nyoo, ña tuhvá ra cahan tyin ñavin nyivi ra cuví yo. ³⁰ Tsanaha nyooho ña tyaá yahvi ndo tsi Nyoo. Maa tyin vityin tyaá yahvi ndo tsi ra tan cundaahví iñi ra nyehé ra tsi ndo tsa cuenda tsa ña tyaá yahvi nyivi Israel tsi ra. ³¹ Nyivi Israel ña tyaá yahvi ñi tsi Nyoo vityin tumaa tsa ña tyaá yahvi nyooho tsi ra tahán tsanaha. Maa tyin cua cundaahví iñi ra nyehé ra tsi ñi tumaa tsa cundaahví iñi ra nyehé ra tsi nyooho. ³² Yihí tsaha tandihí nyivi tan nacoó ñi tsa tyaá yahvi ñi tsi Nyoo. Tsahá ra ndatu tsi ñi tsa javahá ñi tacan, tyin tacan tan iin caa ñi cua cuví cundaahví iñi ra tsi tandihí yo.

³³ ¡Cahnu xaan cuví tsa cuca tan tsa tsitó Nyoo tan tsa tsiñí tuñi tsa iyó tsi ra! Yoo ña cuví nacatyí tuhun yo cuhva tsicá iñi ra, tan ndi iin sava quivi ña cua cutuñi iñi yo tandihí cuhva javahá ra. ³⁴ ¿Yóo cutuñi iñi cuhva tsicá iñi Jutu Mañi yo? ¿O yóo jacuahá tsi ra? Yoñi. ³⁵ Tyin yoñi cuví cuhva jihna iin tsa vaha tsi ra, tan tsa cuenda can tan cuita iñi ñi tyin cua naquihin ñi yahvi cuenda can. ³⁶ Tyin tandihí maa tsa iyó, maa Nyoo javahá itsi, tan iyó tsi tsa cuenda ra. ¡Na jacahnu yo tsi Nyoo tacan ñi maa! Tan na cuví tsi tacan.

12

Na javaha yo cuhva cuñi Nyoo tsihin ñayivi iyó yo

¹ Yacan cuenda yañi, tsitó ndo tyin cundaahví xaan iñi Nyoo nyehé ra tsi yo, tan tsa cuenda yacan caahán ndaahvi yu tsihin

ndo. Cuhva cuenda ndo cuñu ñuhu ndo tsi Nyoo, tan cuví tsi iin tsa nyito tsa jamañi ndo, tyin tsa javahá yo tacan janahá tsi tyin nditsa tsa jacahnú yo tsi ra. Yacan cuví tsa taahán iñi ra. ² Ña cõo ca ndo cuhva iyó nyivi ñuu ñayivi ihya. Cuhva ndo tsa nasama Nyoo cuhva tsicá iñi ndo, tan cuhva iyó ndo, tyin tacan tan coto ndo javaha ndo tsa taahán iñi maa ra: náa ndihi tsa vaha tan tsa cuiti.

³ Nyoo, tsa cuenda tsa vaha iñi ra, tan tava tyiñu ra tsi yu tyin cuví yu iin ra caca tyiñu ra Jesucristo. Yacan cuenda catyí yu tsihin tandihi nyooho tyin ndi intuhun ndo tan ña çaça iñi ndo tyin vaha xaan ndo. Maa tyin çaça iñi ndo nácaa iyó ndo tan náa cuví tsa vaha tsa tsahá Nyoo tsi ndo iin caa ñi tsihin tsa tsinú iñi ndo tsi ra. ⁴ Tumaa soho yo tan tinuu yo iin ñi cuví tsi tsihin tandihi ca tahan tsi tsa iyó iin cuñu ñuhu. Tan tsa intuhun intuhun tsi siin siin tyiñu javahá tsi. ⁵ Tacan tucu yoo, cuaha xaan yo maa tyin iin ñi cuñu ñuhu cuví yo tyin iin ñi cuví yo tsihin ra Cristo. Tan tsa tacan, iin ñi cuví tucu yo tsihin inga tahan yo tyin iin ñi cuñu ñuhu cuví yo.

⁶ Siin siin ndatu tsahá Nyoo tsi tsa intuhun intuhun yo, tsahá ra tsi yo ndáa tsa cuñí maa ra cuhva ra tsi yo, tan na cuatyíñu yo itsi. Tatun tsahá ra tsa cuví yo ndusau yuhu ra, na tsinu iñi yo tyin tyiñu can tsahá ra tsi yo, tan na javaha yo itsi. ⁷ Tatun tsahá ra ndatu tsi iin yo tsa jatyinyee yo tsi nyivi, na javaha yo itsi tsihin tsa ñi iñi añima yo. Tatun tsi inga yo tsahá ra tsa jacuahá yo tsi nyivi, na jacuahá yo tsi ñi tsihin tsa ñi iñi yo. ⁸ Tatun tsahá ra tsi inga yo tsa cuví jandu iin yo iñi nyivi, na jandu iin yo iñi ñi tsihin tsa ñi iñi añima yo. Tatun inga yo ñihí tsa jatyinyee yo tsi nyivi tsihin xuhun, na jatyinyee yo tsi ñi, maa tyin ña cuita iñi yo tyin natyahvi ñi tsi yo. Tatun inga yo ñihí tsa jaquihín ityi yo tsi nyivi yihí cuenda Nyoo tsihin yo, na jaha yo cuenda cuhva jaquihín ityi yo tsi ñi. Tatun inga yo ñihí tsa jatyinyee yo tsi nyivi tsa iyó tsa tsiñí ñuhu, na jatyinyee yo tsi ñi tsihin tsa sii cuñí yo.

Náa taahán tsi javaha nyivi yihí cuenda ra Cristo

⁹ Cuñi tahan ndo tsi ndo tsihin tsa ñi iñi añima ndo. Ndasí cuñí ndo nyehé ndo tsa ña vaha. Tan cpanyicun ndo tsa vaha. ¹⁰ Cuñí tsi tsa cuñi tahan yo tsi yo tumaa tsa cuñí yo tsi nyivi yo. Tan tyaa yahvi tahan ndo tsi ndo tan jaha tahan ndo tsa ñayivi tsi ndo.

¹¹ Ndücü ndo tunyee iñi tsa iyó tsi Nyoo. Ña utsan jaha ndo tsi ndo. Tan jaha tyiñu ndo tyiñu Jutu Mañi yo tsihin tsa ñi iñi añima ndo.

¹² Cõo ndo ñayivi ihya tsihin tsa sii, tyin tsitó ndo tyin cua coo ndo tsihin Nyoo nu

cuahán ca tsi. Janyee ndo iñi ndo nyehé ndo tundoho. Tan ndacán tahvi ndo tsi Nyoo iin nyita ñi.

¹³ Cuhva ndo tsa tsiñí ñuhu tsi nyivi yihí cuenda Nyoo tsihin ndo. Vaha tyañuu ndo tsi nyivi tsaá vehe ndo.

¹⁴ Tatun caahán nyivi ndavaha ñi tsi ndo, vaha çahan ndo tsihin ñi, tan ña çahan ndasi ndo tsi ñi. Ndacán tahvi ndo tsi Nyoo tsa cuenda ñi, na nasoco ra tsi ñi.

¹⁵ Sii cuñí ndo tsihin nyivi sii cuñí. Vácu ndo tsihin nyivi tsa tsacú jahá tucuihaya iñi.

¹⁶ Ña çañi tahan ndo. Iin ñi cuví ndo tsihin tahan ndo. Ña cahnu jaha ndo tsi ndo; jandundaahvi ndo tsi ndo tumaa iyó nyivi ndaahvi; ña jaha ndo tsa tsitó xaan ndo.

¹⁷ Ña javaha ndo tsa ña vaha tsihin nyivi tsa javahá tsa ña vaha tsihin ndo. Jañiñi ndo tsi ndo tan javaha ndo tsa vaha tsihin tandihi nyivi. ¹⁸ Ndücü ndo cuhva coo taxin ndo tsihin tandihi nyivi. ¹⁹ Yañi, cuñí yu tsi ndo. Tatun javahá nyivi tsa ña vaha tsihin ndo, ña tatsi tuñi ndo tsi ñi; natyaa cuenda ndo tsi ñi ndaha Nyoo na tatsi tuñi maa ra tsi ñi. Tyin nu tutu ra catyí tsi tyehen: “Yuhu taahán tsi tatsi tuñi tsi nyivi tan tyahvi tsi ñi”, catyí Jutu Mañi yo. ²⁰ Tan juvin ñi catyí tucu ra: “Tatun nyivi xaan iñi tsi ndo tan tsisocó ñi, cuhva ndo tsa catsi ñi, tan tatun na ityi iñi ñi, cuhva ndo ndutya coho ñi. Tyin tsa javaha ndo tacan, cuaaha tacan ña nuu ñi cua cuví, tyin cua nducahan nuu ñi.” ²¹ Ña cuhva ndo tsa cundaca ñaha tsa ña vaha tsi ndo, maa tyin jandu iin ndo iñi añima ndo. Javaha ndo tsa vaha tan çasi ndo nu vatsi tsa ña vaha tsihin can.

13

¹ Tandihí nyivi cuñí tsi tsa tyaa yahvi ñi tsi ra cumi tyiñu cuenda ra ndacá ñaha naha ra. Tyin tandihí maa ra cumi tyiñu tan Nyoo tsahá tyiñu can tsi ra naha. Ra cumi tyiñu tsa iyó, maa Nyoo tsahá tsi ra naha tsa cuví ra naha tyiñu. ² Yacan cuenda, nyivi tsa ña tyaa yahvi tsi ra naha, cuñí tsi catyí tyin ña tyaa yahvi ñi tsa caahán Nyoo. Ñi tsa javahá tacan, tsiçõo cuatyí ñi tsa cuenda can, tan cua cutuñí ñi. ³ Tyin ra ndacá ñaha naha ra, ña nyisó tyiñu ra naha tsa jayuhvi ra naha tsi nyivi tsa javahá tsa vaha. Nyisó tyiñu ra naha tsa tatsi tuñi ra naha tsi nyivi tsa javahá tsa ña vaha. Tun ña cuñí un tsa jayuhvi ra cumi tyiñu naha ra tsi un, cõo vaha, tyin tacan tan cua nyehe ra naha tyin vaha iyó un tan vaha nyivi cuví un. ⁴ Tyin ra cumi tyiñu naha ra iyó ra naha tsa javahá ra naha tyiñu Nyoo tsa cuenda tsa vaha tsi maa yo. Maa tyin tatun ña catsi iyó un, yacan nditsa cuví nayuhvi un tsi ra naha. Tyin ñavin nyecú taxin ñi maa ra naha vehe tyiñu. Nyecú ra naha tsa tatsi tuñi ra naha tsi nyivi

javahá tsa ña vaha, tyin tyiñu can tyaa Nyoo tsi ra naha. ⁵ Yacan cuenda ñiñi cuñí tsi tsa tyaa yahvi ndo tsi ra cumí tyiñu naha ra, ñavin ñi tsa cuenda tsa cuví tatsi tuñi ra naha tsi ndo, maa tyin tsa cuenda tyin tsitó ndo tyin tacan taahán tsi javaha ndo. ⁶ Tan inga tuhun tsa cuenda can tyahví ndo xuhun tsa tavá ra cumí tyiñu naha ra tsa cuenda tsa janduvahá ra naha ñuu ndo. Jahá tyiñu ra naha tyiñu Nyoo, tyin yacan tyiñu nyecú ra naha.

⁷ Cuhva ndo tsa taahán tsi tsi intuhun intuhun nyivi. Tyahvi ndo náa taahán tsi tyahvi ndo tsa cuenda tsa vaha tsi ñuu ndo. Tyaa yahvi ndo tsi nyivi tsa taahán tsi tyaa yahvi ndo. Jaha ndo tsa ñayivi tsi nyivi tsa taahán tsi jaha ndo tsa ñayivi tsi. ⁸ Ña cunyaa cuenda ndo tsi ndi intuhun nyivi. Maa tyin cuñi tahan ndo tsi ndo, tyin tsa cuñi tahan yo tsi yo, javahá yo tandihí tsa catyí ley Nyoo tsa tyaa ra Moisés tyin javaha yo. ⁹ Catyí ley Nyoo tyehen: “Tun iyó ñasihí ndo o yí ndo ña cōo inga ñaha o rayii tsi ndo. Ña çahñi ndo. Ña sūhu ndo. Ña çahan ndo cuendu siqui ndi intuhun nyivi. Ña nyjyo iñi ndo tsa tsii inga nyivi.” Tandihí tsehe tan inga ca ley javahá ndo itsi tatun cuñi ndo tsi tahan ndo tumaa tsa cuñi ndo tsi maa ndo. ¹⁰ Tatun cuñi ndo tsi tahan ndo, ña javaha ndo tsa ña vaha tsihin ñi. Tsihin tsa cuñi tahan yo tsi yo, javahá yo tandihí tsa catyí ley Nyoo tsa tyaa ra Moisés.

¹¹ Tsihin tuhun ihya jaha ndo cuenda tsi ndo quivi iyó ndo vityin. Tyin tsa tahán tsi cuhva tsa taahán tsi ndoto yo. Tyin vityin tsa yatyin cuii ca cua cunuhu añima yo nu nyaá Nyoo tan ñavin ca quivi tsa quihvi yo tuhun ra. ¹² Tsa yaha tsa tsacuaa, tan tsa cua tuvi. Yacan cuenda cuñi tsi jandihí ndo tsa javahá ndo tsa javahá nyivi iyó nu naa. Tan jaha tyiñu ndo tsihin tsa vaha tsa tsaha Nyoo tsi ndo; javaha ndo cuhva javahá nyivi iyó nu nditsin. ¹³ Cuñi tsi cuiti coo yo tyin nu nditsin Nyoo iyó yo. Tan ña cōho ndo nyixi, ña javaha ndo vico tan cōho ndo nyixi. Nyooho rayii, ña çaca nuu ndo tsihin ñaha. Tan nyooho ñaha ña çaca nuu ndo tsihin rayii. Ña cōo viciu tsi ndo. Tan ña ndasi cuñi ndo nyehe ndo tsi nyivi. Tan ña nyjyo iñi ndo tsa iyó tsi ñi. ¹⁴ Maa tyin cōo ndo tsihin Jutu Mañi yo Jesucristo, tumaa tsinditsi yo jahma tacan na cunditsi yo tsi ra. Tan ña çaca iñi ndo javaha ndo cuhva cuñi cuñu ñuuho ndo.

14

Na ña çahan nyaa yo tsi nyivi

¹ Tatun iin nyivi yihí cuenda Nyoo tan luxu ñi tsinú iñi ñi tsi ra, ña vaha tsa ña naquihin cuenda ndo tsi ñi. Naquihin cuenda ndo tsi ñi, maa tyin ña çahan ndo

tsa luxu tuhun Nyoo tsa ña cutuñí vaha iñi yo tsihin ñi coto ndu uvi iñi ñi. ² Cua cuhva yu iin cuhva tsi ndo: Tsa cuenda juhva nyivi cuví catsi maa ñi tandihí maa nuu tsa iyó. Tan tsa cuenda tucu inga ñi, maa ñi maa yucu cuví catsi ñi, cuñi ñi. Ñi ihya cuví ñi tsa ña ñihí vaha nyaá tsihin Nyoo. ³ Maa tyin ñi tsa tsatsí tandihí can, taahán tsi naquihin cuenda ñi tsi ñi tsa tsatsi yucu ñi. Tan ñi tsa tsatsi yucu, na ña çahan nyaá ñi tsi inga ñi can. Tyin Nyoo naquihin cuenda ra tsi ñi can. ⁴ Tan çyóo nyivi cuví yooho tan çahan nyaá un tsi musu inga ra? Tyin tun vaha o ña vaha javahá ñi, nyehe maa tsitoho ñi tsihin ñi. Tan vaha cua quita ñi tyin Jutu Mañi yo, iyó tunyee iñi tsi ra tan cua jatyinyee ra tsi ñi na quita vaha ñi.

⁵ Inga tucu cuhva: Yihí nyivi jacahnú ñi iin quivi tan ñavin ca inga quivi. Tan tsa cuenda inga nyivi nduve quivi çahnu cuví tan quivi ña çahnu cuví. Inducu ñi quivi cuñi ñi, yacan cuenda intuhun intuhun maa yo tan cuñi tsi tyihí tuñi vaha iñi yo. ⁶ Ñi tsa naquihin vaha quivi, naquihin vaha ñi can tsa cuenda tsa jacahnú ñi tsi Jutu Mañi yo. Ñi tsa ña naquihin vaha can, juvin ñi jacahnú tucu ñi tsi Nyoo tyin ña naquihin vaha ñi can. Tan ñi tsa tsatsí tandihí can, juvin ñi tsatsí tucu ñi tsa cuenda tsa jacahnú ñi tsi Jutu Mañi yo, tan nacuhvá ñi tyahvi nyoo tsi ra tyin tsaha ra tsa catsi ñi. Tan ñi tsa ña tsatsi tandihí, ña tsatsí ñi tsa cuenda tsa jacahnú ñi tsi Jutu Mañi yo tan juvin ñi nacuhvá tucu ñi can tyahvi nyoo tsi ra.

⁷ Tyin ndi intuhun yo tan ña iyó yo tsihin tunyee iñi maa yo. Tan ndi ñavin tsa cuenda maa yo tsiihí yo. ⁸ Tyin tatun iyó yo, iyó yo tsa jaha tyiñu yo tyiñu Nyoo. Tan tatun tsiihí yo, tsiihí yo tsa cuenda Jutu Mañi yo tan naquihin ra añima yo. Yacan cuenda tsii maa Jutu Mañi yo cuví tsi yo vasu ndi maa nyito yo o tsiihí yo. ⁹ Tyin ra Cristo tsihí ra tan nandotō ra tyin cundaca ñaha ra tsi nyivi nyito tan nyivi ña nyito.

¹⁰ Maa tyin yooho, çnacuenda nyehé nyaá un tsi ra yañi un? Ço nacuenda ña naquihin cuenda un tsi ra?, tan tsitó vaha un tyin tandihí yo tan cua tahan tsi quivi cuhva cuenda yo tsi yo nuu ra Cristo tyin tatsi tuñi ra tsi yo. ¹¹ Tumaa tsa catyí Nyoo nu tutu ra tyehen:

Yuhu nditsa tsa nyito yu. Tan tumaa tsa nditsa tsa nyito yu, tacan nditsa tsa cuñi tsi cuñi tsiti tandihí nyivi nuu yu.

Tandihí ñi tan cua nacoto ñi tsi yo tsa cuví yu Nyoo.

Tan nuu tandihí nyivi cua jacahnú ñi tsi yu, catyí Nyoo.

¹² Yacan cuenda intuhun intuhun yo tan cua nacuhva cuenda yo tyiñu javaha yo tsi Nyoo.

Ña janacava ndo tsi yañi ndo nu cuatyí

¹³ Yacan cuenda, ña taahán tsi cahan nyaa ca ndo tsi nyivi. Maa tyin nducu ndo cuhva tsa ña janacava ndo tsi ñi nu cuatyí coto jandihí ñi tsa tsinú iñi ñi tsi ra Cristo. ¹⁴ Yuhu tsitó yu tyin cuví catí yo tandihí tyin tsinú vaha iñi yu tsi Jutu Mañi yo Jesucristo, tan maa ra jacuahá tsi yu. Maa tyin ñi tsa tsicá iñi tyin ña cuví catsi ñi tandihí, tsa cuenda maa ñi ña cuví catsi ñi can. ¹⁵ Maa tyin tatun tsa cuenda tsa tsatsí ndo tan ndasi cuñi yañi yo, ña nditsa tsa cuñi ndo tsi ra. Ña cuhva ndo tsa tiví yañi yo tsihin tsa tsatsí ndo tyin ra Cristo tsihí ra tsa cuenda ra. ¹⁶ Ña cuhva ndo tsa cahan nyivi ndavaha ñi siqui tsa tsahá Nyoo ndatu tyin catsi yo. ¹⁷ Tatun ndacá ñaha Nyoo tsi yo ña ñiñi xaan náa tsatsí yo o náa tsihí yo. Tsa ñiñi ca cuví tsa vaha iyó yo nuu ra, tan tsihin tsa sií cuñi yo, tan taxin iyó añima yo jahá Tatyí Ii ra. ¹⁸ Nyivi jahá tyiñu tyiñu ra Cristo tacan, sií cuñi Nyoo nyehé ra tsi ñi, tan tacan tucu nyivi sií cuñi ñi nyehé ñi tsi ñi.

¹⁹ Yacan cuenda cuñi tsi jañiñi yo tsi yo tan coo vaha yo tsihin nyivi. Tyin tacan tan cuví jatinyee tahan yo tsi yo na cuahnu ca yo tsihin tuhun Nyoo. ²⁰ Ndi intuhun ndo tan ña jatívi ndo tyiñu jahá Nyoo tsitsi añima inga nyivi tsihin tsa tsatsí ndo. Nditsa tyin tandihí tsa tsatsí yo tan vaha tsi. Maa tyin ña vaha tsa catsi yo iin tsa tsatsí yo tatun tsihin can janacava yo tsi nyivi nu cuatyí. ²¹ Yacan cuenda, vaha tsa ña catsi yo cuñu, ndi ña coho yo vinu tatun ndasi cuñi yañi yo nyehé ra tyin javahá yo can. Na ña janacava yo tsi ra yañi yo nu cuatyí. Na ña casi yo nu tsinú iñi ra tsi Nyoo tsihin iin tsa javahá yo. ²² Cuhva tsa tsinú iñi yo tsa cuenda tandihí yacan ña cahan yo tuhun can tsihin inga nyivi. Na coto intuhun ñi maa yo can tsihin Nyoo. Sií xaan cuñi yo tatun ña uvi tsicá iñi yo javahá yo tsa tsahá Nyoo ndatu tyin javahá yo. ²³ Maa tyin nyivi tsa tsatsí náa tsatsí, tan uvi tsicá iñi ñi, tsicoo cuatyí ñi tyin ña tsinú vaha iñi ñi tyin cuví catsi ñi can. Tan tandihí tsa javahá yo tsihin tsa ña tsiñú iñi yo tyin tsahá Nyoo ndatu javaha yo can, cuatyí cuví.

15

Na javaha yo tsa taahán iñi nyivi yihí tuhun Nyoo tsihin yo, tan ñavin tsa taahán iñi ñi maa yo

¹ Yoo tsa vaha cuanyicún tsi Nyoo, cuñi tsi tsa jatinyee yo tsi nyivi tsa ñaha ca tsinú vaha iñi tsi ra. Jatinyee yo tsi ñi na tsinu ca iñi ñi. Tan na ña nducu yo maa ñi maa tsa taahán iñi maa yo. ² Intuhun intuhun yo cuñi tsi tsa javaha yo cuhva taahán iñi inga nyivi tatun cuví tsi tsa vaha cuenda ñi, tyin tacan tan cuví cuahnu ca ñi tsihin

tuhun Nyoo. ³ Tyin ndi ra Cristo tan ña javahá ra cuhva taahán iñi maa ra, maa tyin tahan ra tumaa catyí nu tutu Nyoo tyehen: “Tandihí tsa ndavaha ñi tsa cahan nyivi siqui Nyoo, siqui ra Cristo ndoo can”, catyí tsi. ⁴ Tyin tandihí tsa tsinyaq nu tutu Nyoo tahan tsanaha, tsinyaq tsi tsa cuenda tsa cutuhva yo itsi. Tan juven tsi jatinyee tsi yo tsa cunyeé iñi yo cuatu yo tsa cua cuhva Nyoo tsi yo. Tyin tun cahví yo itsi jandu iin tsi iñi yo. ⁵ Tan juven ñi maa ra tsahá tsa cunyeé iñi yo cuatu yo, tan tsahá ra tsa vaha cuñi añima yo. Na jatinyee ca ra tsi yo coo vaha yo tan iin ñi cuví yo tumaa taahán iñi ra Cristo Jesús. ⁶ Tacan tan tandihí yo iin caa ñi jacahnu yo tsi Nyoo Jutu ra Jesucristo Jutu Mañi yo.

Nyivi tsa ñavin ñi Israel cuví, cua coto ñi tuhun Nyoo

⁷ Yacan cuenda naquihin cuenda tahan ndo tsi ndo, tumaa naquihin cuenda ra Cristo tsi yo, tyin tun javaha yo tacan, jacahnu yo tsi Nyoo. ⁸ Tan catyí yu tsihin ndo: ra Cristo quitsí ra quitsí jatinyee ra tsi nyuhu tsa cuví nyivi Israel, tyin tacan catyí Nyoo tsihin tsi tsaahnu ndi tyin cua javaha ra. Tan tacan janahá ra Cristo tyin tandihí tsa catyí Nyoo tyin cua javaha ra, javahá ra itsi. ⁹ Quitsí ra Cristo tyin tacan tan jacahnu tucu nyivi tsa ñavin ñi Israel cuví tsi Nyoo, tsa cuenda tsa cundaahví iñi ra nyehé ra tsi ñi, tumaa catyí nu tutu ra tyehen:

Yacan cuenda cua jacahnu yu tsi un tan cua nyehé tandihí nyivi tsa ñavin ñi Israel cuví.

Cua jacahnu yu tsi un tan cata yu yaa tsa cuenda un, catyí tsi.

¹⁰ Tan inga tucu nu catyí tsi tyehen: Nyooho tsa ñavin ñi Israel cuví, sií cuñi ndo tsihin ñi Israel, nyivi Nyoo.

¹¹ Tan inga tucu nu catyí tsi tyehen: Jacahnu ndo tsi Jutu Mañi yo, nyooho nyivi tsa ñavin ñi Israel cuví.

Çata tandihí ndo yaa tan jacahnu ndo tsi ra. ¹² Ra Isaías tyaa tucu ra nu tutu Nyoo tyehen:

Cua cacu iin ra tsa cuví tata ra Isai.

Cua quitsí ra cua cundaca ñaha ra tsi nyivi tsa ñavin ñi Israel cuví.

Tan cua cuita iñi ñi tyin cua jacacu ra tsi ñi.

¹³ Juvín ñi maa Nyoo tsahá tunyee iñi tsi yo tan tsitó yo tyin cua cuhva ra tsa cuhva ra tsi yo. Na jacutu ra tsi ndo tsihin tusii iñi ra. Tan na coo taxin añima ndo tsa cuenda tsa tsinú iñi ndo tsi ra, tyin tacan tan tsihin tunyee iñi Tatyí Ii ra tan cuita vaha iñi ndo tyin cua ñihi ndo tsa cua cuhva ra tsi ndo.

¹⁴ Yañi, tsitó vaha yu tyin nyooho vaha iñi ndo tan cutuñi vaha iñi ndo, tan tsitó vaha ndo cuhva cuhva cuenda tahan ndo tsi ndo. ¹⁵ Maa tyin nu carta ihya ñihi xaan

caahán yu siqui juhva tsa tyaq yu tyin tacan tan ña naa iñi ndo can. Tyehen javahá yu tsa cuenda tyin Nyoo tsaḥa ra tsa vaha ra tsi yu ¹⁶ tsa jaha tyiñu yu tyiñu ra Jesucristo nu iyó nyivi tsa ñavin ñi Israel cuví. Tan tyiñu tsa javahá yu cuví tsa caahán yu tuhun Nyoo nácaa jacacú ra tsi nyivi. Tyehen javahá yu tyin tacan tan cuví cuhva cuenda yu tsi ñi tsi Nyoo tan cuví ñi iin ofrenda tsa taahán iñi ra, tyin tsa nduvahá ñi nuu ra jahá Tatyí li ra.

¹⁷ Yuhu tsa tsinú iñi yu tsi ra Cristo Jesús, siñi cuñi yu jahá tyiñu yu tyiñu Nyoo tyin tsitó yu tyin tyiñu vaha javahá yu. ¹⁸ Yuhu ña caná iñi yu cahan yu tsa ña javahá ra Cristo tsihin yu. Maa tyin tsaḥa cuenda yu tsi ndo tyin nyivi tsa ñavin ñi Israel cuví, tsinú iñi ñi tsi Nyoo tyin Nyoo tsatyíñu ra tsi yu tan vityin tyaá yahví ñi tsi ra tsa cuenda tsa tsinú iñi ñi tuhun cahan yu tan nyeḥe ñi tsa javahá yu ¹⁹ tsihin tunyee iñi seña tan tsa iyo tsa javahá yu jahá Tatyí li Nyoo. Tsihin tandihí yacan cunyeḥ cahan yu tuhun ra Cristo tan nácaa jacacú ra tsi yo tsihin nyivi. Quitsahá yu nda Jerusalén tan inga ca ñuu nda cuanda tsaq yu ñuu tsa cayucú Ilírico. ²⁰ Tacan nducú yu cuhva caahán yu tsa jacacú ra Cristo tsi yo nu ñaha ca coto nyivi tuhun ra, tyin ña cuñi yu jaha tyiñu yu nu tsa yaha cahan inga ra tuhun ra Cristo. ²¹ Tumaa catyí nu tutu Nyoo tyehen: Nu nduve maa tuhun Nyoo iyó, cua tsaahá tuhun Nyoo tan cua cutuñi iñi nyivi iyó can itsi, catyí tsi.

Nu tyaá ra Pablo cuhva tyin cahun ra ñuu Roma

²² Yacan cuenda ña cuví quitsi yu quitsi nyeḥe yu nu yucú ndo, vasu ndi maa cuaha xaan tsaḥa cuñi yu quitsi yu. ²³ Maa tyin vityin tsa ndihí jahá tyiñu yu ityi ñuu ihya. Tan tsa cuaha xaan cuiya cuñi yu quitsi yu nu yucú ndo tan ndoo yu juhva quivi tsihin ndo. ²⁴ Nyehe jihna yo tatun cuví yaha yu nu yucú ndo quivi cua cahun yu España. Tsa yaha tsa cunyi yu juhva quivi tsihin ndo, nyehe yo tatun cuví jatinyee ndo tsi yu tan tsaahá yu nu cahun yu. ²⁵ Maa tyin vityin cuahán yu ñuu Jerusalén tan nyisó yu ofrenda tsa cuenda nyivi yihí cuenda ra Cristo tsa iyó ndacan. ²⁶ Tyin nyivi tsicá vehe ñuhu tsa iyó ityi Macedonia tan ityi Acaya natuhun tahan ñi tan tava ñi juhva cahun jacuhun ñi tsi nyivi ndaahví tsa iyó Jerusalén, ñi yihí cuenda ra Cristo. ²⁷ Tyehen cuñi ñi javahá ñi. Tan nditsa tyin taahán tsi javaha ñi tacan. Tyin nyivi Israel, ñi tsinú iñi tsi ra Cristo, tsaḥa ñi tuhun ra Cristo tsi ñi. Yacan cuenda taahán tucu tsi tsi maa ñi tsa jatinyee ñi tsi ñi Israel tsihin tsa iyó tsi ñi. ²⁸ Yacan cuenda, tatun tsa yaha jandaa yu tyiñu ihya, tan tsa yaha nacuhva

cuenda yu xuhun ihya tsi nyivi Jerusalén, tacan tan cahun yu nda España tan cua yaha yu nu yucú ndo. ²⁹ Tsitó vaha yu tyin quivi cua quitsi yu nu yucú ndo, cuaha tsa vaha cua cuhva Nyoo tsi yu tyin nacuhva cuenda yu tsi ndo.

³⁰ Yañi, Tatyí li Nyoo tsaḥa tsa cuñi ndo tsi yu tan tsi ra Jesucristo, yacan cuenda caahán ndaahví yu tsihin ndo ndacan tahvi ndo tsi Nyoo tsa cuenda yu tan tsa cuenda tyiñu jahá yu. ³¹ Ndacan tahvi ndo tsa cuenda yu, na jacacu Nyoo tsi yu ndaha nyivi Judea tsa ña tsinú iñi tsi ra Cristo. Tan ndacan tahvi ndo tsa cuenda nyivi yihí cuenda ra Cristo ñuu Jerusalén, na tñi cuenda vaha ñi ofrenda tsa ndahá yu. ³² Tan ndacan tahvi ndo na cuví cuhva cuñi Nyoo tan cuví quitsi yu quitsi nyehe yu nu yucú ndo tsihin tsa siñi cuñi yu tan cuví quitatu vaha yu. ³³ Tan Nyoo, ra tsaḥa tsa taxin coo aña yu, na cunyaa ra tsihin tandihí ndo. Tan na cuví tsi tacan.

16

Nu tsaḥa ra Pablo nacumi tsi nyivi vaha iñi tsi ra

¹ Jacotó yu tsi ndo tyin ña hermana Febe jatinyeeé xaan ña tsi nyivi yihí cuenda Nyoo ñuu Cencrea. ² Naquihin vaha ndo tsi ña tumaa naquihín Jutu Mañi yo tsi yo, tumaa taahán tsi javaha ñi yihí cuenda Nyoo. Jatinyee ndo tsi ña tsihin tandihí tsa tsiniñi ñuhu tsi ña, tyin maa ña cuaha xaan nyivi jatinyeeé ña, tan nda cuanda maa yu.

³ Cuhva ndo nacumi tsi ña Priscila tan tsi ra Aquila, ñi tsa cutahan tsihin yu nu jahá tyiñu yu cuenda ra Cristo Jesús. ⁴ Tsañya iñi ñi ñayivi ñi quivi jacacú ñi tsi yu. Yacan cuenda tsaḥa yu tyahvi nyoo tsi ñi. Tan ñavin yuhu ñi, tyin tandihí tucu nyivi tsa ñavin ñi Israel cuví, ñi tsa yihí cuenda Nyoo, tsaḥa ñi tyahvi nyoo tsi ñi. ⁵ Cuhva tucu ndo nacumi tsi ñi yihí cuenda Nyoo tsa ndú iin vehe ña Priscila tan ra Aquila. Vatsi tucu nacumi tsi ra Epeneto, yañi yu. Juvín ra cuví ra tsa tsiniñi jihna iñi tsi ra Cristo ityi Acaya. ⁶ Cuhva ndo nacumi tsi ña María. Jahá tyiñu xaan ña nu yucú ndo. ⁷ Cuhva ndo nacumi tsi nyivi ñuu yu, ra Andrónico tan ra Junias, ra yañi yu tsa tsiyucú tsihin yu vehe caa. Cahnu tyiñu jahá tyiñu ra naha cuenda Jutu Mañi yo tsihin tandihí ca ra jahá tyiñu cuenda Nyoo. Tan jihna ca ra naha natsiniñi iñi tsi ra Cristo tan ñavin ca yuhu.

⁸ Cuhva ndo nacumi tsi ra Amplias ra vaha iñi tsi yu cuenda Jutu Mañi yo. ⁹ Cuhva ndo nacumi tsi ra Urbano, ra yañi yo cuenda tyiñu ra Cristo Jesús, tan tacan tucu ra Estaquis, ra yañi yu. ¹⁰ Cuhva ndo nacumi tsi ra Apeles. Nyeḥe yo tyin nditsa tsa tsinú iñi

ra tsi ra Cristo. Tan tsahá tucu yu nacumi tsi nyivi ra Aristóbulo. ¹¹ Cuhva ndo nacumi tsi ra Herodión ñuu yu tan tsi nyivi ra Narciso, ñi tsa tsinú iñi tsi Jutu Mañi yo. ¹² Vatsí nacumi tsi ña Trifena tan tsi ña Trifosa, ñi tsa jahá tyiñu tyiñu Jutu Mañi yo. Tan ña hermana Pérsida, ñaha tsa jahá tyiñu xaan tyiñu Jutu Mañi yo. ¹³ Cuhva ndo nacumi tsi ra Rufo, iin ra cahnu cuví nuu Nyoo. Tsinú vaha iñi ra tsi Jutu Mañi yo. Tan vatsí tucu nacumi tsi sihi ra, ña tsa cuví tumaa sihi yu. ¹⁴ Cuhva ndo nacumi tsi ra Asíncrito, tsi ra Flegonte tan tsi ra Hermas, tan tsi ra Patrobas, tan tsi ra Hermes, tan tsi ra hermano tsa yucú tsihin ra naha. ¹⁵ Cuhva tucu ndo nacumi tsi ra Filólogo tan tsi ña Julia tan tsi ra Nereo tsihin cuhva ra, tan tsi ra Olimpás tan tsi tandihí ñi yihí cuenda Nyoo tsa yucú tsihin ñi.

¹⁶ Cuhva tahan ndo nacumi tsi ndo. Tandihí nyivi yihí cuenda ra Cristo tsa iyó ityi ihya jaquitsj ñi nacumi tsi ndo.

¹⁷ Yañi, caahán ndaahvi yu tsihin ndo, jaha ndo cuenda tsi ndo tsihin ñi cuñí jasiin tsi ndo, tan nducú ñi cuhva tsa nduva ndo tsihin tuhun Nyoo, tyin ñavin tacan cutuhva ndo tuhun ra Cristo. Ña cutahan ndo tsihin ñi can. ¹⁸ Tyin ñi can ñavin tyiñu Jutu Mañi yo Jesucristo jahá tyiñu ñi, maa ñi cuhva cuñí maa ñi javahá ñi. Tan jandahví ñaha ñi añima nyivi ndaahvi tsihin tsa vita caahán ñi. ¹⁹ Tandihí nyivi tsitó ñi tyin tyaá yahvi ndo tsi Nyoo. Yacan cuenda si xaan cuñí yu tsihin ndo, tan cuñí yu tsa yatyi javaha ndo tsa vaha. Maa tyin ña yatyi javaha ndo tsa ña vaha. ²⁰ Nyoo ra iyó tandihí tsa taxin añima, na cuhva ra tsa jaha canaa ndo tsi nu ña vaha tsa yatyi, tan na cuhva ra tsa cuañi ndo siqui nu. Na nasoco Jutu Mañi yo Jesucristo tsi ndo.

²¹ Ra Timoteo ra cutahán tsihin yu nu jahá tyiñu ndi tyiñu Nyoo, jaquitsí ra nacumi tsi ndo. Tan tacan tucu ra Lucio, tan ra Jasón, tan ra Sosípater; tandihí ra ñuu yu can jaquitsí ra naha nacumi tsi ndo.

²² Yuhu ra Tercio javahá yu tutu ihya tsa cuenda ra Pablo, juvin ñi jaquitsí tucu yu nacumi tsi ndo tyin iin caa ñi yihí yo cuenda Jutu Mañi yo.

²³ Jaquitsí tucu ra Gayo nacumi tsi ndo. Vehe ra iyó yu. Juvin ñi ihya ndú iin tandihí ñi yihí cuenda Nyoo. Ra Erasto ra cuví tesorero ñuu ihya, jaquitsí ra nacumi tsi ndo, tan yañi yo ra Cuarto tucu.

²⁴ Na ndoo Jutu Mañi yo Jesucristo tsihin tandihí ndo. Tan na cuví tsi tacan ñi.

Nu ndihí caahán ra Pablo tan jacahnú ra tsi Nyoo

²⁵ Tan vityin na jacahnu yo tsi Nyoo, tyin maa ra cuví ra cua cuhva tsa ndu iin iñi añima ndo, tyin tacan tan ña jandihí ndo

tsa tsinú iñi ndo tuhun ra tsa jacacú tsi yo. Tsehe cuví tuhun caahán yu tan tuhun tsa jacuahá yu tsa cuenda ra Jesucristo. Iin ñi cuví tsi tsihin tuhun tsa ñuhú xeehe tahan tsanaha nda ndi cumañi ca tsinú ñuhu ñayivi. ²⁶ Maa tyin vityin jacuahá Nyoo tsi yo tsa cuenda tutu tsa nacoq ra cuví ndusu yuhu ra, ra tsahá cuenda tuhun ra tahan tsanaha. Catyí Nyoo, ra tsa ña cua cundihi maa, tyin vityin taahán tsi coto tandihí nyivi tyin tacan tan tsinu iñi ñi tsi ra tan tyaa yahvi ñi tsa caahán ra. ²⁷ Intuhun ñi maa Nyoo iyó, tan iyó xaan tsa tsiñi tuñi tsi ra. Tan na ña jandihí yo tsa jacahnú yo tsi ra tsa cuenda ra Jesucristo.

Tan na cuví tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Corinto

Nu tyaá ra Pablo iin carta tsa cuenda nyivi yihí cuenda Nyoo ñuu Corinto

¹ Yuhu ra Pablo, cana Nyoo tsi yu tyin caca yu tyiñu ra Jesucristo. Yuhu tsihin ra Sóstenes, ra yañi yo, ² jaquitsi ndi carta ihya tsi ndo tsa yucú ndo vehe ñuhu cuenda Nyoo ñuu Corinto. Nyivi Nyoo cuví ndo vityin, tyin tsa ndu iin ndo tsihin ra Cristo Jesús. Nyoo cana ra tsi ndo tyin nanduví ndo nyivi vaha cuenda ra, tsihin tandihí nyivi tsa jacahnú tsi Jutu Mañi yo Jesucristo tandihí ñi ityi. Tyin cuví ra Nyoo cuenda ñi tan cuenda tucu maa yo. ³ Naquihin ndo tsa vaha tan tsa taxin tsahá Nyoo Jutu yo tan Jutu Mañi yo Jesucristo coo añima ndo.

Nacaa nasocó Nyoo tsi nyivi yihí cuenda ra

⁴ Tandihí ñi quivi tsahá yu tyahvi nyoo tsi Nyoo tsa cuenda ndo, tyin ñihí ndo tsa vaha Nyoo tsa cuenda tsa ndu iin ndo tsihin ra Cristo Jesús. ⁵ Tan tsa iin ñi cuví ndo tsihin ra Cristo, Nyoo tsahá ra tunyee iñi tsi ndo tsa cahan ndo tuhun ra. Tan tsahá ndihí tucu ra tsa coto xaan ndo. ⁶ Tan tandihí tuhun ra Cristo tsa cahan ndi tsihin ndo tsa ndunditsin tsi tyin tsa nasama ndo cuhva iyó ndo. ⁷ Tan yacan cuenda nduve tsa cumaní tsi ndo tyin iyó tandihí tsa vaha Nyoo tsi ndo jahá ra tsitsi tsa ndatú ndo quivi quitsi Jutu Mañi yo Jesucristo. ⁸ Nyoo cua jaha cuenda ra tsi ndo nda cuanda naa ñuhu ñayivi tyin tacan tan yoñi cuví tyaacuatyi tsi ndo quivi cua quitsi Jutu Mañi yo Jesucristo. ⁹ Nyoo tacan ñi maa javahá ra cuhva catyi ra. Tan maa ra cuví ra cana tsi ndo tyin ndu iin ndo tsihin Sehe ra, ra Jesucristo, Jutu Mañi yo.

Nyivi yihí cuenda Jutu Mañi yo, ña vaha quita siin ñi

¹⁰ Yañi, tsicán yu tsi ndo tsihin sivi Jutu Mañi yo Jesucristo, na iin ñi cuví ndo tan ña cusin ndo. Tan iin ñi cuhva caça iñi ndo, tan iin ñi tuhun quihí iñi ndo. ¹¹ Caahán yu tacan tsihin ndo, yañi, tyin catyi nyivi ra Cloé tsihin yu tyin iyó tsihi nu yucú ndo. ¹² Tyin nyooho siin siin cuhva caahán ndo. Yihí ndo catyi ndo: “Cuenda ra Pablo yihí yu”; inga ndo: “Cuenda ra Apolos”; inga tucu ndo: “Cuenda ra Pedro”; tan inga tucu ndo catyi ndo: “Cuenda ra Cristo yihí yu.” ¹³ ¿A cuñi ra Cristo tsa quita siin yo? ¿A maa yu tsihi nu cruu tsa cuenda ndo? ¿A tsicoondutyá ndo tsihin sivi yu? Ñavin. ¹⁴ Tyahví

nyoo tsi Nyoo tyin ra Crispo tan ra Gayo ñi jacoondutyá yu tan ña jacoondutyá yu tsi ndi intuhun ca nyooho, ¹⁵ yacan ña cuví cahan ndo tyin tsicoondutyá ndo tsihin sivi yu. ¹⁶ Aan, jacoondutyá tucu yu tsi nyivi ra Estéfanos, maa tyin ña nducuhún iñi yu tun jacoondutyá yu tsi inga ndo. ¹⁷ Tyin ra Cristo ña tava tyiñu ra tsi yu tsa jacoondutyá yu. Tava tyiñu ra tsi yu tsa cahan yu nácaa jacacú ra tsi yo. Tan ñavin tsihin tsa tsiñi tuñi tsa iyó nu ñuhu ñayivi ihya caahán yu, tyin coto catyi nyivi tyin nduve yahvi nyaá tsa tsihi ra Cristo cuenda cuatyí yo.

Vaha ca tsa tsiñi tuñi Nyoo tan ñavin ca tsa tsiñi tuñi nyivi iyó nu ñuhu ñayivi

¹⁸ Nyivi tsa cua cuhun anyaya tsiñi ñi tuhun tsa tsihi ra Cristo nu cruu, tan ña tsinú iñi ñi tsi ra, yacan cuenda cuñi maa ñi tyin nduve yahvi nyaá tsa tsihi ra. Tan tsa cuenda yoo tsa cua cacu, tunyee iñi Nyoo cuví tsa tsihi ra. ¹⁹ Tyin tacan catyi maa tuhun Nyoo:

Cua janaa yu tsa nyityi jiñi ra tsitó xaan.

Tan ña cua cahan yu tsa caahán ra, catyi Nyoo.

²⁰ Nduve yahvi nyaá ra tsa tsitó xaan, tan ra maestro, tan ra caahán náa ndihí tuhun tsa iyó nu ñuhu ñayivi ihya. Tyin tsa tsiñi tuñi tsa iyó nu ñuhu ñayivi ihya, tuhun nduve yahvi nyaá nanduvj can jahá Nyoo. ²¹ Nyoo tsihin tsa tsiñi tuñi tsa iyó tsi ra tyaá ra cuhva tyin ña cuví nacoto nyivi tsi ra tsihin tsa tsiñi tuñi tsa iyó nu ñuhu ñayivi ihya. Maa tyin tyaá tucu ra cuhva tsa jacacu ra tsi nyivi tsa tsinú iñi tuhun ra vasu ndi maa inga ca nyivi cuñi ñi tyin nduve yahvi nyaá tsi.

²² Nyivi Israel cuñi ñi nyehe ñi tsa iyo. Tan nyivi Grecia maa ñi maa tsa tsiñi tuñi tsa iyó nu ñuhu ñayivi ihya nanducú ñi. ²³ Maa tyin nyuhu jacotó ndi tuhun ra Cristo, ra tsa tsihi nu cruu. Tan tsa tsiñi nyivi Israel tuhun ra ndasi xaan cuñi ñi. Tan ñi tsa ñavin ñi Israel cuví, cuñi ñi tyin nduve yahvi nyaá tsi. ²⁴ Maa tyin tsa cuenda nyivi tsa nacatsj Nyoo, cuví ñi nyivi Israel, a nyivi Grecia, ñi ícan cutuñi iñi tyin ra Cristo iyó tandihí tunyee iñi Nyoo tsi ra, tan tsahá ra tsa cutuñi iñi ñi tsa tsiñi tuñi Nyoo. ²⁵ Vasu ndi maa inga nyivi cuñi tyin nduve yahvi nyaá tsa tsiñi tuñi Nyoo, maa tyin nyaá yahvi ca tsi tan ñavin ca tsa tsiñi tuñi tsa iyó nu ñuhu ñayivi ihya. Tan cuñi tucu ñi tyin ña ñihi tunyee iñi Nyoo. Maa tyin ñihi ca tsi tan ñavin ca tunyee iñi tsa iyó nu ñuhu ñayivi ihya. ²⁶ Yañi, cuñi tsi tsa cutuñi iñi ndo tyin Nyoo nacatsj ra tsi ndo vasu ndi maa ña cuaha ndo cuví nyivi tsitó, tan nyivi cahnu cuví o nyivi ndacá ñaha nu ñuhu ñayivi ihya. ²⁷ Nacatsi ra tsi nyivi tsa catyi nyivi tyin soho xaan ñi, tyin cuhva ra ticanuu tsi nyivi tsitó xaan. Tan nacatsi ra tsi nyivi nduve

tunyeey iñi iyó tsi tyin cuhva ra ticanuu tsi nyivi cuñi tyin iyó xaan tunyee iñi tsi ñi. ²⁸ Tan nacatsí ra tsi nyivi ndaahvi tsa cuñi nyivi tyin ña tsiñi ñuhu ñi, tan nyivi tsa ña cuñi nyivi nyehe ñi, tan janduluhlu ra tsi nyivi jahá tyin cahnu cuví ñi. ²⁹ Javahá ra tacan tyin tacan tan yoñi cuví nduyaa nuu ra. ³⁰ Tan juven ñi maa ra jandu iin tsi yo tsihin ra Cristo Jesús. Tan tsahá ra Cristo tsa tsiñi tuñi tsi yo, tan tsa cuenda tsa jata ra tsi yo tsihin niñi ra, quihñ nyaa ra tsi yo ndaha nu ña vaha tan cacu yo tan nduvahá yo jahá ra tan jacu ií ra tsi yo. ³¹ Yacan cuenda na javaha yo cuhva catyí tuhun Nyoo nu catyí tsi tyehen: “Ña cuví nduyaa yo tsihin tsa javahá maa yo, maa tyin tatun cua nduyaa yo, na nduyaa yo tsihin tsa javahá Nyoo tsihin yo.”

2

Tuhun ra Cristo, ra tsihi nu cruu

¹ Maa tyin yañi, quivi tsa quitsi yu cahñ yu tuhun Nyoo tsihin ndo, ña cahñ yu tuhun tsa tsiñi tuñi tsa iyó nu ñuhu ñayivi ihya tumaa caahán ra tsitó xaan naha ra. ² Tyin maa ñi maa tuhun ra Jesucristo, nácaa tsihi ra nu cruu tsa cuenda cuatyí yo tyaá iñi yu tan cahñ yu tsihin ndo. ³ Tan tsa tsaá yu nu yucú ndo ñihi nihí yu jahá tsa yuuhví yu. ⁴ Tan tsa cahñ yu tsihin ndo, ña cahñ yu tsihin tuhun si caa tumaa caahán ra tsitó xaan naha ra. Maa tyin tsihin tunyee iñi Tatyí Ii Nyoo cahñ yu tsihin ndo. ⁵ Tyin tacan tan tsinu iñi ndo tsi Nyoo tsa cuenda tunyee iñi maa ra, tan ñavin tsa cuenda tsa tsiñi tuñi tsa iyó nu ñuhu ñayivi ihya.

Juvin ñi maa Tatyí Ii Nyoo tsahá tsa nacoto yo tsi Nyoo

⁶ Maa tyin nditsa caahán ndi tuhun tsa tsiñi tuñi tsihin nyivi tsa ñihi nyaá tsihin tuhun Nyoo. Maa tyin ñavin tsa tsiñi tuñi tsa iyó nu ñuhu ñayivi ihya, tan ndi ñavin tsa tsiñi tuñi ra ndacá ñaha naha ra tsa cua cundihi ñi maa, tyin caahán ndi tsa tsiñi tuñi Nyoo ⁷ tsa tsi cumi xeehe ra tsa ndi cumañi ca javaha ra ñuhu ñayivi ihya. Tyaá ra cuhva tsa jacacu ra tsi yo tan cunyecu cuii yo tsihin ra nda gloria. ⁸ Tan ndi intuhun ra ndacá ñaha nu ñuhu ñayivi ihya tan ña cutuñi iñi ra naha can. Tun tsatyin cutuñi iñi ra naha can, ña cua tyaá ra naha tsi Jutu Mañi yo, ra ndacá ñaha gloria, nu cruu. ⁹ Maa tyin cuví tsi tumaa catyí maa tuhun Nyoo:

Yoñi nyehe tan yoñi tsiñi tan tsicá iñi tuhun vaha tsa javahá Nyoo tsa cuenda nyivi cuñi tsi ra, catyí tsi.

¹⁰ Maa tyin Nyoo tsahá ra Tatyí Ii ra tsi yo tan jacotó Tatyí Ii ra tuhun ihya tsi yo, tan juven ra jacotó tandihi ca tuhun xeehe tsa tsicá iñi Nyoo tsi yo.

¹¹ Intuhun intuhun yo tsitó yo nácaa tsicá iñi yo, maa tyin inga nyivi ña tsitó ñi tsa tsicá iñi yo. Tan tacan tucu intuhun ñi Tatyí Ii Nyoo tsitó ra tsa tsicá iñi maa Nyoo. ¹² Yoo ñavin tsa tsiñi tuñi tsa iyó nu ñuhu ñayivi naquihñ yo, tyin naquihñ yo Tatyí Ii Nyoo, tan juven ra jacotó tandihi tsa ñihí yo jahá Nyoo. ¹³ Tan tsa caahán ndi tsihin ndo ihya, tuhun tsa jacuahá maa Tatyí Ii Nyoo tsi ndi cuví. Ñavin tsa cutuhva maa ndi tsihin tsa tsiñi tuñi jiñi ndi. Nacatyí tuhun ndi tsa jacuahá Tatyí Ii Nyoo tsi ndi tsi nyivi tsa yihí Tatyí Ii Nyoo.

¹⁴ Maa tyin nyivi tsa nduve Tatyí Ii Nyoo iyó tsihin, ña naquihñ vaha ñi tan ndi ña cutuñi iñi ñi tsa jacuahá Tatyí Ii Nyoo tsi ñi. Tan cuñi maa ñi tyin nduve yahvi nyaá tsi, tyin nduve Tatyí Ii Nyoo iyó tsihin ñi. ¹⁵ Maa tyin nyivi yihí Tatyí Ii Nyoo cuví cutuñi iñi ñi. Tan tsitó ñi tatun vaha a ña vaha náa iin tuhun. Maa tyin ña cuví catyí inga nyivi tatun vaha a ña vaha tsa iyó añima ñi. ¹⁶ Tyin tuhun Nyoo catyí tsi: “Yoñi tsitó tsa tsicá iñi Jutu Mañi yo Nyoo. Yoñi cuví jacuahá tsi ra”, catyí tuhun Nyoo. Maa tyin yoó tsitó yo tsa tsicá iñi ra tyin iyó tsa tsiñi tuñi ra Cristo tsi yo.

3

Ña taahán tsi cunyicun yo tsi iin ra yihí tuhun Nyoo tsihin yo, na cunyicun yo tsi Nyoo

¹ Yañi, quivi tsa quitsi yu nu yucú ndo ña cuví cahñ yu tsihin ndo tumaa caahán yu tsihin nyivi jaquihñ ityi Tatyí Ii Nyoo. Cahñ yu tsihin ndo tumaa caahán yu tsihin nyivi ña tsitó tsi Nyoo, tyin ndi lee xaan ndo tsihin ra Cristo. ² Cahñ yu tsihin ndo tsihin tuhun tsa ña yihí ñi cutuñi iñi ndo. Tumaa tsahá yo letsí coho lee tsa ñaha ca cuví catsi nyayu, tacan javahá yu tsihin ndo, tyin nyoo ñaha ca cuví cutuñi vaha iñi ndo. ¡Tan ndi vityin tan ña cutuñi iñi ndo! ³ Tyin ndi tsicá ca iñi ndo tsa cuñi cuñu ñuhu ndo. Nyiyó iñi ndo, tan iyó tsihi nu yucú ndo, tan ndusiñ ndo. Ndi tsicá iñi ndo tuhun tsicá iñi nyivi cuenda nu ñuhu ñayivi ihya, tan javahá ndo tumaa cuñi cuñu ñuhu ndo. ⁴ Tyin yihí ndo catyí ndo: “Cuenda ra Pablo yihí yu.” Tan inga ndo catyí ndo: “Cuenda ra Apolos yihí yu.” Yacan cuñi tsi catyí tyin javahá ndo tumaa javahá nyivi iyó ityi tsata.

⁵ Tyin zyóo ra cuví yuhu, ra Pablo? Tan zyóo ra cuví ra Apolos? tyin cañi tahan ndo tsaha ndi. ¿A ñavin musu Nyoo ñi cuví ndi? Juvin. Tan cahñ ndi tuhun Nyoo tsihin ndo tan natsinu iñi ndo tsi Jutu Mañi yo. Tyin tan iin tan iin ndi javahá ndi tyiñu tsa catyí maa Nyoo tyin javaha ndi. ⁶ Yuhu tatsi tuhun Nyoo añima ndo, tan ra Apolos tyosó. Maa

tyin Nyoo jacuahnu ra tuhun ra añima ndo. ⁷Tan yacan cuenda ndi ra tsa tatsí tan ndi ra tsa tyosó, nduve ra cuví ra. Maa tyin Nyoo cuví ra tandihí tyin maa ra jacuahnú tuhun ra añima yo. ⁸Ra tsa tatsí tan ra tsa tyosó, iin ñi ra cuví ra naha. Tan Nyoo cua tyahví tsi intuhun intuhun ra naha cuhva tyiñu jahá ra naha. ⁹Tan nyuhu, cuví ndi musu tan jahá tyiñu ndi tyiñu Nyoo. Tan nyooho cuví ndo tumaa ñuhu nu jahá tyiñu Nyoo.

Cuví tucu ndo tumaa iin vehe tsa javahá Nyoo. ¹⁰Tsahá Nyoo tsa vaha tsi yu tyin yuhu cuví yu tumaa iin ra cuví ityi nuu tsa samá vehe. Tyin tsaquín yu cuhva vehe can tan tyihí yu tsaha tsi tsitsi ñuhu. Tan inga ra tsa cua sama ityi siqui cuví ra jacuahá, tan cuñí tsi jahá ra cuenda nácaa jacuahá ra tuhun Nyoo. ¹¹Tan yofií can tyiñu inga cuhva tyin tsa canyíí cuhva can. Tan yacan cuví ra Jesucristo. ¹²Tan siqui cuhva can cuví sama ra jacuahá tsihin xuhun cuaan, tsihin xuhun cuitsin, tsihin yuu vaha. Tan cuví tucu javaha ra vehe tsihin yutun, tsihin vitsin, a tsihin tiyama. ¹³Maa tyin quivi nacuhva cuenda ra jacuahá tsa cuví tumaa ra samá can tyiñu can tsi ra Cristo, cua yaha tyiñu can nu ñuhu. Tan ñuhu can cua nducu cuhva tsi tyiñu javahá ra naha. ¹⁴Tan vehe tsa ña cua cayu, cua ndoo tsi. Tan ra tsa javahá vehe can cua naquihin ra yahví tsa taahán tsi tsi ra. ¹⁵Maa tyin tun ndihí tyiñu javahá ra naha cayu, nduve náa cua ñihi ra naha. Vasu cua cacu maa ra naha tumaa cacu iin ra tsa cuñí cayu tan tsinú ra nu cayú ñuhu.

¹⁶¿A ña tsitó ndo tyin vehe ñuhu Nyoo cuví ndo, tan iyó Tatyí Ii Nyoo tsitsi añima ndo? ¹⁷Tatun iin nyivií jativi vehe ñuhu ra, cua janaa ra tsi ñi, tyin vehe ñuhu ra, ii tsi. Tan vehe ñuhu can, cuví maa yo.

¹⁸Ndi intuhun ndo tan ña jandavi ñaha ndo tsi ndo. Tyin tatun cuñí ndo tyin tsitó xaan ndo tsihin tsa tsiñi tuñi tsa iyó nu ñuhu ñayivi ihya, cuñí tsi tsa jandusoho ndo tsi ndo tumaa ra tsa ña tsitó maa. Tacan tan Nyoo cua cuhva ca ra tsa tsiñi tuñi vaha tsi ndo. ¹⁹Tyin tsa tsiñi tuñi tsa iyó nu ñuhu ñayivi ihya nduve yahví nyaá can nu Nyoo. Tyin catyí tuhun Nyoo: “Janacavá ra tsi ra tsitó, juven ñi maa nu tsa nyitvi javahá ra.” ²⁰Tan catyí tucu tsi: “Jutu Mañi yo tsitó ra tyin tsa tsicá iñi ra tsitó, nduve yahví nyaá can.” ²¹Yacan cuenda ndi intuhun ndo tan ña taahán tsi cu iyo iñi ndo nyehé ndo tsi iin ra jacuahá tsi ndo tyin maa Nyoo tsahá tsi ra naha tsa jacuahá ra naha tuhun vaha tsi ndo tan tsahá ndihí ra tandihí tsa iyó tsi ndo. ²²Yuhu ra Pablo, ra Apolos, ra Pedro, maa Nyoo tsahá tsi ndi tsa cahan ndi tuhun ra tsihin ndo. Tan ñuhu ñayivi ihya, tan ñayivi iyó yo, tan tuhun tsihí, tan tsa cuví vityin, tan tsa cua cuví nu cuahán ca tsi, tandihí

maa tuhun ihya tsahá Nyoo tsi ndo. ²³Tan inga tucu tuhun tyin cuví ndo tsa tsií ra Cristo, tan ra Cristo, tsií Nyoo cuví ra.

4

Ña jacahnu yo tsi yo tan ndi tsi yañi yo

¹Yacan cuenda ña taahán tsi nyehé ndo tsi ndi tumaa nyehé ndo tsi ra Cristo, tyin musu ñi ra cuví ndi. Tyin tava tyiñu Nyoo tsi ndi tsa jacuahá ndi tuhun xeehe ra. ²Tan ra tsa tava tyiñu Nyoo cuñí tsi tsa tyaá yahví ra tandihí tsa caahán ra tsihin ra. ³Yacan ña ndihí iñi yu tsa caahán ndo tsi yu, o tatun cutuñi yu nuu ra cumí tyiñu. Tyin ndi maa yu tan ña caná iñi yu cahan yu tun vaha yu o ña vaha yu. ⁴Vasu ndi maa tuví iñi yu tyin nduve cuatyí yu, maa tyin ña cuñí tsi catyí tyin nduve cuatyí yu nuu Nyoo. Tyin maa Jutu Mañi yo cua catyí tun iyó cuatyí yu o nduve. ⁵Yacan cuenda, ña cahan ndo tsi yu. Cuatu ndo nda tahan maa tsi quitsi ra Cristo, tyin maa ra cua tava tsa yihí xeehe nu naa nu nditsin, tan cua jaquituvi ra tsa iyó añima intuhun intuhun yo. Tacan tan cua jacahnu Nyoo tsi intuhun intuhun yo cuhva tsa taahán tsi.

⁶Yañi, caahán yu tuhun ihya tsihin ndo tsa cuenda tsa vaha tsi maa ndo. Nyehé ndo cuhva iyó yu, tan cuhva iyó ra Apolos tyin ña cahnu jahá ndi tsi ndi. Tan tacan tucu maa ndo, nducu ndo cuhva javaha ndo tumaa catyí tuhun Nyoo, tan ña cuñí ndo tsi intuhun ñi nyivi. Inducu ñi cuñí ndo tsi tandihí nyivi. ⁷Ndi intuhun ndo tan ña cahnu ca ra cuví ndo tan ñavin ca inga ndo, tyin tsa iyó tsi ndo maa ñi maa tsa tsahá Nyoo cuví. Yacan cuenda ña taahán tsi tsa jacahnú ndo tsi ndo, tyin maa Nyoo tsahá can tsi ndo.

⁸Tan cuñí ndo tyin tsa tsitó maa ndo tandihí tuhun Nyoo, yacan nduve ca tsa cumañí tsi ndo. Tan cuñí tucu ndo tyin cuví ndo rey, tan ña tsiñí ñuhu ca nyuhu tsi ndo. Vaha xaan tun tsatyin nditsa tsa cuví ndo rey, tyin tacan tan rey cuví tucu nyuhu. ⁹Nyuhu tsa cuví ndi ra tsicá tyiñu ra Cristo, tumaa tsa nacoq Nyoo tsi ndi nda tsata ca, tan cuví ndi tumaa nyivi tsa taahán tsi cúu. Tan cuaha xaan nyivi tan ángel nyehé tsa taahán ndi. ¹⁰Nyivi tsicá iñi maa ñi tyin tsa cuenda ra Cristo tan ndusohó ndi. Tan nyooho iyo xaan cuñí ndo tsa caahán ñi tyin tsitó xaan ndo tuhun ra Cristo. Nyuhu nduve maa tunyee iñi iyó tsi ndi tan nyooho iyo xaan cuñí ndo tyin iyó tunyee iñi tsi ndo. Tun ndasi cuñí nyivi nyehé ñi tsi nyuhu, jaha xaan ca ñi tsa ñayivi tsi nyooho. ¹¹Nda cuenda vityin nyehé ndi tundoho; tsisocó ndi, tan na ityi iñi ndi, cumañí jahma ndi, nduve vehe ndi iyó, tan nyivi jacuu ñi tsa uhvi tsi ndi. ¹²Tan tsitatú ndi tsa jahá tyiñu

ndi tsihin ndaha ndi. Caahán nyivi tsi ndi, maa tyin nacahán ndi tsihin tsa vaha nu caahán ñi tsi ndi. Nyaá ndaha ñi tsi ndi, maa tyin cunyeé iñi ndi. ¹³ Caahán ñi ndavaha ñi tsi ndi, maa tyin ña nduxaan ndi, tan vii vii ñi tsahá cuenda ndi tsi ñi. Cuví ndi tsahan tsa ña tsiñi ñuhu ca jahá ñi nda cuenda vityin ihya.

¹⁴ Tyaá yu tuhun ihya tsa cuenda ndo, maa tyin ñavin tsa cuñi yu cuhva yu ticanuu tsi ndo. Tyin tsahá cuenda vaha yu tsi ndo tsa cuenda tsa cuñi yu tsi ndo tyin cuví ndo tumaa sehe yu. ¹⁵ Vasu ndi maa utsi mil ra jacuahá tuhun ra Cristo tsi ndo, maa tyin intuhun ñi jutu ndo iyó. Tan yuhu cuví jutu ndo tyin juvin yu cahán tuhun ra Cristo Jesús tsihin ndo nda jihna ñi tan natsinü iñi ndo tsi ra. ¹⁶ Tan tsa cuenda tsehe tsicán yu tsi ndo tsa javaha ndo tumaa javahá maa yu.

¹⁷ Yacan cuenda jaquitsí yu tsi ra Timoteo, sehe yu cuenda Jutu Mañi yo, nu yucú ndo. Nii xaan iñi ra nyicún ra tsi Nyoo, tan cuñi xaan yu tsi ra. Maa ra cua janducuhun iñi tsi ndo cuhva iyó yu tsihin ra Cristo tan cuhva jacuahá yu tandihí ñi vehe ñuhu nu cuahán yu. ¹⁸ Yihí ndo cahnu jahá ndo tsi ndo tyin cuñi maa ndo tyin ña cua quitsi ca yu nu yucú ndo. ¹⁹ Maa tyin tun Jutu Mañi yo tan cuñi ra, yatyi cua quitsi nyehe yu nu yucú ndo. Tacan tan cua nyehe yu tatun nditsa tsa iyó tunyee iñi Nyoo tsi ra tsa cahnu xaan jahá tsi naha ra, o tatun caahán ñi maa ra naha. ²⁰ Tyin tun nditsa tsa tsahá ra naha tsa cundaca ñaha Nyoo tsi ra naha, ña cua cahán ñi ra naha. Maa tyin cua tuvi iñi yo tyin nditsa iyó tunyee iñi Nyoo tsi ra naha. ²¹ ¿Náa cuñi ndo javaha yu tsa quitsi yu? ¿A cuñi ndo tsa cuxaan yu tsi ndo, o cuñi ndo tsa cahan vii yu tsihin ndo?

5

Nu tavá tyiñu ra Pablo tyin cutuñi iin ra tsicoo tsihin sihi quiin

¹ Nihí tuhun yu tyin iin ra nyii tsihin ndo iyó ra tsihin sihi quiin ra. Tan yacan cuví cuatyí cahnu xaan, tyin ndi nyivi iyó ityi tsata tan ña javahá ñi tacan tyin tsitó ñi tyin ña vaha. ² Taahán tsi cuihyá cuñi ndo tsa cuenda cuatyí can tan ña nduyaa ndo. Tava ndo tsi ra tsa javahá tacan nu yucú ndo. Tan ña cutahan ca ra tsihin ndo. ³⁻⁴ Vasu nduve yu nyii tsihin ndo, maa tyin tumaa tsa nyii ñi yu tsihin ndo tyin ñuhú iñi yu tsi ndo, tan tsihin sivi Jutu Mañi yo Jesucristo jandaa yu tyiñu ra tsa javahá cuatyí can. Yacan cuñi tsi tsa ndu iin ndo. Tan jaha ndo tuhun tyin nyii yu tsihin ndo. Tan cunyaa tunyee iñi Jutu Mañi yo Jesús tsihin ndo. ⁵ Tacan tan cuhva ndo tsa javaha nu ña vaha tsa cuñi maa nu tsihin cuñu ñuhu ra tsa javahá

tsa caquiñi ihya, tyin vasiqui tacan tan cua jandihí ra tsa javahá ra can. Tacan tan quivi quitsi Jutu Mañi yo Jesucristo cacu añima ra.

⁶ Ña vaha tsa jacahnu xaan ndo tsi ndo tyin ña jahá ndo cuenda tsa javahá ra yucú vehe ñuhu ndo. ¿A ña tsitó ndo tyin vasu luxu ñi yutsan iya, jandaá tsi tandihí yutsan paan? Tan tacan ñi cuñi yo cuví tucu yacan. ⁷ Tava ndo yutsan iya tsahnu tsa jativi tsi ndo. Tacan tan cuví ndo tumaa paan tsa tuhvá nyivi javahá vico pascua, tyin paan can nduve yutsan iya yihí tsihin tsi. Tsa nditsa tyin tacan taahán tsi cuví tucu nyooho tyin maa ra Cristo cuví mbee ticatyí luhlu tsa tsihi tsa cuenda cuatyí yo. ⁸ Yacan cuenda taahán tsi catsi coo yo tyin tsihi ra Cristo tsa cuenda yo. Tan jandoo yo tsa caquiñi tsa javahá yo ityi tsata tsa cuví tumaa yutsan iya tsahnu. Tan cahan yo maa ñi maa tsa nditsa tsihin tsa nii iñi yo tyin cuví tsi tumaa paan tsa nduve yutsan iya yihí.

⁹ Nu inga carta tsa jaquitsí yu tsi ndo, catyi yu tyin ña taahán tsi cunyanaa ndo tsi ra tsicá nuu tsihin ñaha. ¹⁰ Tan tsa caahán yu tyeheh tsihin ndo, ñavin tsa cunu ndo nu nyivi tsa iyó ityi tsata, ñi tsa iyó tsihin rayii a ñaha, ñi tsa nyiyó iñi, ñi suhú, tan ñi jacahnú tsitoho, tyin tun cunu ndo nu iyó ñi ihya, cuñi tsi tsa quita ndihí ndo nu ñuhu ñayivi ihya. ¹¹ Maa tyin tsa cuñi yu catyi yu tsihin ndo ña cunyaa naa ndo tsi nyivi tsa catyi: “Hermano cuví yu”, tan tsicá nuu ra tsihin ñaha, o ñaha tsicá nuu ña tsihin rayii, o nyiyó iñi ñi, o jacahnú ñi tsitoho, o caahán ñi cuendu, o tsihi ñi nyixi, o suhú ñi. Ñi tsa javahá iin tsa ña vaha ihya, ndi ña cunyecú ndo catsi ndo tsihin ñi. ¹²⁻¹³ Tyin yoo ña taahán tsi tatsi tuñi yo tsi nyivi ña tsitó tsi Nyoo. Nyoo cuví ra cua tatsi tuñi tsi ñi can. Maa tyin nyooho cuñi tsi tatsi tuñi ndo tsi nyivi yihí cuenda Nyoo. Yacan cuenda tavá ndo tsi ra iyó cuatyí nu yucú ndo.

6

Ña cua ndacan yo cuatyí tsaha iin yañi yo cuenda Nyoo nuu ra cumí tyiñu

¹ ¿Nacuenda tyin tsicán ndo cuatyí tsaha yañi ndo nuu ra cumí tyiñu tsa ña yihí cuenda Nyoo tsihin ndo, tan ña jacoto ndo tsi ra yihí cuenda Nyoo, tan nyehe maa ra naha ndaa ra iyó cuatyí? ² ¿A ña tsitó ndo tyin juvin ñi maa yo cua jandaa cuatyí tandihí nyivi iyó nu ñuhu ñayivi ihya nu cuahán ca tsi? Tan tatun maa yo cua jandaa cuatyí can, ¿nacuvi tyin ña cuví jandaa ndo cuatyí nyihi ihya? ³ ¿A ña tsitó ndo tyin cua jandaa yo cuatyí nda cuenda ángel? Tun tacan, ¿a yii jandaa yo cuatyí nyihi tsa iyó nu ñuhu ñayivi? ¿Ña yii jandaa

yo can! ⁴ Yacan cuenda tatun iyó tsihi nu yucú ndo, ¿nacuenda tyin cuahán ndo nuu ra cumi tyiñu tsa ña yihí tuhun Nyoo? ⁵ Caahán yu tyehen tsihin ndo na nducahan nuu ndo. ¿A nduve cuii vasu intuhun ra jandaa cuyati yañi ndo nu yucú ndo? ⁶ Tyin cuahán ndo cua ndacan ndo cuyati tsaha yañi ndo cuenda Nyoo nuu iin ra cumi tyiñu tsa ña tsinú iñi tsi Nyoo.

⁷ Ña vaha tsa iyó tsihi nu yucú ndo. Vaha taxin ca cunyeet iñi ndo tatun javaha nyivi tsa ña vaha tsi ndo. Tan jaña ndo na suhu maa ñi tsa tsii ndo. ⁸ ¡Maa tyin nyooho javahá ndo tsa ña vaha tan suhú ndo nda cuanda tsa tsii yañi ndo!

⁹⁻¹⁰ ¿A ña tsitó ndo tyin nyivi quiñi iyó ña cua quihvi ñi nu ndacá ñaha Nyoo? Ña jandavi ñaha ndo tsi ndo. Ña cua quihvi ra tsa tsicá nuu tsihin ñaha o ñaha tsa tsicá nuu tsihin rayii, ndi ñi jacahnú tsitoho, ndi ra iyó ñasihi tan iyó inga ñaha tsi ra, tacan tucu ñiñaha tsa iyó yii tan iyó inga rayii tsi ñi, ndi ra ndusihi, ndi ñi nduyii, ndi ñi suhú, ndi ñi nyiyó iñi, ndi ñi caahán cuendu, ndi ñi tuhva tsihi nyixi, tan ndi ñi tsit; o jandavi ñaha. Tandihí maa nyivi ihya ña cua ñihi ñi nu ndacá ñaha Nyoo cuhun ñi. ¹¹ Tyin tacan javahá juhva nyooho. Maa tyin tsa ndatsi cuyati ndo tan ndu iñi ndo tan nduvahá ndo nuu Nyoo jahá Jutu Mañi yo Jesucristo tan Tatyí li Nyoo.

Cuñu ñuhu yo cuví vehe ñuhu Nyoo

¹² Cattyí tsi tyin nuña maa javaha yo tandihí náa cuñi maa yo. Tan nditsa tucu maa, maa tyin ña tandihí tan vaha. Cuví javaha yo náa cuñi maa yo, maa tyin cuñi tsi jaha yo cuenda tun vaha a ña vaha, tan ña cuhva yo tsa cundaca ñaha can tsi yo. ¹³ Cattyí nyivi tyin Nyoo javahá ra tsa tsatsi yo tsa cuenda tsitsi yo. Tan javahá ra tsitsi yo tsa cuenda tsa tsatsi yo. Tan nditsa. Maa tyin Nyoo cua janaa ra nduvi tsehe quivi cua naa ñayivi. Tan tsa cuenda cuñu ñuhu yo ña nditsa tsa javahá ra itsi tyin coo yo tsihin ñaha a tsihin rayii, tyin cuenda Jutu Mañi yo cuví cuñu ñuhu yo. Tan maa Jutu Mañi yo cuví ra cuenda cuñu ñuhu yo. ¹⁴ Tan Nyoo cua janandoto ra tsi yo tsihin tunyee iñi ra tumaa tsa janandoto ra tsi ra Cristo Jesús.

¹⁵ ¿A ña tsitó ndo tyin tandihí yoo tsa yihí cuenda ra Cristo cuví yo intuhun ña cuñu ñuhu tsihin ra tan luxu luxu cuñu ñuhu ra cuví tsa intuhun intuhun yo? ¿A cuví quihin yo luxu cuñu ñuhu ra Cristo tan jativí yu tsihin iin ñaha tsicá nuu? Ña taahán tsi javaha yu tacan. ¹⁶ ¿A ña tsitó ndo tyin tun iin rayii tan iyó ra tsihin iin ñaha tsicá nuu intuhun ña cuñu ñuhu nanduví ra tsihin ña? Tyin nu tutu Nyoo cattyí tsi tyehen: “Tsa nduvi ñi, iin ña nyivi cuví ñi.” ¹⁷ Maa tyin

tatun iin nyivi tan nacuhva ñi añima ñi tsi Jutu Mañi yo, iin ñi cuví ñi tsihin ra tyin quihvi Tatyí li ra añima ñi.

¹⁸ Jandihí ndo tsa iyó ndo tsihin ñaha a tsihin rayii tun ñavin ñasihi ndo a ñavin yii ndo cuví. Tyin tandihí inga nu cuyati tsa javahá nyivi ña jativí can cuñu ñuhu ñi. Maa tyin tsa tsicá nuu ñi tsihin ñaha a tsihin rayii, jativí can cuñu ñuhu ñi. ¹⁹ ¿A ña tsitó ndo tyin cuñu ñuhu yo cuví vehe ñuhu Tatyí li tsa tsahá Nyoo, tyin coo tsihin yo? Ñavin maa yo ndacá ñaha tsi yo; Nyoo cuví ra ndacá ñaha tsi yo. ²⁰ Tyin Nyoo yahvi xaan jatá ra tsi yo. Yacan cuenda taahán tsi jacahnú yo tsi ra tsihin cuñu ñuhu yo, tan tacan tucu ñi tsihin tsa tsiñi tuñi iñi yo tyin nduvi taahan tuhun ihya tsi maa Nyoo cuví.

7

Nu tsahá cuenda ra Pablo nácaa taahán tsi coo nyivi tindahá

¹ Tan vityin cua cahan yu tsa tsicá tuhun ndo tsi yu nu carta tsa jaquitsi ndo tsi yo. Nditsa tyin vaha tsa ña tindaha yo. ² Maa tyin cuaha xaan ra naha tsicá nuu ra naha tsihin ñaha, o ñiñaha tsicá nuu ñi tsihin rayii. Yacan cuenda cuñi tsi tsa coo ñasihi tsa intuhun intuhun ra naha, tacan tucu ñiñaha taahán tsi coo yii tsa intuhun intuhun ñi. ³ Na javaha rayii cuhva taahán tsi tsihin ñasihi ra. Tan tacan tucu maa ñaha, na javaha ña cuhva taahán tsi tsihin yii ña. ⁴ Ñiñaha ña cuví cundaca ñaha ñi maa ña cuñu ñuhu ña, tyin tsii yii ña cuví cuñu ñuhu ña. Tacan tucu maa yii ña, ña cuví cundaca ñaha ñi maa ra cuñu ñuhu ra tyin tsii ñasihi ra cuví cuñu ñuhu ra. ⁵ Ña vaha tun ña cuhva iin ndo tsi ndo tsi inga ndo. Tatun cuñi ndo coo ndo oración, vaha ca natuhun tahan jihna ndo tyin ña cua coo tsihin tahan ndo quivi tsa cua nanduco ndo tsi Nyoo. Yaha can tan coo tsihin tahan nyico ndo tyin coto nducu rayii inga ñaha o ñaha nducu ña inga rayii tan javaha ndo tsa ña vaha jaha nu ña vaha.

⁶ Tsa caahán yu tyehen tsihin ndo ñavin tsa caahán yu tyin tindaha ndo. Ña jañiñi yu tsi ndo tsa tindaha ndo. Maa tyin cuví tindaha ndo tatun cuñi ndo. ⁷ Tsa cuenda yuhu, vaha ca coo ndo tumaa iyó maa yu. Maa tyin siin siin tunyee iñi tsahá Nyoo tsi tsa intuhun intuhun yo. Yihí yo tsahá ra tunyee iñi tsa ña coo ñasihi yo. Tan yihí yo tsahá ra tunyee iñi tsa coo ñasihi yo.

⁸ Tsahá cuenda yu tuhun ihya tsi tandihí nyooho tsa ñaha ca tindaha tan nyooho ñi tsihi yii tyin vaha ca cuví tsi ndo tun ña tindaha ndo tumaa maa yu. ⁹ Maa tyin tatun ña cunyeet iñi ndo coo tacan ñi ndo, vaha ca

tsa tindaha ndo tan ñavin ca tsa ndoo ndo tsihin tsa cuñi ndo tindaha ndo.

¹⁰ Maa tyin caahán yu tsehe tsihin nyooho ñiñaha tsa tsa tindaha: ña nacoo ndo yíi ndo tyin tuhun caahán yu ihya, ñavin tsa cuñi maa yu cuví, tyin maa Jutu Mañi yo tsahá itsi tyin cuhva cuenda yu tsi ndo. ¹¹ Maa tyin tatun iin ñaha tan nacoo ña yíi ña, cuñi tsi tsa ndoo ña cunyaa ña tsa ña cua tindaha ca ña, o cunuhu nyico ña tsihin yíi ña. Tan tacan tucu rayíi, ña taahán tsi nacoo ra ñasihi ra.

¹² Tan cuñi yu cahan yu inga tuhun ihya tsihin inga ndo, maa tyin ñavin Nyoo tsahá itsi. Tatun iin ra hermano tan ña tsinú iñi ñasihi ra tsi Nyoo, maa tyin ndoo ña vaha tsa cunyaa ña tsihin ra, nduve ndatu tsa nacoo ra tsi ña. ¹³ Tan tatun iin ña hermana, tan ña tsinú iñi yíi ña tsi Nyoo, ndoo ra vaha tsa cunyaa ra tsihin ña, nduve ndatu tsa nacoo ña tsi ra. ¹⁴ Tyin tsa yahá nasoco Nyoo tsi rayíi tsa ña tsinú iñi can tsa cuenda tsa iin ñi rayíi ra tsihin ñaha tsa tsinú iñi. Tan tsa yahá nasoco tucu Nyoo tsi ñaha tsa ña tsinú iñi tsi Nyoo tsa cuenda tsa iin ñi cuví ña tsihin ra tsinú iñi. Yacan cuenda sehe ñi ña cuví tsi naha tsi tumaa cuví sehe nyivi tsa ña tsinú iñi tsi Nyoo, tyin tsa nasoco ndíhi Nyoo itsi naha tsi. ¹⁵ Maa tyin tatun rayíi an ñaha tsa ña tsinú iñi tsi Nyoo, tan cuñi ñi nacoo ñi tsi tahan ñi tsa tsinú iñi tsi Nyoo, na nacoo maa ñi. Tacan tan ra hermano a ña hermana ndoo nuña ñi. Tyin maa Nyoo cuñi tsa coo vaha yu tsihin tsa nduve tsihi.

¹⁶ Tyin ña tsitó iin ñaha tatun cacu yíi ña. Tan ndí rayíi ña tsitó ra tatun cacu ñasihi ra.

¹⁷ Tan catyí yu tsihin ndo coo ndo tsihin ndatu tsa tsahá Jutu Mañi yo tsi ndo tan cuhva iyó ndo quívi caná ra tsi ndo. Tan tsehe cuví tsa jacuahá yu tandíhi vehe ñuhu tan iin tan iin ñuu. ¹⁸ Tatun tsa yaha tsinyaa tuñi Nyoo cuñu ñuhu ndo tan caná Nyoo tsi ndo ña çaça iñi ndo tsa cuenda yacan. Maa tyin tun ña tyaa ñi tuñi can tsi ndo, tan caná Nyoo tsi ndo, nduve cuenda; ña javaha ca ndo can. ¹⁹ Ña ñiñi xaan tsa coo tuñi can tsi yo, o tsa ña coo tsi. Tyin tsa ñiñi ca, cuví tsa tyaa yahvi yo tuhun caahán Nyoo. ²⁰ Tan intuhun intuhun ndo taahán tsi jahá tyiñu ndo juvin ñi tyiñu tsa tuhvá ndo javahá quívi tsa caná Nyoo tsi ndo. ²¹ Tyin tatun musu cuví ndo quívi tsa caná Nyoo tsi ndo, ña çaça iñi ndo. Maa tyin tatun tsahá tsi cuhva tsa ndoo nuña ndo, nducu ndo cuhva.

²² Iin ra tsa cuví musu tan quihví ra cuenda Jutu Mañi yo iyó nuña ra nuu ra vityin. Tan iin ra tsa iyó nuña tan quihví ra cuenda Jutu Mañi yo, vityin cuví ra musu tsa cuenda ra. ²³ Nyoo yahvi xaan jatá ra tsi yo, yacan cuenda ña taahán tsi cuhva yo tsa cundaca ñaha ra ñuu ñayivi naha ra tsi yo. ²⁴ Tan catyí yu tsihin ndo, yañi, jahá tyiñu ndo tyiñu tsa tuhvá ndo javahá quívi caná Nyoo tsi ndo.

²⁵ Tan tsa cuenda nyivi tsa ñaha ca tindaha, nduve tuhun tsahá Jutu Mañi yo tsi yu tsa cuenda ñi. Maa tyin cua cahan yu cuhva tsa tsicá iñi maa yu tsihin ñi. Tan cuví cuita iñi ñi tuhun caahán yu tyin Nyoo tsahá ra tucahnu iñi tsi yu tan maa ra yíhi ndaha tsi yo. ²⁶ Tsa cuenda yuhu, vaha ca ña tindaha ñi can, tyin vityin cuaha xaan tundoho ñayivi iyó. ²⁷ Maa tyin tatun tsa iyó ñasihi ndo, ña nducu ndo cuhva tsa nacoo ndo tsi ñi. O tatun nduve ñasihi ndo iyó, vaha ca ña tindaha ndo. ²⁸ Maa tyin tatun tindaha ndo, ñavin cuatyí cuví. Tan tacan tucu tun tindaha iin ñaha yoco juvin ñi ñavin cuatyí cuví. Maa tyin nyivi tsa tindaha cuaha xaan tundoho cua nyehe ñi ñayivi ihya. Tan yacan cuenda catyí yu tsihin ndo tyin vaha ca tsa ña tindaha ndo. Tyin ña cuñi yu tsa nyehe ndo tundoho.

²⁹ Yañi, cuñi yu cahan yu tuhun ihya tsihin ndo: Juhva cuii ña quívi iyó yo. Yacan vityin tan ityi nuu tandíhi ra tsa iyó ñasihi cuñi tsi tsa jaha tyiñu ra naha tyiñu Nyoo tumaa tsa nduve ñi ñasihi ra naha iyó. ³⁰ Tan nyooho tsa iyó tucuihya iñi, ña tyaa yahvi ndo tucuihya iñi can. Tan nyooho tsa si cuñi, ña tyaa yahvi ndo tusi iñi can. Tan nyooho tsa jatá ndaha tyiñu taahán tsi coo ndo tumaa tsa nduve ndaha tyiñu ndo. ³¹ Tan nyooho tsa iyó vaha nu ñuhu ñayivi ihya, coo ndo tumaa tsa nduve ñi tsa iyó tsi ndo, tyin tsa cua ndíhi ñuhu ñayivi ihya.

³² Cuñi yu tyin nyooho ña caca xaan iñi ndo tuhun tsa iyó nu ñuhu ñayivi ihya; iin ñi maa tuhun Nyoo caca iñi ndo. Iin ra yoco tsa ñaha ca tindaha tsicá iñi ra nácaa javaha ra cuhva cuñi maa Jutu Mañi yo. ³³ Maa tyin tatun tsa tindaha ra, tsicá iñi ra nácaa coo vaha ra nu ñuhu ñayivi ihya cuhva taahán iñi ñasihi ra. ³⁴ Tan tacan tucu ñiñaha, siñ siñ cuhva iyó ñi, tyin ñaha tsa ñaha ca tindaha, maa ñi tuhun Jutu Mañi yo tsicá iñi ña. Tan nducú ña cuhva jacahnu ña tsi Nyoo tsihin cuñu ñuhu ña, tan tsihin tsa ñi iñi añima ña. Maa tyin ñaha tsa iyó yíi, maa ñi cuhva coo vaha ña tsihin yíi ña nducú ña.

³⁵ Caahán yu tuhun ihya tsihin ndo tsa cuenda tsa vaha tsi maa ndo, ñavin tsa jañiñi yu tsi ndo. Maa tyin coo ndo iin ñayivi cuiti tsihin tsa nduve tsa jatyañi tsi ndo. Tan javaha ndo iin ñi tyiñu Nyoo.

³⁶ Maa tyin ndáa nyooho tsicá iñi tyin vaha tsa tindaha sehe ndo tyin tsa cua yaha cuiya tsi; vaha maa, na tindaha maa tsi tun cuñi tsi; ñavin cuatyí cuví can. ³⁷ Maa tyin ndáa nyooho tsicá iñi tyin ña cua tindaha sehe ndo, tan tacan tucu tsicá iñi maa tsi, vaha maa. ³⁸ Ñi tsa cuñi tindaha sehe ñi, vaha javahá ñi. Tan ñi tsa ña cuñi tindaha sehe ñi, vaha ca javahá ñi.

³⁹ Maa tyin ley Nyoo catyí tsi na cundacá ñaha rayí tsi ñasíhi ra tsitsi tsa ndi iyó ra. Tatun tsa tsihí ra, tacan tan cuví ndoo nuña ña tan tindaha ña yóo tsihin cuñí maa ña. Maa tyin tun cua tindaha ña, na tindaha ña tsihin ra yihí tuhun Nyoo. ⁴⁰ Maa tyin síi xaan ca cua cuví tsi ña tun ña tindaha ña inga tsaha. Tsehe cuví tsa tsicá ñi maa yu. Tan cuñí yu tyin maa Tatyí li Nyoo, tsaha tuhun ihya tsi yu, tan tsahá cuenda yu tsi ndo.

8

Nu jacuahá ra Pablo tyin ña vaha janacava yo tsi nyivi nu cuatyí

¹ Tan vityin cua cahan yu tsihin ndo cuenda nyayu tsa jamañi nyivi nu tsitoho. Tandihí yo tan cuñí yo tyin tsitó yo tun vaha o ña vaha catsi yo nyayu can. Tan tsa cuenda tsa tsitó xaan yo, iyo xaan cuñí yo tan nduyaá yo tsihin can. Tan ndi nduve nu jatinyee can tsi yo. Maa tyin tsa cuñí tahan yo tsi yo jacuahnú tsi tsi yo tsihin Nyoo. ² Ra tsa cuñí tyin tsitó xaan ra, nduve náa tsitó ra. ³ Maa tyin Nyoo tsitó ra ndáa nyivi cuñí tsi ra tsihin tsa nui ñi añima ñi.

⁴ Tan vityin tsa cuenda tsa catsi yo nyayu tsa iyó vico tsitoho: tsa tsitó vaha yo tyin tsitoho nduve maa yahvi nyaá can, tyin intuhun ñi maa Nyoo iyó. ⁵ Vasu ndi maa juhva nyivi catyí ñi tyin iyó cuaaha nyoo tsa ndacá ñaha nu ñuhu ñayivi ihya tan andivi, ⁶ maa tyin tsa cuenda yoo, intuhun ñi Nyoo Jutu yo iyó. Tan juven ra javahá tandihí cuíi maa tsa iyó. Tan yoo iyó yo tsa cuenda ra. Tan iyó tucu intuhun ñi Jutu Mañi yo Jesucristo. Tan maa ra javahá tandihí maa tsa iyó, nda cuanda tsi maa yo.

⁷ Maa tyin yihí juhva ñi yihí cuenda Nyoo ña tsitó ñi tyin intuhun ñi Nyoo iyó. Tyin ndi tsicá ñi ñi tyin nyito tsitoho can. Tan cuñí ñi tyin nyayu, tsa jamañi nyivi tsi tsitoho can, ica tsi. Tan cuñí ñi tyin tun catsi ñi nyayu can cua coo cuatyí ñi nu Nyoo. ⁸ Maa tyin Nyoo nduve cuenda ra tatun catsi yo, a ña catsi yo. Ñavin tsa tsatsí yo can tan ña vaha ca yo nuu ra, tan ñavin tsa cuenda tsa ña tsatsí yo tan vaha ca yo. ⁹ Maa tyin nyooho tsa tsitó tyin nduve cuatyí tsa catsi yo nyayu tsa jamañi nyivi nuu tsitoho, jaha ndo cuenda coto janacava ndo tsi ñi tsa ndi quihvi tuhun Nyoo nu cuatyí, tyin ñi ican tsicá ñi ñi tyin tun catsi ñi tsa jamañi nyivi nu tsitoho, cua coo cuatyí ñi nuu Nyoo. ¹⁰ Tyin tatun yooho tsa tsitó un tuhun ihya, tan cunyya un catsi un tsa iyó vehe tsitoho, tan iin ra yañi yo tsa ndi quihvi cuenda Nyoo tan nyehe ra tyin tsatsí un tsa jamañi nyivi nu tsitoho, cua cuñí ndihí ra catsi ra. ¹¹ Tan cua tiví añima ra tyin cuñí maa ra tyin tsicoo cuatyí ra. Tan ra ican tsihí ra Cristo tsa

cuenda ra. Tan yooho tsa tsitó un, síqui un cua cahun cuatyí can. ¹² Tyin tun janacava yo tsi yañi yo tsa ndi quihvi cuenda Nyoo, tsicoo cuatyí yo nuu ra Cristo. ¹³ Yacan cuenda tatun janacava yu tsi iin yañi yo nuu cuatyí tsihin tsa tsatsí yu nyayu, vaha ca tsa ña cua catsi ca yu nyayu ndi sava ca quivi, tyin ña cuñí yu tsa janacava yu tsi yañi yo nuu cuatyí.

9

Tsa taahán tsi javahá iin ra tava tyiñu ra Jesucristo

¹ Nditsa tsa cuví yu iin ra tava tyiñu ra Jesucristo. Tan yoñi nyivi ndacá ñaha tsi yu tyin nyehe yu tsi ra Jesús Jutu Mañi yo. Tan juven ñi maa ndo cuví tsandaa tsa cuenda tyiñu javahá yu, tyin tsinú ña ndo tuhun ra tsa jacoto yu tsi ndo. ² Vasu yihí nyivi ña tsinú ñi ñi tyin ra Jesucristo tava tyiñu tsi yu, maa tyin nyooho taahán tsi tsinu ñi ndo, tyin juven yu cahan tuhun ra tsihin ndo tan natsinú ñi ndo tsi ra. Yacan cuenda juven ndo cuví tsandaa.

³ Tyehen cuví tsa cua cahan yu tsihin nyivi tsa caahán nyaat tsi yu. ⁴ Iyó ndatu tsa quihín yu tandihí tsa tsahá ñi catsi yu tan tsa tsahá ñi coho yu. ⁵ Tan iyó tucu ndatu tsa tindaha yu tsihin iin ñaha yihí cuenda ra Cristo tumaa javahá yañi ra Jesús, tan ra Pedro, tan tandihí ca ra tava tyiñu ra Jesucristo. ⁶ ¿O tsicá ñi ndo tyin yuhu ñi tan ra Bernabé ñi taahán tsi jaha tyiñu ndi tsihin ndaha ndi tan jata ndi tsa tsiní ñuhu tsi ndi? ¿A ña taahán tsi nacoo ndi tyiñu can tan cahan ndi maa ñi tuhun Nyoo? ⁷ Ra tsa cuví andaru iyó yahví ra naha. Tan ra tsa tatsí yava nducuaa tsatsí ra tucuaa tsa queé nu nducuaa ra. Tan ra tsa jahá cuenda indiqui tsihí ra letsí ti. ⁸ Tan ña cuñi ndo tyin tuhun ihya tsa tsiní tuñi jiñi maa yu cuví, tyin nu ley Nyoo tsa tyaá ra Moisés catyí tsi tyehen: ⁹ “Ra tsa tatsí trigu ña taahán tsi tyihí ra yoho yuhu indiqui tsa janduvahá trigu can, tyin taahán maa tsi catsi ti juhva trigu nu jahá tyiñu ti.” Nditsa tyin Nyoo ña cahan ra tyehen tsa cuenda indiqui ñi. ¹⁰ Maa tyin na cutuñi ñi yo tyin tumaa ra tahví ñuhu tan ra tatsí, nyita ñi ra naha tyin cua naquihin ra naha tsa cua quee nuu tsa tatsí ra naha. ¹¹ Tan tacan cuví tucu nyuhu, quítsi cahan ndi tuhun Nyoo tsihin ndo, tumaa tsa quítsi tatsí ndi tsiti tsitsi añima ndo cuví can. Tan taahán tsi tsa jatinyee ndo tsi ndi tsa cuenda tsa jacotó ndi tuhun Nyoo tsi ndo. ¹² Tatun jatinyee ndo tsi inga ra tsa ña quítsi tyihí tuhun Nyoo nu yucú ndo, taahán tsi tsa cuaaha ca jatinyee ndo tsi nyuhu, tyin nyuhu tyihí tuhun Nyoo nu yucú ndo.

Maa tyin ña caahán ndi, tan cunyeé iñi ndi tandihi. Ña tsicán ndi tsa tsiñi ñuhu tsi ndi tsi ndo tyin coto jandihí ndo tsa tyaa yahví ndo tuhun ra Cristo tsa jacuahá ndi. ¹³ Tsitó ndo tyin ra jahá tyiñu vehe ñuhu nyivi Israel, iyó ra naha tsihin tsa iyó vehe ñuhu can. Tyin taahán tsi tavá siin ra naha juhva cuñu quiti tyin catsi ra naha. Tan tandihi ca cuñu can cua cahmi ra naha tumaa catyí maa Nyoo tsihin ra naha. ¹⁴ Tan juvin ñi tacan caahán Jutu Mañi yo, tyin taahán tsi jatyinyee ñi yihí cuenda Nyoo tsi ra caahán tuhun Nyoo tsihin ñi. ¹⁵ Maa tyin yuhu, ndi iin tsaha tan ñaha ca ndacan yu tsa taahán tsi tsi yu. Tan ndi ña tyaá yu tuhun ihya tyin cuñi yu tsa cuhva ndo tsa cuhva ndo tsi yu. Vaha taxin ca nacúu maa yu jaha soco tan ñavin ca tsa ndihí tsa sií cuñi yu caahán yu tuhun ra Cristo tsihin ndo vasu ndi maa nduve náa jatyinyee ndo tsi yu.

¹⁶ Ña cuví nduyaa yu tsihin tsa caahán yu tuhun Nyoo tyin maa ra Cristo tavá tyiñu tsi yu tsa cahan yu tuhun ra. Maa tyin ndahví yu tun ña cahan yu tuhun Nyoo ihya. ¹⁷ Yacan cuenda tatun cahan yu tsihin tsa ñi iñi yu, cua ñihí yu yahví yu. Vasu ña cuñi yu cahan yu, tsa ñiñi cuñi tsi cahan yu, tyin tyiñu tsahá maa Nyoo tsi yu cuví tsi. ¹⁸ Tan tsa sií cuñi yu caahán yu tuhun ra Cristo yacan cuví yahví yu. Tan ña tsicán yu tsa taahán tsi tsi yu tsa cuenda tsa caahán yu tuhun ra.

¹⁹ Vasu ñavin musu cuví yu, maa tyin nanduví yu musu tandihi nyivi tyin tacan tan cuví jaha canaa yu cuaha ca nyivi cuenda ra Cristo. ²⁰ Tatun nyii yu nu yucú ra Israel naha ra, nanduví yu tumaa maa ra naha tyin ra can naha ra iyó ra naha cuhva catyí ley Nyoo tsa tyaá ra Moisés. Tan tsa cuñi yu jaha canaa yu tsi ra naha cuenda ra Cristo, javahá yu tsa catyí ley vasu ndi maa ña ñiñi tsa javaha yu tan cacu yu. ²¹ Maa tyin tatun cuñi yu jaha canaa yu tsi nyivi tsa ña nyitá iñi ley ra Moisés, javahá yu tumaa javahá ñi, tyin tacan tan cuví jaha canaa yu tsi ñi. Tan tsa javahá yu cuhva javahá ñi, ña cuñi tsi catyí tyin ña tyaá yahví yu ley Nyoo tyin tyaá yahví yu ley ra Cristo. ²² Tatun nyii yu tsihin ra tsa ñaha ca coo vaha tunyee iñi Nyoo tsihin, nanduví yu tumaa maa ra naha, tyin tacan tan cuví cahan yu tuhun Nyoo tsihin ra naha, tan ndunyee ca iñi ra naha tsihin tunyee iñi Nyoo. Nanduví yu tumaa iyó intuhun intuhun nyivi, tyin tacan tan tyaá soho ñi tuhun Nyoo tsa caahán yu tsihin ñi tan cacu ñi. ²³ Javahá yu tacan tyin tacan tan cacu nyivi tan nasoco ndihí tucu maa Nyoo tsi yu.

²⁴ Tsitó ndo tyin tatun cua cunu suuhva nyivi, tandihi ñi tsinú, maa tyin intuhun ñi ñi jaha canaa. Tacan tucu maa yo, cuñi tsi tsa

ñihí cunyicun yo tsi Nyoo tyin tacan tan cuví jaha canaa yo tsa vaha ca tsa tsahá ra tsi yo. ²⁵ Tandihí nyivi tsa tsinú suuhva, nacoó ñi tandihí tsa jatyañú tsi ñi tyin cuñi ñi jahá canaa ñi. Tan nyivi can cua jaha canaa ñi intuhun corona ndaha yutun tsa iin yaha ñi na ityí. Maa tyin yoo nducú yo cuhva jaha canaa yo tsa ña cua tiví maa. ²⁶ Tsa cuenda yuhu ña tsinú soho ñi yu, tan ndi ña cañi tahan soho ñi yu. ²⁷ Maa tyin ñihí ndacá ñaha yu tsi cuñu ñuhu yu. Tan jañiñi yu tyaá yahví yu tsi Nyoo, coto juvin ñi maa yu tsa yaha jacuahá yu tsi inga nyivi, tan ndoo yu.

10

Nu jacuahá ra Pablo tyin ña vaha jac-ahnú yo tsitoho

¹⁻² Yañi, ña cuñi yu tsa naa iñi ndo tsa cuví tsi tsii tsaahnu yo tahán tsanaha. Nyoo jacuhun ra iin vico ityí nuu ñi. Tan yaha sava ñi nu ndutya ñuhu iin caa ñi tsihin ra Moisés, ra cuví ityí nuu tsihin ñi. Tan tsa tacan, tumaa tsa tsicoondutyá ñi tsihin vico tan tsihin ndutya ñuhu tan ndu iin ñi tsihin ra Moisés. ³ Tan Nyoo tsahá ra iin ñi tsa tsatsj tandihí ñi. ⁴ Tan tsihí ñi ndutya tsa quita tsata cava tsa cuahán tsihin ñi tan cava can cuví ra Cristo, tan tandihí ñi iin ñi ndutya can tsihí ñi. ⁵ Maa tyin vasu cuaha tsa iyo javahá Nyoo nyehe ñi, cuaha ñi ña tyaá yahví ñi tuhun cahan ra tsihin ñi. Tan tsihí ñi nu tsiqui can.

⁶ Tandihí tuhun ihya tsahá tsi iin cuhva tsi yo tyin tacan tan ña cuñi yo javaha yo tsa caquiñi tumaa tsa javahá ñi can. ⁷ Yacan cuenda ña jacahun ndo tsitoho, tumaa javahá juhva ñi can, tyin catyí nu tutu Nyoo tyehen: “Tsinyecu ñi, tsatsj ñi, tan tsihí ñi. Yaha can tan nduvitá ñi, tsahan quitsahá tsañi ñi [jacahnú ñi indiqui xuhun cuaan tsa javahá ñi].” ⁸ Ña coo ndo tsihin iin ñaha tun ñavin ñasihi ndo cuví. Tacan tucu ñiñaha ña taahán tsi coo ñi tsihin rayii tumaa javahá nyivi can. Tan tsihí oco uñi ñi tsa iin quivi. ⁹ Jutu Mañi yo vita xaan iñi ra, maa tyin ña taahán tsi nducú cuhva yo tsi ra tumaa javahá juhva ñi can. Tan tsihí ñi tsa caan coo tsi ñi. ¹⁰ Tan ña cahan ndo ndavaha ñi siqui Nyoo, tumaa tsa cahan juhva ñi can. Tan jaquitsj ra ángel ra tsahñj tsi ñi.

¹¹ Tandihí yacan tahán tsii tsaahnu yo tsa tsicoo tahán tsanaha. Tan tsinyaq tsi nu libru Nyoo tyin tacan tan yoo tsa iyó yo nu cua ndihí ñuu ñayivi ihya vityin coto yo tyin ña taahán tsi javaha yo tandihí tsa javahá ñi can. ¹² Tan nyooho tsa cuñi tyin vaha cuahán ndo tsihin Nyoo, jaha ndo cuenda coto nduva ndo [jaha nu ña vaha]. ¹³ Tundoho tsa nyehé ndo, cuñi maa ndo tyin intuhun ñi maa ndo nyehé can. Maa tyin inducu ñi nyehé tandihí ca nyivi. Cuiita

iñi ndo tsi Nyoo, tyin ña tuhvá ra cuhva tsa nyehé ndo tundoho tsa ña cuví cunyeé iñi ndo. Tyin tun nyehé ndo tundoho, nducú ra cuhva tsa quita ndo tsitsi tundoho can tan cunyeé iñi ndo.

¹⁴ Yacan cuenda yañi, ña jacahnu ndo tsi-toho. ¹⁵ Caahán yu tsihin ndo tumaa caahán yu tsihin ra tsa cutuñi iñi. Yacan cuenda jaha ndo cuenda tsa caahán yu tsihin ndo tan nyehé ndo tun nditsa a ña nditsa tsa caahán yu. ¹⁶ Quivi tsa nducuhún iñi yo tyin tsihi ra Cristo nu cruu, tsihi yo vinu tan tsatsi yo paan. Tan vinu can cuñi tsi catyi tyin iin ñi cuví yo tsihin ra Cristo tsa cuenda niñi ra. Tan paan can cuñi tsi catyi tyin iin ñi cuví yo tsihin ra tsa cuenda cuñu ñuhu ra. ¹⁷ Tyin vasu cuaha yo, maa tyin tandihí yo tan tsatsi yo intuhun ñi paan. Tan yacan cuenda cuví yo intuhun ñi cuñu ñuhu tsa cuenda ra.

¹⁸ Tyjhi tuñi iñi ndo cuhva iyó nyivi Israel. Tsatsi ñi quiti tsa jamañi ñi nuu Nyoo, tan tsihin yacan janahá ñi tyin iin ñi cuví ñi tsihin ra. ¹⁹ Ñavin caahán yu tyin iyó yahvi nyaá tsitoho tsa jacahnú nyivi tsa ña tsitó tsi Nyoo. Nduve yahvi nyaá yacan, tan ndi cuñu tsa jamañi ñi nuu can. ²⁰ Tsa caahán yu cuví: Tun jamañi nyivi tsa ña tsitó tsi Nyoo tsa jamañi ñi, nuu tatyí ña vaha jamañi ñi can tan ñavin nuu Nyoo. Tan ña taahán tsi tsa iin ñi cuví ndo tsihin tatyí ña vaha. ²¹ Tyin ña cuví coho yo copa Nyoo tan juvin ñi cuhva can tan coho tucu yo copa nu ña vaha. Tan ña cuví catsi yo nu mesa Nyoo tan juvin ñi cuhva can catsi yo nu mesa nu ña vaha. ²² Ña cuhva yo tsihi tsi Jutu Mañi yo tyin maa ra iyó ca tunyee iñi tsi ra tan ñavin ca maa yo.

Tun cua javaha yo náa javaha yo, na javaha yo tsa cuenda tsa vaha tsi inga ca nyivi

²³ Nditsa tsa caahán nyivi: “Cuví javaha yo náa cuñi maa yo.” maa tyin ña tandihí can tan jacuhnú can tsi yo tsihin Nyoo tan ndi ña cuví can tsa vaha tsi yo. ²⁴ Ña cuví caca iñi yo tsa cuenda maa ñi maa yo, tyin cuñi tucu tsi tsa caca iñi yo tsa cuenda inga ca nyivi tan nducu yo tsa vaha tsi ñi.

²⁵ Cãtsi nyooho tandihí cuñu tsa cuyahví nu nuyahví. Tan ña nducu tuhun ndo náa cuñu cuví can tyin tacan tan ña cua jatyañu tsa tsicá iñi ndo tsi ndo. ²⁶ Tyin ñuhu ñayivi tan tandihí tsa iyó nuu tsi, tsii maa Nyoo cuví.

²⁷ Tan tatun iin nyivi tsa ña tsinú iñi tsi Nyoo, tan cana ñi tsi ndo tsa cucatsi ndo yuvehe ñi, tun cuñi ndo cuhun ndo, vaha maa cuhun ndo, çãtsi nyooho tandihí tsa cua cuhva ñi catsi ndo. Tan ña nducu tuhun ndo tun jamañi ñi cuñu can nuu tsitoho.

²⁸⁻²⁹ Maa tyin tatun ndáa nyivi caahán tye-hen tsihin ndo: “Nyayu ihya, nyayu tsa jamañi nyivi nuu tsitoho cuví tsi”; ña çãtsi ndo tyin coto nduva ñi tsa caahán tacan tsihin ndo tan ndoo tsa tuñu cuñi ñi jaha can.

Maa tyin yihí ndo cua catyi ndo: “¿Nacuenda cuñi tsi tsa jahá yu cuenda tsi yu tsa catyi tsa tsicá iñi inga ca nyivi? ³⁰ ¿Tan nacuenda ña cuví catsi yu can?, tan maa ñi tsahá yu tyahvi nyoo tsi Nyoo tan tsatsi yu”, catyi ndo. ³¹ Vaha maa, tun tsatsi ndo, tan tsihi ndo, o javahá ndo inga ca tsa javahá ndo; javaha nyooho maa tyin cuhva taahán iñi Nyoo. ³² Tan ña javaha ndo tsa cuví janduva tsi inga ca nyivi, ndi ñi Israel, tan ndi ñi tsa ñavin ñi Israel cuví, tan ndi ñi yihí cuenda Nyoo. ³³ Tumaa yuhu, ña nducú yu tsa vaha tsi maa yu. Maa tyin nducú yu tsa vaha tsi inga nyivi tan nácaa cuví cacu aña maa ñi.

11

¹ Nyehe ndo tumaa javahá yu cuhva javahá ra Cristo, tacan taahán tucu tsi javaha nyooho cuhva javahá yuhu.

Nacaa taahán tsi javaha ñiñaha nu iyó culto

² Yañi, sã xaan cuñi yu tyin tacan ñi nducuhún iñi ndo tsi yu. Tan tyaá yahvi ndo tsa jacuahá yu tsi ndo. ³ Maa tyin cuñi yu tsa coto ndo tyin ra Cristo cuví jiñi tsihin intuhun intuhun rayi tyin juvin ra cuví ityi nuu tsihin ra, tan rayi cuví jiñi tsihin ñasihi ra, tumaa cuví Nyoo jiñi tsihin ra Cristo.

⁴ Tatun iin rayi tyasi ra jiñi ra tan tsicán tahvi ra o tsahá cuenda ra tuhun tsa tsahá Nyoo tsi ra, tsahá ra ticanuu tsi ra Cristo tyin juvin ra cuví jiñi tsihin ra. ⁵ Maa tyin tun iin ñaha tan ña tyasi ña jiñi ña tsa tsicán tahvi ña, o tsa tsahá cuenda ña tuhun tsa tsahá Nyoo tsi ña, tumaa tsa xatya ndi jiñi ña cuví can. Tan tsahá ña ticanuu tsi yã ña tyin juvin ra cuví jiñi tsihin ña. ⁶ Tatun iin ñaha tan ña tyasi ña jiñi ña, vaha taxin ca xatya ña tandihí ixi jiñi ña. Maa tyin tun cahán nuu ña tsa xatya jiñi ña, nacasi ña jiñi ña. ⁷ Ña taahán tsi tsa casi rayi jiñi ra. Tyin cuhva caá Nyoo caá ra, tyin ndacá ñaha ra tsi ñasihi ra, tumaa tsa ndacá ñaha maa Nyoo tsi ra. Maa tyin iin ñaha jacahnu ña tsi yã ña tsihin tsa tsahá ña tsa cundaca ñaha ra tsi ña. ⁸ Tyin quivi javahá Nyoo tsi rayi, ña javahá ra tsi ra tsihin yiqui naha ñaha. Tyin tsihin yiqui naha rayi javahá ra tsi ña. ⁹ Tan tsacatyí rayi, tan tsinu ñaha, tan ñavin tsacatyí ñaha tan tsinu rayi. ¹⁰ Yacan cuenda ñiñaha cuñi tsi tsa cundasi jiñi ñi. Tyin cuñi tsi catyi tyin ndacá ñaha yã ñi tsi ñi. Tan cuví tsi tsa vaha tsi ra ángel naha ra. ¹¹ Maa tyin tyag Nyoo cuhva tyin tsiñi ñuhu rayi tsi ñaha. Tan tsifí ñuhu ñaha tsi rayi. ¹² Nditsa tyin ñaha

tsinü ña tsihin yiqui naha rayi jahä Nyoo. Maa tyin nda cuanda quivi can tan quitsaha tsahä Nyoo tsa coo sehe yii ña. Tan nda cuanda vityin juvin ñi maa Nyoo tsahä tsa coo nduvi taahan ñi, rayi tan ñaha.

¹³ Tyihi tuñi jihna iñi ndo tsa cuenda tuhun ihya. ¿A vaha tsa ña ndasi jiñi ñaha tan tsicán tahvi ña tsi Nyoo tsitsi vehe ñuhu? ¹⁴ Tsitó yo tyin ticanuu cuví tsi tsa cuenda rayi taton nañi jiñi ra. ¹⁵ Maa tyin ñiñaha, vaha tsa nañi jiñi ñi tyin Nyoo tsahä ra tsa ndunañi tsi tan casi tsi jiñi ñi. ¹⁶ Maa tyin taton yoo cuñi cañi tahan tsa catyi tuhun ihya, cuví tsi coto ndo tyin ndi nyuhu tan ndi vehe ñuhu Nyoo, nduve inga ca tuhun iyó.

Nu caahán ra Pablo tsihin nyivi Corinto tyin ña vaha cuhva tsatsi ñi Santa Cena

¹⁷ Yañi, inga tuhun cua cahan yu tsihin ndo tyin ña sii cuñi yu tsihin ndo; tyin tsa javahá ndo nu ndu iin ndo, ña tsahä tsi tsa vaha tsi ndo, tan jativí tsi tsi ndo. ¹⁸ Tyin catyi nyivi tsihin yu tyin cuhva tsa ndu iin ndo tsa cua coo ndo culto, tan natahvi sava ndo. Tan tsicá tucu iñi yu tyin vasiqiu nditsa tsa caahán ñi. ¹⁹ ¡Vasiqiu cuñi maa ndo tyin tsihin tsa natahvi sava ndo tan quituvi ndaa nyooho tsinü vaha iñi tsi Nyoo! ²⁰ Maa tyin taton tacan ñi iyó tsihi nu yucú ndo, ñavin Santa Cena cuví can. ²¹ Tyin cuhva tsa cua catsi ndo, tsatsi ñi ndo tsa ndahá ndo. Tan ña ndatú ndo nda cuanda ndu iin tandihi nyivi. Tan yihí ndo cuaha tsatsi ndo, tan nda cuanda tsiñi ndo tsihin vinu. Tan yihí nyivi ña ñihí ñi tsa catsi ñi jahá ndo. ²² ¿A nduve yuvehe ndo catsi ndo tan coho ndo? Tyin tsa javahá ndo tacan, ndasi cuñi ndo nyehé ndo vehe ñuhu Nyoo cuví can. Tan tsahá ndo ticanuu tsi nyivi nduve tsa iyó tsi. ¿A taahán tsi catyi yu tsihin ndo tyin vaha cuhva javahá ndo, cuñi maa ndo? Ña taahán tsi, tyin ña vaha tsa javahá ndo.

Ra Pablo tsahá cuenda ra tsi ñi, nácaa taahán tsi coo ñi Santa Cena

(Mt. 26.26-29; Mr. 14.22-25; Lc. 22.14-20)

²³ Tyin Jutu Mañi yo jacuahä tuhun ihya tsi yu. Tan juvin yacan tsa yahä jacuahä yu tsi ndo. Tyin tsacuaa tsa ndi cumañi ca nacuhva cuenda ra Judas tsi Jutu Mañi yo tsi nu xaan iñi tsi ra, quihñ ra iin paan. ²⁴ Tan tsa yahä nacuhvã ra tyahvi nyoo tsi Nyoo tan tsahnü ra paan can. Tan catyi ra: “Çatsi ndo paan ihya tyin cuví tsi tumaa cuñu ñuhu yu tyin tsa cuenda ndo tan cua cúu yu. Javaha ndo tyehen tan nducuhun iñi ndo tsi yu”, catyi ra Jesús. ²⁵ Tan tsa yahä tsa cuxiñi ra naha tan quihñ ra Jesús vasu vinu tan catyi ra: “Tsihin vinu ihya ndoó Nyoo tyiñu tsihin ndo vityin, tyin vinu tsa

yihí tsitsi vasu ihya, niñi yu cuví. Tahan ñi tsaha tsa cua coho ndo, coho ndo tsa cuenda tsa nducuhun iñi ndo tsi yu”, catyi ra Jesús tsacuaa can. ²⁶ Tan tahan ñi tsa ndu iin yo tan tsatsi yo paan tan tsihi yo vinu jacotó yo tsi nyivi tyin tsacatyí cuatyí yo tsihi Jutu Mañi yo. Tan tacan jacotó yo tsi nyivi nda cuanda quivi quitsi nyico ra.

Ra Pablo tsahá cuenda ra tsi yo nácaa taahán tsi coo yo Santa Cena

²⁷ Taton tsatsi yo paan tan tsihi yo vinu cuhva tsa ña taahán iñi Nyoo, tsicoó cuatyí yo. Tyin ña tyaá yahvi yo tsa tsihi ra Cristo nu cruu tan tsa tsatj niñi ra. ²⁸ Yacan cuenda cuñi tsi jaha yo cuenda taton vaha cuahán yo tsihin Nyoo tsa ndi cumañi ca catsi yo paan tan coho yo vinu. ²⁹ Tyin Nyoo tatsi tuñi ra tsi yo tun tsatsi yo tan tsihi yo tan ña tsicá iñi yo tsa cuenda tsa tsihi ra Cristo. ³⁰ Tan tsa cuenda yacan cuaha xaan ndo cuhví ndo tan nduve tunyee iñi iyó tsi ndo, tan juhva nyivi tahan ndo tsa yahä tsihi ñi. ³¹ Maa tyin taton jaha vaha ndo cuenda tsi ndo, Jutu Mañi yo ña cua tatsi tuñi ra tsi ndo. ³² Maa tyin taton tatsi tuñi Jutu Mañi yo tsi yo tacan, javahá ra tacan tyin tacan tan ña cunaa yo tsihin nyivi iyó cuenda nu ñuhu ñayivi ihya.

³³ Tan tacan nyooho yañi, taton cua ndu iin ndo tsa cua catsi ndo Santa Cena, çatu tahan ndo tsi ndo tan çatsi ndo tan coho ndo iin caa ñi. ³⁴ Maa tyin taton ndaa nyooho tsisocó ndo, çatsi jihna ndo nda yuvehe ndo tyin tacan tan ña cua tatsi tuñi Nyoo tsi ndo.

Nda quivi tsa quitsi nyehé yu nu yucú ndo tan jandaa yu inga ca tuhun.

12

Ndatu tsa tsahá Tatyí Ii Nyoo tsi yo

¹ Yañi, cuñi yu tsa coto ndo náa ndihi ndatu tsahá Tatyí Ii Nyoo tsi tsa intuhun intuhun yo.

² Tsitó ndo tyin quivi tsa ñaha ca nacoto ndo tsi Nyoo, tsahä ndo tsa cundaca ñaha tsitoho tsa ña cuví cahan tsi ndo. ³ Yacan cuenda cuñi yu tsa coto ndo tyin ra tsa caahán tyin ña vaha ra Jesús, ñavin Tatyí Ii Nyoo jacahán tsi ra. Maa tyin ra tsa jacahán Tatyí Ii Nyoo catyi ra tyin ra Cristo cuví Jutu Mañi yo.

⁴ Siin siin ndatu naquihín intuhun intuhun yo, maa tyin iin ñi Tatyí Ii Nyoo tsahá itsi yo. ⁵ Siin siin cuhva jahá tyiñu yo maa tyin tyiñu intuhun ñi maa Jutu Mañi yo javahá yo. ⁶ Siin siin tyiñu javahá tsa intuhun intuhun yo. Maa tyin intuhun ñi maa Nyoo cuví ra jatyinyee tsi tandihi yo tan javahá yo can. ⁷ Tan tsahá ra tunyee iñi Tatyí Ii ra tsi intuhun intuhun yo tyin tacan tan jatyinyee yo tsi tandihi ca nyivi yihí cuenda ra. ⁸ Tsi juhva yo tsahá Tatyí Ii

Nyoo tsa cahan yo tsihin tsa tsiñi tuñi tsa iyó tsi ra. Tan tsi inga yo tsahá ra tsa nacoto yo tsa ña tsitó yo. ⁹ Tan tsi inga yo tsahá ra tsa tsinú xaan iñi yo tsi ra. Tan juvin ñi maa Tatyí li ra tsahá tunyee iñi tsi inga yo tsa janduvaha yo tsi nyivi cuuhví. ¹⁰ Tan tsi inga yo tsahá ra tunyee iñi tsa cuví javaha yo tsa iyo. Tan inga yo tsahá ra tsa cahan yo tuhun tsa tsahá ra tsi yo tyin jacoto yo tsi inga ca nyivi. Tan tsi inga yo tsahá ra tsa cuví nacoto yo tun Tatyí li Nyoo a tatyí ña vaha caahán. Tan tsi inga yo tsahá ra tunyee iñi tsa cuví cahan yo inga yuhu tsa ña tsitó yo. Tan tsi inga yo tsahá ra tunyee iñi tsa cuví nacoto yo tan nacatyí tuhun yo náa caahán tsa caahán inga nyivi. ¹¹ Tan tandihi yacan tsahá intuhun ñi maa Tatyí li Nyoo. Maa tyin siin siin tsa tsahá ra tsi tsa intuhun intuhun yo, nácaa cuñí maa ra.

Tandihi yo tan cuví yo intuhun ñi cuñu ñuhu tsihin ra Cristo

¹² Tumaa cuñu ñuhu yo iyó jiñi tsi, iyó ndaha tsi, iyó tsaha tsi, maa tyin tandihi tsi tan cuví tsi intuhun ñi cuñu ñuhu. Tan tacan cuví tucu maa yo tsihin ra Jesucristo; vasu cuaha xaan yo, maa tyin intuhun ña cuñu ñuhu ra cuví yo. ¹³ Tan tacan tucu tandihi yo, a cuví yo nyivi Israel, a ñi Grecia, a ñi iyó tsitoho, a ñi nduve tsitoho, maa tyin tsa tsicoondutya yo tan nanduví yo intuhun ña cuñu ñuhu ra Cristo tyin tsahá ra intuhun ñi maa Tatyí li ra coo tsihin tandihi yo.

¹⁴ Tyin cuñu ñuhu yo ña cuví cuví tsi intuhun ñi maa tinuu tyin cuñí tsi tsa cunyecu tandihi ca tsa cutahan tsihin tsi tan cuví tsi cuñu ñuhu nii. ¹⁵ Tun tsatyin cuví cahan tsaha yo tan catyí tsi: “Yuhu nduve yahvi nyaá yu tyin ñavin ndaha cuví yu.” Ñavin tsa cua cahan tsi tacan tan ña cua cutahan ca tsi tsihin cuñu ñuhu can. ¹⁶ O tun tsatyin cuví cahan soho yo tan catyí tsi: “Yuhu nduve yahvi nyaá yu tyin ñavin tinuu cuví yu.” Ñavin tsa cua cahan tsi tacan tan ña cutahan ca tsi tsihin cuñu ñuhu can. ¹⁷ Tun tsatyin nanii cuñu ñuhu yo cuví tsi tinuu tan nduve soho yo, ¿nácaa cua cuñi yo? O tun tsatyin nanii cuñu ñuhu yo cuví tsi soho, ¿nácaa cua tahñi yo? ¹⁸ Maa tyin Nyoo tyaá ra tan iin tan iin can nu cuñí maa ra. ¹⁹ Tatan nduve tsa intuhun intuhun tsa cutahán tsihin cuñu ñuhu can, ñavin cuñu ñuhu cuví can. ²⁰ Maa tyin tsa ndu iin soho, tinuu, jiñi, ndaha, tan tandihi ca maa, tacan tan cuví tsi intuhun cuñu ñuhu.

²¹ Tinuu yo ña cuví catyí tsi tsihin ndaha yo: “Ña tsiñi ñuhu yooho tsi yu.” Tan ndi jiñi yo tan ña cuví catyí tsi tsihin tsaha yo: “Ña tsiñi ñuhu yooho tsi yu.” ²² Ña vaha tsa cahan tsi tacan tyin vasu iin tsa líhli tsa cuñí maa yo tyin ña tsiñi ñuhu tsi yo, yacan cuví tsa tsiñi ñuhu ca. ²³ Tan nu cuñí yo tyin

ñi sii caá, tyasí yo. Tan nu ña taahán tsi nyehé nyivi, yacan tyasí vaha ca yo. ²⁴ Tan nu sii caá, ña tyasí yo. Tacan javaha Nyoo cuñu ñuhu yo, tyin tacan tan jacahnú ca yo nu cuñí maa yo tyin ña sii caa. ²⁵ Tan tsa intuhun intuhun tsa iyó cuñu ñuhu yo, jahá cuenda tahan maa tsi itsi, yacan cuenda ña cuví cusiiñ tsi. ²⁶ Tatan luxu cuñu ñuhu yo nyehé tundoho, nyehé ndihi tanii ca cuñu ñuhu yo tundoho. Tan tatan sii cuñí luxu tsi, sii cuñí tanii tsi.

²⁷ Tan maa yo cuví yo cuñu ñuhu ra Cristo. Tan luxu luxu cuñu ñuhu ra cuví tsa intuhun intuhun yo. ²⁸ Tan Nyoo natyisó ra tsi intuhun intuhun yo vehe ñuhu tyin tacan tan jatyinyee tahan yo tsi yo. Tsa jihna ñi natyisó ra tsi ra caca tyiñu ra. Tsa tsinu uvi, natyisó ra tsi ra cuví ndusu yuhu ra. Tan tsa tsinu uñi, natyisó ra tsi ra jacuahá. Yaha can, tan natyisó ra tsi ra tsa javaha tsa iyo, tan natyisó tucu ra tsi ra tsa janduvaha nyivi cuuhví, tan ra tsa jatyinyee tsi nyivi, tan ra jaha cuenda vehe ñuhu, tan ra caahán inga yuhu tsa ña tsitó ra. ²⁹ Ña tandihi yo tan tsicá yo tyiñu ra Cristo. Ña tandihi yo tan cuví yo ndusu yuhu ra. Ña tandihi yo tan cuví yo ra jacuahá. Ña tandihi yo tan javahá yo tsa iyo. ³⁰ Ña tandihi yo tan tsahá Nyoo tunyee iñi tsa janduvahá yo tsi nyivi cuuhví. Ña tandihi yo tan caahán yo inga yuhu tsa ña tsitó yo. Ña tandihi yo tan cuví nacotó yo tan nacatyí tuhun yo náa cuñí tsi catyí tsa caahán inga nyivi. ³¹ Nducu ndo cuhva naquihin ndo tsa vaha ca tsa tsahá Nyoo. Maa tyin cua janaha yo iin cuhva vaha ca tsi ndo.

13

Nu janahá ra Pablo nácaa taahán tsi cuñi yo tsi nyivi

¹ Tatan yuhu tan cuví cahan yu cuaha ñi yuhu tsa caahán nyivi iyó nu ñuhu ñayivi ihya, tan cuví cahan tucu yu yuhu tsa caahán ángel, maa tyin tatan ña cuñí yu tsi Nyoo tan ndi tsi nyivi, cuví yu tumaa tyombo tsa nañí ñi maa o iin caa tsa tsacú ndaxin ñi maa. ² Tatan cuví cuhva cuenda yu tuhun caahán Nyoo, tan cuví coto yu tandihi tuhun xeehe, tan tsitó yu tandihi tuhun, maa tyin tatan ña cuñí tucu yu tsi Nyoo tan ndi tsi nyivi, nduve náa catyí javaha yu tandihi yacan. Tatan tsinú xaan iñi yu tsi Nyoo nda cuanda cuví cahan yu tsihin yucu na cuhun tsi inga ityi, tan cua cuhun tsi, maa tyin tatan ña cuñi yu tsi Nyoo tan ndi tsi nyivi, nduve náa ra cuví yu. ³ O tatan cuhva yu tandihi tsa iyó tsi yu tsi nyivi ndaahvi, tan cuhva yu nda cuanda ñayivi yu tyin cucayu cuñu ñuhu yu, maa tyin tatan ña cuñi yu tsi Nyoo tan ndi tsi nyivi, nduve náa cua jatyinyee can tsi yu.

⁴ Tatum nditsa tsa cuñi yo tsi Nyoo tan tsi nyivi, ña tyixin yo, vaha iñi yo; ña nyiyó iñi yo tsa tsahá ra tsi inga ñi, ña cahnu jahá yo tsi yo, tan ña yaa yo. ⁵ Tatum nditsa tsa cuñi yo tsi Nyoo tan tsi nyivi, ña siqui iñi yo, tan ña nducú yo maa ñi tsa vaha tsi maa yo, ña cuxaán yo, tan ña ndoó tsihi tsitsi añima yo. ⁶ Tatum nditsa tsa cuñi yo tsi Nyoo tan tsi nyivi, ña sii cuñi yo náa ndihi tsa ña vaha javahá ñi, maa tyin cusii iñi yo tsihin tsa vaha tan tsa nditsa. ⁷ Tatum nditsa tsa cuñi yo tsi Nyoo tan tsi nyivi, cunyeé iñi yo nyehe yo tundoho jahá ñi, tan tsinú iñi yo tyin cua javaha ñi tsa vaha tan ndatú yo tsa nasama ñi kuhva iyó ñi, tan ña cundihi iñi yo.

⁸ Tsa cuñi yo tsi Nyoo tan tsi nyivi ña cua cundihi maa tsi, maa tyin coo quivi tsa ña cua kuhva cuenda ca yo tsa caahán Nyoo, tan ña cua cahan ca yo inga yuhu, tan tsa tsitó yo vityin ña tsiñi ñuhu ca can tsi yo. ⁹ Nyoo tsahá ra tsa coto yo luxu ñi vityin tan tsahá tucu ra luxu ñi tsa kuhva cuenda yo tsi nyivi, ¹⁰ maa tyin quivi quitsi nyico ra Cristo, cua cundihi tsa tsitó yo luxu ñi tyin cua coto yo tandihi maa.

¹¹ Quivi tsa luhlu yu caahán yu tumaa caahán ra nyihi tan tsicá iñi yu tumaa tsicá iñi ra nyihi, maa tyin quivi tsahnú yu nacoó yu tsa yu kuhva javahá ra nyihi. ¹² Tan tacan tucu vityin tsitó yo tuhun Nyoo tumaa tsa nyehé yo nu inu tun tsa ndihí tsi yaa. Maa tyin quivi cua quitsi ra Cristo, cua coto yo tandihi maa. Luxu ñi tsitó yo vityin, maa tyin quivi quitsi nyico ra, tandihi cuii maa tan cua coto yu, tumaa nacotó maa ra tsi yu vityin. ¹³ Iyó uñi taahan tsa ña cua ndihi maa: tsa tsinú iñi yo tsi Nyoo, tsa tsitó yo tyin nditsa tsa cua ñihi yo tandihi tsa cahan Nyoo tyin kuhva ra tsi yo, tan tsa cuñi yo tsi Nyoo tan tsi nyivi. Tan tsitsi tsa nduñi taahan tsehe, tsa tsiñi ñuhu ca cuvi tsa cuñi yo tsi Nyoo tan tsi nyivi.

14

Nu jacuahá ra Pablo nácaa cahan yo inga yuhu tsa ña tsitó yo

¹ Jañihi ca ndo cuñi ndo tsi Nyoo tan tsi nyivi. Tan nducu ndo kuhva naquihin ndo ndatu tsa tsahá Tatyí Ii Nyoo tsi yo. Nducu jihna ndo tsa kuhva cuenda ndo tuhun Nyoo tsi nyivi. ² Tyin tun caahán yo inga yuhu tsa ña tsitó yo, tsihin Nyoo caahán yo, tan ñavin tsihin nyivi. Tyin ndi intuhun ñi tan ña cutuñi iñi ñi, tyin tuhun xeehe caahán yo jahá Tatyí Ii Nyoo. ³ Maa tyin tun tsahá cuenda yo tuhun Nyoo tsi nyivi, cutuñi iñi ñi tan ñihi ca tsahnú ñi tsihin tuhun Nyoo. Tan ndu iin ca iñi ñi jahá yo tan ndunyeé ca iñi ñi. ⁴ Tatum caahán yo inga yuhu tsa ña tsitó yo, maa ñi maa yo tsahnú tsihin can. Maa tyin tun tsahá cuenda yo tuhun

caahán Nyoo tsihin yo tsihin nyivi, tandihi ñi tsahnú.

⁵ Yuhu cuñi yu tsa cahan tandihi ndo inga yuhu tsa ña tsitó ndo. Maa tyin vaha xaan ca tun cuvi kuhva cuenda ndo tsa caahán Nyoo, tyin jatyinyeé ca yacan tsi ñi yucú vehe ñuhu tan ñavin ca tsa cahan yo inga yuhu. Maa tyin tatum iin ndo cuvi nacoto ndo nácaa caahán inga ndo tsihin inga yuhu, naçatyí tuhun ndo tsihin ñi. Tacan tan cuvi jatyinyeé tsi tsi tandihi ñi. ⁶ Yacan cuenda yañi, tatum yuhu tan tsaá yu nu yucú ndo, tan cahan yo inga yuhu, ña cua jatyinyeé tsi tsi ndo. Maa tyin tun cahan yu tsa janaha Nyoo tsi yu, o tsa jacotó ra tsi yu, o tsa tsahá ra tyin kuhva cuenda yu tsi ndo, o tsa jacuaha yu tsi ndo, cua jatyinyeé tsi tsi tandihi ndo.

⁷ Tatum tiví yo cutu, o javacú yo guitarra, tan ña quitá vaha ndusu can jahá yo, ña cua coto yo náa yaa javacú yo. ⁸ Tan tatum nu iyó cuatyí tan ña vaha tiví ra cutu, yofi cua coto náa kuhva cua cañi tahan ra naha. ⁹ Tan tacan tucu yoo, tatum caahán yo inga yuhu tsa ña cutuñi iñi nyivi, ña cua coto ñi náa caahán yo. Tan cua catyí ñi tyin jiñi yo ña vaha cuñi, yacan caahán maa yo. ¹⁰ Cuaha xaan yuhu caahán nyivi nu ñuhu ñayivi ihya. Tan intuhun intuhun nuu yuhu tan iyó iyó ñi tsa cuñi tsi catyí. ¹¹ Maa tyin tun ña cutuñi iñi yu yuhu tsa caahán inga nyivi tsihin yu, ña cuvi natuhun yu tsihin ñi. Tan ndi maa ñi ña cuvi natuhun ñi tsihin yu. Cuví ñi tumaa nyivi inga ñuu tsa cuenda yu. ¹² Yacan cuenda nyoocho tsa cuñi xaan naquihin ndatu tsa tsahá Tatyí Ii Nyoo, nducu ndo kuhva naquihin ndo tunyee iñi tsa cuvi jatyinyeé vaha ca tsi nyivi yucú vehe ñuhu.

¹³ Tacan tucu nyoocho tsa caahán inga yuhu, ndacan ndo tsi Nyoo na kuhva ra ndatu tsa nacatyí tuhun ndo tsihin nyivi náa cuñi tsi catyí. ¹⁴ Tyin tatum tsicán tahvi yu tsi Nyoo tsihin iin yuhu tsa ña cutuñi iñi yu, añima yu tsicán tahvi tsi Nyoo, maa tyin tsa tsiñi tuñi jiñi yu ña cutuñi iñi tsi. ¹⁵ Yacan cuenda cuñi tsi tsa ndacan tahvi yu tsi Nyoo tsihin inga yuhu. Tan ndacan tahvi tucu yu tsi ra tsihin yuhu tsa cutuñi iñi yu. Tan cuñi tsi tsa cata yu yaa tsihin yuhu tsa ña cutuñi iñi yu. Tan cata ndihi tucu yu yaa tsihin yuhu tsa cutuñi iñi yu. ¹⁶ Tyin tatum jacahnú un tsi Nyoo tsihin maa ñi maa yuhu tsa tsahá Tatyí Ii Nyoo tsi un, ña cua cutuñi iñi nyivi tsa ña tsitó náa cuvi yacan. Tan ña cua cuvi jacahnu ñi tsi Nyoo tsihin un. ¹⁷ Vasu ndi maa vaha tsa caahán un, kuhva tsa nacuhvá un tyahvi nyoo tsi Nyoo, maa tyin ña jatyinyeé tsi tsi inga nyivi tyin ña cutuñi iñi ñi tsa caahán un. ¹⁸ Tan yuhu nacuhvá yu tyahvi nyoo tsi Nyoo tyin cuaha ca tsaha caahán yo inga yuhu tan ñavin ca

tandihí nyooho. ¹⁹ Maa tyin vaha ca cuñi yu cahan yu vasu uhun taahan ñi tuhun tsitsi vehe ñuhu tan ñavin ca tsa cahan yu utsi mil tuhun tsihin inga yuhu, tyin vasu cuaha tuhun cua cahan yu tsihin ndo ña cua jatyinyee can tsi ndo tyin ña cutuñi ñi ndo.

²⁰ Tshanu çaça ñi ndo, yañi. Tan ña lee xaan çaça ñi ndo. Maa tyin tatun javaha ndo náa javaha ndo, javaha ndo tumaa javahá lee tyin lee ña javahá tsi tsa caquiñi.

²¹ Catyí Nyoo nu libru ley ra tyehen: “Cua cahan yu tsihin nyivi ihya tsihin yuhu nyivi inga ñuu tan tsihin inga yuhu tsa ña tsitó ñi. Maa tyin vasu ndi maa tsa cua javaha yu tacan, ña cua tyaa yahvi maa ñi tsi yu”, catyí Jutu Mañi yo. ²² Yacan cuenda tsa caahán yo inga yuhu cuví tsi tumaa iin seña tsa cuenda nyivi tsa ña tsinú ñi tsi ra Cristo. Maa tyin tsa tsahá cuenda yo tsa caahán Nyoo, cuví tsi cuenda nyivi tsa tsinú ñi tsi ra. ²³ Tyin tatun tandihí ndo caahán ndo inga yuhu nu ndu iin ndo, tan quihví iin nyivi tsa ña yihí cuenda Nyoo, o ñi tsa ña cutuñi ñi tuhun Nyoo, cua catyí ñi tyin jiñi ndo ña vaha cuñi.

²⁴ Maa tyin tatun tandihí ndo tsahá cuenda ndo tsa caahán Nyoo tan quihví iin nyivi tsa ña yihí cuenda Nyoo, a ñi tsa ña cutuñi ñi tuhun Nyoo, cua coto ñi tyin iyo cuatyí ñi tsa cuenda tsa cutuñi ñi ñi tsa caahán ndo. ²⁵ Tan tandihí tsa iyó tsitsi añima ñi cua nacoto ñi, tan cua cuñi tsiti ñi jacahnu ñi tsi Nyoo. Tan cua catyí ñi tyin nditsa nditsa cuii tsa nyaá Nyoo tsihin ndo.

Nacaa javahá yo culto iin cuhva vaha

²⁶ Yacan cuenda yañi, tatun cua ndu iin ndo, tan tsahá Nyoo tsa tsahá ra tsi tsa intuhun intuhun ndo, cuhva cuenda ndo itsi; a tsahá ra tsa cata ndo yaa, o tsa jacuaha ndo, o náa tsa janahá ra tsi ndo, o jacoto ra tsi ndo, o cua cahan ndo inga yuhu, o nacatyí tuhun ndo naa cuñi tsi catyí inga yuhu can. Maa tyin tandihí yacan taahán tsi cuví tsi iin tsa tsahá tunyee ñi maa Nyoo tsi tandihí ndo tsa yihí ndo cuenda ra. ²⁷ Tatun cua cahan ndo inga yuhu nu ndu iin ndo, cuñi tsi tsa cahan uvi ndo a uñi ñi ndo, maa tyin intuhun intuhun ñi ndo cahan; ña cahan tandihí ndo juven ñi cuhva tsa caahán inga ndo. Tan inga tucu tuhun cuví tsi tsa nacatyí tuhun inga ndo tsa caahán ndo. ²⁸ Maa tyin tun yoñi cuví nacatyí tuhun tsa caahán ndo, vaha taxin ca, ña cahan ndo tsihin inga yuhu nu ndu iin ndo. Cahan ndo tsihin Nyoo tsihin inga yuhu tun cuñi ndo, maa tyin ndihí cuhva tsifi ñi maa ndo. ²⁹ Tacan tucu tatun tsahá cuenda yo tsa caahán Nyoo. Cahan uvi ndo, a uñi ñi ndo. Tan tandihí ca ndo jaha ndo cuenda tun vaha tsa caahán yañi ndo. ³⁰ Maa tyin tatun jacoto Nyoo náa inga ca tuhun tsi inga nyivi tsa yucú tsifi tuhun caahán ndo, tacan tan

ra tsa nyaá caahán can, cuñi tsi jandihí ra tsa caahán ra tan cahan inga ñi. ³¹ Tan tacan tandihí nyooho tsa naquihín tuhun tsa tsahá Nyoo cuví nacatyí tuhun intuhun intuhun ndo, tyin tacan tan cutuhva tandihí nyooho tsa ndu iin vehe ñuhu tan ndu iin ca ñi ndo. ³² Nyooho tsa tsahá cuenda tsa caahán Nyoo, cuví cuatu nuu ndo nda cuanda ndihí cahan inga nyivi, ³³ tyin Nyoo ña cuñi ra tsa tavi tahan ña cahan ndo, tyin maa ra catsi iyó ra.

Quihín ndo cuhva iyó inga ca vehe ñuhu nu ndu iin nyivi yihí cuenda ra Cristo, ³⁴ tyin ñiñaha taxin ñi nyecú ñi tsitsi vehe ñuhu tyin tyaá yahvi ñi tsi yí ñi tumaa catyí ley Nyoo. Tan tacan taahán tucu tsi javaha nyooho. ³⁵ Tatun náa cuñi ñi coto ñi, na ndaca tuhun ñi tsi yí ñi nda yuvehe ñi, tyin ña vaha tsa cahan ñiñaha nu ndu iin ndo.

³⁶ Tatun siin cuhva tsicá ñi ndo, cuñi tsi nducuhún ñi ndo tyin ñavin nu yucú ndo quitsahá tuhun Nyoo. Tan ñavin nyooho ñi naquihín tuhun Nyoo. ³⁷ Tatun ndaa nyooho cuñi tyin ndusu yuhu Nyoo cuví ndo, o cuñi ndo tyin Tatyí Ii Nyoo jaquihín ityí tsi ndo, tun nditsa tsa cuví ndo yacan, cua nacoto ndo tyin tsa caahán yu tsihin ndo ihya, tsa tsahá maa Jutu Mañi yo tyin cuhva cuenda yu tsi ndo cuví. ³⁸ Maa tyin tatun ña cuñi ndo naquihín ndo tuhun ihya, ndi nyuhu tan ña cua naquihín ndi tuhun caahán nyooho.

³⁹ Tan tacan, yañi, nducu ndo cuhva cuhva cuenda ndo tuhun Nyoo tsi nyivi. Tan ña çasi ndo nu cahan nyivi inga yuhu. ⁴⁰ Maa tyin javaha ndo tandihí tsihin tsa vii tan tsa catsi.

15

Nacaa nandoto ra Cristo

¹ Vityin yañi, cuñi yu tsa nducuhun ñi ndo tuhun ra Cristo, tsa jacacú tsi yo, tsa cahan yu tsihin ndo quivi can. Tan naquihín ndo itsi tan ñi ñi añima ndo tsinú ñi ndo.

² Tan juven tsa cuenda tuhun ra Cristo cacú añima ndo tun ndi tsinú ñi ndo cuhva jacuahá yu tsi ndo. Maa tyin tun ña tsinú ca ñi ndo cuhva jacuahá yu tsi ndo, nduve yahvi nyaá tsa natsinú ñi ndo tsi ra Cristo.

³ Tsa jihna ñi jacoto yu tuhun tsa jacuahá ra Cristo tsi yu tsi ndo. Tan catyí yu tyin tsihí ra tsacatyí cuatyí yo, tumaa catyí nu libru Nyoo tyin cua cuví. ⁴ Tan quihví cuñu ñuhu ra tsitsi ñuhu. Maa tyin tsinu uñi quivi nandoto ra tumaa catyí nu libru Nyoo. ⁵ Tan tsa yahá tan quituví ra nuu ra Pedro tan quituví ndihí ra nuu tandihí ra tsicá tyiñu ra. ⁶ Yahá can tan quituví ra nuu yaha ca uhun cientu nyivi yihí cuenda ra. Tan juhva ñi can tsa tsihí ñi, maa tyin ndi iyó cuaha ca ñi nda cuanda vityin. ⁷ Yahá can tan quituví ra nuu

ra Jacobo. Tacan tan quituvj ndihí ra nuu tandihí ra tsicá tyiñu ra.

⁸ Tan nu ndihí ña quituvj ndihí ra nuu yuhu, tsa cuví yu tumaa iin lee tsa cacu yutya. ⁹ Tyin tsa nuu tandihí ca ra tsicá tyiñu ra Cristo nduve yahvi nyaá yuhu. Tan ndi ña taahán tsi tsa cuví yu ra tsicá tyiñu ra tyin tsinyaa ndaha xaan yu tsi nyívi yihí cuenda ra. ¹⁰ Maa tyin Nyoo vaha iñi ra tsihin yu. Yacan cuenda tsaha ra ndatu tsa cuví yu ra tsicá tyiñu ra tan ña cuatu tsaha ra tyiñu tsi yu, tyin cuaha ca tyiñu javahá yu tsihin tsi tan ñavin ca tandihí ra naha. Maa tyin ñavin tsihin tunyee iñi maa yu javahá yu can tyin maa tunyee iñi Nyoo tsa iyo tsihin yu javahá can. ¹¹ Maa tyin nduve cuenda tun yuhu, a inga ra caahán tsihin ndo, tyin tunhun caahán ndi tsihin ndo, yacan cuví tuhun tsa tsinú iñi ndo.

Nu jacuahá ra Pablo tyin nditsa tsa cua nandoto ndiyi

¹² Tsa caahán ndi tsihin ndo yacan cuví tsa nandoto ra Cristo tsa yaha tsihi ra tan ¿Nacuenda yihí ndo catyí ndo tyin ña nandoto ndiyi? ¹³ Tyin tatun ña cua nandoto ndiyi, ndi ra Cristo tan ña nandoto ra quívi can. ¹⁴ Tun tsatyin ña nandoto ra Cristo, nduve yahvi nyaá tsa caahán ndi tsihin ndo. Tan ndi nduve yahvi nyaá tsa tsinú iñi ndo tsi ra. ¹⁵ Tan tun tsatyin ña nditsa tsa janandoto Nyoo tsi ra Cristo, cuví ndi iin ra vatya tyin catyí ndi tyin janandoto Nyoo tsi ra. Tan tatun ña nditsa tsa nandoto ndiyi, ña nditsa tsa janandoto Nyoo tsi ra Cristo. ¹⁶ Tyin tun ña cua nandoto ndiyi, ndi ra Cristo tan ña nandoto ra. ¹⁷ Tan tatun ña nandoto ra Cristo, ndi iyó cuatyí ndo, tan nduve yahvi nyaá tsinú iñi ndo tsa jaha ra tucahnu iñi cuatyí ndo. ¹⁸ Tan ndi nyívi tsa tsihi tsa yihí cuenda ra ña cacu ñi tun ña nditsa tsa nandoto ra. ¹⁹ O tun nu ñuhu ñayivi ihya ñi jatyinyeé ra tsi yo, tan ña cua quítsi ra inga tsaha, nduve yahvi nyaá tsinú iñi yo tan cuví yo nyívi soho ca tsa nuu tandihí ca nyívi.

²⁰ Maa tyin tsitó vaha yo tyin nditsa tsa nandoto ra Cristo. Tan juven ra cuví ra tsa nandoto jihna ca tsítsi tsa tandihí ca ndiyi tsa cua nandoto. ²¹ Tyin tsacatyí cuatyí ra Adán tan tsicoq tuhun tsihi. Tan yacan tsihi nyívi nda cuenda vityin. Maa tyin tsa cuenda tsa nandoto ra Cristo cua nandoto tandihí nyívi yihí cuenda ra. ²² Tyin tumaa tsa tandihí yo tsihi tyin cuví yo tata ra Adán, tacan tucu cua nandoto tandihí yo tan coo yo ñayivi nyito tyin cuví yo nyívi ra Cristo. ²³ Maa tyin cua nandoto yo quívi taahán tsi tsi yo. Jihna ca ra Cristo nandoto. Tan quívi quítsi ra inga tsaha cua nandoto ñi yihí cuenda ra. ²⁴ Yaha can tan cua naa ñuhu ñayivi ihya tan ña cua cundaca ñaha ca

ra cumí tyiñu naha ra, tan ndi nu tatyí ña vaha nahnu ña cua cundaca ñaha ca nahnu. Tyin ra Cristo cua quihin nyaa ra tunyee iñi tsa iyó tsi tandihí nahnu, tan cua nacuhva cuenda ra can tsi Nyoo Jutu ra. ²⁵ Tyin ra Cristo cua cundaca ñaha ra nda cuanda quívi cuhva Nyoo tsa cuví jaha canaa ra tsi tandihí nu xaan iñi tsi ra nahnu. ²⁶ Tan nu tsa cua janaa ra nu ndihí ña, nu ican cuví tuhun tsihi. ²⁷ Tyin tsa tsaha Nyoo tsa quívi ndaha ra tandihí maa tsa iyó. Maa tyin nu catyí tyin tandihí nacuhva cuenda Nyoo tsi ra Cristo, ña cuñí tsi catyí tyin quívi ndaha ndihí ra tsi maa Nyoo tyin maa Nyoo cuví ra tsaha tsa quívi ndaha ra tandihí maa tsa iyó. ²⁸ Maa tyin quívi jaha canaa ra Cristo tandihí can, tacan tan maa ra, tsa cuví ra Sehe Nyoo, cua nacuhva cuenda nyico ra tandihí tsa tsaha Nyoo tsi ra. Tyin tacan tan cundaca ñaha Nyoo tandihí maa tsa iyó.

²⁹ Tun tsatyin ña nandoto ndiyi, ¿nacuenta tyin juhva nyívi tsicoondutyá ñi tsa cuenda ndiyi? ¿Tan nacuenta javahá ñi tyehen tun ña tsinú iñi ñi tyin coo quívi cua nandoto ndiyi?

³⁰ Tan tacan tucu maa ndi, tun ña cua nandoto ndi, ¿nacuenta tyin ndoó ndi vaha tsa nyehé ndi tundoho ndihí quívi ñi? ³¹ Tandihí ñi quívi nducú nyívi tsi yu cahñi ñi, tan tsa nditsa cuví tsi, yañi, tumaa tsa nditsa tsa sii cuñí yu tsihin ndo, tsa cuenda tsa tsinú iñi ndo tsi Jutu Mañi yo Jesucristo. ³² Nduve náa catyí tsa nyehe yu tundoho tsa cuñí cahñi nyívi tsi yu ñuu Efeso tun ña cua nandoto yo. Tatun tacan, nditsa maa tsa caahán nyívi: “Catsi yo, coho yo tyin tyaan isa cua cúu yo”, catyí ñi tsa ña tsitó.

³³ Tan catyí tucu ñi tyin: “Tun cutahán yo tsihin nyívi caquiñi jatívi ñi cuhva vaha iyó yo.” Tan tsehe cuví tsa nditsa. Yacan jaha ndo cuenda tsi ndo tan ña cuhva ndo tsa jandavi ñaha nyívi tsi ndo. ³⁴ Jaha ndo cuenda cuhva iyó ndo, tan ña javaha ca ndo tsa caquiñi. Tyin tsihin tsa javahá ndo tan nacotó yu tyin ña tsitó ndo tsi Nyoo. Caahán yu tyehen tsihin ndo na nducahan nuu ndo.

Nu jacuahá ra Pablo nácaa cua janandoto Nyoo tsi yo quívi quítsi nyico ra Cristo

³⁵ Maa tyin yihí ndo cua ndaca tuhun ndo: “¿Nacaa cua nandoto ndiyi? ¿Nacaa cuñu ñuhu ñi cua cuví?” ³⁶ ¿Nacaa tsa soho xaan ndo? ¿A ña tsitó ndo tyin tatun tatsi yo iin tsiti, cuñi tsi tsa tyahyu jihna tsi? Tacan tan cana nuu tsi. ³⁷ Tyin tsa tatsi yo nuñi, ñavin tsa cuví maa tsi itu tan tatsi yo. Tyin nuñi cuví tsi tatsi yo tan tacan ñi cuñi tucu yo tsihin náa inga ca tsiti. ³⁸ Nyoo javahá ra nácaa cuñi maa ra tsihin tsa intuhun intuhun tsiti can, yacan cuenda tsa cana tsi cuví tsi tsa taahán maa tsi cuví tsi. Tan ña cuví nanduví tsi inga ca tsiti. ³⁹ Tan tacan

tandihí cuñu ñuhu, ña inducu caá tsi, tyin cuñu ñuhu nyivi, siin caá tsi, tan cuñu ñuhu quiti nahnu, siin caá tucu can, tan cuñu ñuhu saa, siin caá tucu yacan, tan tyaca siin caá tucu can. ⁴⁰ Tan tacan tucu tsa iyó andivi, siin caá tsi. Tan siin caá tucu tsa iyó nu ñuhu ñayivi ihya. Sií xaan caá tsa iyó nda andivi, tan siin tyaqui tucu tsa iyó nu ñuhu ñayivi ihya. ⁴¹ Tsa nditsin ñicanyii, tan tsa nditsin yoo ña inducu tsi. Tan ña inducu tsi tsihin tsa nditsin tiñuu. Tan tsa nditsin tiñuu ña inducu tsi tsihin inga nyico tiñuu. ⁴² Tan tacan tucu tuhun tsa cua nandoto ndiyi. Tuhvá yo tsicutsí cuñu ñuhu tan tyaahyú tsi. Maa tyin tsa cua nandoto yo ña cua cúu ca yo. ⁴³ Cuñu ñuhu tsa iyó tsi yo vityin nduve tunyee iñi iyó tsi can, nacuhví can, tan tsiihí can. Maa tyin cua nandoto iin tsa sií caá tan iyó ca tunyee iñi tan ña cua cúu ca can. ⁴⁴ Tsa tsiihí yo tsicutsí yo cuñu ñuhu tsa naquihín yo nu ñuhu ñayivi ihya. Maa tyin tsa cua nandoto yo cua cuhva Nyoo inga cuñu ñuhu tsi yo. Iyó cuñu ñuhu cuenda nu ñuhu ñayivi. Tan iyó tucu cuñu ñuhu cuenda gloria.

⁴⁵ Catyi tutu Nyoo tyin ra Adán ra tsa tsicoq tsa jihna ñi, tsaḥa Nyoo ñayivi coo ra. Tan ra Cristo cuví ra tumaa ra Adán maa tyin ñavin cuñu ñuhu tsaḥa ra tsi yo tyin tsaḥa ra ñayivi nyito coo yo, tyin juven ra cuví Tatyí Ií. ⁴⁶ Tsa jihna ñi taahán tsi coo yo tsihin cuñu ñuhu cuatyí yo, yaha can tan coo yo cuenda Tatyí Ií Nyoo. ⁴⁷ Rayii tsa tsinú tsa jihna ñi, tsihin nyaca ñuhu tsinú ra. Tan cuví ra cuenda ñuhu ñayivi. Maa tyin ra Cristo cuví ra tumaa rayii tsa tsinú uví tan cuví ra cuenda gloria. ⁴⁸ Tandihí yo iyó cuñu ñuhu yo tumaa tsicoq cuñu ñuhu ra Adán tsa tsinú tsihin nyaca ñuhu. Maa tyin tsa cua nandoto yo cuñu ñuhu yo cua nanduvi tsi tumaa cuñu ñuhu ra Cristo ra iyó nda andivi. ⁴⁹ Tumaa ndacu yo tsi rayii, ra tsa tsinú tsihin nyaca ñuhu, tacan tucu cua ndacu yo tsi ra Cristo ra iyó nda gloria.

⁵⁰ Tan cuñí yu cahan yu tsihin ndo, yañi, tyin cuñu ñuhu yo ña cuví quihví tsi nu ndacá ñaha Nyoo, tyin iin tsa yatyi tiví ña cuví quihví can nu yihí tsa ña tuhvá tiví. ⁵¹ Tan cuñí tucu yu tsa coto ndo iin tsa xeehe tsa yofi maa tsitó. Ña tandihí yo cua cúu, maa tyin tandihí yo tan cua nasama cuhva caá yo. ⁵² Tan nu cua ndihí tiví ángel trompeta, cua nandoto ndiyi iin yaha cuíi ñi tumaa tsa ndaahvá tinuu yo. Tyin cua tiví ra trompeta tan cua nandoto nyivi tsihi tsa ña cua cúu ca maa. Tan Nyoo cua nasama ra cuhva caá yo tun ndi iyó ca yo. ⁵³ Tyin cuñí tsi tsa nasama Nyoo cuñu ñuhu yo tsihin iin tsa ña cua naa maa. ⁵⁴ Tan quivi cua nasama cuñu ñuhu yo tan cua ñihí yo iin tsa ña cua tiví maa, cua cundaa tsa caahán tuhun Nyoo nu catyi tsi tyehen:

“Nyoo jahá canaa ra tsi tuhun tsiihí.”

⁵⁵ Yooho, Tuhun Tsiihí, ¿náa tunyee iñi tsa tsicoq tsi un tyin cahñi un tsi ndi?

¿Náa jahá canaa un, yooho Tuhun Tsiihí?

⁵⁶ Tyin cuatyí yo tsaḥa can tsa cahñi tuhun tsiihí tsi yo, tyin ley tsaḥu tsaḥa tunyee iñi tsi can. ⁵⁷ Maa tyin yahví nyoo tsi Nyoo, yañi, tyin jaquitsi ra tsi Jutu Mañi yo Jesu-cristo tan tsaḥa ra tunyee iñi tsi yo tsa jahá canaa yo tsi nu tuhun tsiihí can.

⁵⁸ Yacan cuenda yañi, cunya naa vaha ndo tsi Nyoo tsihin tsa ñi iñi añima ndo. Tan jañihí ca ndo jahá tyiñu ndo tyiñu Jutu Mañi yo. Tyin tun jahá tyiñu yo tyiñu Jutu Mañi yo, ña jahá tyiñu cuatu yo.

16

Nu tsaḥa cuenda ra Pablo tsi nyivi nácaa taahán tsi jatinyee ñi tsi inga ñi yihí cuenda Nyoo

¹ Tan tuhun tsa jatinyeeé ndo xuhun tsi nyivi ndaahvi, ñi yihí cuenda Nyoo, javaha ndo tumaa tsaḥa cuenda yu tsi nyivi tsicá vehe ñuhu ñuu tsa cayucú Galacia. ² Jandu iin ndo xuhun tsa taahán tsi cuhva ndo tsi ñi tahan tahan una quivi nácaa tsaḥa maa Nyoo tsi ndo. Tan ña cuatu ndo nda tsaá yu. ³ Tan nacatsi ndo ndáa ra cuñí maa ndo tyin cundaca xuhun can. Tan tsa tsaá yu, cua javaha yu iin carta tyin cundaha ndihí ra naha tan jacuhun yu tsi ra naha tyin cundaca ra naha can tsi ñi tsicá vehe ñuhu Jerusalén. ⁴ Tan tatun tahan tucu tsi tsa cuhun yu, cuhun ra naha tsihin yu.

Nu caahán ra Pablo ndáa ndihí nu cua cahan ra tuhun ra Cristo

⁵ Tsa cua quitsi yu nu yucú ndo ñuu Corinto, cua yaha yu ityi Macedonia. ⁶ Tatun cuhva tsi cuhva cua ndoo yu tsihin ndo nda cuanda yaha yoo vitsin, tacan tan cuví jatinyeeé ndo luxu tsi yu tan cuhun yu inga ñuu. ⁷ Ña iin yaha ñi cua yaha yu nu yucú ndo tyin cuñí yu ndoo yu juhva quivi tsihin ndo tatun Jutu Mañi yo tan cuñí ra. ⁸ Maa tyin cua cunyi yu ñuu Éfeso ihya nda cuanda yaha quivi vico Pentecostés tsa jacahnú nyivi Israel. Tacan tan cua quitsi yu nu yucú ndo. ⁹ Cua ndoo yu juhva quivi ihya tyin tsaḥa xaan tsi cuhva caahán yu tuhun Nyoo tsihin nyivi vasu ndi maa cuaha ñi ña taahán iñi ñi tuhun ra.

¹⁰ Tatun tsaá ra Timoteo nu yucú ndo, na cunyi ra tsihin ndo. Tan vaha tyánuu ndo tsi ra tyin juven ñi tyiñu Jutu Mañi yo jahá tyiñu ra tumaa maa yu. ¹¹ Tan vaha cuñi ndo nyehé ndo tsi ra. Tan jatinyeeé ndo tsi ra na quitsi ra nu nyii yu tyin ndatú yu tsi ra tsihin inga ca ra yañi yo naha ra.

¹² Tan ra Apolos yañi yo, cahan ndaahvi xaan yu tsihin ra na quitsi ra nu yucú ndo

tsihin inga ca ra yañi yo naha ra. Maa tyin ña cuñi ra quitsi ra. Catyí ra tyin quitsi maa ra nda cuhva tsi cuhva tsi ra.

Nu tshá ra Pablo nacumi tsi tandihi nyivi yihí cuenda Nyoo ñuu Corinto

¹³ Jañihi ca ndo tsinú iñi ndo tsi Nyoo. Tan jandu iin ca ndo iñi ndo, tan na coo ca tunyee iñi Nyoo tsi ndo. ¹⁴ Tandihí tsa javahá ndo, javaha ndo tsa cuenda tsa cuñi ndo tsi Nyoo tan tsi nyivi yihí cuenda ra.

¹⁵ Yañi, tsitó ndo tyin jhna ca nyivi ra Estéfanos natsinú iñi tsi ra Cristo ityi Acaya nu yucú ndo. Tan vityin javahá ñi tyiñu nuu ra hermano. ¹⁶ Tan cuñi yu tsa jaha ndo tsa ñayivi tsi nyivi tsa iyó tumaa iyó nyivi ra Estéfanos, tan tsi tandihi ca ñi tsa jatyinyeé tan jahá tyiñu cuenda Nyoo. ¹⁷ Tan sii xaan cuñi yu tyin quitsi ra Estéfanos, ra Fortunato, tan ra Acaico. Tan jatyinyeé ra naha tsi yu tyin nyooho ña cuví quitsi ndo tyin cañi xaan ñuu ndo. ¹⁸ Maa tyin maa ra naha quitsi ra naha. Tan jandunyeé ca ra naha iñi yu tsihin tuhun Nyoo, tumaa tsa jandunyeé tucu ra naha iñi nyooho. Tan vaha cuñi ndo nyehé ndo tyiñu jahá ra naha tyin iin ñi tsi maa Nyoo nyicún ra naha.

¹⁹ Tan vatsí nacumi tsi ndo jahá tandihi nyivi yihí cuenda Nyoo ñuu tsa cayucú Asia ihya. Tan vatsí tucu nacumi tsi ndo jahá ra Aquila tan ña Priscila, tan ñi yihí cuenda Nyoo tsa ndu iin yuvehe ñi. ²⁰ Vatsi nacumi tsi ndo jahá tandihi ra yañi yo, tan cuhva ndo nacumi tsi tsa intuhun intuhun ndo nu yucú ndo juvin.

²¹ Tan yuhu ra Pablo tshá yu nacumi tsi ndo tan tyaa yu itsi tsihin ndaha yu.

²² Tatun ndáa nyivi ña cuñi tsi Jutu Mañi yo Jesucristo, na cuhun ñi anyaya. Maa tyin yuhu catyí yu: ¡Jutu Mañi yu, naha!

²³ Tan na nasoco Jutu Mañi yo Jesucristo tsi tandihi ndo. ²⁴ Tan catyí yu tsihin ndo tyin yuhu cuñi yu tsi tandihi ndo tsa cuenda ra Cristo Jesús.

Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Nyivi Yihí Cuenda Nyoo Ñuu Corinto

*Nu tyaá ra Pablo iin carta cuenda nyivi
yihí cuenda Nyoo ñuu Corinto*

¹ Yuhu ra Pablo, cuví yu iin ra tava tyiñu ra Cristo Jesús tyin maa Nyoo nacatsí tsi yu. Yuhu tan ra Timoteo, yañi yo, jaquitsí ndi carta ihya tsi ndo tsa cuví ndo nyivi yihí cuenda Nyoo tsa iyó ñuu Corinto tsa canyii Acaya, tan tsi tandihí ca nyivi yihí cuenda Nyoo tsa iyó inga ñuu tsa cayucú nanii cahnú Acaya. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

*Nu nyehé xaan ra Pablo tundoho nu tsicá
ra caahán ra tuhun ra Cristo*

³ Na jacahnu yo tsi Nyoo Jutu ra Jesucristo Jutu Mañi yo. Tyin juvin ra cuví Nyoo Jutu yo. Tan cundaahví xaan iñi ra nyehé ra tsi yo. Tan jandusí ra iñi yo tandihí ñi tsaha. ⁴ Nyuhu nyehé xaan ndi tundoho maa tyin maa ra jandusí iñi ndi. Tyin tacan tan cuví jandusí ndi iñi nyivi nyehé tundoho tumaa jandusí maa ra iñi ndi. ⁵ Tyin nyehé ndi tundoho tsa cuenda ra Cristo, tan juvin ñi tsa cuenda ra jandusí Nyoo iñi ndi. ⁶ Yacan cuenda tatun nyehé ndi tundoho tsa cuenda tsa jacotó ndi tuhun ra Cristo tsi ndo, nyehé ndi tundoho tsa cuenda tsa vaha tsi ndo tyin tacan tan jandusí Nyoo iñi ndo, tan jacacu ra tsi ndo. Tatun jandunyeé Nyoo iñi ndi, javahá ra tacan tyin tacan tan ndunyeé tucu iñi nyooho tan jacacú ra tsi ndo tan cuví cunyeé iñi ndo nyehé ndo tahan tundoho nyehé ndi. ⁷ Tyin tsitó vaha ndi tyin jandusí ra iñi ndo tyin nyehé ndo tundoho tsa cuenda ra Cristo tumaa tsa nyehé tucu nyuhu tundoho.

⁸ Yañi, cuñí ndi tsa coto ndo tyin cuaha xaan tundoho nyehé ndi tsa tsiyucú ndi ñuhu Asia. Ñihi xaan nducú cuhva nu ña vaha tsi ndi tan tsicá iñi ndi tyin ña cua cunyeé maa iñi ndi cuyucu ndi ican. Tan cuñi maa ndi tyin cua cúu ndi tsa ndi cumañi ca quita ndi ican. ⁹ Tsa nyehé ndi tyin tsa cuñi cúu ndi tan ña cuví jacacu ndi tsi ndi tsihin tunyeé iñi maa ndi. Tacan tan cutuñi iñi ndi tyin cuñi tsi tsa cuita ca iñi ndi tsi Nyoo, ra janandotó ndiyi, tan ña cuita iñi ndi tsi maa ndi. ¹⁰ Nyoo jacacú tsi ndi quivi can, tan juvin ra jacacú tsi ndi nda cuanda vityin. Tan tsitó ndi tyin tacan ñi maa cua jacacu ra tsi ndi, ¹¹ tun nyooho tan ña jandihí ndo tsa

jatyinyeé ndo tsi ndi tsihin tsa tsicán tahvi ndo tsi ra tsa cuenda ndi. Tyin tatun cuaha nyivi tsicán tahvi tsa cuenda ndi, tsa cua ñihi tuhun ñi tyin tsahá xaan Nyoo tsa vaha tsi ndi, cuaha ñi tan cua cuhva ñi tyahvi nyoo tsi Nyoo.

*Nu caahán ra Pablo nacuenda ña tsahán
ra ñuu Corinto*

¹² Iyó iin tuhun tsa tsahá tsa sii xaan cuñí ndi tan tuhun ihya cuví tsa cuiti iyó ndi, tan ndaa iyó ndi tsihin tandihí nyooho, tan tsihin tucu inga ca nyivi. Maa tyin ñavin tsihin tsa tsiñi tuñi maa ndi iyó ndi tacan, iyó ndi tacan tsa cuenda tyin maa Nyoo tsahá tsa vaha tsa iyó tsi ra tsi ndi. ¹³⁻¹⁴ Nu tutu tsa tsa yaha jaquitsí ndi tsi ndo, tyaá ndi maa ñi maa tuhun tsa cuví cahvi ndo tan cuví cutuñi iñi ndo. Vityin tsa tsa cutuñi iñi ndo juhva. Tan cuñí ndi tsa cutuñi vaha ca iñi ndo tandihí tuhun can tyin tacan tan sii cua cuñi ndo tsihin ndi quivi quitsi Jutu Mañi yo Jesucristo. Tan sii cua cuñi tucu nyuhu tsihin nyooho.

¹⁵⁻¹⁶ Tsa cuenda tsa tsitó vaha yu tyin tacan cua cuví: tyaá yu cuhva tyin tsa cua cahun yu Macedonia tan cua yaha jihna yu nu yucú ndo. Tan quitsi nyico yu nu yucú ndo tsa yaha cahun yu Macedonia tyin tacan tan cuví cusii iñi ndo. Tan tsicá tucu iñi yu tyin yaha can tan cuví jatyinyeé ca ndo tsi yu tan cahun yu Judea. Tyehen tyaá yu cuhva javaha yu, maa tyin ña cuví. ¹⁷ ¿A cuñí maa ndo tyin ña tyaá yu cuhva quitsi yu nu yucú ndo? Ñavin. Tyin yuhu ña javahá yu tumaa javahá nyivi tuhvá jandaví ñaha. Catyi ñi tyin vaha, maa tyin tsitsi añima ñi catyi ñi tyin ña vaha. Caahán ñi nduvi tuhun can tsa iin ñi cuhva. ¹⁸ Tsitó maa Nyoo tyin nditsa tsa caahán yu tsa ña tuhvá yu javaha tumaa javahá ñi can; ñavin jandaví ñaha yu. ¹⁹ Tyin ra Silvano, ra Timoteo tan yuhu, maa ñi tuhun ra Cristo sehe Nyoo caahán ndi. Ra Cristo ña caahán ra tumaa tuhvá nyivi can caahán; maa ñi maa tsa nditsa caahán ra. ²⁰ Tan tsa cuenda ra ñihi yo tandihí tsa vaha tsa catyi Nyoo tyin cuhva ra tsi yo. Yacan cuenda tsa jacahnú yo tsi Nyoo, catyi yo tyehen: “Na cuví tsi tacan”. Tyin tsitó yo tyin tsahá ra tsa vaha tsi yo tsa cuenda ra Cristo. ²¹ Nyoo cuví ra tsahá tunyeé iñi tsi nyuhu tsa cuenda ra Cristo, tan tsahá ndihí tucu ra tunyeé iñi tsi nyooho. Nacatsí ra tsi yo, ²² tan tsahá ra Tatyí Ii ra coo añima yo, tan cuví tsi tumaa iin tuñi tsa tyaá ra tsi yo tan janahá tsi tsi yo tyin cua ñihi yo tsa cua cuhva ra tsi yo.

²³ Ñaha ca maa quitsi nyico yu nu yucú ndo, tyin ña cuñí yu janducuihaya yu iñi ndo. Tsitó maa Nyoo tyin nditsa tsa caahán yu. Tan tatun ña nditsa yu, na nyehe maa Nyoo náa cuñi ra tsihin yu. ²⁴ Caahán ndi

tandihí tuhun ihya tsihin ndo tsa cuenda tsa cuñí ndi jatyinyee tahan yo tsi yo tan coo ca tusí ñi Nyoo tsi ndo. Ña cuñí ndi quíhi ndaha ndi tsi ndo tyin nyoocho tsa tsinú vaha maa ñi ndo tsi Nyoo.

2

¹ Yacan cuenda ña cuñí yu quítsi yu tyin tacan tan ña cuhva ca yu tucuihya ñi tsi ndo. ² Tyin tatun yuhu tan janducuihyá yu ñi ndo, yofí cua jandusí ñi tsi maa yu. Tyin nyoocho ña cuví ca jandusí ndo ñi yu tun tsa yaha janducuihyá yu ñi ndo. ³ Yacan cuenda carta ñi jaquítsi yu tsi ndo. Ña cuñí yu quítsi yu tyin ña cuñí yu janducuihya ndo ñi yu tsihin cuhva iyó ndo. Tyin taahán tsi jandusí ndo ñi yu. Tyin tatun sí cuñí yuhu, tsitó yu tyin tandihí yo tan sí cuñí yo. ⁴ Quívi tsa tyaa yu carta can tsa cuenda ndo, tsicá xaan ñi yu. Cuihya xaan cuñí yu tan nda cuanda tsacú yu. Jaquítsi yu carta can tsi ndo maa tyin ñavin tsa cuenda tsa janducuihya yu ñi ndo. Jaquítsi yu can tsa cuenda tsa cuñí yu tsa coto ndo tyin cuñí xaan yu tsi ndo.

Nu tsahá cuenda ra Pablo tsi nyívi nácaa taahán tsi jaha ñi tucahnu ñi

⁵ Ra tsa tsahá tucuihya ñi, ñavin yuhu ñi janducuihyá ra ñi. Tyin janducuihya tucu ra luxu ñi nyoocho. Caahán yu tyehen tyin tacan tan ña cuñí ndo tyin ña cuví coo tucahnu ñi tsi ra javahá tacan. ⁶ Tsa iyó vaha ñi. Ña çahan ca ndo tsi ra can. Ña tatsi tuñi ca ndo tsi ra. ⁷ Vityin taahán tsi jaha ndo tucahnu ñi tsi ra tan naquihin ndaahvi ndo tsi ra, tyin tacan tan ña cuihya xaan ca cuñi ra. ⁸ Yacan cuenda cuñí yu tsa cahan ndo tsihin ra tan janaha ndo tsi ra tyin ndi cuñí ndo tsi ra. ⁹ Jaquítsi yu carta can tsi ndo quívi can tyin cuñí yu coto yu tatun cua tyaa yahvi ndo tsa tsahá cuenda yu tsi ndo. ¹⁰ Tan vityin nyívi tsa jahá nyoocho tucahnu ñi, jahá tucu yuhu tucahnu ñi tsi ñi. Tatun iyó ñi tsa taahán tsi jaha yo tucahnu ñi, jahá yu tucahnu ñi tsi ñi tsa cuenda tsa vaha tsi maa ndo. Tacan javahá yu nuu ra Cristo. ¹¹ Tyin tacan tan ña cuví jaha canaa nu ña vaha tsi yo. Tyin tsitó vaha yo nácaa cuñí nu jandavi ñaha nu tsi yo.

Ra Pablo ña ndoo ra ñuu Troas tyin ña nañihí ra tsi ra Tito

¹² Quívi tsaá yu ñuu Troas tsa cua cahan yu tuhun tsa jacacú ra Cristo tsi yo, tsahá xaan tsi cuhva tsi yo tsa jahá tyíñu yu tyíñu Jutu Mañi yo. ¹³ Maa tyin tuñu xaan cuñí yu, tyin ña nañihí yu tsi ra Tito, yañi yo. Yacan cuenda vatsi yu ityi Macedonia ihya tan ña ndoo yu ndacan cahan yu tsihin nyívi.

Nu caahán ra Pablo tuhun ra Cristo tsihin tsa ñi ñi aña

¹⁴ Maa tyin tyahvi nyoo tsi Nyoo tyin tacan ñi jahá canaa yo tsihin tunyee ñi ra Cristo Jesús tan tsahá ra tsa caahán ndi tuhun ra tsihin nyívi. Tan tuhun ra tsa caahán ndi, cuví tsi tumaa iin xico tami tsa caná tandihí ñi ityi nu cuahán ndi. ¹⁵ Tyin nyuhu cuví ndi tumaa xico tami ra Cristo tsa cuenda Nyoo. Tan tandihí ñi ityi cuahán ndi tan ñihí nyívi xico tami can, tahan ñi nyívi tsa cua cacu tan ñi tsa ña cua cacu. ¹⁶ Maa tyin tsa cuenda nyívi tsa ña cua cacu, ndasi caná tsi, tan cuñí maa ñi tyin tuhun tsa jacotó ndi tsi ñi caná tsi tumaa caná xico ndiyi. Tyin jacotó ndi náa cua tahan ñi tyin ña tsinú ñi ñi tsi ra Cristo. Maa tyin tsa cuenda nyívi tsa cua cacú, tami xaan tsi, tyin jacotó ndi nácaa cua coo ñi ñayívi tsa ña cua naa maa. Maa tyin çyóo cuví jaha tyíñu tyíñu ihya? ¹⁷ Nyuhu ña javahá ndi tumaa javahá ra tsicá nuu cuaha naha ra. Ra ican naha ra cuñí ra naha xuhun. Maa tyin ña taahán tsi xico yo tuhun ra Cristo. Nyuhu caahán ndi tuhun ra tsihin tsa ñi ñi aña ndi tyin iin ñi cuví ndi tsihin ra tan maa Nyoo tava tyíñu tsi ndi tsa cahan ndi tyin cuenda ra Cristo yihí ndi.

3

Tuhun tsa tsa ndoo ra Cristo tsihin yo

¹ Tsa caahán ndi tuhun ihya, ¿a cuñí maa ndo tyin caahán ndi tacan tsa cuñí ndi nduyaa ndi? Ñavin. ¿A cuñí tsi cuhva ndi iin carta tsa catyi tyin vaha nyívi cuví ndi? ¿O cuñí tsi ndacan ndi carta tsi ndo tumaa javahá juhva nyívi? ² Ña cuñí tsi. Tyin tsa tyaa Nyoo tsi ndo aña ndi, tan maa ña cuví carta tsa cuenda ndi. Yacan cuenda ña tsiñí ñuhu ca carta tsi ndi. Tyin tsihin tsa nyehé nyívi nácaa nasamá Nyoo cuhva iyó ndo, tan tsitó ñi tyin maa ñi maa tsa vaha jacuahá ndi tsi ndo. ³ Tan catsi nyehé ñi tyin cuví ndo carta tsa tyaa ra Cristo tsa cuenda ñi, tan nyuhu nacuhvá cuenda ndi carta can tsi ñi. Tan ña tyaa ra Cristo itsi tsihin tyinta maa tyin tyaa ra itsi tsiñi aña ndo tsihin Tatyí Ií Nyoo nyito. Tan ñavin nu yuu tsinyaa tsi.

⁴ Caahán ndi tyehen tyin tsitó vaha ndi tyin Nyoo cua cuhva ra tsa quita vaha tyíñu javahá ndi, tyin jatyinyee ra Cristo tsi ndi.

⁵ Ña cana ñi ndi caca ñi ndi tyin javahá ndi náa javahá ndi tsihin tunyee ñi maa ndi. Tyin tsitó ndi tyin tandihí tsa javahá ndi tan maa Nyoo javahá can. ⁶ Tan tsahá ra tunyee ñi tsi ndi tsa cahan ndi tuhun ra Cristo, tan tuhun ihya cuví tuhun tsa tsa tsahá ñayívi tsa coo yo tyin iyó Tatyí Ií ra aña yo. Ley tsa tsahá Nyoo tsi ra Moisés ña tsahá tsi ñayívi tsa coo yo tyin janahá ñi tsi tsi yo tyin iyó cuatyí yo tan taahán tsi cúu yo.

⁷ Ley tsahnu can tsinyaa nu yuu tsihin letra, tan cahnu xaan cuví tsi. Yacan cuenda tsa tsaá ra Moisés tsihin tsi nu yucú nyívi Israel, nayuhví xaan ñi nyehe ñi nuu ra tyin xiñu xaan nuu ra cuví. Maa tyin tsindihí tsa xiñu can. Tatun tacan cuví quiví quitsí ley tsa tsahá tuhun tsihihí, ⁸ iyaha ca cahnu cuví tuhun tsa ndoó Nyoo tsihin yo tsa tsahá Tatyí li ra tsi yo! ⁹ Tatun cahnu cuví ley tsahnu tsa jacuhún tsi yo anyaya, yaha ca cahnu cuví tuhun tsa tsa ndoo Nyoo tsihin yo tyin janduvahá tsi tsi yo nuu ra. ¹⁰ Nditisa tyin cahnu cuví ley tsahnu can. Maa tyin vityin tsitó yo tyin yaha ca cahnu cuví tuhun ra Cristo tsa jacacú tsi yo nuu Nyoo. ¹¹ Tyin tatun cahnu cuví tsa tsicoq juhva ñi tyembu, yaha ca cahnu cuví tsa ña cua cundihi maa.

¹² Tsitó vaha ndí tyin ña cua cundihi tsi. Yacan cuenda caahán ndi tsihin tsa ñi ñi añima ndi. Ña cahan nuu ndi tan ña yuuhví ndi caahán ndi. ¹³ Tan ña javahá ndi tumaa javahá ra Moisés. Tyin ra Moisés tyasi ra nuu ra tsihin jahma, tyin tacan tan ña nyehe nyívi Israel nu cu naa tsa xiñu nuu ra. ¹⁴ Quiví can ña cutuñí ñi ñi. Nda cuenda vityin tan ña cutuñí ñi ñi. Tyin tatun cahví ñi ley tsahnu ña cutuñí ñi ñi itsi tyin ndasí tsa tsiñi tuñi jiñi ñi tumaa tsindasi nuu ra Moisés quiví can. Yoñi maa cuví jatsiyo yacan tyin intuhun ñi maa ra Cristo cuví jatsiyo can. ¹⁵ Nda cuenda vityin tan ña cutuñí ñi ñi ley tsa tyaá ra Moisés tun cahví ñi itsi. Tyin ndasí tsa tsiñi tuñi ñi ñi. ¹⁶ Maa tyin tatun nacuhva cuenda ñi tsi ñi tsi Jutu Mañi yo, maa ra cua nuña tsa tsiñi tuñi ñi ñi. ¹⁷ Tyin Jutu Mañi yo, Tatyí li cuví ra. Tan tatun iyó Tatyí li Jutu Mañi yo añima yo, tsitó yo tyin ña yihí ndaha ca ley tsahnu tsi yo. ¹⁸ Yacan cuenda tandihí yo tan ña ndasí ca nuu yo. Tan vityin cuví yo tumaa inu, tyin cuví nyehe nyívi tsa cahnu cuví Jutu Mañi yo jahá yo. Tan cuahán nduvahá ca yo jahá Tatyí li ra.

4

¹ Nyoo nyehe ndaahvi ra tsi ndi, tan tava tyiñu ra tsi ndi tsa cahan ndi tuhun ra tsihin nyívi yacan cuenda ña ndu uvi ñi ndi. ² Tandihí tsa javahá ndi, ña tuhvá ndi javahá xeehe itsi, tan ndi ña javaha ndi tsa tsahá ticanuu. Ña tsicá nuu ndi jandaví ñaha ndi tsi nyívi. Maa ñi maa tuhun Nyoo jacuahá ndi. Ña sacá nuu ndi tuhun Nyoo tsihin inga ca tuhun. Tan caahán ndaahvi ndi tsihin tandihí ñi nyívi, na jaha vaha ñi cuenda tyin tandihí tsa caahán ndi, tan nda maa nuu Nyoo javahá ndi, tan maa ñi maa tsa nditsa cuví tsi. ³ Nyuhu ña tyihí xeehe ndi tuhun Nyoo. Maa tyin yihí xeehe tsi tsa cuenda nyívi ndasí tsa tsiñi tuñi ñi, ñi tsa cua cunaa. ⁴ Nu ña vaha, nu ndacá ñaha tsi nyívi iyó nu

ñuhu ñayívi ihya, juven nu tyasí tsa tsiñi tuñi ñi ñi, tyin tacan tan ña tsinu ñi ñi tsi Nyoo, tan ña nyehe ñi tsa nditsin ra, tan ña cutuñi ñi ñi nácaa jacacú ra Cristo tsi yo, ra iin ñi cuví tsihin Nyoo. ⁵ Ñavin tuhun maa ndi caahán ndi. Tyin tuhun ra Jesucristo caahán ndi tsihin nyívi tyin juven ra cuví Jutu Mañi yo. Tan nyuhu musu ñi ndo cuví ndi tyin cuñi ndi tsi ra. ⁶ Nyoo catyí tyin ndunditsin nu naa quiví tsinu ñuhu ñayívi. Tan juven ñi ra jandunditsin tsitsi añima yo tsihin ñuhu ra tyin tacan tan tsihin tsa nditsin can cuví coto yo tsa cahnu cuví ra tsa nduxiñú nuu ra Cristo.

Iyó yo ñayívi tsa tsihin tsa tsinú ñi yo tsi Nyoo

⁷ Tsa cuca Nyoo, tsa cuví tunyee ñi cahnu ra, yihí tsi tsitsi cuñu ñuhu yo tan nasamá tsi cuhva iyó yo tyin cuví yo tumaa quisi ñuhu tan naquihín yo itsi. Juvín tsi janahá tsi nyívi tyin maa Nyoo tsahá tunyee ñi ra tsi yo tan ñavin tunyee ñi maa yo cuví tsi. ⁸ Yacan cuenda vasu ndi maa nyehe xaan ndi tundoho tandihí ñi nu cuahán ndi, ña ndu uvi ñi ndi. Yihí tsaha ña tsitó ndi nácaa quita ndi nu tundoho nyehe ndi, maa tyin nyitá ñi ndi tyin cua quita vaha ndi. ⁹ Vasu ndi maa nyaá ndaha nyívi tsi ndi, maa tyin ña nacoo ihñi Nyoo tsi ndi, tacan ñi iyó maa ra tsihin ndi. Nduvá ihñi ndi jahá nyívi, maa tyin ña tsihihí ndi. ¹⁰ Tandihí ñi nu cuahán ndi tan nyicún tuhun tsihihí tsi ndi tsa cuenda tsa caahán ndi tuhun ra Jesús. Tyin tacan tan nyehe nyívi tyin iyó ndi ñayívi ra. ¹¹ Tsitsi tsa ndi iyó ndi nu ñuhu ñayívi ihya tandihí ñi quiví tan ndatú ndi tuhun tsihihí tyin tandihí ñi quiví tan nducú nyívi cahñi ñi tsi ndi tsa cuenda ra Cristo. Tan tsihin tsa taahán ndi janahá tyin iyó ñayívi ra añima ndi. ¹² Yacan cuenda nyuhu tandihí ñi tsaha nyicún tuhun tsihihí tsi ndi tyin caahán ndi tuhun ra Cristo tsihin nyívi. Maa tyin nyoooho, iyó ndo ñayívi ra Cristo tsa cuenda tuhun ra tsa cahán ndi tsihin ndo.

¹³ Tsinú ñi ndi tsi Nyoo tumaa tsinu ñi ra David tsi ra. Tumaa catyí ra nu libru Salmos: “Tsinú ñi yu tsi Nyoo, yacan cuenda caahán yu tuhun ra”. Tacan tucu nyuhu; tsinú ñi ndi tsi Nyoo, yacan cuenda caahán ndi tuhun ra. ¹⁴ Tyin tsitó ndi tyin Nyoo, ra janandoto tsi Jutu Mañi yo Jesucristo, cua janandoto ndihí ra tsi ndi. Tan cua ndu iin ndo tsihin ndi, tsahan cua cundaca ra tsi yo iin caa ñi nda gloria. ¹⁵ Tandihí tuhun ihya cuví tsa cuenda tsa vaha tsi nyoooho tan tsa vaha tsi cuaha ca nyívi. Tyin tun cuaha ndo naquihín tsa vaha Nyoo, cuaha xaan ndo cua nacuhva tyahví nyoo tsi ra, tan cua jacahnu ndo tsi ra.

¹⁶ Yacan cuenda ña ndu uvi maa ñi ndi, vasu ndi maa cuahán ndutsahnú cuñu ñuhu

ndi, tyin ñayivi tsa tsa iyó ndi ndutsaa tsi tan iin tan iin quivi. ¹⁷ Tundoho tsa nyehé ndi nu ñuhu ñayivi ihya, tsa yahá ñi maa cuví tsi. Tan tsahá tsi tsa coo cuii ndi tsihin Nyoo nda gloria. ¹⁸ Yacan cuenda ña tyaá iñi ndi tsa cuví nyehé yo. Tyin nyitá iñi ndi tsa ña cuví nyehé yo. Tyin tsa cuví nyehé yo juhva cuii ñi tyembu tsicoó can. Maa tyin tsa ña cuví nyehé yo, ña cua cundihi maa tsa iyó tsi.

5

¹ Tsitó yo tyin quivi cúu yo, cua tyahyu cuñu ñuhu yo. Tyin cuví tsi tumaa iin vehe tsa tañi ñi tsicoó. Maa tyin Nyoo cumí vaha ra inga cuñu ñuhu tsa ña cua cundihi maa tsa cuenda intuhun intuhun yo. Tan ican cua cuyucu añima yo. Iyó can nda gloria tan ñavin ra ñuhu ñayivi ihya javahá can. ² Nditsa tyin tsitsi tsa ndi iyó yo tsitsi cuñu ñuhu yo, caahán yuhu yo tyin tsa cuñi yo cuhun yo coo yo tsitsi cuñu ñuhu vaha tsa cua cuhva Nyoo tsi yo. ³ Cuhun añima yo tsitsi tsa tsahá Nyoo. Tan cua cunditsi yo itsi tumaa nditsi yo jahma tyin tacan tan ña cua cutandii añima yo. ⁴ Tsitsi tsa iyó yo tsitsi cuñu ñuhu yo tsa cuví tumaa vehe, ndaahvi cuñi yo. Maa tyin ña ndaahvi cuñi yo tsa cuenda tsa cuñi yo quita añima yo tsitsi cuñu ñuhu yo tan cutandii tsi. Ndaahvi cuñi yo tsa cuenda tsa cuñi yo coo añima yo tsitsi tsa ña cua cundihi maa, tyin tacan tan coo cuii yo. Tan cua cundihi tsa tañi ñi tsicoo jaha tsa ña cua cundihi maa. ⁵ Tan Nyoo tyaq ra cuhva tyin tacan cua javaha ra tsihin yo. Tan tsahá jihna ñi ra Tatyí lí ra tsi yo tyin tacan tan cuíta iñi yo tyin cua cuhva ra tandihi ca tsa cua cuhva ra tsi yo.

⁶ Yacan cuenda nyitá iñi ndi tsi Nyoo tsihin tsa ñi iñi añima ndi tsa nducuhún iñi ndi tyin tsitsi tsa iyó yo tsitsi cuñu ñuhu yo, ña iyó yatyin yo nu iyó Jutu Mañi yo nda gloria. ⁷ Vasu ndi maa ña cuví nyehé yo tsi ra, maa tyin iyó yo nu ñuhu ñayivi ihya tsihin tsa tsinú iñi yo tsi ra. ⁸ Nyitá iñi ndi tsi ra tan cuñi ndi quita ndi tsitsi cuñu ñuhu ihya tan cuhun ndi coo ndi tsihin Jutu Mañi yo. ⁹ Yacan cuenda tsitsi tsa ndi iyó ndi tsihin cuñu ñuhu ihya, jañihí ca ndi nducú ndi cuhva javahá ndi tsa taahán iñi Jutu Mañi yo tan tacan ñi maa vasu nduve ca ndi tyin tsa cuahán ndi tsihin Jutu Mañi yo nda gloria. ¹⁰ Tyin tandihi yo tan cua cuhun yo nu nyaá ra Cristo nu cua jacutuñi ra tsi yo. Tan cua nacuhva cuenda intuhun intuhun yo nácaa tsa vaha a tsa ña vaha tsa javahá yo quivi tsicoo yo tsitsi cuñu ñuhu yo cuenda nu ñuhu ñayivi ihya.

Nu tsahá cuenda ra Pablo nácaa cuví coo vaha yo tsihin Nyoo

¹¹ Tsitó ndi tyin Jutu Mañi yo cua tatsi tuñi ra tsi ndi tatun ña cua javaha ndi tsa

caahán ra. Yacan cuenda nducú ndi cuhva cahan ndi tsihin nyivi na nacuhva cuenda ñi tsi ñi tsi Nyoo. Tan Nyoo tsitó vaha ra tyin tacan javahá ndi, tan cuñi ndi tsa coto tucu nyooho. ¹² Caahán ndi tyehen, maa tyin ñavin tsa cuñi ndi nduyaa ndi tyin caahán ndi tsa cuenda tsa cuñi ndi tsa nducuhun iñi ndo tyin caahán ndi tsa nditsa, tan cusii ca iñi ndo tan ñihi ndo cuhva cahan ndo tsihin inga ca ra tsa nduyaa náha ra. Catyí ra náha tyin vaha iyó ra náha tsihin Nyoo, maa tyin tsitsi añima ra náha maa ñi tsa ña nditsa iyó. ¹³ Tatun caahán ndi tuhun Nyoo, catyí juhva nyivi tyin jifi ndi sana. Nditsa, sana iñi ndi maa tyin tsa cuenda Nyoo, tyin tuhun maa ra caahán ndi. Tan tatun vaha cuñi ndi, tsa cuenda nyooho vaha cuñi ndi. ¹⁴ Tan tsitó ndi tyin intuhun ñi ra Cristo tsihi tsa cuenda tandihi nyivi ñuu ñayivi. Tacan tan tsihi tandihi yo. [Tsa tsihi yo cuñi tsi catyí tyin nacoó yo tsa javahá yo cuhva cuñi maa yo.] Tan tsa tyehen tsitó yo tsa tsihi ra Cristo tsa cuenda tsa cuñi xaan ra tsi yo, jañihí tsi tsi yo tsa cahan yo tuhun ra tsihin nyivi. ¹⁵ Ra Cristo tsihi ra tsa cuenda tandihi yo tyin tacan tan coo yo cuhva cuñi maa ra tan ñavin cuhva cuñi maa yo tyin tsihi ra tan nandotq ra tsa cuenda tandihi yo. ¹⁶ Vityin tan ityi nuu, ña caca ca iñi yo nyehé yo cuhva iyó nyivi tumaa tsicá iñi nyivi ña tsitó tsi Nyoo. Tsicoo quivi tacan tsicá iñi yo nyehé yo tsi ra Cristo cuñi yo tyin ra ñuhu ñayivi ñi cuví ra. Maa tyin vityin ña tsicá ca iñi yo tacan. ¹⁷ Tyin quivi nacuhva cuenda yo tsi yo tsi ra Cristo, jandutsaa ra añima yo. Tan nanduvj yo nyivi tsa jahá ra. Tan tandihi tuhun tsa tsicá iñi yo nu quitsj ca tsi, ña tsicá ca iñi yo can vityin ihya tyin tsaahá ra tsa tsiñi tuñi tsa tsi yo.

¹⁸ Maa Nyoo javahá tandihi yacan tyin vityin iyó vaha yo tsihin ra jahá ra tsa cuenda ra Cristo Jesús. Tsahá cuenda ra tsi yo tyin cuñi tsi jacoto yo tsi nyivi nácaa javaha ñi tan cuví coo vaha ñi tsihin ra. ¹⁹ Tyin maa ra tsa yaha nduvahá iyó ra tsihin ñi tsa cuenda tsa tsihi ra Cristo tsa cuenda cuatyí ñi. Nyoo jahá ra tyin nduve ca cuatyí ñi nuu ra. Tan tava tyiñu ra tsi yo tsa jacoto yo tuhun ihya tsi ñi. ²⁰ Yacan cuenda cuví ndi ra tava tyiñu ra Cristo. Tan caahán ndaahvi Nyoo tsihin ndo tsihin yuhu ndi. Yacan cuenda caahán ndahvi ndi tsihin ndo tsihin sivi ra Cristo, na nduvaha coo ndo tsihin Nyoo. ²¹ Ra Cristo ña javahá ra ndi intuhun cuatyí. Maa tyin Nyoo jaquitsj ra tsi ra nu ñuhu ñayivi ihya; quitsj cúu ra tsa cuenda tandihi cuatyí yo. Tyin tacan tan cuví jacacu ra tsi yo, tan tsa cuenda ra Cristo, nduvahá yo jahá tsa vaha Nyoo.

6

¹ Yañi, iin caa ñi jahá tyiñu yo tyiñu Nyoo.

Yacan cuenda caahán ndaahvi xaan ndi tsihin ndo tyin cūatyīñu ndo tandihī tsa vaha tsa tsahá ra tsi intuhun intuhun ndo. ²Tyin catyí Nyoo nu tutu ra tyehen:

Quivi tahañ tsi tsa jacacu yu tsi un, tsiñi yu tsa cahañ un

tan jatyinyee yu tsi un, catyí Nyoo.

Jaha ndo cuenda tyin vityin cuví quivi taahán tsi. Tan vityin cuví quivi jacacú Nyoo tsi yo.

³Nducú xaan ndi cuhva tsa ña javaha ndi náa javaha ndi tyin tacan tan ña cahan nyaa nyivi tyiñu Nyoo tsa javahá ndi. ⁴Tan cuñi ndi tsa nyehé ñi tyin nditsa tsa musu Nyoo cuví ndi. Yacan cuenda cunyeé iñi ndi náa ndihī tsa taahán ndi, náa tundoho, tan náa tsihi. ⁵Vasu ndi maa cañi nyivi tsi ndi, tyihī ñi tsi ndi vehe caa, tsacú nducu ñi tsi ndi, maa tyin cunyeé xaan iñi ndi. Tan ñihī xaan jahá tyiñu ndi nda cuanda tsicoó nyito ndi, tan tsisocó ndi. ⁶Janahá tucu ndi tyin nditsa tsa musu Nyoo cuví ndi tsihin tsa catsi iyó ndi, tsihin tsa tsitó ndi tsa nditsa tan tsihin tsa cunyeé xaan iñi ndi nyehé ndi tandihī maa nuu tundoho tan ña tsihi ndi tsihi. Vaha iñi ndi, tan cuñi xaan ndi tsi nyivi tyin iyó Tatyí Ii Nyoo añima ndi. ⁷Caahán ndi maa ñi maa tuhun Nyoo tsa nditsa. Iyó tunyee iñi ra tsihin ndi. Tan tsatyīñu ndi tandihī tsa vaha tsa tsahá ra tsi ndi, tyin tacan tan cuví jaha canaa ndi tsi nu ña vaha. ⁸Yihi quivi vaha cuñi nyivi nyehé ñi tsi ndi, tan iyó tucu quivi ndasi cuñi ñi nyehé ñi tsi ndi. Iyó tsaha vaha caahán ñi tuhun ndi, inga tucu tsaha caahán ñi ndavaha ñi siqui ndi. Yihi tsaha catyí ñi tyin cuendu caahán ndi tan inga tucu tsaha catyí ñi tyin tsa nditsa caahán ndi. ⁹Iyó tsaha jahá ñi tyin ña nacotó ñi tsi ndi, tan yihī tsaha jacahnú tucu ñi tsi ndi. Iyó quivi tsa yatyin ña cúu ndi, maa tyin ña tsihi ndi tan ndi iyó ca ndi. Iyó quivi tatsi tuñi nyivi tsi ndi, maa tyin ña tsahñi tucu ñi tsi ndi. ¹⁰Vasu ndi maa cuilhya cuñi ndi iyó tsaha, maa tyin ña tsindihī tsa sī cuñi ndi. Iyó tsaha ndaahvi ndi, maa tyin cuaha nyivi janducucá ndi tsihin tuhun Nyoo. Vasu nduvee náa iyó tsi ndi, maa tyin tandihī maa tsa iyó tan tsi maa ndi cuví.

¹¹Nyooho nyivi ñuu Corinto; caahán catsi ndi tsihin ndo tsihin tsa ñi iñi añima ndi tyin nditsa tsa cuñi xaan ndi tsi ndo. ¹²Nyuhu, ña ndasi cuñi ndi nyehé ndi tsi ndo. Maa ndo cuví ndo ndasi cuñi nyehé tsi ndi. ¹³Caahán ndaahvi yu tsihin ndo tumaa caahán ndaahvi iin ra tsihin sehe ra; nuña ndo añima ndo, tumaa tsa javahá maa yu tsihin ndo. Tan ña ndasi ca cuñi ndo nyehé ndo tsi ndi, tyin maa ndi ña ndasi cuñi ndi nyehé ndi tsi ndo.

Vehe Nyoo nyito cuví yo tyin iyó ra añima yo

¹⁴Ña ndu iin ndo tsihin nyivi ña tsinú iñi tsi Nyoo tyin ña nacatsí tahan añima ndo tsihin añima ñi. Tyin tsa vaha ña cuví ndu iin tsi tsihin tsa ña vaha. Tan ndi tsa nditsin tan ña cuví ndu iin tsi tsihin tsa naa. ¹⁵Tyin ra Cristo ña ndu iin ra tsihin nu ña vaha. Tan tacan tucu yoo tsa tsinú iñi tsi ra, ña cuví ndu iin yo tsihin nyivi ña tsinú iñi tsi ra. Tyin tun ndu iin yo tsihin ñi ña cua nacatsi tahan coo yo tsihin ñi. ¹⁶Tyin ndi vehe Nyoo tan ña cuví nacatsi tahan tsi tsihin tsitoho. Yacan ndi ña jacahnu ndo tsitoho tyin vehe Nyoo nyito cuví yo, tumaa catyí maa ra tuhun yo tahañ tsanaha:

Cua coo yu añima ñi, tan cua cuhun yu tsihin ñi nu cuhun ñi.

Maa yu cua cuví Nyoo ñi, tan maa ñi cua cuví nyivi yu, catyí ra.

¹⁷Yacan cuenda catyí ra:

Quita ndo mahñu nyivi ña tsinú iñi tsi yu.

Ña cūtahan ndo tsihin ñi.

Ña javaha ndo tsa ña vaha.

Tacan tan naquihun yu tsi ndo.

¹⁸Tan cuví yu jutu ndo.

Tan cuví ndo sehe yu,

catyí Jutu Mañi yo, ra iyó tandihī tunyee iñi tsi.

7

¹Yañi, yacan cuví tsa tsahá Nyoo tsi yo, yacan cuenda cuñi tsi nducu yo cuhva nduvaha vaha ca yo. Tan ña javaha ca yo tsa caquiñi tan ña caca ca iñi yo tsa ña vaha. Cūiti coo yo tyin tyaá yahvi yo tsi Nyoo.

Nu nacatyí tuhun ra Pablo nácaa nasamq cuhva iyó nyivi yihī cuenda Nyoo ñuu Corinto

²Yañi, caahán ndaahvi yu tsihin ndo, vaha cuñi ndo nyehé ndo tsi ndi tyin nduvee maa náa javahá ndi tsi ndi intuhun ndo. Tan ndi ña jativi ndi tsi ndi intuhun ndo. Tan ña jandavi ñaha ndi tsi ndi intuhun ndo.

³Tsa caahán yu tyehen tsihin ndo ñavin tsa caahán yu tsi ndo cuví. Tyin tsa yaha catyí yu tsihin ndo nda nu quitsj ca tsi, tyin nditsa tsa cuñi yu tsi ndo. Tyin iin caa ñi iyó yo tsihin Nyoo. Tatum iyó yo, iin ñi cuví yo tsihin ra; o tatun cúu yo, iin ñi cua cuví tucu yo tsihin ra. ⁴Tsitó vaha yu tyin cua javaha ndo tsa vaha, yacan cuenda sī xaan cuñi yu nyehé yu tsi ndo. Vasu ndi maa nyehé xaan ndi tundoho, maa tyin ndu iin ca iñi añima ndi. Tan sī xaan ca cuñi ndi.

⁵Nda quivi tsaq ndi Macedonia ihya, tan ñaha ca maa quitatú ndi. Tyin cuaha xaan tsihi tan tundoho nyehé ndi tandihī ñi ityi cuahán ndi. Cañi tahan nyivi tsihin ndi. Tan tsicá xaan iñi ndi tyin ña tsitó ndi tun cua quita vaha tyiñu jahá ndi. ⁶Maa tyin Nyoo, tacan ñi maa jandu iin ra iñi yo tun cuilhya

cuñi yo. Tan jandu ijin xaan ra iñi ndi quivi tsaḡ ra Tito nu yucú ndi ihya. ⁷Tan ñavin tsa cuenda tsa tsaḡ ñi ra, maa tyin sii cuñi tucu ndi tsa cuenda tsa jandu ijin xaan ndo iñi ra. Nacatyj tuhun ra tsihin ndi tyin cuñi xaan ndo nyehe ndo tsi ndi. Tan catyj tucu ra tyin tsacú xaan ndo tsa cuenda tsa cuiihya cuñi ndo. Tan ñuhú xaan iñi ndo tsi yu. Tsa tsito yu yacan, sii xaan ca cuñi yu cuvj.

⁸Quivi can tsicḡ xaan iñi yu tyin tsaḡ yu tucuiihya iñi tsi ndo tsihin carta tsa jaquitsj yu tsi ndo. Tan ndu uvj iñi yu tsa jaquitsj yu carta can tsi ndo. Maa tyin juhva ñi quivi nducuiihya iñi ndo. Tan vityin ña tsicá ca iñi yu tsa cuenda tucuiihya iñi tsa tsaḡ yu tsi ndo. ⁹Tan vityin sii xaan cuñi yu. Ñavin tsa cuenda tsa tsicoḡ ndo tucuiihya iñi, tsa cuenda tsa ndu uvj iñi ndo cuatyj ndo jahḡ tucuiihya iñi can. Tan cunyeḡ xaan iñi ndo nyehe ndo tucuiihya iñi kuhva taahán maa iñi Nyoo. Yacan cuenda vaha javahḡ ndi tsa tsaḡ ndi tucuiihya iñi tsi ndo. ¹⁰Tyin tun cunyeḡ iñi yo nyehe yo tucuiihya iñi kuhva cuñi maa Nyoo, cua nasama kuhva iyó yo tacan tan cua cacu yo. Yacan cuenda na sii cuñi yo tun nyehe yo tucuiihya iñi kuhva cuñi maa Nyoo. Tyin tucuiihya iñi tsa iyó tsi nyivi tsa ña tsitó tsi Nyoo maa ñi anyaya ñihí ñi tsihin can. ¹¹Nyooho cunyeḡ iñi ndo nyehe ndo tucuiihya iñi tumaa kuhva taahán iñi maa Nyoo. Tan vityin, nyehe ndo tyin cuaha xaan tsa vaha ñihí ndo tsa cuenda tucuiihya iñi can. Jandaḡ vaha ndo cuatyj ra can. Cuxaan ndo tsi ra. Tan nayuhvj tucu ndo tsi Nyoo. Tsaḡ cuenda vaha ndo nácaa caahán tyiñu can. Yaha can tan nda cuanda cuñi ndo nyehe ndo tsi yu. Tan tatsj tuñi ndo tsi ra can. Tan tsa cuenda tsa javahḡ ndo tumaa cuñi maa Nyoo, cuñi tsi catyj tyin nduve cuatyj ndo tsa cuenda yacan. ¹²Yacan cuenda quivi jaquitsj yu carta can tsi ndo ña jaquitsj yu itsi tsa cuenda tsa tsicá xaan iñi yu cuenda ra tsa javahḡ cuatyj can. Tan ndi ñavin tsa cuenda ra tsa taḡan ticanuu can. Maa tyin tsa cuenda maa ndo, tyin cuñi yu tsa coto ndo nácaa ñuhú iñi ndo tsi ndi nuu Nyoo tan nácaa cuñi ndo jatyinyeé ndo tsi ndi. ¹³Yacan cuenda nduvahḡ cuñi añima ndi. Tan sii xaan cuñi ndi tyin tsitó ndi tyin cuñi ndo tsi ndi.

Tsa nyehe ndi tyin sii xaan cuñi ra Tito, ndusiḡ ca iñi ndi tyin tsaḡ xaan ndo tunyee iñi tsi ra. Tan vaha xaan naquihjin cuenda ndo tsi ra. ¹⁴Catyj yu tsihin ra Tito tsa ndi cumañi ca quitsi ra nu yucú ndo tyin cua tyaa soho vaha ndo tuhun tsa jaquitsj yu tsihin ra. Tan vityin sii cuñi yu tyin cundaḡ tsa caḡan yu tsihin ra. Tyin maa ñi maa tsa nditsa tuhvá yu caahán. Tan tacan tucu ndunditsḡ tsa caḡan yu tsihin ra. ¹⁵Cuñi xaan ra tsi ndo tsa nducuhún iñi ra tyin

javahḡ ndo tandihí cuii maa tsa caḡan ra tsihin ndo. Tan tsa tsaḡ ra nu yucú ndo, ndaahvi jahḡ ndo tsi ndo nuu ra. Tan vaha xaan caḡan ndo tsihin ra. Tan vaha xaan tyaa yahvi ndo tsi ra. ¹⁶Tan sii xaan cuñi yu tyin tsitó yu tyin tacan ñi javahḡ ndo tsa vaha.

8

Na jatyinyeé yo tsi nyivi yihí cuenda Nyoo tsihin tsa ñi iñi añima yo

¹Vityin yañi, cuñi ndi nacatyj tuhun ndi tsihin ndo nácaa jatyinyeé xaan Nyoo tsi nyivi yihí cuenda ra, ñi iyó ñuu tsa cayucú Macedonia ihya. ²Vasu ndi maa cuaha xaan tundoho nyehe ñi, maa tyin sii cuñi ñi tsihin Nyoo. Ndaahvi xaan ñi, maa tyin cuaha tsa iyó tsi ñi tsaḡ ñi, tumaa tsatyin cuca ñi. ³Tan cuví yu tsandaa tyin nyehe yu tyin tsaḡ ñi cuaha tsa iyó tsi ñi tsihin tsa ñi iñi ñi tan nda cuanda yaha ca tsaḡ ñi. ⁴Caahán ndaahvi xaan ñi tsihin ndi na kuhva ndi ndatu tsa jatyinyeé ndihí ñi tsi nyivi yihí cuenda Nyoo tsa iyó ñuu Jerusalén. ⁵Cuaha ca javahḡ ñi tan ñavin ca tsa tsicá iñi maa ndi. Tyin tsa jihna ñi, nacuhva cuenda ñi tsi ñi tsi Nyoo tsihin tsa ñi iñi añima ñi. Tacan tan nacuhva cuenda tucu ñi tsi ñi tsi nyuhu tsa qihí ndaha ndi tsi ñi tumaa cuñi maa Nyoo. ⁶Tsa nyehe yu tyin tacan javahḡ nyivi Macedonia, tacan tan catyj yu tsihin ra Tito tyin na quitsi ra nu yucú ndo tan janumí ra tsi ndo jacatsi tahan ndo xuhun tsa quitsahḡ tavá ndo jahḡ ra. ⁷Tyin nyooho vaha xaan javahḡ ndo tandihí tyiñu. Tsinú xaan iñi ndo tsi Nyoo. Vaha xaan caahán ndo tuhun ra. Vaha cutuñi iñi ndo. Tan tsihin tsa ñi iñi añima ndo javahḡ ndo tyiñu ra. Tan cuñi xaan ndo tsi ndi. Tan juvin ñi tacan taahán tucu tsi jatyinyeé ndo tsi nyivi ndaahvi, tsa yihí cuenda Nyoo.

⁸Ña jañiñi yu tsi ndo tsa javahḡ ndo tsa caahán yu. Caahán yu tyehen tsihin ndo tsa cuenda tsa cuñi yu tsa nyehe ndo tsa vaha javahḡ nyivi yihí cuenda Nyoo Macedonia. Tyin tacan tan javahḡ ndihí ndo tsa vaha tumaa javahḡ maa ñi. Tan tsihin yacan cua janaha ndo tyin nditsa tsa vaha xaan iñi ndo. ⁹Tyin tsa tsitó maa ndo nácaa tsa vaha iñi Jutu Mañi yo Jesucristo tsihin yo. Maa ra cuca xaan ra, maa tyin quitsj ra nu ñuhu ñayivi ihya tan jandundaahvj ra tsi ra tsa cuenda tsa cuñi ra tsi yo tyin tacan tan cuví janducuca ra tsi yo.

¹⁰Yuhu cuñi yu tsa vaha tsa cuenda ndo, yacan cuenda cua caḡan yu tsihin ndo tsa tsicá iñi yu tsa cuenda tuhun ihya. Nyooho cuví nyivi tsa quitsahḡ jandu iin jihna xuhun cuyava. Ñavin nyivi tavá tyiñu tsi ndo javahḡ ndo tacan. Javahḡ ndo tacan

tyin tacan tsicá iñi maa ndo. ¹¹ Yacan vityin cuñí yu tsa jañihi ca ndo javaha ndo tumaa javahá maa ndo nda nu quitsahá nda cuanda nacatsi tahan xuhun can jaha ndo. Cuhva nyooho nácaa iyó maa tsi ndo. ¹² Tyin tatun iin nyívi tan cuñí ñi cuhva ñi tandihi cuhva iyó tsi ñi tan cuhva ñi can tsihin tsa ñi iñi añima ñi, Nyoo cua naquihín cuenda ra tsa cua cuhva ñi tyin Nyoo ña jañiñí ra tsi yo cuhva yo tun nduve náa iyó tsi yo.

¹³ Caahán yu tyehen tsihin ndo, maa tyin ñavin tsa cuenda tsa cuñí yu tsa jatinyee ndo tsi nyívi tan ndoo ndaahvi ndo tan ñi ican coo tsa coo tsi ñi. ¹⁴ Tyin vityin tsa iyó luxu tsi ndo, taahán tsi jatinyee ndo tsi nyívi ndaahvi tsihin can. Tyin tacan tan inducu ñi coo tandihi yo. Tan inga tsaha, maa ñi cua jatinyee tucu tsi maa ndo tun cumañi tsa cumañi tsi ndo. Tyehen taahán tsi jatinyee tahan yo tsi yo tsihin tsa iyó tsi yo tyin tacan tan ña nyehe ndi intuhun yo tundoho. ¹⁵ Tumaa catyí nu tutu Nyoo tyehen: “Ra tsa cuaha xaan tsa iyó tsi, ña jatívi ra itsi. Tan ra tsa iyó luxu ñi tsa iyó tsi, ña cumañí tsa cumañi tsi ra”, catyí tsi nu tutu Nyoo.

Nu tyaá ra Tito naha ra cuhva cuhun ra naha ñuu Corinto

¹⁶ Tyahvi nyoo tsi Nyoo tyin tsahá ra tsa vaha iyó añima ra Tito tan tsicá iñi ra tuhun ndo tumaa tsicá iñi maa yu tuhun ndo. ¹⁷ Tsa cahán yu tsihin ra tyin quitsi ra nu yucú ndo, ndoo ra tyiñu tsa quitsi ra, tyin tuñu cuñí tucu maa ra ñuhú iñi ra tsi ndo. Yacan cuenda vityin vatsí ra nu yucú ndo tsihin tsa iyó iñi maa ra.

¹⁸ Jaquitsí ndi tsi iin ra yañi yo iin caa ñi tsihin ra Tito. Vaha xaan tsinú iñi ra tsi Nyoo, tan tacan caahán tucu tandihi nyívi yihí cuenda Nyoo. ¹⁹ Tan inga tucu tuhun tyin nacatsj vaha nyívi yihí cuenda Nyoo tsi ra yañi yo ihya tyin cuhun ndihi ra tsihin ndi cundaca ndi xuhun tsi nyívi ndaahvi iyó ñuu Jerusalén. Cuñí xaan ndi jacahnú ndi tsi Jutu Mañi yo tsihin tsa javahá ndi tyiñu ihya. Tan tacan tucu cuñí xaan ndi jatinyee ndi tsi tandihi nyívi yihí cuenda Nyoo. ²⁰ Tsihin cuenda xaan javahá ndi tyiñu ihya, tyin tacan tan ña cahán nyívi tsi ndi tsa cuenda tsa tavá ndi xuhun cuenda nyívi ndaahvi. ²¹ Tacan ñi nducú xaan ndi cuhva javahá ndi tyiñu. Tatun cua javaha ndi náa iin tsa cua javaha ndi, javahá ndi can tsihin tsa catsi iyó ndi ityi nuu Jutu Mañi yo tan ñavin ityi nuu Jutu Mañi yo ñi tyin ityi nuu tucu nyívi.

²² Tan juvin ñi jaquitsí tucu ndi inga ra yañi yo tsihin ra Tito naha ra tyin nyehé ndi tyin ñi xaan iñi ra. Tan cuaha ñi tsaha janahá ra tyin cuñí xaan ra tsi Jutu Mañi yo. Tan vityin tsa tsa tsitó ra tuhun ndo, sii cuñí

ra tyin tsitó ra tyin cua javaha ndo tsa vaha nuu Nyoo. ²³ Tatun yóo tsicá tuhun tuhun ra Tito, catyí ndo tsihin ñi tyin ra vaha iñi tsi yu cuví ra, tan jahá tyiñu ra tsihin yu, tan jatinyee ra tsi ndo tsihin tuhun Nyoo. Tatun tsicá tuhun tucu ñi tuhun inga uvi ca ra yañi yo ihya naha ra, catyí ndo tyehen tsihin ñi:

—Maa nyívi yihí cuenda Nyoo jaquitsj tsi ra naha. Tan vaha xaan jahá tyiñu ra naha tyiñu ra Cristo —catyí ndo.

²⁴ Yacan cuenda janaha ndo tsi ra ihya naha ra nu tuví tyin nditsa tsa cuñí ndo tsi ra naha. Tyin tacan tan coto tandihi nyívi yihí cuenda Nyoo tyin nditsa tsa caahán yu tyin vaha javahá ndo.

9

Nu tsahá cuenda ra Pablo nácaa taahán tsi jatinyee yo tsi nyívi ndaahvi yihí cuenda Nyoo

¹ Tan cuenda xuhun tsa jandu iin ndo tsa cuenda nyívi ndaahvi yihí cuenda Nyoo, ña ñiñi xaan cuñí tsi cahán yu tuhun can tsihin ndo. ² Tyin tsitó yu tyin cuñí xaan ndo javaha ndo tsa vaha. Yacan cuenda sii cuñí yu nacatyí tuhun yu tuhun ndo tsihin nyívi iyó Macedonia, tyin nyooho tsa iyó ñuu Corinto tsa canyíi Acaya, nda cuyava tan quitsahá cuñí ndo jatinyee ndo tsi nyívi ndaahvi. Tan tsa cuenda yacan cuaha xaan nyívi yihí cuenda Nyoo Macedonia ndu iin ca iñi ñi tan cuñí ndihi tucu maa ñi jatinyee ñi tsi nyívi ndaahvi. ³ Vasu ndi maa tsitó yu tyin vaha tsicá iñi ndo, maa tyin jaquitsí yu tsi ra yañi yo ihya naha ra nu yucú ndo, tyin jatinyee ra naha tsi ndo tan janumi ndo jandu iin ndo xuhun, tumaa tsa caahán yu tuhun ndo tyin cuñí ndo javaha ndo tsa vaha. Tyin tacan tan ña cua catyí nyívi Macedonia tyin ña nditsa yu tsa caahán yu. ⁴ Tyin coto cusana quitsi iin ra Macedonia tsihin yu, tan nyehe ra tyin nduve xuhun jandu iin ndo. Tan tahan yu ticanuu tsa cuenda tsa nduve náa javahá ndo. Tan vihi ca maa ndo. Tyin tsa yahá catyí yu tyin cuñí xaan ndo jatinyee ndo tsi nyívi ndaahvi. ⁵ Yacan cuenda tsicá iñi yu tyin vaha ca tsa quitsi jihna ra yañi yo ihya naha ra nu yucú ndo tyin tacan tan jatinyee ra naha tsi ndo tsa jandu iin ndo xuhun tsa tyihí ndo cuhva tyin cuhva ndo. Tyin tacan tan quívi quitsi yu tandihi tsi tan tsa iyó vaha tsi. Tyin tsa cacú iñi maa ndo tan javahá ndo cuhva can, tan ñavin nyuhu jañiñí tsi ndo.

⁶ Ndūcuhun iñi ndo tuhun tsa catyí tyehen: Ra tsa tatsí luxu ñi, luxu ñi tsiti naquihín ra. Maa tyin ra tsa tatsí cuaha, cuaha tsiti naquihín ra. ⁷ Tan intuhun intuhun yo cuñí tsi cuhva yo cuhva iyó iñi maa yo. Ñavin uvi caca iñi yo tan cuhva yo o

cuhva yo tsa cuenda tyin jañiñi nyivi tsi yo. Tyin Nyoo cuñi ra tsi nyivi tsahá tsihin tsa sii cuñi ñi. ⁸ Nyoo cuví cuhva ra tandihí nuu tsa vaha tsi ndo, tyin tacan tan ña cumañi náa cumañi tsi ndo. Tan cuví jatyinyee tucu maa ndo tsi inga ca nyivi. ⁹ Tumaa catyí tuhun Nyoo tyehen:

Iin ra vaha tsahá ra, tsihin tsa nü iñi ra, tsa iyó tsi ra tsi nyivi ndaahvi.

Tan tumañi iñi tsa javahá ra, ña tsinaá tsi nuu Nyoo, catyí tsi.

¹⁰ Nyoo, ra tsahá tsiti tatsi yo, tsahá tucu ra tandihí tsa tsatsi yo. Tan cua cuhva tucu ra cuaha ca tsiti tsa tatsi ndo tan vaha cua cuvaha tsi jaha ra. Tan tsa tacan tsahá ndo cua jatyinyee ca ra tsi ndo javaha ndo tsa vaha tsihin nyivi. ¹¹ Tan coo ca tandihí nuu tsa cuca tsi ndo, tyin tacan tan cuví jatyinyee ca ndo tsi nyivi yihí cuenda Nyoo tsihin yo. Tan maa ñi, cua nacuhva ñi tyahvi nyoo tsi Nyoo tsa cuenda xuhun tsa jacuhun ndo tsi ñi.

¹² Tyin tsa jatyinyee yo tsi nyivi yihí cuenda Nyoo tsihin tsa tsahá yo tsa tsíñi ñuhu tsi ñi, tsahá tucu yo tsa nacuhva ñi tyahvi nyoo tsi Nyoo. ¹³ Tan cua jacahnu ñi tsi Nyoo. Tyin tsihin tsa jatyinyee ndo tsi ñi, nyehé ñi tyin nditsa tsa tyaá yahvi ndo tuhun ra Cristo. Tan juvin ñi cua jacahnu ñi tsi Nyoo tsa cuenda tsa jatyinyee xaan ndo tsi maa ñi tan tsi tandihí ca nyivi. ¹⁴ Cua ndacan tahvi ñi tsi Nyoo tsa cuenda ndo. Tan cua cuñi xaan ñi tsi ndo tsa cuenda tsa vaha tsa tsahá ndo tsi ñi jahá Nyoo. ¹⁵ Tyahvi nyoo tsi Nyoo tyin tsahá ra tsa vaha xaan tsi yo, tan nda cuanda ña ñihí yo cuhva nacatyí tuhun yo itsi.

10

Ra Pablo iyó ndatu tsi ra tsa jaha cuenda ra tsi nyivi tsa jacoto ra tuhun Nyoo

¹ Yuhu ra Pablo tsihin tsa vaha iñi ra Cristo caahán ndaahvi yu tsihin ndo, tyin yihí ndo catyí ndo tyin tun tsahá cuenda yu tsi ndo tsihin carta, ñihi xaan caahán yu tsihin ndo, maa tyin tun nyí yu tsihin ndo, ndaahvi xaan jahá yu tsi yu, catyí ndo. ² Vaha. Maa tyin jaha ndo cuenda tan ña jañiñi ndo tsi yu tsa cuxaan yu tsi ndo quivi quitsi yu nu yucú ndo tyin tsitó yu tyin cuñi tsi tsa cuxaan ñihi yu tsi juhva ndo. Tyin yihí ndo catyí ndo tyin javahá yu tumaa javahá ra ña yihí cuenda ra Jesucristo. ³ Nditsa tyin ra ñuu ñayivi cuví ndi. Maa tyin ña cañi tahan ndi tumaa cañi tahan nyivi iyó nu ñuhu ñayivi ihya. ⁴ Tyin tsa xaan tsa tsatyíñi ndi tsa cañi tahan ndi, ñavin tsa xaan tsa iyó nu ñuhu ñayivi ihya cuví tsi. Tyin maa tunyee iñi maa Nyoo cuví tsi, tyin cuví jaha canaa ndi siqui tandihí ca tunyee iñi tsihin tsi tan nda cuanda tunyee iñi tsa iyó tsi tatyí ña vaha. ⁵ Tan tacan cuví jaha canaa ndi tsi

tandihí tsa caahán ndasi nyivi siqui tuhun Nyoo, tan tandihí tsa ña vaha tsa tyasí nu tyaa yahvi nyivi tuhun Nyoo. Tan tsahá ndi tsa cundaca ñaha ra Cristo tandihí cuhva tsicá iñi ndi tyin tacan tan tyaá yahvi ca ndi tsi ra. ⁶ Quivi cutuhva tandihí nyooho tsa iyó Corinto tyaa yahvi vaha ndo tsi ra Cristo, tatun ndoo inga ndo tsa ña cuñi tyaa yahvi tsi ra, tyaa ndi cuhva tsa tatsi tuñi ndi tsi ndo.

⁷ Nyooho jahá ndo cuenda cuhva iyó nyivi. Tan ña jahá ndo cuenda nácaa iyó añaña ñi. Tatun tsitó vaha ndo tyin cuenda ra Cristo yihí ndo, taahán tsi coto ndihí tucu ndo tyin cuenda ra yihí tucu nyuhu. ⁸ Ña cahán nuu yu caahán yu tsa tsahá Nyoo ndatu tsi yu tsa quihí ndaha yu tsi ndo, vasu ndi maa yahá caahán yu juhva tyin tsitó yu tyin tsa vaha tsi maa ndo cuví, tan ña javahá yu can tsa cuenda tsa cuñi yu jatí yu tsi ndo. ⁹ Ña cuñi yu tsa catyí ndo tyin jayuhví yu tsi ndo tsihin tsa caahán yu nu carta tsa jaquitsí yu tsi ndo. ¹⁰ Tyin yihí ndo catyí ndo tyin nu carta tsa jaquitsí yu tsi ndo ñihi xaan caahán yu tsihin ndo. Maa tyin tatun maa yu tsaá nu yucú ndo, nduve yahvi nyaá yu, catyí ndo. Tan catyí tucu ndo tyin nduve yahvi nyaá tuhun caahán yu. ¹¹ Maa tyin nyooho tsa caahán tacan cuñi tsi coto ndo tyin tumaa caahán yu nu carta, tacan cua javaha tucu yu tsa tsaá yu nu yucú ndo.

¹² Nditsa ña caná iñi ndi jandu inducu ndi tsi ndi tsihin ra nduyaá naha ra. Tyin ra can naha ra juvin ñi maa ra naha catyí tyin vaha ra naha. Tan tsa caahán ra naha tacan, nduve yahvi nyaá caahán ra naha can tyin javahá ra naha cuhva javahá inga nyivi tan ñavin cuhva cuñi Nyoo. Tan cuñi ra naha tyin vaha tsa jandu inducu ra naha tsi ra naha tsihin inga nyivi. ¹³ Nyuhu ña cua nduyaa ndi tsihin tsa ña taahán tsi tsi ndi. Nyoo cuví ra janahá náa tyiñu taahán tsi javahá yo. Tan maa ra jaquitsí tsi ndi ñuu Corinto nu yucú ndo. ¹⁴ Tun tsatyin ña jihna ca maa ndi cahan tuhun Nyoo tsihin ndo, ña taahán tsi jahá cuenda ndi tsi ndo. Maa tyin taahán tsi jahá cuenda ndi tsi ndo tyin jihna ca maa ndi tsindaca tuhun ra Cristo nu yucú ndo. ¹⁵ Nyuhu ña nduyaá ndi tsihin tyiñu javahá inga ca ra naha. Ña catyí ndi tyin tyiñu maa ndi cuví tsi. Maa tyin nyitá iñi ndi tyin cua natsinu vaha ca iñi ndo tsi Nyoo. Tan tatun tsa tsinú vaha ca iñi ndo, tacan tan cua cuví jacuaha cuaha ca ndi tuhun ra Cristo tsi ndo, maa tyin tandihí ñi tsaha tsa cua jacuaha ndi tsi ndo maa ñi tsa caahán Nyoo cua cahan ndi. ¹⁶ Tan tsicá iñi ndi cuhun ndi cucahan ndi tuhun ra Cristo nu ña tsitó nyivi tuhun ra. Tyin tacan tan ña cua catyí nyivi tyin nduyaá ndi tsihin tyiñu javahá inga ra naha.

¹⁷ Nyooho tsa cuñi nduyaa, nduyaa ndo tsihin tsa javahá Jutu Mañi yo tan ñavin tsihin tsa javahá maa ndo. ¹⁸ Tyin ra tsa catyí tyin vaha ra, ña quitá vaha ra nuu Nyoo. Maa tyin ra tsa catyí Nyoo tyin vaha, ra ican cua quita vaha nuu Nyoo.

11

Nu tsahá cuenda ra Pablo tsi nyivi ñuu Corinto na jaha cuenda ñi tsi ñi na ña jandavi ñaha ra vatya naha ra tsi ñi

¹ Vaha xaan tun ña cundihi iñi ndo tyaa soho ndo tsa cua cahan yu tsa tsicá iñi maa yu tsihin ndo. Ña cundihi iñi ndo tsihin yu vasu ndi maa tuhun maa yu cuví tsi. ² Yuhu cuiñú xaan yu tsi ndo. Tan maa Nyoo tsahá tsa cuiñu yu tsi ndo, tyin juvin yu cahan tuhun ra Cristo tsihin ndo nda jihna. Tan cuiñi yu tsa cuiñi ndo tsi intuhun ñi maa ra tumaa cuiñi iin ñaha yoco tsi ra tsa cua cuví yí ña. Tyin iin ñaha yoco cuiñi ña tsi intuhun ñi maa ra tsa cua cuví yí ña. ³ Maa tyin tsicá xaan iñi yu tsa cuenda ndo, coto tahan ndo tumaa tahā ña Eva. Tyin ña Eva jandavi ñaha nu coo tsi ña tsihin maña nu. Tan yuhu ña cuiñi yu tsa jandavi ñaha nyivi tsi ndo tan nasama ndo cuhva tsicá iñi ndo tuhun ra Cristo, tan jandihi ndo tsa jacahnú ndo tsi intuhun ñi maa ra. ⁴ Tyin nyooho yatyi xaan nasamá ndo cuhva tsinú iñi ndo tuhun ra Jesús tun sin cuhva caahán nyivi tuhun ra. Tyin ñavin tuhun ra Jesús tsa jacotó ndi tsi ndo cuví can. Tan taahán xaan iñi ndo caca iñi ndo tuhun tsa ña nacatsí tahan tsihin tuhun Tatyí li Nyoo tsa naquihñi ndo nda jihna. Yatyi xaan natsinú iñi ndo tuhun caahán nyivi tan ñavin tuhun, tsa jacacú ra Cristo tsi yo, tsa cahan ndi tsihin ndo. ⁵ Ra tsa catyí, “Nyuhu cuví ndi ra vaha caahán tuhun ra Cristo”, tsicá iñi yu tyin ña cahnú ca cuví ra can naha ra tan ñavin ca maa yu. Tan nyooho nyicún ndo tsi ra naha. ⁶ Vasu ndi maa ña ñihí vaha yu cuhva caahán yu, maa tyin cutuñí vaha iñi yu tuhun Nyoo. Tan yacan cuví tsa jacuahá ndi tsi ndo tsihin tandihi cuhva javahá ndi.

⁷ ¿O cuiñi maa ndo tyin ña vaha javaha yu tsa ña quihñi yu yahvi quivi cahan yu tuhun tsa jacacú Nyoo tsi yo tsihin ndo? Tacan javahá yu tyin tacan tan ña cahnú xaan jaha ndo tsi yu tan nducahnu maa ndo nuu Nyoo. ⁸ Nyivi tsa tsicá tuhun Nyoo vehe ñuhu inga ñuu jatyinyee tsi yu tsihin xuhun. Tan xuhun tsa tsahá ñi tsi yu tsatyíñu yu can quivi quítsi yu quítsi cahan yu tuhun ra Cristo tsihin ndo. ⁹ Vasu ndi maa yihí tsaha cumañi tsa cumañi tsi yu tsa tsinyi yu tsihin ndo, maa tyin ña tsahá yu tundoho tsi ndi intuhun maa ndo. Tyin ra yañi yo tsa quee nda Macedonia, juvin ra naha tsahá tandihi tsa cumañi tsi yu. Tacan jahá cuenda yu tsi

yu tyin ña cuiñi yu cuhva yu tundoho tsi ndo. Tan tumaa tsa javahá yu nda vityin tacan ñi maa cua javaha yu. ¹⁰ Tumaa tsa nditsa yu tyin nacotó vaha yu tuhun nditsa ra Cristo, tacan nditsa yu tsa ña cua ndacan yu xuhun, ndi tsi nyooho tan ndi tsi inga nyivi iyó nani Acaya. ¹¹ ¿Nacuenda caahán yu tyehen cuiñi maa ndo? ¿A tsa cuenda tsa ña cuiñi yu tsi ndo? Ñavin. Tyin nda maa Nyoo tan tsitó ra tyin cuiñi xaan yu tsi ndo.

¹² Ña cua jandihi yu javahá yu tsa tuhvá yu javahá. Tyin tacan tan ña coo ndatu cahan ra tsicá nuu naha ra tyin javahá ra naha tumaa javahá ndi tyin ña nditsa maa ra naha tsa caahán ra naha. ¹³ Catyí ra naha tyin ra tsicá tyiñu ra Cristo cuví ra naha, maa tyin ña nditsa ra naha. Tyin jandavi ñaha ra naha tan jahá ra naha tyin ra tsicá tyiñu ra Cristo cuví ra naha. ¹⁴ Tan tsa javahá ra ican naha ra ñavin tsa iyo cuiñi yo cuví can. Tyin nda maa nu ña vaha tan jahá nu tyin ángel Nyoo tsa xiñu xaan cuví nu. ¹⁵ Yacan cuenda ña iyo cuiñi yo tun ra nyicún tsi nu tan jahá ra naha tyin javahá ra naha tsa vaha. Coo quivi cua tatsi tuñi Nyoo tsi ra naha tsa cuenda tsa ña vaha tsa javahá ra naha.

Tundoho tsa nyehé ra Pablo nu tsicá ra caahán ra tuhun Nyoo

¹⁶ Inga tsaha caahán yu tsihin ndo: Ndi intuhun ndo tan ña caca iñi ndo tyin sana iñi yu tsa caahán yu tyehen. Maa tyin tun tacan tsicá iñi ndo, cuhva ndo cahan yu tsihin ndo tumaa caahán ra sana iñi. Tyin tacan tan cuví nduyaa ndihi tucu yuhu luxu. ¹⁷ Caahán yu tumaa caahán ra sana iñi tyin tacan tan cuví nduyaa yu. Ñavin maa Jutu Mañi yo catyí tsihin yu tsa javahá yu tyehen. ¹⁸ Cuaha xaan ra naha catyí ra naha tyin cahnú cuví ra naha tan nduyaa ra naha tsihin tsa iyó nu ñuhu ñayivi ñhya. Yacan cuenda cua jacahnú ndihi tucu yuhu tsi yu. ¹⁹ Nyooho catyí ndo tyin tsitó xaan ndo. Tun nditsa ndo, ¿nacuenta tyin yatyi xaan tyaa soho ndo tsa caahán ra sana iñi can naha ra? ²⁰ Tan cunyeé xaan iñi ndo nyehé ndo tsi ra naha tan cuaha tsa javahá ra naha tsi ndo. Jañiñi ra naha tsi ndo tsa cuví ndo musu ra naha. Suhú ra naha tsa tsi ndo. Ndacá ñaha ra naha tsi ndo. Ndasi cuiñi ra naha nyehé ra naha tsi ndo. Tan nda cuanda cañi ndaha ra naha nuu ndo. ²¹ ¿A taahán tsi nducahan nuu ndi tsa ña javahá ndi tacan tsihin ndo?

Tatun inga ra can naha ra tan ña cahán nuu ra naha caahán ra naha tuhun maa ra naha tsihin ndo, tacan tucu yuhu ña cua nducahan nuu yu cahan yu tuhun maa yu tsihin ndo vasu ndi maa cahan ndo tyin sana iñi yu. ²² Catyí ra can naha ra tyin nyivi Hebreo cuví ra naha; tacan tucu yuhu, ra Hebreo cuví yu. Ra ican naha cuví ra

naha nyívi Israel; juvin ra Israel cuví tucu yuhu. Cuví ra naha tata ra Abraham; tata ra Abraham cuví tucu yuhu. ²³ Tan tatun ra can naha ra tan jahá tyiñu ra naha tyiñu ra Cristo, yaha ca jahá tyiñu yuhu tyiñu ra Cristo. Tsa caahán yu tyehe caahán yu tumaa caahán ra sana iñi, maa tyin nditsa tsa ñihi ca jahá tyiñu yu tan ñavin ca ra can naha ra. Tan cuaha ca tsaha cañi nyívi tsi yu tsihin yoho tan ñavin ca ra can naha ra. Cuaha ca tsaha tsinyij yu vehe caa. Tan cuaha tsaha cuñi cúu yu, maa tyin ña tsihi yu. ²⁴ Uahun tsaha cañi ra Israel naha ra tsi yu tsihin yoho. Tan tsa iin tsaha cañi ra naha tsi yu, cañi ra naha oco tsahun cumi tsaha tsata yu. ²⁵ Uñi tsaha cañi ra naha tsi yu tsihin yutun. Iin tsaha cañi ra naha tsi yu tsihin yuu. Tan uñi tsaha nyee yutun ndoo tsa cuahán yu tsihin. Tan tsa uñi tsaha tsa nyee yutun ndoo tsitsi ndutyá, iin tsaha ndoo yu nu ndutyá ñuhu iin quívi tan iin tsa cuaa. ²⁶ Tandíhi ñi tsaha tsa cuahán yu tyiñu ra Cristo tan yahá yu tundocho. Cuaha ñi tsaha cuñi tañi yu. Cuaha tsa tahañ yu. Quitá ñasuhu nuu yu ityi cuahán yu. Nda cuanda ra ñuu yu, ra Israel naha ra, tan jayuhvi ra naha tsi yu. Tan juvin ñi tacan javahá nyívi inga ñuu tsihin yu. Cuaha tsa tahañ yu tsitsi ñuu, nu tsiqui, nu ndutyá ñuhu. Cuaha tsa tahañ yu jahá ra catyi tyin yañi yo cuví tsi ra naha tan ña nditsa ra naha. ²⁷ Ñihi jahá tyiñu yu tan tsitatú yu. Cuaha xaan tsaha tsicoo nyito yu. Tsisoco yu tan ña ñihi yu ndutyá coho yu. Cuaha tsaha tsicoo nyitya yu. Cuaha tsaha yahá yu tsa vitsin tan cumañi jahma tsi yu.

²⁸ Ñavin tuhun ihya ñi tyin cuaha inga ca tuhun. Tsicá tucu iñi yu tuhun tandíhi nyívi yíhi cuenda Nyoo, nyoocho tan nyívi inga ñuu tucu. ²⁹ Tyin tun iin ndo tan vita cuñi ndo, tacan vita cuñi tucu yuhu. Tatun javahá iin ndo tsa ña vaha jahá nyívi, cahán nuu yu tan xaan cuñi yu. ³⁰ Tatun cuñi tsi nduyaa yu tan coto ndo tyin nditsa tsa cuví yu musu Nyoo, cua nduyaa yu tsihin tuhun yu tsa janahá tyin ña cuví javahá yu náa javaha yu tsihin tunyee iñi maa yu. ³¹ Nyoo, Jutu ra Jesucristo Jutu Mañi yo, ra taahán tsi jacahnú yo tacan ñi maa, tsitó ra tyin tsa nditsa caahán yu tan ñavin jandaví ñaha yu. ³² Quívi tsinyij yu ñuu Damasco ra cumi tyiñu tsa jahá tyiñu tyiñu ra rey Aretas, tyacu ra andarú yuhu cora ñuu can, tyin jaha cuenda ra naha coto quita yu tan tiin ra naha tsi yu tan cundaca ra naha tsi yu vehe caa. ³³ Maa tyin nyívi iyó vehe tsa cacu tsihin cora can januu ñi tsi yu ityi ventana tsihin iin tyica cahnu. Tacan jacacu Nyoo tsi yu ndaha ra cumi tyiñu ñuu can.

Tsa nyehé ra Pablo nda nu tsinu uñi gloria jahá Nyoo

¹ Nduve náa ñihi yo tsihin tsa cahan yo tuhun maa yo, maa tyin cua nacatyí tuhun yu tsihin ndo tsa janahá Jutu Mañi yo tsi yu tan tsa nyehé yu jahá ra. ² Nacotó yu iin ra yíhi cuenda ra Cristo tsa tsahan andívi. Tsa iyó utsi cumi cuiya tsa quihín Nyoo tsi ra tsahan ra nda nu tsinu uñi andívi. Maa tyin ña tsitó yu tatun tsahan ra tsihin cuñu ñuhu ra o ñavin. Intuhun ñi maa Nyoo cuví ra tsitó. ³⁻⁴ Tsitó yu tyin tsindaca Nyoo tsi ra nda paraiso nu iyó nyívi tsihi tsa tsinu iñi tsi Nyoo. Maa tyin ña tsitó yu tatun tsahan ra tsihin cuñu ñuhu ra o ñavin. Intuhun ñi maa Nyoo cuví ra tsitó. Nu tsahan ra can tsiñi ra tuhun tsa ña cuví nacatyí tuhun yo, tan ndi ña ñihi ndatu nyívi tsa nacatyí tuhun ñi tuhun can. ⁵ Cuví nduyaa yu tsihin tsa janahá Nyoo tsi yu quívi can. Maa tyin ña nduyaa yu tsihin tsa javahá yu tyin nduyaa yu maa ñi maa tsihin tsa nduve tunyee iñi maa yu iyó tsi yu. ⁶ Tatun cua cahan yu tuhun maa yu, ñavin tsa soho cua cuví can. Tyin tun cua cahan yu can maa ñi maa tsa nditsa cua cahan yu. Maa tyin ña cuñi yu cahan yu can coto cahnu xaan jaha nyívi tsi yu. Vaha ca nanyehé maa ñi cuhva iyó yu tan cuhva jacuahá yu, tacan tan coto ñi tatun vaha yu o ña vaha yu.

⁷ Nyoo ña cuñi ra tsa nduyaa yu tsihin tsa janahá ra tsi yu. Yacan cuenda tsaha ra tsa nyehé xaan yu tundocho jahá nu ña vaha. Tan uhvi xaan yu tumaa uhvi nu tyisó iñu cuñu ñuhu yo. Tyin tacan tan ña cuví nduyaa yu tsihin tsa janahá Nyoo tsi yu. ⁸ Tan tsican yu uñi tsaha tsi Jutu Mañi yo na quihin nyaa ra tundocho can siqui yu. ⁹ Maa tyin catyi Jutu Mañi yo tyeheh tsihin yu: “Yuhu cuñi xaan yu tsi un, tan yacan ñi cuví tsa tsiñi ñuhu tsi un. Tyin nyívi tsa nduve tunyee iñi maa ñi iyó tsihin ñi, nyaá tunyee iñi maa yu tsihin ñi”, catyi ra. Yacan cuenda sii xaan cuñi yu tyin nyaá tunyee iñi ra Cristo tsihin yu tyin nduve tunyee iñi maa yu iyó tsihin yu. ¹⁰ Yacan cuenda sii xaan cuñi yu tsa nduve tunyee iñi maa yu iyó tsi yu. Vasu ndi maa caahán nyívi tsi yu, tan nyaá ndaha ñi tsi yu, vasu ndi maa nduve tsa iyó tsi yu, vasu ndi maa cuaha tsa cuví tsi yu, maa tyin sii xaan cuñi yu tsa nyehé yu tundocho tsa cuenda ra Cristo. Tyin tsa nduve tunyee iñi maa yu iyó tsi yu, nyaá tunyee iñi Nyoo tsihin yu.

Tsicá iñi ra Pablo tuhun nyívi yíhi cuenda Nyoo ñuu Corinto

¹¹ Tsa caahán yu tuhun maa yu nanduví yu tumaa ra sana iñi. Maa tyin maa ndo cuñi tsa cahan yu tacan tyin ña jahá ca ndo tsa ñayívi tsi yu. Maa ndo taahán tsi vaha cahan tuhun yu, vasu ndi maa ña cahnu xaan

cuví yu. Tatun yuhu tan ña cahnu cuví yu, vihi ca ra tsa catyí tyin tyiñu ra Cristo tsicá ra naha, tan ña nditsa ra naha. Cuñí maa ra naha tyin vaha xaan ca ra naha tan ñavin ca inga ra tsicá tyiñu Nyoo. ¹² Yuhu cunyeë xaan iñi yu nyehe yu tandihí tundoho quivi tsinyi yu jahá tyiñu yu tyiñu Nyoo nu yucú ndo. Cuaha xaan tsa iyo javahá yu jahá Nyoo tyin tacan tan coto ndo tyin nditsa tsa cuví yu ra tavá tyiñu ra. ¹³ ¿A vaha ca tyaá nuu yu tsi inga nyivi tsa iyó inga ñuu tan ñavin ca nyooho? Ñavin. Inducu ñi tyaá nuu yu tsi tandihí ndo. Intuhun ñi tsa ña javahá yu tsihin ndo tsa tsinyi yu tsihin ndo cuví tsa ña tsicán yu xuhun cuita catsi yu tsi ndo. Ña taahán tsi ndacan yu tucahnu iñi tsi ndo tyin tsitó ndo tyin vaha javahá yu.

¹⁴ Vityin tsa iyó vaha tandihí tsa tsii yu, tsa quitsi yu nu yucú ndo tsa tsinu uñi tsaha. Ña cua cuhva yu tundoho tsi ndo tyin ña cua quitsi yu quitsi nducu yu tsa iyó tsi ndo tyin maa yu cua jatyinyee tsi ndo. Tyin iin ra iyó sehe, ñavin sehe ra tsahá tsa tsiiñi ñuhu tsi ra. Tyin maa ra taahán tsi cuhva tsa tsiiñi ñuhu tsi sehe ra. Tan tacan yuhu. ¹⁵ Sií xaan cuñí yu cua janaa yu tsa iyó tsi yu tsa cuenda tsa vaha tsi ndo. Tan nda cuanda cuhva yu ñayivi yu tsa cuenda ndo. Tan tsicá tucu iñi yu tyin tun jañihí ca yu cuñí yu tsi ndo, nyooho ña cuñí vaha ndo tsi yu.

¹⁶ Tandihí ndo tan tsitó ndo tyin ña tsahá yu tundoho tsi ndo. Tan vasu ndi maa tsitó ndo yacan, vatu ñi tyin catyí juhva ndo tyin jandaví ñaha yu tsi ndo tan ña jahá ndo cuenda. ¹⁷ ¿O cuñí maa ndo tyin cahan yu cuendu tsihin ra jaquitsi yu nu yucú ndo tan jandaví ñaha ra naha tsi ndo jahá yu? ¹⁸ ¿A jandaví ñaha ra Tito tan inga ra naha tsi ndo quivi quitsi ra naha nu yucú ndo jahá yu? Ña jandaví ñaha ra naha tsi ndo tyin nyuhu ña tuhvá ndi jandaví ñaha. ¿A ña tsitó ndo tyin ra Tito tan yuhu inducu ñi javahá ndi, tan iin ñi Tatyí lí Nyoo iyó tsi nduvi ndi?.

¹⁹ Vasiquí tsicá iñi maa ndo tyin tandihí tsa caahán ndi, tan caahán ndi can tsa cuñí ndi tsa vaha cahan ndo tuhun ndi, maa tyin ñavin tacan tsicá iñi ndi. Tyin tandihí tsa caahán ndi tan tsa vaha tsi maa ndo cuví can tyin tacan tan cunyicun vaha ca ndo tsi Nyoo. Nda nuu Nyoo tan tsihin tunyee iñi ra Cristo caahán ndi tyin nditsa tsa cuñí xaan ndi tsi ndo. ²⁰ Tsicá iñi yu coto ña cua tahan iñi yu cuhva yucú ndo quivi tsa yu. Tan ndi maa ndo tan ña cua tahan iñi ndo cuhva cua cahan yu tsihin ndo. Yuuhví yu coto coo tsihi, tan nyiyo iñi ndo tsa iyó tsi inga ndo, tan cuxaan tahan ndo tsi ndo, tan nducu ndo maa ñi maa tsa vaha tsi maa ndo, tan cahan ndo cuendu, tan cahan nyaa tahan ndo tsi ndo, tan nduyaa ndo. Tan yuuhví tucu yu coto tsa yu nu yucú ndo tan ña cuiti

ñi ndaa yucú ndo. ²¹ Tan yuuhví yu quitsi yu nu yucú ndo, tyin coto cuhva Nyoo tsa tahan yu ticanuu tsa cuenda ndo. Tan tsicá tucu iñi yu tyin coto vacu yu jaha ndo. Tyin yihi ndo ña jandihí ndo tsa javahá ndo tsa ña vaha tsa quitsahá javahá ndo nu quitsi ca tsi tyin rayií ndi tsicá nuu ra tsihin ñaha tan ñaha ndi tsicá nuu ña tsihin rayií tan nda ndihí ca maa tsa ña vaha.

13

Nu tsahá cuenda ra Pablo tsi nyivi Corinto, na jaha vaha ñi cuenda tsi ñi tatun vaha cuahán ñi tsihin Nyoo

¹ Tsinu uñi tsaha cuví tsi tsa cua quitsi yu ihya. Nda tacan tan cuví cundaa tyiñu ñi tsa javahá tsa ña vaha. Maa tyin cuñí tsi uvi o uñi taahan ra cua cuví tsandaa. ² Tyin quivi quitsi yu nu yucú ndo, catyí yu tsihin nyivi javahá tsa ña vaha, tyin jandihí ñi tsa javaha ñi tsa ña vaha. Tan vityin catyí tucu yu inga tsaha tsihin ñi, tan tsihin tandihí ndo, tyin tun cua quitsi yu inga tsaha nu yucú ndo, tan ndi javahá ca ndo tsa ña vaha, ña cua cundaahvi iñi yu nyehe yu tsi ndo. ³ Tacan tan cua coto ndo tsa cuñí xaan ndo coto ndo: Tyin nditsa nditsa tsa caahán ra Cristo tsihin yuhu yu. Tyin ra Cristo cuví ra iin ra iyó tunyee iñi tsi tan iyó ra añima ndo. Tyin iyó xaan tunyee iñi ra tsi ndo. ⁴ Nditsa tyin tsihi ra nu cruu tumaa iin ra nduve tunyee iñi iyó tsi. Maa tyin nandoto ra, tan vityin iyó ra tsihin tunyee iñi Nyoo. Tan tacan tucu nyuhu; vasu ndi maa nduve tunyee iñi maa ndi iyó tsi ndi, maa tyin iin ñi cuví ndi tsihin ra Cristo. Tan iyó ndi tsihin tunyee iñi maa Nyoo tyin tacan tan cuví jatyinyee ndi tsi nyooho.

⁵ Nducu cuhva ndo tsi ndo tun iin iñi ndo tsinú iñi ndo tsi ra Cristo. ¿A ña tsitó ndo tyin iyó ra Cristo añima ndo tun nditsa tsa tsinú iñi ndo tsi ra? ⁶ Maa tyin cuñí yu tsa coto ndo tyin nyuhu ña vatya ndi. ⁷ Tan tsicán tahvi xaan ndi tsi Nyoo tsa cuenda ndo, tyin tacan tan ña javaha ndo tsa ña vaha. Ña caahán ndi tyehen tyin cuñí ndi catyí nyivi tyin vaha ndi. Caahán ndi tyehen tyin cuñí ndi tsa javaha ndo maa ñi maa tsa vaha. Nduve cuenda ndi tun catyí nyivi tyin vaha ndi o ña vaha ndi. ⁸ Tyin nyaá tsi siqui ndi tsa javaha ndi tsa vaha. Ña cuví tyihi xeehe ndi tsa nditsa. Intuhun ñi tsa cuví javaha ndi, yacan cuví tsa jacuaha ndi tsa nditsa. ⁹ Yacan cuenda sii cuñí ndi tsa nduve tunyee iñi iyó tsi ndi, tan nyee cuñí nyooho tsihin tunyee iñi Nyoo. Tan tacan ñi tsicán tahvi ndi tsi Nyoo tsa cuenda ndo tan cunyicun vaha ca ndo tsi ra nda cuanda ña cumañi ca tsa cumañi tsi ndo. ¹⁰ Jaquitsi yu carta ihya tsi ndo tsa ndi cumañi ca quitsi yu nu yucú ndo tyin janduvaha ndo tsi ndo. Tyin

tacan tan ña cua cuñi tsi cuxaan yu tsi ndo quivi tsaá yu nu yucú ndo. Tyin nditsa tsa tsahá Nyoo ndatu tsi yu tsa quihí ndaha yu tsi ndo. Maa tyin ña tsahá ra ndatu can tsi yu tsa janducuiya ndihí ca yu iñi ndo. Ñihí yu ndatu can tsa cuenda tsa jatyinyee yu tsi ndo.

¹¹ Yañi, nu ndihí caahán yu ihya, catyí yu tsihin ndo, ndücu ndo kuhva ña cumañi tsa cumañi tsi ndo nuu Nyoo. Sii cuñi ndo. Jandu iin ndo iñi ndo. Coo mañi tahan ndo. Tan Nyoo, ra cuñi xaan tsi ndo tan tsahá tsa taxin coo añaima yo, na cunyaa ra tsihin ndo.

¹² Cuhva tahan ndo nacumi tsi ndo tsihin tsa sii cuñi ndo nyehé ndo tsi ndo. ¹³ Tan jaquitsí tandihí nyivi yihí cuenda Nyoo ñuu ihya nacumi tsi ndo.

¹⁴ Naquihin ndo tsa vaha coo añaima ndo jaha Jutu Mañi yo Jesucristo. Tan na coto ndo tyin Nyoo cuñi xaan ra tsi ndo. Tan nacoto tucu ndo tyin iyó Tatyí Ii ra tsihin ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ŋuu Cayucú Galacia

Nu tyaá ra Pablo iin carta tsa cuenda nyivi yihí cuenda Nyoo Ŋuu cayucú Galacia

¹ Yuhu ra Pablo cuví yu iin ra tsa tava tyiñu ra Jesucristo. Ŋavin nyivi jaquitsí tsi yu tyin maa ra Jesucristo tan maa Nyoo Jutu yo jaquitsí tsi yu tan tsaha ra tyiñu ihya tsi yu. Tan juven ra cuví ra tsa janandoto tsi ra Cristo tsa yaha tsihi ra. ² Yuhu tan tsihin tandihi ra yañi yo tsa yucú tsihin yu, tyaá ndi carta ihya tsa cuenda nyooho nyivi yihí cuenda Nyoo tandihi vehe ŋuhu iyó ŋuu cayucú Galacia. ³ Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo tsi yo coo añima ndo. ⁴ Maa ra Jesucristo nacuhva cuenda ra tsi ra nu cruu tsacatyí cuatyí yo Tan javaha ra tacan tyin maa Nyoo Jutu yo tsa cahan tsihin ra. Tyin tacan tan jacacú ra tsi yo nu yucú yo tsihin nyivi caquiñi iyó nu ŋuhu ñayivi ihya. ⁵ Yacan cuenda na jacahnu yo tsi maa Nyoo tacan ñi maa. Tan na cuví tsi tacan.

Nduve ca inga kuhva cuví cacu yo

⁶ Iyo xaan cuñi yu tyin nyooho numi xaan nacoq ndo tsi Nyoo. Juvín ra nacana tsi ndo tyin coo vaha ndo tsihin ra tsa cuenda tsa javaha ra Cristo tsa cuenda yo. Tan vityin siin tuhun tsinú iñi ndo. Cuñi maa ndo tyin cua jacacu yacan tsi ndo. ⁷ Maa tyin nduve ca inga kuhva cuví cacu yo. Vasu ndi maa yihí ra naha jatyañu ra naha tsi ndo. Tan cuñi ra naha jativi ra naha tuhun Nyoo tsa jacacú ra Cristo tsi yo. ⁸ Tun iyó yoo caahán tuhun ra Cristo tsihin ndo tan ña nacatsi tahan can tsihin tuhun tsa cahan ndi tsihin ndo, na cahun ñi anyaya. Yoñi jaha, vasu maa ndi cuví, o iin ángel quee andivi cuví. ⁹ Tsa yaha cahan yu tuhun ihya tsihin ndo, maa tyin cuñi yu cahan nyico yu itsi tsihin ndo inga tsaha. Tatun yoo nyivi caahán tuhun Nyoo tsihin ndo tan siin kuhva caahán ñi, na jacuhun Nyoo tsi ñi anyaya.

¹⁰ Ña caahán yu tacan tsihin ndo tsa cuenda tsa cuñi yu tsa vaha cahan nyivi tuhun yu. Tyin yuhu nducú yu tsa coo vaha yu nuu Nyoo. Tyin tun cuñi yu cuví yu nyivi vaha nuu nyivi, ñavin ra jahá tyiñu tyiñu ra Cristo cuví yu.

Nacaa quitsaha tsi cá ra Pablo tyiñu Nyoo

¹¹ Cuñi yu tsa coto ndo yañi, tyin tuhun ra Cristo tsa caahán yu tsihin ndo, ñavin tuhun nyivi cuví tsi. ¹² Ŋavin nyivi tsaha tuhun ihya tsi yu. Tyin juven ñi maa ra Cristo jacotó itsi tsi yu.

¹³ Nyooho tsiñi ndo nácaa javaha yu quivi can. Tan tsitó ndo tyin tsinyaq ndaha xaan yu tsi nyivi yihí cuenda Nyoo quivi tsa tsinyij yu cuenda ñi Israel ŋuu yu. Tan nducú yu kuhva jandu uvi yo iñi ñi tsinú iñi tsi ra Cristo. ¹⁴ Tan tsicoq yu kuhva iyó ñi Israel, tan yuhu cuví ra cuahán ityi nuu ca tan ñavin ca juhva ra yihí tahan tsihin yu tsa iin ñi cuiya ndi. Tyin yuhu cuñi xaan ca yu javaha yu kuhva javaha tsi tsahnu ndi. ¹⁵ Maa tyin tsa ndi cumañi ca cacu yu tan Nyoo tsa nacatsi maa ra tsi yu tyin cuñi xaan ra tsi yu. Tan nda tsa tsaaq maa quivi tsa tyaq ra kuhva, tan nacana ra tsi yu. ¹⁶ Tacan tan janaha ra tsi Sehe ra tsi yu tan nacoq yu tsi ra, tyin tacan tan cuví cahan yu tuhun ra nácaa jacacú ra tsi yo tsihin nyivi tsa ñavin nyivi Israel cuví. Tan quivi can ña nducú yu nyivi jacuaha tsi yu nácaa taahán tsi javaha yu. ¹⁷ Tan ndi ña tsahan yu ŋuu Jerusalén nu yucú ra tsa tava tyiñu jihna ra Cristo tsa ñaha ca tava tyiñu ra tsi yu. Maa tyin numi ñi tsahan yu nda Arabia. Tacan tan cuanuhu nyico yu inga tsaha nda ŋuu Damasco.

¹⁸ Tsa yaha uñi cuiya tan tsahan yu nda Jerusalén, tan nacoq yu tsi ra Pedro. Tan ndoq yu tsihin ra tsahun quivi. ¹⁹ Maa tyin ña nyehe yu tsi inga ra tsa tava tyiñu ra Cristo. Intuhun ñi ra Jacobo yañi Jutu Mañi yo, nyehe yu. ²⁰ Tan nda nuu Nyoo tan caahán yu tsihin ndo tyin tuhun tsa tyaá yu nu tutu ihya, tsa nditsa cuví tsi.

²¹ Tsa yaha tsa tsahan yu ŋuu Jerusalén tan tsahan yu nda Siria tan nda Cilicia. ²² Tan ra yañi yo tsa yucú vehe ŋuhu ra Cristo tsa iyó ŋuu tsa cayucú Judea, ña nacotó ra naha tsi yu. ²³ Maa tyin ñihí tuhun ra naha tsa caahán nyivi tuhun yu, tyin catyí ñi: “Ra tsa tsinyaq ndaha tsi yo quivi can, vityin caahán ndihi ra tsihin nyivi na tsinu iñi ñi tsi ra Cristo. Tan quivi can cuñi ra jativi ra tuhun ra Cristo”, catyí ñi, ñihí tuhun ra naha. ²⁴ Tan jacahnu ra naha tsi Nyoo tsa cuenda tsa javaha Nyoo tsihin yu.

2

Ra cuví ityi nuu tsihin nyivi vehe ŋuhu ŋuu Jerusalén, ndoó ra naha vaha kuhva jahá tyiñu ra Pablo

¹ Tsa yaha utsi cumi cuiya, tan tsahan yu ŋuu Jerusalén inga tsaha tsihin ra Bernabé. Tan tsahan ndihi tucu ra Tito tsihin ndi. ² Tsahan yu ndacan tyin maa Nyoo janaha tsi yu tyin taahán tsi tsa cahun yu. Tan ndacan quitá siin yu tsihin ra cuví ityi nuu tsihin nyivi vehe ŋuhu naha ra. Tan tsaha

cuenda yu tsi ra naha nácaa tuhvá yu caahán tuhun ra Cristo tsihin nyívi tsa ñavin ñi Israel cuví. Tyin tacan tan coto yu tun ndoo ra naha vaha tsihin cuhva jacuahá yu. Tyin tun ña ndoo ra naha vaha, cuatu xaan jahá tyiñu yu. ³ Maa tyin ndoo ra naha vaha. Tan ña jañiñi ra naha tsa cunyaa tuñi Nyoo tsi ra Tito, tan ñavin ra Israel cuví ra. ⁴ Nditsa tyin juhva ra naha cuñi ra naha tsa cunyaa tuñi can tsi ra Tito. Tan ra ícan naha ra quihví xeehe ra naha nu yucú ndi, tan jahá ra naha tyin yihí ra naha cuenda ra Cristo, maa tyin ña nditsa tyin ra tsacú nducu cuhva iyó nuña yo jahá ra Cristo cuví ra naha. Tan cuñi ra naha tyin taahán tsi tsa cundaca ñaha ley tsahnu tsi yo. ⁵ Maa tyin ndi luxu tan ña tsahá ndi tsa cundaca ñaha ra can naha ra tsi ndi. Tyin ña cuñi ndi tsa jaña ndo tuhun nditsa tsa jacacú ra Cristo tsi yo.

⁶ Maa tyin ra cuví ityi nuu tsihin nyívi vehe ñuhu, nduve tuhun tsa tsahá ra naha tsi yu. Tan vasu cahnu tyiñu nyisó ra can naha ra, maa tyin tsa cuenda yuhu, yofi jaha. Tyin ña cahnu cuví yo nuu Nyoo vasu ndi maa tsa cahnu tyiñu nyisó yo. ⁷ Ra cuví ityi nuu vehe ñuhu naha ra, nduve inga tuhun tsahá cuenda ra naha tsi yu tyin nacoto ra naha tyin maa Nyoo jaquitsi tsi yu tyin cahan yu tuhun ra Cristo tsihin nyívi tsa ñavin nyívi Israel cuví. Tumaa tsa jaquitsi ra tsi ra Pedro tyin cahan ra tsihin nyívi Israel. ⁸ Tyin juvin ñi maa Nyoo tavá tyiñu tsi ra Pedro tyin cahan ra tuhun ra Cristo tsihin nyívi Israel. Tan tavá tyiñu tucu ra tsi yuhu tyin cahan yu tuhun ra tsihin nyívi tsa ñavin nyívi Israel cuví.

⁹ Yacan cuenda ra cuví ityi nuu naha ra, ra Jacobo, ra Pedro tan ra Juan, nacoto ra naha tyin Nyoo tsahá ra tunyee ifi tsi yu tsa cahan yu tuhun ra Cristo tsihin nyívi. Tan tsahá ra naha ndaha ra naha tñi ndi, tsihin ra Bernabé tyin ndoo ra naha vaha tsa cahan ndi tuhun ra Cristo tsihin nyívi tsa ñavin nyívi Israel cuví, tan maa ra naha cahan tucu ra naha tsihin nyívi Israel. ¹⁰ Tan cahan ra naha iin tuhun tsihin ndi, na nducuhun ifi ndi tsi nyívi ndaahvi tan na jatinyee ndi tsi ñi. Tan yacan cuví tsa nducú xaan yu cuhva javahá yu tandihi ñi quivi.

Nu nduxaqañ ra Pablo tsi ra Pedro tyin ña vaha tsa javahá ra

¹¹ Maa tyin quivi tsahan ra Pedro ñuu Antioquía, nuu nuu ra tan cuxaqañ yu tsi ra tyin ña vaha tsa javahá ra. ¹² Tyin tsa jihna ñi vaha javahá ra tyin tsatsi ra tsihin ñi tsa ñavin nyívi Israel cuví. Maa tyin tsa tsaa juhva ra Israel naha ra tsa jaquitsi ra Jacobo, tacan tan quitsahá jatsiyó ra tsi ra tan ña cuñi ca ra catsi ra tsihin ñi ícan. Javahá ra tacan tyin yuuhví ra coto cuxaan ra tsa tsaa can naha ra tsi ra tyin ndi nyitá

ifi ra can naha ra tuñi Nyoo. ¹³ Tacan tan inga ra Israel tsa yihí cuenda ra Cristo, ndu iin ra naha tsihin ra Pedro. Tan javahá ndihi ra naha tsa ña vaha can. Tyin javahá ra naha tumaa javahá ra Pedro vasu tsitó ra naha tyin ña vaha can. Tan nda cuenda ra Bernabé tan ndu iin ra tsihin ra naha. ¹⁴ Tan nyehe yu tyin ña vaha javahá ra naha. Ñavin tumaa cuhva catyi tuhun ra Cristo. Yacan cuenda cahan yu tsihin ra Pedro nuu tandihi ra yucú ícan: “Yooho cuví un iin ra Israel. Tan iyó un tumaa iyó nyívi tsa ñavin nyívi Israel cuví. ¿Nacaa tsa cuñi un jañiñi un tsi nyívi tsa ñavin nyívi Israel cuví na coo ñi cuhva iyó ñi Israel? [Tan ndi maa un tan ña javahá un tacan]”, catyi yu tsihin ra.

¹⁵ Maa yo nda ndi cacú yo tan cuví yo ra ñuu Israel ña javahá xaan yo cuatyí tumaa javahá ñi tsa ñavin nyívi Israel cuví. ¹⁶ Maa tyin tsitó yo tyin ña cuví janduvaha yo tsi yo nuu Nyoo tsihin tsa nducú yo cuhva tyaa yahvi yo ley tsahnu tsa tyaa ra Moisés. Tan nduvahá yo nuu Nyoo tsa cuenda tsa tsinú ñi ifi yo tsi ra Jesucristo. Yacan cuenda tsinú ifi yo tsi ra, tyin tacan tan coo vaha yo tsihin ra, tan ñavin tsa cuenda tsa nducú yo cuhva tyaa yahvi yo tsa catyi ley can. Tyin ndi intuhun yo tan ña nduvahá yo nuu Nyoo tsihin tsa nducú yo cuhva javaha yo cuhva catyi ley tsahnu can.

¹⁷ Maa tyin vityin tatun nducú yo cuhva nduvaha yo nuu Nyoo tsa cuenda ra Cristo, cuñi tsi catyi tyin nacoto yo tyin ifi tucu cuatyí yo tumaa iyó cuatyí ñi tsa ñavin nyívi Israel cuví. Tatun tacan, ¿a cuñi tsi catyi tyin iyó cuatyí yo jahá maa ra Cristo tyin nacoto yo tyin iyó cuatyí yo? Ñavin tacan. ¹⁸ Maa tyin tun cua cuita nyico ifi yo ley tsa tsa yahá nacoo yo, yacan nditsa cua coo cuatyí yo. ¹⁹ Tyin ley can janahá tsi tsi yu tyin taahán tsi cúu yu tsa catyi cuatyí yu, tan yacan cuenda ña nducu ca yu cuhva cacu yu tsihin ley can, tyin tacan tan cuví coo yu tsa cuenda Nyoo. ²⁰ Yuhu, tumaa tsa iin caa ñi tsihi yu nuu cruu tsihin ra Cristo. Tan ñavin ca maa yu iyó, tyin ra Cristo iyó añima yu vityin. Tan cuhva iyó yu vityin, iyó yu tsihin tsa tsinú ifi yu tsi ra tsa cuví ra Sehe Nyoo. Tyin maa ra cuñi ra tsi yu, tan tsihi ra tsacatyí cuatyí yu. ²¹ Ña cuñi yuhu tyaa tsiyo yu tunyee ifi tsa tsahá Nyoo tsi yo. Tyin tun tsatyin cuví cacu yo jaha ley tsahnu, nduve nacatyí tsihi ra Cristo.

3

Naquihín yo Tatyí Ii Nyoo tsa cuenda tsa tsinú ifi yo tsi ra Cristo

¹ ¿Náa tsa soho iyó nyoooho, nyívi Galacia! ¿Yóo tsa jatívi tsi ndo tan ña tyaa yahvi ca ndo tsa nditsa? Catsi xaan tsahá cuenda ndi tuhun ra Jesucristo tsi ndo. Tan cutuñi vaha

iñi ndo nacuenda tsihi ra nu cruu. ²Intuhun ñi tsa cuñi yu nducu tuhun yu tsi ndo. ¿A naquihin ndo Tatyí li Nyoo tsa cuenda tsa javahá ndo tsa catyí ley ra Moisés, a tsa cuenda tsa tsiñi ndo tuhun ra Cristo tan tsinú iñi ndo tsi ra? ³¿Nacaa tsa soho xaan iyó ndo vityin? Tan quivi jihna ñi vaha xaan tyaá yahví ndo tsi Nyoo tsihin tunyee iñi Tatyí li ra. Tan vityin, ¿nacaa cuñi ndo coo ndo tsihin tunyee iñi maa ndo? ⁴¿A tsa cuatu ñi nyehe ndo nacaa jatyinyee Tatyí li Nyoo tsi ndo nu nyehe ndo tundoho? Ñavin tsa cuatu ñi cuví yacan, cuñi yuhu. ⁵¿Nacaa tsahá Nyoo Tatyí li ra tsi ndo, tan javahá ra tsa iyo nyehé ndo? Ñavin tsa cuenda tsa nducú ndo cuhva javaha ndo tsa catyí ley tan javahá ra yacan tsihin ndo; javahá ra yacan tyin tsiñi ndo tuhun ra Cristo tan tsinú iñi ndo tsa caahan ra.

⁶Ra Abraham, tsinú iñi ra tsa cahan Nyoo tsihin ra, yacan cuenda Nyoo naquihin tsi ra tumaa tsatyin vaha ra. ⁷Yacan cuenda taahan tsi coto ndo tyin nyivi tsa nditsa cuví tata ra Abraham, juven ñi cuví ñi tsa tsinú iñi tsi Nyoo. ⁸Tan tsanaha ndoo tuhun Nyoo nu tutu. Tan catyí tsi tyin nu cuahan ca tsi quivi, cua janduvaha Nyoo tsi nyivi tsa ñavin nyivi Israel cuví tsa cuenda tsa tsinú iñi ñi tsi ra. Yacan cuenda catyí Nyoo tsihin ra Abraham tsanaha: “Tandihí maa nyivi cua nasoco yu tsi ñi tsa cuenda un”, catyí Nyoo tsihin ra. ⁹Yacan cuenda ñi tsa tsinú iñi tsi ra Cristo, Nyoo nasocó ra tsi ñi iin caa ñi tsihin ra Abraham, tyin tsinú iñi tucu maa ra.

¹⁰Nyivi tsa nyitá iñi ley tsa tyaá ra Moisés, cua tatsi tuñi Nyoo tsi ñi. Tyin tuhun Nyoo catyí tsi. “Tandihí nyivi tsa ña tyaá yahví tandihí ley tsa nyaá nu libru ley Nyoo, cua tatsi tuñi Nyoo tsi ñi.” ¹¹Tan nditsa tyin yoñi nduvahá jaha Nyoo tsa cuenda tsa nyitá iñi ñi ley can. Tyin tuhun Nyoo catyí tsi: “Ra tsa nduvahá nuu Nyoo tsa cuenda tsa tsinú iñi ra, juven ra cua coo ñayivi tsa ña cua naa maa”, catyí tuhun Nyoo. ¹²Tan ley ra Moisés ña catyí tsi tun taahan tsi tsinú iñi yo. Tyin catyí ley can: “Nyivi javahá tsa catyí ley ihya, coo ñi ñayivi nyito tsa cuenda can”, catyí tsi.

¹³Ley can catyí tyin taahan tsi cúu yo tsa cuenda cuatyí yo, tan ña ndacá ñaha ca tsi tsi yo tyin ra Cristo tsa tavá nuña ra tsi yo. Tan maa ra naquihin tandihí cuatyí yo. Tyin catyí tuhun Nyoo: “Tandihí maa ra tsa ticaá nu yutun, tatsí tuñi Nyoo tsi ra.” ¹⁴Tacan cuví tyin tsa cuenda ra Cristo Jesús tan nasocó Nyoo tsi nyivi tsa ñavin nyivi Israel cuví, tumaa catyí ra tsihin ra Abraham tyin cua nasoco ra tsi ra. Tan tsa cuenda tsa tsinú iñi yo tsi Nyoo, naquihin yo Tatyí li tsa catyí Nyoo tyin cuhva ra tsi yo.

Ley tsahnu janahá tsi tsi yo tyin iyó cu-atyí yo, maa tyin ña jacacú tsi tsi yo

¹⁵Yañi, cua cahan yu iin cuhva tsihin ndo, cuhva iyó yo nu ñuhu ñayivi ihya. Tatun iin ra tan catyí ra tyin cua cuhva ra tsa cuhva ra tsi inga ra, tan tatun tsa yahá tyihí ra firma ra, yoñi ca cuví quihin nyaa can. Tan yoñi ca cuví natyiso juhva ca siqui can. ¹⁶Tan Nyoo catyí ra tyin cua cuhva ra tsa cuhva ra tsi ra Abraham tan tsi inga ra tsa cuví tata ra. Ña catyí tsi nu tutu Nyoo tun cuhva ra tsi tandihí ra cuví tata ra, tyin intuhun ñi ra cua cuhva ra. Tan juven ra can cuví ra Cristo. ¹⁷Tsa caahan yu, cuví tsehe: Nyoo natuhun tahan ra tsihin ra Abraham. Tan ndoo vaha ra tuhun tsihin ra. Tacan tan yahá cumi cientu oco utsi cuiya tan tsaá ley tsa tyaá ra Moisés. Maa tyin ña cuví caní ley can tuhun tsa ndoo Nyoo tsihin ra Abraham. Tan ña cuví casí tsi nu naquihin yo tsa catyí Nyoo tyin cuhva ra tsi yo. ¹⁸Tun tsatyin tsa cuenda ley ra Moisés tan naquihin yo tsa taahan tsi tsi yo, cuatu xaan ndoo Nyoo tuhun tsihin yo. Maa tyin tsitó yo tyin ñihí ra Abraham tsa ñihí ra tyin tsahá Nyoo tsa catyí ra tyin cuhva ra tsi ra.

¹⁹Tatun tacan, ¿nacuenta vaha ley ra Moisés? Tsa jihna ñi Nyoo catyí ra tyin cuhva ra tsa vaha tsi ra Abraham. Yahá can tan tsahá ra ley can tsi ra Moisés tan janahá tsi tyin iyó cuatyí yo. Tan ángel Nyoo tsahá cuenda ley can tsi ra Moisés. Tan ra Moisés tsahá cuenda can tsi nyivi. Tan ndoo tsi nda cuenda quivi tsa quitsí ra Cristo, ra cuví tata ra Abraham. Juven ra cuví ra tsa catyí Nyoo tyin cua cuhva tsa vaha tsi yo. ²⁰Tan juven ñi maa Nyoo cahan tsihin ra Abraham quivi can. Tan ña tsiñi ñuhu tsa nducu siin ra iin ra nacatyí tuhun tsihin ra Abraham.

²¹¿A cuñi tsi catyí tyin ley tsa tyaá ra Moisés ña nacatsí tahan tsi tsihin tsa catyí Nyoo tyin cuhva ra tsi yo? Ñavin. Tun tsatyin cuví coo yo ñayivi nyito jaha ley can, cuví nduvaha yo nuu Nyoo tsa cuenda tsi. Maa tyin ña cuví. ²²Tyin catyí nu tutu Nyoo tyin iyó cuatyí tandihí nyivi. Tyin tacan tan nyivi tsa tsinú iñi tsi ra Jesucristo cuví ñihí ñi ñayivi nyito tsa catyí Nyoo tyin cuhva ra tsi yo.

²³Tsa ndi cumañi ca tsinú iñi yo tsi ra Cristo, ley can yihí ndaha tsi yo tumaa tsa tsinyi yo vehe caa. Tacan cuví nda cuenda janahá Nyoo tsi yo nacaa tan tsinú iñi yo tsi ra. ²⁴Tan ley can cuví tsi tumaa iin nyivi jahá cuenda tsa nyihí. Tyin jahá cuenda tsi tsi yo nda cuenda quivi quitsí ra Cristo. Tan cuví tsinú iñi yo tsi ra tan nduvahá yo nuu Nyoo. ²⁵Tan vityin tsa tsaá quivi tsa tsinú iñi yo tsi ra Cristo, yacan cuenda ña jahá cuenda ca ley can tsi yo.

²⁶ Tyin tandihí yo cuví yo sehe Nyoo tyin tsinú iñi yo tsi ra Cristo Jesús. ²⁷ Tan tandihí yo tsicoondutyá yo tan ndu iin yo tsihin ra Cristo, tan nanduví yo tumaa maa ra. ²⁸ Ña ñiñi xaan ca tsa cuví yo nyivi Israel, a cuví yo nyivi Grecia; a cuví yo musu, a ñavin musu cuví yo; a cuví yo rayi, a ñaha. Yofí ca caahán tuhun yacan, tyin tsa iin ñi cuví yo tsihin ra Cristo, intuhun ña nyivi cuví yo tsihin ra. ²⁹ Tan tatun cuenda ra Cristo yihí ndo, nditsa tsa tata ra Abraham cuví ndo. Tan ñihí ndo tsa catyí Nyoo tsihin ra Abraham tyin cuhva ra tsi ra.

4

¹ Cua cahan yu iin cuhva tsihin ndo. Tatun iin ra luhlu tan tsihí jutu ra, tan nacoó jutu ra tandihí tsa cuca ra tsi ra, ra luhlu can cua cutyiñu ra can nda cuahnu ra. Tan tsitsi tsa ndi cumañi ca cuahnu ra, cuví ra tumaa iin musu ñi. Vasu tsii maa ra cuví tandihí tsa cuca jutu ra. ² Iyó ra jahá cuenda tsi ra nda cuanda tsaa cuiya ra tsa catyí jutu ra tyin cua naquihin ra ndaha tyiñu tsa nacoó ra tsi ra. ³ Tan tacan cuví maa yo. Tsa ndi cumañi ca quítsi ra Cristo, cuví yo musu cuhva iyó nyivi iyó nu ñuhu ñayivi ihya. ⁴ Maa tyin quivi tahañ tsi, Nyoo jaquítsi ra tsi Sehe ra. Tan jacacú iin ñaha tsi ra. Tan tsindaca ñaha ley tsahnu Nyoo tsi ra. ⁵ Jaquítsi Nyoo tsi ra tyin jacacu ra tsi yo tsa ña quihí ndaha ca ley tsi yo. Tyin tacan tan naquihin cuenda Nyoo tsi yo tumaa sehe ra.

⁶ Tan tsa cuenda tsa nanduví yo sehe ra, Nyoo jaquítsi ra Tatyí Ii ra Cristo cunya añima yo. Tan tsa cuenda Tatyí Ii ra caná tsaa yo tsi Nyoo tan catyí yo: “Tyatya”. ⁷ Yacan cuenda sehe Nyoo cuví yo tan ña cuví ca yo tumaa iin musu. Tan tsa cuenda tsa cuví yo sehe Nyoo, tsahá ra tsa cuca ra tsi yo tsa cuenda ra Cristo.

Tsicá iñi ra Pablo tsa cuenda nyivi yihí cuenda Nyoo

⁸ Tan quivi tsa ñaha ca nacoto ndo tsi Nyoo, cuví ndo musu tsitoho tsa ñavin Nyoo cuví. ⁹ Maa tyin vityin tsa nacotó ndo tsi Nyoo. Vaha ca catyí yu, maa Nyoo nacotó ra tsi ndo. ¿Nacaa tsa cuñi ndo quihin nyico ndo tuhun ndaahvi tsa nduve tunyee iñi iyó tsi, tan cuví nyico ndo musu? ¹⁰ Nyooho ndi jacahnú ca ndo quivi vico, quivi nduyutyá yoo, tan vico tandihí ñi cuiya. ¹¹ Yuuhví xaan yu coto iin tsa cuatu ñi cuví tyiñu jahá yu tsihin ndo.

¹² Yañi, caahán ndaahvi yu tsihin ndo coo ndo tumaa iyó maa yu. Tyin yuhu ña yihí ndaha ca ley tsahnu tsi yu. Tumaa tsa ña yihí ndaha ley tsahnu tsi maa ndo. Tan tsa tacan iyó yu, ña cuñi yu tsa caca iñi ndo tyin jatíví ndo tsi yu. ¹³ Tan tsa tsitó ndo tyin quivi quítsi jihna yu ñuu ndo iyó iin cuehe tsi

yu, yacan cuenda ndo yu juhva quivi tsihin ndo, tan cahan yu tuhun ra Cristo tsihin ndo. ¹⁴ Tan vasu ndi maa tsa cuuhví yu tsihin cuehe can vaha naquihin cuenda ndo tsi yu tan ña tyaa tsiyo ndo tsi yu. Naquihin cuenda ndo tsi yu tumaa tun cuví yo iin ángel tan tumaa tun ra Cristo cuví yu. ¹⁵ Tan vityin ¿numaa cuahán tsa sii xaan cuñi ndo tsihin yu quivi can? Tyin yuhu cuví yu tsandaa tyin quivi can, nda cuanda cuñi ndo tava ndo tinuu ndo tan cuhva ndo tsi yu, tun tsatyin cuví nduvaha yu tsihin yacan. ¹⁶ Tan vityin, ¿a nanduví yu ra xaan iñi tsi ndo tsa cuenda tsa caahán yu tsa nditsa tsihin ndo? Ñavin.

¹⁷ Nyivi can, cuñi xaan ñi tsi ndo catyí ñi. Maa tyin ña nditsa ñi. Caahán ñi tacan tyin cuñi ñi tsa cunyicon ndo tsi ñi tan ña tsinu ca iñi ndo tuhun caahán yu. ¹⁸ Vaha tsa cuñi yo tsi nyivi, maa tyin cuñi yo tsi ñi tsihin tsa vaha, tan ña cuñi yo tsi ñi tañi ñi cuhva tsa tyin nyíi ñi yu tsihin ndo. ¹⁹ Nyooho ra cuatyí sehe yu, nyehé nyico yu tundoho tan tsa uhvi tsa catyí ndo. Tumaa nyehé iin ñaha tundoho tun cua cacu sehe ña. Tacan nyehé yu tundoho. Tan ndi nyaá ca cua nyehé yu tundoho nda cuanda cuahnu ndo tsihin tunyee iñi maa ra Cristo. ²⁰ Vaha xaan tun tsatyin cuví cunyi yu tsihin ndo vityin ihya. Tyin tacan tan cuví nasama yu cuhva cahan yu tsihin ndo. Tyin vityin ña tsitó yu ñaa caca iñi yu tsa cuenda ndo.

Na coo yo tsa cuenda Nyoo tan ñavin tsa cuenda ley tsahnu

²¹ ¿A ñaha ca cahvi ndo tsa caahán ley tsa tsahá Nyoo tsi ra Moisés? tyin cuñi ndo cundaca ñaha can tsi ndo, catyí tuhun ndo tsihin yu tun ñaha ca cahvi ndo can. ²² Catyí tsi tyin ra Abraham tsicoó uvi taahan sehe ra. Tsicoó iin sehe ra tsihin ña Agar tsa cuví musu ñasihi ra. Tan tsicoó inga sehe ra tsihin ña Sara ñasihi vaha maa ra. ²³ Cacú sehe ñaha tsa cuví musu can tumaa cacú tandihí ca maa lee. Maa tyin sehe ñasihi ra Abraham cacú ra tumaa catyí maa Nyoo tsihin ra tyin cua cuví. ²⁴ Tan tuhun can iyó tsa cuñi tsi catyí tsi tsihin yo. Nduvi taahan ñi ñaha can cuví ñi tumaa nduvi taahan tuhun tsa ndo Nyoo tuhun tsihin yo. Intuhun tuhun can cuví cuenda yucu Sinaí. Tan nyivi yihí cuenda ley can cuví ñi tumaa ña Agar, tyin iin musu ñi cuví ña tsihin sehe ña. ²⁵ Tumaa ña Agar, tan tumaa yucu Sinaí tsa canyíi Arabia, tacan cuví ñuu Jerusalén nda quivi vityin. Tyin nyivi ñuu can yihí ndaha ley tsahnu tsi ñi. Tan cuví ñi tumaa musu ley can. ²⁶ Maa tyin nda gloria iyó inga Jerusalén, tsa cuví ñuu yoo. Tan ñuu can iyó nuña tsi. Yacan cuenda yoo iyó nuña yo tyin ñuu can cuví tumaa sihi yo. ²⁷ Tan catyí tuhun Nyoo tyehen:

Cusii iñi yooho, ñaha tsa ña cuví coo sehe.

Yooho tsa nduve sehe iyó.

Caná tsaá tsihin tsa sii cuñí un, tyin ña tsitó un tsa uhví cacú sehe un.

Cusii iñi tyin cua cuhva cuaha ca yu sehe un tan ñavin ca ñaha iyó yí, catyí tuhun Nyoo.

²⁸ Yañi, yoo cuví yo tumaa ra Isaac, sehe ra Abraham tyin cacú ra cuhva catyí maa Nyoo tsihin jutu ra. ²⁹ Ra sehe ñaha tsa cuví musu can, xaan iñi ra tsi ra Isaac sehe ñasihi ra Abraham. Tacan cuví tucu vityin ihya. Ra tsa cuñí tyin javaha yo tsa catyí ley, xaan iñi ra naha tsi yo tsa cuví yo nyívi cacú tsaá tsihin Tatyí Ii Nyoo. ³⁰ Tan ¿náa catyí tuhun Nyoo? Catyí tsi: “Tava tsiyo tsi ñaha tsa cuví musu can tsihin sehe ña, tyin ña cuví naquihin sehe ña tsa taahán tsi tsi sehe ñaha tsa ñavin musu cuví”, catyí tuhun Nyoo. ³¹ Yacan cuenda, yañi, ña cuví yo tumaa cuví sehe ñaha tsa cuví musu can. Tyin cuví yo tumaa cuví sehe ñasihi ra Abraham, tyin ñavin musu cuví yo. [Tan Nyoo naquihin cuenda ra tsi yo tyin tsinú iñi yo tsi ra tan ñavin tsa cuenda tsa tyaá yahvi yo ley tsahnu.]

5

Na tyaá yahvi yo tuhun ra Cristo tan ña cuhva yo cundaca ñaha ley tsahnu tsi yo

¹ Ra Cristo tsa yaha jacacú ra tsi yo ndaha ley tsahnu can. Yacan cuenda jaha ndo cuenda tsi ndo, coto nanduvi ndo musu inga tsaha.

² Tyaá soho ndo, yuhu ra Pablo caahán tsihin ndo. Tatun cuhva ndo tsa cunyaa tuñi Nyoo tsi ndo tan cuñi ndo tyin cua jacacu yacan tsi ndo, ña cua cuví jatinyee ra Cristo tsi ndo. ³ Cuñí yu cahan yu tsihin ndo inga tsaha tuhun ihya: Tandihí ra tsa cuñí cacu tsihin tsa cunyaa tuñi Nyoo tsi ra naha, cuñí tsi javaha ra naha tandihí maa tsa catyí ley ra Moisés. ⁴ Tandihí nyooho tsa nducú nduvaha nuu Nyoo tsihin tsa javaha ndo cuhva catyí ley can, tsa quita tsiyo ndo nuu ra Cristo. Tan jaña ndaha ndo tsa vaha tsa tsahá Nyoo tsi ndo. ⁵ Maa tyin yoo tsihin tsa jatinyee Tatyí Ii Nyoo tsi yo tan tsinú iñi yo tsi ra Cristo, tan nyítá iñi yo nduvahá yo nuu Nyoo. ⁶ Tyin tatun iin ñi cuví yo tsihin ra Cristo Jesús, yoñi jaha tun nyaá tuñi Nyoo tsi yo, o nduve. Tyin cahnu ca cuví tsa tsinú iñi yo tsi ra Cristo. Tan tsihin tsa tsinú iñi yo cuví coo yo, tan cuñí tahan ca yo tsi yo.

⁷ Nyooho vaha xaan cuahán ndo quivi can. ¿Tan vityin yoo jandu uvi iñi ndo? Tan ña tyaá yahvi ca ndo tsa nditsa. ⁸ Tuhun tsa janahá ñi can, ñavin tuhun Nyoo, ra tsa caná tsi yo, cuví can. ⁹ Tyin tumaa ndaá yutsan paan jahá luxu ñi yutsan iya, tacan cuví iin nyívi caquiñi, cuaha ca nyívi cuví jativi ñi. ¹⁰ Nyoo cua tatsi tuñi ra tsi nyívi jandu uvi

iñi ndo. Nduve cuenda ra yóo ñi cuví ñi. Maa tyin yuhu tsitó vaha yu tyin Jutu Mafí yo cua jatinyee ra tsi ndo tan ña cua tyaá iñi ndo inga cuhva tsa ña janahá yu tsi ndo.

¹¹ Tan tsa cuenda yuhu, yañi, tun tsatyin catyí yu tyin ra tsinú iñi tsi ra Cristo cuñí tsi tsa cunyaa tuñi Nyoo tsi ra, ra Israel can naha ra ña cua cunyaa ndaha ra naha tsi yu. Tan ña ndasi cua cuñi ra naha tsa caahán yu tuhun ra Cristo, ra tsa tsihi nu cruu tsacatyí cuatyí yo. ¹² Maa tyin ra tsa cuñí jandu uvi iñi tsi ndo, vaha taxin ca na quita tsiyo ra naha nu yucu ndo, tyin tacan tan ña cua cuví ca jandu uvi iñi ra naha tsi ndo.

¹³ Nyooho, yañi, caná Nyoo tsi ndo tsa ña cundaca ñaha ca ley tsi ndo. Tan ñavin tsa cuenda tsa iyó nuña ndo tan cuví javaha ndo náa ndihí tsa cuñí cuñu ñuhu ndo. Maa tyin taahán tsi tsa jatinyee tahan ndo tsi ndo tsa cuenda tsa cuñí tahan ndo tsi ndo. ¹⁴ Tyin iyó iin ley Nyoo, tan catyí tsi: “Cuñí tahan ndo tsi ndo tumaa cuñí ndo tsi maa ndo”, catyí tsi. Tan tatun nditsa tsa cuñí tahan yo tsi yo, tsa javahá ndihí yo tandihí ca tsa caahán ley tsahnu. ¹⁵ Jaha ndo cuenda tyin tatun caahán nyaá tahan ndo tsi ndo tan ndasi cuñí ndo nyehe tahan ndo tsi ndo, cua tivi nu yucu ndo.

Cuhva cuñí cuñu ñuhu yo tan cuhva iyó yo tsihin Tatyí Ii Nyoo

¹⁶ Tsa cuñí yu cahan yu tsihin ndo cuví tuhun ihya: Cqo ndo tsihin tunyee iñi Tatyí Ii Nyoo. Tacan tan ña cua javaha ca ndo tsa ña vaha tsa cuñí cuñu ñuhu ndo. ¹⁷ Tyin tsa javahá yo tsa ña vaha tsa cuñí cuñu ñuhu yo, ñavin cuhva cuñí Tatyí Ii Nyoo javahá yo. Tyin Tatyí Ii Nyoo cuñí tsi tsa javahá yo tsa vaha. Tan cuñu ñuhu yo ña cuñí tsi javahá tsi cuhva cuñí Tatyí Ii Nyoo. Tsa cuñí Tatyí Ii Nyoo cañí tahan can tsihin tsa cuñí cuñu ñuhu yo. Yacan cuenda yíi javaha yo tsa cuñí yo javaha yo. ¹⁸ Maa tyin tatun tsahá yo tsi yo tsa jaquihin ityi Tatyí Ii Nyoo tsi yo, ña cua cundaca ñaha ca ley tsahnu tsi yo.

¹⁹ Ña yíi nacoto yo tsi nyívi javahá cuhva cuñí cuñu ñuhu ñi. Yihí rayíi, iyó ñasihi ra naha tan iyó inga ñaha tsi ra naha. Tan yihí ñiñaha iyó yí ñi tan iyó inga rayíi tsi ñi. Tan yihí rayíi quixí ra tsihin ñaha tan ña cuñí ra tindaha ra tsihin ña, tan juvin ñi tacan javaha juhva ñiñaha. ²⁰ Yihí ñi jacahnú ñi tsitoho. Yihí ñi tasi ñi. Yihí ñi ndasi cuñí ñi nyehe ñi nyívi. Yihí ñi cañí tahan ñi. Yihí ñi cuiñu ñi. Tan yihí ñi iin yaha ñi cuxaan ñi. Yihí ñi tsicá iñi ñi maa ñi tsa vaha tsi maa ñi. Tan yihí ñi natahvi sava ñi nu yucú ñi tyin cañí tahan ñi. Tan tacan tan quita siin ñi. ²¹ Tan yihí ñi nyiyó iñi ñi tsa iyó tsi inga nyívi. Tan yihí ñi tsahnú tahan ñi. Tan yihí ñi tuhva

ñi tsiñi. Tan yihí ñi cuaha xaan tsatsi ñi. Tan javahá ñi cuaha ca tsa javahá ñi. Tan caahán yu tsihin ndo tumaa tsa cahán yu tsihin ndo quivi can. Tyin tandihí ñi tsa javahá yacan, ña cua cuvi naquihin cuenda ñi nu ndacá ñaha Nyoo.

²² Maa tyin tsa tsahá Tatyí Ii Nyoo tsi yo, cuví tsa cuñí yo tsi Nyoo tan tsi nyivi, tsa sii cuñí yo, tsa taxin cuñí añima yo, tsa nyee xaan iñi yo, tsa vaha iñi yo, tsa vaha nyivi cuví yo, tsa ña cundihi iñi yo javahá yo tsa vaha tsihin nyivi, tsa tsinú iñi yo tsi ra Cristo.

²³ Tan inga tsa tsahá Tatyí Ii Nyoo tsi yo, yacan cuví tsa ndaahvi jahá yo tsi yo, tsa ña javahá yo cuhva cuñí cuñu ñuhu yo. Tatun javahá yo tandihí tsa vaha ihya, ndi intuhun ley tan ña cua cuvi catyi tsi tyin iyó cuatyí yo. ²⁴ Tan yoo tsa yihí cuenda ra Cristo Jesús, tsa yaha jandihí yo tuhun tsa javaha yo tsa ña vaha tsa cuñí cuñu ñuhu yo. ²⁵ Tan tumaa tsa iyó yo ñayivi nyito tsa cuenda Tatyí Ii Nyoo, tacan cuñí ndihí tucu tsi tyaá yahvi yo tsa janahá ra tsi yo.

²⁶ Na ña cahnu jaha yo tsi yo. Tan ña jacañi tahan yo tsi nyivi. Tan na ña nyiyo iñi yo tsa tsii inga nyivi.

6

Taahán tsi jatyinyee tahan yo tsi yo

¹ Yañi, tatun nyehé ndo javahá iin ra yañi yo cuatyí, nyoocho tsa ñihi nyaá Tatyí Ii Nyoo tsihin, jatyinyee ndo tsi ra na nduvaha ra inga tsaha. Maa tyin cuñí tsi cahán vii ndo tsihin ra tsihin tsa vita iñi ndo. Tan cuñí tsi jahá xaan ndo cuenda tsi ndo coto nducu cuhva ndihí nu ña vaha tsi ndo.

² Na jatyinyee tahan yo tsi yo náa tundoho taahán yo. Tyin tatun javahá yo tacan, cuñí tsi catyi tyin tyaá yahvi yo tsi ra Cristo.

³ Tatun ndáa yo cuñí maa yo tyin cahnu nyivi cuví yo, tan nduve náa cuví yo, juven ñi tsi maa yo jandavi ñaha yo. ⁴ Na jaha jihna yo cuenda tatun vaha tsa javahá yo. Tacan tan coto yo tatun vaha javahá yo tan cusii iñi yo. Tan ña taahán tsi nyehe yo náa javahá inga nyivi. ⁵ Tyin intuhun intuhun maa yo tan taahán tsi cunyeé iñi yo cuiso yo tsa taahán tsi tsi yo.

⁶ Tan cuñí tsi tsa jatyinyeé ndo tsi ra jacuahá tuhun Nyoo tsi ndo. Cuhva ndo náa tsiñí ñuhu tsi ra.

⁷ Tan ña jandavi ñaha ndo tsi juven ñi maa ndo. Tyin Nyoo yoñi cuví vacu nducu tsi ra. Tyin tandihí tsa tatsí nyivi, yacan cua naquihin ñi. Tyin tatun javahá ñi tsa vaha, tsa vaha cua naquihin ñi. ⁸ Tacan tucu tatun iin nyivi tan javahá ñi tsa ña vaha tsa cuñí cuñu ñuhu ñi, juven ñi maa tsa javahá ñi cua jativi tsi ñi. Maa tyin tatun javahá ñi cuhva cuñí Tatyí Ii Nyoo, Tatyí Ii Nyoo cua cuhva ñayivi nyito tsa ña cua naa maa coo ñi.

⁹ Yacan cuenda janyee ndo iñi ndo javaha ndo tsa vaha. Tyin tatun ña jandihí yo tsa javahá yo tacan, cua naquihin yo tsa vaha na tahan tsi quivi. ¹⁰ Yacan cuenda tandihí ñi tsaha tsa cuvi javaha yo tsa vaha, na javaha yo itsi tsihin tandihí ñi nyivi. Tan tsa jihna ñi taahán tsi javaha yo tsa vaha tsihin nyivi yihí cuenda Nyoo.

Sii xaan cuñí ra Pablo tyin nyehé ra tundoho tsa cuenda ra Cristo

¹¹ Nyehe ndo tsa nahnu letra tyaá yu tsihin ndaha yu nu tutu ihya vityin. ¹² Ra tsa jañiñi tsi ndo tsa cunyaa tuñi Nyoo tsi ndo, tacan javahá ra naha tyin cuñí ra naha na catyi nyivi tyin vaha xaan ra naha. Tan ña cuñí ra naha nyehe ra naha tundoho tsa cuenda ra Cristo, ra tsa tsihi nu cruu tsa cuenda yo. ¹³ Tyin ndi maa ra tsa nyisó tuñi Nyoo tan ña tyaá yahvi ra naha tandihí tsa caahán ley. Cuñí ra naha tsa cunyaa tuñi Nyoo tsi nyoocho. Tyin tacan tan cuví jacahnu ra naha tsi maa ra naha tyin javahá ndo cuhva caahán ra naha. ¹⁴ Maa tyin yuhu ña cuñí yu cu iyo iñi yu tsi yu tsa cuenda náa ndihí tuhun. Maa tyin cu iyo iñi yu tyin tsihi Jutu Mañi yo Jesucristo nu cruu tsa cuenda yu. Tan maa ra ndacá ñaha tsi yu, tan ña cuñí ca yu tsa iyó ñuu ñayivi ihya tyin ña ndaca ñaha ca yacan tsi yu. ¹⁵ Tyin tatun nyicún yo tsi ra Cristo Jesús, ña ñiñi xaan ca tsa cunyaa o tsa ña cunyaa tuñi Nyoo tsi yo. Tyin tsa ñiñi ca cuví, tsa nanduvi yo iin nyivi tsaa tsa cuenda ra. ¹⁶ Tandihí nyoocho tsa iyó tacan, naquihin ndo tsa taxin coo añima ndo. Tan na cundaahvi iñi Nyoo nyehe ra tsi tandihí ndo, tyin nditsa tsa cuví ndo nyivi cuenda ra.

¹⁷ Vityin tan nu cuahán tsi ityi nuu, ndi intuhun ndo tan ña cua cuhva ca ndo tsihi tsi yu. Tyin tandihí paa tsa nyecú cuñu ñuhu yu, cuñí tsi catyi tsi tyin nditsa tsa cuví yu iin ra tsicá tyiñu Jutu Mañi yo Jesús.

¹⁸ Yañi, na nasoco Jutu Mañi yo Jesucristo tsi tandihí ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo Ñuu Éfeso

Nu quitsahá javahá ra Pablo carta

¹ Yuhu ra Pablo cuví yu iin ra tsicá tyiñu ra Jesucristo tyin tacan cuñí maa Nyoo. Nyooho nyivi ñuu Éfeso tsa yihí cuenda Nyoo tan tsinú iñi ndo tsi ra Cristo Jesús, jaquitsi yu carta ihya tsi ndo. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Tsa iin ñi cuví yo tshin ra Cristo, Nyoo nasocó xaan ra tsi yo

³ Na jacahnu yo tsi Nyoo, jutu ra Jesucristo Jutu Mañi yo. Tyin nasocó xaan ra tsi yo tshin tandihí nuu tsa vaha tsa iyó gloria tsa cuenda tsa iin ñi cuví yo tshin ra Cristo. ⁴ Tsa ndi cumañi ca javaha ra ñuhu ñayivi tan nacatsj ra tsi yo tyin ndu iin yo tshin ra Cristo. Tyin tacan tan cuiti coo yo nuu ra tan ña coo ca cuatyí yo. ⁵ Tsa cuenda tsa cuñí ra tsi yo, tyaá ra cuhva tahañ tsanaha tyin nanduvi yo sehe ra tsa cuenda ra Jesucristo. Tacan javahá ra tyin tacan cacú iñi maa ra. ⁶ Yacan cuenda taahán tsi jacahnu xaan yo tsi ra, tyin tsahá ra tsa vaha tsa iyó tsi ra tsi yo nu jandu iin ra tsi yo tshin Sehe ra, ra tsa cuñí xaan ra. ⁷ Nyoo cuñí xaan ra tsi yo. Tan yacan cuenda tyahvi ra tshin niñi Sehe ra tsa cuenda cuatyí yo. Tan jahá ra tucahnu iñi tsi yo. Tan tavá nuña ra tsi yo. ⁸ Tan tsa javahá ra tsi yo tyin cuñí xaan ra tsi yo, tsahá ra tsa nyityi ra tan tsa tsinú tuñi ra coo tsi yo. ⁹ Tan tsahá ra tsa nacotó yo tuhun tsa tyihí ra cuhva tahañ tsanaha tyin javaha ra tshin ra Cristo. Tan tandihí tuhun can tsicumj xeehe ra tan ña jacotó ra can tsi nyivi tahañ tsanaha. ¹⁰ Maa tyin tsa cua tahan tsi quivi cundaa tuhun tsa tyihí ra cuhva, cua jandu iin ra tandihí tsa iyó nu ñuhu ñayivi ihya tan andivi, tan cua nacuhva cuenda ra tandihí can tsi ra Cristo tyin quihí ndaha ra.

¹¹ Tan tsa cuenda tsa iin ñi cuví yo tshin ra Cristo, ñihí ndihí yo tsa ñihí ra, tyin maa Nyoo cuñí tacan. Yacan cuenda nacatsj ra tsi yo, tyin tacan tyihí ra cuhva tyin javaha ra tyin maa ra javahá tandihí cuhva nyehé ra tyin vaha. ¹² Javahá ra tyehen tyin nyuhu tsa natsinú jihna iñi tsi ra Cristo jacahnu ndi tsi Nyoo tsa cuenda tsa cahnu cuví ra. ¹³ Tan tacan tucu nyooho natsinú iñi ndo tsi ra Cristo, tan ndu iin ndo tshin ra quivi tsa tsinú ndo tuhun Nyoo tsa cuví tsa nditsa, tan nácaa jacacú ra tsi yo. Tan tsahá ra Tatyí Ii ra coo añima ndo, tumaa catyí ra tyin cua javaha ra tan yacan cuñí tsi catyí tyin cuví

ndo nyivi yihí cuenda ra. ¹⁴ Nyoo jihna ca Tatyí Ii ra tsahá ra tsi yo tyin tacan tan cuita iñi yo tandihí ca tsa cua cuhva ra tsi yo quivi jandu iin ra tandihí nyivi tsa cua cacu. Tyin tacan tan jacahnu yo tsi ra, tyin cahnu xaan cuví ra.

Nu tsicán ra Pablo tsi Nyoo na cuhva ra tsa tsinú tuñi tsi nyivi tsa tsinú iñi

¹⁵⁻¹⁶ Yacan cuenda, tsa ñihí tuhun yu tyin tsinú vaha iñi ndo tsi Jutu Mañi yo ra Jesucristo, tandihí ñi tsaha tsa tsicán tahvi yu tsi ra tan tsahá yu tyahvi nyoo tsi ra tsa cuenda ndo tan tsa cuenda tyin cuñí tahan xaan ndo tsi ndo tsa yihí ndo tuhun Nyoo. ¹⁷ Tsicán yu tsi Nyoo Jutu ra Jesucristo, ra cuví Nyoo Jutu yo tsa cahnu ca cuví, tyin na cuhva ra tsa cutuñi iñi ndo tsa javahá ra tsi yo tshin Tatyí Ii ra, tacan tan nacoto vaha ca ndo tsi ra. ¹⁸ Tan tsicán yu tsi ra, na cuhva ra tsa cutuñi vaha iñi ndo, tyin tacan tan coto ndo nacuenda caná ra tsi ndo, tan náa cuví tsa cua cuhva ra tsi ndo ityi nuu ca tyin tsa cua cuhva ra tsi nyivi cuenda ra, sñi xaan caá can tan cuca xaan can. ¹⁹ Tan cahnu xaan cuví tunyee iñi tsa iyó tsi ra, tan ña cuví cutuñi iñi yo nácaa tsa cahnu cuví can. Tan yacan cuví tsa jahá tyiñu tshin yoo tsa tsinú iñi tsi ra. Tan juven ñi maa tshin tunyee iñi cahnu can ²⁰ janandotó Nyoo tsi ra Cristo. Tan tyaá ra tsi ra xiin cuaha ra nda gloria. ²¹ Tan yacan cuví nu jacahnu xaan ca Nyoo tsi ra Cristo tan ñavin ca tandihí ca ra ndacá ñaha nu ñuhu ñayivi ihya tan nda andivi. Tyin yoñi yóo ra cahnu ca cuví ñuu ñayivi ihya tan ndi ñayivi tsa cua coo, tyin intuhun ñi maa ra Cristo cuví ra cahnu ca cuví. ²² Tan tandihí cuñi maa tsa iyó tsahá Nyoo tyin cundaca ñaha ra Cristo. Tan tsahá Nyoo tsa cuví ra jiñi tshin nyivi tsa yihí cuenda ra. ²³ Tyin yoo, tsa yihí yo cuenda ra, cuví yo cuñu ñuhu ra. Tan maa ra tshin yo cuví tsi intuhun ña cuñu ñuhu. Tan juven maa ra janduní ra tandihí tsa iyó.

2

Jacacú Nyoo tsi yo tsa cuenda tsa cuñí ra tsi yo

¹ Nyoo tsahá ra ñayivi nyito coo ndo quivi ndu iin ndo tshin ra Cristo. Maa tyin tsa ndi cumañi ca tsinú iñi ndo tsi ra Cristo ña nyito añima ndo tyin ndi iyó cuaha cuatyí ndo. ² Tan quivi can ndi javahá ndo cuhva javahá nyivi ña tsitó tsi Nyoo. Ndi tyaá yahvi ndo tsi nu ña vaha tsa ndacá ñaha tsi nu tatyí ña vaha tsa natyuhú tsi nyivi tsa ña tyaá yahvi tsi Nyoo. ³ Tan juven ñi tacan tsicoo tucu yo quivi can, tyin javahá yo tsa ña vaha tsa cuñí cuñu ñuhu yo tan cuhva tsicá iñi yo. Tan tsa cuenda tsa javahá yo tacan, taahán tsi tatsi tuñi Nyoo tsi yo iin caa ñi tshin tandihí

ca nyívi tsa javahá tsa ña vaha. ⁴ Maa tyin Nyoo cundaahví xaan íñi ra nyehe ra tsi yo tsa cuenda tsa cuñí xaan ra tsi yo. ⁵ Tan vasu tsa tsihí añima yo jahá cuatyí yo, Nyoo janandoto ra añima yo tan tsahá ra ñayívi nyito coo yo nu jandu iin ra tsi yo tsihin ra Cristo. Tan cacú yo jahá tsa cuñí xaan Nyoo tsi yo. ⁶ Tan tsa janandoto ra tsi yo iin caa ñi tsihin ra Cristo Jesús tyaá ra tsi yo tsihin ra nda gloria. ⁷ Tan javahá Nyoo tyehen tyin tacan tan nu cuahán ca tsi ityi nuu cua coto tandihí ca tsa cua coo tyin vaha xaan íñi ra tsihin yo tan cahnu xaan tumañi íñi tsahá ra tsi yo tsa cuenda ra Cristo Jesús. ⁸ Tyin tsa cuenda tsa vaha tsa tsahá Nyoo tsi yo tan cacú yo. Tan ñihí yo tumañi íñi ihya jahá tsa tsinú íñi yo tsi ra Cristo. Tan ñavin tsihin tsa javahá yo tan ñihí yo can, tyin maa Nyoo tsahá can tsi yo. ⁹ Ñavin tsihin tsa javahá yo tsa vaha tan cuví cacu yo. Yacan cuenda ndi intuhun yo tan ña taahán tsi cu iyo íñi yo tyin cacú yo tsihin tsa javahá yo tsa vaha. ¹⁰ Nyoo janduvahá ra añima yo tsihin tsa ndu iin yo tsihin ra Cristo Jesús. Tacan javahá ra tyin tacan tan javaha yo tsa vaha, tyin nda tsanaha tan tyaá ra cuhva tyin coo yo tacan.

Cuví yo nyívi Israel, a cuví yo nyívi inga ñuu, maa tyin tsa cuenda ra Cristo iin ñi nyívi cuví tandihí yo

¹¹ Catyí ra Israel naha ra tyin ña vaha nyooho tsa ñavin nyívi Israel cuví, tyin ña tsinyaá tuñi Nyoo cuñu ñuhu ndo tumaa maa ra naha. Cuñí maa ra naha tyin vaha ra naha nuu Nyoo tan nyooho ña vaha ndo. ¹² Tan nducuhun tucu íñi ndo tyin nu quítsi tsi tahán tsanaha, nduve ra Cristo iyó añima ndo. Tan ndi ña iin ñi cuví ndo tsihin nyívi Israel. Tan ña tsitó ndo tuhun tsa ndoo Nyoo tsihin ra Abraham tan tsihin nyívi tata ra. Tyin iyó soho ñi maa ndo quívi can, tan nduve Nyoo nyaá tsihin ndo. Yacan cuenda nduve náa cua ñihí ndo. ¹³ Tyin ndi luxu tuhun Nyoo tan ña tsitó ndo tahán tsanaha, maa tyin vityin ndu iin ndo tsihin ra Cristo Jesús tyin quítsi ra tsatí ra ñihí ra tsa cuenda ndo. ¹⁴ Tyin juvin ra Cristo tsahá tsa taxin coo yo tan jandu iin ra tsi nyooho tsa ñavin nyívi Israel cuví tsihin nyuhu tsa cuví nyívi Israel. Vityin iin ña nyívi cuví yo, tyin jandihí ra tsa xaan cuñi yo nyehé tahan yo tsi yo. ¹⁵ Tan tsa quítsi ra Cristo tsihí ra nu cruu, tsindihí tuhun tsahnu tsa iyó ndi tsa tyasi nu ndu iin ndi tsihin ndo, tan jandu iin ra tsi ndo tsihin ndi. Tan vityin iin ña nyívi cuví yo nuu ra, tan iyó yo tsihin tsa taxin. ¹⁶ Tan tsihin tsa tsihí ra nu cruu tsindihí tsa ña caahán tsihin tahan yo, tan nacoq vaha yo tsihin Nyoo jahá ra, iin ña nyívi cuví yo vityin.

¹⁷ Ra Cristo quítsi ra cahán ra tyin cuví coo vaha yo tsihin Nyoo tan tsihin tahan yo: Cahán ra tsihin ndi tsa cuví ndi nyívi Israel tsa tsa tsitó maa tuhun Nyoo tan tsihin nyooho tsa ña tsitó ndi luxu maa tuhun Nyoo tahán tsanaha. ¹⁸ Tan tsa cuenda tsa quítsi ra Cristo tsihí ra nu cruu, nduyatyin nyecú yo tsihin Nyoo Jutu yo. Tyin iin ñi Tatyí Ii ra iyó añima yo: a cuví yo nyívi Israel, o ñavin nyívi Israel cuví yo. ¹⁹ Yacan cuenda nyooho ñavin ca nyívi inga ñuu cuví ndo, tyin iin ña nyívi cuví ndo tsihin nyívi yihí cuenda Nyoo. Tan cuví ndo nyívi maa ra. ²⁰ Tan cuví ndo tumaa iin vehe. Tan nyecú ndo nu samá ra tava tyiñu ra Cristo tan ra ndusu yuhu Nyoo. Tan yuu tsa nyecú ndo tsata, yacan cuví ra Cristo Jesús. ²¹ Tan tsata yuu tsa cuví ra Cristo, si xaan cua quita vehe tsa ndi cuahán tsinú, tyin tandihí maa yo cuví nama vehe tsa ndi tsinú can. Tan tsa cua quita tsi, cua cuví tsi iin vehe ñuhu ii tan cua ndu iin tsi tsihin Jutu yo Nyoo. ²² Tan tacan tucu nyooho ndu iin ndo tsihin tandihí nyívi yihí cuenda ra Cristo jahá Tatyí Ii ra, tyin tacan tan cua cuví ndo vehe nu coo Nyoo.

3

Nyoo tava tyiñu tsi ra Pablo tyin cahan ra tuhun ra Cristo tsihin nyívi tsa ñavin nyívi Israel cuví

¹ Yacan cuenda yuhu ra Pablo nyíi yu vehe caa ihya tyin jacotó yu tuhun ra Cristo Jesús tsi nyooho tsa ñavin nyívi Israel cuví. ² Taahán tsi coto ndo tyin cahnu xaan tunyee íñi tsahá ra tsi yu tsa cuenda tsa vaha tsi ndo, tyin jacotó yu tuhun ra tsi ndo. ³ Tan Nyoo janahá ra tuhun xeehe tsa tsicumj ra tsi yu, tan tyaá yu juhva tuhun can nu carta ihya tyin coto ndo. ⁴ Tan tsa cua cahví ndo tuhun tsa tyaá yu ihya cua coto ndo nácaa tsahá Nyoo tyin cutuñi íñi yu tuhun ra Cristo tsa tsicumj xeehe ra. ⁵ Tyin nu quítsi tsi tahán tsanaha, ñajanahá Nyoo tuhun xeehe can tsi nyívi, tumaa tsa janahá Tatyí Ii ra tuhun can tsi ra tava tyiñu ra Jesucristo tan ra cuví ndusu yuhu Nyoo. ⁶ Tan tuhun xeehe can, cuñi tsi catyí tyehen: Nyívi tsa ñavin nyívi Israel cuví cua ñihí ndihí ñi tsa cua ñihí nyívi Israel tyin iin ña cuñu ñuhu cuví yo vityin tsa cuenda tsa jacacú ra Cristo tsi yo. Tan cua ñihí yo tsa catyí Nyoo tyin cuhva ra tsi yo tyin natsinú íñi yo tsi maa ra Cristo Jesús.

⁷ Nyoo tsahá ra tsa vaha tsi yu tan jatinyeé ra tsi yu tyin tacan tan jacoto yu tuhun vaha ihya tsi nyívi. ⁸ Yuhu luhlu xaan ra cuví yu tan ñavin ca tandihí nyívi tsa yihí cuenda Nyoo. Maa tyin Nyoo tsahá ra tumañi íñi cahnu ihya tsi yu tyin cahan yu tuhun ra Cristo tsihin nyívi tsa ñavin ñi Israel cuví. Tyin na coto ñi tsa cuca tsa cua

cuhva ra Cristo tsi ñi. ⁹ Tava tyiñu Nyoo tsi yu na jacoto yu tsi tandihí nyívi nácaa tyaa ra cuhva tsa cua javaha ra tsa ndi cumañi ca javaha ra tandihí tsa iyó, tyin tsanaha ña jacoto ra tuhun tsa tsi cumi xeehe ra tsi nyívi. ¹⁰ Tacan cuví tan vityin tandihí ra ndacá ñaha nda andívi cua nyehe tsa vaha tsa javahá Nyoo tsihin yo tsa cuví yo nyívi yihí cuenda ra. Tan cua coto ra naha tyin iyó xaan tsa tsiñi tuñi tsi Nyoo. ¹¹ Tandihí tuhun ihya nacatsí tahan tsi tsihin tsa tyaa Nyoo cuhva tyin javaha ra tsihin Jutu Mañi yo Jesucristo tsa cuenda tsa vaha tsi yo. ¹² Tan tsa cuenda tsa tsinú iñi yo tsi ra Cristo, tsahá Nyoo ndatu tsi yo tsa cunyanaa ca yo tsi ra. Yacan cuenda ña yuuhví yo natuhvá yo nu nyaá ra. ¹³ Tan tsa cuenda tsa tsahá ra ndatu can tsi yo caahán ndaahvi yo tsihin ndo na ña ndu uvi iñi ndo tsa nyehé yo tundoho tsa cuenda ndo. Tyin tsa tyehen nyehé yo tundoho tsa cuenda ndo, tsa vaha tsi maa ndo cuví can.

Tsicán tahvi ra Pablo tyin na nacoto vaha ca nyívi tsi ra Cristo

¹⁴ Tan tsa cuenda tsa nducuhun iñi yo tumañi iñi tsa javahá Nyoo, Jutu ra Jesucristo Jutu Mañi yo tsihin yo, tsi cuñi tsi yu nuu ra. ¹⁵ Tyin juvin ra cuví Jutu tandihí nyívi: ñi tsa cuahán andívi, tan ñi tsa yucú nu ñuhu ñayívi ihya. ¹⁶ Tan tsicán yu tsi ra na jandun-ye yee xaan ra iñi ndo tsihin Tatyí Ii ra tsa iyó añima ndo. ¹⁷ Tan na coo ra Cristo añima ndo tsihin tsa tsinú iñi ndo tsi ra. Tacan tan cua cuñi xaan ndo tsi tandihí nyívi, tyin nyanaá vaha ndo tsi Nyoo. ¹⁸ Tacan tan cua cutuñi vaha iñi ndo tsihin tandihí ñi yihí cuenda ra nácaa tsa cahnu xaan tsa cuñi ra Cristo tsi yo. Tan ndi ña cua ñihi ndo cuhva nacatyí tuhun ndo tsihin nyívi nácaa tsa cuñi ra tsi ndo. ¹⁹ Tsiacán yu tsi Nyoo na coto ndo nácaa tsa cahnu xaan tsa cuñi ra tsi ndo. Nyoo nyaá maa ra tsihin ndo.

²⁰ Tan vityin na jacahnu yo tsi Nyoo, ra tsa iyó xaan tunyee iñi tsi. Tan cuaha xaan ca tsa cuví javaha ra tan ñavin ca cuhva tsa tsicán yo tsi ra, a cuhva tsa tsicá iñi yo. Tyin juvin ñi tsihin tunyee iñi maa ra tsa tsahá ra tsi yo, javahá ra tandihí. ²¹ Yoo tsa cuví yo nyívi tsinú iñi tsi Nyoo, na jacahnu yo tsi ra tacan ñi maa, tsa cuenda tsa javahá ra Cristo Jesús. Tan na cuví tsi tacan.

4

Iin ñi cuví tandihí yo tsa yihí yo cuenda ra Cristo jahá Tatyí Ii Nyoo

¹ Yacan cuenda yuhu, tsa nyívi yu vehe caa tsa cuenda Jutu Mañi yo, caahán ndaahvi yu tsihin ndo na catsi coo ndo tumaa cuhva taahán tsi coo nyívi tsa nacana Nyoo. Tyin nacana ra tsi ndo na cuví ndo nyívi ra.

² Yacan cuenda jandundaahvi ndo tsi ndo nuu nyívi, tan vita cuhun iñi ndo. Tan ña cūtyixin ndo tsihin ñi, tan ña cūndihí iñi ndo nyehé ndo tsi ñi tyin tacan tan coto ñi tyin cuñi ndo tsi ñi. ³ Tyin tsa taxin tsa tsahá Nyoo coo añima yo jandu iñi tsi tsi yo tan yacan cuenda ndūcu vaha ndo cuhva tan iin ñi cuví ndo tsihin tsa jatyinyee Tatyí Ii Nyoo tsi ndo. ⁴ Tandihí yoo tsa tsinú iñi tsi ra Cristo Jesús cuví yo intuhun ña cuñu ñuhu tsa cuenda ra. Tan tandihí yo intuhun ñi Tatyí Ii Nyoo iyó tsihin yo, tan catyí Nyoo tsihin tandihí yo tyin nditsa tsa cua ñihi yo ñayívi nyito coo yo. ⁵ Iyó intuhun ñi Jutu Mañi yo ndacá ñaha tsi yo. Tan intuhun ñi tsi maa ra tsinú iñi yo. Tan intuhun ñi tsa cuenda maa ra tsicoondutya yo. ⁶ Iyó intuhun ñi Nyoo tan maa ra cuví ra Jutu tandihí yo. Tan ndacá ñaha ra tsi tandihí yo, tan iyó ra añima tandihí yo, tan tsatyíñu ra tsi tandihí yo, tan jahá tyiñu yo tyiñu ra.

⁷ Tan tsahá ra Cristo ndatu tsi tsa intuhun intuhun yo cuhva cuñi maa ra. ⁸ Yacan cuenda catyí tsi nu tutu Nyoo tuhun ra Cristo tyehen:

Cunyee ra jahá canaa ra tsi nu xaan iñi tsi ra, tan quihñ nyaa ra tsi nyívi tsa yihí ndaha nu tan nandaq ra andívi tsihin ñi.

Tan tsahá ra ndatu tsi yo tsa jaha tyiñu yo tyiñu ra, catyí tsi.

⁹ ¿Tan náa cuñi tsi catyí tsa “nandaq ra”? Cuñi tsi catyí tyin nuu jihna ra nu ñuhu ñayívi. ¹⁰ Ra tsa nuu can, juvin ñi ra cuví ra tsa nandaq nda gloria. Tyin tacan tan janduní ra tandihí maa tan cunyaa ra tsihin yo tandihí ñi ityi. ¹¹ Tan juvin ñi maa ra Cristo tsahá ndatu tsi yo. Tsi juhva yo tava tyiñu ra tsi yo tsa caca yo tyiñu ra. Tan tsi inga yo tsahá ra tsa cuví yo ndusu yuhu ra. Tan tsi inga yo tsahá ra tyin jacoto yo tsi nyívi nácaa jacacú ra tsi yo. Tan tsi inga yo tsahá ra tsa jaha cuenda yo tsi ñi yihí cuenda ra, tan tsi inga yo tsahá ra tsa cuví jacuaha yo tuhun ra tsi ñi. ¹² Tacan tsahá Nyoo ndatu can tsi yo tyin jatyinyee tahan yo tsi yo tan tsi inga ca nyívi tyin tacan tan cuahnu ca yo tsihin ra Cristo. ¹³ Nda cuenda ndu iin tandihí yo jaha tsa tsinú iñi yo tsi Sehe Nyoo. Tan nacoto vaha yo tsi ra. Tan cutsa vaha yo nda cuanda tsaa yo cuví yo tumaa cuví maa ra Cristo. ¹⁴ Tacan tan ña cua cuví ca yo tumaa tsa nyihi. Tyin tsa nyihi yatyi xaan tsinú iñi tsi náa luxu tsa ñihí tuhun tsi. Tan na ña cuví yoo tacan tyin coto jandavi ñaha nyívi tsi yo. ¹⁵ Maa tyin tyehen cua javaha yo: cua cuñi yo tsi nyívi tan cua cahan yo tsa nditsa tsihin ñi. Tan ndunyee ca añima yo tsihin tandihí tsa vaha tsa iyó tsi Nyoo. Tan cuahnu yo tan cuví yo tumaa maa ra Cristo, ra cuví ityi nuu tsihin yo. ¹⁶ Tan tsa

cuenda ra Cristo tandihí yo tsa cuví yo cuñu ñuhu ra, iin ñi cuví yo. Tumaa yihí tahan iin cuñu ñuhu, tan tsa iin tsa iin nu yihí tahan tsi vaha jahá tyiñu tsi. Tan tacan jatyinyeé tsi tsi nanñi cuñu ñuhu can, na coo vaha tsi tan cuahnu tsi. Tan tacan tucu yoo, tsahnú yo tsihin tsa cuñi tahan yo tsi yo tan jatyinyeé tahan yo tsi yo.

Tsahá ra Cristo ñayivi nyito coo yo

¹⁷ Tuhun ihya cuví tsa tsahá cuenda yu tsi ndo, catyí Jutu Mañi yo. Ña coo ca ndo tumaa iyó nyivi ña nacotó tsi Nyoo. Tyin maa ñi maa tsa ña jatyinyeé tsi ñi tsicá iñi ñi. ¹⁸ Tan ña cutuñi iñi ñi, tyin ñavin ñayivi Nyoo iyó ñi. Tyin ña tsitó ñi, tsa cuenda tsa ndava añima ñi. ¹⁹ Ña cahán ca nuu ñi javahá ñi tsa ña vaha. Tan nacuhva cuenda ñi tsi ñi tsi tsa caquiñi. Maa ñi tsa ña vaha cuñi ñi javaha ñi. ²⁰⁻²¹ Maa tyin tatun nditsa tsa tsiñi ndo tuhun ra Cristo, cua nducuhun iñi ndo tyin ñavin tacan taahán tsi coo ndo. Tyin tsiñi ndo tan cutuhva ndo tsa nditsa cuví tuhun maa ra Cristo. ²² Yacan cuenda ña coo ca ndo cuhva tsicoo ndo quivi can, tan ña javaha ca ndo tsa caquiñi tsa cuñi cuñu ñuhu ndo, tyin tsanaha, jandavj ñaha xaan can tsi ndo. ²³ Nacuhva cuenda ndo tsi ndo tsi Nyoo na nasama ra cuhva tsicá iñi ndo. ²⁴ Tan coo ndo ñayivi nyito tyin vityin nyivi tsa cuví ndo jahá Nyoo. Tan javaha ndo maa ñi tsa vaha na nyehe nyivi tyin iyó ndo ñayivi nyito tyin catsi tan cui ti iyó ndo.

²⁵ Yacan cuenda ña çahan ca ndo cuendu. Çahan ndo maa ñi tsa nditsa tsihin nyivi tyin iin ña cuñu ñuhu cuví tsa tandihí yo.

²⁶ Tatun cuxaan ndo, jahá ndo cuenda coto javaha ndo tsa ña vaha. Juhva ñi cuhva cuxaan ndo. Tan ña quihí tsihi tsi ndo nduvi. ²⁷ Tan ña cuhva ndo ndatu tsi nu ña vaha tsa nducu cuhva nu tsi ndo.

²⁸ Ra tsa tuhva suhu quivi can, na ña suhu ca ra vityin. Na jahá tyiñu ra tsihin ndaha ra. Tacan tan coo tsa tsi ra, tan cuví jatyinyeé ra tsi nyivi tsa iyó tsa tsiñi ñuhu tsi ñi.

²⁹ Ña çahan ndo tsa ndavaha ñi. Çahan ndo, maa ñi tsa vaha tsa cua jatyinyeé tsi nyivi tsa tsiñi tsa caahán ndo. ³⁰ Tan ña cuhva ndo tucuihya iñi tsi Tatyí Ii Nyoo tyin Tatyí Ii ra cuví tuñi tsa tyag ra añima yo nda cuanda ndihí jacacu ra tsi yo quivi cua quitsi ra.

³¹ Ña çahun iñi ndo tsihi. Tan ña cuxaan ndo. Tan ña cuví ndo nyivi tyixin. Tan ña çahan nyaa ndo tsi nyivi, tan ndi ña çahan ndo tsa ndavaha ñi. ³² Maa tyin cuví ndo nyivi vaha, tan cundaahvi iñi ndo tsi nyivi. Tan jahá ndo tucahnu iñi tsi ñi, tumaa jahá Nyoo tucahnu iñi tsi maa ndo tsa cuenda ra Cristo.

5

Nacaa taahán tsi coo nyivi yihí cuenda Nyoo

¹ Nducu ndo cuhva coo ndo tumaa iyó maa Nyoo, tyin sehe ra cuví tsi yo, tan cuñi xaan ra tsi yo. ² Cuñi yo tsi nyivi tumaa tsa cuñi maa ra Cristo tsi yo tan quitsi ra tsihi ra nu cruu tsa cuenda yo. Tumaa jamañi ra cuví jutu mbee ticatyí luhlu nuu Nyoo, tacan jamañi ra Cristo tsi ra tsa cuenda yo. Tan sii xaan cuñi Nyoo tsihin ra tsa cuenda tsa javahá ra tacan.

³ Vityin tsa cuví yo nyivi yihí cuenda Nyoo, ña taahán tsi javahá ndo tsa caquiñi tsihin cuñu ñuhu ndo, tan ndi ña cuñi ndo coo cuaha ndaha tyiñi ndo. Tan ña taahán tsi caca iñi ndo ndi intuhun tuhun ihya. ⁴ Ña çahan ndo tuhun tsa tsahá ticanuu tsi yo. Tan ndi ña çahan ndo tsa nduve yahvi nyaá. Tyin ña taahán tsi çahan yo tacan. Vaha ca cuhva ndo tyahvi nyoo tsi Nyoo. ⁵ Tyin tsa tsitó ndo tyin tandihí nyivi tsa javahá tsa caquiñi, ña cua quihvi ñi nu ndacá ñaha ra Cristo tsihin Nyoo. Ra tsa iyó tsihin ñaha tan ñavin ñasihi ra cuví ña, a ñaha iyó tsihin rayi tan ñavin yii ña cuví ra, tan nyivi tsa cuñi xaan coo cuaha ndaha tyiñu, ña cua quihvi ñi nu ndacá ñaha Nyoo tyin tumaa tsa jacahnú ñi tsitoho cuví can, tyin maa ñi yacan tsicá iñi ñi tan ña jacahnú ñi tsi maa Nyoo. ⁶ Ña cuhva ndo tsa jandavi ñaha nyivi tsi ndo tsihin tuhun tsa nduve yahvi nyaá tsa caahán ñi tyin tsa cuenda tandihí tsa ña vaha can cua tatsi tuñi Nyoo tsi nyivi tsa ña tyaá yahvi tsi ra. ⁷ Yacan cuenda ña çutahan ndo tsihin ñi.

⁸ Nyooho tsicoo ndo nu naa quivi can. Tan vityin ña taahán ca tsi coo ndo nu naa tyin Jutu Mañi yo tsa tavá ra tsi ndo nu nditsin. Yacan cuenda taahán tsi javaha ndo tumaa cuñi maa Nyoo. ⁹ Tyin Nyoo jandunditsin ra añima yo tan janduvahá ra añima yo, yacan cuenda javaha ndo tsa vaha tan çahan ndo maa ñi maa tsa nditsa. ¹⁰ Jañiñi ndo cutuhva ndo cuhva taahán iñi Jutu Mañi yo. ¹¹ Ña javaha ndo cuhva javahá nyivi iyó nu naa. Tyin nduve náa tsa vaha ñihí ñi tsihin can. Vaha ca çacoto ndo tsi ñi tyin ña vaha tsa javahá ñi. ¹² Tyin çahán nuu yo çahan yo tsa javahá xeehe ñi. ¹³ Maa tyin quivi quita tsa yihí xeehe nu nditsin, tacan tan catsi xaan cua nyehe yo. Tyin tsa nditsin Nyoo cua tava tsi tandihí tsa yihí xeehe. ¹⁴ Yacan cuenda iyó nu catyí tsi: Ndoqo yooho tsa quixí un, nduvita mahñu nu yucú ndiyi.

Tan ra Cristo cua jandunditsin ra ñuhu nu cuahán un, catyí tsi.

¹⁵ Yacan cuenda jahá ndo cuenda cuhva iyó ndo. Tan ña coo ndo tumaa iyó ra soho.

Coo ndo tumaa iyó ra tsító. ¹⁶Tan ndücu ndo cuhva cahan ndo tuhun Nyoo tsihin nyivi tandihí ñi cuhva tsa nuña ndo, cahan ndo tyin vityin maa ñi maa tsa caquiñi javahá ñi. ¹⁷Yacan cuenda ña soho coo ndo. Ndücu ndo cuhva cutuñi iñi ndo cuhva cuñi maa Jutu Mañi yo. ¹⁸Ña cõho ndo nyixi tan cuvi ndo ra tsiñi tyin cuvi jativi yacan tsi ndo. Maa tyin cuhva ndo tsi ndo cundaca ñaha Tatyí Ii Nyoo. ¹⁹Cahan ndo tsihin tahan ndo maa ñi tsa vaha, tan jacahnu ndo tsi Nyoo. Cata ndo salmo cuenda ra; cata ndo yaa Nyoo; cata ndo tsa tsahá Tatyí Ii tsi ndo; jacahnu ndo tsi Jutu Mañi yo tsihin tandihí añima ndo. ²⁰Tacan ñi nacuhva ndo tyahvi nyoo tsi Nyoo Jutu yo tsa cuenda tandihí maa, a sii cuñi ndo, o nyehé ndo tundoho. Nacuhva ndo tyahvi nyoo tsi ra tsihin ndatu tsa tsahá Jutu Mañi yo Jesucristo tsi yo.

Naca taahán tsi coo yo tsihin nyivi yo

²¹Tyaa yahvi tahan ndo tsi ndo, tyin tun javahá ndo tacan, tsihin yacan janahá ndo tyin tyaa yahvi ndo tsi Nyoo

²²Nyooho tsa iyó yí, tyaa yahvi ndo tsa caahán yí ndo tumaa tsa tyaa yahvi ndo tsa caahán Jutu Mañi yo. ²³Tyin rayii cuvi ityi nuu tsihin ñasihi ra, tumaa cuvi ra Cristo ityi nuu tsihin nyivi yihí cuenda ra. Juvín ñi maa ra jacacú tsi yo tsa cuvi yo cuñu ñuhu ra. ²⁴Yacan cuenda tumaa tsa cuvi ra Cristo ityi nuu tsihin nyivi yihí cuenda ra, tacan taahán tsi tyaa yahvi ñaha tsi yí ña.

²⁵Tan nyooho rayii, cuñi tsi tsa cuñi ndo tsi ñasihi ndo tumaa cuñi ra Cristo tsi yo tsa yihí yo cuenda ra, tan tsahá ra ñayivi ra tsa cuenda yo. ²⁶Tacan javahá ra tan jandundií ra añima yo tsihin tuhun caahán ra tsa cuvi tumaa ndutya, tan nacatyá ra tsi yo quivi tsa natsinú iñi yo tsi ra. ²⁷Ndoõ añima yo tumaa ndoó iin jahma, ña nyayu ca tsi, ña tiyi ca tsi. Tyin ra Cristo jandundií ra tsi yo tsa cuvi yo nyivi yihí cuenda ra. Tyin tacan tan cuvi nacuhva cuenda ra tsi yo tsi Nyoo, tyin vaha yo, tan nduve ca cuatyí yo. ²⁸Tacan taahán tsi cuñi rayii tsi ñasihi ra, tumaa tsa cuñi ra cuñu ñuhu maa ra. Tyin tatun cuñi ra tsi ñasihi ra, cuñi ra tsi maa ra. ²⁹Tyin ndi intuhun yo tan ña cuvi tsa ña cuñi yo cuñu ñuhu yo, tyin jacatsi yo tan jacunditsi yo cuñu ñuhu yo. Tan ra Cristo juvín ñi tacan javahá ra tsihin nyivi yihí cuenda ra. ³⁰Tyin cuñu ñuhu ra cuvi yo. Tan intuhun intuhun yo cuvi yo juhva cuñu ñuhu ra tan yiqui ra. ³¹Catyí tuhun Nyoo: "Rayii taahán tsi nacoo ra tsi jutu ra tan tsi síhi ra, tan ndu iin ra tsihin ñasihi ra. Tan intuhun ña cuñu ñuhu cua cuvi tsa nduvi ñi." ³²Xeehe xaan tan cahnu xaan tuhun ihya, tan catyí yu tyin cuñi tsi catyí tyin ra Cristo ndu iin ra tsihin nyivi yihí cuenda ra tumaa ndu iin iin rayii

tsihin ñasihi ra. ³³Tan inga tucu tuhun, cuñi tsi catyí tyin intuhun intuhun ndo taahán tsi tsa cuñi ndo ñasihi ndo, tumaa cuñi ndo tsi maa ndo. Tan nyooho ñiñaha, tyaa yahvi ndo tsi yí ndo.

6

¹Nyooho tsa nyihí, tyaa soho ndo tsa caahán jutu ndo tan síhi ndo. Tyin tacan taahán tsi javaha ndo. ²⁻³Tyin nu tutu Nyoo catyí tsi tyehen: "Jaha tsa ñayivi tsi jutu un tan síhi un", tan tuhun ihya cuvi tsa jihna ñi catyí Nyoo tyin javaha yo tan cua ñihí yo tsa cua cuhva ra tsi yo. Tyin tyaa ra cuhva tyin tun javaha yo tacan, sii xaan cua coo yo tan cuaha xaan quivi cua coo yo nu ñuhu ñayivi ihya.

⁴Tan nyooho tsa iyó sehe, ña javaha ndo tsa ña vaha tsi sehe ndo tan cuxaan iñi tsi tsi ndo. Maa tyin jacuaha ndo tuhun Nyoo itsi naha tsi, tan na cutuhva tsi tyaa yahvi tsi tsi ndo tan tsi Nyoo.

⁵Tan nyooho tsa cuvi musu, tyaa yahvi ndo tsi ra yihí ndaha tsi ndo nu ñuhu ñayivi ihya. Jaha ndo tsa ñayivi tsi ra naha tsihin tsa ñi iñi añima ndo. Tan ndücu ndo cuhva tyaa yahvi ndo tsi ra naha tumaa tyaa yahvi ndo tsi ra Cristo.

⁶Jaha tyiñu vaha ndo. Ñavin tsa nyehé ñi tsitoho ndo tan vaha jaha tyiñu ndo tan catyí tsitoho ndo tyin vaha xaan ndo. Jaha tyiñu vaha nyooho tumaa tsatyin tyiñu ra Cristo javahá ndo. Tacan tan cua javaha ndo cuhva cuñi Nyoo tsihin tsa ñi iñi añima ndo. ⁷Jaha tyiñu ndo tsihin tsa sii cuñi ndo tumaa tun jahá tyiñu ndo cuenda Jutu Mañi yo tan ñavin tsa cuenda nyivi. ⁸Tyin tsító ndo tyin Jutu Mañi yo cua tyahvi ra tsi intuhun intuhun ndo tun javahá ndo tsa vaha, vasu ndi maa musu cuvi ndo o ñavin musu cuvi ndo.

⁹Tan nyooho tsa iyó musu, javaha ndo tsa vaha tsihin musu ndo. Tan ña jayuhvi ndo tsi ñi. Tyin tsító ndo tyin nuu Jutu Mañi yo iin ñi cuvi ndo tsihin musu ndo, tyin ña siin caá iin nyivi tan inga ñi nuu ra.

Tunyee iñi tsa tsahá Nyoo tsi yo tsa yihí yo cuenda ra

¹⁰Tan vityin coo ndo tsihin tunyee iñi tsa tsahá Jutu Mañi yo tsi ndo tyin iin ñi cuvi ndo tsihin ra. Tyin cahnu xaan tunyee iñi iyó tsi ra. ¹¹Jaha cuenda vaha ndo tsi ndo tsihin tunyee iñi tsa tsahá Nyoo tsi ndo tumaa jahá cuenda iin andaru tsi ra. Tacan taahán tsi jaha cuenda ndo tsi ndo tyin tacan tan ña jandavi ñaha nu ña vaha tsi ndo tyin nu ican nyityi xaan nu. ¹²Yacan jaha vaha ndo cuenda tsi ndo tsihin tunyee iñi Nyoo tyin cañi tahan yo, maa tyin ñavin tsihin ra ñuu ñayivi, tyin cañi tahan yo tsihin nu ña vaha tsa ña cuvi nyehé yo. Tan nu

ican yihí ndaha tsi nyivi caquiñi. ¹³ Yacan cuenda jaha cuenda vaha ndo tsi ndo tsihin tandihí tsa jatyinyee Nyoo tsi yo. Tyin tacan tan cunyeé iñi ndo quivi nducu cuhva nu ña vaha tsi ndo. Tan ña cua nduva ndo jaha nu. ¹⁴ Ñihi cunyaa ndo tsihin tuhun Nyoo tumaa nyaá listu vaha iin andaru tun tsa yihí cinturón tsitsi ra. Tan çaça vaha ndo ityi tsa nditsa cuví ityi Nyoo tyin yacan cuví tsa tyasí yiqui nyica ndo tumaa iin andaru iyó tsa tyasí yiqui nyica ra tan nduve náa taahán ra. ¹⁵ Tacan tucu nyooho janduvaha ndo tsi ndo tumaa tsa janduvahá ra andaru tsi ra tan tyihí ra zapatu tsaha ra tun tsa cua cahun ra cuatyí. Tacan taahán tsi janduvaha ndo tsi ndo tsa cua cahan ndo tuhun Nyoo tsihin nyivi. ¹⁶ Tan çasi vaha ndo tsi ndo tumaa tyasí ra andaru tsi ra tsihin iin caa tan ña nañi ndaha nduva tsa cayú tsi ra. Tacan taahán tsi cunyecu ñihi ndo tsihin tsa tsinú iñi ndo, tan ña cuhva ndo tsa jaha canaa nu ña vaha tsi ndo. ¹⁷ Ra andaru iyó iin caa ndasí jiñi ra tan jacacú can tsi ra, tacan cuví tsa jacacú Nyoo tsi yo. Cuatyíñu vaha ndo tuhun Nyoo tyin yacan cuví tumaa mityi tsahá Tatyí Ii Nyoo tsi ndo. ¹⁸ Tan ña jandihí ndo tsa tsicán tahvi ndo tsi Nyoo tan tsa caahán ndaahvi ndo tsihin ra tumaa jaquihín ityi maa Tatyí Ii ra tsi ndo. Yacan cuenda ña ndu uvi iñi ndo tan ço nyito vaha ndo, ndaçan tahvi ndihí ndo tsi Nyoo tsa cuenda tandihí nyivi yihí cuenda ra. ¹⁹ Tan ndaçan tahvi ndo tsi ra tsa cuenda yu, na ñihi ca yu tuhun cahan yu, tan na ña nayuhvi yu jacoto yu tuhun ra Cristo tsi nyivi. Tyin tsanaha yihí xeehe tuhun ihya tan vityin cua nacoto ñi itsi. ²⁰ Tan tsa cuenda tsa jacotó yu tuhun ra Cristo, nyíí yu vehe caa ihya vityin. Ndaçan tahvi ndo tsa cuenda yu, na ña nayuhví yu, tan cahan yu cuhva taahán maa tsi cahan yu.

Nu jacuhún ra Pablo tsi ra Tíquico nu yucú nyivi yihí cuenda ra Cristo

²¹ Tan ra Tíquico, ra yañi yo, cua nacatyí tuhun ra tandihí tuhun yu tsihin ndo. Nñi xaan iñi ra jahá tyiñu ra cuenda Jutu Mañi yo, tan cuñi xaan yo tsi ra. ²² Jaquitsí yu tsi ra nu yucú ndo tyin jacoto ra tsi ndo nácaa iyó ndi ihya, tyin tacan tan ndu iin iñi ndo.

²³ Na cuhva Nyoo Jutu yo tan Jutu Mañi yo Jesucristo tsa taxin coo añaima tandihí ra yañi yo naha ra tan na tsinu ca iñi ra naha tsi ra tan na cuñi ra naha tsi nyivi. ²⁴ Tan na nasoco xaan Nyoo tsi tandihí nyoocho tsa cuñi tsi Jutu Mañi yo Jesucristo. Ña jandihí ndo tsa cuñi ndo tsi ra.

Tan na cuví tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo ņuu Filipos,

Nyíi ra Pablo vehe caa, tan javahá ra iin carta tan jacuhun ra tsi nyivi yihí cuenda Nyoo ņuu Filipos

¹ Yuhu ra Pablo tan ra Timoteo, cuví ndi musu ra Jesucristo. Tan javahá ndi carta ihya tsa cuenda tandihí ndo tsa yucú ndo ņuu Filipos tan cuví ndo nyivi cuenda Nyoo tan iin ņi cuví ndo tsihin ra Cristo. Tan yacan jaquitsí ndi carta ihya tsi tandihí ndo tsihin ra cuví ityi nuu tsihin nyivi vehe ņuhu naha ra, tan tsihin ra jahá tyiñu vehe ņuhu naha ra. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo aña.

Nu tsicán tahvi ra Pablo tsa cuenda ñi yihí cuenda Nyoo ņuu Filipos

³ Tandihí ñi tsaha tsa nducuhún iñi yu tsi ndo, nacuhvá xaan yu tyahvi nyoo tsi Nyoo tsa cuenda ndo. ⁴ Tan tandihí tsa tsicán tahvi yu tsi Nyoo tan tsicán tahvi yu tsa cuenda tandihí ndo tsihin tsa sii cuví aña yu. ⁵ Tyin nda quivi jhna tsa tsíñi ndo tuhun ra Cristo tan nda vityin tan ña jandihí ndo tsa jatinyeé ndo tsi yu. Tyin iin caa ñi jacotó yo tuhun ra Jesucristo tsi nyivi. ⁶ Tsitó vaha yu tyin tumaa tsa quitsahá javahá Nyoo tsa vaha tsitsi aña ndo, tacan cua javaha ca ra nda cuenda quivi quitsi ra Jesucristo inga tsaha. ⁷ Taahán tsi tsa caca iñi yu tacan tsa cuenda ndo, tyin cuví xaan yu tsi ndo. Tyin iin caa ñi nasocó Nyoo tsi yo. Vasu ndi maa tsa nyíi yu vehe caa ihya, tan vasu ndi maa cahun yu nuu ra cumí tyiñu naha ra, maa tyin jacotó yu tuhun Nyoo tsi ra yucú vehe caa ihya naha ra, tan tsihin ra cumí tyiñu naha ra, na coto ra naha tyin nditsa tuhun ra Cristo. ⁸ Nyoo tsitó ra tyin cuví xaan yu tsi tandihí nyooho tumaa tsa cuví maa ra Jesucristo tsi ndo. ⁹ Tan tsicán tahvi xaan yu tsi Nyoo na cuví ca ndo tsi ra tan na cundahvi ca iñi ndo tsi nyivi. Tan naco ca tsa nyityi Nyoo tsi ndo, tan cutuñi ca iñi ndo, ¹⁰ tyin tacan tan cuví ñihi ndo tsa vaha tsi Nyoo. Tan ña cua coo ca cuatyí ndo tan cuví coo vaha ndo tsihin tuhun Nyoo nda cuenda quivi quitsi ra Cristo. ¹¹ Maa ra cua jatinyeé tsi ndo. Tan tacan ñi cua javaha ndo maa ñi maa tsa vaha, tan tsa ndaa. Tacan tan cua jacahnu nyivi tsi Nyoo tyin cahun xaan ra cuví ra.

Maa ñi maa tyiñu Nyoo javahá ra Pablo tyin iyó ra Cristo aña ra

¹² Yañi, cuví yu tsa coto ndo tyin tandihí tundoho taahán yu, jatinyeé xaan tsi tyin nducua ca nyivi tsinú iñi tuhun Nyoo. ¹³ Tan tandihí andaru tsa iyó vehe ra cuví rey tan tandihí nyivi iyó ihya tsitó ñi tyin nyíi yu vehe caa tsa cuenda tsa nyicún yu tsi ra Cristo. ¹⁴ Tan cuaha xaan ra yañi yo cuenda Jutu Mañi yo naá tsa yuuhví ra naha tsa nyehé ra naha tyin jatinyeé Nyoo tsi yu nu nyíi yu vehe caa. Yacan cuenda jañihí ca ra naha caahán ra naha tuhun Nyoo tsihin nyivi.

¹⁵ Tan nditsa tyin yihí ra naha, caahán ra naha tuhun ra Cristo tsa cuenda tyin cuví ra cunycun nyivi tsi maa ra naha. Tan yihí tucu ra naha caahán ra naha tuhun ra Cristo tsihin nyivi maa tyin tsihin tsa ñi iñi ra naha. ¹⁶⁻¹⁷ Yihí ra caahán ra tuhun ra Cristo, tyin tsitó ra naha tyin maa Jutu Mañi yo jaquitsí tsi yu ihya. Tyin cahan yu tuhun ra tan jacotó yu tsi nyivi tyin nditsa tsa jacacú ra tsi yo. Tan tsa cuenda tsa cuví ra naha tsi ra Cristo, yacan caahán ra naha tuhun ra. Maa tyin inga ra can naha ra ñavin tsa ñi iñi ra naha tan caahán ra naha tuhun ra Cristo, tyin cuví ra naha na cunycun cuaha nyivi tsi ra naha tan cuví ra naha vacu nducu ra naha tsi yu nu nyíi yu vehe caa ihya. ¹⁸ Tan ña ndihí iñi yuhu tatun juhva ra naha caahán ra naha tuhun ra Cristo tsihin tsa ña ñi iñi ra naha. Maa tyin yuhu sii xaan cuví yu tyin tuhun ra Cristo caahán tandihí ra naha, cuví ñi tsa ñi iñi ra naha caahán ra naha o ñavin.

Tan ndusi ca cuví yu ¹⁹ tyin tsitó yu tyin maa Nyoo cua jacacu tsi yu. Tyin tsicán tahvi xaan ndo tsi ra tsa cuenda yu, tan inga tuhun tyin jatinyeé xaan Tatyí Ii ra Cristo tsi yu. ²⁰ Tsitó vaha yu tyin Nyoo cua jatinyeé ra tsi yu tan ña cua nducuhan nuu yu, tan ña cua nayuhvi yu cahan yu tuhun ra Cristo tsihin tsa ñi iñi yu. Tan ña ndihí iñi yu, an coo ca yu ñayivi, o cúu yu, maa tyin cuví yu cahan yu tuhun ra, tahan ñi cuhva tsa tuhvá yu caahán, na nyehe nyivi cuhva iyó yu tan coto ñi tyin ra Cristo cahun xaan ra cuví ra. ²¹ Tyin tsa cuenda yuhu ñayivi tsa iyó yu vityin, ñayivi ra Cristo cuví. Maa tyin tatun cúu yu, cua ñihi yu tsa sii caa tsa iyó gloria. ²² Tan tatun coo ca yu, vaha xaan. Tyin tacan tan cuví jañihí ca yu jahá tyiñu yu tyiñu Jutu Mañi yo. Tan cua cuví tsi tsa vaha tsa cuenda ra. Yacan cuenda ña tsitó yu nda ityi cahun yu, a cúu yu, a cahun yu cucahan ca yu tuhun Nyoo tsihin nyivi, ña tsitó yu. ²³ Yíi xaan cuví yu tan quihin yu ndaa ityi cahun yu tyin tsa cuví yu cahun yu cunyya yu tsihin ra Cristo. Tyin vaha ca yacan. ²⁴ Maa tyin tsa cuenda nyooho, vaha ca tsa ña cúu naha yu tyin tacan tan cuví cunyya yu tsihin ndo tan coto ca ndo

tuhun Nyoo. ²⁵ Yacan cuenda tsitó yu tyin cua ndoo yu juhva ca quívi ihya. Tyin cuñi tsi tsa jatyinyeé ca yu tsi ndo tan cuvi cuhun ndo ityi nuu ca tan cusii ca iñi ndo tsihin tsa tsinú iñi ndo tsi Nyoo. ²⁶ Tacan tan cua nyehe ndo tsi yu inga tsaha, tan sii xaan ca cua cuñi ndo tsa cuenda yu tyin iin caa ñi iyó yo tsihin ra Cristo.

²⁷ Cuñi tsi tsa coo yo cuhva taahán tsi coo nyivi yihí cuenda ra Cristo. Vasu nyaá yu tsihin ndo, a cañi nyii yu, maa tyin cuñi yu coto yu tuhun ndo tyin nyooho vaha cuahán ndo tsihin Nyoo. Tan iin caa ñi jahá tyiñu tandihi ndo tyin tacan tan cua tsinu iñi nyivi tuhun ra Cristo. ²⁸ Maa tyin nyivi xaan iñi tsi ndo, cuaha xaan tsa cua jacuu ñi tsi ndo maa tyin ña nayuhvi ndo. Tyin tsa tacan, catsi xaan janahá tsi tyin cunaa ñi can. Tan janaha tucu tsi tyin tsa cacu nyooho jahá Nyoo. ²⁹ Tyin tsahá ra ndatu tsa tsinú iñi tandihi yo tsi ra Cristo, tan tacan tucu tsahá Nyoo ndatu tsa nyehé yo tundoho tsa cuenda maa ra Cristo. ³⁰ Iin caa ñi nyehé yo tundoho tan jacotó yo tuhun ra Cristo. Tan tsa tsitó ndo náca nyehé yo tundoho, tan vityin tsitó tucu ndo tyin ña jandihí yu tsa caahán yu tuhun Nyoo.

2

Cuca xaan ra Cristo, maa tyin quítsi cúu ra tumaa iin ra ndaahvi

¹ Nditsa tyin ra Cristo jandu iin xaan ra iñi yo tsa iin ñi cuvi yo tsihin ra. Tan vaha cuñi yo tsa cuenda tsa cuñi ra tsi yo. Tan nditsa tucu tyin iyó Tatyí Ii Nyoo tsihin yo. Tan nditsa tucu tsa ndaahvi cuñi yo nyehé yo tsi nyivi tahan yo. Tatin nditsa tandihí yacan, ² cuhva ndo tsa cusii ca iñi yu tsihin tsa vaha iyó ndo. Tan cuñi tahan ndo tsi ndo tumaa tsa cuñi ra Cristo tsi yo. Tan iin ñi cuhva çaça iñi ndo. Tan iin ñi tsa vaha javaha ndo. ³ Ña javaha ndo maa ñi tsa jatyinyeé tsi maa ndo, javaha ndo tsa vaha tsi inga nyivi. Tan náa javaha ndo, ña cahnu jahá ndo tsi ndo. Ndaahvi jahá yo tsi yo. Tan intuhun intuhun yo na jahá yo tyin vaha ca inga nyivi tan ñavin ca maa yo. ⁴ Tan intuhun intuhun yo caca iñi yo tsa cuenda tsa vaha tsi inga nyivi, tan ñavin tsa cua jatyinyeé tsi maa ñi maa yo.

⁵ Çaça iñi yo tumaa tsicá iñi maa ra Cristo Jesús. ⁶ Tyin nu quítsi tsi tsanaha tsa ndi cumañi ca quítsi ra nu ñuhu ñayivi, cuvi ra tahan ñi maa cuvi Nyoo. Maa tyin ña tsicá iñi ra tsa nacoo ra yacan. ⁷ Tan tyaq tsiyo ra tandihí tunyee iñi ra tan tandihí tsa cuca ra. Tan quítsi ra nanduvj ra iin nyivi ndaahvi nu ñuhu ñayivi ihya quívi tsa cacu ra. ⁸ Tan tsa nanduvj ra iin rayi, tan ndaahvi jahá ra tsi ra tan tyaq yahvi vaha ra tsi Nyoo nda cuenda tsahá ra tsa cahñi nyivi tsi ra nu

cruu. Tumaa iin ra caquiñi, tacan jahá ñi tsi ra, tan tahan ra ticanuu tyin tsahñi ñi tsi ra nu cruu. ⁹ Yacan cuenda Nyoo jacahnú xaan ra tsi ra. Tan tsahá Nyoo iin sivi tsi ra, iin sivi tsa cahnu xaan ca cuvi tan ñavin ca tandihí sivi. ¹⁰ Tyin tatun tsifñi yo sivi ra Jesucristo, tandihí yo tan cua cuiñi tsiti yo. Tan tandihí tucu tsa iyó andivi, tan tsa iyó nu ñuhu ñayivi, tan tsitsi ñuhú, tandihí yacan cua jacahnu tsi ra. ¹¹ Tyin tandihí tsa iyó, cua nacoto tan cua cahan tyin ra Jesucristo cuvi ra ndacá ñaha tsi tandihí maa tsa iyó. Tacan tan cua nyehe tsi tyin cahnu xaan ca cuvi maa Nyoo Jutu yo.

Nyivi yihí cuenda Nyoo cuvi ñi tumaa iin ñuhu tsa jandunditsin nu ñuhu ñayivi ihya

¹² Yacan cuenda, yañi tsa cuñi xaan yu, tumaa tsa tyaq yahvi ndo tsi yu quívi tsa tsinyii yu tsihin ndo, tacan ñi taahán tsi tyaq yahvi ndo tsi yu vasu ndi maa tsa cañi nyii yu vityin. Ndücu ndo cuhva na nyehe nyivi tyin nditsa tsa jacacú Nyoo tsi yo. Tan jahá vaha ndo cuenda cuhva coo ndo tsihin ra. ¹³ Tyin maa Nyoo tyihj tsa vaha añima ndo. Tan jatyinyeé ra tsi ndo tyin tacan tan cuvi tyaq yahvi ca ndo tsa caahán ra tan javahá ndo cuhva cuñi ra.

¹⁴ Tatun cua javaha ndo náa tsa cua javaha ndo, ndücu jihna ndo cuhva tsa ña cahan yuhu tahan ndo. Tan ña cañi tahan ndo. ¹⁵ Tacan tan ña cua coo cuatyí ndo. Taahán tsi cuvi ndo nyivi cuiti iyó, taahán tsi cuvi ndo nyivi nduve cuatyí, tumaa tsa taahán tsi coo nyivi cuenda Nyoo tyañu nyivi caquiñi ihya. Cuñi tsi tsa cuvi ndo tumaa iin ñuhu tsa jandunditsin nu naa nu ñuhu ñayivi ihya. ¹⁶ Cahan yo tuhun Nyoo tsihin nyivi tyin yacan tsahá ñayivi nyito tsa iyó yo. Javaha ndo tacan, tan quívi cua quítsi ra Cristo, yuhu ñi vaha cua cuñi yu tsa cuenda ndo, tyin ña jacotó cuatu yu tuhun Nyoo tsi ndo. ¹⁷ Tan vasu cahñi nyivi tsi yu tsa catyi tuhun Nyoo, maa tyin cua cuvi tsi iin tsa cua jamañi yu tsi Nyoo tan tsihin tsa tsinú iñi ndo tsi ra. Tan iin caa ñi cusii iñi yo tsihin ra. ¹⁸ Tan yacan cuenda taahán tsi tsa cusii iñi ndo tsihin yu.

Nu jacuhun ra Pablo tsi ra Timoteo tan ra Epafrodito ñuu Filipos

¹⁹ Tatun Jutu Mañi yo tan cuñi ra, cua jaquitsi yu tsi ra Timoteo naquitsi nyehe ra nu yucú ndo. Tan quívi tsaa ra inga tsaha nu nyii yu sii xaan cua cuñi yu. Tyin cua nacatyí tuhun ra tsihin yu náca yucú ndo. ²⁰ Tyin intuhun ñi ra tsicá iñi tumaa tsa tsicá iñi yu tsa cuenda ndo. Tan yoñi inga ra tsa tsicá iñi tacan. ²¹ Tyin tandihí ca ra naha, maa ñi maa tsa cuenda tsi maa ra naha nanducú ra naha. Tan ña nanducú ra naha cuhva cuñi ra Cristo Jesús. ²² Maa tyin tsitó ndo tyin ra Timoteo, vaha cuahán ra

tsihin Nyoo, tan tsa cuenda yuhu, cuví ra tumaa sehe yu. Tan jatyinyeé xaan ra tsi yu tsa caahán ndi tuhun ra Cristo tsihin nyívi. ²³ Tan nyaá tsa cua jaquitsi yu tsi ra nu yucú ndo. Maa tyin nda coto jihna yu nácaa cua cahan ra cumí tyíñu, tatun ña naha ca cunyíi yu ihya. ²⁴ Tyin tsitó vaha yu tyin Jutu Mañi yo numi ñi cua cuhva ra tsa quitsi nyehe yu nu yucú ndo.

²⁵ Tan ra Epafrodito, yañi yo tsa jaquitsi ndo tsa jatyinyee tsi yu tsihin tyíñu tsa javahá yu, iin caa ñi cuví ndi andarú ra Cristo tsihin ra. Tan vityin cua jaquitsi nuhu yu tsi ra inga tsaha na yucú ndo. ²⁶ Cuñi xaan ra quitsi nuhu ra nu yucú ndo, tyin tsicá xaan iñi ra tsa tsitō ndo tyin nacuhví ra. ²⁷ Nditsa ñihi xaan nacuhví ra tan tsa cua cúu maa ra cuví. Maa tyin Nyoo cundahví iñi tsi ra, tan tsii tucu yuhu tyin na ña nducuihya xaan ca iñi yu. ²⁸ Yacan cuenda, yuhu cuñi xaan yu tsa quitsi nuhu ra nu yucú ndo. Tyin tacan tan sii xaan cua cuñi ndo tsa cua nyehe ndo tsi ra inga tsaha. Tan yuhu ña cua coo ca yu tucuihya iñi, tyin cua nyehe ndo tyin ra Epafrodito iyó vaha ra. ²⁹ Yacan cuenda, naquihin ndo tsi ra tsihin tsa sii cuñi ndo, tyin yañi yo tsa cuenda maa Jutu Mañi yo cuví tsi ra. Tan tacan ñi taahán tucu tsi tsa jaha ndo tsa ñayívi tsi ra yañi yo naha ra tsa iyó tumaa cuhva iyó ra. ³⁰ Tyin tsa yatyin maa cúu ra tsa cuenda tsa javahá ra tyíñu ra Cristo. Tyin vasu ndi maa cuhví xaan ra, maa tyin ña cuñi ra jandihí ra tsa jatyinyeé ra tsi yu. Tyin maa ndo ña cuví quitsi ndo tan jatyinyee ndo tsi yu tyin cañi xaan yucú ndo.

3

Nu janahá ra Pablo nácaa nduvaha yo nuu Nyoo

¹ Tan vityin yañi, çusii iñi ndo tsihin Jutu Mañi yo. Tsa cuenda yuhu nduve tsihi cuví tsi tsa cua tyaa yu inga tsaha tuhun ihya tsi ndo. Tyin tsa vaha tsi maa ndo cuví tsi. ² Jaha ndo cuenda tsi ndo tsihin ra icá tumaa icá ina, ra caquiñi naha ra. Javahá ra naha tsa ña vaha. Tyin catyí ra naha tyin cuñi tsi cunyaa tuñi Nyoo tsi yo, tacan tan cacu yo. ³ Maa tyin yoo nysó yo tuñi tsa nditsa tyin maa Nyoo tyaa tuñi ra tsitsi añima yo quívi nacuhvá cuenda yo tsi yo tsi ra. Tan jacahnú yo tsi ra tsihin Tyatí Ii ra tsa iyó añima yo. Tan cusii iñi yo tyin cuenda maa ra Cristo Jesús yíhi yo. Tan ña nyitá iñi yo tyin cacu yo tsihin náa cunyaa cuñu ñuhu yo. ⁴ Tun tsatyin nditsa tsa cuví cacu yo tsihin tsa javahá yo yacan, jihna ca yuhu tsa yaha cacu tan ñavin ca tandihí ra tsa javahá yacan vityin. ⁵ Tyin una quívi yu tan tsinyaa tuñi Nyoo tsi yu. Tyin tata ra Israel cuví yu. Tan tata ra Benjamín sehe ra Israel cuví ndihí yu.

Juvin ñi tata nyívi caahán yuhu hebreo cuví yu. Yacan cuenda nditsa tyin hebreo cuví yu. Tan inga tucu tuhun, tyaa yahvi xaan yu ley tsahnu quívi can, tyin ra fariseo cuví yu. ⁶ Tan tsa cuenda tsa cuñi yu tyaa yahvi yu ley, tan tsinyaa ndaha xaan yu tsi ñi yíhi cuenda ra Cristo. Tan tyaa yahvi yu tandihí maa ley tsahnu, tyin nducu xaan yu cuhva tyaa yahvi yu tsa caahán ley can. ⁷ Maa tyin tandihí tsa cuñi maa yu tyin cahnu xaan cuví quívi can, vityin nduve ca yahvi nyaá yacan tsa cuenda yu. Tyin vityin maa ra Cristo cuví ra tsa nyitá iñi yu. ⁸ Tan inga tucu tuhun, tandihí tsa javahá yu, tsitó maa yu tyin nduve ca yahvi nyaá yacan tyin tsa nacoto yu tsi ra Cristo Jesús, Jutu Mañi yu. Tyin yacan cuví tsa cuca xaan ca. Tan tsa cuenda ra Cristo tandihí tsa javahá yu quívi quitsi tsi ityi tsata, cuví tsi iin tsa cuatu ña vityin. Yacan cuenda tyaa tsiyo yu tandihí can. Tyin cuñi yu coto vaha ca yu tsi ra Cristo. ⁹ Tan cuñi yu ndu iin ca yu tsihin ra. Tsinú iñi yu tyin jacacú ra tsi yu, yacan cuenda nduvahá iyó yu nuu Nyoo. Ñavin tsa cuenda tsa tyaa yahvi yu ley Nyoo tan vaha iyó yu, maa tyin tsa cuenda tyin tsinú iñi yu tsa caahán ra, tyin jacacú ra tsi yo tan vaha iyó yu nuu ra. Tan tsa cuenda tsa tsinú iñi yo, ra Cristo naquihin cuenda ra tsi yo. ¹⁰ Tsa coto vaha ca yu tsi ra Cristo, yacan cuví tsa cuñi yu. Tyin Nyoo janandoto ra tsi ra Cristo tsihin tunyee iñi ra. Tan cuñi yu tyin coo ca tunyee iñi can tsi yu. Tan cuñi yu cunyeé iñi yu tundoho tsa taahán tsi nyehé yu tsa cuenda ra. Tan cuñi yu nacuhva cuenda yu tsi yu tumaa maa ra Cristo nacuhvá cuenda ra tsi ra tan tsihi ra. ¹¹ Tyin nducú xaan yu cuhva nandoto yu tsa yaha cúu yu.

Nacaa cunyicun ñihi ca yo tsi Nyoo

¹² Ña catyí yu tyin nduve ca tsa cumañi tsi yu, tan vaha xaan yu. Maa tyin cuahán yu ityi nuu ca. Tyin cuñi yu naquihin yu tsa cahan ra Cristo tyin cuhva ra tsi yu. Tyin jihna ca maa ra cahan tsihin yu. ¹³ Yañi, ña catyí yu tsihin ndo tyin tsa ñihí yu tandihí tsa vaha can. Maa tyin iyó intuhun ñi tsa javahá yu; nacoó yu ityi tsata tandihí tsa javahá yu, tan jañiñi yu cuhun yu ityi nuu ca. ¹⁴ Tyin tacan tan tsaá yu nu nyaá tsa taahán tsi tsi yu. Tyin caná Nyoo tsi yo nda gloria. Tyin naquihin yo tsa catyí ra tsihin yo tyin cuhva ra tsi yo tsa cuenda tsa iin caa ñi iyó yo tsihin ra Cristo Jesús.

¹⁵ Tacan taahán tsi caa iñi tandihí nyívi tsa ñihi nyaá tsihin Nyoo. Maa tyin tatun ñavin tacan tsicá iñi ndáa nyooho, Nyoo cua cuhva ra tsa cutuñi iñi ndo. ¹⁶ Maa tyin iyó iin tsa cuñi tsi tsa tyaa yahvi vaha yo, tuhun tsa tsa yaha jacoto Nyoo tsi yo.

17 Yañi, javaha ndo cuhva iyó yu tan cuhva caahán yu. Tan nyehe vaha ndo cuhva iyó nyivi iyó cuhva janahá ndi tsi tandihi nyivi. 18 Tyin cuaha xaan tsaha caahán yu tsihin ndo, tan vityin cua cahan yu inga tsaha tsihin tsa cuihyá cuñi yu tyin cuaha xaan ra naha janahá ra naha tsihin cuhva iyó ra naha tyin ra xaan iñi tsi ra Cristo cuví ra naha tyin tumaa tsa ña cahnú cuví tsa tsihi ra Cristo nu cruu jahá ra naha. 19 Maa tyin quivi quitsi ra Cristo inga tsaha, ra ican naha ra cua cuhun anyaya. Tyin javahá ra naha cuhva cuñi cuñu ñuhu ra naha. Tan cahnú jahá ra naha tsi ra naha tsihin tsa taahán tsi coo ticanuu tsi ra naha. Tan nyitá iñi ra naha maa ñi maa tsa iyó ñuu ñayivi ihyá. 20 Maa tyin yoo nda gloria cuví nu iyó ñuu yu. Tan ndatú yu quivi quitsi nyico Jutu Mañi yo Jesucristo, ra jacacú tsi yo. 21 Tan cua quihin ra cuñu ñuhu ndaahvi yo, tan cua jananduvi ra tsi yo tumaa cuñu ñuhu maa ra. Tan cua javaha ra tacan tsihin tunyee iñi tsa iyó tsi ra. Tan juvin ñi tsihin tunyee iñi can ndacá ñaha ra tandihi tsa iyó.

4

Tacan ñi maa na cusii iñi yo tsihin Jutu Mañi yo

1 Yañi, cuñi yu tsi ndo. Tan cuñi xaan yu nyehe yu tsi ndo. Sii xaan cuñi yu tsihin ndo. Tan tsitó yu tyin ña cahan cuatu yu tuhun Nyoo tsihin ndo. Tyin ní xaan iñi ndo nyicún ndo tsi ra. Tan jañihi ca ndo cunyicun ndo tsi ra.

2 Tan vityin tsiacán yu tsi ña Evodia, tan ña Síntique, na ña cahan yuhu tahan ñi, tan coo vaha ñi cuhva cuñi Jutu Mañi yo. 3 Tan yooho, yañi, tsa iin caa ñi jahá tyiñu tsihin yu, cuñi yu tyin jatinyee un tsi ñi cuhva yo ihyá. Tyin juvin ñi jatinyee xaan tsi yu nu cahan yu tuhun Nyoo, maa tyin ñavin intuhun ñi yu jatinyee ñi, tyin jatinyee ndihi ñi tsi ra Clemente tan tsi tandihi ca ra tsa cutahán tsihin ndi. Tan sivi tandihi ñi tsa nyaá nuu tutu Nyoo nda gloria.

4 Cusii iñi ndo tsihin Jutu Mañi yo tandihi ñi quivi. Tan caahán yu tsihin ndo inga tsaha, cusii iñi ndo tsihin ra. 5 Coo vaha ndo tyin tacan tan nyehe tandihi nyivi tyin nditsa tyin nyivi vaha cuví ndo. Tan nducuhun iñi ndo tyin tsa yatyin cua quitsi Jutu Mañi yo.

6 Tan ña caca iñi ndo náa taahán ndo. Iin nyita ñi ndacan tahvi ndo tsi Nyoo náa ndihi tundoho tsa iyó ndo. Tan ndacan ndo tsi ra nacuhva ra tandihi tsa tsiñi ñuhu tsi ndo. Tacan tan ña nacoo ndo tsa tsahá ndo tyahvi nyoo tsi ra. 7 Tan Nyoo cua cuhva ra tsa taxin coo añima ndo. Tan cahnú xaan tsa vaha cuví yacan. Tan yoñi cuví cutuñi iñi nácaa tsa cahnú tsi. Tan tsa taxin iyó tsi

Nyoo cua jaha cuenda añima ndo tan tsihin tsa tsiñi tuñi jiñi ndo, tyin iin caa ñi iyó ndo tsihin ra Cristo Jesús.

Na caca iñi yo maa ñi maa tsa vaha

8 Nu cua ndihi tuhun, yañi, caca iñi ndo maa ñi tsa nditsa, maa ñi tsa ndaa, tsa cuiti iyó, tan tsa ndoo iyó. Ña caca iñi ndo tsa caquiñi. Caca iñi ndo tsa sii caa, maa ñi tsa vaha, tan maa ñi cuhva cuví jacahnú ndo tsi Nyoo.

9 Javaha ndo tsa jacuhá yu tsi ndo. Tuhun tsa cahan yu tsiñi ndo, tan tsa javahá yu nyehe ndo, yacan taahán tsi javaha ndo. Tan Nyoo ra tsahá tsa taxin coo añima yo, cua cunyaa ra tsihin ndo.

Nu jatinyee nyivi ñuu Filipos tsi ra Pablo tsihin tsa iyó tsi ñi

10 Sii xaan cuñi yu. Tan jacahnú yu tsi Jutu Mañi yo tsa cuenda tsa jatinyee xaan ndo tsi yu inga tsaha. Tan tsitó yu tyin ndihi ñi tsaha tan cuñi ndo jatinyee ndo tsi yu. Maa tyin tsicoo juhva quivi ña tsahá tsi cuhva tsa jatinyee ndo tsi yu. 11 Ñavin tyin iyó tsa tsiñi ñuhu tsi yu tan caahán yu tsihin ndo, tyin yuhu tsa cutuhvá maa yu tsa cusii iñi yu tsihin náa tsa iyó tsi yu. 12 Tyin yuhu tsa tsitó maa yu nácaa coo ndaahvi yu tan nácaa coo cuca yu. Tyin tsa caan maa yu tun iyó tsa catsi yu a nduve, tyin tun ndoo ca tsa catsi yu, quivi tsa iyó, o nduve tsa catsi yu, ndoo maa yu vaha. 13 Tandihí tan cuví jaha yu tsihin tunyee iñi tsa tsahá ra Cristo tsi yu. 14 Tan nyooho yañi, vaha xaan tsa javahá ndo tyin jatinyee ndo tsi yu quivi tsa tsicoo yu tundoho.

15 Tsa tsitó nyooho nyivi Filipos nácaa cuví quivi quitsahá caahán yu tuhun Nyoo tsihin ndo. Tacan tan quee yu Macedonia nu iyó ndo tan cuahán yu cua jacoto yu tuhun Nyoo inga ñuu. Tan nyooho cuví nyivi tsa jatinyee tsi yu tsihin xuhun, tyin vaha xaan cuñi ndo tsa cahan yu tuhun Nyoo tsihin ndo. 16 Tan tsitsi tsa nyii yu ñuu Tesalónica, ñavin intuhun ñi tsaha jatinyee ndo tsi yu. 17 Ñavin tsa tsicá iñi yu tsa jatinyee ndo tsi yu, tyin tsa cuñi yu tsa jatinyee ndo tsihin tyiñu Nyoo, tacan tan cuaha ca cua nasoco Nyoo tsi ndo. 18 Tan vityin, nduve tsa cumañi tsi yu. Nda cua ndoo ca tsa jaquitsi ndo tsi yu tsihin ra Epafrodito. Tan tsa tsahá ndo can cuví tsi tumaa xico tamí, xico vaha tsa tsaa nuu Nyoo. Yacan cuví tsa taahán iñi ra. 19 Tan Nyoo cua cuhva ra tandihí tsa tsiñi ñuhu tsi ndo. Tan tandihí tsa cuca tsa iyó tsi ra Cristo nda gloria tandihí yacan tan cua cuhva ra tsi ndo. 20 Na jacahnú yu tsi Nyoo Jutu yo tacan ñi maa. Tan na cuví tsi tacan ñi.

Nu jacuhún ra Pablo nacumi tsi nyivi ñuu Filipos

²¹ Tsahá yu nacumi tsi tandihí ndo tsa yihí ndo cuenda ra Cristo ñuu Filipino. Tan jaquitsi tucu ra yañi yo tsa yucú tsihin yu ihya nacumi tsi ndo. ²² Tan nyiví cuenda Nyoo tsa yucú vehe ra ndacá ñaha ñuu Roma ihya, tan tandihí ca nyiví yihí cuenda Nyoo ñuu ihya jaquitsi ñi nacumi tsi ndo.

²³ Na nasoco maa Jutu Mañi yo Jesucristo tsi tandihí ndo.

Tan na cuvi tsi tacan ñi.

Carta Tsa Jacuhun Ra Pablo Tsi Nyivi Yihí Cuenda Nyoo ņuu Colosas

Nu quitsaha javahá ra Pablo carta

¹⁻² Yuhu ra Pablo cuví yu iin ra tava tyiñu ra Jesucristo, tyin tacan cuñí maa Nyoo tyin caca yu tyiñu ra. Yuhu tan ra Timoteo, yañi yo, jaquitsí ndi carta ihya tsi nyooho nyivi ņuu Colosas tsa iin iñi yihí cuenda Nyoo tan cuenda ra Cristo. Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu tsicán tahvi ra Pablo tsa cuenda nyivi yihí cuenda ra Cristo

³ Tandihí ñi saha tsa tsicán tahvi ndi tsa cuenda ndo, tan nacuhvá ndi tyahvi nyoo tsi Nyoo Jutu ra Jesucristo Jutu Mañi yo tsa cuenda ndo. ⁴ Tyin ñihí tuhun ndi tyin tsinú xaan ndo tsi ra Cristo Jesús, tan cuñí xaan ndo tsi tandihí nyivi tsa yihí cuenda Nyoo. ⁵ Tacan javahá ndo tyin tsitó vaha ndo tyin cua coo ndo tsihin Nyoo nda gloria. Nda quivi tsiñi ndo tuhun Nyoo tsa nditsa tyin jacacú ra Cristo tsi ndo tan quitsaha nyitá iñi ndo tsi Nyoo. ⁶ Tan juvin ñi maa tuhun ra Cristo tsa cahan ra Epafra tsihin ndo, yacan nacutá tandihí ñi ityi, tumaa tsa tsityá tucu tsi nu iyó ndo ihya. Tan cuaha nyivi nacuhvá cuenda ñi tsi ñi tsi Nyoo, tumaa nacuhvá cuenda maa ndo tsi ndo. Tyin quivi tsa tsiñi ndo tuhun ra Cristo tsito ndo tyin nditsa tsa cuñí Nyoo tsi ndo. ⁷ Yacan janahá ra Epafra tsi ndo, tyin iin ñi tyiñu Nyoo jahá tyiñu ndi tsihin ra. Tan juvin ra cuví musu vaha ra Cristo tsa cuenda ndo. ⁸ Tan juvin ra catyi tuhun tsihin ndi tyin cuñí xaan ndo tsi nyivi tahan ndo, tyin maa Tatyí li Nyoo tsahá tsa vaha can coo añima ndo.

⁹ Yacan cuenda nda quivi tsa ñihí tuhun ndi tyin tacan javahá ndo, ña jandihí ndi tsa tsicán tahvi ndi tsi Nyoo tsa cuenda ndo. Tan tsicán ndi tsi Nyoo na cuhva ra tsa tsiñi tuñi tsa iyó tsi ra tsi ndo, tan na cutuñi iñi ndo jahá Tatyí li ra tan coto vaha ndo náa ndihí tsa cuñí ra tyin javahá ndo. ¹⁰ Tacan tan cuví coo ndo tumaa taahán maa tsi coo nyivi yihí cuenda Jutu Mañi yo. Tan javaha ndo tumaa cuñí maa ra, tan javaha ndo tandihí nuu tsa vaha tan nacoto vaha ca ndo tsi ra. ¹¹ Tan tsicán tucu ndi tsi ra na jatinyee ca ra tsi ndo tsihin tunyee iñi cahnu tsa iyó tsi ra tan ña cundihí iñi ndo tsa yaha ndo tandihí tundoho, tan na cusii iñi ndo. ¹² Tan na cuhva ndo tyahvi nyoo tsi Nyoo Jutu yo, tyin maa ra tsa janduvahá ra

tsi yo tyin tacan tan cuví ñihí yo tsa cua ñihí nyivi tsicá nu nditsin, tan cuñí tsi catyi nyivi tsa cuñi iyó nuu ra. ¹³ Tyin Nyoo tava ra tsi yo nu naa tan nacuhvá cuenda ra tsi yo tsi Sehe ra tsa cuñi xaan ra tyin cundaca ñaha ra tsi yo. ¹⁴ Tan jatá ra tsi yo tsihin ñihí Sehe ra tan jahá ra tucahnu iñi tsi yo.

Tsa cuenda tsa tsihi ra Cristo nu cruu tsacatyí cuatyí yo tan nduvahá iyó yo tsihin Nyoo

¹⁵ Nyoo ña nyehé yo tsi ra. Maa tyin nanduvj ra nyivi tan cuví nacoto yo tsi ra. Tan juvin ra cuví ra Cristo Sehe Nyoo. Nda ndi cumañi ca tsinú ñuhu ñayivi tan tsa iyó maa ra Cristo. ¹⁶ Tan maa ra javahá tandihí tsa iyó andivi tan nu ñuhu ñayivi jahá Nyoo. Javahá ra tsa cuví nyehe yo tan tsa ña cuví nyehe yo. Javahá ra tandihí tatyí vaha tan tatyí ña vaha tsa ndacá ñaha andivi tan nu ñuhu ñayivi ihya. Tan tandihí yacan javahá ra tyin cuatyíñu ra cuhva cuñí ra. ¹⁷ Tan tsa iyó maa ra tsa ndi cumañi ca coo tandihí maa tsa iyó. Tan tandihí tsi jahá tyiñu vaha tsi jahá ra. ¹⁸ Tan yoo tsa yihí cuenda ra Cristo cuví yo cuñu ñuhu ra, tan maa ra cuví jiñi tsihin yo, tan tsahá ra tsa coo nyito yo. Tan juvin ra cuví tsa nandoto tsa jihna ca, tyin tacan tan quihí ndaha ra tandihí tsa iyó. ¹⁹ Tyin Nyoo cuñi ra tsa cuví ra Cristo tumaa cuví maa ra. ²⁰ Tan tsahá ra tsi ra Cristo tsa cúu ra nu cruu tyin tacan tan cuví coo vaha tandihí tsa iyó tsihin ra, tahan ñi tsa iyó nu ñuhu ñayivi tan andivi.

²¹⁻²² Tahan tsanaha javahá ndo tsa ña vaha tan xaan cuñi ndo nyehé ndo tsi Nyoo. Maa tyin Nyoo jaquitsj ra tsi ra Cristo, Sehe ra tan tsahá cuenda ra cuñu ñuhu ra tan tsihi ra nu cruu. Tan janaco vaha ra tsi ndo tsihin Nyoo, tan cua nacuhva cuenda ra tsi ndo tsi ra tsihin tsa nduve ca cuatyí ndo tan cuñi vaha cua coo ndo nuu ra. ²³ Yacan cuenda jañihí ca ndo tsinú iñi ndo. Tan quita iñi ndo tyin cua tsa ndo nu nyaá Nyoo tun ña jandihí ndo tsa tsinú iñi ndo tuhun ra Cristo tsa tsiñi ndo tyin cua jacacu ra tsi ndo. Tuhun ihya cuví tsa caahán ra naha tani cahnu ñuhu ñayivi. Tan yuhu ra Pablo jatinyee yu caahán yu tuhun ihya tsihin nyivi.

Nu catyi ra Pablo tyin nyaá siqui ra tsa janahá ra tuhun ra Cristo tsi tandihí nyivi tsicá vehe ñuhu

²⁴ Vityin sii cuñi yu tsa cuenda tsa nyehé yu tundoho tsihin cuñu ñuhu yu tsa cuenda ndo. Tyin taahán tsi tsa nyehé yu tundoho tsa cuenda nyivi yihí cuenda ra Cristo tyin maa ra cuaha xaan tundoho nyehé ra tsa cuenda yo tsa cuví yo cuñu ñuhu ra. Tacan tan cua jaquita ndihí yu tundoho tsa nyehé ra. ²⁵ Yuhu cuví iin ra caahán tuhun ra Cristo tyin tacan jatinyee yu tsi tandihí

nyivi yihí cuenda ra. Tyin maa ra Nyoo catyi tsa cahan yu tandihí tuhun ra tsa cuenda tsa vaha tsi ndo. ²⁶ Jacuahá yu tuhun tsa tsicumj xeehe Nyoo tahañ tsanaha, tsa ndi cumañi ca javahá ra ñuhu ñayivi. Tan vityin tsahá ra tsa nacoto nyivi yihí cuenda ra itsi. ²⁷ Tan nyooho tsa ñavin nyivi Israel cuví cuñi ndihí ra jacoto ra tuhun xeehe can tsi ndo. Tan tuhun xeehe can cuví tsehe: ra Cristo iyó ra añima nyooho ñi yihí cuenda ra. Tan tsa cuenda maa ra cua ñihi ndo gloria nu cua coo ndo tsihin Nyoo.

²⁸ Tuhun maa ra Cristo caahán ndi. Tan tsahá cuenda ndi tuhun ihya tsi tandihí nyivi. Tan jacuahá ndi tsi tandihí ñi na cutuñi iñi ñi, tan cutsa vaha ñi tyin iin ñi cuví ñi tsihin ra Cristo. ²⁹ Tan tsa cuenda tsa cuñi yu tsa cuahnu vaha ñi ñihi xaan jahá tyiñu yu tsihin tunyee iñi ra Cristo tsa tsahá ra tsi yu.

2

¹ Tan cuñi yu tsa coto ndo tyin tsicá iñi yu tsa cuenda ndo. Tan tsicán tahvi xaan yu tsi Nyoo tsa cuenda tandihí ndo tan tsa cuenda nyivi ñuu Laodicea, tan tsa cuenda tandihí nyivi tsa ñaha ca nyehe tsi yu. ² Tsicán yu tsi ra na jandu iin ra iñi añima ndo, tan jandu iin ra tsi ndo tsihin tsa cuñi tahan ndo tsi ndo. Tan na cuhva ra tsa cutuñi vaha iñi ndo nacuenta jaquitsj ra tsi ra Cristo, tyin tacan tan cua nacoto vaha ca ndo tsi ra. Tyin juven tuhun ra Cristo cuví tsa tsicumj xeehe Nyoo tahañ tsanaha, tan vityin jacotó ra itsi tsi yo. ³ Tyin tsi intuhun ñi maa ra Cristo iyó tsa tsiñi tuñi tan tsahá ra itsi tsi yo na cutuñi iñi yo tsi Nyoo. ⁴ Caahán yu tyehen tsihin ndo tyin tacan tan ña jandavi ñaha nyivi tsi ndo tsihin tuhun tsa sii natuhún ñi. ⁵ Vasu nduve yu nyíi tsihin ndo, maa tyin ñuhú xaan iñi yu tsi ndo. Tan sii xaan cuñi yu tsa nducuhún iñi yu cuhva iyó nu yucú ndo tyin vaha xaan icá ndo. Tan tsinú vaha xaan iñi ndo tsi ra Cristo.

⁶ Yacan cuenda tumaa natsinú iñi ndo tsi ra Cristo quivi nañihj ndo tsi ra, tacan cuñi tsi coo ndo tsihin ra. ⁷ Tan çynpaa naa vaha ndo tsi ra, na cuhva ra tunyee iñi ra tsi ndo. Tan ndu iin ca iñi ndo jahá tsa tsinú iñi ndo tsi ra, tumaa cutuhvã ndo. Tan iin nyita ñi nacuhvá ndo tyahvi nyoo tsi Nyoo.

Ñayivi nyito tsa tsahá ra Cristo tsi yo

⁸ Jaha ndo cuenda tsi ndo coto jandavi ñaha nyivi tsa caahán tsa ña nditsa tsi ndo. Tyin ñi ican ña nacoto ñi tsi ra Cristo. Tyin maa ñi cuhva iyó nyivi tsitó ñi tan tsiñú iñi ñi cuhva tsicá iñi nyivi.

⁹ Yacan ña tsjnu iñi ndo tsa caahán ñi tyin ra Cristo juven ra cuví Nyoo tan cuví tucu ra nyivi. ¹⁰ Tan tsitú ndo tsihin Nyoo tyin iin ñi cuví ndo tsihin ra Cristo. Tan maa

ra ndacá ñaha tandihí tsa ndacá ñaha nu ñuhu ñayivi tan tandihí tatyí tsa ña nyehé yo. ¹¹ Tan tsa iin ñi cuví ndo tsihin ra Cristo, nda quivi natsinú iñi ndo tsi ra, tan nanduvj ndo nyivi ra. Maa tyin ña nanduvj ndo nyivi ra tsa cuenda tsa tsinyaq tuñi ra cuñu ñuhu ndo, tyin jacacú ra tsi ndo ndaha tsa caquiñi tsa javahá ndo jahá cuñu ñuhu ndo. Tsehe cuví tuñi tsa tyaq ra Cristo tsi ndo: ¹² Quivi tsicoondutya ndo tsitsi ndutya, tumaa tsa tsihj ndo tsihin ra Cristo tan quihvi ndo tsitsi ñuhu cuví can. Tacan tan nandotó tucu ndo tsihin ra tyin tsinú iñi ndo tyin Nyoo janandotó tsi ra tsihin tunyee iñi ra. ¹³ Tahañ tsanaha cuví ndo tumaa nyivi tsihj jahá cuatyí ndo, tyin nduve Nyoo nyaá añima ndo tan ña tsinyaq tuñi Nyoo cuñu ñuhu ndo. Maa tyin vityin Nyoo jahá ra tucahnu iñi tandihí cuatyí ndo. Tan tsahá ra tsa coo ndo ñayivi nyito tsihin ra Cristo. ¹⁴ Tyin ley tsahnu jaquituvj tsi cuatyí yo. Tan catyí tsi tyin taahán tsi cuhun yo anyaya tyin ña tyaá yahvi yo itsi. Maa tyin ra Cristo tsihj ra nu cruu jahá Nyoo tan tsindihj tsa cuhun yo anyaya. ¹⁵ Tan tsa tsihj ra nu cruu jahá canaa ra tsi nu ña vaha tan tandihí ca tatyí ña vaha tsa ndacá ñaha. Tacan tan tsindacá ra tsi nu nuu tandihí nyivi tan nuu ángel tyin na nyehe ñi tyin cahnú ca cuví maa ra, yacan cuenda jahá canaa ra.

Na nanducú yo tsa vaha tsa tsahá Nyoo

¹⁶ Yacan cuenda ña taahán tsi tyaá nyivi cuatyí tsi ndo tsa cuenda tsa tsatsí ndo a tsa cuenda tsa tsihí ndo, o tsa cuenda tsa ña naquihín vaha ndo iin quivi vico tsa jacahnú nyivi Israel; cuví ñi quivi tsa nduyutyá yoo, o quivi quitatú ñi. ¹⁷ Tandihí tsehe ña jacacú can tsi yo tyin cuví can tumaa tixahñu tsa cua quitsi ra Cristo. Tan vityin tsa yahá quitsj ra, tan juven ra jacacú tsi yo. ¹⁸ Ña çuhva ndo tsa casi nyivi nu naquihín ndo tsa tsahá Nyoo tsi ndo. Tyin ndaahvi jahá ñi tsi ñi nu Nyoo, maa tyin ña nditsa ñi. Jacahnú ñi tsi ángel, tan catyí ñi tyin cuaha tsa vaha janahá Nyoo tsi ñi tan ña nditsa, tyin tsa tsicá iñi ñi maa ñi nduyaá ñi tsihin can. ¹⁹ Ñi ican ñavin ra Cristo nyicún ñi. Maa tyin yoo tsa nyicún tsi ra cuví yo cuñu ñuhu ra, tan maa ra cuví jiñi tsihin yo. Tan jandu iñi ra tsi tandihí yo. Tan jacuahnú ra tsi yo tsihin tunyee iñi ra tumaa cuhva cuñi maa Nyoo.

²⁰ Tumaa tsa tsihj cuñu ñuhu cuatyí ndo tsihin ra Cristo cuví can. Tan ña ndacá ñaha ca tuhun ñuhu ñayivi ihya tsi ndo. ¿Nacuenta tyin iyó ca ndo tumaa iyó nyivi tsa ña nacotó tsi Nyoo? Tan tyaá yahvi ndo tsa caahán ñi tsa javahá tuhun tsahnu. ²¹ Tyin catyí ñi tsihin ndo tyehen: “Ña tñin un tsehe tsihin ndaha un, ña catsi un tsehe, coto ña cacu un”, catyí ñi tsihin ndo. ²² Maa tyin ña taahán tsi casi ñi nu javahá ndo yacan tyin

tsa jacuahá ñi, maa ñi tsa tsicá iñi nyivi cuví can. Tyin tsa tsatsí yo tsa iin yaha ñi cuví can, tan ña cuví jatívi can tsi ndo nuu Nyoo. ²³ Ñi tsa javahá tandíhi can tsicá iñi ñi tyin tacan vaha jacahnú ñi tsi Nyoo. Tan nditsa tyin tumaa tsa vaha javahá ñi tyin jandundaahví ñi tsi ñi tan janyehé ñi tundoho cuñu ñuhu ñi. Maa tyin nduve náa catyí javahá ñi tacan, tyin ña cuví quinyaa can tsa caquiñi tsa tsicá iñi ñi.

3

¹ Tsaḥá Nyoo ñayívi nyito coo yo tyin nandotó ra Cristo, tan vityin nyaá ra xiin cuaha Nyoo nda gloria. Yacan cuenda nanducu ndo tsa vaha tsa tsahá ra tsi yo. ² Čača iñi ndo yacan, tan ña čača xaan iñi ndo tuhun tsa iyó nu ñuhu ñayívi ihya. ³ Tyin vityin ña javahá ca ndo tsa javahá ndo taḥan tsanaha, tyin tsa tsihí ndo iin caa ñi tsihin ra Cristo cuví can. Tan vityin iyó ndo iin caa ñi tsihin ra tsihin Nyoo. ⁴ Tan quívi cua quítsi nyico ra Cristo, ra tsa tsahá ñayívi nyito tsa iyó yo, tacan tan cua nyehe nyívi tyin maa ra cahnu ca cuví ra. Tan cua nyehe tucu ñi tsi nyooho iin caa ñi tsihin ra.

Nacaa tsicoo yo nu quítsi tsi ityi tsata tan nácaa cuñi tsi coo yo tsihin Nyoo vityin

⁵ Yacan cuenda jandíhi ndo tandíhi tsa ña vaha tan tsa caquiñi tsa cuñi cuñu ñuhu ndo. Tan ña cuxu ndo tsihin iin ñaha tun ñaha ca tindaha ndo, taḥan ñi rayíi tan ñaha. Tan ña cuñi ndo coo cuaha ndaha tyíñu ndo tyin tun tsicá iñi ndo yacan, tsitoho jacahnú ndo tan tyaá tsiyo ndo tsi Nyoo cuví can. Tyin tacan javahá nyívi tsa ña yihí tuhun Nyoo, maa tyin nyooho ña taahán tsi javaha ndo tacan. ⁶ Tsa cuenda tandíhi tsa caquiñi ihya cuxaán xaan Nyoo tsi nyívi tsa ña tyaá yahví tsa caahán ra. Tan cua tatsi tuñi ra tsi ñi. ⁷ Tan juvin ñi tacan javahá tucu maa yo quívi tsa ña nacotó yo tsi Nyoo. ⁸ Maa tyin vityin ña javaha ca ndo tandíhi tsa ña vaha can: ña cuxaan ca ndo. Ña xaan cuñi ndo nyehe ndo tsi nyívi taḥan ndo, tan ña jacuñi nyaá ndo tsi ñi, tan ña čahan ndo cuendu siquí ñi. Tan ña čahan ca ndo tsa ndavaha ñi. ⁹ Ña čahan taḥan ca ndo cuendu siquí iin ndo tan inga ndo. Tyin tsa nacoq ndo tandíhi tsa ña vaha tsa javahá ndo taḥan tsanaha. ¹⁰ Tyin vityin tsa nanduví yo nyívi tsa tan iyó yo ñayívi nyito. Tan ndutsaa ca yo tumaa caá Nyoo, ra javahá tsi yo, nda cuenda coto vaha ca yo tsi ra. ¹¹ Ña ñiñi tsa cuví yo nyívi Israel, o nyívi Grecia, o nyívi inga ñuu. Tan ña ñiñi tatun tyaá ñi tuñi Nyoo tsi yo, o ña tyaá ñi; a cuví yo iin nyívi catsi iñi, o cuví yo iin ñi soho; a iyó tsitoho yo, o yoñi ndacá ñaha tsi yo, ña ñiñi xaan ca tuhun can. Ñiñi ca tsa iin ñi cuví tandíhi yo tsihin

ra Cristo, tyin maa ra cuví tandíhi tan iyó ra tsihin tandíhi yo.

¹² Nyoo cuñi ra tsi yo tan nacatsí vaha ra tsi yo tyin cuví yo nyívi ra. Yacan cuenda coo ndo ñayívi nyito tumaa taahán tsi coo nyívi yihí cuenda ra; cundaahvi iñi ndo nyehe ndo tsi nyívi taḥan ndo; cuví ndo nyívi vaha tan ndaahvi jaḥa ndo tsi ndo nuu Nyoo; ndumasu ndo; cunyee iñi ndo nyehe ndo tandíhi tsihi tan tundoho tsihin tsa sii cuñi ndo. ¹³ Ña cundíhi iñi ndo tsihin nyívi taḥan ndo. Jaḥa ndo tucahnu iñi tsi ñi tatun náa javahá ñi tsi ndo. Tumaa ra Cristo jaḥa ra tucahnu iñi tsi maa ndo, tacan cuñi tsi javahá tucu maa ndo tsihin nyívi. ¹⁴ Tyin tsa cuñi taḥan yo tsi yo, yacan cuví tsa ñiñi ca cuñi tsi. Tyin yacan cuví tsa jandu iin tsi yo. ¹⁵ Tan cuhva ndo tsa cundaca ñaha tsa taxin Nyoo añima ndo, tan na jaquihin ityi tsi tsi ndo. Tyin tsa cuenda yacan, caná Nyoo tsi ndo tan jandu iin ra tsi ndo tsihin ra Cristo. Tan cuhva ndo tyahvi nyoo tsi Nyoo.

¹⁶ Tan na cutu añima ndo tsihin tuhun ra Cristo, tan jacuahá taḥan ndo tuhun ra tsi ndo. Tan jandu iin taḥan ndo iñi ndo tsihin tandíhi tsa tsíñi tuñi tsa tsahá Nyoo tsi ndo. Čata ndo yaa tan salmo. Tan čata ndo yaa tsa tsahá Tatyí Ii Nyoo tsi ndo tsihin tsa ñi iñi añima ndo. Tan tacan ñi načuhva ndo tyahvi nyoo tsi Nyoo. ¹⁷ Tatun náa tyíñu cua javaha ndo, o náa cua cahan ndo, javaha ndo can tsihin sivi Jutu Mañi yo Jesús. Tan juvin ñi cuhva can načuhva ndo tyahvi nyoo tsi Nyoo tsa cuenda maa ra Cristo.

Nu tsahá cuendar a Pablo nácaa nducú yo cuhva coo vaha yo tsihin nyívi

¹⁸ Nyooho tsa iyó yíi cuhva ndo tsa cundaca ñaha yíi ndo tsi ndo. Tacan taahán tsi coo ndo, tyin yihí ndo cuenda Jutu Mañi yo. ¹⁹ Tan nyooho rayíi, cuñi ndo tsi ñasihi ndo. Tan ña cundíhi iñi ndo nyehe ndo tsi ñi. ²⁰ Nyooho tsa nyihi tyaa yahví ndo tsi jutu ndo tan tsi sihi ndo, tyin sii xaan cuñi Jutu Mañi yo tun javahá ndo tacan. ²¹ Nyooho tsa cuví ndo jutu tan sihi, ña yaha xaan jacuxaan ndo tsi sehe ndo, tyin coto nducuihya xaan iñi tsi. ²² Tan nyooho tsa cuví musu, tyaa yahví ndo tsi ra yihí ndaha tsi ndo. Ñavin tsa nyehe ñi ra tsi ndo tan tyaa yahví ndo tsi ra naha, tan catyí ra naha tyin vaha xaan ndo. Tyaa yahví nyooho tsi ra naha tsihin tsa ñi iñi añima ndo vasu ña nyehe ra naha, tyin Nyoo nyehe ra. ²³ Tandíhi ñi tyíñu javahá ndo, javaha ndo can tsihin tsa sii cuñi ndo tumaa tsa jahá tyíñu ndo cuenda Jutu Mañi yo tan ñavin cuenda nyívi. ²⁴ Tyin tsitó ndo tyin maa Jutu Mañi yo ra Cristo cua cuhva ra tsa taahán tsi tsi ndo tyin maa ra cuví ra yihí ndaha tsi ndo tsa nditsa. ²⁵ Tan

tatun javahá ndo tsa ña vaha, Nyoo cua tatsi tuñi ra tsi ndo tsa cuenda tsa ña vaha tsa javahá ndo, tyin ña siin caá iin yo tan inga yo nuu Nyoo, tyin tandihi yo tan inducu ñi caá yo.

4

¹ Nyooho tsa iyó musu, cuñi tsi cuví ndo nyivi vaha tsihin musu ndo. Ndūcuhun iñi ndo tyin iyó ra yihí ndaha tucu tsi maa ndo nda gloria. Tan maa ra nyehé ra tsi ndo.

² Ndācan tahvi ndo tsihin tsa níi iñi ndo. Coo nyito ndo tan nacuhva ndo tyahvi nyoo tsi Nyoo tsa cuenda tandihi maa. ³ Ndācan tahvi ndo tsa cuenda ndi, tyin na nuña Jutu Mañi yo añima nyivi tan tyaa soho ñi tuhun xeehe ra Cristo tsa caahán ndi tsihin ñi. Tsaatyí tuhun ihya nyii yu vehe caa. ⁴ Ndācan tahvi ndo tsa cuenda yu na cuvi jacuaaha yu tsi nyivi cuhva cuvi cutuñi vaha iñi ñi tuhun ra Cristo, tumaa taahán maa tsi javahá yu.

⁵ Cuiti cōo ndo tsihin nyivi tsa ña yihí tuhun Nyoo, tyin tacan tan cuvi cahan ndo tuhun Nyoo tsihin ñi. ⁶ Tan maa ñi tuhun vaha cahan ndo tsihin ñi. Tan taahán tsi coto ndo nácaa cua nacahan ndo tatun nducu tuhun ñi náa nducu tuhun ñi tsi ndo.

Nu tsaá ra Pablo nacumi tsi nyivi yihí cuenda Nyoo ñuu Colosas

⁷ Ra Tiquico, ra yañi yo, ra jahá tyiñu tyiñu Jutu Mañi yo tsihin yu, cua nacatyí tuhun ra tsihin ndo nácaa iyó yu. ⁸ Yacan cuenda jaquitsí yu tsi ra nu yucú ndo na jandu iin ra iñi ndo tan catyi tuhun ra tsihin ndo nácaa yucú ndi. ⁹ Tan vatsí ndihí ra Onésimo, ra ñuu ndo, tsihin ra. Vaha xaan tsinú iñi ra tsi ra Cristo, tan cuñi xaan yo tsi ra. Cua catyi tuhun maa ra naha tsihin ndo tandihi tsa cuví nu nyii yu ihya.

¹⁰ Ra Aristarco, ra nyii tsihin yu vehe caa ihya, jaquitsí ra nacumi tsi ndo. Tan ra Marcos, tsatsin ra Bernabé, jaquitsí ra nacumi tsi ndo. Tan tsa jacoto yu tsi ndo tyin tun taa ra Marcos nu yucú ndo, vaha cahan ndo tsihin ra. ¹¹ Vatsí tucu nacumi tsi ndo jahá ra Jesús, ra tsa nañi tucu Justo. Tan tsitsi tsa tandihi ra Israel tsa yihí cuenda Nyoo, uñi taahan ñi ra ihya naha ra jahá tyiñu tyiñu Nyoo tsihin yu. Tan jandu iin xaan ra naha iñi yu. ¹² Vatsí tucu nacumi tsi ndo jahá ra Epafras, ra ñuu ndo. Musu ra Cristo cuví ra. Ña jandihí ra tsa tsicán tahvi ra tsi Nyoo tsa cuenda ndo na caca vaha ndo tsihin Nyoo. Tan coto vaha ca ndo nácaa taahán tsi javaha ndo tandihi cuhva cuñi ra. ¹³ Yuhu cuví tsandaa tyin ra Epafras tsicán tahvi xaan ra tsa cuenda ndo, tan tsa cuenda nyivi tsa yucú ñuu Laodicea tan ñuu Hierápolis. ¹⁴ Vatsí tucu nacumi tsi ndo jahá

ra Lucas, ra tsa cuví doctor tsa cuñi xaan yo, tan ra Demas tucu.

¹⁵ Cuhva ndo nacumi tsi ra yañi yo naha ra tan tsi ñi cuhva yo naha ñi tsa yucú ñuu Laodicea. Tan cuhva ndihí ndo nacumi tsi ña Ninfas tan tsi tandihi nyivi yihí cuenda Nyoo tsa ndu iin yuvehe ña. ¹⁶ Tatun ndihí cahvi ndo carta ihya, tan jacuhun ndo itsi tsi nyivi yihí cuenda Nyoo nda ñuu Laodicea na cahvi ndihí ñi itsi. Tan na cuhva ñi carta tsa jacuhun yu tsi ñi, cahvi ndo. ¹⁷ Cahan ndo tsihin ra Arquipo tan catyi ndo: “Javaha vaha tyiñu tsa tsaah Jutu Mañi yo tsi un tyin javaha un.”

¹⁸ Yuhu ra Pablo tyaa yu nacumi ihya tsi ndo. Na ña naa iñi ndo tyin nyii yu vehe caa tsa cuenda ra Cristo. Tan na nasoco Nyoo tsi ndo.

Tan na cuvi tsi tacan ñi.

Carta Tsa Jihna Ñi Jacuhun Ra Pablo Tsi Nyivi Yihí Cuenda Nyoo Ñuu Tesalónica

Nu tyaq ra Pablo tan ra cutahán tsihin ra iin carta cuenda nyivi yihí tuhun Nyoo

¹Yuhu ra Pablo ra Silvano tan ra Timoteo, jaquitsi ndi carta ihya tsi ndo tsa cuví ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan tsihin Jutu Mañi yo Jesucristo. Naquihin ndo tsa vaha tan tsa taxin tsa tsahá ra naha coo aña ndo.

Vaha xaan tsinú iñi nyivi Tesalónica tsi Nyoo

²Tandihí ñi quivi tsahá ndi tyahvi nyoo tsi Nyoo tsa cuenda tandihí ndo. Tan iin nyita ñi tsicán tahvi ndi tsi ra tsa cuenda ndo. ³Tan nducuhún iñi ndi tuhun ndo nuu Nyoo Jutu yo tyin ñi iñi ndo tsinú iñi ndo tsi ra tan jahá tyiñu ndo tyiñu ra. Tan iin nyita ñi jahá tyiñu ndo tsa cuenda tsa cuñi ndo tsi ra. Tan tsihin tsa ñi iñi ndo ndatú ndo tsa ñihi ndo tsa cua cuhva Jutu Mañi yo Jesucristo tsi ndo. ⁴Tyin tsitó ndi tyin Nyoo cuñi xaan ra tsi ndo, nyooho yañi, tan maa ra nacatsj vaha tsi ndo. ⁵Tyin quivi cahán ndi tuhun Nyoo, nácaa jacacú ra tsi yo, tsihin ndo, cahán ndi tuhun tsihin tunyee iñi Tatyí li Nyoo, tan tsitó vaha ndi tyin tuhun nditsa cuví tsi. Tan ñavin tuhun caahán ñi cuví tsi. Tan nyehé ndo nácaa tsicoo ndi quivi tsiyucú ndi tsihin ndo. Tsicoo ndi tacan tsa cuenda tsa vaha tsi maa ndo.

⁶Tan quitsahá iyó ndo cuhva iyó ndi, tan cuhva iyó Jutu Mañi yo. Tyin naquihñ cuenda ndo tuhun Nyoo, vasu cuaha tundoho nyehé ndo tsa cuenda tsi. Maa tyin sií xaan cuñi ndo tyin maa Tatyí li tsahá can tsi ndo. ⁷Tan tsa tacan iyó ndo, jatyinyee xaan ndo tsi tandihí nyivi yihí cuenda Nyoo tanñi cahnu Macedonia tan tanñi cahnu Acaya ihya, tyin nyehé ñi cuhva iyó ndo tsihin Nyoo. ⁸Ñavin Macedonia tan Acaya ñi, maa tyin tandihí ñi ityi nu tsinú nyivi tuhun ndo tsitó ñi tuhun Jutu Mañi yo tan tsitó ñi tyin tsinú xaan iñi ndo tsi Nyoo. Tan yacan cuenda nda cuanda ña ñiñi ca cuñi tsi cahan ndi tuhun Nyoo tsihin ñi. ⁹Tyin juven ñi maa ñi nacatyí tuhun tsihin ndi nácaa tsa vaha xaan naquihñ cuenda ndo tsi ndi. Nacatyí tuhun ndihí tucu ñi tsihin ndi nácaa jandihí ndo tsa jacahnú ndo tsitoho tan quitsahá jahá tyiñu ndo tyiñu Nyoo nyito. ¹⁰Tan nacatyí tuhun tucu ñi nácaa ndatú ndo quivi quitsi ra Jesús Sehe Nyoo inga tsaha tsa cua

quee ra andivi. Ra ican cuví ra tsa janandotó Nyoo. Tan maa ra cuví ra jacacú tsi yo tsa ña tatsi tuñi ca Nyoo tsi yo quivi cua tatsi tuñi ra tsi nyivi.

2

Tyiñu jahá ra Pablo ñuu Tesalónica

¹Nyooho yañi, tsitó ndo tyin ñavin tsa cuatu quitsj ndi cahan ndi tuhun Nyoo ñuu ndo. ²Tyin tsitó ndo nácaa nyehé ndi tundoho jahá nyivi ñuu Filipo tsa ndi cumañi ca tsaq ndi ñuu ndo. Tan vasu nyehé xaan ndi tundoho ñuu can, maa tyin quivi tsaq ndi ñuu ndo cahan ndi tuhun Nyoo tsihin ndo tsihin tsa ña yuuhví ndi. Tan vasu xaan xaan cuñi nyivi ñuu ndo, maa tyin jatyinyee xaan Nyoo tsi ndi tan ñi iñi ndi jacotó ndi tsi ndo cuhva jacacú ra tsi yo. ³Tyin tuhun tsa tsahá cuenda ndi tsi ndo maa ñi maa tsa nditsa cuví tsi. Tan nduve tsa caquiñi tsicá iñi ndi. Tan ndi ñavin tsa cuñi ndi jandavi ñaha ndi tsi ndo. ⁴Nduve tsa ña vaha cahan ndi, tyin Nyoo nyehé ra tsi ndi, tan maa ra tavá tyiñu tsi ndi tsa jacoto ndi tsi ndo nácaa jacacú ra tsi yo. Tan tacan caahán ndi tumaa tavá tyiñu maa ra tsi ndi. Tyin ña cuñi ndi tsa vaha cahan nyivi tuhun ndi, maa tyin cuñi ndi tsa vaha cahan Nyoo tuhun ndi, tyin maa ra nyehé ra cuhva iyó yo. ⁵Tan tsitó ndo tyin ndi iin tsaha tan ña cahan ndi tsihin tuhun tsa tyaqui xaan tsa cuñi ndi jandavi ñaha ndi tsi ndo. Tan ndi ñavin tsa cuñi ndi jaha canaa ndi xuhun tan cahan ndi tuhun Nyoo tsihin ndo. Maa Nyoo cuví tsandaa tyin nditsa tsa caahán ndi ihya. ⁶Tan ndi iin tsaha ña nducu ndi cuhva jacahnu nyivi tsi ndi, ndi nyooho, ndi inga ñi. Nditsa, iyó ndatu tsi ndi tsa jacahnu ndo tsi ndi tyin maa ra Cristo tavá tyiñu tsi ndi, maa tyin ña cuñi ndi tsa javaha ndo tacan tsihin ndi. ⁷Tan vita cahan ndi tsihin ndo. Tumaa iin ñaha iyó sehe jahá cuenda vaha ña sehe ña. Tacan cuñi ndi jatyinyee ndi tsi ndo. ⁸Cuñi xaan ndi tsi ndo, tan yacan cuenda ñavin tuhun Nyoo ñi cuñi ndi cuhva ndi tsi ndo, tyin cuñi ndi cuhva tucu ndi nda cuanda ñayivi iyó ndi tsa cuenda tsa cuñi ndi tsi ndo. ⁹Nyooho yañi, nducuhún iñi ndo nácaa jahá tyiñu ndi tan tsatsj ndi quivi tsiyucú ndi tsihin ndo. Jahá tyiñu ndi tsinu cahñi tan tsacuaa tyin ña cuñi ndi jatyañu ndi tsi ndo tsitsi tsa caahán ndi tuhun Nyoo tsihin ndo.

¹⁰Tan nyooho cuví ndo tsandaa, tan tacan tucu Nyoo, tyin maa ñi tsa vaha tan tsa ndaa javahá ndi quivi tsiyucú ndi tsihin ndo tsa cuví ndo nyivi tsinú iñi tsi ra Cristo. Maa tyin maa ñi maa cuhva cuñi Nyoo javahá ndi, tan yacan cuenda ña cuví cahan ndo tsi ndi. ¹¹Tan tsitó tucu ndo nácaa jandu iin ndi iñi intuhun intuhun ndo tsihin tuhun tsa

tsaha cuenda ndi tsi ndo. Tsaḥa ndi tunyee iñi tsi ndo tumaa iin rayii tsa iyó sehe tsahá ra tunyee iñi tsi sehe ra. ¹² Tan catyi ndi tsihin ndo, catsi coo ndo tumaa taahán tsi coo nyivi yihí cuenda Nyoo. Tyin maa Nyoo caa tsi ndo tyin coo ndo nu ndacá ñaha ra, tan nyehe ndo tsa cahnu cuví ra.

¹³ Yacan cuenda iin nyita ñi tsahá ndi tyahvi nyoo tsi Nyoo, tyin quivi tsiñi ndo tuhun ra tsa cahán ndi tsihin ndo, naquihín cuenda ndo tuhun can tyin nacoto ndo tyin tuhun Nyoo cuví tsi tan ñavin tuhun ra ñayivi cuví tsi. Tan nditsa tsa tuhun Nyoo cuví tsi, tyin quitsaha tsinú iñi ndo tsi Nyoo tan nasamā kuhva iyó ndo. ¹⁴ Yahá can tan nyehe tucu maa ndo tundoho jahá nyivi ñuu ndo. Tumaa tsa nyehe nyivi yihí cuenda ra Cristo Jesús ñuu tsa cayucú Judea. Tacan nyehe ñi can tundoho jahá nyivi Israel. ¹⁵ Tan ñi Israel can tsahñi ñi tsi Jutu Mañi yo Jesús tumaa tsahñi ñi tsi ra cuví ndusu yuhu Nyoo tahán tsanaha. Ñi Israel can tsinyaa ndaha ñi tsi ndi. Ñavin kuhva cuñi Nyoo iyó ñi. Tan xaan iñi ñi tsi tandihí maa nyivi. ¹⁶ Tatun cuñi ndi cahan ndi tuhun Nyoo tsihin nyivi tsa ñavin ñi Israel cuví na jacacu Nyoo tsi ñi, ña tsahá ñi Israel can cahan ndi. Tan tsa cuenda tsa tyasí ñi nu caahán ndi, nducuaha ca cuatyí ñi. Tan vityin nu ndihí tuhun tatsí tuñi xaan Nyoo tsi ñi.

Nu cahán ra Pablo tyin cuñi ra cunyehe ra nu yucú nyivi Tesalónica inga tsaha

¹⁷ Nyooḥo yañi, tsa yahá tsa quitá ndi ñuu ndo juhva quivi, vasu ndi maa ña nyehé ndi tsi ndo, maa tyin ñuhú xaan iñi ndi tsi ndo. Tan tsihin tsa ña iñi ndi cuñi ndi cunyehe ndi nu yucú ndo inga tsaha. ¹⁸ Tan nducu ndi kuhva quitsi ndi, maa tyin ña cuví. Yuhu ra Pablo, cuaha xaan tsaha nducu yu kuhva quitsi ndi, maa tyin tandihí ñi tsaha tsa cuñi ndi quitsi ndi, ña tsahá nu ña vaha. ¹⁹ Maa tyin ¿náa ndatú ndi? Tan ¿yóo cuenda cusii iñi ndi, tan vaha cuñi ndi? ¿A ñavin tsa cuenda maa ndo cua cusii xaan iñi ndi nuu Jutu Mañi yo Jesucristo quivi quitsi ra inga tsaha? ²⁰ Tyin tsa cuenda tsa vaha cuahán ndo tsihin Nyoo tan nyehé yo tyin ña cuatu jahá tyiñu ndi. Tan sii xaan cuñi ndi tsa cuenda yacan.

3

¹ Tan ña cunyeé ca iñi ndi tsa cuñi ndi coto ndi nácaa cuahán tsinú iñi ndo tsi Nyoo. Tan tyaá ndi kuhva tsa ndoo intuhun ñi maa yu ñuu Atenas. ² Tan jaquitsj yu tsi ra Timoteo yañi yo, na quitsi nyehe ra nu yucú ndo. Ra ican cuví musu Nyoo tyin inducu ñi jahá tyiñu ra tsihin ndi caahán ra tuhun Nyoo nácaa jacacú ra Cristo tsi yo. Jaquitsj ndi tsi ra nu yucú ndo na jandu iin ca ra iñi ndo tan kuhva ca ra tunyee iñi tsi ndo na tsinú ca iñi

ndo tsi Nyoo. ³ Tyin tacan tan ndi intuhun ndo tan ña ndu uvi iñi ndo tsihin tsa nyehé ndo tundoho. Tyin nyooḥo tsitó ndo tyin nyaá tsa nyehe yo tundoho. ⁴ Tyin nda ndi yucú ca maa ndi tsihin ndo, tan cahán ndi tsihin ndo tyin nyaá cua nyehe yo tundoho. Tan tsitó vaha maa ndo tyin tacan cuví. ⁵ Ña cunyeé ca iñi yu tsa cuñi yu coto yu nácaa yucú ndo. Yacan cuenda jaquitsj yu tsi ra Timoteo na nyehe ra tun vaha tsinú iñi ndo tsi Nyoo. Tyin yuuhvi yu coto jandavi ñaha nu ña vaha tsi ndo tan javaha nyico ndo tsa ña vaha. Tun tacan cua cuví, tsa cuatu ñi jahá tyiñu ndi nu yucú ndo.

⁶ Maa tyin vityin tsa tsag nuhu ra Timoteo tsa quitsj ra nu yucú ndo. Tan nacatyí tuhun ra tsihin ndi tyin ñi xaan iñi ndo tsinú iñi ndo tsi Nyoo. Tan cuñi tahan xaan ndo tsi ndo. Tan catyi ra tyin ñuhú xaan iñi ndo tsi ndi tan cuñi xaan ndo nyehe ndo tsi ndi; tumaa tsa cuñi tucu maa ndi nyehe ndi tsi ndo. ⁷ Yacan cuenda, nyooḥo yañi, vasu ndi maa cuaha tsa taahán ndi tan cuaha tundoho nyehé ndi, maa tyin vaha xaan cuñi ndi tsa tsitó ndi tyin nyooḥo vaha tsinú iñi ndo tsi Nyoo tan ña nacoó ndo tsi ra. ⁸ Tyin tumaa tsa ndutsaa ñayivi iyó ndi cuñi ndi tsa tsitó ndi tyin nyooḥo vaha tsinú iñi ndo tsi Nyoo. ⁹ Ndi ña ñihí ca ndi kuhva kuhva ndi tyahvi nyoo tsi Nyoo tsa cuenda ndo. Tyin sii xaan cuñi ndi nuu Nyoo tsa cuenda tyin vaha cuahán ndo tsihin ra. ¹⁰ Tsiacán tahvi xaan ndi tsi Nyoo tsinu cahñi tan tsacuaa, tyin cuñi xaan ndi quitsi nyehe ndi tsi ndo. Tacan tan cuví jandu iin vaha ndi iñi ndo tan tsinú vaha ca iñi ndo tsi ra, tan ña cumañi ca tsa cumañi tsi ndo tsihin kuhva tsinú iñi ndo tsi ra.

¹¹ Tan vityin ndatú ndi tunyee iñi Nyoo Jutu yo tan Jutu Mañi yo Jesucristo, maa ra naha cua jatyinyee tan cuví quitsi ndi nu yucú ndo. ¹² Tan na jatyinyee ca Jutu Mañi yo Jesucristo tsi ndo na cuahnu ca ndo tsihin tuhun ra, tyin tacan tan cuñi tahan ca ndo tsi ndo tan cuñi tucu ndo tsi tandihí ca nyivi tumaa tsa cuñi maa ndi tsi ndo. ¹³ Tyin tacan tan cuñi coo ndo tsihin ra tyin tsa yahá janduvahá ra añima ndo. Tan ña cua coo ca cuatyí ndo nuu Nyoo Jutu yo quivi quitsi Jutu Mañi yo Jesucristo tsihin tandihí nyivi yihí cuenda ra.

4

Nacaa taahán iñi Nyoo coo yo

¹ Vityin nyooḥo yañi, tsihin sivi ra Jesús caahán ndaahvi xaan ndi tsihin ndo tan tsiacán ndi tsi ndo tsa ña jandihí ndo tsa iyó ndo tumaa tsa janahá ndi tsi ndo. Jañihí ca ndo nducu ndo kuhva coo vaha ndo nuu Nyoo tumaa taahán iñi maa ra.

²Tyin nyooho tsa tsitó maa ndo nácaa tava tyiñu ndi tsi ndo tumaa tava tyiñu maa Jutu Mañi yo Jesús tsi ndi. ³Tyin tsa taahán iñi ra javaha yo yacan cuví tsa cuita iñi yo tsi intuhun ñi maa ra, tan nducu yo cuhva nduvaha añima yo nuu ra. Tan nyooho, rayii, ña coo ndo tsihin ñaha tun ñavin ñasihi ndo cuví ña, tan ñiñaha na ña coo ñi tsihin rayii tun ñavin yii ñi cuví ra. ⁴Tan nyooho yañi, intuhun intuhun ndo cuñi tsi coto ndo nácaa coo vaha ndo tsihin ñasihi ndo. Iin ñi maa ña cuñi ndo tan jaha ndo tsa ñayivi tsi ña tan ña nducu ndo inga ñaha. ⁵Ña caca caquiñi iñi ndo nyehe ndo tsi ñasihi ndo, ña javaha ndo tumaa javahá nyivi ña yihí tuhun Nyoo. ⁶Ndi intuhun ndo tan ña jandavi ñaha ndo tsi inga ca rayii tan coo ndo tsihin ñasihi ra naha. Tyin tun javaha ndo tacan, ñihi xaan cua tatsi tuñi Jutu Mañi yo tsi ndo, tumaa tsa cahan ndi tsihin ndo. ⁷Tyin Nyoo cana ra tsi yo tsa coo yo cuhva cuñi maa ra, tan ña javaha yo tsa caquiñi. ⁸Yacan cuenda nyivi ña cuñi tyaa soho tuhun caahán ndi, ñavin tuhun caahán ndi ña naquihin ñi, tyin ña naquihin ñi tuhun caahán Nyoo ra tsa tsahá Tatyí lí ra tsi yo. ⁹Maa tyin tuhun tsa cuñi tahan yo tsi yo ña tsiñi ñuhu tsa tyaa yu itsi nu carta ihya. Tyin tsa janaha maa Nyoo tsi yo nácaa taahán tsi cuñi tahan yo tsi yo. ¹⁰Tan nyooho tsa tsitó maa ndo tuhun can tyin cuñi ndo tsi tandihi nyivi yihí tuhun Nyoo tsa iyó Macedonia nu iyó ndo. Maa tyin caahán ndaahvi yu tsihin ndo, yañi, tyin na jañihi ca ndo cuñi tahan ndo tsi ndo tsa intuhun intuhun quivi. ¹¹Nducu ndo cuhva coo taxin ndo. Tan ña tyihí ndo tsi ndo nu ña taahán tsi quihvi ndo. Jaha tyiñu ndo iin ñi tyiñu maa ndo. Tan jaha tyiñu ndo tsihin ndaha ndo tumaa cahan ndi tsihin ndo quivi can. ¹²Tacan javaha ndo tyin tacan tan nyivi ña nacotó tsi Nyoo cua jaha ñi tsa ñayivi tsi ndo. Tan ña cua cumañi tsa cumañi tsi ndo.

Nacaa cua cuví quivi quitsi Jutu Mañi yo Jesús inga tsaha

¹³Nyooho yañi, cuñi ndi tsa coto ndo nácaa taahán nyivi tsa tsa tsihi, tyin tacan tan ña nducuihya iñi ndo tumaa cuihya cuñi nyivi ña cua nandoto tsa ña cua coo tsihin Nyoo. ¹⁴Tumaa tsa tsinú iñi yo tyin tsihi ra Jesús tan nandoto ra, tacan tsinú tucu iñi yo tyin Nyoo cua janandoto ra tsi nyivi tsinú iñi tsi ra tun tsa tsihi ñi.

¹⁵Yacan cuenda catyí ndi tsihin ndo tumaa jacuaha Jutu Mañi yo tsi ndi, tyin yoo tsa nyito nda quivi quitsi ra, ña jihna ca yo cua cuhun tan nacoo yo tsi nyivi tsa tsihi. ¹⁶Tyin juven ñi maa Jutu Mañi yo cua nuu, tan cua cana tsaa ra tyin maa ra ndacá ñaha. Tan cua cana tsaa ra cuví ityi nuu tsihin ángel. Tan cua navacu trompeta

Nyoo. Tacan tan nyivi tsa tsinú iñi tsi ra Cristo tan tsihi ñi, jihna ca ñi cua nandoto. ¹⁷Yaha can tan yoo tsa ndi nyito cua ndaa yo iin caa ñi tsihin ñi nu vico, nu cua ñihi tahan yo tsihin Jutu Mañi yo. Tacan tan cua coo cuivi yo tsihin ra. ¹⁸Yacan cuenda jandu iin tahan ndo iñi ndo tsihin tuhun ihya.

5

¹Nyooho yañi, ña ñiñi cuñi tsi jacoto yu tsi ndo ama cua cuví tandihi tsa tsa yaha cahan yu tuhun tsihin ndo. ²Tyin tsa tsitó maa ndo tyin ña cua coto yo náa cuhva, náa quivi cua quitsi Jutu Mañi yo. Tyin sana iñi yo cua quitsi ra tumaa sana iñi yo quihvi ñasuhu yuvehe yo tsa tsacuaa tacan cua cuví. ³Tyin quivi tsa catyí nyivi tyin taxin ñi caa, tan nduve maa tsa yuuhvi ñi, tacan tan sana iñi ñi tan cua quitsi tundoho siqui ñi. Tumaa iin ñaha ñuhú sehe, sana iñi ña tan quitsahá cuuhvi tsitsi ña. Tan tacan cua tahan nyivi quivi quitsi Jutu Mañi yo, tyin ña cua cuví ca cunu xeehe ñi. ⁴Maa tyin nyooho yañi, quivi quitsi Jutu Mañi yo ña cua tahan ndo tumaa taahán nyivi, tun sana iñi ñi tan quihvi ñasuhu yuvehe ñi tyin nyooho ñavin ca nu naa iyó ndo. ⁵Tyin tandihi yo tsitó yo nácaa taahán tsi coo yo tyin jandunditsín Nyoo añima yo, tan ña iyó ca yo nu naa tumaa iyó nyivi ña nacotó tsi Nyoo. ⁶Yacan cuenda catsi coo ndo cponyito ndo tan ña cusu ndo tumaa iyó nyivi ña nacotó tsi Nyoo, tyin ñi ican ña tyaa yahvi ñi tsa cua quitsi Jutu Mañi yo inga tsaha. ⁷Tyin nyivi quixí, quixí ñi tsacuaa, tan nyivi tuhva tsihi nyixi, tsiñi ñi tsacuaa. ⁸Maa tyin yoo tsa cuví yo nyivi iyó tsinu cahñi, na catsi coo yo. Tumaa iyó iin andaru tyin iin andaru jahá cuenda ra tsi ra tsihin iin caa tsa yihí yiqui nyica ra, tacan taahán tsi jaha yo cuenda tsi yo tsihin tsa tsinú iñi yo tsi Nyoo, tan tsihin tsa cuñi yo tsi tandihi nyivi. Tan na jaha tucu yo cuenda tsi yo tumaa jahá cuenda andaru jiñi ra tsihin iin caa, tacan taahán tsi cuita iñi yo tyin cua cacu yo. ⁹Tyin Nyoo ña nacatsj ra tsi yo tsa tatsi tuñi ra tsi yo, nacatsj ra tsi yo tyin jacacu Jutu Mañi yo Jesucristo tsi yo jaha ra. ¹⁰Tyin ra Jesucristo tsihi ra tsa cuenda yo tyin tacan tan coo yo iin caa ñi tsihin ra. Yoñi jaha vasu tsa tsihi yo, a nyito yo, maa tyin tandihi yo cua coo yo iin caa ñi tsihin ra. ¹¹Yacan cuenda jandu iin ndo iñi nyivi yihí tuhun Nyoo tsihin ndo tan cuhva tahan ndo tunyee iñi tsi ndo, tumaa javahá ndo nda vityin.

Nu tsaha cuenda ra Pablo tsi nyivi yihí cuenda Nyoo

¹²Nyooho yañi, caahán ndaahvi xaan ndi tsihin ndo, jaha ndo tsa ñayivi tsi ra jahá tyiñu, ra cuví ityi nuu nu yucú ndo. Tan tsahá cuenda ra naha cuhva coo ndo tyin

tyiñu Jutu Mañi yo javahá ra naha. ¹³ Cuñí tsi tsa jaha xaan ndo tsa ñayivi tsi ra naha. Tan cuñi ndo tsi ra naha. Tyin tyiñu Jutu Mañi yo javahá ra naha. Tan ña cañi tahan ndo.

¹⁴ Tavá tucu ndi tyiñu tsi ndo yañi, jachahan ndo tsi nyivi ña cuñi jaha tyiñu. Tan jandu iin ndo iñi nyivi tsa ndu uvi xaan iñi. Tan jatyinyee ndo tsi nyivi ña ñihi vaha cuahan tsihin Nyoo, ñi tsa ñaha ca tsinu vaha iñi tsi ra. Tan ña cundihi iñi ndo tsihin nyivi.

¹⁵ Jaha ndo cuenda coto javaha ndo tsa ndavaha ñi tsihin nyivi javahá tsa ña vaha tsihin ndo. Nducu ndo cuhva javaha ndo tsa vaha tsihin nyivi yihí tuhun Nyoo tsihin ndo tan tsihin tandihi ca nyivi.

¹⁶ Cusihi iñi ndo tandihi ñi quivi. ¹⁷ Tan ña jandihi ndo tsa tsicán tahvi ndo tsi Nyoo. ¹⁸ Cuhva ndo tyahvi nyoo tsi Nyoo vasu ndi maa nyehé ndo tundoho. Tyin tacan cuñi maa Nyoo javaha yo tsa cuvi yo nyivi tsinú iñi tsi ra Cristo Jesús.

¹⁹ Ña ndahva ndo ñuhu Tatyí Ii Nyoo tsa iyó añima ndo. ²⁰ Ña vacu nducu ndo tsa caahán ra cuvi ndusu yuhu Nyoo. ²¹ Nyehe jihna ndo tun tandihi tsa caahán ra tan vaha tsi tumaa tsa taahán tsi nyehe ndo tandihi inga ca tuhun. Tan naquihin ndo tsa vaha. ²² Ña tyihi ndo tsi ndo nu iyó tsa ña vaha.

²³ Tan maa Nyoo, ra tsahá tsa taxin coo añima yo, na janduvaha ca ra tsi ndo tan cuhva cuenda vaha ca ndo tsi ndo tsi ra. Tan na jaha cuenda ra añima ndo tan tsihin tsa tsiñi tuñi iñi ndo tan tsihin tsa tsicá iñi ndo tan tsihin cuñu ñuhu ndo tyin tacan tan ña coo ca cuatyí ndo quivi quitsi Jutu Mañi yo Jesucristo inga tsaha. ²⁴ Ra tsa cana tsi yo, cuvi cuita iñi yo tsi ra, tyin maa ra cua javaha tandihi maa tsa caahán yu ihya.

Nu ndihi cahqn ra Pablo tan tsaha ra nacumi tsi nyivi

²⁵ Yañi, ndacan tahvi ndo tsa cuenda ndi.

²⁶ Tan cuhva ndo nacumi tsi tandihi nyivi yihí cuenda Nyoo.

²⁷ Tavá tyiñu yu tsi ndo tsihin sivi Jutu Mañi yo na cahvi ndo carta ihya nuu tandihi nyivi tsa yihí cuenda Nyoo.

²⁸ Tan maa Jutu Mañi yo Jesucristo nasoco tsi ndo.

Tan na cuvi tsi tacan ñi.

Carta Tsinú Uvi Tsa Jacuhun Ra Pablo Tsi Nyivi Yihí Cuenda Nyoo ñuu Tesalónica

Nu tyaq ra Pablo, tan ra cutahán tsihin ra, tsa tsinu uvi carta tsa cuenda nyivi yihí tuhun Nyoo ñuu Tesalónica

¹ Yuhu ra Pablo, ra Silvano tan ra Timoteo jaquitsi ndi carta ihya tsi ndo tsa cuvi ndo nyivi yihí cuenda Nyoo ñuu Tesalónica. Tyin iin caa ñi iyó ndo tsihin Nyoo Jutu yo tan Jutu Mañi yo Jesucristo. ² Naquihin ndo tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima ndo.

Nu cahan ra Pablo nácaa cua tatsi tuñi Nyoo tsi nyivi iyó cuatyi quivi quitsi ra Cristo

³ Nyooho yañi, cuñi tsi tsa nacuhva ndi tyahvi nyoo tsi Nyoo tsa cuenda ndo tandihí ñi quivi, tyin tacan taahán maa tsi javahá ndi tyin ñihi xaan cuahán tsinú iñi ndo tsi Nyoo tsa iin iin quivi, tan cuñi xaan ndo tsi nyivi yihí tuhun Nyoo tsihin ndo. ⁴ Yacan cuenda sii xaan cuñi ndi caahán ndi tuhun ndo tsihin nyivi yihí cuenda Nyoo inga ca vehe ñuhu. Tyin nyooho cunye xaan iñi ndo nyicún ndo tsi Nyoo tan vaha xaan tsinú iñi ndo tsi ra vasu ndi maa nyehé xaan ndo tundoho jahá nyivi. ⁵ Tandihí yacan janahá tyin Nyoo cuiti xaan jacutuñi ra tyin cua catyi ra tyin taahán maa tsi cahun nyooho tsa nyehé xaan tundoho nu ndacá ñaha ra tyin tsa cuenda ra nyehé xaan ndo tundoho.

⁶ Tan tsa cuenda maa Nyoo, taahán tsi janyehé ra tundoho tsi nyivi tsa janyehé xaan tundoho tsi ndo. ⁷ Tan nyooho tsa nyehé xaan tundoho jahá nyivi, cua cuhva ra quitatu ndo iin caa ñi tsihin ndi quivi cua quitsi nyico Jutu Mañi yo Jesucristo tsa quee ra andivi tsihin ñuhu tan tsihin ángel tsa iyó tunyee iñi maa ra. ⁸ Tyin tatsi tuñi ra tsi nyivi tsa ña nacotó tsi Nyoo, ñi tsa ña tyaá yahvi tuhun tsa jacacú ra tsi yo. ⁹ Ñi ican cua janyehé Nyoo tundoho tan ña cua cundihi maa tsa nyehé ñi tundoho, ña cua nyehé ñi tsi Jutu Mañi yo Jesucristo tan ña cua nyehé ñi tsa cahun cuvi ra tsihin tunyee iñi tsa iyó tsi ra ¹⁰ quivi cua quitsi ra. Tyin quivi can nyivi yihí cuenda ra, ñi tsinú iñi tsi ra, cua jacahnu ñi tsi ra. Tan iyo xaan cua cuñi ñi nyehé ñi tsi ra. Tan tyañu nyivi can, cua cuyucu tucu nyooho tyin tsinú iñi ndo tuhun tsa cahan ndi tsihin ndo.

¹¹ Yacan cuenda tsicán tahvi ndi tsi Nyoo tsa cuenda ndo tandihí ñi quivi, na jatyinyee ra tsi ndo. Tacan tan catyi ra tyin taahán tsi tsi ndo tsa cuvi ndo nyivi cana maa ra.

Tan tsicán tahvi tucu ndi tsi ra na jatyinyee ra tsi ndo tan cuvi javaha ndo tsa vaha tsa cuñi ndo javaha ndo. Tan na quita vaha tandihí tyiñu ra tsa javahá ndo tsihin tunyee iñi tsahá ra tsi ndo tyin tsinú iñi ndo tsi ra. ¹² Tacan tan cua jacahnu nyivi sivi Jutu Mañi yo Jesucristo, tyin nyehé ñi cuhva iyó ndo. Tan cua jacahnu tucu maa ra tsi ndo nuu nyivi tsa cuenda tumañi iñi tsa tsahá ra tsi yo jahá Nyoo.

2

Ra tsa nduve ley Nyoo iyó añima

¹ Nyooho yañi, vityin cuñi yu cahan yu tsihin ndo tsa cuenda quivi quitsi nyico Jutu Mañi yo Jesucristo tan ndu iin yo tsihin ra. Caahán ndaahvi xaan ndi tsihin ndo, ² ña numi xaan sama ndo cuhva tsicá iñi ndo. Tan ña nayuhvi ndo tatun quita tuhun jahá tatyí ña vaha tyin tsa tahán tsi quivi quitsi Jutu Mañi yo; vasu ndi maa nyivi caahán can, a jaquitsi ñi carta tsi ndo tan catyi ñi tyin yuhu jaquitsi carta can tsi ndo. Ña tsinu iñi ndo tandihí yacan. ³ Ndi iin tsaha tan ña cuhva ndo jandavi ñaha nyivi tsi ndo. Tyin tsa ndi cumañi ca tahan tsi quivi quitsi Jutu Mañi yo, cuaha xaan nyivi, xaan cua cuñi ñi nyehé ñi tuhun Nyoo, tan cua quituvi rayii tsa nduve ley Nyoo iyó añima, ra tsa nyaá maa cahun anyaya. ⁴ Ra ican cuvi ra xaan iñi tsi Nyoo. Cua cañi tahan ra tsihin tandihí tsa nyisó sivi Nyoo; tan cua cañi tahan ra tsihin tandihí tsa jacahnú tsi Nyoo. Tan nda cuanda tsitsi vehe ñuhu cahnu Nyoo tan cua cunyaa ra tan cua cundaca ñaha ra, cua jahá ra tyin Nyoo cuvi ra.

⁵ ¿A ña nducuhún iñi ndo tyin nda ndi nyii ca yu tsihin ndo tan cahan yu tuhun ihya tsihin ndo? ⁶ Maa tyin nyooho tsitó ndo náa tsa tyasí tan ñaha ca quituvi ra. Nda tahan maa tsi quituvi ra tan cua quituvi ra. ⁷ Vityin tsa iyó tatyí tsa ña tsahá tyaá yahvi nyivi tsi Nyoo, maa tyin ndi nyii xeehe nu, tyin iyó iin ra tsa ña tsahá quituvi nu. Maa tyin quivi cua quita ra tan cundihi tsa tyasí ra, tacan tan cua quituvi nu. ⁸ Tacan tan cua quituvi ra tsa nduve ley Nyoo iyó añima, maa tyin Jutu Mañi yo Jesús cua cañi ra tsi ra tsihin tuhun quitá yuhu ra tan cua janaa ra tsi ra tsihin tsa xiñu tsa cahun cuvi ra quivi quitsi ra inga tsaha. ⁹ Ra ña vaha can, nu ña vaha cua jaquitsi tsi ra. Tan cua cuhva nu tandihí tsa nyiyi nu, coo tsi ra, tan tsihin seña tan tsa iyo cua javaha ra cua jandavi ñaha ra tsi nyivi. ¹⁰ Cua cuatyiñu ra tandihí nuu tsa ña vaha tan tsihin yacan cua jandavi ñaha ra tsi nyivi tsa ña cua cacu. Tyin ñi can ña cuñi ñi naquihin cuenda ñi tuhun Nyoo tsa nditsa tan cacu ñi. ¹¹ Tan yacan cuenda cua cuhva Nyoo ndatu tsa jandavi ñaha tatyí ña vaha can tsi ñi. Tan cua tsinu iñi ñi tsa

ña nditsa. ¹² Tacan tan cua tatsi tuñi ra tsi tandihi ñi tyin ña cuñi ñi tsinu iñi ñi tuhun nditsa. Tyin taahán ca iñi ñi javahá ñi tsa ña vaha.

Nu cahán ra Pablo tuhun nyivi tsa nacatsi Nyoo tyin cacu ñi

¹³ Maa tyin tandihi quivi cuñi tsi cuhva ndi tyahvi nyoo tsi Nyoo tsa cuenda nyooho yañi. Tyin cuñi xaan Jutu Mañi yo tsi ndo. Tan nacatsi ra tsi ndo nda jihna, [nda ndi cumañi ca tsinu ñuhu ñayivi], tyin tsihin tsa janduvahá Tatyí li ra añima ndo tan tsihin tsa tsinú iñi ndo tuhun nditsa cuvi cacu ndo. ¹⁴ Yacan cuenda caná Nyoo tsi ndo quivi tsa cahán ndi tuhun ra tsihin ndo tyin tacan tan ñihi ndo tsa cahnu cuvi Jutu Mañi yo Jesucristo coo tsi ndo.

¹⁵ Yacan cuenda nyooho yañi, jandu iin ndo iñi ndo. Tan ña naa iñi ndo tandihi tsa tsahá cuenda ndi tsi ndo tan jacuahá ndi tsi ndo nda ndi yucú ca maa ndi tsihin ndo. Tan ña ña iñi ndo tandihi tuhun tsa tyaa ndi nu carta tsa jaquitsj ndi tsi ndo. ¹⁶ Jutu Mañi yo Jesucristo tan Nyoo Jutu yo, juven ra cuñi tsi yo; tan tsahá ra tunyee iñi tsi yo tandihi tyembu, tan tsahá ra naha tsa cuita iñi yo coo yo tsihin ra. Tandihi yacan tsahá ra tsi yo quivi tsahá ra tsa vaha tsa iyó tsi ra tsi yo. ¹⁷ Na cuhva ra tsa sii cuñi añima ndo. Tan jandu iin ra iñi ndo, tacan tan cua cahán ndo tan javaha ndo tandihi tsa vaha.

3

Nu tsicán ra Pablo na ndacan tahvi nyivi tsi Nyoo tsa cuenda ra naha

¹ Tan inga tuhun, nyooho yañi, ndacan tahvi ndo tsa cuenda ndi tyin tacan tan numi ñi cua tsa tuhun Jutu Mañi yo tandihi ñi ityi. Tan na tyaa yahvi nyivi tuhun ra tan naquihin cuenda ñi itsi tumaa tsa naquihin cuenda maa ndo itsi. ² Ndacan tahvi tucu ndo na jacacu Nyoo tsi ndi ndaha nyivi ña vaha. Tyin ña tandihi ñi tan tsinú iñi ñi tsi Jutu Mañi yo. ³ Maa tyin Jutu Mañi yo javahá ra tsa catyi ra tyin javaha ra. Tan maa ra cua jandu iin iñi ndo, tan cua jaha cuenda ra tsi ndo tyin tacan tan ña tñin nu ña vaha tsi ndo. ⁴ Tan nditá xaan iñi ndi tsi Jutu Mañi yo tyin tsitó ndi tyin jatynyee ra tsi ndo tan javahá ndo tsa catyi ndi tyin javaha ndo. Tan tsitó tucu ndi tyin ña cua jandihí ndo tsa javaha ndo tacan. ⁵ Tan na jatynyee ca Jutu Mañi yo tsi ndo tan cuñi ca ndo tsi nyivi tumaa tsa cuñi maa Nyoo tsi yo tsihin ñi, tan cunyee ca iñi ndo nyehé ndo tundoho, tumaa tsa cunyee iñi maa ra Cristo nyehé ra tundoho.

Taahán tsi tsa jaha tyiñu yo

⁶ Tan vityin nyooho yañi caahán ndi tsihin ndo tsihin sivi Jutu Mañi yo Jesucristo, ña cunyaa naa ndo tsi ra yañi yo tsa ña cuñi jaha tyiñu, tan ña cuñi ra coo ra tumaa

jacuahá ndi tsi ndo. ⁷ Tyin tsitó maa ndo nácaa taahán tsi coo ndo tumaa tsicoo maa ndi tsa tsiyucú ndi tsihin ndo. Tyin nyuhu ña tsicá nuu utsan ndi tyin jahá tyiñu ndi. ⁸ Tan tandihi tsa tsatsj ndi, maa ñi maa tyahvi ndi tsi ndo. Tyin jahá tyiñu ndi tsinu cahñi tan tsacuaa tyin ña cuñi ndi tsa coso tundoho can siqui ndi intuhun ndo. ⁹ Vasu ndi maa iyó ndatu tsi ndi tsa ndacan ndi tsa jatynyee ndo tsi ndi, maa tyin nyuhu jahá tyiñu ndi tyin cuñi ndi janaha ndi nácaa taahán tsi coo ndo. ¹⁰ Tyin quivi tsiyucú ndi tsihin ndo, cahán ndi tsihin ndo tyin nyivi ña cuñi jaha tyiñu, na ña catsi ñi. ¹¹ Caahán ndi yacan tyin ñihí tuhun ndi tyin yihi ndo tsicá nuu ñi maa ndo tan tyihí ndo tsi ndo nu ña taahán tsi quihvi ndo tan ña jahá tyiñu ndo. ¹² Nyooho tsa iyó tacan, tavá tyiñu ndi tsi ndo tsihin ndusu yuhu Jutu Mañi yo Jesucristo, jahá tyiñu ndo, tan coo tsa catsi ndo.

¹³ Nyooho yañi, ña cundihí iñi ndo javaha ndo tsa vaha. ¹⁴ Tatun iyó iin ra ña cuñi tyaa yahvi tuhun caahán ndi nu carta ihya, jaha ndo cuenda ndáa ra cuvi ra, tan ña cunyanaa ndo tsi ra na nducahan nuu ra. ¹⁵ Maa tyin ña cuxaan iñi ndo tsi ra. Cuhva cuenda ndo tsi ra tyin yañi yo tsi ra.

Nu ndihí cahán ra Pablo

¹⁶ Jutu Mañi yo ra iyó tsa vaha tsi, juven ñi maa ra cuhva tsa vaha coo añima ndo tandihi ñi quivi tan tandihi ñi tsaha vasu ndi maa nyehé ndo tundoho. Tan Nyoo ndoo tsihin tandihi ndo. ¹⁷ Yuhu ra Pablo tyaá yu nacumi tsi ndo nu tutu ihya tsihin ndaha yu, tan tsihin letra yu. Tyehen tyihí yu firma yu tandihi carta yu. Tan tyehen tyaá yu. ¹⁸ Tan na nasoco Jutu Mañi yo Jesucristo tsi tandihi ndo.

Tan na cuvi tsi tacan ñi.

Carta Tsa Jihna Ñi Tsa Jacuhun Ra Pablo Tsi Ra Timoteo

Nu tyaa ra Pablo iin carta tsa cuenda ra Timoteo

¹ Yuhu ra Pablo cuví yu iin ra tava tyiñu ra Jesucristo, tyin Nyoo catyí tyin caca yu tyiñu ra. Maa ra cuví ra tsa jacacú tsi yo. Tan ra Cristo cuví ra tsa nyitá iñi yo. ² Tyaá yu carta ihya tsa cuenda un, yooho Timoteo, tyin sehe yu cuví tsi un tsa cuenda tsa natsinu iñi un tuhun ra Cristo tsa jacoto yu tsi un. Naquihin tsa vaha tan tsa taxin tsa tsahá Nyoo Jutu yu tan Jutu Mañi yo Jesucristo coo añima un. Tan na nyehe ndaahvi ra tsi un.

Nu tsaha cuenda ra Pablo tyin jaha cuenda yo tsi yo tan ña cunyicun yo tsa ña nditsa

³ Quivi quita yu ñuu Éfeso tan vatsi yu Macedonia nu nyii yu ihya, tava tyiñu yu tsi un tsa ndoo un ñuu Éfeso tyin cahan un tsihin nyivi jacuahá inga ca tuhun. Catyí yu tsihin un tyin catyí un tsihin ñi na ña jacuaa ñi tsa ña nditsa. Tan vityin juven ñi tacan caahán nyico yu tsihin un. ⁴ Cahan tsihin ñi na ña tyaa iñi ñi cuendu, na ña tyaa iñi ñi tuhun nyivi tsicoo tahañ tsanaha. Tyin tun, maa ñi yacan tyaá iñi ñi maa cua cahan yuhu tahañ ñi ñi. Tan ña cua jatyinyeé can tsi ñi tan quita vaha tyiñu tsa tsahá Nyoo tsi ñi. Tyin tyiñu can tsihin tsa tsinu iñi yo tan cuví quita vaha tsi.

⁵ Tatun javahá yo tsa tava tyiñu Nyoo tsi yo tyin javaha yo, cua cuñi tahañ yo tsi yo, tsihin tsa ñi iñi añima yo tsa janduvaha Nyoo. Cua cuñi yo tsi ñi tsihin tsa vaha caca iñi yo tan tsihin tsa nditsa tsinu iñi yo tsi Nyoo. ⁶ Maa tyin yihí nyivi nacoq ihñi ñi yacan, tan tsinaa ñi jahá tsa caahán yuhu tahañ ñi. ⁷ Cuñi ñi cuví ñi maestro cuenda ley tsahnu, maa tyin ndi maa ñi tan ña cutuñi iñi ñi tuhun caahán ñi tan ñi xaan iñi ñi jacuahá ñi tuhun can.

⁸ Tsitó yo tyin ley can, vaha tsi, maa tyin cuñi tsi cuatyíñu vaha yo itsi tumaa taahán maa tsi. ⁹ Cuñi tsi coto yo tyin ndi intuhun ley tan ña iyó tsi tsa cuenda nyivi vaha. Tyin ley can iyó tsi tsa cuenda nyivi javahá tsa ña vaha, ñi ña tyaá soho tsa caahán Nyoo, nyivi iyó cuatyí, nyivi caquiñi, nyivi ña tyaá yahvi tsi Nyoo. Iyó tucu tsi tsa cuenda nyivi tsahñi tsi jutu ñi, tsi sihi ñi, tan tsa cuenda tandihí nyivi tsahñi nyivi. ¹⁰ Iyó ley can tsa cuenda nyivi iyó tsihin rayi a ñaha tan ñavin yi ña a ñasihi ra cuví. Iyó tsi tsa cuenda ra ndusihi, tan tsa cuenda nyivi tyihí xeehe nyivi tan xicó ñi, tan iyó tsi tsa cuenda nyivi vata,

tan iyó tsi tsa cuenda nyivi tsa catyí: “Naha Nyoo”, tan ña nditsa tsa caahán ñi. Tan juven ñi iyó tucu ley can tsa cuenda nyivi caahán ndavaha ñi siqui tuhun Nyoo tsa cutuhva yo. ¹¹ Tuhun Nyoo ihya, iin ñi cuví tsi tsihin tuhun cahnun xaan tsa jacacú ra Jesús tsi yo. Nyoo tava tyiñu ra tsi yo tsa jacuaa yu tuhun ihya tsi nyivi. Tan intuhun ñi maa ra taahán tsi jacahnú yo.

Tsahá ra Pablo tyahvi nyoo tsi Nyoo tyin nyehe ndaahvi ra tsi ra

¹² Tsahá xaan yu tyahvi nyoo tsi Jutu Mañi yo Jesucristo tyin tsaha ra tunyee iñi tsi yu, tan nyehe ra tsi yu tan tsitó ra tyin tsinú vaha iñi yu tsi ra, tan tsa cuenda yacan tava tyiñu ra tsi yu tsa jaha tyiñu yu tyiñu ra. ¹³ Tacan javahá ra tsihin yu, vasu ndi maa nu quitsí tsi quivi, yuhu cahan nyaa xaan yu tsi ra. Tan tsinyaá ndaha yu tsi nyivi yihí cuenda ra, tan tsacú nducu yu tsi ra. Maa tyin Nyoo cundaahvi xaan iñi ra nyehe ra tsi yu, tyin quivi can ñaha ca tsinu iñi yu tsi ra, tan ña tsitó yo náa javahá yu. ¹⁴ Tacan tsaha Jutu Mañi yo Jesucristo tsa vaha ra tsi yu. Tan tsinú xaan iñi yu tsi ra jahá ra. Tan cuñi xaan yo tsi nyivi tyin iin ñi cuví yo tsihin ra Cristo Jesús.

¹⁵ Tan tuhun cua cahan yu ihya tsa nditsa vaha cuví tsi. Taahán tsi tsinu iñi yo itsi tan catyí tsi tyehen: Ra Cristo Jesús quitsí ra nu ñuhu ñayivi ihya tyin jacacú ra tsi nyivi iyó cuatyí. Tan yuhu cuví iin ra caquiñi ca tan ñavin ca tandihí nyivi. ¹⁶ Yacan cuenda, tava Nyoo tsi yu nu caquiñi tan cundahvi iñi ra tsi yu tyin tacan tan janaha ra Jesucristo tsi nyivi tyin cuñi xaan ra tsi ñi tan cunyeé iñi ra ndatú ra nda cuenda nacuhva cuenda ñi tsi ñi tsi ra. Tyin tacan tan cua tsinu iñi ñi tsi ra tan cua coo ñi ñayivi nyito tsa ña cua naa maa. ¹⁷ Yacan cuenda na jacahnun yo tsi ra yihí ndaha tsi yo tandihí ñi quivi, ra nduve tuhun tsihi iyó tsi, ra ña cuví nyehe yo, ra tsa intuhun ñi maa cuví Nyoo tan tsitó ra tandihí. Na cuví tsi tacan.

¹⁸ Yooho Timoteo sehe yu, tava tyiñu yu tsi un, cañi tahañ vaha tsihin nu tatyí ña vaha. Cuatyíñu tsa tsinú iñu un tsi Nyoo tan tsihin tsa tsitó un tyin vaha cuahán un tsihin Nyoo; tumaa tsaha cuenda ra yafi yo naha ra tsi un quivi cahan ra naha tuhun un jahá Nyoo. ¹⁹ Ña jandihí un tsa tsinú iñi un tsi Nyoo tan ña jandihí un tsa javahá un tumaa catyí maa Nyoo tyin javaha un, nacoto vaha tsitsi añima un tyin vaha cuahán un tsihin Nyoo. Tyin juhva ra naha nacoq ra naha tandihí yacan, yacan cuenda ña tsinú ca iñi ra naha tumaa taahán maa tsi. ²⁰ Tacan javahá ra Himeneo tan ra Alejandro. Yacan cuenda tsaha cuenda yu tsi ra naha tsi nu ña vaha, tyin tacan tan coto ra naha tyin ña vaha cahan yo ndavaha ñi siqui tuhun Nyoo.

2

Nu jacuahā ra Pablo nácaa taahán tsi ndacan tahviyo tsi Nyoo

¹ Tsháh cuenda yu tsi tandihí nyívi yihí cuenda Nyoo tyin ñíñi xaan cuñí tsi ndacan tahvi yo tsi Nyoo tsa cuenda tandihí nyívi. Tan nacuhva yo tyahvi nyoo tsi Nyoo tsa cuenda ñi. ² Na ndacan tahvi yo cuenda ra ndacá ñaha naha ra tan cuenda tandihí ra cumí tyiñu naha ra. Ndacan tahvi yo tsa cuenda ra naha tyin tacan tan coo yo tsihin tsa vaha, coo taxin yo, tan coo yo iin ñayívi vaha nuu Nyoo tan nuu nyívi. Tacan tan cua jaha ñi tsa ñayívi tsi yo. ³ Tyin tacan taahán iñi Nyoo, ra tsa jacacú tsi yo. ⁴ Tyin cuñí ra tsa cacu tandihí nyívi. Tan cuñí ra tsa coto ñi tuhun nditsa. ⁵ Tyin intuhun ñi maa Nyoo iyó. Tan iyó intuhun ñi ra cuví cahan ndaahvi tsa cuenda yo nuu Nyoo. Ra ican cuví ra Cristo Jesús. Tan coo ra iin nyívi tumaa maa yo. ⁶ Juvín ra Jesucristo tsihi tsa cuenda tandihí nyívi. Tyahví ra tsa cuenda cuatyí tandihí yo tyin tacan tan cuví cacu yo. Tan cundaq can quívi tyaq maa Nyoo cuhva. ⁷ Tsa cuenda yacan, tavā tyiñu Nyoo tsi yu, tyin cahan yu tuhun ra, tan cacu yo tyiñu ra, tan jacuahā yu tsi nyívi tsa ñavin nyívi Israel cuví nácaa tsinu iñi ñi tsa nditsa. Tan nyooho tsitó ndo tyin tsa nditsa caahán yu tyin ña tuhvá yu jandavi ñaha tyin cuenda ra Cristo yihí yu.

⁸ Yacan cuenda cuñí yu tsa ndacan tahvi rayi naha ra tsi Nyoo tandihí ñi ityi. Tan coo vaha ra naha nuu ra. Tan cañihi ra naha ndaha ra tan jacahnu ra naha tsi Nyoo tsihin tsa vaha cacu iñi ra naha. Tan tsihin tsa ña ñuhú tsihi iñi ra naha. Tan ña cahan yuhu tahan ra naha. Tacan taahán tsi coo ra naha tan ndacan tahvi ra naha tsi Nyoo. ⁹ Tacan tucu ñiñaha. Catsi vaha cunditsi ñi jahma ñi, tumaa taahán maa tsi cunditsi nyívi yihí cuenda Nyoo. Na ña cunditsi ñi jahma iyo xaan caa. Ña iyo xaan janduvaha ñi jiñi ñi. Ñavin tsihin xuhun cuaan, ndi tsihin yuu xiñu, tan ña cunditsi ñi jahma yahvi xaan. ¹⁰ Maa tyin na janduvaha ñi tsi ñi tsihin tsa catsi coo ñi tan tsihin tsa javaha ñi tsa vaha, tumaa taahán maa tsi javaha nyívi nacuhva cuenda tsi ñi tsi Nyoo. ¹¹ Tan cunyecu taxin ñi tyaa soho ñi tuhun Nyoo. Tan jaha ñi tsa ñayívi tsi ra tsháh cuenda tuhun Nyoo tsi ñi. ¹² Tyin ña tsháh yu jacuahā ñiñaha nuu nyívi cuaha. Ndi ña tsháh yu tsa cundaca ñaha ñi tsi rayi. Taxin ñi na cunyecu ñi. ¹³ Tyin jihna ca ra Adán javahā Nyoo, yahā can tan javahā ra tsi ña Eva. ¹⁴ Tan ñavin tsi maa ra Adán jandavj ñaha nu ña vaha, tyin tsi ña Eva ñasihi ra jandavj ñaha nu tan tsicoq cuatyí ña. ¹⁵ Maa tyin ñiñaha nduve tsa cua tahan ñi tsa cua cacu sehe ñi, tatun jacuahnu vaha ñi tsi sehe

ñi, tan tsinú vaha iñi ñi tsi Nyoo tan cuñí ñi tsi ra tan tsi nyívi, tan catsi coo ñi nuu Nyoo tan nuu nyívi.

3

Nacaa taahán tsi coo ra cuví ityi nuu tsihin nyívi vehe ñuhu

¹ Tuhun ihya tuhun nditsa cuví tsi: Tatun iin ndo cuñí ndo cuví ndo ityi nuu tsihin nyívi vehe ñuhu, vaha xaan tyiñu cuñí ndo javaha ndo. ² Maa tyin ñiñi cuñí tsi tyin ra cuví ityi nuu tsihin nyívi vehe ñuhu cuñí tsi cuví ra iin ra catsi iyó tyin tacan tan ña cuví tyaa nyívi cuatyí tsata ra. Tan cuñí tsi tsa coo intuhun ñi ñasihi ra. Tan cuñí tsi tsa cuví ra iin ra tsitó vaha cuhva coo, iin ra vaha nuu nyívi. Tan cuñí tsi vaha cahan ra tsihin nyívi tsaá yuvehe ra, tan cuví ra iin ra tsitó vaha jacuahā tsi nyívi. ³ Iin ra cuví ityi nuu tsihin nyívi vehe ñuhu ña taahán tsi coho ra nyixi, tan ña taahán tsi cuví ra iin ra nanducú tsihi. Tan ña taahán tsi cuví ra iin ra nducú xuhun tsihin tsa ña taahán tsi. Cuñí tsi tsa cuví ra iin ra vaha iñi, iin ra ña tuhvá cañi tahan. Tan cuví ra iin ra ña nyiyo iñi xuhun. ⁴ Cuñí tsi tsa cuví ra iin ra yihí ndaha vaha tsi ñasihi ra tan tsi sehe ra, iin ra ndacá ñaha tsi sehe ra tan tyaa yahvi vaha sehe ra tsi ra, tan jahá ñi tsa ñayívi tsi ra. ⁵ Tyin tatun ña tsitó ra cundaca ñaha ra nyívi vehe ra, ñacaa cua quihí ndaha ra nyívi tsicá vehe ñuhu Nyoo? ⁶ Tan iin ra ndi tsaá xaan tsihin tuhun Nyoo ña taahán tsi cuví ra ityi nuu tsihin nyívi vehe ñuhu tyin coto nduyaa ra, tan tatsi tuñi Nyoo tsi ra, tumaa tatsi tuñi Nyoo tsi nu ña vaha tsa cuenda tsa cahnú xaan jahá nu tsi nu. ⁷ Tan cuñí tucu tsi tsa cuví ra iin nyívi vaha nuu nyívi tsa ña yihí tuhun Nyoo, tyin tacan tan ña ñiñi ñi náa cuatyí tyaa ñi tsata ra tan ña cuví jaha canaa nu ña vaha tsi ra.

Nacaa taahán tsi coo ra jahá tyiñu vehe ñuhu

⁸ Tan tacan tucu ra jahá tyiñu vehe ñuhu naha ra. Na catsi coo ra naha. Na ña cumañi ra naha tsihin tuhun caahán ra naha, tan ña cuví ra naha ra tuhvá tsihi nyixi. Tan ndi ña nyiyo iñi ra naha jaha canaa ra naha xuhun tsihin tsa ña taahán tsi. ⁹ Cuñí tsi tsa cuntuñi vaha iñi ra naha nácaa taahán tsi tsinu iñi yo tsi Nyoo tan coto vaha ra naha tyin vaha cuahán ra naha tsihin Nyoo. ¹⁰ Tan cuñí tucu tsi tsa nyehe jihna yo tatun vaha cuahán ra naha tsihin Nyoo, tacan tan cuví jaha tyiñi ra naha vehe ñuhu. ¹¹ Tan tacan tucu ñiñaha, cuñí tsi cuví ñi nyívi vaha nuu nyívi. Ña cahan ñi cuendu. Catsi coo ñi. Tan tyaa nuu vaha ñi tandihí tyiñu. ¹² Ra jahá tyiñu vehe ñuhu na coo intuhun ñi ñasihi ra. Tan cuñí tsi tsa coto vaha ra cundaca

ñaha ra tsi sehe ra tan nyivi vehe ra. ¹³ Tyin ra jahá tyiñu vehe ñuhu, tan vaha tyanuú ra tyiñu tsa nyisó ra, cuahán ca ra ityi nuu tsihin Nyoo. Tan tsihin tsa ñi ñi ra caahán ra tuhun Nyoo tyin tsinú vaha ñi ra tsi ra Cristo Jesús.

Nu caahán ra Pablo siqui tuhun xeehe cuhva tsinú ñiyo

¹⁴⁻¹⁵ Vasiqú numi ñi cua quitsi nyehe yu nu nyí un. Maa tyin tun ña cuví quitsi yu tsa numi ñi, yoñi jaha, vaha tyin tsa tyaá yu tuhun ihya tyin coto un nácaa taahán tsi coo yo tsa cuví yo nyivi cuenda Nyoo. Tyin maa yo cuví vehe ñuhu Nyoo nyito. Tan cuñi tsi tsa jañihi ca yo janaha yo tuhun Nyoo tsi nyivi. Tan naquihin vaha yo tyin tuhun nditsa cuví tsi. ¹⁶ Tsa nditsa tyin yaha xaan cahnu cuví tuhun xeehe tsa jaquituvj Nyoo, tyin coo yo tumaa iyó maa ra:

Nyoo nanduvj ra rayi tan tsicoo ra, tsicoo cuñu ñuhu ra tumaa tsa iyó cuñu ñuhu maa yo.

Tan catyi Tatyí li Nyoo tyin ra nduve cuatyí cuví ra.

Tan nyehe ra cuví ángel naha ra tsi ra.

Tañi cahnu nu ñuhu ñayivi caahán nyivi tuhun ra.

Tan tsinú ñi nyivi tsi ra tanñi cahnu nu ñuhu ñayivi.

Tan cuanuhú ra nda gloria.

4

Nu catyi ra Pablo tyin nu cuahán ca tsi quivi yihí nyivi ña cua tsinu ca ñi ñi tsi ra Cristo

¹ Maa tyin caahán catsi Tatyí li tan catyi ra tyin nu cua ndihi tyembu yihí nyivi ña cua tsinu ca ñi ñi tsi ra Cristo, tyin cua tyaá soho ñi tuhun caahán tatyí ña vaha tsa jandaví ñaha. Tan cua cunyicun ñi ndusu yuhu nu ña vaha. ² Cua tyaá soho ñi tuhun caahán nyivi jandaví ñaha. Tan ñi can ña tuví ñi ñi náa javahá ñi tyin tsa ndundavá xaan añima ñi. Tumaa tsa cayu añima ñi jahá iin caa ihñi tan ndundavá tsi. ³ Cua casi ñi nu tindaha nyivi. Tan cua catyi ñi tyin ña vaha catsi yo juhva nuu nyayu. Vasu tsitó yo tyin tandihi nuu tsa tsatsí yo, Nyoo javahá itsi. Tan tandihi yoo tsa tsinú ñi tsi ra tan tsitó yo tsa nditsa, tsatsí yo can tan tsahá yo tyahvi nyoo tsi ra. ⁴ Tyin tandihi tsa javahá Nyoo tan vaha tsi. Tan ña taahán tsi catyi yo tyin ña vaha tsi. Tan cuví catsi yo tandihi tsi tun tsahá yo tyahvi nyoo tsi Nyoo tsa cuenda tsi. ⁵ Tyin ndu ii tsi jahá tuhun Nyoo tan tsa tsicán tahvi yo tsi ra tan tsahá yo tyahvi nyoo tsi ra.

Nacaa iyó ra vaha jahá tyiñu tyiñu ra Jesucristo

⁶ Tatum jacuahá un tandihi tsa caahán yu ihya tsi tandihi nyivi yihí tuhun Nyoo tsihin yo, cua cuví un iin musu vaha ra Cristo Jesús. Tan tuhun tsa tsinú ñi yo, tsihin tandihi tuhun ra Cristo tan tsa nyicún yo, cua jatyinyee tsi tsi un tan cahnu ca un tsihin tuhun Nyoo. ⁷ Maa tyin ña tyaá yahvi un tsa cuví xembulu, tuhun sana, tan tuhun tsahnu cuhva iyó nyivi. Vaha ca jañiñi un tsi un tan javaha un maa ñi maa cuhva cuñi maa Nyoo. ⁸ Tsa jañiñi yo coo tunyee ñi cuñu ñuhu yo, juhva ñi jatyinyee tsi tsi yo. Maa tyin tsa jañiñi yo javahá yo tandihi cuhva cuñi Nyoo, jatyinyee tsi tsi yo iin cahnu ñi, tyin jatyinyee tsi tsi yo nu ñuhu ñayivi ihya. Tan jatyinyee tucú tsi tsi yo tsa coo vaha yo nu cua tsaá yo nda gloria. ⁹ Tan nditsa, tyin tsa nditsa cuví tsi tan tandihi yo taahán tsi tsa tsinú ñi yo itsi. ¹⁰ Tan juvin ñi tsa cuenda yacan jahá tyiñu yo tan nyehé yo tundoho tyin ndatú yo tsa naquihin yo tsa vaha tsa tsahá Nyoo nyito tsi yo. Tyin maa ra cuví ra jacacú tsi tandihi nyivi, tan jihna ca yoo tsa tsinú ñi yo tsi ra jacacú ra.

¹¹ Tuhun ihya jacuaha un tsi nyivi yihí cuenda Nyoo, tan jañiñi un tsi ñi na cutuhva ñi itsi. ¹² Catsi jaha un tsi un coto ña cua jaha nyivi tsa ñayivi tsi un tsa cuenda tsa ndi tyuvaa xaan un. Jacuaha tsi ñi tsihin cuhva iyó un, tan tsihin cuhva caahán un. Jacuaha tsi ñi tsihin tsa cuñi un tsi Nyoo tan tsi nyivi, tsihin cuhva tsicá ñi un, tsihin cuhva tsinú ñi un, tan tsihin cuhva javahá un maa ñi maa tsa vaha. ¹³ Tan tsitsi tsa ndi cumañi ca tsaá yu nu nyí un, çahvi tuhun Nyoo tsihin ñi yihí tuhun Nyoo. Cuhva cuenda ñihi tsi ñi, tan jacuaha tsi ñi nácaa cunyicun vaha ñi tsi Nyoo. ¹⁴ Jaha cuenda vaha tunyee ñi tsa tsahá Nyoo tsi un quivi tyiso ndaha ra nyisó tyiñu vehe ñuhu naha ra jiñi un tan cahán ra naha tsa tsahá cuenda Nyoo tsi ra naha. ¹⁵ Tyaá vaha ñi tuhun can tan javaha cuhva catyi tsi. Tacan tan cua nyehe tandihi nyivi nácaa cuahán un ityi nuu ca tsihin Nyoo. ¹⁶ Jaha cuenda tsi un tsihin cuhva iyó un. Tan jaha cuenda cuhva jacuahá un tsi nyivi. Tan ña nacoo ihñi un tsa vaha. Tatum javahá un tacan, cua cacu un, tan cua cacu tucu nyivi tyaá soho tuhun jacuahá un.

5

Nu tsahá cuenda ra Pablo tsi ra Timoteo nácaa cuhva cuenda ra tsi nyivi yihí cuenda ra Cristo

¹ Ña cuxaan un tsi iin ra tsahnu, maa tyin cuhva cuenda tsi ra tan jaha tsa ñayivi tsi ra tyin tumaa cuví jutu un cuví tsi ra. Tan ra cuatyí naha ra, cuhva cuenda tsi ra naha tumaa tsa yañi un cuví tsi ra naha. ² Tan ñi tsahnu cuhva cuenda tsi ñi tumaa tsa sihi un cuví tsi ñi. Tan ñi cuatyí, cuhva cuenda tsi

ñi tumaa tsa cuhva un cuví tsi ñi. Javaha tandihí tsa caahán yu ihya tsihin tsa vaha tsicá iñi un.

³ Jatyinyee tsi ñiñaha ndaahvi tsa tsihí yíi tatun nduve nyívi ñi cuví jatyinyee tsi ñi. ⁴ Maa tyin tatun iyó iin ñaha tsihí yíi tan iyó sehe ña, a sehe yañi ña, cuñi tsi cutuhva jihna maa ñi can jatyinyee ñi tsi ña. Na nducuhun iñi ñi nácaa jahá cuenda sihi ñi tsi ñi tsa ndi nyihí ñi. Tan tacan taahán tsi tsa jaha cuenda tucu ñi tsi ña vityin. Tun tacan javaha ñi, vaha xaan, tyin tacan taahán iñi maa Nyoo. ⁵ Tan ñaha tsa tsihí yíi tan ndoo ndaahvi intuhun ña maa ña, iin ña Nyoo tyaá iñi ña tan tsicán tahvi ña tsi ra tsinu cahñi tan tsacuaa. ⁶ Maa tyin ñaha tsihí yíi tsa cusí iñi tsihin tsa iyó nu ñuhu ñayívi ihya, vasu nyito ña maa tyin tsihí ña cuenda Nyoo. ⁷ Jacoto tucu tuhun ihya tsi ñi cuhva yo tyin tacan tan ña ñihí nyívi cuhva cahan ñi ndavaha ñi tsi ñi. ⁸ Maa tyin tatun yihí yo iyó nyívi yo tan ña tsicá iñi yo jatyinyee yo tsi ñi, ña vaha tacan. Tyin tatun ña jatyinyee yo tsi nyívi vehe yo, tumaa tsa ña tsinú iñi yo tsi Nyoo cuví can. Tan cahnu ca cuatyí yo iyó tan ñavin ca nyívi tsa ña tsinú iñi tsi Nyoo.

⁹ Nu tutu tsa nyaá sívi ñi tsihí yíi, na cun-
yaa sívi ñi tsahnu tsa iyó ndaahvi, tatun tsa yaha uñi xico cuiya ñi, tan intuhun ñi yíi ñi tsicoq. ¹⁰ Tan tatun tsitó vaha nyívi tsi ñi tsa cuenda tsa vaha tsa javahá ñi; tan jacuahñu vaha ñi sehe ñi, tan tsahá ñi tsa catsi nyívi tsaá yuvehe ñi, tan jahá tyiñu ñi tyiñu nyívi yihí cuenda Nyoo tsihin tsa ñi iñi añima ñi, tan jatyinyee ñi tsi nyívi nyehé tundoho. Tun tacan javahá ñi tandihí tsa vaha, cuví cunyata sívi ñi.

¹¹ Maa tyin ña tyaa ndo sívi ñiñaha tsa ñaha ca quita uñi xico cuiya, coto coo quívi tan cuñi ñi coo nyico yíi ñi tan cuñi ñi tindaha ñi inga tsaha tan jandihí ñi tsa jahá tyiñu ñi tyiñu ra Cristo. ¹² Tan coo cuatyí ñi tyin ña javahá ñi cuhva cahan ñi tsa cua javaha ñi. ¹³ Tan inga tucu tyiñu tatun tsicá nuu jutsan ñi maa ñi tan iin tan iin vehe nyívi quihvi ñi. Tan ñavin yacan ñi maa tyin tsicá nuu tucu ñi caahán ñi cuendu. Tan tyihí ñi tsi ñi nu ña taahán tsi quihvi ñi, tan caahán ñi tsa ña taahán tsi cahan ñi. ¹⁴ Vaha taxin ca na tindaha ñi inga tsaha. Na coo sehe ñi. Na jaha cuenda vaha ñi vehe ñi. Tan ña cuhva ñi cahan nya nyívi xaan iñi tsi yo tsi yo. ¹⁵ Caahán yu tandihí tuhun ihya tsihin un tyin yihí ñi tsa nacoq ñi tsi Nyoo tan nyicún ñi tsi nu ña vaha. ¹⁶ Tatun ñi yihí cuenda Nyoo tan iyó iin nyívi ñi tsa tsihí yíi, cuñi tsi tsa jatyinyee maa ñi tsi ñi can, tan ña tyiso ñi itsi síqui vehe ñuhu. Tyin tacan tan cuví jatyinyee vehe ñuhu tsi inga ñi tsihí yíi tsa nduve ca maa nyívi iyó.

¹⁷ Ra tsahnu ra nyisó tyiñu vehe ñuhu, cuñi tsi tsa jaha xaan nyívi vehe ñuhu tsa ñayívi tsi ra, tan tsa jihna ñi na jaha ñi tsa ñayívi tsi ra caahán tuhun Nyoo tan jacuahá ra naha tsi ñi. ¹⁸ Tyin tuhun Nyoo catyí tsi tyehen: “Ña tyihí un yoho yuhu indiquí na jahá tyiñu ti, tacan tan cuví catsi ti luxu.” Tan catyí tucu tuhun Nyoo tyehen: “Iyó ndatu tsa ñihí ra jahá tyiñu yahvi ra.”

¹⁹ Tatun tyaá nyívi cuatyí tsi iin ra tsahnu tan ña quita uvi a uñi taahan tsandaa, ña tyaa yahvi un tsa caahán ñi. ²⁰ Maa tyin nyívi tsa jahihí ca javahá tsa ña vaha, cuñi tsi tsa cahan ndo tsihin ñi nuu tandihí nyívi yucú vehe ñuhu. Tacan tan nayuhvi tandihí ca ñi tan ña javaha ñi tsa ña vaha. ²¹ Tavá tyiñu yu tsi un nuu Nyoo tan nuu Jutu Mañi yo Jesucristo, tan nuu ángel tsa nacatsí ra. Tan caahán yu tsihin un tyaa yahvi tsa caahán yu ihya, inducu ñi cuñi un nyehe un tsi tandihí nyívi. ²² Ña numi xaan cuhva un tyiñu tsi iin ra cuví ra ityi nuu tsihin nyívi vehe ñuhu. Coto cuhnu cuatyí javaha ra síqui un. Jaha cuenda vaha tsi un tsihin tandihí tsa javahá un tan ña cuhva un ndatu tsi nu ña vaha tsa nducu cuhva nu tsi un.

²³ Tan tsa cuenda tsa uhvi tsitsi un, ña coho ca un maa ñi maa ndutya, coho luxu vinu na nduvaha tsitsi un.

²⁴ Yihí nyívi quituví cuatyí ñi tsa ndi cumañi cutuñi ñi. Tan yihí ñi quituvi cuatyí ñi tsa yaha cutuñi ñi. ²⁵ Tan tacan tucu tatun javahá yo tsa vaha, ña cuxeehe tsi. Vasu ña quituví tsi tsa numi ñi, maa tyin ña cuví ndoo xeehe tsi.

6

¹ Nyívi yihí cuenda Nyoo tsa cuví musu, cuñi tsi tyaa yahvi vaha ñi tsi tsitoho ñi. Tyin tacan tan ña ñihí nyívi cuhva cahan ñi ndavaha ñi síqui Nyoo, tan síqui tuhun ra tsa jacuahá yo. ² Tan tatun iin musu tan yihí tsitoho ra cuenda Nyoo, taahán tsi tsa jaha ra tsa ñayívi tsi ra ican tyin yañi ra cuenda Nyoo cuví tsi ra. Cuñi tsi tsa vaha ca jahá tyiñu ra tyiñu tsitoho ra, tyin tsinú tucu iñi maa ra can tsi ra Cristo, tan Nyoo cuñi ra tsi ra ican. Jacuahá yacan tsi nyívi yihí cuenda Nyoo tan cuhva cuenda tsi ñi na javaha ñi cuhva catyí tsi.

Cuhva iyó yo tsihin Nyoo tan na cusí iñi yo tsihin tsa tsahá ra tsi yo

³ Tatun iyó iin ra jacuahá inga tuhun tsa ña nacatsi tahan tsihin tuhun vaha tsa jacuahá Jutu Mañi yo Jesucristo; tan ña nacatsi tahan can tsihin cuhva vaha iyó yo tsihin Nyoo, ⁴ cuví ra iin ra nduyaá ñi maa, iin ra ña tsitó. Tan tsa caahán yuhu ra síqui iin tsa ñavin ñi tsa cahan yo tuhun, cuví can tumaa cuehe tsi ra. Tan tsa cuenda yacan cacú tsihí tan nyiyo iñi nyívi tsa iyó tsi inga

ñi, tan tsa caahán nyaa tahan ñi tsi ñi, tacan tan ndasi cuñi nyivi nyehe tahan ñi tsi ñi. ⁵ Tan maa ñi cañi tahan nyivi jahá can tyin quiñi tsicá iñi ñi, tyin ña tsitó ñi tsa vaha. Cuñi maa ñi tyin cua jaha canaa ñi xuhun tsihin tuhun Nyoo. Ña cutahan un tsihin ñi can. ⁶ Nditsa tyin tsa javahá yo cuhva catyí Nyoo tan sií cuñi yo tsihin tsa tsaha ra tsi yo, cuví tsi tumaa iin tsa cuca iyó tsi yo. ⁷ Tyin nduve náa tsaá tsihin yo quivi cacu yo nu ñuhu ñayivi ihya. Tan nduve náa cuhun tsihin yo quivi cúu yo. ⁸ Maa tyin tatun iyó tsa catsi yo tan iyó jahma cunditsi yo, na cusii iñi yo, tan na ndoo yo vaha tsihin yacan. ⁹ Maa tyin nyivi cuñi nducuca, nducú cuhva nu ña vaha tsi ñi. Tan nacava ñi tsitsi xayí nu. Jandusohó nu tsi ñi tsihin tsa cuñi ñi coo cuaha tsa coo tsi ñi. Tan jativí can tsi ñi. Tan nu ndihi tuhun cua tivi ndihi ñi tan cua cuhun ñi anyaya. ¹⁰ Tyin tsa cuñi xaan yo xuhun, yacan cuví yoho tandihi ca nuu tsa ña vaha. Tan yihí nyivi tsa cuenda tsa cuñi xaan ñi xuhun, tan jandihí ñi tsa tsinú iñi ñi tuhun Nyoo. Tan janyehé ñi tundoho tsi juvin ñi maa ñi tsihin yacan.

Nacaa cañi tahan yo tsihin nu ña vaha tsihin tsa tsinú iñi yo tsi Nyoo

¹¹ Maa tyin yooho cuví un iin rayii cuenda Nyoo. Quita tsiyo nuu tandihi tsa caquiñi. Coo cuñi vaha nuu Nyoo. Cũanyicun tsi Nyoo tsihin tsa ñi iñi un. Cuñi tsi nyivi. Cũnyee iñi tsihin tsa vita iñi un nyehe un tandihi tsa cua tahan un. Tan ña cahnu jaha un tsi un. ¹² Cañi tahan vaha tsihin nu ña vaha tsihin tsa tsinú iñi un tsi Nyoo. Ña jaña ndaha un ñayivi nyito tsa ña cua naa maa tsa tsaha Nyoo tsi yo. Tyin tsa cuenda can, cana Nyoo tsi un, tan tacan catyí un quivi cahán catsi un nuu tandihi ra cuví tsandaa naha ra, catyí un tyin tsinú iñi un tsi Nyoo. ¹³ Tan vityin nuu Nyoo, ra tsa tsahá ñayivi coo tandihi tsa iyó, tan nuu ra Cristo Jesús ra tsa tsaha cuenda vaha tuhun nditsa nuu ra Poncio Pilato, caahán yu tsihin un, ¹⁴ javaha tandihi tsa catyí yu tsihin un tyin javaha un tyin tacan tan ña cuví cahan nyaa nyivi tsi un nda tahan tsi quivi quitsi Jutu Mañi yo Jesucristo. ¹⁵ Nda tsaa maa quivi, tan cua jaquitsi Nyoo tsi ra Cristo inga tsaha. Ra ican cuví ra jacahnú yo, tan intuhun ñi maa ra cuví Nyoo, ra iyó xaan tunyee iñi. Rey cahnu cuví ra nuu tandihi ca ra cuví rey. Tan ra ndacá ñaha cahnu cuví ra nuu tandihi ca ra ndacá ñaha. ¹⁶ Intuhun ñi maa ra cuví ra tsa nduve tuhun tsihi iyó tsi. Tan iyó ra nu nditsin nu ña cuví cutuhva nyivi. Tan ndi intuhun nyivi ñaha ca nyehe tsi ra. Tan ndi ña cuví nyehe ñi tsi ra. Na jacahnu yo tsi maa ra. Tan na cundaca ñaha ra tsi yo tandihi tyembu. Tan na ña cundihí maa tsa ndacá ñaha ra tsi yo. Na cuví tsi tacan. ¹⁷ Tan

cahan tsihin nyivi tsa iyó tsa cuca ñuu ñayivi ihya, na ña cahnu xaan jaha ñi tsi ñi. Tan ña cuita iñi ñi tsa cuca tsa iyó tsi ñi. Tyin tsa cuca can cua ndihi can. Na cuita iñi ñi tsi Nyoo nyito, tyin maa ra cuví ra tsahá tandihi tsi yo. Tan cuví cusii iñi yo tsihin tsi. ¹⁸ Cahán tsihin ñi cuca na javaha ñi tsa vaha tan nducuca ñi nuu Nyoo tsihin tsa javahá ñi tsa vaha. Tan na cuhva ñi tsa iyó tsi ñi tsihin tsa ñi iñi ñi tan ñavin tsihin tsa cuihya cuñi ñi. ¹⁹ Tacan tan coo tsa cuca tsa ña cuanaa maa tsi ñi, tan jatinyee tsi tsi ñi nu cuahán quivi ityi nuu. Tan coo ñi ñayivi nyito tsa ña cua naa maa.

Nu ndihí tsahá cuenda ra Pablo tsi ra Timoteo

²⁰ Yooho Timoteo, jaha cuenda vaha tyiñu tsa tsaha Nyoo tsi un. Ña tyaa soho un tuhun nu ñuhu ñayivi ihya, tuhun nduve yahvi nyaá. Ña tyaa yahvi un tuhun tsa catyí nyivi tyin tsitó xaan ñi tan ña nditsa. ²¹ Tyin tsa cuenda yacan, yihí nyivi tsa nacoo ihñi ñi tuhun Nyoo. Tan ña tsinú vaha ca iñi ñi tsi ra vityin.

Coo tsihin tsa vaha tsa iyó tsi Nyoo tsa tsaha ra tsi un.

Tan na cuví tsi tacan ñi.

Carta Tsinu Uvi Tsa Jacuhun Ra Pablo Tsi Ra Timoteo

Nu tyaq ra Pablo inga carta tsa cuenda ra Timoteo

¹Yuhu ra Pablo cuvı̄ yu iin ra tavā tyiñu ra Jesucristo, tyin tacan cuñı̄ maa Nyoo. Tyin cuñı̄ ra tsa jacoto yu tsi nyı̄vı̄ tyin tsahá ra ñayı̄vı̄ nyıto coo tandı̄hi ñi tsa iin ñi cuvı̄ tsihin ra Cristo Jesús. ²Jaquitsı̄ yu carta ihya tsi yooho Timoteo. Tan cuñı̄ xaan yu tsi un tyin tumaa cuvı̄ sehe yu cuvı̄ tsi un. Tan naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo coo añima un. Tan na cundaahvi iñi ra tsi un.

Nu caahán ra Pablo tsihin ra Timoteo na catyi tuhun ra tsihin nyı̄vı̄ tyin cuenda ra Cristoyı̄hi ra

³Tandı̄hi ñi quı̄vı̄ nducuhún iñi yu tsi un tan tsicán tahvi yu tsi Nyoo tsinu cahñi tan tsacuaa. Tan tsahá yu tyahvi nyoo tsi ra tsa cuenda un. Tyiñu maa ra jahá tyiñu yu tumaa jahá tyiñu tsiı̄ tsaahnu yu tyiñu Nyoo tsanaha. Tan vaha cuñı̄ añima yu tyin vaha iyó yu nuu ra. ⁴Nducuhún xaan iñi yu nácaa tsacü un quı̄vı̄ quitā yu nu nyı̄ı̄ un. Tan vityin cuñı̄ xaan yu nyehe yu tsi un inga tsaha tan cusı̄ iñi yu. ⁵Tan nducuhún xaan iñi yu tyin tsinú nı̄ vaha iñi un tsi Nyoo. Tumaa tsa tsinú iñi ña Loida tsitan un tan ña Eunice sihi un. Ñi ıcan vaha xaan tsinú iñi ñi tsi Nyoo, tan tsıtó yu tyin tacan tsinú iñi maa un tsi Nyoo vityin.

⁶Yacan cuenda tsahá cuenda yu tsi un jandu iin ca iñi un tan cuatyı̄ñu ndatu tsa tsahá Nyoo tsi un tsa cahan un tuhun ra. Yacan cuvı̄ ndatu tsa tsahá ra tsi un quı̄vı̄ tyıso ndaha yu jiñi un. ⁷Nyoo ña tsahá ra tatyı̄ ña vaha tsa jayuhvi tsi yo. Tsahá ra Tatyı̄ Ii ra tsi yo tyin coo tunyee iñi cahnu tsi yo, tan cuñı̄ tahan yo tsi yo. Tan tsahá ra tunyee iñi tsi yo tyin tacan tan cundaca ñaha vaha yo tsi yo. ⁸Yacan cuenda ña nducahan nuu un cahan un tuhun Jutu Mañi yo. Tan ndi ña nducahan nuu un tsa nyı̄ı̄ yu vehe caa tsa cuenda ra. Cuatyı̄ñu tunyee iñi tsa tsahá Nyoo tsi un tan ndoo un vaha tsa nyehe un tundoho tsa vatsı̄ sıquı̄ yo tsa cuenda tuhun Nyoo. ⁹Tyin juvin ra jacacü tsi yo. Tan caná ra tsi yo tyin coo yo ñayı̄vı̄ ii. Ñavin tsa cuenda tsa vaha tsa javahá yo tan caná ra tsi yo. Caná ra tsi yo tyin tacan tyaq maa ra cuhva javaha ra nda ndi cumañi ca tsinú ñuhu ñayı̄vı̄. Tyin nda quı̄vı̄ can tyaq ra cuhva tsa cuhva ra tsa vaha tsa iyó tsi ra tsi yo tsa cuenda ra Cristo Jesús. ¹⁰Tan vityin tsıtó yu tsa vaha can tyin tsa quı̄tsı̄ ra

Jesucristo jacacü ra tsi yo. Tan quihin nyaa ra tandı̄hi tunyee iñi tuhun tsihi. Cahán ra tuhun vaha, tan tavā nditsin ra tuhun tsa coo yo ñayı̄vı̄ nyıto tsa ña cua naa maa.

¹¹Nyoo tavā tyiñu ra tsi yo tsa cahan yu tuhun can tsihin nyı̄vı̄. Tavā tyiñu ra tsi yo tsa caca yu tyiñu ra, tan jacuaaha yu tuhun can tsi nyı̄vı̄ tsa ñavin nyı̄vı̄ Israel cuvı̄. ¹²Yacan cuenda nyehé yu tandı̄hi tundoho. Maa tyin ña nducahan nuu yu tsa tacan nyehé yu tundoho, tyin tsıtó yu yóo tsinú iñi yu. Tyin nacuhvā cuenda yu tsi yo tsi ra, tan tsıtó vaha yu tyin cuvı̄ jaha cuenda ra tsi yo nda cuanda quı̄vı̄ quıtsı̄ ra inga tsaha.

¹³Cuanyı̄cun tuhun vaha tsa tsahá cuenda yu tsi un. Tan coo tsihin tsa tsinú vaha iñi un tsi Nyoo. Cuñı̄ tsi ra, tan tsi nyı̄vı̄. Tyin tacan taahán tsi coo yoo tsa iyó iin caa ñi tsihin ra Cristo Jesús. ¹⁴Tan na jatı̄nyee maa Tatyı̄ Ii tsa iyó añima yo tsi un tan jaha cuenda vaha un tsa vaha tsa tsahá Nyoo tsi un.

¹⁵Tsa tsıtó un tyin nacoó ihñi ra Figelo tan ra Hermogenes tsi yu tan tandı̄hi ca maa ra iyó itı̄y Asia. ¹⁶Maa tyin ra Onesı̄foro na cundaahvi iñi Jutu Mañi yo tsi ra tan tsi nyı̄vı̄ ra tyin cuaha xaan tsaha quı̄tsı̄ ra jatı̄nyee ra tsi yo. Tan ña cahán nuu ra tsa tyehen nyı̄ı̄ yu vehe caa. ¹⁷Tan quı̄vı̄ tsinyı̄ı̄ ra ñuu Roma ihya, ña jandı̄hi maa ra tsa nanducú ra tsi yo nda cuanda tsa nañihı̄ ra tsi yo. ¹⁸Maa Jutu Mañi yo na cundaahvi iñi ra nyehe ra tsi ra quı̄vı̄ cua jacutuñi ra tsi yo. Tsıtó maa un nácaa jatı̄nyee xaan ra Onesı̄foro tsi yo quı̄vı̄ tsı̄yucü yo ñuu Éfesos.

2

Iin andaru vaha ra Jesucristo

¹Tan yooho sehe yu, janyee iñi tsihin tunyee iñi Nyoo tsa tsahá ra Cristo Jesús tsi un tsa cuenda tsa iin ñi cuvı̄ yo tsihin ra. ²Tuhun tsa tsiñı̄ un cahán yu nuu nyı̄vı̄ cuaha, jacuaaha yacan tsi nyı̄vı̄ tsa nı̄ iñi tsinú iñi tsi Nyoo, ñi tsa cuvı̄ jacuaaha tsi inga nyı̄vı̄.

³Tan cunı̄yee iñi nyehe tundoho tumaa iin andaru vaha ra Jesucristo. ⁴Ndi intuhun ra cuvı̄ andaru tan ña cuvı̄ jatı̄yañu xaan ra tsi ra tsihin inga ca tyiñu. Tyin cuñı̄ tsi tsa javaha ra maa ñi maa tsa caahán ra cuvı̄ itı̄y nuu tsihin ra. ⁵Tan tacan tucu ra jası̄quı̄ tsihin balón, ña cuvı̄ jaha canaa ra tatun ña cunı̄yee iñi ra jası̄quı̄ ra tumaa taahán maa tsi. ⁶Iin ra jahá tyiñu tsitsı̄ cuhu, taahán tsi tsa jaha tyiñu jihna ra, tacan tan cuvı̄ catsı̄ jihna ca maa ra tsa quitā nu jahá tyiñu ra. ⁷Tyihı̄ tuñi vaha iñi tsa caahán yu tsihin un ihya, tan maa Jutu Mañi yo cua cuhva tsa cutuñi iñi un tandı̄hi tsi.

⁸Nducuhun iñi tsi ra Jesucristo, ra tsa nandotó tsa yahā nyehē ra tundoho tan tsihi

ra. Cuví ra tata ra rey David. Tan tuhun ra cuví tuhun tsa jacacú Nyoo tsi yo tsa tsaḥa cuenda ra tsi yu tyin cahan yu tsihin nyívi. ⁹ Tan tsa cuenda tuhun can cunyeé iñi yu nyehé yu tandihí tundoho nda cuanda nuuhí yu tsihin cadena vityin tumaa tsatyin cuví yu iin ra caquiñi. Tyin iin ra caquiñi tacan javahá ra naha tsihin ra. Maa tyin tuhun Nyoo ña nuuhí tsi. ¹⁰ Yacan cuenda cunyeé iñi yu nyehé yu tandihí tundoho tsa cuenda tsa vaha tsi tandihí ca nyívi tsa nacatsj maa Nyoo, tyin tacan tan cua cacu ñi iin caa ñi tsihin yo tsa cuenda ra Cristo tan cua ñihi yo nu sii caá tsa ña cua ndihí maa coo yo. ¹¹ Tuhun ihya tuhun nditsa cuví tsi tan cua cundaa tsi:

Tatun tsihí yo cuenda cuñu ñuhu yo, coo nyito tucu yo tsihin ra.

¹² Tatun nyehé yo tundoho tsa cuenda ra, cua cundaca ñaha ndihí yo tsihin ra.

Tatun catyí yo tyin ñavin cuenda ra yihí yo, cua catyí tucu maa ra tyin ñavin nyívi yihí cuenda ra cuví yo.

¹³ Tatun jandihí yo tsa tsinu iñi yo tsi ra, maa ra tacan ñi maa javahá ra tsa caahán ra.

Tyin maa ra ña tuhvá ra nasama tuhun caahán ra.

Tatun jahá tyiñu vaha yo, cua quita vaha yo

¹⁴ Janducuhun iñi tuhun ihya tsi ra jacuahá tuhun Nyoo, tan catyí tsihin ra naha nuu Jutu Mañi yo, na jandihí ra naha tsa caahán yuhu tahan xaan ra naha tsihin tsa nduve yahvi nyaá. Tyin tsa caahán yuhu tahan ra naha tacan, nduve maa ndáa tsiñi ñuhu can. Tyin tsihin yacan javí ra naha tsi nyívi tyaá soho tsa caahán ra naha. ¹⁵ Jañiñi tan nacuhva cuenda un tsi un nuu Nyoo tumaa iin ra jahá tyiñu vaha. Tyin tatun tsatyíñu vaha un tuhun nditsa cuhva taahán maa tsi, ña cua nducahan nuu un. ¹⁶⁻¹⁷ Ña tyaa soho un tsa ña vaha tan tsa ñavin ñi tsa cahan yo tuhun tsa caahán nyívi. Tyin cuví can tumaa cuehe xaan tsi ñi. Tan yaha ca cuhva cua tiví ñi jahá can. Yacan cuví tsa tahan ra Himeneo tan ra Fileto. ¹⁸ Tyin quita tsiyo ra naha ityi vaha tan catyí ra naha tyin tsa yahá nandoto yo tan ña cua nandoto ca cuñu ñuhu yo inga tsaha. Tan tsihin yacan jandoyó ñuhu ra naha tsi juhva nyívi tsa tsinu iñi tsi Nyoo. ¹⁹ Vasu yihí juhva ñi tacan quita tsiyo ñi, maa tyin Nyoo tsaquin ra tsa nditsa, tan yacan cuví tsa ña cua nasama maa. Tan nyaá iin seña tsa catyí: “Jutu Mañi yo nacotó ra tsi nyívi yihí cuenda ra tsa nditsa.” Tan catyí tucu tsi: “Tandihí ñi nyisó sivi ra Cristo na quita ñi nu iyó tsa ña vaha.”

²⁰ Tsitsi iin vehe cahnu, ñavin maa ñi maa ndaha tyiñu tsinu tsihin xuhun cuaan tan xuhun cuitsin iyó tsatyíñu nyívi. Tyin tsatyíñu tucu ñi tsa tsinu tsihin vitu tan tsihin ñuhu quisi. Yihí can tsatyíñu ñi can cuenda tyiñu nahnu, tan yihí can ndáa tahan ñi maa tsi tsatyíñu ñi can. ²¹ Tacan tucu maa yo tatun jahá vaha yo cuenda tsi yo, cuví yo iin nyívi tsa tsatyíñu Nyoo. Tan cuví yo tumaa iin vasu xuhun cuaan tsa ndog vaha, tacan tan cuví cuatyíñu ra tsi yo tsa cuenda tandihí tyiñu vaha.

²² Ña caca iñi un tumaa tsicá iñi ra cuatyí iyó nu ñuhu ñayivi ihya. Tyin ra ihya naha ra maa ñi maa tsa caquiñi tsicá iñi ra naha. Maa tyin yooho coo iin ñayivi cuiti. Tsinu vaha iñi tsi Nyoo. Cuñi tsi Nyoo tan tsi nyívi. Coo vaha tsihin tandihí nyívi yihí cuenda Nyoo, tandihí ñi tsa tsicán tahvi tsi Jutu Mañi yo, ñi iyó añima vaha. ²³ Tan ña tyaa soho un tsa nduve yahvi nyaá tsa caahán yuhu tahan nyívi. Tyin tsitó un tyin tsihin yacan nducuaḥa ca tsihi. ²⁴ Tan iin ra cuví musu Jutu Mañi yo, ña taahán tsi cañi tahan ra. Taahán tsi tsa vaha nyívi cuví ra tsihin tandihí nyívi. Tan cuñi tsi tsa ñihi vaha ra cuhva jacuaha ra tuhun Nyoo tsi nyívi. Tan cuñi tucu tsi tsa cunyeé iñi ra tsihi tsahá nyívi. ²⁵ Tan tsihin tsa vita iñi ra cuñi tsi janaha vaha ra cuhva coo nyívi ndava iñi. Tan cuatu ra tatun ndu uvi iñi ñi tan coto ñi tsa nditsa. ²⁶ Tacan tan cua cutuñi iñi ñi tan quita ñi tsitsi xayí nu ña vaha tyin tsa vityin javahá maa nu cuhva cuñi nu tsihin ñi.

3

Nacaa cua coo nyívi nu cua ndihí quívi

¹ Tan cuñi tucu tsi coto un tyin nu cua ndihí tyembu cua coo quívi tsa yí xaan cua coo yo. ² Tyin cua coo nyívi nyiyo iñi, maa ñi tsa tsii maa ñi cua cuñi ñi coo. Tan cua cuñi xaan ñi xuhun. Tan yaa xaan cua jaha ñi tsi ñi, cahnu cua jaha ñi tsi ñi. Cua cahan ñi ndavaha ñi tsi Nyoo. Tan ña cua tyaa yahvi ñi tsa caahán jutu ñi tan sihi ñi. Ña cua nacuhva ñi tyahvi nyoo tsi Nyoo, tan ndi tsi nyívi ñi. Ña cua tyaa yahvi ñi tsi Nyoo. ³ Ña cua cuñi ñi tsi nyívi ñi. Ña cua cuhva maa ñi coo taxin nyívi. Cua cahan ñi cuendu. Ña cua cuví cundaca ñaha ñi cuñu ñuhu ñi. Xaan xaan ñi cua cuvi. Tan ña cua cuñi ñi nyehe ñi tsa vaha. ⁴ Cua xico ñi tsi nyívi ñi. Tan cana iñi ñi javaha ñi náa ndihí tsa cuñi maa ñi. Tan cahnu cua jaha ñi tsi ñi. Tan maa ñi maa tsa cuñi maa ñi cua nanducu ñi, tan ña cua nanducu ñi tsi Nyoo. ⁵ Cua cunyicun ñi tsi Nyoo tumaa tsa tsinu iñi ñi cua jaha ñi tsi ñi, maa tyin ña nditsa. Tyin tyasi ñi nu janahá Nyoo tunyee iñi ra tyin ña tsinu iñi ñi tsi ra.

Ña cutahan un tsihin nyivi javahá tacan. ⁶ Tyin tyañu ñi ican iyó ra tsa quihví tsitsi vehe, tan jandaví ñaha ra tsi ñiñaha tsa nduve maa tsa tsiñi tuñi jiñi ñi. Tan cuaha cuatyí ñi can iyó, tan cuaha tsa ña vaha cuñi ñi. ⁷ Cuahán ñi can tyaa soho ñi tuhun tsa, maa tyin ña cuví maa cutuñi ñi ñi tsa cuví tsa nditsa. ⁸ Tan nyivi cua coo, cua cuví ñi tumaa ra Janes tan ra Jambres, ra tasi tsa tsicoo tsanaha naha ra. Tyin cuñi ra naha jaha canaa ra naha tsi ra Moisés. Tan tacan tucu nyivi cua coo nu cuahán ca tsi itiyí nuu. Cua cahan ñi ndavaha ñi siqui tuhun Nyoo. Quiñi xaan cua caca ñi ñi. Tan ña can quita vaha ñi tsihin cuhva tsinu ñi ñi. ⁹ Maa tyin tsa cua janaha ñi, ña cua cuví nducuaha can tyin ña xeehe caa tyin iin tsa nduve yahvi nyaá cua cuví can, tumaa tsa javahá tucu ra Janes tan ra Jambres.

Nu ndihí tavá tyiñu ra Pablo tsi ra Timoteo

¹⁰ Maa tyin yooho tsitó vaha un tyin yuhu ñavin tacan iyó yu. Tan nyicún un tuhun tsa jacuahá yu, tan cuhva iyó yu. Tan tsitó un nacuenta iyó yu tacan, tan nácaa tsinú ñi yu tsi Nyoo. Tan tsitó tucu un nácaa cunyeé ñi yu tsa cuxaán nyivi tsi yu, tan nácaa cuñi yu tsi ñi. ¹¹ Tan tsitó un nácaa cunyeé ñi yu nyehé yu tundoho tsa tsinyaá ndaha nyivi tsi yu. Tsitó un tsa tahañ yu, tandihí tundoho tsa nyehé yu tsacatyí tuhun Nyoo nda ñuu Antioquía, tan ñuu Iconio, tan ñuu Listra. Maa tyin Jutu Mañi yo jacacá ra tsi yu tsitsi tandihí tundoho can. ¹² Tsa nditsa tyin tandihí yoo tsa cuñi coo cuhva cuñi ra Cristo Jesús cua janyehé nyivi tundoho tsi yo. ¹³ Maa tyin yooho jañiñi tan nyivi jandaví ñaha, quiñi xaan ca cua coo ñi. Tyin cua jandaví ñaha ñi tsi nyivi tan cua jandaví ñaha tucu maa nyivi tsi ñi.

¹⁴ Maa tyin yooho jañiñi tsi un tan coo un tsihin tsa cutuhvá un. Tyin tsitó un yóo jacuahá tsi un tan tsitó un tyin tsa nditsa cuví tsa cutuhvá un. ¹⁵ Nda ndi luhlu un tan tsitó un tuhun nyaá nu tutu Nyoo. Tan yacacán cuví tsa tsahá tsa cutuñi ñi un tan cacu un tsa cuenda tsa tsinú ñi un tsi ra Cristo Jesús. ¹⁶ Tandihí tuhun tsa nyaá nuu tutu Nyoo, maa Nyoo tsahá tsi. Tan jatyinyeé xaan tsi tsi yo tsa nacoto yo nácaa taahán tsi tsinú ñi yo. Janahá tsi tsi yo tyin iyó cuatyí yo. Natyisó vaha tsi tsi yo. Jacuahá tsi tsi yo nácaa coo cuiti vaha yo nuu Nyoo. ¹⁷ Tacan jatyinyeé tuhun Nyoo tsi yo tyin tacan tan ña cumañi tsa cumañi tsi yo tan cuví yo iin ra cuiti yihí cuenda Nyoo tan javaha yo tandihí tsa vaha.

4

¹ Tavá tyiñu yu tsi un nuu Nyoo tan nuu Jutu Mañi yo Jesucristo, tyin maa ra cua

jandaa cuatyí nyivi nyito tan nyivi tsihi quivi cua quitsi ra cundaca ñaha ra tsihin tunyee ñi tsa iyó tsi ra. ² Cahán tuhun Nyoo tsihin nyivi. Tan ña jandihí un tsa jañiñi un javaha un tacan. Cahán tuhun Nyoo tsihin ñi tatun tsahá tsi cuhva tan vasu ña tsahá tsi cuhva. Cuhva cuenda tsi ñi, cahán tsihin ñi tatun ña vaha javahá ñi, tyin tacan tan cunyicun vaha ñi tsi ra Cristo. Tan cunyeé ñi cuatu nda nasama ñi cuhva iyó ñi. Tan jacuahá tsi ñi nácaa taahán tsi coo ñi. ³ Tyin coo quivi ña cua cunyeé ca ñi nyivi tyaa soho ñi tsa vaha. Cua nducu ñi cuaha maestro tsa jacuahá tsi ñi maa ñi maa tsa taahán ñi maa ñi tyaa soho ñi. ⁴ Tan cua tyaa tsiyo ñi tsa nditsa. Tan cua tyaa soho ñi tsa ña nditsa. ⁵ Maa tyin yooho jaha cuenda tsi un tsihin tsa vaha tsicá ñi un. Cunyeé ñi nyehé tundoho. Cahán tuhun Nyoo tsihin nyivi. Vaha javaha un tyiñu tsa tsahá Nyoo tsi un.

⁶ Yuhu tsa yatyin cua nacuhva cuenda yu ñayivi iyó yu tsa cuenda tuhun Nyoo, tyin tsa cuyatyin cúu yu. ⁷ Tsa yahá cañi tahan yu tumaa taahán maa tsi, tan tsa ndihí javahá yu tyiñu tsa tsahá Nyoo tsi yu tumaa iin ra tsinú suuhva, tun tsa tsaá ra nu taahán tsi cucuñi ra. Tan tacan ñi maa tsinú ñi yu tsi Nyoo. ⁸ Tan vityin nu cuahán ca quivi, ndatú vaha yu tsa taahán tsi tsi yu tsa cua cuhva Jutu Mañi yo tsi yu tsa cuenda tsa vaha tsicoo yu nuu ra. Tan ñavin maa ñi maa yu cua cuhva ra itsi, cua cuhva tucu ra itsi tsi tandihí ca nyivi tsa ndatú tsi ra quivi cua quitsi ra. Tyin intuhun ñi maa ra cuví ra tatsí tuñi vaha.

Inga tyiñu tavá ra Pablo tsi ra Timoteo

⁹ Janumi tan quitsi ñi un, quitsi nyehé un nu nyii yu. ¹⁰ Tyin ra Demas nacoo ihñi ra tsi yu tyin cuñi ca ra tsa iyó ñuu ñayivi ihya. Tan cuahán ra nda ñuu Tesalónica. Tan ra Crescente cuahán ra Galacia. Tan ra Tito cuahán ra Damacia. ¹¹ Intuhun ña ra Lucas nyii tsihin yu. Nanducu tsi ra Marcos tan quihin tsi ra quitsi tsihin un quivi quitsi un. Tyin cuví jatyinyee ra tsi yu tsihin tyiñu Nyoo. ¹² Jacuhun yu tsi ra Tíquico ñuu éfeso. ¹³ Quivi quitsi un yaha un naquihin un jahma vixin yu tsa nacoo yu ñuu Troas vehe ra Carpo. Tan naquihin un tandihí libru yu, cundaha un quitsi tsihin un. Tsa ñiñi ca cuñi tsi cundaha un, yacacán cuví tandihí tutu yu.

¹⁴ Ra Alejandro, ra cañi caa, cuaha xaan tsa ña vaha javahá ra tsi yu. Maa Jutu Mañi yo cua natyahvi tsi ra tsa cuenda tandihí tsa javahá ra. ¹⁵ Jaha cuenda vaha tsi un coto náa javaha ra tsi un. Tyin xaan xaan cuñi ra cuenda tuhun Nyoo tsa caahán yo.

¹⁶ Tsa jihna ñi jacacú yu tsi yu nuu ra cumí tyiñu naha ra, yoñi maa jatyinyeé tsi yu. Tandihí ra naha nacoo ihñi ra naha tsi yu. Na jaha Nyoo tucahnu ñi tsi ra naha

tsa cuenda yacan. ¹⁷ Vasu ndi maa tandihi ra naha naco ihñi tsi yu, maa tyin Jutu Mañi yo jatyinyee xaan ra tsi yu. Tan tsaḥa ra tunyee iñi tsi yu tan cuvi cahan catsi yu tuhun ra nuu nyivi. Tan tsiñi tandihi nyivi tsa ñavin ñi Israel cuvi tsa caḥan yu. Tan jacacu Nyoo tsi yu tan ña tsatsj ndicaha can tsi yu. ¹⁸ Tan maa Nyoo cua jacacu tsi yu ndaha tandihi tsa ña vaha. Tan cua jaha cuenda ra tsi yu tsa cuenda tsa cua naquihin vaha ra tsi yu, tan cua cunyaa yu tsihin ra nu ndacá ñaha ra nda gloria. Tan taahán tsi jacahnu yo tsi ra tandihi ñi tyembu. Tan na cuvi tsi tacan.

Nu ndihi caḥan ra Pablo tan tsaḥa ra nacumi tsi nyivi

¹⁹ Cuhva nacumi tsi ña Prisca tan tsi ra Aquila tan tsi nyivi ra Onesiforo. ²⁰ Tan jacotó ndihi yu tsi un tyin ndoo ra Erasto ñuu Corinto. Tan ndoo ra Tróximo ñuu Mileto tyin cuuhví ra. ²¹ Janumi un tan quitsi un tsa ndi cumañi ca tahan tsi tyembu vitsin.

Tan nacumi tsi un catyí ra Eubulo tan ra Pudente tsihin ra Lino tsihin ña Claudia tan tandihi ca nyivi yihí cuenda Nyoo tsihin yo.

²² Na quihi ndaha Jutu Mañi yo Jesucristo tsi un. Tan Nyoo nasoco tsi tandihi ndo.

Tan na cuvi tsi tacan ñi.

Carta Tsa Jacuhun Ra Pablo Tsi Ra Tito

Nu tyaq ra Pablo carta tsa cuenda ra Tito

¹ Yuhu ra Pablo jahá tyiñu yu tyiñu Nyoo. Tan tsicá yu tyiñu ra Jesucristo, tyin tava tyiñu ra tsi yu tsa jatynyee yu tsi nyivi nacatsi Nyoo, na tsinu iñi ñi tsi ra, tan nacoto ñi tsa nditsa, tan coto ñi ñacaa taahán tsi coo yo cuhva cuñi Nyoo. ² Tan cuita iñi ñi tsa cua coo ñi ñayivi nyito tsa ña cua naa maa nda gloria. Tyin nda ndi cumañi ca tsinu ñuhu ñayivi tan catyi Nyoo tyin cuhva ra ñayivi nyito coo yo. Tan ña jandavi ñaha ra. ³ Tan vityin tsa tahán tsi quivi tsa tyaq Nyoo cuhva tyin coto yo tuhun ra. Maa ra cuvi ra jacacú tsi yo, tan tava ra tyiñu tsi yu tsa cahan yu tuhun ra tsihin nyivi. ⁴ Jaquitsi yu carta ihya tsi un, Tito, tyin nditsa tyin cuvi un tumaa sehe yu tsa cuenda tuhun Nyoo, tyin inducu ñi tsinú iñi yo tsi ra Jesucristo. Naquihin tsa vaha tan tsa taxin tsa tsahá Nyoo Jutu yo tan Jutu Mañi yo Jesucristo ra jacacú tsi yo, coo añima un. Tan na cundaahvi iñi ra nyehe ra tsi un.

Tyiñu tsahá ra Pablo tsi ra Tito tyin jaha tyiñu ra tyiñu Nyoo ñuu tsa cayucú ñuhu Creta

⁵ Nacoo yu tsi un ñuhu Creta tyin jandaa un tyiñu Nyoo tsa nyaá cundaa. Tan na tyiso un tsi ra tsahnu cuvi ityi nuu tsihin nyivi vehe ñuhu intuhun intuhun ñuu, tumaa tsa catyi maa yu tsihin un. ⁶ Tyin ra tsahnu cuvi ityi nuu tsihin nyivi vehe ñuhu, cuñi tsi cuvi ra iin ra iyó intuhun ñi ñasihi, tan tsinú iñi tandihi sehe ra tsi Nyoo, tan catsi iyó sehe ra tsihin ra, tan ña ndava iñi sehe ra, tan ña tuhvá nyivi tyaq cuatyí siqui sehe ra. Tun tacan iyó ra, cuvi cuvi ra ityi nuu tsihin nyivi vehe ñuhu. ⁷ Tyin ra cuvi ityi nuu tsihin ñi yihí cuenda Nyoo, maa Nyoo tsahá tyiñu can tsi ra. Yacan cuenda ñiñi cuñi tsi tsa cuvi ra iin ra cuiti iyó nuu Nyoo. Iin ra cahnú jahá tsi ña cuvi cuvi ra ityi nuu tsihin nyivi vehe ñuhu, ndi iin ra ndihi iñi, ndi iin ra tuhvá tsihi, ndi iin ra nducú tsihi, ndi iin ra jaha canaa xuhun tsihin iin cuhva ña vaha. ⁸ Maa tyin cuñi tsi cuvi ra iin ra sií cuñi tatun tsa nyivi yuvehe ra. Tan taahán tsi cuhva ra nu ndoo ñi cusu ñi. Cuñi tsi cuvi ra iin ra javahá tsa vaha, iin ra tsicá iñi tsa vaha, iin ra tsa nacuhva cuenda vaha tsi ra tsi Nyoo, iin ra tsitó cundaca ñaha tsi maa ra. ⁹ Cuñi tsi cunyicun vaha ra tuhun nditsa tsa jacuahá yo tsi ra. Tacan tan coto ra jandu iin ra iñi nyivi tsihin tuhun vaha ihya, tan ñihi ra cuhva jacuahá ra tsi nyivi caahán tyin ña nditsa tuhun caahán yo. ¹⁰ Tyin cuaha xaan ra ndava iñi iyó, cuaha ra caahán tsa nduve yahvi nyaá, cuaha ra jandavi ñaha.

Tan vihi ca ra nyicún costumbre tsaahnu nyivi Israel, yaha ca cuhva caahán ra can naha ra. ¹¹ Cuñi tsi tsa casi yo nu caahán ra naha, tyin cuaha xaan nyivi tan vehe tan vehe ñi jandoyó ñuhu ra naha. Tyin jacuahá ra naha iin tsa ña taahán tsi tsi ñi tsa cuenda tsa cuñi ra naha xuhun.

¹² Tan juvin ñi maa iin ra Creta, iin ra tsitó xaan, cahan ra tuhun nyivi ñuu maa ra catyi ra tyeheh: “Nyivi Creta, vatyá xaan ñi. Cuví ñi tumaa cuvi quiti. Cuaha xaan tsatsi ñi tan jutsan xaan ñi”, catyi ra. ¹³ Tan nditsa tsa cahan ra. Yacan cuenda cuñi tsi tsa cahan ñihi un tsihin ñi, na nasama ñi cuhva iyó ñi tyin tacan tan vaha tsinu iñi ñi tsi ra Cristo. ¹⁴ Tan ña tyaq soho ca ñi cuendu tsa caahán nyivi Israel. Tan ndi ña tyaq soho ca ñi tsa caahán nyivi tsa ña cuñi coto tsa nditsa.

¹⁵ Tsa cuenda nyivi tsa vaha tsicá iñi ñi, tandihi maa náa tsa iyó tan vaha tsi cuñi ñi. Maa tyin tsa cuenda nyivi tsa ña tsinú iñi tan ña vaha tsicá iñi, nduve maa iin tsa vaha cuñi ñi, tyin nda cuanda cuhva tsicá iñi ñi tan tsa tsinú tuñi iñi ñi tan ña vaha. ¹⁶ Catyi ñi tyin tsitó ñi tsi Nyoo, maa tyin tsihin tsa ña vaha javahá ñi, nyehe yo tyin ña nditsa ñi. Tyin ndasi tsicá iñi ñi tan ndava iñi ñi. Tan ña cuvi javaha ñi tsa vaha.

2

Tuhun vaha tsa tsahá Nyoo tyin jacuahá yo

¹ Maa tyin yooho, jacuahá tsa vaha tsa nacatsi tahan tsihin tsa jacuahá Nyoo tsi yo. ² Jacuahá tsi ra tsahnu naha ra, na catsi coo ra naha, tyin tacan tan cua jaha nyivi tsa ñayivi tsi ra naha. Tan tacan vaha caca iñi ra naha. Vaha cuhun ra naha tsihin tsa tsinú iñi ra. Cuñi tsi tsa cuñi ra naha tsi Nyoo tan tsi nyivi. Tan cunyehe iñi ra naha tandihi náa tundocho nyehe ra naha. ³ Tan tacan tucu ñiñaha tsahnu. Cahan tsihin ñi na coo ñi tumaa taahán iñi maa Nyoo. Tan ña cahan ñi cuendu. Ña coho ñi nyixi. Na janaha ñi tsa vaha tsi nyivi tsihin cuhva iyó ñi. ⁴ Tyin tacan, jacuahá vaha ñi tsi ñiñaha cuatyí tsa ndi tindaha, na cuñi ñi tsi yí ñi tan tsi sehe ñi. ⁵ Na caca vaha iñi ñi. Tan jaha vaha ñi cuenda cuhva iyó ñi. Na jaha cuenda vaha ñi vehe ñi. Tan na cuvi ñi nyivi vaha. Na cuhva ñi tsa cundaca ñaha yí ñi tsi ñi, tyin tacan tan ña cuvi cahan nyivi ndavaha ñi siqui tuhun Nyoo tsa cuenda cuhva iyó ñi.

⁶ Tacan tucu ra cuatyí naha ra. Cuhva cuenda tsi ra naha na catsi coo ra naha. ⁷ Tan maa un cuñi tsi tsa janaha un maa ñi maa tsa vaha tsi ra naha tsihin cuhva iyó un. Jacuahá tsi ra naha tsihin tsa vii tan tsihin tsa vaha. ⁸ Maa ñi tuhun vaha cahan un tyin tacan tan yoñi cuvi tyaq cuatyí siqui un. Tan ra xaan iñi tsi ndo naha ra ña cua ñihi ra

naha cuhva cahan ra naha ndavaha ñi siqui ndo tan cua nducahan nuu ra naha.

⁹ Cuhva cuenda tsi ra yañi yo, ra cuvi musu naha ra, na tyaa yahvi ra naha tsi tsi-toho ra naha. Na javaha ra naha tandihí tsa caahán tsitoho ra naha. Tan na ña nacahan ra naha nu caahán tsitoho ra naha. ¹⁰ Tan na ña suhu ra naha tsa tsii tsitoho ra naha. Na jaha vaha ra naha cuenda tandihí ndaha tyiñu tsitoho ra naha, tyin tacan tan nyehe nyivi tyin vaha xaan tuhun Nyoo, ra jacacú tsi yo.

¹¹ Tyin Nyoo janahá ra tsa vaha tsa iyó tsi ra tsi nyivi tan cuñi ra jacacú ra tsi tandihí ñi. ¹² Tsihin yacan jacuahá Nyoo tsi yo tyin taahán tsi nacoo yo tsa caquiñi tsa javahá nyivi tsa ña tsitó tsi ra, tan nacoo tucu yo tsa cuñi ñi can. Tan cuiti coo yo nu ñuhu ñayivi ihya, na cundaca ñaha vaha yo tsi yo tumaa cuñi maa Nyoo. ¹³ Tan janahá tucu ra tsi yo nácaa cuatu yo tsa vaha tsa cua ñiñi yo quivi quitsi ra Jesucristo inga tsaha. Tyin sii xaan cua cuñi yo nyehe yo tsa sii caá quivi quitsi ra cuvi Nyoo yo, ra cahnú cuvi, ra jacacú tsi yo. ¹⁴ Tsañá ra ñayivi ra tsa cuenda yo tyin tacan tan jacacú ra tsi yo ndaha tandihí tsa caquiñi. Tan nacatyá ra tsi yo na cuvi yo nyivi vaha, tan cuvi yo tsii maa ra, tan javaha yo maa ñi maa tsa vaha. ¹⁵ Yacan cuñi tsi jacuahá un tsi nyivi. Jandu iin ñi ñi. Tan çahan tsihin ñi tsihin sivi Nyoo. Tan ña javaha un tsa ña vaha tyin tacan tan ña ñiñi nyivi nácaa cahan nyaa ñi tsi un.

3

Cuhva taahán tsi javaha nyivi yihí cuenda Nyoo

¹ Janducuhun iñi tsi nyivi yihí cuenda Nyoo tsihin yo na tyaa yahvi ñi tsi ra ndacá ñaha tan ra cumí tyiñu naha ra. Tan na javaha ñi tyiñu catyí ra cumí tyiñu tyin javaha ñi tsihin tsa ñi iñi ñi. ² Tan ña cahan ñi ndavaha ñi siqui nyivi. Ña cañi tahan ñi tsihin nyivi. Na cuvi ñi nyivi vaha. Na masu jaha ñi añima ñi tsihin tandihí nyivi.

³ Tyin nda cuanda maa yo tan ña vaha javahá yo nu quitsi tsi. Soho xaan tsicoo yo. Ndava xaan iñi yo. Ña tsicá yo ityí vaha tyin jandaví ñaha xaan nu ña vaha tsi yo. Tan tsindacá ñaha tandihí tsa ña vaha tsa cuñi cuñu ñuhu yo tsi yo. Tan javahá yo tandihí cuhva cuñi maa yo. Tan cuñi yo coo tandihí tsa iyó tsi inga nyivi tsi yo. Ndasi tsicá iñi yo nyehe yo tsi nyivi yo. Tan tacan tucu maa nyivi ndasi cuñi ñi nyehe ñi tsi yo. ⁴ Maa tyin Nyoo vaha xaan iñi ra tan jacacú ra tsi yo. Tsihin yacan janahá ra tsi yo tyin cuñi ra tsi tandihí nyivi. ⁵ Ñavin tsa cuenda tsa vaha javahá yo tan jacacú ra tsi yo, tyin jacacú ra tsi yo tsa cuenda tsa cundaahví iñi ra nyehe ra tsi yo. Tan tsihin niñi ra Jesús nacatyá ra

cuatyí yo, tan nacacú tsaá yo jahá Tatyí Ii ra, tan tsahá ra ñayivi nyito coo yo. ⁶ Tan tsa cuenda ra Jesucristo, ra jacacú tsi yo, tsahá xaan Nyoo tsa coo Tatyí Ii ra añima yo. ⁷ Tsihin tsa vaha maa ra tan janduvahá ra tsi yo nuu ra. tyin tacan tan naquihin cuenda yo ñayivi nyito tsa ña cua naa maa tsa ndatú yo. ⁸ Tandihí tuhun ihya tuhun nditsa cuvi tsi. Tan cuñi yu tsa jañiñi xaan un cuhva cuenda un tuhun ihya tsi nyivi tsinú iñi tsi Nyoo tan na jaha cuenda ñi tsi ñi, tan javaha ñi tsa vaha. Vaha xaan tuhun ihya. Cua jatyinyee tsi tsi tandihí nyivi tatun tyaá yahvi ñi itsi. ⁹ Maa tyin ña tyaa soho un nu caahán yuhu tahan nyivi siqui tsa nduve yahvi nyaá. Ña tyaa soho un tsa caahán ñi tyin ñi ican cuñi ñi coto ñi nácaa vatsi tata nyivi. Ña tyihí un tsi un tsihin nyivi cañi tahan tsa cuenda ley tsa tyaa ra Moisés tsanaha. Tyin nduve náa jatyinyee yacan. Tan nduve tsa tsiiñi tuñi tsahá can.

¹⁰ Tatun iyó nyivi cuñi natahvi sava tsi nyivi tsicá vehe ñuhu, çana tsi ñi iin tsaha a uvi tsaha tan cahan un tsihin ñi tyin ña vaha tsa javahá ñi tacan. Tan tatun ña tyaá yahvi ñi tsa caahán un, çasi nu caca ñi vehe ñuhu. ¹¹ Tyin tsihin tsa javahá ñi tacan, tsa tsitó un tyin ña vaha añima ñi tyin tsicoo cuatyí ñi. Tan juvin ñi maa ñi jacunaá tsi ñi tsa tacan javahá ñi.

Tyiñu tavá ra Pablo tsi ra Tito

¹² Cua jaquitsi yu tsi ra Artemas, a ra Tíquico nu nyii un. Tan quivi tsaá ra, nducu cuhva tan çuhun un nda ñuu Nicópolis tyin ndacan cua ñiñi tahan yo. Tyin tyaá yu cuhva tsa ndoo yu ndacan yoo vitsin. ¹³ Nducu cuhva jatyinyee un tsi ra Zenas ra tuhvá caahán ndaahvi tsaha nyivi, tan tsi ra Apolos. Tan çuhva tsa tsiiñi ñuhu tsi ra naha nu tsicá ra naha caahán ra naha tuhun Nyoo. Tacan tan ña cumañi tsa cumañi tsi ra naha. ¹⁴ Na cutuhva nyivi yihí cuenda Nyoo javaha ñi tsa vaha tan jatyinyee ñi tsi inga nyivi tatun iyó tsa cumañi tsi ñi. Tacan tan ña cuatu nyicún ñi tsi Nyoo.

Nu ndihí cahan ra Pablo

¹⁵ Tandihí ra yucú tsihin yu, tsahá ra naha nacumi tsi un. Tan cuhva nacumi tsi tandihí nyivi cuñi tsi yo tsa cuenda tsa iin ñi cuvi yo cuenda Nyoo. Tan Nyoo nasoco tsi tandihí ndo.

Tan na cuvi tsi tacan ñi.

Carta Tsa Jacuhun Ra Pablo Tsi Ra Filemón

Nu quitsahā tyaá ra Pablo carta cuenda ra Filemón

¹ Yuhu ra Pablo, nyíi yu vehe caa tsa cuenda tsa caahán yu tuhun ra Cristo. Yooho Filemón tyaá yu carta ihya tsa cuenda un. Tan jaquitsí yu nacumi tsi un. Tan catyí tucu ra Timoteo tyin jaquitsí ndihí ra nacumi tsi un. Cuñí xaan ndí tsi un tsa cuenda tsa iin ñi tyiñu ra Cristo jahá tyiñu yo.

Nu quitsahā tyaá ra Pablo carta cuenda ra Filemón

² Tan tyaá yu carta ihya tsa cuenda ña Apia tan ra Arquipo tyin jatyinyeé xaan ñi tsi yo tsihin tyiñu jahá yo, tan tyaá tucu yu itsi tsa cuenda tandihí nyivi ndu iin yuvehe un. ³ Na nasoco xaan Nyoo tan Jutu Mañi yo Jesucristo tsi ndo, na cuhva ra naha tsa taxin coo añima ndo.

Ra Filemón tsinú xaan iñi ra tsi ra Jesús tan cuñí xaan ra tsi nyivi

⁴ Tandihí ñi tsaha tsa tsicán tahvi yu tsi Nyoo tan nducuhún iñi yu tsi un, ⁵ tyin ñihí tuhun yu tyin tsinú xaan iñi un tsi ra Jesús tan cuñí xaan un tsi tandihí nyivi yihí cuenda ra. ⁶ Tan tsicán yu tsi Nyoo tsa cuenda tandihí nyivi tsa natsinú iñi tsi ra Jesús jahá un tsihin tsa tsinú iñi un, tyin na cutuñi iñi ñi tandihí tsa vaha tsa iyó tsi yo tsa cuenda ra Jesucristo. ⁷ Tan sii xaan cuñí yu tan iin xaan cuñí yu tsa cuenda tsa cuñí xaan un tsi nyivi tsa yihí cuenda ra Cristo tan jandu iin xaan un iñi ñi.

Nu tsicán ra Pablo tumañi iñi tsi ra Filemón tsa cuenda ra Onésimo

⁸ Yuhu iyó ndatu tsi yu tsa tava tyiñu yu tsi un javaha un cuhva taahán maa tsi tyin ra tsicá tyiñu ra Cristo cuví yu. ⁹ Maa tyin yuhu cuñí xaan yu tsi un, yacan cuenda ña cua tava tyiñu yu tsi un tyin cuñí yu ndacan yu iin tumañi iñi tsi un. Tan tsa tsitó maa un tyin yuhu tsa tsahnu xaan yu tan nyii yu vehe caa ihya tsa cuenda ra Cristo. ¹⁰ Tan yacan tsicán yu tumañi iñi tsi un tsa cuenda ra Onésimo, tyin vityin cuví ra tumaa iin sehe yu tsa cuenda Nyoo tyin cahan yu tuhun ra Cristo tsihin ra nu nyii yu vehe caa ihya.

¹¹ Tahān tsanaha cuví ra musu un tan ña jahá tyiñu vaha ra. Maa tyin vityin vaha xaan cua jatyinyee ra tsi yo, tahan ñi tsi yooho tan yuhu. ¹² Yacan jaquitsí nyico yu tsi ra yuvehe un tan cuñí yu tsa naquihin cuenda un tsi ra tumaa tsa maa yu cuví ra. ¹³ Tsicá tucu iñi yu tsa ndoo ra nu nyii yu

vehe caa ihya tan jatyinyee ra tsi yu cahan yu tuhun Nyoo tsitsi tsa nduve un. ¹⁴ Maa tyin ña cuñí yu jandoo yu tsi ra tyin ña tsitó yu nácaa cua cahan un. Tan ña cuñí yu jañiñi yu tsi un tun ña cuhva un tsa cunyii ra. Vaha ca jaquitsí nyico maa un tsi ra tun cacu iñi un tsa cuhva un tsi ra tsa jaha tyiñu ra tsihin yu. ¹⁵ Vasiqí maa Nyoo cuñí tsa cunu ra nuu un juhva quivi tan vityin cua tsa nyico ra yuvehe un tan coo cuñi ra tsihin un. ¹⁶ Tan vityin naquihin cuenda tsi ra tumaa yañi un tsa cuenda ra Cristo; tan ñavin tumaa musu. Yuhu cuñí xaan yu tsi ra, yacan yooho taahán tsi tsa cuñi ca un tsi ra tan ñavin ca yuhu, tyin vityin ñavin musu ñi un cua cuví tsi ra tyin cuví tucu ra yañi un tsa cuenda ra Cristo.

¹⁷ Tun nditsa un tsa cuñí un tsi yu tsa cuenda tsa yihí yo cuenda ra Cristo, naquihin cuenda tsi ra tumaa tsa cua naquihin cuenda un tsi maa yu tatun tsa yu yuvehe un. ¹⁸ Tatun javahá ra iin tsa ña vaha tsi un o nyaá cuenda ra tsi un, tyahvi maa yu can. ¹⁹ Yuhu ra Pablo tyaá yu letra ihya tsihin ndaha yu tyin cua tyahvi maa yu tsi un, tan ña cua cahan yu tsihin un tyin nyaá tucu cuenda maa un nda cuanda ñayivi iyó un tsi yu. ²⁰ Yañi, javaha tumañi iñi ihya tsi yu, tumaa ra yihí cuenda ra Cristo; na cusii iñi yu tan na ndu iin iñi añima yu tsihin tsa cua javaha un.

²¹ Jaquitsí yu carta ihya tsi un tyin tsitó yu tyin cua tyaah yavi un tsa caahán yu tan cua javaha un tsa tsicán yu, tan cuaha ca tsa cua javaha un. ²² Tan cuñí tucu yu tyin janduvaha un nu cusu yu yuvehe un tyin nyitá iñi yu tyin Nyoo cua cuhva ra tsa quitsi nyehe yu tsi ndo, tyin tsicán tahvi ndo tsi ra.

Nu ndihí tyaq ra Pablo carta tsa cuenda ra Filemón tan tsahá ra nacumi tsi ra tan jacuhún tucu inga ra naha nacumi tsi ra

²³ Ra Epafras tsa nyii ndihí vehe caa ihya tyin caahán ra tuhun ra Cristo Jesús jaquitsí ra nacumi tsi un. ²⁴ Ra Marcos, ra Aristarco, ra Demas, tan ra Lucas tsahá ra naha nacumi tsi un. Ra ihya naha ra jatyinyeé xaan tsi yu tsihin tyiñu. ²⁵ Na nasoco xaan Jutu Mañi yo Jesucristo tsi ndo. Tan na cuví tsi tacan ñi.

Carta Tsa Tsinyaa Tsa Cuenda Nyivi Israel, Ñi Caahán Yuhu Hebreo

Caahán Nyoo tsihin yo tsihin yuhu Sehe ra

¹ Tahān tsanaha cuaha xaan tsaha, tan cuaha xaan cuhva cahān Nyoo tsihin tsii tsaahnu yo. Tsa jihna ñi tsatyíñu ra tsi ra cuvī ndusu yuhu ra. Juvín ra can naha ra tsaḥā cuenda tsi nyivi tuhun caahán Nyoo. ² Tan vityín, nu cua ndihi tyembu ihya tsatyíñu ra tsi Sehe ra tsa caahán ra tsihin yo. Iín ñi cuvī ra tsihin Sehe ra tan javahā ra tandihí tsa iyó. Tan nacuhvā cuenda ra tandihí can tsi Sehe ra. ³ Tan maa Sehe ra janahá ra tsa sī caá ra, tyín juvín ra Sehe ra cuvī tixahñu ra tyín juvín ñi cuhva caá maa ra caá ra Sehe ra. Tan tsihin tunyee iñi tuhun caahán ra, yihí ndaha ra tandihí tsa iyó. Tsa yahā tsa nacatyā ra cuatyí yo, tan tsinyaa ra xiín cuaha Nyoo nda gloria.

Cahnu ca cuvī Sehe Nyoo tan ñavin ca ángel

⁴ Sehe Nyoo cahnu xaan ca cuvī ra tan ñavin ca ángel. Tan cahnu ca tyiñu ñihí ra jahá tyiñu ra tan ñavin ca ángel. ⁵ Tyín Nyoo ña catyí ra ndi iín tsaha tsihin ndi intuhun ángel tyehen:

Yooḥo cuvī Sehe yu.

Tan tsahá yu ñayivi coo un vityín.

Tan ndi ña caḥān ra tuhun ndi intuhun ángel tyehen:

Yuhu cua cuvī Jutu ra.

Tan maa ra cua cuvī Sehe yu.

⁶ Maa tyín quivi jaquitsí Nyoo tsi Sehe mañi ra nu ñuhu ñayivi, catyí ra:

Tyín tandihí ángel ra taahán tsi jacahnu ra naha tsi Sehe ra.

⁷ Tan caḥān tucu ra tuhun ángel tan catyí ra: Ángel yu cuvī ra naha tumaa iín tatyí jahá yu,

jahá tyiñu ra naha tyiñu yu, tan cuvī tucu ra naha tumaa ñuhu, catyí Nyoo.

⁸ Maa tyín tuhun Sehe ra catyí ra tyehen:

Nyoo cuvī un, tan ña cua cundihí maa tsa ndacá ñaha un. Tan tsa ndacá ñaha un ndaa tsi tan nditsa tsi.

⁹ Tyín cuñí un tsa vaha tan ndasi cuñí un nyehé un tsa ña vaha.

Yacan cuenda yuhu, tsa cuvī yu Nyoo un, tsahá yu cuaha ca tsa sī cuñí un, tan ñavin ca tsi ra cutahán tsihin un naha ra.

¹⁰ Tan catyí tucu Nyoo tsihin Sehe ra tyehen: Yooḥo cuvī Jutu Mañi tandihí nyivi. Quivi jihna ñi juvín un javahā ñuhu ñayivi, tan tsihin ndaha un javahā un andivi.

¹¹ Ñuhu ñayivi tan andivi tan tandihí maa tsa iyó cua cundihí tsi, maa tyín yooḥo, ña cua cundihí un, tyín tacan ñi iyó maa un.

Tandihí maa can cua ndutsahnu can tumaa ndutsahnú jahma.

¹² Tan cua quihí tahnú can tumaa tyihí tahnú yo iín jahma.

Tan cua nasama can tumaa nasamá nyivi jahma ñi.

Maa tyín yooḥo iín ñi maa ra cuvī un tan ña cua nasama un.

Tan ña cua cundihí maa ñayivi un tyín tacan ñi iyó maa un, catyí Nyoo tsihin Sehe ra.

¹³ Nyoo ndi iín tsaha ña caḥān ra tsihin ndi intuhun ángel tumaa caḥān ra tsihin Sehe ra tyehen:

Cunyaa xiín cuaha yu ihya

tsitsi tsa nacuhva cuenda yu tsi nu xaan iñi tsi un nahnu tsi un.

¹⁴ Tandihí ángel, tatyí cuvī ra naha. Tava tyiñu Nyoo tsi ra naha tsa caca ra naha tyiñu ra tan jatyinyee ra naha tsi nyivi tsa cua cacu.

2

Cahnu xaan cuvī tsa jacacú Nyoo tsi yo

¹ Yacan cuenda cuñí tsi tyaa yahvi xaan ca yo tuhun nditsa tsa tsiñí yo, coto nacoó ihñi yo itsi. ² Tahān tsanaha tsaḥā cuenda ángel ley Nyoo tsi ra Moisés. Tan janahā Nyoo tyín nditsa tan taahán tsi tyaa yahvi nyivi itsi. Tan nyivi tsa tsicoó cuatyí tan ña tyaa yahvi ley can, tatsí tuñi ra tsi ñi tumaa catyí maa ley can. ³ Tun tacan tahān ñi can quivi can zñácaa cua javaha yoo vityín, tan cuvī cacu yo tatan ña tyaa yahvi yo tsa jacacú Nyoo tsi yo?, tan cahnu xaan ca cuvī tuhun ihya. Juvín ñi maa Jutu Mañi yo Jesucristo cuvī ra tsa caḥān jihna tyín cuvī cacu yo. Yahā can tan caḥān nyivi tsa tsiñí tsa caḥān ra. Nyeḥé ñi tyín nditsa tan nacatyí tuhun ñi itsi tsihin yo. ⁴ Tan sīn tyín Nyoo janahā catsi ra tsi yo tyín nditsa tsa jacacú ra tsi yo. Janahá ra can tsi yo tsihin tsa javahā ra cuaha tsa iyo. Tan tsaḥā tucu ra Tatyí lí ra tsi yo tyín jatyinyee tsi tsi yo tsa javaha yo tyiñu tsa cuñí ra javaha yo. Tan tsihin tandihí yacan janahá ra tsi yo tyín nditsa tsa jacacú ra tsi yo.

Ra Jesucristo quitsí ra cuvī ra rayi nu ñuhu ñayivi ihya

⁵ Nyoo ña tsaḥā ra tsa cundaca ñaha ángel ñuhu ñayivi tsa tsa cua coo tsa caahán yo tuhun vityín. ⁶ Tyín iyó iín nu tyaa iín ra nu tutu Nyoo tyehen:

Nyoo Jutu yu zyoó ra cuvī rayi nu ñuhu ñayivi ihya tyín ñuhú iñi un tsi ra?

¿Tan yóo ra cuvī ra tyín cutuñu iñi un tsa cuenda ra?

7 Tyin ndaahvi ca jahá un tsi ra juhva tyembu, tan ñavin ca ra ángel naha ra. Maa tyin jacahnú un tsi ra. Tan jahá un tsa ñayivi tsi ra.

Tan tsaḥá un tsa quihí ndaha ra tandihí tsa javahá un.

8 Tandihí can tyaá cuenda un ndaha ra.

Tan nduve maa náa ña tsaḥá cuenda Nyoo quihí ndaha ra. Tan ñaha ca nyehé yo tyaá yahvi tandihí yacan tsi ra. 9 Maa tyin nyehé yo tsi ra Jesús tyin nduluhlu ra jahá Nyoo juhva tyembu tan ñavin ca ra ángel naha ra. Tan janduluhlu Nyoo tsi ra tsa cuenda tsa cuñí xaan ra tsi yo. Tan tsaḥá ra tsi ra Jesús quitsj ra quitsj cúu ra tsa cuenda tandihí yo. Tan vityin jahá xaan Nyoo tsa cahnu tsi ra tan jacahnú xaan ra tsi ra tsa cuenda tundoho tsa nyehé ra quivi can.

10 Tandihí maa tsa iyó, tsa cuenda maa Nyoo cuví tsi. Maa ra javahá itsi. Tan cuñí ra kuhva ra tandihí tsa sñ caá tsa iyó andiví tsi tandihí sehe ra. Yacan cuenda janyehé ra tundoho tsi ra Jesucristo, ra tsa jacacú tsi yo, tan tsihin yacan janduvahá ra tsi ra. 11 Ra Cristo tsa jacacú tsi yo, Sehe Nyoo tsi ra. Tan juven ñi sehe Nyoo nanduvj yoo tsa tsinú iñi tsi ra. Yacan cuenda ña cahán nuu ra Cristo tsa caahán ra tyin yañi ra tan kuhva ra cuví tsi yo, tyin iin ñi Jutu yo tsihin ra. 12 Tyin catyj ra Cristo nu tutu Nyoo tyehen: Cua cahan yu tuhun un tsihin yañi yu. Tan cua jacahnu yu tsi un tsihin yaa nu ndu iin yo.

13 Catyj tucu ra tyehen:

Yuhu nyitá iñi yu tsi Nyoo.

Tan catyj tucu ra:

Ihya nyaá yu tsihin sehe Nyoo, tsa tsaḥá ra tsi yu, catyj ra.

14 Yoo tsa cuví yo nyivi ñuhu ñayivi, iyó cuñi ñuhu yo tan ñiñi yo. Tacan cuví ra Cristo, tyin tun tsa ña tsicoḡ cuñi ñuhu ra tan ñiñi ra, ña cua cuví cúu ra tan janaa ra tsi nu ña vaha, nu tsa tsaññi tsi nyivi.

15 Tacan javahá ra tan jacacú ra tsi nyivi tsa tsicoḡ yuuhví jahá tuhun tsihi. Cuví ñi tumaa musu nu ña vaha tyin tandihí ñi quivi tsicoḡ yuuhví ñi.

16 Tan tsa nditsa vaha tyin ña quitsj ra quitsj jatjinyee ra tsi ángel. Tyin quitsj ra quitsj jatjinyee ra tsi nyivi tata ra Abraham. 17 Yacan cuenda ñiñi cuñí tsi tsa cuví ra tumaa yoo tsa cuví yo yañi ra tan kuhva ra tyin tacan tan cuví ra iin ra cundaahvi iñi tsi yo, tan cuví ra jutu tsaahnu cuví ityi nuu tsa cuenda yo nuu Nyoo tyin jandaá ra tandihí maa tan quihín nyaa ra cuatyí yo tsihin tundoho tsa nyehé ra. 18 Tan tsa cuenda tsa nyehé ra tundoho quivi nducú kuhva nu ña vaha tsi ra, tsitó ra nácaa cuñí yo tun nyehé yo tundoho. Yacan vityin nyaá ra tsa jatjinyee ra tsi yo tun nyehé yo tundoho tsa nducú kuhva nu ña vaha tsi yo.

3

Cahnu ca cuví ra Jesús tan ñavin ca ra Moisés

1 Nyoooho, yañi, tsa jandu íi Nyoo, tan tsa nacatsj ra tyin coo ndo tsihin ra nda gloria, nyehé vaha ndo kuhva iyó ra Cristo Jesús, juven ra jaquitsj Nyoo tyin caca ra tyiñu ra tan cuví ra jutu tsaahnu cuví ityi nuu tsa cuenda yoo tsa tsinú iñi tuhun ra.

2 Ra Cristo javahá ra tandihí tsa cahan Nyoo tyin javaha ra, tumaa javahá tucu ra Moisés tyiñu tsa tsaḥá Nyoo tsi ra tsa jaha cuenda ra vehe Nyoo tsa cuví nyivi Israel. 3 Ra Jesucristo cahnu ca ra cuví ra, tan ñavin ca ra Moisés, tyin cuví ra tumaa iin ra javahá vehe. Tyin ra tsa javahá vehe cahnu ca ra cuví ra tan ñavin ca maa vehe tsa javahá ra. 4 Tyin maa ñi iyó ra javahá intuhun intuhun vehe, maa tyin Nyoo cuví ra tsa javahá tandihí maa tsa iyó. 5 Ra Moisés tyaá yahvi ra tsi Nyoo tan javahá ra tyiñu tsa tsaḥá Nyoo tsi ra tyin jahá cuenda vaha ra vehe Nyoo tsa cuví nyivi Israel, tan juven ñi jacoto tucu ra tsi nyivi tsa cua javaha Nyoo nu cuahán ca tsi. 6 Maa tyin ra Cristo, Sehe Nyoo, tyaá yahvi tucu maa ra tsi Nyoo tan juven ra cuví ra ndacá ñaha vehe Nyoo vityin. Vehe can cuví yoo tun iin ñi cuñí yo nyicún yo tsi Nyoo tan nyitá vaha iñi yo tsi ra nda cuanda nu ndihí, tan tacan ñi sñ cuñí yo ndatú yo tsa cua ñihi yo.

Nyivi tsinú iñi tsi Nyoo, quitatú ñi tsihin ra

7 Yacan cuenda cuñí tsi jaha cuenda vaha yo tsi yo tumaa catyj Tatyí lí Nyoo tyehen: Tatun tsiñí ndo tsa caahán Nyoo tsihin ndo vityin,

8 ña jandava ndo añima ndo, tumaa javahá nyivi tsa ña tyaá yahvi tsi Nyoo quivi nducú kuhva ñi tsi ra nu tsicá ñi nuu tsiquí.

9 Tyehen catyj Nyoo:

Tsii tsaahnu ndo nducú kuhva ñi tsi yu, vasu ndi maa nyehé ñi tsa javahá yu tsitsi tsa uvi xico cuiya.

10 Yacan cuenda cuxaan yu tsihin nyivi can, tan catyj yu tyehen: “Na iin maa cuñí nyivi ihya

tan ña cuñí ñi cunyicun ñi ityi janahá yu tsi ñi.”

11 Yacan cuenda cuxaan yu tsihin ñi, tan cahan catsi yu tsihin ñi, tyin ña cua quitatu ñi tsihin yu, catyj Nyoo.

12 Yacan cuenda yañi, jahá ndo cuenda tsi ndo tan ña caca uvi iñi ndo tsitsi añima ndo coto jandihí ndo tsa tsinú iñi ndo tsi Nyoo nyito tan coto nacoo ndo tsi ra. 13 Maa tyin jandu iin tahan ndo iñi ndo tandihí ñi quivi, tsitsi tsa tsaḥá tsi kuhva tsi ndo vityin. Tyin tacan tan ña cua ndundava añima ndo, tan ndi intuhun ndo tan ña cua jandavi ñaha tsa

caquiñi tsi ndo. ¹⁴ Tyin tun ña jandihí yo tsa nyitá iñi yo tsi Nyoo nda cuanda naa ñuhu ñayivi tumaa javahá yo nda quivi quitsahá yo, cua ñihí yo tsa vaha iin caa ñi tsihin ra Cristo tyin cunyeé iñi yo ndatu yo tsi ra.

¹⁵ Yacan tacan cuñi tsi jaha yo cuenda tsi yo tumaa catyí tutu Nyoo:

Tatun tsiñi ndo tsa caahán Nyoo tsihin ndo vityin

Ña jandava ndo añima ndo, tumaa javahá nyivi tsa ña tyaá yahvi tsi Nyoo —catyí tutu Nyoo.

¹⁶ ¿Yoo nyivi cuví ñi tsiñi tsa cahan Nyoo tan ña tyaá soho ñi? Nyivi ihya cuví nyivi Israel tsa tavá ra Moisés Egipto tahan tsanaha. Juvín ñi can ña tyaá soho. ¹⁷ Tan ¿yoo nyivi cuxaan Nyoo tsitsi tsa uvi xico cuiya? Juvín ñi maa ñi tyin tsicoo cuatyí ñi. Tan tsihi ñi nu tsiqui, juvín ñi maa nu tsicá ñi. ¹⁸ ¿Tan yoo tsihin cahan catsi Nyoo tyehen?:

—Ña cua quitatu ndo tsihin yu.

Juvín ñi tsihin ñi tsa ña tyaá soho can. ¹⁹ Ihya nyehé yo tyin ña cuví ñihí ñi quitatu ñi tsihin Nyoo tyin ña tsinu iñi ñi tsi ra.

4

¹ Yacan cuenda, tsitsi tsa ndi iyó ndatu tsa quitatu yo tsihin Nyoo, jaha ndo cuenda tsi ndo tyin tacan tan ndi intuhun ndo tan ña cua ndoo ihñi ndo. ² Vityin yoo tsiñi tucu yo tuhun Nyoo tsa jacacú ra tsi yo, tumaa tsa tsiñi tucu maa nyivi Israel can. Tsiñi ñi itsi, maa tyin nduve nacatyí tsa tsiñi ñi itsi tyin ña tsinu iñi ñi itsi. ³ Yoo tsa tsinu iñi tsi Nyoo, quitatu yo tsihin ra. [Maa tyin ña quitatu nyivi tsa ña tsinu iñi tsi ra] tyin catyí ra:

Yuhu cuxaan yu tsihin ñi tan cahan catsi yu tsihin ñi tyin ña cua quitatu ñi tsihin yu, catyí ra.

Vasu ndi maa [tacan cahan Nyoo tsihin ñi ican], maa tyin [tsa iyó tuhun tsa cuví quitatu yo tsihin Nyoo nda quivi] ndihí jahá tyiñu ra javahá ra ñuhu ñayivi. ⁴ Tyin yihí nu tutu Nyoo caahán tsi tyehen tuhun tsa tsinu utsa quivi nu ndihí vitya:

Tsa ndihí jahá tyiñu Nyoo, quitatu ra tsa tsinu utsa quivi.

⁵ Tan catyí tucu tsi tyehen:

Ña cua quitatu ñi tsihin yu, catyí Nyoo.

⁶ Nyivi tsa tsiñi jihna tuhun tsa jacacú Nyoo tsi yo ña cuví quitatu ñi tsihin ra, tsa cuenda tsa ña tyaá yahvi ñi tsa cahan ra tsihin ñi. Maa tyin vityin ndi iyó ndatu tsa quitatu inga nyivi tsihin ra. ⁷ Tsa yahá tsa ña tyaá yahvi nyivi Israel tsa cahan Nyoo, tan tyaá ra inga quivi cuví quitatu yo tsihin ra, tan quivi can cuví tyembu vityin. Tacan caahán Nyoo nu tutu ra nu tyaá ra David tyehen: Vityin tatun nyooho tan tsiñi ndo tsa caahán yu,

Ña jandava xaan ndo añima ndo, catyí Nyoo. ⁸ Tun tsatyn tsahá ra Josué nu quitatu nyivi Israel, ña cua cahan Nyoo tsa cuenda inga quivi. ⁹ Yacan cuenda cuví quitatu nyivi yihí cuenda ra tsihin ra. ¹⁰ Tyin nyivi quitatu tsihin Nyoo, ña tsicá iñi ñi tsa cuenda tyiñu jahá ñi tyin quitatu añima ñi tumaa quitatu Nyoo quivi ndihí jahá tyiñu ra. ¹¹ Cuñi tsi jañiñi yo nducu yo cuhva quitatu yo tsihin Nyoo, tyin tacan tan ndi intuhun yo tan ña javaha yo tumaa javahá nyivi tsicoo tsanaha tsa ña cuñi tsinu iñi tsi ra.

¹² Tyin tuhun Nyoo, nyito tsi, tan iyó tunyee iñi itsi. Tan xaan ca tsi tan ñavin ca mityi tsa xaan nduvi tsiyo tuhun. Tan jasiñ tsi tsa tsiñi tuñi jiñi yo tan tsa nyito yo, tan nu yihí tahan yiqui yo tan susun yihí tsitsi yiqui yo. Tan janahá tsi tun vaha o ña vaha tuhun xeehe tsa iyó añima yo tan tsa tsicá iñi yo. ¹³ Nduve maa tsa javahá Nyoo tan cuví cunu xeehe can nuu ra, tyin tandihí maa tan nyehé ra. Tan juvín tsi ra cua cuhva cuenda yo tsa javahá yo.

Ra Jesús cuví jutu tsaahnu cuví ityi nuu tsa caahán ndaahvi tsihin Nyoo tsa cuenda yo

¹⁴ Ra Jesús Sehe Nyoo, juvín ra cuví jutu tsaahnu cuví ityi nuu tsa cuenda yo, tyin quihvi ra nu nyaá Nyoo nda gloria tan caahán ndaahvi ra tsaha yo. Yacan cuenda na ña jandihí yo tsa tsinu iñi yo tsi ra. ¹⁵ Tyin ra tsa cuví jutu tsa cuenda yo cuví naquihin ndaahvi ra tsi yo tatun cuihya cuñi yo, tyin tsitó ra nácaa cuñi yo tun nyehe yo tundoho tyin maa ra nyehé tucu maa ra tandihí nuu tundoho quivi nducu cuhva nu ña vaha tsi ra, maa tyin ña tsicoo cuatyí ra. ¹⁶ Yacan cuenda cuñi tsi nanducu yo tsi Nyoo tan ndacan yo tsi ra tsihin tsa ña yuuhvi yo na cundaahvi iñi ra nyehé ra tsi yo tan cuhva ra tunyee iñi tsa iyó tsi ra tsi yo, tan jatyinyee ra tsi yo quivi nyehé yo tundoho.

5

¹ Tandihí ñi jutu tsaahnu tsa cuví ityi nuu tsa nacatsi Nyoo tsitsi tsa tandihí nyivi Israel, nacatsi ra tsi ra naha tyin cahan ndaahvi ra naha tsaha ñi, tan cuhva cuenda ra naha tsa jamañi ñi tsi Nyoo, tan cahñi ra quitu tsa cuenda cuatyí ñi. ² Tan vatsi tsaha juvín ñi ndaahvi cuñi ra cuví jutu quivi nducu cuhva nu ña vaha tsi ra, yacan cuenda cuví cundaahvi iñi ra nyehé ra tsi nyivi ña cutuñi vaha iñi tuhun Nyoo tan nyivi ña nyicún vaha tsi Nyoo. ³ Tan yacan cuenda tsahñi ra quitu tan jamañi ra can nuu Nyoo tsa cuenda cuatyí maa ra tan tsa cuenda cuatyí nyivi.

⁴ Ndi intuhun maa nyivi tan ña cuví cuví ñi jutu tun ñavin maa Nyoo nacatsi tsi ñi. Tyin maa Nyoo cuví ra nacatsi tsi ra cua cuví

jutu, tan tsahá ra ndatu tsi ra tsa cuví ra jutu, tumaa javahá ra tsihin ra Aarón tahan tsanaha. ⁵ Tan tacan tucu ra Cristo, ñavin maa ra tyaá tyiñu can tsi ra, tyin maa Nyoo tsahá tsa cuví ra jutu tsaahnu tsa cuví ityi nuu, tumaa catýj ra:

Yoocho cuví Sehe yu.

Yuhu tsahá yu ñayivi coo un vityin, catýj Nyoo tsihin ra Cristo.

⁶ Tumaa catýj tucu ra tsihin ra nu inga nu caahán tsi tyehen:

Ña cua cundihi maa tsa cuví yoocho jutu, tumaa cuví ra Melquisedec.

⁷ Quivi tsicoq ra Cristo nu ñuhu ñayivi ihya, tsicán tahvi ra tsi Nyoo, tsacu xaan ra cahan ra tsihin Nyoo tyin juvin ra cua jacacu tsi ra ndaha tuhun tsihi tsihin tunyee iñi tsa iyó tsi ra. Tsiñi Nyoo tuhun caahán ra tsa cuenda tyin javahá ra tandihi tsa catýj Nyoo tyin javaha ra. ⁸ Yacan cuenda vasu ndi maa Sehe Nyoo tsi ra Cristo, cutuhvá ra tyaá yahvi ra tsi Nyoo tsihin tsa nyehé ra tundoho. ⁹ Tsa yahá tsa javahá ra tandihi cuhva cuñi Nyoo tyin javaha ra, tacan tan tsahá Nyoo tsi ra tsa jacacú ra tsi tandihi nyivi tsa tyaá yahvi tsa caahán ra tyin tacan tan coo cuñi ñi tsihin Nyoo. ¹⁰ Tyin maa Nyoo tavá tyiñu tsi ra tsa cuví ra jutu tsaahnu cuví ityi nuu, tumaa cuví ra Melquisedec.

Na ña jandihi yo tsa tsinú iñi yo tsi Nyoo

¹¹ Cuví cahan cuaha yo siqui tuhun ihya, maa tyin yí xaan nacatyj tuhun yu nácaa cuahán tsi, tyin nyoocho ña cuñi ndo cutuñi iñi ndo. ¹² Tsa naha xaan yihí ndo cuenda ra Cristo, yacan tsa taahán tsi jacuaha ndo tsi inga nyivi. Maa tyin nyoocho cuví ndo tumaa cuví lee tsa tyaxín tsa ñaha ca cuví catsi tyin cuñi tsi tsa tyaá soho nyico ndo tuhun tsa tsiñi ndo tsa jihna ñi. ¹³ Tyin nyivi cuñi tyaá soho tuhun tsa ña yíi cuví ñi tumaa lee tsa tyaxín tyin ñaha ca cutuñi vaha iñi ñi nácaa coo vaha ñi tsihin Nyoo. ¹⁴ Maa tyin nyivi tsa cutuñi vaha iñi tan tsahnú ñi tsihin tuhun Nyoo, juvin ñi cuví tumaa iin nyivi tsa tsatsí nyayu tyin nacotó ñi ndáa tsa vaha tan ndáa tsa ña vaha.

6

¹ Yacan cuenda ña ndoo yo vaha maa ñi maa tsihin tuhun ra Cristo tsa cutuhvá yo tsa jihna ñi; na cuhun yo ityi nuu ca tyin tacan tan cuahnu ca yo tsihin tuhun Nyoo. Na ña ndoo yo vaha tsihin tsa tsa yahá cutuhvá yo: tsa ña nducu yo cuhva nduvaha yo nuu Nyoo tsihin tsa javahá yo, tan tsa jacacú Nyoo tsi yo tsihin tsa tsinú iñi yo tsi ra. ² Tan na ña ndoo yo vaha tsihin tuhun tsa cutuhvá yo cuenda tsa tsicoondutya yo, tan tsa tyisó ndaha yo siqui nyivi tsinú iñi tsi Nyoo na nasoco ra tsi ñi, tan tsa cuenda tsa cua nandoto tandihi nyivi tsa yaha cúu

ñi, tan tsa cuenda tucu tsa cua cutuñi tandihi nyivi nuu Nyoo tan yihí ñi cua cuhun cuñi ñi anyaya. Na ña ndoo yo vaha tsihin yacan ñi. ³ Nacuhun ca yo ityi nuu tatun Nyoo tsaha ra ndatu.

⁴ Tyin nyivi tsa tsa yahá naquihín cuenda tsa nditsin Nyoo tsitsi añima ñi, nacotó ñi tsa tsahá Nyoo, tan iyó Tatyj Ii Nyoo añima ñi.

⁵ Tan tsitó ñi tyin vaha tuhun Nyoo. Tan tsa nyehé ñi juhva nácaa cua cuví tsa cua coo yo nu ñuhu ñayivi tsa, tyin ñihí ñi tunyee iñi tsa iyó tsi Nyoo. ⁶ Tatun tsa naquihín cuenda ñi tandihi yacan, yaha can tan jandihi ñi tsa tsinú iñi ñi tsi Nyoo, ña cua cuví ca ndu uvi iñi ñi inga tsaha. Tyin tumaa tsa tyaá ñi tsi ra Cristo nu cruu inga tsaha cuví can, tyin tsacú nducu ñi tsi ra nu tuvi nyivi. ⁷ Añima nyivi cuví tsi tumaa ñuhu nu jahá tyiñu nyivi, tyin tandihi ñi tsaha tsa cuñ saví, nacohó ñuhu can ndutya saví can. Tatun vaha ñuhu can, vaha tsicoó tsa tatsí nyivi, tan nasocó Nyoo ñuhu can. ⁸ Maa tyin tatun caná maa ñi maa yutun tsa nduve tsiti tsahá tan caná iñu nuu tsi, nduve yahvi nyaá tsi. Ña nasocó Nyoo itsi, tan cua cahmí ra itsi. Tacan cua tahan nyivi tsa jandihi tsa tsinú iñi tsi Nyoo.

⁹ Yañi, vasu ndi maa caahán ndi tacan, maa tyin tsitó vaha ndi tyin nyoocho nasocó Nyoo tsi ndo tyin jacacú ra Cristo tsi ndo.

¹⁰ Tyin Nyoo, vaha xaan ra cuví ra, tan ña naá iñi ra tsa javahá ndo. Nyehé ra tyin cuñi xaan ndo tsi nyivi yihí cuenda ra, tan nyehé tucu ra tyin tsa yaha xaan jatyinyee ndo tsi ñi, tan ndi jatyinyee ca ndo tsi ñi vityin. ¹¹ Cuñi ndi tsa jañihi ca ndo ndu iin iñi ndo nda cuanda quitsi Jutu Mañi yo, tyin tacan tan ñihi ndo tandihi tsa ndatu ndo. ¹² Ña cuñi ndi tsa jutsan xaan jaha ndo tsi ndo, maa tyin cuñi ndi tsa coo ndo tumaa iyó nyivi tsa tsinú vaha iñi tsi Nyoo tan javaha ndo tumaa javahá ñi. Tyin ñi ican cunyeé xaan iñi ñi ndatu ñi, tan ñihí ñi tsa catýj Nyoo tyin cuhva ra tsi yo.

¹³ Tyin quivi tyihí Nyoo cuhva tyin cuhva ra tsa cua cuhva ra tsi ra Abraham, tsatyiñu ra juvin ñi sivi maa ra, tyin ña cuví cuatyíñu ra náa inga ca sivi tyin nduve nyivi cahnu ca cuví tan ñavin ca maa ra. ¹⁴ Tan catýj ra tsihin ra Abraham tyehen: “Tsa nditsa tyin cua nasoco xaan yu tsi un tan cuaha xaan tata un cua cuví jaha yu”, catýj ra tsihin ra. ¹⁵ Ra Abraham ñihí ra tsa catýj Nyoo tsihin ra tyin cuhva ra tsi ra tsa cuenda tsa tsinú iñi ra tan cunyeé iñi ra ndatu ra can. ¹⁶ Iin nyivi tun tyihí ñi cuhva tsa cuhva ñi tsa cua cuhva ñi tsi yo, tsatyíñu ñi sivi iin nyivi cahnu ca cuví tan ñavin ca maa ñi. Tsihin yacan ndoo ñi tuhun tsihin yo. ¹⁷ Nyoo tsatyíñu ra juvin ñi sivi maa ra quivi catýj ra tyin cuhva ra tsa cuhva ra tsi nyivi ra. Javahá ra tacan tyin cuñi ra tsa coto ñi tyin cua jandaa ra

tsa cahān ra tsihin ñi tan ña cua nasamá tuhun cahān ra. ¹⁸ Tan iyó uvi taahan tsa ña cuvī nasama. Iin tsi cuvī tsa cuhva Nyoo tsa catyī ra tyin cuhva ra tsi yo, tan inga tsi cuvī tsa tsatyīñú ra juvin ñi sivi maa ra. Nyoo ña vatyā ra. Yacan cuenda tandihī yoo tsa nyanaá tsi ra, ñi cuñi yo nyitá iñi yo tsi ra, tan ndatú yo tsa ñihī yo tsa catyī ra tyin cuhva ra tsi yo. ¹⁹ Tumaa iin yutun ndoo tsa tsicá nuu ndutyā ñuhu nuuhñi tsi tsihin iin caa vee coto cuhun tsi tsihin tatyī, tacan nyitá iñi yo tsa jacacú ra Cristo tsi yo. Tan tsa nyitá iñi yo tsi ra, cuvī tsi tumaa tsa nuuhñi yo tsihin Nyoo ra nyaá Nu Ii Xaan inga tsiyo nu natahvī sava jahā jahma. ²⁰ Ican quihvī ra Jesús tyin tacan tan nuñā ra ityi cuhun yo nu nyaá Nyoo. Tan ña cua cundihī maa tsa cuvī ra Jesús jutu tsaahnu cuvī ityi nuu, tumaa cuvī ra Melquisedec.

7

Ra Jesús cuvī ra jutu tumaa cuvī ra Melquisedec

¹ Ra Melquisedec tsa caahán yu tuhun ihya, juvin ra cuvī rey ñuu Salem, tan cuvī tucu ra jutu cuenda Nyoo, ra cahnu ca cuvī tan ñavin ca tandihī tsa iyó. Quivi tsa vatsi nuhu ra Abraham naha ra tsa yahā tsañān ra naha tsicañi tahan ra naha tsihin ra cuvī rey naha ra, tan jahā canaa ra naha, ra Melquisedec jatañān ra tsi ra naha tan nasocó ra tsi ra Abraham. ² Tan cuaha tsa ñihī ra Abraham nu tsañān ra tsicañi tahan ra. Tsitsi tsa utsi utsi nuu tsa ñihī ra, tsañān ra intuhun intuhun can tsi ra Melquisedec. Melquisedec cuñi tsi catyi: “Rey tsa javahá tsa vaha.” Tan juvin ñi cuvī tucu ra rey ñuu Salem, tan Salem cuñi tsi catyi “tsa taxin”. Yacan cuenda cuvī ra: “Rey tsahá tsa taxin.” ³ Ra Melquisedec nduve jutu ra tan sihi ra. Ña caahán tsi tun iyó nyivi ra, tan ndi ña caahán tsi ama cacū ra, tan ama tsihi ra. Yacan cuenda cuvī jandu inducu yo tsi ra tsihin Sehe Nyoo, tyin ña tsindihī maa tsa cuvī ra jutu.

⁴ Nyehé yo ihya vityin tyin cahnu xaan cuvī ra Melquisedec, tyin tsañān ra Abraham juhva tsa ñihī ra nu tsicañi tahan ra tsi ra. ⁵ Tun tsatyin tata ra Abraham cuvī ra Melquisedec, tan cuvī ra jutu, ña iyo cua cuñi yo tsa tsañān ra Abraham juhva tsa ñihī ra tsi ra, tyin tsa yahā cuaha cuiya tan tsañān Nyoo ley tsi nyivi tata ra Abraham. Tan catyi ley can tyin taahán tsi cuhva juhva tsa ñihī ñi tsi ra jutu tsa cuvī tata ra Leví naha ra, vasu ndi maa iin ñi nyivi cuvī ñi tsihin ra naha tyin juvin ñi tata ra Abraham cuvī ra naha. ⁶ Ra Melquisedec, vasu ndi maa ñavin tata ra Leví, tan tata ra Abraham cuvī ra, maa tyin naquihñin cuenda ra juhva tsa ñihī ra Abraham. Tan nasocó ra Melquisedec tsi

ra Abraham, ra tsa catyi Nyoo tsihin tyin cua cuhva ra tsa cuhva ra. ⁷ Tan tsitó catsi yo tyin cahnu ca cuvī ra tsa nasocó, tan ñavin ca ra tsa nasocó ra. ⁸ Nyehé yo tyin cahnu ca cuvī ra Melquisedec tan ñavin ca tandihī ra tsa quihñin cuenda intuhun intuhun tsi tsa utsi utsi tsa ñihī nyivi, tyin rayiñi ñuhu ñayivi ihya ñi cuvī ra naha, tan tuhvá ra naha tsihi. Maa tyin caahán tsi nu tutu Nyoo tan catyi tsi tyin ra Melquisedec nyito ra. ⁹ Ra Leví tsihin sehe ra, tata ra Abraham cuvī ra naha. Juvin ra naha cuvī jutu tsa naquihñin tsa intuhun intuhun tsitsi tsa utsi utsi tsa ñihī nyivi. Cuvī catyi yo tyin tandihī ra can naha ra tyahvī ndihī ra naha tsi ra Melquisedec quivi tyahvī ra Abraham tsi ra. ¹⁰ Cuvī catyi yo tyin tyahvī ndihī tata ra Leví tsi ra Melquisedec quivi ñihī tahan ra tsihin ra Abraham tyin tata ra Abraham tsi ra naha vasu ndi maa ñaha ca coo ra naha quivi can.

¹¹ Ra jutu tata ra Leví tsa cuvī tucu tata ra Aarón, juvin ra naha jacuahá ley tsahnu Nyoo tsi yo. Vaha vityin; tun tsatyin cuvī janduvahá ra jutu can naha ra tsi nyivi nyicún ley can, ña ñiñi cuñi tsi quitsi inga jutu, ñavin jutu tumaa ra Aarón maa tyin jutu tumaa ra Melquisedec. ¹² Tyin tun nasamá Nyoo tsi ra cuvī jutu, nasamá tucu ra ley ra. ¹³ Jutu Mañi yo tsa caahán tutu Nyoo tuhun, tata inga ra sehe ra Israel cuvī ra. Tan ndi intuhun tata ra can tan ña cuvī ra naha jutu. ¹⁴ Tsitó vaha yo tyin Jutu Mañi yo tata ra Judá tsi ra, tan ra Moisés ña cahān ra tuhun tata ra Judá quivi cahān ra tuhun ra cuvī jutu naha ra.

¹⁵ Nditisa tsa nasamá Nyoo tsi ra jutu tyin jaquitsi ra iin jutu tumaa ra Melquisedec. ¹⁶ Ra jutu ihya ña quitsi ra tumaa catyi ley tsahnu, tyin ley can catyi tsi tyin maa ñi tata ra Leví taahán tsi cuvī jutu, tan ra can ñavin tata ra Leví cuvī ra. Maa tyin iyó tunyee iñi tsi ra tsa coo cuii ra, yacan cuenda juvin ra jaquitsi Nyoo. ¹⁷ Tyin tyehen caahán Nyoo tuhun ra:

Yooho ña cua ndihī maa tsa cuvī un jutu, tyin cuvī un jutu tumaa ra Melquisedec.

¹⁸ Yacan cuenda nacóo Nyoo ley tsahnu can tyin ña cuvī jatyinyee tsi tsi nyivi, tan ña cuvī cacu nyivi jahá tsi. ¹⁹ Ley can ña cuvī janduvahá tsi tsi nyivi nu Nyoo. Yacan cuenda tsañān ra inga tsa vaha ca tsi yo. Tan tsa vaha ihya jatyinyee tsi tsi yo tsa cuvī natuhún yo tsihin Nyoo. Yacan cuenda nyitá iñi yo tuhun can, tan tuhun can cuvī ra Cristo.

²⁰ Nyoo cahān catsi ra tyin tacan cua cuvī, tan tacan cuvī. ²¹ Tandihī ca maa ra jutu tsa iyó vityin naha ra nduve náa cahān Nyoo tuhun ra naha. Maa tyin quivi tsañān Nyoo tsi ra Cristo tsa cuvī ra jutu, cahān catsi ra tsihin ra tumaa caahán nu tutu ra tyehen:

Cahañ catsi Jutu Mañi yo, tan ña nasama ra tsa cahañ ra nu catyi ra tyeheh:

“Yooho ña cua ndihi maa tsa cuví un jutu, tyin cuví un jutu tumaa ra Melquisedec”, catyi Nyoo.

²² Tsa cuenda tsa javahā ra Cristo, tan tsitó yo tyin vaha ca tyiñu ndoq Nyoo tsihin yo tan ñavin ca tsa jihna ñi can. ²³ Jutu tsa cuví tata ra Leví cuaha xaan ra naha tsa cuenda tyin tun tsiihí iin ra, nacosó inga ra. ²⁴ Maa tyin ra Jesús nduve tuhun tsiihí iyó tsi ra, yacan cuenda ña tsindihí tsa cuví ra jutu. ²⁵ Tan tsa cuenda yacan cuví jacacu ra tsi nyivi tsa nanducú tsi Nyoo. Tan tsahá ra tsa coo cuii ñi tsihin Nyoo tyin tacan ñi iyó maa ra tan tsicán tahvi ra tsi Nyoo tsa cuenda ñi.

²⁶ Ra Jesús cuví jutu tsaahnu cuví ityi nuu tsa tsiiñiñuhú tsi yo tyin ii ra, tan ña javahá ra tsa caquiñi, tan nduve cuatyí ra iyó tan quita tsiyo ra nu iyó nyivi iyó cuatyí tan nandaq ra ityi siqui andivi. ²⁷ Ra Jesús ñavin tumaa inga ra jutu tsaahnu can naha ra cuví ra, tyin ra ican naha ra cuñí tsi cahñi ra naha quiti tan jamañi ra naha nuu Nyoo tandihí ñi quivi. Jihna ca jamañi ra naha quiti tsa cuenda cuatyí maa ra naha, yaha tan jamañi ra naha tsa cuenda cuatyí tandihí nyivi. Maa tyin ra Jesús iin tsaha ñi jamañi ra juvin ñi tsi maa ra nuu Nyoo tan tsa cuenda cuatyí tandihí yo. ²⁸ Ley Nyoo tsa naquihñin cuenda ra Moisés, tsahá tsi ndatu tsa cuví ra naha jutu tsaahnu vasu ndi maa iyó cuatyí ra naha. Maa tyin tsa yaha quitsi ley can, cahañ catsi Nyoo tan ndoq ra iin tuhun tsa tsihin yo. Tan tsahā ra tsi Sehe ra tsa cuví ra jutu tsaahnu cuví ityi nuu ca. juvin ra cuví ra vaha tan ña cua cundihí maa tsa vaha ra.

8

Quivi tsihi ra Jesús tsa cuenda yo tan ndoq Nyoo tuhun tsa tsihin yo

¹ Yacan tuhun ihya cuví tsa ñiñi ca caahán yu: Ra jutu tsaahnu tsa iyó tsi yo ndi in-tuhun cuatyí ra nduve iyó, tan juvin ra tsinyaq nu tyayu tsa nyaá xiin cuaha Nyoo nda gloria. ² Tan ra jutu ihya jahá tyiñu ra vehe ñuhu nu nyaá Nyoo. Vehe ñuhu tsa juvin ñi maa Nyoo Jutu yo javahā tan ñavin vehe ñuhu tsa javahā nyivi. Tyin vehe ñuhu tsa javahā nyivi cuví tsi tixahñu tsa vaha tsa iyó nda gloria. ³ Tandihí ra jutu naha ra, cuñí tsi cahñi ra naha quiti tan jamañi ra naha nu Nyoo tyin jaha Nyoo tucahnu iñi tsi ra naha tan tsi nyivi. Yacan cuenda cuñi tsi jamañi ra Jesucristo tsa jamañi ra nuu Nyoo. ⁴ Tun tsatyin nyii ra nu ñuhu ñayivi ihya, ndi ña cuví cuví ra jutu. Tyin nu ñuhu ñayivi ihya, iyó ra jutu tsa jamañi nuu Nyoo tsa catyi ley tsa tyaq ra Moisés tyin jamañi ra naha. ⁵ Ra jutu tsa iyó nu

ñuhu ñayivi ihya naha ra, jahá tyiñu ra naha tsitsi vehe ñuhu tsa cuví tixahñu tsa iyó nda gloria. Tan tsitó yo tyin tixahñu ñi cuví tsi, tyin tahañ tsanaha quivi tsa cua javaha ra Moisés vehe ñuhu jahma, catyi Nyoo tsihin ra tyeheh: “Jaha cuenda vaha, tan javaha tandihí tumaa janahā yu tsi un quivi tsahañ un yucu Sinaí”, catyi Nyoo tsihin ra. ⁶ Maa tyin ra Cristo ra cuví jutu tsaahnu cuví ityi nuu tsa cuenda yo, vaha ca tyiñu javahá ra tan ñavin ca tsa javahá inga ca ra jutu naha ra, tyin tsa cuenda maa ra, ndoó Nyoo tuhun vaha xaan ca tsihin yo, tan vaha ca tsa tsahá ra tsi yo.

⁷ Tun tsatyin cuví cacu yo jahá tuhun tsa ndoq jihna Nyoo tsihin yo, ña cuñí tsi tsa ndoo ra inga tuhun tsa tsihin yo. ⁸ Maa tyin Nyoo nyehē ra tyin ña vaha javahá nyivi can tsihin tuhun tsa ndoo jihna ra tsihin ñi, tacan tan caahán ra tuhun ñi nu tutu ra tan catyi ra tyeheh:

Cua tsa quivi
cua ndoo yu tuhun tsa tsihin nyivi Israel
tan nyivi Judá.

⁹ Maa tyin ñavin tumaa tuhun tsa ndoq yu tsihin tsii tsaahnu ñi,
quivi tiñ yu ndaha ñi tan tava yu tsi ñi ñuhu
Egipto.

Ña javahā ñi tuhun ndoq yu tsihin ñi,
yacan nacoq ihñi yu tsi ñi, catyi Nyoo Jutu
yo.

¹⁰ Tuhun tsa tsa cua ndoo yu tsihin nyivi
Israel nu cuahán ca tsi ityi nuu, cuví
tsehe, catyi Nyoo Jutu yo:

Cua tyihi yu ley yu tsitsi tsa tsiiñi tuñi jiñi ñi,
tan cua tya tucu yu itsi añima ñi.
Tacan tan cua cuví yu Nyoo ñi,
tan maa ñi cua cuví nyivi yu.

¹¹ Tacan tan ña ñiñi ca tsa jacuahá ñi tsi inga
ñi, na nacoto ñi tsi yuhu tsa cuví yu
Nyoo ñi.

Tyin tandihí ñi tan cua nacoto ñi tsi yu,
ñi nyihi tan nda cuenda ñi tsahnu.

¹² Cua jaha yu tucahnu iñi tsi ñi vasu ndi
maa cuaha tsa caquiñi javahá ñi.

Tan ña cua nducuhun ca maa iñi yu cuatyí
ñi, catyi Nyoo Jutu yo.

¹³ Quivi tsa cahañ Nyoo tyin cua ndoo ra
tuhun tsa tsihin yo, tsa jandutsahnu ra
tuhun tsa jihna ñi can. Tan tuhun tsa ndut-
sahnú tsa cua cundihí tsi.

9

Nu janahá tsi nácaa iyó vehe ñuhu tsa iyó nu ñuhu ñayivi tan vehe ñuhu nu cuví nda gloria

¹ Quivi ndoq Nyoo tuhun tsa jihna ñi tsi-
hin nyivi, tsahā ra ruhva nácaa jacahnu ñi
tsi ra, tsitsi vehe ñuhu tsa tsicoq nu ñuhu
ñayivi ihya tahañ tsanaha. ² Tyeheh tsicoq
vehe ñuhu can: Tsitsi vehe tsa jihna ñi nyaaq

candileru, tan nyaq mesa nu yucu paan ii. Tan yaceru tsinañi Vehe li. ³ Tan vehe tsa tsinu uvi tsinañi Vehe li Xaan. ⁴ Tsitsi vehe can tsinyaq altar xuhun cuaan nu tsahmj ra jutu cutu. Tan tsinyij tucu tsatun cuenda tsa ndog Nyoo tuhun tsihin yo, tsa ndasi tsihin xuhun cuaan. Tsitsi tsatun can tsinyij yatsin xuhun cuaan nu yihí maná. Tan tsinyij yutun tsa tsindahá ra Aarón tsa quita ita nuu. Tan tsiyucu tucu yuu nu nyaá tsa utsi ley Nyoo. ⁵ Tan siqui tsatun can tsinyaq tsa caá tumaa caá ángel, tan cuñi tsi catyi tyin nyaá Nyoo ican. Ndsitsin ángel can tyasi nu tuhvá Nyoo jahá tucahnu iñi tsi nyivi. Tsa vityin ña cuví nacatyí tuhun ca ndi siqui tuhun ihya.

⁶ Tacan tsicoq vehe ñuhu can. Tandihí ñi quivi quihví ra jutu naha ra tsitsi Vehe li, tan jacahnú ra naha tsi Nyoo. ⁷ Maa tyin Vehe nu li Xaan, intuhun ñi maa ra jutu tsaahnu cuví ityi nuu cuví quihví ican, tan iin tsaha ñi taahán tsi quihví ra tsa iin cuiya. Tsa cua quihví ra, cuñi tsi cundaha ra niñi quiti tyin jamañi ra itsi tsi Nyoo tsa cuenda cuatyí maa ra tan cuenda cuatyí nyivi, ñi tsa javahá soho ñi maa cuatyí. ⁸ Tan tsa tacan tsicoq yacan Tatyí li Nyoo janahá ra tsi yo tyin tsitsi tsa ndi jacahnú ra jutu naha ra tsi Nyoo tsitsi Vehe li cuñi tsi catyi tyin ñaha ca nuña ityi quihví ndáa nyivi tahan ñi maa tsi tsitsi Vehe nu li Xaan. ⁹ Tandihí yacan cuví can tumaa tixahñu tuhun tsa tsa ndog Nyoo tsihin yo vityin. Tahán tsanaha jamañi nyivi tsa jamañi ñi nu Nyoo maa tyin ña jatyinyeç can tsi nyivi tsa jacahnú tsi Nyoo tsihin can, tsa caca vaha iñi ñi. ¹⁰ Tyin tandihí tsa javahá nyivi can caahán tsi maa ñi tsa cuenda tsa tsahá Nyoo ndatu catsi ñi, tan coho ñi, tan nácaa nduvaha cuñu ñuhu ñi nuu ra. Tsahá ra tsa javahá ñi tacan tsa nuni ñi, nda tahan maa tsi quivi cuhva ra tsa vaha ca.

¹¹ Vityin tsa yahá quitsj ra Cristo tsa cuví jutu tsaahnu cuví ityi nuu tsa cuenda tuhun vaha ca tsa ndog Nyoo tsihin yo. Quihví ra tsitsi vehe ñuhu vaha ca, tan ii ca. Tan ña quihví ra tsitsi vehe ñuhu tsa javahá nyivi. Yacan cuñi tsi catyi tyin ñavin vehe ñuhu iyó nu ñuhu ñayivi ihya cuví nu quihví ra. ¹² Ra Cristo quihví ra tsitsi Vehe li Xaan. Maa tyin ña quihví ra tsihin tsa jamañi ra niñi mbee lee, o niñi indiqui lee. Quihví ra tsihin niñi maa ra, tan iin tsaha ñi quihví ra tan ña cuñi ca tsi tsa cuenda quihví ñi ra tyin jamañi ra niñi maa ra. Tsihin yacan jacacú cuii ra tsi yo. ¹³ Ra jutu naha ra tuhvá ra naha quiti niñi toro, niñi mbee, tan nyaa nu cayú indiqui lee tsi nyivi. Tsihin yacan nduvahá ñi nuu Nyoo, maa tyin maa ñi cuñu ñuhu ñi nduvaha, tan ña nduvahá añima ñi. ¹⁴ Tun tacan jatyinyeç niñi quiti can tsi nyivi, cuñi tsi catyi tyin jñiñi ra Cristo cahnú ca

tunyee iñi iyó itsi! Tyin nduve cuatyí ra tsicoq tan jamañi ra juven ñi tsi maa ra nuu Nyoo jahá Tatyí li tsa ña cua cúu maa. Tan niñi ra quihín nyaq tsa ña vaha tsa iyó añima yo tyin tacan tan ña cuita ca iñi yo ley tsa tsahá tuhun tsihi tsi yo, tan cuví jaha tyiñu yo tyiñu Nyoo nyito.

¹⁵ Yacan cuenda ra Jesucristo cuví ra caahán ndaahvi tsaha yo tsa cuenda tuhun tsa tsa ndog Nyoo tsihin yo. Tan tsa cuenda tsa tsihi ra, jahá Nyoo tucahnu iñi tsi yo tsa cuenda cuatyí tsa javahá yo quivi yihí ndaha tuhun jihna ñi can tsi yo. Tyin tacan tan yoo, tsa caña Nyoo cuví naquihin cuenda yo ñayivi tsa ña cua naa maa coo yo, tsa catyi ra tyin cuhva ra tsi yo. ¹⁶ Tun iin nyivi tsihi tan nacoq ñi iin tutu nu tsahá cuenda ñi yóo nyivi cua naquihin tsa iyó tsi ñi, nyivi tsa cua naquihin ndaha tyiñu can cuví naquihin ñi can, maa tyin cuñi tsi janaha ñi iin tutu cuví tsandaa tyin nditsa tsa tsa tsihi ra tsa javahá tutu can. ¹⁷ Maa tyin tun ndi nyito ra jatsii ndaha tyiñu can, ña cuví naha naquihin ñi ndaha tyiñu ra. ¹⁸ Yacan cuenda quivi ndog Nyoo tuhun tsahnu can tsihin nyivi Israel, tsahñi ra jutu naha ra quiti tan tsatj niñi ti naha ti. ¹⁹ Tsa ndihí tsahá cuenda ra Moisés ley Nyoo tsi tandihí nyivi, tan quihín ra jahma cuaha tsa tsinu tsihin ixi mbee ticatyí tan iin soco yutun luhlu tsa nañi hisopo, jatyi ra can tsitsi nu yihí niñi indiqui lee tan niñi mbee luhlu tsa sacá nuu tsihin ndutya. Tacan tan quiti ra niñi can nu libru nu nyaá ley Nyoo tan quiti ndihí tucu ra can tsi nyivi. ²⁰ Tacan tan catyi ra tsihin ñi tyehen: “Niñi ihya cuví tsandaa tsa cuenda tsa ndog Nyoo tuhun tsihin yo”, catyi ra. ²¹ Tan juven ñi quiti tucu ra Moisés niñi can vehe ñuhu jahma can tan tandihí ndaha tyiñu tsa tsatyíñu ra jutu naha ra tsa jacahnú ra naha tsi Nyoo. ²² Tacan javahá ra naha tyin catyi ley Nyoo tyin tsa yatyin tandihí tsa iyó tan cuñi tsi nduvaha can nuu Nyoo tsihin niñi. Juven ñi catyi tucu tsi tyin tun ña cati niñi ña cua jaha Nyoo tucahnu iñi tsi nyivi.

Niñi ra Cristo nacatyá cuatyí yo

²³ Javahá ra jutu naha ra tacan tyin cuñi tsi tsa nduvaha tandihí ndaha tyiñu tsa cuví tixahñu tsa iyó nda gloria tsihin niñi quiti. Maa tyin tandihí tsa iyó nda gloria, cuñi tsi nduvaha can tsihin niñi vaha ca, ñavin tsihin niñi quiti ñi. ²⁴ Ra Cristo ña quihví ra tsitsi vehe ñuhu tsa javahá nyivi tsa cuví tixahñu vehe ñuhu tsa nditsa. Tyin quihví ra tsitsi vehe ñuhu tsa nditsa tsa cuví gloria. Tan vityin nyaá ra caahán ndaahvi ra tsihin Nyoo tsa cuenda yo. ²⁵ Ra jutu tsaahnu cuví ityi nuu cuenda nyivi Israel quihví ra naha tsitsi Vehe li Xaan iin tsaha ñi tsa iin iin cuiya tyin jamañi ra naha niñi tsa ñavin niñi maa ra

naha cuví. Maa tyin ra Cristo, ña cuñí tsi tsa jamañi ra tsi ra tañi tañi ñi nuu Nyoo. ²⁶ Tun tsatyin tacan, cuñí tsi tsa cuenda quítsi ñi ra nyehe ra tundoho tan cúu ra nda tsa tsinu ñuhu ñayivi tan nda cuanda vityin. Maa tyin vityin tsa tsa cuyatyin cundihi ñuhu ñayivi ihya, iin tsaha ñi quítsi ra Cristo, tan jamañi ra tsi ra tyin tacan tan cuví quihin nyaa ra cuatyí yo. ²⁷ Tumaa cua tahan yo: iin tsaha ñi cua cúu yo. Yaha can tan cua cutuñi yo. ²⁸ Tacan iin tsaha ñi tsihi ra Cristo, tan quihin nyaa ra cuatyí cuaha xaan nyivi. Yaha can tan cua quítsi ra tsinu uvi tsaha, ñavin ca tsa quítsi jamañi ra tsi ra tsa cuenda cuatyí, tyin cua quítsi ra quítsi jacacu ra tsi nyivi ndatú tsi ra.

10

¹ Ley Nyoo tsa tyaa ra Moisés cuví tsi tumaa iin tixahñu tsa vaha ca tsa cua quítsi. Tsa catyí ley can, ña cuví janduvaha tsi tsi nyivi nanducú tsi Nyoo tyin maa ñi maa ñi quíti jamañi ra jutu tsaahnu cuví ityi nuu naha ra tan iin tan iin cuiya. Tan ña cuví cacu yo tsihin yacan. ² Tun tsatyin cuví janduvaha ley can tsi nyivi, cua cundihi tsa jamañi ra jutu naha ra ñi quíti tandihi ñi cuiya. Tyin tun tsa nduvaha nyivi tsa tsaha quíti can iin tsaha tsa cuenda tandihi maa, ña cua caca ca iñi ñi tun iyó cuatyí ñi tan ña cuñí ca tsi tsa jamañi ra jutu ñi quíti tsa cuenda ñi inga tsaha. ³ Maa tyin tsa jamañi ra jutu naha ra ñi quíti tan iin tan iin cuiya, janducuhñi iñi tsi tsi nyivi iyó cuatyí ñi. ⁴ Tyin ñi indiqui tan ñi mbee lee, ña cuví nacatya can cuatyí nyivi.

⁵ Yacan cuenda catyí tutu Nyoo tyin ra Cristo cahan ra tyehen tsihin Nyoo:

Ña cuñí un tsa jamañi nyivi quíti nuu un, yacan cuenda tsaha un tsa coo cuñu ñuhu yu.

⁶ Tyin ña taahán iñi un tsa cahmi ñi quíti tan jamañi ñi nuu cun tan quihin nyaa un cuatyí ñi.

⁷ Tacan tan catyí yu: “Nyoo Jutu yu, va yu ihya, vatsí yu vatsí javahá yu cuhva cuñí maa un

tumaa nyaá tuhun yu nu libro ley maa un”, catyí ra Jesucristo.

⁸ Tsa jihna ñi, catyí ra Jesucristo tyin Nyoo, ña taahán iñi ra tsa jamañi nyivi quíti nuu ra. Ndi tsa cahmi ñi quíti tan quihin nyaa ra cuatyí ñi. Ndi intuhun yacan tan ña taahán iñi ra vasu ndi maa catyí ley tsahnu tyin cuñí tsi jamañi nyivi quíti nuu ra, catyí ra.

⁹ Yaha can tan catyí tucu ra: “Nyoo Jutu yu, va yu ihya, vatsí yu vatsí javaha yu cuhva cuñí maa un.” Tuhun ihya cuñí tsi catyí tyin quítsi ra jatsiyo cuii ra tsa jamañi nyivi tan jamañi ra tsa vaha ca. ¹⁰ Tsa cuenda tsa javahá ra Jesucristo cuhva cuñí jutu ra tan janduvahá jutu ra tsi yo. Tsa javahá ra cuví

tsa jamañi ra juvin ñi tsi maa ra. Javahá ra tacan iin tsaha ñi tsa cuenda cuatyí nyivi.

¹¹ Tandihí ñi quivi tan jamañi ra jutu cuenda nyivi Israel naha ra quíti nuu Nyoo, tan cuaha xaan tsaha jamañi ra naha iin ñi maa nuu quíti maa tyin ña cuví quihin nyaa can cuatyí nyivi. ¹² Maa tyin ra Jesucristo, iin tsaha ñi jamañi ra tsi ra nuu Nyoo tsa cuenda cuatyí yo. Tacan tan tsinyaa ra nu tyayu nyaá xiin cuaha Nyoo. ¹³ Tan ndatú ra nda cuanda caquin Nyoo tsi nu xaan iñi tsi ra nahnu tsaha ra tyin cuañi ra siqui nahnu. ¹⁴ Tyin tsihin tsa jamañi ra tsi ra iin tsaha ñi tan janduvahá ra tsi nyivi yihí cuenda ra yoso cuahán quivi. ¹⁵ Tatyí Ii Nyoo juvin ñi janahá tucu ra yacan tsi yo. Tsa jihna ñi catyí ra tsihin yo tyehen:

¹⁶ Tuhun tsa tsa cua ndoo yu tsihin nyivi quivi can, tyehen cua cuví tsi, catyí Jutu Mañi yo:

Cua tyihi yu ley yu tsitsi añima ñi, tan cua tyaa yu itsi tsitsi tsa tsiñi tuñi iñi ñi, catyí ra.

¹⁷ Tan juvin ñi catyí tucu ra:

Ña cua nducuhun ca maa iñi yu cuatyí ñi, tan ndi tsa caquiñi javahá ñi, catyí Jutu Mañi yo.

¹⁸ Yacan cuñí tsi catyí tyin tsa yaha jaha Nyoo tucahnu iñi tsi yo. Yacan cuenda ña cuñí ca tsi cahñi yo quíti, tan jamañi yo nuu Nyoo tsa cuenda cuatyí yo.

Cuñí tsi nanducu yo tsi Nyoo

¹⁹ Yacan cuenda yañi, vityin cuví quihvi yo tsitsi Vehe Ii Xaan nu nyaá Nyoo, tsa cuenda ñi ra Jesucristo tsa tsatí. Tsihin ñi can nacatya ra cuatyí yo. ²⁰ Tan nuña ra ityi tsa, tan iin ityi cuhun yo nu coo nyito yo. Tyin cuhva tsa tsihi ra tan ndata jahma tsa tyasi tsa ña cuví quihvi yo nu nyaá Nyoo. Tsa ndata jahma can, cuví tsa tsihi ra Cristo, tyin tacan tan cuví cuhun yo nu nyaá Nyoo. ²¹ Ra Jesús cuví jutu tsaahnu cuví ityi nuu tsa ndaca ñaha tsi nyivi yihí cuenda Nyoo. ²² Yacan cuenda cuñi tsi nanducu yo tsi Nyoo tsihin tsa nditsa tan tsihin tsa ñi iñi añima yo tsinu iñi yo tsi ra. Tyin maa ra janduvahá añima yo, yacan cuenda tsitó yo tyin nduve ca cuenda yo nyaá tsi ra tsa cuenda cuatyí yo, tan tumaa tsa nacatya ra cuñu ñuhu yo tsihin ndutya cuii, tan nduvahá yo nuu Nyoo. ²³ Na ndu iin ca iñi yo tsinu iñi yo tsi Nyoo tan na ña ndu uvi iñi yo, tyin Nyoo cua cuhva ra tsa catyí ra tyin cuhva ra tsi yo. ²⁴ Tan cuñi tsi nanducu yo cuhva jatinyee tahan yo tsi yo, na cuñi tahan ca yo tsi yo tan javaha yo tsa vaha. ²⁵ Na taahán tsi jandihí ndo tsa tsicá ndo tuhun Nyoo tumaa javahá inga nyivi tsa ña tsicá vaha. Tyin cuñi tsi jandu iin tahan yo iñi yo. Vityin tsa tsa nyehé yo tyin tsa cuyatyin quítsi nyico Jutu

11

Mañi yo tan cua jacutuñi ra tandihí nyívi, cuñí tsi tsa jatinyee tahan ca yo tsi yo.

²⁶ Tyin tun tsa tsitó yo tsa nditsa tan javaha ca maa yo tsa ña vaha, nduve ca nácaa javaha yo tan cuví jaha Nyoo tucahnu iñi tsi yo. ²⁷ Cua tatsi tuñi Nyoo tsi yo. Tan cua tyihí ra tsi yo nu yucú nyívi xaan iñi tsi ra. Tan ican cua cayu yo iin caa ñi tsihin ñi. ²⁸ Tatum iin nyívi tsa nyitá iñi ley Nyoo tsa tyaá ra Moisés tan ña tyaá yahvi ñi tsa catyí ley can, tan tatum iyó uvi o uñi ra cuví tsandaa tsa cuenda tsa javaha ñi, cua cúu ñi tsa cuenda cuatyí ñi, tan yofi maa cua cundaahví iñi tsi ñi. ²⁹ Tan yaha ca cua tatsi tuñi Nyoo tsi nyívi caahán ndavaha ñi siquí Tatyí li ra tsa tsahá tsa vaha ra tsi yo, tan jandihí ñi tsa tsinú iñi ñi tsi Sehe ra tan jahá ñi tyin nduve yahvi nyaá niñi Sehe ra tsa janduvaha añima ñi. Tan tsihin niñi can ndoo Nyoo tuhun tsihin yo. ³⁰ Tsitó yo tyin catyí Jutu Mañi yo tyehen: “Maa yu taahán tsi tatsi tuñi tsi nyívi; tan juven yu cua cahan náa taahán tsi tahan ñi.” Juvín ñi catyí tucu ra tyin maa ra taahán tsi jacutuñi tsi nyívi ra. ³¹ ¡Cahnu xaan tundoho cua nyehe nyívi yosó ica tsi Nyoo nyito tsa cuenda cuatyí ñi!

³² Maa tyin nyooho nducuhun iñi ndo nácaa cunyeé xaan iñi ndo nyehe ndo tundoho tsa yaha naquihín cuenda ndo tsa nditsin Nyoo tsitsi añima ndo. ³³ Yihí nyooho cahan nyívi tsi ndo, tan janyehé ñi tundoho tsi ndo nu tuvi nyívi. Tan yihí ndo cundaahví iñi ndo nyehe ndo tsi nyívi vaha iñi tsi ndo tsa tahán juven ñi tacan. ³⁴ Tan cundaahví iñi ndo nyehe ndo tsi nyívi tsiyucú vehe caa. Cunyeé iñi ndo nyehe ndo tundoho tsihin tsa sii cuñí ndo quívi quihín nyaá nyívi ndaha tyiñu ndo, tyin tsitó ndo tyin gloria iyó tsa vaha ca tsa cuenda ndo, tan yacan ña cua cundihi maa can. ³⁵ Yacan cuenda ña jandihí ndo tsa nyitá iñi ndo tsi ra Cristo, tyin nu cuahán ca tsi tan cua ñihi ndo tsa vaha ca tyin tsinú iñi ndo tsi ra. ³⁶ Cuñí tsi coo tsa taxin añima ndo tsitsi tsa cunyeé iñi ndo tyin tacan tan cuví javaha ndo cuhva cuñí Nyoo, tan naquihín ndo tsa catyí ra tyin cuhva ra tsi yo. ³⁷ Tyin nu tutu Nyoo catyí tsi tyehen:

Ña naha ca

tan quítsi ra tsa nyaá quítsi, tan ña cua cucuee ca ra.

³⁸ Tan catyí Jutu Mañi yo tyehen: “Nyívi naquihín cuenda yu tumaa tsatyin vaha ñi, tsihin tsa tsinú iñi ñi tsi yu tan cua coo nyito ñi.

Maa tyin tatum jandihí ñi tsa tsinú iñi ñi, ña sii cua cuñi yu tsihin ñi”, catyí Nyoo.

³⁹ Maa tyin yoo ña javahá yo tumaa javahá nyívi jandihí tsa tsinú iñi tsi Nyoo, tyin yoo tacan ñi maa tsinú iñi yo tsi ra tan tsa cuenda tsa tsinú iñi yo cua cacu añima yo.

Cuhva cuñí tsi tsa tsinu iñi yo tsi Nyoo

¹ Tsa tsinú iñi yo tsi Nyoo cuví tsa tsitó vaha yo tyin cua ñihi yo tsa ndatú yo; tan tsitó vaha yo tyin cua ñihi yo iin tsa nditsa tsa ñaha ca nyehe yo, tyin tsinú iñi yo tsi Nyoo. ² Juhva nyívi yo tsa tsicoq tahan tsanaha quita vaha ñi nuu Nyoo tyin tsinú iñi ñi tsi ra.

³ Tsa cuenda tsa tsinú iñi yo tsi Nyoo, tan tsitó yo tyin javaha ra ñuhu ñayívi tsihin tuhun caahán ra. Tan tsitó yo tyin tahan tsanaha tsinú tandihí tsa nyehe yo vityin tsihin tsa ña nyehe yo.

⁴ Tsa cuenda tsa tsinú iñi ra Abel tsi Nyoo, tan jamañi ra tsa vaha ca nuu Nyoo tan ñavin ca ra Cain, yafi ra. Tsa cuenda yacan naquihín cuenda Nyoo tsi ra tumaa tsatyin vaha ra, tan naquihín cuenda tucu ra tsa jamañi ra. Vasu ndi maa ña nyito ca ra Abel, maa tyin tsinú yo nácaa tsinú iñi ra.

⁵ Tsa cuenda tsa tsinú xaan iñi ra Enoc tsi Nyoo, tan naquihín Nyoo tsi ra tyin tacan tan ña nyehe ra tuhun tsihi. Tan ña nañihí ca nyívi tsi ra, tyin cuanuhú ra tsihin Nyoo. Catyí tsi nu tutu Nyoo tyin tsa ndi cumañi ca naquihín Nyoo tsi ra, maa ñi maa cuhva taahán iñi Nyoo javaha ra. ⁶ Maa tyin ña cuví javaha yo tsa taahán iñi Nyoo tatum ña tsinú iñi yo tsi ra. Tyin tatum cuñí yo nanducu yo tsi ra, cuñí tsi tsinu jihna iñi yo tyin iyó ra, tan tsahá ra tsa vaha tsi nyívi nanducú tsi ra.

⁷ Tahan tsanaha jacotq Nyoo tsi ra Noé náa cua cuví ityi nuu. Vasu ndi maa ñaha ca coo can nyehe ra Noé, tsinú iñi ra tan javaha ra yutun ndoo tan ican cacú ra tsihin nyívi vehe ra. Nyívi tsa ña tyaq yahvi tsa cahan Nyoo, tatsi tuñi ra tsi ñi. Maa tyin jacacú ra tsi ra Noé tan nduvaha ra nuu ra tsa cuenda tsa tsinú iñi ra tsi ra.

⁸ Ra Abraham tsinú iñi ra tan tyaq yahvi ra tsi Nyoo quívi canq Nyoo tsi ra. Quita ra nu ñuhu ra tan cuahán ra nu ñuhu tsa cua cuhva cuii Nyoo tsi ra. Vasu ndi maa ña tsitó ra nu maa cuahán ra, maa tyin quita ra nu ñuhu ra tan cuahán ra. ⁹ Tsa cuenda tsa tsinú iñi ra Abraham tsi Nyoo, tsicoq ra nu ñuhu tsa ñaha ca nacuhva cuenda Nyoo tsi ra. Tsicoq ra tsitsi vehe jahma ñi. Juvín ñi tacan tsicoq tucu ra Isaac, sehe ra, tan ra Jacob, sehe ra Isaac. Tyin juven ñi catyí tucu Nyoo tsihin nduvi taahan ra can naha ra tyin cua cuhva ra ñuhu can tsi ra naha.

¹⁰ Ra Abraham ndatú ra coo ra iin ñuu tsa ña cua naa maa; iin ñuu tsa vaha ca tsa cua cuhva Nyoo tsi ra. Tan ñuu tsa ndatú ra maa Nyoo tsaquin cuhva tsaha tsi tan samq itsi.

¹¹ Tan juven ñi tsa cuenda tsa tsinú iñi ña Sara tsa cahan Nyoo tsihin ña, tsicoq iin sehe ña. Vasu ndi maa tsa tsahnu xaan ña, cuví tsicoq sehe ña tyin maa Nyoo tsaha

tunyee ifni ra tsi ña. Tacan cuvɨ tyin tsinu ifni ña tyin cua cundaa tsa cahan Nyoo tsihin ña. ¹² Yacan cuenda vasu ndi maa tsa cuñi cūu cuii ña ra Abraham, maa tyin tsicoo sehe ñasiihi ra. Yahā can tan tsicoo cuaha nyivi tata ra. Tan yofi maa cuvɨ nacahvi tsi ñi tyin cuaha xaan ñi, tumaa cuaha tiñuu iyó andivi tan tumaa cuaha nyiti iyó yuhu ndutya ñuhu.

¹³ Tandihɨ nyivi can tan nyivi tata ñi tsihɨ ñi tsa ndi cumañi ca naquihɨn cuenda ñi tsa catyɨ Nyoo tsihin ñi tyin cuhva ra tsi ñi. Vasu ndi maa ña ñihɨ ñi can, tsinu ifni ñi tyin cua cuhva Nyoo can. Yacan cuenda sii cuñi ñi tyin tsitó ñi tyin coo quivi cua nyehe ñi can. Tan sii tucu cuñi ñi caahán ñi tyin yahá ñi maa ñi nu ñuhu ñayivi ihya. ¹⁴ Tan tsa caahán ñi tacan, cuñi tsi catyɨ tyin ndi tsicá ñi nanducú ñi iin nu vaha ca coo ñi. ¹⁵ Tun tsatyin ñuhú ifni ñi ñuu ñi nu quita ñi, cuvɨ cunuhu nyico ñi iin yaha ñi. ¹⁶ Maa tyin ña tsinuhú ñi ñuu ñi tyin cuñi ñi coo ñi ñuu vaha ca, tuhun ihya cuñi tsi catyɨ tyin cuñi ñi coo ñi nda andivi. Tan tsa tacan nducú ñi coo ñi nda gloria, ña cahán nuu Nyoo tsa cuvɨ ra Nyoo ñi tyin tsa janduvahā ra iin ñuu nu coo ñi.

¹⁷ Tsa cuenda tsa tsinu ifni ra Abraham tsi Nyoo, tyaā yahvi ra tsa cahan Nyoo tsihin ra tan jamañi ra tsi ra Isaac, sehe mañi ra, quivi nducú cuhva Nyoo tsi ra tun nditsa tsa tsinú ifni ra tsi ra. Javahā ra tacan vasu ndi maa catyɨ Nyoo tyehen tsihin ra: ¹⁸ “Tsa cuenda ra Isaac tan cua coo nyivi tata un.” ¹⁹ Vasu ndi maa cahan ra tacan tsihin ra Abraham, ra Abraham ña nayuhvi ra tsa cuhva cuenda ra sehe ra tsi Nyoo, tyin tsitó ra tyin iyó tunyee ifni tsi Nyoo tsa janandoto ra ndiyi. Quivi can tsa nyaá ra Abraham tsa cahñi ra tsi ra Isaac, sehe ra. Maa tyin Nyoo nacuhva cuenda nyico ra tsi ra Isaac tsi ra. Tan cuvɨ can tumaa tsa janandoto Nyoo tsi ra.

²⁰ Juvín ñi tsa cuenda tsa tsinu tucu ifni ra Isaac tsi Nyoo, tan catyɨ ra tyin ra Jacob tan ra Esaú, sehe ra, cua ñihɨ ra naha tsa vaha nu cuahán ca tsi. ²¹ Tsa cuenda tsa tsinu ifni ra Jacob tsi Nyoo, tan catyɨ ra tyin nduvi taahan sehe ra José cua ñihɨ ra naha tsa vaha jaha Nyoo. Tan nyaá naa ñi ra yutun tsa tsindahā ra tan jacahnū ra tsi Nyoo tyin tsa tsahnu xaan ra. ²² Juvín ñi tsa cuenda tsa tsinu ifni ra José tsi Nyoo, catyɨ ra tsa tsa cuñi cūu ra tyin cua quita nyivi ra, ñi Israel, ñuhu Egipto. Tan tsahā cuenda tucu ra tsi nyivi tyin quivi quita ñi na quihin ñi yiqui ra cahun tsihin ñi.

²³ Tsa cuenda tsa tsinu ifni jutu ra Moisés tan sihi ra tsi Nyoo, tyihɨ xeehe ñi tsi ra uñi yoo tyin nyehe ñi tyin sii xaan caá ra. Ña nayuhvi ñi tsa cahan ra rey tyin cuñi tsi cūu tandihɨ sehe yi nyivi [tsa cuenda tyin tsitó ñi tyin cua jacacu Nyoo tsi ra]. ²⁴ Tsinu

tucu ifni ra Moisés tsi Nyoo. Yacan cuenda quivi tsahnu ra, ña cuñi ca ra cuvɨ ra sehe ñaha cuvɨ sehe ra rey ñuhu Egipto. ²⁵ Tan nacoq ra ñuhu Egipto can tyin ña cuñi ra cusɨ ifni ra tsihin tsa javaha ra tsa caquini. Tan nacatsɨ ra tsa cua nyehe ra tandoho tsihin nyivi Nyoo tan ñavin ca tsa cusɨ ifni ra tsihin tsa tsindihɨ ñi maa. ²⁶ Tsa cuenda ra Moisés, vaha ca tsa cuca ra Cristo tan ñavin ca tandihɨ tsa cuca tsa iyó Egipto. Yacan cuenda sii cuñi ra nyehe ra ticanuu tsa cuenda ra Cristo tyin tsitó ra tyin cua ñihɨ ra tsa cua cuhva Nyoo tsi ra. ²⁷ Juvín ñi tsa cuenda tsa tsinu ifni ra Moisés tsi Nyoo, ña nayuhvi ra quita ra ñuhu Egipto, vasu ndi maa cuxaan ra rey tsi ra. Tan cunyeē xaan ifni ra tyin tumaa tsatyin nyehe ra tsi Nyoo tsa ña nyehe yo.

²⁸ Juvín ñi tsa cuenda tsa tsinu ifni ra tava tyiñu ra na jacahnu tandihɨ nyivi Israel vico tan cahñi ñi iin mbee ticatyɨ luhlu. Tan tava tyiñu tucu ra na cahyɨ ñi ñihɨ mbee can quisiyu yuvehe ñi, tyin tacan tan tsa cua yaha ángel Nyoo cahñi ra sehe nuu nyivi Egipto, ña cahñi ra ndi intuhun sehe nuu maa ñi. ²⁹ Tsa cuenda tsa tsinu ifni ñi Israel tsi Nyoo tan yahā sava ñi nu Nduyta Ñuhu Cuaaha tumaa nu ñuhu ityi. Ra Egipto naha ra cuñi ndihɨ tucu ra naha yaha ra naha, maa tyin ña cuvɨ yaha ra naha tyin nacasɨ Nyoo ndutya ñuhu can siqui ra naha tan tsihɨ ra naha jahā ndutya can.

³⁰ Juvín ñi tsa cuenda tsa tsinu ifni ñi tsico nduvi ñi utsa tsaha tsata ñuu Jericó, tan tandihɨ cuii maa nu sama tsaha ñuu can tanɨ. ³¹ Juvín ñi tsa cuenda tsa tsinu ifni ña Rahab, ñaha sii ifni tsicá nuu tsa tsicoq Jericó, tan ña tsihɨ ña quivi tsihɨ tandihɨ nyivi ñuu ña. Ña tsihɨ ña tyin jatinyeē ña tsi ra Israel ra tsa tsahan naha ra tsinyehe ñuu ña. Tandihɨ ca ñi tsihɨ ñi tsa cuenda tsa ña tyaā yahvi ñi tsi Nyoo.

³² ¿Náa ca cua cahan yu vityin? Tyin ña cuyatyɨ yu cahan yu tuhun tandihɨ ra naha, tumaa ra Gedeón, ra Barac, ra Sansón, ra Jefe, ra David, tan ra Samuel, tan ra cuvɨ ndusu yuhu Nyoo naha ra tahañ tsanaha. ³³ Tsa cuenda tsa tsinu ifni ra naha tsi Nyoo, tan yihɨ ra naha jahā canaa ra naha tsi inga ñuu nahnu. Tan yihɨ ra naha vaha xaan tsindacá ñaha ra naha nyivi cuenda Nyoo. Yihɨ ra naha ñihɨ ra naha tsa catyɨ Nyoo tyin cuhva ra tsi ra naha. Yihɨ ra naha jatinyeē Nyoo tsi ra naha quivi nducú cahñi ndicaha tsi ra naha. ³⁴ Yihɨ ra naha ña cayu ra naha jahā ñuhvɨ tsitsi ono nu tyihɨ nyivi tsi ra naha. Yihɨ ra naha cacu ra naha tan ña tsahñi nyivi tsi ra naha tsihin mityi. Yihɨ ra naha tsahā Nyoo tunyee ifni tsi ra naha quivi nduve tunyee ifni tsicoq tsi ra naha, tan cuvɨ cañi

tahan ra naha tsihin nyivi xaan iñi tsi ra naha tan jahá canaa ra naha tsi ñi. ³⁵ Tsioco juhva ñiñaha, tsa nandoto nyivi.

Juhva nyivi tsinuhñi ñi tan ndoho ñi jahá nyivi, maa tyin vasu ndi maa tacan tahán ñi, cunyeé xaan iñi ñi tan ña cuñi ñi ndoo nuña ñi. Nyivi can catyi ñi tyin tun nacoo ñi tsi Nyoo ña cua nyehe ca ñi tundoho, maa tyin ñi ican ña cuñi ñi tyin tsitó ñi tyin vasu ndi maa cúu ñi, cua nandoto ñi inga tsaha tan cua coo ñi iin ñayivi vaha ca. ³⁶ Inga ñi nyehe ñi tundoho jahá nyivi tyin caahán nyaa nyivi can tsi ñi tan cañi ñi tsi ñi. Inga tucu ñi tsinuhñi ñi tsihin cadena tan tsiyucu ñi vehe caa. ³⁷ Yihí ñi tsahñi nyivi tsi ñi tsihin yuu. Yihí ñi tsahnya sava nyivi tsi ñi tsihin cierra. Yihí ñi nducu cuhva nyivi tsi ñi. Yihí ñi tsahñi nyivi tsi ñi tsihin mityi. Yihí ñi tsinditsi ñi ñi mbee ticatyi tan ñi mbee; nduve jahma vaha ñi tsioco tan ndi nduve vehe ñi. Ndaahvi xaan tsioco ñi, tan tsioco xaan ñi tucuihya iñi, tan nyehe ñi tundoho jahá nyivi tsa ña tsitó tsi Nyoo. ³⁸ Tan nyivi ndaahvi can vaha ca ñi nuu Nyoo tan ñavin ca inga ca nyivi. Tsiqa nuu ndaahvi ñi nu tsiqui tan nu iyó yucu. Tsioco ñi tsitsi cava tan tsitsi ñuhu. ³⁹ Tandihí maa nyivi ndaahvi can vasu ndi maa vaha cañan Nyoo tuhun ñi tsa cuenda tsa tsinu iñi ñi tsi ra, maa tyin ña ñihj ñi tsa catyi ra tyin cuhva ra. ⁴⁰ Tyin cuñi ra tsa ñihi ndihí ñi tsa vaha ca tsa tyaa ra cuhva tyin cuhva ra tsi yoo tyin tacan tan nduvaha ñi nuu ra iin caa ñi tsihin yo.

12

Na cuita iñi yo tsi intuhun ñi maa ra Jesús

¹ Tandihí nyivi can quita vaha ñi nuu Nyoo tyin tsinu iñi ñi tsi ra. Tan vityin jandu iin ñi iñi yo tsihin can, tan ndatú ñi nyehe ñi tatun quita vaha yo. Yacan cuenda cuñi tsi nacoo yo tandihí tsa jatyañú tsi yo, tan tandihí cuatyí tsa tuhvá jandavi ñaha tsi yo. Tan na cunyeé iñi yo cuhun yo ityi nuu ca tsihin Nyoo tsihin tsa taxin iyó añima yo. ² Na nyehe yo tsi intuhun ñi maa ra Jesús tyin juven ra jatyinyeé tsi yo tsa tsinu iñi yo tsi ra, tan tsahá tucu ra tandihí cuhva taahán tsi tsinu iñi yo. Ra Jesús cunyeé xaan iñi ra nyehe ra tundoho tan ña tyaa yahvi ra ticanuu tsa cua tahan ra tsa cúu ra nu cruu tumaa tsilhi iin nyivi iyó cuatyí. Yacan cuenda, vityin nyaá ra xiin cuaha Nyoo nda gloria. Tyin tsa ndi cumafí ca cúu ra, tan tsa tsitó maa ra tyin sii xaan cua cuñi ra tsa yaha cúu ra. ³ Jaha ndo cuenda cuhva tsioco ra Jesús, tyin ra Jesús nyehe xaan ra tundoho jahá nyivi iyó cuatyí, maa tyin cunyeé iñi ra. Tacan tucu nyooho, ña cundihi iñi ndo tan ña ndu uvi iñi ndo tsa nyicún ndo tsi ra. ⁴ Tyin nyooho ñaha ca nyehe ndo tundoho

tumaa nyehe ra Cristo tundoho tsa cañi tahan ra tsihin tsa caquiñi tan tsihi ra. Tyin ñaha ca cúu ndo jaha tsa cañi tahan ndo tsihin tsa caquiñi. ⁵ ¿A tsa naq iñi ndo nácaa jaquihín ityi Nyoo tsi yo tsa cuví yo sehe ra? Catyi ra nu tutu ra tyehen:

Sehe luhlu yo, ña cuxaan un tatun tsahá cuenda yu tsi un nácaa taahán tsi javaha un.

Tan ña nducuihya iñi un tatun cuxaán yu tsi un.

⁶ Tyin yuhu jaquihín ityi yu tsi nyivi cuñi yu, tan tatsi tuñi yu tsi nyivi cuví sehe yu, catyi Nyoo.

⁷ Janyee ndo iñi ndo tan nducu ndo cuhva cutuhva ndo tun jaquihin ityi Nyoo tsi ndo. Tyin Nyoo, jaquihín ityi ra tsi sehe vaha ra tumaa javaha tandihí nyivi iyó sehe, jaquihín ityi ñi tsi sehe ñi. ⁸ Tyin tatun ña jaquihín ityi Nyoo tsi yo, ñavin sehe vaha ra cuví yo. Maa tyin tatun jaquihín ityi ra tsi yo, juven sehe vaha ra cuví yo. ⁹ Tan inga tucu tuhun, tsa ndi nyihí yo, jutu yo nu ñuhu ñayivi ihya jaquihín ityi ra naha tsi yo, tan jahá yo tsa ñayivi tsi ra naha. Tan vihi ca cuñi tsi tyaa yahvi yo tsi Jutu yo Nyoo, tyin tacan tan cuví coo cuii yo. ¹⁰ Jutu yo tsa iyó nu ñuhu ñayivi ihya, jaquihín ityi ra naha tsi yo tsa cuenda juhva ñi quivi, tan javahá ra naha can cuhva cuñi maa ra naha tyin vaha tsa cuenda yo. Maa tyin Nyoo jaquihín ityi vaha ca ra tsi yo, tan tsahá ra tsa ndu ii yo tumaa ii maa ra. ¹¹ Nditsa tyin tsa ndi cuxaán Nyoo tsi yo nyehe yo tundoho. Maa tyin tun cutuhva yo javaha yo tsa vaha tsihin tsa nyehe yo tundoho can, cua quita vaha yo.

Ica xaan tun ña tyaa yahvi yo tsa caahán Nyoo tsihin yo

¹² Yacan cuenda ña ndu uvi iñi ndo tsa javaha ndo tsa cuñi Nyoo javaha ndo, tan ña nducuihya iñi ndo. ¹³ Nducu ndo cuhva coo vaha ndo tsihin Nyoo, tan cuhva caca vaha ndo tsihin ra. Tyin tacan tan cuhva ra tunyee iñi tsi ndo tan nduvaha ndo nuu ra tan ña cuihya ca cua cuñi ndo.

¹⁴ Jañiñi ndo tsi ndo tan coo vaha ndo tsihin tandihí nyivi. Nacoo ndo tandihí tsa ña vaha. Tyin nyivi tsa ña nacoo tsa ña vaha ña cuví nyehe ñi tsi Nyoo Jutu yo. ¹⁵ Jaha cuenda vaha ndo tsi ndo tyin tacan tan ña ndoo ihñi ndi intuhun ndo tyin tandihí ndo tan cua ñihi ndo tunyee iñi tsa tsahá Nyoo, tan ña cua ndoo tsa xaan tsitsi añima ndo tan ña cua tiví ndo nuu Nyoo, tyin jahá cuenda vaha ndo tsi ndo. ¹⁶ Nyooho rayii ndi intuhun ndo tan ña caca nuu ndo tsihin ñaha. Tacan tucu nyooho ñaha, ña caca nuu ndo tsihin rayii. Tan ña caca iñi ndo tyin nduve yahvi nyaá tuhun Nyoo, tumaa tsiqa iñi ra Esaú, tyin ra Esaú xico ra tsa cuví ra ra

tsitsa tsacatyí tsa catsi ra. ¹⁷ Tsító ndo tyin tsa yaha yacan tan cuñi ra Esaú tsa nasoco jutu ra tsi ra, maa tyin ña cuví. Tsacu xaan ra, maa tyin ña ñihí ca ra cuhva nasama ra tsa tsa yaha javaha ra.

¹⁸ Nyooho ña taahán tsi javaha ndo tacan tyin tsaá ndo nuu Nyoo, maa tyin ñavin tumaa tsaá nyivi Israel nuu Nyoo quivi tsahan ñi yucu Sinaí tsa cuví nyehe yo. Nyehe ñi cayu ñuhu, tan ñihi xaan yihí tatyí xaan, tan naa xaan cuví. ¹⁹ Tan tsiñi ñi ndusu trompeta tan cahan Nyoo tsihin ñi. Tan cahan ndaahvi ñi tsihin ra na ña cahan ca ra tsihin ñi, tyin yuuhví xaan ñi ²⁰ tsa cuenda tyin ña cunyeé iñi ñi tsa tsaá cuenda ra tsi ñi Tyin catyí ra tyehen: “Nyivi natuhva tan cuañi tsaha yucu ihya cahñi ndo tsi ñi tsihin yuu o tsihin lanza, tahan ñi nyivi tan quiti”, catyí Nyoo tsihin ñi. ²¹ Nayuhví xaan ñi tsa nyehe ñi yacan, nda cuenda ra Moisés tan catyí ra: “Ñihi xaan ñihí yu jahá tsa yuuhví yu”, catyí ra.

²² Maa tyin nyooho ña nyehe ndo tsa yuuhví can tyin tsaá ndo yucu nañi Sión tsa cuví ñuu Nyoo nyito. Tuhun ihya cuñi tsi catyí ñuu Jerusalén tsa canyí nda gloria, nu iyó cuenda mil ángel. ²³ Ndu iin ndo ican tsihin tandihí sehe Nyoo tsa iyó sivi nu libru nda gloria tan jacahnu ndo tsi ra. Natuhvá ndo nuu Nyoo, ra cuví juee [tsa jandaa cuatyí] tandihí nyivi, tan natuhvá ndo nuu tandihí añima nyivi vaha tsa janduvahá Nyoo. ²⁴ Natuhvá tucu ndo nuu ra Jesús, ra caahán ndaahvi tsihin Nyoo tsa cuenda yo vityin tsa ndoq Nyoo tuhun tsaá tsihin yo. Tan ñiñi ra Jesús tsa tsaá tsahá tsa vaha ca tsi yo tan ñavin ca ñiñi ra Abel. [Tyin ñiñi ra Abel tsican tsi cuatyí tsaha ra yañi ra. Maa tyin ñiñi ra Jesús, jahá tucahnu iñi cuatyí yo.]

²⁵ Yacan cuenda cuñi tsi jaha yo cuenda tsi yo tan tyaa yahvi yo tsi ra caahán tsihin yo. Tyin tacan tan ña tahan yo tumaa tahan juhva nyivi Israel tsa ña tyaa yahvi tsa cahan Nyoo quivi cahan ra yucu Sinaí nu ñuhu ñayivi ihya. Tan vihi ca yoo, tun ña tyaa yahvi yo tsi ra nyaá nda gloria tsa caahán tsihin yo vityin, ña cua cuví maa cacu yo. ²⁶ Tahan tsanaha jacandá Nyoo ñuhu ñayivi tsihin ndusu ra. Tan catyí ra tyehen vityin: “Cua jacanda yu iin tsaha ca ñuhu ñayivi, maa tyin ñavin ñuhu ñayivi ñi, tyin cua jacanda ndihí yu nda cuenda andivi.” ²⁷ Tsa caahán ra tyin cua jacanda ra inga tsaha, cuví cutuñi iñi yo tyin cua catsiyo tandihí tsa javahá ra tsa cuví nacanda. Tan cua ndoo tsa ña cuví nacanda. ²⁸ Nu ndacá ñaha Nyoo nu tsahá ra cunyeeco yo tsihin ra, ña cuví nacanda can. Na cuhva yo tyahvi nyoo tsi ra tsa cuenda yacan tan na jacahnu yo tsi ra tsihin tsa ñi iñi añima yo, tan tyaa

yahvi yo tsi ra, tyin yacan cuví tsa taahán iñi ra. ²⁹ Tyin Nyoo yo cuví ra tumaa ñuhu tsa tsahmí, tan cua janaa ra tandihí maa tsa ña vaha.

13

Na coo yo cuhva taahán iñi Nyoo

¹ Ña jandihí ndo tsa cuñi ndo tsi tandihí nyivi yihí cuenda Nyoo tyin cuví ñi tumaa nyivi ndo. ² Ña nga iñi ndo tyaa nuu vaha ndo tsi nyivi tsaá vehe ndo, tyin tun javaha yo tacan nda cuenda cua cuhva yo nu coo ángel Nyoo, vasu ndi maa ña tsító yo tun ángel cuví ra naha tumaa javahá juhva nyivi.

³ Ña nga iñi ndo tsi nyivi yucú vehe caa tumaa tsatyin yucú ndihí ndo tsihin ñi. Ndūcuhun iñi ndo tsi nyivi nyehé tundoho jahá nyivi. Cundaahvi iñi ndo tsi ñi tan jatyinyee ndo tsi ñi. Tyin tsító ndo nácaa cuñi yo tun nyehe yo tundoho.

⁴ Nyooho nyivi tsa tsa tindaha, jaha tahan ndo tsa ñayivi tsi iin ndo tan tsi inga ndo. Tan cgo vaha ndo tyin Nyoo cua tatsi tuñi ra tsi rayi tsicá nuu tsihin naha tan rayi iyó ñasiñi tun coo ra tsihin inga ñaha. Tan juvin ñi cua tatsi tuñi tucu ra tsi ñaha tsicá nuu tsihin rayi tan ñaha tsa iyó yí tun coo ña tsihin inga rayi.

⁵ Ña caca iñi ndo nácaa javaha ndo tan cuví coo cuaha ca xuhun tsi ndo. Ndoo ndo vaha tsihin tsa iyó tsi ndo, tyin catyí Nyoo tyehen: “Tandihí ñi tsaha nyaá yu tsihin un, tan ña cua nacoo ihñi maa yu tsi un”, catyí ra. ⁶ Tsa cuenda yacan cuví caahán yo tyehen tsihin tsa ñi iñi añima yo: Jutu Mañi yu juvin un jatyinyee tsi yu, Yacan cuenda ña yuuhví yu tun javahá nyivi náa javahá ñi tsi yu.

⁷ Ndūcuhun iñi ndo tsi ra cuví ityi nuu vehe ñuhu, ra tsa caahán tuhun Nyoo tsihin ndo. Nyehe ndo tyin vaha iyó ra naha nuu Nyoo, tan cuanyicun ndo cuhva vaha tsinú iñi ra naha tsi Nyoo.

⁸ Ra Jesucristo ña nasamá ra. Juvín ra iyó nda tsanaha, tan juvin ra iyó vityin. Tan juvin ra cua coo yoso cuahán quivi. ⁹ Ña cuhva ndo jandavi ñaha nyivi tsi ndo tsihin tsa siin siin tsa jacuahá ñi. Vaha ca jandu iin ndo iñi ndo tsihin tsa vaha tsa tsahá Nyoo coo añima yo, tyin vaha ca yacan tan ñavin ca tsa jacuahá ñi ican. Tyin ñi ican jacuahá ñi maa ñi maa tsa cuenda náa tsatsi yo. Tan ña jatyinyee can ndi tsi maa ñi.

¹⁰ Tsañi ñiñi ra Cristo nu cruu tsa cuenda yo. Tan ra jutu tsa nyitá iñi ley tsahnu naha ra ña cuví jatyinyee ra Cristo tsi ra naha. ¹¹ Ra jutu tsaahnu cuví ityi nuu cuenda nyivi Israel tsindacá ra naha ñiñi quiti tsitsi Vehe Ii Xaan tsa cuenda cuatyí nyivi, maa tyin cuñu ti tuhvá can cuatyí ityi tsata ñuu.

¹² Tacan tucu ra Jesús, tava tyiñu Nyoo tsi ra tsa nyehe ra tundohe tan cúu ra ityi tsata ñuu Jerusalén, tyin tacan tan janduvaha ra tsi yo tsihin niñi ra. ¹³ Na cunyicun yo tsi ra Cristo tan ña nducahan nuu yo vasu ndi maa vacu nducu nyivi tsi yo. ¹⁴ Tyin tsa cuenda yoo nduve ñuu tsa ña cua cundihi maa nu ñuhu ñayivi ihya. Yacan cuenda nanducú yo iin ñuu tsa cua quitsi, tsa yaha naa ñuhu ñayivi ihya. ¹⁵ Yacan cuenda vityin tsa iyó ra Cristo aña yo, taahán tsi jañiñi yo tsi yo tan jacahnu yo tsi Nyoo tsihin tsa cata yo yaa ra, tan tsihin tsa caahán yo. ¹⁶ Ña naa iñi ndo javaha ndo tsa vaha. Tan jatyinyee tahan ndo tsi ndo tsihin tsa iyó tsi ndo, tyin yacan cuví tsa taahán iñi Nyoo.

¹⁷ Tyaa yahvi ndo tsi ra jaquihín ityi tsi ndo naha ra; cuhva ndo tsi ndo cundaca ñaha ra naha tyin juvin ra naha jahá cuenda aña ndo. Tan coo quivi cua cuhva cuenda ra naha tyiñu jahá ra naha tsi Nyoo. Nducu ndo cuhva javaha ndo tsa vaha, tyin tacan tan sii cua cuñi ra naha cuhva cuenda ra naha tsi ndo tsi Nyoo. Maa tyin tun ña javahá ndo tsa vaha, cua cuhva cuenda ra naha tsi ndo tsi Nyoo tsihin tucuihya iñi, tan ña cua quita vaha ndo nuu ra.

¹⁸ Ndacán tahvi ndo tsi Nyoo tsa cuenda ndi tyin tsitó ndi tyin vaha cuahán ndi tsihin ra, tyin maa ñi maa tsa vaha cuñi ndi javaha ndi. ¹⁹ Tan tsicán yu tsa ndacan tahvi tucu ndo tsa cuenda yu na cuhva Nyoo quitsi yu inga tsaha tsa numi ñi nu yucú ndo tan cunyi yu tsihin ndo.

Nu ndihí cahán ra tan tsahá ra nacumi tsi ñi

²⁰ Jutu Mañi yo Jesucristo tsa janandoto Nyoo, ra tsahá tsa taxin coo aña yo, juvin ra jahá cuenda tsi yo tsa cuví yo tumaa mbee jana ra. Tsihin niñi ra Cristo tsa tsati, ndoo Nyoo tuhun tsa ña cua cundihi maa tsihin yo. ²¹ Tandihí tsa cuñi Nyoo javahá ra tsihin tandihí yo, maa ra Jesucristo javahá can jahá ra. Tan na javaha ra tsihin yo tsa cuñi ra javaha ra. ¡Na jacahnu yo tsi ra Cristo yoso cuahán quivi! ¡Na cuví tsi tacan ñi!

²² Yañi, caahán ndaahvi yu tsihin ndo; janyee ndo iñi ndo tan javaha ndo tsa tsahá cuenda yu tsi ndo tsihin tsa taxin iyó aña ndo, tyin ña cuaha xaan tuhun tyaa yu tsa cuenda ndo. ²³ Cuñi yu tsa coto ndo tyin ra Timoteo, yañi yo, tsa quita ra vehe caa. Tatun yatyi tsa ra, cua quitsi ra tsihin yu na quitsi yu quitsi nyehe yu nu yucú ndo.

²⁴ Cuhva ndo nacumi tsi tandihí ra jaquihín ityi tsi ndo, tan tsi tandihí nyivi yihí cuenda ra Cristo. Nyivi Italia nu nyí yu, tsahá ñi nacumi tsi ndo.

²⁵ Tan na nasoco Nyoo tsi tandihí ndo. Na cuví tsi tacan ñi.

Carta Tsa Jacuhun Ra Santiago Tsi Nyivi Israel Tsa Yihí Cuenda Ra Cristo

Nu tsahá ra Santiago nacumi tsi nyivi

¹ Yuhu ra Santiago cuví yu iin ra jahá tyiñu tyiñu Nyoo tan Jutu Mañi yo Jesucristo. Jaquitsí yu nacumi tsi tandihí nyooho tsa cuví ndo tata tsa utsi uvi ra sehe ra Israel tan iyó ndo ñuu nyivi tsa ñavin tata ra Israel cuví.

Tsa tsiñi tuñi tsa tsahá Nyoo tsi yo

² Yañi, cusii iñi ndo tun cuaha tundoho nyehé ndo. ³ Tyin tsitó ndo tyin tsihin tsa nyehé ndo tundoho tan cua cahnu ca ndo tsihin tsa tsinú iñi ndo. Tan cua cunyeé iñi ndo nyehe ndo náa ndihí ca tundoho vatsi siqui ndo. ⁴ Jaña ndo na quitsi maa tundoho can siqui ndo, tyin tun tsa cunyeé iñi ndo yahá ndo tundoho can, cua cuví ndo nyivi tsitsa tsihin tuhun Nyoo, tan nduve ca náa cua cumañi tsi ndo tan cua cunyeé ndo yaha ndo tandihí maa tundoho tsa cua quitsi siqui ndo.

⁵ Ndáa nyooho cumañi tsa tsiñi tuñi tsi, ndacan ndo itsi tsi Nyoo, tan Nyoo cua cuhva ra itsi tsi ndo, tyin maa ra tsahá ra tsa tsicán tandihí nyivi tan ña tuhvá ra tyicuhvá itsi, tan ndi ña cuxaán ra tsi ñi tun tsicán ñi náa tsicán ñi tsi ra. ⁶ Maa tyin cuñi tsi ndacan yo itsi tsihin tsa tsinú vaha iñi yo. Tan ña caca iñi yo tyin ña cua cuhva ra itsi tsi yo. Tyin tun caca iñi yo tyin ña cua ñihí yo tsa tsicán yo, cuví yo tumaa ndutya ñuhu tsa tandahá tatyí ityí ihya tan ityí can. ⁷ Ra tsa javahá tacan, ña taahán tsi caca iñi ra tyin cua cuhva Nyoo tsa tsicán ra. ⁸ Tyin uvi xaan tsicá iñi ra. Ña tyaá iñi ra tsa tsicán ra, tyin ña iin cuñi ra. Vityin cuñi ra tsa cuñi ra, tan inga tsa cuñi tucu ra tyaan. ⁹ Tatun iyó iin ra yañi yo, ndaahví ra, na cusii iñi ra tyin cahnu cuví ra jahá Nyoo. ¹⁰ Tatun iin ra yañi yo, tan cuca ra, tun cua ndundaahví ra nu ñuhu ñayivi ihya, taahán tsi cusii iñi ra tsihin Nyoo tyin tsitó ra tyin cuví ra tumaa cuví ita tsa iyó tsitsi cuhu, tyin ita can iin yaha ñi cucuyó can. ¹¹ Tyin ihñi xaan cuví tsitsi cuhu jahá ñicanyii. Tacan tan na ityí ita can. Tan canacavá can tan ndihí tsa sii caá can. Tan tacan cuví ra cuca, tyin cua quitsi tuhun tsiihí tsi ra tan cua cundihí tsa cuca ra.

Nacaa cunyeé iñi yo nyehé yo tundoho

¹² Sii xaan cuví tsi ra tsa cua cunyeé iñi nyehe tundoho tyin tsa yaha nyehe ra tundoho cua ñihí ra ñayivi nyito tsa catyí Nyoo tyin cuhva ra tsi ñi tsa cuñi tsi ra. ¹³ Tatun ndáa nyooho tsicá iñi ndo tsa javaha ndo

tsa ña vaha, ña cuñi ndo tyin Nyoo tsahá tsa caca iñi ndo tacan. Tyin Nyoo ña tsicá iñi ra javaha ra tsa ña vaha. Tan ndi ña tyuhú ra tsi yo tsa javaha yo tsa ña vaha. ¹⁴ Maa tyin nyooho tsa javahá tsa ña vaha, javahá ndo can tyin cuñi ndo javaha ndo can. Tan yacan cuenda tsicoó cuatyí ndo. ¹⁵ Tatun cua cuhva yo tsa caca iñi yo tuhun ña vaha, coo quivi cua javaha yo cuhva tsicá iñi yo tan cua coo cuatyí yo. Tan tatun maa ñi yacan cua javaha yo, cua tatsi tuñi Nyoo tsi yo tsa cuenda can tan cua cúu yo.

¹⁶ Yañi, cuñi xaan yu tsi ndo. Ña jandavi ñaha ndo tsi ndo. ¹⁷ Tandihí tsa vaha tan tsa vii tsa ñihí yo, queé tsi ityí siqui tyin maa Nyoo Jutu yo tsahá itsi. Tan maa ra javahá ñuhu tsa iyó andivi: tiñuu, tan yoo, tan ñicanyii. Tan maa ra tacan ñi cuví ra Nyoo, tyin ndi luxu ña tuhvá ra nasama. ¹⁸ Tan tsahá ra ñayivi tsa tsa iyó yo tsa cuenda tsa nditsa tsa caahán ra. Tyin jihna ca yo jandutsaá ra tsa nuu tandihí ca tsa javahá ra, tyin tacan cuñi maa ra.

Itiyí nditsa tsa taahán tsi cuhun yo

¹⁹ Yacan cuenda yañi, intuhun intuhun yo tan taahán tsi cuhun iñi yo tsa tyaá soho yo, maa tyin ña yatyi xaan nacahan yo tan ndi ña yatyi xaan cuxaan yo. ²⁰ Tyin nyivi tsa cuxaán, ña javahá ñi tsa taahán iñi Nyoo. ²¹ Yacan cuenda jaña ndo tsa ña vaha tan tsa caquiñi tsa iyó cuaha nu ñuhu ñayivi ihya. Ndaahví jaha ndo tsi ndo tan tñin cuenda vaha ndo tuhun Nyoo tsa tatsí ra añima ndo. Tyin tuhun Nyoo can iyó tunyee iñi itsi tsa jacacú tsi tsi yo. ²² Javaha ndo cuhva caahán tuhun Nyoo, tan ña tyaá soho ñi maa ndo itsi, tyin tatun tyaá soho ñi maa ndo itsi juven ñi tsi maa ndo jandaví ñaha ndo. ²³ Tyin nyivi tsa tyaá soho tuhun Nyoo tan ña javahá ñi cuhva caahán tsi, cuví ñi tumaa nyivi nyehé nuu ñi nu inu. ²⁴ Tyin nyehé ñi cuhva caá ñi, yaha can tan cuahán ñi tan naá nyico iñi ñi cuhva caá ñi. ²⁵ Maa tyin nyivi tsa iin nyita ñi tyaá soho tuhun Nyoo tsa tavá nuña tsi yo ndaha nu ña vaha tan ña naá iñi ñi itsi tan javahá ñi cuhva caahán tsi, sii cua cuví tsi ñi ican tan cua quita vaha tandihí tsa javahá ñi. ²⁶ Tan nyivi tsa catyí tyin tuhun Nyoo yihí ñi, maa tyin yatyi xaan yuhu ñi cahan ñi tsa caquiñi, nduve nacatyi tsicá ñi tuhun Nyoo tyin juven ñi tsi maa ñi jandaví ñaha ñi. ²⁷ Tyin tsa cuenda Nyoo, nyivi tsa nditsa tsinú iñi tsi ra juven ñi cuví ñi tsa javahá tyehehen: Jatyinyeé ñi tsi nyivi ndaahví tsa tsihí yí, tan jahá cuenda ñi tsi tsa nyihí tsa nduve ca sihi tan jutu, tan jahá cuenda ndihí tucu ñi tsi maa ñi tsa ña javaha ñi tsa ña vaha.

2

Na inducu ñi cuñi yo tsi nyivi tyin ña sñin caá intuhun ñi tan inga ñi

¹ Yañi, nyooho tsinú iñi ndo tsi Jutu Mañi yo Jesucristo, ra tsa cahnu xaan cuví, yacac cuenda ña taahán tsi cahnu jaha ndo tsi iin nyivi tan ñavin ca inga ñi. ²⁻³ Tatun cua quihvi iin ra yihí iin xehe xuhun cuaan ndaha tsitsi vehe ñuhu nu yucú ndo, tan nditsi ra jahma xiñu, znácaa cua cahan ndo tsihin ra? ¿A ña cua catyí ndo, “Cunyaa nu tyayu vaha ihya”? Tan juvin ñi cuhva can tan quihvi tucu iin ra ndaahvi nditsi ra jahma tyahnyá, tan catyí ndo tsihin ra, “cunyaa nyityi juvin o cunyaa nu ñuhu ihya”. ⁴ Ña vaha tsa javahá ndo tacan, tyin ña inducu jahá ndo tsa ñayivi tsi ra naha, tan tsicá iñi ndo tsa ña vaha.

⁵ Yañi tsa cuñi xaan yu, tyaa soho ndo tuhun ihya: Nyoo nacatsi ra tsi nyivi ndaahvi nu ñuhu ñayivi ihya, tyin nducuca ñi tsihin tsa tsinú iñi ñi tsi ra, tan cua ñihi ñi tsa vaha nu ndacá ñaha ra tyin yacan cuví tsa catyí ra tyin cuhva ra tsi nyivi tsa cuñi tsi ra. ⁶ Maa tyin nyooho tsahá ndo ticanuu tsi nyivi ndaahvi. ¿A ña tsitó ndo tyin juvin nyivi cuca tsahñi ndaahvi tsi ndo, tan tsindacá ñi tsi ndo nuu ra cumí tyiñu? ⁷ Tan ¿a ña tsitó ndo tyin nyivi can caahán ñi ndavaha ñi sivi ii ra Cristo, ra yihí ndaha tsi ndo?

⁸ Ley Nyoo tsa ñiñi ca catyí tsi: “Cuñi ndo tsi nyivi tumaa tsa cuñi ndo tsi maa ndo.” Tatun javahá ndo tsa catyí ley can, vaha javahá ndo. ⁹ Maa tyin tun intuhun ñi nyivi cuñi ndo, tan ña cuñi ndo tsi inga ñi, tsicoó cuatyí ndo tyin catyí ley Nyoo tyin iyó cuatyí nyivi javahá tacan. ¹⁰ Tyin tatun iin nyivi tsa tyaa yahvi tandihí ley, tan ña tyaa yahvi ñi intuhun tsi, cuví tsi tumaa tsa ña tyaa yahvi ñi tandihí ley. ¹¹ Tyin Nyoo catyí ra tyin ña coo inga ñaha tsi rayii, tun iyó ñasihi ra. Tacan tucu ñiñaha, tsa iyó yii, ña cuví coo inga rayii tsi ñi. Tan juvin ñi catyí tucu ra tyin ña cahñi yo nyivi. Yacan cuenda tatun iin ra nduve inga ñaha tsi ra, maa tyin tsahñi ra iin nyivi, juvin ñi ña tyaa yahvi ra tsa catyí ley. ¹² Maa tyin ley ra Cristo tsa jacacú tsi yo cua catyí tun vaha o ña vaha javahá yo. Yacan cuenda nducu ndo cuhva cahan ndo tan cuhva coo ndo. ¹³ Tyin nyivi tsa ña cundaahvi iñi tsi tahan ñi, Nyoo cua tatsi tuñi ra tsi ñi, tan ña cua cundaahvi iñi ra tsi ñi. Maa tyin ñi tsa cundaahvi iñi tsi inga ñi, cua quita vaha ñi quivi cutuñi ñi.

¿Ndáa tsa jacacú tsi yo, tsa tsinú iñi yo tsi ra Cristo o tsa javahá yo tsa vaha?

¹⁴ Yañi, nduve nacatyí tsinú iñi ndo tsi Nyoo, tun ña javaha ndo tsa vaha. ¿A jacacu tsa tsinu iñi yo tsi Nyoo ñi tsi yo? ¹⁵ Na jaha

yo tuhun: Iin tsaha iin ra yañi yo nduve jahma ra tan nduve tsa catsi ra tan tsahan ra yuvehe un, ¹⁶ Maa tyin yooho ña tsaha un jahma ra tan ndi tsa catsi ra tan catyí un tsihin ra: “Cyaahan tan Nyoo cuhun tsihin un. Na coo ca jahma un tan tsa catsi un”, catyí un. Nduve nacatyí cahan un tacan tyin ña tsaha un tsa tsiniñi ñuhu tsi ra. ¹⁷ Tan tacan ñi cuñi tucu yo tsihin tsa tsinú iñi yo, tun catyí yo tyin tsinú iñi yo tsi Nyoo tan ña jatynyee yo tsi nyivi, nduve yahvi nyaá catyí yo tyin tsinú iñi yo.

¹⁸ Yihí ndo cua catyí ndo: “Yooho tsinú iñi un tsi Nyoo tan yuhu javahá yo tsa vaha. Tan catyí un tyin tsihin tsa tsinú iñi ñi yo tan cuví cacu yo.” Maa tyin yuhu catyí yo tyin juvin ñi cahnu cuví tucu tsa javahá yo tsa vaha. Tyin yooho ña cuví janaha un tsa tsinú iñi un tsi Nyoo tsi yo tun ña javaha un tsa vaha. Maa tyin yuhu cuví janahá yo tsa tsinú iñi yo tsi Nyoo tsi un tsihin tsa javahá yo tsa vaha. ¹⁹ Nditsa tsa tsinú xaan iñi un tyin iyó intuhun ñi maa Nyoo. Vaha tyin tsinú iñi un. Maa tyin nu ñavaha nahnu tsinú tucu iñi nahnu tyin iyó intuhun ñi Nyoo. Tan yacan cuenda nihí nahnu tsihin tsa yuuhvi nahnu tyin ña cua cacu nahnu. ²⁰ Ña soho xaan çaça iñi un. Cutuñi iñi tyin tun tsinú iñi yo tan ña javahá yo tsa vaha, nduve yahvi nyaá tsa tsinú iñi yo. ²¹ Ra Abraham, tsii tsaahnu yo, cuví ra iin ra vaha nuu Nyoo tyin jamañi ra tsi ra Isaac, sehe ra, tumaa catyí maa Nyoo tsihin ra. ²² Ihya nyehé yo tyin tsa cuenda tsa tsinú iñi ra Abraham tsi Nyoo javahá ra tsa catyí ra tsihin ra tyin javaha ra. Tan tsa javahá ra yacan, quituvi vaha tsa tsinú iñi ra tsi Nyoo. ²³ Tacan tan cundaá tsa catyí nu tutu Nyoo tyehen: “Ra Abraham tsinú iñi ra tsi Nyoo, yacan cuenda cuví ra ra vaha nuu Nyoo.” Tan iyó tucu inga nu catyí tsi: “Ra Abraham, cuví ra ra vaha iñi tsi Nyoo.”

²⁴ Tan ihya cuví nu cutuñi iñi yo tyin vaha yo nuu Nyoo tatun tsinú iñi yo tsi ra tan javahá yo tsa vaha tan ñavin tsihin tsa tsinú iñi ñi yo tsi ra. ²⁵ Tan tacan tucu ña Rahab tsa tsicá nuu tsihin rayii. Yahá tsa javahá ña cuatyí, javahá ña tsa vaha quivi tsaha ña nu tsiyucu xeehe ra tsa jacuhun ra Josué. Tan jatynyee ña tsi ra naha tsa cuhun ra naha inga ityi. Tan tsa cuenda yacan, catyí Nyoo tyin vaha ña. ²⁶ Tan tacan tucu cuví cuñu ñuhu nyivi. Tatun nduve ca tsa nyitó ñi iyó tsitsi cuñu ñuhu can, nduve ca yahvi nyaá can. Tan tacan cuví tucu yoó, tatun ña javahá yo tsa vaha, nduve yahvi nyaá tsa tsinú iñi yo.

3

Nacaa jaha cuenda yo cuhva caahán yo

¹ Nyooho yañi, ña yatyi xaan cuñi ndo cuví ndo ra cahan tuhun Nyoo. Tyin tyin ndo tyin nyuhu tsa caahán ndi tuhun Nyoo, tatun ña vaha cahan ndi, ñihi ca cua tatsi tuñi Nyoo tsi ndi tan ñavin ca nyivi tsa ña caahán tuhun Nyoo. ² Tyin tandihi maa yo tan tsicoó cuatyí yo, maa tyin ra tsa ña javahá cuatyí tsihin tsa caahán ra, juvin ra cuví ra vaha tyin cuví ndaca ñaha ra nanií cahnu cuñu ñuhu ra. ³ Tumaa ra tsa tyihí yoho yuhu cuayu cuví ndaca ñaha ra tsi ti, vasu ndi maa cahnu ti. ⁴ Tan tacan tucu iin yutun ndoo tsa tsicá nu ndutya ñuhu, vasu cahnu tsi maa tyin tsihin vitu luhlu tsa nyaá ityi xuu tsi, cuví jacahun ra jacacá itsi ndáa ityi cuñí maa ra, vasu ñihi xaan yihí tatyí. ⁵ Tan tacan tucu yaa yo, luhlu xaan tsi. Maa tyin cuaha tsa caquiñi cuví cahan yo tsihin tsi. Tumaa nu natñin iin ñuhu luhlu iin cuhu cahnu tan cayu tandihi maa yutun. ⁶ Tacan tucu yaa yo cuví tsi tumaa iin ñuhu luhlu. Tan cuví tucu tsi tumaa iin tsa quiñi cahnu tsa jatíví tsi nanií cahnu cuñu ñuhu yo tan tandihi cuhva iyó yo ñayiví ihya, tyin juvin ñi maa nu ña vaha natyuhú itsi. ⁷ Nyivi cuví jandumasa ñi tandihi maa nu quití tsa iyó: saa, coo, tan quití tsa iyó tsitsi ndutya ñuhu. ⁸ Maa tyin yoñi cuví jandumasa yaa yo tyin cuví tsi iin tsa ña vaha tan ña tsahá tsi cundaca ñaha yo itsi. Tumaa iin coo tyihí ti venenu ti tsi nyivi, tan tsiihí ñi. Tacan cuví yaa yo. ⁹ Tyin juvin ñi tsihin yaa yo jacahnú yo tsi Nyoo Jutu yo. Tan juvin ñi tsihin can caahán tucu yo ndavaha ñi siqui nyivi tsa javahá Nyoo tumaa caá maa ra. ¹⁰ Juvín ñi tsihin yuhu yo jacahnú yo tsi Nyoo. Tan juvin ñi tsihin can caahán yo tsa caquiñi. Maa tyin yañi, ña taahán tsi tsa javahá ndo tacan. ¹¹ Tyin, ¿a cuví quita ndutya cuii tan ndutya uva tsitsi iin ñi ndohyo? Ña cuví. ¹² Yañi, ¿a cuví cuhva tumangu iin paya, o cuví cuhva tupaya iin mangu? Ña cuví. Tan tacan ña cuví quita ndutya uhva tan ndutya cuii tsitsi iin ndohyo.

Tsa tsiñi tuñi tsa vaha ca

¹³ Tatun yihí ndo tsitó ndo tan iyó tsa tsiñi tuñi tsi ndo, janaha ndo can tsihin tsa catsi iyó ndo. Tan ña nduyaa ndo javahá ndo tsa vaha tyin javahá ndo can tsihin tsa tsiñi tuñi Nyoo tsa iyó tsi ndo. ¹⁴ Maa tyin tatun nyiyo iñi ndo tsitsi añima ndo tan cuñí xaan ndo nduvaha ndo nu nyivi, ña cahnu jaha ndo tsi ndo tan catyi ndo tyin iyó tsa tsiñi tuñi tsi ndo. Tyin tun cahnu jahá ndo tsi ndo, tyihí xeehe ndo tsa nditsa, cuví can. ¹⁵ Tyin tun tacan tsicá iñi ndo, ñavin tsa tsiñi tuñi Nyoo cuví can, tyin cuhva tsicá iñi nyivi ña tsitó tsi Nyoo tan cuhva tsica iñi nu ña vaha cuví can. ¹⁶ Tyin tatun nyiyo iñi ndo tan cuñí ndo nduvaha ndo nu nyivi, ticaña xaan tsicá iñi ndo. Tan iyó tucu tandihi inga nuu tsa ña

vaha nu yucú ndo. ¹⁷ Maa tyin tatun iyó tsa tsiñi tuñi Nyoo tsi ndo, cuii iyó ndo, catsi iyó ndo. Tan nducú ndo cuhva coo vaha ndo tsihin nyivi tsihin tsa vita iñi ndo, tan vaha nyivi cuví ndo. Tan catsi vaha tsicá iñi ndo, tan cundaahví iñi ndo tsi nyivi, tan caahán ndo tsa nditsa tsihin ñi, tan nducú ndo tsa vaha tsi ñi tsihin tsa nu iñi ndo. ¹⁸ Tatun iyó vaha yo tsihin nyivi, tan iyó taxin yo tsihin ñi, cua coo yo ñayivi cuii.

4

Ña taahán tsi javaha yo cuhva cuñí cuñu ñuhu yo

¹ ¿Nacuenda iyó tsihi nu yucú ndo? ¿Nacuenda iyó cuatyí? Tsa cuenda tyin tsitsi añima ndo tsicá iñi ndo maa ñi maa tsa ña vaha. ² Iyó tsaha nda cuanda tsahñí ndo nyivi tyin cuñí ndo tsa cuñí ndo tan ña ñihí ndo can. Tatun nyehé ndo náa cuví can nyehé ndo, nyiyo iñi ndo can tan tsa ña ñihi ndo can quitsaha cañi tahan ndo. Ña ñihí ndo tsa cuñí ndo tyin ña tsicán ndo can tsi Nyoo. ³ Tatun tsicán ndo tsa tsicán ndo tsi ra tan ña ñihí ndo can, ña tsahá ra can tsi ndo tyin tsitó ra tyin cua jatíví ndo can tsihin tsa taahán iñi ndo. ⁴ ¿Nacuenda javahá ndo cuhva cuñí nyivi, nyoocho tsa ña tsinú vaha iñi tsi Nyoo? ¿A ña tsitó ndo tyin tun javahá yo cuhva cuñí nyivi, ñi xaan iñi tsi Nyoo cuví yo? ⁵ Tan yacan iyó cuenda catyi nu tutu Nyoo tyin Tatyí lí tsa tsahá ra coo añima yo, cuñí xaan tsi tsi yo tan cuiñu xaan tsi tsi yo tyin cuñí tsi tsa jacahnú yo tsi intuhun ñi maa ra. ⁶ Tan jatyinyeé xaan Nyoo tsi yo tsa nacuhvá yo tsi yo tsi ra. Tyin catyi ra tyin jatyinyeé ca ra tsi nyivi ndaahví tsa tsitó tyin tsiñí ñuhu ra tsi ñi. Tan ña cuñí ra nyehé ra tsi ra tsa cahnu jahá tsi. ⁷ Yacan ñacuhva vaha ndo tsi ndo tsi Nyoo. Ña tyaa yahví ndo nu caahán nu ña vaha tyin tun ña jahá ndo cuenda nu caahán nu, tacan tan cua cunu nu nyehé nu tsi ndo. ⁸ Ndúcu ndo cuhva cunyanaa vaha ca ndo tsi Nyoo tyin tacan tan natuhva ra tsi ndo. Nyoocho, nyivi iyó cuatyí, jandundú ndo tsi ndo. Tan nyoocho tsa tsicá iñi tyin cuví javaha ndo tsa iyó nu ñuhu ñayiví ihya tan juvin ñi cuhva can tan jacahnú tucu ndo tsi Nyoo, jandu iin ndo iñi ndo tan cuhva ndo añima ndo jacutu Nyoo tsa vaha, tyin tacan tan ndundú ndo nuu ra. ⁹ Cuiihya cuñi ndo. Vácu ndo. Na nacoto ndo tyin ña vaha cuhva iyó ndo. Tsa nuu tsa vacu naaha ndo tsihin tsa sií cuñí ndo, vacu ndo tsihin tsa cuiihya cuñi ndo. Tan tsa sií cuñí ndo na nanduvi tsi tucuiihya iñi. ¹⁰ Ndaahví jaha ndo tsi ndo nuu Jutu Mañi yo, tyin tacan tan janducahnú ra tsi ndo.

Ña cahan nyaa ndo tsi nyivi

¹¹ Yañi, ña cahan ndo ndavaha ñi siqui iin yañi yo. Tyin nyivi caahán ndavaha ñi siqui

nyivi, o caahán nyaa ñi nyivi, siqui ley Nyoo caahán ñi ndavaha ñi tan caahán nyaa ñi cuví can. Tyin tun caahán nyaa yo ley Nyoo, juez jahá yo tsi yo tsa nuu tsa tyaá yahvi yo tsa caahán ley can. ¹² Tyin intuhun ñi ra tsahá ley can. Tan juvin ñi ra cuví Juez. Tan juvin ra cuví ra jacacú tsi yo, o jacunaá tsi yo. Tan ¿yooho yoo ra cuví un tyin cahan nyaa un tsi inga nyivi, tan tatsi tuñi un tsi ñi tan jaha un tsi un tumaa juez?

Ña tsitó yo náa cua cuví tsi yo tyaan, yacan cuenda ña taahán tsi cahnu jaha yo tsi yo

¹³ Yihí ndo catyí ndo: “Vityin o tyaan cahun yo ñuu can, o inga ñuu can. Tan ndoo yo ican iin cuiya tan jaha tyiñu yo tan jaha canaa yo xuhun”, catyí ndo. Maa tyin tyaá soho ndo tsa cua cahan yu ihya: ¹⁴ Ñayivi tsa iyó yo cuví tsi tumaa vico nuhu tsa tuhvá yihí tan iin yaha ñi naa ihñi nyico. Ndi ña tsitó ndo tsa cua cuví tyaan tan catyí ndo tyin cahun ndo. ¹⁵ Vaha ca cahan ndo tyeheh: “Coo yo juhva ca quivi tan javaha yo tsehe o yacan, tun Jutu Mañi yo tan cuñi ra.” ¹⁶ Maa tyin nyooho ña caahán ndo tacan, tan cahnu xaan jahá ndo tsi ndo. Tan Nyoo ña taahán iñi ra nyehe ra tsi nyivi javahá tacan. ¹⁷ Tyin yoo tsa tsitó javaha tsa vaha tan ña javahá yo can, tsicoó cuatyí yo.

5

Nu tsahá cuenda ra Santiago náa cua tahan nyivi cuca

¹ Tyaá soho ndo tuhun caahán yu ihya, nyooho nyivi cuca! Vacu ndo tsihin tsa cuiihya cuñi ndo, çana tsaá ndo tsa cuenda tundoho tsa cua nyehe ndo. ² Tyin tsa cuca tsa jacayá ndo, tsa ndihi can tyaahyú. Tan jahma vaha ndo, tsa ndihi maa can tsatsj tiguixin. ³ Xuhun cuaan tan xuhun cuitsin ndo tsa ndihi can cuxí. Tan cuxí can tsahá cuenda can tyin ña vaha javahá ndo tsihin xuhun ndo. Tan juvin can cuví tumaa ñuhú tsa cua cahmi tsi ndo. ¿Nacuenda jacayá ndo tsa cuca nu cua ndihi quivi ihya? ⁴ Tan ña tyahví ndo yahvi tsa taahán tsi tsi nyivi ndaahví tsa jahá tyiñu tyiñu ndo. Tan vityin tsicán ñi cuatyí tsaha ndo nuu Jutu Mañi yo, ra ndacá ñaha tandihi ángel tsa cuví andaru cuenda ra. Tan maa Jutu Mañi yo tsiñi ra tuhun caahán ñi ndaahvi can. ⁵ Iyó vaha xaan ndo nu ñuhu ñayivi ihya tyin cuca ndo. Tan javahá ndo cuhva cuñi maa ndo. Tumaa tuhvá nyivi janduxaahán quini tyin cuu ti, tacan javahá ndo tsihin ndo. Tan vityin tsa tsaá quivi tsa cua cuu ndo. ⁶ Tyin tyaá ndo cuatyí tsaha nyivi vaha tan tsahñi ndo tsi ñi. Tan ndi ña cahan ñi cuatyí siqui ndo.

Na cunyeé iñi yo cuatu yo tsi ra Cristo

⁷ Yacan cuenda, yañi, janyee ndo iñi ndo cuatu ndo nda cuanda quitsi nyico Jutu Mañi yo. Tumaa ra tsa jahá tyiñu tsitsi cuhu ndatú ra nda cuun savi tsa jihna tan nda ndihi cuun nyico tsi, tan naquihin ra tsa tatsj ra. ⁸ Tan tacan taahán tsi cunyeé iñi yo cuatu yo tsi Jutu Mañi yo. Jandu iin ndo iñi ndo tyin tsa yatyin cuii quitsi ra.

⁹ Yañi, ña tyaá ndo cuatyí tsi yañi ndo, coto tatsi tuñi Nyoo, ra cuví Juez, tsi ndo, tyin tsa nyaá ra tsa cuñi quitsi ra. ¹⁰ Yañi, quihin cuenda ndo cuhva tsicoó ra cuví ndusu yuhu Nyoo tahañ tsanaha. Tyin ra ican naha ra cunyeé xaan iñi ra naha nyehe ra naha tundoho quivi tsahá cuenda ra naha tuhun Jutu Mañi yo. ¹¹ Tsitó yo tyin si xaan cuñi ra tsa cunyeé iñi nyehe tandihi nuu tundoho, tumaa tsa cunyeé xaan iñi ra Job nyehe ra tundoho. Tan nu ndihi ña, cuaha xaan tsa vaha tsahá Jutu Mañi yo tsi ra, tyin Jutu Mañi yo iyó xaan tucahnu iñi tsi ra. Tan cundaahví iñi ra nyehe ra tsi yo. ¹² Maa tyin yañi, ña cahan ndo: “Naha Nyoo maa”. Tan ña cahan ndo: “Tsitó vaha maa ra nyaá gloria”, tan ndi ña cahan ndo: “Tsitó vaha maa ra javahá ñuhu ñayivi”, tan ndi ña cahan ndo inga ca tuhun tahan can. Tatun nditsa tuhun caahán ndo, “nditsa” catyí ndo. Maa tyin tatun tsitó ndo tyin ña nditsa, catyí ndo tyin “ña nditsa”, coto tatsi tuñi Nyoo tsi ndo.

¹³ Tun ndáa nyooho nyehe tundoho, ndacan tahvi ndo tsi Nyoo. Tan nyooho tsa si cuñi, çata ndo yaa Nyoo. ¹⁴ Tan nyooho tsa cuuhví, çana ndo tsi ra tsahnu vehe ñuhu naha ra tyin ndacan tahvi ra naha tsa cuenda ndo tan tyihi ra naha aceteye tsi ndo tsihin sivi ra Cristo. ¹⁵ Tan tatun tsinú iñi ra naha tsi Nyoo cuhva tsa tsicán tahvi ra naha, nyivi cuuhví can cua nduvaha ñi. Tan Jutu Mañi yo cua janduvita ra tsi ñi. Tan tatun tsicoó ñi cuatyí, Nyoo cua jaha ra tucahnu iñi tsi ñi. ¹⁶ Yacan cuenda ñahma ndo cuatyí ndo tsi iin ndo tan tsi inga ndo. Tan ndacan tahvi ndo tsi Nyoo tsa cuenda inga ca nyivi na nduvaha ñi. Tyin nu tsicán tahvi iin ra vaha tsicá tsihin Nyoo, iyó xaan tunyee iñi Nyoo. ¹⁷ Tumaa ra Elías ra cuví ndusu yuhu Nyoo tahañ tsanaha. Cuví ra iin rayi tumaa maa yo. Tan tsicán tahvi ra tsi Nyoo tyin na ña cuun savi. Tan ña cuun savi uñi cuiya sasava. ¹⁸ Yahá can tan tsicán tahvi nyico ra tsi Nyoo inga tsaha tyin na cuun savi. Tan cuun tsi inga tsaha. Tan tsahnu tsi tsa tatsj nyivi.

¹⁹ Yañi, tatun iin nyivi tahan ndo nacoó ñi tuhun nditsa Jutu Mañi yo, tan cuanuhú ñi ñayivi inga tsaha, tan jatyinyee ndo tsi ñi tsa nanducu nyico ñi ityi Nyoo, ²⁰ coto ndo tyin tsa javahá ndo tacan tsihin ñi, jacacu ndo aña ñi tan ña cua cahun ñi anyaya. Tan jahá Nyoo tucahnu iñi cuatyí ñi jahá ndo.

Carta Tsa Jihna Ñi Tsa Jacuhun Ra Pedro Tsi Nyivi Yihi Cuenda Nyoo

Nu quitsahq tyaá ra Pedro carta tsa cuenda nyivi yihi cuenda Nyoo

¹Yuhu ra Pedro tava tyiñu ra Jesucristo tsi yu na caca yu tyiñu ra. Tyaá yu carta ihya tsa cuenda nyooho tsa iyó ñuu tsa cayucú Ponto, tan Galacia, tan Capadocia, tan Asia tan Bitinia tsa ñavin ñuu ndo cuví. ²Tyin nda tsanaha tan nacatsj vaha maa Nyoo Jutu yo tsi nyooho tyin cuví ndo nyivi ra. Tan tsa cuenda tsa nacatsj ra tsi ndo, jatyinyee Tatyí li ra tsi ndo tan nacuhvā ndo tsi ndo tsi ra, tan tyaá yahvi ndo tsi ra Jesucristo vityin, tan ndundí ndo tsihin niñi ra. Naquihin ndo cuaha ca tsa vaha tan tsa taxin tsa tsahá Nyoo tsi yo coo añima ndo.

Cuita iñi ndo tyin cua ñihi yo ñayivi tsa coo yo

³Jacahnu ndo tsi Nyoo Jutu ra Jesucristo Jutu Mañi yo tyin ndaahvi xaan cuñi ra nyehé ra tsi yo. Tan tsahá ra tsa nacacu tsaá yo inga tsaha tyin janandoto ra tsi ra Jesucristo. Yacan cuenda cuita iñi yo tyin cua ñihi yo ñayivi tsaá tsa ña cua naa maa. ⁴Tan tsa cuenda tsa nacacú tsaá yo, Nyoo cua cuhva ra tandihí tsa cumí vaha ra nda gloria tsi yo. Tan ña cua naa maa tsi, tan ndi ña cua tiví tsi, tan ndi ña cua ndahva tsi tumaa ndaahvá ita. ⁵Tan tsa cuenda tsa tsinú iñi yo tsi Nyoo, jahá cuenda ra tsi yo tsihin tunyee iñi ra nda cuanda ndihi cacu yo. Tan cua janaha ra tsi yo náa cuñi tsi catyi tsa cacú yo nu cua ndihi tyembu tyin tsa ndatú vaha can tsi yo.

⁶Yacan cuenda sii cuñi ndo, vasu ndi maa nyehé ndo tandihí nuu tundoho juhva quivi vityin. ⁷Tyin tandihí maa tundoho can tan taahán tsi nyehé yo can tyin tacan tan coto vaha yo tun nditsa tyin tsinú iñi yo tsi Nyoo. [Tyin tsa tsinú iñi yo cuví tsi tumaa xuhun cuaan.] Tan tumaa tsahmí yo xuhun cuaan tun cuñi yo coto yo tun juvin xuhun cuaan vaha cuví can, tacan cuví can. Tyin tsa tsinú iñi yo cahnu xaan ca cuví can tan ñavin ca xuhun cuaan tyin xuhun cuaan tsindihí ñi maa can. Maa tyin tun ña jandihí yo tsa tsinú iñi yo tsi Nyoo, cua quituvi yo nuu ra tan cua jacahnu nyivi tsi maa ra tan tsi maa yo quivi quitsi Jutu Mañi yo Jesucristo inga tsaha.

⁸Nyooho cuñi ndo tsi ra Jesucristo vasu ña nyehé ndo tsi ra. Tan tsinú iñi ndo tsi ra vasu ña nyehé ndo tsi ra vityin. Tan sii xaan sii xaan cuñi ndo nda cuanda ña cuví

ñihi ndo cuhva catyí ndo najava cuhva tsa sii cuñi ndo, ⁹tyin nu ndihi cua cacu ndo tan yacan cuví tsa cua ñihi ndo jahá tsa tsinú iñi ndo tsi Nyoo.

¹⁰Ra ndusu yuhu Nyoo tsa tsicoq tahan tsanaha nducú tuhun ra naha nácaa cua cacu yo. Tan nducú ra naha cuhva coto ra naha náa cuví tsi. Tyaá ra naha nu tutu cuenda tsa vaha tsa cua cuhva Nyoo tsi yo. ¹¹Tan Tatyí li ra Cristo tsa iyó tsihin ra naha jacoto tsi tsi ra naha náa ndihi tundoho cua nyehe ra Cristo, tan nácaa cua jacahnu Nyoo tsi ra. Tan nducú xaan ra naha cuhva coto ra naha yóo ra cua cuví ra Cristo tsa cua tahan tacan, tan ama cua cuví tuhun tsa catyí Tatyí li tsihin ra naha. ¹²Maa tyin jacoto Nyoo tsi ra naha tyin tyiñu tsa javahá ra naha, ñavin tsa vaha tsi maa ra naha cuví can, tyin tsa vaha tsi maa yo cuví can. Tan tandihí tsa cahān ra naha juvin tsi cuví tuhun tsa jacacú ra Jesucristo tsi yo tsa tsa yaha tsinú ndo. Tan ra tsa cahān tuhun ihya naha ra, maa Tatyí li Nyoo jacahān tsi ra naha. Tan ra ángel naha ra cuñi xaan ra naha coto ra naha tuhun ihya.

Nyoo caná ra tsi yo tyin coo yo ñayivi cuiti

¹³Yacan cuenda jahā vaha ndo cuenda tsi ndo tsihin tsa javaha ndo. Cuiti coo ndo. Cuita iñi ndo tyin quivi quitsi ra Jesucristo inga tsaha cuaha tsa vaha cua cuhva Nyoo tsi yo tsa cuenda tsa vaha iñi ra. ¹⁴Coq ndo tumaa iyó tsa nyihi tsa tyaá yahvi tsi jutu. Ña coq ndo tumaa tsicoq ndo quivi tsa ndi cumañi ca nacoto ndo tsi Nyoo tyin tsanaha tsindacā ñaha tsa ña vaha tsa cuñi cuñu ñuhu ndo tsi ndo. ¹⁵Maa tyin vityin coo ndo ñayivi cuiti tyin maa Nyoo, ra tsa canā tsi ndo, cuiti iyó ra. ¹⁶Tyin tacan catyí ra nu tutu ra: “Cuiti coo ndo tyin maa yu cuiti iyó yu”, catyí Nyoo.

¹⁷Tatun tuhvá ndo tsicán tahvi tsi Nyoo tan catyí ndo tsihin ra “Jutu Mañi yu”, jahā cuenda ndo tsi ndo tan jahā ndo tsa ñayivi tsi ra tsitsi tsa iyó ndo nu ñuhu ñayivi ihya. Tyin Nyoo jahá ra cuenda cuhva iyó tsa intuhun intuhun yo, an cuví yo nyivi cuca, an nyivi ndaahvi. ¹⁸Nyoo nasama ra cuhva tsa ña vaha tsicoq ndo, cuhva tsa janahā tsii tsaahnu ndo tsi ndo. Tan tsitó vaha ndo tyin ñavin tsihin xuhun cuaan o xuhun cuitsin tsa tsindihí ñi maa tyahvi ra tan cacú yo, ¹⁹tyin tyahvi ra tsihin niñi ra Cristo, tan yacan cuví tsa yahvi xaan ca. Ra Cristo cuví ra tumaa iin mbee ticatyí luhlu tsa ña pehe [tsa tuhvá nyivi Israel jamañi nuu Nyoo], tan tsihj ra vasu ndi maa nduve cuatyí ra. ²⁰Tsa ndi cumañi ca tsinu ñuhu ñayivi tsinyaq cuhva tyin tyehen cua tahan ra Cristo. Maa tyin ña cuví tsi tsa numi ñi. Nda cuanda vityin nu cua ndihi quivi, cuví tandihí can tsa cuenda tsa vaha tsi maa yo.

²¹ Tsa cuenda ra Cristo tan tsinú iñi ndo tsi Nyoo tyin juvin ra janandoto tsi ra Cristo tsa yahá tsihí ra tan jacahnu ra tsi ra. Tan yacan cuenda tsinú iñi ndo tsi Nyoo tan nyitá iñi ndo tyin cua naquihin ra tsi ndo.

²² Tsihin tunyee iñi Tatyí Iin Nyoo tyaá yahvi ndo tuhun nditsa. Tan tsa ndundú ndo jahá Nyoo tsa cuenda tsa tyaá yahvi ndo tuhun nditsa can. Tyin tacan tan cuví cuñi tahan ndo tsi ndo tsihin tsa nditsa. Yacan cuñi tahan ndo tsi ndo tsihin tsa nñi iñi ndo, tan tsihin tandihí tunyee iñi tsa iyó tsi ndo. ²³ Tyin tsa nacacú tsa ndo, maa tyin ñavin tumaa cacú nyívi nu ñuhu ñayívi ihya, tyin jutu ndo cacú ra naha jahá sihi ra naha tan tsihí ra naha. Tan nyooho vityin nacacú tsa ndo tsihin Nyoo tsa ña cua cundihi maa, tyin tacan ñi cua coo maa tsi. ²⁴ Tyin catyí tuhun Nyoo tyehen:

Tandihí nyívi tsa iyó nu ñuhu ñayívi ihya cuví ñi tumaa cuhu.

Tan tsa cahnu tsa javahá ñi cuví tsi tumaa ita.

Tyin cuhu can na ityí can, tan cucoyó ita can. [Tacan cuví nyívi, tyin iin yaha ñi tsihí ñi.]

²⁵ Maa tyin tuhun Jutu Mañi yo tacan ñi iyó maa tsi.

Tan tuhun ihya cuví tuhun vaha tsa jacacú Nyoo tsi yo tsa caahán ndi tsihin ndo.

2

¹ Yacan cuenda nacoo ndo tandihí nuu tsa caquiñi. Ña jandavi ñaha ndo tsi nyívi, ña jaha ndo tyin vaha ndo tan ñi nditsa, ña nyíyo iñi ndo nyehe ndo tsa iyó tsi inga nyívi, ña cahan ca ndo cuendu. ² Javaha ndo tumaa javahá lee, tyin lee tsa ndi cacú nanducú tsi tsa caxin tsi, tacan taahán tucu tsi nanducu nyooho tuhun Nyoo tyin juvin tsi cua jacuhnu tsi ndo tan nacoto vaha ca ndo tsi Nyoo nda cuanda ndihí cacu ndo, ³ tun nditsa tyin tsitó ndo tyin Jutu Mañi yo, vaha xaan ra cuví ra.

Ra Cristo cuví yuu nyito

⁴ Cunya naa ndo tsi Jutu Mañi yo. Tyin juvin ra cuví yuu nyito tsa ña cuñi nyívi cuatyínu ñi. Maa tyin Nyoo nacatsí ra tsi Jutu Mañi yo tyin juvin ra cuví yuu sii caá tsa yahvi nyaá tsa cuenda ra. ⁵ Tatun nya naa vaha yo tsi ra Cristo, cua cuví yo tumaa iin vehe tyin maa Nyoo cuví ra tumaa ra javahá vehe. Cuhva ndo tsa jandu iin Nyoo tsi ndo tsihin ra Cristo tyin tun tsa nya naa vaha ndo tsi ra, cua cuví ndo tumaa ra jutu tsa javahá maa ñi tyiñu Nyoo. Cua jacahnu ndo tsi ra tan sii xaan cua cuñi ra. ⁶ Tyin catyí tucu nu tutu ra tyehen:

Yuhu nacatsí yu iin yuu tsa tsiñi ñuhu ca tan sii ca caá, tan tsaquín yu yuu can nu cua javaha yu vehe yu nda Sión.

Tan nyívi tsa tsinú iñi tsi ra tsa cuví yuu can, ña cua tahan ñi ticanuu. Tacan catyí Nyoo tuhun ra Cristo nu tutu ra.

⁷ Maa tyin tsa cuenda yoo tsa tsinú iñi tsi ra Cristo, ra cuví yuu can, tsiñi ñuhu xaan ra tsi yo. Tan tsa cuenda nyívi tsa ña tsinú iñi tsi ra, cuví ra tumaa iin yuu tsa caahán Nyoo tuhun nu tutu ra tan catyí tsi tyehen:

Yuu tsa ña cuñi ra javahá vehe cuatyínu ra, yacan cuví yuu tsa tsiñi ñuhu ca, catyí tsi.

⁸ Tan catyí tucu tsi:

Ra ican cuví yuu tsa cuaha xaan nyívi cua nañi tsa ha tan nduva ñi.

Cuví ra iin cava tsa janduvá tsi ñi, catyí tsi nu tutu Nyoo.

Nduva nyívi can tyin tsiñi ñi tuhun Nyoo, tan ña tyaá yahvi ñi itsi tyin tacan nyaá tyin cua javaha ñi.

Nyívi yíhi cuenda Nyoo

⁹ Maa tyin nyooho cuví ndo nyívi nacatsí maa Nyoo. Tan cuví ndo tumaa jutu tyin javahá ndo tyiñu nuu ra tyin juvin ra ndacá ñaha tsi yo. Tan cuví ndo nyívi ii ityi nuu ra tan cuví ndo nyívi maa ra, tacan tan cahan ndo tuhun vaha tsa javahá ra. Tyin juvin ra tavá tsi yo nu naa tan tyihí ra tsi yo nu nditsin tan nu sii caá. ¹⁰ Tsa ndi cumañi ca cuví ndo nyívi Nyoo, nduve yahvi nyaá ndo. Maa tyin vityin nyívi Nyoo cuví ndo. Quívi can yoñi cundaahví iñi tsi ndo, maa tyin vityin Nyoo cundaahví iñi ra tsi ndo.

Nu catyí ra Pedro tyin coo yo, tan javaha yo tyiñu nuu Nyoo

¹¹ Yañi, cuñi xaan yu tsi ndo, tan caahán ndahvi yu tsihin ndo tumaa tsa ñavin ca ra ñuhu ñayívi cuví ndo, tyin nda gloria cuví ñuu ndo. Yacan cuenda ña javaha ndo cuhva cuñi cuñu ñuhu ndo. Tyin cañi tahan cuñu ñuhu ndo tsihin añima ndo. ¹² Jaha cuenda ndo tsi ndo nu iyó ndo tyañu nyívi tsa ña tsitó tsi Nyoo. Tyin vasu caahán ñi ndavaha ñi siqui ndo, tan catyí ñi tyin ña vaha ndo, maa tyin quívi quítsi nyehe Nyoo tyiñu javahá yo cua nyehe ñi tyin vaha tsa javahá ndo tan cua jacahnu ñi tsi Nyoo.

¹³ Tyaa yahvi ndo tsi ra cumí tyiñu nu iyó ndo tsa cuenda tsa cuñi ndo tsi Nyoo. Tyaa yahvi ndo tsi ra cumí tyiñu, a cuví ra rey cahnu ca, ¹⁴ a iin ra jaquitsí ra rey tyin tatsí tuñi ra tsi ra iyó cuatyí naha ra tan naquihin ndaahvi ra tsi yoo tsa javahá tsa vaha. ¹⁵ Tyin Nyoo cuñi ra tsa javaha yo maa ñi maa tsa vaha tyin tacan tan ña ñiñi ca nyívi soho tan nyívi ña tsitó náa cahan ñi siqui yo.

¹⁶ Coo ndo tumaa iyó nyívi tsa iyó nuña, maa tyin ñavin tsa tacan coo nuña ndo tan javaha ndo tsa ña vaha. Javaha ndo tyiñu nuu Nyoo tyin cuví ndo musu ra. ¹⁷ Jaha ndo tsa ñayívi tsi tandihí ñi nyívi. Cuñi ndo tsi ñi

yihí cuenda Nyoo. Jaha ndo tsa ñayivi tsi ra ndacá ñaha, tyin Nyoo nyehé ra tandihi tsa javahá yo.

Uvi taahan cuhva nyehé yo tundoho

¹⁸ Nyooho tsa cuví musu, cuhva ndo tsa cundaca ñaha tsitoho ndo tsi ndo, tyaa yahvi ndo tsi ra naha, vasu xaan ra naha a vasu vaha iñi ra naha. ¹⁹ Tyin tatun cunyeé iñi yo nyehé yo tundoho tsa janyehé nyivi tsi yo tsa cuenda tsa javahá yo tsa vaha nu Nyoo, cua tsa ca nnu ra. ²⁰ Maa tyin tatun tatsi tuñi nyivi tsi ndo tsa cuenda tsa javahá ndo tsa ña vaha tan cunyeé iñi ndo nyehé ndo tundoho, nduve náa catyi. Maa tyin tatun ña cundihí iñi ndo tan cunyeé iñi ndo nyehé ndo tundoho tsa cuenda tsa javahá ndo tsa vaha, yacan cuví tsa vaha nuu Nyoo. ²¹ Tumaa tsa nyehé maa ra Cristo tundoho tsa cuenda yo, tacan taahán tsi cunyeé iñi yo nyehé yo tundoho tyin tsa cuenda yacan cana Nyoo tsi yo. ²² Ra Cristo ndi intuhun cuatyí ña javahá ra. Tan ndi iin tsaha tan ña jandaví ñaha ra tsi nyivi. ²³ Quivi jacuñi nyaa ñi tsi ra, ña jacuñi nyaa ra tsi ñi. Quivi tsa janyehé ñi tundoho tsi ra ña jayuhvi ra tsi ñi. Tyin intuhun ñi maa Nyoo cuví ra tuhvá jacutuñi tsi nyivi tsihin tsa ndaa tan tsihin tsa nditsa. Yacan cuenda natyaa ra tsi ra ndaha Nyoo. ²⁴ Tyin cuhva tsa ticaá ra Cristo nu cruu can, tsicoso tandihi cuvi maa cuatyí yo tsata ra. Tacan cuví tyin tacan tan ña javaha ca yo cuatyí, tan coo yo ñayivi cuiti. Tyin tsihin tsa ñicueehé ra, tan nduvahá yo. ²⁵ Tyin quivi can tsica nnu yo cuví yo tumaa mbee tsa ndoo ihñi, tsa nduve tsitoho. Maa tyin vityin nacuhvá cuenda yo tsi yo tsi ra Cristo, tan jahá cuenda ra añima yo. Cuví ra ityi nuu tsihin yo.

3

Naca taahán tsi coo nyivi tindaha

¹ Tacan tucu nyooho, ñiñaha tsa iyó yii. Tyaa yahvi ndo tsi yii ndo tyin tatun ña tsinú iñi ra tsi ra Cristo, cua tsinu ndihí iñi ra tsi ra Cristo tsihin cuhva javahá ñi ndo tyin nyehé ra tyin vaha tsahá ndo tsa quihí ndaha ra tsi ndo. Tan ña cuñí tsi cuaha xaan cahan ndo tsihin ra, ² tyin nyehé ra tyin catsi iyó ndo tan jahá ndo tsa ñayivi tsi ra. ³ Ña çaça xaan iñi ndo janduvaha ndo tsi ndo ityi tsata ñi, tyin ña ñiñi xaan cuñi tsi tsa iyo xaan janduvaha ndo jiñi ndo, tan cuatyíñu ndo tsa cuví xuhun cuaan tan cunditsi ndo jahma xiñu xaan. Ña nducu ndo tandihi yacan. ⁴ Maa tyin jandutyaqui ndo tsi ndo tsihin tsa quitá añima ndo tyin tun cuiti iyó yo tan vita iñi yo, tan taxin iyó yo, yacan cuví tsa si ca caá nuu Nyoo. Tan ña cua tiví maa can. ⁵ Tyin tsihin tsehe ndutyaqui ñiñaha tsa nacotq tsi Nyoo, ñi tsa tsicoq tahán tsanaha. Nyita iñi ñi tsi Nyoo tan tyaa yahvi ñi tsi yii ñi. ⁶ Tumaa

ñi Sara, tyaa yahvi ña tsi ra Abraham yii ña. Tan catyi ña: "Tata", tsihin ra. Tatun nyooho tan javahá ndo tsa vaha tan ndi luxu maa tan ña nayuhvi ndo, cua cuvi ndo tumaa maa ña.

⁷ Tan tacan tucu nyooho, ra iyó ñasihi naha ra, cutuñi iñi ndo cuhva coo ndo tsihin ñasihi ndo. Jaha ndo tsa ñayivi tsi ñi tsa cuenda tsa vita ca cuñu ñuhu ñi tan ñavin ca cuñu ñuhu nyooho tan tsa cuenda tyin iin caa ñi tsahá ra tumañi iñi tsi ndo, tan yacan cuví ñayivi iyó ndo. Javaha ndo tyeheñ tyin tacan tan tñin cuenda Nyoo tuhun caahán ndo tsihin ra.

Nu tsahá cuenda ra Pedro nácaa taahán tsi coo yo

⁸ Nu ndihí tuhun, iin ñi cuhva çaça iñi tandihi ndo. Cundaahvi tahan iñi ndo tsi ndo. Cuñi tahan ndo tsi ndo tumaa tsa cuñí ndo tsi yañi ndo tsa cacu tsihin ndo. Vita çahan ndo tsihin tahan ndo, tan ña cahnu jaha ndo tsi ndo; cuví ndo nyivi vaha.

⁹ Ña javaha ndo tsa ña vaha tsihin nyivi tsa javahá tsa ña vaha tsihin ndo. Ña çahan ndo tsi ñi tatun caahán ñi tsi ndo, tyin Nyoo cana ra tsi ndo tyin javaha ndo tsa vaha tsihin ñi tyin tacan tan cua nasoco ra tsi ndo. ¹⁰ Tyin tuhun Nyoo catyi tsi tyeheñ:

Nyivi tsa cuñi coo ñayivi tsihin tsa si, cuñí tsi jaha ñi cuenda yaa ñi, tan ña çahan ñi tsa ndavaha ñi, tan ndi ña çahan ñi cuendu.

¹¹ Jandihí ndo tsa javahá ndo tsa ña vaha, tan javaha ndo tsa vaha.

Nducu ndo cuhva coo taxin ndo, tan coo ndo tacan.

¹² Tyin Jutu Mañi yo jahá cuenda ra tsi nyivi vaha.

Tatun caahán ñi tsihin ra, tyaa soho ra tsa caahán ñi.

Maa tyin nyivi javahá tsa ña vaha, ña cuñi ra nyehé ra tsi ñi.

¹³ Ndi intuhun maa nyivi tan ña cuvi javaha ñi tsa ña vaha tsihin ndo tatun nyooho tan maa ñi tsa vaha nanducú ndo.

¹⁴ Cusi iñi ndo vasu ndi maa nyehé ndo tundoho tsa cuenda tsa javahá ndo tsa vaha. Tan ña nayuhvi ndo tun jayuhvi nyivi tsi ndo. ¹⁵ Jacahnu ndo tsi ra Cristo tsitsi añima ndo. Cuhva ndo tsa cundaca ñaha ra tsi ndo. Çaça iñi ndo tuhun Nyoo tyin tatun ndaca tuhun nyivi tsi ndo nacuenta tsinú iñi ndo tsi ra, cuvi cuhva cuenda ndo tsi ñi. Tan javaha ndo can tsihin tsa ña cahnu jahá ndo tsi ndo tan jaha ndo tsa ñayivi tsi ñi. ¹⁶ Catsi coo ndo tyin tun catsi iyó ndo ña cua nducahan nuu ndo nuu Nyoo. Tan tatun caahán nyivi ndavaha ñi siqui ndo tsa cuenda tyin vaha cuahán ndo tsihin ra

Cristo, juvin ñi maa ñi tan cua nducahan nuu ñi tsa cuenda tsa çahan ñi siqui ndo.

17 Vaha ca nyehé yo tundoho tsa cuenda tsa javahá yo tsa vaha tatan Nyoo cuñí, tan ñavin ca tsa nyehe yo tundoho cuenda tsa ña vaha. 18 Tyin ra Cristo nyehé ra tundoho tan tsihí ra iin tsaha ñi tsa cuenda cuatyin tandihi yo. Ra vaha cuví ra maa tyin nyehe ra tundoho tan tsihí ra tsa cuenda yo tsa cuví yo nyívi caquiñi, tyin tacan tan cuví tsaá yo nu nyaá Nyoo. Tsihí cuñu ñuhu ra, maa tyin nandoto nyico ra tsihin Tatyí Ii ra. 19 Tacan tan tsihin Tatyí Ii ra tsahan ra tsicahan ra tsihin añima nyívi tsa yucú anyaya. 20 Tan ñi ican cuví ñi tsa ña tyaá yahví tsi Nyoo quívi tsioco ra Noé tahañ tsanaha, tyin nã tsinú yutun ndoo tacan tsa ndatú Nyoo tsa ndu uvi iñi ñi cuatyí ñi. Maa tyin ña cuaha ñi cacú quívi cuñ savi cahnú tsa tsahñi ndutya ñuhu tsi ñi. Una taahan ñi ñi cacú tsitsi yutun ndoo tyin nandaá yutun ndoo can nu ndutya ñuhu. 21 Tan tacan tucu maa yo tumaa tsa cacú ñi ican, tacan cacú yo quívi tsiocoondutya yo. Maa tyin ñavin nyahyu yo nacatya ndutya can tsa tsiocoondutya yo. Yacan cuñí tsi catyí tsa tsicán tahvi yo tsi Nyoo na nacatya ra añima yo tan cacú yo jahá tsa nandoto ra Jesucristo. 22 Tan nandaá ra nda gloria, tan nyaá ra xiin cuaha Nyoo vityin. Ndacá ñaha ra tsi ángel tan tandihi tatyí ña vaha tsa ndacá ñaha tsi nyívi.

4

Jaha tyiñu ndo nuu nyívi yihí tuhun Nyoo tsihin ndo nácaa tsahá maa Nyoo tsi ndo.

1 Yacan cuenda janyee ndo iñi ndo nyehe ndo tundoho tumaa nyehe ra Cristo tundoho tsihin cuñu ñuhu ra. Tyin nyívi tsa nyehé tundoho tsihin cuñu ñuhu ñi, ña javahá ca ñi tsa caquiñi tsa cuñí cuñu ñuhu ñi. 2 Tyin tacan tan tandihi quívi coo ñi cua javaha ñi cuhva cuñí Nyoo, tan ñavin cuhva cuñí cuñu ñuhu ñi. 3 Vityin tsindihí tsa javahá ndo tsa caquiñi tsa taahán iñi nyívi tsa ña tsitó tsi Nyoo. Tsioco ndo cuhva cuñí ndo, cuaha tsa caquiñi javahá ndo, tan javahá ndo tsa caquiñi tsa cuñí cuñu ñuhu ndo. Javahá ndo vico tan tsiñi ndo. Tan jacahnú ndo tsitoho tsa ña taahán tsi jacahnú ndo. 4 Tan vityin tsa ña cutahán ca ndo tsihin ñi tan ña javahá ca ndo tsa caquiñi tsa javahá ñi, iyo cuñí ñi. Tan caahán ñi ndavaha ñi síqui ndo. 5 Maa tyin tandihi tsa caahán ñi tan tsa javahá ñi cua nacuhva cuenda ñi can tsi ra cua jacutuñi tsi nyívi nyitó tan nyívi tsihí. 6 Yacan cuenda jacoto ra Cristo tuhun vaha tsi ndiyi. Tyin tacan tan cuví coo añima ñi tumaa iyó Nyoo, vasu ndi maa tsihí ñi nu ñuhu ñayívi ihya tumaa tsihí tandihi ca nyívi.

7 Tsa yatyin cuii cundihí tandihi maa tsa iyó nu ñuhu ñayívi ihya. Yacan cuenda catsi

coo ndo tan ña jandihí ndo tsa ndacan tahvi ndo tsi Nyoo. 8 Tsa jihna ñi taahán tsi tsa cuñi tahan ndo tsi ndo, tyin tatan cuñi tahan yo tsi yo, cuaha tsaha cua jaha yo tucahnú iñi tsi ñi. 9 Tatan tsaá iin nyívi vehe ndo, vaha tyanuú ndo tsi ñi tan ña caca iñi ndo tyin jatyañu ñi tsi ndo. 10 Tan cuñí tsi tsa jaha tyiñu intuhun intuhun ndo nuu nyívi tahan ndo nácaa tsahá maa Nyoo tsi ndo. Tyin siin siin tsa tsahá Nyoo tsi tsa intuhun intuhun yo. Tan taahán tsi cuatyíñu yo can tsihin tahan yo. 11 Tatan tsahá Nyoo tuhun cahan un tsihin nyívi, cahan, maa tyin maa ñi tuhun tsa tsahá ra tsi un. Tatan tsahá ra tyin javaha un tyiñu nuu nyívi, javaha tsihin tunyee iñi tsa tsahá maa ra. Tandihí tsa catyí Nyoo tyin javaha ndo, javaha ndo can, tyin tacan tan jacahnú nyívi tsi Nyoo tsa cuenda ra Jesucristo. Tyin intuhun ñi maa Nyoo taahán tsi jacahnú yo. Tan na cundaca ñaha ra tsihin tunyee iñi ra tacan ñi maa. Tan na cuví tsi tacan.

Sii cuñí ndo tun nyehé ndo tundoho tsa cuenda ra Cristo

12 Yañi tsa cuñí xaan yu, ña iyo xaan cuñi ndo tatan vatsí tundoho ñihi síqui ndo. Ña cuñi ndo tyin ña taahán tsi nyehe ndo tundoho. 13 Cú sii iñi ndo tyin cuví nyehe ndo tundoho tumaa nyehe ra Cristo tundoho. Tyin tacan tan quívi quitsi nyico ra Cristo inga tsaha, sii cua cuñi ndo nyehe ndo tsa cahnú cuví ra. 14 Tatan caahán nyívi ndavaha ñi síqui ndo tyin nyicún ndo tsi ra Cristo, sii cuñi ndo, tyin nyaá Tatyí Ii Nyoo tsihin ndo. Maa ñi caahán ñi ndavaha ñi síqui ra Cristo, maa tyin nyooho jacahnú ndo tsi ra. 15 Tatan nyehé ndo tundoho tsa cuenda yacan, vaha, tan ñavin ca tsa nyehé ndo tundoho tsa cuenda tsa tsahñi ndo, o tsa suhú ndo, o javahá ndo tsa ña vaha, o tsa tyihí ndo tsi ndo nu ña taahán tsi. 16 Maa tyin tun nyehé ndo tundoho tsa cuenda tsa yihí ndo cuenda ra Cristo, ña nducahan nuu ndo. Jacahnú ndo tsi Nyoo, tyin tsahá tsi cuhva tsa nyehe ndo luxu tundoho tsa cuenda ra.

17 Tyin tsa tsag quívi tsa quitsahá jacutuñi Nyoo tsi tandihi nyívi. Tan jihna ca yoo tsa yihí cuenda ra cua cutuñi. Tatan tyehen tatsí tuñi Nyoo luxu ñi tsi yoo, ¿nácaa cua tatsi tuñi ra tsi nyívi tsa ña tyaá yahvi tuhun caahán ra? 18 Tatan yí cacú añima nyívi vaha, ¿nácaa cua cacú añima ñi quiñi iyó, ñi ña vaha? 19 Yacan cuenda tatan nyehé ndo tundoho cuhva cuñí Nyoo, cuñí tsi tsa jañihí ca ndo javaha ndo tsa vaha. Tan tyaá cuenda ndo añima ndo ndaha ra tyin maa ra javahá tsi yo, tan cua javaha ra tumaa caahán ra.

5

Nu tsahá cuendará Pedro tsi yo nácaa coo yo

¹ Yacan cuenda tsahá cuenda yu tsi ra tsahnu yucú vehe ñuhu tsihin ndo, tyin ra tsahnu cuví tucu maa yu. Tan cuví yu tsandaa tyin nyehe yu tandihí tundoho tsa tahañ ra Cristo. Tan cua cutahan yu tsihin tandihí ca ra naha quívi quítsi ra Cristo inga tsaha tsihin tsa cahnu cuví ra. ² Jaha cuenda ndo tsi nyívi yihí tuhun Nyoo tsa yihí ndaha ndo, tumaa jahá cuenda vaha iin ra mbee jana ra. Javaha ndo can tsihin tsa níi íñi añima ndo tan ñavin tsihin tsa ñíñi, maa tyin cuhva cuñí Nyoo. Ña javaha ndo can tsa cuenda tsa cuñí ndo xuhun. Tandihí tyiñu javahá ndo, javaha ndo can tsihin tsa cacu íñi ndo. ³ Tyin tun vaha iyó ndo nyehé ñi, tacan cua coo ndihí ñi tyin nyehe ñi tyin ña ndacá ñaha ñihí ndo tsi ñi. ⁴ Tacan tan quívi cua quítsi ra cuví ityi nuu tsihin nyooho tsa jahá cuenda mbee jana Nyoo, cua cuhva ra tsa síi caá tsa ña cua tiví maa tsi ndo.

⁵ Tacan tucu nyooho, ra cuatyí tan ñi cuatyí, tyaa yahví ndo tsi ra tsahnu naha ra. Tan tandihí ndo ndaahví jaha ndo tsi ndo tan tyaa yahví tahañ ndo tsi ndo. Tyin catyí nu tutu Nyoo tyehen:

Nyoo ña cuñí ra nyehe ra tsi nyívi tsa yaa xaan,

Maa tyin jatyinyeé ra tsi ñi tsa ña yaa.

⁶ Yacan cuenda ndaahví jaha ndo tsi ndo nuu Nyoo. Cuhva ndo tsi ndo cundaca ñaha ra tsihin tunyee íñi tsa iyó tsi ra, tyin tacan tan cuví jacahnu ra tsi ndo quívi cua tahañ tsi. ⁷ Tyaa cuenda ndo tandihí tsa tsicá xaan íñi ndo ndaha Nyoo tyin maa ra jahá cuenda tsi ndo.

⁸ Catsi cuhun íñi ndo tan jaha vaha ndo cuenda ndáa tsa vaha tan ndáa tsa ña vaha, tyin nu ña vaha, nu xaan íñi tsi yo, tsicá nuu nu nanducú nu yóo jaha canaa nu tumaa tsicá nuu ndicaha xaan nanducú tí tsa catsi tí. ⁹ Ñihí cunyecu ndo tsihin tsa tsinú íñi ndo tsi Nyoo tyin tacan tan cuví jaha ndo tsi nu ña vaha. Tyin juvin ñi tundoho tsa nyehé nyooho tan nyehé tucu tandihí ca nyívi yihí cuenda ra Cristo taníi cahnu nu ñuhu ñayívi.

¹⁰ Maa tyin Nyoo jatyinyeé ra tsi yo, tan tsa yaha nyehe ndo tundoho juhva quívi, Nyoo cua jacutsa ca ra tsi ndo, ñihí cunyecu ndo tsihin tsa tsinú íñi ndo, tan cua cuhva ca ra tunyee íñi tsa iyó tsi ra tsi ndo. Tan juvin Nyoo cuví ra tsahá tandihí tsa vaha tsi yo, tan maa ra caná tsi yo tyin ndu iin yo tsihin ra Cristo tyin coo yo nu síi caá tsihin ra tacan ñi maa. ¹¹ Na jacahnu yo tsi ra tan na cundaca ñaha maa ra tacan ñi maa. Tan na cuví tsi tacan.

Nu tsahá ra Pedro nacumi tsi nyívi nu ndihí ña

¹² Jaquítsi yu carta ihya tsi ndo tsihin ra Silvano, yañi yo. Tyin tsitó yu tyin níi xaan íñi ra nyicún ra tsi ra Cristo. Tan tsahá cuenda yu juhva tsi ndo nu carta ihya tyin tsa vaha tsa ñihí ndo janahá tsi tyin ndítsa tsa cuñí xaan Nyoo tsi yo. Yacan cuenda ña ñacoo ndo itsi.

¹³ Nyívi yihí cuenda Nyoo ñuu Babilonia tsa nacatsí Nyoo tumaa nacatsí ra tsi nyooho, jaquítsi ñi nacumi tsi ndo. Tan ra Marcos, sehe yu tsa cuenda Jutu Mañi yo, jaquítsi ndihí ra nacumi tsi ndo.

¹⁴ Cuñi tahañ ndo tsi ndo tan cuhva tahañ ndo nacumi tsi ndo.

Na coo ca tsa taxin añima tandihí nyooho tsa iin ñi cuví tsihin ra Jesucristo.

Tan na cuví tsi tacan ñi.

Carta Tsinu Uvi Tsa Jacuhun Ra Pedro Tsi Nyivi Yihí Cuenda Nyoo

Nu tyaá ra Pedro inga carta tsa cuenda nyivi yihí cuenda Nyoo

¹ Yuhu ra Simón Pedro cuví yu musu ra Jesucristo, tan cuví yu iin ra tava tyiñu ra tyin caca yu tyiñu ra. Tyaá yu carta ihya tsa cuenda nyooho tsa natsinü vaha iñi tsi Nyoo tumaa tsa tsinü iñi nyuhu. Inducu ñi tsinü iñi yo tsi Nyoo jahá ra Jesucristo tsa cuenda tsa vaha ra. Juvín ra cuví Nyoo, tan juvín ra cuví ra jacacú tsi yo. ² Naquihin ca ndo tsa vaha tsa tsahá Nyoo tsi yo coo tsitsi añima ndo tan na coo taxin ca tsi. Yacan ñihí ndo tsa cuenda tsa nacotó ndo tsi ra tan tsi Jutu Mañi yo Jesús.

Nacaa taahán tsi coo nyivi yihí cuenda Nyoo

³ Nyoo, tsihin tunyee iñi tsa iyó tsi ra, tsahá ra tandihí tsa tsinü ñuhu tsi yo tyin tacan tan coo yo ñayivi tsa iyó ra tan cuví yo tumaa maa ra. Tandihí tsehe ñihí yo tsa cuenda tsa tsahá ra tsa nacotó yo tsi ra tsa caná tsi yo. Tyin caná ra can tsi yo tsihin tsa cahnu cuví ra tan tsihin tsa iyo tsa javahá ra. ⁴ Tan tsihin tandihí tsa vaha can, tsahá tucu ra tsa catyi ra tyin cuhva ra tsi yo. Maa tyin cahnu xaan tan yahvi xaan can. Maa tyin tsahá ra can tsi yo tyin tacan tan cuví coo yo tumaa maa ra tyin tsa nacoo yo tandihí tsa caquiñi tsa javahá yo, tan ña cua tiví yo tumaa tiví nyivi nyicún tsa ña vaha tsa iyó nu ñuhu ñayivi ihya. ⁵ Yacan cuenda cuñi tsi tsinü ca iñi yo tsi Nyoo tan ñavin yacan ñi tyin cuñi tucu tsi nducu yo cuhva coo cuiti yo. Tan cuñi tucu tsi nducu yo cuhva cutuñi vaha iñi yo cuhva cuñi Nyoo tsihin yo. ⁶ Yaha can tan nducu yo cuhva cundaca ñaha yo cuñu ñuhu yo tan cuhva tsicá iñi yo. Yaha can tan nducu yo cuhva tsa ña yatyí xaan cundihí iñi yo. Yaha can tan nducu yo cuhva coo yo ñayivi iyó Nyoo. ⁷ Yaha can tan nducu yo cuhva tsa cuñi tahan yo tsi yo. Yaha can tan nducu tucu yo cuhva cuñi yo tsi nyivi tumaa tsa cuñi maa Nyoo tsi tandihí yo.

⁸ Tatun tacan iyó ndo tan tacan nducú ndo cuhva tsa coo tandihí tsehe tsi ndo, cua cutyiñu xaan Nyoo tsi ndo. Tan ña cuatu nacotó ndo tsi Jutu Mañi yo Jesucristo tyin javahá ndo tandihí yacan. ⁹ Maa tyin nyivi tsa nduve yacan iyó tsi, cuví ñi tumaa iin ra cuaa. Ña cutuñi iñi ñi tsa taahán tsi coto ñi. Tan tsa naq iñi ñi tyin ndatsj Nyoo cuatyí ñi tahan tsanaha. ¹⁰ Nyoo caná tsi ndo tan nacatsj ra tsi ndo. Yacan cuenda

yañi, tun javahá ndo tandihí tsa caahán yu tuhun ihya, ña cua nduva ihñi ndo. ¹¹ Tacan tan ña yñi cua quihvi ndo nu ndacá ñaha ra Jesucristo, ra cuví Jutu Mañi yo tan ra jacacú tsi yo. Tan cua coo cuui ndo tsihin ra.

¹² Yacan cuenda ña jandihí yu tsa janducuhún iñi yu tuhun ihya tsi ndo, vasu tsa tsitó maa ndo itsi, tan vasu nñi cuñi ndo javahá ndo tuhun nditsa tsa cutuhva ndo. ¹³ Tan cuñi yu tyin vaha tsa janducuhún iñi yu tuhun ihya tsi ndo tsitsi tsa ndi iyó ca yu. ¹⁴ Tyin tsa jacotó Jutu Mañi yo Jesucristo tsi yu tyin ña naha ca tan cua nacoo yu ñuhu ñayivi ihya. ¹⁵ Tan cua jañiñi yu tsi yo tsa janducuhún iñi yu tuhun ihya tsi ndo tyin tacan tan quivi cúu yu ña naa iñi ndo itsi.

Nu nacatyí tuhun ra Pedro nacaa nyehe ra naha tsa cahnu cuví ra Cristo

¹⁶ Ñavin tsa nandacü iñi ñi maa ndi tan cahán ndi tsihin ndo quivi jacotó ndi tuhun Jutu Mañi yo Jesucristo tsi ndo. Tsa nditsa cuví tsi tyin tsihin tinuu ndi nyehe ndi tsa cahnu cuví ra. Tan jacotó ndi tsi ndo tyin iyó xaan tunyee iñi tsi ra tan cua quitsi ra inga tsaha. ¹⁷ Tyin nyehe ndi nu jacahñu Nyoo Jutu yo tsi ra tan nyehe ndi nu janduxiñu ra cuhva caá ra. Tan sñi xaan cuví nu cahán Nyoo tan catyi ra: “Ra ihya cuví Sehe yu, tan cuñi xaan yu tsi ra. Tan sñi xaan cuñi yu tsihin ra”, catyi Nyoo tuhun ra Jesús quivi can. ¹⁸ Juvín nyuhu tsiñi ndusu Nyoo tsa quitsj ityi andivi quivi tsiyucü ndi yucu ii tsihin Jutu Mañi yo.

¹⁹ Tuhun ihya janahá tyin nditsa tsa tyaá ra cuví ndusu yuhu Nyoo nu tutu tahan tsanaha. Tatun tyaá yahvi vaha ndo tuhun can, vaha javahá ndo. Tyin tuhun can cuví tsi tumaa iin ñuhu tsa jandunditsín tsa naa ca. Maa tyin ra Jesucristo cuví ra tumaa tiñuu cahnu tsa caná tsa cua tiví tyin jandunditsín ra tsitsi añima yo. ²⁰ Maa tyin cuñi tsi coto ndo tyin ña cuví nacatyí tuhun tsa intuhun ñi maa yo tsa cuñi tsi catyi tsa tyaá ra ndusu yuhu Nyoo. ²¹ Tyin ra cuví ndusu yuhu Nyoo tahan tsanaha ña cahán ra naha cuhva cuñi maa ra naha. Maa tyin cahán ra naha cuhva cuñi Nyoo tyin maa Tatyí Ii Nyoo jaquihin ityi tsi ra naha.

2

Ra jacuahá tsa ña nditsa (Judás 4-13)

¹ Maa tyin tsicoq tucu ra cahán cuendu naha ra nu tsicoq nyivi Israel tahan tsanaha. Catyi ra naha tyin cuví ra naha ndusu yuhu Nyoo tan ña nditsa. Tan tacan cua coo tucu ra vatya naha ra nu yucú ndo. Xeehe xaan cua jacuahá ra naha tsa ña nditsa tsa cuví jativi tsi ndo. Tan cua catyi ra naha tyin ña nditsa tuhun Jutu Mañi yo tan juvín ra jatá tsi ra naha. Yacan cuenda numi ñi

cua cunaa ra can naha ra. ² Tan cuaha xaan nyivi cua cunycun tsi ra naha tsihin tsa caquiñi tsa javaha ra naha. Tan cuaha xaan ñi cua cahan ndavaha ñi siqui tuhun tsa nditsa vaha ra Cristo. ³ Tan tsa cuenda tsa cuñi ra naha xuhun, cua nducu ra naha cuhva jandavi ñaha ra naha tsi ndo tsihin tsa jacuaha ra naha maa ñi tsa ña nditsa. Maa tyin ndatu Jutu Mañi yo tatsi tuñi ra tsi ra naha tyin tsanaha iyó maa tuhun tsa cua cunaa ra naha.

⁴ Tyin ndi ña jahá Nyoo tucahnu iñi tsi ángel tsa tsicoq cuatyí tahañ tsanaha. Jacuhun ra tsi nahnu anyaya. Tsaññi ra tsi nahnu tsihin cadena, tan nacoq ra tsi nahnu nu naa nda cuanda tahañ tsi jacutuñi ra tsi nahnu. ⁵ Tan ndi ña jahá ra tucahnu iñi tsi nyivi ña vaha tsa tsicoq tsanaha. Jacuñ ra savi xaan tsaññi tsi ñi. Maa tyin jacacu ra tsi intuhun ñi ra Noé tsihin utsa taahan nyivi ra. Ra ican cahañ ra tsihin nyivi na nducu ñi cuhva coo vaha ñi tsihin Nyoo. ⁶ Tacan javaha tucu ra tsihin ñuu Sodoma tan ñuu Gomorra, janaq ra itsi. Tsaññi ra ñuu can tan nanduví tsi nyaa, tyin coto nyivi caquiñi tsa iyó vityin tan nyivi tsa cua coo náa cua tahañ ñi. ⁷ Maa tyin jacacu ra tsi ra Lot tyin vaha iyó ra nuu ra. Cuihya cuñi ra Lot nyehé ra cuhva iyó nyivi caquiñi can. ⁸ Tandihí quivi tsa tsicoq ra Lot ñuu can, cuihya cuñi añima ra tsa cuenda tsa tsiñi ra tan nyehé ra tsa caquiñi javahá ñi can. Tyin maa ra, ra vaha cuví ra, tan ñi ican maa ñi tsa ña vaha javahá ñi. ⁹ Tacan jacacu Nyoo tsi yo tatun vaha iyó yo nuu ra. Maa tyin naquihín vaha ra tsi nyivi caquiñi nda cuanda tahañ tsi quivi cutuñi ñi.

¹⁰ Yaha ca cua tatsi tuñi Nyoo tsi nyivi tsa javahá tsa ña vaha tsa cuñi cuñu ñuhu ñi, ñi tsa ña cuñi cundaca ñaha Jutu Mañi yo tsi ñi. Tan ra vatya tsa yaa xaan naha ra, javahá ra naha cuhva cuñi maa ra naha. Tan ña yuuhví ra naha caahán ra naha ndavaha ñi siqui ra iyó ca tuncye iñi tsi tumaa Nyoo a ángel, a tatyí ña vaha. ¹¹ Tan ángel, vasu ndi maa iyó ca tuncye iñi tsi ra naha tan ñavin ca nyivi, maa tyin ña caná iñi ra naha cahan ra naha ndavaha ñi siqui ra can naha ra nuu Jutu Mañi yo.

¹² Maa tyin ra vatya can naha ra cuví ra naha tumaa quiti tsa ña cutuñi iñi tan javahá ti naha ti tsa cuñi maa ti naha ti. Tyin quiti, ¿náa cuenda iyó ti? Iyó ti tyin tiin yo tsi ti, tan cahñi yo tsi ti. Tacan ra can naha ra: Caahán ra naha ndavaha ñi siqui tsa ña cutuñi iñi ra naha, tan cua cúu ra naha tumaa tsihí quiti can naha ti. ¹³ Cua nyehé ra naha tundoho tsa cuenda tsa janyehé ra naha tundoho tsi inga nyivi. Sñ xaan cuñi ra naha tsihin tsa caquiñi javahá ra naha nu tuvi. Tsañ ra naha ticanuu nu yucú ndo nu iyó vico tatun cutahán ra naha tsihin ndo.

Nyaá xaan ra naha tusñi iñi. Maa tyin juven ñi tsi maa ra naha jandavi ñaha ra naha.

¹⁴ Tandihí ñaha tsa nyehé ra naha, cuñi ra naha coo ra naha tsihin ñi. ña quitatú ra naha tsa javahá ra naha tsa caquiñi. Jandavi ñaha ra naha tsi nyivi tsa ña ñihi nyaá tsihin Nyoo. Yatyí xaan nducú ra naha maa ñi maa tsa cuenda maa ra naha. Maa tyin nyaá tsa cua cunaa ra naha. ¹⁵ Nacoq ra can naha ra ityi vaha tan naquihín ra naha ityi tsa cuahán nu cua cunaa ra naha tyin javahá ra naha tumaa javaha ra Balaam, sehe ra Beor. Tyin ra Balaam cuñi ra jaha canaa ra xuhun tsihin tsa ña vaha tsa javaha ra. ¹⁶ Tacan tan nacahañ burru jana ra tsihin ra, tumaa caahán nyivi, tan tsa nacahañ ti ña tsañ ti cuhun ra javaha ra tsa ña vaha tsicá iñi ra.

¹⁷ Tan tacan tucu maa ra can naha ra. Cuví ra naha tumaa iin soco ityi nu nduve ndutyá yihí. Tan cuví tucu ra naha tumaa vico tsa tindahá tatyí ñihi. Maa tyin tsa nyaá tsa cua cuhun ra naha nu naa xaan tan ican cuví nu cua ndoo cuí ra naha. ¹⁸ Yaa xaan caahán ra naha. Maa tyin tandihí tsa caahán ra naha nduve yahvi nyaá can. Tan tsihin tandihí tsa ña vaha tsa javahá ra tan tsihin tsa ña vaha tsa cuñi cuñu ñuhu ra naha jandavi ñaha ra naha tsi nyivi tsa tsa yaha quita mahñu nyivi tsa javahá tsa caquiñi. ¹⁹ Catiyí ra naha tsihin ñi tyin cua coo nuña ñi. Maa tyin juven ñi maa ra naha tsañá tsa cundaca ñaha tsa caquiñi tsi ra naha. Tyin tatun tsañá yo tsa cundaca ñaha tsa cundaca ñaha tsi yo, musu can cuví yo. ²⁰ Tyin nyivi tsa nacoto tsi Jutu Mañi yo Jesucristo, ra jacacu tsi yo, tsa yaha nacoq ñi tsa caquiñi tsa iyó nu ñuhu ñayivi ihya maa tyin tatun javaha nyico ñi tsa caquiñi, cahnú ca cuatyí ñi cua coo nu Nyoo. ²¹ Vaha ca tun tsatyin ña nacoto ñi ityi vaha, tan ñavin ca tsa nacoq ihñi ñi tsa tsañá Nyoo tsi ñi tsa tsa yaha nacoto ñi tsi ra. ²² Maa tyin cundaq tsa tuhvá nyivi caahán: "Ina tsatsí nyico ti tsa ndutsan ti. Tan quini tucu, tun tsa yaha tsityí ti, quihví nyico ti nu xahan nyahyu." Tacan cuví ñi can tyin javahá nyico ñi tsa javahá ñi nda jihna.

3

Quivi cua quitsi nyico Jutu Mañi yo

¹ Yañi, cuñi xaan yu tsi ndo. Carta ihya cuví carta tsinu uvi tsa jaquitsí yu tsi ndo. Tan nu nduvi taahan carta ihya tsañá cuenda yu tsi ndo na caca vaha iñi ndo tan ña naa iñi ndo tsa cutuhva ndo. ² Ndūcuhun iñi ndo tsa cahañ ra cuví ndusu yuhu Nyoo tahañ tsanaha. Tan ndūcuhun tucu iñi ndo tsa jacuahañ ndi tsi ndo. Tyin cuví ndi ra tava tyiñu Jutu Mañi yo Jesucristo, ra jacacu tsi yo.

³ Coto jihna ndo tyin nu cua ndihi quivi cua quitsi nyivi cua vacu nducu tuhun Jutu Mañi yo. Tan cua coo ñi cuhva ña vaha cuñi cuñu ñuhu ñi. ⁴ Tan cua catyi ñi: “¿Náa ra Jesucristo tsa catyj tyin cua quitsi ra inga saha? ¿Numaa nyii ra? Tyin nda quivi tsa tsihi tsi tsaahnu yo tan nda cuanda tsa tsinu ñuhu ñayivi tan nda vityin caá ñi maa tahan ñi caá”, cua catyi ñi. ⁵ Tyin maa ñi ña cuñi ñi coto ñi tyin nda tyembu tsahnu cahān Nyoo tan javahā ra andivi tan ñuhu ñayivi. Quitā ñuhu ñayivi tsitsi ndutya, tan tsihin ndutya tsinu tsi. ⁶ Tsa yahā javahā Nyoo ñuhu ñayivi juvin ñi maa tsihin ndutya naā ñuhu ñayivi quivi cuun savi xaan. ⁷ Maa tyin andivi tan ñuhu ñayivi tsa iyó vityin ndatú tsi tsa cayu tsi tumaa catyj maa Nyoo. Cua cayu andivi tan ñuhu ñayivi tsihin ñuhu quivi cua cutuñi nyivi tan cua naa nyivi caquiñi.

⁸ Maa tyin nyooho yañi yu tsa cuñi xaan yu, ña naā iñi ndo tyin tsa cuenda Jutu Mañi yo tsa iin quivi cuvi tsi tumaa mil cuiya, tan tsa mil cuiya cuvi tsi tumaa tsa iin quivi tsa cuenda ra. ⁹ Vasiqui yihí ndo tsicá iñi ndo tyin maa Jutu Mañi yo ña cuñi naha quitsi. ñaha ca quitsi ra tyin ndatú jihna ra nda ndu uvj iñi tandihí nyivi tan nasama ñi cuhva iyó ñi tyin ña cuñi ra tsa cunaa ndi intuhun yo.

¹⁰ Maa tyin quivi cua quitsi Jutu Mañi yo, yoñi maa cua coto tyin cua quitsi ra quivi tsa ña ndatú yo tsi ra. Cua quitsi ra tumaa iin ñasuhu. Tan ñihi cunahma tan cua naa andivi. Tan cua janaa ñuhu tandihí tsa iyó ityi siqui. Tan ñuhu ñayivi cua cayu tsi tsihin ñuhu tsihin tandihí tsa iyó nuu tsi.

¹¹ Tacan cua naa tandihí tsa iyó. Yacan cuenda cuñi tsi cuiti coo yo tumaa iyó maa Nyoo. ¹² Cuatu ndo quivi quitsi Nyoo. Nducu ndo cuhva quitsi ñi ra tyin quivi tsa cua quitsi ra cua naa andivi jaha ñuhu. Tan tandihí tsa iyó cua naa tsi tsihin tsa ihñi ñuhu can. ¹³ Maa tyin yoo ndatú yo andivi tsa tan ñuhu ñayivi tsa tsa catyj Nyoo tyin cuhva ra tsi yo. Tan maa ñi maa tsa vaha tsi Nyoo cua coo ican.

¹⁴ Yacan cuenda yañi, tsitsi tsa ndatú yo tsi Jutu Mañi yo, nducu ndo cuhva coo vaha ndo tsihin Nyoo, tyin tacan tan quivi quitsi ra, sii cua cuñi yo tan cua coo taxin añima yo tyin nduve ca cuatyí yo iyó. ¹⁵ Coto ndo tyin Jutu Mañi yo ña cundihí iñi ra ndatú ra tsi yo tyin cuñi ra tsa cacu cuaha nyivi. Juvin ñi tyehen caahān tucu ra Pablo yañi yo nu carta tsa jaquitsj ra tsi ndo. Tyaā ra itsi tsihin tsa tsiñi tuñi tsa tsahā Nyoo tsi ra. ¹⁶ Tandihí ñi nu carta ra tan caahān ra tuhun ihya. Vasu yihí tsa yñi xaan cutuñi iñi yo. Tan nyivi tsa ña cutuñi iñi, ñi tsa ña ñihi nyaá tsihin Nyoo, sññ cuhva cutuñi iñi ñi itsi. Juvin ñi tacan javahá ñi tsihin tuhun

Nyoo tsa tyaā inga ca ra naha. Tan tsa tacan javahá ñi, juvin ñi tsi maa ñi jacunaá ñi.

¹⁷ Yacan cuenda yañi, vityin tsa tsitó ndo tuhun ihya tsa ndi cumañi ca cuvi tsi, jaha ndo cuenda tsi ndo tan cuñi yu tsa coto ndihi ndo cuhva jandavi ñaha ra caquiñi can naha ra, tyin tacan tan ña nacoo ndo cuhva vaha tsa cuahān ndo. ¹⁸ Maa tyin cuñi tucu tsi nacoto vaha ca ndo tsi Jutu Mañi yo ra Jesucristo, ra jacacú tsi yo. Tan cuahnu ca ndo tsihin tsa vaha ra tsa tsahá ra tsi yo. Na jacahnu yo tsi ra vityin tan tacan ñi maa.

Tan na cuvi tsi tacan ñi.

Carta Tsa Jihna Ñi Tsa Tyaa Ra Juan

Cua coo yo ñayivi nyito

¹ Ihya tyaá ndi tuhun ra tsa iyó nda ndi cumañi coo tandihi tsa iyó. Tsiñi ndi tsa cahan ra quivi tsica ndi tsihin ra. Nyehe ndi tsi ra tsihin tinuu ndi tan cutuñi iñi ndi yóo ra cuví ra. Tan tñin ndi tsi ra tsihin ndaha ndi. Maa ra cuví Tuhun Caahán Nyoo tsihin yo. Tan tsaha ra ñayivi nyito iyó yo. ² Tan quivi tsaá ra nyehe ndi ñayivi nyito can tan cuví ndi tsandaa tsa cuenda can. Tan jacotó ndi tsi ndo náa cuví ñayivi tsa ña cua naa tyin iyó tsi tsihin Jutu yo Nyoo, tan tsaá tsi nu iyó yo. ³ Nacatyí tuhun ndi tsihin ndo tsa nyehe ndi tan tsa tsiñi ndi. Tyin tacan tan cuví ndu iin ndo tsihin ndi, tumaa tsa iin ñi cuví maa ndi tsihin Jutu yo Nyoo tan tsihin ra Jesucristo, Sehe ra. Tan nditsa tsa iin ñi cuví ndi tsihin ra. ⁴ Tan tyaá ndi tuhun ihya tsa cuenda ndo tyin tacan tan coto ndo tandihi tsa tsahá Nyoo tsi ndo tan si xaan cua cuví tsi ndo.

Nyoo, ñuhú cuví ra

⁵ Vityin nacatyí tuhun ndi tsihin ndo tsa cahan ra Cristo tsihin ndi. Catyí ra tsihin ndi tyin Nyoo ñuhú cuví ra. Tan nduve tsa naa tsi ra, [nduve tsa ña vaha tsica iñi ra cuví can]. ⁶ Tun catyí yo tyin iin ñi cuví yo tsihin ra, tan ndi iyó ca maa yo nu naa, jandaví ñaha yo tan ña javahá yo tsa nditsa. ⁷ Maa tyin tatun iyó yo nu nditsin, tumaa tsa iyó maa Nyoo nu nditsin, tacan tan iin ñi cuví yo tsihin nyivi yihí tuhun Nyoo tsihin yo, tan nacatyá ra Jesucristo Sehe Nyoo tandihi catyí yo tsihin niñi ra.

⁸ Tatun catyí yo tyin nduve cuatyí yo, juven ñi maa yo jandaví ñaha yo, tan nduve tsa nditsa iyó añima yo. ⁹ Maa tyin tatun naahmá yo cuatyí yo nuu Nyoo, cuví cuíta iñi yo tsi ra tyin cua jaha ra tucahnu iñi tsi yo tsa cuenda cuatyí yo tan cua nacatya ra tandihi cuatyí yo tyin maa ra vaha ra tan javahá ra cuhva catyí ra tyin ña vatya ra. ¹⁰ [Nyoo catyí ra tyin iyó cuatyí yo], tan tatun catyí yo tyin nduve cuatyí yo iyó, jahá yo tyin vatya Nyoo. Tan nduve tuhun caahán ra, iyó añima yo.

2

Ra Cristo cuví ra caahán ndaahvi tsaha yo

¹ Sehe nyihi yu, caahán yu tandihi tuhun ihya tsihin ndo, tyin tacan tan ña javahá ca ndo tsa ña vaha. Maa tyin tatun iin ndo tan javaha ndo tsa ña vaha, ña nayuhvi ndo tsa ña cuví ca nduvaha ndo nuu Nyoo, tyin iyó

iin ra caahán ndaahvi tsaha yo nuu Nyoo. Tan ra ican cuví ra Jesucristo, ra cui ti iyó. ² Juvín ra jahá tucahnu iñi tsi yo tyin tsihi ra nu cruu tsa cuenda cuatyí yo. Tan ñavin tsa cuenda maa ñi maa yo tsihi ra, tyin tsihi ra tsa cuenda tandihi cui nyivi iyó nu ñuhu ñayivi.

³ Tatun tyaá yahvi yo tsa caahán Nyoo, nacotó yo tsi ra. ⁴ Maa tyin tatun iin ra tsa catyí tyehen: “Yuhu tsitó yu tsi Nyoo”, tan ña tyaá yahvi ra tsa caahán Nyoo, cuví ra iin ra vatya. Tan nduve tsa nditsa iyó añima ra. ⁵ Nyivi javahá tsa caahán Nyoo, ñi ican cuví ñi cuñi tsi ra tsihin tsa ni iñi añima ñi. Tan tsihin yacan tsitó yo tyin iin ñi cuví ñi tsihin ra. ⁶ Nyivi catyí tyin iin caa ñi iyó ñi tsihin Nyoo, taahán tsi coo ñi tumaa tsicoo maa ra Jesucristo quivi quitsi ra nu ñuhu ñayivi ihya.

Taahán tsi tsa cuñi tahan yo tsi yo

⁷ Yañi, ñavin tuhun tsaá jacotó yu tsi ndo, tyin cuví tsi tuhun tsahnu tsa tsa tsitó maa ndo nda quitsi ca tsi. Tan juven tsi cuví tsa tsa yahá tsiñi ndo. ⁸ Maa tyin ña tsindihí tsa tsaá tsi tyin tyaá yahvi yo itsi tan tsa tyaá yahvi yo itsi, cuñi tahan yo tsi yo tumaa javahá maa ra Cristo. Tan tsihin yacan cuahán nduluhlu tsa naa tan nduñihi ca jandunditsin ñuhú tsa nditsa.

⁹ Nyooho tsa catyí tyin iyó ndo nu nditsin, tan ndasi cuñi ndo nyehe ndo tsi nyivi yihí tuhun Nyoo tsihin ndo, ndi iyó ndo nu naa. ¹⁰ Maa tyin nyivi tsa cuñi tsi nyivi yihí tuhun Nyoo tsihin ñi, iyó ñi nu nditsin. Tan nduve maa cuatyí cuví janduve tsi ñi. ¹¹ Maa tyin nyivi ndasi cuñi nyehe tsi nyivi yihí tuhun Nyoo tsihin ñi, iyó ñi nu naa. Tan ña tsitó ñi numaa cuahán ñi tyin ña nditsin nyehé ñi tyin tumaa tsa cuaá ñi jahá tsa naa can.

¹² Jaquitsí yu tandihi tuhun ihya tsi nyooho tsa ndi nacuhvá cuenda tsi ndo tsi Nyoo. Tyin tsa yahá jahá Nyoo tucahnu iñi cuatyí ndo tsa cuenda tsa tsihi ra Jesucristo cuenda yo. ¹³ Nyooho tsa tsa tsahnu tsihin tuhun Nyoo, tyaá yu carta ihya tsa cuenda ndo, tyin nacotó ndo tsi ra iyó nda ndi cumañi ca tsinu ñuhu ñayivi. Tan tyaá tucu yu itsi tsa cuenda nyooho ra tsa ndi cuahan cutuñi vaha iñi tuhun ra Cristo tyin jahá canaa ndo tan ndi jahá canaa ca ndo tsi nu ña vaha.

Tan tyaá tucu yu itsi tsa cuenda nyooho, tsa ndi nacuhvá cuenda tsi ndo tsi Nyoo, tyin nacotó ndo tsi Nyoo Jutu yo. ¹⁴ Jaquitsí yu carta ihya tsi nyooho tsa tsa tsahnu tsihin tuhun Nyoo, tyin nacotó ndo tsi ra tsa iyó maa tan tsinu ñuhu ñayivi. Tan jaquitsí yu carta ihya tsi nyooho tsa ndi cuahan cutuñi vaha iñi tuhun ra Cristo, tyin iyó xaan tunyee iñi tsi ndo jahá tuhun Nyoo tsa iyó añima ndo. Tan jahá canaa ndo tsi nu ña vaha.

¹⁵ Ña cuñi ndo tsa caquiñi tsa iyó nu ñuhu ñayivi ihya. Tyin nyivi cuñi tandihi yacan, ña cuñi ñi tsi Nyoo Jutu yo. ¹⁶ Tyin tandihi tsa ña vaha tsa iyó nu ñuhu ñayivi ihya, tsa cuñi cuñu ñuhu yo, tsa nyehé yo tan cuñi yo coo tsi yo, tan tsa cuñi yo nduyaa yo tshihin tsa iyó tsi yo, tandihi yacan tsahá ñuhu ñayivi ihya tsi yo, tan ñavin Nyoo Jutu yo tsahá can. ¹⁷ Ñuhu ñayivi ihya cua cundihi can, tan cua cundihi ndihi tucu tandihi tsa caquiñi tsa cuñi nyivi javaha ñi. Maa tyin nyivi tsa javahá kuhva cuñi Nyoo, cua coo cuii ñi tshihin ra.

Nu tsa ndasi cuñi nyehé tsi ra Cristo

¹⁸ Nyooho, tsa cuví ndo tumaa sehe yu, coto ndo tyin tsa cua ndihi quívi. Tan nyooho tsiñi ndo tyin vatsi nyivi tsa ña cuñi nyehé tsi ra Cristo, tan vityin tsa nducuahá xaan ñi. Tan tsa tacan tsa iyó cuaha ñi. Tshihin yacan nacotó yo tyin tsa tahan tsi cundihi quívi. ¹⁹ Nyivi can ña yihí ca ñi tuhun Nyoo tshihin yo, tyin ñavin cuenda yo cuví ñi. Tyin tun nditsa ñi tyin cuenda yo cuví ñi, ña cua quita ñi tuhun Nyoo. Maa tyin tacan cuví tyin tacan tan coto yo tyin ñavin nyivi yihí tuhun Nyoo tshihin yo cuví ñi.

²⁰ Maa tyin nyooho tsa tsitó ndo tsa caahán Nyoo tyin tsahá ra Cristo Tatyí Ii Nyoo iyó añima ndo tan jacotó tsi tandihi tsi ndo. ²¹ Jaquitsi yu carta ihya tsi ndo tsa cuenda tsa tsitó ndo tsa nditsa tan ñavin tsa cuenda tsa ña tsitó ndo. Tan tsitó ndo tyin ña cuví quita tuhun vatya tshihin tuhun nditsa.

²² ¿Yóo cuví nyivi vatya? Nyivi vatya cuví ñi catyí tyin ra Jesús ñavin ra Cristo cuví ra. Tan juvin ñi ican cuví ñi ndasi cuñi nyehé tsi ra Cristo. Tyin ña tsinú ñi ñi tsi Jutu yo Nyoo, tan tsi ra Jesucristo Sehe ra. ²³ Tan tandihi nyivi tsa ña tsinú ñi tsi Sehe Nyoo, nduve Nyoo Jutu yo iyó tshihin ñi. Maa tyin nyivi tsa caahán tshihin tsa ñi ñi añima ñi tshihin nyivi tyin ra Jesucristo cuví Sehe Nyoo, iyó Nyoo Jutu yo tshihin ñi.

²⁴ Yacan cuenda naquihin vaha ndo tsitsi añima ndo tandihi tsa tsiñi ndo nda quívi jihna ñi. Tyin tun naquihin vaha ndo itsi tsitsi añima ndo, cua coo ndo iin caa ñi tshihin Nyoo Jutu yo tan tshihin Sehe ra. ²⁵ Tan ñayivi nyito can cuví tsa catyí ra Jesucristo tyin kuhva ra tsi yo.

²⁶ Tyaá yu tuhun ihya tyin cahvi ndo itsi tsa cuenda tyin tsa iyó cuaha nyivi cuñi jandaví ñaha tsi ndo. ²⁷ Maa tyin ra Jesucristo tsahá ra Tatyí Ii Nyoo iyó añima ndo, yacan cuenda ña tsiñi ñuhu ca tsa jacuaha nyivi tsi ndo. Tyin juvin ñi maa Tatyí Ii Nyoo jacuahá tandihi maa tyiñu tsi ndo. Tan tsa nditsa cuví tsi, ñavin cuendu cuví tsi. Yacan cuenda jañihi ndo cunyanaa vaha ndo tsi ra Cristo tumaa janahá maa Tatyí Ii Nyoo tsi ndo.

²⁸ Tan vityin nyooho, tsa cuví tumaa sehe yu, cunyanaa vaha ca ndo tsi ra Cristo tyin tacan tan quívi quitsi ra, iin cuñi yo tshihin ra. Tan iin cuñi tucu maa ra tshihin yo. Tan inga tucu tuhun ña cua tahan yo ticanuu nuu ra quívi tsaa ra. ²⁹ Vityin tsa tsa tsitó ndo tyin vaha ra Cristo, cuñi tsi coto ndihi ndo tyin tandihi nyivi javahá tsa vaha, sehe Nyoo tsi ñi.

3

Nyivi cuví sehe Nyoo

¹ Nyehé ndo, Nyoo Jutu yo cuñi xaan ra tsi yo, tyin jacunañi ra sehe Nyoo tsi yo. Tan cuví yo sehe ra. Tan tsa cuenda yacan, nyivi taahán ñi tsa iyó nu ñuhu ñayivi ihya ña cutuñi ñi ñi kuhva tsicá ñi yo tyin ña nacoto ñi tsi maa ra. ² Nyooho yañi, tsa cuví yo sehe ra vityin, maa tyin ñaha ca coto yo náa cua cuví yo. Maa tyin tsitó yo tyin quívi quitsi ra Jesucristo, cua cuví yo tumaa cuví maa ra, tyin cua nyehé vaha yo tsi ra tan cua nyehé tucu yo nácaa caá ra. ³ Tandihi yoo tsa ndatú tsa cua cuví tacan, nducú yo kuhva janduvaha yo tsi yo, tan cuví yo tumaa maa Jutu Mañi yo Jesucristo, tyin maa ra cuii iyó ra.

⁴ Tandihi nyivi tsa tsicóo cuatyí, ñi ican cuví ñi tsa ña tyaá yahvi ley Nyoo. Tyin tun javahá yo tsa ña vaha, cuñi tsi catyí tyin ña tyaá yahvi yo ley Nyoo. ⁵ Nyooho tsa tsitó tyin ra Cristo quitsi ra nu ñuhu ñayivi ihya tyin quinyaá ra cuatyí yo, tan tsitó tucu ndo tyin maa ra nduve cuatyí ra. ⁶ Tandihi yoo tsa iyó iin caa ñi tshihin ra, ña jañihi ca yo javahá ca yo tsa ña vaha. Maa tyin nyivi javahá tsa ña vaha, ñaha ca nyehé ñi tsi ra, tan ñaha ca coto ñi tsi ra. ⁷ Nyooho, tsa cuví tumaa sehe yu, coto jandaví ñaha nyivi tsi ndo. Tyin nyivi javahá tsa vaha, cuví ñi nyivi vaha, tumaa vaha maa ra Cristo. ⁸ Tyin nyivi javahá tsa ña vaha, cuenda nu ña vaha cuví ñi. Tyin nu ña vaha javahá nu tsa ña vaha nda quívi jihna ñi. Yacan cuenda quitsi ra Jesucristo, Sehe Nyoo, tyin janaa ra tandihi tsa javahá nu.

⁹ Tandihi yoo tsa tsa yahá nacacú tsaa jahá Nyoo, ña taahán ca ñi yo javahá yo tsa ña vaha, tyin iyó yo ñayivi tsahá Nyoo tsi yo. Yacan cuenda ña javahá ca yo tsa ña vaha, tyin tsa yahá nacacú tsaa yo tan vityin cuví yo sehe Nyoo. ¹⁰ Cuví nacotó yo ndáa nyivi cuví sehe Nyoo, tan ndáa nyivi cuví sehe nu ña vaha, tyin tandihi nyivi tsa ña javahá tsa vaha tan ña cuñi tsi nyivi yihí cuenda Nyoo, ñavin sehe Nyoo tsi ñi.

Na cuñi tahan yo tsi yo

¹¹ Tyin tsa tsiñi ndo nda quívi jihna ñi cuví. Tsa cuñi tahan yo tsi yo. ¹² Ña taahán tsi javaha yo tumaa javahá ra Caín, tyin ra Caín cuví ra iin ra cuenda nu ña vaha. Tan

tsahñi ra tsi yañi ra. ¿Náa cuenda tsahñi ra tsi yañi ra? Tsa cuenda tyin ra yañi ra javahá ra tsa vaha, tan maa ra javahá ra tsa ña vaha.

¹³ Nyooho yañi, ña iyo cuñi ndo tun ndasi cuñi nyivi ña yihí tuhun Nyoo nyehé ñi tsi ndo. ¹⁴ Yoo tsa cuñi tsi nyivi yihí tuhun Nyoo tsitó yo tyin iyó yo ñayivi nyito, tyin juvin tsi janahá tsi yo tyin ña cuví ca yo nyivi tsihí. Maa tyin nyivi ña cuñi tsi nyivi yihí tuhun Nyoo, cuví ñi tumaa nyivi tsihí. ¹⁵ Nyivi ndasi cuñi nyehé tsi nyivi, cuví ñi tumaa nyivi tsahñi nyivi. Tan tsitó ndo tyin ndi intuhun ñi tsahñi nyivi, tan ña cua cuhva Nyoo ñayivi nyito coo ñi. ¹⁶ Tsitó yo náa cuví tsa cuñi tahan yo tsi yo tyin tsa yaha javahá ra Jesucristo tsi yo nácaa taahán tsi cuñi tahan yo tsi yo. Tyin maa ra nda cuenda tsahá ra ñayivi ra tsa cuenda yo tsa catyi tsa cuñi ra tsi yo. Tacan taahán tsi javaha tucu maa yo. Cuñi tsi cuhva yo nda cuenda ñayivi iyó yo tsa cuenda nyivi yihí tuhun Nyoo. ¹⁷ Tatun yihí yo tan iyó luxu tsa iyó tsi yo, tan nyehé yo tyin cumañi tsa cumañi tsi inga nyivi, tan jahá yo tumaa tsa ña nyehé ñi yo, ¿a cuñi yo tsi Nyoo tsa tacan javahá yo? Ña cuñi yo tsi ra. ¹⁸ Nyooho tsa cuví ndo tumaa sehe yu, na ña cuñi yo tsi nyivi tsihin tuhun caahán ñi yo, na cuñi tahan yo tsi yo tsihin tsa quitá tsitsi aña yo tan javahá yo tumañi ñi tsihin tsa ñi ñi yo.

Nacaa javaha yo tan coo vaha yo tsihin Nyoo

¹⁹ Tatun javahá yo tacan, tsitó yo tyin iyó vaha yo tsihin tsa nditsa. Tan vaha iyó yo tsihin Nyoo. ²⁰ Tatun tuví ñi tsitsi aña yo tyin iyó cuatyí yo, na ña cuita ñi yo yacan. Na cuita ñi yo tsi Nyoo tyin juvin ra tsitó tandihí tsa iyó aña yo tan cahnu ca cuví ra tan ñavin ca aña yo. ²¹ Yañi, tatun tuví ñi yo tyin nduve cuatyí yo, na ña nayuhvi yo nyehé yo tsi Nyoo. ²² Tan tandihí tsa cua ndacan yo tsi ra, cua cuhva ra can tsi yo, tyin tyaá yahvi yo tsa caahán ra, tan javahá yo cuhva taahán ñi ra. ²³ Tyin tyiñu tsa tsahá ra tsi yo yacan cuví tsa tsjnu ñi yo tyin ra Jesucristo cuví Sehe ra, tan tsa cuñi tahan yo tsi yo, tumaa tava tyiñu ra tsi yo. ²⁴ Nyivi tyaá yahvi tyiñu tsahá ra tsi ñi, iyó ñi tsihin ra, tan iyó tucu maa ra tsitsi aña ñi. Tan tsitó yo tyin iyó ra tsihin yo tsa cuenda Tatyí li ra tsa tsahá ra tsi yo.

4

Tatyí li Nyoo tan tatyí nu ña vaha

¹ Nyooho yañi tsa cuñi xaan yu, ña tsjnu ñi ndo tsa caahán nyivi catyi tyin tuhun Nyoo caahán ñi. Nyehé jihna ndo tatun nacatsí tahan tsa caahán ñi tsihin tuhun Nyoo. Tyin vityin cuaha xaan nyivi jandaví

ñaha iyó. Catyi ñi tyin Nyoo caahán tsa caahán ñi tan ña nditsa ñi. ² Cuví nacoto ndo tsi nyivi tun juvin Tatyí li Nyoo jacahán tsi ñi o ñavin. Ñi tsa iyó Tatyí li Nyoo tsihin, catyi ñi tyin quee ra Jesucristo nda gloria tan quítsi ra nu ñuhu ñayivi ihya, tan cuví ra ñi rayi tumaa maa yo. ³ Maa tyin tandihí nyivi tsa catyi tyin ñavin tacan cuví, ñavin Nyoo jacahán tsi ñi. Tatyí ña vaha, tsa ndasi cuñi nyehé tsi ra Cristo, jacahán tsi ñi. Tsa tsitó ndo tyin nyaá tsa cua quítsi nu jandaví ñaha can. Tan vityin tsa iyó nu nu ñuhu ñayivi ihya tan jandaví ñaha nu tsi nyivi.

⁴ Nyooho tsa cuví ndo tumaa sehe yu, nyivi cuenda Nyoo cuví ndo. Tan tsa yaha jahá canaa ndo tsi nu caahán tsa ña nditsa. Tyin Nyoo iyó ra aña ndo tan cahnu ca cuví ra tan ñavin ca nu ña vaha, tsa iyó aña nyivi tsa taahán ñi tsa iyó nu ñuhu ñayivi ihya. ⁵ Ñi ican, cuenda nu ñuhu ñayivi ihya cuví ñi. Yacan cuenda caahán ñi cuenda tsa iyó nu ñuhu ñayivi ihya. Tan inga nyivi cuenda nu ñuhu ñayivi ihya tyaá soho ñi tsa caahán ñi ican. ⁶ Maa tyin yoo cuví yo nyivi cuenda Nyoo. Tan nyivi nacotó tsi Nyoo tyaá soho ñi tsa caahán yo. Tan nyivi tsa ña tsitó tsi Nyoo, ña cuñi ñi tyaá soho ñi tsa caahán yo. Tsihin yacan cuví nacoto yo ndaa nyivi iyó Tatyí li Nyoo tsihin, tan caahán ñi tsa nditsa tan ndaa nyivi yihí tatyí ña vaha tan jandaví ñaha ñi.

Nyoo cuñi xaan ra tsi tandihí nyivi

⁷ Nyooho yañi, na cuñi tahan yo tsi yo, tyin Nyoo janahá ra tsi yo nácaa taahán tsi cuñi tahan yo tsi yo. Tyin tandihí yoo tsa cuñi tsi nyivi, sehe Nyoo cuví tsi yo, tan nacotó yo tsi Nyoo. ⁸ Nyivi ña cuñi tsi inga nyivi, ña nacotó ñi tsi Nyoo, tyin Nyoo cuñi xaan ra tsi yo tan tsi tandihí nyivi. ⁹ Nyoo janahá ra tsi yo tsa cuñi ra tsi yo tsihin tsa tsahá ra Sehe mañi ra quítsi nu ñuhu ñayivi ihya, tyin cuhva ra ñayivi nyito coo yo. ¹⁰ Nyehé ndo, nácaa tsa cuñi Nyoo tsi yo. Ñavin jihna ca maa yo cuñi tsi ra, tyin jihna ca maa ra cuñi tsi yo. Tan jaquítsi ra Sehe ra tyin tacan tan cúu ra tsa cuenda yo tan quinyaa ra cuatyí yo.

¹¹ Nyooho yañi, tatun tacan cuñi Nyoo tsi yo, juvin ñi tacan taahán tsi tsa cuñi tucu maa yo tsi nyivi tumaa tsa cuñi maa Nyoo tsi yo. ¹² Ndi intuhun maa nyivi, tan ñaha ca maa nyehé ñi tsi Nyoo, maa tyin tatun cuñi tahan yo tsi yo, iyó Nyoo aña yo. Tan ñi vaha ñi yo cuñi yo tsi ra tan tsi nyivi. ¹³ Tan tsitó yo tyin iyó vaha yo tsihin ra tan maa ra iyó ra aña yo, tyin tsahá ra Tatyí li ra iyó aña yo. ¹⁴ Nyuhu nyehé vaha ndi tan cuví ndi tsandaa tyin jaquítsi Nyoo Jutu yo tsi Sehe ra tyin jacacu ra tsi yo tsa cuví yo nyivi iyó nu ñuhu ñayivi ihya. ¹⁵ Tandihí nyivi tsa tsinu ñi tan caahán tyin ra Jesús cuví Sehe

Nyoo, iyó Nyoo ańima ńi. Tan iyó ńi iin caa ńi tsihin ra.

¹⁶ Yoo tsító yo tan tsinú ińi yo tyin Nyoo cuńi ra tsi yo, tan cuńi ra tsi tandihi nyivi. Tan tandihi yoo tsa cuńi tahan yo tsi yo, iyó yo iin caa ńi tsihin Nyoo; tan Nyoo iyó ra tsitsi ańima yo. ¹⁷ Tyin tatun cuńi yo tsi Nyoo tsihin tsa ńi ińi ańima yo, ńa cua nayuhvi yo nyehe yo tsi ra na tahan tsi quivi cutuńi tandihi nyivi nuu ra. Tyin tumaa iyó ra Jesucristo, tacan iyó yo nu ńuhu ńayivi ihya. ¹⁸ Nyoo cuńi ra tsi yo, tan tatun cuńi yo tsi ra, nduve tsa nayuhvi yo. Tatun ńi ińi yo cuńi yo tsi Nyoo ńa nuńa ca nu quihvi tuhun yuuhvi can ańima yo, tyin Nyoo jatsiyó ra tandihi maa yacan. Tyin tatun yuuhvi yo, yihí can tyin tuví ińi yo tyin iyó cuatyí yo. Tan yuuhvi yo tsa cua tatsi tuńi Nyoo tsi yo. Tyin tatun yuuhvi cuńi yo, yuuhvi yo tyin ńaha ca cuńi yo tsi Nyoo tumaa taahán maa tsi cuńi yo tsi ra.

¹⁹ Yoo cuńi yo tsi Nyoo tyin jilna ca maa ra cuńi tsi yo. ²⁰ Tatun iin nyivi tan catyí ńi: “Yuhu cuńi yu tsi Nyoo”, tan ndasi cuńi ńi nyehé ńi tsi nyivi tahan ńi, nyivi vatya cuví ńi. Tyin tatun ndasi cuńi yo nyehé yo tsi nyivi tahan yo tsa tuhvá yo nyehé, ńáca ca cua cuńi yo tsi Nyoo tsa ńa cuví nyehe yo? ńa cua cuví. ²¹ Tava tyińu Nyoo tsi yo tyin tun cuńi yo tsi ra, tacan cuńi tsi tsa cuńi tahan yo tsi yo.

5

Tatun ńi ińi yo tsinú ińi yo tsi Nyoo cuví jaha canaa yo tsi tsa ńa vaha

¹ Tandihí nyivi tsa tsinú ińi tyin ra Jesús cuví ra Cristo ra quee nda gloria jahá Nyoo, juvin ńi cuví sehe Nyoo. Tyin tatun cuńi yo tsi iin ra iyó sehe, cuńi ndihi yo tsi sehe ra. ² Tatun cuńi yo tsi Nyoo tan javahá yo tsa caahán ra, cua cuńi ndihi yo tsi nyivi cuví sehe ra. ³ Tyin tsa cuńi yo tsi Nyoo yacan cuví tsa tyaá yahvi yo tsa tsahá cuenda ra tsi yo. Tan tandihí tsa tsahá cuenda ra tsi yo, ńa yí javaha yo can. ⁴ Tyin tandihí yoo tsa cuví sehe Nyoo, jahá canaa yo tsi tsa ńa vaha tsa iyó nu ńuhu ńayivi ńayivi ihya. Cuví jaha canaa yo can tyin tsinú ińi yo tsi Nyoo. ⁵ Maa ńi maa nyivi tsa tsinú ińi tyin ra Jesús cuví Sehe Nyoo, ńi ican cuví ńi cuví jahá canaa tsa ńa vaha tsa iyó nu ńuhu ńayivi ihya.

Tatyí Ii Nyoo cuví tsandaa cuenda ra Jesús Sehe Nyoo

⁶ Ra Jesucristo quítsi ra nu ńuhu ńayivi ihya. Tan tsa tsicoondutyá ra tsihin ndutyá tan tsa tsatí ńińi ra janahá tyin Sehe Nyoo cuví tsi ra. ńavin tsa tsicoondutyá ńi ra. tyin nda cuenda tsa tsatí ńińi ra. Tan juvin ńi maa Tatyí Ii Nyoo cuví tsandaa tyin tacan cuví. Tan Tatyí Ii Nyoo ńa jandaví ńaha tsi. ⁷ Nda andiví iyó uńi taahan tsa cuví

tsandaa: maa Nyoo Jutu yo tan ra Cristo ra cuví Tuhun tsa Caahán Nyoo, tan Tatyí Ii Nyoo. Tsa nduńi taahan ra naha, iin ńi cuví ra naha. ⁸ Tan nu ńuhu ńayivi ihya iyó tucu uńi tsandaa: Tatyí Ii Nyoo tsa iyó ańima yo caahán tyin ra Jesús cuví Sehe Nyoo. Tsa tsinu uvi cuví nu tsicoondutyá ra Jesús, nu catyí Nyoo tyin juvin ra Jesús cuví Sehe ra. Tan tsa tsinu uńi cuví nu tsatí ńińi ra Jesús. Tan tsa nduńi taahan yacan nacatsí tahan caahán can. ⁹ Yoo naquihín yo tsa caahán ra cuví tsandaa nu ńuhu ńayivi ihya. Tan Nyoo cahnu ca cuví ra tan ńavin ca ra ńuu ńayivi ihya. Yacan cuenda taahán tsi naquihín yo tsa caahán ra, tan juvin ńi maa ra catyí tyin Sehe ra cuví tsi ra Jesús. ¹⁰ Nyivi tsa tsinú ińi tyin Sehe Nyoo cuví tsi ra Jesús, tsító ńi tsitsi ańima ńi tyin nditsa. Nyivi tsa ńi tsinú ińi tsi ra, jahá ńi tyin vatya Nyoo, tyin ńa cuńi ńi tsinu ińi ńi tsa caahán Nyoo tsandaa cuenda Sehe ra. ¹¹ Tan tyehen caahán Nyoo tsihin yo: Catyí ra tyin tsahá ra ńayivi nyito coo yo tan ńihi yo itsi tatun tsinú ińi yo tyin ra Jesucristo cuví Sehe ra. ¹² Nyivi iyó Sehe Nyoo ańima, iyó ńi ńayivi nyito. Tan nyivi nduve Sehe Nyoo iyó ańima, ńa iyó ńi ńayivi nyito.

Nu ndihí cahan ra Juan tan nu tsahá ra tyińu tsi nyivi

¹³ Tyaá yu tuhun ihya tsa cuenda nyooho tsa tsinú ińi tsi ra Jesús Sehe Nyoo, tyin tacan tan coto ndo tyin tsa iyó ndo ńayivi nyito tsa ńa cua naa maa.

¹⁴ Nditá ińi yo tsi Nyoo tyin tatun tsicán yo tsa tsicán yo tsi ra tan cahva cuńi maa ra tsicán yo, tsító yo tyin maa ra tsíńi ra tsa caahán yo. ¹⁵ Tan tsa tsító yo tyin tsíńi ra tsa tsicán yo, tsító tucu yo tyin tsa ńihí yo tsa tsicán yo tsi ra.

¹⁶ Tatun iin nyivi tan nyehe yo tyin javahá ńi cuatyí tsa ńa taahán tsi cúu ńi, taahán tsi cahan ndaahvi yo tsihin Nyoo tsa cuenda ńi na jaha ra tucahnu ińi tsi ńi tsa cuenda cuatyí can. Maa tyin tatun javahá ńi cuatyí tsa taahán tsi cúu ńi, ńa ndacan tahvi yo tsa cuenda ńi. ¹⁷ Tandihí tsa caquihí tsa javahá nyivi, cuatyí cuví can. Tan iyó tucu cuatyí tsa ńa jaha Nyoo tucahnu ińi.

¹⁸ Tsító yo tyin nyivi tsa nacacú tsa jahá Nyoo, ńa jańihí ca ńi javaha ńi cuatyí. Tyin jahá cuenda Sehe Nyoo tsi ńi tan ńa tsahá ra tsa ńi nu ńa vaha tsi ńi.

¹⁹ Yoo tsa tsító yo tyin cuenda Nyoo yihí yo. Tan tandihí nyivi tsa taahán ińi tsa iyó nu ńuhu ńayivi ihya, nu ńa vaha ndacá ńaha tsi ńi.

²⁰ Tan tsító tucu yo tyin quítsi Sehe Nyoo, tan tsahá ra tsa cutuńi ińi yo tsa caahán ra tyin tacan tan nacoto yo tsi Nyoo, ra cuví tsa nditsa. Tan ra cuví tsa nditsa can, cuví ra Jesucristo Sehe Nyoo. Tan iyó yo iin caa ńi

tsihin ra. Tan juvin maa ra cuví Nyoo tsa nditsa. Tan iyó ra ñayivi nyito tsa ña cua naa maa. ²¹Nyooho tsa cuví tumaa sehe yu, jaha cuenda ndo tsi ndo tsihin tsitoho tsa jacahnú nyivi, tyin ñavin Nyoo cuví can.

Tan na cuví tsi tacan ñi.

Carta Tsinu Uvi Tsa Tyaa Ra Juan

Nu caahán ra Juan tyin cuñí xaan ra tsi nyivi yihí cuenda Nyoo

¹ Yuhu ra tsahnu cuenda vehe ñuhu, jaquitsí yu carta ihya tsi yooho, cuhva yu, tan tsi sehe un tyin cuví un ñaha tsa nacatsí maa Nyoo. Cuñí xaan yu tsi ndo tsihin tsa nñi ññi añima yu. Tan cuñí ndihí tucu tandihí nyivi tsa tsitó tsa nditsa tsi ndo, yacan ñavin yuhu ñi cuñí tsi ndo. ² Cuñí ndí tsi ndo tsa cuenda tsa nditsa tsa iyó tsitsi añima yo. Tan tacan ñi maa cua coo tsa nditsa can tsihin yo. ³ Tan na nasoco Nyoo Jutu yo tan Jutu Mañi yo Jesucristo Sehe Nyoo tsi ndo. Tan na cundaahvi ññi ra tsi ndo, tan na coo ca tsa taxin ra añima ndo. Iyó can tsi yo tyin iyó yo tsihin tsa nditsa tan tsihin tsa cuñí xaan ra tsi yo.

⁴ Sii xaan cuñí yu tyin tsitó yu tyin juhva sehe un vaha xaan nyicún ñi tsa nditsa, tumaa tavá tyiñu maa Nyoo Jutu yo tsi yo. ⁵ Hermana, caahán ndaahvi yu tsihin un vityin, na cuñi tahan yo tsi yo. Tyiñu ihya cuñí yu cahan yu tsihin un, yacan cuenda jaquitsí yu carta ihya tsi un. Ñavin tuhun tsa ndí tsahá Nyoo tsi yo cuví tsi. Tyin tsa iyó maa tsi nda nu quitsahá. ⁶ Tsa cuñí yo tsi Nyoo, yacan cuví tsa javahá yo tandihí tsa tavá tyiñu ra tsi yo. Tan yacan cuví tsa cahan Nyoo tyin javaha yo. Tan juvin tsi cuví tsa tsiñi ndo nda quivi jihna ñi: Coo ndo tsihin tsa cuñí ndo tsi Nyoo tan tsi nyivi.

Nu tsahá cuenda ra Juan nácaa jaha cuenda yo tsi yo tsihin nyivi jandavi ñaha

⁷ Caahán yu tyehen tsihin un tyin cuaha xaan nyivi jandavi ñaha iyó nanií cahnu nu ñuhu ñayivi. Catyí ñi tyin ña nditsa tsa quitsí ra Jesucristo cacú ra tsihin cuñu ñuhu tan cuví ra ra ñayivi. Nyivi tsa caahán tacan, ñi jandavi ñaha cuví ñi. Tan ñi ndasí cuñi nyehé tsi ra Cristo cuví ñi. ⁸ Yacan cuenda, jaha xaan ndo cuenda tsi ndo tsihin tsa jacuahá ñi coto jacunaa ndo tsa vaha tsa javahá ndo, tan coto ña ñihí ca ndo tandihí tsa cua cuhva Nyoo tsi ndo.

⁹ Tandihí nyivi tsa ña naquihín vaha tuhun tsa jacuahá ra Cristo tsi yo, tan jacuahá ñi inga ca tuhun, nduve Nyoo iyó tsihin ñi. Maa tyin nyivi naquihín vaha tuhun jacuahá ra Cristo tan tyaá yahvi ñi itsi, iyó Jutu yo Nyoo tan ra Jesucristo Sehe ra tsihin ñi. ¹⁰ Tatun tsaá nyivi yuvehe ndo, tan cuñí ñi jacuahá ñi tsi ndo tsa ña jacuahá ra Jesucristo, ña cuhva ndo cunyecu ñi yuvehe ndo tan ndí ña cuhva ndo nacumi tsi ñi. ¹¹ Tyin

tun cuhva yo nacumi tsi ñi, cuñí tsi catyi tyin javahá ndihí yo tsa ña vaha tsa javahá ñi.

Nu ndihí cahan ra Juan

¹² Iyó cuaha ca tuhun cuñí yu cahan yu tsihin ndo. Maa tyin ña cuñí yu cahan yu can tsihin carta. Tyin tyaá yu cuhva tsa quitsi yu nu yucú ndo. Tyin tacan tan natuhun vaha ca maa yo, tan cusii ca ññi yo.

¹³ Ihya vatsi nacumi tsi un jahá sehe ña tahan un tsa nacatsí ndihí maa Nyoo.

Tan na cuví tsi tacan ñi.

Carta Tsinu Uñi Tsa Tyaa Ra Juan

Nu caahán ra Juan tyin vaha cuahán ra Gayo tsihin Nyoo

¹ Yooho Gayo, yuhu tsa cuví yu ra tsahnu cuenda vehe ñuhu, jaquitsí yu carta ihya tsi un, tyin cuví un iin ra vaha ñi tsi yu tan tsa tsitó maa un tyin cuñí xaan yu tsi un tyin iin caa ñi nyicún yo tsa nditsa.

² Yañi, tsicán tahvi xaan yu tsi Nyoo tsa cuenda un tyin na coo vaha ca un. Tumaa tsa vaha cuahán un tsihin Nyoo, na nasoco ra tsi un tacan tan coo vaha un tan ña cuhvi un. ³ Yuhu sii xaan cuñi yu quivi quitsi juhva ra yañi yo naha ra nu nyii yu. Tan nacatyj tuhun ra naha tsihin yu tyin nditsa tsa iyó un cuhva jacuahá ra Cristo, tan nyicún un tsa nditsa. ⁴ Nduve inga ca tsa sii cuñi yu tumaa tsa sii cuñi yu tsa tsitó yu tyin sehe yu cuenda Nyoo nyicún ñi tsa nditsa.

⁵ Yañi, cuñi xaan yu tsi un. Vaha xaan javahá un, tyin jatyinyeé un tsi ra yañi yo naha ra. Tsa vaha ca javahá un cuví tsa jatyinyeé un tsi ra yañi yo tsa quee inga ñuu. naha ra. ⁶ Tandihí ra naha, tan nacatyí tuhun ra naha nuu tandihí nyivi tsicá vehe ñuhu tyin cuñi xaan un tsi ra naha. Jaha tumañi ñi, jatyinyee ca tsi ra yañi yo naha ra, cuhva tsa tsiñi ñuhu tsi ra naha tumaa taahán ñi maa Nyoo. Tyin tacan tan jañihi ca ra naha cuhun ra naha cahan ra naha tuhun Nyoo. ⁷ Tyin tyiñu ra Jesucristo tsicá ra naha. Tan ña cuñi ra naha tsa jatyinyee nyivi tsa ña tsitó tsi Nyoo tsi ra naha. ⁸ Yacan cuenda maa yo taahán tsi jatyinyee tsi ra naha tsihin tsa tsiñi ñuhu tsi ra naha. Tan tacan tan cutahan yo tsihin ra naha nu caahán ra naha tuhun nditsa.

Nu caahán ra Juan tyin ña vaha javahá ra Diótfrefes

⁹ Yuhu jacuhun yu iin carta tsi nyivi tsicá vehe ñuhu, maa tyin ra Diótfrefes ña cuñi ra tyaa soho ra tsa caahán yu tyin cuñi xaan maa ra cuví ra ityi nuu tsihin nyivi. ¹⁰ Yacan cuenda tatun quitsi yu nu yucú ndo cua jandaa yu tyiñu tsihin ra tsa cuenda tsa caahán ra, tyin caahán xaan ra ndavaha ñi tsata yo. Tan inga tucu tuhun tyin ña naquihín vaha ra tsi ra hermano tatun tsaá ra naha. Tan tatun cuñi nyivi tsicá vehe ñuhu naquihín vaha ñi tsi ra hermano can naha ra, tyasí ra Diótfrefes tsi ñi, tan tavá ra tsi ñi vehe ñuhu.

¹¹ Yooho yañi yu tsa cuñi xaan yu ña javaha un tsa ña vaha tumaa javahá ra can, maa tyin javaha tsa vaha. Tyin ra javahá tsa vaha, cuenda Nyoo cuví ra, tan ra javahá tsa ña vaha, ña tsitó ra tsi Nyoo.

Nu caahán ra Juan tyin vaha xaan tsinú ñi ra Demetrio tsi Nyoo

¹² Tandihí nyivi tan vaha caahán ñi tuhun ra Demetrio. Tan vaha xaan tyaa yahvi ra tuhun Nyoo, tan juvin ñi maa tuhun Nyoo janahá tyin ra vaha cuví ra. Tan juvin ñi cuví tucu nyuhu tsandaa tsa cuenda ra, tan tsitó ndo tyin tsa nditsa caahán ndi.

Nu ndihí cahán ra Juan

¹³ Cuaha xaan tuhun cuñi yu jacoto yu tsi un, maa tyin ña cuñi yu jacoto yu can tsi un tsihin carta. ¹⁴ Tyin tyihí yu cuhva tsa quitsi yu nu iyó un tsa numi ñi, tyin tacan tan natuhun vaha ca maa yo. ¹⁵ Na coo tsa taxin añima un. Ra vaha ñi tsi yo tsa iyó ityi ihya jaquitsí xaan ra naha nacumi tsi un. Tan cuñi yu jaha un tumañi ñi cuhva un nacumi tsi tsa intuhun intuhun ra vaha ñi tsi yo.

Carta Tsa Jacuhun Ra Judas Tsi Nyivi Yihí Cuenda Nyoo

Nu tyaá ra Judas carta tsa cuenda nyivi cana Nyoo

¹ Yuhu ra Judas cuví yu musu ra Jesucristo. Tan cuví yu yañi ra Jacobo. Tyaá yu carta ihya tsa cuenda nyooho tsa cana Nyoo Jutu yo. Cuñí xaan ra tsi ndo tan jahá cuenda vaha ra tsi ndo tyin iin ñi cuví ndo tsihin ra Jesucristo. ² Na nyehe ndaahvi Nyoo tsi ndo. Tan na cutuñi ca iñi ndo nácaa tsa cuñí ra tsi yo. Tan na naquihin ca ndo tsa taxin tsahá ra tsi yo coo añima ndo.

*Nu caahán ra Judas tuhun nyivi tsa jacuahá tsa ña nditsa
(2 Pedro 2.1-17)*

³ Tyihí yu cuhva tyaá yu iin carta tsa cuenda ndo yañi, tyin cuñí yu cahun yu tsihin ndo nácaa jacacú Nyoo tsi yo. Maa tyin vityin tyaá yu nu carta ihya tan jañiñí yu tsi ndo na ña cuhva ndo tsa sama cuhva tsinú iñi ndo tsa vaha tsa tsahá Nyoo tsi yo tsa cuví yo nyivi yihí cuenda ra. Tyin iin tsaha ñi janahá ra nácaa tsinu iñi yo tsi ra tan ña cua nasama ra itsi. ⁴ Yacan cuenda jaha cuenda vaha ndo tsi ndo tyin quihví xeehe juhva ra jandaví ñaha naha ra. Catyí ra naha tyin tsa yahá jahá Nyoo tucahnu iñi tsi yo, tan yacan cuenda cuví ñi javaha maa yo tsa cuñí yo. Tan ña tsinú iñi ra naha tsi Nyoo, ra ndacá ñaha tsi yo, ndi ña tsinú iñi ra naha tsi Jutu Mañi yo Jesucristo. Maa tyin catyí Nyoo tahañ tsanaha tyin ra tsa javahá tacan, cua cunaa ra naha.

⁵ Vasu ndi maa tsa tsitó ndo tsa javahá Nyoo tahañ tsanaha, maa tyin cuñí yu janducuhun iñi yu tsi ndo tyin Jutu Mañi yo tava ra tsi nyivi Israel ñuhu Egipto, jacacú ra tsi ñi ndaha nyivi Egipto can. Maa tyin tsa yahá can janaa ra tsi tandihí maa ñi tsa ña tsinú iñi tsi ra. ⁶ Tan juvin ñi tacan javahá tucu Nyoo tsihin ángel tsa ña tyaá yahvi tsi ra. Tsahá ra tyiñu tsi nahnu, maa tyin nacoó nahnu can. Tan yacan cuenda tsaháñi ra tsi nahnu tsihin cadena nu naa tan jahá cuenda ra tsi nahnu nda tahan tsi quivi cutuñi nyivi. ⁷ Tacan tucu nyivi ñuu Sodoma tan ñuu Gomorra, tan nyivi ñuu nyihí tsa tsicoo nicanduvi ñuu can. Janaa Nyoo tsi ñi tsa cuenda tsa caquiñi tsa javahá ñi. Tyin rayi can naha ra tsicoo ra naha tsihin ñaha. Tan ñiñaha tsicoo ñi tsihin iin rayi tan inga ra. Tan cuaha ca tsa caquiñi javahá ñi tyin rayi tsicoo ra naha tsihin ra ndusihi. Tan tsa cuenda yacan, nyehe ñi tundoho nu cayú ñi quivi tshamj Nyoo ñuu

ñi. Tan yacan janahá tsi yo tyin nyivi javahá tsa caquiñi, cua cayu ñi tsihin ñuhu tsa ña cua ndahva maa.

⁸ Vasu ndi maa tacan cuví, vityin ndi iyó ra jandaví ñaha naha ra. Cuñí ra naha tyin vaha javahá ra naha. Maa tyin jatívi ra naha cuñu ñuhu ra naha tan ña tsahá ra naha tsa cundaca ñaha Jutu Mañi yo tsi ra naha. Caahán ra naha ndavaha ñi sigui ra iyó ca tunyee iñi tsi tan ñavin ca maa ra naha. ⁹ Tan ndi ángel Miguel tsa cahnu cuví nuu Nyoo, ña cana iñi ra javahá ra tacan. Tyin quivi cañi tahan ra tsihin nu ña vaha tsa cuenda cuñu ñuhu ra Moisés, ña cana iñi ra cahán ra ndavaha ñi sigui nu. Intuhun ñi tsa catyí ra tsihin nu: “Na tatsi tuñi Jutu Mañi yo tsi un” catyí ángel Miguel can tsihin nu ña vaha. ¹⁰ Maa tyin ra tsa jatyañú tsi ndo can naha ra, caahán ra naha ndavaha ñi tyin ña tsitó ra naha. Tan javahá ra naha tumaa javahá quiti, tyin quiti ña cutuñi iñi ti. Ica ñi maa ti naha ti tsa cuñi cuñu ñuhu ti naha ti. Tan tacan tucu ra can naha ra. Tsihin tsa caquiñi tsa javahá ra naha jatívi ra naha juvin ñi tsi maa ra naha.

¹¹ JNdahvi ra ndaahvi can naha ra! tyin javahá ra naha tumaa javahá ra Caín. Tan tsa cuenda tsa cuñi ra naha jaha canaa ra naha xuhun, nacoó ra naha ityi Nyoo tumaa javahá ra Balaam. Tan cua cunaa ra naha tumaa cunaá ra Coré, tyin tsihí ra can tsa cuenda tsa ña tyaá yahvi ra tsa cahán ra cuví ityi nuu tsihin ra. ¹² Ra tsa jatyañú tsi ndo naha ra tsahá ra naha ticanuu tsi ndo nu ndu iin ndo. Tyin tsatsí ra naha tan tsihí ra naha tsihin tsa sii cuñi ra naha, tan ña cahán nuu ra naha tsa ña jahá ra naha tsa ñayivi tsi Nyoo. Cuví ra naha tumaa ra tsa ña jahá cuenda vaha mbee, tyin juvin ñi tsi maa ra naha jahá cuenda ra naha. Cuví ra naha tumaa vico tsa yihí ityi sigui tun tsa cua cuun savi tan cuahán tsi tsihin tatyí tan ña cuun savi. Cuví ra naha tumaa yutun tsa ña tsahá tsiti. Tyin yutun tsa ña tsahá tsiti cuví tun tumaa yutun tsa tsa tsihí vasu ndi nyitó tun. Tan tumaa tsa uvi tsaha cua cúu tun tyin cua tyahnya cuui yoho tun. ¹³ Tan juvin ñi cuví tucu ra can naha ra tumaa ndutya ñuhu xaan tsa nacoó tiñuu nu nyiti tyin tsahá ra naha ticanuu. Tan cuví tucu ra naha tumaa tiñuu tsa iyó andivi tsa tsinaa. Tsa nyaá maa tsa cua ndoo cuui ra naha nu naa. Tacan ñi maa tsa cua tahan ra naha.

¹⁴ Tuhun ra can naha ra cahán ra Enoc tahañ tsanaha. Ra Enoc tsa tsinu utsa tsa cuví tata ra Adán. Cahán ra tuhun tsa tsahá maa Nyoo tsi ra, tan catyí ra: “Nyehe yu nu vatsí Jutu Mañi yo tan cuenda mil ángel ra vatsí tsihin ra ¹⁵ tyin vatsí ra vatsí tatsi tuñi ra tsi nyivi caquiñi tsa cuenda tandihí tsa ña vaha tsa javahá ñi, tan nyivi caahán

ndavaha ñi siqui ra”, catyj ra Enoc tahañ tsanaha. ¹⁶Ra tsa jatyañú tsi ndo naha ra, ña ndoó ra naha vaha tsihin tsa tsahá Nyoo tsi ra naha. Caahán ra naha tan catyj ra naha: “Yi xaan, cahnu xaan tundo ho nyehé yo.” Javahá ra naha tsa cuñi cuñu ñuhu ra naha. Yaa xaan caahán ra naha. Tan tsa caahán ra naha tsa vaha tsihin nyivi, javahá ra naha can tyin cuñi ra naha tsa cahan nyivi tyin vaha xaan iñi ra naha.

Nu tsahá cuenda ra Judas tsi nyivi yihí cuenda Nyoo

¹⁷Yañi, ña tyaa yahvi ndo tsi ra can naha ra. Maa tyin nducuhun iñi ndo tuhun tsa cahan ra tsa tava tyiñu Jutu Mañi yo Jesucristo, ¹⁸tyin catyj ra naha tyehen: “Nu cua ndihi quivi cua coo ra vacu nducu tuhun Nyoo. Cua coo ra naha tsihin tsa ña vaha tsa tsicá iñi ra naha.” ¹⁹Ra tsa cahan ra naha tuhun cuvi ra cuñi jasiñ tsi yo. Tyin tyaa yahvi ra naha cuhva cuñi cuñu ñuhu ra naha tan nduve Tatyí Ii Nyoo iyó tsihin ra naha.

²⁰Maa tyin nyooho yañi, jandu iin ndo iñi ndo tsihin tsa tsinú iñi ndo tsi ra Cristo. Ndañan tahvi ndo tsi ra tsihin tunyee iñi Tatyí Ii maa ra. ²¹Nducu ndo cuhva cunyanaa vaha ca ndo tsi Nyoo, tyin tacan tan coto ndo tyin cuñi xaan ra tsi yo. Tan cuatu ndo quivi cahun yo coo cuii yo tsihin ra. Tyin yacan cuvi tsa cua cuhva Jutu Mañi yo Jesucristo tsi yo tsa cuenda tsa cundaahvi iñi ra tsi yo.

²²Cahan yuhu ndo tsihin nyivi tsa ña tsinú iñi, na tsinu iñi ñi. ²³Nducu ndo cuhva cacu ñi tsa cua cayu. Cundaahvi tucu iñi ndo nyehe ndo tsi inga ñi tsa javahá tsa caquiñi. Maa tyin jaha ndo cuenda tsi ndo tsa ña cua javaha ndo tsa caquiñi tsa javahá ñi, tyin nda cuanda jahma nditsí ñi tan ña vaha can.

Nu ndihi cahan ra Judas tan jacahnu ra tsi Nyoo

²⁴⁻²⁵Intuhun ñi Nyoo iyó, tan iyó xaan tsa tsiñi tuñi tsi ra. Ra ican cuvi ra tsa jacacú tsi yo. Tan iyó xaan tunyee iñi tsi ra tsa jahá cuenda ra tsi yo tsa ña coo ca cuatyí yo quivi cua cahun yo tsihin ra nu cahnu cuvi nu nyaá ra. Tan si xaan cua cuñi yo.

Na coto yo tsa cahnu xaan cuvi ra. Na jacahnu yo tsi intuhun ñi maa ra tyin cahnu xaan cuvi ra. Tan iyó xaan tunyee iñi tsi ra. Na cundaca ñaha intuhun ñi maa ra tandihi. Tyin nda nu quitsj tsi, tan vityin, juvin ra ndacá ñaha tan tacan ñi maa cua cundaca ñaha ra.

Tan na cuvi tsi tacan ñi.

Tsa Janaha Ra Jesucristo Tsi Ra Juan

Tsa nyehe ra Juan

¹ Nyoo tava tyiñu ra tsi ra Jesucristo tyin cuhva cuenda ra tsi ra jahá tyiñu tyiñu ra tyin tsa cuyatyin cuii javaha ra tsa cua javaha ra. Tan jaquitsi ra Jesucristo iin ángel ra tan tsaha cuenda ra tandihi tsa cua cuví tsi yuhu, ra Juan, ra cuví musu ra. ² Tan caahán yu tandihi tsa nyehe yu. Tan cuví yu tsandaa tsa cuenda tuhun Nyoo tsa jacotó ra Jesucristo tsi yu.

³ Sií xaan cuví tsi nyívi tsa cua cahvi tuhun Nyoo tsa nyaá nu tutu ihya tan cuñi ñi tuhun caahán tsi tan tyaa yahví ñi itsi, tyin tandihi tuhun tsa nyaá nu tutu ihya, tsa yatyin cuii cundaa tsi.

Nu jacuhun ra Juan tutu tsi nyívi tsa utsa taahan vehe ñuhu

⁴ Yuhu ra Juan jaquitsí yu tutu ihya tsi nyooho, nyívi tsicá tsa utsa vehe ñuhu tsa cayucú ityi Asia. Na nasoco Nyoo tsi ndo. Tan tacan tucu tsa utsa tatyí íi tsa iyó nu ndacá ñaha ra. Tan na coo tsa taxin añima ndo jahá ra. Nyoo tacan ñi iyó maa ra, juven ra cuví Nyoo nda tsanaha, tan vityin, tan juven ra cua quitsi. ⁵ Tan naquihing tucu ndo tsa vaha jahá ra Jesucristo. Tyin ra ican cuví ra tsandaa tan tsa nditsa. Juvín ra cuví ra tsa nandotó tsa jihna ñi. Tan ndacá ñaha ra tsi ra cuví rey tsa iyó nu ñuhu ñayívi ihya naha ra. Tan cuñi xaan ra tsi yo, tan nacatya ra tsi yo tsihin niñi ra. ⁶ Tan tsaha ra tsa cuví yo rey tan cuví yo jutu tyin jahá tyiñu yo tyiñu Nyoo Jutu ra. ¡Na jacahnu yo tsi ra tan na ña cundihí maa tsa ndacá ñaha ra! Tan nacuvi tsi tacan.

⁷ ¡Nyehe jihna ndo! ¡Tsa vatsí ra Cristo nu vico andívi! Tandihí nyívi cua nyehe ñi tsi ra nda cuanda nyívi tsa jañicuehe tsi ra tan cua nyehe ñi tsi ra. Tan tandihí ñi cua vacu xaan ñi tyin cua nayuhví ñi nyehe ñi tsi ra inga tsaha tyin juven ñi maa ra cuví. Nditsa, tacan cua cuví, tan na cuví tsi tacan ñi.

⁸ Catyí Jutu Mañi yo:

—Yuhu cuví ra jihna ñi, tan yuhu cuví ra cua coo nu cua ndihí quívi, tumaa letra A tan Z —catyí Jutu Mañi yo, ra iyó tandihí tunyee íñi tsi. Tacan ñi iyó maa ra: Juvín ra cuví Nyoo nda tsanaha, tan vityin, tan juven ra cua quitsi.

Nu nyehe ra Juan tsa iyo caá ra Cristo

⁹ Yuhu ra Juan cuví yu yañi ndo. Tan iin caa ñi nyehe yu tundoho tsihin ndo, tan ndacá ñaha Nyoo tsi yo, tan iin caa ñi cunye xaan íñi yo náa cuví tsi yo tyin jatyinyee ra Jesucristo tsi yo. Nyíi yu vehe caa ñuhu

Patmos tsa canyíi mahñu ndutya ñuhu. Nyíi yu vehe caa tsa cuenda tsa caahán yu tuhun Nyoo tsa jacuahá ra Jesucristo. ¹⁰ Tan iin tumingu quívi jacahnú yo tsi Jutu Mañi yo, tuví íñi yu tsa nyaá Tatyí Ii Nyoo tsihin yu. Tan tsiñi yu iin ndusu ñihi xaan ityi tsata yu, tumaa ndusu trompeta. ¹¹ Tan catyí tsi tsihin yu tyehen:

—Yooho, Juan. Yuhu cuví ra jihna ñi, tan yuhu cua coo nu cua ndihí quívi. Tyaa nu iin tutu tandihí tsa cua nyehe un. Tan jacuhun itsi vehe ñuhu tsa utsa ñuu tsa cayucú ityi Asia: vehe ñuhu ñuu Éfeso, vehe ñuhu ñuu Esmirna, vehe ñuhu ñuu Pérgamo, vehe ñuhu ñuu Tiatira, vehe ñuhu ñuu Sardis, vehe ñuhu ñuu Filadelfia, tan vehe ñuhu ñuu Laodicea —catyí ndusu can tsihin yu.

¹² Tacan tan nyico coo yu tyin cuñi yu nyehe yu yóo caahán tsihin yu. Tan nyehe yu utsa taahan candileru xuhun cuaan.

¹³ Tan mahñu tsa utsa taahan candileru can, nyehe yu nyaá iin ra tsa caá tumaa caá rayíi ñuhu ñayívi ihya. Nditsi ra jahma cañi nda nu tsaha ra. Tan yihí iin cinturón xuhun cuaan yiqui nyica ra. ¹⁴ Tan xixi jñi ra cuitsin tsi, tumaa cuitsin xixi mbee, tan tumaa cuitsin catyí. Tan tinuu ra caá tsi tumaa caá nu cayú ñuhu. ¹⁵ Tan xiñú xaan tsaha ra tumaa xiñú iin caa tsa nañi bronce tsa tuhvá yo nacuhvá tsa yaha quita can tsitsi ono nu cayú ñuhu. Tan ñihi xaan ndusu ra tumaa ndusu ndutya cuaha. ¹⁶ Tan ndaha cuaha ra nyecú utsa taahan tiñuu andívi. Tan tuhun quitá yuhu ra caá tsi tumaa caá mityi tsa xaan nduvi tsiyo yuhu. Tan nu ra caá tsi tumaa caá tun ñihi xaan nyehe ñicanyii.

¹⁷ Cuhva tsa nyehe yu tsi ra, nduva yu tsaha ra tumaa tsa tsiñi yu. Maa tyin tyiso ra ndaha cuaha ra siqui yu, tan catyí ra tsihin yu:

—Ña ngayuhví un. Yuhu cuví ra jihna ñi, tan yuhu cua coo nu cua ndihí quívi. ¹⁸ Yuhu nyito yu vasu tsiñi yu, maa tyin vityin ña cua cundihí maa tsa iyó yu. Tan iyó ndatu tsi yo tsa catyí yu ama taahán tsi cuu nyívi, tan tatun cuhun ñi anyaya o ña cuhun ñi. ¹⁹ Tyaa nu libru tandihí tsa nyehe un, tan tsa iyó vityin, tan tsa cua coo nu cuahán ca tsi. ²⁰ Tuhun ihya cuví tuhun xeehe cuenda tsa utsa tiñuu tsa nyecú ndaha cuaha yu, tan tsa cuenda tsa utsa candileru xuhun cuaan can: Tsa utsa tiñuu can caahán tsi cuenda tsa utsa ra caahán tuhun yu tsa utsa vehe ñuhu. Tan tsa utsa candileru can cuñi tsi catyí tsa utsa vehe ñuhu.

2

Nu quitsaha tsahá cuenda ra Cristo tsi nyívi tsicá tsa utsa vehe ñuhu: Tsa tsaha cuenda ra tsi nyívi tsicá vehe ñuhu ñuu Éfeso

¹ J'acuhun tutu tsi ra caahán tuhun yu tsihin nyívi tsicá vehe ñuhu ñuu Éfeso. Tan catyi tsihin ra tyehen: "Tyehen catyi ra tsa nyecú utsa tiñuu ndaha cuaha, tan tsicá nuu ra mahñu tsa utsa candileru xuhun cuaan: ² Yuhu tsitó yu tandihi tsa javahá ndo. Tan nyehé yu tyin ñihi xaan jahá tyiñu ndo tan cunyeé xaan iñi ndo. Tan tsitó yu tyin ña cuñi ndo nyehé ndo tsi nyívi caquiñi. Tan tsitó yu tyin tuhva ndo nducu cuhva tsi ra tsa catyi tyin ra tsicá tyiñu Nyoo cuví ra naha, tan tsitó ndo tyin ña nditsa ra naha. ³ Cunyeé xaan iñi ndo. Tan nyehé xaan ndo tundoho tan jahá tyiñu xaan ndo tsa cuenda yu tsihin tsa ña ndu uvi iñi ndo. ⁴ Maa tyin iyó iin tsa ña vaha javahá ndo, tyin ña cuñi ca ndo tsi yu vityin tumaa tsa cuñi ndo tsi yu quívi jihna ñi. ⁵ Yacan cuenda nducuhun iñi ndo numaa nda nduvá ndo. Tan ñasama ndo cuhva iyó ndo, tan javaha nyico ndo tumaa javahá ndo quívi naquihín cuenda ndo tsi Nyoo. Tatun ña nasama ndo cuhva iyó ndo, tsa nyaá tsa cua quítsi yu nu yucú ndo, tan quinyaa yu candileru ndo nu nyaá tsi. Maa tyin tatun ndu uvi iñi ndo cuatyí ndo, ña cua quítsi yu quinyaa yu itsi. ⁶ Cuaha tsa ña vaha javahá ndo, maa tyin iyó tucu tsa vaha javahá ndo, tyin ña cuñi ndo nyehé ndo tsa caquiñi tsa javahá nyívi yihí cuenda ra Nicolás. Tacan tucu yuhu ña taahán iñi yu nyehé yu yacan. ⁷ Nyooho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu. Catyi ra tyehen: Tatun cuví jaha canaa ndo tsi nu ña vaha, cuhva yu tsa catsi ndo tsiti yutun tsa tsahá tsa coo nyito aña ndo. Tan yutun can nyaá tun nda nu iyó Nyoo nda gloria, tyin ndacan, maa ñi maa tsa vaha iyó."

Tsa tsahá cuenda ra Jesucristo tsi nyívi tsicá vehe ñuhu ñuu Esmirna

⁸ J'acuhun ndihi tutu tsi ra caahán tuhun yu tsihin nyívi tsicá vehe ñuhu ñuu Esmirna, tan catyi tsihin ra tyehen: "Tyehen catyi ra cuví tsa jihna ñi, ra cua coo nu cua ndihi quívi, ra tsa tsihí tan nandoto: ⁹ Yuhu nyehé yu tandihi tsa javahá ndo. Tan tsitó yu tyin nyehé xaan ndo tundoho. Tan tsitó yu tsa ndaahvi ndo, maa tyin tsihin tuhun Nyoo cusa ndo. Tan tsitó yu tsa caahán nyívi Israel ndavaha ñi siqui ndo. Tan ndi ñavin ñi Israel cuví ñi tsitsi aña ñi tyin cuenda nu ña vaha, nu nañi Satanás, cuví ñi. ¹⁰ Maa tyin ña ñayuhvi ndo tsa nyehé ndo tundoho. Tyin nu ña vaha cua tyihí nu tsi juhva ndo vehe caa, tyin cua nducu cuhva nu tsi ndo tatun cua jaña ndo tsi Nyoo. Tan utsi quívi cua nyehé ndo tundoho. Maa tyin cüanyicun vaha ndo tsi Nyoo nda cuanda cúu ndo. Tan yuhu cua cuhva yu ñayívi coo ndo tsihin Nyoo. ¹¹ Nyooho tsa iyó soho, tyaa soho ndo tsa caahán Tatyí Ii Nyoo tsihin

nyívi tsicá vehe ñuhu. Catyi ra tyehen: Tatun cuví jaha canaa ndo tsi nu ña vaha, ña cua cuhun ndo anyaya, quívi cúu nyívi tsa tsinu uvi tsaha."

Tsa tsahá cuenda ra Jesucristo tsi nyívi tsicá vehe ñuhu ñuu Pérgamo

¹² J'acuhun tucu tutu tsi ra caahán tuhun yu tsihin nyívi tsicá vehe ñuhu ñuu Pérgamo. Tan catyi tsihin ra tyehen: "Tyehen catyi ra tsa ndahá mityi tsa xaan nduvi tsiyo yuhu: ¹³ Yuhu nyehé yu tandihi tsa javahá ndo. Tan tsitó yu tyin vaha javahá ndo tyin ña jandihí ndo tsa tsinú iñi ndo tsi yu. Tan tacan ñi tsinú maa iñi ndo tsi yu vasu ndi maa iyó ndo nu iyó nu Satanás, nu ndacá ñaha nu, nu tsahñi nyívi tsi ra Antipas, ra tsa cuví tsandaa cuenda yu. ¹⁴ Maa tyin quituví juhva tsa javahá ndo nuu yu: Tyin ñuu Pérgamo nu yucú ndo ihya, yihí ra tsa ña cuñi jandihí cuhva tsa javahá ra Balaam, ra tsicoo tsanaha. Tyin ra Balaam natyuhú ra tsi ra Balac, na jacatsi ra cuñu quiti tsa jamañi nyívi nu tsitoho tsi nyívi Israel. Tan natyuhú ra tsi ra na catyi ra tsihin ñi tyin ñavin cuatyí cuví tun iin ñaha tan iyó ña tsihin iin rayi vasu ña tindahá ñi, tan tacan tucu ñi rayi. ¹⁵ Tan juven ñi iyó tucu juhva nyívi tsa ña cuñi nacoo tsa jacuahá ra yihí cuenda ra Nicolás. Tan yuhu ndasi cuñi yu nyehé yu tsa jacuahá ra can naha ra. ¹⁶ Yacan cuenda janumi ndo ñasama ndo cuhva iyó ndo. Tyin tatun ña nasama ndo cuhva iyó ndo, cua quítsi yu nu yucú ndo tsa numi ñi tan cua cañi tahan yu tsihin nyívi tsa javahá tacan tsihin mityi [tsa cuví tuhun] quitá yuhu yu. ¹⁷ Nyooho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu: Tatun cuví jaha canaa ndo tsi nu ña vaha, cua cuhva yu tsa catsi ndo paan tsa cuví maná tsa nyii xeehe. Tan cua cuhva yu iin yu cuitsin tsi ndo. Tan nu yuu can nyaá iin sivi tsa tsa yofi tsitó; intuhun ñi nyívi tsa cua naquihín yuu can cua coto sivi can."

Tsa tsahá cuenda ra Jesucristo tsi nyívi tsicá vehe ñuhu ñuu Tiatira

¹⁸ J'acuhun tucu tutu tsi ra caahán tuhun yu tsihin nyívi tsicá vehe ñuhu ñuu Tiatira. Tan catyi tsihin ra tyehen: "Tyehen catyi Sehe Nyoo, ra tsa caá tinuu tumaa caá nu cayú ñuhú. Tan tsaha ra caá tumaa caá caa bronce tsa xiñu xaan. ¹⁹ Yuhu nyehé yu tandihi tsa javahá ndo. Tan tsitó yu tsa cuñi xaan ndo tsi nyívi. Tan tsitó yu tyin tsinú xaan iñi ndo tsi yu, tan jatyinyeé ndo tsi nyívi, tan cunyeé xaan iñi ndo. Tan tsitó yu tyin cuaha ca tsa vaha javahá ndo vityin tan ñavin ca nu quítsi tsi. ²⁰ Maa tyin iyó juhva tsa cuñi yu cahan yu tsihin ndo: Nyehé yu tyin tsahá ndo ndatu tsi [ñaha tsa javahá

tumaa javahá] ña Jezabel [tsa tsicoo tahan tsanaha]. Ña ican jacuahá tsi ndo, catyí ña tyin Nyoo tsahá tuhun caahán ña, maa tyin jandaví ñaha ña tsi nyívi tsa jahá tyiñu tyiñu yu tsihin tuhun jacuahá ña. Tyin catyí ña tyin ñavin cuatyí cuví tsa coo iin rayíi tsihin ñaha o iin ñaha tsihin rayíi tun ña tindahá ñi. Tan jacuahá ña tyin cuví catsi ñi nyayu tsa jamañi nyívi tsi tsitoho. ²¹ Yuhu tsa ndatu xaan yu tsa nasama ña cuhva iyó ña, maa tyin ña cuñi ña javahá ña can. Ña cuñi ña jandihí ña tsa tsicá nuu ña tsihin rayíi. ²² Tan vityin cua quihin cuehe tsi ña tan ña cua cuví nduvita ña. Tan nyívi javahá tsa caquiñi tsihin ña, cua cuhva yu tundoho nyehe ñi tatun ña ndu uvi iñi ñi tsa javahá ñi. ²³ Tan cua cahñi yu sehe ña. Tacan tan cua coto tandihí nyívi tsicá vehe ñuhu, tyin yuhu tsitó yu tandihí tsa tsicá iñi ñi, tan tandihí tsa iyó añima ñi. Tan tsa intuhun intuhun nyooho cua cuhva yu tsa taahán tsi tsi ndo tsa cuenda tsa javahá ndo. ²⁴ Maa tyin tandihí ca nyooho tsa iyó ñuu Tiatira, nyooho tsa ña naquihin cuenda cuhva jacuahá ña, ndi ña javahá ndo tsa catyí nyívi tyin cuví tuhun xeehe cuenda nu ña vaha, ña tyaá yu inga tsa yíi siqui ndo. ²⁵ Maa tyin jañihi ndo javaha ndo tsa vaha nda cuenda quitsi nyico yu. ²⁶ Tan nyooho tsa jaha canaa tsi nu ña vaha, tan javahá ndo cuhva cuñi yu nda cuanda nu ndihí tuhun, cua cuhva yu ndatu tsi ndo tsa cundaca ñaha ndo tsi nyívi iyó nu ñuhu ñayívi ihya. ²⁷ Tumaa tsahá Jutu yu ndatu tsi yu tsa cundaca ñaha yu, tacan cua cundaca ñaha ndo. Tan tsihin iin tatun tsa cuví caa cua tatsi tuñi ndo tsi nyívi. Tan cua tahví cuatyí ndo tsi ñi tumaa tsa tahví cuatyí yo quisi. ²⁸ Tan cua cuhva yu tiñuu cahnu tsa caná tsa naa ca coo tsihin ndo. ²⁹ Nyooho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu.”

3

Tsa tsahá cuenda ra Jesucristo tsi nyívi tsicá vehe ñuhu ñuu Sardis

¹ Jacuhun tucu tutu tsi ra caahán tuhun yu tsihin nyívi tsicá vehe ñuhu ñuu Sardis. Tan catyí tsihin ra tyehen: “Tyehen catyí ra tsa iyó tsa utsa tatyí ii Nyoo tan tsa utsa tiñuu: Yuhu nyehé yu tandihí tsa javahá ndo. Tan vasu catyí nyívi tyin nyito ndo, maa tyin tsa cuenda yuhu, tsa tsihi ndo. ² Jaha cuenda vaha ndo tsa vaha tsa iyó luxu ca tsi ndo. Tyin coto ndihí ndihí tuhun yu nu yucú ndo. Nyehé yu tyin nuu Nyoo ña vaha maa tsa javahá ndo. ³ Ndúchuhun iñi ndo tsa vaha tsa cutuhvá ndo. Cüanyicun ndo can, tan nasama ndo cuhva iyó ndo. Tyin tun ña naquihin vaha ndo tsa vaha, sana iñi ndo tan cua quitsi yu nu yucú ndo, tumaa iin ñasuhu. ⁴ Maa tyin iyó juhva nyooho, nyívi

Sardis, tsa ña janyahyu jahma; ña javahá ndo tsa caquiñi cuví can. Tan juven nyooho cua cunditsi jahma cuitsin tsihin yu, tan cua caca ndo tsihin yu, tyin tacan taahán tsi tsi ndo. ⁵ Tan nyooho tsa cua cuví jaha canaa tsi nu ña vaha, cua cunditsi ndo jahma cuitsin tsihin yu. Tan ña cua janaa yu sivi ndo nu libru nu nycú sivi tandihí nyívi cua coo nyito tsihin Nyoo. Tan cua catyí yu tsihin Jutu yu, tan ángel ra tyin nacotó yu tsi ndo. ⁶ Nyooho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu.”

Tsa tsahá cuenda ra Jesucristo tsi nyívi tsicá vehe ñuhu ñuu Filadelfia

⁷ Jacuhun tucu tutu tsi ra caahán tuhun yu tsihin nyívi tsicá vehe ñuhu ñuu Filadelfia. Tan catyí tsihin ra tyehen: “Tyehen catyí ra ii, ra nditsa, ra yihí ndaha ndaha tucu ra rey David, ra tsa nuñá yuvehe tan ndi intuhun nyívi tan ña cuví nacasi. Tan tatun nacasi ra, ndi intuhun ñi tan ña cuví nuña ñi. Tyehen catyí ra: ⁸ Yuhu nyehé yu tandihí tsa javahá ndo. Tan nuña yu iin yuvehe tsa cuenda ndo tan yoñi cuví nacasi itsi, [tyin tsahá yu tsa cahan ndo tuhun Nyoo tsihin nyívi, tan yoñi cuví casi tsi ndo]. Tan iyó luxu tunyee iñi tsi ndo, tan tyaá yahvi ndo tsa caahán yu, tan ña catyí ndo tyin ña nacotó ndo tsi yu. ⁹ Tan nyívi yihí cuenda nu ña vaha, ñi vatya, ñi catyí tyin nyívi Israel cuví ñi, maa tyin ñavin nyívi Israel cuví ñi tsitsi añima ñi; cua jacuiñi tsiti yu tsi ñi nuu ndo, tyin tacan tan coto ñi tyin yuhu cuñi yu tsi ndo. ¹⁰ Tyin cunyeé xaan iñi ndo tumaa catyí yu tsihin ndo tyin cunyee iñi ndo. Tan yacan cuenda cua jaha cuenda yu tsi ndo tan nduve náa cua tahan ndo quívi cua jaquitsi yu tundoho cahnu siqui tandihí nyívi, tyin cua nducu cuhva yu tsi tandihí ñi iyó nu ñuhu ñayívi. ¹¹ Yatyí cua quitsi yu nu yucú ndo. Jaha cuenda vaha ndo cuhva iyó ndo, tyin coto quinyaa nyívi tsa vaha tsa cua ñihi ndo. ¹² Nyooho tsa cua cuví jaha canaa tsi nu ña vaha, cahnu tyiñu Nyoo cua jaha tyiñu ndo. Cua cuhva yu tsa cuví ndo tumaa ticoo tsa nyisó vehe ñuhu Nyoo yu. Tan ña cua quita maa ndo nu nyaá Nyoo. Tan cua tyaa yu sivi Nyoo yu tsi ndo, tan sivi ñuu Nyoo yu, ñuu Jerusalén tsa tsa cua queue nda andívi, tan juvin ñi cua tyaa tucu yu sivi tsa yu tsi ndo. ¹³ Nyooho tsa iyó soho, tyaa soho ndo tsa caahán Tatyí Ii Nyoo tsihin nyívi tsicá vehe ñuhu.”

Tsa tsahá cuenda ra Jesucristo tsi nyívi tsicá vehe ñuhu ñuu Laodicea

¹⁴ Jacuhun tucu tutu tsi ra caahán tuhun yu tsihin nyívi tsicá vehe ñuhu ñuu Laodicea. Tan catyí tsihin ra tyehen: “Tyehen catyí ra tsa nditsa, ra jandaá tsa caahán ra tyin javaha ra, tan tsihin ra javahá Nyoo tandihí

maa tsa iyó: ¹⁵ Yuhu nyehé yu tandihí tsa javahá ndo. Tan cuví ndo tumaa ndutya tsa ña vitsin tan ndi ña ihñi, tyin ndi ña tsinú vaha iñi ndo tsi yu, tan ndi ña jandihí tucu ndo tsa tsinú iñi ndo tsi yu. Vaha ca tsa tsinu vaha iñi ndo tuhun caahán yu, o jandihí cuii ndo tsa tsinú iñi ndo tsi yu. ¹⁶ Maa tyin tsa cuenda tsa cuví ndo tumaa ndutya vixin ñi ndi ña vitsin tan ndi ña ihñi ndo, cua ndutsan yu tsi ndo. ¹⁷ Tyin nyooho catyí ndo tyehen: 'Yuhu cuca xaan yu, vaha xaan iyó yu. Nduve náa cumañi tsi yu,' catyí ndo. ¿A ña jahá ndo cuenda tyin cuiihya cuñi ndo nyehé ndo tundoho tsitsi añima ndo, ndaahvi ndo, cuaa ndo, tan tandií ndo tsitsi añima ndo? ¹⁸ Yacan cuenda tsahá cuenda yu tsi ndo tyin tsi maa yu jata ndo xuhun cuaan tsa cayu tan naa tsa nyahyu tsi, tyin tacan tan nducuca ndo. Tan jata ndo jahma cuitsin nu nyaá yu tyin cunditsi ndo, tyin tacan tan ña cua nducahan ca nuu ndo tsa tandií ndo. Tan jata ndo numeri quihví tinuu ndo tyin tacan tan cuví nyehé ndo. ¹⁹ Yuhu tsahá cuenda yu tan tatsí tuñi yu tsi tandihí nyivi tsa cuñi xaan yu. Yacan cuenda catyí yu tsihin ndo: Jandu iin ndo iñi ndo tsihin tsa ñi iñi añima ndo tan javaha ndo tsa vaha. ²⁰ ¡Nyehe jihna! Yuhu nyaá yu yuvehe tan cañi ndaha yu. Nyivi tsa cua cuñi ndusu yu, tan nuña ñi yuvehe, cua quihvi yu tan cuxiñi yu tsihin ñi. Tan maa ñi cuxiñi ñi tsihin yu. ²¹ Cua cuhva yu tsa cunyecu ndo tsihin yu nu ndacá ñaha yu tatun cuví jaha canaa ndo tsi nu ña vaha. Tumaa tsa jahá canaa yu tsi nu, tan vityin nyaá yu tsihin Jutu yu nu ndacá ñaha ra. ²² Nyooho tsa iyó soho, tyaa soho ndo tsa caahán Tatyí Ii Nyoo tsihin nyivi tsicá vehe ñuhu" —catyí ra Jesucristo.

4

Tsa cuví nda gloria

¹ Tsa yahá can, tan nyehe yu ticoho iin yuvehe nda andivi. Tan tsiñi yu ndusu tsa caahán jihna tsihin yu, ndusu tumaa ndusu trompeta, tan catyí tsi tsihin yu:

—Ndáa nyehe tan janaha yu tsi un tsa cua cuví nu cuahán ca tsi —catyí ndusu can tsihin yu.

² Tan juvin ñi cuhva can tan tuví iñi yu tsa nyaá Tatyí Ii Nyoo tsihin yu. Tan nyehe yu nyaá iin tyayu nda gloria. Tan nu tyayu can nyaá iin ra nyaá. ³ Tan nuu ra tsa nyaá nu tyayu can, xiñu tsi tumaa xiñu yuu vaha tsa nañi jaspe tan tumaa xiñu yuu cornalina. Tan tanií cahnu yuhu tyayu can tsinú nduvi coo cuiya, tan xiñu ti tumaa xiñu yuu vaha tsa nañi esmeralda. ⁴ Tan nyehe yu nyecú oco cumi ca tyayu nu nyecú oco cumi ra tsahnu naha ra, tsinú nduvi tyayu can nu nyaá tyayu tsa nyaá mahñu can. Nditsi ra

naha jahma cuitsin. Tan yihí corona xuhun cuaan jiñi intuhun intuhun ra naha. ⁵ Tan nu nyaá tyayu tsa nyaá mahñu can, quitá tatsa tan ñihi cuvaa tan ñihi caahán savi. Tan cayú utsa ñuhu ityi nuu tyayu can, tan tsa utsa ñuhu can cuví tsa utsa tatyí Ii Nyoo. ⁶ Tan ityi nuu tyayu can iyó tucu iin tsa caá tumaa caá ndutya ñuhu, tan xiñu xaan can tumaa xiñu yutyi.

Nii canduvi yuhu tyayu can tan mahñu tyayu can, nyecú cumi tsa nyito. Tan cuaha xaan tinuu tsa nyito can iyó, ityi nuu can tan ityi tsata can. ⁷ Iin tsa nyito can caá can tumaa caá nducaha. Tan tsa tsinu uvi tumaa caá indiqui lee. Tan tsa tsinu uñi, tumaa caá nuu rayií caá nuu can. Tan tsa tsinu cumi tumaa caá tasu tsa cuahán ndavá. ⁸ Tan iyó iñu nditsin tsa intuhun intuhun tsa nyito can. Tan tanií cahnu tsi nyecú tinuu tsi, tahan ñi ityi tsata tan ityi tsitsi tsi. Tan ña jandihí tsi tsa caahán tsi tyehen nduvi tan ñihu:

Ra ii cuví un; ra ii cuví un; ra ii cuví un.

Jutu Mañi yu, Nyoo, iyó tandihí tunyee iñi tsi un.

Tacan ñi iyó maa un, juvin un cuví Nyoo nda tsanaha tan vityin, tan juvin un cua quitsi.

⁹ Tan jacahnú tsa cumi tsa nyito can tsi Nyoo, tan nacuhvá tsi naha tsi tyahvi nyoo tsi ra nyaá nu tyayu can, ra tsa iyó tandihí tyembu. Tan tahan ñi tsaha tsa javahá tsi naha tsi tacan, ¹⁰ tsa oco cumi ra tsahnu can naha ra tsicuiñi tsiti ra naha tan jacahnú ra naha tsi ra iyó tandihí tyembu. Tan tsaquin ra naha corona ra naha nu nyaá tyayu can. Tan catyí ra naha:

¹¹ Jutu Mañi ndi, Nyoo ndi cuví un.

Yooho taahán tsi jacahnú ndi.

Tan taahán tsi tsi un tsa cundaca ñaha un.

Tyin maa un javahá tandihí tsa iyó.

Tan tsa cuenda tsa iyó iñi maa un, tan tsicoo tandihí tsa iyó, catyí ra naha.

5

Nu nyehe ra Juan iin tutu tan Mbee Ticatyi Luhlu tsa cuví ra Jesucristo

¹ Tacan tan nyehe yu tyin ra tsa nyaá nu tyayu can ndahá ra iin tutu tsihin ndaha cuaha ra. Tan yihí tuvi tutu can tan nyaá letra ityi nuu tan ityi tsata can. Ndasí tsi tsihin utsa sellu. ² Tan nyehe yu iin ángel tsa nyee xaan. Tan caná tsaa ra tan catyí ra:

—¿Yóo taahán tsi nacani tutu ihya tan joco sellu ihya? —catyí ra.

³ Maa tyin ndi intuhun tsa iyó andivi tan nu ñuhu ñayivi, tan tsitsi ñuhu, tan cuví nacani tutu can. Nduve maa náa cuví nyehe nuu tsi. ⁴ Tan tsacú xaan yu, tsa tsitó yu tyin yoñi maa cuví nacani tutu can tan cuví

cahvi, tan cuví nyehe nuu tsi. ⁵ Tacan tan catyí iin ra tsahnu tsa nyaá can tsihin yu:

—Ña vācu ca un. Tyin ra cuví Ndicaha [o cuñí tsi catyí, ra ndacá ñaha], ra cuví tata ra Judá, tan tata ra rey David, ra ican jahā canaa tan juvin ra cua nacani tutu can tan jocon tsa utsa sellu tsa ndasí tutu can —catyí ra.

⁶ Tacan tan mahñu tyayu can tan mahñu tsa cumi tsa nyito can, tan mahñu ra tsahnu can naha ra, nyehe yu nyaá nyityi iin Mbee Ticatyí Luhlu. Tan caá ti tumaa caá iin mbee tsa tsahñí nyívi tan jamañí ñi. Tacan caá ti. Tan iyó utsa ndiquí ti tan nyecú utsa tinuu ti. Tan tinuu can cuví tsa utsa tatyí ii tsa jacuhun Nyoo tanií cahnú nu ñuhu ñayívi.

⁷ Tan ra Mbee Ticatyí Luhlu can tsahan ra nu nyaá ra nyaá nu tyayu can tan quihñ ra tutu tsa ndahá ra can nu ndaha cuaha ra. ⁸ Cuhva tsa quihñ ra tutu can, tandihí tsa cumi tsa nyito can tan tandihí tsa oco cumi ra tsahnu can tsicuiñí tsiiti ra naha nuu ra. Tan tsa intuhun intuhun ra tsahnu can naha ra ndahá ra naha arpa tsa iyó cuerda tumaa iyó cuerda nuu guitarra. Tan tsitū cutu tsitsi copa xuhun cuaan ndahá ra naha. Tan cutu can cuví tandihí tsa tsicán tahvi nyívi yihí cuenda Nyoo. ⁹ Tan tsitá ra naha iin yaa tsa, tan catyí ra naha:

Yooho cuví ra taahán tsi quihin tutu ihya tan jocon un tsa utsa sellu tsa ndasí itsi.

Tyin tsahñí nyívi tsi un. Tan tsihin niñi un jatā un tsi ndi tyin coo vaha ndi tsihin Nyoo.

Tan cuví ndi nyívi ñuu nyihi tan ñuu nahnu tsa iyó tanií cahnú nu ñuhu ñayívi, nyívi caahán siin siin yuhu, tan nyívi siin siin tata.

¹⁰ Tsaḥā un tsa cuví ndi rey tan jutu tsa cuenda Nyoo Jutu yo.

Tan cua cundaca ñaha ndi tsi nyívi iyó nu ñuhu ñayívi, catyí ra naha, tsitá ra naha.

¹¹ Yahā can tan tsiñí yu ndusu tan nyehe yu nyecú cuenda millón ángel tanií canduvi nu nyecú ra tsahnu can naha ra, nu nyecú tsa cumi tsa nyito, tan xiin tyayu can. ¹² Tan ñihi caahán ángel can naha ra, tan catyí ra naha:

Ra Mbee Ticatyí Luhlu tsa tsahñí nyívi, juvin ra taahán tsi cundaca ñaha, tan naquihin cuenda tsa cuca.

Tan juvin ñi ra taahán tsi naquihin cuenda tsa tsiñi tuñi tan tandihí tunyee iñi.

Na jacahnú yo tsi ra tan na jacahnú tandihí nyívi tan tandihí tsa iyó tsi ra, tyin cahnú xaan cuví ra, catyí ángel can naha ra.

¹³ Tan tsiñí tucu yu tsa caahán tandihí tsa javahā Nyoo; tandihí tsa iyó andivi, tan nu

ñuhu ñayívi, tan tsitsi ñuhu, tan tsitsi ndutya ñuhu; tan catyí tsi naha tsi:

Cahnú xaan cuví ra tsa nyaá nu tyayu.

Cahnú xaan cuví ra Mbee Ticatyí Luhlu.

Tan tunyee iñi tsa iyó tsi ra naha ña cua cundihi maa tsa iyó tsi.

Tan taahán tsi tsa jacahnú yo tan tyaa yahvi yo tsi ra naha tacan ñi maa —catyí tandihí tsa javahā Nyoo.

¹⁴ Tan catyí tsa cumi tsa nyito can:

—iNa cuví tsi tacan! —catyí tsi naha tsi.

Tan tsicuiñí tsiiti tsa oco cumi ra tsahnu can naha ra tan jacahnú ra naha tsi ra tsa ña cua cundihi maa.

6

Nu jocon ra Jesucristo tsa utsa sellu tsa ndasí tutu can

¹ Tacan tan nyehe yu nu jocon ra Mbee Ticatyí Luhlu can sellu tsa jihna ñi tsitsi tsa utsa sellu can. Tan tsiñí yu ndusu iin tsa nyito can tan ndusu tsi cuví tumaa nu caahán savi, tan catyí tsi:

—iÑaha, tan nyehe un! —catyí tsi tsihin yu.

² Tacan tan nanyehe yu tan nyehe yu iin cuayu cuisin, tan ra yosó tsi ti ndahá ra iin nduva. Tan ñihí ra iin corona yihí jiñi ra, yacan jahā canaa ra, tan ndi nyaá ca cua jaha canaa ca ra.

³ Tan tsa jocon ra Mbee Ticatyí Luhlu can tsa tsinu uvi sellu can, tsiñí yu tsa caahán inga tsa nyito can tan catyí tsi:

—iÑaha, tan nyehe un! —catyí tsi tsihin yu.

⁴ Tan quitā iin cuayu cuaaha. Tan ra tsa yosó tsi ti ñihí ra ndatu tsa quinyaa ra tsa taxin iyó nu ñuhu ñayívi, tyin tacan tan cahñi tahan nyívi tsi ñi. Tan ñihí ndihí ra iin mityi cahnú cundahá ra.

⁵ Tan tsa jocon ra Mbee Ticatyí Luhlu can tsa tsinu uñi sellu can, tsiñí yu tsa caahán inga tsa nyito can tan catyí tsi:

—iÑaha, tan nyehe un! —catyí tsi tsihin yu.

Tan nanyehe yu, tan nyehe yu iin cuayu tuun. Tan ra yosó tsi ti, ndahá ra iin ticatya.

⁶ Tan tsiñí yu caahán iin ndusu mahñu tsa cumi tsa nyito can, tan catyí tsi:

—Tumaa tyahví nyívi tsi iin musu tsa iin quívi, tacan yahvi tsa intuhun ñi kilu nuñi. Tacan tucu ñi tsa uñi kilu cebada. Tan ña jatívi ndo acetey tan vinu —catyí ndusu can.

⁷ Tan tsa jocon ra Mbee Ticatyí Luhlu can tsa tsinu cumi sellu can, tsiñí yu tsa caahán intuhun ca tsa nyito can, tan catyí tsi:

—iÑaha, tan nyehe un! —catyí tsi tsihin yu.

⁸ Tan nanyehe yu, tan nyehe yu iin cuayu cuaan. Tan ra yosó tsi ti nañi ra Tuhun Tsihi. Tan tsata ra can vatsí inga ra tsa

nañi Nu Yucú Añima Ndiyi. Tan ñihí ra naha tunyee iñi tsa cahñi ra naha tsa cuaha nyivi iyó nu ñuhu ñayivi. Tyin tsitsi tsa sava nyivi iyó nu ñuhu ñayivi, cua cahñi ra naha sava ñi. Tan cua cahñi ra naha tsi ñi tsihin tsa jacoo ra naha cuatyí, tan tsihin tamaa, tan tsihin cuehe, tan tsihin quití xaan iyó nu ñuhu ñayivi.

⁹ Tan tsa joçon ra Mbee Ticatyí Luhlu can tsa tsinu uhun sellu can, nyehe yu xuu altar. Tan ican yucú añima nyivi tsa tsihí tsa cuenda tsa jacoto ñi tuhun Nyoo. ¹⁰ Tan caná tsa ñi tan catyí ñi tyehen:

—Jutu Mañi ndi, ra ii cuví un, tan jandaá un tandihí tsa caahán un tyin javaha un. ¿Ama cua tatsi tuñi un tsi nyivi tsa tsañhí tsi ndi tsa cuenda un? —catyí ñi.

¹¹ Tacan tan ñihí intuhun intuhun ñi jahma cuitsin tsa cunditsi ñi. Tan catyí ra tsihin ñi na quitatu ñi tan cuatu ñi juhva ca quivi, nda cuanda cahñi nyivi tsi tandihí ca ñi tsa jahá tyiñu tyiñu ra Cristo, ñi tsa taahán tsi cúu tumaa tsihí tucu maa ñi.

¹² Tan tsa joçon ra Mbee Ticatyí Luhlu can tsa tsinu iñu sellu can, nyehe yu tyin ñihí xaan taán. Tan ndutuun ñicanyii tumaa tuun jahma nyivi iyó tucuihíya iñi. Tan yoo nducuaaha tsi tumaa cuaaha ñiñi. ¹³ Tan tiñuu cucoyo tsi nu ñuhu ñayivi tumaa cucoyo tsiti yutya yutun tatun ñihí yahá tatyí. ¹⁴ Tan andivi tsiquihí tsi tumaa tyihí tuví yo iin ndaha tutu. Tan tandihí yucu tan ñuhu nyihí tsa cayucú mahñu ndutya ñuhu nasama nu cayucú tsi. ¹⁵ Tan tandihí rey tsa iyó nu ñuhu ñayivi tsihin ra nahnu naha ra, tan ra cuca naha ra, tan ra cuví ityí nuu tsihin andaru naha ra, tan ra iyó xaan tunyee iñi tsi naha ra, tan tandihí nyivi tsa cuví musu, tan ñi tsa ñavin musu cuví, quihví xeehe ñi tsitsi yavi yuu tan tyañu cava tsa iyó yucu nahnu. ¹⁶ Tan catyí ñi tsihin yucu can tan tsihin yuu can:

—Cucoyo ndo tsata ndi, na ña nyehe ra nyaá nu tyayu can tsi ndi tan coto tatsi tuñi ra Mbee Ticatyí Luhlu can tsi ndi.

¹⁷ Tyin tsa tsaá quivi cahnu tsa cua tatsi tuñi ra tsi ndi, tan yoñi cunyehe iñi can —catyí ñi.

7

Nu ñihí nyivi Israel tuñi cunyaq nutyaan ñi

¹ Tsa yaha can tan nyehe yu nyecú cumi ángel tsa ndihí tsa cumi tutun ñuhu ñayivi ityi nu tuhvá tatyí quee tyin tacan tan ña yaha tatyí nu ñuhu ñayivi tan nu ndutya ñuhu tan nu yutun. ² Tan nyehe tucu yu quee inga ángel, ityi nu caná ñicanyii, tan ndahá ra tuñi Nyoo nyito. Tan caná tsa ra tsi tsa cumi ángel tsa ñihí ndatu tsa jatívi nu ñuhu ñayivi

tan nu ndutya ñuhu. Tan catyí ra tsihin ra naha:

³ —Ña jatívi naha ndo nu ñuhu ñayivi, ndi nu ndutya ñuhu, tan ndi nu yutun tsa ndi cumañi ca janaha ndi yoo nyivi cuví musu Nyoo, tyin cua tyaa ndi tuñi nutyaan intuhun intuhun ñi —catyí ángel can.

⁴ Tan catyí ra tsiñi yu tyin cientu uvi xico cumi mil cuví nyivi Israel tsa tsinyaa tuñi can. ⁵ Utsi uvi mil nyivi tata ra Judá tsinyaa tuñi, tan utsi uvi mil nyivi tata ra Rubén, tan utsi uvi mil nyivi tata ra Gad, ⁶ tan utsi uvi mil nyivi tata ra Aser, tan utsi uvi mil nyivi tata ra Neftalí, tan utsi uvi mil nyivi tata ra Manasés, ⁷ tan utsi uvi mil nyivi tata ra Simeón, tan utsi uvi mil nyivi tata ra Leví, tan utsi uvi mil nyivi tata ra Isacar, ⁸ tan utsi uvi mil nyivi tata ra Zabulón, tan utsi uvi mil nyivi tata ra José, tan utsi uvi mil nyivi tata ra Benjamín. Tandihí ñi can tan tsinyaa tuñi Nyoo tsi ñi.

Nu nyehe ra Juan tsi nyivi nditsí jahma cuitsin

⁹ Tsa yaha can tan nyehe yu yucú cuaha nyivi. Tan yoñi maa cuví nacahvi tsi ñi, tyin cuaha xaan ñi. Yucú nyivi quee tandihí ñuu nyihí tan ñuu nahnu tsa iyó tanñi cahnu nu ñuhu ñayivi. Tan yucú nyivi caahán siin siin yuhu. Tan yucú nyivi siin siin tata. Tan nyecú ñi nuu ra nyaá nu tyayu, tan nuu ra Mbee Ticatyí Luhlu. Ndisí ñi jahma cuitsin. Tan ndahá ñi ndaha ndicaha. ¹⁰ Tan tandihí ñi caná tsa ñi tan catyí ñi:

Nyoo Jutu yo, ra nyaá nu tyayu, tan ra Mbee Ticatyí Luhlu,

juvin ra naha jacacú tsi yo —catyí ñi caná tsa ñi.

¹¹ Tan tandihí ángel naha ra nyecú ra naha tanñi canduvi nu nyaá tyayu, nu nyecú ra tsahnu naha ra, nu nyecú tsa cumi tsa nyito. Tan tsiicuiñi tsi tsi ra naha tan tsaquín ra naha nuu ra naha nda nu ñuhu ityi nuu ra nyaá nu tyayu can. Tan jacahnú ra naha tsi ra tyin juvin ra cuví Nyoo. ¹² Tan catyí ra naha:

Tyehen taahán tsi jacahnu ndi tsi un, Jutu Mañi ndi tyin iyó xaan tsa tsiñi tuñi tsi un:

Nacuhvá xaan ndi tyahvi nyoo tsi un.

Tan jacahnú ndi tsi un tyin iyó xaan tunyee iñi tsi un, Nyoo Jutu ndi.

Tan na cuví tsi tacan tandihí tyembu, catyí ra naha.

¹³ Tacan tan tsiçá tuhun iin ra tsahnu can tsi yu tan catyí ra:

—¿Yoo nyivi cuví ñi nditsí jahma cuitsin ihya? ¿Tan ndáa ityi quee ñi? —catyí ra.

¹⁴ Tan catyí yu tsihin ra:

—Maa un tsitó, tata.

Tan catyí ra tsihin yu:

—Nyivi ihya cuví ñi nyehe tundoho cahnu. Maa tyin nacatyá ñi jahma ñi tsihin

niñi ra Mbee Ticatyí Luhlu tan nducuitsjin tsi. ¹⁵ Yacan cuenda nyecú ñi ityi nuu tyayu nu nyaá Nyoo. Tan jahá tyiñu ñi tyiñu ra nduvi tan ñiñu tsitsi vehe ñuhu ra. Tan ra tsa nyaá nu tyayu can jahá cuenda ra tsi ñi tsihin tsa nyaá ra tsihin ñi. ¹⁶ Tan ña cua cusoco ca ñi, ndi ña cua na ityi ca iñi ñi. Ña cua cahmi ca ñicanyii tsi ñi. Tan ndi ña tuñu ca cuñi ñi tsihin tsa ihñi. ¹⁷ Tyin ra Mbee Ticatyí Luhlu tsa nyaá mahñu tyayu can cua jaha cuenda ra tsi ñi, tumaa jahá cuenda yo mbee. Tan cua cundaca ra tsi ñi nu coho ñi ndutya tsa tsahá tsa coo cuii ñi. Tan Nyoo cua nacuhva ra tandihí ndutya nuu ñi —catyí ra tsihin yu.

8

Nu jocoñ ra Jesucristo tsa tsinu utsa sellu tan nu quitá iin ángel tsihin iin cuu xuhun cuaan

¹ Tan tsa jocoñ ra Mbee Ticatyí Luhlu tsa tsinu utsa sellu tsa ndasí tutu can, ndutaxin ndandivi tumaa sava hora.

² Yahá can tan nyehe yu nyecú utsa ángel ityi nuu Nyoo. Tan intuhun intuhun ra naha quihñ cuenda ra naha iin trompeta. ³ Yahá can tan tsaá inga ángel tsa ndahá iin cuu xuhun cuaan. Tan tsinyaá nyityi ra ityi nuu altar can. Tan quihñ cuenda ra cuaha xaan cutu, tyin cuhva cuenda ra itsi iin caa ñi tsihin tsa tsicán tahvi nyivi tsi Nyoo nuu altar xuhun cuaan tsa nyaá ityi nuu tyayu Nyoo. ⁴ Tan quitá yuhma cutu tan yuhma tsa tsicán tahvi nyivi tsi Nyoo ndaha ra, tan cuahán yuhma can nu nyaá Nyoo. ⁵ Tacan tan ángel can quihñ ra cuu can tan jacutú ra can tsihin tuun ñuhu tsa quitá nu altar can. Tan tyosoñ ra can nu ñuhu ñayivi. Tan quitsahá caahán savi, tan iyo cuví. Tan ñihi tatsa, tan quitsahá taán.

Nu tiví ángel naha ra trompeta

⁶ Tacan tan tsa utsa ángel tsa ndahá trompeta can, ndatú ra naha tsa tiví ra naha can.

⁷ Tsa tiví iin ángel can trompeta tsa ndahá ra, quitsahá cuñ savi tan cucoyó yuu savi, ñihi cayú ñuhu tan sacá nuu niñi tsihin can. Tan tsa yatyin cayú sava ñuhu ñayivi, tan tsa yatyin tucu sava cuhva nyaá cuhu tsitsa tan tandihí cuhva nyaá cuhu cuii.

⁸ Tan tsa tiví tsa tsinu uvi ángel can trompeta tsa ndahá ra, nyehe yu cayú tumaa iin yucu cahnu. Tan nacavá can mahñu ndutya ñuhu. Tan tsa yatyin sava ndutya ñuhu can nanduví tsi niñi. ⁹ Tan tsa tandihí quití iyó tsitsi ndutya ñuhu can tsihí tsa yatyin sava ti naha ti. Tan tahví cuatyí tucu tsa yatyin sava yutun ndoo cuaha tsa iyó tsitsi ndutya ñuhu can.

¹⁰ Tan tsa tiví tsa tsinu uñi ángel can trompeta tsa ndahá ra, nacavá iin tiñuu

cahnu. Cayú tsi tumaa cayú yiti. Tan nacavá tsi siqui tsa yatyin ña sava yutya nahnu tan tsa yatyin ña sava nu ndohyo. ¹¹ Tan sivi tiñuu cahnu can cuví Ajenjo. Tan tsa yatyin ña sava ndutya tsa iyó, ndu uvá tsi tumaa tsa uva xaan ajenjo can. Tan cuaha xaan nyivi tsihí tyin tsihí ñi ndutya tsa ndu uvá can.

¹² Tan tsa tiví tsa tsinu cumi ángel can trompeta tsa ndahá ra, ndu naq tsa yatyin ña sava ñicanyii, tan tsa yatyin ña sava yoo, tan tsa yatyin ña sava tiñuu ndunaa tsi naha tsi. Tan tsa cuenda tsa ndunaa juhva ñicanyii, ndunaa nu ñuhu ñayivi cumi hora tsa iin iin nduvi. Tan tsa cuenda tsa tiví juhva yoo tan tiñuu, ña ndunditsin maa nu ñuhu ñayivi cumi hora tsa iin iin tsacuaa.

¹³ Yahá can tan nyehe yu iin ángel ndavá ra mahñu andivi tan tsiñi yu tsa caahán ra. Tsihin tsa ñihi ndusu ra catyí ra:

—ñdahvi nyivi iyó nu ñuhu ñayivi tsa cua tiví tsa uñi ca ra ángel naha ra trompeta tsa ndaha ra naha! —catyí ángel can.

9

¹ Tacan tan tsa tiví tsa tsinu uhun ángel can trompeta tsa ndahá ra, nyehe yu quee iin tiñuu ityi andivi. Tan nacavá can nu ñuhu ñayivi. Tan quihñ cuenda can ndaha tucu tsa cuenda yavi cunu tsa nduve maa nuu tsindihi. ² Tacan tan nuñá can yuhu yavi can. Tan quitá cuaha yuhma tumaa quitá yuhma tsitsi iin ono cahnu. Tan tyasé yuhma can nuu ñicanyii tan nasacá nuu can tsihin tatyí. Tan ndunaa nu ñuhu ñayivi. ³ Tan tsitsi yuhma can quitá tica xama. Tan ndava ti naha ti nu ñuhu ñayivi. Tan ñihí ti naha ti ndatu tsa tyaa ti naha ti tsi nyivi tumaa tyaa tujuhma tsa iyó nu ñuhu ñayivi. ⁴ Quihñ ti naha ti tuhun tyin na ña jativi ti naha ti cuhu tsa iyó nu ñuhu ñayivi, ndi cuhu cuii, tan ndi yutun. Maa tyin na tyaa ti naha ti tsi nyivi tsa nduve tuñi Nyoo nyaá nutyaan. ⁵ Ña ñihí ndatu ti naha ti tsa cahñi ti naha ti tsi nyivi, tyin tyaa ñi maa ti naha ti tsi ñi. Tan quihí xico ti tsi ñi uhun yoo. Tan xico uhvi can uhvi tsi tumaa uhvi nyivi tsa tyaa tujuhma. ⁶ Quivi can nyivi cua nanducu ñi tuhun tsihi. Maa tyin ña cua nañihi ñi can. Tan vasu ndi maa cuñi ñi cúu ñi, tuhun tsihi cua cunu tsi nuu ñi tyin ña cua cúu ñi.

⁷ Tica xama can caá ti tumaa caá cuayu tsa tsicá cuatyí. Tan jiñi ti naha ti yihí tsa caá tumaa caá corona xuhun cuaan. Tan nuu ti naha ti caá tumaa caá nuu nyivi. ⁸ Tan ixí jiñi ti naha ti caá tumaa caá ixí jiñi ñaha. Tan nuhu ti naha ti caá can tumaa caá nuu ndicaha. ⁹ Tan soo ti naha ti caá tumaa caá caa. Tan ñihi xaan cundatsán nditsin ti naha ti, tumaa cundatsán carreta cuayu cuaha tsa tsinú nu iyó cuatyí. ¹⁰ Tan juhma ti naha ti caá tumaa caá juhma tujuhma, tyin yihí iñu

can. Tan tsihin can cua tyaa ti naha ti tsi nyivi tsitsi tsa uhun yoo. ¹¹ Tan iyó iin nu cuví ityi nuu tsihin tica xama can naha ti. Tan nu ican cuví tatyí tsa ndacá ñaha yavi cahnu tan cunu tsa nduve maa nu tsindihi. Tan tsa tsihin yuhu hebreo nañi nu Abadón. Tan tsihin yuhu griego nañi nu Apolión, tan cuñí tsi catyí: Nu Janaá.

¹² Tsa yahá iin tundoho, tan cumañi uvi taahan ca.

¹³ Tan tsa tiví tsa tsinu iñu ángel can trompeta tsa ndahá ra, tsiñi yu iin ndusu tsa quitá tsitsi tsa cumi ndiquí tsa nycú tutun altan xuhun cuaan tsa nyaá ityi nuu Nyoo.

¹⁴ Tan ndusu can caahán tsi tsihin tsa tsinu iñu ángel tsa ndahá trompeta can, tan catyí tsi:

—Ndatsi tsi tsa cumi ángel tsa nuuhñi yatyin yuhu yutya cahnu Eufrates —catyí ndusu can.

¹⁵ Tacan tan ndatsi ra tsi tsa cumi ángel can, tyin tsa ndatu xaan ra naha ora can, quivi can, yoo can, cuiya can, tyin cahñi ra naha tsi tsa yatyin sava nyivi iyó nu ñuhu ñayivi. ¹⁶ Tan tsiñi yu tyin uvi cientu millón andarú tsa yosó cuayu.

¹⁷ Tacan nyehe yu cuayu jahá Nyoo. Tan ra yosó cuayu can naha ra nyaá caa cuaaha, azu tan cuaan yiqui nyica ra naha. Tan jiñi cuayu ra naha caá tumaa caá jiñi ndicaha. Tan tsitsi yuhu ti naha ti quitá ñuhu tan yuhma tan azufre. ¹⁸ Tan tsa yatyin sava nyivi iyó nu ñuhu ñayivi tsiñi tsihin tsa uñi tsa quitá yuhu cuayu can naha ti: ñuhu tan yuhma tan azufre. ¹⁹ Tyin iyó tunyee iñi tsi ti naha ti tsitsi yuhu ti naha ti tan nu juhma ti naha ti. Tyin juhma ti naha ti caá tumaa caá coo tan nu juhma ti naha ti caá tumaa caá jiñi coo. Tan tsihin yacan jañicueehé ti naha ti tsi nyivi.

²⁰ Maa tyin tandihi ca nyivi tsa ndoo, ñi tsa ña tsiñi tsihin tundoho can, ña jandihí ñi tsa javahá ñi tsa ña vaha. Ndi tsa jacahnú ñi tatyí ña vaha tan ndi tsi tsitoho tsa tsinu tsihin xuhun cuaan, xuhun cuitsin, bronce, yuu, tan yutun: tsitoho tsa ña cuví nyehe, ndi ña tsiñi, ndi ña cuví caca. ²¹ Ndi ña jandihí ñi tsa tsahñi ñi nyivi, tan javahá ñi tsa tasi. Tan ñiñaha ña jandihí ñi tsa tsicá nuu ñi tsihin rayi, tan rayi ña jandihí ra naha tsa tsicá nuu ra naha tsihin ñaha vasu ndi maa ña tindahá ñi. Tan ña jandihí ñi tsa suhú ñi.

10

Ángel tsa ndahá libru luhlu

¹ Tacan tan nyehe yu inga ángel tsa iyó xaan tunyee iñi. Quee ra ityi andivi tan vatsi nuú ra tsitsi vico. Tan nyaá coo cuiya jiñi ra. Tan nuu ra xiñu xaan can tumaa xiñu ñicanyii. Tan tsaha ra caá tumaa nyaá nyityi ñuhu tsa cayú. ² Tan ndahá ra iin libru luhlu

nuñá nuu tsi. Tan tsañi tsaha cuaha ra nu ndutya ñuhu tan tsaha satyin ra nu ñuhu ñayivi. ³ Tacan tan caná tsaa ra, tumaa taná ndicaha tsa cuxaán ti. Tan cuhva tsa caná tsaa ra, tsiñi yu utsa ndusu tumaa cuví nu caahán savi, tan intuhun intuhun tsi caahán tsihin ndusu maa tsi. ⁴ Tsa yahá tsa tsiñi yu tsa utsa ndusu can, tan cua tyaa yu can nu tutu. Maa tyin tsiñi yu caahán iin ndusu nda andivi, tan catyí tsi tsihin yu:

—Naquihin xeehe tuhun tsa cahán tsa utsa ndusu can. Tan ña tyaa un can nu tutu —catyí ndusu can.

⁵ Tacan tan ángel tsa nyehe yu tsa tsañi nu ndutya ñuhu tan nu ñuhu ñayivi, jandahá ra ndaha cuaha ra ityi andivi. ⁶ Tan ángel can catyí ra:

—Na nyehe maa Nyoo ra ña cua cundihi maa, ra tsa javahá andivi tan ñuhu ñayivi tan ndutya ñuhu tan tandihi tsa iyó nuu tsi tyin nduve ca tsa cucuee. ⁷ Tyin cuhva tsa cua quitsaha tiví tsa tsinu utsa ángel can trompeta tsa ndahá ra, cuhva can cua cundaa tuhun xeehe tsa catyí Nyoo tyin javaha ra, tumaa cahán ra tsihin ra jahá tyiñu tyiñu ra, ra cuví ndusu yuhu ra —catyí ángel can.

⁸ Tan ndusu tsa quitá andivi, tsa cahán jihna tsihin yu, juvin tsi caahán tsihin yu tyehen:

—Cuaahan cuaquihin libru luhlu tsa nandicá tsa ndahá ra ángel tsa tsañi nu ndutya ñuhu tan nu ñuhu ñayivi —catyí tsi.

⁹ Tacan tan tsahán yu nu nyaá ángel can tan tsicán yu libru luhlu can tsi ra, tan catyí ra tsihin yu:

—Juhun, çatsi itsi. Vixi xaan tsi cua cuví tsitsi yuhu un, tumaa vixi ndutya ñuñu. Maa tyin cua ndu uva tsi tsitsi un —catyí ra tsihin yu.

¹⁰ Tacan tan quihin yu libru luhlu tsa ndahá ra, tsatsi yu. Tsa ndi nyii tsi tsitsi yuhu yu, vixi xaan tsi tumaa vixi ndutya ñuñu. Maa tyin tsa cocó yu itsi, ndu uvá tsi tsitsi yu. ¹¹ Tacan tan catyí ra naha tsihin yu:

—Cuñí tsi tsa cahan nyico un inga tsaha tuhun tsa caahán Nyoo siqui nyivi tsa iyó ñuu nyihi tan ñuu nahnu, tan nyivi caahán siin siin yuhu, tan siqui ra cuví rey naha ra —catyí ra tsihin yu.

11

Nduvi ra tsa cuví tsandaa naha ra

¹ Tacan tan tsahá ra naha iin ndoo tsi yu. Caá tsi tumaa caá yutun tsa tuhvá yo tyihí cuhva tsihin. Tan catyí ra naha tsihin yu:

—Nduvita tan tyihí cuhva un vehe ñuhu Nyoo tan altar ra, tan çahvi najava taahan nyivi jacahnú tsi ra tsitsi vehe can. ² Maa tyin ña tyihí cuhva un nuquehe vehe ñuhu can, tyin tsa cuenda nyivi inga ñuu cuví can. Cua vaca tsaha ñi nu ñuu ii tsitsi tsa uñi

cuiya sasava. ³ Tan yuhu cua jacuhun yu uvi ra tsa cua cuvi tsandaa tan cahan tuhun yu tsitsi tsa mil uvi cientu uñi xico quivi. Tan cunditsi ra naha jahma tucuihya iñi.

⁴ Tan tsa nduvi tsandaa can cuvi uvi yutun olivo tan uvi candileru tsa nyecú nu Jutu Mañi yo, ra ndacá ñaha nu ñuhu ñayivi. ⁵ Tan nyivi tsa cua cuñi jañicueehe tsi ra cuvi tsandaa can naha ra, cua naa cuvi nuu ñi. Tyin cua quita ñuhú yuhu ra naha, tan tshin can cua cahmi ra naha tsi tandihi nyivi xaan iñi tsi ra naha. ⁶ Tan iyó ndatu tsi ra naha tsa casi ra naha nu cuun savi tandihi quivi tsa cua kuhva cuenda ra naha tuhun caahán Nyoo tshin ra naha tsi nyivi. Tan iyó tucu ndatu tsi ra naha tsa jananduvi ra naha ñiñi ndutya. Tan iyó tucu ndatu tsi ra naha tsa janyeha ra naha tundoho tsi nyivi iyó nu ñuhu ñayivi tshin tandihi nuu cuehe. Tan cuvi javaha ra naha yacan najava tsaha cuñi maa ra naha. ⁷ Maa tyin tsa cua ndihi kuhva cuenda ra naha tuhun Nyoo tsi nyivi, cua quita quiti xaan yavi cunu can, tan cua cañi tahan ti tshin tsa nduvi taahan ra cuvi tsandaa can. Tan cua jaha canaa ti tsi ra naha. Tan cua cahñi ti tsi ra naha. ⁸ Tan cua cava cuñi ñuhu ra naha tsitsi calle ñuu nu tsahñi nyivi tsi Jutu Mañi yo tan tyaa ñi tsi ra nuu cruu. Tan cua cuvi ñuu can tumaa ñuu Sodoma tan ñuhu Egipto, [tsa cuenda tsa ña vaha tsa cua javaha nyivi ñuu can]. ⁹ Tan tsitsi tsa uñi quivi sasava, cua nyehe tandihi nyivi cuñi ñuhu ra naha; nyivi iyó tandihi ñuu nyihi, nyivi tandihi ñi tata, tan ñi caahán siin siin yuhu, tan ñi iyó ñuu can, cua nyehe ñi cuñi ñuhu ra naha. Tan ña cua kuhva ñi tsa quihí xeehe cuñi ñuhu ra naha tsitsi ñuhu. ¹⁰ Tan sii xaan cua cuñi ñi tsa cuenda tsa cua cúu ra can naha ra. Tan nda cuanda cua jacuhun ñi regalo tsi tahan ñi tsa cuenda tsa sii cuñi ñi tsa cua cúu nduvi taahan rayi tsa cahan tuhun Nyoo tshin ñi. Tyin cuñi maa ñi tyin tsahá xaan ra naha tundoho tsi ñi. ¹¹ Maa tyin tsa cua yaha tsa uñi quivi sasava, Nyoo cua janandoto ra tsi ra naha, tan nduvita nyico ra naha inga tsaha. Tan tandihi nyivi tsa cua nyehe tyin cua nandoto ra naha, cua nayuhvi xaan ñi. ¹² Tan tsa yahá tsa tsihí ra naha tan nyehe yu nandoto ra naha, tan catyí iin ndusu ityi andivi tshin ra naha:

—Ñaha ndo nyehe

Tacan tan nandaá ra naha ityi andivi tsitsi vico. Tan nyehe nyivi xaan iñi tsi ra naha nu nandaá ra naha. ¹³ Tan ñihi xaan tañ cuhva can. Tan tsitsi ñuu can tanñi cuaha xaan vehe. Tsitsi tsa utsi vehe, tanñi intuhun intuhun tsi. Tan tsihí utsa mil nyivi jahá tsa tañ can. Tan nyivi tsa ña tsihí, jacahnú ñi tsi Nyoo, ra nyaá andivi, tsa cuenda tsa yuhví ñi.

¹⁴ Yacan cuvi tundoho tsa tsinu uvi tsa nyehe nyivi, maa tyin tsa vatsí tsa tsinu uñi.

Nu tiví tsa tsinu utsa ángel trompeta tsa ndahá ra

¹⁵ Tan tsa tiví tsa tsinu utsa ángel can trompeta tsa ndahá ra, tsiñi yu ndusu ñihi xaan ityi andivi, tan catyí tsi:

Tandihí nu ndacá ñaha rey nu ñuhu ñayivi, tsa yahá nanduví tsi tsa tsii Nyoo Jutu yo tan ra Cristo.

Tan ña cua ndihi maa tsa ndacá ñaha ra naha, catyí ndusu can.

¹⁶ Tacan tan tsa oco cumi ra tsahnu tsa nyecú nu nyaá Nyoo, tsiñi tsiñi tsiñi ra naha tan tsaquin ra naha nuu ra naha nda nu ñuhu. Tan jacahnú ra naha tsi Nyoo. ¹⁷ Tan catyí ra naha:

Jutu Mañi ndi Nyoo ndi. Ra iyó tandihi tunyee iñi tsi.

Tacan ñi iyó maa un. Juvín un cuvi Nyoo nda tsanaha tan vityin, tan juvín un cua quitsi.

Tsahá xaan ndi tyahvi nyoo tsi un, Tyin tsa naquihín cuenda un tunyee iñi un. Tan tsa quitsahá ndacá ñaha un.

¹⁸ Tan vasu ndi maa cuxaán nyivi iyó tandihi ñuu nahnu.

Maa tyin tsa tsaá quivi tatsi tuñi un tsi ñi.

Tan tsa tsaá quivi tsa jacutuñi un tsi ndiyi.

Tan kuhva un tsa vaha tsa taahán tsi tsi nyivi jahá tyiñu tyiñu un, ñi tsahá cuenda tuhun caahán un,

ñi tsa nacuhvá cuenda añima ñi tsi un, tan jacahnú ñi sivi un.

Vasu ndi maa cahnú cuvi ñi o ndaahví ñi.

Tan tsa tsaá kuhva tsa janaa un tsi nyivi jativí tsi nyivi iyó nu ñuhu ñayivi, catyí ra naha.

¹⁹ Tacan tan nuñá yuvehe ñuhu Nyoo tsa iyó gloria, tan tsitsi vehe ñuhu can quituví tsatun cuenda tsa ndoo ra tyiñu tshin yo. Tan quihví tatsa. Tan ñihí cuvaá tan caahán savi. Tan tañ. Tan ñihi xaan cucoyo yuu savi.

12

Nu nducú coo xaan tsa iyó ndaha tsi ñaha

¹ Tacan tan quituví tsa iyo cahnú ityi andivi. Quitá iin ñaha tan ndítsi ña ñicanyii tumaa ndítsi yo jahma. Tan tsañi ña nu yoo. Tan yihí iin corona tsa utsi uvi tiñuu jiñi ña. ² Tan ñaha ihya ñuhú sehe ña. Tan tsacú xaan ña tshin tsa cuuhví tsitsi ña, tyin nyehe xaan ña tundoho. ³ Tacan tan quitá inga tsa iyo ityi andivi. Tan nyehe yu iin coo xaan tsa iyó ndaha. Cuaaha ti tan cahnú ti. Tan iyó utsa jiñi ti, tan utsi ndiqui ti. Tan yihí corona intuhun intuhun jiñi ti. ⁴ Tan tshin juhma ti jacoyo ti tsa yatyn sava tiñuu tsa iyó andivi nu ñuhu ñayivi. Tan coo can tsiñiñi ti nuu ñaha tsa cua cacu sehe, tyin

cuñi ti catsi ti sehe ña náa cuhva cacu ñi maa tsi. ⁵ Tan ñaha can jacacú ña iin rayii. Tan juvin ra cua cundaca ñaha tandihi nyivi iyó nu ñuhu ñayivi. Ñihi xaan cua cundaca ñaha ra tumaa tsa tshin iin tatun tsa cuví caa. Tan tsa yahá cacú ra, naquihin Nyoo tsi ra cuahán ra nu nyaá ra nu tyayu ra. ⁶ Tan cuahán ñaha can tsinú xeehe ña ñuhu ityi, nu janduvahá Nyoo coo ña, tyin ican cua cuhva ra tsa catsi ña tsitsi tsa mil uvi cientu uñi xico quivi.

⁷ Yahá can tan tsicoo cuatyí nda andivi, cañi tahan ángel Miguel tan tandihi ángel tsa cutahán tshin ra tshin coo xaan can. Tan coo can tshin tandihi tatyí ña vaha tsa cutahán tshin ti, cañi tahan ti tshin ángel Miguel. ⁸ Maa tyin ña cuví jahá canaa ti tsa cañi tahan ti. Tan ña ñihí ca ti nu ndoo ti nda andivi tshin tatyí ña vaha tsa cutahán tshin ti. ⁹ Tacan tan tavá Nyoo tsi nu coo xaan can, nu Coo Tsaahnu, tan juvin ñi nu cuví nu ña vaha tan Satanás, juvin nu jandaví ñaha tsi tandihi nyivi iyó nu ñuhu ñayivi. Maa nu tan tatyí ña vaha tsa cutahán tshin nu cucoyo nahnu nda nu ñuhu ñayivi.

¹⁰ Tacan tan tsiñi yu iin ndusu ñihi xaan ityi andivi, tan catyí tsi:

—Vityin tsa tsaá quivi tsa jacacú Nyoo tsi nyivi. Tsa jahá canaa tunyee iñi Nyoo. Maa ra tan ra Cristo, Sehe ra, ndacá ñaha ra naha tyin tsa tavá ra naha tsi nu tsa tyaá xaan cuatyí siqui ñi nuu ra naha nduvi tan ñihu. ¹¹ Tan jaha canaa ñi tsi nu tshin niñi ra cuví Mbee Ticatyí Luhlu, tan tshin tuhun Nyoo tsa cahán ñi tshin nyivi. Ña nayuhví ñi cúu ñi tan tsaá cuenda ñi ñayivi ñi. ¹² Yacan cuenda cusii iñi nyooho tsa iyó andivi. Maa tyin ndahvi nyivi tsa iyó nu ñuhu ñayivi tan nu ndutya ñuhu! Tyin nu ña vaha nacavá nu nu ñuhu ñayivi nu yucú ñi. Tan xaan xaan cuñi nu tyin tsitó nu tyin ña cuaha ca quivi tan cundihí tsa jandaví ñaha nu tsi ñi.

¹³ Tan tsa nyehe nu coo xaan tsa iyó ndaha can tyin nacavá nu nu ñuhu ñayivi, quitsahá nyaá ndaha nu tsi ñaha tsa tsicoo sehe yii can. ¹⁴ Maa tyin tsicoo uvi nditsin nahnu ñaha can tan caá can tumaa caá nditsin tasu. Tsicoo can tyin tacan tan cuví ndava ña tan cuhun ña cunu xeehe ña nu tsiqui nu ña cuví ñihi coo can tsi ña. Ican cuví nu cua ñihi ña tsa catsi ña tsitsi tsa uñi cuiya sasava. ¹⁵ Tan nu coo can tavá nu ndutya tshin yuhu nu, tyin coo yutya cahnu, tan tañi ñaha can tsitsi yutya can. ¹⁶ Maa tyin ñuhu ñayivi jatyinyee tsi tsi ña, tyin ndatá tsi tan nanyee yutya tsa javahá nu coo tshin ndutya tsa quitá yuhu nu. ¹⁷ Tan tsa ña cuví jaha canaa nu tsi ña, quitsahá cañi tahan nu tshin nyivi cuví tata ña, ñi tsa tyaá yahvi tuhun caahán Nyoo, tan nycún ñi tshin tsa ñi iñi añima ñi tsa nditsa tsa caahán ra Jesucristo.

13

Nu nyehé ra Juan uvi quití caquiñi

¹ Tan tsinyaa nyityi yu nu nyiti yuhu ndutya ñuhu, nyehe yu quitá iin quití caquiñi nu ndutya ñuhu can. Tan iyó utsa jiñi ti, tan utsi ndiqui ti. Tan iin tan iin ndiqui ti yihí iin corona. Tan intuhun intuhun jiñi ti nyaá iin sivi tsa caahán ndavaha ñi tsi Nyoo. ² Quití caquiñi can caá ti tumaa caá cuiñi. Tsaha ti caá tumaa caá tsaha oso. Tan yuhu ti caá tumaa caá yuhu ndicaha. Tan nu coo xaan tsa iyó ndaha can tsaá nu ndatu tsi quití caquiñi can tsa cunyya ti nu tyayu nu. Tan tsaá nu ndatu tsi ti tsa cundaca ñaha ti. ³ Tan nyaá iin nu caahvi tsa cua cahñi tsi ti jiñi ti, maa tyin ndaha nu caahvi can. Tan tsa nyehe nyivi iyó nu ñuhu ñayivi ihya can, iyo xaan cuñi ñi. Tan quitsahá nycún ñi tsi ti. ⁴ Tan jacahnú ñi tsi nu coo xaan can, tyin tsaá nu ndatu tsi quití can. Tan jacahnú tucu ñi tsi quití can, tan catyí ñi:

—¿Yoñi maa cuví tumaa cuví quití ihya? ¿Tan yoñi cuví cañi tahan tshin ti? —catyí ñi.

⁵ Tan ñihí tucu quití can ndatu tsa cahan ndasi ti tan cahan ti ndavaha ñi siqui Nyoo. Tan cua cundaca ñaha ti uvi xico uvi yoo. ⁶ Tacan javahá ti: Cahán ti tsi Nyoo. Cahán ti ndavaha ñi nu iyó ra, tan sivi ra, tan tsa iyó andivi. ⁷ Tan tsicoo tucu ndatu tsi ti tsa cañi tahan ti tshin nyivi yihí cuenda Nyoo nda cuanda cuví jaha canaa ti tsi ñi. Tan ñihí ndatu tucu ti tsa quihí ndaha ti tsi nyivi ndihí ñi tata, nyivi caahán siin siin yuhu, nyivi iyó tandihi ñi ñuu nyihí, tan ñuu nahnu. ⁸ Tan nyivi tsa ña cua coo ñayivi tsaá tshin ra cuví Mbee Ticatyí Luhlu, ra tsa tsiñi, ña cua coo ñi ñayivi tsaá can tsa cuenda tyin ña tsinyaa sivi ñi nu libru ra tsa ndi cumañi ca tsinú ñuhu ñayivi. Tandihí maa ñi can cua jacahnú ñi tsi quití caquiñi can.

⁹ Tatun yihí ndo iyó soho ndo, tyaa soho ndo tuhun ihya: ¹⁰ Nyivi tyihí tsi inga nyivi vehe caa, cua cuhun tucu maa ñi vehe caa. Tan nyivi tsa tsahñi tshin tsa xaan, juvin ñi maa tshin can cua cúu ñi. Yacan cuenda nyooho tsa yihí cuenda Nyoo cuñi tsi cunyye iñi ndo tan tsinu iñi ndo tsi ra.

¹¹ Yahá can tan nyehe yu quitá inga quití caquiñi tsitsi ñuhu. Tan iyó uvi ndiqui ti, caá can tumaa caá ndiqui mbee ticatyí luhlu. Maa tyin caahán ti tumaa caahán coo xaan tsa iyó ndaha can. ¹² Tan ndacá ñaha ti tumaa ndacá ñaha inga quití caquiñi can. Tan nyehe inga quití can tsa ndacá ñaha ti. Tan natyuhú ti tsi ñuhu ñayivi tan nyivi iyó nu tsi na jacahnú ñi tsi inga quití caquiñi tsa cuñi cúu jahá tsa caahvi tsa tsinyaa tsi ti. ¹³ Tan cuaha xaan tsa iyo javahá ti nda cuanda quitá ñuhu andivi tan janacavá ti can nu ñuhu ñayivi tyin nyehe nyivi. ¹⁴ Tan jandaví

ñaha ti tsi nyivi iyó nu ñuhu ñayivi tsihin tsa iyo tsa cuví javaha ti nuu quiti caquiñi tsa jihna ñi. Tava tyiñu ti na javaha ñi iin tsi-toho quiti caquiñi tsa tyahnya caahvi tsihin mityi, tan ña tsiñi ti. ¹⁵ Tan quiti caquiñi tsa tsinu uvi can tsicoq ndatu tsi ti tsa cuhva ti tsa coo nyito tsitoho quiti caquiñi tsa jihna can tyin tacan tan cuví cahan tsi tan cahñi tsi tsi tandihi nyivi tsa ña cua jacahnú itsi. ¹⁶ Tan siin tyin catyí tsi tyin cunyaa tuñi tsi tandihi nyivi; nyivi nyihi, nyivi tsahnu, nyivi cuca, nyivi ndaahvi, nyivi iyó nuña, tan nyivi iyó tsitoho. Tan cua cunyaa tuñi can ndaha cuaha ñi a nutyaan ñi. ¹⁷ Tan yofi maa cuví jata tan xico tatun nduve tuñi can nyaá tsi ñi, o tatun nduve sivi ti, o número sivi ti nyaá tsi ñi. ¹⁸ Tuhun ihya cuñi xaan tsi tsa tsiñi tuñi. Nyivi cutuñi iñi, na jaha cuenda ñi número quiti caquiñi can. Tyin número rayií cuví can. Tan número can cuví iñu cientu uñi xico iñu.

14

Nu tsitá cientu uvi xico cumi mil nyivi iin yaa tan jacahnú ñi tsi Nyoo

¹ Yahá can tan nyehe yu tsi ra cuví Mbee Ticatyí Luhlu, nyaá nyityi ra jiñi yucu Sión. Tan yucú cientu uvi xico cumi mil rayií tsihin ra. Ra ihya naha ra cuví ra tsa nyaá sivi ra tan sivi Jutu ra nutyaan. ² Tacan tan tsiñi yu cucayú ityi andívi, tumaa cucayú yutya nahnu, tan tumaa caahán savi tsa ñihi xaan, o tumaa cuví nu javacú ra naha guitarra cuaha. ³ Tan tsitá ra naha iin yaa tsaa nu nyaá Nyoo nu tyayu ra, tan nu nyecú tsa cumi tsa nyito, tan nu nyecú tandihi ra tsahnu naha ra. Tan yofi maa cuví cutuhva yaa can, maa ñi maa tsa cientu uvi xico cumi mil rayií tsa cacú nu ñuhu ñayivi cuví tsitá can. ⁴ Ra ihya naha ra cuví ra tsa ña tsicá nuu tsihin ñaha, tyin ii ra naha. Tan nyicún ra naha tsi ra cuví Mbee Ticatyí Luhlu tandihi ñi ityi cuahán ra. Cacú ra naha tan juvin ra naha jamañi tsi ra naha nuu Nyoo tan nuu ra cuví Mbee Ticatyí Luhlu tsa jihna ñi. ⁵ Yofi cuví catyí tyin vatya ra naha, tyin tsa cuenda Nyoo nduve ca cuatyí ra naha iyó tan yucú ra naha nu nyaá ra nu tyayu ra.

Tuhun tsa jacoto uñi ángel

⁶ Tacan tan nyehe yu ndavá inga ángel ityi andívi. Tan nyisó ra tuhun Nyoo tsa ña cua cundihi maa, tan tuhun can cuví tsa jacacú ra Cristo tsi yo. Tyin jacoto ra tuhun can tsi nyivi iyó nu ñuhu ñayivi; nyivi iyó tandihi ñi ñuu nahnu, tan ñuu nyihi, nyivi tandihi ñi tata, tan nyivi caahán siin siin yuhu. ⁷ Tan ñihi xaan cahán ra tan catyí ra:

—Nayuhvi ndo tsi Nyoo, tan jacahnu ndo tsi ra. Tyin tsa tahán tsi cuhva tsa cua cutuñi nyivi. Jacahnu ndo tsi ra javahá andívi tan

ñuhu ñayivi, tan ndutya ñuhu tan ndohyo —catyí ángel can.

⁸ Tan catyí inga ángel tsa vatsí nyicún tsi ra:

—Tsa nduvá ñuu Babilonia tsa cuví ñuu cahnu, tsa taní tsi. Tyin nyivi iyó ñuu can jacuahá ñi tsa caquiñi tsa javahá ñi tsi inga nyivi iyó nu ñuhu ñayivi. Tumaa tsa tsiñi ñi tsihin vinu ña vaha, jahá ñi Babilonia cuví can —catyí ángel can.

⁹ Tacan tan vatsí tsa tsinu uñi ángel, tan ñihi cahán ra tan catyí ra:

—Tatun ndáa nyivi jacahnu tsi quiti caquiñi can tan tsitoho ti, o cuhva ñi tsa cunyaa tuñi ti nutyaan ñi o ndaha ñi, ¹⁰ cua nyehe xaan ñi tundoho tyin cua tyihi Nyoo tsi ñi nu ñuhu, tan nu azufre. Tumaa tsa cua jacoho ra vinu xaan tsi ñi nuu ángel tan nuu ra cuví Mbee Ticatyí Luhlu cuví can. ¹¹ Tan ña cua cundihi maa tsa quita yuhma nu nyehé ñi tundoho, tan ña cua quitatu maa ñi nduvi tan ñiñu. Ñi ihya cuví ñi tsa jacahnú tsi quiti caquiñi can tan tsi tsitoho ti, tan tsahá ñi tsi ñi cunyaa tuñi sivi ti. ¹² Yacan cuenda nyivi yihí cuenda Nyoo, tan tyaá yahvi ñi tuhun caahán ra, tan tsinú iñi ñi tsi ra Jesús, cuñi tsi tsa cunyeé iñi ñi —catyí ángel tsa tsinu uñi can.

¹³ Tacan tan tsiñi yu iin ndusu tsa quee nda andívi, tan catyí tsi tsihin yu:

—Tyaa tuhun ihya: “Vityin tan ityi nuu, sii xaan cua cuví tsi nyivi cua cúu tun tsinú iñi ñi tsi Jutu Mañi yo.”

Tan catyí Tatyí Ii Nyoo:

Nditsa, sii xaan cua cuví tsi ñi tyin cua quitatu ñi tan ña cua jaha tyiñu ca ñi. Tan cua coo tsa vaha tsa javahá ñi tsihin ñi.

Nu cua tatsi tuñi Nyoo tsi nyivi

¹⁴ Tacan tan nyehe yu iin vico cuitsin. Tan nu vico can nyaá iin ra caá tumaa caá ra ñuu ñayivi. Yihí corona xuhun cuaan jiñi ra. Tan ndahá ra iin mityi yacua tan xaan.

¹⁵ Tan quita inga ángel tsitsi vehe ñuhu tan ñihi xaan caná tsaa ra tsi ra nyaá nu vico can. Tan catyí ra:

—Vityin jaha tyiñu tsihin mityi un, jataca cosecha un tsa iyó nu ñuhu ñayivi. Tyin tsa tsaa cuhva, tan tsa iyó nu ñuhu ñayivi tsa tsityi tsi —catyí ra.

¹⁶ Tacan tan ra tsa nyaá nu vico can jayahá ra mityi ra nu ñuhu ñayivi, tan naquihñ ra tsa iyó nuu tsi.

¹⁷ Tacan tan quita inga ángel tsitsi vehe ñuhu tsa iyó andívi. Tan juvin ñi ndahá tucu ra iin mityi yacua tsa xaan. ¹⁸ Tan quita inga ángel nu nyaá altar, tan ra ihya iyó ndatu tsi ra tsa cundaca ñaha ra ñuhu tsa cayú. Tan caná tsaa ra tsi ra tsa ndahá mityi yacua tsa xaan can. Tan catyí ra tsihin ra:

—Jaha tyiñu tsihin mityi xaan tsa ndahá un juvin, tan cahnya cuenda ndoco yucu

vixi tsa nañi uvas tsa iyó nu ñuhu ñayivi, tyin tsa tsityi tsi —catyí ra.

¹⁹ Tan jayahá ángel can mityi ra nu ñuhu ñayivi tan tsahnya ra uvas can. Tan tyihj ra itsi iin nu tyihj ra tyin cua cuhñi ra itsi tan quita ndutyta tsi. Tan yacan cuñi tsi catyí tsa cua tatsi tuñi Nyoo tsi nyivi. ²⁰ Tan nacuhñj ra uvas can ityi tsata ñuu, tan cuñi tsi catyí tyin cuaha xaan nyivi tsihj, tan nu cuvj can, cuaha xaan cuaha xaan niñi ñi tsati. Tan tsaá tsi nda nu sucun nu yihí frenu yuhu cuayu, tan tsinú tsi tumaa uñi cientu kilómetro.

15

Nu quita ndihi utsa taahan ña tundoho tsa cua nyehe nyivi

¹ Nyehe yu inga tsa iyo cahnu andivi tan nayuhvj xaan yu, nyehe yu utsa ángel tsa vatsi ndacá utsa taahan ña tundoho. Tsihin tundoho ihya cua cundihi tsa xaan cuñi Nyoo nyehe ra tsi nyivi tsa ña tyaá yahvi tuhun caahán ra.

² Tan nyehe tucu yu iin tsa caá tumaa caá ndutyta ñuhu tsa tsinú tsihin yutyi. Tan tumaa tsa nasacá ñuhu tsihin tsi. Tan nyivi tsa cunyeé jahá canaa tsi quiti caquiñi can tan tsi tsitoho ti, tan ña tsinyaá número sivi ti tsi ñi, tandihi ñi tan yucú ñi yuhu tsa nyehe yu can. Tan ndahá ñi tsa caá tumaa guitarra tsa tsahá Nyoo tsi ñi. ³ Tan tsitá ñi yaa ra Moisés, ra jahá tyiñu tyiñu Nyoo, tan yaa ra cuví Mbee Ticatyi Luhlu. Tan catyí yaa can tyehen:

Cahnu tan iyo xaan caá tandihi maa tsa javahá un,
Nyoo, Jutu ndi, iyó tandihi tunyee iñi tsi un.
Ndox xaan tan nditsa xaan ityi un,
Yooho Rey cuenda tandihi nyivi iyó nu ñuhu ñayivi.

⁴ ¿Yóo ña cua nayuhvi tsi un, yooho Jutu Mañi ndi?

¿Yóo ña cua jacahnu tsi un?

Tan intuhun ñi maa un cuví ra ii.

Tan cua quitsi nyivi quee tandihi maa ñuu,
tan cua jacahnu ñi tsi un,
tyin nyehe ñi tsa vaha tsa javahá un, catyí yaa tsitá ñi.

⁵ Tacan tan nyehe yu nuñá yuvehe ñuhu tsa nyaá nda andivi nu yucú vaha nduvi tabla tsa nyaá ley Nyoo nuu. ⁶ Tan quita utsa ángel tsa vatsi ndacá tsa utsa tundoho can tsitsi vehe ñuhu can. Ndisi ra naha jahma vaha, cuitsin tan xiñu. Tan yihí cinturón xuhun cuaan yiqui nyica tsa intuhun intuhun ra naha. ⁷ Tacan tan iin tsa nyito can, tsahá can intuhun intuhun coho xuhun cuaan tsi tsa intuhun intuhun tsa utsa ángel can. Tan tsity maa can tsihin tsa xaan Nyoo tsa cua tatsi tuñi ra tsi nyivi. Ra ican ña cua cundihi maa tsa iyó ra. ⁸ Tan tsity maa tsitsi vehe ñuhu can tsihin yuhma tsa

cuenda tsa cahnu xaan cuví Nyoo tan tsa cuenda tunyee iñi tsa iyó tsi ra. Tan yofi maa cuví quihvi tsitsi vehe ñuhu can tsitsi tsa ndi cumañi ndihi tsa utsa tundoho tsa vatsi ndacá tsa utsa ángel can.

16

Coho tsa yihí tundoho tsa cua jaquitsi tsa utsa ángel

¹ Tacan tan tsiñj yu iin ndusu ñihi xaan tsa quita tsitsi vehe ñuhu nu nyaá Nyoo. Tan catyí tsi tyehen tsihin tsa utsa ángel can:

—Cuacoyo ndo tsa yihí tsitsi coho ndahá ndo juven siqui nyivi iyó nu ñuhu ñayivi, tyin Nyoo cua tatsi tuñi ra tsi ñi —catyí ndusu can.

² Tacan tan tsahán iin ángel can tsicoyo ra tsa yihí tsitsi coho ra siqui nyivi tsa nyaá tuñi quiti caquiñi can tan jacahnu ñi tsitoho ti. Tan quita nu caahvi xaan tan uhvi xaan tsi ñi.

³ Tacan tan coyó tsa tsinu uvi ángel can tsa yihí tsitsi coho ra nu ndutyta ñuhu. Tan ndutyta ñuhu can nanduvj tsi niñi tumaa niñi ndiyi, tan tandihi tsa nyito tsa iyó tsitsi ndutyta ñuhu can tsihj tsi.

⁴ Tacan tan coyó tsa tsinu uñi ángel can tsa yihí tsitsi coho ra nu yutyta nahnu tan nu ndohyo tan nanduvj tsi niñi. ⁵ Tacan tan tsiñj yu tsa caahán ángel cuenda ndutyta tan catyí ra:

—Jutu Mañi yu, yooho vaha xaan un tyin tatsi tuñi un tsi nyivi tyehen. Jutu Mañi yu, Nyoo ii cuví un tyin nda nu quitsahá tandihi tan nda cuenda vityin tacan ñi iyó maa un. ⁶ Tatsi tuñi un tsi ñi tyin maa ñi tsati ñi niñi nyivi yihí cuenda un tan niñi ra cuví ndusu yuhu un. Tan vityin yooho tumaa tsa jacohó un niñi tsi ñi tyin tacan taahán maa tsi tsi ñi —catyí ángel can.

⁷ Tan tsiñj tucu yu nacahán inga ndusu ityi nu nyaá altar Nyoo tan catyí tsi tyehen:

—Ndisa, Nyoo, Jutu Mañi yu, ra iyó tandihi tunyee iñi tsi, vityin tsa tatsi tuñi un tsi nyivi tsihin tsa nditsa tan tsihin tsandaa —catyí ndusu can.

⁸ Tan coyó tsa tsinu cumi ángel can tsa yihí tsitsi coho ra nu ñicanyii. Tacan tan tsicoo ndatu tsi ñicanyii can tsa cahmi tsi tsi nyivi tsihin ñuhu tsi. ⁹ Tan tandihi nyivi ndasi xaan cayú ñi jahá ñicanyii can. Maa tyin vasu ndi maa tacan tahán ñi, ña nasamañi ñi cuhva tsicoo ñi, tan ndi ña jacahnu ñi tsi Nyoo. Tan cahán ñi ndavaha ñi siqui Nyoo, ra tsa jaquitsj tundoho can siqui ñi.

¹⁰ Tan coyó tsa tsinu uhun ángel can tsa yihí tsitsi coho ra siqui tyayu quiti caquiñi can. Tan ndunaq nu ndacá ñaha ti. Tan nyivi cuenda ti, nda cuanda tsatsj yihí ñi yaa ñi tsa cuenda tsa nyehe xaan ñi tsa uhvi. ¹¹ Maa

tyin vasu ndi maa tacan cuvji, ña jandihí ñi tsa javahá ñi tsa ña vaha. Tan cahān ñi ndavaha ñi siqui Nyoo, ra nyaá andiví, tsa cuenda tsa uhvi nu caahvi ñi.

¹²Tan coyo tsa tsinu iñu ángel can tsa yihí tsitsi coho ra nu yutya Eufrates cahnu. Tan ndoco ndutya can tyin tacan tan nuña ityi nu cua yaha ra rey tsa quee ityi nu caná ñicanyii naha ra. ¹³Tacan tan nyehe yu quita tatyí ña vaha tsa caá tumaa caá sahva yuhu tsa intuhun intuhun quiti. Iin can quita yuhu quiti caquiñi, inga can quita yuhu coo xaan tsa iyó ndaha inga can quita yuhu tsa cuví ndusu yuhu vatya. ¹⁴Tatyí ña vaha can cuví tatyí nu ña vaha, tan nahnu tsa nyityi javahá nahnu. Quita nahnu, jandu iin nahnu tandihí rey tsa iyó nu ñuhu ñayiví, tyin cañi tahan ra naha quivi tsa quivi janaha Nyoo tyin iyó tandihí tunyee iñi tsi ra. ¹⁵Tan catyí ra Cristo:

—Nyehe ndo tyin tsa vatsí yu tumaa vatsí iin ñasuhu tyin iin ñasuhu sana iñi ndo tan quihví ra tsitsi vehe ndo tacan yuhu. Sii xaan cua cuví tsi nyiví ndatú quivi quiti yu tan tsa iyó vaha jahma ñi tyin quivi cua tsa yu ña cua nducahan nu ñi tyin ña tandií ñi —catyí ra Cristo.

¹⁶Tan cua ndu iin ra cuví rey naha ra nu nañi Armagedón tsihin yuhu hebreo.

¹⁷Tan coyo tsa tsinu utsa ángel can tsa yihí tsitsi coho ra nu tatyí, tacan tan quita iin ndusu nu nyaá tyayu Nyoo tsitsi vehe ñuhu tsa nyaá nda andiví. Caná tsa tsi tan catyí tsi:

—Tsa iyó vaha vityin.

¹⁸Tacan tan vaa ña maa cuví tan caahán savi tan cañi tatsa. Tan ñihi xaan tañ nu ñuhu ñayiví. Tan ña tuhvá maa taán tacan tsa ndi quitsaha iyó nyiví nu ñuhu ñayiví. ¹⁹Tan uñi nu ndatá ñuu cahnu Babilonia can, jahā tsa tañ. Tan tandihí ca ñuu tsa cayucu nu ñuhu ñayiví tanñi tsi. Nyoo ña naq maa iñi ra tsa javahā nyivi Babilonia. Yacan cuenda janyehe xaan ra tundoho tsi ñi. ²⁰Tandihí maa ñuhu tsa iyó tsitsi ndutya ñuhu tan tandihí yucu, tandihí maa tsi tsinaq. ²¹Tan cucoyo cuaaha yuu savi nahnu xaan tsa quee andiví siqui nyivi. Vee xaan tsi. Tumaa vee uvi xico kilu, tacan vee tsa intuhun intuhun yuu savi can. Tan nyivi cahān ñi ndavaha ñi siqui Nyoo tsa cuenda tundoho yuu savi can, tyin cuví tsi iin tundoho cahnu xaan tsa cuenda ñi.

17

Nu cua tatsi tuñi Nyoo tsi ñuu ña vaha

¹Tacan tan quita iin ángel tsitsi tsa utsa ra tsa ndahá coho can naha ra, natuhvá ra nu nyaá yu, tan catyí ra tsihin yu:

—Ñaha tyin janaha yu tsi un nácaa cua cutuñi ñaha ña vaha tsa tsicá nuu tsihin rayii,

ñā tsa nyaá nu ndutya cuaaha. ²Tyin ra cuví rey nu ñuhu ñayiví tsicoo ra naha tsihin ña, tan tsa cuenda ña tiví tandihí nyivi iyó nu ñuhu ñayiví —catyí ra tsihin yu.

³Tacan tan nyehe yu iin tsa janahā Tatyí Ii Nyoo tsi yu, tan tsindacā ángel can tsi yu nu tsiqui nu nduve maa nyivi iyó, tan juvin ñi ican nyehe yu iin ñaha yosó iin quiti cuaaha caquiñi. Nyecú sivi tsa caahán ndavaha ñi tsi Nyoo tsi ti. Iyó utsa jiñi ti tan utsi ndiqui ti. ⁴Tan ñaha can nditsí ña jahma tijinda tan cuaaha. Tan cuaaha xaan xuhun cuaan iñi tsi ña, tan yuu vaha, tan perla. Tan ndahá ña iin taza xuhun cuaan tsitú tsihin tsa ña vaha tan tsa caquiñi tsa javahá ña. ⁵Tan nyaá iin sivi tsa cuví iin tuhun xeehe tsa ña cutuñi iñi nyivi nutyaan ña. Tan catyí can tyehen: “Ñaha ihya cuví ñuu Babilonia cahnu, sihi tandihí ñiñaha tsa tsicá nuu tsihin rayii tan sihi tandihí tsa ña vaha tsa iyó nu ñuhu ñayiví.” ⁶Tacan tan nyehe yu tyin tsiñi ñaha can jahā tsa tsihi ña niñi nyivi yihí cuenda Nyoo, ñi tsa tsihi tsa cuenda tsa cahān ñi tuhun ra Jesús. Tsa nyehe yu tsi ña, iyo xaan cuñi yu. ⁷Tacan tan catyí ángel can tsihin yu:

—¿Nacuenda iyo xaan cuñi un? Cua jacoto yu tsi un náa cuñi tsi catyí tuhun xeehe ñaha ihya tan quiti caquiñi tsa yosó ña, quiti tsa iyó utsa jiñi tan utsi ndiqui. ⁸Quiti caquiñi tsa nyehe un can, juvin ti cuví quiti tsa tsicoo tan vityin nduve ca ti iyó. Maa tyin cua quita ti tsitsi yavi cunu tsa nduve nu tsindihí. Ican nyii ti tsa ndi cumañi ca cahun ti nu cua cundihí cuñi ti. Nyivi iyó nu ñuhu ñayiví, ñi tsa nduve sivi nyaá nu libro Nyoo nda quivi tsinu ñuhu ñayiví, iyo xaan cua cuñi ñi nyehe ñi tsi quiti can. Libro can catyí yoo nyivi cua coo cuñi.

⁹Tuhun ihya cuñi tsi tsa cutuñi iñi yo itsi: Tsa utsa jiñi quiti can cuñi tsi catyí tsa utsa yucu tsa nyaá ñaha can nuu. ¹⁰Tan juvin ñi cuñi tucu tsi catyí can utsa rey. Uhun ra naha tsa yaha tsindacā ñaha ra naha. Tan tsa tsinu iñu rey ndacá ñaha ra vityin. Tan ra tsa tsinu utsa ndi cumañi cundaca ñaha ra. Quivi quiti ra, ña naha cua cundaca ñaha ra. ¹¹Tan quiti caquiñi tsa tsicoo tan vityin nduve ca ti iyó, juvin ti cuví iin rey tsitsi tsa utsa taahan rey can, tan cua cuví tucu ti rey tsa tsinu una. Tsa yaha cundaca ñaha nyico ti, tacan tan cua cahun ti nu cua cundihí cuñi ti.

¹²Tan tsa utsi ndiqui tsa nyehe un can, cuñi tsi catyí utsi rey tsa ndi cumañi cundaca ñaha. Cua coo ndatu tsi ra naha tsa cundaca ñaha ra naha iin ora, iin caa ñi tsihin quiti caquiñi can. ¹³Tsa utsi rey can inducu ñi cua caca iñi ra naha. Tan cua nacuhva ra naha tunyee iñi tsa iyó tsi ra naha tsi quiti caquiñi can. Tan tandihí ndatu tsa iyó tsi ra naha cua nacuhva ra naha tsi

ti. ¹⁴ Tan cua cañi tahan ra naha tsihin ra Mbee Ticatyí Luhlu. Maa tyin ra Mbee can, cua jaha canaa ra tsi ra naha. Tyin juvin ra yihí ndaha tsi tandihí ra ndacá ñaha. Tan yihí ndaha tucu ra tsi tandihí ra cuví rey naha ra. Tan nyívi yihí cuenda ra, maa Nyoo caná tsi ñi tan nacatsj ra tsi ñi. Tan níi xaan cuñí ñi nyicún ñi tsi ra.

¹⁵ Tan catyí tucu ángel can tsihin yu:

—Ndutya cuaha tsa nyehe un can, nu nyaá ñaha tsicá nuu can, yacan cuví nyívi iyó tandihí ñuu nyihi tan ñuu nahnu, ñi caahán siin siin yuhu. ¹⁶ Rey tsa cuví tsa utsi ndiqui quiti caquiñi tsa nyehe un can, ndasi cua cuñi ra naha nyehe ra naha tsi ñaha tsicá nuu can. Cua nacoo ihñi ra naha tsi ña. Tan cua jatandí ra naha tsi ña; tan cua catsi ra naha cuñu ñuhu ña. Tan cua cahmi ra naha tsi ña. ¹⁷ Tyin Nyoo tsahá ra tsa caca íñi rey can naha ra tyin javaha ra naha cuhva cuñi maa Nyoo. Tyin iin ñi cuhva cua caca íñi ra naha, tan cua cuhva ra naha ndatu tsi quiti caquiñi can tsa cundaca ñaha ti tumaa rey nda cuanda cundaa tuhun caahán maa Nyoo. ¹⁸ Ñaha tsa nyehe un can, juvin ña cuví ñuu cahnu tsa ndacá ñaha tsi tandihí ra cuví rey nu ñuhu ñayívi.

18

Nu naá ñuu Babilonia

¹ Tsa yaha yacan tan nyehe yu quee inga ángel ityí andívi tan iyó xaan tunyee íñi tsi ra. Tan ndunditsjn ñuhu ñayívi jaha tsa nditsin ra. ² Tan caná tsaa ra tsihin tsa ñihi ndusu ra, tan catyí ra:

—Tsa tsindihí nuu ñuu Babilonia cahnu. Nanduvj tsi nu iyó tatyí ña vaha, vehe tandihí nuu tatyí ña vaha, tan taca saa ña vaha tsa ña taahán íñi nyívi. ³ Tyin tandihí nyívi tiví ñi tsa cuenda cuatyí javahá ñuu Babilonia can. Ra cuví rey nu ñuhu ñayívi naha ra tumaa tsa tsicoo ra naha tsihin ñaha tsa cuví ñuu Babilonia can. Javahá ra naha cuatyí tsihin ña. Tan nyívi ñuhu ñayívi nducuca ñi tsihin tsa cuaha xaan tsa yahvi tsa jatá nyívi ñuu can.

⁴ Tacan tan tsifí yu ndusu Nyoo ityí andívi, tan catyí tsi:

—Qujta ndo ñuu ihya, nyooho tsa cuví nyívi yu, ña cutahan ndo tsihin nyívi ihya tan ña javaha ndo cuatyí tumaa javahá ñi cuatyí, tyin tacan tan ña nyehe ndo tundoho tumaa nyehé maa ñi. ⁵ Tyin tsa canyíi tucuíi cuatyí nyívi iyó ñuu can, nda cuanda tsaa can nu nyaá yu. Tan ñuhú íñi yu tsa ña vaha javahá ñi. ⁶ Cuhva ndo juvin ñi maa tsa tsahá ñi tsi inga nyívi tsi ñi; cuhva ndo uvi ca tsaha siqui tsa javahá ñi. Tacan janyehe ndo tundoho tsi ñi. Cuhva ndo tundoho nyehe ñi tsa ñihi uvi ca tsaha tan ñavin ca tsa tsahá maa ñi tsi inga nyívi. ⁷ Yacan cuenda cuhva

ndo tsa iyo xaan tahan ñi tsihin tundoho nyehe ñi jaha ndo. Tahan ñi cuhva tsa jacahnú xaan ñi tsi ñi tan cusíi xaan íñi ñi juvin cuhva can janyehe ndo tundoho tsi ñi. Tyin tsicá íñi tsitsi añima ñi: “Ihya nyecú yo tumaa iin reina. Ñavin ñaha ndaahvi cuví yo, tan ndí ña cua nyehe yo tundoho”, cuñí ñi, tsicá íñi ñi. ⁸ Yacan cuenda iin quívi ñi cua quítsi tundoho siqui ñuu can, cua quítsi tuhun tsíihí, tucuíihya íñi, tama, tan cua cayu tsi tsíihí ñuhu. Tyin yuhu iyó xaan tunyee íñi tsi yu tsa cuví yu Nyoo, Jutu ndo tan maa yu cua tatsi tuñi tsi nyívi ñuu can —catyí Nyoo.

⁹ Ra cuví rey nu ñuhu ñayívi ihya tumaa tsa tsicoo ra naha tsihin ñaha tsa cuví ñuu can, cua vacu xaan ra naha, tan cuiihya cua cuñi ra naha na nyehe ra naha yuhma tsa cayu ñuu can. ¹⁰ Tan tsa cuenda tsa yuuhví ra naha tundoho can, nda sava ñi cua cunyecu ra naha. Tan cua catyí ra naha:

—jNdahvi yooho, ñuu cahnu Babilonia, ñuu tsa tsicoo cuaha tunyee íñi tsi! Tyin iin yaha ñi tsaa tundoho nyehé un —cua catyí ra naha.

¹¹ Tan ra tsa xicó ndaha tyíñu naha ra, juvin ñi cua vacu xaan ra naha tan cuiihya cua cuñi ra naha tsa cuenda ñuu can. Tyin yoñi ca cua jata tsa xico ra naha. ¹² Tyin xicó ra naha xuhun cuaan, xuhun cuitsin, yuu sii caá, perla, jahma linu, jahma seda, tan jahma tijinda cuaaha. Tan xicó tucu ra naha tandihí nuu vitu tami tan náa ndihí tsa tsinú tsihin yiqui nuu landa, tan vitu sii caá, tan caa tsa cuví bronze, tan caa tsa cuví hierro, tan yuu tsa cuví mármol. ¹³ Tan xicó tucu ra naha canela, náa ndihí ca yacu tsa quihví tsihin tsa tsatsi yo, tan tsa tami tumaa cutu, tumaa mirra, tan tumaa ndutya tami. Tan xicó tucu ra naha vinu, aceteye, yutyí paan vaha, tan trigu. Tan juvin ñi xicó tucu ra naha quiti cuenda carga, tan mbee, cuayu, carreta, tan nda cuanda nyívi tsa cuví musu tan xicó ra naha. ¹⁴ Tan catyí ra naha tsihin nyívi ñuu can tyehen:

—Nduve ca tsa sii caá tsa tsicoo tsi un, tsa taahán xaan íñi un. Tan tsa tsindihí tandihí tsa cuca un. Tan ña cua ñihi ca maa un tandihí yacan —catyí ra naha.

¹⁵ Ra tsa xicó tandihí can, nducuca ra naha tsa cuenda tsa jatá nyívi ñuu Babilonia can tsa xicó ra naha. Nda sava cua cunyecu ra naha tsa cuenda tsa yuuhví ra naha tsa cua nyehe nyívi can tundoho. Tan cua vacu xaan ra naha tan cuiihya cua cuñi ra naha. ¹⁶ Tan cua catyí ra naha:

—jNdahvi ñuu cahnu can! Cuvj tsi tumaa iin ñaha tsa nditsí jahma linu, jahma tijinda cuaaha. Tan cucutú ña tsihin xuhun cuaan, tan yuu sii caá tan perla. ¹⁷ jTan iin yaha ñi

ndihí tsa cuca xaan can! —cua catyí ra xicó can naha ra.

Tan tandihí ra cuví capitán tsa jacacá yutun ndoo nu ndutya, tsihin nyiví yucú tsitsi can tan tandihí ra jahá tyiñu nu ndutya ñuhu naha ra, nda sava cua ndoo ñi. ¹⁸Tan tsa cua nyehe ñi yuhma tsa cayú ñuu can, cua cana tsaa ñi, tan cua catyí ñi:

—¿Náa inga ñuu tsicoo tumaa ñuu cahnu ihya? Nduve —cua catyí ñi.

¹⁹Tan cua coso ñi nyaca jiñi ñi, tan cua vacu xaan ñi. Tan cuihíya cua cuñi ñi, cua cana tsaa ñi, tan cua catyí ñi:

—¿Ndahví ñuu cahnu can! Tyin tsihin tsa cuca tsi tan nducuca tandihí yoo tsa tsicá nuu nu ndutya ñuhu tsihin yutun ndoo. ¡Tan vityin iin yaha ñi naq tsi! —cua catyí ñi.

²⁰Maa tyin nyooho cusii iñi ndo nyehe ndo tsa taahán ñuu can, nyooho tsa iyó andiví, tan nyooho ra tsicá tyiñu ra Cristo tan nyooho ra cuví ndusu yuhu Nyoo, tan tandihí ca nyooho tsa yihí cuenda Nyoo. Cusii iñi ndo tyin tsa cuenda tsa javahá ñi tsa ña vaha tsihin ndo tan tatsí tuñi Nyoo tsi ñi.

²¹Tacan tan iin ángel tsa iyó xaan tunyee iñi tsi, cañihí ra iin yuu tsa caá tumaa caá iin yoso cahnu xaan, tan jacuhun ra can tsitsi ndutya ñuhu, tan catyí ra:

—Tyehen cua cundihí nuu ñuu Babilonia cahnu. Tan ndi iin tsaha ca tan ña cua nyehe ca ndo itsi. ²²Yoñi ca cua cata yaa tsitsi ñuu can, tan yoñi ca cua javacu arpa, tan yoñi ca cua tiví tiyoo, tan ndi caa. Tan ndi ña cua coo ca ra jahá tyiñu náa ndihí ca tyiñu. Tan ndi ña cua cucayu ca molino. ²³Tan ndi ñuhu tyuma, tan ña cua cayu ca tsitsi ñuu can. Ndi ña cua cuñi ca yo ndusu nyiví nu iyó vico tindaha. Tacan cua cuví vasu ndi maa ra xicó tsa tsicoo ñuu can naha ra, cahnu xaan tunyee iñi tsicoo tsi ra naha, tan jandaví ñaha xaan nyiví iyó ñuu can tsi tandihí nyiví iyó nu ñuhu ñayiví tsihin tuhun tasi.

²⁴Tyin cuaha xaan niñi ra cuví ndusu yuhu Nyoo canyí tsitsi ñuu can tyin tsahñi ñi tsi ra naha. Tan canyí tucu niñi inga ca nyiví yihí cuenda Nyoo, tan niñi tandihí nyiví tsa tsahñi nyiví naniñi cahnu nu ñuhu ñayiví.

19

¹Tsa yahá yacan, tan tsiñi yu ndusu nyiví cuaha ityí andiví. Tan catyí ñi:

¡Cahnu xaan cuví Nyoo! Jutu Mañi yo, Nyoo cuví ra ra jacacú tsi yo. Tan tsi maa ra taahán tsi jacahnu yo, tyin iyó xaan tunyee iñi tsi ra.

²Tyin tsihin tsa vaha tan tsandaa tan tsa nditsa jacutuñi ra.

Tatsj tuñi ra tsi ñaha tsicá nuu tsa cuví ñuu Babilonia

tsa jativí xaan tsi nyiví iyó nu ñuhu ñayiví tsihin tsa caquiñi tsa javahá ña tsihin ñi.

Tan tatsj tuñi ra tsi ña tsa cuenda tsa tsahñi ña tsi nyiví jahá tyiñu tyiñu ra.

³Tan catyí ñi inga tsaha:

—¡Cahnu xaan cuví Nyoo! Yuhma tsa cayú ña, ña cua cundihí maa tsa ndaa tsi ityí siqui —catyí ñi.

⁴Tan tsa oco cumi ra tsahnu tan tsa cumi tsa nyito tsa nyecú nu nyaá tyayu Nyoo, tsicuiñi tsiti ra naha nda nu ñuhu. Tan jacahnu ra naha tsi Nyoo nu nyaá ra nu tyayu ra. Tan catyí ra naha:

—¡Cahnu xaan cuví Nyoo! ¡Na cuví tsi tacan! —catyí ra naha.

⁵Tan nu nyaá tyayu Nyoo, nacahan iin ndusu, tan catyí tsi: Jachahnu ndo tsi Nyoo Jutu yo tandihí nyooho tsa jahá tyiñu tyiñu ra, tan tyaá yahví ndo tsi ra, nyooho nyiví nyihí tan nyiví tsahnu.

Nu iyó vico tindaha ra Mbee Ticatyi Luhlu tan nyiví tsinú iñi tsi ra

⁶Tan tsiñi tucu yu ndusu tumaa cuví nu cuaha xaan nyiví yucú, o tumaa ndusu nu cuaha xaan yutya o tsa ñihí xaan caahán savi. Tan catyí tsi:

¡Cahnu xaan cuví Nyoo Jutu yo, ra iyó tandihí tunyee iñi tsi! Tyin tsa quitsahá ndacá ñaha ra.

⁷Na cusii iñi yo tan na cutu yo tsihin tsa sii. Na jacahnu yo tsi ra,

Tyin tsa tsaa cuhva tsa coo yo vico tindaha ra Mbee Ticatyi Luhlu.

Tan yoo cua cuví yo tumaa ñasiñi ra, tan ndatú yo quiví tindaha yo tsihin ra.

⁸Tyin tsa ñihí ndatu yo tsa cunditsi yo jahma cuitsin tsa ña nyahyu ca tsa cuví jahma linu.

Tyin jahma linu can cuñi tsi catyí tsa vaha tsa javahá nyiví yihí cuenda ra.

⁹Tacan tan quitsahá catyí ángel can tsihin yu:

—Tyaa tyehen nu tutu: “¡Sii xaan cuví tsi nyiví tsa cua kuhun nu tindaha ra Mbee Ticatyi Luhlu!”

Tan catyí tucu ra tyehen:

—Tuhun ihya cuví tuhun nditsa Nyoo —catyí ra tsihin yu.

¹⁰Tacan tan tsicuiñi tsiti yu nuu ángel Nyoo can tsa cua jacahnu yu tsi ra. Maa tyin catyí ra tsihin yu:

—Ña jacahnu un tsi yuhu, tyin yuhu musu Nyoo ñi cuví tucu yu tumaa yooho, tan tumaa tandihí ra yañi un tsa tsinú iñi tuhun nditsa tsa cahan ra Jesucristo. Tsi Nyoo taahán tsi jacahnu yo —catyí ra tsihin yu.

Tyin tsa cahan ra Jesús, yacan cuví tsa jandu iin iñi tsi ra cuví ndusu yuhu ra, ra tsahá cuenda tuhun caahán Nyoo tsihin yo.

Nu nyehe ra Juan tsi ra tsa yosó cuayu cuitsin

¹¹ Tacan tan nyehe yu tichóh andívi. Tacan tan quituvj iin cuayu cuitsin. Tan ra yosó tsi ti nañi ra Ra Nditza Tsa Nii Iñi Jahá Tyiñu Tyiñu Nyoo. Tyin tshih tsa ndaa jacutuñi ra tsi nyivi, tan ndaa javahá ra tsa cañi tahan ra. ¹² Tan tumaa caá nu cayú ñuhu, tacan caá tinuu ra. Tan cuaha xaan corona yihí jiñi ra. Tan intuhun ñi maa ra tsitó iin sivi tsa nyaá tsi ra. ¹³ Tan nditsí ra jahma cahyí tshih niñi. Tan nañi ra Tuhun Nyoo. ¹⁴ Tan nyicún andaru andívi tsi ra, nditsí ra naha jahma vaha tsa cuví linu, cuitsin tsi tan ña nyahu tsi. Tan yosó ra naha cuayu cuitsin. ¹⁵ Tan quitá iin mityi xaan yuhu ra, yacan cuví Tuhun Nyoo; tshih yacan cua jañicueehe ra tsi nyivi iyó nu ñuhu ñayivi. Tan ñihi cua cundaca ñaha ra tsi ñi tshih tatun tsa cuví caa. Cua tatsi tuñi ra tsi ñi tumaa javahá ra tavá ndutya yucu vixi tsa cuví uva tshih tsaha ra. Tan cua jacoho ra vinu tsa tsinú tshih uva tsi ñi, tsehe cuñi tsi catyi tyin cuxaan Nyoo tshih ñi tan cua tatsi tuñi ra tsi ñi tyin tsahá xaan ñi tsihi tsi Nyoo, ra iyó tandihí tunyee iñi tsi. ¹⁶ Nu jahma ra tan nu sihin ra can nyaá letra tsa catyi tyehen: “Ra ihya cuví ityi nuu tshih tandihí rey. Tan juvin ñi ra cuví ityi nuu tshih tandihí ra ndacá ñaha naha ra.”

¹⁷ Tacan tan nyehe yu nyaá nyityi inga ángel nu ñicanyii. Tan ñihi xaan caná tsa ra tsi tandihí saa tsa ndavá ityi andívi, tan catyi ra tshih ti naha ti:

—Nuu ndo tan ndu iin ndo tan cuxiñi ndo tsa tsahá Nyoo catsi ndo. ¹⁸ Cua catsi ndo cuñu ra cuví rey naha ra tan ra cuví ityi nuu tshih andaru naha ra tshih tucu ra xaan naha ra. Tan catsi ndo cuñu cuayu tan cuñu ra tsicoso tsi ti naha ra. Catsi ndo cuñu tandiho ra naha, ra iyó tsitoho tan ra nduve tsitoho, tahan ñi nyivi nyihi tan nyivi tsahnu —catyi ra tshih saa can naha ti.

¹⁹ Tacan tan nyehe yu quitá caquiñi can tshih ra cuví rey tsa iyó nu ñuhu ñayivi tshih andaru cuenda ra naha. Ndu iin ra naha tsa cua cañi tahan ra naha tshih ra yosó cuayu cuitsin can tan andaru cuenda ra. ²⁰ Tshih ra yosó cuayu cuitsin can tsi quitá caquiñi can iin caa ñi tshih ra cuví ndusu yuhu vatya can, tyin nuu quitá caquiñi can javahá ra vatya can tsa nyityi, tan tshih yacan jandavj ñaha ra tsi nyivi tsa tsahá cunyaa tuñi quitá caquiñi can, tan tsi ñi jacahnú tsitoho ti. Tan jacuhun nyito ra tsi nduvi taahan ra naha nu ñuhu tsa cayú tshih azufre. ²¹ Tan tandihí ca ñi tshih ñi tshih mityi xaan tsa quitá yuhu ra yosó cuayu cuitsin can. Tan tandihí maa saa, tsatsj xaan ti naha ti cuñu ñi.

20

Nu nyehe ra Juan tsa cuenda tsa mil cuiya

¹ Tsa yaha can tan nyehe yu quee iin ángel ityi andívi, ndahá ra ndaha tucu yuvehe yavi cunu tsa nduve maa nu tsindihí. Tan ndahá tucu ra iin cadena cahnu. ² Tshih ángel can tsi nu coo xaan tsa iyó ndaha, tsa cuví Coo Tsaahnu can, tan cuví tucu nu ña vaha, tan nañi nu Satanás. Tshahñi ra tsi nu tshih cadena iin mil cuiya. ³ Tan jacuhun ra tsi nu tsitsi yavi cunu xaan can. Nacasj ra yuhu yavi can, tan tyaa ra iin sellu yuhu can tyin tacan tan ña jandavj ñaha ca nu tsi nyivi iyó nu ñuhu ñayivi, nda yaha mil cuiya. Tsa yaha mil cuiya can, cua ndatsi nyico nu jshva ca quivi.

⁴ Yaha can tan nyehe yu nyecú cuaha tyayu. Tan nuu can nyecú nyivi tsa ñihj ndatu tyin tatsi tuñi ñi tsi nyivi. Tan nyehe tucu yu añima nyivi tsahnya nyivi jiñi tsa cuenda tsa cahán ñi tuhun Nyoo tsa tsahá cuenda ra Jesús tsi ñi. Nyivi ihya ña jacahnú ñi tsi quitá caquiñi can, ndi tsi tsitoho ti, tan ndi ña tsahá ñi cunyaa tuñi ti nutyaan ñi, tan ndaha ñi. Nyehe yu nandoto ñi can tan tsindacá ñaha ñi tshih ra Cristo tsitsi tsa mil cuiya can. ⁵ Ñi ihya cuví ñi tsa nandoto tsa jihna ñi. Maa tyin inga ndiyi ña nandoto ñi tyin cua nandoto ñi nda yaha mil cuiya can. ⁶ Iñi xaan cuví tsi ñi tsa nandoto jihna tyin nacatsj Nyoo tsi ñi! Tan ña cua cuhun ñi anyaya nu tatsi tuñi Nyoo añima ña vaha tsa cua cúu nyivi tsinu uvi tsaha. Tyin cua jaha tyiñu ñi cuenda Nyoo tan cuenda ra Cristo. Cua cuví ñi tumaa jutu tan cua cundaca ñaha ñi tshih ra Cristo mil cuiya.

⁷ Tsa yaha mil cuiya can, cua ndatsi Satanás nu nyii nu nuuhí nu. ⁸ Cua quita nu, jandavj ñaha nu tsi nyivi Gog tan Magog, ñi xaan iñi tsi Nyoo tsa iyó naní cahnu nu ñuhu ñayivi. Cua jandu iin nu tsi andaru ñi can tyin cuhun ra naha cuatyí. Cuaha xaan ra naha, tumaa cuaha nyiti yuhu ndutya ñuhu. ⁹ Tacan tan nyehe yu quee ra naha naní cahnu nu ñuhu ñayivi. Tan tyasj nduvi ra naha nu iyó nyivi yihí cuenda Nyoo ñuu Jerusalén tsa cuñi xaan Nyoo. Maa tyin Nyoo januu ra ñuhu tsa quee andívi tan tsahmj tsi tsi tandihí ra naha. ¹⁰ Tan nu ña vaha tsa jandavj ñaha tsi ñi, jacuhun Nyoo tsi nu anyaya nu cayú ñuhu tshih azufre, nu jacuhun ra tsi quitá caquiñi can tan ndusu yuhu vatya can. Ican cua nyehe nahnu tundoho tacan ñi maa, nduvi tan ñiñu.

Nu cutuñi nyivi ityi nu nyaá tyayu cuitsin nu nyaá Nyoo

¹¹ Tacan tan nyehe yu iin tyayu cuitsin cahnu. Tan nyehe yu tsi ra nyaá nuu can. Tan nyehé ra nu naq ñuhu ñayivi tan andívi. Tan ña ñihj tsi numaa cava tsi. ¹² Tan nyehe

yu tandihí ańima nyiví tsihí, tahan ńi nyiví tsahnu tan nyiví nyihí, nyecú nyityi ńi ityi nuu Nyoo. Tacan tan nuńa libru tsa nyaá tandihí tsa javaha ńi quiví tsicoo ńi. Tan nuńa tucu inga libru nu nyecú siví nyiví tsa cua coo nyito tsihin Nyoo. Ndiyí can cua cutuńi ńi tsa cuenda náa ndihí ca tsa javaha ńi tsa nyaá nu libru can. ¹³Tan ndutya ńuhu nacuhva cuenda tsi ańima nyiví tsa tsihí tsa cumí uvi. Tan nu yucú ańima nyiví tsihí tan Tuhun Tsiihí, nacuhva cuenda nahnu ańima nyiví tsa yihí ndaha nahnu. Tan tandihí ńi cua tahan ńi nácaa javaha maa ńi. ¹⁴Tacan tan Tuhun Tsiihí can tan nu yucú ańima nyiví tsihí can cua jacuhun ndihí Nyoo nduvi taahan can anyaya cahnu nu cayú ńuhu. Tan tsehe cuví tuhun tsiihí tsa tsinu uvi. ¹⁵Juvin ńi ican jacuhun ra tsi nyiví tsa nduve siví nyaá nu libru nu nyecú siví nyiví cua coo nyito tsihin Nyoo tacan ńi maa.

21

Nu nyehé ra Juan andiví tsa tan ńuhu ńayiví tsa

¹Yaha can tan nyehé yu iin andiví tsa tan iin ńuhu ńayiví tsa, tyin andiví tan ńuhu ńayiví tsa tsicoo jihna naa tsi. Tan tacan tucu ndutya ńuhu naa tsi. ²Yuhu ra Juan nyehé yu ńuu ii tsa cuví Jerusalén tsa tsa quee nda nu nyaá Nyoo andiví, nyehé yu nuu tsi. Tan sií xaan caá cucutu tsi tumaa cucutu iin ńaha cua tindaha. ³Tan tsińy iin ndusu ńihí tsa quita nda andiví, tan catyí tsi:

—Nyehé jihna! Iyó Nyoo mahńu nyiví. Cua coo ra tsihin ńi. Maa ńi cua cuví ńi nyiví ra. Tan cua cunyaa ra tsihin ńi, tan cua cuví ra Nyoo cuenda ńi. ⁴Juvin ńi maa ra cua nacuhva ndutya nuu ńi. Na cua coo ca tuhun tsiihí tan ndi tucuihya ińi. Na cua vacu ca nyiví tyin ńa cua nyehé ca ńi tundoho. Tan ńa cua nyehé ca ńi tsa uhvi. Tyin tandihí tsa tsicoo, tsa tsindihí tsi —catyí ndusu can.

⁵Tacan tan ra nyaá nu tyayu cahnu can, catyí ra:

—Nyehé jihna. Jandutsaa yu tandihí maa tsa tsicoo.

Tan catyí tucu ra:

—Tyaa tuhun cahán yu ihya, tyin tuhun nditsa cuví tsi. Cqita ińi tuhun ihya tyin cua cundaa tsi —catyí ra tsihin yu.

⁶Tsa yaha cahán ra yacan tan catyí tucu ra:

—Tsa iyó vaha tandihí vityin. Yuhu cuví ra jihna ńi, tan yuhu cuví ra cua coo nu cua ndihí quiví: tumaa letra A cuví tsi letra jihna ńi tan tumaa letra Z cuví tsi letra nu ndihí ńa. Nyiví tsa na ityi ińi cua cuhva yu ndutya coho ńi; tuhun ihya cuńí tsi catyí: ńi cuńí tyaa soho tuhun yu, cua cuhva yu ńayiví tsa

ńa cua naa maa coo ńi, tan nduve yahvi tsi cua coo. ⁷Nyiví jahá canaa tsi nu ńa vaha, cua ńihí ńi tandihí tsa cahán yu tuhun ihya, tan cua ndoo ńi tsihin can. Tan yuhu cua cuví yu Nyoo ńi tan maa ńi cua cuví ńi sehe yu. ⁸Maa tyin nyiví yuuhví xaan, ńi ńa tsinú ińi, ńi quíńi iyó, ńi tsahńi, ńińaha tsicá nuu tsihin rayii, tan rayii tsicá nuu tsihin ńaha, ńi tasi, ńi jacahnú tsitoho, ńi vatya; tandihí maa nyiví ihya taahán tsi cuhun ńi anyaya cahnu nu cayú ńuhu tsihin azufre, nu cuví tsa tsinu uvi tuhun tsiihí, nu tatsí tuńi Nyoo ańima ńa vaha.

Nu nyehé ra Juan nácaa cua cuví ńuu Jerusalén tsa

⁹Tacan tan tsitsi tsa utsa ángel tsa ndahá coho tsitú tsihin tundoho, quita iin ra tan natuhva ra nu nyaá yu tan catyí ra:

—Cohon tsihin yu tan janaha yu nyiví yihí cuenda ra Cristo tsi un, ńi tsa cuví tumaa ńasiihí ra Mbee Ticatyí Luhlu —catyí ra tsihin yu.

¹⁰Tan janaha Tatyí Ii Nyoo tsi yu tyin tsindaca ángel can tsi yu iin yucu sucun tan cahnu. Tan janaha ra ńuu ii, ńuu Jerusalén cahnu can tsi yu. Juvin ńi cuhva tsa vatsí nuu tsi tsa quee tsi andiví nu nyaá Nyoo. ¹¹Xińu xaan ńuu can tsihin tsa sií caá Nyoo. Xińu xaan tumaa iin yuu vaha tan sií caá, tumaa yuu jaspe, tumaa nyehé yo tsa nyaá inga tsiyo tsihin yutyí, tacan caá tsi. ¹²Nii canduvi ńuu can nyaá iin cora sucun xaan. Tan iyó utsi uvi yuhu tsi. Tan nyaá nyityi iin ángel tsa intuhun intuhun yuhu can. Tan yuhu can nyecú siví tsa utsi uvi sehe ra Israel ra cuví tsii tsaahnu yo naha ra. ¹³Uńi yuhu cora can nyecú ityi nu caná ńicanyii. Tan uńi tsi nyecú ityi norte. Tan uńi tsi nyecú ityi sur. Tan uńi tsi nyecú ityi nu tyisó ńicanyii. ¹⁴Utsi uvi yuu yihí nu cacú tsaha tsi. Tan nuu yuu can nyecú siví tsa utsi uvi ra tsa tava tyińu ra Mbee Ticatyí Luhlu.

¹⁵Tan ángel tsa cahán tsihin yu, ndahá ra iin metru tsa tsinú tsihin xuhun cuaan, tsihin yacan tyihí cuhva ra ńuu can, tan yuhu cora can tan nani canduvi cora ńuu can. ¹⁶Iyó cumí taahan tutun ńuu can. Tan inducu ńi tsa quihin tan tsa cańi tsi. Tan tyihí cuhva ángel can ńuu can tsihin metru xuhun cuaan can. Tan quita uvi mil uvi cientu kilómetro. Iin ńi cuhva tsa cańi tan tsa sucun tan tsa quihin. ¹⁷Tacan tan tyihí cuhva ra cora ńuu can. Tan quita uńi xico cumí metru tsa quihin, tyihí cuhva ra tumaa tyihí cuhva nyiví.

¹⁸Tsihin yuu jaspe samá cora ńuu can. Tan maa ńi maa xuhun cuaan cuví ńuu can. Tan caá tsi tumaa caá yutyí tun ndoó vaha tsi. ¹⁹Tan tsaha cora can samá tsi tsihin tandihí ńi nuu yuu sií caá: yuu tsa jihna ńi cuví jaspe; tsa tsinu uvi cuví zafiro; tsa

tsinu uñi cuví ágata; tsa tsinu cumi cuví esmeralda; ²⁰ tan tsa tsinu uhun cuví ónice; tsa tsinu iñu cuví cornalina; tsa tsinu utsa cuví crisólito; tsa tsinu una cuví berilo; tsa tsinu iin cuví topacio; tsa tsinu utsi cuví crisoprasa; tsa tsinu utsi iin cuví jacinto; tan yuu nu ndihí ña cuví amatista. ²¹ Tsa utsi uvi yuhu cora can tsinú tsi tshin utsi uvi perla. Intuhun ñi perla cuví tsa intuhun intuhun tsi. Tan nu cuví ityi cahnu ñuu can, maa ñi maa xuhun cuaan cuví tsi, tumaa iin yutyi. Tyin iin yutyi cuví nyehe yo tsa nyaá inga tsiyo tsi tshin tsi, tacan caá tsi.

²² Ña nyehé maa yu ndi intuhun vehe ñuhu tsitsi ñuu can, tyin maa Nyoo Jutu yo, ra iyó tandihí tunyee iñi tsi, tan ra Mbee Ticatyí Luhlu cuví vehe ñuhu ñuu can. ²³ Ña tsiñí ñuhu tsa jandunditsin ñicanyii ñuu can tan ndi tsa jandunditsin yoo. Tyin juvin ñi maa tsa nditsin Nyoo tan tsa nditsin ra Mbee Ticatyí Luhlu jandunditsin tsitsi ñuu can. ²⁴ Tandihí nyiví tsa cacú añima, cua caca nuu ñi nu nditsin can. Tan ra cuví rey nu ñuhu ñayiví naha ra cua cundaca ra naha tsa cuca ra naha tan tandihí tsa cahnu cuví ra naha ñuu can. ²⁵ Ña cua cundasi yuhu cora tsa tsinu cahñi, tan ña cua coo tsacuaa ñuu can. ²⁶ Tan tandihí tsa cuca, tan tsa cahnu, tsa iyó nu ñuhu ñayiví cua tsa tsi ñuu can. ²⁷ Maa tyin ña cua cuví quihvi tsa caquiñi, ndi intuhun nyiví javahá tsa caquiñi, tan ndi ñi vatya. Intuhun ñi maa nyiví iyó siví nu libru ra Mbee Ticatyí Luhlu cua cuví quihvi, tan cua coo nyito tshin ra tacan ñi maa.

22

¹ Tacan tan janahá ángel can iin yutya cuii xaan tsi yu. Nduya tsa tsahá tsa coo nyito yo cuví. Cuii xaan tsi tumaa cuii iin yutyi vaha. Tan quitá ndutya can nuu nyaá tyayu Nyoo tan nu nyaá ra Mbee Ticatyí Luhlu. ² Mahñu tsitsi ityi cahnu ñuu can tan nduvi tsiyo xiin yutya can, nycéc yutun tsa tsahá tsa coo nyito yo. Tsahá tun naha tun tsiti tan iin tan iin yoo. Tan tsa iin cuiya tsahá tun naha tun tsiti utsi uvi tsaha. Tan ndaha numa tun vaha tsi cuví tsi numeri tsi nyiví iyó nu ñuhu ñayiví. ³ Nduve maa tsa ña vaha cua coo ñuu can tyin ican nyaá tyayu Nyoo nu nyaá ra tan cua cundaca ñaha ra tshin ra Mbee Ticatyí Luhlu. Tan cua jacahnu nyiví yihí cuenda ra tsi ra. ⁴ Tan cua nyehe tshin nuu ñi tsi ra. Tan cua cunyaa siví ra nutyaan ñi. ⁵ Ña cua coo ca tsacuaa ican. Tan nyiví tsa cua coo ican ña tsiñi ñuhu ñuhu candill tsi ñi, ndi ñuhu ñicanyii, tyin Nyoo Jutu yo cua jandunditsin nu cua coo ñi. Tan maa ñi cua cundaca ñaha ñi tshin ra tacan ñi maa.

Nu janahá tsi tyin tsa cuyatyin quitsi ra Cristo

⁶ Tacan tan catyí ángel can tshin yu:

—Tuhun ihya cuví tuhun nditsa, tan cuví cuita iñi un itsi tyin cua cundaa tsi. Maa Nyoo Jutu yo ra cahñan tshin ra cuví ndusu yuhu ra tahañ tsanaha, juvin ra jacuhun ángel ra, tyin janaha ra tsi nyiví jahá tyiñu tyiñu ra náa cua cuví tsa numi ñi —catyí ra.

Tan catyí Jutu Mañi yo:

⁷ —¡Tsa cuyatyin quitsi yu! —catyí ra.

¡Sii xaan cuví tsi nyiví tsa javahá cuhva caahán tuhun Nyoo tsa nyaá nu libru ihya!

⁸ Yuhu ra Juan, tsiñi yu tan nyehe yu tandihí tuhun ihya. Tsa yaha nyehe yu tan tsiñi yu itsi, tsicuñi tsiti yu tsaha ángel tsa janahá itsi tsi yu, tyin jacahnu yu tsi ra. ⁹ Maa tyin catyí ra tshin yu:

—Ña jacahnu un tsi yuhu, tyin yuhu, musu Nyoo ñi cuví yu, tumaa yooho tan tandihí ca ra yañi un tsa cuví ndusu yuhu Nyoo, tan tumaa tandihí ca nyiví tyaa yahvi tuhun nyaá nu libru ihya. Intuhun ñi Nyoo taahán tsi jacahnu yo —catyí ra tshin yu.

¹⁰ Tan catyí tucu ra tshin yu:

—Ña tyihí xeehe un tuhun Nyoo tsa nyaá nu libru ihya, tyin tsa yatyin cuii cundaa tsi. ¹¹ Maa tyin jaña ndaha tsi nyiví caquiñi, na javaha maa ñi cuhva cuñi maa ñi. Tan nyiví iyó cuatyí, na coo ca cuatyí ñi. Maa tyin nyiví javahá tsa vaha, na jañihi ca ñi javaha ñi tsa vaha. Tan nyiví tsa jandu íi Nyoo, na cunycun vaha ca ñi tsi ra —catyí ra tshin yu.

¹² Tan Jutu Mañi yo catyí ra:

—Nyehe ndo. Tsa cuyatyin quitsi yu. Tan tyahvi yu tsi intuhun intuhun nyiví tsa cuenda tsa javahá ñi, a javahá ñi tsa vaha o tsa ña vaha. ¹³ Yuhu cuví ra jihna ñi, tan yuhu cuví ra cua coo nu cua ndihí quivi, tsa iyó maa yu nda nu quitsahá tandihí tan tacan ñi maa cua coo yu nu cua ndihí tumaa letra A cuví tsi letra jihna ñi tan letra Z cuví tsi letra nu ndihí ña —catyí Jutu Mañi yo.

¹⁴ Sii xaan cuví tsi nyiví tsa nacatyá jahma, [ñi janduvahá añima], tyin cua ñihi ñi ndatu catsi ñi tsiti yutun tsa tsahá tsa coo nyito añima yo. Tan cuví quihvi ñi yuhu cora ñuu can. ¹⁵ Maa tyin nyiví javahá tsa caquiñi, tumaa ñi tasi, rayi tsa tsicá nuu tshin ñaha tan ñiñaha tsa tsicá nuu tshin rayi, tan ñi tsahñi, tan ñi jacahnu tsitoho, tan tandihí ñi vatya, tan ñi jandavi ñaha; tandihí maa ñi can, ña cua quihvi ñi tsitsi ñuu can.

¹⁶ Tan catyí tucu Jutu Mañi yo:

—Yuhu ra Jesús, jacuhun yu ángel yu tyin jacoto ra tandihí tuhun ihya tsi nyiví tsicá vehe ñuhu. Yuhu cuví nyiví sahnu ra rey David. Tan cuví tucu yu tata ra. Tan cuví tucu yu tiñuu cahnu tsa xiñu xaan, tsa caná tsa naa ca —catyí ra.

¹⁷ Tatyí íi Nyoo tan nyiví yihí cuenda ra, ñi tsa cuví tumaa ñasihi ra Mbee Ticatyí Luhlu, catyí ñi tyehen:

—Naha ñi, Jutu Mañi yu —catyí ñi.

Tan nyivi tsa tsiñi tuhun ihya, na catyi ndihí ñi:

—Naha.

Tan nyivi na ityi iñi tan tandihí nyivi cuñi quitsi, na quitsi ñi tan coho ñi ndutya tsa tsahá tsa coo nyito aña yu, tan nduve náa cua tyahvi ñi.

¹⁸ Tan tandihí nyooho tsa tsiñi tuhun Nyoo tsa nyaá nu libru ihya, cuñi yu catyi yu tsehe tsihin ndo: Nyivi tsa cua janducuaha ca tuhun ihya, Nyoo cua janducuaha ca ra tundo tsa nyaá nu libru ihya siqui ñi.

¹⁹ Tan nyivi tsa cua quinyaa juhva tuhun Nyoo tsa nyaá nu libru ihya, Nyoo cua

quinyaa ra tsa taahán tsi tsi ñi tsa nyaá nu libru tsa caahán yoo nyivi cua coo nyito, tan ña cua cuhva ca ra coo ñi ñuu ii. Tan ña cua ñihi ñi tsa vaha tsa caahán libru ihya tuhun.

²⁰ Tan Jutu Mañi yo, ra tsa tsahá cuenda tuhun ihya catyí ra tyehen:

—Tsa nditsa tyin tsa cuyatyin quitsi yu —catyí ra.

Tan yuhu catyí yu:

—Na cuvi tsi tacan. Naha ñi, Jutu Mañi yu, Jesús —catyí yu.

²¹ Na naquihin tandihí ndo tsa vaha tsa tsahá Jutu Mañi yo Jesucristo tsi yo.

Tan na cuvi tsi tacan ñi.